


Yompor Po'ñoñ ñeñċ attō Yepartseshar

Jesucristo e'ñe etserra a'pocaterriy

Yomprosho



New Testament in Yanasha' (PE:ame:Yanasha')

Yompōr Po'ñoñ ñeññ attō Yepartseshar Jesucristo e'ñe etserra a'pōctaterrnay Yompōresho

New Testament in Yanesha' (PE:ame:Yanesha')

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

fa985bb4-fad0-5968-9ee4-626b89cba24f

Contents

SAN MATEO	1
SAN MARCOS	122
SAN LUCAS	194
SAN JUAN	323
HECHOS	399
ROMANOS	497
1 CORINTIOS	552
2 CORINTIOS	604
GÁLATAS	638
EFESIOS	656
FILIPENSES	675
COLOSENSES	687
1 TESALONICENSES	698
2 TESALONICENSES	708
1 TIMOTEO	714
2 TIMOTEO	728
TITO	738
FILEMÓN	744
HEBREOS	747
SANTIAGO	788
1 PEDRO	802
2 PEDRO	816
1 JUAN	824
2 JUAN	836
3 JUAN	838
JUDAS	840
APOCALIPSIS	845

COHUEN ÑOÑETS ÑEÑT QUELLCA' SAN MATEO

*Arrpa' all aquellcayet allohuen pa'so'chñechno ñeñt
pa'tañneshañ pen Jesús
(Lc. 3.23-38)*

¹ Arrpa' all aquellcayet Jesucristo pa'tañneshañ e'ñe pa'so'chñechnohuenet. Jesucristopa' David po'm'reneñ, e'ñe Abrahamoteñ. Allohuen añ so'chñetspa' ñeñtara mereñtsorecmuet.

² Abrahampa' chemere'tana Isaac. Isaacña' chemere'tana Jacob. Jacobña' chemere'tana Judá epuet ñaña pa'mo'nasheñechno. ³ Judáña' chemere'tana Fares epuet ñaña Zara. Ñet pachoret'pa' añ pa'so'cheñ Tamar. Faresña' chemere'tana Esrom. Esromña' chemere'tana Aram. ⁴ Aramña' chemere'tana Aminadab. Aminadabña' chemere'tana Naasón. Naasónña' chemere'tana Salmón. ⁵ Salmónña' chemere'tana Booz. Ña pachor'pa' añ pa'so'cheñ Rahab. Boozña' chemere'tana Obed. Ña pachor'pa' añ pa'so'cheñ Rut. Obedña' chemere'tana Isaí. ⁶ Isaíña' chemere'tana David ñeñt añcha'tarettatset. Davidña' chemere'tana Salomón. Ñeñt'pa' arrot Urías puet'aporoť.

⁷ Salomónña' chemere'tana Roboam. Roboamña' chemere'tana Abías. Abíasña' chemere'tana Asa. ⁸ Asaña' chemere'tana Josafat. Josafatña' chemere'tana Joram. Joramña' chemere'tana Uzías. ⁹ Uzíasña' chemere'tana Jotam. Jotamña' chemere'tana Acaz. Acazña' chemere'tana Ezequías. ¹⁰ Ezequíasña' chemere'tana Manasés. Manasésña' chemere'tana Amón. Amónña' chemere'tana Josías. ¹¹ Josíasña' chemere'tana Jeconías epuet ñaña pa'mo'nasheñechno. Ñehua, Josíaspa' alla chemere'tos allempo a'chapatarettet allapa' all anetso ñeñt pa'so'cheñ Babilonia.

¹² Allempo hua'cherret Babiloniot'pa' Jeconíasña' chemere'tuerrana Salatiel. Salatielña' chemere'tana Zorobabel. ¹³ Zorobabelña' chemere'tana Abiud. Abiudña' chemere'tana Eliaquim. Eliaquimña' chemere'tana Azor. ¹⁴ Azorña' chemere'tana Sadoc. Sadocña' chemere'tana Aquim. Aquimña' chemere'tana Eliud. ¹⁵ Eliudña' chemere'tana Eleazar. Eleazarña' chemere'tana Matán. Matánña' chemere'tana Jacob.

16 Jacobñapa' chemere'tana José ñeñtēpa'tcha' puerrollar p̄a' María. Maríañapa' cheyore'tana Jesús, ñeñtara ñeñt Cristotats.

17 Allempoteñ corre't Abraham tarrempohua allempo corre't ñaña David, ñeñña allponsheña chemere'shatnomuetspa' allo'tsenca'ye çharrasheña puechenet pa'tatssheña. Ñaña allempoteñ corre't David tarrempohua allempo a'chapatarettet Babilonio, ñeñtpa'cho'ña allo'tsenerrerr çharrasheña puechena pa'tatssheña ñeñt allponsheña chemerasha'terrtserr allempo. Ñaña allempoteñ a'chapatarettet Babilonio tarrempohua allempo eñalleta Cristo, ñeñtpa'cho'ña allo'tsenerrerr çharrasheña puechenet pa'tatssheñet ñeñt allponsheña chemerasha'tnerrtserr tarrempohua allempo eñalleta ñaña Cristo.

Arrpa' atto eñalleta Jesucristo
(Lc. 2.1-7)

18 Te'pa' o'ch neserrpare'tatas atto allempo eñalleta Jesús. Allempoña María ñeñtcha' pachor p̄a' Jesúsapa' aña'ye o'patenaya José ño'ch yore'. Ama yoreña'pa' Maríañapa' ahuepa't a'chomenta Parets Puecamquēño'. 19 Joséña ñeñtcha' puerrollar p̄a'pa' ñaña' e'ñe cohuen acheñer ñeñto'marña ñapa' ama mueno o'ch pencach. Ñaña'pa' atet co'ape'ch o'ch ser e'ñe a'nahuota. 20 Allempoña atet cotape'chenpa' machayo'to' orrtoña Yompor po'mllaño'ñer. Ñeñt orrtoya puechopo'ño'pa' atet otos:

—José Davidna'tare, amach p̄a'llpatsto; pocte'ca'ye o'ch peyore María ñeñtcha' petapor pe'pa' tarro'mar ñapa' o'ca'ye a'chomenta Parets Puecamquēño'. 21 Te'pa' eñalletatan'cha' asheñorr, ñeñña'pa' peso'chcha' Jesús tarro'mar ñapa' ñeñtcha' a'queshpaterre' pa'cheñer po'chñaro'tet. Arrpa' allohua ñeñt atet och mellaño'ñeñ.

22 Ñeñtpa' tarro'mar atet p̄a' attoch etsota ñeñt atet eñorana'tane't Isaiás ñeñt a'mtahuete't Yompor po'ñoñ, ñeñtpa' atet ote't:

23 Ñeñña shopshesha'pa' amach a'p̄llare'tote'ye' a'chomento; cheyore'tanach asheñorr, ñeñña'pa' so'chet'cha' Emanuel.

Ñeñt ña so'chñetspa' atet oten: Te'ña Paretspa' e'ñe parro'tseney.

24 Allempoña José oyerr ñemo't, atet och Yompor po'mllaño'ñerpa' ñaña'pa' atet'cho' p̄a. Yoran María ñeñtcha' puetapor p̄a'. 25 Tarraña ñapa' ama a'p̄lleñe tarrempohua allempoch emare'tua; ñeñña asheñorrpa' soch JESÚS.

2

Atto eñotañnesha'pa' huačha'tet o'ch enteñeta' Jesús allempo eñalleta

¹ Allempo eñalleta Jesús all Beléño, e'ñe alla Judeopa' añ añcha'tarettatset' Herodes. O'ña eñalletuapa' eñotañnesha'ña huačha'tet allot huena atsrretpa' o' čhačha'tet Jerusaléño.

² Ñetñapa' atet otyesoset:

—¿Erro'tsena'tña ñeñt eñalletatsa ñeñtcha' pa'micha'tareter pa' judionesha'? Yapa' yeñoteñ o' eñalleta tarro'mar yapa' o' yentoñ po'rantor allot huena atsrret; yapa' ñeñtecopña yehuena o'ch yeconcorpana'teña'.

³ Allempoña añcha'tareť Herodes e'man atet ñoñetspa' ñañaapa' ñeñta na' pueyočhro ama eñmato pueyočhro. Allohuen jerusaléño'marnesha'pa'čo'ña ama esesha' eñmatatseto ñamet pueyočhreto. ⁴ Allempoñapa' agotatan añcha'tareťnesha' ñeñtara judioneshet; o'ch apčhet allohuen cornanesha' ñeñt atarr sherba'yets judioneshacop. O'ch apčhet ñaña ñeñt atarr etsotayene' ñoñets ñeñt atet anaret judioneshacop. Allña a'p'to'tyesanet:

—¿Erra't otete'tña allcha' eñalletaña ñeñtcha' Cristoterrets?

⁵ Ñetñapa' atet ochet:

—Arr anetso Beléño allara Judeo tarro'mar quellcopa' atet anuaret, atet quellquē't ñeñt a'mtaye't Yompor po'ñoñ. Ñeñtpa' Yomporña atet otatset'.

⁶ Añ Beléñ ñeñt judana'tarnesha' po'patseñ, e'ñe po'ñočh ñeñt anetser ñeñt atarr asherben entyeñet allohuen ñeñt añcha'tareťetyetsa allo'marnesha'. Tarro'mar all Beléño allcha' eñalleterra ñaña ñeñtcha' atarr añcha'tareťterrtsa ñeñtcha' cohuanperre' allohuen neyochreshačhno ñeñtara israelnesha'.

⁷ Allempoña otuoset atetpa' Herodesñapa' e'ñe a'nahua agotaterran ñaña po'potantañ eñotañnesha' ñeñt čhačha'tats allempo Jerusaléño. Allñapa' e'ñe acořa a'p'to'tare'tyesapanet:

—Rantopa' ¿e'ñe'tña esempoteñña señch ñeñt sorrtoya ñenmať?

⁸ Allempoña eñotatosetpa' ñañaapa' otanet:

—Te'pa' o'ch ahues Beléño, e'ñech acořa se'nyesos ñeñt cheshaťoll. Ñerra'm o'ch señchpa' o'ch sotuerren allochñapa' napa'čo'ña o'ch ahuen o'ch neconcorpana'teña' naña.

⁹ Ñetñapa' allempo e'mhuanmuet atet otanet añcha'tareťpa' allempoñapa' ahuanmuet. Rantoña ñeñt entnenet allot huena atsrretpa' ta'netsa allenet senet, attotapa' o' chap e'ñe allo'tsen cheshaťoll. O'ña chap allo'tsen cheshaťollpa' o' muechecosa e'ñe alla ento e'ñe pucto.

10 Allempoña enterreterr rantopa' atarr nanac coshet.
 11 Allempoñapa' o' be'tososet pocollo, allña entoset cheshatoll epuet pachor María. Concorpana'tosyetpa' ma'yochosyet. Toram̄pesyesoset po'tsapotpa' aposet e'ñe atta oro, aposet tsach puese' ñeñt atarr eñmosañ. Aposet ñaña eñmosañ puerets. 12 Allempoña ñetpa' eñotatanet Yompor pueçhopoño allochñapa' attoch ama oñerreto Herodesesho'mar. Allempo puerrerrret pa'nyetopa' aña coferret po'poñ toñ.

Allempo cheshatoll Jesúsapa' anmet Egipto allcha' a'qeshpachet

13 Puerraçherrtsetpa' Yomporña po'mllañoñeñerpa' alla orrterranerr José pueçhopoñoñ. Ñeñtpa' atet otererr:

—Petantaye'cha o'ch pa'yech cheshatoll pachore'na, orraye'chañ all anetso Egipto allcha' seyçhosa. Esemposhuañeññapa' o'ch alla noterrperr atet'cha' peña. Herodes po'ñoçhpa' e'natan'cha' añ cheshatoll attoch muetsatach.

14 Allempoña o' tantapa' anman cheshatoll, pachore'na yeta tsapo, ahuanmuet Egipto. 15 Allñapa' alleneta attotañapa' o' rromuen Herodes. Attoña etsota Yompor po'ñoñ atet ote't ñeñt a'mtaye't po'ñoñ; ñeñtpa' Yompor atet otatse't: “Egiptot'cha' nagotater Nechemer.”

Allempo Herodespa' mueñan ñeñt'cha' muetsue' allohuen asheñorrotolesha'

16 Ñehua, allempoña Herodespa' o' eñoch çha sheca'nem̄ eñotañnesha'pa' ñañaapa' ñeñta atarr atsrre'mate'. Atto atsrre'ma nanacpa' allempoñapa' mueñan ñeñt'cha' muetsue' allohuen asheñorrotolesha' ñeñt Beléño'tsa'yen ñaña ñeñt allohuen allampaño'tsa'yen Beléño. Allohuen asheñorrotolesha' ñeñt echene' epa po'charña ama't ñaña allohuen ñeñt eñalleyetsa chenta' e'ñe poctacma muetsanatuet. Ñehua, ñeñt atet eñotatos eñotañnesha'pa' ñañaapa' atet cotape'ch ahuo'te' epa char eñalletuaña ñeñt cheshatoller. 17 Attoña etsota ñeñt atet ote't Jeremías ñeñt a'mtaye't Yompor po'ñoñ ahua't; ñeñtpa' atet ote't:

18 Ñeñt anetser Ramopa' atarr'cha' e'morrterra yahueñets, atarr gogatstena; allpa' Raquelca'ye ya'na'tene' puechoyoresha'; ama mueno o'ch esesha' emya'te' tarro'mar puechoyoresha'pa' ama eñallmeñe, o' e'ñe muetsanatuet.

19 Allempoña rroma Herodespa' Yomporña po'mllañoñeñerpa' alla orrterranerr José pueçhopoño all Egipto. 20 Allñapa' otererr:

—Te'ñapa' o'ch petanterra, o'ch alla paner cheshatoll pachore'na o'ch alla pepuerrerra israelnesha' pa'nyo; o'ca'ye

colla'huaña ñeñt' o'pataye't añ cheshatoller ñeñto'ch muet-sayeñ.

²¹ Atet otuepa' ñaña'p' allenta tantena o' alla anerran cheshatoll pachore'na alla ahuerret israelnesha' pa'nyo. ²² Allempo ahuerretpa' ñetñapa' e'mare'tueret añ añcha'tarettertsa Judeo ñeñt' Herodesoñ puechemer ñeñt' sochetsa Arquelao. Ñeñto'marña mecha'tenet serrtset all. Puechopoñoñapa' alla eñotatererr ñeñto'marña allempopa' alla serr Galileo. ²³ Cherr Galileopa' ahuerret paterr anetso ñeñt' pa'so'cheñ Nazaret. Allñapa' alla ye'cha'huerra. Atotca'yeña etsotaña ñeñt' atet otyese't ñeñt' a'mta'yesaye't Yompor po'ñoñ; ñetpa' atet otyesete't ñeñt'cha' Cristoterretspa' "oteñetcha' nazareto'marnesha'."

3

Allempo orrta Juan ñeñt' serrpare'tosets all amayo

(Mr. 1.1-8; Lc. 3.1-9, 15-17; Jn. 1.19-28)

¹ Allempoñapa' orrta Juan ñeñt' apatose' acheñenesha' Yomporecop. Ñaña'p' arr serrpare'tatosanet amayo e'ñe alla Judeo. ² Allñapa' atet otosanet:

—Te'pa' o'ch soctape'cherr ello cohuen Yomporecop tarro'mar o' chapmoch allempoch ayochreshatterra Yompor ñeñt' pue'ntaño'tsen.

³ Ñehua, añmapa' ñocopca'ye eñose'tña Isaías ñeñt' a'mtaye't ahua't Yompor po'ñoñ. Allempopa' atet ote't:

E'morrterrach puecheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñt'pa' atetcha' oterranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pacharretyesoñ pa'tep'." Arrpa' allohua ñeñt' atet aquellcare't ahua'toteñ Cristocop.

⁴ Ñeñt'ña Juanpa' camello pue'ch apomotaret ñeñt' pa'shtam pen. Allo chanena ñeñt'pa' pa'rrom. Allñapa' rra'yesane't ahuañchenclla* ñeñt'ña puerran pe't epuet pets po'moñ.

⁵ Allempoña jerusaléño'marnesha'pa' chocma huacha'tyenet ñesho ñaña allohuen judeo'marnesha'. Hua'cha'tyeññaña ñaña allohuen jordanaso'marnesha'. ⁶ Allña ñetpa' a'meta'yesoset po'chñaret, Juanñapa' apatyasapanet Yomporecop. Ñeñt'ña oñ all apatyasapanet añ pa'so'cheñ Jordanas.

⁷ Allempoña entapan shonte' saduceonesha' ñaña fariseonesha' ñeñfaret ñeñfet judioneshet. Ñetpa' tarro'mar

* 3:4 Ñeñt' ahuañchencllapa' arrapo' enteñ palestino'marnesha'.

huačhenet añ muenenet o'ch apatapanet Juan. Juanña serrpare'tatapanetpa' otapanet:

—Sapa' ama cohuenayayso atarr ashcarñaŕes, čha sotena ñerra'mrrate' shechpa sompor sepen. Po'ñočca' ama eseshaye' sotenaye e'ñech sapataretteñoŕa o'ch sequestherra allochñaŕa' amach coñchatuerrso Yompor allempoch yoročhtatuer tsapaŕonet. ⁸ Napa' añcha'ña notapas o'ch sorratyŕes ñeñŕe e'ñe cohuen enten Yompor ñeñŕe atet pena ñeñŕe po'ñočh o' cotape'cherran ello cohuen Yomporecop. ⁹ Sapa' čha soteneñ seyočhro año' es sepallteno, sapa' año' e'ñe seyemtena satañ Abrahamañ. Tarraña napa' o'ch notas amach atet soctape'chatsto tarro'mar ñeñŕa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñŕe senten arr o'ch a'pnasereñ Abraham po'mreneñ. ¹⁰ Ñeñŕo'marña napa' o'ch notas ñerra'm amach soctape'cherro cohuen Yomporecop o' mameshamerra o'ch čhaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'mata'tmochet tsach. O' e'ñe onañchachet gach allcha' tet e'ñe allohua huañen puepallactar. Ñeñŕe allohuen tsachečhno ñeñŕe ama cohuenaye' me'tetsopa' a'mata'tueretcha' saprochetcha' all huorten tso' allcha' e'ñe a'poyatatueret.

¹¹ Elloña Juanpa' atet oterraneterr:

—Ñeñŕes cotape'cherre' cohuen Yomporecop napa' ama't e'ñe po'ñočh napatensoñ Yomporecop, napa' e'ñeca'ye oñočhaya napatenes. Tarraña Cristo ñeñŕa' huapatsa chenta'pa' ñapa' añcha'ca'ye chorratossa Parets Puecamquēñ ñeñŕe atet ñerra'm tso'. Ñapa' ñeñŕe atarr ahuamencatesha' nañapa' ama tama ahuamencateyayno. Ñapa' ñeñŕa' atarr sherbets, nañapa' ama es nesherbeno attoch ama't po'sapatapa' o'ch nanmoñ. ¹² Ñapa' atarr ahuamencat ñapa' ñach acerre' allohuen acheñenesha'. Ñapa' añ toma'ntena ñeñŕe orrene' puešoshnat alloch shoshnan po'trigo o'ch e'ñe pue'llomrochayama. Ñeñŕa' pue'llomerpa' o'ch a'yapačhe' o'ch año'ch allecma año'teñ e'ñe cohuen. Pue'she'marñaŕa' o'ch huapore'ch tso allcha' e'ñe poyhua. Ñeñŕa' tso'pa' ama emaya'pahuo ama't errponaña. Ñeñŕa' allohua atet serrpare'tatanet Juan.

Allempo apataretta Jesús Yomporecop
(Mr. 1.9-11; Lc. 3.21-22)

¹³ Allempo huapa Jesús Galileot, čhap Jordanaso allo'tsen Juan, ñapa' añ muenen o'ch apatañ Juan Yomporecop.

14 Juanñapa' eñoratsa čha mueneñeñ o'ch emman Jesús. Ñeñtpa' atet otaṗ:

—Ama pocteyaye o'ch napatapaṗ ṗa, añña poctetsa ṗachña napatose'. Papa' eso'maruachñaca'ye ṗonña nesho, ṗaca'yeña ñeñteṗ atarr sherbets.

15 Jesúsñapa' atet otererr:

—Papatapno'tach Juanacha' tarro'mar atetca'ye poctetsa o'ch yetgota allohuen ñeñt poctetsa Partsocop.

Allempoña Juanpa' e'ñe pocte' eñch, 16 allempoñapa' apatapan Jesús. E'ne apatue'pa' o' čha'nerrña Jesús oñot, enetñapa' ahuepa't atoraretta. Alloñña e'ñe sohua'nma Parets Puecamquëñ, Jesúsñapa' e'ñe atet entaṗ ñerra'mrrate' yeṗ o' sohua'nma entot, e'ñe čhap ñesho. 17 Allempoñapa' čha e'morrtatsa ñaña ñoñets entot atet eñorena Yompor. Ñeñña ñoñetspa' atet oten:

—Añmapa' ñeñña Nechemer ñeñt atarr nemorrentena. Ña atarr nanac nocshatene'.

4

Allempo oneñeṗa' topatenan Jesús, mueneñ o'ch atet ṗatan Jesús ñeñt ama pocteye' enteno Yompor

(Mr. 1.12-13; Lc. 4.1-13)

1 Allempoña Parets Puecamquëñpa' anman Jesús all amayo. Ñeñtpa' añecop atet ṗa attochña allpa' o'ch huapoña oneñeṗ, tarro'mar ñapa' añ mueneñ o'ch atet ṗatyets ñeñt ama pocteye' enteno Yompor.

2 Allñapa' ama rreno e'ñe añña torrena attoch etsotuan ora allohuen ñeñt cohuentetsa Pomporecop. Ñeñto'marña ama't o' pa'tatsoch čharramatpa' ama't coñe'tapa' ama es rreno yeto ama't ñaña tsapo. O'ña pa'tatsoch čharramatuapa' čho cheporratsa. 3 Allempoñapa' huapoña oneñeṗ. Atto topatosan Jesúsapa' atet otos:

—Pa ñerra'm po'ñochte' Parets Puechemereṗpa' o'ch ṗot: Añ mapue' puenasepa' pan.

4 Jesúsñapa' atet otaṗ:

—Napa' ama nemno o'ch atet neṗa tarro'mar Yompor po'ñoñ ñeñt anuaret ahuatoteñ ñeñtpa' atet oteneṗ: “Allohueneṗ acheñeneshohueneṗa' ama e'ñe rreñtsa ñapueṗ yocrramñ yepeno. Añe'naña yocrramñ yepen yecamquëñecop ñeñt allohuen allpon oteneṗ Yompor.”

5 Allempoña oneñeṗa' o' anemñ all Jerusaléño, ñeñt anetserpa' anaret Partsocop. Allñapa' a'tapatos nanac eno allohuanen Parets pa'paquëll. 6 Allñapa' otuererr:

—Papa' ñerra'm po'ñochte' Parets Puechemerep̄ te'pa' p̄omacha arrot tarro'mar amach p̄a'tserrpo tarro'mar Parets po'ñoñ ñeñt̄ anuaret̄ ñeñt̄pa' ama'tña atet̄ oten:

Yomporpa' o'ch mueñonañ̄ po'mllañoñeñnanesha' ñeñt̄cha' pecuam̄psapue'. Ñetcha' p̄agapapuet, o'ch enatapapet̄ attoch amach p̄a'tserrp̄atca'toso mapyo.

⁷ Allempoña Jesús pa' alla otererr:

—Añpa'cho'ña anuaret̄ Yompor po'ñoño: “Amach ya'llocchame'tatsche Yompor ñeñt̄ Yepartsesha' yepen.”

⁸ Allempoña oneñt̄pa' o' alla anerranerr Jesús all atarr aspeno e'ñe a'noso. Allotña gatyuesuererr allohuen ñeñt̄ allpon all añcha'taretetyena pa'namen acheñenesha' ñeñt̄ ye'cha'yetsa errap̄aren añe patsro, gatyuesuererr all atarr cohuentatyeñet. ⁹ Oneñt̄ñapa' alla otuererr:

—Ñerra'm na pema'yocheñoñen o'ch peconcorpana'tna, napa' napa'cha' ora allohuen ñeñt̄ cohuen pentyen arr.

¹⁰ Jesúsñapa' alla otererr:

—Te'pa' o'ch orrerrep̄ oneñete. Napa' ama nemno o'ch atet̄ ne'pa' tarro'mar Yompor po'ñoñ ñeñt̄ anuaret̄ ñeñt̄pa' atet̄ oteney: “Añach ñapuet̄ yema'yochena Yompor ñeñt̄ Yepartse-sha' yepen, e'ñech ñap̄ta' yesherbe'.”

¹¹ Allempoña oneñt̄ topatuahuan Jesús pa' o' ahuer o' que'chpa'ner. Allempoñapa' cha'cha'toña Yompor po'mllañoñeñnanesha'; ñetñapa' e'ñe cohuen sherboset Jesús all. Arrpa' allohua huañ atto oneñt̄pa' topatenan Jesús allempo.

*Allempo e'ñe ñenmañ torrena Jesús Partsocop all Galileo
(Mr. 1.14-15; Lc. 4.14-15)*

¹² Allempoña Jesús e'mare'tan Juan o' yottam̄pset, ñaña'ña' allenta ahuer Galileo. ¹³ Cherr Galileopa' ama a'pohuerro anetso Nazareto, arra'ña serr Capernaumo, allña ye'cha'huerra. Ñeñt̄ Capernaumpa' e'ñe sa'patop̄ño'tsen, allara ñeñt̄ otenet Zabulónnanesha' pa'netser ñaña Neftalenesha' pa'netser. ¹⁴ Ñeñt̄pa' allña ye'cha'huerra allochñapa' attoch etsota Isaías po'ñoñ ñeñt̄ a'm̄taye't̄ Yompor po'ñoñ; ñeñt̄ ñapa' atet̄ ote't̄ ñeñte anetsrecop:

¹⁵ Ñeñt̄ Zabulónnanesha' pa'netsro ñaña Neftalenesha' pa'netsro ñeñt̄ all sa'patop̄ño all Jordanas yom̄ta'n, allara Galileo all ye'cha'yena pa'namen acheñenesha' ñeñt̄ ama judioneshayayeto.

¹⁶ Ñeñt̄ acheñenesha'pa' ñetpa' añña ye'cha'yenet ñeñt̄ ama cohuenaye' enteno Yompor; ñetpa' cha' ottenet ñerra'm checmeto'tseneta. Tarraña te'ñapa' o' enteret ñeñt̄cha'

e'ñe cohuen a'puetarsam̄perrahuet poctaḡñet. Ñetña ama't aña o'patyesahuetañe't rromueñets ñeñfara chenquēñets, te'ñapa' ama't ñocpuetpa' o' a'puetarsam̄psaretterret e'ñe cohuen. Arrpa' allohua atet nane't Isaiás po'ñoñ.

17 Allempo çherr Jesús Galileo allempoña e'ñe ñenmañ serpare'tatuerranet all. Ñeñtpa' atet otuerranet:

—Te'pa' o'ch soctape'çherr ello cohuen Yomporecop tarro'mar te'pa' o' çherrmoch allempoch ayochreshatterra Yompor ñeñt pue'ntaño'tsen.

Atto Jesús'pa' çhore'tosan pa'tatssheña ñeñt e'ñe caca torrenet rromuet

(Mr. 1.16-20; Lc. 5.1-11)

18 Allempo Jesús'pa' chopeñe'chyen all sa'patoḡño'mar; ñeñtña sa'ppa' añ pa'so'cheñ Galileas. Allñapa' entosan acheñ epsheña; ñeñtña puesheñarrpa' añ pa'so'cheñ Simón ñeñfara sochetsa Pedro epuet pa'mo'nasheñ Andrés. Ñetñapa' ter-rayetset e'ñe alla sa'po tarro'mar ñetpa' e'ñe ñeñta po'taruas penet. 19 Jesúsñapa' atet otosanet:

—Te'ñapa' o'ch notas, socta'n na attoch neyochresha' neperres. Ñeñt atet sepena ahuatoteñ e'ne' cac te'ñapa' o'ch neyçhaterras attoch se'nerr ñaña acheñ ñeñtcha' same'ñaterra.

20 Ñetñapa' allorocma na'nmuet po'terrayapa' o' co'tet Jesús.

21 Allempoña meterrerr allotpa' entuerranerr po'poñ acheñ epsheña; ñeñtña puesheñarrpa' añ pa'so'cheñ Jacobo* epuet pa'mo'nasheñ Juan; ñeñtpa' Zebedeo puechemerasha'. Ñetñapa' po'noñto'tsa'yenet; allo'tsen ñaña pomporet all a'cohuenetyenet po'terraya. Jesúsñapa' çhore'tuerraneterrpa' atet otuerraneterr ñamet:

—Te'pa' o'ch socta'n saña.

22 Ñetpa'çho'ña e'ñe allorocma na'nmuet po'noñt ñaña pomporet o' co'tet ñamet Jesús attoch pueyochresha' perranet ñamet.

Allempo Jesús'pa' yeçhatenan shonte' acheñenesha'

(Lc. 6.17-19)

23 Allempoñapa' chopeñe'chyas Jesús erraḡaren Galileo'mar. Yeçhatyesosan judionesha' e'ñe ñet po'prahueto. Allñapa' serrpare'tatosanet cohuen ñoñets atto ayochreshattena Yompor. A'crratyesosan acheñenesha'; ama't pa'namen osyenahuet, ama't pa'namen a'prrama'yenahuet, ñañapa' e'ñe a'crratyesusanet. 24 Atteñapa' e'mare'tuet erraḡaren ama't Sirio'mar.

* 4:21 Jacobopa' ñeñfara ñeñt sochenet Santiago.

Huapatyesoñet allohuen ñeñt muerochtatyen atsnañets. Huapatyesoñet ñeñt osyen pa'namen atsnañets ñaña ñeñt atserrpañachno. Huapatyesoñet ñaña ñeñt chorra'yena oneñet ñaña ñeñt oñañachno ñaña echarrañachno. Allohuenetpa' ñaña'pa' e'ñe a'crratyesuerranet. ²⁵ Shonte' acheñenesha' ñeñt coña'yese'. Coña'yes galileo'marnesha', ñaña decapoliso'marnesha' ñaña jerusaléño'marnesha', ñaña judeo'marnesha'; ama't ñeñt yeçhetsa Jordanaso yonña'npa' o' e'ñe coña'yese.

5

Allempo Jesús'pa' serrpare'tatosanet all aspento

1 Allempoña entan shonte' acheñenesha' ñeñt coñene', Jesús'ña'pa' ahuo' aspento. Allña anorrospa' huach'a'toña allohuen pueyochreshachno. ² Ñaña'pa' yeçhatapanetpa' atet otapan acheñenesha' ñeñt po'ñoçh atarr cosheñtso'tsa'yenet:

Acheñenesha' ñeñt po'ñoçh atarr cosheñtso'tsa'yenet (Lc. 6.20-23)

3 —Nanac cosheñtso'tsa'yen allohuen ñeñt ama esoye' asherbenaye' entyetso pueyoçhreto Yomporecop tarro'mar ñetpa' o'paterretcha' Yompor po'cohuenña atto ayochresha'ttena pue'ntañot.

4 'Nanac cosheñtso'tsa'yen allohuen ñeñt lleca'yetsa Yomporecop tarro'mar ñetpa' coshaterranetcha' Yompor.

5 'Nanac cosheñtso'tsa'yen allohuen ñeñt ama añeye' e'neneto ñeñt e'ñe ñocpueta tarro'mar ñetpa' o'pataterranetcha' Yompor allohuanen pats.

6 'Nanac cosheñtso'tsa'yen allohuen ñeñt nanac muenene' o'ch e'ñe orrtatyenet ñeñt e'ñe pocte' enten Yompor. Ñetpa' e'ñe atet mueneñet ñerra'mrrate' çho nanac yachporrena ñaña nanaccha' yo'ñpa'ten. Nanac cosheñtso'tsa'yenet ñet tarro'mar Yomporña e'ñe atet muenaterranet.

7 'Nanac cosheñtso'tsa'yen allohuen ñeñt nanac cohuen muerannetsa tarro'mar elloña Yomporpa' atarrcha' muererranet ñet.

8 'Nanac cosheñtso'tsa'yen allohuen ñeñt e'ñe pueyoçhretopa' ama eñalle sosya'tsañ ama't coñe'ta tarro'mar ñetpa' enteretcha' Paret.

9 'Nanac cosheñtso'tsa'yen allohuen ñeñt çhocma amo'tstanna'tatenahuet tarro'mar ñetpa' po'ñoçhcha' Yompor puechemer perranet.

10 'Nanac cosheñtso'tsa'yen allohuen ñeñt e'moñe'tyenet atto ñetpa' e'ñe pocte' es pa'yenet Yomporecop. Nanac

cosheñtso'tsa'yenet tarro'mar ñetpa' o'paterretcha' Yompor po'cohuenña atto ayochreshattena pue'ntañõ.

¹¹ 'Sapa'cho'ña nanac cosheñtso'tsa'yenes ñerra'm esempo erroñuanen penset no'mar. Nanac cosheñtso'tsa'yenes ñerra'm cho sapa' sasare'tyenset, e'moñe'tyenset, pa'namen sosey toma'tañpesyenset. ¹² Chocmuepa'chña socsha tarro'mar shonte' ñeñt' o'patatensa Yompor pue'ntañõ; ñeñt'cha'ña atarr socshaterre'. Ama't ahuatoteñ allempo ama se'ñalletena' attecma e'moñe'tyesete't ñaña ñeñt' a'mta'yesaye't Yompor po'ñoñ.

Acheñenesha' ñeñt' sherbets Yomporecop arr patsro ñetpa' atet atma'ntatarettenet ñerra'm pos ñaña puetare'

(Mr. 9.50; Lc. 14.34-35)

¹³ 'Sapa' ñeñtes name'ñenaya añ netma'ntatensa atet ñerra'm pos ñeñt' atarr sherbene' allohuen acheñenesha' arr patsro. Tarraña pospa' ñerra'm o'ch huañer po'poserrteña amach erroñeno't ellopa' ya'poserrtatere. Allempopa' o'huañcha' es sherba' acheñeneshacop; añecpach sherberr o'ch yehuapore'ch a'yo allcha' atmama'ch acheñenesha'.

¹⁴ 'Ñaña añ netma'ntatensa puetare' elloña ñeñt'ña atarr sherbene' acheñenesha' arr patsro. Sapa' chocmach cohuen es sorrtatyen. Atetcha' sepena ñerra'mrrate' paterr anets ñeñt' e'ñe a'noso'tsen aspeno. Ñeñt'ña anetserpa' chocmach cohuen orrtena allemñateñ, amach erroñeno't ma'natacheto. ¹⁵ Ñaña ñerra'm esempo ya'llchaten lampareña' ñeñt'pa' ama tarrecpaye' ya'llchateñe o'ch ye'rramañpes coyño. Ñeñt'pa' añecopña ya'huortateñ o'ch yene' enonet attoch e'ñe choyo'tañpesuan allohuen ñeñt' pocollo'tsa'yen. ¹⁶ Sapa' attecmuepa'chña sorrtatyen ñeñt' cohuen enten Yompor. Allochña'po'potantaña'cho'ña e'ñech cohuenare' entennaset atet es sorrtatyen cohuen. Attochña ñetpa'cho'ña cohuentat-apreternasetcha' Seyomporer ñeñt' pue'ntañõ'tsen.

Atto Jesús'pa' ye'chatosanet atarr sherben Yompor po'ñoñ ñeñt' atet anaret ahuatoteñ

¹⁷ Jesús'ña'pa' atet oterraneterr:

—Amach soctape'chatsto napa' añecop'te' nohuapa o'ch nehuapore'taterr Yompor po'ñoñ ñeñt' ahuatoteñ atet anaret atet ñerra'm Moisés po'ñoñ ñaña añ po'ñoñ ñeñt' quellca'yese't ñeñt' a'mta'yesaye't Yompor po'ñoñ. Napa' ama añecpaye' nohuapo o'ch nehuapore'tach, napa' e'ñechca'yeña netsotatuer. ¹⁸ E'ñe po'ño'ch notenes: Ama ahuapore'tpahuoyaye Yompor po'ñoñ ñeñt' atet anaret ahuatoteñ, ama't tayoteñ tarremphuach esempohuañencha' chenca'huerra pats ñaña enet. Ama't patrra ñoñets ñeñt'

atef anaretpa' amach chenquërro ama't e'ñe patrra quelled pueshempotollohuenpa' amach chenquërro ama't tayoteñ tarremphuach esempohuañencha' e'ñe etsotuerra ñeñf atef oten ahuatoteñ. ¹⁹ Ñeñfo'marña ñerra'm esesha' o'huañ e'ñeye' ame'ña'po', entan ama't patrratolla ñoñets ñeñf atef anaref ahuatoteñ ñaña ñerra'm atfach yeçhatan po'potantañ, ñeñña acheñerpa' amach tama sherbeno Yomporecop ñeñf atto ayochreshattena ña pue'ntaño. Tarraña ñerra'm esesha'chña e'ñe etsoterre' ñaña ñerra'm e'ñech atef yeçhatan po'potantañ, ñeñña acheñerpa' ñeñtcha'ña atarr sherberrets Yomporecop attoch ayochreshatterra ña. ²⁰ Napa' o'ch notas, po'ñoçhca'ye sa atef e'ñe pocte' es sorratyen, ellochña señtana'tuerepa'ch atef es cohuen orrtatyeneñ fariseonesha' ñaña añ ñeñf atarr etsotayenayeñ ñoñets ñeñf atef anaref. Ñerra'm amach señtana'tuerranetopa' amach errotenof so'pataprechoña Yompor po'cohuenña atto ayochreshattena ña pue'ntaño. Attoña ama't ahuatapa' amach seçherro all añcha'tarettena pue'ntaño.

Atto Jesúsapa' yeçhatosanet ama e'moñe'tanna'tpahuoyaye (Lc. 12.57-59)

²¹ Jesúsñapa' alla yerpaterraneterr ñeñf atef anarettete't ahuatoteñ ñoñets, ñeñtpa' atef oterraneterr:

—Sa ahuatoteñpa' se'marte'ña atef otarettete't ahuañ acheñenesha'. Ñeñtpa' atef otarettete't: “Amach muetsatsteto acheñ. Ñerra'm esesha' muetsene' acheñpa' ñapa'cho'ña muetseretcha' tarro'mar ñeñfo'tcha'ña o'patateret coñcheñets.” ²² Elloña na te'pa' o'ch noterres, ama't ñeñf atfa e'moñe'tene' pamo'tspa' ñapa'cho'ña ñeñfo'tach o'patateret coñcheñets. Ñaña ñerra'm esesha' atarr sosyof sochatse'teñet pamo'ts ñeñtpa'cho'ña ñeñfo'tach o'patateret coñcheñets allo'tsa'yen añcha'taretneshachno allecma a'pocatenet ñoñets. Ñaña ñerra'm esesha' puepencare'teño atarr sosyof sochatse'teñet pamo'ts ñeñtpa'cho'ña acheñerpa' añ o'patenaya tso' ñeñf parrarets errañaren.

²³ Ñeñfo'marña napa' o'ch notas: Ñerra'm esempo çho es pãpuen Yomporecop allecma sherbeñet Yompor allñapa' taya o' peyerposya pãmo'tsñapa' çha pãtsrre'mateñ, ²⁴ pãñapa' ñeñtcha' pãp Yomporpa' pena'ner alla. O'ch ahuerreþ, pemo'nasheñña ñanom pãmo'tsterra'. Allempochña pepuerrerra allecma sherbeñet Yompor allempochña pãphuer Yompor ñeñf pã'patateña.

²⁵ Ñaña ñerra'm esempo esesha' setmantene' o'ch anmaset añcha'taretsho allcha' sa'pocatterra' señoñ, sañapa' e'ñech allorocma samo'tstera ñeñf se'moñe'tene'

Ƨayepa'tñapa' ama sečhena' añcha'taretesho. Chosachña amo'tsterraya ñeñt setmantene' te't attot pomataterret añcha'taretesho ñaña'pa' o'ch pomuensa' guardiyesho ñeñtcha' seyottam̄pse'. ²⁶ Po'ñočca'ye o'ch notas, ñerra'm čhoch yottam̄psasetpa' allenasachca'ye o'pono allotpa' amachca'ye ahuen čha'nmaterrseto. Esemphuañencha' čhoch seča'nmaterret ñerra'm esempoch e'ñe setsa'tuerra ora allohuen ñeñt allpon quelle muenenet. Ama't e'ñe eptalla centavotollña ñerra'm ama setsa'tueña'pa' amachca'ye čha'nmaterrseto allot. Ñeñto'marña notenes o'ch e'ñe cohuen samo'tstera ñeñt se'moñe'tene' Ƨayepa'tñapa' ama čhennasa' ñeñt atarr yoročhen senten socop.

Atto Jesús'pa' yečhatosanet ama achtapret'pahuoyaye taporets

²⁷ 'Ñaña sapa' ahuatoteñ se'marte'ña atet otarette't acheñenesha': "Amach chetapretatsteto taporets." ²⁸ Elloña na te'pa' o'ch noterres, ñerra'm esesha' cohue'ne' coyanesha' pueye'cheñoť, o'ca'ye ochña'tet pueyočhreto.

²⁹ 'Ñeñto'marña notenes: Ñerra'm seclle' p̄atyenes ñeñt ama pocteye' enteno Yompor, añ poctetsa o'ch sequečhuerr ñeñt seye'chena seclloyot. Ñeñtpa' e'ñe atet ñerra'mrrate' čho serroten seclle' o'ch sehuapore'ch, ama't ñeñt seclle' secohuenrote'tsen ñeñt atarr sesherbene'. Añña ama tama yoročhenayaye socop o'ch sa'ypo'ñer e'ne Ƨayecma ñeñt soctape'chatene' sosya'tsañ. Añcha'ña atarr yoročhen socop ñerra'm ama Ƨayecma sa'ypo'ñerepa' esempohuañenpa' orach huapore'terrset coñcha'puetso all parraren tso'. Ñeñtpa' añ toma'ntena atet ñerra'mrrate' o'ya'chencaterr paterr yechets ama't yecle' ama't yot, te't esempohuañen ora yechtsohuenpa' huapore'terryet coñcha'puetso. ³⁰ Attecma ñaña ñerra'm sotpa' p̄atyenes ñeñt ama pocteye' enteno Yompor añ poctetsa o'ch sequečhuerr ñeñt atet čhocma p̄atse'tatyenes sot. Ñeñtpa' e'ñe atet ñerra'mrrate' čho sepechen sotpa' o'ch sehuapore'ch, ama't ñeñt secohuenrote'tsen sot ñeñt atarr sesherbene'. Ñeñtpa' o'ch alla noterreserr. Añña ama tama yoročhenayaye socop o'ch sa'ypo'ñer e'ñe Ƨayecma ñeñt soctape'chatene' sosya'tsañ. Añcha'ña atarr yoročhen socop ñerra'm ama Ƨayecma sa'ypo'ñerepa' esempohuañenpa' orach huapore'terrset coñcha'puetso.

Atto Jesús'pa' yečhatosanet ama asanna'tpahuoyaye (Mt. 19.9; Mr. 10.11-12; Lc. 16.18)

³¹ 'Ñaña te'pa' o'ch noterreserr po'poñ: Sapa' ahuatoteñpa' señoteñe'tña atet otarettete't: "Ñerra'm esesha' serre' puetaporpa' apa'nme'pa'ña papell all aquellcare't attoch

quechpuerran puetapor.”³² Elloña na te'pa' o'ch noterres: Ñerra'm ama añecpaye' quechpuerrano puetapor atto ama choye' aguënano po'psheñeñ yacma, ñerra'm attota serran puetapor; ñañapa' ochña'taterrancha' puetaporeshe'mañ po'psheñeshof; ñeñtpa' ama cohuenaye' enteñe Yompor. Ñaña ñerra'm esesha'ña yorerre' ñeñt' asaretpa' ñeñtña yacmarpa' chach chetapretenan po'psheñeñ puetapor; ñeñtpa'cho'ña ama cohuenaye' enteñe Yompor.

Atto Jesús'pa' ye'chatosanet amach natsteto po'ñoñ Parets pa'so'chño

³³ 'Ñaña te'pa' o'ch noterrser po'poñ: Sa ahuatoteñpa' se'mare'tña ñeñt' atet otarettete't: “Amach e'ñe orrena na'yeneto po'ñoñet Parets pa'so'chño tarro'mar ñerra'm erra'tsen nene' po'ñoñ Parets pa'so'chño ñeñtpa' atarr huomenc ñoñets amach atta puesatscheto, chocmachña e'ñe a'pocatyenet ñeñt' atet o' nohuetña po'ñoñet Parets pa'so'chño.” Ñeñtpa' atetca'ye otarettete'tña ahuatoteñ.³⁴ Tarraña elloña na te'pa' o'ch noterres: Ama't e'ñe erra'tsena pa'so'chño'pa' amach senatsto señoñ. Amach sotatsto o'ch sena' señoñ Yompor pue'ntañ pa'so'chño; ñeñtpa' ama tama huomencaye' senteñe ñeñtecop atet senen señoñ. Tarro'mar napa' o'ch notas ama't pue'ntañpa' ñeñt' po'conañ pen Parets ñeñto'marña attera atarr huomenc ñerra'm Pamo'mte'.³⁵ Ñaña amach sotatsto o'ch sena' señoñ Yompor po'patseñ pa'so'chño tarro'mar ñeñtpa'cho'ña attera atarr huomenc tarro'mar ñeñtpa' ñeñtña nen Parets pa'tconet. Ñaña amach sotatsto o'ch sena' señoñ Jerusaléñ pa'so'chño tarro'mar ñeñtpa'cho'ña attecma atarr huomenc tarro'mar ñeñtpa'cho'ña ñeñt' pa'netser pen Parets.³⁶ Ñaña amach sotatsto o'ch sena' señoñ e'ñe sa soñ pa'so'chño tarro'mar ñeñtpa'cho'ña ama soyaye seye'chcatar. Ama't e'ñe pue'parra sechpa' amate' erroteno't sello'tacheña sa. Ñaña ñerra'm esempoch sello'tenpa' amach erroteno't alla sa'quelluetatereña sa.³⁷ Ama't errotena sepa'yesa'chpa' atetcha' sotanna'tyesa: Ñeñtpa' atetcha'ca'ye yepe'. Ama palltenoña o'ch sena'yen señoñ ama't e'ñe esa pa'so'chño tarro'mar ñerra'm atet sepa'yenapa' ñeñtpa' oneñe'eshota huena.

Atto Jesús'pa' ye'chatosanet ama atsa'tatpahuoyaye atto e'moñe'tenyet

(Lc. 6.29-30)

³⁸ 'O'ch alla noterrser po'poñ: Ñaña sapa' ahuatoteñ se'mare'tña ñeñt' atet otete't: “Ñerra'm esesha' pochocle'che'

pamo'ts, semoñseñoť ñeñť apochoclle'charetpa' sepochochle'ch ñaña ñeñť pochoclle'chene' pamo'ts. Ñaña ñerra'm esesha' pue'moñe'teñoťan a'cayam̄psan pamo'ts pa'spa' semoñseñoťpa' sa'cayam̄pes ñaña pa's ñeñť a'cayam̄pene' pamo'ts pa's." Ñeñťpa' atetca'ye otarettete'tña ahuat. ³⁹ Tarraña na te'pa' o'ch notas ellonet: Amach semoñsatstoña sa e'ñe sañeña ñerra'm esempo e'moñe'tyenset. Atet ñerra'm esempo esesha' pue'moñe'teñoťetas o'ch tacllaset setsa'po secohuenrot, sañapa' poctepa'chña señch tacllerrserrepa' ñaña po'pshem̄tañoť. ⁴⁰ Ñaña ñerra'm esempo esesha' muenene' o'ch temantaset attoch puerratañpsaset seshtam, sañapa' poctepa'chña señch puerratañpsasetepa' seshtam ñeñť muenenet ama't ñaña po'pmañ seshtam allo sepmatena. ⁴¹ Ñaña ñerra'm esesha' sanmatsre'tatene' e'ñe atta paterr kilómetro, sañapa' poctepa'chña señch o'ch sanmatsre'ch ama't epa kilómetro. ⁴² Ñaña ñerra'm esesha' es senamuene', sañapa' sapepa'ch. Ñaña ñerra'm esesha'ch senamuene' o'ch es sarchapa' sañapa' sarchepa'ch.

Atto Jesúsapa' ye'chatosanet amorrentpo'ch yeñch ñeñť ye'moñe'tyene'

(Lc. 6.27-28, 32-36)

⁴³ 'Ñaña sapa' se'marte'ña atet otete't ahuat: "Mueryetcha' pamo'tset ñeñť muerenahuet. Tarraña ñeñť e'moñe'tenahuetpa' ñetpa'cho'ña o'ch e'moñe'chet ñamet." Ñeñťpa' atetca'ye otete't ama't ahuatoteñ. ⁴⁴ Tarraña ñaña te'pa' elloña o'ch noterres: Semueryach ama't ñeñť se'moñe'tene'. Ñaña ñeñť sarrnomare'tenaya sañapa' o'ch senamaterrñañ Yompor pa'nateña. Ñaña ñeñť erroť sepene'pa' sañapa' añcha' atet sepoñ ñeñť atarr cohuen enten ña. Ñaña ñeñť sa'muero'chtatene' sañapa' o'ch sema'yocham̄pesya. ⁴⁵ Attochña sapa' eñotenset po'ño'ch puechemer penes Yompor ñeñť pue'ntaño'tsen tarro'mar sapa' añ sorrattyen cohuen ama't e'ñe allohuenacop e'ñe atet pena Sompör ñapa' e'ñe cohuenare' es orrtattyen ama't allohuenacop. Atet ñapa' chocma huapata'muenane't po'puetarenña allohuenacop ama't atsrre'mña'ecop ñaña ñeñť cohuenacop acheñer. Ñaña ñapa' chocma huatateñ añecop ñeñť e'ñe pocte' es pets ama't ñaña añecop ñeñť ama pocteye' es pa'yetso. ⁴⁶ Ñeñťo'marña notenes: Ñerra'm ñaña e'ñe semorrentena ñeñť semorrentenaya saña ñeñťpa' amach e'ñeye' sorratenoña ñeñť e'ñe po'ño'ch cohuentetsa, attoña Yomporpa' amach es apuerro ñeñťcha' atarr

socshaterre'. Tarro'mar ñeñt ama ame'ñenayo Yompor, ñetpa' aña morrentenet ñeñt e'ñe morrentenahuet ñamet. Sapa' e'ñeca'ye señoñeñ e'ñe atet pena ñeñt pueshquẽñoñe'na cobrenan acheñenesha' shonte' quelle. Aña atarr cohuentetsa ama't ñeñt ama yemorrentenayepa' o'ch yemorrencha e'ñe cohuen. ⁴⁷ Ñaña ñerra'm e'ñe aña cohuen saguẽn ñeñt e'ñe samo'ts sepen, ñeñtpa' amach errotenot señtanoña ñeñt ama ame'ñetso, tarro'mar ñetpa' e'ñe aña cohuen aguẽnet ñeñt e'ñe pamo'ts penet. ⁴⁸ Ñeñto'marña napa' notenes: Sapa' e'ñepa'chña cohuenare' es sorrtatyen allohuenacop e'ñe atet pena Sompor ñeñt pue'ntañotsen e'ñe cohuenare' es orrtatyenña ña.

6

Atto Jesúsapa' yeçhatosanet amach pommo'cheñoñe'na es cohuen orrtatatseto

¹ Jesúsñaapa' atet oterraneterr:

—E'ñech señoñe, amachña e'ñe sommo'cheñoñe'naña es sorrtatyeno cohuen Yomporecop attoch acheñenesha'pa' o'ch entenset sapa' atarro' cohuen acheñeseñ. Tarro'mar ñerra'm ñeñtecpa'na es sorrtatyen cohuen, Yomporña ñeñt pue'ntañotsenpa' amach es apuerrsoña sa ñeñtcha' atarr socshaterre'. ² Ñerra'm esempo es sapueñ huocchañnesha'pa' e'ñechña a'nahua sapuenanet. Sommo'cheñoñpa' amach sotatsto entasepa' allohuen acheñenesha' attoch e'ñe cohuen entasetañ. Tarro'mar ñeñtpa' ommoñañenesha' atet petsa. Ñeñt ommoñañenesha'pa' ñerra'm esempo es apueñet huocchañnesha'chnopa' o'ch orrtachet allo'tsa'yen allohuen acheñenesha' all puerahuo'mar ama't ñaña toño'mar; attochña allohuen acheñenesha'pa' e'ñech cohuen entenanetañ. Tarraña napa' o'ch notas, ñeñt atet petsapa' Yomporñaapa' amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñeneshach cohuentatenahuet. Ñetpa' e'ñech alla atsa'taretterret. ³ Tarraña sapa' ñerra'm esempo es sapueñ huocchañnesha'chno amach esesha' sota'psa'tatsto ama't ñeñt e'ñe parro seyemtannena. ⁴ E'ñechña a'nahua es cohuen sepa'yen, allochñaapa' Sompor ñeñtña entene' allohuen ñeñt a'nahua es sepa'yen, ñachña sapuerre' ñeñtcha' ello atarr socshaterre'.

Atto Jesúsapa' yeçhatosanet e'ñech cohuen ma'yochet
(Lc. 11.2-4)

⁵ Jesúsñaapa' atet oterraneterr:

—Ñaña ñerra'm esempo sema'yochena sapa' amach atet sepatsto atet pena ommoñañenesha'. Ñetpa' añecpaña ma'yochenet attoch acheñenesha'pa' e'ñech cohuen entenanetañ. Ñeñto'marña allempo ma'yochenetpa' arrach tomyesoset all shontena acheñenesha' puerahuo'mar amapa' all etsape'tyena toñ allecma huachena shonte' acheñenesha' attochña allohuen acheñenesha'pa' e'ñech cohuen entenanetañ. Tarraña napa' po'ñoçhpa' o'ch notas: Ñeñt atet ommo'chetsa Yomporña' amach apuerraneto ñeñtcha' coshaterrahuet tarro'mar ñetpa' aña e'nenet acheñeneshach cohuentatenahuet. Ñetpa' e'ñech alla atsa'taretterret. ⁶ Sañapa' ñerra'm esempo sema'yochenapa' o'ch sebe'tosyes so'ponro çhochña seyottam'psa attochña sapa' amach sommo'cheñoña sema'yochenoña Sompore, ñeñt'pa' e'ñech ñapuef allo'tsenes epas. Allochña' Sompore ñeñt e'ñe ñapfa sentene' ñachña sapuerre' ñeñtcha' ello atarr socshaterre'.

⁷ 'Sa ñerra'm çho sema'yochenapa' amach atta nanac señosatsto atarr aton e'ñe orrena ñeñt atet pena po'poñ acheñenesha' ñeñt ama ame'ñenayo ñeñt ya Yeyomporer. Ñetpa' atarr tematen ma'yochenetaña' tarraña ñeñtach alla oterrete't. Çate' otenapuetañ ñerra'm atarr tematen eñosetpa' e'ñe'e' cohuen entenanet Yompor attoch e'ñe cohuen e'mñotenanet. ⁸ Sañapa' amach atet sepatsto atet penet ñet tarro'mar sapa' ama't ama es senamuena' sema'yochenoñ, Somporeña e'ñe eñotuennas ñeñt sepallta'yena. ⁹ Sañapa' atetcha'ña cohuen sema'yochaña sa:

Yompore Partso ñeñtep pe'ntaño'tsen, yentapepa'ch pa atarr Partsof.

¹⁰ Chapuepa'ch Nompore allempoch atarr pa'yochreshatterra arr patsro. Yetsonapepa'ch arr patsro ñeñt atet pemnen pa Nompore ñeñt atet penet ñaña all pe'ntaño.

¹¹ Chocmuepa'ch Nompore papuene y ñaña yocram ñeñt allpon yepallta'yena pate'tets yet.

¹² Pepret'na'huonayepa'ch Nompore allohuen yo'chñar ñeñt ama pocteye' pentapretenye atto Nompore yapa'çho'ña yepret'nannena ñerra'm esempo errof yeßannena.

¹³ Ñaña amach Nompore pemnatatsche sosya'tsañ o'ch atarr topateney. Añcha'ña çhoch Nompore pa'ypo'ñataterrey allohuen sosya'tsañeçhno. Tarro'mar e'ñe pa Nompore ayochreshattetsa ñeñtep atarr Partseshatets, e'ñe

þapta ñeñteþ Nompore aye'chochtatarettetsa e'ñe er-
rponañohuen. Ñeñtach nenamaþ; ñeñþpa' attepa'ch
Nompore.

14 'Ñerra'm sa chocma seþretnannena atto erroþ
seþannenapa' sapa'cho'ña chocmach peretnerresña
Sompore ñeñt pue'ntañotsen. 15 Tarraña ñerra'm ama cho
seþretnannenopa' Somporepa'cho'ña amach peretnerrnasña
saña so'chñar.

*Atto Jesúsþa' yeçhatosanet ñeñt e'ñech po'ñoçh tore'teñets
Yomporecop*

16 Jesúsñaþa' atet oterranneterr:

—Ñaña ñerra'm esempo semneñ sema'yocheñoþ Yompore
o'ch sequeçþpa' serrar ñeñþpa' e'ñe pocte'. Tarraña
ñeñþpa' ama añecpayaye attoch entas acheñenesha' ñerra'm
çha sellca'huen. Tarro'mar ñeñþpa' ommoñañenesha'ña
atet petsa. Ñetpa' ñerra'm esempo queçþpuenet puerrar
Yomporecop ñetpa' attach atsocloyayenet allochñaþa'
attoch eñotenanet acheñenesha' ñetpa' Yomporecop' atet
penet. Tarraña na po'ñoçþpa' o'ch notas: Ñeñt atet
ommo'çetsa puetore'teñoþ Yomporeñaþa' amach es
apuerraneto ñeñtcha' atarr coshaterrahuet. Tarro'mar
ñetpa' aña e'nenet acheñeneschach cohuentatenahuet. Ñetpa'
e'ñech alla atsa'taretterret. 17 Tarraña sa ñerra'm esempo
e'ñe sema'yocheñoþ Yompore o'ch sequeçþpa' serrar sapa'
atterachña sorrtena e'ñech cohuen satsañotyena ñaña
se'pacle'chyena. 18 Allochña acheñenesha'þa' amach çha
eñotaseto sapa' cho sequeçþpuen serrar ma'yochaya Yompore.
Sapa' e'ñech ñapta Sompore sentene' ñeñt pue'ntañotsen.
Allochñaþa' Sompore ñeñt e'ñe ñapta sentene' ñachña sapuerre'
ñeñtcha' ello atarr socshatterre'.

*Atto ñeñtcha' seshonterr ñeñt atarr sherbets arrca'ye se-
shonteñ all Yompore pue'ntañot*

(Lc. 12.33-34)

19 Jesúsþa' alla oterrerr:

—Ñaña amach seshonta'yesatsto checmañats aña patsro
ñeñtcha' atarr semorrentena. Ñeñþpa' atarr apomþpere'chña
atarr aptsaña. Ama't eñeþpa' o'ch be'tosamþsonasapa'
o'ch yoratsre'tamþpesas. 20 Yompore pue'ntañochña
seshonta'yesña ñeñt e'ñe po'ñoçh sherbets. Ñeñþpa' ama
apomþpere'chño ñaña ama aptsaño. Allpa' ama't eñeþpa'
ama be'teno attoch yoratsre'tamþpesas. 21 Tarro'mar ñerra'm
all Yompore pue'ntañot seshonta'nen ñeñt atarr cohuen
senten, yeñoteñ e'ñe ñeñta paterr senen seyochro ñeñtña

atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyoçhro ñeñtña' ama es sherbenoña Yomporecop.

Atto yecle'pa' añ toma'ntena ñeñt po'lampareñ pen allohuen yechets

(Lc. 11.34-36)

22-23 Jesúsña'papa' alla oterraneterr:

–Yecle'pa' añ toma'ntena atet ñerra'm ñeñt po'lampareñ pen ora yechets. Ñerra'm e'ñe cohuen huomech yecle'pa' e'ñech cohuen entateney puetare'. Allochña'papa' attoch e'ñe cohuen torratyenana allemeñ yechets tarro'mar e'ñe cohuen a'puetarsam̄psarettenet. Tarraña yecle'ña ñerra'm ama e'ñe cohuen huom̄cheyayepa' amach e'ñe cohuenaye' entateney puetare' attochña amach eshcaye' torratyenano allemeñ yechets tarro'mar cha ottena ñerra'mrate' checmeto'tsa'yeneta. Attecma pena ñaña yeyoçher. Ñerra'm e'ñe cohuen yoctape'chyen yeyoçhro, ama aña es ye'nyeno ñeñt e'ñe yocpa, attoña çhennayaña e'ñe ora allohuen Yomporecop poçtapña ñeñt po'cohuenña pen. Attoña ora yoctapña'papa' e'ñech a'puetarsam̄psarettena Yomporeshot. Tarraña ñerra'm ama cohuenaye' yoctape'cheno yeyoçhro, ñerra'm aña ye'nyen ñeñt e'ñe yocpa ñeñtpa' amach errotenot a'puetarsam̄penyeña ñeñt yoctapña yepen. Ñeñtña yoctapña yepenpa' atarrcha' a'checmetam̄pennay yeyoçher.

Amach aña yema'yochratsto ñeñt e'ñe yocpa attoch yegana aton quelle; ñeñt atetpa' amach errotenot yema'yochroña ñaña Yomporecop

(Lc. 16.13)

²⁴ Ñeñtpa' atetcha' yetma'ntacha: Ama't puesheñarrotoyepa' amach errotenot e'ñe cohuen yetaru-asona epsheño'mar yamo'mtayecop. Tarro'mar ñerra'm atet yepapa' puesheñarr e'ñech cohuen yemorrenteño't yocsheñeshocmañen yesherbeñ, po'psheñeñña'papa' amach e'ñeye' yemorrenteño; çhach yottena ñerra'm cha yetsena'teñ. Ñeñto'marña ñeñtpa' amach cohuenaye' yesherbeñe. Ñerra'm aña e'ñe sema'yochrena ñeñt e'ñe socpa attoch segana aton quelle, ñeñt atetpa' amach errotenot sema'yochroña ñaña ñeñtecop atarr sherbets Yomporecop.

Atto Yomporecopa' ñach e'ñe cohuen cohuan̄pene' ñeñt puechemerasha' pen

(Lc. 12.22-31)

25 'Ñeñto'marña te'pa' o'ch noterrser: Amach aña sellcatsto ñeñt' atto yocrrena arr patsro. Ama't seyoçhrapa' amach sotatsto, esuachca' yerrerrerrte' tsapatonet, esuachca' yorrte'. Ñaña amach aña sellcatsto ñeñt' e'ñe sechtsocpa. Amach sotatsto, esuachca' yehorrate'. Tarro'mar Yomporña yapuene' yo'rrerrña allo yocrrena ñeñtña atarr nanac sherbets. Ñeñto'mar yeñoteñ ña yapuene' ñaña yerrar ñeñtña ñocoppa' ama esoye' enteñe. Ñaña ña yeçhcatene' ye'chets ñeñt' atarr sherbets. Ñeñto'mar yeñoteñ ña yapuene' ñaña ama't ñeñt' yehorra'yena ñeñtña ñocop ama esoye' enteñe. 26 Senteñte' atto correna otneshachno ñeñt' anomcha'tyetsa entonet. Ñetpa' ama çhoye' nare'tatse'teneto ñaña ama çhoye' apcha'yeneto puerrar ñeñtcha' rra'yenet. Ñetpa' ama es echenaye allcha' es aña'nyenet. Ama't atto correnet Somporña ñeñt' pue'ntaño'tsenpa' e'ñe yeçhcatyesuanet ñeñtcha' puerrar pa'yenet. Elloña sa Yomporpa' atarr morrentensa sa; ello señtaneñ ñeñt' atto atarr morrentenana otneshachno. 27 Ñaña amach sellcatsto attoch amach serromo tarro'mar ama't sellquëñañ attoch atarr atomat socra arr patsro, tarraña ama't e'ñe puesheñarrotesapa' amate' errotenot so'chtatoña socreña ama't e'ñe pamtarra.

28 'Eso'mare'tcha'ña sellca'yesaña attoch sepashta. Senteñte' atet yeçhquëna roreçhno ñeñt' chopyets ñota allemeñ. Ñetpa' ama çhoye' taruasa'yeneto ama't mamesha ama çhoye' taneneto ñeñt' chorra'yenet atto e'ñe cohuen orreyenet. 29 Tarraña napa' o'ch notas: Ama't añcha'tareñ Salomón atto e'ñe a'cohuentate't ahuat, ama't ñapa' ama chorrane'teña ñeñt' atarr cohuen ñeñt' atet atarr cohuentena ror. 30 Ñaña ñeñt' ror pue'chorpa' ñeñtara ta'te' ñeñt' chopyets allemeñ ñeñt' sentyen te' tarraña ñeñt'pa' mamecpa. Ama't cohuen chopyleneñ te'pa' tsapatonetña'pa' o'ch etomamperetpa' e'ñech colla'huerrapa' o'huañcha' cohuenta. Ñehua, Yompor atto cohuentatyenan ama't ñeñt' e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño. 31 Ñeñto'marña notenes: Amach atarr sellca'yesatsto. Amach sotatsto: "Esuachca'ye yerra'te'. Esuachca'ye yorrte'." Amach sotatsto: "Esuachca'ye yehorrate'." 32 Tarro'mar allohuen acheñenesha' arr patsro ñeñt' ama ame'ña'yetso, ñetpa' ñeñtña e'ñe paterr e'nenet. Ñehua, Somporña ñeñt' pue'ntaño'tsen ñapa' e'ñe entuenes ñeñt' allpon pa'namen sepallta'yena arr patsro. 33 Sapa' añcha'ña e'ñe ñanom sema'yoçhrena Yomporcop attoch atarr ayochreshattena ña. Ñaña añcha'ña sema'yoçhrena ñeñt' e'ñe pocte' enten ña,

allochñapa' ñachña sapa'yene' ñeñt' allpon sepallta'yena samña.
 34 Amach e'ñe tayecma sellca'yesatsto ñeñt'cha' setantyesoya
 tsapaonet. Tarro'mar ama't e'ñe tayoteña' chocma eñall
 ñeñt' allcatañetyetsa ama't e'ñe pate'tets yet.

7

*E'ñe attotapa' amach yotteñe'channa'tatsto
 (Lc. 6.37-38, 41-42)*

¹ Jesúsapa' atet oterraneterr:

—Sapa' e'ñe attotapa' amach sottene'chatsche po'psheñeñ
 allochñapa' amach otteñe'cherrso samña Yompor. ² Tarro'mar
 ñerra'm atet sottene'chyeñ po'potantañ, Yomporpa'cho'ña
 e'ñech attecma otteñe'cherres samña. Ñerra'm errponochcha'
 sottene'chyeñ po'potantaña' sapa'cho'ña e'ñech allponoch
 otteñe'cherres samña Yompor. ³⁻⁵ Amach atet sentatsche
 po'potantañ ñerra'm ñetpa' ama cohuenaye' es peneto, ama't
 sapa' ama sentenoña ñeñt' atet sepa'yena sa ñeñt'pa' ello
 señtaneña po'potantañ ñeñt' atet es pa'yenet ñet. Ñerra'm
 ama cohuenaye' es sepeno samapa' amach sotatscheña
 po'potantañ: “Napa' o'ch noctape'chatuerres e'ñe cohuen.”
 Tarro'mar ñerra'm atet sepenapa' cha sommo'chena.
 Ñanomcha'ña añ sehuapore'terr ñeñt' ama cohuenaye' sepeno
 sa, allochñapa' attoch seño chotape'chate' samo'ts e'ñe
 cohuen. Ñeñt'pa' añ toma'tena o'ch sentoñ po'psheñeñ
 pa'clloyo'tsen puepachña ama't sa seclloyopa' allo'tsen tsach;
 ñeñt'ña' ama senteñe. Ñerra'm atetpa' amach errotenot
 socheña po'psheñeñ napa' o'ch nechternap' pecloyot
 pepachña tarro'mar añ tsach ñeñt' seclloyo'tsenpa' cha
 a'npuennasña attoch e'ñe cohuen es sentyen. Ñanomcha'ña añ
 sehuapore'terr tsach seclloyot allochñapa' attoch e'ñe cohuen
 es sentyen. Attochña e'ñe cohuen sechterrñañ po'psheñeñ
 puepachña pa'clloyot.

⁶ Jesúsapa' atet oterraneterr po'poñ:

—Ñeñt' ama quechpuenaye pachmareñ ñaña patpareñ
 amach alla seserrpare'taterranete'te Parets po'cohuenña.
 Tarro'mar ñetpa' atta penet ñerra'mrate' ochec. Ñehua,
 ochec ñerra'm esempo ama'tcha' atarr cohuen ya'ppa'
 ya'nach rrema'pes chach achota'teypa' o'ch shetsay. Ñaña
 ama't atet ñerra'm chañcho ñerra'm esempo es yena' ñesho
 ama'tcha' atarr cohuen yenten ya, yeser, chañchoña' attach
 atmama'tam'psey tarro'mar chañchopa' ama esoye' entenano
 ama't ñeñt' atarr cohuen.

*Chocmach es yenamueñ Yompor ñaña chocmach ye'neñ
 (Lc. 11.9-13; 6.31)*

⁷ Jesús^{pa}’ alla yečhaterraneterr po’poñ, ñeñt^{pa}’ atet oterraneterr:

—E’ñe senamueñoť, Yomporñapa’ apascha’. Se’name’teñoťpa’ señchcha’; sečhore’teñoť, Yomporñapa’ e’ñe pue’mñoteñoťespa’ e’ñech cohuen toram^{ps}apas. ⁸ Tarro’mar ñeñť es enamare’tetspa’ ñetña es aguětset; ñaña ñeñť es e’name’tets ñetñapa’ čhocmach eñchet ñaña erra’tsen ñeñť chore’tyene’ ñetñapa’ e’ñe e’mñotenanet Yompor.

⁹⁻¹¹ Yompor ñeñť pue’ntaño’tsen čhocmach e’ñe cohuenare’ es apa’yeney ñerra’m esempo es yenamueñ. Ñapa’ amach aña apuenye ñeñť ama cohuenaye’ yenteno ya. Ama’t sa ñeñtes arromñaťes atet sepeñ saña sechemer, e’ñech cohuen es sapueñ ñerra’m esempo es enamuenes. Atet ñerra’m allempo pa’chporrñoť es enamuenes, o’ch enamas mam* ñeñťcharr’, sapa’ ama’t puesheñarroťesapa’ amach aña sapueñeña sechemer mapue’ ñeñť ama arrapahuoyaye. Amapa’ ñerra’m cac enamuenes sañapa’ ama’t puesheñarroťesapa’ amach aña sapueñeña sechemer shecheř ñeñť atarr amueročtatañ. Ñeñťo’marña sa ama’t arromñaťes ama’t ñaña atsrre’mñaťes sapa’ e’ñe señoťeñ apa’yese’ sechemerasha’ e’ñe cohuenare’. Añña ñeñť Seyomporer sepen saña ñeñť pue’ntaño’tsen elloña ñapa’ e’ñe eñoteñ atto e’ñe cohuenare’ es apa’yenes saña ñeñtes es enamuene’.

¹² Ñeñťo’marña atet notenes: Ñerra’m erra’tsente’ e’ñe cohuen senten ñeñť semnen sa ñeñťcha’ atet ponas po’psheñeñ, sapa’čo’ña e’ñech attecma seřanet saña. Tarro’mar ñeñťpa’ atet oteneý Yompor po’ñoñ ñeñť ahuatoteñ, ama’t Moisés po’ñoñ ñeñť atet anareť ama’t ñaña ñeñť a’mta’yeseýť Yompor po’ñoñpa’ e’ñe attecma otyeseteť.

Atto Jesús^{pa}’ toma’ntaterraneterr ñerra’mrrate’ yetarroťollo yebe’ten esheccha’ yečhap Yomporesho (Lc. 13.24)

¹³ Jesúsñapa’ atet toma’ntaterraneterr, ñeñťpa’ atet otanet:

—Sebeťos yetarro añeťoll tarro’mar ñeñť atarr yetarr, atarr toñ ñeñťpa’ alla sen chenca’puetso. Shonte’ acheñenesha’pa’ e’ñe alla beťosčha’tyenet. ¹⁴ Ñeñťña añeťoll yetarr, añeťoll toñ ñeñťñapa’ arr sen corra’puetso allña sapa’ corretsasach. E’ñe puesheña’ttsa entene’ña ñeñť toñer.

Ñeñťpa’ añ toma’ntena attoch yocter Cristo, čhoch yesuanemña ñeñť ama cohuenaye’ entapretenye.

* **7:9-11** Ñehua, Jesús añ toma’ntatanet pan ñeñť puerrar penet all pa’nyo.

Allohuen acheñ ñeñt e'ñe po'ñoçh cohuen acheñer, ñetñapa' añcha' orrtatyenet ñeñt e'ñe cohuenare'

(Lc. 6.43-44)

¹⁵ Jesúsñapa' atet oterraneterr:

—Sapa' señota'tach tarro'mar huaponasach ñeñtcha' aycha'natatsa ñetpa' a'miteneto' Yompor po'ñoñ. Ñetpa' puehquëño'tetpa' ottenetañ atet ñerra'm atarr cohuen acheñret e'ñech attetañ ñerra'mrrate' carrnero ñeñt ama erro't apaneyaye ama't mamesha. Tarraña ñetpa' atta shequënet tarro'mar e'ñe po'ñoçh ñetpa' e'ñe attet ñerra'mrrate' ma'yarr ñeñt añach e'nyen ñeñt e'ñe ñocpa. Attotcha'ña e'ñe a'chencatuerran acheñenesha'. ¹⁶⁻²⁰ Tarraña sapa' attotcha'ña e'ñe sechme'tyesanet. Tarro'mar allohuen acheñenesha' ñeñt e'ñe po'ñoçh cohuen acheñeneshar, ñetpa' añcha'ña orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye, ñetñapa' añach orrtatyenet ñeñt ama cohuenayaye. Ñeñtapa' atetcha' netma'ntacha. Ora allohuen ñeñt e'ñe cohuenare' narmetsocheçhno'pue'merpa'cho'ña e'ñech cohuenare'. Ama't parrochapa' amach me'toña ñeñt ama cohuenayaye. Añña po'pchañeçhno narmetsocheçhno ñeñt ama cohuenayaye, pue'merpa'cho'ña amach cohuenayaye. Ñeñtapa'cho'ña ama't parrochapa' amach me'tenoña e'ñe cohuen. Ñaña yapa' e'ñe yeñoteñ ama't erro'tenapa' ama arroteye' yetoquëñoña llo'm ajcho't. Ñaña ama't erro'tenapa' ama arroteye' yetoquëñoña ap rrenagachot.† Ñeñto'marña attoña yeñoteñ erra'tsente' ñeñt e'ñe cohuenare' narmetsoch, ñaña ñeñt ama cohuenayaye; pue'merotña yechme'teñ. Ñaña allohuen narmetsocheçhno ñeñt ama cohuenaye' me'tyetsopa' a'mata'tueretcha' saprotueretcha' tso.

Atto amach allohuenacmaye' çhapueto all añcha'tarettena Yompor pue'ntaño

(Lc. 13.25-27)

²¹ Jesúsñapa' atet oterraneterr:

—Ñeñt notyenayeñ: “Papa' po'ñoçh na'yochreshater nepeneþ”, tarraña amach allohuenacmaye' çhapueto all añcha'tarettena Nompor Parets ñeñt pue'ntaño'tsen. Añach çhapyerrets all ñeñt e'ñe po'ñoçh atet pene' ñeñt atet muenen Nompor ñeñt pue'ntaño'tsen. ²² Allempopa' shonte'ch acheñenesha' ñeñtcha' notyerrayeñ: “Po'ñoçh Ayochreshate e'ñe peso'chñopa' çhocmaca'ye ya'mtonape'tña peñoñ. Ñaña yeçhore'teño'teþ peso'chñopa' çhocmaca'ye

† 7:16-20 Ñehua, Jesús añ toma'ntatanet uva ñaña higo ñeñt puenarenñ penet all pa'nyo.

yequechpatache'tña shonte' oneñetečno. Ñaña yeçhore'teñoť peso'chñopa' epaye'ca'ye yorrtatyese'tña partsoteñets." ²³ Naña allempopa' na'meta'huerranetcha', notyerranetcha': "Ama't ahuaťapa' ama nentarso, ama neyochreshayayso. Te'pa' orrerres, sapa' aña setsoten ñeñť ama cohuenaye' nenteno."

Atto Jesús toma'ntatana acheñ ñeñť e'ñe eñotene' ñeñť po'ñoč sherbets ñaña ñeñť ama eñotenaye ñeñť sherbets

(Lc. 6.47-49; Mr. 1.22)

²⁴ Jesúsñapa' atet oterraneterr:

—Allohuen ñerra'm erra'tsencha' e'mñotene' neñoñ ñeñť atet e'ñe cohuen neyčhatenanet, ñerra'm ñetña e'ñech atet penet, ñetñapa' e'ñech eñoteñet ñeñť e'ñe po'ñoč sherbets. Ñeñť acheñer ñeñť atet petsapa' ñapa' e'ñe atet ñerra'mrrate' puesheñarr yacma ñeñť atarr es eñotets. Ñaña'pa' tomatan pa'paquell, e'ñe echarr pe'. ²⁵ E'ñe tomatue'pa' huata huomenc, apellchena oñ, orrnota, pocollñapa' orrnotamñpsa. Ama a'matamñse tarro'mar quellpachpa' e'ñe echarr aťomataret. ²⁶ Tarraña po'potantañña ñeñť e'mñotene' neñoñ ñetña ñerra'm amach atteye' peneto ñeñť notenanet, ñetñapa' e'ñech atteta ñerra'mrrate' puesheñarr yacma ñeñť ama es eñoteno. Ñapa'cho'ña tomataneñcha'ña pa'paquell, tarraña amach echarroye' pe. ²⁷ E'ñe tomatue'pa' huata huomenc, apellchena oñ, orrnota, pocollñapa' orrnotamñpsatsapa' čhepa'tcha' mata'nerretspa' e'ñe muellotsetuerra.

²⁸ Allempo serrpare'tatuanet Jesús, acheñenesha'ñapa' epaye' cohuanrrorteñet ñeñť atet yečhatenanet ña. ²⁹ Tarro'mar ñapa' atarr cohuen yečhatenanet ñerra'mrrate' ñeñť allsensarettetsa Partseshot. Judionesha' pa'mcha'tareternesha' ñeñť atarr etsotayenayeñ ñoñets ñeñť atet anaret, ñetñapa' ama e'ñeye' atteye' yečhateneto.

8

Atto Jesús a'crraterran puesheñarr yacma ñeñť aptsarñat
(Mr. 1.40-45; Lc. 5.12-16)

¹ Allempoña err Jesús aspentotpa' coťa'huanererr acheñenesha' nanac shonte'. ² Allñapa' huapoña puesheñarr ñeñť osen puetsarñats ñeñť otenet lepra. Chap Jesúseshopa' allenta concorposana Jesús'pa' atet otos:

—Ayochreshate ñerra'm pa muenats pa'pa' ñeñtep atarr ahuamencatesha' pa'crrataye'cherren allochñapa' attoch e'ñe cohuen entuerren acheñenesha'.

³ Jesúsña anretapa' allenta a'p'le', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerreḡ allohuen acheñenesha'.

Yacmañapa' allorocmuepa'tcha' metuernña pueptsarñapa' čha cohuenterrtsa. ⁴Jesúsñapa' alla otererr:

—Te' atto o' na'crraterreḡpa' po'ñočh ama't e'ñe puesheñarrapa' amach ḡotaḡsa'tatsche ama't mamesha. Corneshachña pegatena' all peptsarse't. Ate't nane't Moisés ñoñets añ acheñrecop ñeñt'cha' a'crrataretterrtsapa' te'ñapa' o'ch es ḡanom ñeñt'cha' ḡapos all ñeñt' Yomporecop allochñapa' attoch e'ñe cohuen enterreḡ allohuen acheñenesha'.

Atto Jesús a'crraterran puesheñarr capitán pueñañra; ñeñt'pa' romo'marnesha'

(Lc. 7.1-10)

⁵ Allempoña čherr Jesús Capernaumopa' allñapa' huapoña puesheñarr solltar po'caḡtaner, ñeñt'ñapa' romo'marnesha' ama judioneshayaye. Ñaña'pa' atarr otare'tosan Jesús, ⁶ ñeñt'pa' ate't otos:

—Nomporcha' nepaclopa' atarr pa'na'ttenapa neñañra. Alla ḡanena po'mayo nanac mueročhtena čha echarrtena.

⁷ Jesúsñapa' ate't och:

—Ama'tpa' napa' o'ch ahuen o'ch na'crratera'.

⁸ Capitánña puepatare'teño'tpa' ate't och:

—Na Nomporcha'pa' ama cohuenayayno attoch pebe'tosapo'tañpesna nepaclo. Arro'tach ḡot: “Ama'tpa' correrrepa' peñañra”, neñañrañapa' acrrerroche'ch.

⁹ Tarro'mar napa' ñeñten ñeñt' ate't petsa ñeñt' ate't otenen ñeñt' neyechenaya na. Napa'čho'ña eñall ñeñt' neyechena naña ñeñt' nesolltarer nepen. Ñerra'm puesheñarr solltar noteñ: “Papa' o'ch ahueḡ a'yo”, ñaña'pa' o'ch'cho' ahuo'. Naña po'psheñeñ solltar ñerra'm noch: “Papa' aḡon arr”, ñaña'pa' o'ch'cho' huapa. Naña po'psheñeñ na'taruasañer ñerra'm noch: “Papa' arrcha' petaruasa'muen”, ñapa' allcha'čho' taruasa'muen. Ñeñto'marña napa' neñoteneḡ ñerra'm erro'ten ḡotenpa' e'ñechca'ye ate't pena.

¹⁰ Allempo e'man Jesús ñeñt' ate't oten capitán, ñaña'pa' ate't otan allohuen acheñenesha' ñeñt' cota'nene':

—Ñapa' atarrca'ye yemtenna, ama't ñapa' amaca'ye judioneshayaye. Napa' po'ñočh o'ch notas: Ama't ahuatapa' ama nentareña acheñ ñeñt' e'ñe ate't neyemtenaya, ama't allohuen israelena'tarnesha'pa' ama't puesheñarra ama nentareña ñeñt' ate't atarr neyemtenaya. ¹¹ Ñeñto'marña te'pa' o'ch notas: Shonte'ch acheñenesha' ñeñt' ama judioneshayaye ñeñt'cha'ña e'ñe neyemterraya. Allochñapa'

esempohuañenpa' ñetñapa' allenmateñcha' e'ñe huaçha'tuerret ñeñtcha' anorrcha'tyesuerrets all e'ñe Yomporesho all añcha'tarettena ña pue'ntaño. Allcha'ña rrallme'chapreteret yatañneshaçhno Abraham, ñaña Isaac ñaña Jacob. 12 Shonteña judionesha' ñetcha'ña chapatsetañ all añcha'tarettena Yompor, tarraña ñetñapa' amach chapueto all tarro'mar ñetpa' ama naye' yemteneto. Ñetñapa' allach ahupore'taretterret a'yot checmeto. Allña' allcha' yahuanrrorterret, panmueñoñet atserrpa' rraso'tyesosetcha' pa's.

13 Allempoña Jesús pa' alla oterranerr capitán:

—Te'pa' o'ch ahuerreḡ pepaclo, e'ñe atto atarr peyemtenapa' attetepa'ch p̄ocop.

Pueñañraña' e'ñe allempocma correrra.

Allempo a'crratosan Jesús Simón Pedro pa'so'mue

(Mr. 1.29-31; Lc. 4.38-39)

14 Allotñapa' chap Jesús Pedro pa'paclo. Allña' entosñañ pa'so'mue alla panena po'mayo cha atsna'ten, cha hueraten. 15 Jesúsña' allenta a'p̄llosñañ potpa' cha metuerretsña po'urateña. Allenta tantapa' o' yema'tallme'chaḡa.

Allempo Jesús pa' a'crraterran shonte' pa'namen atснаñe'teçhno

(Mr. 1.32-34; Lc. 4.40-41)

16 Ñeñte yetrocma allempo ellerrenpa' huaçha'tateññañeterr shonte' ñeñt chorra'yena oneñeñ. Jesúsña' e'ñe po'ñoñoña queçhpatuerranet oneñeñ ñeñt chorra'yenahuet. Ñaña allohuen ñeñt atsna'tyetspa' o' a'crratyesapanet. 17 Ñeñtpa' tarro'mar atet pa' allochña' attoch etsota Isaías po'ñoñ ñeñt a'mtaye't Yompor po'ñoñ; ñapa' atet ote't: “Ñapa' ñach yahuanmanḡperre' ñeñt yemueroçhtatyene', ñapa' ñach ahuanerre' allohuen ñeñt ya'tserrpa'yene'.”

Allempo Jesús pa' yeçhatan ñeñt muenene' o'ch coter

(Lc. 9.57-62)

18 Po'pocheño allempo Jesús pa' entapuenanerr shonte' acheñenesha' cha emchorra'hueñerr, ñaña' atet otan pueyochresha':

—Te'pa' o'ch ahuanḡsey yonita'n.

19 Allña' huapoña puesheñarr ñeñt atarr etsotene' ñoñets ñeñt atet anare't. Ñaña' atet otos:

—Na te'pa' Maestrocha' nemneñ o'ch noctare'tyeseḡ ama't errohuanencha' pechopeñe'chyes.

20 Jesúsña' atet och:

—Te'pa' napa' peñotencha' ama't nepacllapa' ama necheñe allcha' neychenañ. Ro'quëppa' chocma eñall pa'pon allecma yeçhena.* Oteçhnopa'cho'ña chocma eñall pa'ma' allecma yeçha'yenet. Tarraña naña Ñeñfen Acheñetosetspa' ama eñalle ñeñt e'ñe nepaquëll nepen allcha' neñanena.

²¹ Po'pocheño Jesús pa' atet otenanerr po'psheñeñ pueyochresha':

—Te'pa' o'ch pöcta'n attoch e'ñe po'ñoçh neyochresha' neperreþ.

Tarraña ñeñtña acheñerpa' atet otan Jesús:

—Te'pa' arrcha'ña ñanóm pemnaterren o'ch ahuerren apuesho o'chña nepampa'huera' apañpa' allempochña nohuerrapa' o'ch noctaþ.

²² Tarraña Jesús pa' atet otererr:

—Acheñenesha' ñeñt ama yerpa'penaye Yompor, ñetñapa' pampanna'tetepa' parro arromñatecmuet. Tarraña þocoppa' ñeñteþ o' peyerpuera Yompor añ poctetsa o'ch pöcta'n attoch po'ñoçh e'ñe neyochresha' neperreþ.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mr. 4.35-41; Lc. 8.22-25)

²³ Allempoña Jesús pa' a'tapos noñto pueyochresha'ñapa' co'ta'huanmet, ahuañþset rroçha'sonet atarr sa'po.

²⁴ Allñapa' machayotepa'tcha' huomenquëshatañpesnomuet. Emo'yare'ña çha esha'tena noñto, atteña oññapa' chorramoch noñto. Jesúsñapa' çha muen. ²⁵ Atteña pueyochresha'ñapa' ponemyet Jesús all muenpa' opueret atet ochet:

—¡Pa'queshþataye'chey Ayochreshate po'ñoçhuachca'ye yoclla'huerrate'!

²⁶ Ñaña pa' atet otanet:

—Eso'mare'tña nanac seyoren. Sapa' ama e'ñeye' seyemtenno.

Jesúsña tanterrapa' e'ñe po'ñoñoña a'mtsoññetuerran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen mueçhettañperret. ²⁷ Atta cohuanrrorteñet ñetñapa' atet otanna'tyeset:

—Ta'mca'ye, añ acheñerpa' esona'tarte'ca'ye. Atarrep'a't es a'mchechaten, ama't po'ñoñoñapa' a'mchechaterran huomenquësha' ama't ñaña emo'yare' oñ.

Atto gadaro'marnesha' ñeñt chorrena oneñt ñetñapa' hua-puet Jesúsesho

(Mr. 5.1-20; Lc. 8.26-39)

* 8:20 Ñehua, Jesús añ toma'ntacha zorra ñeñt berrotets all pa'nyo.

²⁸ Allempoñapa' o' etsotoset yomita'n all sechenet. Allpa' añ pa'ney pene' gadaro'marnesha'. Allñapa' huapoña ñaña epsheña achen tarraña ñetpa' añ chorrenahuet oneñet. Ñeñtpa' arroť huenet allecma pampa'yeñet arromñaťechno. Allenetñapa' ama eseshaye' setso tarro'mar ñeñť chorra'yena oneñet ñetpa' atarr amcha'nochetenyet allenet. ²⁹ Allempoñapa' rranare'tapet Jesús, atet ochet:

—Eso'maruachca'ye, Parets Puechemerecha' pa'tsrre'moťhtana'tosey. Papa' añecopťe' pehuena o'ch pecoñchaterrey ama't ama čhena' allempoch ya'coñchatareťterra.

³⁰ Nehua, allpa' a'yente'tsa'yen shonte' chañchočhno all rratse'tyen. ³¹ Ñeñťo'marña oneñeťechnopa' atet otare'tapet Jesús:

—Ñerra'm čhoch pequečpatosey achenpa' arrña pemñaye'chosey chañchesho allochñapa' o'ch yechorra'yerr ñaña chañchočhno.

³² Jesúsñapa' allenta otanet:

—Ama'tca'yepa' orrasca'ye.

Allempoña oneñeťechnopa' quečpa'neret achenpa' o' chorrereterr ñaña chañchočhno. Chañchoña allempo chorrosya oneñeťechnopa' čhepa'tcha' matrra'tua allohuen ñegoneť, shorčha'tuos allotpa' e'ñe ño'shrra'tuosa oño.

³³ Achenenesha'ña ñeñť cohuanmpene' chañcho, ñetñapa' allenta matrra'tet ñamet po'yorñoť, ahuanmuet anetso. Allñapa' serrpare'tyesoset ora atet o' perra ñeñť chorra'yese't oneñet.

³⁴ Allentepa'tcha' ahuanmaña allohuen anetso'marnesha' ahuo'ch enteñeta' Jesús. Ñetña entoset Jesúsapa' atet otoset:

—Te'pa' o'ch ahuerreř arroť, yenyot.

9

Atto Jesúsapa' a'crraterran ñaña ñeñť echarrtaña
(Mr. 2.1-12; Lc. 5.17-26)

¹ Allotña Jesúsapa' a'terr noñťopa' pechaterra, čherr anetso all a'puena. ² Allñapa' huapatamřsoñet echarrtaña, puechecnape'na. Jesúsñapa' eñotapanet ñetpa' atarr nanac yemteñet. Allempoña ñapa' otapan echarrtaña:

—Chochña neyochre pocserra tarro'mar te' ñeñť p'o'chñarpa' a'pretna'huareťterra.

³ Puesheña'tetsña ñeñť etsotayenayeñ ñoñets ñeñť atet anareť ñetñapa' atta otatse'tyeset pueyočhreto e'ñe ñagattseta, ñeñťpa' atet otet: "Añ achenerpa' čha achmenan Yompor."

⁴ Jesúsñapa' o' eñotanet ñeñť atet otyenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyoçhro. ⁵ Sapa' çhate' soten ñeñt atet o' notue echarraña po'chñar o' apretna'huareta ñeñtpa' ama torrapahuoyaye. Sapa' añña atarr torrapo' senten attoch na' crrater çhoncha'ña ote': "Petantena pechope'chnen." ⁶ Ñehua, napa' o'ch neñotatas na Ñeñten Acheñetosets, napa' ñeñten apareten llesens attoch nach peretnerre' ochñarets añe patsro.

Ñeñto'marña Jesúsapa' atet oterranerr echarraña:

—Te'pa' o'ch petantena, peçhta'nen pemue'pa' pechope'chnen, ahueneþ pepaclo.

⁷ E'ñe otue' atetpa' echarrañañapa' çha tantetsa allorocma, ahuerr pa'paclo. ⁸ Acheñenesha'ña all ñeñt entene' ñetñapa' çha yorennet, elloñapa' alla cohuentaterrñañet Yompor. Atet otyenet:

—Yomporca'yeña o' llesenserran ñeñt ama't e'ñe acheña.

Allempo Jesúsapa' hua'ña'nman Mateo attoch pueyochresha' per

(Mr. 2.13-17; Lc. 5.27-32)

⁹ Jesúsña meterrerr allotpa' entnoman puesheñarr acheñ ñeñtñapa' añ pa'so'cheñ Mateo.* All anen allecma cobra'yenan acheñenesha' quelle ñeñt gobiernocop. Jesúsñaapa' atet otosan Mateo:

—Te'pa' o'ch pçocta'n attoch neyochresha' nepperreþ.

Mateoñapa' çha tantnomtsapa' allenta cotan Jesús.

¹⁰ Allempoña çhap ñaña allempoch rrallme'chen Jesús pocollo. Allñaapa' huaçha'ta po'potantañ shonte' ñeñt po'taruas pene' o'ch cobra'yeñet acheñenesha' quelle ñeñt gobiernocop. Ñeñtpa' atarr ashcañnesha' entyeñ allohuen acheñenesha'. Ñaña epuet po'potantañ ochñañeneshaçhno ñetñapa' all anorrçha'tyesoset all anen Jesús epuet pueyochreshaçhno. ¹¹ Añña fariseonesha' ñeñt allo'tsa'yen ñetña allempo atet eñchetpa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenanña añ acheñeneshar ñeñt puehquëño'te'na cobra'yene' acheñenesha' ñaña epuet acheñenesha' ñeñt atarr ochñañeneshaçhno.

¹² Atto e'manet Jesús, ñañaapa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetñapa' çhocma e'nenet ñeñtcha' a'crraterrahuet. ¹³ Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt atarr ochñañ entyetsa. Allochñaapa' attoch o'ch cotape'cherret

* 9:9 Mateopa' ñeñtara ñeñt sochenet Leví.

ello e'ñe cohuen Yomporecop. Socoppa' añ poctetsa ñerra'm o'ch ahuerrespa' señotuerrepa'chña ñeñt atet ye'chateney añ Yompor po'ñoñ ñeñt atet anaret ahuatoteñ. Ñeñtpa' atet oteney Yompor: "Napa' ama e'ñe aña cohuen nenteno o'ch sapuenen sayara ñeñt semtsen nocop. Añe'naña atarr cohuen nenten o'ch semuereña allohuen samo'tsesha'."

Allempo Jesúsapa' eñotatanet atetcha' tore'tet Yomporecop ñeñt po'ño'ch sherbets

(Mr. 2.18-22; Lc. 5.33-39)

¹⁴ Allempoñapa' ñeñt pueyochresha' pen Juan ñeñt apataye't acheñenesha' ñetña huacha'toñet Jesúsapa' atet otoset:

—Yapa' tore'tetsay Yomporecop ñaña fariseone-sha'pa'cho'ña tore'tetset. Pañapa' ¿eso'mare'tña ama tore'tenoña peyochresha'?

¹⁵ Jesúsñapa' alla toma'ntatanet, atet otanet:

—Ñeñt ahua'ñarete'chno all rrallme'chapreteñet ñeñt errete' sena'tetsa, ama pocteyaye o'ch yotamet amach es serra'yesatsto. Amach yellcatatstaneto tarro'mar atet coshapreteñet ñeñt sena'tetsa. Tarraña ñerra'm esempo machayo'ta sa'nerranet ñeñt sena'tetsa, ñeñtña parro yemuetyena allempoña ñetpa' e'ñe puellquëño'tet que'chpa'huerretcha' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

¹⁶ Elloñapa' alla toma'ntaterraneterr ñeñt atet ye'chen judionesha' arr patsro, ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patse'chpa' ñeñtpa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tam'pespa' 'chach chellama'ta 'chach martse'tatanña shetamtso'she'm. Ñeñtña yelltenpa' allo'nach sen rrrartse'tats nanac.

¹⁷ Jesúsñapa' alla toma'ntaterraneterr po'poñ ñeñt atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarro'teyapa' amach yeshatstoña vinos emasa mellasha'mañ orroto ñeñt aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' 'chach a'ptsan orrot, vinosñapa' e'ñech shebhua, ñeñtña orrotpa' ama't mameshapa' amach es sherberro. Añña ñerra'm emasa vinos, arrcha'ña yeshe' emerra orroto ñeñt aye'chcataret

† 9:14 Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch ye'que'chpa'yerrar.

pa'rrom. Allochñapa' ama'tcha' chasa' vinospa' amach cha potsa'psoña vinos, ñeñtpa' allach yechen epo'mar.

Ñeñtpa' attoña Jesúsapa' eñotatanet ña poctaþña e'ñe etserra.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt a'þlla'nmue' pa'shtam

(Mr. 5.21-43; Lc. 8.40-56)

¹⁸ Allempo atet eñorena Jesúsapa' huapa ñaña puesheñarr ñeñt amcha'tarettetsa judioneshacop, concorposñañapa' atet otos:

—Nesñeñpa' e'ñe errte' rromuets. Tarraña ama't o' rromaña' te'pa' o'ch þocterren, ama't attapa' o'ch þa'þlleña' þotoť attoch o'ch alla correrra.

¹⁹ E'ñe otue'pa' allempoñapa' allenta cota'ner Jesús epuet pueyochresha'. ²⁰ Allñapa' cota'nmanet ñaña puesheñarr coyanesha' ñeñt atсна'tets. Charra' puechena epa char ñeñt atto chocma yella'yena. Ñaña'papa' allenta cota'nenan Jesús chenta' pa'che'ñoť, allñapa' a'þllerrñaña' pa'shtam pa'rpe'moť. ²¹ Tarro'mar, ñapa' atet oten pueyočhro: “Ama't pa'shtama na'þlloñpa' ñeñtach na'crraterre'.” ²² Allempo atto a'þlla'huoñ pa'shtampa' Jesúsña allenta puetallerra pa'che'ñoneþpa' entan coyanesha', ñeñtpa' atet och:

—Choña nesñeshacha' þocsherra tarro'mar atto atarr peyemtenna na, attoña te'pa' o' e'ñe na'crratnomueþ.

Coyanesha'ñapa' allorocma correrra.

²³ Jesúsña allempo chap amcha'tareť pa'pacillo allñapa' entosan ñeñt penclla'tamþesyene' arromñať llequēñtsorečo, entosan ñaña shonte' acheñenesha' all puellquēñoťet atarr ano'tatse'tyenet. ²⁴ Jesúsñapa' atet otosan acheñenesha':

—Sahuanerra arroť, añ shopshesha'pa' amaca'ye čhoye' rromueno, čhaca'ye muen.

Ñetñapa' pachmare'teñoťetpa' atta che'tatsetyesapet tarro'mar ñetpa' e'ñeca'ye eñoteñet čhoca'ye rromuen.

²⁵ Allempoña cha'nmačha'tatuosan ñeñt shontetsa all, ñaña'pa' be'tosos o'pono. Allempoña Jesúsapa' rromota'tosan shopsheshañ potoť ñaña'pa' čhepa'tcha' tanterrtsa.

²⁶ Allempoñapa' e'mare'tuet erraþaren anetso'mar Jesúsapa' o' tantaterran arromñať.

Atto Jesúsapa' a'crraterran epsheña aporo'yet

²⁷ Ahuerrerr Jesús alloťpa' cota'neñ ñaña epsheña aporo'yet. Rranare'tneñet chenta' atet otneñet:

—Pemueraye'cherrya ñeñteþ Davidna'tare.

²⁸ Chap Jesús pocollopa' all be'tosos allña rromuera'ña ñaña aporo'yet. Jesúsñapa' a'þto'tapanet:

—¿Seyemtenñate' napa' ahuamencaten attotcha' necuaterres?

Ñetñapa' atet otoset:

—Yeyemtenñaca'ye, Ayochreshate.

²⁹ Allempoñapa' allenta a'pñacalle'chanetpa' atet otanet:

—Atto atarr seyemtennapa' attetepa'ch socop.

³⁰ Allempocma e'ñe cohuen cohuerret. Jesúsñapa' atet otanet:

—Po'ñooh te'pa' o'ch notas: Amach esesha' sotañsa'tatsto, ama't e'ñe puesheñarra.

³¹ Elloña ñetñapa' ahuanmuet a'metare'tyeset Jesús. Er-
rañaren allampaño'mar e'mare'tuet Jesús atet pena.

Atto Jesúsapa' a'crraterran ñaama ñeññ opanatets

³² Allempo ahuen epsheña aporo'yet allña Jesúseshopa' hua-
paterrñañeterr ñaama opan ñeññ chorrena oneñeñ. ³³ Jesúsñapa'
allenta quechpatan oneñeñ ñeññ atto opanatateñ, opanñapa'
allenta eñorerra. Acheñenesha'ñapa' cohuanrrorteñetpa' atet
otyenet:

—Israelnesha'pa' ama't ahuañapa' ama puentarano ñeññ
atet pena te' Jesús.

³⁴ Fariseonesha'ñapa' puesasare'teñoñetpa' atet otyeset:

—Oneñeñte' pompor ahuamencat pene' attot quechpatenan
oneñeñechno acheñenesha'.

Atto Jesúsapa' atarr muerenana allohuen acheñenesha'

³⁵ Alloñapa' asuahuanom Jesús allohuen anetso ama't
ñaama all ama tama eñalle acheñ. All yechatyesosanet
puerahuo'mar. Serrpare'tatosanet ñeññ cohuen ñoñets
atto ayochreshattena Yompor. A'crratyesosan ñeññ osyen
pa'namen atsnañets ñaama ñeññ pa'namen atsotyenet.

³⁶ Allempo entosan shonte' acheñenesha'pa' ñañapa' nanac
muerenanet. Tarro'mar e'ñe atet entenanet ñerra'mrrate'
carrnero ñeññ ama acuamñsaretayaye; ñeñño'marña nanac
allpatatarettenet tarro'mar ama eñalle ñeññcha' ahuamencat
penahuet. ³⁷ Ñeñño'marña atet otan pueyochresha':

—Shonte' narmets ñeññ nanac ellomñre'tets ñeññcha'
a'yapachetañ. Tarraña ataruasañña ñeññcha' a'yapache'pa'
ama atarr atonayayeto. ³⁸ Te'pa' añcha'ña sanamoñ
pamo'mte' mueñanepa'ña ñeññcha' a'yapacherrets pa'mro.

Ñeññpa' atet toma'ntatanet Jesús atto atarr shonte'
acheñenesha' ñeññcha' ame'ñerñsañ tarraña ñeññcha'
ame'ñaterrahuetpa' ama atarr atonayayeto. Añcha'ña yanam
Yompor ñeññ Yamo'mte' yepen mueñanepa'ña pa'taruasañer
ñeññcha' torra'yerrtsa ñocop allemeñ anetso'mar.

10

Allempo Jesús pa' acran charrasheña ñeñt puechetsa epsheña ñeñtcha' llesensa'

(Mr. 3.13-19; Lc. 6.12-16)

¹ Allempo chapa'muen allempo Jesús agota'mueanan pueyochresha' charrasheña ñeñt puechetsa epsheña. E'ñe apcha'huet ñeshopa' ñañapa' apamet llesens attoch quechpatyeset oneñefečno acheñenesha'. Ñaña llesensanet attoch a'crratyeset acheñenesha' ñeñt osyen allohuen pa'namen atsnañtsočno ñaña ñeñt pa'namen atsotyenet.

² Ñehua, ñetpa' arro'tsa'yenet pa'so'chñečno; allohuenetpa' charrasheñet puechena epsheña ñeñt llesensa'. Ñeñt ñanom atarr sherbets ñeñt pa' Simón ñeñtara sochetsa Pedro, allotpa' ñaña Andrés ñeñt e'ñe pa'mo'nasheñ; allotña pa' ñaña Jacobo ñeñt Zebedeo puechemer epuet pa'mo'nasheñ Juan.

³ Allostña pa' ñaña Felipe ñaña Bartolomé; allostña pa' ñaña Tomás ñaña Mateo ñeñt cobraye't acheñenesha' quelle ñeñt gobiernocop; allostña pa' Jacobo ñeñt Alfeo puechemer, allostpa' ñaña Tadeo. ⁴ Allostña pa' ñaña Simón ñeñt cananistanesha' ñeñt nanac torratse't pa'netsrecop, allostpa' ñaña Judas Iscariote ñeñtcha' pomuerre' tsapaonet Jesús.

Allempo Jesús pa' llesensan pueyochresha' o'ch ahuanemyeset allcha' serrpare'tyeneta'

(Mr. 6.7-13; Lc. 9.1-6)

⁵ Ñeñtña charrasheña puechena epsheña llesensanet attoch ahuanemyeset pa'namen anetso'mar, ñeñt pa' atet otapanet:

—Amach arrenta setatsto all yecha'yena ñeñt ama judioneshayaye. Ñaña amach arrenta setatsto samario'marnesha' pa'netsro all yecha'yenet.

⁶ Arrcha'ña seta all yecha'yena israelena'tarnesha'. Ñetpa' e'ñe atet nentenanet ñerra'mrrate' carrneročno ñeñt paya'tyetsa.

⁷ Allcha' soñemyespa' seserrpare'tatyesnomanetcha' atetcha' sotyesnomanet: "Te'pa' o' cherr allempoch ayochreshattena Yompor ñeñt pue'ntaño'tsen."

⁸ Ñaña alla oterranerr pueyochresha':

—Ñeñt atsna'tyetspa' sa'crratyesnomanetcha', ñeñt rromayetspa' setantatyesnomicha', ñeñt osyen puetsarñatspa' sa'crratyesnomicha' attoch e'ñe cohuen entuerranet acheñenesha', sequechpatatyescha' ñaña oneñefečno ñeñt chorra'yenaya acheñenesha'. Sapa' e'ñe atta aparetos huomencñats atto es cohuen sorrtyaten Yomprecop, ñeñto'marña sapa'cho'ña e'ñech atta sapa'yesanet saña, amach secobratstaneto ñeñt atet o' sepa'yesanet.

9 'Ñaña o'ch notas: Ñerra'm o'ch sahuamapa' ama't puetallarrapa' amach sasha'tatsetnomo quelle. Ama't orotlullen, ama't huallatlullen, ama't cobretlullen amach sasha'tatsetnome. 10 Ama't e'ñe coñe'ta amach es sanmatsto allcha' sechopeñe'chyes, ama't sebolsa, ama't e'ñe epma seshtam, ama't sesapata, ama't secarra, amach sanmatsche tarro'mar ñeñtescha' torra'yetsapa' e'ñe pocte' rratyepasetcha'.

11 'Ama't erra'tsena anetser ama't ñaña all ama tama eñalle acheñ ñerra'm erra sechapa'chpa' chochña ñanom sa'pto'tyesosanet erro'tsente' cohuen acheña' allcha'ña sechapa. Allñapa' allcha'ña sa'posa tarrempohuach esempoch seserrerr ñaña allot. 12 Ama't erra'tsena pocoller allcha' sechapa, e'ñe sehuom'cha'teño' o'ch senamatosanet Yompor pa'nateña. 13 Ñetña ñerra'm e'ñe cohuen acheñret, Yomporñapa' a'natenanetcha'. Ñerra'm ama cohuenayaye acheñretpa' Yomporñapa' o'ch alla apuerres sa pa'nateña. 14 Ñerra'm erra anetsro ñeñt' allo'marnesha'ña ama cohuenaye' agapaseto tarro'mar ñetpa' amach mueneto o'ch e'mñotapaset ñeñt' atet seserrpare'ten, sañapa' o'ch sem'terrerr ñaña allot. Ñerra'm allempo sem'terrerrña ñaña allot, ñeñt'ña setco'tsa'yen pañe'te' patspa' choch sepa'shetca'tyesnomña setac. Attochña allo'marnesha'pa' o'ch seño'tatnomanet ñetpa' amaca'ye pocteye' entenaneoña Yompor. 15 Po'ño'ch te'pa' o'ch notas: Esemphuañen allempoch acrare'tetuerra allohuen acheñenesha'pa' añ anetso'marnesha' ñeñt'cha' ama cohuenaye' sagapaye te', ñetñapa' nanaccha' a'coñchatare'tterretña allempo. Ama't sodomo'marnesha' ñaña gomorro'marnesha' ñetpa' amach tama a'coñchatare'tterreto atet ñerra'm ñeñt' anetso'marnesha' ñeñt'cha' ama cohuenaye' sagapaye te'.

Allempo Jesús'pa' eñotatenan pueyochresha' chocmach eñall ñeñt'cha' e'moñe'tahuet

16 'Ñaña sapa' ñerra'm o'ch ahues te'pa' seño'chcha' po'ño'ch chocmach eñall ñeñt'cha' se'moñe'te' ama't sapa' amach cho erro't sepenaneto ñet. Ñeño'marña notenes te'pa' o'ch nemñas e'ñech attes ñerra'mrrate' carrnero o'ch ahuo' allo'tsa'yen ma'yarro'chno. Ñeño'marña sapa' seño'ta'tach atet ñerra'm shecheppa' atarr eñote'. Tarraña sapa' amach erro't a'pañso atet ñerra'm yeppa' ama erro't a'pañeyaye. 17 Ñeño'marña notenes: Seño'ta'tach tarro'mar acheñenesha'pa' erro'tuanencha' perrset, sanmare'tterrach añcha'tare'tesho allcha' otteñe'cherrset. Nalle'tyerrsetcha' all judionesha' po'prahuo'mar. 18 Po'ño'ch e'ñe no'marpa' rremanaterrsetcha' attoch

mueročhtatyerrset, sanmaretterrach añcha'taretesho ñaña allo'tsa'yen ñeñt nanac añcha'taretečno allcha'ña sa'meta'yesosnancha' neñoñ. Ñaña arrcha' sa'meterannan neñoñ allo'tsa'yen ñeñt ama judioneshayaye. ¹⁹ Ñaña allempoch sanmaretetyesapa' ama't mameshapa' amach cha sellca'psatsto, amach sota'psa'tatsto: Errotuachca'ye notoste' añcha'taretesho ñerra'm o'ch a'pto'tare'tapuen. Tarro'mar allempopa' Sompurcha'ña Puecamquëñ señotatyese'ña all. ²⁰ Attoña amach e'ñe sochaya se'ñora'yesoso, añcha'ña Sompurcha'ña se'ñoratyese'.

²¹ 'Allempoch atet perrsetpa' ñeñt e'ñe semo'nasheñ sepen ñato' ñeñtachca'ye sepomuerre' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparño'tpa' o'paterranach pamo'mte' attoch muetsatater. ²² Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr mueročhtaterrsetpa' tarraña esesha'ch e'ñe ahuanta'huanmue' e'ñe pueyemteño'ten na, ñeñtcha'ña a'queshpatarettertsa. ²³ Ñerra'm esempo e'moñe'terrset ñeñt anetsro allo'tsenes o'ch seyetañpsanetpa' o'ch sahanma po'poñ anetso. Allpa'cho'ña ñerra'm attecma e'moñe'terrseterrpa' o'ch seyetañperraneterr o'ch sahanerrerr ñaña po'poñ anetso. E'ñe po'ño'ch notenes: Amach e'ñe sepa'huena' ora allohuen israelnesha' pa'netsropa' na Ñeñten Acheñetosets o'ch alla norrterra.

²⁴ 'Ñaña o'ch noterrser: Ñeñt yochreshatpa' ñerra'm e'moñe'teññañet po'maestror, e'ñech attecma e'moñe'terrñañet ñaña ñeñt pueyochresha'čno pen. Ñaña ñeñt ñañretso'yets ñerra'm e'moñe'teññañet pamo'mte' e'ñech attecma e'moñe'terrñañet ñaña pueñañresha'čno. ²⁵ Ñeñt yochreshatso'chnopa' e'ñepa'chña pocte' entyeñet o'ch atet a'paretterret atet ñerra'm po'maestror. Ñaña ñeñt ñañretso'chnopa' e'ñepa'chña pocte' entyeñet ñaña o'ch atet a'paretterret atet ñerra'm pamo'mte'. Ñaña señoche'pa'ch ñerra'm na puesochatse'teño'tetan otenet napa' oneñe'to' pomporen ñeñt otenet Beelzebú, sapa'cho'ña ellochña atarr sochatse'terrset. Ama't na ñeñten e'ñe samo'mte' sepenen atto atarr sochatse'tennet na, sapa'cho'ña ñeñtes nechemerasha'čno nepen, elloña sapa' atarrcha' nanac sochatse'terrset saña.

*Atto amach yemcha'tatsto ñeñtcha' muetse' yechets,
añcha'ña yemcha'na't Yompor
(Lc. 12.2-9)*

26 'Ama't atteñpa' tarraña sapa' amach semcha'tatstaneto tarro'mar yapa' yeñoteñ allohuen ñeñt' atto e'ñe a'nahua shecare'tyenet te', esempohuañenñapa' a'meñamñsaretterretcha'. Ama't allohuen ñeñt' e'ñe a'nasotyenet te'pa' esempohuañenñapa' e'ñech eñotatarefetuerret. 27 Ñeñto'marña ama't erra'tsena neserrpare'tatyenes te' e'ñe saptoche', esempoña sapa' e'ñech señotatuer ora allohuen acheñenesha'. Ama't erra'tsen ñeñt' atet neserrpare'tatyenes te' e'ñe a'nahua o'pono pocollo, esempoña sapa' seserrpare'terrcha' allcha' e'ñe cohuen e'muerres allohuen acheñenesha' atet ñerra'mrrate' enot seserrpare'ten shelletot. 28 Amach aña semcha'tatsto ñeñt'cha' semtse'. Tarro'mar añach muetsonaset sechets, secamquëññapa' amach errotenot muetsonaseto. Añcha'ña semcha'na't Yompor tarro'mar ñerra'm ña muenatspa' e'ñe ña po'huamenco'tpa' o'ch a'chencatonay ye'chets yecamquëñpa'cho'ña o'ch a'chencatonay coñcha'puetso all parraren tso'.

29-31 'Elloña te'pa' napa' o'ch notas: Chocmach seyemcha Yompor, po'ño'ch ñapa' ñach secuamñpene'. Ama't otetollesha'pa'cho'ña chocma cohuañpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset epa otetollesha'pa' ñeñt'pa' ama tsa'teyaye, e'ñe puetallarratolla centavo tsa'tena. Tarraña ama't atteñpa' ama't patrra otetoll amach rromo attoch shora'nom ñerra'm ama Sompom muenataye atet. Ñeñto'marña notenes: Ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasotpahuo Jesucristo acheñesho'mar

(Lc. 12.8-9)

32 'Elloña napa' o'ch noterserr: Allohuen ama't erra'tsencha' ñeñt'cha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotuerraneto naña Nomporesho all pue'ntaño. 33 Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nomporesho all pue'ntaño.

Atto Jesúsapa' orrtatosan e'ñe ño'mar elloptanna'teñets

(Lc. 12.51-53; 14.26-27)

34 'Sapa' chate' sotenapañ añecop'te' nohuapa o'ch e'ñe cohuen namo'tstanna'tatera acheñenesha' arr patsro. Ñeñt'pa' ama atteyaye. Añecpa'naña nohuapa allochñapa' e'ñe no'marpa' acheñenesha'ñapa' o'ch

atta elloptanna'tyeset. ³⁵⁻³⁶ Ñehua, ñeñt noten te' ama't ñeñt e'ñe pamo'tsna'tarecmuet ñato' no'marach e'moñe'tannerret. Tarro'mar ñato' eñallcha' ñeñtcha' name'ñerraya, pamo'tshetñapa' ñato' amach ame'ñerrneto. Ñeñto'marña notenes e'ñe no'marpa' ñato' puechemerpa' o'ch epatare'tenan pompopor, ñaña ñato' puechoyorpa' o'ch epatare'tenan pachor, ñaña ñato' ñeñt pa'to'ñen pen o'ch epatare'tenan ñaña pa'so'mue.

³⁷ 'Tarraña ñerra'm erra'tsencha' nemorrenterrayañ ñerra'm ñetña pompورا atarr morrentenet ñamet pachoret ñeñtña acheñerpa' ama e'ñeye' pocte' nenteñe attoch neyochresha' neperranet. Ñaña po'potantañ ñeñtcha' nemorrenterrayañ ñetpa'cho'ña ñerra'm puechemera atarr morrentenetpa' ñaña po'sñet ñeñtpa'cho'ña acheñerpa' ama e'ñeye' pocte' nenteñe attoch e'ñe neyochresha' neperranet.

³⁸ Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocueta attoch coterrnet e'ñe poctacma, nañapa' amach pocte' nenteñe o'ch neyochresha' neperranet. Ñeñtpa' añ toma'ntena atet ñerra'mrrate' cho sechechnen secorsoch alloch semueroçhta samña. ³⁹ Tarraña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet nocop ñeñt atet muenenet ñeñt e'ñe ñocueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

Ñeñtcha' apuerrey Yompor attoch atarr coshaterrey
(Mr. 9.41)

⁴⁰ Jesús pa' alla otterranerr pueyochresha':

—Ñerra'm o'ch sahuanna, ñerra'm esesha'ch e'ñe cohuen sagapue' sa, ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellensene' na. ⁴¹ Ama't erra'tsena ñeñt e'ñe cohuen aguëne' ñeñt a'mtene' Yompor po'ñoñ tarro'mar ñapa' Yomporca'ye po'ñoñ a'mten, ñeñtña acheñer ñeñt e'ñe cohuen aguëne'pa' Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt a'mtene' po'ñoñ. Ñaña ama't erra'tsena ñeñt e'ñe cohuen aguëne' ñeñt e'ñe pocte' es orrtatyets Yomporecop tarro'mar ñapa' Yomporecopca'ye e'ñe pocte' es orrtatyen, Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt e'ñe pocte' es orrtatyets Yomporecop. ⁴² Ñaña añ ñeñt ama esoshe'maye' enteneto, erra'tsencha' apapue' ñeñtcha' orros tarro'mar ñapa'

noca'ye neyochresha', ama't coñe'ta oñ apapet, napa' po'ñoçh o'ch notas, Yomporcha'ca'yeña apuerrahuetña ñeñtcha' atarr coshaterrahuet.

11

Juan ñeñt apatañtatse'tpa' mueñan pueyochresha' Jesúsesho (Lc. 7.18-35)

¹ Yeçhatuahuan Jesús pueyochresha' ñeñt çharrasheña ñeñt puechetsa epsheña atetcha' pa'yeset, allempoñapa' ahuo' ñaña Jesús allot yeçhatyesets; serrpare'tatyesan acheñenesha' all pa'netsreto.

² Añña Juanpa' allo'tsena all yottampeñet. Allñaapa' o' e'mare'tan Cristo atet pa'yena, allenta mueñan pueyochresha' Jesúsesho. ³ Ñetña o' çhapuet allpa' atet otoset:

—Ñato' pãte'ña ñeñtep e'ñe po'ñoçh Cristotets ñeñt atarr yecuen ahuatoteñ o'ch huapa. Ñerra'm amate' ñeñteyaypepa' o'ch e'ñe potey allochñapa' añcha' yecua' po'psheñeñ ñeñtcha' huapatsa ñeñt e'ñe Cristo.

⁴ Jesúsñapa' anapanetpa' atet otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentyesuennana' arr ñaña ora allpon ñeñt atet se'myesuennana' arr. ⁵ O'ch e'ñe seserrpare'tatuer ora ama't atto aporo'yeteçhnopa' te'ñapa' o' e'ñe necuatyesuerranet ñaña ñeñt checa'repayetspa' te'pa' o' e'ñe chope'chyesuerret cohuen, ñaña ñeñt a'ptsaresyen leprapa' te'ñapa' o' e'ñe a'cohuentataretetuerret ñamet, ñaña ñeñt paquetneshaçhnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt rromayets te'ñapa' o' alla atantataretetuerret, ñaña ama't ñeñt huocchañneshaçhno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

⁶ Jesúsñapa' alla oterrannerr Juan pueyochresha':

—Ñaña ellonetpa' o'ch sotuer Juan ñeñt atet notenes, atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

⁷ Allempoña Juan pueyochresha'pa' o' ahuanerret. Jesúsñapa' alla serrpare'taterrannerr acheñenesha' ñeñt atet pe't ahuaña Juan, ñeñtapa' atet otanet:

—Ahuaña allempo sete't amayo all serrpare'ten Juan, sapa' amaca' añcepaye' sete'teña all o'ch sentena' amuesma' atet a'yma'tateñ mōrr. ⁸ Ñaña amaca' añcepaye' sete'teña all o'ch senteña' ñeñt atarr coçhnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçhnesha'tetsa pa'shtam. Yapa' yeñoteñ arrña

yentenña ñeñt atarr coñnesha' chorra'yenaya shetamuets añcha'taretepahuo. ⁹ Sapa' añecopca'yeña sete'tña amayo o'ch senteña' all ñeñt po'ñoçh a'mtene' Yompor po'ñoñ. Napa' o'ch notas: Juanpa' atto atarr sherbenan Yomporpa' ello metana'tuan allohuen ñeñt atto a'mtenet Yompor po'ñoñ. ¹⁰ Tarro'mar Juanpa' ñocop eñose't Yompor ahuať. Ñehua, allempopa' atet otne't na ñeñt atet'cha' p'osa Juan nocop esempoch huapa, ñeñtpa' atet anaret ñoñets ahuaťoteñ: Papa' peñoche'pa'ch napa' o'ch nemñona'p puesheñarr ñeñt'cha' ñanom otatsa ñeñt'cha' p'a'cohuentatyese' p'ocop allcha' p'õñmos.

¹¹ Ñeñto'marña na te'pa' e'ñe po'ñoçh atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese't ahuaña acheñenesha' Yomporecop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor ñeñt pue'ntaño'tsen atto te'pa' ayochreshattena ña, ñeñtña acheñerpa' atarrca'ye sherben, ello metanenan atto atarr sherben Juan.

¹²⁻¹³ Tarro'mar añña ñoñets, Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yese't Yompor po'ñoñ, ñetpa' ñeñtaña serrpare'tete't attoch atarr ayochreshatterra Yompor tarrempohua allempo orrtosa Juan. Ñaña allempoteñ serrpare'tatosanet Juan ama't teme'ttsen e'ñe po'huamencocma serrpare'tatyese't atet penaña Yompor po'cohuenña attoch ayochreshatterra ña ñeñt pue'ntaño'tsen. Ama't atsrre'mñañnesha'pa' e'ñe ñeñta atarr muenet pueyochrocmañen. ¹⁴ Ñaña ñerra'm po'noçh same'ñyañcha' Juanpa' ñaca'yeña Elíasoterrets ñeñt atarr secuen ñeñt'cha' seherroya. ¹⁵ Allohuenes ñeñtes ne'mñotene' neñoñ, çhaponasepa'chña seyoçhro ñeñt atet notenes.

¹⁶⁻¹⁹ Jesúsñapa' atet oterraner acheñenesha':

—Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtase't ñapa' ama rrane'te ñeñt yocrrañ yepen allohueny, ama orrane'te ñeñtecma yorren allohueny. Ñeñto'marña ñapa' çha sotyese't çho'te' chorreña oneñet; ama't e'ñe mameshapa' ama pocteye' señche'te. Te'ñapa' o' norrtorra ñaña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñañen ñaña atarro'

orrarñaten napa' año'chña e'ñe neyemuetyena ñeñt atarr ochñatenesha' ñaña ashcarñatechno ñeñt atarr cobra'yene' acheñenesha' quelle. Tarraña ama't atet sepennoñpa' Nomporna e'ñe eñotene' ñeñt po'ñoçh atarr sherbets ñocop. Ñaña allohueney ñeñtey e'ñe puechemerasha' pohueney ñeñtey co'tene' ña poçtañña yapa'cho'ña e'ñe yeñotuenña ñeñt po'ñoçh atarr sherbets. Ñeñto'marña yorrtatyeññañ ñeñt cohuen enten ña. Sañapa' ama't e'ñe mameshapa' ama acshatpahuoyayso, e'ñe attes ñerra'mrrate' cheshaneshash' ñeñt chocma po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o'yerequerca'hua allo yocshame'tenapa' sañapa' amaña seshe'rarampenye; allotpa' ama't o'yepoctorare'tua ñeñt ya'chpeñtsorech allo yellcanrrortenapa' sañapa' amaña sellcapretenyo."

*Atto Jesúsapa' eños epo'mar anetsocop all ama ame'ñyeto
(Lc. 10.13-15)*

²⁰ Allempoña Jesúsapa' cha muene' che'ptare'tyenan acheñenesha' all pa'netsreto all epaye' entatyenanet po'partsoña ahuañmo'chofeñ. Ama't entatyenanetañ po'partsoña ñetñapa' ama es co'tape'chenaye ello cohuen Yomporecop, ñeñto'marña allpa' cha muene' che'ptare'tyesanet. Ñeñtpa' atet otyesanet:

²¹—Nanaccha'llequëñtso'tsa'yenes coraziño'marneshacha', nanaccha'llequëñtso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soçtape'cherroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' co'tape'cherretañ e'ñe cohuen Yomporecop. Ñetpa' attoch e'ñe orrtetañ cha llecatenanet po'chñaret, cotnashe'mach chorra'yetañ, tsapñach epachshema'tyenetañ all anorrcha'tyenet puellquëño'tet. ²² Ñeñto'marña te'pa' notenes: Esemphuañen allempoch acrare'tetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatare'tterretoña allempo. Coraziño'marneshacha' ñaña betsaido'marneshacha' saña allempopa' atarrcha' a'coñchatare'fes. ²³ Ñaña sa capernaumo'marneshacha' chate' sotenapañ atto e'ñe cohuen sentyena sañeña, Yomporna'pa' allentach a'tapaterres pue'ntaño. Ñeñtpa' amachca'ye atteye' perrsoña Yompor,

allachca'ye huapore'terres o'pono coñcha'puetso all parraren tso'. Tarro'mar ama't atarr norrtatonaseñ nepartsoña sesho, sañapa' amaña semnoña o'ch soctape'cherr cohuen Yomporecop. Ñerra'm arrcha' ñanom norrtatañ ahuatoteñ nepartsoña sodomo'marneshesho ñetpa' allorocmate' coñape'cherretañ cohuen Yomporecop. Allempopa' amate' a'poyatatare'tterretañeña pa'netser. Orate' allo'tsenaraña. ²⁴ Ñeñto'marña te'pa' notenes: Esempohuañen allempoch acrare'tetuerra allohuen acheñenesha'pa' sodomo'marnesha' ñetpa' amach tama a'coñchatare'tterretoña allempo. Capernaumo'marneshacha' saña allempopa' atarrcha' a'coñchatare'tes.

Jesúspa' atet oten, e'ñe same'ñeño'ten na, napa' na'huaña'mperrescha' ñeñt atarr amuerochtatañ sentyen
(Lc. 10.21-22)

²⁵ Allempoña Jesúspa' ma'yochenana Pompor, ñeñtpa' atet oten:

—Na Apacha' o'ch na'ye'chochtatonap, p'apa' p'a ñeñtep atarr ayochreshattetsa pe'ntaño ama't ñaña arr patsro. Na'ye'chochtatonap tarro'mar ora añechno ñeñt pecohuenña pepen, ñeñtpa' ama arreye' pechapateñe pueyo'chro ñeñt atarr eñotañ entyetsa. Papa' aña pechapaten pueyo'chreto ñeñt ama eñotañeye' entyetso. ²⁶ Tarro'mar Apa e'ñe pemuereño't ñeñtpa' atetña e'ñe pocte' penten p'a. Arrpa' allohua ñeñt atet ma'yochenana Pompor.

²⁷ Jesúspa' alla o'terranerr acheñenesha':

—Nomp por allohuen po'cohuenña e'ñe eñotatuenen. Na ñeñten Puechemerenpa' ama po'ño'ch eseshaye' neñotenaye, ñap'taña Nomp or e'ñe eñotenen. Nomp orpa'cho'ña ama po'ño'ch eseshaye' eñotenaye nap'taña na ñeñten Puechemeren e'ñe neñoteñ Nomp or, ñaña erra'tsencha' ñeñt e'ñe pocte' nenten na ñeñten Puechemeren ñeñt'ña'pa' o'ch neñotater Nomp or. ²⁸⁻³⁰ Sehua'cha'ta nesho allohuenes ñeñtes nene' seyo'chro ñeñt atarr amuerochtatañ sentyen. E'ñe same'ñeño'ten na, napa' na'huaña'mperrescha' ñeñt atarr amuerochtatañ sentyen. Napa' aña'ña nenerrnas ñeñt amach cha muerochtaterrso; ñeñt'ña sapa' e'ñech pocte' senteñ. Attochña sapa' señotenen napa' atarr nemuerensa ama atsrre'mo'chen entño'eno ama't e'ñe puesheñarrocpa. Ama't e'ñe mamesha ama aña'ye' ne'nen ñeñt e'ñe nocpa. Attochña e'ñe cohuen nocshatterres seyo'chro ama't e'ñe secamquëño'huen.

12

Allempo Jesús pueyochresha' taso'tam̄pesyesnomuet trigo añe yetro allempocma amesen judionesha'

(Mr. 2.23-28; Lc. 6.1-5)

¹ Allempoña çherrerr pam̄tarr allempo çhocma amesen judionesha'. Allempoña Jesús^{pa'} arr oñem chetso'mar epuet pueyochresha'çhno. Allempo oñenet pueyochresha'ñapa' e'ñe pa'chporrñoŋetpa' taso'tam̄pesyesnomuet puechm̄a'tets trigo o' rra'yeshomet. ² Fariseonesha'ña ñeñt̄ entahuet atet p̄a'nmueta' ñetñapa' allenta otyeset Jesús:

—Pecue'ñaca'yeña añ pueyochresha' taso'tam̄pesyesnomuet trigo; atet penet ñeñt̄ ama pocteyaye o'ch atet yeḡa taru-asats añe yetro tarro'mar te'pa' añe yetro ñeñt̄ atet anaret̄ ahuaŋtoñ allempocmach yamesen.

³ Jesúsñapa' atet otanet:

—Sapa' ama'trra selleyareña ñeñt̄ atet p̄a ahuaŋ David allempo cheporra'nma epuet ñaña allohuen ñeñt̄ coŋene'.

⁴ Ña allempopa' be'tosos Yompor pa'paclo allñapa' rrosan pan ñeñt̄ atma'ntatareŋ atet ñerra'mrrate' ñeñt̄ nenet all Partso-cop. Ñehua, ñeñt̄ panpa' ama pocteyayñe o'ch rros David ñaña ñeñt̄ epuet. Ñeñtpa' añach ñapueŋ rrene' cornaneshachno; ñeñtpa' atet anuareŋ judioneshacop. ⁵ Ñaña ama't selle-yareña ñoñets ñeñt̄ atet anaret̄ ñeñt̄ Moisés po'ñoñ all oten atet pena ñaña cornaneshas' Parets pa'paclo. Ñehua, ñet puesherbeñoŋetpa' ama ameseneto añe yetro allempocma yamesen. Ñetpa' ama't atet penetpa' Yomporñapa' e'ñe pocte' entenamet. ⁶ Napa' o'ch notas: Napa' ñeñten arro'tsenen nanac nesherb̄en ello nem̄taneñ ñeñt̄ atet sherben Parets pa'paquell. ⁷ Ñehua, añ ñoñetspa' ñeñt̄ña atet ote't Yompor ahuaŋ: “Napa' ama e'ñe aña cohuen nenteno o'ch sapuenen sayara ñeñt̄ semtsen nocop. Añe'ñaña atarr cohuen nenteno o'ch semuereña allohuen samo'tsesha'.” Ñerra'm çho çhennasañ seyoçhro ñeñt̄ atet oteney Yompor, amach erroŋ sotatscheña ama't erra'tsena acheñer ñeñt̄ e'ñe pocte' enten Yompor. ⁸ Ñeñto'marña te'pa' o'ch notas, na Ñeñten Acheñetosets ñeñten allsensareten, naca'yeña atet otets este' poctetsaña ñeñt̄cha' atet yeḡa añe yetro allempocma yamesen.

Allempo Jesús^{pa'} a'crraterran ñeñt̄ chelletsas pot

(Mr. 3.1-6; Lc. 6.6-11)

⁹ Metuerrerr Jesús alloŋpa' be'tosuerrerr judionesha' po'prahuo. ¹⁰ Allñapa' allo'tsen puesheñarr yacma ñeñt̄ çha chellena pot. Fariseonesha'ñapa' allenta a'p̄to'chet:

—Añe yetro allempocma yamesenpa' ta'm ¿pocte'te' penteñ o'ch pa'crrateñerr acheñ?

Tarro'mar atet a'pto'teñet allochñapa' esheccha' otteñe'chet.

¹¹ Ñaña'pa' atet otanet:

—Sapa' ñerra'm cho shora'nen ama't puemocarra secarneror añe yetro allempocma yamesen, ama'tcha'ña allenta sechtere ama't ñeñte yetro allempo yamesen allohueney.

¹² Ñehua, acheñpa' elloca'ye metanenanña ñeñt atto sherben carrnero. Ñeñto'marña napa' notenes e'ñe pocte' o'ch atet yepa ñeñt cohuentetsa ama't añe yetro allempocma yamesen.

¹³ Allempoña Jesús'pa' atet otan yacma ñeñt chelletsa pot:

—Te'pa' o'ch notaḡ petapuerr ḡot.

E'ñe otue'pa' ñaña'pa' allentepa'tcha' tapuerran pot, e'ñe allorocma cohuenterra pot e'ñe attecmaterr ñerra'm po'pshenitañoḡ pot. ¹⁴ Fariseonesha'ña cha'nmaçherretpa' cotape'chatanna'tyesnerret, atarr o'pateñet Jesús attoch muetsatachet.

Atet ote't Yompor ahuat Jesúsocop

¹⁵ Jesúsña eñotanetpa' ahuer allot. Shonte' acheñenesachno co'ta'huanereter. Allohuen ñeñt atсна'tyetspa' e'ñe a'crratyesseranet. ¹⁶ Atet otyesamet:

—Po'ñoçh amach esesha' sotaḡsa'tatsto napa' na ñeñten Yompor Puechemeren.

¹⁷ Ñehua, ñeñtpa' atet pa' allochñapa' attoch etsota Isaías po'ñoñ ñeñt a'mtaye't Yompor po'ñoñ, ñeñtpa' atet ote't Yompor Puechemerecop ñeñtcha' Cristoterrets:

¹⁸ Añmapa' ñeñtcha' atarr torrerrtsa nocop, ñapa' ñeñt nenen ñeñtcha' atarr sherberrets. Ñapa' ñeñt atarr nemorrentena ñeñt e'ñe nocshatene'. Ñapa' ñach ahua-mencat neperr necamquëñoḡ, ñach eñotaterre' allohuen pa'namen acheñenesha' ama't ñeñt ama judione-shayaye. Añcha' eñotateranet ñeñt e'ñe cohuen ñoñets attochña e'ñe pocte' nentuerranet.

¹⁹ Ñapa' amach es otnare'tyerraneto ama't mameshapa' amach ama'toçhetyerro. Ama't mameshapa' amach che'chame'tyerraneto ama't allecma chopeñe'chyen acheñenesha'.

²⁰ Ama't ñeñt mueroçhetyetsapa' ñapa' e'ñech muererranet. Ñeñtpa' atetcha' netma'ntacha ñerra'mrate' ama't puecharra cho'ne'ch tsopa'ne'pa' ñaña'pa' amach cha a'meyatere. Ñaña ñerra'm lampareñ cha muene'mayen ñeñtpa'cho'ña amach emayatere. Ñapa' amach cha es añcha'noçhtana'tyerro, tarraña

esempohuañenpa' e'ñech atta a'mchechatuerran ora allohuen ñeñt ama pocteye' enteno Yompor.

21 Ñeñto'marña allohuen pa'namen acheñeneshačno ñachña e'ñe yemuetuerret. Arrpa' allohua huañ atet ote't Yompor ñeñt quellquë't Isaiás.

Atto puesheña'tets oteñet Jesús ñapa' oneñeto' po'huamencot quechpatenanña po'potantañ oneñetečno acheñenesha'
(Mr. 3.19-30; Lc. 11.14-23; 12.10)

22 Jesúsapa' alla huapaterrñañeterr puesheñarr yacma ñeñt aporo'yef ñeñt chorrena oneñeñ cha opanatateñ. Jesúsñapa' a'crratañ, ñeñtña opanerpa' o' alla eñorerra, ñaña o' e'ñe cohuen cohuer. 23 Allohuenña acheñenesha'pa' atarr cohuanr-rorteñet, ñetñapa' atet otyeset:

—Ñato' añte'ca'yeña David po'mñreneñ ñeñtcha' Cristotosets.

24 Fariseonesha'ña allempo e'mare'chetpa' ñetñapa' atet otyeset:

—Atto quechpatatyenan oneñetečno acheñenesha' añaca'ye ahuamencat pene' Beelzebú ñeñt pompor pen allohuen oneñetečno.

25 Jesúsñapa' eñotanet ñeñt atet cotape'chatse'tyenet pueyochreto ñocop ñeñt atto otyeñet ñapa' oneñeña pompor po'huamencot quechpatatenan oneñetečno acheñenesha'. Ñeñto'marña ñapa' atet otanet:

—Ñerra'm puesheñarr añcha'taret elloptannena pa'cheñer e'ñe ñagattsetpa' e'ñech poctacma a'cllatanna'tuerret. Attecmach ñannerra ñeñt parro yeçheta paterr anetso, ñerra'm cho elloptannenet e'ñe ñagattsetpa' ñeñtña atto huomencatenetpa' ñeñtpa'cho'ña çhachca'ye huañerrets. Attecmach ñannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' ñeñtña atto huomencatenetpa' ñeñtpa'cho'ña çhachca'ye huañerrets. 26 Attecmach ñanna'ta ñaña oneñeñ pueyochreshačno ñerra'm oneñetečno e'moñe'tannenet, ñerra'm huapore'tannenet e'ñe ñagattseta amach errotenot allo'na atarr huomencatneneto. Po'ñoçh oneñetpa' amaca'ye huapore'tanneno. 27 Sapa' atet sotenen napa' Beelzebo' po'huamencot nequechpateññañ e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch quechpatachet oneñetečno acheñenesha', ñetpa'cho'ña amaña Beelzebú po'huamencoteye' quechpateñetoña oneñetečno acheñenesha'.

Ñetpa'cho'ña Yomporoña po'huamencot quechpateñetña oneñeñ. Ñeñtña o' eñotatas ñeñt atet sotenoñ ñeñtpa' amaca'ye po'ñoçh atteyaye. 28 Po'ñoçhca'ye Yompor e'ñe Puecamquëño't

ñeñña ahuamencat nepene' attot nequechpateñña oneñeñechno acheñenesha', ñeñtcha'ña señotate' te'pa' o' nechapatonas Yompor po'cohuenña ñeññ atto po'ñoçh atarr ayochreshattena ña.

29 'Ñehua, yapa' yeñoteñ ñeññ atarr ahuamencattetsa atto atarr ahuamencattena oneñeñ, ñañapa' e'ñe po'huamencot cohuamñpesyenan allohuen e'ñe cohuen ñeññ pa'paquëll p'a'yen. Tarraña ñerra'm esempo o'ch huapoña ñeññ atarr ahuamencatesha' ñeñtcha' metanose'ña po'huamenc atet ñerra'm na Nompör, ñeñtcha'ña rromose' o'ch huancos, allochñapa' o'ch be'tosos all ñeññ pa'paquëll p'a'yen o'ch e'ñe puerratañpsos ñeññ allpon o'patyena ña.

30 'Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeññña acheñerpa' çhaca'ye epatare'tennan ñeññ atet netorra'yena na. Ñeñtpa' o'ch netma'ntatasa atet: Ñerra'm esesha' ama na'yapachapretenaye ñeññ na'yapachen na, ñeññña' cha a'parratse'tamñpenen a'yenet.

31 'Ñeñto'marña te'pa' o'ch notas: Allohuen pa'namen sosya'tsañechno ñeññ ama pocteye' enteno Yompor ama't ñaña achmãare'tanna'teñets ñeñtpa' a'pretna'po' nenteñ.

32 Ñaña ñerra'm esesha' nesasene' na Ñeñten Acheñetosets ñeñtpa' a'pretna'po' nenteñ. Tarraña ñerra'm esesha' añ achmãare'teññañet Parets Puecamquëñ ñeññña' amaca'ye a'pretna'pahuoye' nenteñe. Ñeñtpa' amach a'pretna'pahuoterro e'ñe tayoteñ errponohuañen.

Allohuen acheñ ñeññ e'ñe po'ñoçh cohuen acheñer, ñetñapa' añcha' orrtatyenet ñeññ e'ñe cohuenare'

(Lc. 6.43-45)

33 'Ñehua, yeñoteñ allohuen acheñ ñeññ e'ñe po'ñoçh cohuen acheñer, ñetcha'ña orrtatenet ñeññ e'ñe cohuenare'. Tarraña po'potantañ acheñenesha' ñeññ po'ñoçh ama cohuenayaye ñetñapa' añach orrtatenet ñeññ ama cohuenayaye. Ñeñtpa' atetcha' netma'ntaterra: Ora allohuen ñeññ e'ñe cohuen narmetsoch pue'merpa'cho'ña e'ñech cohuenare'. Añña po'pchañ narmetsoch ñeññ ama cohuenayayepa' pue'merpa'cho'ña amach e'ñe cohuenayaye. Ñeñto'marña attoña yeñoteñ erra'tsente' ñeññ e'ñe cohuenare' narmetsoch ñaña ñeññ ama cohuenayaye narmetsoch, pue'merotña e'ñe yechme'tenanet. 34-35 Sapa' ama cohuenayayso. Cha sottena ñerra'm shechpa e'ñe sompor sepen allohuenes. Ñeñto'marña amach errotenot señoso cohuen tarro'mar sapa' po'ñoçhpa' ama cohuenayayso. E'ñe atet atarr

soctape'chatse'tyen seyočhro ñeñt̃ ama cohuenayaye, attotca'yeña señosatse'tyen. Ama't erra'tsena acheñer ñeñt̃ e'ñe po'ñočh cohuen ñapa' añcha'ña orrtatyen ñeñt̃ e'ñe cohuenare' cotape'chen pueyočhro tarro'mar pueyočhroña all cotape'chenan shonte' ñeñt̃ e'ñe cohuentetsa. Tarraña po'poñ acheñer ñeñt̃ po'ñočh ama cohuenayaye, ñapa'čo'ña añach orrtatyen ñeñt̃ atet cotape'chen pueyočhro ñeñt̃ ama cohuenayaye tarro'mar pueyočhroña all cotape'chenan shonte' pa'namen sosya'tsañ. Tarro'mar ñerra'm shonte' yoctape'chen yeyočhro ñeñt̃ cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yoctape'chen ñaña yeyočhro ñeñt̃ ama cohuenayayepa' ñeñtpa'čo'ña e'ñech ñeñta yemnen o'ch yeserrpare'tyen. ³⁶ Po'ñočh napa' o'ch alla noterrserr, esempohuañen allempoch acraretetuerra allohuen acheñenesha'pa' allohuen ñoñets ñeñt̃ atta otatse'tyen acheñenesha' ñeñt̃ña'pa' a'metatyeretcha'. ³⁷ Tarro'mar ñerra'm e'ñe cohuenare' seserrpare'tyen te' Yomporñapa' e'ñech pocte' entuerrnas señoñ allempo. Tarraña te'pa' ñerra'm čha señosatse'tyen ñeñt̃ña señoñerpa' ñeñtachña secoñchaterre' allempo.

Atto Jesús'pa' otan acheñenesha' ñeñt̃ ama cohuenaye' cotape'chetso ñetñapa' čhocma e'nenet partsoteñets
(Mr: 8.12; Lc. 11.29-32)

³⁸ Allempoña allponsheña ñeñt̃ atarr etsotayenayeñ ñoñets ñeñt̃ atet anaret epuet ñaña allpon fariseonesha' ñetña e'ñe puehquëñoťetpa' atet ochet Jesús:

—Yapa' Maestrocha' yemneñ o'ch porrtatonay peparsoña ñeñt̃cha' yeñotate' p̃apa' po'ñočhte' Parets Puechemerep̃ ñeñtepte' Cristotosets.

³⁹ Ñaña'pa' atet otanet:

—Acheñenesha' ñeñt̃ corra'yetsa te' ñetñapa' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otennet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahuať nínivo'marnesha' allempo a'mítane't Yompor po'ñoñ. ⁴⁰ Ñehua, yeñoteñ Jonás allempopa' allo'tsena cacacotmo ma'pamuet, yeťo ama't ñaña tsapo ñeñt̃ añecmuen cac. Atetcha' neperra naña Ñeñten Acheñetosets, napa'čo'ña nema'pamuetcha' o'pono e'ñe allohuanen patso, yeťo ama't ñaña tsapo. Ñeñt̃cha'ña eñotaterrahuet atet penaña ñeñt̃ huetsa Yomporeshot. ⁴¹ Tarro'mar ahuať allempo serrpare'tatane't Jonás nínivo'marnesha', ñetñapa' allempocma cotape'cherret e'ñe cohuen Yomporecop. Te'ña arr seshopa' allo'tsenen na

ñeñten ello metanene' ñeñt atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñto'marña esempohuañen allempoch acraretetuerra allohuen acheñenesha' ñeñtña nínivo'marnesha' ñeñt e'ñe cohuen cotape'cherrets Yomporecop ahua't, ñetpa'cho'ña orrterretcha', ñeñtcha'ña señotaterre'ña sapa' ama't mameshapa' ama pocteyayeña ñeñt atet sepa'yese't tarro'mar ama soctape'cherro ello cohuen Yomporecop. ⁴² Ñaña te'pa' o'ch neyerpatasa ñeñt atet pa ahua't puesheñarr coyanesha' ñeñt amcha'tarettatset atarr bachayo allohuanen pats sa'ponet. Ñeñtña coyanesha'pa' allotet on o'ch e'mñotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten naña, ello nemtaneñ atto eñotañte't Salomón. Tarraña sañapa' amaña es sotapoteno. Ñeñto'mar esempohuañen allempoch acraretetuerra allohuen acheñenesha', ñeñtña coyanesha' ñeñt e'ñe cohuen e'mñotatset ñapa'cho'ña orrterrach, ñeñtcha'ña señotaterre' sapa' ama pocteyayeña ñeñt atet sepa'yese't tarro'mar sapa' ama es same'ñe'te ama't e'ñe mamesha.

Atto Jesús'pa' eñotatanet ñato' oneñetpa' o'ch alla chorrerran-err acheñ allot'cha'nom ahuaña
(Lc. 11.24-26)

⁴³⁻⁴⁵ 'Ellonetpa' o'ch alla neñotaterrerr po'poñoneñ ñeñtcha' atet a'paretterra acheñenesha' ñeñt te'pa' ama e'ñeye' cohuen cotape'cheneto Yomporecop. Ñehua, oneñet ñerra'm esempo cha'nom acheñenesesho't, ñeñtña oneñetpa' o'ch auyes erraparen ama't amayo'mar e'nyese' po'psheñeñ allcha' ye'cherrerr allcha' e'ñe amesurrerr cohuen. Tarraña ñerra'm amach erra eñchepa' atet'napa' o'ch ot: "Napa' o'ch alla ahuerren nepacillo allot'necha'nom ahuaña." Atet'cha'cho' pa. O'ch alla ahuer allot'cha'nom ahuaña. Allña o'ch cherrpa' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen añño'tyesaret, tarraña amach eseshaye' ye'chetso all. Allempoñapa' o'ch alla ahuer allo'tsa'yen pamo'tsesha'pa' o'ch enana' po'poñ can'cherrsheña oneñet'etchno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch ye'chaprecha. Allohuenetpa' o'ch chorreñet ñeñt acheñer. Allempoña tsapatonetpa' allo'nach sen ñeñt sosyatnomuets huomenc. Elloch metanerran ñeñt atet patsetyese't ñenmañ. Po'ño'chcha'ca'ye atet perraña acheñenesha' ñeñt te'pa' ama e'ñeye' cohuen cotape'cheneto Yomporecop.

Allempo huapoña Jesús pachor ñaña pa'mo'nasheñnesha'
(Mr. 3.31-35; Lc. 8.19-21)

⁴⁶ Allempo atet eñorana'tenana acheñnesha'pa' o' huapa Jesús pachor epuet ñaña pa'mo'nasheñnesha'. O' chapuet allpa' ñetñapa' alla tomchenet a'yot. Añ muenenet ahuo'ch serrpare'tatoset. ⁴⁷ Allempoña puesheñarrpa' atet otan Jesús:

—O'ca'ye huapaña p̄achor ñaña pemo'nasheñnesha'. Ñetpa' a'yote'tsa'yenet, mueneñet o'ch serrpare'tatospet.

⁴⁸ Ñaña'pa' atet otan ñeñt otene':

—¿Ama't señoñe ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñ nepen?

⁴⁹ Allempoñapa' yochan pueyochresha'pa' atet otanet:

—Napa' añca'yeña ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñnesha' nepen. ⁵⁰ Ñehua, ama't erra'tsena ñeñt'cha' e'ñe atet pohuene' ñeñt atet muenen Nompōr ñeñt pue'ntañotsen ñeñt'ca'yeña e'ñe po'ño'ch nemo'nasheñ nepen ñeñtña noch nepen ñeñtña nachor nepen.

13

All toma'ntatanet Jesús ñeñt a'parre'tene' puerets
(Mr. 4.1-9; Lc. 8.4-8)

¹ Ñeñte yetropa' cha'nerrerr Jesús pocolotpa' anorruerr sa'patopño. ² Allñapa' emchorra'huererr shonte' acheñnesha' ñeñto'marña Jesús'pa' a'tap noñtopa' ahuanpes mame' allpononet allñapa' anorros noñto. Acheñnesha'ña allohuenetpa' alla tom'cha'tet sa'patopño. ³ Allñapa' esocmañen ye'chatyenan acheñnesha' pa'namen toma'nteñtso'chno. Ñeñt ñanompa' atet otanet:

—Ñeñtña a'parrene' puerets ñaña'pa' ahuo' allcha' a'parre'tyenana' puepuer. ⁴ All a'parre'tyeñ patanta'tetsñapa' alla chapyes toño'mar. Allñapa' hua'cha'tyesa ot e'ñe añyallmechuenana' puerets. ⁵ Po'poñe'chnoñapa' alla chapyes mapetro'meso'mar all ama tama eñalle pats. Ama nanac o'pono'tseno patso ñeñto'marña mametollapa' cheparesuañ. ⁶ O'ña enome'ta'muen atsrre'tpa' alla a'uyatuer. Ama er'cha'tena' ñeñto'marña alla hueya'huerra. ⁷ Po'potantañña pueretspa' alla chapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua' alla ca'matuerranña narmets alla a'cclatuer. ⁸ Po'potantañe'chno ñeñtñapa' arr chapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' ñeñtñapa' atarr aton ellomre'tyes—puecha'tetspa' charroch charra'

pue'llomer, po'pchañechnopa' pechapoch çharra' pue'llomer, po'pchañechnopa' ma'poch çharra' pue'llomer.

⁹ Allempoña Jesús pa' alla oterraneterr:

—Ñeñfes po'ñoçh ne'mñotene', çhaponasepa'ch seyoçhro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mr. 4.10-12; Lc. 8.9-10)

¹⁰ Allempoña pa' ponemña pueyochresha' pa' atet otoset:

—¿Eso'mare'tña peserrpare'teño'pa' atta es petma'ntatyenanet?

¹¹ Jesúsña pa' atet oterraneterr:

—Sa te'pa' Yomporña o' muenaterres attoch seño'terr ñeñt ama eñotpahuoyaye ama't ahuatoteñ ñeñt atet penaña Yompor po'cohuenña atto ayochreshattena ña pue'ntaño'. Tarraña po'potantañechnoña pa' ñeñt atta es pue'cha'yetsa, ñocpuetña pa' amach erro'tenot eñoterrñañeto Yompor po'cohuenña. ¹² Esha'te' o' çherranet pueyoçhreto ama't e'ñe allpona Yompor po'ñoñ elloña Yomporpa' allo'nach eñotatnenanet nanac shonte'. Tarraña essha'ña ñerra'm ama çhenaneto pueyoçhro tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyenetañ pueyoçhro ñeñtña pa' çhach puerratamperranet Yompor.

¹³ Ñeñto'marña ama't neserrpare'tatenanet toma'nteñtso, ñocpuetña pa' ama eñoteñetoña ñeñt atet netma'ntatenanet. Attoña ama't enteñetañ, ñetña pa' ama amnataretteneto o'ch es çhapanet pueyoçhreto. Ama't e'mueñetañ amaña çhenanetoña pueyoçhreto ñeñt atet yeçhateney Yompor po'cohuenña. ¹⁴ Atet penet ñetpa' te'ña pa' po'ñoçh o' etsotua Isaías po'ñoñ ñeñt a'mtaye't Yompor po'ñoñ ahuat. Ñeñt pa' atet ote't Yompor:

Ama'tcha' po'ñoçh e'mueñetañ ama't e'ñe ahuatapa' amach çhapanetoña pueyoçhreto. Ñaña ama'tcha' cho e'ñe es entenetaña pa' amach çhapanetoña pueyoçhreto.

¹⁵ Tarro'mar ñeñt acheñeneshar te'ña ñet pueyoçhretopa' nanac echarrtenet attoçhña amach es çhenahueto pueyoçhreto. Te'ña ñetpa' amach mueneñeto o'ch es e'mñotet taye'tote' es çhenahueto pueyoçhreto. Te'ña pa' amach mueneñeto o'ch es entet taye'tote' çherranet pueyoçhreto. Attoçhña amach es cotape'cherreto nocop ama't e'ñe mamesha attoçhña na'qeshpaterranetañ.

¹⁶ Allempoña Jesús pa' alla oterranerr pueyochresha':

—Saña po'ñoçhpa' atarr cosheñtso'tsenes sa tarro'mar atto o' senterrñañ Yompor po'cohuenña seclloyot te'ña pa' o' e'ñe çherrnasa seyoçhro. Ñaña atto se'muerrñañ Yompor po'ñoñ,

te'ñapa' o' e'ñe çhernasa seyoçhro. ¹⁷ Po'ñoçhca'ye notenes e'ñe ahuatoteñpa' shonte' ñeñt' a'mta'yese' Yomp'or po'ñoñ ama't ñaña ñeñt' e'ñe pocte' es pa'yestse't allempo, ñetñapa' atarr muenetañe't o'ch enterrñañetañ Yomp'or po'cohuenña ñeñt' o' senter sa te'. Tarraña allempo ñetpa' amaña eseshaye'ña enterrapaye Yomp'or po'cohuenña. Ama't atarr muenetañe't o'ch e'mñoterrñañet Yomp'or po'ñoñ ñeñt' o' se'muerr sa te'. Tarraña allempo ñetpa' amaña eseshaye'ña e'muerrapayeña Yomp'or po'ñoñ.

Arrpa' all eñotatanet Jesús ñeñt' toma'ntatenanet ñeñt' a'parre'tene' puerets

(Mr. 4.13-20; Lc. 8.11-15)

¹⁸ Jesúsñapa' alla oterranerr pueyoçhresha':

—Ñeñto'marña te' sapa' se'mñoten o'ch neñotatas ñeñt' atet yeçhateney ñeñt' atet o' netma'ntatua atet ñerra'mrrate' puesheñarr ñeñt' a'parrene' puerets. ¹⁹ Ñehua, añ puerets ñeñt' çhapyesets toño'mar, ñeñtpa' añ notenes acheñenesha' ñeñt' e'mñotenayeñ Yomp'or po'ñoñ ñeñt' atto ayochreshattena ña. Ama't e'mñotenetañ tarraña ama çhenaneto pueyoçhreto ñeñt' po'ñoçh atet oteney Yomp'or. Ñeñto'mar allorocmach huapa oneñetpa' o'ch alla puerratanperranet Yomp'or po'ñoñ e'ñe pueyoçhretot. ²⁰⁻²¹ Ñaña ñeñt' çhapyesets mapuetro'meso'mar ñeñtpa' añ notenes acheñenesha' ñerra'm esempo e'mñoteññañet Yomp'or po'ñoñ e'ñech allorocma pocsheñesha' aguëññañetañ Yomp'or po'ñoñ. E'ñech cohuen ame'ñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt' chepuets mapyo amach eñalle puereçh. Tsapatoneña ñerra'm o'ch huapanet topateñets ñeñt'cha' mueroçhtatahuet tarro'mar ñetpa' o' ame'ñeretañ Yomp'or po'ñoñ, ñetñapa' allorocmach alla queçhpuerretña Yomp'or po'ñoñ. ²² Ñaña puerets ñeñt' çhapyesets ajmo'mar, ñeñtpa' añ netma'ntatena po'potantañ acheñenesha' ñeñt' e'mñotenayeñ Yomp'or po'ñoñ. Ama'tcha' çhapanetañ pueyoçhreto, tarraña ñetpa' allo'nach senet e'ñech aña atarr cotape'chenet ñeñt' lleca'yenet arr patsro ñeñt' e'ñe ñocpueta. Añach muenenet o'ch esocmañen es eçhyenet, tarraña ñeñtpa' çhaca'ye shequënanet. Attoña ñetpa' amach errotent orrtatyesñañetoña ñeñt' e'ñe cohuen enten Yomp'or. Ñetpa' e'ñe atteta ñerra'm narmets ñeñt' cha' a'çllaten ajma' ñeñto'marña amach errotent me'teneto o'ch ellom're'tyeset. ²³ Ñaña añ puerets ñeñt' çhapyesets e'ñe cohuen patso ñeñt' e'ñe cohuen cheparsatspa' ñeñtña toma'ntenaya

po'potantañ acheñenesha' ñeñt e'mñotene' Yompor po'ñoñ, ñoñetspa' e'ñech cohuen chenonet pueyoçhreto. Ñetñapa' ñeñfet po'ñoçh orrtatyenet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr aton ellomre'tyets—pate'tets çharroch çharra' pue'llomer, po'poñpa' pechapoch çharra' pue'llomer, po'poñpa' ma'poch çharra' pue'llomer.

Atto Jesúsapa' toma'ntaterranet atet pena ñeñt a'parre'tene' ta'tllom e'ñe all a'parraret cohuen trigo

²⁴ Allempoña Jesúsapa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt atto te' ayochreshattena ña pue'ntañoç, ñeñtpa' atet pena ñerra'mrrate' puesheñarr yacma ñeñt a'parrene' cohuen puerets pa'mro. ²⁵ E'ñe cohuen a'parre'tuepa' tarraña allempo manrrenet allohuenet, e'ñe't a'nahua huapa ñeñt e'moñe'tene'pa' allñapa' ahuo't a'parre'tyesuenana' ta'tllom e'ñe all a'parraret cohuen trigo. Ahuo'tña a'parre'tueña'pa' o' ahuerr a'nahua. ²⁶ Narmetsñapa' o' cheparesua o' me'tyesuapa' allempoñapa' entet ñaña ta'te' o' chepares epuet trigo. ²⁷ Allempoñapa' huacha'ta pamo'mte' pa'taruasañer, ñetñapa' atet otoset: “¿Ama't, Nomporcha' cohuenaye' pa'parrenoña puerets pa'mro? Errotenofuañaca'ye o' chopña ñaña ta'te' all.” ²⁸ Ñañaapa' atet otanet: “E'ñeca'ye cohuen na'parraña nepuer all. Ñeñt ne'moñe'tene'pa' ñeñt'e'ca'yeña o' atet pa'mpsen.” Pa'taruasañerñapa' atet ochet: “¿Ama't pemno o'ch ahuey o'ch ya'mare'tuerra'ña ta'te'?” ²⁹ Ñañaapa' atet otanet: “Amachca'ye sa'mare'tatsche te't cha sa'maranpennan netrigor. ³⁰ Allepa' chepuepa' epuet. EsemPOCH pomella'hua trigopa' allempochña noch ñeñtcha' a'yapaçhe' trigo: Ñanomcha' añ sa'yapaçha' ta'te' o'ch sehuancachmech attoch ya'poyatater. Sehuanca'huepa' çoscha'ña a'yapaçhe'ña ñaña trigo o'ch sañño'teña' allecma neshontateñ.”

Atto Jesúsapa' toma'ntaterranet atet pena pue'llomer ñeñt otenet mostazllom

(Mr. 4.30-32; Lc. 13.18-19)

³¹ Allempoña Jesúsapa' alla oterraneterr:

—Añ Yompor po'cohuenña ñeñt atto ayochreshattena ña pue'ntañoç, ñanompa' e'ñech puesheña'ttsa ame'ña'yetsa. Allempoteñña' allo'nach sen atonetnomtsa ñeñtcha' ame'ñeritsa attochña e'ñe epa'huerra erracmañen Yompor po'cohuenña.

Ñeñtpa' añ toma'ntaterraneterr mostazllom:

—Ñeñña pue'llomiretollpa' puesheñarrña'pa' o' anemí pa'mro allcha' nare'teña'. ³²Ñehua, e'ñe yeñoteñ mostazllom ñeñpa' atarrca'ye nanac añe'folleshallmerr, tarraña ñerra'm o'ch yenare'chpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetso'chno. Ñeñña narmetsocherpa' o'ch hua'cha'toña ote'chno ñeñtcha' ama'tanatyesosets puetacro'mar.

*Atto Jesús'pa' toma'ntaterranet ñeñ atet pena chase'
(Lc. 13.20-21)*

³³Jesús'pa' alla serrpare'taterraneterr ellonet ñeñ atet pena Yompor po'cohuenña ñeñ atto atarr ayochreshatena ña pue'ntaño't. Ñeñpa' ama'tcha' añe'tolla ñeñtcha' ñanom ortatsa tarraña e'ñe ña po'huamenco't mame'tollapa' o'ch e'ñe epa'hua ora errañaren. Ñeñpa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñña chase'pa' ama'tcha' añe'tolla net, ama'tcha' aton harina' ñeñt ma'pa arroga, mame'tollapa' o'ch e'ñe a'muesatuanña ama't atarr aton harina'.

*Jesús'pa' ora allpon ñeñt atet ye'chatyenan acheñenesha'
ñeñpa' attoña pa'namenot es toma'ntatyenanet
(Mr. 4.33-34)*

³⁴Ora allpon ñeñt atet ye'chatenan Jesús acheñenesha', ñeñpa' atto es toma'ntatyenanet. Allempopa' ama serrpare'tataneto e'ñe atta, chocmaña serrpare'tatenanet toma'nteñtso. ³⁵Attoña o' etsoterra ñeñt atet ote't ñeñt a'mtaye't Yompor po'ñoñ ahuat ñeñt atetcha' ye'chaterr Cristo:

Napa' neñerrcha' e'ñe toma'nteñtso; na'poterrcha' ñeñt ama a'potareteyaye ama't ahuatoteñ allempoteñ Yompor ye'chcatan añ patser.

*Atto Jesús'pa' eñotaterranet ñeñt atma'ntatarettetsa ta'tllom
epuet trigo*

³⁶Allotña Jesús'pa' sa'nman acheñenesha'pa' o' cherr pocollo. Allña hua'cha'toña pueyochresha'pa' atet otoset:

—Te'pa' o'ch potey e'ñe eñotochen ñeñt toma'ntena ta'te' ñeñt chepuets pa'mro.

³⁷Ñaña'pa' atet otanet:

—Ñeñt nare'tene' e'ñe cohuen pueretspa' ñeñpa' naca'ye Ñeñten Acheñetosets. ³⁸Ñeñt na'muer nepenpa' ñeñtca'yeña añe patser. Ñeñt cohuen pueretspa' ñeñtca'yeña Yompor pueyochresha' ñeñtcha'ña cherrets

all am̄cha'tarettena Yompor. Ñeñt̄ ta'te'pa' ñeñt̄ca'yeña oneñeñ pueyochresha'.³⁹ Ñeñt̄ e'moñe'tene' ñeñt̄ nare'tam̄pse' ta'te' ñeñt̄ca'yeña oneñeñ pompor. EsemPOCH çherr allemPOCH pomella'huapa' ñeñt̄pa' añ toma'ntena allemPOCHña mellapoterra. Ñeñt̄cha'ña a'yapaçherretspa' ñeñt̄ca'yeña mellañoteñnanesha' ñeñt̄cha' huaçha'ttsa entoť. ⁴⁰ Atet apçhenet ta'te' te' o'ch a'poyatachet tsopa' atetcha' perrñañetña oneñeñ pueyochreshačno allemPOCH mellapoterra. ⁴¹ Ñehua, na Ñeñten Acheñetosetspa' nach mueñerre' nemllañoteñnaneshar ñeñt̄cha' a'yapaçha'tuerre' allohuen ñeñt̄ cotape'chatyenahuet sosey ñaña allohuen ñeñt̄ e'ñe aña etsotayen paťpareñ. Arrotcha' a'yapaçharetterra allo'tsa'yen ñaña Yompor pueyochreshačno, ama't e'ñe all ayochreshattena ña. ⁴² O'ch e'ñe a'yapaçharettetuerretpa' allemPOCHña asaprrotarettet o'pono all huorten tso'. Allña'pa' allcha' yahuanrrorterret, panmueñoťet atserrpa' rraso'tyerretcha' pa's. ⁴³ Allempoña allohuen ñeñt̄ e'ñe pocte' es pa'yets ñetña'pa' poptetsetach e'ñech attet ñerra'm atsrret. E'ñech cohuen popuetyenet all am̄cha'tarettena ñeñt̄ pompor penet. Allohuenes ñeñtes ne'mñotene' neñoñ çhaponasepa'chña seyoçhro ñeñt̄ atet notenes.

Atto Jesús'pa' toma'ntaterraneterr shonte' quelle ñeñt̄ e'potarettetsa patso

⁴⁴ Po'pocheño Jesús'pa' alla toma'ntaterranet po'poñoneť. Ñeñt̄pa' añ toma'ntatanet Yompor po'cohuenña atto atarr ayochreshattena ña, ñeñt̄ña'pa' atarr aye'choçhen. Ñeñt̄pa' atet toma'ntatanet ñerra'mrrate' shonte' quelle ñeñt̄ e'potarettetsa e'ñe patso. Ñeñt̄ña quelle puesheñarr yacmapa' machayoťach entos. O'ña entuepa' o' alla pampa'ner ñaña'pa' o' ahuerr e'ñe pocsheñesha' allenta pomhuahuerran ora ñeñt̄ allpon ehyen allochña'pa' attoch echan quelle alloch rañterrana ñeñt̄ patser allo'tsen quelle. Attochña ganam̄perrana atarr shonte' quelle ñeñt̄ atarr ye'chena.

Atto Jesús'pa' toma'ntaterraneterr ñeñt̄ atarr coçhnesha' serets

⁴⁵ Po'pocheño'pa' atet toma'ntaterraneterr:

—Yompor po'cohuenña atto atarr ayochreshattena ña ñeñt̄pa' atarr aye'choçhen atet ñerra'mrrate' ñeñt̄ atarr coçhnesha' serets. Puesheñarrña ñeñt̄ pomatsre'tyetsa ñeñt̄ach atarr e'nyen ñeñt̄cha' rañta. ⁴⁶ Pamťarrña'pa' entosan serets ñeñt̄ atarr nanac coçhnesha' ñeñt̄ña'pa' atarr tsa'te'. Ñaña'pa' allentach ahuerr o'ch pomhuahuerran ora

ñeñt allpon ehyen allochñapa' attoch echan quelle alloch rañtterrana serets ñeñt atarr nanac cochnesha'.

Atto Yompor po'cohuenña eñe atet pena ñerra'mrrate' añecmuen terraya

⁴⁷ Jesúsapa' alla toma'ntaterraneterr; ñeñtapa' atet otanet:

—Yompor po'cohuenña atto atarr ayochreshattena pue'ntañot ñeñtñapa' eñe atet ñerra'mrrate' terraya añecmuen. O'ch terrayet sa'popa' o'ch eñe ap'cha'huan allohuen pa'namen cacachno. ⁴⁸ Ñerra'm o'ch eñe chorra allempoñapa' o'ch chetamperet topñaso, o'ch anorrcha'tet allcha' acret ñeñt eñe cohuenare' ñeñtcha'ña esha'tanatet puecañtro. Ñeñtña ama cohuenayayepa' o'ch saprochet. ⁴⁹ Ñeñtapa' atetcha'ca'ye perraña allempoch mellapoterra. Cha'nma'cha'tcha' mellañoteñnesha' ñeñtcha' ellopa'tetstattere' ñeñt atsrre'mñañnesha' ñaña ñeñt eñe pocte' es pa'yets. ⁵⁰ Ñeñtña atsrre'mñañnesha'pa' huapore'teretcha' o'pono all huorten tso'. Allñapa' allcha' yahuanrrorterret, panmueñotet atserrpa' rraso'tyerretcha' pa's.

Attoch eñe cohuen yorrtatyen cotapñats ñeñt ahuatoteñ atarr sherbets ñaña attoch eñe cohuen yorrtatyen cotapñats ñeñt eñe etserra atarr sherbets

⁵¹ Allempoñapa' allenta a'p'to'tanet:

—¿Eñoto'chena't sentenña allohuen ñeñt atet notyenes?

Ñetñapa' atet ochet:

—Eñoto'chenca'ye yenteñ.

⁵² Allempoñapa' atet otanet:

—Ñeñto'marña ama't allohuen erra'tsen ñeñt atarr et-sotene' ñoñets ñeñt atet anaret ahuatoteñ, ñerra'm elloña ay'chatarettet ñamet ñeñt atet pena Yompor po'cohuenña atto atarr ayochreshattena ña, ñeñtña acheñer atarrcha' cohuen orrtatendan cotapñats ñeñt ahuatoteñ, elloña cohuencha' orrtaterran ñaña ñeñt eñe etserra cotapñats. E'ñech atet pena ñerra'mrrate' ñeñt apacllatesha'. All año'tyenan ñeñt atarr morrentena errotenopa' o'ch orrtatendan ñeñt er-te' año'ten all; errotenoñapa' o'ch orrtatyenan ñaña ñeñt año'ten ahuatoteñ all pa'paclo.

Allempo serrpare'tatan Jesús acheñenesha' all Nazareto (Mr. 6.1-6; Lc. 4.16-30)

⁵³ Serrpare'tatuanet Jesús ñeñt atet toma'ntatyesanet, ñañaapa' ahuerrerr allot. ⁵⁴ Cherr pa'nyo all Nazareto ye'chatuerraneterr all po'prahueto. Allñapa' nanac cohuanrrorteñet, atet otyeñet:

—Ñapa' errahuañaca'yeña eñotanña ora allohuen ñeñt atet pa'yena. Esheshahuañaca'yeña eñotatene'ña attot orrtatenan partsoteñets. ⁵⁵ Ñapa' aña puechemer ñeñt po'taruas pene' o'ch torrenana tsach attoch es yeçhcatyen pa'namen. Pachorpa' aña María. Pa'mo'nasheñpa'cho'ña aña Jacobo, José, Simón, Judas. ⁵⁶ Allohuen po'chanesha'pa' e'ñeca'ye yechme'tuenanet parro'marneshayarramche'. Ta'm ñaña'pa' errotenotte'ña atarr es eñotyen.

⁵⁷ Ñeñto'marña all e'ñe ña pa'nyo ama eseshaye' acua'penaye entenaye. Allempoña Jesús'pa' atet otanet:

—Ñeñt a'mtene' Yompor po'ñoñpa' çhocmaca'ye amcha'na'tpo' entyeñña allohuen acheñenesha', arrña pa'nyo allo'tsen e'ñe ña pamo'tsna'tarnesha' ñetñapa' ama acua'penaye' enteñeto. Ama't ñaña ñeñt parro yeçhenet pa'pacleto, ñetpa'cho'ña ama acua'penaye' enteñeto.

⁵⁸ Ama ame'ñeñeto ñeñto'marña allpa' ama atonocheye' orrtataneto po'partsoña.

14

Allempo e'ñe cohuen es orrtatyey Jesús, Herodesñapa' cha otapañ Juanañe' o' tanterra ñeñt apataye't acheñ Yomporecop (Mr. 6.14-29; Lc. 9.7-9)

¹ Allempoña amcha'taret Herodespa' e'mare'tenan atet pa'yena Jesús. Ñehua, Herodespa' all amcha'tare'tena anetso Galileo. ² Allempoñapa' atet otan ñeñt sherbene':

—Añepa'tca'yeña Juanañ ñeñt apataye't acheñ Yomporecop; ta'mca'ye çhate'ca'ye tanterraña rromot. Ñeñto'marte'ca'yeña te'pa' orrtaterranña partsoteñets.

³ Ñehua, allempopa' ahuañmo'chacma rrematenana' Juanañ o' huancachpa' allña yottam'psach attoch coshatan Herodías ñeñt pa'mo'nasheñ Felipe puetapor. ⁴ Tarro'mar Juanañpa' ña otaye't Herodes:

—Amaca'ye pocteyaye o'ch peyoram'pes pemo'nasheñ puetapor.

⁵ Ama't atarr mueneñeñ o'ch muetsatacheñ e'ñe allempocma tarraña Herodespa' mecha'tenan acheñenesha' ñeñto'marña ama eshcaye' muetsatache. Tarro'mar acheñenesha'pa' e'ñe cohuen enteñet Juanañ atet ñerra'mrrate' ñeñt a'mtene' Yompor po'ñoñ. ⁶ Allempoña coshame'tapreteñet Herodes allempo eñalletña allñapa' o' tancosa Herodías puechoyor. ⁷ Herodesñapa' ñeñta atarr cohuen ent. Ñeñto'marña och:

—Na po'ñoçhpa' o'ch nena' neñoñ e'ñe Parets pa'so'chño, ama't es penamuenpa' napa' napa'pcha'.

⁸ Pachorñapa' allenta otare'ch e'ñe a'nahua:

—O'hua p̄ochte' am̄cha'taret: "Añcha' p̄apuen Juan poñ."

Allempoña shopshesha'pa' atet otan Herodes:

—Napa' añ nemnen o'ch pepechennana' Juan poñ ñeñ' apataye't acheñenesha', o'ch penon platopa' o'ch p̄aphuerren e'ñe arrma.

⁹ O'ña enamhuepa' am̄cha'taretñapa' čha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñ' hua'ñen ñeñ' e'muene' atet oten ñeñto'marña otanet:

—Te'pa' o'ch saṗ Juan poñ.

¹⁰ Allempoñapa' o' mueñan pa'cheñer o'ch pecheñeta' Juan all yottam̄peñet. ¹¹ Allempoña o' huapaterrñañet poñ platopa' aphueret shopshesha'. Ñaña'p' anem̄ pachoresho o'ch apueña'.

¹² Allempoñapa' ahuanma Juanañ pueyochresha' o' aneret apecharet o'ch pampuereta'. O'ña pampa'huereta'pa' o' ahuanerret o'ch e'mare'tateñeta' Jesús.

Allempo Jesús'pa' rratenan shonte' acheñenesha'; ñeñña' acheñenesha'pa' allo'tsen amnaroch mil

(Mr. 6.30-44; Lc. 9.10-17; Jn. 6.1-14)

¹³ Jesús'pa' allempo e'mare'tan Juanañ, ñaña'p' ahuan̄pes noñto o' sa'nman acheñenesha' o'ch ahuo' all ama acheñempaño'ye. Acheñenesha'ñapa' allempo e'mare'chet ñetñapa' allenta ahuanmuet ñamet. Allohuen anetsotpa' e'ñe ahuanmuet o'ch entereta' Jesús. Ñetñapa' alla oñmacha'tet patso'mar. ¹⁴ Allempoña sehuosa Jesús noñtotpa' alla entuerraneterr o' alla shonta'huerrerr acheñenesha'.

Ñaña'p' atarr nanac muera'huerraneterr. Allña'p' o' alla a'crratyessuerraneterr patsñañeter. ¹⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempaño'ye ñaña o'ca'ye ellerren. Te'pa' o'ch p̄och acheñenesha' ahuanemyerretepa' anetso'mar allcha' rañta'yesuerret puerraret ñeñ'cha' rra'yesuerret.

¹⁶ Jesúsñapa' otanet:

—Amachca'ye ahuanmatsterreto. Sachca'ye apa'yesahuet ñeñ'cha' rret.

¹⁷ Ñetñapa' atet ochet:

—Ya arrpa' amaca'ye es yechenoña ama't coñe'ta; yapa' e'ñeca'ye amnara pan yechen ñaña epatoll cac.

¹⁸ Allempoña Jesús'pa' atet otanet:

—Sanmon arrma o'ch sapuenna'.

¹⁹ Allempoñapa' otan acheñenesha':

—Te'pa' o'ch sanorr'cha'tyes e'ñe all cohuen emmo'ratyen pasetma'.

Allempoña agapan ñeñt amnar pan ñaña epatoll cac, o' cohua' enonet, parasyoso'tam̄psan pan allotñapa' shota'tan pan, apanatyesan pueyochresha'. Ñetñapa' o' epatyaset allohuen acheñenesha'. ²⁰ E'ñe epa'huet, allempoña o' rrallme'chet allohuenet e'ñepa'tcha' yetrra'tuahuet. E'ñe yetuahuetpa' cha a'pchatyaset ñeñtñapa' a'yapa'cheret. Ñeñtña a'yapa'cherretpa' chepa'tcha' chorrats charra' puechena epa cañter e'ñe tamo'yare'. ²¹ Ñeñtña rrallme'chatspa' atarr shonte' acheñenesha'; ñato' allo'tsente' amnaroch mil ñeñt e'ñe yacmaneshoche'. Ellonetpa' allo'tsa'yen ñaña coyane-shachno ñaña cheshaneshachno.

Atto Jesús'pa' e'ñe cohuen chope'chnen enot oño
(Mr. 6.45-52; Jn. 6.16-21)

²² Allempoña Jesús'pa' otan pueyochresha':

—Te'pa' o'ch sa'tacha't noñto o'ch sota sanom o'ch sepchatterra yot. Napa' o'ch neso'tnom ora acheñenesha'.

²³ O'ña so'tuanmanetpa' ñaña'pa' ahua' aspeno e'ñe ñapue't allña ma'yochosa. Ama't o' tsapuenpa' ñaña'pa' allo'tsena ñapue't. ²⁴ Noñtñapa' ñeñta rrochaso'tsenara sa'po, emo'yare'ñapa' cha anmape'cham̄penanet, a'puerrame'tam̄penanet orno. ²⁵ Atteña allempoña puetarenmochpa' huenanet Jesús' cha chope'chnen enot oño. ²⁶ All chope'chnen allempoña entapueñ pueyochresha', ñetñapa' cha toratsetyaset pueyo'chret, atet otanna'tyaset:

—Choyeshe'matste'ca'ye huaponaya.

Pueyorñotetpa' atta rrannartet.

²⁷ Jesús'ñapa' eñorana'tuenanet, atet otuenanet:

—Choñaca'ye socshapuenña, naca'ye o' nohuapa, amach atta sem'cha'tatstapno.

²⁸ Allempoña Pedropa' eñorana'cha ñeñt'pa' atet och:

—Ñerra'm po'ñochte' pa' Partseshacha', te'pa' o'ch potosen, aponca'ye nesho, pechope'chnom paña enot oño.

²⁹ Jesús'ñapa' allenta och:

—Aponca'ye.

Ñaña'pa' allenta sohua noñtotpa' o' chope'chnom ñaña enot oño o'ch ahua' Jesúsesho. ³⁰ Chope'chnomtsapa' o' cohua'nman huomenquësha' ñeñt' cha emo'yartatenan sa'ppa' cha yore'ch. Cha yore'chpa' alla muene' esha'ta oño. Allña'pa' rranare'ta atet otan Jesús:

—¡Pa'queshpotosen Partseshacha'!

³¹ Jesús'ña tecma rrema'ppa' atet och:

—Papa' ama't e'ñeye' peyemtenno. Eso'mare't cha pe'charrtatenña peyo'cher.

32 E'ñe a'ta'cha'tatseta noñtopa' huomenquësha'ñapa' çhepa'tcha' muetsoñeñterrtsa. 33 Ñeñña noñto'tsa'yenpa' allentepa'tcha' concorpanrrortana'tapetpa' atet otyeset:

—Po'ño'che'pa't p'apa' e'ñe Parets Puechemerep'.

Allempo Jesús'pa' a'crratyesosan pa'namen atsnañe'te'chno all Genesareto
(Mr. 6.53-56)

34 Allempoña pechatam'psetpa' arr etsotaset all oteñet Genesareto. 35 Ñeñña ane'tañnesha' allpa' o' cheme'tapet Jesús. Atto cheme'tapetpa' ñetñapa' allenta mueñet acheñ, o'ch e'mare'tatenana' acheñenesha' allampaño'mar. Alloñapa' huapatyesoñet allohuen atsnañe'te'chno. 36 Ñeñña atsnañe'te'chnopa' o' enemyeset ama't poso'mo'a o'ch a'p'lla'yesosñañet pa'shtam. Allpon ñeñt a'p'lla'yese' Jesús pa'shtam allpon'cho' e'ñe corra'yesuerrtsa.

15

Atto Jesús'pa' e'ñotatenanet ama añeye' ya'sosyatenaye Partso-cop ñeñt'yerra'yen yenamot
(Mr. 7.1-23)

1 Allempoña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop ñetñapa' arro't hua'cha'tet Jerusaléño'. Cha'cha'tet Jesúseshopa' atet otyeset:

2 —Eso'mare'tña peyochresha'ñapa' que'chpuerretña ñeñt atet yeyche't ya ahua't yatañneshohuen. Ñeñto'mar o'huañ e'pota'tetña Partsocop allempo rrenet.

3 Ñaña'pa' atet otanet:

—Sapa'cho'ña ñeñto'mare'trraña satpare'teññañña samña Yompor po'ñoñ ñeñt atet anaret allochñapa' e'ñech sañeña seycheña e'ñe setsotayen. 4 Ñehua, po'ño'chca'ye yeñoteñ Yomporpa' atet otene'y: “Semorrenteño'tpa' sen'cha'na'chcha' sompor ñaña sachor.” Elloña ñaña po'poñonet atet otene'y: “Ñerra'm esesha' sasare'tene' pompor ñaña pachor ñeñtpa' muetsetepa'.” 5 Tarraña sañapa' amaña atteye' sepeno tarro'mar sapa' chaña atet sotyen:

—Ñerra'm esesha' atet otene' pompor ñaña pachor: “Ñeñt nechen o'ch napapeñpa' tarraña amach napape te'pa' o'ch nene'Yomporcop” 6 ñeñña acheñerpa' sañapa' atet'cha' soteñ: “Pocoppa' ama pallteno o'ch es p'ap' p'amo'mte'.” Sapa' attoca'yeña sehuapore'teññañña Yompor po'ñoñ allochñapa' e'ñech aña setsoten ñeñt e'ñe sañeña seycheña. 7 Sapa' atar-ca'ye ommoñañneshas tarro'mar atarr seshcare'ten amaña Yompor'ye'ña sesherbene. Isaíaspa' e'ñe cohuen a'ñtane't

Yompor po'ñoñ, saña te'pa' e'ñe atet sepena atet ote't; allem-
popa' atet ot Yompor:

⁸ Ñeñt' acheñenesharpa' e'ñe puenamota cohuentatennanetañ;
pueyočhretoña' ama čhenaneto ñeñt' cohuen nenten
na.

⁹ E'ñe orrena ma'yochennet, ñeñt' atet yečhatannenetpa'
ñeñt'pa' e'ñe acheña naye't ahuat poctapña.

¹⁰ Allempoña Jesús'pa' čhore'tan acheñenesha' ñeñt' shon-
tetsa, ñetña'pa' atet otanet:

—Saña'pa' e'ñepa'chña cohuen se'mñoten allochña'pa'
attoch e'ñe cohuen čhaponasa seyočhro. ¹¹ Ama añeye'
ya'sosyatene' Partsocop ñeñt' yerra'yen yenamo't. Añca'yeña
ya'sosyatene' yeñoñ ñeñt' čha'nets yenamo't ñeñt' atet
yeñosatse'tyen.

¹² Allña'pa' atet oteña' pueyočhresha':

—¿Peñoteñe't fariseonesha'ña'pa' allempo e'monapet peñoñ
ñeñt' atet potyenanet ñetña'pa' čha'atsrre'muet?

¹³ Ñaña'pa' atet toma'ntatanet ñeñt'cha' atet ařaretterra
fariseonesha', ñeñt'pa' atet otanet:

—Allohuen narmetsočhno ñeñt' ama añeye' nare'taye
Apa ñeñt' pue'ntaño'tsen ñeñt'ña'pa' a'mare'taretetuerrach.

¹⁴ Ñetpa' ottetepa'ta. Ñetpa' e'ñe atet penet ñerra'mrrate'
puesheñarr ñeñt' aporo'yetpa' ñapa' o'ch echa'nman
po'psheñeñ ñeñt' parro aporo'yetecmuet. Allempo
atet penet ñerra'm arrorotonta echa'nman'ntnomuet
epsheño'maret čhach shora'nmoset arroroto. Arrpa'
allohua ñeñt' atet toma'ntatanet atet ñerra'm ya allempo
ama yoctape'cherra' ñeñt' cohuentetsa Yomporecop amach
errotent' yoctape'cache po'psheñeñ ñeñt' ama eñotenaye
ñeñt' cohuen enten Yompor.

¹⁵ Allempoña Pedropa' atet ot:

—Yapa' čhochña peserrpare'tatey e'ñe cohuen eñotočhen
ñeñt' atet petma'ntatena ñorra'.

¹⁶ Ñaña'pa' atet otanet:

—Ama't sapa'cho'ña ama'tña seño'teña'. ¹⁷ Sapa' ama't
čhennasoña seyočhro ñeñt' yerra'yen yenamo'tpa' alla
sen ya'to ñeñt'pa' čhocmach yener a'yo. ¹⁸ Añña ñeñt'
čha'nets yenamo't ñeñt' atto yeñosatse'tyen ñeñt'pa' e'ñe
yeyočhrot huena ñeñt'ña' čhocma ya'sosyatene'ña Partsocop.
¹⁹ E'ñe yeyočhrot huena cotapñats ñeñt' ama't mameshapa'
ama cohuenayaye, ñeñt'pa' añ: muetsanna'teñets,
chetapretanna'teñets, cañoresha'teñets, etatsre'tyeñets,
toma'tamñsanna'teñets, sasare'teñets. ²⁰ Ñeñt' allohuen
sosya'tsañečhno ñeñt' huetsa yeyočhrot ñeñt'ña' po'ñočh

ya'sosyatene' Partsocop. Tarraña allempo yerrallme'chyen ama't ama ye'pota'tyesopa' ñeñtpa' amaña ñeñteye'ña ya'sosyatenaña Partsocop.

Atto puesheñarr coyanesha' ñeñt ama judioneshayaye ñapa' atarr yemtapana Jesús

(Mr. 7.24-30)

²¹ Ahuerrerr Jesús allotpa' alla chap allampaño anets Tiro ñaña Sidón. ²² Allñapa' o' huapa puesheñarr coyanesha' ñeñt allo'marnesha' ñeñt canano'marnesha'. Ñañaapa' allenta rranare'tospa' atet otos:

—Pemueraye'chosna, Nepapareshacha' p̄apa' ñeñtep̄ Davidna'tarep̄. Na nacñe'terpa' atarr muerochtateñ oneñeñ.

²³ Jesúsñapa' ama't mameshapa' ama eñorana'teño. Atteñapa' o' ponemña pueyochresha' otoset:

—Pe'mñochñaca'ye tecma allochñapa' o'ch ahuerri, chaca'ye cota'neney perranare'tnomue'.

²⁴ Ñañaapa' atet otanet:

—Napa' e'ñe añecpa allsensareten ñeñt israelena'tarneshacop; ñetpa' e'ñe atet nentenanet ñerra'm carrneročno ñeñt paya'tyetsa.

²⁵ Coyanesha'ña ñeñt ama israelena'tareyayepa' ñañaapa' allenta on e'ñe ñesho concorposñañapa' atet otos:

—Choña Nepapareshacha' p̄bensam̄psaye'cherrnan nacñe'ter.

²⁶ Jesúsñapa' toma'ntatana acheñenesha' ñeñt ama israelena'tarneshayaye ñeñto'marña atet och:

—Ama pocteyaye o'ch yepratan̄pes yacñeñtar puerrar o'ch yehuapore'tam̄pes allo'tsen ochec o'ch rre' ñaña ochec.

²⁷ Coyanesha'ñapa' atet otererr:

—Ama't atteñ Nepapareshacha' tarraña ama't ochecpa'cho'ña rra'yenan ñeñt a'shore'tatyen pamo'mte' po'mesañnacho.

²⁸ Allempoña Jesúsapa' atet otererr:

—Chepa't nesñeshacha' atarr nanac peyemtenna ñeñtep̄ñapa' attetepa'ch p̄ocop atet pemnen p̄a.

Pacñe'terñapa' allorocma correrra.

Atto Jesúsapa' a'crraterranerr po'potantañ atsñañeñečno

²⁹ Ahuerrerr Jesús allotpa' alla oñem sa'patop̄ño'mar e'ñe Galileaso. Allotpa' ahuo' aspeno allñapa' anorros.

³⁰ Allñapa' alla huacherrñañerr shonte' acheñenesha'. Huapatyerrñañeterr checa'repačno, mancočno, aporo'yetečno, opananeshachno ñaña huapatoñet shonte' po'potantañečno. Ñeñtñapa' alla nanatyesosñañet pa'rrp̄ot. Ñañaapa' e'ñe a'crratyesuerranet. ³¹ Allña

acheñenesha'pa' čha atarr cohuanrrorteñet allempo eñchet atto opanačhno čha eñora'yerrtsa, mancočhno'pa'čo'ña čha cohuenetyerrtsa, checa'repačhno'pa'čo'ña čha chope'chyerrts, aporo'yetečhno'pa'čo'ña čha e'ñe cohuen cohua'yerrts. Ateť e'ñe cohuen eñchetpa' allohuenetñapa' cohuentateññañet israelnesha' Po'yomporer.

*Allempo Jesús'pa' rratenan shonte' acheñenesha', ñeñña
acheñenesha'pa' allo'tsen pa'tatsoch mil*

(Mr. 8.1-10)

³² Allempoña Jesús'pa' agotan pueyochresha'pa' ateť otapanet:

—Napa' čha atarr nemuereña allohuen acheñenesha' ñeññ shontetsa arr. O' ma'pamtoset nesho ama eñallmeñeto ñeññcha' rret. Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto toño.

³³ Pueyochresha'ñapa' ateť otoset:

—Errahuachca'ye yentña allpon rreñets ñeññcha' yerrach shonte' acheñ, arrpa' amayaca'ye.

³⁴ Jesús'ñapa' ateť oterraneterr:

—Sapa' ¿errpona't sechenña pan?

Ñetñapa' otereterr:

—E'ñeca'ye cančhrra ñaña coñe't cacatollesha'.

³⁵ Allempoñapa' otan acheñenesha':

—Te'pa' sanorrča'tyes patso.

³⁶ Allñapa' agapan ñeññ cančherr pan ñaña cacatollesha'. Agaphuepa' o' parasyoso'tenanerr Pompor allotñapa' o' shota'tan pan, shetse'tan ñaña cac, apanatyesan pueyochresha'. Ñetñapa' o' epatyaset ñamet allohuen acheñenesha' e'ñe epa'huet. ³⁷ Allempoñapa' o' rrallme'chet allohuenet, e'ñe yetra'tuahuet. O' e'ñe yetuahuetpa' čha a'pchatyaset ñeññapa' a'yapačheret. Ñeñña a'yapačherretpa' čhepa'tcha' chorrats cančherr cañter e'ñe tamo'yare'. ³⁸ Ñeññ rrallme'chats atarr aton acheñenesha' ñato' allo'tsente' pa'tatsoch mil ñeññ e'ñe yacmaneshoche'. Ellonetñapa' allo'tsa'yen ñaña coyaneshačhno ñaña cheshaneshačhno. ³⁹ Allempoña Jesús'pa' so'tnerran acheñenesha'pa' ahuer, a'tapos noñtopa' ahuanperr o'ch ahuo' anetso ñeññ pa'so'cheñ Magdala.

16

*Atto fariseonesha' ñaña saduceonesha' enamoset Jesús gat-
apanetepa'to' po'partsoña*

(Mr. 8.11-13; Lc. 12.54-56)

¹ Fariseonesha' ñaña saduceonesha' ñetpa' o' ahuanmuet o'ch enteñeta' Jesús. Cha'cha'tet Jesúsesho ñetña puehquëno'etpa' atet otyesoset:

—Yapa' añ yemnen o'ch pegatapuey pepartsoña entot allochñapa' attoch yeñotosep po'ño'ch papa' Parets Puechemerep.

Ñetpa' cha mueneñet o'ch topatoset Jesús. ² Ñaña'papa' añ yerpatapanet ñeñt atet otyenet ñet pa'nyeto:

—Sapa' ñerra'm esempo sentnen o'ch tsatatetnena enet, sañapa' chocmach atet sotyeseñe't: “Tsapa'tpa' atarrcha' char.” ³ Aromtañañapa' ñerra'm esempo senta'muen enet cha tsatatta'muena, sañapa' chocmach atet sotyesa'muene't: “Choch huata'muena ñeñto'mar o' cha rrenarsa'muen.” Sapa' atarr señoteneña ñeñt sentyen ento ñeñña señotatene'. Tarraña ñeñt atet norrtatyennas nepartsoteña eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñt'pa' attate' seshquën. ⁴ Acheñenesha' ñeñt corra'yetsa te' ñetñapa' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otennet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahuat nínivo'marnesha'.

Jesúsñapa' sa'nerranetpa' ahuerr.

Atto Jesús toma'ntaterraneterr ñeñt po'chaser pen fariseonesha'

(Mr: 8.14-21)

⁵ Allempoña pechatra'tet yom'ta'n o' chapuet all, pueyochresha'ñapa' o' yerpuerret ñetpa' ama anmueto pan ñeñt'cha' rrosset all. ⁶ Jesúsñapa' atet otapanet:

—E'ñech señota ñato't semeñe'teña'ña fariseonesha' ama't ñaña saduceonesha' po'chaser allo tsetenet pan.

⁷ Ñetña cotape'chyasetpa' atet otanna'tyeset:

—Amaca'ye yanmoña pan ñeñto'marte'ca'yeña oteneñ año'ch yemeñe'tatscheña fariseonesha' po'chaser.

⁸ Jesúsña allempo eñotanet atet cotape'chyenet ñaña'apa' atet oterraneterr:

—Eso'mare't sellquëñesha' sotanna'tyena año' eñalle ñeñt'cha' serra'. Sapa' ama'tña e'ñeye' seyemtenno.

⁹ Teme'ttsena'tña ama es sechenoyoña seyo'chro. Ama'tña seyerpunoña allempo natontat amnar pan ñeñt nerratallme'chpa' allo'tsen amnaroch mil acheñenesha'. Ama't seyerpunoña ñaña ñeñt allpon chorrarerrrets cañiro ñeñt sap'cherr allempo. ¹⁰ Ama't ñaña allempo natontaterrerr ñeñt can'cherr pan ñeñtña nerratallme'cherrrrpa' allo'tsen pa'tatsoch mil

acheñenesha'. Ñaña ñeñt allpon chorrarerrets cañtro ñeñt sapcherrerr allempo. ¹¹ Errotenotuñaca'yeña ama señotenoña ñeñt atet notas ñorra' attoch ama semeñe'tatsche fariseonesha' ama't ñaña saduceonesha' po'chaser ñeñtpa' ama rreñtsoye' notenso.

¹² Allempoña ñetpa' o' chapamet pueyoçhreto, atet otanna'tet:

—Amuepa'tca'ye añeye' otenye pan po'chaser; añepa'tca'yeña oteney amach yemeñe'tatsche fariseonesha' ama't ñaña saduceonesha' poctapña ñeñt atet yeçhatannenet ñeñt ama cohuenayaye, te't mamesha epa'hua erracmañen e'ñe atet pena chase' mameshapa' o'ch a'chasa'huan ora all yeneñ.

Atto Pedropa' otan Jesús, p̄apa' p̄aña Yompor Puechemerep̄ ñeñtep̄ Cristotosets

(Mr. 8.27-30; Lc. 9.18-21)

¹³ Allempoña chap Jesús all Cesarea ñeñtara Filipo, allñapa' otosan pueyochresha':

—¿Errofena't otyenenña allohuen acheñenesha', na Ñeñten Acheñetosets eseshante'?

¹⁴ Ñetñapa' atet otyeset:

—Patantarr acheñenesha'pa' atetca'ye otyenpet p̄apa' Juanañpo'te' ñeñtepo' apatañtatset Yomporecop. Po'potantaññapa' atet otyenpet p̄apa' Elíasopo'te'; po'potantaññapa' atet otyenpet p̄apa' Jeremíasopo'te' amapa' añeño'te' po'psheñeñ ñeñt a'mtaye't Yompor po'ñoñ ahuat.

¹⁵ Allempoñapa' alla a'p̄to'terraneterr:

—Sañapa' ¿errofena'tña sotenenna sa?

¹⁶ Simón Pedroñapa' eñoratsapa' atet och:

—Papa' ñeñtep̄ca'ye atarr yecuen ama't ahuatoteñ; ñeñtep̄ca'ye Parets Puechemerep̄ ñeñtep̄ Cristotosets. Ñeñtña Parets ama arromñañeshayaye.

¹⁷ Jesúsñapa' atet och:

—Nanac cosheñtso'tsenep̄, Simóna ñeñtep̄ Jonás puechemerep̄ tarro'mar atto peñotenenpa' ñeñtpa' ama arromñañeshaye' peñotatenaye; ñaña Nompor peñotatene' ñeñt pue'ntaño'tsen. ¹⁸ Napa'cho'ña te'pa' o'ch nota p̄aña, p̄apa' añcha' nesocherre p̄ Pedro. (Ñehua, añ so'chñets Pedropa' añ toma'ntena ñeñt atarr es echarr atet ñerra'm mapue'.) Ñaña p̄a e'ñe peyemteñoñen na, na po'ñoçhpa' ñaña Cristotosets, ñeñtpa' allochca'yeña norrtaterrña allohuen ñeñtcha' name'ñerraya ñeñtcha' apcha'yerrtsa e'ñe na pame'ñeñoñet. Atarrcha' huomenc echarr nepa'yerranet allohuenet ñeñtetcha' apcha'yerrtsa pame'ñeñoñetan na attochña

ñocpuetpa' amach eñalle ñeñtcha' huapore'terrahuet, ama't ahuata. Ama't rromueñets po'huamencpa' amach erroteno't metanerranetoña ñet po'huamenc. ¹⁹ Ñaña na te'pa' o'ch napuerre'p llesens attoch pa'poterrñañ Yompor po'cohuenña ñeñt atto ayochreshattena ña pue'ntañot; ñeñt'pa' añ toma'ntena atet ñerra'mrrate' llave alloch petoramper allohuen ñeñt muenene' o'ch pueyochresha' perranet. Ñaña ñerra'm erra'tsencha' e'ñe pocte' pent ñeñtcha' pena'yes arr patsropa' Yomporpa'cho'ña ñeñt ento'tsen e'ñech attecma pocte' enterranet. Ñaña ñeñtcha' ama pocteye' penteno ñeñtcha' pena'yes arr patsro, Yomporpa'cho'ña ñeñt ento'tsen e'ñech attecma amach pocteye' enterraneto.

²⁰ Allempoñapa' otan pueyochresha':

—Amach esesha' sota'psa'tatsto ama't puesheñarra napa' na ñeñten Cristotsets.

Atto Jesús'pa' eñotatan pueyochresha' ñapa' amtsaretterrach (Mr: 8.31-9.1; Lc. 9.22-27)

²¹ Jesúsña e'ñe allempoteñpa' motetnomñ eñotatyesnomue' pueyochresha' ñeñt atet anaret ñocop, ñapa' muerochtateretcha'; o'ch ahuo' Jerusaléño allña'pa' allcha' muerochtateret. Añcha' errotuanen perre' ñeñt pompornesha' pen allohuen judionesha' ñaña ñeñt pa'micha'tareternesha' pen allohuen po'cornaneshar ñaña ñeñt atarr etsotayenayeñ ñoñets ñeñt atet anaret judioneshacop. Allña'pa' allcha' muetsatateret tarraña puema'pamtañoña Pomporpa' o'ch alla tantater. ²² Pedroña' allenta anemñ a'yenetpa' allña'pa' atet otos:

—Arepachña Partseshacha' atteye' perrpeto ama't errponaña. Yomporpa'chña e'ñe pecuamipene'.

²³ Ñaña'pa' puetallsa a'yenet mame'pa' atet otan Pedro:

—Orra'p a'yo neshot oneñe'e, p'apa' e'ñe orrena pepatare'tenen; p'apa' amaca'ye Yomporpeye' atet poctape'chatenaye, ñeñt'pa' acheñarramche' pocta'pña.

²⁴ Allempoña Jesús'pa' atet otan pueyochresha':

—Ñerra'm esesha' muenene' o'ch coterrnet na e'ñe po'ño'ch attoch neyochresha' neperranet, añ poctetsa sehuanmuetepa'ña ñeñt atet muenenet e'ñe ñocpueta. Attochña ñetpa' o'ch e'ñe toma'nteret ñeñt chechnene' po'corsoch allcha' muerochtet ñamet. Attochña coterrnet e'ñe po'ño'ch. ²⁵ Tarro'mar ñerra'm esesha' e'ñe añ muenenet o'ch correna atomat attoch e'ñe coshenet arr patsro, ñetña'pa' chach a'chencatenet e'ñe ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop, ñeñtña' acheñerpa' ñaña'pa'

corretsach pocsheñeshocmañen e'ñe tayoteñ errponañohuen. ²⁶ Ama't errponenaparen esocmañen es yeyoratse'tyes ora allpon ñeñt yentyen a'ne patsro, tarraña ñerra'm ñeñfach e'ñe ya'chencaterre' yecamquëñohuen, ñeñtñapa' ama't coñe'tapa' amach es sherberrye. Tarro'mar ama eñalle po'poñ ñeñt atarr sherbets, añña atarr nanac sherbets ñeñtcha' a'queshpaterre' yecamquëñ. Tarro'mar yocoppa' ama es eñalle ñeñtcha' yepomuerr alloch alla yerañterra yecamquëñ. ²⁷ Po'ñoçh napa' Ñeñten Acheñetosets o'ch nohuerra epan ñaña nemillañoñeñnaneshar. E'ñech Nompore'cohuenñoñ nohuerra. Allempochña netsa'terranet e'ñe puesheña'tsocmuet erro'tente' p'a'yese't. ²⁸ Po'ñoçhca' te'pa' o'ch notas, patanta'ttsos ñeñtes arro'tsa'yenes ama't ama serromhuena'pa' o' senterrñañ Yompor po'cohuenña atto napa' Ñeñten Acheñetosetspa' atarrcha' na'yochreshatterra.

17

Allempo Jesúsapa' po'poñetañpsana pueyochresha'
(Mr. 9.2-13; Lc. 9.28-36)

¹ Allempo pechapmaterrerr, Jesúsñapa' ahuanerranerr pueyochresha'; añ anem Pedro ñaña Jacobo ñaña Juan ñeñt Jacobo pa'mo'nasheñ. Ñetpa' arr anmanet atarr aspeno e'ñe ñaptochayet. ² Allña Jesúsapa' machayotepa'tcha' po'poñetañpsosanet. Pa'clloyotpa' cha'poptosa e'ñe atet ñerra'mrrate' atsrret'poptetsa. E'ñe pa'shtamohuen atarr huallama'to'poptosa'cha' a'puetaresue a'yohuen. ³ Allñapa' machayotepa'tcha' orrtanet Moisés ñaña Elías. Ñetñapa' alla serrpare'toset epuet Jesús. ⁴ Pedroña eñoratsapa' atet otan Jesús:

—Atarruaca'ye Partseshacha', cohueno'tseneyte' arr. Ama't pocte' penteñe napa' o'ch na'tomatonas ma'ppahua quërpachet —puepahuarra' pocopcha', po'ppahueñpa' Moisésocopcha', po'ppahueñpa' Elíasocopcha'.

⁵ Allempo eñorena Pedropa' cha' orrtosahuet os ñeñt atarr cohuen'poptetsa' chepa'tcha' a'pomañpsosanet. Cha e'morrtostsa'ñoñets osot; ñeñtña'ñoñetspa' Yompor otosahuet; ñeñtapa' atet ot:

—Añmapa' ñeñt no Nechemer ñeñt atarr nemuerena ñeñtña atarr nocshatene', ñeñtcha'ña e'ñe cohuen se'mñoterr.

⁶ Allempo atet e'muet'ñoñets pueyochresha'ñapa' alla rrema'rrtet patso atarr nanac yorenent. ⁷ Jesúsñapa' allenta ponerranetpa' a'plla'huerranet, atet otanet:

—Setanterra, amach'cha' seyorenatsto.

⁸ Allempoña o' cohuerretpa' arepa'tcha' eseshaye' entereto, ñap̄ta enteret Jesús.

⁹ Allempo onaçherret aspen̄toť Jesúsñapa' atet otnerranet:

—Te'pa' amach esesha' sotaṗsa'tatsto ama't e'ñe puesheñarra ñeñt̄ atet o' sentua. Tarrempohuach allempoch netanterra rromot̄ na Ñeñten Acheñetosets, allempochña seserrpare'taterña allohuen acheñenesha'.

¹⁰ Pueyochresha' ñapa' atet otnerret:

—¿Eso'mare'tña otenña ñeñt̄ atarr etsotene' ñoñets ñeñt̄ atet anaret, Elíaso'ch ñanom huerrtsa?

¹¹ Ñaña'apa' atet otnerraneterr:

—Elías po'ñoçhpa' ñachca'yeña huerrtsa, ñapa' e'ñechca'ye a'cohuentatuer ora allohuen. ¹² Tarraña napa' o'ch notas: Elíaspa' o'ca'ye huaphuerrañ arr tarraña amaca'ye eseshaye' cheme'tapuerraye ñeñtapa' çhaña erroťuanen ṗapueret ñeñt̄ atet muena'yenet ñet. E'ñech attecma perrnet naña Ñeñten Acheñetosets.

¹³ Allempoñapa' o' çhapanet pueyoçhreto ñeñt̄ otenanetpa' añepa'tca'ye Juanañ ñeñt̄ apataye't acheñenesha' Yomporecop ñeñtapa'tca'yeña Elíasoterrets.

Atto Jesús'pa' a'crraterran cheshachor ñeñt̄ otetsa
(Mr. 9.14-29; Lc. 9.37-43)

¹⁴ Cherreterr all shontena acheñenesha' puesheñarrña yacmapa' ponmapuerrana Jesús concorposñaña. ¹⁵ Atet otos:

—Pemueraye'chosnana, Ayochreshate, nacñe'ter çha o'tena, nanac mueroçhtena. Epaye' coya'nmame'tateñ tso, erroťenopa' o'ch coya'nmame'tach ñaña oño. ¹⁶ Nanomhue peyochresheshopa' ñetñapa' ama erroťeye' peto attoch a'crrateret.

¹⁷ Jesúsñapa' atet ot:

—Sa ñeñtes acheñres ama't mamesha'pa' ama ayemtenaye' sentpenno; çhach po'poñ sentuena seyoçhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' attoťpa' o'ch same'ñerrna.

Allempoñapa' atet otanet:

—Ama'tpa' sanmonca'ye chesha' arr.

¹⁸ Jesúsñapa' atet otapan oneñet̄ ñeñt̄ otatene':

—Te'pa' po'ñoçh o'ch notaṗ, pequeçhpuer cheshachor.

Oneñet̄ñapa' allentepa'tcha' queçhpa'ner. Cheshachorñapa' allorocma correrra.

¹⁹ Allempoñapa' poneñya pueyochresha', e'ñe ñap̄toçhayetpa' atet otoset:

—Yañapa' ¿eso'mare'tña ama eshcaye' yequeçhpatereña oneñet̄ atto otatenan cheshachor?

²⁰ Ñaña'apa' atet otanet:

—Tarro'marca'ye amaca' e'ñeye' seyemtenno ñeñt atet notenes. Napa' o'ch notas, ñerra'm po'ñooh e'ñe na seyemtenañ napa' e'ñeca'ye na'pochtatenña neñoñ ñeñt atet notenes. Ama'tcha' allponatollota seyemtenna ñerra'mrrate' mostazllometoll sañapa' ama't erra'tsena senamuennonñ ama't ñeñt atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot: “Añ aspenetpa' rrote'tepa' a'yenet”, aspenetñapa' atetcha'cho'ña pennasañ ñeñt e'ñe atet soteñ. Ama't mameshapa' amach eñalleña ñeñt torrapo' senten ñerra'm e'ñe po'ñooh na seyemtena. ²¹ Ñehua, ñeñt atet oneñetpa' amach errotenoñ yequehpatacheña acheñ e'ñe atta. Chochña yema'yochena ñaña yema'yochreñoñ ama't yerrarpa' o'ch yequehpue'mame'. Attotcha'ña yequehpaterña oneñet ñeñt atet.

Jesúspa' eñotaterraneterr puepocheño ñapa' chocmach muetseret

(Mr. 9.30-32; Lc. 9.43-45)

²² Allempo chopeñe'chyenet parro all Galileo'mar, Jesúsña allpa' eñotatan pueyochresha', ñeñtpa' atet otnomanet:

—Na Ñeñten Acheñetosetspa' pomuerrnetcha' attochña errotuancha' perrnet. ²³ Atteñapa' o'ch muetsataterret tarraña poma'pamtañoñapa' o'ch alla netanterra. Ñetñapa' ñeñta atarr nanac lleca'rrtatyehuet.

Atto Jesúsapa' tsa'ta impuesto añecop Parets pa'paclecop

²⁴ Allempoña Jesús epuet pueyochreshachnopa' o' alla cha'cherretter Capernaumo. Allñapa' huapanet ñeñt tsa'tatenaya acheñesha' quelle ñeñt impuesto; ñeñtpa' Parets pa'paclecop. Ñetpa' atet otoset Pedro:

—Semaestrorpa' ¿ama't pomuenana'ña quelle impuesto añecop Parets pa'paclecop?

²⁵ Pedroña atet otanet:

—Chocmach tsa'ta.

Allempo chap pocollopa' Pedroñaapa' ama otenana'ña Jesús, ñañaapa' ñanmacma otapan Pedro:

—¿Errotena't, Simóna, penteñña pa? Ñeñt añcha'tarete'chno ñeñt añe patsro'tsa'yen, ¿eseshatña cobrenetña quelle ñeñt impuestocop, ñato' añate' cobrenet ñeñt e'ñe ñet pamo'tsna'tarecmuet amapa' añte' cobrenet ñeñt ello'marnesha'?

²⁶ Pedroña atet otan Jesús:

—Añca'ye cobrenet ñeñt ello'marnesha'.

Jesúsñaapa' atet och:

—Ñeñtepñapa' ñeñt e'ñe pamo'tsna'tarecmuetpa' ama'trra ñeñteye' cobreneto. ²⁷ Ama't pocteh amach netsa'tatsto

tarro'mar napa' ñeñten Puechemeren ñeñt pa'paquell pene' ñeñtecop tsa'tenet, tarraña attoch ama ya'tsrre'matanetopa' e'ñeca'ye pocte' o'ch netsa'ta. O'ch ahuep oño o'ch pego'tena' all. Erra'tsencha' ñanom pechta' pegoroñ ñeñtña'pa' o'ch pechete. Puenamopa' allcha'ca'ye pent puetallarr quelle. Ñeñtña quellepa' o'ch ñaner ñeñtña'pa' alloch petsa'tanet nocop ama't ñaña p̄ocop.

18

All eñotateny ñeñt acheñer e'ñe po'ñoçh atarr asherben enteñ Yompor

(Mr. 9.33-37; Lc. 9.46-48)

¹ Allempoña Jesús'pa' a'p̄to'teña' pueyochresha', ñeñt'pa' atet ochet:

—Ñeñtey allponey ñeñtcha' e'ñe pueyochresha' perr Yompor ñeñt pue'ntañotsen, yapa' añ yemnen te'pa' o'ch p̄otey, ¿erra'tsenoteyte'ñaca'yeña ñeñtey atarr sherbets ñeñtey atarr añcha'taretoyen entyenyet?

² Jesús'ña'pa' chesha'tolla çhore'tpa' tomach e'ñe allo'tsa'yenet. ³ Allempoña'pa' atet otanet:

—Po'ñoçh napa' o'ch notas: Ñerra'm ama çho sequeçpa'huerro sommo'cheña attoch o'ch atet sepena cohuen ñerra'mrrate' añ chesha'toll ñeñt ama eñotenana' o'ch ommo'chena, saña'pa' amate' errotent es so'paterroña atto atarr ayochreshattena Yompor pue'ntañot. ⁴ Ñeñt allpon ñeñtcha' e'ñe pueyochresha' perr Yompor ñeñtña' acheñer atto o'huañ cohuen enta ñañaña ñeñt'pa' o' e'ñe atet perra ñerra'm chesha'toll ñeñt ama eñotenana' pommo'cheña. Ñeñtña'pa' atarr nanac asherben enteñ Yompor. ⁵ Erra'tsenotes sa ñerra'm e'ñe same'ñeñoñen na e'ñe cohuen saguëñ ama't ñeñt ama asherbenaye' entyenet atet ñerra'm añ chesha'toll, na'ña e'ñe cohuen saguën.

Atto çhocmach huaponaya ñeñtcha' yetpatyene' o'ch atet p̄atyesey ñeñt ama pocteye' enteno Yompor

(Mr. 9.42-48; Lc. 17.1-2)

⁶ Ama't erra'tsena ñeñt ama pommo'cheño'teye' ame'ñenno atet ñerra'm chesha'toll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet p̄atach ñeñt ama pocteye' enteno Yompor, ñeñtña' acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet p̄atenana' po'psheñeñ, e'ñech allorocma o'ch çharachetañ mapue' añecmuen pa'çhno'po allpon ñerra'm puetse'tamets o'ch huapore'chet

oño epo allcha' ño'shach mapue'. ⁷ Atarr llequëñets acheñeneshacop arr patsro ñerra'm esempo esesha'pa' o'ch atet p̄atyenanet ñeñt̄ ama pocteye' enteno Yompor. Tarro'mar chocmach huaponaya ñeñt̄cha' yetpatyene' o'ch atet p̄atey ñeñt̄ ama pocteye' enteno Yompor. Tarraña napa' o'ch notas, atarrcha' yorocheno'tsen ama't erra'tsena acheñer ñeñt̄ orrtatene' ñeñt̄cha' topatyene' po'psheñeñ ñeñt̄ name'ñenaya o'ch atet p̄atyenanet ñamet ñeñt̄ ama't mameshapa' ama pocteye' enteno Yompor.

⁸⁻⁹ 'Ñaña o'ch noterrser: Ñerra'm sechets p̄atyenes ñeñt̄ ama pocteye' enteno Yompor atet ñerra'm sot, setac, seclle', añ poctetsa o'ch sequechpuerr ñeñt̄ chocma atet p̄atse'tatyenes sechets. Ñeñt̄pa' e'ñe atet ñerra'mrrate' e'ñe allorocma o' sepecherr sot, setac, o' serrōterr seclle', o'ch sehuapore'ter. Añ cohuen socop ama't e'ñe sepo'yota'teñoť corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch huapore'terrset coñcha'puetso all parraren tso' ñeñt̄ ama ahuañaño ama't errponaña. Ñaña añ cohuen socop ama't e'ñe setcoťpa' sepshem̄tatquëñoť corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt̄ ama ahuañaño ama't errponaña. Ñaña añ cohuen socop ama't seclloyoť sepshem̄taclo'yeñoť corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'.

Acheñ ñeñt̄ ama ame'ñetsopa' arrpa' all atma'ntatarettet atet ñerra'm carrnero ñeñt̄ chenquëtsa

(Lc. 15.3-7)

¹⁰ Jesúsapa' alla oterranerr pueyochresha':

—E'ñech señoata, añepa'chña atarr asherben senten ñeñt̄ ama ommo'chetso ñeñt̄ atet petsa ñerra'm cheshatoll ñeñt̄ña'pa' e'ñech pueñmañesha' yemtenna. Tarro'marña te'pa' o'ch notas, ñeñt̄ ama pommo'cheñoťeye' name'ñenayo ñocpuetpa' eñalletca'yeña po'mllañoťeñer ñeñt̄cha' cohuañpenahuet. Ñeñt̄ña po'mllañoťeñretpa' chocma Yomporesho'tsenet allña e'ñe cohuen e'mñnotenananetña Yompor pue'ntaño. ¹¹ Po'ño'ch na Ñeñten Acheñetosets añecopña nohuapa attoch na'qeshp̄atyesos acheñeneshas' ñeñt̄ chenquëtsa.

¹² 'Ñehua, ¿ama't atet senteñeña? Ama't erra'tsen acheñer ñeñt̄ echene' shonte' po'carrneror, charroch charra' echen tarraña ñerra'm puemocarrña machayota a'chencachpa'

pamo'mte'ñapa' o'ch sa'nman allohuen po'potantañ ñeñt' o' noventa nuebama all aspeno o'ch ahuo' e'nerraya' puemocarr ñeñt' chenquëtsa. Allcha' e'name'tyera'pa' attotach enter. ¹³ Ñerra'm ña o'ch enterpa' ñeñt'cha'ña atarr coshaterre'. Elloch metanan atto coshenana po'potantañ noventa nueve po'carrneror ñeñt' ama paya'tetso. ¹⁴ Atetca'ye penaña ñaña Sompör ñeñt' pue'ntañotsen; ñapa'cho'ña amaca' mueno o'ch chenca ama't puesheñarrofolla acheñ.

*Attoch e'ñe cohuen yamo'tstera yemo'nasheñ
(Lc. 17.3)*

¹⁵ Jesúsña'p' alla otterraneterr; ñeñt'pa' atet otanet:

—Ñerra'm erroten p'onas semo'nasheña' o'ch ahues ñesho e'ñech sapuet o'ch soctape'chatera' e'ñe cohuen. Ñerra'm cho e'mñoterrespa' allempoñapa' o'ch amo'tso't senterra. ¹⁶ Ñerra'm soctape'chatueña' amach e'mñotasopa' se'ñ puesheñarr amapa' epsheña ñeñt'cha' sa'pocatatapreterre'. Atetcha' sepa allochñapa' ñeñt'cha' eñosets epsheña amapa' ma'psheño'marescha' eñosets allempopa' e'ñech po'ño'ch same'ña ñeñt' ñoñets tarro'mar e'ñech attecma otenet. ¹⁷ Ñerra'mña atetña o' sepohuerña' amach e'mñoterrisopa' allempoñapa' o'ch soch allohuenet ñeñt' chocma apchetsa pame'ñeñot' Yompör. Cotape'chateretepa' ñamet. Ñerra'm o'ch cotape'chatuet allohuenetña', ama't ñetña amach e'mñoterranetopa' sañapa' e'ñech atta senter ñerra'm po'poñ acheñer ñeñt' ama semo'nasheñeyaye. E'ñech atet senteñ ñeñt' acheñer ñeñt' ama ame'ñetso, atet ñerra'mrrate' ñeñt' puehquëñote'na cobra'yene' acheñenesha' quelle ñeñt' gobiernocop.

¹⁸ 'Ñehua, te' po'ño'chpa' o'ch alla noterrser: Ñerra'm errotentcha' e'ñe pocte' sent ñeñt'cha' sena'yes arr patsro, Yompörpa'cho'ña ñeñt' ento'tsen e'ñech attecma e'ñech pocte' enterranet. Ñaña ñeñt'cha' ama pocteye' senteno ñeñt'cha' sena'yes arr patsro, Yompörpa'cho'ña ñeñt' ento'tsen e'ñech attecma amach pocteye' enterraneto.

¹⁹ 'Ñaña o'ch alla noterrser: Po'ño'ch ñerra'm epsheñas arr patsro o'ch e'ñe sa'pocatatue epsheño'mares ñeñt'cha' senamuennan Nompör ñeñt' pue'ntañotsen ñapa' ama't erra'tsena senamueñ chocmach e'ñe atet pennas. ²⁰ Tarro'mar ñerra'm erro'tsen ama't e'ñe epsheña amapa' ma'psheña ñeñt' apchetsa e'ñe pame'ñeñotetan na, ñaña allpa' allo'tsenentcha' e'ñe ñesheto.

²¹ Allempoña Pedropa' a'p'to'tenana' Jesús, ñeñt'pa' atet otos:

—Partseshacha', ñerra'm chocma epaye' errof penen namo'ts, ta'm çerrponoche'tcha'ña neþretne' ñato' e'ñech cançhrocha neþretne'?

²² Jesúsña' atet och:

—Napa' ama notenpe e'ñech cançhrocha peþretne', añña noteneþ atonochcha' peþretne' —ama't cançhrochcha' çharra', ñaña po'poñ cançherr, allponochcha' seþretne'ña samo'ts.

Atto Jesúsapa' eñotatanet ñerra'm amach e'ñe cohuen yeþretnannenopa' Yomporpa'cho'ña amach peretnerrye yaña

²³ Jesúsapa' atet oterraneterr:

—Ñeñto'marña Yompor po'cohuenña ñeñt atto ayochreshattena ña pue'ntañof ñeñtpa' atet ñerra'mrrate' puesheñarr añcha'taret. Ñeññapa' añcha' muenen o'ch a'pocatyesan atto teþa'yeñ allohuen pa'taruasañreçhno.

²⁴ Allempoña all e'ñe a'pocatyesanetpa' allña' huapatoñet puesheñarr pa'cheñer ñeñt tebene' patoner quelle ñeñt allpon tebenpa' ñeñt oteñet shonte' millones. ²⁵ Ñaña' ama echenano allpon quelle alloch tsa'terra ñeñt allpon teben. Po'patronarña' atet otanet: “Te'pa' o'ch sepomuer epuet puetapor epuet ñaña puechemerasha' ñaña o'ch sepomhuerrñañ errponte' eçhyen allochña' ama't allapa' o'ch tsa'terrna atto tebenen.” ²⁶ Allempoña' allenta concorpana'cha pa'taruasañer ñeñt tebene', ñeñtpa' atet otare'ch: “Amach nomporcha' pema'yore'tatsetno, netsa'tuerrþach acoþa.”

²⁷ Po'patronarña' alla morrentera allenta a'rroyer allempocma e'shohuerrñañ all quellquëññañet ñeñt allpon teben. ²⁸ Ñeñtña

pa'taruasañerpa' o' cha'nerr entuerran po'psheñeñ ñeñt parro ataruasatareñtenet ñeñt tebene' ñaña, ñeñtpa' e'ñe coñe'ta quelle. Ñaña' cha rrema'huerre'pa' allenta mueñoche' atet otuer: “Petsa'terrnañaca'ye ñeñt allpon petebenen.” ²⁹ A'rroyerpa' ñaña' allenta concorpana'tana ñaña ñeñt o' mueñocho'tue. Allña' atet och: “Amach pema'yore'tatsetno, netsa'terrþach acoþa allpon ñeñt netebeneþ.”

³⁰ Ñaña' ama't mameshapa' ama pocteye' eñche, ñeñtpa' anemñ allcha' yottamþsach. Allña' allach esempohuach e'ñe tsa'tuerra ñeñt allpon teben. ³¹ Añña po'potantañeçhnoña ñeñt parro ataruasatareñtenetpa' ñetña' ama't mameshapa' ama pocteye' eñcheto ñeñt atet þa ñeñt e'ñe atta e'shohuareñterrtsa ñeñt allpon tebane't po'patronar. Allempoña ñetpa' allenta ahuanmuet po'patronaresho. Allña' a'metanþperet. ³² Allempoña' o' alla agotater po'patronar. O' çherr po'patronareshopa'

atef otapuer: “Pa na’taruasañre, ama’t mamesha ama cohueneshayaye. Pañapa’ atta p̄otare’ten napa’ ahuo’ch neṗretnerreṗ nañapa’ e’ñe atta ne’shohuerrnaṗ ñeñĩ allpon petebenen. ³³ Ama’t e’ñe pocteñ p̄apa’cho’ña o’ch pemueryañ ñeñĩ parro petaruasen. Atef nepena na e’ñe cohuen nemuererrṗa.” ³⁴ Allempoña po’patronarpa’ e’ñe patsrre’mueñesha’ pomuer, o’ apuer ñeñĩcha’ coñchate’ esempohuañen allcha’ña e’ñe tsa’tuerrana ñeñĩ allpon teben.

³⁵ ‘Sapa’cho’ña e’ñe puesheña’ttsosña ñerra’m amach seṗretnere samo’tspa’ e’ñech attecma perres samña Nomp̄or ñeñĩ pue’ntañotsen. Chocmuepa’ch e’ñe cohuen seṗretnannenaña sa e’ñe seyo’chrocmañen.

19

*Atto Jesúsapa’ yeçhatosanet ama asanna’tpahuoyaye
(Mr. 10.1-12; Lc. 16.18)*

¹ Serrpare’tuanerr Jesúsapa’ err Galileoṫ. Arr çherr Judeo, ñeñĩña Judeapa’ e’ñe alla Jordanaso yom̄ta’n. ² Coṫa’huanererr shonte’ acheñenesha’ allñapa’ a’crratyesuerraneterr allohuenet patsnañeferet.

³ Allñapa’ o’ alla huaçherrñañerr ñaña fariseonesha’. Ñetpa’ añ muenenet e’ñe pueshquẽñoṫetpa’ o’ch eñorachet ñeñĩ ama cohuenayaye. Attoña ñetpa’ atef otoset:

—Ta’m ¿pocte’tē’ o’ch yeser yetapor ñerra’m esempo er-rotenot?

⁴ Jesúsapa’ atef otapanet:

—Ama’t selleyareña atef oten Yomp̄or po’ñoñ ñeñĩ aque-llcareṫ ahuaṫoteñ. Ñehua, allpa’ atef oten, Yomp̄orpa’ e’ñe ahuaṫoten allempoteñ es yeçhcatyes allempo yeçhcatan ñaña asheñorr, yeçhcatan ñaña peno. ⁵ Allempo Yomp̄orpa’ atef ot: “Ñeñto’marña yacmapa’ ñerra’m esempoch sena’ta, coyanesha’pa’ o’ch echan puerrollar, añ pocte’ o’huañcha’ tama yemteñet pamo’mte’ allochñapa’ yacmapa’ attochña e’ñe parrocmat epuet puetapor. Attoña epsheño’maretpa’ e’ñech patrra po’chets penet.” ⁶ Attotcha’ña o’huañcha’ puesheña’tetstet, allochñapa’ o’ch e’ñe puesheñarratet. Ñeñĩ atto Parets e’ñe patrratatan yacma epuet puetapor amach çha ellopa’ alla sannerreto.

⁷ Ñetñapa’ atef otereterr:

—Ñerra’m po’ñoçh atetpa’ ¿eso’mare’tña nanña Moisés ñoñets all oteney o’ch yaṗ yetapor papell aquellcareṫ attoch yesannerra, allempoñapa’ e’ñech pocte’ o’ch yeser?

⁸ Ñañaapa’ atef oterraneterr:

—Sapa' ama es sechenoyo seyoçhro ñeñto'marca'yeña Moiséspa' muenatas o'ch sese' setapor. Ama't atet muenataseñpa' tarraña Yompor e'ñe ahuatoteñpa' amaca'yeña atteye' oteno. ⁹ Na te'pa' o'ch notas: Ñerra'm esesha' serre' puetapor, puetaporñapa' ñerra'm ama cho aguënano po'psheñeñ yacma, ñeñt e'ñe atta serre' puetapor, ñaña'pa' çhach ochña'tam'perrana puetaporeshe'mañ ñerra'm o'ch alla yorerranerr po'poñ coyanesha'. Ñeñtpa' ama pocteye' enteñe Yompor. Ñaña ñeñtcha' yorerre' coyanesha' asare't, ñeñtña yacmarpa' çhach chetapreten taporets. Ñeñtpa'cho'ña ama pocteye' enteñe Yompor.

¹⁰ Pueyochresha'ñapa' atet ochet:

—Ñerra'm amate' asapahuo yetapor ama't ahuatapa' amate' tama pocteyayeña yocop o'ch yeyore coyanesha' ñeñtcha' yetapor ye'pa'.

¹¹ Ñaña'pa' atet otanet:

—Tarraña atetpa'cho'ña e'ñeca'ye poctet tarraña ama allohuenacmaye' çhennasoña seyoçhro atet tarro'mar ama allohuenacmaye' seyçhenona atet. Ñeñtpa' aña eñotene' ñeñt atet cotape'chaten Yompor. ¹² Ñehua, atet ñerra'm puesheña'tets yacma ñeñt atta eñalletenet e'ñech atta yeçhquënet po'chets amach mueneñeto coyanesha'. Ellonetpa' eñall ñaña po'potantañ yacmanesha', ñetñapa' çhoch acaparettenet ñeñto'marña amach mueneñeto coyanesha'. Ellonetpa'cho'ña eñall ñaña po'potantañ yacmanesha', ñetñapa' añecpach ama mueneñeto coyanesha' esheccha' e'ñech aña ma'yoçhrenet Yomporecop attoch atarr ayochreshatena ña pue'ntaño't. Ñeñt atet cotape'chenet Yomporecop ñeñtpa' e'ñe pocte'. Attepa'chña pet ñerra'm Yompor cotape'chatenahuet atet.

Atto Jesús'pa' bensare'tam'psapan cheshaneshha' ñeñt huapatoñet

(Mr. 10.13-16; Lc. 18.15-17)

¹³ Allempoñapa' huacha'tachet ñaña shonte' cheshatollesha' Jesúsesho. Ñetpa' añecopña huacha'tachet o'ch a'p'lla'yesapanet Jesús attoch bensare'tam'psapanet. Jesúsña pueyochresha' allempo entapan ñeñt huacha'tate' cheshaneshachno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto. ¹⁴ Tarraña Jesúsñapa' atet otanet:

—Pocte'ña'cho' semnachñaca'yeña cheshaneshha' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na e'ñe atet ñerra'mrrate'

cheshatoll, ñetcha' o'patenetña Yompor po'cohuenña ñeñt' atto ayochreshattena ña pue'ntañot.

¹⁵ Allempoña Jesús pa' a'p'lla'y esapan cheshanesha' allohuenet e'ñe pue'sheña'ttset. Allempoñapa' ahuerr allot.

Atto pue'sheñarr ñeñt' huepueshameñ ñeñt' atarr ec'llayoret ñaña'pa' eñorana'tosana Jesús
(Mr. 10.17-31; Lc. 18.18-30)

¹⁶ Allempoñapa' huapa pue'sheñarr yacma Jesúsesho, ñeñt'pa' ora huepueshameñ. Ñaña'pa' atet otos:

—Maestro, p'apa' atarr cohuen acheñreḡ, te'pa' o'ch p'otapuen ¿errotena'tcha'ña nepaña na e'ñe cohuen attochña napa' corretsanach e'ñe tayoteñ ama't errponañohuen?

¹⁷ Jesúsñapa' atet otaḡ:

—Eso'mare't p'otenenña napa' atarro' cohuen acheñren. Arr arromña'enesha' ama't e'ñe pue'sheñarrapa' ama eñalleña ñeñt' e'ñe cohuen acheñer. Ñap'taña Yompor ñeñt' e'ñe po'ño'ch cohuen. Ñerra'm añte' pemnen attoch p'apa' corretsaḡach e'ñe tayoteñ ama't errponañohuen añ poctetsa p'ocop o'ch e'ñe pepohuoñ ñeñt' atet oten Yompor.

¹⁸ Huepuesha'ñapa' alla a'p'to'tererr:

—¿Erra'tsen'te'ña ñoñets ñeñt'cha' atet nepohua?

Jesúsñapa' atet otererr:

—Ñeñt'pa' añca'ye, amach pemtsatsto acheñ, amach pechtapretatsto taporets, amach petyesatsto, amach petoma'tamḡpsatsche p'amo'ts e'ñe atta. ¹⁹ Ñaña e'ñe pemorrenteño'tpa' pem'cha'na'ch'cha' p'ompor ñaña p'achor. Ñaña añcha' atarr cohuen pemorrenta p'amo'ts e'ñe atet atarr pemorrentena e'ñe p'añeña.

²⁰ Huepuesha'ñapa' alla oterranerr Jesús:

—E'ñe cheshoteñ ora añe'chnopa' napa' e'ñeca'ye netsotueñ. Ta'm ¿erra'tsenmeñte'ña ñeñt' nepalltena?

²¹ Jesúsñapa' atet otererr:

—Ñerra'm añ pemnen o'ch e'ñe petsotua ñeñt' pepalltenmeñ te'pa' añcha'ña atet peperra, o'ch ahuerreḡpa' o'ch pepomhuerr ora allpon ñeñt' pechyen o'ch p'apa'yera' huochañeshachno ñeñt' atarr es pallta'yetsa, attochña p'apa' pecherrcha' ñeñt' atarr nanac sherbets Yompor pue'ntañot. Allempochña pehuerrapa' o'ch p'oc'terren attoch e'ñe neyochresha' neperreḡ e'ñe poctacma.

²² O'ña e'mhuan huepuesha' ñeñt' atet och Jesús pa' ñaña'pa' puellquēnesha' ahuerr tarro'mar ñapa' shonte' esocmañen echyen.

²³ Jesúsñapa' atet otan pueyochresha':

—Po'ñoçh napa' o'ch notas: Ñeñt atarr eçllayoretpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña pue'ntañot. ²⁴ Ñeñtpa' atetcha' netma'ntacha. Yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt eçllayoreñ ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁵ Pueyochresha'ña allempo e'met Jesús atet oten, ñetñapa' çha muene' lleca'rrtetpa' atet otanna'tyenet:

—Tarraña ñerra'm atette'pa' amate' esesha' a'queshpatareterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁶ Allempoña Jesúsapa' atta cohua'yesanetpa' atet oterraneterr:

—Sa arromñañeneshaspa' amach es erroñenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁷ Allempoña Pedropa' atet och:

—Partseshacha', po'ñoçh yapa' o' e'ñe yesuanom ora allohuen attoch e'ñe yocterreñ. Yapa' ¿eso'tcha'ña apuerreyña Yompor?

²⁸ Jesúsapa' atet otanet:

—Po'ñoçh notenes, allempoch etserraterr pats allempoch nanorruerr neconaño allcha' necohuenetuerra nepartsoteñoñ na Ñeñten Acheñetosets sapa'cho'ña allcha' sanorryesuerr seconañeçhno e'ñe puesheña'ttsos çharra' puechena epa seconañ ñeñtes noctene'. Sa ñeñtes noctene' allcha' sanorryesos allotcha'ña sa'mcha'taretterraña añecop ñeñt çharra' puechena epa Israel po'mrenñenesha'.

²⁹ Jesúsapa' alla oterraneterr:

—Allohuen erra'tsencha' acheñer ñeñtcha' e'ñe sehuanmue' allohuen ama't pa'pacillohuen, ama't pa'mo'nasheñnesha' ñato' poçhanesha' ñato' pompor, pachor ñato' po'patseñ, attochña na e'ñech cohuen sherberrnet, ama't erra'tsencha' ñeñtcha' sehuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharrochcha' çharra' alla agapyerret. Elloña tsapatonetpa' o'ch aguërret ñeñt alloch ñetpa' corretsetach beñecpuen pocsheñeshocmañen. ³⁰ Te'pa' señoche'pa'ch, eñall shonte' acheñ ñeñt ama esoye' senteno sa

* **19:24** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeññ atarr asherben sentyen sa te', tarraña ñetña allempopa' amach asherbenaye' enterraneto Yompor.

20

Atto Jesúsapa' toma'ntaterraneterr e'ñech allponeshacma atsa'taretta allohuen ataruasañechno pamtarr yet

1 'Yompor po'cohuenña ñeññ atto ayochreshattena ña pue'ntañof, ñeññpa' añ toma'ntena ñeññ atet pena puesheñarr ane'tañ. Ñañaapa' ahuatecma ahua'muen e'nyenaya' acheñ ñeññcha' taruasat pa'mro o'ch toteññañeta' puenareñ.

2 Ñeññ allpon entospa' atet otosanet: "Ama't semno o'ch setaruasena' na'mro. Pamta'tetspa' netsa'tasach allpon quelle ñeññ paterr denario."* Ñetñaapa' e'ñe pocte' eñchet allenta mueñanet pa'mro, allcha' totoset narmetsmo.

3 O'ña enome'ta'muenpa' o' alla ahuerterr allecma shontena acheñenesha' ñeññ e'nyene' taruas. Allñaapa' entuerranerr tama allponsheña, ñetpa' ama es otteneto.

4 Ñañaapa' atet otosanet: "Sapa'cho'ña ñerra'm semne'pa' o'ch setaruasa' na'mro; napa' netsa'tasach allpon ñeññ poctetsa." Ñetpa'cho'ña allenta ahuanmuet pa'mro allcha' totoset ñamet narmetsmo.

5 Allempo chap poctopa' alla ahuerterr ane'tañ, alla entuerranerr po'potantañ acheñ. Ñetpa'cho'ña attecma otuerraneterr ñeññ atet otan ñorra' po'potantañ. Ñetpa'cho'ña allenta mueñerraneterr pa'mro allcha' totoset ñamet narmets.

O'ña ellerrenmochpa' o' alla ahuerterr, allñaapa' entuerranerr po'potantañ acheñ. Ñetpa'cho'ña e'ñe attecma otuerraneterr ñeññ atet otan ñorra' po'potantañ. Ñetpa'cho'ña allenta mueñerraneterr pa'mro.

6 Atteña o' ellerrenpa' o' alla ahuerterr, allñaapa' entuerranerr po'potantañ acheñ, ñetpa'cho'ña ama es otteneto. Ñetpa'cho'ña atet otuerraneterr: "Sapa' ¿eso'mare'tña atta sellapene't tomcha'tyesetsña arrma? Amaña es sotteno."

7 Ñetñaapa' atet ochet: "Yapa' amaca'yeña eseshaye' yetaruasatenaye ñeñño'marca'ye ama es yotteno." Ñañaapa' atet otanet: "Ñehua, sapa'cho'ña o'ch ahues na'mro, ama't mameshapa' setaruasa'nen. Napa' netsa'tasach allpon ñeññ poctetsa."

8 O'ña puenaso'tenpa' ane'taññaapa' otosan ñeññ cohuanñpene' allohuen pa'taruasañer: "Te'pa' o'ch pechore'ter ataruasañnesha', o'ch petsa'tyesapuerranet e'ñe puesheña'ttsocmuet. Añcha' ñanom petsa'tapuerra ñeññ taruasosets chenta' alloteñach

* 20:2 Denariopa' quelle ñeññ allpon tsa'tenet pamtarr ñeññ taruasets all pa'nyo.

p̄amotech tsa'tyesapuerrahuet attotach petsa'tuanet ora
 allohuenet ama't ñeñt̄ aromtañohuen." 9 Ñeñt̄ña taruasosets
 ellerronet̄ ñet̄ñapa' o' huaçherret. E'ñe allponeshacma
 atsa'taretetyesapuerret ñeñt̄ paterr denario. 10 Atteña
 allempo o' huaçherra ñaña ñeñt̄ taruasosets ahuat̄ecma,
 ñet̄ñapa' çha otenapuetañ ñato' atoncha' atsa'taret̄tapuerret.
 Tarraña ñet̄pa'çho'ña e'ñe puesheña'tt̄socmuet̄pa' e'ñe
 allponeshacma atsa'taret̄tapuerret ñeñt̄ paterr denario.
 11 Allempo agapet̄pa' ñet̄ñapa' çha po'poñ entet, çha
 e'moñe'tueret ane'tañ. 12 Ñeñt̄o'marña atet̄ ochet: "Añenesha'
 ñeñt̄ huapatsa chenta'pa' ñet̄ñapa' mamesha taruasoset.
 E'ñe allponeshacma petsa'tapuerranet ñeñt̄ e'ñe allpon
 petsa'tapuerria yañ. Ama't yapa' o' yellapen ya'ñet̄se'
 yetaruas, nanac etay atsrret̄ all yetaruasen. Eso'mare'tña e'ñe
 allponeshacma petsa'tapuerria ñeñt̄ allpon petsa'tapuera
 ñaña ñeñt̄ taruasosets mame'." 13 Allempo atet̄ otuer
 ataruasañ, ane'taññapa' atet̄ och: "Ama, masheñcha',
 çhoye' neshquēnpe, e'ñe allpona netsa'tenpa' ñeñt̄ allpon
 ya'poc̄tata'muen aromtaña. 14 Te'pa' p̄anerr peçllayor,
 orrerrep̄. Napa' e'ñe poc̄te' nenteñ na allponcha' netsa'çha
 ñeñt̄ huapatsa chenta' allpon netsa'tasa saña. 15 Sapa'
 ama't poc̄teye' senteñe allpon ñeñt̄ e'ñe nocma napa' e'ñech
 atet̄ nepe' ñeñt̄ atet̄ nemnen na. Ñato' tarro'marte' çha
 muene' se'moñe'tenenña' napa' atarrca'ye amuerañan."
 16 Ñeñt̄o'mar te'pa' o'ch noterr̄serr: Ñeñt̄ ama esoye'
 senteno sa te' tarraña ñet̄ña allempopa' atarrcha' asherben
 enterranet Yompor. Ñeñt̄ña atarr asherben sentyen te', ñet̄ña
 allempopa' amach tama asherbenaye' enterraneto Yompor.
 Ñeñt̄o'mar te'pa' o'ch alla noterr̄serr: Ama't shonteñña ñaña
 ñeñt̄ ahua'ñareñ ñeñt̄cha' neyochresha' neperreñ, tarraña
 ñet̄pa' e'ñe puesheña'tt̄seta ñeñt̄cha' e'ñe poc̄te' nenterr na
 ñeñt̄cha'ña e'ñe neyochresha' neperr poc̄tacma.

Allempo Jesús̄pa' alla eñotaterraneterr ñapa' çhocmach amt-saretterra

(Mr. 10.32-34; Lc. 18.31-34)

17 Jesús̄pa' ahuenerr Jerusaléñoneñ pueyochreshohuen. O'
 ahuanenan pueyochresha' a'yenteye' allñapa' atet̄ otnenanet:

18 —Te' po'ñoçh o' ahueney Jerusaléño, allcha'
 pomatater̄net na Ñeñten Acheñetosets. Añcha'
 nerrmaterre' ñeñt̄ pa'm̄cha'tareternesha' pen allohuen
 judionesha' po'cornaneshar ñaña ñeñt̄ atarr etsotayenayeñ
 ñoñets ñeñt̄ atet̄ anareñ. Ñet̄ñapa' atet̄cha' otyesnet
 na'mtsaretterrepa'to', 19 o'ch pomuerr̄net po'poñ acheñesho
 ñeñt̄ ama judioneshayaye. Ñet̄ña pueche'tatseteñoñet̄anpa'

allcha'ña achmāre'terrnet, ashterrnetcha', attōtcha'ña o'ch corso'tam̄perrnet, tarraña poma'pamtañoch alla netanterra.

Ñeñt pachor pen Jacobo ñaña Juan, ñañaapa' enamuenan Jesús attoch anorrcha'tyesuerr puechoyoresha' Jesúsesho

(Mr. 10.35-45)

²⁰ Allempoñapa' ponmosya ñeñt pachor pen Jacobo ñaña Juan ñeñt Zebedeo puechemerasha'. Huapa epuet epsheño'mar puechoyor, ñañaapa' concorpana'tosana Jesús attoch es enamos. ²¹ Jesúsñapa' atet otaḗ:

—¿Eso'tña pemnen?

Ñapa' atet otos:

—Napa' añ nemnen te'pa' o'ch pemnatapon añ nechoyor epsheño'mar o'ch anorruerret pesho allcha' ḗa'm̄cha'taretterra e'ñe pecohuenño. Puesheñarrpa' anorrosepa'ch pecohuenroḗ, po'psheñeñña' anorrosepa'ch pe'chcoterōḗ, allcha' cohuentapreterpet.

²² Jesúsñapa' atet otanet:

—Sapa' amaca'ye señoḗe ñeñt po'ño'ch senamuenen. Añca'yeña senamuenen attoch semuero'chtapreterrna saña. Ta'm̄ ¿e'ñeḗe' po'ño'ch pocte' senteñ o'ch semuero'chtterra saña tarro'mar napa' ḗocmach na'muero'chtataretterra?

Ñeñt muero'chteñetspa' Jesúsapa' atet toma'ntatanet ñerra'm̄rate' atarr pesherr es yorren orram̄tso ñaña atto yapatarettena e'ñe atet ñerra'm̄rate' ḗo ya'mtsaretterra Yomporecop. Ñetñapa' atet ochet:

—Yapa'ḗo'ña atetcha'ca'ye yepe'.

²³ Ñañaapa' alla otarraneterr:

—Ñehua, po'ño'chpa' sa'muero'chtataretterrach saña attescha' ñerra'm na, sa'mtsaretterrach saña. Tarraña añña attoch sanorryesos nesho necohuenroḗ ñaña ne'chcoterōḗ allcha' secohuentapreterrna ñeñtapa' amachca'ye naye' semnaterraye. Añcha'ña anorryesuerrets all ñeñt e'ñe o'patatenna Nompōr.

²⁴ Añña po'potantañ pueyochresha' ñeñt ḗharrasheña allem̄po e'met ñeñt atet enamuen Jacobo epuet pa'mo'nasheñ Juan, ñetñapa' ama pocteye' eñcheto ḗha muene' e'moñe'chet. ²⁵ Allempoña Jesúsapa' alla ḗhore'terranet allohuen e'ñe ñesho ñeñtapa' atet otanet:

—Sapa' señoḗeñte' ñeñt atet pena po'poñ acheñenesha' ñeñt ama judioneshayaye. Ñet ñeñt pa'm̄cha'tareḗer penet e'ñech pa'm̄cha'no'chteñocmañen pomnaren ḗa'yenan allohuen pueyochresha'chno. ²⁶ Sapa' arepa'chña atteye' seḗpanna'tatsto e'ñe sommo'cheñoḗ. Socoppa' añña poctetsa o'ch atet sepena. Ñerra'm̄ erra'tsenotes ñeñtes atarr

añcha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruasetso po'potantañecop.
 27 Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen seforrena po'potantañecop atet ñerra'mrrate' acheñ ñeñt atarr taruasetso e'ñe atta. 28 Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrrate' napa' atarr añcha'tare't sentenen. Napa' añecopña nehuapa allochñapa' nachña sesherboseña sa, ñeñto'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesús a'crraterranerr epsheña aporo'yet

(Mr. 10.46-52; Lc. 18.35-43)

29 Allostña'p' alla meterreterr Jericótpa' co'ta'huanererr shonte' acheñenesha'. 30 Allcha' oñmuetpa' allñapa' ahuepa't anorros epsheña aporo'yet e'ñe toñetopño. Ñetña eñotatare'ttet añ huetsa Jesús. Ñeñña aporo'yetpa' allenta rranare'tapet Jesús, ñeñtpa' atet otapet:

—Pemueraye'chnomya, Ayochreshate, p'apa' ñeñtep Davidna'tarep.

31 Acheñenesha'ñapa' cha muene' che'ptare'tnometña aporo'yet, atet otoset:

—O'hua semma.

Aporo'yetñapa' elloña alla rranare'terreterr atet otereterr:

—Pemueraye'chnomyañaca'ye, Ayochreshate, p'apa' ñeñtep Davidna'tarep.

32 Jesúsñapa' alla tomos o' chore'tanetpa' atet otanet:

—¿Eso'tña semnen ñeñtcha' atet neposes?

33 Ñetñapa' alla otereterr:

—Ayochreshate, yapa' añ yemnen o'ch pecuatnomuey attoch o'ch cohuen yenterrapa.

34 Jesúsñapa' allenta muerosanet attoña ñapa' a'p'illacle'chosanet. A'p'illacle'chuanetpa' aporo'yetñapa' allorocma enterret e'ñe cohuen. E'ñe cohuerrtsetpa' cha co'ta'nmuet ñamet Jesús.

21

Allempo chap Jesús Jerusaléño

(Mr. 11.1-11; Lc. 19.28-40; Jn. 12.12-19)

¹ Atteñapa' o' čhačha'tet allame'tets Jerusaléño. Chapuet aspentó ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé. O'ña čhapmochet all anetso, ² Jesúsñapa' atet otnoman epsheña pueyochresha':

—Sapa' o'ch sota o'ch sečhap a'yenteye' e'ñe allara anetso. Allñapa' allcha' sentos ashen all huanquëñet epuet ñaña puechoyor ñeñt rre'ptor. Ñeñña ashenpa' o'ch sepyam̄psospa' o'ch sanerrnan. ³ Ñerra'm esesha' erroř sotapue' sañapa' atetcha' sotosanet: “Yepartsesharca'ye muenene'ña añ ashen. Mameshapa' o'ch alla apuerrsa'.”

⁴ Ñeñtpa' tarro'mar atet p̄a allochñapa' attoch etsota añ po'ñoñ ñeñt a'mtaye't ahuat Yompor po'ñoñ. Ñeñtpa' Yompor eñorataye't atet:

⁵ Atetcha' soch sióno'marnesha' ñeñtara jerusaléño'marnesha': “Secue'tach, te'chca'yeña huaponasaña ñeñtcha' Sa'mcha'tareter seperr. Atto huena ñapa' amaca'ye pommo'cheñoťeye' čhapoña all, ñeñto'marña ama't rre'ptorechora ashenpa' ñeñtachca'ye monta'nená.” Arrpa' allohua huañ añ po'ñoñ ñeñt a'mtaye't ahuat Yompor po'ñoñ.

⁶ Allempoña pueyochresha'ña ñeñt mueñapa' ñetñapa' allenta ahuanmuet all anetso. E'ñe atet otapanet Jesús, ñetñapa' e'ñečo' atet p̄oset. ⁷ Allempoñapa' huapaterrñañet ashen epuet ñaña puechoyor. Ñetñapa' nohuerret pa'shtam ashnache'ñopa' montatueret Jesús. ⁸ Shonte' acheñenesha' ñetñapa' toťma'tyesoñet pa'shtam toño allcha' oñem Jesús. Po'potantañečñoñapa' tsorrmore'tyeset tsach pue'morer allo topanetyeset toñ. ⁹ Allohuen acheñenesha' ñeñt otáčhetsa ñaña ñeñt coťa'huanene' chenta' ñetñapa' puerrannarteñoťetpa' atet atarr cohuentatyesneññañetpa' atet otenet:

—¡Acsherrapo'ch allohueney! ¡Aye'chočhtaterrapo'ch Jesús ñeñt añcha'taret David po'mreñeñ! ¡Aye'chočhtaterrapo'ch Jesús ñeñt llesensen Yompor! ¡Ya'ye'chočhtaterrñañepa'ch Yompor Parets ñeñt pue'ntaño'tsen!

¹⁰ Atteñapa' o' čhap Jesús Jerusaléño. Chap allpa' allohuen anetso'marnesha' epaye' cohuanrrortapet. Ñetñapa' atet otyeset:

—¿Esesha'te'ña añ acheñer?

¹¹ Acheñenesha' ñeñt coťa'nene'pa' ñetñapa' atet otoset:

—Añca'yeña Jesús ñeñt a'mtene' Yompor po'ñoñ. Ñapa' Galileoťca'ye huena allara anetso Nazareto.

*Atto Jesúsapa' a'cohuentatosan Parets pa'paquëll
(Mr. 11.15-19; Lc. 19.45-48; Jn. 2.13-22)*

12 Allotña Jesús pa' be'tosos Parets pa'paclo. Allñapa' mueño'tuosan allohuen ñeñt pomatsre'tetsa all ñaña allohuen ñeñt rañta'yetsa. E'ñe čha'nmačha'tatosanet allot, a'coye'tamšosanet po'mesačno allecma camyatyenet po'čllayoret, a'coye'tuosan ñaña allecma anorryen ñeñt pomuene' yepečno. 13 Allempoñapa' atet otosanet:

—Yompor po'ñoñ ñeñt atet anuaret ahuatoteñ allñapa' atetca'ye oten Yompor: “Añ ñeñt nepaquëll nepenpa' añečpaca'yeña sherben allecmach ma'yochennet.” Tarraña sañapa' e'ñe atet sepeññaña Yompor pa'paquëll ñerra'mrrate'eñet ñeñt epotyetsa mapuetpono.

14 Allña Parets pa'paclopa' huacha'toña aporo'yetečno ñaña ñeñt checa'repayets. Ñaña' e'ñe a'crratyesapanet. 15 Añña ñeñt pa'nčha'tareternesha' pen allohuen judionesha' po'cornaneshar epuet ñaña ñeñt atarr etsotayenayeñ ñoñets ñeñt atet anaret, ñetñapa' entoñet ñeñt atarr cočhnesha' atet orrtatyen Jesús ñeñt ama't eseshapa' ama puentareto. Ñaña e'mueññañet cheshanesha' all Parets pa'paclo puerranarotepa' atet otyenet:

—¡Aye'chochtaterrapo'ch Jesús ñeñt añcha'taret David po'mreneñ!

Ñetña atet entetpa' ñeñtepa'tcha' atarr atsrre'matahuet. 16 Allempoñapa' atet ochet Jesús:

—¿Ama't pe'muenoña atet otačhre'tapañ cheshanesha'?

Jesúsña' otanet:

—Ne'mueñca'ye. Sañapa' ama't selleyareña Yompor po'ñoñ. All anaret ñoñetspa' ñeñtña atet oten:

Ama't chesha'tollesha' e'ñe puenamotet e'ñech cohuen pe'ñoratos ačhotachre'teñtso. Ama't ñeñt ora momuenmeñ pe'morrtatoscha' e'ñe cohuen pocop.

17 O'ña yerpatuerranet añ ñoñets ñeñt atet anaret ahuatoteñ ñocop, allempoña sa'nerranet ñeñte anetsrotpa' o' alla ahuererr Betanio. Allpa' allecma ommuena.

Allempo Jesús pa' eñora higočecop amach eñalletatsto pue'mer

(Mr. 11.12-14, 20-26)

18 Tsapañ puetaren alla ahua'muenerr Jesús anetso Jerusaléño. Toñoñapa' čha cheporra'nma. 19 Allñapa' entnoman higoč toñetopño'tsen. Ponmosya ama entoñe pue'mer, pasopanrepa'tcha' entosñañ. Jesúsña čhepa'tcha' eñorotsa higočecop, ñeñtapa' atet otos:

—¡Arepa'ch eñalleterro pue'mer ama't e'ñe ahuata!

E'ñe otue'pa' allorocmuepa'tcha' hueya'huaña pasopaner.
 20 Pueyochresha'ñapa' e'ñe enteñet o' hueya'huaña higoch-pan. Ñetñapa' atta cohuanrrorteñet, atet otanna'tet:

—Erroteno'uañaca'yeña o' a'uyatachña e'ñe mamecmate'.

21 Jesúsña atet otanet:

—Po'ño'chca'ye o'ch notas: Ñerra'm seyemteña Yompor, ama čhoye' se'charrtateno seyocher, amach añayaya atet seño atet nepa' higoch. Añe'nachña e'ñe setsoten ñeñ' ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop, “Añ aspenetpa' rrote'tepa'ch arroť, arropa'chña esha'tosa sa'po allcha' e'ñe chencosa”, aspenetñapa' atetcha'cho' pónasa. 22 Ama't allohuen erra'tsencha' es senamñ Yompor e'ñe sema'yocheñoť, ñerra'm čho senamueñ e'ñe seyemteño'cmañen, ñeñ'ñapa' sagařcha'.

Atto allsensarettena Jesús

(Mr. 11.27-33; Lc. 20.1-8)

23 Allempoña Jesús'pa' o' alla čherrerr Jerusaléño, allñapa' be'ťosuerrerr Parets pa'paclo. Allñapa' yečhatuerranerr acheñenesha'. Atto yečhatenan acheñenesha'pa' allempoña huačha'toña ñaña ñeñ' pa'm'cha'tareťernesha' pen allohuen judionesha' po'cornaneshar epuet puesheña'tets ñeñ' pom-pornesha' pen allohuen judionesha'. Ñetñapa' atet otoset:

—Ñehua, yapa' añecop yohuena yemneñ o'ch p'otey ¿erroťe't apuenpetña llesens? ¿Esesha'tña p'apueñe'ña llesens attot p'orrtatyenña ñeñ' čhocma attecma pepa'yena?

24 Jesúsñapa' atet otapanet:

—Ñehua, napa'cho'ña nemneñ o'ch na'p'ťo'tapas samña ama't patrra ñoñets. Ñerra'm sanaposencha'pa' napa'cho'ña attochña notapas namña allot apuennetña llesens ñeñ'ťo'mar atet nepena. 25 Sapa'cho'ña o'ch sotosen, ahuañmo'cha allempo apate'ť Juanañ Yomporecop, ñapa' ¿eseshatña llesense' ñato' Yompor amapa' acheñaťe' apue'ña llesens? Nemnen o'ch sotosen ñeñ' atet soctape'chen sa.

Ñetñapa' e'ñe a'nahua otanna'tyeset:

—Ta'm erroťcha'ca'ye yochťe'. Ñerra'm čha yoch Yomporeshoťca'ye apetña llesens, ñapa' čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” 26 Elloña ñerra'm čha yoch acheñeshoťa apet llesenspa' acheñenesha'ñapa' čhate' e'moñe'tyet, tarro'mar ñetpa' e'ñe cohuen eñchete'ť Juanañ, čhocma otyeñet ñapa' ñeñ'ca'yeña a'mťose' Yompor po'ñoñ.

Ñeñto'marña ñetpa' mecha'teñet acheñenesha'.
 27 Ñeñto'marña ñetpa' atet ochet Jesús:

—Ta'm yapa' amaca'yeña yeñoteñe; erroñte' huapaña Juanañ, erroñte' apetña ñaña llesens.

Allempoña Jesús'pa' atet oterraneterr:

—Napa'cho'ña te'pa' amach notaso samña allot apareten namña llesens attot atet ne'pa'yena.

Atto Jesús'pa' toma'ntaterraneterr puesheñarr yacma atet penaña epsheña puechemer

28-32 Jesús'ña'pa' alla oterranerr judionesha' pa'micha'tareñernesha':

—Ahuañmo'cha allempo huapa Juanañ, ñapa' añecop huapa attoch ñach seyçhaterre' allohuen ñeñt e'ñe pocte' enten Yompor. Tarraña sañapa' ama same'ñyo. Aña e'ñe cohuen ame'ñapaya ñeñt atarr ochñañeneshaçhno atet ñerra'm añ ñeñt po'taruas pa'yene' e'ñe puehquëñoñet cobra'yeñet acheñeneshaçhno quelle ñeñt gobiernocop ñaña aña e'ñe cohuen ame'ñapayaña Juanañ ñeñt atarr ecañoresha'teçhno. Allempo sentanet atto ñetpa' cotape'cherret ello cohuen Yomporecop, sañapa' amaña eseshas cotape'cherrayeña cohuen Yomporecop attoch o'ch same'ñera samña. Ñeñtña te'pa' o'ch netma'ntacha. Ñehua, puesheñarr yacma eñall epsheña puechemer. Ñaña'pa' atet otenana' puesheñarr puechemer: "Te'pa' nechemere, o'ch ahua'muene'p ya'mro allcha' petaruasa'muen."* Ñaña'pa' ellonta otapan pompor: "Amaca'ye nemno, amachca'ye neto." Tarraña elloñapa' cotape'cherran cohuen allempoñapa' ahuo' pompor pa'mro taruasats. Allempoña pomporpa' ahuo' ñaña po'psheñeñ puechemeresho, ñapa'cho'ña atet otos atet otuan po'psheñeñ puechemer: "Te' nechemere, o'ch ahua'muene'p ya'mro allcha' petaruasa'muen pa'ña." Ñaña'pa' e'ñe cohuen otapan pompor: "Ñehua, apacha' o'ch ahuen o'ch netaruasa'muen ya'mro." Tarraña ñaña'pa' ama't atet otañpa' ama to.

Jesús'ña'pa' alla oterraneterr:

—Te'pa' o'ch na'p'to'tas sa, ñeñt epsheña puechemer, ¿era'tsena't sentenña sa ñeñt e'ñe po'ñoçh atet petsa ñeñt atet muenen pompor?

Judionesha'ña pa'micha'tareñernesha'pa' ñetña'pa' atet ochet:

—Añca'ye ñeñt ñanom, ñeñt otapue' ñapa' año'ch to taruasats tarraña elloñapa' allenta ahuo' taruasats pa'mro. Ñeñtca'yeña etsotene'ña ñeñt atet muenen pompor.

Jesús'ña'pa' atet oterraneterr:

* 21:28-32 Ñeñt po'taruas penet ñetpa' toteneta' uva.

—Ñeñto'marña te'pa' o'ch notas: Ñeñt puehquëñote'na cobra'yene' acheñeneshachno ñaña ñeñt atarr ecañoreshafečno, ñetñapa' po'ñočh allenta aguërret Yompor po'cohuenña ñeñt atto ayochreshattena ña. Sañapa' amaña allentaye' saguëreña samña tarro'mar sapa' chaña atarr se'charrtatenña seyočher.

Atet atma'ntatarettena ñeñt ataruasañečno ñeñt ama co-huenayaye

(Mr. 12.1-12; Lc. 20.9-19)

³³ Jesúsñapa' alla oterranerr judionesha' pa'mcha'tareternesha':

—Te'ñapa' se'mñotencha', napa' o'ch netma'ntatasa po'poñ. Eñall pueheñarr ane'tañ, ñaña' nare'tanatatnoman shonte' uvach; pa'muerñapa' e'ñe ora uvachmatatue. E'ñe concha'tam̄pesue allotñapa' eñan ñaña allcha' a'pecho'toñet uvas po'ñer. Allñapa' tomatatnoman torrepo' allotcha' cohuan̄psoñet pa'muer.

'Tomatuepa' na'nman ñeñtcha' taruasatats ñeñtcha' coyerrahuet allpon ñerra'm esempoch toteñet. O'ña nare'tanatatuepa' o' ahuo' po'poñ anetso bačhayo.

³⁴ Chap allempo yen uvachllom̄pa' ñaña' mueñerran po'psheñečno pa'taruasañer ñetcha' enamuertseta' uvachllom̄ po'psheñeñ pa'taruasañesho ñeñt cohuan̄pene' uvachma'. ³⁵ Allempoña chen̄et allpa' enamosan ñeñt allpon o'patena pamo'mte', arepa'tcha'ña es apapuenayeña uvachllom̄, elloña ñeñtapa' cha rremapoñet pa'taruasañer, cha nalle'tapueñet pueheñarr, cha muetsapet po'psheñeñ, po'psheñeñpa'cho'ña cha rrolle'tapoñet.

³⁶ Allempoña ñeñt pamo'mte' pen uvachma'pa' o' alla mueñerranerr po'psheñečno pa'taruasañer shonte'. Allempo chapuet ñamet allpa' attecma erro'tuanen a'pare'ttapuet ñamet.

³⁷ 'Allempoña ñeñt pamo'mte' penetpa' ñaña'pa' atet ot: "Te'pa' o'ch nemñe all ñeñt e'ñe na nechemer. Ñato'rraña ñeñtapa' mecha'na'tapetcha'."

³⁸ Ñeñtapa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenarem̄ esempo. Ñapa'cho'ña te'pa' o'chca'ye yemtsaḡ allochñapa' yachca'yeña e'ñe o'paterrayaña pompor puenarem̄. Te'pa' o'ch ahuey o'ch yemtsaḡ ñaña."

³⁹ Allempoñapa' o' rromapet o' chetare'tnomet narmetsmo't a'yenet, allña muetsapetña ñaña. Arrpa' allohua atet toma'ntata Jesús e'ñe ñañeña.

⁴⁰ Allempoña Jesúsapa' atet oterraneterr:

—Ñehua, ñerra'm esempoch huerra ñeñt' pamo'mte' pen ataruasañechnopa' ¿señoteñe'tña ñetpa' atetcha' aḡaretterret?

⁴¹ Judionesha'ña pa'mcha'tareternesha'pa' atet oterretter:

—Ñerra'm huerrachpa' ñeñtña ama matsrre'mñaopa' e'ñech a'cclatuerranet pamo'mte', nanaccha' coñchatuerranet; narmetsmoñapa' elloch nerranerr po'potantañ ñeñtcha' taruaserrtserr all uvachmo. Nerranerrcha' ñeñtcha' e'ñe po'ñoçh apuerre' pue'mer ñerra'm esempoch yen.

⁴² Allempoña Jesúsapa' atet oterraneterr:

—Sapa' ama't ahuatapa' ama'tña selleyareña ñeñt' atet auaret Yompor po'ñoñ ahuatoteñ. Tarro'mar ñeñt'pa' atet oten nocop, na atma'ntataret mapue'. Ñeñt'pa' atet oten:

Añ mapue' ñeñt' ama pocteye' entyeno ñeñt' tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll. Ñeñt'pa' Yomporca'yeña atet ḡatene', ñeñto'marña yapa' e'ñe cohuen yenteñ. Arrpa' allohua atet toma'ntaterrerr Jesús e'ñe ñañeña.

⁴³ Ñeñto'marña sa ñeñtes judioneshaspa' te'ña Yomporpa' puerratañperrescha' po'cohuenña ñeñt' atto ayochreshattena ña. Añcha'ña apuerr ellonet po'potantañ acheñenesha' ñeñt' ama judioneshayaye ñeñtcha' po'ñoçh orrtatterre' e'ñe ña po'cohuenña atto atarr ayochreshattena ña. ⁴⁴ Allohuen erra'tsencha' atetsa añ mapyo ñeñtña mapue'pa' e'ñech a'yosatse'tuanet. Ñaña ñerra'm eseshesho shora'nom ñeñt' mapyerpa' e'ñech a'peḡtse'tuosanet.

Attoña Jesúsapa' toma'ntatanet ñerra'm ama esesha' pocteye' entenaye Cristo ñerra'm erra'tsencha' ama aguërraye, ñeñtña acheñerpa' çhocmach huapoña ñeñtcha' atarr mue-roçhtaterrahuet.

⁴⁵ Allempo atet e'myes ñeñt' pa'mcha'tareternesha' pen allohuen judionesha' po'cornaneshar ñaña fariseonesha', ñeñt' atet toma'ntatanet Jesús, ñetña allempopa' çhapanet pueyoçhreto ñocpuetepa't serrpare'tenña Jesús. ⁴⁶ Ñetña' mueneñetañ o'ch rremuetañ tarraña ama esesha' rromaye tarro'mar ñetpa' çha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús ñapa' po'ñoçh ñeñt' a'mtene' Yompor po'ñoñ.

22

Atto atma'ntatarettena puesheñarr amcha'taret puetare'tatan shonte' rreñets ñeñtcha' rret allempoch sena'ta puechemer

1 Jesúsñapa' alla toma'ntaterraneterrpa' atet'oterraneterr:

2 —Yompor po'cohuenña ñeñt'atto ayochreshattena ña pue'ntañot' ñeñt'pa' o'ch netma'ntacha atet'ñerra'mrrate' puesheñarr amcha'tareñ. Ñeñt'ña amcha'taretpa' o' puetare'tatan shonte' rreñets ñeñt'cha' nanac rret allempoch sena'ta puechemer. 3 O'ña a'potatuan rreñetspa' o' mueñan pa'taruasañrenesha' o'ch otyeñeta' ñeñt' ahua'ñareñ o'ch rrapreteneta' rreñets. O'ña otyesua'rettetpa' ñetñapa' arepa'tcha' eseshaye' sechatso o'ch ahuet all. 4 Po'pocheñopa' o' alla mueñerranerr po'potantañ pa'taruasañrenesha'.

Ama seneta'pa' atet'otapanet: “Sotoscha' acheñenesha' ñeñt' ahua'ñareñ: 'Amcha'taretpa'ye sagotatene', atetca'ye oten: Rreñetspa' o' e'ñe na'potatue. Huacshečno ñaña beserečno ñeñt' ne'soya'tatyen o' e'ñe nemtsatue ñaña o'ca'ye e'ñe na'potatue. Te'pa' sona'cha'tepa'to' ahuo'ch serrapreteña.' ” 5 Ahua'ñareñnesha'ñapa' arepa'tcha' a'cua'psenaye' eñchetoña ñeñt' hua'ñenahuet. Ñeñt'apa' ahuanemyeset ñopa'tets. Puesheñarrpa' ahuo' pa'mro, po'psheñeñpa' ahuo' pomatsre'tatsa. 6 Po'potantañña' ñeñt'apa' o' rremapoñetña pa'taruasañrenesha'pa' erro'tuanen pet, atteñapa' o' muetsanatu. 7 Amcha'tareñapa' ñeñt'ña atarr atsrre'mate'. Allempoñapa' o' mueñan ñaña po'solltar-renesha' ñeñt'cha' a'cllatenaya' ñeñt' amtsañečno, ñeñt'cha' a'poyatatuenaya' ñaña pa'netser.

8 Allo'tña amcha'taretpa' atet'oterranerr po'potantañ pa'taruasañrenesha': “Rreñtso'chnoña po'ño'chpa' epaye'ca'ye. Tarraña ñeñt'ña ahua'ñaretpa' ñetpa' amaca'ye cohuenaye' nentenaneto. 9 Te'pa' orras samña allo'tsen toñečno tarro'mar allpa' shonte' chopeñe'chyen acheñenesha'. Allohuen errponcha' sentyes o'ch sotyapanet onetepa' arr o'ch rrapreteneta' rreñets ñeñt' shonte' na'potaten.” 10 Allempoña alla ahuanerrerr pa'taruasañrenesha', ñetñapa' añ co'ta'yeset toñ. Ñeñt' allpon pocta'yeset toño'mar e'ñe sechatyesuahuet, ama't atsrre'mña'ečno ñaña ñeñt' cohuen acheñ. Atteñapa' o' cha shontosa ñeñt' hua'ñenet. Allña pocollo all sena'tena puechemerpa' e'ñe que'chcosa ñeñt' ahua'ñareñ.

11 'Amcha'tareñapa' allenta be'tos o'ch entapan ñeñt' hua'ñatyen ñeñt'cha' rrallme'chosets all. Allña'pa' entan puesheñarr yacma. Ñaña'pa' ama añeye' chorreno shetamuets emarr ñeñtecma chorrenet all atto coshapreteñet ñeñt' sena'tetsa. 12 Amcha'tareñapa' atet'och: “Eso'mare'tña masheñe pebe'tenña arr amaca'ye añeye' pechorreno shetamuets emarr attoch p'ochshaprecha ñeñt' sena'tetsa.”

Ñaña'pa' ama e'ñoro. 13 Allempoña amcha'taretpa' otan

pa'taruasañrenesha': "Sehuancoñ pa'tac ñaña potpa' chosa huapore'terre' a'yot checmetoť. Allñapa' allcha' yahuanrrorterret, panmueñoťet atserrpa' rraso'tyerretcha' pa's." ¹⁴ Tarro'mar ama't shonteñña ñeñť ahua'ñareťpa' țarraña puesheña'ttsaña ñeñť e'ñe cohuen a'craret.

Atto a'pťo'chet Jesús, pocte'te' o'ch tsa'tet impuesto
(Mr. 12.13-17; Lc. 20.20-26)

¹⁵ Allempoña fariseonesha'pa' ahuanerra. Ñetñapa' cha atarr cotape'chatanna'teneta'. Ñetpa' aña atarr e'nenet attoch e'ñe puehquēñoťetpa' ama't parrochapa' o'ch eñorachet Jesús ñeñť ama pocteyaye. Allochñapa' attotcha'ña otteñe'chet. ¹⁶ Ñetñapa' e'ñe a'nahua mueñet ñet pueyochresha' epuet ñaña puesheña'tets Herodes pueyochresha'. Ñetña chapuet Jesúseshopa' e'ñe puehquēñoťet atet otoset:

—Maestrocha' yapa' yeñoteneñ ppa' ama peshquēno ama't mamesha ñaña ñeñť atto peychaten Yompor poctapña ñeñťpa'cho'ña e'ñe cohuenacma, ama shequēñťsoyaye ama't mamesha. Ñaña ppa' ama aña ñapueť pemorrenteno ñeñť atarr añcha'na'tpo' entyen allohuen acheñenesha'. Allohuen acheñ e'ñe cohuen pentueñ. ¹⁷ Ñeñťo'marña te'pa' yapa' yemneñ o'ch peñotatapuey erra'tsente'ña e'ñe po'ñoč cohuentetsa. ¿Pocte'te' penteñña pa o'ch yetsa'ta impuestos añecop ñeñť añcha'tareťtetsa all anetso Romo ñeñť ama judioneshayaye? Ñato' amate' pocteyayeña yocop ñeñťey judioneshay o'ch yetsa'cha añcha'tareť romo'marnesha' ñeñť ama judioneshayaye.

¹⁸ Jesúsñapa' eñotapanet ñeñť atet cotape'chyenetañ ñocop, ñaña'pa' atet otanet:

—Sapa' atarr ashcarñaťes, eso'mare'tña semneñña o'ch sehcare'tenen. ¹⁹ Ñehua, ama't atteseñpa' segatenca'ye puetallarr quelle ñeñť alloch setsa'ta impuestos.

Allempoñapa' gachet puetallarr quelle ñeñť otenet denario. ²⁰ Ñaña'pa' atet oterraneterr:

—Ñehua, sapa' o'ch soten, ¿esesha't sentenña ñeñť atma'ntareťtetsa all? ¿Esesha't pa'so'cheñ aquellcareťtetsa all?

²¹ Ñetñapa' atet ochet:

—Añcha'tareťca'ye atma'ntareťtetsaña all, ñaña ñoca'yeña pa'so'cheñ ñeñť aquellcareťtetsa all.

Jesúsñapa' alla oterraneterr:

—Ñeñťepña' añ poctetsa o'ch yať añcha'tareť ñeñť ño ñeñť atet poctetsa gobiernocop, țarraña elloneťña ñeñť Yomporo o'ch yať ñaña ñeñť atet poctetsa ñocop.

22 Ñetña atet e'mueñet Jesús atet anapuenanetpa' atta cohuanrrorteñet tarro'mar Jesús pa' atarrca'ye cohuen anapuenanet. Atteñapa' quechpa'huaneretpa' ahuanerret.

Atto a'pto'chet Jesús, ñerra'm po'ñochte' atanterrapo' rromot, ta'm, allempopa' errotenchañña yeperra
(Mr. 12.18-27; Lc. 20.27-40)

23 Ñeñte yetrocma huačha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' el-lonet echenet pocta'ña ñeñto'marña ñetpa' atet otenet amate' errotentot yetanterroña rromot ama't errponaña. Ñetñapa' atet otoset Jesús:

24 —Añ Maestrocha' ñeñtca'yeña atet otye'tña Moisés ñeñt poctetsa ñeñtcha' atet ye'pa. Ñerra'm esempo rroma yacma o'ch sa'nman puetapor tarraña ñerra'm ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñtcha' puechemer perr pa'mo'nasheñeñ. Ñeñt pa' atetca'ye quellca'nmonayña ahua't Moisés. 25 Ñehua, te'pa' eñall cancherrsheña yamo'ts ñeñt e'ñe poctacma pa'mo'nasheñecmuet. Ñeñt puesheñarr popo'naret pa' o' yoran coyanesha' ñeñt puetapor pa'. E'ñe allponmatatsapa' o' rroma, atta sa'nman puetapor ama chemere'tnomo. Allempoña ñeñt po'rrocho'merpa' o' yorerran pa'mo'nasheñeñ puetapor. 26 E'ñe allponmatatsapa' ñapa'cho'ña o' rromuerrerr ñaña, ñeñt pa'cho'ña ama chemere'tnomo. Allempoña po'psheñeñ pa'mo'nasheñ pa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñt pa'cho'ña ama chemere'tnerrero o' atta rromuerrerr. E'ñe attecma pohuet cancherrsheño'maret pa' e'ñe pueyorarochetña ñeñtara puesheñarr coyanesha'. Allohuenet pa' e'ñe attecma pet rromayestset ama't puesheñarrofetapa' amaca'yeña chemere'tnomueto. 27 Allempoñapa' cho rromatsña ñaña coyanesha'. 28 Te'ña ñerra'm po'ñochte' atanterrapo' rromot pa' añña coyanesha'ñapa' allempopa' zeseshat'chañña e'ñe ñapue't puetapor perre' tarro'mar allohuenet cancherrsheño'maret pa' e'ñeca'ye pueyorarochet?

29 Jesúsñapa' atet otapanet:

—Chaca'ye atarr sepanteñ tarro'mar amaca'ye chennasoña seyo'chro ñeñt e'ñe po'ño'ch atet ye'chateney Yompor po'ño'ñ ñeñt atet anuaret ahua'toteñ. Ñaña aña sepantatene' tarro'mar sapa' ama sepocteññañe Yompor po'huamenc. 30 Tarro'mar esempohuañen allempoch tanterret po'pocheño, allempopa' ama't puesheñarrofeta amach

sena'terreto, ama't coyanesha'pa'cho' amach eseshaye' apuerraye ñeñcha' yorerrahuet. Tarro'mar allempopa' e'ñech attet ñerra'm Yompor po'millañoñeñnaneshar ñeñ pue'ntaño'tsa'yen. ³¹ Sapa' ama'tña selleyare ñeñ atet ote't ahuat Yompor e'ñe socop attoch señoçh po'ñoçhpa' ama't ñeñ o' colla'huapa' ñetña' corretseta. ³² Ñehua, ñeñtpa' atet otene'y Yompor: "Napa' na ñeñten Po'yomporer pen Abraham ñaña Isaac ñaña Jacob ama't ñetpa' o' rromhuet ahuatoteñ." Ñehua, yapa' yeñoteñ Yomporpa' ama añeye' Po'yomporer penaye ñeñ rromuets e'ñe poctacma, ñapa' añca'yeña Po'yomporer pene' acheñ ñeñ corretsetach. Attoña Yomporpa' e'ñe allame'ttsa entenanet allohuen ñetña' e'ñe bettetseta.

³³ Allempoña allohuen acheñenesha' ñeñ e'muene' Jesús atto emma'huan saduceonesha', ñetña' atet otanna'tyeset:

—¡Erroñenoña'yeña atarr es eñoten, atto atarr cohuen yeçhatyeny!

Añmapa' ñeñ ñoñets ñeñ atarr sherbets, e'ñe metana'tueñan allohuen po'poñeçhno ñoñets

(Mr. 12.28-34)

³⁴ Ñaña allempo fariseonesha' e'mare'chet atto Jesús emma'huan saduceonesha' ñetña' apçhanna'tet parro.

³⁵ Allempoña puesheñarrotet ñeñ atarr etsotene' ñoñets ñeñ atet anaret ñaña' otenana' Jesús. Ñeñtpa' tarro'marña atet a'p'to'tos ñetpa' çhoca'ye mueneñet o'ch topachet Jesús.

³⁶ Ñeñtpa' atet otos:

—Maestrocha' çerra'tsena't ñoñsor ñeñ atet anaret ñeñ atarr sherbets ñeñ ello metana'tueñe' ora allohuen po'poñeçhno ñoñets ñeñ e'ñe parro attecma anaret?

³⁷ Jesúsña' atet otaþ:

—Añca'yeña ñeñ ello atarr sherbets, ñeñ ñoñetspa' atet oten: "Atarrepa'ch yemorrenteña Yeyomporer ñeñ Yepartseshar yepen e'ñe ora yeyoçhrocmañen. Ñaña e'ñe yecamquëñoñ yemorreñchach, ama't ñaña ora yoçtaþñoñhuen."

³⁸ Ñeñtpa' ñeñca'ye ñoñets ñeñ po'ñoçh atarr sherbets, ñeñtpa' elloca'yeña metana'tueñan po'poñeçhno ñoñsoçhno.

³⁹ Alloþpa' po'poñ ñoñets ñeñ atarr sherbets ñeñtpa' atet oten: "Atarrcha' yemorrenteña yamo'ts e'ñe atet atarr yemorrentena yañeña."

⁴⁰ Añ epo'mar ñoñets ñeñña e'ñe etsotatuene' allohuen po'poñeçhno ñoñsoçhno ñeñ atet ana'yese't, ñaña allohuen Yompor po'ñoñ ñeñ a'ñta'yese't ahuat.

Atto Cristo ñeñt Po'partseshar pe't David ahuat, elloñapa' o' alla po'mireneñ per

(Mr. 12.35-37; Lc. 20.41-44)

⁴¹ Allempoña fariseonesha'pa' ñetñapa' allo'tsenareta all apchenet e'ñe ñochayet, ⁴² Jesúsña allpa' atet otanet:

—Sapa' ¿errotēna't sotenña sa añecop ñeñtcha' Cristotosets? ¿Esesha't soten ñeñtcha' po'mireneñ perre'ña ñeñtcha' Cristotosets?

Ñetñapa' atet ochet:

—Davidcha'ca'ye po'mrenñoť huapaña ñeñtcha' Cristotosets. ⁴³ Ñaña'pa' alla oterraneterr:

—Ñerra'm po'ñočhcha' David po'mireneñ perre'pa' sapa' ama't señoťeña Davidpa' allempo eñorache't Parets Puecamquēñ ñapa' atetca'ye ote't po'mrenñecop ñeñtara ñeñtcha' Cristoterrets: “Napa' ñeñtca'yeña Nepartseshar nepen.” David allempopa' atetca'ye eñose'tña añecop ñeñtcha' Cristoterrets:

⁴⁴ Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): “Te'pa' o'ch ñanorruerr arr necohuenrot allcha' pecohuentapreterrna. Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen ña.”

⁴⁵ Ñeñtapa' atetca'ye ote'tña David, ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoťeña Cristo ñeñt Po'partseshar pe't Davidpa' ñeñtña te'pa' o' alla po'mireneñ per ñaña.

⁴⁶ Ñetñapa' ama't puesheñarroťetapa' ama eseshaye' anapuenaye' entaye. Ñeñto'marña allempoteñpa' ama't puesheñarroťetapa' ama eseshaye' a'p'to'tenaye' enterraye.

23

Atto Jesúsapa' a'metare'tenan fariseonesha' ñeñt atet yechenet ñetpa' ñeñtapa' ama cohuenaye' entapretenaneto Yompor

(Mr. 12.38-40; Lc. 11.37-54; 20.45-47)

¹ Allempoña Jesúsapa' alla serrpare'taterran allohuen acheñenesha' ñaña e'ñe ña pueyochreshachno. Ñeñtapa' atet otanet:

² —Añña fariseonesha' epuet ñaña ñeñt atarr etsotayene' ñoñets ñeñt atet anareť, ñetpa' añecpa anareťtenet ñetcha' señoťatene' ñoñets ñeñt atet nonase't Moisés ahuat.

³ Ñeñto'marña socoppa' e'ñe pocte' o'ch sepohuena ñeñt atet otenset, amachña čaña satpare'teñe. Tarraña sapa' amachña atet sepatsto ñeñt atet patse'tyenet ñet. Tarro'mar

ama't atarr cohuen serrpare'tenetañpa' amaca'yeña e'ñeye' atet peneto ñeñt atet serrpare'tatenset. ⁴ Ñetpa' çhaca'ye atarr atontatennasetña ñoñets ñeñtcha' e'ñe atet seþohueneñ ñetpa' ñeñtaca'yeña nennaset ñeñt atarr torrapo' sentyen. Ñeñtpa' atetcha' netma'ntacha ñetpa' çhaca'ye ottenet ñerra'mrrate' añ huanquënnaset ñeñt atarr eñerr se'muen attoch sechechnom. Tarraña ñet ama't mameshapa' amaña anmapretenseto, ama't potaþotetapa' ama echantapretnenseto ñeñt chechatnenset.

⁵ Fariseonesha' allohuen ñeñt atet etsotayeneñpa' ñeñtpa' e'ñe pommo'cheñofteta atet penet allochñapa' acheñenesha'ñapa' e'ñech cohuen entyeñet ñeñt atto atarr torra'yenetañ Yomporecop. Tarraña ñeñtpa' e'ñeca'ye orrena. Ñaña ñetpa' çhaca'ye ateshatomuerrtatenet poreñ allñapa' all quellquëññañetañ Yompor po'ñoñ ama't ñeñtpa'cho'ña alloca'yeña huancato'tenet. Tarraña ñeñtpa' e'ñe añecpa atet penet attoch acheñenesha'pa' e'ñech cohuen entenamet. Tarraña ñeñtpa' e'ñe orrena atet penet ñeñt atto ommo'chenet. Ñaña ñetpa' añe'naca'yeña allpocha'ptatenet ñeñt çhera'rretenet pa'shtamueto pa'rre'pmonet. Tarraña ñeñtpa'cho'ña e'ñe añecpa atet penet e'ñe pommo'cheñoftet.

⁶ Ñaña ñetpa' ñerra'm cho rrallme'chapretenetpa' añaca'ye atarr muenenet o'ch anorrcha'tyenet allecma anorryen ñeñt atarr añcha'na'tpo' entyen allohuen acheñenesha'. Ñaña ñetpa' e'ñe attecma penet ama't all judionesha' po'prahuo. ⁷ Ñaña ñetpa' e'ñe pommo'cheñoftet añe'naña atarr muenenet acheñenesha'pa' o'ch huomcha'tyesapanet pue'mcha'nañoftet ñerra'm esempo chopeñe'chyenet toño'mar allecma shontena acheñenesha'. Ñaña pommo'cheñoftetpa' añe'naña atarr muenenet o'ch otanet acheñenesha' ñetpa' e'ño' partsesharerochet.

⁸ Tarraña saye'ña neyochreshacha' ñato'tña semnena'ña o'ch otas acheñenesha' sapa' e'ño' partseshareroches. Ñaña sa allohuenespa' e'ñechña semo'nasheñecma seþannena, tarro'mar sa allohuenacpaspapa' naptaca'yeña Separtseshar sepenen na ñeñten Cristotosets. ⁹ Ñaña arr patsro ama't puesheñarra amach seyomporer seþatstaneto. Tarro'mar sapa' e'ñeca'ye patrraña Sompore ñeñt pue'ntaño'tsen. ¹⁰ Ñaña sapa' amach semnatsche ama't puesheñarra e'ñe pueçhore'teñoftetaspapa' o'ch otaset: Na'yochreterneshacha'. Tarro'mar sa allohuenacpaspapa' naptaca'yeña Sa'yochreshater sepenen na ñeñten Cristotosets. ¹¹ Tarro'mar ñeñt po'ño'ch cohuen añcha'tarettetsa sesho ñeñtpa' ñeñtaca'yeña atarr torretsaña

po'potantañecop attoch orrtatanet ñeñt atarr sherbets ñocpuet. ¹² Tarro'mar allohuen ñeñt e'ñe cohuen entetsa e'ñe pommo'cheñoñ ñeñña tsapaonetpa' amach esoshe'maye' entereto. Tarraña allohuen ñeñt ama esoshe'maye' entetso te' ñeñña tsapaonetpa' atarrcha' cohuen enteret.

¹³ 'Atarr nanac llequëntso'tsenes fariseoneshacha' ñaña saña ñeñtes e'ñe etsotayenayeñ ñoñets ñeñt atet anaret judioneshacop tarro'mar sapa' sommo'cheñoñe'na atarr seshcare'tyen. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña chocma sepatare'teñña po'potantañ ñeñt e'nene' Yompor po'cohuenña. Cha sa'npanipeña acheñenesha' attoch ñetpa'cho'ña amach enterrñañeto Yompor po'cohuenña ñeñt atto atarr ayochreshattena ña pue'ntañoñ.

¹⁴ 'Atarr nanac llequëntso'tsenes fariseoneshacha' ñaña saña ñeñtes e'ñe etsotayenayeñ ñoñets ñeñt atet anaret judioneshacop, tarro'mar sapa' sommo'cheñoñe'na seshcare'tyen. Ama't rretorrnanasha'pa' ñeñte'naña seprratam pesyenña pa'paquëll. Elloña e'ñe sommo'cheñoñpa' aña atarr semnen o'ch atet sepena ñerra'm atarr cohuen acheñres ñeñto'marña all sema'yochena allecma shontena acheñenesha'pa' amach tematenayaya sema'yocheno. Ñeñto'marña na te'pa' o'ch notas, sapa' elloña atarrcha' sa'coñchatare'tterra.

¹⁵ 'Atarr nanac llequëntso'tsenes fariseoneshacha' ñaña saña ñeñtes e'ñe etsotayenayeñ ñoñets ñeñt atet anaret tarro'mar sapa' sommo'cheñoñe'na atarr seshcare'tyen. Sapa' chocma sechopeñe'chyen erracmañen patso'mar, se'chatyena ama't ñaña sapa'mar. Ñeñtpa' añecpa atet sepena attoch same'ñatyeya ama't e'ñe puesheña'ttsa e'ñe sa soctapña ñeñtes judioneshas. Ñeñt allpon same'ñatyenapa' ñetñapa' aña sey'chatyenamet ñeñt ama cohuenayaye ñeñt e'ñe atet sepena saña. Ñeñto'mar ñetpa'cho'ña ello atarr nanac o'patatare'ttenet coñcheñets, e'ñe epoche'tsocma so'patatenamet coñcheñets.

¹⁶ 'Atarr nanac llequëntso'tsenes tarro'mar ama't ñeñt ama sechenoyo seyo'chro sañapa' ñeñtara sey'chateñña po'potantañe'chno. Ñeñtpa' e'ñe atet sepena ñerra'mrrate' aporo'yecmas echa'nmannetsa. Ama't sey'chateneñ ñeñt po'ño'chpa' amaca'ye atteyaye. Ñeñtpa' atet soteneñ: "Ñerra'm esesha' nene' po'ñoñ ñerra'm aña Parets pa'paquëll pa'so'chño nenan po'ñoñ saña ñeñtpa' cha soten año' esoyaye ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ oro pa'so'chño yena'

yeñoñ ñeñt Parets pa'paclo'tsen allempoña po'ñoçhpa' çhocmach e'ñe ya'pocstat yeñoñ." ¹⁷ Sapa' atarr otatsñates, ama añeye'ña seçhenoyoña seyoçhro ñeñt cohuen enten Yompor. Chaca'ye sottena ñerra'mrrate' aporo'yeteemas. Ama't señoñeña atet sherben oropa' e'ñeca'ye attecma sherbenña ñaña Parets pa'paquëll. Tarro'mar allempo nete't oro Parets pa'paclo, ñeñtña oropa' aña'ye e'ñe cohuen a'pocstataye't Partsocop ñeñtara Partsopo'. ¹⁸ Ñaña po'poñpa' atet soteneñ: "Ñerra'm esesha' nene' po'ñoñ e'ñe altar pa'so'chño allecma neñet ñeñt amtsarettetsa Yomporecop, ñeñtpa'cho'ña cha soten aña' esoyaye, ama pallteno o'ch e'ñe po'ñoçh a'pocstatan po'ñoñ." Tarraña po'poñpa' atet soteneñ: "Ñerra'mña añ pa'so'chño yena' yeñoñ ñeñt amtsarettetsa Yomporecop ñeñt nenet altarro enot, allempoña po'ñoçhpa' çhocmach e'ñe ya'pocstat yeñoñ." Tarraña ama't atet sotatse'tyeneña' ñeñtpa' amaca'ye po'ñoçhoyaye. ¹⁹ Sapa' ama añeye' seçhenoyoña seyoçhro ñeñt cohuen enten Yompor. Cha sottena ñerra'mrrate' aporo'yeteemas. Ama't señoñeña altarpa'cho'ña atarrca'ye sherben. E'ñe attecma sherben ñerra'mrrate' ñeñt amtsarettetsa Yomporecop ñeñt nenet all altarro enot. Tarro'mar altarpa' ñeñtca'yeña a'pocstatene'ña Yomporecop ñeñt nenet all. ²⁰ Ñeñto'marña yeñoteñ ñerra'm esempo yenen yeñoñ altar pa'so'chño, ama e'ñe ñapta altar pa'so'chño yenenoña yeñoñ; añohuenca'yeña yenenña yeñoñ e'ñe pa'so'chño allohuen ñeñt na'yenet all, allecma sherba'yenet Yompor. ²¹ Ñaña ñerra'm esempo yenen yeñoñ Partsopo' pa'so'chño, ama e'ñe ñapta Partsopo' pa'so'chño yenenoña yeñoñ. Yompore'naca'yeña pa'so'chño yenenña yeñoñ tarro'mar ñapa' e'ñeca'ye ño pa'paquëll. ²² Ñaña ñerra'm yenen yeñoñ Yompor pue'ntañ pa'so'chño, Yompore'naca'ye pa'so'chño yenenña yeñoñ ama't ñaña Yompor po'conañe'naca'ye pa'so'chño yenenña yeñoñ tarro'mar enetpa' Yomporca'ye po'conañ pene' tarro'mar allpa' allo'tsenca'yeña Yompor.

²³ 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayen ñoñets ñeñt atet anaret judioneshacop tarro'mar sapa' sommo'cheño'te'na atarr seshcare'tyen. Ora allohuen ñeñt senarem sepen ama't çhocma sapueñeñ Yompor allpon ñeñt pocstetsa ñocop —mentapan, anísopan, cominopan—sapa' cha sepsenña ñeñt ñoñtsor ñeñt atet anaret ñeñtca'yeña ello nanac sherbets. Ñeñtpa' attoch e'ñe cohuen es sepa'yeññañ po'potantañ. Ñeñtña sapa' chaña sepseñ. Ñaña attoch semueranna'ta ñeñtpa'cho'ña sañapa' çhaca'yeña sepseñ.

Ñaña attoch po'ñoch e'ñe cohuen same'ñañañtena Yomporecop ñeñtpa'cho'ña sañapa' chaca'yeña sepseñ. Sapa' e'ñe ñeññaña sepalltena. Ñaña atto chocma es sapa'yen Yomporecop ñeñtpa'cho'ña chocmach atet sepena amach cha sepsatstere. ²⁴ Sapa' ama't ama choye' chennaso seyoçhro ñeñña atarr semneñ o'ch seyçhach po'potantañ acheñenesha'. Ñeñtpa' e'ñe atet sepena ñerra'mrrate' aporo'yeteemas echa'nmannetsa. Añ ñoñets ñeññ atet anaret socop ñeññ setseten e'ñe so'na socta'pña ama't ñeñtpa' atarr coñe'tot sherben Yomporecop, sañapa' ñeññaca'ye atarr semneñ o'ch seyçhateñ po'potantañ. Tarraña añ ñoñtsor ñeññ atarr nanac sherbets Yomporecop, saña ñeñtpa' ama chennasoña seyoçhro ama't e'ñe mamesha. Ñeñtpa' o'ch netma'ntacha atet ñerra'mrrate' ñeññ atarr es añe'toll allpon ñerra'm çhopo'yetoll saña ñeñtpa' chaca'yeña seyorasoteñ tarraña ñeñña atarr añecmuen allpon ñerra'm huaquësh* sapa' ñeññaña sañyen e'ñe atta.

²⁵ 'Atarr nanac llequëñtso'tsenes fariseoneshacha' ñaña sa ñeñtes e'ñe etsotayenayeñ ñoñets ñeññ atet anaret judioneshacop. Sapa' e'ñe se'pame'teneña setaza eno'tpa' o'pono'tñapa' ama se'parro'teñe. Seplatopa'cho'ña eno'ta e'ñe se'pata'teñ o'pono'tñapa' ama se'pata'teñe. E'ñe atet sepena saña. E'ñe sa'cohuentatena ñeññ eno'mar ñeññ atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'pono seyoçhropa' amaca'yeña sa'cohuentateñe, allñapa' e'ñe chorren shonte' sosya'tsañeçhno ñeññ atto e'ñe seshquëño'te'na chocma es seprratam'pesyen, atarr es seye'chapretannena, ñeñña'apa' e'ñeca'ye socpa. ²⁶ Ñeñtes fariseoneshas, sapa' ama añeye' seçhenoyoña seyoçhro ñeññ cohuen enten Yompor. Chaca'ye sottena ñerra'mrrate' e'ñe aporo'yeteemas. Socoppa' añca'yeña poctetsa, ñanomcha'ña o'ponot se'pame'tña setaza, seplatopa'cho'ña ñanomcha'ña o'ponot se'patach. Allochñapa' o'ch e'ñe cohuenta emoshem'to'mar.

²⁷ 'Atarr nanac llequëñtso'tsenes fariseoneshacha' ñaña sa ñeñtes e'ñe etsotayenayeñ ñoñets ñeññ atet anaret judioneshacop. Sapa' e'ñe attes ñerra'm apampaña ñeññ a'hullama'ttam'penet. Eno'tpa' e'ñech cohuen orrtenañ. O'pono'tñapa' e'ñech chorren arromña'tap ñaña pa'namen ñeññ nanac sosey. ²⁸ Sapa'cho'ña e'ñerramche' attesña saña. Po'ñoçhca'ye ñeññ atet sorratayen acheñenesha'ñapa' e'ñe atet entenset ñerra'mrrate' sapa' e'ñe cohuenare' es sepa'yen.

* **23:24** Ñehua, Jesús añ toma'ntatanet camello ñeññ payara penet all pa'nyo, ñeññ e'ñe allpon ñerra'mrrate' huaquësh.

Tarraña o'ponoña seyočhropa' e'ñe añña shontetsa alloch sommo'chyena, atarr seshcare'tanna'tyena, pa'namen sortatyen ñeñt' ama't mamesha ama cohuenaye' entapretenso Yompor.

²⁹ 'Atarr nanac llequëñtso'tsenes fariseoneshacha' ñaña sa ñeñtes e'ñe etsotayenayen ñoñets ñeñt' atet anaret judioneshacop tarro'mar sa te'pa' sa'otomaten enot' ñeñt' atarr cohuen senten sa all pampa'yesete't ñeñt' a'mta'yesaye't Yompor po'ñoñ. Ñaña añe'na sa'cohuentam'pesyen all pampa'yesete't ñeñt' acheñenesha' ñeñt' e'ñe pocte' es pa'yesete't. ³⁰ Saña te'pa' atet sotyeneñ: "Ñerra'm allempocmach ye'ñalletañ allempo corre't yatañneshañ, atto ñetpa' muetsanachete't ñeñt' a'mta'yesaye't Yompor po'ñoñ, yañapa' amate' eso'mar yemtsapretaneto." ³¹ Ñeñt' atet sotyeneñpa' te'ña e'ñe sa señoño'tpa' o' sa'metam'psa e'ñe sañeña po'ñoçh sapa' po'mrenñesca'ye ñeñt' muetsanataye't ahuat' ñeñt' a'mta'yesaye't Yompor po'ñoñ. ³² Ñeñto'marña sa te'pa' ñeñt'aca'yeña e'ñe setsoteññañ satañneshañ ñeñt' allpon sosya'tsañechno ñeñt' e'ñe motetnomnas ahuatoteñ e'ñe sa satañneshañ.

³³ 'Sapa' ama cohuenayayso atarr ashcarñates, çha sottena ñerra'mrrate' shechpa sompor sepen. Sapa' erro'tenohuachñaca'yeña sequeshperrate'. Sapa' añaca'ye so'patenaya coñcheñets ñeñt' parrare' tso' all o'pono. ³⁴ Ñeñto'marña te' napa' o'ch nemñernnas ñeñt'cha' a'mta'yerre' neñoñ, ñaña ñeñt' atarr eñotañ ne'pa'yen, ñaña ñeñt' atarr etsotayene' neñoñ ñeñt' atet anaret ahuatoteñ. Tarraña saña ñeñt'pa' çhachca'yeña semtsanatuerrnan ñeñt' patanta'tets, po'potantañña' e'ñech secorso'tam'pesuerrnan. Po'potantañña sapa' çhach senalle'tyesuerrnan e'ñe all sa seprahuo'mar. Atarr se'moñe'tenanet ñeñto'marña çhocma soctare'tenanet anetso't o'ch sa'yetatuanet ñetñapa' o'ch ahuanemyeset po'poñ anetso'mar. ³⁵ Attoca'yeña ora allohuen ñeñt' e'ñe pocte' es pa'yestse't ñeñt' amtsanatyese'ttate't ashataretetyesete't po'rras, sañapa' allempoteñ e'ñe sa'yohuare'ttena ama't teme'ttsen, sa ñeñtes corretsa te', ama't allempoteñ amtsare'tta Abel ñeñt' ama es yeçhcatetso ama't coñe'ta tarremphua allempo semtser ñaña Zacarías ñeñt' Berequías puechemer. Ñeñt'ña sapa' alla semtser Parets po'ponro puecha'petarot' allo'tsen altar allotecma sherbete't Yompor. Ama't allohuen ñeñt' amtsanatyese'ttate't allempo sañapa' e'ñe allempoteñ sa'yohuare'tterra. ³⁶ Po'ñoçhca'ye notenes, acheñenesha'

ñeñt corretsa te' ñetñapa' atsa'tatare'tterretcha' e'ñe ora allpon atserrpatse'tyesonete't ñeñt e'ñe pocte' es pa'yestse't Yomporecop.

Atto Jesúsapa' puellquëñoñan jerusaléño'marnesha' atarr ya'na'tosanet

(Lc. 13.34-35)

37 Te'pa' e'ñe nellquëñoñ o'ch notas sa ñeñtes jerusaléño'marneshas, ñeñtes muetsanatyese't ñeñt a'mta'yese't Yompor po'ñoñ, sa ñeñtes rrollapechyses't ñeñt amñare'ttate't sesho, te'ña napa' o'ch notas: Napa' atarr atonoche'tats nemneñeñ o'ch na'yapa'cha'huerrsoñ allohuenes nesho attoch e'ñe cohuen necuam'pensoñ. Nemneñeñ o'ch na'yapa'cha'huerres atet ñerra'mrrate' atollop a'yapa'chene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno. 38 Te'ñapa' all sey'chena sa, Yomporñapa' o'ch a'ypo'ñerres. 39 Tarro'mar te'pa' o'ch alla noterrerr: Na po'poche'ño'pa' amach alla senterrne'te. Esemphuañenñapa' senterrencha', allempoñapa' atet'cha' soterren: "Aye'chochtatpahuépa'ch Jesucristo ñeñt huapatsa ñeñt llesensen Yeyomporer."

24

Atto Jesúsapa' eñotatanet e'ñech a'mata'tare'tetuerra Partsopo' all Jerusaléño

(Mr. 13.1-2; Lc. 21.5-6)

1 Jesúsñapa' cha'nerrerr Parets pa'pacclot. Alla ahuenerr allempoñapa' ponem'ya pueyochresha'. Ñetñapa' allenta cohuatyeset ñeñt atarr co'chnesha'tyetsa allo orratarettena Partsopo'. 2 Allempo Jesúsapa' atet otanet:

—Ama't senteñeñ ora allohuen ñeñt co'chneshare' tarraña napa' o'ch notas: Po'ño'chca'ye cherrcha' allempoch e'ñe a'mata'tare'tetuerra. Ama't e'ñe puenñarra mapyetpa' amach a'puerroña all allo orratenet Partsopo' e'ñechca'ye poctacma a'coye'tare'tetuerra.

Atto Jesúsapa' eñotatanet shonte'ch entyerret pa'namen ñeñt'cha' eñotaterahuet o' cherrmoch allempoch mellapoterra

(Mr. 13.3-23; Lc. 21.7-24; 17.22-24)

3 Ñeñta otuanenanetpa' allenta ahuen Olivopno. Allñapa' anorrueñ, pueyochresha'ñapa' o' alla hua'cherrñañeterr, e'ñe ñaptochayet. Ñetñapa' atet otuereterr:

—Yapa' yemneñca'ye o'ch potey ¿esempo'tcha'ña atet perra? Ñaña ¿eso'tcha' yentyerrña ñeñt'cha' yeñotaterre' allempoch pehuerrmocha o'ch mellapoterra?

4 Jesúsñapa' atet otanet:

—Eñech señoterra, allochñapa' amach esesha' seshquërraye. ⁵ Tarro'mar shonte'ch orrterrtsa ñeñtcha' aycha'nataterre' neso'cheñ, ñeñtcha' otyerrets: "Napa' ñeñtenca'yeña Cristotets." Ñetñapa' shonte'ch shequëret acheñenesha'. ⁶ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach cha seyorenatsto ama't eñe mamesha. Ñeñtapa' atetcha'ca'ye eñe po'ñoçh perra. Tarraña allempopa' amach chena' allempoch eñe mellapoterra. ⁷ Pa'namen acheñ ñeñt eñe po'poñe'tsocma mereñtsoretapa' ñetpa' quellaranna'terretcha'. Ñaña pa'namen anetso' añcha'tareteçhnopa' quellaraterrancha' pueyochreneshaçhno. Orrterrach allemeñ muecheñets o'ch eñe chaporrñatsotyerr errañaren. Ñaña orrterrach pa'namen atsnañtsoçhno ñeñt atarr apatanna'tpo'. Pella'yerrach pats ora errañaren. ⁸ Ñeñt atet o' notuas te'pa' ñeñña allempopa' ñeñtcha'ña ñanom mueroçhtaterrahuetña allempo.

⁹ 'Allempoña sapa' pomuerrsetcha' attoch errotuanen perrset allcha'ña muetsatyerrset. Atarrcha' e'moñe'terres allohuen acheñeneshaçhno tarro'mar sapa' naca'yeña eñe same'ñena. ¹⁰ Ñaña shonte'ch acheñ allempo ñeñtcha' queçhpuerre' Yompor. Eñe ñagattsetapa' e'moñe'tanna'terretcha' attocha' pomatatanna'tyerrret. ¹¹ Ñaña allempopa' orreyerrach shonte' ñeñtcha' aycha'naterrtsa ñetpa' año' a'mitenet Yompor po'ñoñ. Tarraña po'ñoçh amach Yomporeye' po'ñoñ a'mterreto, ñetpa' attachña shequëretña shonte' acheñenesha'. ¹² Allempopa' atonterrach errañaren pa'namen sosya'tsañeçhno allochña atarr atpare'terrñañet Yompor po'ñoñ. Ñeñto'marña shonte' acheñpa' o'huañcha' allo'na morrentanna'tnenet. ¹³ Tarraña ama'tcha' errotuanen apanetterret, esesha'ch eñe ahuanta'huanmue' ñeñtcha' ama nequeçhpuerriye, ñeñtñapa' ñeñtcha'ña a'queshpataretterrtsa. ¹⁴ Ñaña allempopa' añ cohuen ñoñets atto ayochreshattena Yompor ñeñtcha'ña ñanom serrpare'tatyeretña acheñenesha' ora errañaren allohuanen añe patsro. Attochña eñotateretña ora allohuen pa'namen acheñenesha' ñeñt po'ñoçh atet oteney Yompor. Allempochña po'ñoçh mellapoterra.

¹⁵ Ñehua, ahuañ Daniel ñeñt a'mtaye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtñapa' cherrcha' all ama't ñeñt eñe Partsocpa anareteñ. Ñeñtapa' ñeñtachca'yeña eñe

a'chencatuerrahuet." Ñehua, ñeñtcha' lleyerre' añ ñoñetspa' ñetñapa' eñoteretepa'ch. Ñeñto'marña ñerra'm esempoch senter o' chap all ñeñt e'ñe Partsocpa anaretpa' ¹⁶ allempoña ñeñt allpon Judeo'tsa'yen ñetñapa' allorocmuepa'ch yetrra'terret, ahuanerretepa'ña aspentareronet. ¹⁷ Atet ñerra'mrrate' puesheña'tets ñato' ñetña allempopa' eno'tsa'yenetcha' pa'pacllato, ñetñapa' sohuetepa'chña tecma tarraña amachña be'tosatsetnomuetoña po'ponreto attoch yoratsre'tnomuet. ¹⁸ Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet. ¹⁹ Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emaretetollesha'chno. (Tarro'mar ñocpuetpa' atarr torrapo' attoch yetrra'tet ñamet.) ²⁰ Ñaña Yomporcha'ña sema'yocha allochñapa' amach cha huapoto allempoch seyetañpesya ñaña amachca'ye aña yetro seyetatsto allempocma samesen. ²¹ Allempopa' orrtterrach muerochteñets ñeñtcha' atarr muerochtaterre' allohuen acheñenesha'. Ñeñt ama't ahuatapa' ama puemurochtareto atet atarr nanac huomenc. Ama't allempoteñ e'ñe errte' aye'chcataretta añ patser ama puemurochtareto atet. Allempoña ellopa' amach atet alla muerochterrete'te ama't errponaña. ²² Allempoch atarr amurochtataretterret. Tarraña allempoña Yomporpa' ñach oterrets te'pa' allohuach. Ñerra'm amach oto allohuachpa' allempoña ama't puesheñarrapa' amach esesha' qeshperrtso. Tarraña ñeñtña ame'ñenaya ña ñeñt acrenpa' ñocpuetñapa' oterrcha' te'pa' allohuach.

²³ Ñehua, allempoch orameñ muerochteñetspa' ñerra'm esesha' sote': "Arro'tsenca'yeña Cristo", amapa' o'ch otaset: "Tarro'tsenca'ye Cristo", sañapa' amach same'ñatstaneto. ²⁴ Orretyerrachca'ye ñeñtcha' otyerrets ñapa' ño'ña Cristotets. Tarraña ñeñtpa' attachca'ye shecare'tyerranña acheñenesha'. Orretyerrach ñaña ñeñtcha' otyerrets ñapa' ño'ña a'mtene'ña Yompor po'ñoñ, tarraña ñeñtpa'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñtcha' atet shecare'tyerrets, ñetñapa' orrtatyerretcha' ñeñt ama't ahuata acheñenesha'pa' ama puentare, attochña cohuanrrortateretña acheñenesha'. Ama't ñeñt Yompor pa'carnesharpa' mueneñetañcha' ñeñte'nachña shequërret. ²⁵ Señohepa'ch ama't ama chena' muerochteñsopopa' napa' o' e'ñe notuas sa. ²⁶ Ñeñto'mar te'pa' notenes: Ñerra'm allempoch atet otterret: "Tarro'tsenca'yeña Cristo a'yo all amayo", sañapa' ñato'tña sesena'ña all o'ch senteña'. Amapa' ñerra'm atetcha'

oterrseterr: “Tarro’tsenca’ye Cristo o’pono pocollo”, sañapa’ ñato’tña sesena’ña all o’ch senteña’. ²⁷ Tarro’mar ñerra’m esempo çherr allempoch nohuerra na Ñeñten Acheñetosets e’ñe allohuen acheñenesha’pa’ entapuerrnetcha’ tarro’mar allempopa’ atetcha’ nepater ñerra’mrrate’ meratste’, o’ch meratsta huomencpa’ e’ñech a’puetaresuan ora enet erraþaren, ama’t allot huena atsne’ ama’t e’ñe allohuanen emuena. ²⁸ Ñeñtpa’ e’ñechca’ye atet perraña ñeñt atet senten te’ ñerra’m erro’tsen ñeñt rromuepa’ allcha’ca’yeña shonterraña tse’m.

Atetcha’ perra allempoch huerra Cristo Ñeñt Acheñetosets
(Mr. 13.24-37; Lc. 21.25-33; 17.26-30, 34-36)

²⁹ ‘O’chña huañerr ñeñt muerochteñetspa’ allempoñapa’ e’ñech allorocma mayerr atsne’. Arrorrpa’cho’ña o’huañcha’ atsnom. Rantochnopa’cho’ña shorcha’terrcha’ entot. Ñaña ñeñt huomenc orra’yetsa ento te’ allempoña ama’t ñeñtpa’ pella’yerrach. ³⁰ Allempoñapa’ orrterrach ento ñeñtcha’ señotaterre’ naca’yeña o’ nohuerra Ñeñten e’ñe Acheñetosets. Allempochña nanac llecanrrorterra allohuen pa’namen acheñenesha’chno ñeñt añe patsro’tsen. Entapuerrnetcha’ na Ñeñten Acheñetosets o’ch nesuanmperra osot e’ñe entot. E’ñe nepartsoteñohuen e’ñech necohuenteñesha’ nohuerra. ³¹ Nemñercha’ nemillaño’teñaneshar ñetcha’ña poctora’nerrtset atarr huomenc. Ñetcha’ña a’yapa’cha’huerret allemñateñ ñeñt acren Nompoc nocop e’ñech pa’tatsshemto’marohuen allotecma orrnotena. E’ñech allemñateñ a’yapa’cha’hueretcha’ e’ñe allohuanen añ patsrot.

³² ‘Ñaña te’pa’ señoche’pa’ch ñeñt atet pena higoch. Ñehua, esempoch senteñ higoch o’ch emñachyen puetacretollesha’ allotcha’ o’ch alla tapna’tyerrerr pasopaner, sañapa’ ñeñtcha’ña señotatene’ o’ çhenmoch allempoch huorateterrerr. ³³ Attecmach perra ñerra’m esempoch sentyerr ñaña ñeñt allpono’ notuas, sapa’ ñeñtcha’ña señotaterre’ po’ño’ch o’ca’ye çherrmoch allempoch e’ñe etsotuerre, o’ca’ye e’ñe allame’tsamerra. ³⁴ Napa’ po’ño’ch o’ch notas, acheñenesha’ ñeñt e’ñe corretsa te’ ñetña amach e’ñe rromhueneta’pa’ allempocmach e’ñech etsoterra allohuen añe’chno. ³⁵ Esemphuañen añ enet ñeñt senten te’pa’ e’ñech chenca’huerra; patspa’cho’ña attecmach perra e’ñech chenca’huerra. Tarraña ñaña neñoñpa’ amach chenquërro ama’t e’ñe ahuata.

³⁶ ‘Tarraña ñeñt yetroch nohuerrapa’ ñeñtña’pa’ ama eseshaye’ eñotenaye. Ama’t erro’tsente’ atsne’ ama’t erro’tsen tsapro ñeñtpa’ ama’t mellaño’teñesha’ ñeñt pue’ntaño’tsa’yen

ñetpa'cho'ña ama't puesheñarro'tetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompor Puechemeren napa'cho'ña te'pa' ama neñoteñe, ñapña Nompor Parets eñotene'.

³⁷ 'Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé. ³⁸ Ñehua, allempopa' ama es puecha'yeneto aña e'ñe co'tape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmanesha'chno, coyanesha'chnopa'cho'ña apanatyese'te't ñeñt yoranatyesehuate't. Ñetña'pa' ñeñta e'ñe cohuen entete't. Atteñapa' chap allempo be'tosos Noé po'huarcopahuo. ³⁹ Ama es puecha'yese'te'te

machayotepa'tcha' cho'pa oñ erracmañen, attoña aña yanatuerranet oñ allohuenet. Attecmach perra ñerra'm esempoch nohuerra na Ñeñten Acheñetosets. Machayotachca'ye nohuerra. ⁴⁰ Ñaña allempopa' atetcha'ca'ye perra; puesheña'tetspa' anmare'tterrach;

ama't ñeñt e'ñe pamo'ts pannenetañ ñeñtña'pa' allach asa'nmare'tterra. Ñato' allempopa' allo'tsencha' epsheña yacma pa'mro, puesheñarrña'pa' anmare'tterrach po'psheñeñña'pa' allach asa'nmare'tterra. ⁴¹ Amapa' ñato' allempo allo'tsencha' epsheña coyanesha' ñeñt

parro puete'stets mapyo, ñeñt'pa'cho'ña puesheñarrpa' anmare'tterrach po'psheñeñña'pa' allach asa'nmare'tterra.

⁴² 'Ñeñto'marña te'pa' o'ch notas: Chocmuepa'ch seño'se'rtenna tarro'mar sapa'cho'ña ama señotenna esempoch nohuerra na ñeñten e'ñe Separtseshar sepen.

⁴³ Napa' e'ñech machayota nohuerra atet pena eñe't allempo atta es sepcha'yena machayotach huaponasa o'ch yorats're'tensa'. Tarraña sa ñeñtes apacllates seño'chepa'ch ñerra'm seño'teñeñ e'ñech esempo tsapro huaponasa eñe't, sapa' cho'chña seño'se'rtenañ attoch amach semnacheña o'ch toram'psas sepa'cillo o'ch be'tosam'psasa o'ch yoruennasa' ñeñt allpon semorrenyena. ⁴⁴ Ñeñto'mar notenes sapa'cho'ña

chocmuepa'chña seño'se'rtenna tarro'mar allempoch atta es sepcha'yenapa' allempochña nohuerra na Ñeñten Acheñetosets.

Atetcha' a'pare'tterra ataruasañ ñeñt e'ñe cohuen etsotene' atet yecheña pamo'mte' ñaña atetcha' a'pare'tterra po'poñ ataruasañ ñeñt ama etsotaye ñeñt atet yecheña pamo'mte'

(Lc. 12.41-48)

⁴⁵ Jesúsña'pa' alla toma'ntaterraneterr po'poñone't, atet oter-raneterr:

—Allohuenespa' atetcha' sepa eñe cohuen atet ñerra'mrrate' pueheñarr yacma ñeñt atarr ame'ñañaftetsa ñaña e'ñech eñotenan ñeñt atarr sherbets. Ñeñña yacmarpa' añ yechenaya pamo'mte' e'ñe alla pa'paclo. Añcha' po'taruas pen chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa pueheña'ttso cop. Ñapa' attec mach penanet, chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach quechpuenaneto tarro'mar ñapa' e'ñe eñoteñ attoch e'ñe coshatenan pamo'mte'.⁴⁶ Ñeñña ataruasaña' atarrcha' coshatapuerran pamo'mte'. Ñerra'm esempoch huerra o'ch alla entuenan pa'taruasañer ama cho quechpuenano ñeñt po'taruas apa'neñ ahuañmo'choteñ.⁴⁷ Po'ño'ch o'ch notas, ñeñña yacmar atarrcha' coshatueñ pamo'mte'. Añcha' coshaterre' o'ch nohuer añcha'taret ñeñtcha' cohuanpsaprete' ñeñt allpon echyen pamo'mte'.⁴⁸⁻⁴⁹ Tarraña ñeñña ataruasañer allempo ama huerra' pamo'mte' ñerra'm ñapa' atta oten pueyo'chro, namo'mte'pa' amach ahuen huerro, allempoña ñapa' chach ashtapechyenan ataruasañe'chno ñeñtcha' rratañ. Ñaña' ñerra'm attach allemeñ rrapretyen ñaña attach orrare'tapretyen allcha' atarr posa'tare'tyen, ñeñña ataruasañ atetpa' ama't mameshapa' ama cohuenayaye.⁵⁰ Ñeñña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetroch huerra pamo'mte' ama't erro'tsencha' yetro huena.⁵¹ Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt po'ño'ch ama ame'ñetso ñeñt atta shecare'tyets. Allña' allcha' yahuanrrorterret panmueño'et atserrpa' rraso'tyesosetcha' pa's.

25

All atma'ntataretta ñeñt atet pena charrasheña shopshare'

¹ Jesúsña' alla ye'chaterraneterr, ñeñt pa' atet otanet:

—Allempoch añcha'taretterra Yompor ñeñt pue'ntaño'tsen allempoch nohuerra na, ñeñña allempopa' atetcha' perra e'ñech atet ñerra'mrrate' charrasheña shopshare' ñeñtcha' tatsa allcha' cohuet allempoch huerranet ñeñt e'ñe errte' sena'tetsa. Ñetña' anomyeset po'lampareñ alloch poctapueñet ñerra'm esempoch huerra.²⁻⁴ Ñeñña amnarsheña ñetpa' atta es puecha'yenet ñeñto'marña

ama anmuetoña po'poñ aceite' alloch a'huortaterret po'lampareñ allempoch huañ ñeñt anmanñset po'lamparñeño. Po'potantañ amnarsheña ñetpa' atarr eñotenet attoch eñose'rteneñ e'ñe cohuen, ñeñto'marña ñet e'ñe ellonetpa' anomyeset aceite' puetellmo alloch a'huortaterret po'lampareñ ñerra'm esempo huañañset ñeñt po'lampareñeño'tsenet. ⁵ Allña ñetpa' cohueñet, ama ahuenaye' huerranetoña ñeñt sena'tetsa. Ñetña all machayota moñe'tyesetpa' chepa'tcha' manrra'tuatset. ⁶ O'ña ñarenen tsappa' allempoñapa' machayota e'muet rranarets, ñeñtñapa' atet oten: "Tayaca'yeña huennasaña ñeñt sena'tetsa ñeñt atarr secuen. Secha'nomñaca'ye' o'ch sepocten." ⁷ Allempoñapa' allenta tanrra'tuaña allohuen shopshare' ñetñapa' a'cohuenetyeset po'lampareñ. ⁸ Amnarsheñaña ñeñt ama yerpa'pesnomaye aceite' ñetñapa' atet otare'chet po'potantañ amnarsheña ñeñt chocma anmue' aceite': "Te'pa' o'ch socya'y yaña aceite' ñeñtcha' ya'huortatnom. Yapa' o' maya'huaña yelampareñ." ⁹ Ñeñtña e'ñe cohuen eñotene' eñose'rtatsapa' ñetñapa' atet ochetña po'poñ amnarsheña ñeñt enamuenahuet aceite': "Amachca'ye yocyaso te't yehuañapen yaña. Sapa' arrña seta all pomueñet o'ch serañteña' samña socop." ¹⁰ Ñet ahuanmatset o'ch rañteñeta'pa' ñeñtña sena'tetsapa' e'ñe allorocma chen. Ñeñtña po'poñ amnarsheña ñeñt e'ñe po'ñoçh chocma eñose'rtetsa, ñetñapa' be'toscha'tet parro epuet ñeñt sena'tetsa. Allña'p' allcha' atarr coshame'tapreteret. Allña'p' e'ñe echarr yottanñset. ¹¹ Allña e'ñe o'chtatsapa' o' huaçherraña po'potantañ amnarsheña shopshare' ñeñt ahuanmatsa ñorra'. Ñetñapa' atet otuerret: "Petoramñsaye'chapuerrey Nepapareshacha'." ¹² Ñaña'p' atet otapuerranet: "Te' napa' o'ch notapuerres, sa amaca'ye po'ñoçhaye' seyemtenno."

¹³ Jesúsñapa' alla oterranerr ñeñt e'mñotene':

—Ñeñto'marña na te'pa' o'ch notas: Sapa' chocmuepa'chña e'ñe cohuen señose'rtena, tarro'mar sapa' amaca'ye señoñeñ erra'tsencha' yetñatsro allempoch nohuerra na Ñeñten Acheñetosets, ñaña erro'tsencha' yetro ama't ñeñtpa' ama señoñeñe.

All atma'ntataretta ataruasañeçhno ñeñt aparettatsa puesheña'tets quelle ñeñt otenet talento

¹⁴ Jesúsñapa' alla yeçhaterraneterr po'poñ, ñeñtpa' atet otterraneterr:

—Allempoch añcha'taretterra Yompor ñeñt pue'ntaño'tsen allempoch nohuerra na, ñeñtña allempopa' e'ñech atet perra

ñerra'mrrate' puesheñarr yacma o'ch ahuo' bačhayo. Ñeñña yacmarpa' o'ch agotnoman pa'taruasañrenesha'pa' o'ch apa'yesnomanet quelle ñeññ allpon echen; ñetñapa' o'ch cohuañpsoñet tarremphuach esempohuañencha' huerra.

15 'Puesheñarrpa' apa'neñ amnarmeta talento, ñeñña'pa' atarr shonte' quelle allpon ñerra'm amnar mil. Ñapa' añecop apa'neñ attoch ellopa' o'ch atontatan po'patronar po'čllayor. Po'psheñeñpa' apa'neñ epmeta talento, ñeñña'pa' allpon quelle allpon ñerra'm epa mil. Po'psheñeñpa' apa'neñ puetatarr talento. Ñeñña'cho'ña allpon quelle ñerra'mrrate' paterr mil. Ñehua, puesheña'ttsetpa' e'ñe allpona apa'yesnomanet ñeññ e'ñe allpona eñotyenet attoch ellonetpa' atontatet quelle. Ñeñña' apa'yesuanmanetpa' ñaña'pa' allenta ahuo' bačhayo. 16 Ñeññ agapue' amnar mil ñaña'pa' allorocma ahuo' allcha' taruasatan quelle; attoña ellonetpa' o' alla ganerrerr po'poñ amnar mil quelle. 17 Atet pa' ñaña' ñeññ agapue' epa mil. Ñapa'cho'ña ellonetpa' ganerrerr po'poñ epa mil quelle. 18 Tarraña añña ñeññ agapue' paterr mil ñaña'pa' allenta aneñ allcha' pampueña'; atto'yeña ñapa' cha e'potanña quelle.

19 'O'ña atomatpa' o' huerranetña po'patronaret, allenta agotatuerranet attoch entuerranet po'taruas erro'tente' taruasa'yeset e'ñe puesheña'ttset. 20 Ñeñña' agapue' amnar mil ñaña'pa' huapapa' apapuenan po'patronar po'poñ amnar mil quelle, ñeñña'pa' atet otapueñ: "Añña Nomporka' ñeññ pa'pa'nmuen amnar mil quelle ahuaña, napa' ellocaye neganerrerrña pečllayoroť po'poñ amnar mil quelle." 21 Po'patronarpa' atet och: "E'ñe pocte' neyochrecha'; pa'pa' atarr cohuen pesherbeneñ. Papa' e'ñe cohuen petsoton ñeññ atet notnomuep. Ama't allponatolla napa'nma'p ahuaña, pa'ña'pa' atarro't cohuen pesherbatoñ. Ñeñño'marña te'pa' o'ch nenuerre'p pa'ch necuañpsapreterre' ñeññ atarr aton. Te'ña pa'pa' pebe'tos allcha' atarr po'chshapreterrna." 22 Allempoñapa' ñeññ agapue' ñaña' epa mil, ñapa'cho' huapapa' apapuenan po'patronar po'poñ epa mil quelle. Ñapa'cho'ña atet otapueñ: "Nomporka' ñeññ pa'pa'nmuen ñaña' epa mil, napa'cho'ña ellocaye neganerrerrña pečllayoroť po'poñ epa mil quelle." 23 Ñapa'cho'ña po'patronarpa' atet och: "E'ñe pocte'; pa'pa'cho'ña atarro't cohuen pesherbeneñ. Papa'cho'ña e'ñe cohuen petsoton ñeññ atet notnomuep. Ama't allponatolla napa'nma'p ahuaña, pa'ña'pa' atarro't cohuen pesherbatoñ. Ñeñño'marña te'pa' o'ch nenuerre'p pa'ña' pa'ch necuañpsapreterre' ñeññ atarr aton. Papa'cho'ña te'pa' pebe'tos pa'ña' allcha'

atarr p̄ocshapreterrna.” ²⁴ Allempoñapa’ huapa ñaña ñeñt̄ agapue’ paterr mil quelle. Ñañaapa’ atet otapueñ: “Napa’ neñoteneḡ Nomporcha’. Papa’ amaca’ye matsre’mñape; p̄apa’ čhocmaca’ye peprratam̄pesyen ama’t ñeñt̄pa’ ama p̄oyaye ñaña čhocmaca’ye p̄ocsechatyenña ñeñt̄ ama p̄aye’ nare’tatyenaye; čhocma es p̄a’yapača’yen ama’t ñeñt̄pa’ amaca’ye p̄aye’ na’yenaye. ²⁵ Ñeñto’marña napa’ čha nemča’teneḡ. Ñeñto’marña ñeñt̄ p̄apa’nmuen ahuaña paterr mil quellepa’ nañapa’ čha nepamponaḡ. Teñapa’ o’ch alla napapuerreḡ ñeñt̄ e’ñe p̄o.” ²⁶ Allempoña po’patronarpa’ atet och: “Paña po’ñočpa’ amaca’ye cohuenaye’ pesherbanno ama’t mamesha; atarrca’ye quellañt̄soḡ. Ñerra’m e’ñe po’ñoč peñotenoñ čhocma es neprratam̄pesyeneñ ñeñt̄ ama noyaye; ñerra’m po’ñoč čhocma nocsechatyeneñ ñeñt̄ ama naye’ nare’tatyenaye; ñerra’m po’ñoč čhocma es na’yapača’yeneñ ñeñt̄ ama naye’ na’yenayñe, ñerra’m e’ñe po’ñoč atet pentennoñpa’ ²⁷ eso’maruañaca’ye amaña bancoye’ penennanoña nečllayor allochñapa’ te’ña o’ nehuerrapa’ nagaphuerreñcha’ ñaña allo atontatonet nečllayor.” ²⁸ Allempoñapa’ atet otan ñeñt̄ tomča’tyets all: “Te’pa’ čhosa puerrataḡperre’ña ñeñt̄ paterr mil quelle o’ch sapuer ñeñt̄ echene’ čharra’ mil quelle.” ²⁹ Ñeñto’marña te’ napa’ o’ch notas: Ñeñt̄ es echets shonte’ e’ñe p̄usherbateñotet pamo’mte’, ñetña elloneḡpa’ o’ch alla aparetterret po’poñ aton. Tarraña ñeñt̄ ama es echetsopa’ ama’t allponatolla ñeñt̄ ečhyenetañ aprratam̄psaretterretcha’. ³⁰ Ñaña añ ataruasañer ñeñt̄ ama nesherbenaḡ, te’ñapa’ čhosaña huapore’tē a’yoḡ checmetot. Allñapa’ allcha’ yahuanrrortenet panmueñotet atserrpa’ rraso’tyesosetcha’ pa’s.”

Allempoch ellopa’tetstataretterra ñeñt̄ toma’ntenaya carrneročno ñaña ñeñt̄ toma’ntenaya cabračno

³¹ Allempoch nohuerra na Ñeñten Acheñetosets, nohuerrach e’ñe nepartsoteñohuen epan allohuen nemillañoḡteñnaneshar. Allempopa’ nanorruerrcha’ neconaño allcha’ña e’ñe nepartsotuerr e’ñe necohuenteñesha’. ³² Allempoñapa’ e’ñech nesho apčherra allohuen pa’namen acheñ ñeñt̄ yeča’yetsa arr patsro. Allempochña nellopa’tetstaterranet e’ñe atet pena ñeñt̄ pamo’mte’ pen carrnero, ñañaapa’ o’ch ellopa’tetstatenan carrneročno ñaña cabračno. ³³ Acheñenesha’ña ñeñt̄ e’ñe cohuenpa’ ñetñapa’ necohuenrotcha’ nenuerranet ñeñt̄ e’ñe atet ñerra’m carrneročno. Ñaña ñeñt̄ña ama cohuenayayepa’

ñetñapa' ne'chcoterotach nenuerranet ñeñt e'ñe atet ñerra'm cabračno. ³⁴ Naña allempoch atarr na'nicha'taretterra'pa', atetcha' noter ñeñt necohuenronte'tsa'yen: "Sapa' sona'cha't allohuenes tarro'mar Nompopor o'ca'ye atarr bensare'tamperres. Te'ña sapa' o'ch saguërr ñeñt o'patatensa ahuatoteñ. Ama't allempoteñ Nomporpora' errete' ye'chcatene' pats sañapa' allempoteñ o'patatasa attoch sa'nicha'tarettapretera. ³⁵ Tarro'mar napa' allempo nachporre'tpa' saca'yeña nerratallme'chaye't. Allempo no'ñpa'te'tpa' saca'yeña nonayesaye't. Allempo ne'chapue't sesho all ama nentare sañapa' chocma e'ñe cohuen sagapne't. ³⁶ Allempo nemuelle'tpa' saca'yeña nepashtaye't. Allempo natsna'te'tpa' sañapa' chocma secuamipesne't. Allempo yottamipesnete'tpa' saca'yeña e'ñe cohuen nemo'taye't." ³⁷ Allempoña ñeñt e'ñe cohuen es ne'pa'yesaye'tpa' ñetñapa' atetcha' oterrnet: "Ta'm Partseshacha', ¿esempo'tña yentape't allempo pachporre't allempo yerratallme'chape't? ¿Esempto'tña yentape't allempo po'ñpa'te't allempo yonape't? ³⁸ ¿Esempto'tña yentape't allempo pe'chapue't yesho all ama pentare allempo e'ñe cohuen yagapape't? Ta'm ¿esempto'tña yentape't allempo pemuelle't allempo yepashtape't? ³⁹ ¿Esempto't yentape'tña allempo patsna'te't ñaña allempo yottamipsapete't allempo yemo'tape't?" ⁴⁰ Allempoña na ñeñten Partseshanpa' atetcha' noterres: "Te' napa' o'ch notas: Po'ño'chpa' allempo e'ñe cohuen atet se'pa'yesnane't na nemo'nasheñnesha' na'naca'yeña e'ñe cohuen atet sepen. Ama't puesheñarra ñeñt ama esoshe'maye' entyese'te acheñenesha' allempo, tarraña saña allempopa' atto e'ñe cohuen es se'pa'yesanete't, na'naca'yeña e'ñe cohuen atet sepen allempo."

⁴¹ 'Allempoña ñeñt ne'chcoteronte'tsenpa' atetcha' noterranet: "Sapa' orrerres arro't, sapa' aña so'patenaya ñeñt atarr yoro'chen. Te'ñapa' orras all huorten tso' erra'paren ñeñt ama amayaño ama't errponaña. Ñeñtña tsorpa' añ o'patateñet oneñet e'ñe pueyochreshohuen. ⁴² Tarro'mar na allempo nachporre'tpa' sapa' amaca'ye saye' nerratallme'chaye'te. Allempo no'ñpa'te'tpa' amaca' saye'ña nonaye'te. ⁴³ Allempo ne'chapue't sesho all ama nentare sapa' amaca'ye cohuenaye' sagapne'te. Allempo nemuelle'tpa' sapa' amaca'ye saye' nepashtaye'te. Allempo natsna'te't ama't ñaña allempo yottamipesnete'tpa' sañapa' amaca'ye semo'tne'te." ⁴⁴ Allempoña ñetpa' atetcha' oterrnet: "¿Esemphuañaca'ye, Partseshacha', yentape't allempo pachporre't ñaña allempo po'ñpa'te't ñaña allempo pe'chapue't yesho all ama pentare ñaña allempo pemuelle't ñaña allempo patsna'te't, ñaña

allempto yottam̄psapeteʔ? ¿Esemptoʔtña yentapeʔ atet allempto yapaʔ amaʔ coñeʔtapaʔ ama es yapapeʔte?”⁴⁵ Allemptoña napaʔ atetchaʔ noterranet: “Teʔpaʔ oʔch notas: Poʔñoç sa allempto ama aʔcuaʔpsenayeʔ sentoneʔte allohuen na nemoʔnasheñneshaʔ, naʔnacaʔyeña atet senteʔtña allempto.”⁴⁶ Allemptoña acheñeneshaʔ ñeñt̄ neʔchcoʔteronteʔtsen, ñetñapaʔ ahuanerretchaʔ allchaʔ coñcherret eʔñe errponohuañen. Añña ñeñt̄ eʔñe cohuen es paʔyestseʔt̄ ñetñapaʔ ahuanerretchaʔ Yomporesho allña ñetpaʔ corretsetach pocsheñeshocmañen errponañohuen.

26

Atto atarr oʔpateñet Jesús oʔch muetsatateret
(Mr. 14.1-2; Lc. 22.1-2; Jn. 11.45-53)

¹ Jesúsñapaʔ allempto serrpareʔtatuahuanet allohuen añ ñoñetspaʔ allemptoñaapaʔ atet otan pueyochreshaʔ:

² —Sapaʔ señoʔteñ oʔcaʔye epomtañapaʔ oʔch çhapaʔmuen pascuapo. Allemptoña na Ñeñten Acheñetosetspaʔ allem-pochña pomuerrnet attotchaʔña corsoʔtam̄perrnet.

³ Allemptoña allohuen judioneshaʔ paʔm̄chaʔtareʔterneshaʔ ñetñapaʔ apçhet. Añ apçhatsa allohuen ñeñt̄ judioneshaʔ poʔcornaneshar paʔm̄chaʔtareʔterneshaʔ epuet ñaña ñeñt̄ atarr etsotayenayeñ ñoñets ñeñt̄ atet anaret epuet ñaña ñeñt̄ pom-porneshaʔ pen allohuen judioneshaʔ. Ñetñapaʔ arr apçhenet corneshaʔ paʔpaclo, ñeñt̄ña corneshaʔpaʔ ñacaʔyeña atarr nanac paʔm̄chaʔtareʔter penet, ñeñt̄paʔ añ paʔsoʔcheñ Caifás.

⁴ Allña ñetpaʔ coʔtapeʔchatannenet, Jesús a atarr oʔpatenet. Ñetñapaʔ atet otannaʔtyeset:

—Errotuachcaʔye yepeʔteʔ attoch yeshcach eʔñe aʔnahua eshecchaʔ yerrmach attotchaʔ yemtsatach.

⁵ Ñetña allempopaʔ alla otannaʔtyerreterr:

—Tarraña teʔ pascuapo allempto shontena acheñeneshaʔ amachcaʔye yerrmatsche allañacaʔye çha yatsrreʔmoçhtateñ acheñeneshaʔ.

Atto puesheñarr coyaneshaʔpaʔ shosan eñmosaʔ Jesús poño
(Mr. 14.3-9; Jn. 12.1-8)

⁶ Pam̄tarrña Jesús paʔ Betanioʔtsen all Simón paʔpaclo, ñeñt̄ña Simónpaʔ ñeñt̄ oseʔt̄ puetsarñats. ⁷ Jesúsñapaʔ alla anen all rrallmeʔchen. Allña paʔ huapoña puesheñarr coyaneshaʔ, huapatan eñmosaʔ ñeñt̄ ama matsaʔto; huapatam̄pes puetellm̄o ñeñt̄ña puetellem̄paʔ añ socheñet alabastro. Ñeñt̄ña eñmosaʔpaʔ alla sheʔ Jesús poño.

⁸ Pueyochreshaçhnoña ñetña eñchetpaʔ çha atsrreʔmuet, atet tyeset:

—Eso'mare'tña atta a'pertatosanña eñmosañ. Ñeñt eñmosañterpa' amaca'ye matsa'to. ⁹ Chochña'cho' pomoseñpa' ganañcha' shonte' quelle allempoñapa' apa'yesaneñcha' ñaña allohuen huocchañneshachno.

¹⁰ Jesúsña e'manetpa' ñañaapa' atet otanet:

—Eso'mare'tcha' čha muene' satsrre'močhtana'tapña coyanesha'. Ñapa' atarrca'ye cohuen pōsen. ¹¹ Tarraña ama'tcha' čho pomosaneñ eñmosañ alloch es apa'yesaneñ huocchañneshachno, tarraña čhocmachca'ye eñallña huocchañneshachno arr patsro. Nañapa' po'ñočhpa' amachca'ye allo'na sentenno arr patsro. ¹² Ñeñt atto shosnan te' eñmosañ nechtso, ñeñt'pa' añe'cpa'naca'ye sherben tarremphua allempoch a'yana'terrneterr ñeñt'cha' epuet pampa'pesnet. ¹³ Po'ñočhca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpūenet.

Atto Judaspa' pomuerran Jesús

(Mr. 14.10-11; Lc. 22.3-6)

¹⁴ Allempoña pueyochresha' ñeñt čharra' puechetsa epsheña, puesheñarrña ñeñt pa'so'cheñ Judas Iscariote, ñañaapa' allenta ahuo' allo'tsa'yen ñeñt pa'm'cha'tareternesha' p'a'yen allohuen judionesha' po'cornaneshar.

¹⁵ Chap allpa' ñañaapa' atet otosanet:

—Ñerra'm o'ch negatas Jesús attoch serrmue'pa' ¿errpona'tcha'ña setsa'tna?

Ñeñt'apa' atet ochet:

—O'chca'ye yapaṣ ma'poch čharratlla quelle.

¹⁶ Allempoña ñapa' aña e'ñe co'tape'chyen erro'tenotcha' pomuerranña Jesús.

Atto Jesúsapa' rrallme'chatnenan pueyochresha' attoch čhocmach yerpūeret ñeñt yoten te' Santa Cena

(Mr. 14.12-25; Lc. 22.7-23; Jn. 13.21-30; 1Co. 11.23-26)

¹⁷ Allempoña čhapa'muen ñeñt yetñatsro allempoch rrerretterr pan ñeñt ama anareteyaye chase'. Chapa'muen ñeñt yeterpa' Jesúsñapa' huachha'toña pueyochresha' ñeñt'apa' atet otoset:

—Te'pa' ¿erra't pemneñ allcha' ya'potonaṣ ñeñt'cha' perra' pascuapo?

¹⁸ Ñañaapa' atet otanet:

—Te'pa' o'ch ahues anetso; o'ch sečhap allo'tsen puesheñarr acheñ. Ñeñt'pa' atetcha' sotos: “Ñeñtña Maestro Jesúsapa' atetca'ye oten: ‘Te'pa' o' čhapmoch allempoch nerroma, te'

pascuapopa' arrcha' nerra'nom pepacillo neyochreshohuen.'

¹⁹ Atef otanet Jesús'pa' ñetñapa' atetcho' pet. Allca'yeña añño'tosñañetña rreñets allcha' rrallme'chet.

²⁰ O'ña ellerrotenapa' Jesúsñapa' anorros allcha' rrallme'chatnenan pueyochresha' ñeñt' charrasheña puechena epsheña. ²¹ Allña rrallme'chetsetpa' Jesúsñapa' atef otanet:

—Po'ñochca'ye notenes: Puesheñarroñes sa ñeñtescha'ca'ye nepomuerre'.

²² Ñetñapa' cha atarr lleca'rrtet. A'pto'tyeset e'ñe puesheña'ttset:

—Partseshacha' ta'm ¿amafe' na nepomuerrmochape?

²³ Ñaña'pa' atef oterraneterr:

—Ñeñt' netsapechapretene' nerrarpa' ñeñtcha'ca'yeña nepomuerre'. ²⁴ Po'ñochca'ye te'pa' allo'na sen etsotnomtsa ñeñt' atef anuaret' Yompor po'ñoño nocop Ñeñten Acheñetosets; attotcha' muetsaterrnet. Tarraña nocoppa' e'ñe pocte'; añña po'ñoch acheñer ñeñtcha' nepomuerre' ñocopñapa' atarr llequëñets. Añ acheñerpa' e'ñeca'ye poctet' ñocop amachña'cho' eñalletatstañe.

²⁵ Judasña ñeñtcha' pomuerre'pa' ñaña'pa' atef och:

—Maestrocha' ta'm ¿amafe' na nepomuerrmochape?

Jesúsñapa' atef och:

—Pate'ca'ye atetca' poten.

²⁶ All rrallme'chenet, Jesúsñapa' chetan pan parasyoso'tan Pompor. Parasyoso'tuepa' shota'tan panpa' apa'yesan pueyochresha'. Ñeñt'pa' atef otanet:

—Sagapyes o'ch serre' añmapa' ñeñtcha'ña nechets sepen.

²⁷ Alloñapa' chetan ñaña orramets parasyoso'tuerrerrpa' apa'yerraneterr. Ñeñt'pa' atef oterraneterr:

—Sorr ñaña añ narmetsos allohuenes. ²⁸ Añpa' nerrasca'ye sepeñ ñeñtcha' ashatarettatsa shonte' acheñeneshacop alloch a'pre'tnare'tterret po'chñaret. Añ nerraspa' alloch e'ñe et-serra a'poctaterra acheñenesha' Apuesho. ²⁹ Napa' o'ch notas: Te'pa' amach alla norrerre'te añ narmetsos tayoteñ tarremphuach allempoch alla ello yorrerrerr parro allem-poch añcha'taretetuerra Apa.

*Atto Jesús'pa' eñotatan Pedro ñapa' chocmach a'nasocha
(Mr. 14.26-31; Lc. 22.31-34; Jn. 13.36-38)*

³⁰ Allempoña o' morrechuanmuet Yomporecoppa' ahuaneneterr Olivopno. ³¹ Allña'pa' atef otosanet Jesús:

—Añ tsaprocmach sa allohuenespa' sa'ypo'ña' huanmuencha' tarro'mar Yompor po'ñoñopa' atetca'ye anuaret', ñeñt'pa' atef

ote't Yompor nocop: "O'ch nemtsater ñeñt' cohuanmpene' carrnero, po' carrnerorñapa' čhach matrra'tyesa allemeñt'."

³² Jesúsñapa' atet' oterraneterr:

—Tarraña esempoch alla netanterra napa' nanomcha' otertsa Galileo.

³³ Allempoña Pedropa' atet' och:

—Ama't allohuenet ñerra'm a'ypo'ña'huerrpetcha'pa' naña ama't ahua'tapa' amach na'ypo'ñerrpe.

³⁴ Jesúsñapa' atet' otererr:

—Po'ñočhca'ye o'ch notaḡ, aña tsaprocma amach eñena' atolloppa' ḡañapa' o'ch ma'poch ḡa' nasotenna.

³⁵ Pedroñapa' alla otererr:

—Ama'tcha' yerromhuanen parropa' nañapa' ama't parrocha amach na' nasotaḡo.

Allohuen pueyochresha'pa' ñetpa'čho'ña e'ñe attecma otyeñetañ ñamet.

Atto Jesús'pa' ma'yochuena all oteñet Getsemaní

(Mr. 14.32-42; Lc. 22.39-46)

³⁶ Allo'tñapa' čhap Jesús pueyochreshohuen all narmetsmō, ñeñt'pa' añ pa'so'cheñ Getsemaní. Allñapa' otosanet:

—Te' sapa' allach sanorrčha'tos arrma, napa' o'ch nema'yochena' tarronteye'.

³⁷ Allñapa' aña anmos Pedro ñaña Zebedeo puechemere'sha', epsheña. Jesúsñapa' čha nanac llequēna, nanac allpatena. ³⁸ Allempoñapa' atet' otosanet:

—Napa' čha chepočhenen nellquēña neyočhro, čha muene' nerromuen nellquēño't. Sapa' allasa'tach arr secuapretosno'tach.

³⁹ Ñañapa' ahuo' a'yenteye' all rremosa patso atet' ma'yochosa:

—Apa, ñerra'm errotent'pa' arepa'chña pemnatatsche o'ch čhapona ñeñt' atarr amuročhtatañ nenten.* Tarraña ñerra'm ḡach muenats añepa'chña atet' peḡaton ñeñt' pemnen ḡa, amachña añeyaye ñeñt' nemnen na.

⁴⁰ O'ña atet' ma'yochuapa' o' ahuerri allo'tsa'yen pueyochresha' ma'psheña. O' čherr allpa' alla entuerranet ñetñapa' čha atarr manrrenet. Allempoñapa' otuerran Pedro:

—Ama't mamesha are'tcha'ña acuenaye' sentoso. Amahuachñaca' secuapretosnote' ama't mamesha. ⁴¹ E'ñe seño'se'rteño'tpa' čhoña sema'yochosa allochñapa' attoch amach sañeña a'puerrataterro topateñets ñeñt'cha' sehuapoya atarr huomenc. Ñeñt'pa' ama't atarr semneñeñ

* **26:39** Ñeñt' amuročhtatañ ñeñt'pa' po'ñočh arr atma'ntatare't ñerra'mrrate' ñeñt' atarr pesherr yorren orran'tso.

tarraña sechetsñapa' amaca'ye ahuamencafeye' penso, ñeñto'marña notenes čhocmach sema'yochena.

42 Jesúsñapa' alla ahuerrerr puepocheño o'ch ma'yocherrerr, ñeñtara atet otuerrerr:

—Ñerra'm Apacha' aña pemnaten o'ch čhapona ñeñtcha' atarr na'mueročhtate', ñerra'm ama errofenot pa'huañatamperrno, ñeñtpa' e'ñe pocte'. Añepa'chña atet pepaton ñeñt pemnen pa.

43 O'ña alla ma'yochuerrerrpa' allempoñapa' huerrerr alla entuerranerr pueyochresha' ñetñapa' o' alla manrrerretter, čha nanac atserr moñe'tenet. 44 Jesúsñapa' alla sa'nerraneterrpa' ahuerrerr ma'yochatsa poma'pocheño'hua. E'ñe attecma ma'yochuerrerr atet otua ñorra'. 45 O'ña ma'yochuerrapa' allempoñapa' alla huerrerr pueyochreshesho, atet otuerraneterr:

—Ama't teme'ttsenpa' alla't semanrren; ama'tpa' alla sames. Te'pa' señoche'pa'ch o' čhap allempoch pomataterret na Ñeñten Acheñetosets attočha' erro'tuanen perren ñeñt atarr ochña'tenesha'. 46 Te'ñapa' setanterra o'ch ahuey o'ch yepocte'. Secue'ca'ye ñeñtcha' nepomue' ñeñtpa' alla'tsena.

Allempo rromoset Jesús

(Mr. 14.43-50; Lc. 22.47-53; Jn. 18.2-11)

47 All atet eñorena Jesús'pa' čha huapatsa puesheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñaña'pa' huacha'tatan shonte' acheñenesha' occhelletareret ñaña etsachperetareret. Ñehua, añ ñeñt huacha'ttsapa' añ mueñenahuet ñeñt pa'mičha'tareternesha' pen allohuen judionesha' po'cornaneshar ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rremuenaya' Jesús. 48 Ñehua, Judas ñeñt pomuerre' Jesús'pa' ñaña'pa' atet otnoman acheñenesha' ñeñt anom attoch cheme'toset Jesús. Ñeñtpa' atet otnomanet:

—Erra'tsencha' nehuomčha'tos e'ñe netso'ttsapa'teño'pa' ñeñtca'yeña Jesús. Sañapa' ñeñtcha'ña serrmos.

49 Allempoña huapapa' čha ponmosaya Jesús huomčha'tos e'ñe puetso'ttsapa'teñesha' atet otos:

—Tsapo, Maestrocha'.

50 Jesúsñapa' atet ota'p:

—Eso'maruañaca' masheñe, penña arr nesho.

Allempoña acheñenesha'pa' ponmosyet Jesús'pa' rromoset e'ñe po'huamencocma.

51 Allempoña puesheñarr ñeñt epuet Jesús'pa' ñaña'pa' po'cchella cheta'pa' o'ch čhonto'tapanen cornesha'

pueñañra, puetepa'tcha' tsorroñ. Ñeñt'pa' año pueñañra ñeñt' pa'm'cha'tareter pen allohuen judionesha' po'cornaneshar.

⁵² Allempoña Jesús'pa' atet och:

—Penerr alla p'occhell allecma peneñ. Allohuen ñeñt' orrotetsa po'cchellopa' cochllochca'ye colla'huerret. ⁵³ Papa' çhate' p'otenapañ amate' errotenot es nenameña Nompör. Ama't peñoteñe ñerra'm çho nenampa' ñapa' allorocmach mueñoneñ shonte' nanac po'millañoteñnaneshar ñeñt'cha' nemoñsayañ, ⁵⁴ tarraña ñerra'm atet ne'papa' amate' errotenot etsotoña ñeñt' atet anuaret Yompor po'ñoño nocop. Allña oten ñeñt'pa' atet'cha'ca'ye perra.

⁵⁵ Allempoña Jesús'pa' atet otan acheñenesha':

—Eso'mare't sehuacha'tennanaña e'ñe occhelletareroches ñaña etsachperetareroches attoch serrma'n. Napa' ¿e'ñe't atet sentenen ñerra'mrrate' eñefen? O' allponmatuanen nanorryen Parets pa'paclo'mar, all neyçhatyen, eso'mare'tña ama allempocmaña serrma'ne'te. ⁵⁶ Ama'tpa' attepa'ca'ye perra allochñapa' attoch e'ñe etsotuerra ñeñt' allpon quellca'yese't nocop ñeñt' a'mta'yese't Yompor po'ñoñ.

Allempoña allohuen pueyochresha'pa' allorocma a'ypo'ña' huanmet, ñetñapa' yetrra'tuet.

Allempo çhapata'mueñet Jesús all ap'cha'muena allohuen judionesha' pa'm'cha'tareternesha' ñeñt' a'p'octatyene' ñoñets ñocpuet

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Acheñenesha' ñeñt' rromose' Jesús'pa' ñetñapa' anmet allo'tsen Caifás ñeñt' pa'm'cha'tareter pen allohuen judionesha' po'cornaneshar. Allñapa' all ap'chenet parro allohuen ñeñt' atarr etsotayenayeñ ñoñets ñeñt' atet anaret epuet ñaña ñeñt' pompornesha' pen allohuen judionesha'. ⁵⁸ Pedroñapa' co'ta'nmanet tarraña ñapa' chenta' en a'yo't. E'ñe cornesha' po'pampohua allñapa' anorros epuet ñeñt' guardianesha' allochñapa' esheccha' entan Jesús attoch erro'tuanencha' pet.

⁵⁹ Cornanesha'ña pa'm'cha'tareternesha' ñaña ñeñt' pompornesha' pen allohuen judionesha' ñaña allohuen ñeñt' a'p'octatyene' ñoñets ñocpuet ñetñapa' aña atarr e'nenet ñeñt'cha' toma'tam'pse' Jesús allochñapa' attoch muetsatachet. ⁶⁰ Ama't shonte' huapatsañ ñeñt'cha' toma'tam'psosayeñpa' am'cha'taretnesha'ña ama't puesheñarro'tetapa' ama eseshaye' entayeña attoch muetsatachet. Atteñapa' huapa ñaña epsheña ñeñt'cha' toma'tam'pse'. ⁶¹ Ñetñapa' atet otoset:

—Añ acheñer ahuañapa' atet'ca'ye oten: “Napa' atarr ahua'mencaten attoch na'materrñañ Parets pa'paquëll. Allotña

poma'pamtañopa' o'ch alla natomater." Ñapa' atetca'ye otña allempo.

⁶² Allempoñapa' cornesha' ñeñt nanac amcha'taret allenta tompa' atet otan Jesús:

—Pañapa' ¿ama'tcha'ña ñapananeto? ¿Errofenote'tña oteñe'chenpet?

⁶³ Jesúsñapa' ama eñoreno. Allempoña cornesha'pa' alla otererr:

—Te'pa' o'ch notap o'ch potey e'ñe Yompor pa'so'chño ñeñt ama arromñafeshayaye, ñapa' ¿pa'tña ñeñte' Parets Puechemerep, ñeñte'p'te' Cristotsets?

⁶⁴ Jesúsñapa' atet och:

—Napa' po'ño'chca'ye ñeñten e'ñe atet poten. Elloña napa' o'chca'ye notas, o'ca'ye e'ñe chapmoch allempoch e'ñe senterren na Ñeñten Acheñetsets o'chca'ye alla nanorruerr Parets po'cohuenrot allcha' nepartsotapretera. Ñaña po'pocheño o'ch sentapuerren o'ch nesuanperra oso Yompor pue'ntañot.

⁶⁵ Cornesha'ñapa' ñeñta e'mpa' allenta rrarre'tan pa'shtam e'ñe patsrre'mueñot, ñeñtpa' atet ot:

—O'ca'ye cha achmare'tanña Yompor. Ñeñte'p'ñapa' amach ye'natsche po'psheñeñ ñeñtcha' a'metanp'sose'. Te' ama't sapa' o'ca'ye se'm atet achmare'tenan Yompor. ¿Errofena't senteñña sa?

⁶⁶ Ñetñapa' atet otyeset:

—Ña po'ño'chpa' atarrca'ye nanac achmare'tenan Yompor, pocte'ña'cho' te'pa' o'ch semtsatach.

⁶⁷ Allempoñapa' a'coshare'tyeset e'ñe pa'clloyot, cho'ña chota'tyeset; po'potantañe'chnoñapa' tacllapechyeset.

⁶⁸ Pachmare'teño'fetpa' atet otyeset:

—Te'ña ñerra'm po'ño'chte' Cristo'ppa' eñoratenperrepa' Parets allochñapa' attoch potey esesha'te'ña pe'chota'tyene'.

Atto Pedropa' a' nasotana Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedropa' a'yote'tsen all anen pampo. Allñapa' huapoña coyanesha' ñeñt cornesha' pueñañra, ñaña'pa' atet otosan Pedro:

—Paca'ye e'ñe cotaye'tña Jesús ñeñt galileo'marnesha'.

⁷⁰ Pedroñapa' anapue'pa' cha a'nasocha. Allohuenetñapa' e'ñe e'mhueñet atet ot:

—Napa' amaca'ye neñoteñe ñeñt atet potenen.

⁷¹ Allempoña Pedropa' ahuerri, cherr allotecma be'tenet o'ch chapuet o'pono pampo. Allñapa' entuererr po'psheñeñ coyanesha' ñeñt cornesha' pueñañra. Ñaña'pa' atet otan ñeñt parro allo'tsa'yenet:

—Añ acheñerpa' ñeñtca'ye cotene'ña Jesús ñeñt nazareto'marnesha'.

⁷² Pedroñapa' alla a' nasotererrpa' atet otererr:

—Te' napa' o'ch notas e'ñe Yompor pa'so'chño, napa' amaca'ye nentareña añ yacmar ñeñt potenen.

⁷³ O'ña o'chtererrpa' huapoña ñaña ñeñt tom'cha'tyets all, ñetpa'cho'ña atet otoset:

—Po'ño'chca'ye p'apa' Jesúsca'ye pueyochreshap. E'ñe atet peñen ñerra'mrate' galileo'marnesha', ñeñto'marca'yeña o' yeñotañ.

⁷⁴ Allempoña Pedropa' e'ñe pueshquëñoñanetpa' atta otatse'tyerraneterr, ñeñt'pa' atet otanet:

—Napa' e'ñe Yompor pa'so'chño notenes, ñerra'm amate' po'ño'choye' notensopa' te'pa' nerromuepa'. Napa' po'ño'chca'ye ama nentareña añ yacmar.

Ñeñta otuanetpa' e'ñepa'tcha' allempocma eñenña atollop.

⁷⁵ Allempoña Pedropa' alla yerpuerrana ñeñt atet oteñ Jesús: “Amach eñena' atollop p'aña'pa' o'ch ma'poch p'a' nasotenna.” Allempoña Pedro 'cha'nom allotpa' ahuo' a'yenet allñapa' all atarr yahuosa huomenc.

27

Allempo 'chapata'mueñet Jesús allo'tsen añcha'taret Pilato (Mr. 15.1; Lc. 23.1-2; Jn. 18.28-32)

¹ Tsapaña puetarenpa' ñeñtña pa'm'cha'tareternesha' pen allohuen judionesha' po'cornaneshar ñetñapa' ap'cha'mueneterr parro epuet ñeñt pompornesha' pen judionesha'. Allña ap'chenetpa' ñetña allohuenetpa' cotape'chatanna'tet attotcha' muetsatateret Jesús.

² Jesúsñapa' o' huancota'tuet allempoñapa' anma'mueñet allo'tsen añcha'taret Poncio Pilato (ñeñt nen gobierno Romot ñeñt añcha'tarettetsa allo'marneshacop). Allca'ye poma'mueñetña Jesús.

Atto tsomerra Judas e'ñe ñañeña

³ Judasña ñeñt pomue' Jesús'pa' allempoña ñapa' eñoch Jesús'pa' 'chochca'ye muetseret. Allempoña puellquëñoñpa' ello alla cotape'cherran cohuen. Allempo atet cotape'cherrpa' ñaña'pa' alla pomuerran quelle ma'poch 'charratlla. Alla apuerrana' cornaneshar pa'm'cha'tareternesha' ñaña ñeñt pompornesha' pen allohuen judionesha'. ⁴ Allñapa' atet otuerranet:

—Napa' o' 'cha norrtaterr ñeñt ama cohuenayaye, o'ca'ye 'cha nepomuer acheñ attoch muetseret ama't ñapa' ama't coñe'ta amaca'ye eñalleña po'chñar.

Ñetñapa' atet anaprra'tet:

—Ñeñtpa' amaca'ye errotenoña yocop, ñeñtpa' p̄ocpaca'ye.

⁵ Allempoña ñapa' atta huapore'terrana' quelle o'pono Parets pa'paclopa' o' alla ahuerr, e'ñe puellquëño'tpa' tsoña'huerra ñañeña.

⁶ Cornaneshanapa' o' alla cheterret quelle. Ñetñapa' atet otanna'tyeset.

—Añ quellepa' alloca'ye atsa'taretta attoch shataterrñañet acheñ po'rras. Ñeñto'marña te'pa' amate'ca'ye pocteyaye o'ch alla yenererr allecma apchenet quelle Parets pa'paclo.

⁷ Allempoña e'ñe ñagattsetapa' atet a'pochtachet o'ch rañtoñet allo añ po'patseñ ñeñt ye'chcatyene' patsrro' allochñapa' allcha' pampa'yeret ama't erra'tsena acheñer ñeñt ahuapña ñerra'm esempo rromayenet allampaño.

⁸ Ñeñto'marña ñeñt patserpa' añ sochet Errasatsotnanen tarro'mar ñeñte quellayero rañtyet allo ashataretterra er-rasats. Ama't teme'ttsen ñeñt patser socheñet Errasatsotna-nen. ⁹ Attoca'yeña etsotaña atet ote't Jeremías ñeñt a'mitaye't Yompor po'ñoñ ahuat, ñeñtpa' atetca'ye quellquë't Cristo-cop: “Cheterretcha' ñeñt ma'poch çharratlla quelle ñeñt allpon po'tsa' nen israelena'tarnesha' atto muetsatateret. ¹⁰ Ñeñtña quellepa' allochca'ye rañferrñañet po'patseñ ñeñt ye'chcatene' patsrro'. Atetca'ye otenenña Partseshanapa' o'ch atet ne'pa.”

Atto Jesúsapa' a'p̄to'tare'teñ añcha'taret Pilato

(Mr. 15.2-5; Lc. 23.3-5; Jn. 18.33-38)

¹¹ Allempo çhapachet Jesús añcha'taret Pilatesho, allñapa' all añcha'tareñapa' allenta a'p̄to'ta'p̄:

—Papa' ¿p̄a'tña añcha'tarettetsaña judioneshacop?

Jesúsñapa' atet och:

—Napa' ñeñtenca'ye atet p̄oten.

¹² Ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetña allpa' atarr otteñe'chyesoset Jesús. Ñañaapa' ama't mameshapa' ama eñoreno, ama't parrocha ama anapuenaneto ñeñt atto a'metare'teñet. ¹³ Allempo Pilatopa' atet och:

—¿Ama't pe'muenoña atet a'metare'tenpetpa' esocmañen otenpet?

¹⁴ Ñañaapa' ama anapuenaneto ama't e'ñe parrocha. Ñeñto'marña añcha'taretpa' nanac cohuana'teñ. Ama eñoteñeto eso'marte' ama eñoreno ñocop.

Atto am̄cha'taret Pilatopa' otanet ama'tpa' čhosa muetse'ña Jesús

(Mr. 15.6-20; Lc. 23.13-25; Jn. 18.38-19.16)

15 Ñehua, ñetpa' atetca'ye yečhenet. E'ñe pate'tets char allempoch čherrerr pascuapo, ñeñña am̄cha'taret ñeññen gobierno Romo'tpa' ñaña'pa' čhocmach a'rroyerran puesheñarr judioneshacop ñeññ ayottam̄psarettetsa allempo, ñeññara ñeññ pamo'ts penet ñet. O'ch apanet erra'tsenčo' enamuenet ñeññ muenenet ñet. Ñeññpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'. 16 Ñaña e'ñe allempopa' allo'tsen puesheñarr judionesha' ñeññ ayottam̄psarettetsa ñeññpa' añ pa'so'cheñ Barrabás. Allohuenetpa' e'ñe eñotueñet añecopña yottam̄peñet ñapa' čhocma atpare'tane't am̄cha'taret ñeññ nen gobierno Romo't. 17 Ñeñño'marña allempo apčha'hua allohuen acheñenesha'pa' am̄cha'taretña Pilatopa' a'p̄to'tapanet:

—¿Erra'tsena't semnenña ñeññča' na'rroyonas, ñato' añcha' Barrabás amapa' Jesús ñeññ otenet Cristo?

18 Ñehua, Pilatopa' eñotapan judionesha' pa'm̄cha'tareternesha' ñetpa' e'ñe pue'moñe'tateñme'chatsa o' pomueret Jesús. Ñeñño'marña Pilatopa' añ muenen o'ch a'p̄to'tan allohuen acheñenesha' tarro'mar ñapa' añca'ye e'nen attoch a'rroyerran Jesús.

19 Ñaña tarro'mar allempo anorros po'conaño allcha' a'pocatan ñoñets, puetaporñapa' oñmach po'ñoñ all oteñ: “Amach erro't pe'patsche Jesús ñeññ e'ñe cohuen acheñer tarro'mar ama't añ tsapro napa' o' nečhopo'teñ; napa' ñeññña atarr neyore'te.”

20 Tarraña ñeññ pa'm̄cha'tareternesha' pen judionesha' po'cornaneshar ñaña ñeññ pompornesha' pen allohuen judionesha' ñetñapa' añ atarr co'tape'chatenet acheñenesha' attoch ñetpa' allohuenetpa' o'ch ochet Pilato:

—Añcha' p̄a'rroyerrnay Barrabás, Jesúsñapa' pemtsat-achepa'ch.

21 Allempoña am̄cha'taret Pilatopa' o' alla a'p̄to'terraneterr: —¿Erra'tsena'tña po'ñočh añ epsheño'mar semnen ñeññča' na'rroyerrnas?

Ñetña anaprra'tetpa' atet ochet:

—Añcha'ca'ye p̄a'rroyerrnay Barrabás.

22 Pilatoñapa' alla o'terraneterr:

—Ñehua, añ Jesús ñeññ otenet Cristopa' ¿erro'te'tcha'ña nepe'? Allohuenetñapa' alla o'teretererr:

—¡Ñapa' pecorso'tam̄psachñaca'ye!

23 Pilatoñapa' atet oterraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetñapa' alla rrannarterreterr huomencpa' atet oterreterr:

—Ñapa' ¡chořañaca'yeña corso'tamřsate'!

24 Pilatoñapa' e'ñe eñoteñ attoch ñapa' amach erroř pe, elloña acheñenesha'pa' čha atarr atsrre'mořtana'teñet. Allempoñapa' chetan oñpa' e'pota'ta allochñapa' attoch eñotatanet ñapa' amaca'ye ñaye' otteñe'chenaye, ñeñtpa' atet oterraneterr:

—Napa' amach seyohuatsetno attoch rroma añ acheñer ñeñt ama't coñe'ta ama čhoye' erroř es peno. Ñeñtpa' ama nocpa'nayaye, ñeñtpa' e'ñeca'ye saptecpa.

25 Allohuenña acheñenesha'pa' ñetñapa' alla oterreterr:

—Attoch rromapa' ama'tpa' yohua'yetepa'—ya ñaña ama't yenñrenñohuen.

26 Allempoñapa' a'rroyerranet Barrabás, Jesúsñapa' ashtach allempoñapa' otan po'solltarneshar:

—Te'pa' o'ch secorso'tamřpeña'.

27 Ñehua, solltarnesha'ña ama aneñeta' allcha' corso'tamřsomet ñetñapa' arrña ñanom anmet Jesús amcha'taretepahuo. Allña agotachet allohuen po'potantañ solltarnesha' ñeñt allo'tsa'yen o'ch e'ñe apčhet Jesúsesho.

28 Allñapa' pa'llocchame'teñořet Jesús'pa' rrotamřpes pa'shtam, chorrachet shetamuets tsamamuen ñeñt pa'shtam pen ñeñt po'ñočh amcha'tarettetsa. 29 Pella'toñet ñaña choyo'mets agrečhpa' ñeñtña choyo'mtchet ñeñt atet choyo'mtena ñeñt po'ñočh amcha'tarettetsa. Orrachet ñaña tsacheř poto po'cohuenroř ñeñt atet orren ñeñt po'ñočh amcha'tarettetsa. Allempoñapa' concorpa'yesyet. Pa'llocchame'teñořetpa' e'ñe atet pachat ñerra'mrrate' ñeñt e'ñe po'ñočh amcha'tarettetsa. Pachmāre'teñořetpa' atet oteñet:

—Puetare' amcha'taretecha', atarruaca' cohuenepře' pā ñeñteř judionesha' pa'mcha'tareteřeř.

30 Pueche'tatseteñořet a'coshare'teñetpa' o' chetamřperetña ñaña tsacheř potořpa' alloña asto'tame'teñet poño. 31 O'ña achmāre'tuahuetpa' allempoñapa' rrotamřperet shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tamřpeñeta'.

Atto corso'tamřsomet Jesús

(Mr. 15.21-32; Lc. 23.26-43; Jn. 19.17-27)

32 E'ñe ahuanmatsetpa' allña oñenetpa' o' poctet puesheñarr yacma ñeñt cireneo'marnesha' ñeñtpa' añ pa'so'cheñ Simón. Ñañaapa' allenta chechatnomet Jesús po'corsoch.

³³ Chapachet all socheñet Gólgota ñeñt̃ yoten yeñoño Poñetallep̃no. ³⁴ O' chapachet all Jesús̃pa' aposetañ vinos ñeñt̃pa' añ atsetareñ pueretso ñeñt̃ atarr pesherr. Atta añlle'pa' ama mueno o'ch orr.

³⁵ Allempoña o' corso'tam̃pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets. Atfoña etsoterra añ ñoñets ñeñt̃ a'm̃taye't̃ ahuat Yompor po'ñoñ. Ñehua, allempopa' e'ñe atet ñerra'mrrate' Cristo otatse't̃, ñeñt̃pa' atet oten: "Yellsheñe'chaterrnanetcha' neshtam po'suertot attoch orrtet e'ñe puesheña'ttsetpa' o'ch yorayesonet neshtam puema'tets." ³⁶ Allempoña solltarnesha'pa' alla anorrcha'tet o'ch cohuañp̃set. ³⁷ Ñehua, poñoñ all corsocho all noñet tsachtall aquellcareñ attochña eñoteñet ñeñt̃ecop corso'tam̃peñet. Ñeñt̃ña quellecpa' atet oten: "Añ Jesús̃pa' ñeñt̃ca'yeña judionesha' Pa'm̃cha'tareter."

³⁸ Allñapa' corso'tam̃p̃set epuet ñaña epsheña eñet, puesheñarrpa' nosñañet po'cohuenrot, po'psheñeññapa' nosñañet pue'chcoterot. ³⁹ Ñeñt̃ña oñmachets allpa' ñetpa'cho'ña chocma achm̃are'tneñet. Pachm̃arñoñetpa' coño'coñtana'tyesneñet, ⁴⁰ ñeñt̃pa' atet otyesneñet:

—Pa ñeñt̃ep̃ pommo'cheñoñpa' potatse'te't̃ po'ch a'materrayen Parets pa'paquell, poma'pamtañocmo'ch alla paatomatereñ, te'ñapa' pa'queshp̃aterrañaca'ye e'ñe pañeña. Ñerra'm po'ñoçhte' Parets Puechemerep̃pa' pesuerrañaca'yena tayecma corsochoñ.

⁴¹ E'ñe attecma achm̃are'teñ ñaña ñeñt̃ pa'm̃cha'tareternesha' pen judionesha' po'cornaneshar ñaña ñeñt̃ etsotayenayen ñoñets ñeñt̃ atet anaret̃ ñaña ñeñt̃ pompornesha' pen allohuen judionesha', ama't allohuenet fariseoneshohuen. Ñetñapa' pachm̃are'teñoñpa' atet otatse'tyeñet:

⁴² —Te'ña papa' o' pa'queshp̃atyets po'potantañ, pañapa' eso'mare'tcha'ña ama eshcaye' pa'queshp̃aterroña e'ñe pañeña.

E'ñe pachm̃are'teñoñetpa' atet otyereter:

—Papa' ñeñt̃ep̃o'ca'ye israelnesha' Pa'm̃cha'taretereppa' pesuerrañaca'ye corsochoñ allochñapa' attoch yame'ñaña yaña. ⁴³ Papa' pa' yemtenaya Yomporpa' te'ñapa' a'queshp̃aterrpepa'ñaca'ye ñerra'm po'ñoçhte' e'ñe cohuen muerenpa. Papa' ñeñt̃ep̃ po'ñoçh atet otets Yomporo' Puechemerep̃.

⁴⁴ E'ñe attecma pe' ñaña eñet̃ ñeñt̃ epuet corso'tam̃peñet ñetpa'cho'ña atarr es otnare'chet allot̃ po'corsochoñ.

*Atto rroma Jesús all po'corsocho**(Mr. 15.33-41; Lc. 23.44-49; Jn. 19.28-30; Heb. 9.11-14)*

⁴⁵ O'ña chap poctopa' o'huañ atsnom o' e'ñe checmetua ora erraparen añe patsro, o'ña ellerrotenmochapa' o' alla puetarerr. ⁴⁶ Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Elí, Elí, lama sabactani. Ñeñña ñoñtsorpa' atet oten: Eso'maruachñaca'ye Neyompor-recha' pa'ypo'ñerren.

⁴⁷ Puesheña'tetsña ñeñt tomchets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—O' cha chore'tante' Elías ñeñt a'mtaye't ahua't Parets po'ñoñ.

⁴⁸ Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachpopa' allotña tsotso'tatosanña Jesús. ⁴⁹ Po'potantañña' atet ochet ñeñt tsotso'tatene':

—Amach es papatsche, te'pa' attachca'ye yecue' ñato'rraña huapa Elías ñach a'qeshpatose'.

⁵⁰ Allempoña Jesúsapa' o' alla rranerrerr huomencpa' rroma. ⁵¹ Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. Allempoñapa' o' pella pats atarr huomenc, rrarna'tyes mapuetačno. ⁵² Torna'tampesyes apampaña. Shonte' ñeñt pueyochresha' pen Parets ñeñt o' colla'huañ, ñetñapa' ahuepa't e'ñe tanrra'tuerret. ⁵³ Allempoña tanterra Jesúsapa' ñetpa'cho'ña o' sohuanerretña all apamparettete't o' alla ahuanerret anetso Jerusaléño ñeñt anaret Partsocop, allña'pa' shonte' acheñ ñeñt entapuerrahuet.

⁵⁴ E'ñe allempo rroma Jesús, solltarnesha'ña epuet po'captaner ñeñt allpon cohuanmpene' Jesús, ñetñapa' e'ñe enteñet ñeñt atet pa'yesa allempo, atto pella pats. Ñeñto'marña ñetpa' atarr yorenet. Allempoñapa' atet otet:

—Po'ñochuaca'ye añmapa' Partsepa'tca'ye Puechemer.

⁵⁵ Allo'tsa'yen ñaña shonte' coyaneshačno, ñetñapa' a'yota cohuanrrorteñet. Ñetpa' ñetca'yeha co'ta'huanmue'ña Jesús Galileoteñ ñeñt sherba'yesaye't. ⁵⁶ Ñeñtpa' María Magdalena ñaña po'psheñeñ María ñeñt Jacobo pachor ñaña José. Allo'tsen ñaña ñeñt pachor pen Zebedeo puechemereshá', ñaña po'potantañečno coyaneshačno.

*Atto pampuet Jesús**(Mr. 15.42-47; Lc. 23.50-56; Jn. 19.38-42)*

57-58 Atteñapa' o' ellerren. Puesheñarr ñeñt eçllayoret ñeñt pa'so'cheñ José ñeñt arimateo'marnesha' ñeñtara Jesús pueyochresha' ñaña'pa' ahuos Pilateshopa' o'ch oteña' pocte'ch eñch ñach asuatose' Jesús ñeñt rromuets corsocho. Pilatopa' atet otan pa'cheñer:

—Te'pa' o'ch sa'rroyoñ arromñañ anerepa'.

O'ña ellerren Joséñapa' o' çherr corsocho, ⁵⁹ a'suatuerran Jesús corsochoť all rromuen. Allempoñapa' eřatse'ch shetamtso ñeñt e'ñe cohuen emarr. Allempoñapa' aneñ allcha' pampueña'. ⁶⁰ All e'ñe errte' eñatene' mapuetpon ñeñtpa' e'ñe pamo'tsna'tarneshacpañ allca'yeña nenana'ña Jesús. Allempoñapa' attome'terrñañ mapue' añecmuen allo yottamřesner ñeñt puepampuer řach. O'ña yottamřesuanerpa' Joséñapa' ahuer. ⁶¹ Allña'pa' allo'tsen María Magdalena ñaña po'psheñeñ María. Ñetña'pa' alla anorrcha'toset allame'tets all pampueñet.

Atto guardianesha'pa' cohuanřpeñet all pampuet Jesús

⁶² Met añ yeter allempo çhocmach añño'terretter ñeñt tsapatēcop allempocma amesen judionesha'. Tsapatña'pa' ñeñt pa'ñcha'tareťernesha' pen judionesha' po'cornaneshar ñaña fariseonesha' ñetña'pa' e'ñe alla shontenet parro all Pilatesho. ⁶³ Ñeñtpa' atet otoset:

—Nomporcha' yapa' o'ca'ye yeyerpuera añ acheñer ñeñt atarr ashcañpa' allempo corre'tpa' atetca'ye otye't: "Napa' ama't puema'pamtañopa' netanterrachca'ye rromot." ⁶⁴ Te'pa' pemñaye'chñaca'ye ñeñtcha' nanac cohuanřpsose' puepampro e'ñe puema'pamtañohua, te't huapa pueyochresha'pa' çhate'ca'ye e'ñe a'nahua ereta'. Allempoña ñetpa' çhate' ochet acheñenesha' Jesús'pa' o'ca'ye tanterra rromot. Ellote'ña ñet allempopa' nanacte' shecare'teret acheñenesha'. Ellote' metanerret ñeñt atto shecare'tyesete't ahuaña acheñenesha'.

⁶⁵ Pilatoñapa' atet otapanet:

—Añca'yeña guardianesha', te'pa' orras parro, ñetpa' o'ch cohuanřpsoset, e'ñech echarr seřamřsosñañ puepampuer, errotencha' e'ñe pocte' sent sa.

⁶⁶ Ñetña'pa' ahuanmuet puepampro. Mapue' allo yottamřpeñetpa' e'ñe cohuen yomrraramřpsoset attochña eñoteret ñerra'm esesha'ch toramřperre'. O'ña e'ñe cohuen řamřpesuetpa' allempoñapa' na'neret guardia all ñeñtcha' cohuanřpe'.

28

*Atto tanterra Jesús**(Mr. 16.1-8; Lc. 24.1-12; Jn. 20.1-10)*

¹ O'ña huañ yetñats allempocma amesenet allempoña taya puetaren temenc allempo motta'muena yetñatspa' Maríaña Magdalena ñaña po'psheñeñ María ñetñapa' ahuañecma ahuanma'muenet o'ch enta'mueñet Jesús puepampro. ² Allempoña machayotepa'tcha' pella pats huomenc; añ sohuatsa Yompor po'mllañoñeñer entot. O' sohuapa' a'rrote'tosan mapue' a'yenet ñeñña mapue'pa' allña anorros. ³ Ñaña'p' atarr nanac poptosa e'ñe atet orrtosa ñerra'mrrate' meratste'. Pa'shtamñapa' atarr nanac huallama't. ⁴ Guardianesha'ñapa' ñeñña atarr yore'tose'. Puenchañoñetpa' cha yonshema'tyeset cha o'ta'yese't e'ñe atet ñerra'm cho rromuenet. ⁵ Allempoña mellañoñe'pa' atet otapan coyanesha'čno:

—Amach cha seyorenatsto. Napa' neñotenes aña'ye semen o'ch senta'mueñ Jesús ñeñt corso'tam̄pset. ⁶ Amaca' arro'tsenaro arr, ñapa' atet otase'tpa' te'ñapa' o'ca'ye tanterra. Sonca'ye secueña' all panet amaca' eñalle. ⁷ Secua'huepa' orrerres sema'yoreñ o'ch soterrñaña' pueyochresha': "O'ca'ye tanterraña Jesús rromot. Ñapa' ñanomcha' otatsa o'ch ahuen Galileo. Sapa' allcha'ña sentuer."

⁸ Allempoñapa' puema'yoreñ ahuanerret puepamprot. Ama't yorenetaña' pocsheñesha' matrra'terret o'ch oteññañeta' pueyochresha'. ⁹ Mata'chetsetpa' Jesúsña'p' ahuepa'tcha' poctanet, huomcha'tapanet. Ñetñapa' allenta ponem̄yet, rromoset pa'rrp̄ot concorposñañet. ¹⁰ Allempoña Jesús'pa' atet otanet:

—Amach semcha'tatsetno. Orrerres sotennana' nemo'nasheñnesha'čno ahuanmuetepa' Galileo, allcha'ña e'ñe enternet.

Atto solltarnesha'pa' serrpare'tatyesan allohuen cornaneshachno ñeñt atet entet ñet

¹¹ Ahuanmatsetpa' puesheña'tetsña guardiapa' ahuanmuet ñamet anetso. Allña'p' serrpare'tatoset cornaneshapa'mcha'tareternesha' allohuen atet o' entuet. ¹² Ñetña allempo apchenet epuet ñeñt pompornesha' pen judionesha' ñetñapa' cotape'chatanna'tet. O'ña cotape'chatanna'tuetpa' allempoñapa' apet solltarnesha' shonte' quelle. ¹³ Ñeñtpa' atet ochet solltarnesha':

—Te'pa' atetcha' sot: "Yaña tsapopa' muetsye'tpa' pueyochresha'ñapa' ahuo't huapuet a'nahua't ereta'ña arromña't."

¹⁴ Ellopa' alla oterranerr solltarnesha':

—Ñerra'm añcha'taret čha e'mare'te' yapa' ya'pocatonascha' e'ñe cohuen ñesho attochña sapa' amach errot paseto.

¹⁵ Ñetña allempo agaphuet quellepa' atet otarettetpa' atetcho' pet. Ñeñto'marña ñet pueserrparñetpa' e'ñe allempoteñ epa'hua judioneshesho'mar.

Atto Jesúsapa' otnerran pueyochreshačhno ñetpa' atetcha' pa'yerret

(Mr. 16.14-18; Lc. 24.36-49; Jn. 20.19-23)

¹⁶ Ñeñt čharra' puechena paterr pueyochresha'pa' ñetña'pa' ahuanerret Galileo. Arr ahuanmuet all aspeno all otanet Jesús allcha' tet. ¹⁷ Allempo entosetpa' ñetña'pa' čha concorpa'rretyesoset. Puesheña'tetsña'pa' čha echarrtanet pueyočhro. ¹⁸ Allempoña Jesúsapa' ponmanet atet otapanet:

—Napa' aparetan allohuen llesens añe patsrecop ñaña Yompor pue'ntañecop. ¹⁹ Ñeñto'marña te'pa' orras o'ch seyčhatyes ora allohuen pa'namen acheñ attoch neyochresha' neperranet. O'ch sapat Janet Yompor Parets pa'so'chño ñaña Yompor Puechemer pa'so'chño ñaña e'ñe Yompor Puecamquēñ pa'so'chño allochña'pa' attochña e'ñe pueyochresha' perranet Yompor Parets. ²⁰ Ñaña čhocmach o'ch e'ñe seyčhatyesanet allochña'pa' attoch e'ñe cohuen ame'ñerrnanet e'ñe ora ñeñt allpon o' notuas. Ñaña señohepa'ch napa' e'ñe pate'tets yet čhocmach allo'tseney parro attoch čhocma nebensare'tampenes ama't tarremphuach esempohuañen allempoch mellapoterra. Ñeñtpa' attetepa'ch Nompore. Allohua.

COHUEN ÑOÑETS ÑEÑT QUELLCA' SAN MARCOS

*Allempo orrta Juan ñeñt serrpare'tosets all amayo
(Mt. 3.1-12; Lc. 3.1-9, 15-17; Jn. 1.19-28)*

1-2 Te' arr napa' o'ch nequellconas ñeñt e'ñe cohuen ñoñets alloch yequeshperra e'ñe yame'ñeñoña Jesucristo ñeñt Puechemer pen Yompor. Ñehua, ñeñt ñanom orrtatsa ñeñtpa' e'ñe atet o' perra e'ñe atet quellquë't Isaías ñeñt a'mtaye't ahuat Yompor po'ñoñ. Isaíaspa' ñapa' añca'ye quellquë't ñeñt atet Yomporpa' otan Puechemer ñeñtara Cristo, ñeñtpa' atet och:

Te'pa' peñoche'pa'ch napa' nemñerrna'pcha' puesheñarr ñeñtcha' potam'perraya. E'ñe ña pueserrpare'teño'tpa' añño'terrna'pcha' allcha' poñmos pama' esempo.

3 Ñapa' e'morrterrach po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñtpa' atetcha' otterranel: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pacharretyesoñ pa'te'p." Arrpa' allohua ñeñt atet quellquë't Isaías.

4 E'ñe atet anuaret ahuatoteñpa' ñeñtña'pa' e'ñe'cho' atet perra allempo orrtosa Juan ñeñt apatose' acheñenesha' Yomporecop. Ñapa' alla orrta amayo allña serrpare'tatosanña acheñenesha'. Ñeñtpa' atet otosanet:

—Te'pa' o'ch soctape'cherr ello cohuen Yomporecop allochñapa' e'ñech cohuen sapataretterra e'ñe same'ñeño't Yompor. Attochña Yomporpa' o'ch peretna'huernas so'chñar.

5 Ñeñto'marña shonte' acheñenesha' chocma huacha'tyenet ñesho o'ch e'mñoteñeta'. Allohuen ñeñt judeo'marnesha' ñama allohuen ñeñt jerusaléño'marnesha' chocma huacha'tyenet ñesho. Allña ñetpa' a'meta'yesoset po'chñaret, Juanña'pa' apatyapanet Yomporecop. Ñeñtña' oñ all apatyapanet añ pa'so'cheñ Jordanas.

6 Ñeñtña' Juanpa' camello pue'ch apomotaret ñeñt pa'shtam pen. Allo chanena ñeñtpa' pa'rrom. Allña'pa' rra'yesane't ahuañchenclla* ñeñta puerrar pe't epuet pets po'moñ. 7 Juanña'pa' atet serrpare'tatanet:

* 1:6 Ñeñt ahuañchencllapa' arrapo' enteñ palestino'marnesha'.

—Cristoña ñeñtcha' huapatsa chenta'pa' ñapa' atarrca'ye ahuamenca'tesha', nañapa' ama tama ahuamenca'teyayno. Ñapa' ñeñtña atarr sherbets, nañapa' ama es nesherbena attoch nemo'ca pa'rrpōt ama't po'sapatrechapa' o'ch nepyoñ.† 8 Ñaña napa' ama't napatensoñ Yomporecoppa' e'ñeca'ye oñochaya napatyenes. Tarraña Cristoñapa' añcha'ca'ye chorratossa Parets Puecamquëñ.

Allempo apataretta Jesús Yomporecop

(Mt. 3.13-17; Lc. 3.21-22)

9 Allempoña huapa Jesús Nazaretōt allara Galileo. Chap Juanesho allñapa' apataḡ Juan oño Jordanaso. 10 E'ñe apatue'pa' o' cha'nerrña Jesús oñoḡpa' allenta entan enet atoraret. Alloñña e'ñe sohua'nmaña Parets Puecamquëñ e'ñe atet entaḡ ñerra'mrrate'yep' o' sohua'nma entoḡ. E'ñe arr chap Jesúsesho. 11 Allempoñapa' cha e'morrtatsa ñaña ñoñets entoḡ atet eñorena Yompor. Ñeñtña ñoñetspa' atet oten:

—Papa' ñeñteḡ Nechemereḡ ñeñteḡ atarr nemorrentena, ḡa atarr nocshatene'.

Allempo oneñēpa' topatenan Jesús, mueneñ o'ch atet ḡatan Jesús ñeñt ama pocteye' enteno Yompor

(Mt. 4.1-11; Lc. 4.1-13)

12 Allempoña Parets Puecamquëñpa' allenta anman Jesús all amayo. 13 Pa'tatsoch charramat allo'tsena amayo; allñapa' allo'tsa'yen pa'namen berrochno. Attoña allpa' o' huapoña oneñē mueneñ o'ch atet ḡatyenes ñeñt ama pocteye' enteno Pompor Parets. O'ña topatuahueña'pa' allempoñapa' hua'cha'toña ñaña Yompor po'nllañoteñnaneshar; ñetña sherḡosetña Jesús all.

Allempo e'ñe ñenmaḡ torrena Jesús Partsocop all Galileo

(Mt. 4.12-17; Lc. 4.14-15)

14-15 Allempoña yottamḡset Juan allcha' muerochtachet, Jesúsñapa' allenta ahuerr Galileo. O'ña cherr all ñaña'pa' serrpare'tatuerranet ñeñt e'ñe cohuen ñoñets ñeñt huetsa Yomporeshoḡ alloch yequeshperra. Ñeñtñapa' atet otueranet:

—Te'ñapa' o' etsoterra yetñats, o' cherrmoch allempoch atarr ayochreshatterra Yompor. Socoppa' añ poctetsa o'ch soctape'cherr ello cohuen Yomporecop ñaña o'ch same'ñerra ñeñt e'ñe cohuen ñoñets allochca'yēña sequeshperra.

Atto Jesús'pa' chore'tosan pa'tatssheña ñeñt e'ñe caca torrenet rromuet

(Mt. 4.18-22; Lc. 5.1-11)

† 1:7 Ñeñt atet po'taruas pe't esclavos o'ch pueyamḡsan pamo'mte' po'sapatrech.

16 Allempo Jesús^{pa} chopeñe'chyen all sa'patoḡño'mar; ñeñña sa'ppa' añ pa'so'cheñ Galileas. Allña^{pa} entno-man Simón epuet pa'mo'nasheñ Andrés. Ñetña^{pa} all ter-rayenet e'ñe all sa'po tarro'mar ñetpa' ñeññ po'taruas penet. 17 Jesúsña^{pa} atet otosanet:

—Te'ña^{pa} o'ch notas: Socta'n na attoch neyochresha' neperres. Ñeññ atet sepena ahuaḡtoḡeñ e'ne' cac te'ña^{pa} o'ch neyḡhaterres attoch se'nerr ñaña acheñ ñeñña' same'ñaterra.

18 Ñetña^{pa} allorocma na'nmuet po'terrayapa' o' coḡet Jesús.

19 O'ña meterrerr a'yente^{ye}'pa' allña^{pa} entuerranerr ñaña Jacobo[‡] epuet pa'mo'nasheñ Juan; ñeñña^{pa} Zebedeo puechemerasha'. Ñetña^{pa} po'noñto'tsa'yenet all a'cohuenetyenet po'terraya. 20 Jesúsña^{pa} ḡhore'tuerraneterrpa' atet otuerraneterr ñamet:

—Te'pa' o'ch socta'n saña.

Ñetña^{pa} allenta sa'nmet pomporet Zebedeo all po'noñto epuet ñaña pa'taruasañret. Ñetpa'ḡho'ña coḡet Jesús attoch pueyochresha' perranet ñamet.

Allempo Jesús^{pa} entaḡ puesheñarr yacma ñeññ chorrena oneñeñ

(Lc. 4.31-37)

21 Atteña^{pa} ahuanmuet ñaña anetso Capernaumo. O'ña ḡhap añ yetñatsro allempocma amesen judionesha', allña Jesús^{pa} be'tosos judionesha' po'prahuo, all yeḡhatyesosanet.

22 Allempo serrpare'tatuanet Jesús, acheñenesha'ña^{pa} epaye' cohuanrrorteñet ñeññ atet yeḡhatenanet ña. Tarro'mar ñapa' atarr cohuen yeḡhatenanet atet ñerra'mrrate' ñeññ allsen-sarettetsa Partseshot. Judionesha' pa'mḡha'tareternesha' ñeññ atarr etsotayene' ñoñets ñeññ atet anaret, ñetña^{pa} ama e'ñeye' atteye' yeḡhateneto. 23 Puesheñarrña yacma ñeññ allo'tsen puerahuo, ñeñña^{pa} añ chorrenaya oneñeñ. Ñaña rranare'tapa' atet otapan Jesús:

24 —Eso'mare'tcha'ña errot peḡosey Jesús^o, ḡa ñeññeḡ nazareto'marneshaḡ. ¿Añecopḡe' pehuena o'ch ḡa'chencaterrey? Napa' o' neñnotapaḡ. Papa' atarr Partsoḡ añ pellsensene' Pompor ñeññ atarr nanac Parets.

25 Tarraña Jesús^{pa} ama muenache o'ch eñorana'cha. Ñaña^{pa} atet och:

—Pemma, te'pa' ḡhoḡaña queḡhpa'nerre'ña añ acheñer.

26 Oneñeñña^{pa} ḡha atanman yacmapa' alla o'shshe'ma. Oneñeñña^{pa} ḡha rranare'tnoma allempo queḡhpa'nerran

‡ 1:19 Jacobopa' ñeññara ñeññ sochenet Santiago.

acheñ. ²⁷ Acheñenesha'ñapa' čha atarr torats p̄anet pueyočhret. Ñetñapa' atet otanna'tyeset:

—Ta'mca'ye, erroťente'ca'yeña Jesús po'ñoñ; po'poñontepa'tca'ye yečhatyen. Ñeñtpa' erroťente'ca'ye. E'ñe atet pena po'ñoñ atet ñerra'mrrate' ñeñt allsensarettetsa Yomporeshot. ¡Ama't oneñeť erroť otenpa' atetčho' p̄ateñ, e'ñech ame'ñateña!

²⁸ E'ñe mamecmapa' o' e'ñe serrpare'tuahuet allampaño'mar Galileo atet p̄a'yena Jesús.

Allempo a'crratosan Jesús Simón Pedro pa'so'mue

(Mt. 8.14-15; Lc. 4.38-39)

²⁹ Allempoña čha'nmačherret puerahuotpa' arr ahuanmuet all yečhena Simón ñaña pa'mo'nasheñ Andrés. Allñapa' añ cota'nmue' Jacobo ñaña Juan. ³⁰ Allña Simón pa'so'muepa' čha atsna'ten, čha huoraten, alla p̄anena po'mayo. Otapet Jesús:

—Simón pa'so'muepa' čha atsna'ten.

³¹ Allempoña Jesús pa' ponmosana atsnañeťpa' rremota'tos pototpa' čha echantose' čha metuerretsña atto huoraten. Allempoña o' metua po'urateñapa' allenta tanta o' agapapanet e'ñe cohuen o' yema'tapanet.

Allempo Jesús pa' a'crraterran shonte' pa'namen atsnañeťečhno

(Mt. 8.16-17; Lc. 4.40-41)

³² Ñeñte yetrocma allempo ellerren o' emuena atsrreťpa' acheñenesha'ña huapatyesnenet Jesúsesho allohuen ñeñt atsna'tyets ñaña ñeñt chorra'yena oneñeť. ³³ Huačha'tyesoña allohuen anetso'marnesha', ñetñapa' alla shontoset allotecma be'tenet pocollo. ³⁴ Jesúsña allempopa' e'ñe a'crratyesuapanet, ama't shonte' pa'namen atsnañtsočhno ñeñt osyenahuet. Ama't ñaña shonte' acheñenesha' ñeñt chorra'yena oneñeť ñeñtpa'čho'ña e'ñe quečhpatyesuapanet oneñeť ñeñt chorra'yenahuet. Jesúsñapa' ama muenatano oneñeť attoch eñorana'tnomet, tarro'mar ñetpa' e'ñe eñoteñet ñapa' ñeñtca'ye Cristotets.

Allempo Jesús pa' serrpare'tatyesnoman acheñenesha' erraparen Galileo'mar

(Lc. 4.42-44)

³⁵ Tsapatña e'ñe ahuatecma tanta'muena Jesús, ama e'ñe orretuena' čha'nma'muen ñeñte anetsroť ahua'muen all ama acheñempañooyaye allcha' ma'yocha'muena. ³⁶ E'ñe o'chtatsapa' ahua'muen ñaña Simón ñaña po'psheñečhno ñeñt epuet ta'muena. Ñetpa' o'ch e'nereta' Jesús. ³⁷ Allempoña entosetpa' atet otoset:

—Papa' allohuen acheñenesha' čhocmaca'ye e'nenpet.

³⁸ Ñaña'pa' otapanet:

—Te'pa' o'ch ahuey po'poñ anetso ñeñtara allampaño'mar allpa'čo'ña o'ch neserrpare'tatyesnomanet tarro'mar napa' ñeñtecopca'yeña nohuapa.

³⁹ Allempoñapa' chopeñe'chyes Jesús erraparen Galileo'mar, serrpare'tatyesanet e'ñe ñet po'prahueto. Ñaña ñeñt chorra'yena oneñeñ, ñaña'pa' e'ñe quečpatyesuerranet.

Atto Jesús a'crraterran puesheñarr yacma ñeñt aptsarñat
(Mt. 8.1-4; Lc. 5.12-16)

⁴⁰ Allempoñapa' huapoña ñaña puesheñarr yacma ñeñt osen puetsarñats ñeñt otenet lepra. Chap Jesúseshopa' concorpana'tosana Jesús'pa' atet otos:

—Ñerra'm pa' muenatspa' pa' ñeñtepa' atarr ahuaменcateshap pa'crrataye'cherren allochñapa' attoch e'ñe cohuen entuerren acheñenesha'.

⁴¹ Jesúsñapa' e'ñe cohuen muerapya ñeñto'marña anretapa' allenta a'p'le', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerrepa' allohuen acheñenesha'.

⁴² Yacmañapa' allorocmuepa'tcha' metuerña pueptsarña čha cohuenterrtsa. ⁴³⁻⁴⁴ Jesúsñapa' alla otererr:

—Te' atto o' na'crraterreppa' po'ñočh ama't e'ñe puesheñarrapa' amach potapsa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñrecop ñeñt'cha' a'crratare'tterrtsapa' te'ñapa' o'ch es panom ñeñt'cha' p'apos all ñeñt Yomporecop. Allochñapa' attoch e'ñe cohuen entuerrepa' allohuen acheñenesha'.

Attočca'yeña Jesús'pa' mueñe o'ch ahuo' corneshesho.

⁴⁵ Ñaña'pa' allempo ahua'pa' e'ñe serrpare'tatyesuanman allohuen acheñenesha' ñeñto'marña e'ñe ña pa'metare'teñočpa' o' erracmañen eñotuet ñeñt atet pa'yena Jesús. Ñeñto'marña Jesús'pa' ama eshcaye' seno anetso all shontena acheñenesha'. Ñapa' alla chopeñe'chyen a'yo'mar all ama acheñempaño'yaye. Tarraña ama't atet penañ acheñenesha'ñapa' allemateñ huačha'teññañet ñeñt shontenoya ama't all.

2

Atto Jesús a'crraterran ñaña ñeñt ečharraña
(Mt. 9.1-8; Lc. 5.17-26)

¹ O'ña met allponmat Jesúsñapa' o' alla čherrerr anetso Capernaumo. Acheñenesha'ñapa' e'mare'chet o' alla čherrerr pocollo. ² Allempoñapa' o' alla shonterrñañerr acheñenesha'.

Atteñapa' o'huañ epuet o'pono pocollo. Ama't allot be'tenet pocollopa' o'huañ epuet. Jesúsña allpa' serrpare'tatapan acheñenesha' Yompor po'ñoñ. ³ Atteñapa' huapatam̄psoñet ñaña echarraña ñeññapa' pa'tatssheña ñeññ anman̄pene' puehecnaṗot. ⁴ Ñetpa' añ muenenetañ o'ch be'toset o'ch e'ñe noset Jesúsesho, tarraña shonte' acheñenesha' ñeñño'marña ama eshcaye' abe'tosetoña atsnañeñ attoch chapachet e'ñe Jesúsesho. Atteña a'tapatoset enot pocollato, ñeññña pocollpa' patsopo'. Ñetñapa' rrorosetña ñeññ pocollatar enot e'ñe ñeññecoptaro'tsen Jesús all patsot. Allotña a'suatañp̄sotetña echarraña e'ñe puehecnapena. Attoña chapachet e'ñe rrocho allo'tsen Jesús. ⁵ Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Te'ña neyochre, ṗa ṗo'chñarpa' o' aṗretna'huareterra.

⁶ Ñehua, allñapa' allo'tsa'yen ñaña puesheña'tets ñeññ atarr etsotayenayeñ ñoñets ñeññ atet anaret judioneshacop. All anorrcha'tyenet ñetñapa' atet otatse'tyeset pueyoçhreto: ⁷“Eso'mare'tña atet eñenña añ acheñer. Ñeññ atet otenpa' ñapa' chaca'ye achmare'tenanña Yompor tarro'mar arr patsropa' ama't e'ñe puesheñarra ama eñalleña ñeññ peretnene' ochñarets ñaptaña Yompor peretnene' ochñarets.” ⁸ Jesúsña pueyoçhropa' eñotanet ñeññ atet otyenet ñet pueyoçhreto ñocop. Allempoña Jesúsapa' atet otanet:

—Sapa' eso'mare'tcha'ña atet soctape'chatse'tyesña seyochro. ⁹ Sapa' cha'te' soten ñeññ atet o' notue echarraña po'chñar o' aṗretna'huareta, ñeññpa' ama torrapahuoyaye. Sapa' añña atarr torrapo' senten attoch na'crrater, choncha'ña ote': “Petantena, pechta'nen pemue'pa' o'ch pechope'chnen.” ¹⁰ Ñehua, napa' o'ch neñotatas na Ñeññen Acheñetosets, napa' ñeññen apareten llesens attoch nach peretnerre' ochñarets añ patsro.

Ñeñño'marña Jesús allempopa' atet otan echarraña:

¹¹ —Te'ña napa' o'ch notaṗ: Petantena, pechta'nen pemue'pa' o'ch pechope'chnen, ahuenep̄ pepacillo.

¹² E'ñe otue' atetpa' echarrañañapa' cha tantetsa e'ñe allorocma, o' cheta'nenan po'mue'pa' cha'nen allot. Allohuenña acheñenesha' e'ñe entueñet; ñetñapa' cha atarr cohuanrrortapueñet. Ñeñño'marña ñet allempopa' atarr cohuentatyeññañet Yompor. Ñetñapa' atet otyenet:

—Yapa' ama't ahuatapa' ama yentareña atet ñeññ atarr cohuen.

Allempo Jesúsapa' hua'ña'nman Leví attoch pueyochresha' per

(Mt. 9.9-13; Lc. 5.27-32)

¹³ Jesúsñapa' alla ahuererr sa'patopño. Allohuen acheñenesha'pa' alla huacherrñañeterr, ñaña'pa' yechatyesapanet. ¹⁴ O'ña yechatuanetpa' o' meterrerr Jesús allot, allña oñenpa' entnoman ñaña Levi* ñeñt Alfeo puechemer. Ñaña'pa' alla anen allecma cobra'yenan acheñenesha' quelle ñeñt gobiernocop. Jesúsñapa' atet otosan Leví:

—Te'pa' o'ch pōcta'n attoch neyochresha' neperreḡ.

E'ñe otue' Jesús atetpa' Levíñapa' cha tantnomtsapa' allenta cotan Jesús.

¹⁵ Allempoña chap ñaña allempo Jesúsapa' alla rrallme'chen Leví pa'paclo. All rrallme'chapreteñ shonte' acheñenesha' ñeñt po'taruas pa'yenet ñamet o'ch cobra'yenan acheñenesha' quelle ñeñt gobiernocop. Ñetpa' atarr ashcañnesha' entenamet acheñenesha'. Ñaña allo'tsa'yen shonte' po'potantañechno ñeñt atarr ochñañenesha' entyen acheñenesha'. Ñetñapa' all anorrcha'tyenet all anen Jesús epuet pueyochresha'. Tarro'mar shonte' acheñenesha' ñeñt co'a'huanene' Jesús. ¹⁶ Añña fariseonesha' ñeñt allo'tsa'yen ñaña ñeñt etsotayenayen ñoñets ñeñt atet anaret ñeñtareta judioneshet, ñetña allempo enteñet Jesús all rrallme'chapretenan ñeñt atarr ochñañenesha' ñetñapa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenaña añ acheñeneshar ñeñt puehquēño'e'na cobra'yene' acheñenesha' ñaña epuet acheñenesha' ñeñt atarr ochñañenesha'chno.

¹⁷ Atet e'manet Jesús, ñaña'pa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetñapa' chocma e'nenet ñeñtcha' a'crraterrahuet. Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt atarr ochñañ entyetsa. Allochñapa' attoch o'ch cotape'cherret ello e'ñe cohuen Yomporecop.

Allempo Jesúsapa' eñotatanet atetcha' tore'tet Yomporecop ñeñt po'ñoçh sherbets

(Mt. 9.14-17; Lc. 5.33-39)

* **2:14** Levípa' ñeññara ñeñt sochenet Mateo.

18 Parrochña allempo tore'tyena† Juan pueyochresha' Yomporecop ñaña fariseonesha' pueyochresha', puesheña'tetsña acheña' huacha'tet Jesúsesho, ñetña'p' atet otoset Jesús:

—Juan pueyochresha'p' tore'tetset Yomporecop; fariseonesha' pueyochresha'p'cho'ña tore'tetset ñamet Yomporecop. Paña peyochresha'p' eso'mare'tña amaña tore'teneto.

19 Jesúsña'p' atet toma'ntatanetpa' ñeñtpa' atet otanet:

—Ñeñ ahua'ñaretechno all rrallme'chapreteñet ñeñ e'ñe errete' sena'tetsa, ama pocteyaye o'ch yot Janet “amach es serra'yesatsto” tarro'mar ñeñtpa' atet coshapreteñet ñeñ sena'tetsa. Amachña cha tore'teno allempo allo'tsenmeñ parro ñeñ errete' sena'tetsa. 20 Tarraña ñerra'm esempo machayofa sa'nerranet ñeñ sena'tetsa, ñeñña parro yemuetyenapa' allempoña ñetpa' e'ñe puellquëño'tet quechpa'huerretcha' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ño'ch. Arrpa' allohua huañ ñeñ atet Jesús toma'ntata ña sena'tostsa.

21 Elloña'p' o' alla toma'ntaterraneterr ñeñ atet ye'chen judionesha' arr patsro ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patsechpa' ñeñtpa' e'ñech orrena yellteñ tarro'mar ñeñ emarr lletamuetspa' ñerra'm esempo yatsama'tam'pespa' chach chellama'ta chach martse'tatanña shetamtso'she'm. Ñeñña yelltenpa' allo'nach sen rrrartse'tats nanac.

Ñeñtpa' attoña Jesús'p' eñotatanet ña pocta'ña e'ñe etserra.

22 Jesúsña'p' alla toma'ntaterraneterr po'poñ ñeñ atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarrot'yapa' amach yeshatstoña vinos emasa mellasha'mañ orroto ñeñ aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' chach a'ptsan orrot, vinosña'p' chate' e'ñe shebhua, ñeñña orrotpa' ama't mameshapa' amach es sherberro. Aña ñerra'm emasa vinos arrcha' yeshe' emerra orroto ñeñ aye'chcataret pa'rrom.

Ñeñtpa'cho'ña attoña Jesús'p' eñotatanet ña pocta'ña e'ñe etserra.

† 2:18 Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch yequechpa'yerrar.

Allempo Jesús pueyochresha' taso'tam̄pesyesnomuet trigo añe yetro allempocma amesen judionesha'

(Mt. 12.1-8; Lc. 6.1-5)

²³ Allempoña çherrerr pamtarr allempo çhocma amesen judionesha'. Allempoña Jesús pa' arr oñem chetso'mar epuet pueyochreshačhno. Allempo oñenet chetso'mar pueyochresha'ñapa' taso'tam̄pesyesnomuet puechm̄a'tets trigo. ²⁴ Fariseonesha'ñapa' ñeñt̄ entahuet ñetñapa' allenta otyeset Jesús:

—Pecue' eso'mare'tña peyochresha'ñapa' atet penet ñeñt̄ ama pocteyaye o'ch atet yeḡa tarro'mar te'pa' añe yetropa' ñeñt̄ atet anareḡ ahuatoteñ allempocmach yamesen.

²⁵ Jesúsñapa' atet otanet:

—Sapa' ama'trra selleyareña ñeñt̄ atet ḡa ahuat David allempo pallta'ḡsa ñeñt̄cha' rret allempo cheporra'nma epuet ñaña allohuen ñeñt̄ cotene'. ²⁶ Ña allempopa' be'tosos Yompor pa'paclo, allñapa' rrosan pan ñeñt̄ atma'ntataret atet ñerra'mrrate' ñeñt̄ nenet all Partsocop. Ñehua, ñeñt̄ panpa' ama pocteyayñe o'ch esesha' rre'. Ñeñt̄pa' añach ñapueḡ rrene' cornaneshachno, ñeñt̄pa' e'ñe atet anuaret judioneshacop. Ñeñt̄ña panpa' o' rros David, rratosan ñaña allohuen ñeñt̄ epuet. Ñehua, ñeñt̄pa' tarrempo atet pe't̄ David allempo judionesha' po'cornanesharpa' añ pa'm̄cha'tareter pete't̄ Abiatar.

²⁷ Jesúsña alla oterranelerr:

—Añ yetro allempo yamesen ñeñt̄pa' añecop anareḡ acheñeneshacpay ñeñt̄cha' yesherbene'. Amaña añecpaye' anareteña yetñats ñeñt̄cha' yesherben ya. ²⁸ Ñeñto'mar na Ñeñten Acheñetosets, ñeñten allsensareten, naca'yeña atet otets este' poctetsaña ñeñt̄cha' atet yeḡa añe yetro allempocma yamesen.

3

Allempo Jesús pa' a'crraterran ñeñt̄ chelletsapot

(Mt. 12.9-14; Lc. 6.6-11)

¹ Po'pocheñoña Jesús pa' alla be'tosuener judionesha' po'prahuo. Allñapa' allo'tsen puesheñarr yacma ñeñt̄ cha chellena pot. ² Fariseonesha'ña allpa' Jesús a'tarr cohuanatyenet attoch eñchet ñato'rraña a'crratenanerrcha' acheñ añe yetro allempocma amesenet. Ñerra'm o'ch a'crratenanerr ama't̄ puesheñarra añe yetro allempo amesenet, allempoñapa' esheccha' a'metam̄peñeta' añcha'taretesho. ³ Allempoña Jesús pa' otan ñeñt̄ chelletsapot:

—Aþon, þaþomos arrma.

⁴Jesúsñapa' atet otanet:

—¿Errofena'tña ñeñt e'ñe pocte' senten ñeñtcha' atet yeþa añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yeþoñ ñeñt ama cohuenayaye. ¿Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche çhachña yemtsatach?

Ñetñapa' ama't puesheñarrofetapa' ama eseshaye' anapaye. ⁵Allempona Jesús'pa' cohua'yesanet, ama't mamesha ama pocteye' entenaneto, atarr llecateñet tarro'mar ñetpa' ama mueneneto o'ch çhapanet cohuen pueyoçhreto. Allempona Jesús'pa' otan yacma ñeñt chelletsa pot:

—Te'pa' o'ch notap, petapuerr þot.

E'ñe otue'pa' ñañapa' allentepa'tcha' tapuerranña pot, o' e'ñe cohuenterra pot. ⁶Fariseonesha'ña çha'nmaçherretpa' cotape'chatanna'tet epuet Herodes pueyoçhresha', ñetñapa' Jesús'a atarr o'patenet attoch muetsatachet.

Shonte' acheñenesha' ñeñt huaçha'tatsa sa'patopño all enteñeta' Jesús

⁷⁻⁸Allempona Jesús'pa' ahuerr sa'patopño'mar pueyoçhresha'na. Shonte acheñ galileo'marnesha'pa' cotahuanmet ñamet. Ñaña shonte' po'potantañeçhno acheñenesha' ñetña allempo e'mare'teñet Jesús ñapa' atarr cohuen orrtatyen ñetpa'çho'ña allenta huaçha'tyesoñet ñamet. Allenateñ anetsof huaçha'tyeset Judeot, Jerusalénoñ, Idumeot, Jordanas yomta'noñ, ñaña allo'marnesha' ñeñt huetsa Tiroñ ñaña Sidónoñ. Ñetpa' añ atarr muenenet o'ch enteñeta' Jesús. ⁹Shonte' nanac acheñenesha'. Attoch ama atarr queçhcare'teñe Jesús acheñenesha' ñeñt shontetsa, ñañapa' otan pueyoçhresha':

—Chocmach sehuapaton noñt.

¹⁰Allempona Jesús'pa' a'crratyesan shonte' atsnañeteçhno ñeñto'marña allohuen ñeñt atsna'tyets ñetña allempona' atarr emchorreñet Jesús, añ atarr muenenet o'ch a'þlloset Jesús. ¹¹Añña oneñeteçhno ñeñt chorra'yenaya acheñ ñeñtpa'çho'ña allempona' entoset Jesús'pa' allepa'tcha' rromañpsosyet pa'rrpoñ, rranare'tyesosetpa' atet otoset:

—¡Pepa'tña Parets Puechemereþ!

¹²Jesúsñapa' ama muenatano oneñeteçhno o'ch oteñet ñapa' po'ñoçh Parets Puechemer.

Allempona Jesús'pa' acran çharrasheña ñeñt puechetsa epsheña ñeñtcha' llesensa'

(Mt. 10.1-4; Lc. 6.12-16)

¹³ Allempoña Jesús pa' ahuo' aspeno. Allotña agotatosan ñeñt e'ne cohuen enten ña ñeñtcha' pueyochresha' pa'. Ñeñt agotatenpa' ñetña allenta ahuanmuet ñesho. O'ña cha'cha'tuetpa' ¹⁴ ñaña' napanet ñeñt charrasheñet ñeñt puechetsa epsheña, ñetña' ñeñtcha' e'ne parro chopeñe'chyen ñaña ñeñtcha' llesensen attoch serrpare'tyerret Yompor po'cohuenña. ¹⁵ Ñaña o'ch apuerranet llesens attoch quechpatyeret oneñe'chno acheñenesha'. ¹⁶ Ñeñt llesensa' ñeñt pa' añ pa'so'chñe'chno: Simón ñeñtara o' sochererr Pedro, ¹⁷ allotpa' ñaña Jacobo ñaña pa'mo'nasheñ Juan ñeñt Zebedeo puechemerasha'; ñetña' o' socherraneterr Boanerges ñeñt yoten yeñoño Tecorena'tar. ¹⁸ Allotpa' ñaña Andrés, ñaña Felipe, ñaña Bartolomé, ñaña Mateo, ñaña Tomás, ñaña Jacobo ñeñt Alfeo puechemer, ñaña Tadeo, ñaña ñeñt po'psheñeñ Simón ñeñt cananistanesha' ñeñt atarr torratse't pa'netsrecop. ¹⁹ Allotpa' ñaña Judas Iscariote ñeñtcha' pomuerre' tsapa'onet Jesús.

Atto puesheña'tets oteñet Jesús ñapa' oneñe'to' po'huamencot quechpatenanña po'potantañ oneñe'chno acheñenesha'
(Mt. 12.22-32; Lc. 11.14-23; 12.10)

Allempoña Jesús pa' o' alla cherrerr pocollo pueyochresha'na. ²⁰ Allña' o' alla shonerrñañerr allohuen acheñenesha', ñeñto'marña allempopa' ama eshcaye' rreneto. ²¹ Allempo e'mare'ch Jesús pamo'tsesha' atet pa'yenapa' ñetña' hua'cha'tet o'ch ereta' Jesús tarro'mar ñetpa' otenapuetañ ñato' chote' o' mospaña Jesús.

²² Puesheña'tetsña ñeñt atarr etsotayenayeñ ñoñets ñeñt atet anaret ñetpa' Jerusaléño' hua'cha'tet. Ñetña' atet otyesotet Jesúsocop:

—Añ yacmarpa' añaca'ye chorrenaya Beelzebú ñeñt pompor pen allohuen oneñe'chno; ñeñtca'yeña ahua'ncat pene' attot quechpatenanña oneñe'chno acheñenesha'.

²³ Allempoña Jesús pa' chore'tan acheñenesha', allempoña' atet otapanet:

—O'ch notas, po'ño'ch oneñe'tpa' amaca'ye huapore'tanneno. ²⁴ Atet ñerra'm paterr añcha'taret ñerra'm cho elloptannena pueyochresha' ñeñtña' atto añcha'tare'ttena chach huañerrets amach allo'na huomencatneno. ²⁵ Attecmach pannerra ñaña ñeñt e'ne pamo'tsna'tarecmuet pannenet ñerra'm cho elloptannenet e'ne ñagattsetapa' ñeñtña' atto huomencatenetpa' ñeñt pa'cho'ña chachca'ye huañerrets. ²⁶ Attecmach pannerra ñaña oneñe't pueyochresha'chno, ñerra'm oneñe'chno e'mone'tannenet, ñerra'm tantanna'ta oneñe'chNOPA' ñeñtña' atto huomencatenetpa' ñetpa'cho'ña

čhachca'ye huañerrets amach allo'na huomencatneneto. Ñeñto'mañña po'ñočh oneñe'tpa' amate' erroteno't huapore'tanna'teto e'ñe ñagattseta.

²⁷ 'Ñehua, yapa' yeñoteñ ñeñt' atarr ahuamencattetsa atto atarr ahuamencattena oneñe't, ñaña'pa' e'ñe po'huamenco't cohuam'pesyenan allohuen e'ñe cohuen ñeñt' pa'paquell' p'a'yen. Tarraña ñerra'm esempo o'ch huapoña ñeñt' atarr ahuamencatesha' ñeñt'cha' metanose'ña po'huamenc atet' ñerra'm na Nompör, ñeñt'cha'ña rromose' o'ch huancos, allochña'pa' o'ch be'tosos all ñeñt' pa'paquell' p'a'yen o'ch e'ñe puerratam'psos ñeñt' allpon o'patyena ña.

²⁸ Jesús'pa' alla o'terraneterr:

—Napa' o'ch notas, po'ñočh allohuen pa'namen sosya'tsañečno ñeñt' ama pocteye' enteno Yompör ama't ñaña achm'are'tanna'teñets ñeñt'pa' a'pretna'po' nenteñ. ²⁹ Tarraña ñerra'm esesha' añ achm'are'teññañet Parets Puecamquëñ ñeñt'ña'pa' amaca'ye a'pretna'pahuoye' nenteñe. Ñeñt'ña po'chñaretpa' amachca'ye a'pretna'pahuoterro e'ñe tayoteñ errponohuañen.

³⁰ Ñehua, ñeñt'pa' atet' otanet Jesús tarro'mar ñetpa' atet' otyeñet Jesús, ñapa' año' chorrenaya oneñe't ñeñto'ña ahuamencat' pene'.

Allempoñapa' huapa Jesús pachor ñaña pa'mo'nasheñnesha'
(Mt. 12.46-50; Lc. 8.19-21)

³¹ Allempoñapa' huapa Jesús pachor epuet ñaña pa'mo'nasheñnesha'. Chapuet allpa' ñetña'pa' alla tom'cha'toset a'yot, allotña agotatoset Jesús. ³² Ñeñt' anorr'cha'tyets epuet Jesús ñeñt' arrotam'penaya, ñetña'pa' atet' ochet:

—O'ca'ye huapa p'achor ñaña pemo'nasheñnesha'. Ñetpa' a'yote'tsa'yenet, p'aca'ye e'nenet.

³³ Jesús'ña'pa' atet' otanet:

—Ama't seño'teñe ñeñt' e'ñe po'ñočh nachor nepen ñaña ñeñt' e'ñe po'ñočh nemo'nasheñ nepen.

³⁴ Allempoñapa' cohua'yesan acheñnesha' ñeñt' arrotam'penaya all anorr'chenet. Allempoñapa' atet' o'terraneterr:

—Napa' añca'yeña ñeñt' po'ñočh nachor nepen ñaña ñeñt' po'ñočh nemo'nasheñnesha' nepen. ³⁵ Ñehua, ama't erra'tsena ñeñt' e'ñe atet' pohuene' ñeñt' atet' muenen Nompör ñeñt' pue'ntaño'tsen ñeñt'ca'yeña e'ñe po'ñočh nemo'nasheñ nepen ñeñt'ña noch nepen ñeñt'ña nachor nepen.

4

All toma'ntatanet Jesús ñeñt a'parre'tene' puerets
(Mt. 13.1-9; Lc. 8.4-8)

¹ Jesúsñapa' alla yečhaterranerr acheñenesha' e'ñe alla sa'patopño. Allña emchorra'huererr shonte' acheñenesha'. Ñeñto'marña Jesúsapa' a'tap noñtopa' ahuañpes mame' allpononet allñapa' anorros noñto e'ñe all sa'po. Acheñenesha'ña allohuenetpa' e'ñe sa'patopño'tsa'yenet all masto. ² Allñapa' esocmañen serrpare'tatenan acheñenesha' pa'namen toma'nteñtsočhno. All yečhatyenatetpa' atet otanet:

³ —Se'mñoton añ ñeñt atet notenes: Ñeñtña a'parrene' puerets ñañapa' ahuo' allcha' a'parre'tyenana' puepuer. ⁴ All a'parre'tyeñ patanta'tetsñapa' alla čhapyes toño'mar. Allñapa' huača'tyesa ot e'ñe añyallme'chuenana' puerets. ⁵ Po'poñečhnoñapa' alla čhapyes mapuetromeso'mar all ama tama eñalle pats. Ama nanac o'pono'tseno patso ñeñto'marña mame'tollapa' cheparesuañ. ⁶ O'ña enome'ta'muen atsrretpa' alla a'uyatuer. Ama erča'tena' ñeñto'marña alla hueya'huerra. ⁷ Po'potantañña pueretspa' alla čhapyes allcha' chepares aj. Allpa'čo' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cllatuer, ñeñto'marña ama ellomre'to. ⁸ Po'potantañečhno ñeñtñapa' arr čhapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' o' ellomre'tyes. Atarr atonapa'tets ellomre'tyes—puecha'tetspa' ma'poch čharra' pue'llomer, po'pchañečhnoñapa' pechapoch čharra' pue'llomer, po'pchañečhnoñapa' čharroch čharra' pue'llomer.

⁹ Allempoña Jesúsapa' alla o'terraneterr:

—Ñeñtes po'ñočh ne'mñotene', čhaponasepa'ch seyočhro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet
(Mt. 13.10-17; Lc. 8.9-10)

¹⁰ Allempoña patmuerra acheñpa' o' ñapñaña Jesús epuet ñaña pueyochresha' ñaña puesheña'tets po'potantañ ñeñt allo'tsa'yen, ñetñapa' atet ochet Jesús:

—Ta'm ¿est'e'ña petma'ntatenyaña ñorra'?

¹¹ Jesúsñapa' atet o'terraneterr:

—Sa te'pa' Yomporña semnatene' attoch señoterr ñeñt ama eñotpahuoyaye ama't ahua'toteñ atet penaña Yompor po'cohuenña atto ayochreshattena ña. Tarraña po'potantañečhno ñeñt atta es pueča'yetsa, ñocpuetpa' ama eñoteñeto ñeñt atet atma'ntataret ñoñets. ¹² Attoña ama't enteñetañ ñetñapa' amach errotent es čhaphueto

pueyočhreto. Ama't e'mueñetañ amach čhenanetoña pueyočhreto ñeñt atet yečhateney Yompor po'cohuenña. Attoña amach cotape'cherreto ello cohuen Yomporecop attoch ñach peretnerrahuet po'chñaret.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mt. 13.18-23; Lc. 8.11-15)

¹³ Jesúsñapa' alla oterraneterr:

—Sapa' ama't mameshapa' are't señotenoña ñeñt o' netma'ntatuasa ñorra'. Ñerra'm ama čhennaso seyočhro ñeñt o' netma'ntatuasa ñorra'pa' errotenoťuachñaca'yeña čhaponasaña seyočhro allohuen po'poñečno ñeñtcha' netma'ntaterrserr tsapaťonet.

¹⁴ Allempoña Jesúsapa' eñotatanet ñeñt atet o' toma'ntatuanet ñoñets ñocpuet, ñeñtapa' atet otanet:

—Ñeñt a'parre'tyene' puerets, ñeñtña pueretspa' añca'ye notenes Yompor po'ñoñ allempo serrpare'teñet. ¹⁵ Añ puerets ñeñt čhapyets toño'mar ñeñtapa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotuetpa' allorocmach huapa oneñet o'ch alla puerratanmperranet Yompor po'ñoñ ama't allpon ñeñt eñotetañ pueyočhreto. ¹⁶⁻¹⁷ Ñaña ñeñt čhapyesets mapuetro'meso'mar ñeñtapa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguññañetañ Yompor po'ñoñ. E'ñech cohuen ame'ñeretañ tarraña ñeñtapa' mamecpach atet penet. Tarro'mar ñetpa' e'ñe atet penet ñerra'mrate' narmets ñeñt chepuets mapyo amach eñalle puerečh. Tsapaťoneña ñerra'm o'ch huapanet topateñets ñeñtcha' mueročhtatahuet tarro'mar ñetpa' o' ame'ñeretañ Yompor po'ñoñ, ñetñapa' allorocmach alla quečpuerrñañet Yompor po'ñoñ. ¹⁸ Ñaña po'poñečno puerets ñeñt čhapyets ajmo'mar ñeñtapa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. ¹⁹ Ama'tcha' čhapanetañ pueyočhreto tarraña ñetpa' allo'nach senet e'ñech aña atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es ečhyenet tarraña ñeñtapa' čhaca'ye shequēnanet. Attach pa'namen ye'chatse'tyenet. Attoña huenanet topateñets ñeñto'marña ñetpa' amach errotenoť orrtatoñetoña ñeñt e'ñe cohuen enten Yompor. Ñetpa' e'ñe ateta ñerra'm narmets ñeñt čhaca'mateñ ajma' ñeñto'marña amach errotenoť me'teneto o'ch ellomre'tyeset. ²⁰ Ñaña añ puerets ñeñt čhapyesets e'ñe cohuen patso ñeñt e'ñe cohuen cheparsatspa' ñeñtña

toma'ntenaya po'potantañ acheñenesha' ñeñt e'mñotene' Yompor po'ñoñ. Ñoñetsñapa' e'ñech cohuen chenonet pueyoçhreto. Ñetñapa' ñeñfet po'ñoçh orrtatenet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr me'tets—pate'tets ma'poch çharra' pue'llomer, po'poñpa' pechapoch çharra' pue'llomer, po'poñpa' çharroch çharra' pue'llomer.

*Arrpa' all toma'ntatanet lampareñ atto çhoyo'tampeney
(Lc. 8.16-18)*

²¹ Jesúsñapa' alla toma'ntaterraneterr; ñeñtpa' atet oterraneterr:

—Ñerra'm esempo ya'llchaten lampareñ, ñeñtpa' ama añecpaye' yehuapateñe o'ch alla ye'rramam̄psos coyño. Ñaña ama añecpaye' ya'huortatenoña lampareñ o'ch yene' o'ponot yemayepñacho. Añecopña ya'huortatenña lampareñ o'ch yene' enonet attoch çhoyo'tam̄pesuan allohuen ñeñt allo'tsa'yen. ²² Tarro'mar allohuen pa'namen ñeñt ama eñotpahuoyaye ama't ahuatoteñ, te'ñapa' o'ch e'ñe orrtataretterra attochña o'ch e'ñe eñotataretetuerret e'ñe poctacma. ²³ Ñeñtes po'ñoçh ne'mñotene' çhaponasepa'ch seyoçhro ñeñt atet netma'ntatensa añ ñoñets.

²⁴ Jesúsapa' alla oterraneterr:

—Sapa' señotenate' e'ñe'te' po'ñoçh cohuen se'mñoteññañ Yompor po'ñoñ ñato'pa' amate'. Tarro'mar ñerra'm erro't sepoñ po'psheñeñ ñeñt ama cohuenayaye Yomporñapa' attec mach perres samã. Ñaña ñerra'm e'ñe cohuen sepenanet, Yomporñapa' e'ñech cohuen perres samã ama't ellonet o'ch apuerres ñeñt e'ñe cohuen. ²⁵ Tarro'mar esesha'te' çhena pueyoçhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama çhenaneto pueyoçhreto tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyenetañ pueyoçhro ñeñtñapa' çhach puerratamperranet Yompor.

All toma'ntatanet puerets ñeñt e'ñe cohuen chepyets

²⁶ Jesúsapa' alla toma'ntaterraneterr; ñeñtpa' atet oterraneterr:

—Yompor po'cohuenña ñeñt atto ayochreshattena ña, ñeñtpa' atet pena ñerra'mrate' puesheñarr acheñ ñeñt nare'tene' puepuer. O'chña nare'tuepa' o'ch ahuerr pa'pacillo. ²⁷ Allach allponmaterra' o'ch tsapuenpa' allach muene't, yetoñapa' çhocmach tanta'muene't, puepuerñapa' atteñapa' o'ch chepua o'ch atesha'ta. Pamo'mte'ñapa' amach e'ñeye' eñoteñe erro'tenotte'ña chepyen. ²⁸ Ñehua, yeñoteñ patspa'

ñeñtca'ye a'chpatene' yepuer e'ñe ñoña. Choch ñanom cho'pe'chyes allempoñapa' o'ch atarrchet choch potsets attoch ellomre'tyes, attotachcho' e'ñe po'nuen. ²⁹ E'ñe errte' po'netspa' e'ñech allorocma mueñan ñeñtcha' tsorrenaya'. O'ca' chen allempoch ap'chenetña ñeñt narmetser.

Atto Jesúsapa' toma'ntaterranet atet pena pue'llomer ñeñt otenet mostazllom

(Mt. 13.31-32; Lc. 13.18-19)

³⁰ Jesúsña ellonetpa' atet otterranneterr:

—Añ Yompor po'cohuenña ñeñt atto ayochreshattena ña —ñanompa' e'ñech puesheña'ttsa ame'ña'yetsa, allempoteñapa' allo'nach sen atonetnomtsa ñeñtcha' ame'ñerrtsa, attochña e'ñe epa'huerra erracmañen Yompor po'cohuenña. Ñeñtña te'pa' o'ch netma'ntatasa ñeñt atet pena ña. ³¹ Ñeñtapa' atet pena ñerra'mrrate' añ pue'llomer ñeñt atarr añeñtolleshallmerr ñeñt otenet mostazllom. Ñeñtña pue'llomiretollpa' o'ch nare'chet patso. Ñehua, e'ñe yeñoteñ mostazllom ñeñtapa' atarrca'ye nanac añeñtolleshallmerr. ³² Tarraña ñerra'm o'ch nare'chetpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsočno. Puetacre'nach ateshatacrerrtatsa. Allñapa' o'ch hua'cha'toña otečno o'ch rrema'rrartosa puetacro'mar po'mañero.

Jesúsapa' ora allpon ñeñt atet ye'chatyenan acheñenesha' ñeñtapa' atto pa'namen es toma'ntatyenanet

(Mt. 13.34-35)

³³ Shonte' po'poñečno ñeñt alla toma'ntaterranneterr atto serrpare'tatenanet Yompor po'ñoñ. Attoña e'ñe allpona serrpare'tatanet ñeñtñapa' e'ñe cohuen eñotatanet pueyo'chreto. ³⁴ Ama serrpare'tatenaneto atta, añña chocma serrpare'tatenanet toma'nteñtso. Ellonetpa' chocma e'ñe eñoto'chen serrpare'tatenan pueyo'chresha'.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mt. 8.23-27; Lc. 8.22-25)

³⁵ Ñeñte yetrocma e'ñe ellerronet Jesúsñapa' otan pueyo'chresha':

—Te'pa' o'ch ahuañpsey yomta'n.

³⁶ Pueyo'chresha'na sohuanmet acheñenesha'. Ñeñtara noñto allo'tsen Jesúsapa' alloña anmanpeñet Jesús o'ch ahuañpset yomta'n. Allñapa' co'ña huanmanet po'pnañečno noñtečno. ³⁷ Allempo ahuañpset allñapa' machayotepa'tcha' huomenquëshatañpesnomuet. Emo'yare'ña cha esha'tena noñto atteña oñña' chorrannoch

noñto. ³⁸ Jesúsña' alla muen puepopato alla ñotena. Pueyochresha'ña opueretpa' atet ochet:

—¡Maestro, amahuaca'ye pellquënyoñe' o'rramche' yoclla'huamocha!

³⁹ Jesúsña tanterrapa' e'ñe po'ñoñoña a'mtsoññetueran huomenquësha'. Ñaña po'ñoñoña a'mtsoññeterran sa'p ñeññ emo'yartetsa, ñeñña' atet ot:

—¡Muechecherrepa', muetsoññeterra'!

E'ñe otue'pa' ÷ha muechecherrtsaña huomenquësha'. Attoña ñetpa' o' alla muechettamperret e'ñe cohuen.

⁴⁰ Allempoña Jesús'pa' atet otanet:

—Sapa' eso'mare'tña ÷ha atarr seyoren. Eso'mare'tña ama e'ñeye' seyemtenno.

⁴¹ Ñetña' ÷ha atarr nanac yorenat, atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoñoña'pa' a'mchechaterran huomenquësha' ama't ñaña emo'yare' oñ.

5

Atto gadaro'marnesha' ñeññ chorrena oneñeñpa' huapa Jesúsesho

(Mt. 8.28-34; Lc. 8.26-39)

¹ Allempoña'pa' o' etsotaset yonñta'n all sechenet. Allña'pa' añ pa'ney pene' gadaro'marnesha'. ² Jesúsña'pa' sehuosa all noñtoñ, allña'pa' huapoña puesheñarr yacma tarraña ñapa' añ chorrenaya oneñeñ. Ñeñña'pa' arroñ huapa allecma pampa'yeñet arromñañechno. ³⁻⁴ Ñehua, ñapa' alla yechna all pampueñet arromñañechno. Ama't puesheñarrapa' ama eseshaye' erroñ penaye attoch a'mchecheret. Ama't ÷hocma huanquëñetañ asrerecho pa'tcoñ ñaña potot, ñaña'pa' ÷hach tsepe'tuerannña asrerech allo huanquëñet potot ñaña pa'tcoñ ÷hach rrollapecheñ o'ch e'ñe tsepe'tatue. Ñeñto'marña ama't e'ñe eseshapa' ama eshcaye' a'mchecheñeto. ⁵ Allña'pa' ellapene'tcha' ñaña arepene'tcha' chopeñe'chyesets apampaño'mar ñaña aspenñarero'mar. Allña'pa' allecma atarr ama'tochtena, tsotse'tyena mapyo e'ñe ñañeña. ⁶ Tarraña allempo entapan Jesús a'yoteñ allentepa'tcha' matosa concorpana'tosana Jesús. ⁷⁻⁸ Allempoña Jesús'pa' atet otosan oneñeñ ñeññ chorrenaya ñeññ yacmar, atet otos:

—O'ch oneñeñe notosepñ te'ñapa' ipequechpa'ner añ acheñer!

Ñeñto'marña ñeññ chorrena oneñeñpa' rranosa huomencpa' atet otapan Jesús:

—Eso'maruachca'ye Jesúsocha' p̄atsrre'moçhtana'tosna, p̄apa' ñeñtep̄ Ñeñt nanac Parets Puechemerep̄. Te'pa' o'ch notapaḡ e'ñe Parets pa'so'chño, amach čha pecoñchatatstosno.

⁹ Jesúsñapa' alla oterranerr ñeñt chorrena oneñet:

—Papa' ¿eso'tña peso'cheñ?

Ñaña'apa' atet oterranerr Jesús:

—Napa' añ neso'cheñ Legión tarro'mar yapa' nanac patonrey.

¹⁰ Allempoña ñeñt chorrena oneñetpa' ñaña'apa' atet otare'tapan Jesús:

—Amach pemño'tatsterrye allapaḡ bačhayo.

¹¹ Nehua, allpa' a'yente'tsa'yen shonte' chañchočno ñeñt rratse'tyets aspentonet. ¹² Ñeñto'marña oneñetechnopa' atet otare'tapet Jesús:

—Ñerra'm čhoch muene' erroten peḡoseypa' arrña pemñaye'chosey chañchesho allochñapa' o'ch yechorra'yerr ñaña' chañchočno.

¹³ Jesúsñapa' allenta otanet:

—Ama'tca'yepa' orrasca'ye.

Allempoña oneñetechnopa' quečhp'a'neret acheñ o' chorretterr ñaña' chañchočno. Chañchoña allempo chorrosya oneñetechnopa' čhepa'tcha' matrra'tua ñegonef, shorčha'tuos allotpa' e'ñe ño'shrra'tuosa oño. Ñeñña' chañchočno'pa' allo'tsente' epoch mil.

¹⁴ Acheñenesha'ña ñeñt cohuanpene' chañcho, ñetñapa' allenta matrra'tet ñamet po'yorñoŋ ahuanmuet anetso. Allñapa' serrpare'tyesoset ñaña' ora allohuen allampaño'mar. Acheñenesha'ñapa' allenta ahuanmuet ahuo'ch enteñeta'.

¹⁵ O' čačha'tet Jesúseshopa' allñapa' entoset yacma ñeñt chorre't oneñetechno alla anen ashtamaŋ, o' eñoterra, o' cohuenterra. Ñetñapa' čha atarr mecha'na'toset. ¹⁶ Añña' ñeñt entene' Jesús atto quečhpaterran oneñet acheñ, o' alla mueñererr chañchesho, ñetñapa' allenta serrpare'tatiesapet ñeñt huačha'ttsa anetsoŋ. ¹⁷ Allempoña acheñenesha' ñeñt yechetsa allpa' atet ochet Jesús:

—Te'pa' ahuerreḡ arroŋ yenyot.

¹⁸ Allempoña Jesús'pa' a'terr noñto o'ch ahuer, yacmaña ñeñt chorre't oneñet ñaña'apa' allenta otan Jesús:

—Napa' nemneñca'ye te'pa' o'ch nocterreḡ.

¹⁹ Tarraña Jesúsñapa' ama muenache atet och:

—Allapaḡ, te'pa' o'ch ahuerreḡ pepaclo pamo'tsesho'mar o'ch peserrpare'tatuerranet ora allohuen atto Yomporpa' atarr yenposeḡ ñaña' atto atarr muerospa.

²⁰ Ñaña'pa' atet otue Jesús'pa' atet'cho' p̄a. Allenta ahuerr ser-
rpare'tyesnerrets ora anetso'mar ama't all oteñet Decapoliso
atto Jesús'pa' atarr nanac yenpos. Allohuenña acheñenesha'pa'
atta atarr cohuanrrorteñet.

*Atto Jesús'pa' tantaterran Jairo po'señ ñaña all
a'crratnoman puesheñarr coyanesha' ñeñt a'p̄lla'nmue'
pa'shtam*

(Mt. 9.18-26; Lc. 8.40-56)

²¹ Allempoñapa' ahuanperrerr Jesús noñto, o' alla cherrerr
añeñta'n allot ta ahuaña. Allñapa' o' alla emchorra'huererr
shonte' acheñenesha' e'ñe all sa'patop̄ño. ²² Allñapa' huapoña
puesheñarr amcha'taret ñeñtpa' añ pa'so'cheñ Jairo.
Ñapa' ñeñt puesheñarr ñeñt amcha'tarettetsa judionesha'
po'prahuo. Allempo entosan Jesús'pa' ñaña'pa' alla rromosa
Jesús pa'rrp̄ot. ²³ Allñapa' atet otos:

—Nesñetollañacho' o' cha a'po'ntsena. Ñeñto'marña napa'
nohuenna'pa' o'ch p̄octerren nepacillo. Ama't p̄ototapa' o'ch
p̄a'p̄lleña' attoch p̄a'crrater o'ch alla huomcherra.

²⁴ Jesúsñapa' allenta co'ta'ner, allenta co'ta'huanem̄
ñaña shonte' acheñenesha' cha emchorratse'tnomet, cha
to'mama'tneñet. ²⁵ Allñapa' co'ta'nmanet ñaña puesheñarr
coyanesha' ñeñt atsna'tets. Charra' puechena epa char ñeñt
atto chocma yella'yena. ²⁶ Epaye' mueroc̄htateñ shonte'
apartañechno ñeñt partenayeñ. Ama't o' a'gasta'huahuan
ora allpon quelle echen atto partatena ñaña'pa' attera
ama't mameshapa' ama choye' pasateñe. Elloña allo'na
sen a'po'ntsa'nmatsa. ²⁷ Ñeñt coyanesha'pa' o' e'mare'tan
Jesús ñeñt atto chocma a'crratyenan atsnañe'chno.
Ñeñto'marña allempo co'ta'huanem̄ Jesús acheñenesha'pa'
ñapa'cho'ña allenta co'ta'nman Jesús chenta' pa'che'ño't.
Attoña allpa' a'p̄lla'nmoñ pa'shtam. ²⁸ Tarro'mar ñapa'
atet cotape'chen pueyo'chro: "Ama't pa'shtama na'p̄lloñpa'
ñeñtachca' na'crraterre'." ²⁹ E'ñe a'p̄lla'hue' pa'shtampa'
allorocmuepa'tcha' maserrña po'rras. Ñapa' e'ñe eñotena
po'chtso o' metueña ñeñt mueroc̄htatene'. ³⁰ Jesúsñapa'
eñotnoñ e'ñe ña po'huamenco'tpa' o' a'crratnoman
puesheñarr atsnañeñ. Ñaña'pa' allenta puerraperra alla
acheñenesheshoneñ ñeñt co'ta'huanene', allñapa' atet otanet:

—¿Esesha'tña o' a'p̄lla'nmuenña neshtamo't?

³¹ Pueyo'chresha'ñapa' atet ochet:

—Pentente' shonte' acheñenesha' ñeñt allotemeña
peto'mama'tnene'. Eso'mare'tña p̄otenña esesha'te' p̄a'p̄llene'
peshtamo't.

³² Jesúsñapa' alla cohua'yesanet o'ch entan ñeñt a'p̄llene' pa'shtamoť. ³³ Ñeñña coyanesha'pa' ñapa' o' eñotnoma Jesúsca'yeña o' a'crratnom̄. Ñaña'pa' čha pa'shmuena po'yorñot allempoñapa' concorposa Jesús pa'rrp̄ot. Allña'pa' e'ñe a'meta'nman ora allpon ñeñt po'ñočh atet cotape'chen. ³⁴ Jesúsñapa' atet otapan coyanesha':

—Papa' nesñeshacha' atto atarr peyemtenna na, attoña te'pa' o' e'ñe na'crratnomuep̄. Te'ñapa' o'ch ahuerrep̄ peñmañesha', tarro'mar amach alla mueročhtaterrperro atснаñets.

³⁵ Allempo eñorena atetpa' allña'pa' huacha'ta ñeñt huetsa añcha'taret Jairo pa'pacloť. Ñetña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na p̄atsrre'močhtana'tatsche Maestro o'ch coterrep̄ pepaclo.

³⁶ Jesúsña ama't e'man atet otoset Jairopa' ñaña'pa' atet otan Jairo ñeñt añcha'taretetsa judionesha' po'prahuo:

—Papa' amach čha pe'charrtatatsto peyočher, nachña e'ñe peyemta.

³⁷ Jesúsñapa' aña muenat Pedro ñaña Jacobo ñaña pa'mo'nasheñ Juan. Ñeñtach cota'nmue'. ³⁸ Allempoñapa' ahuanmuet añcha'taret Jairo pa'paclo. O'ña čhacha'tet allpa', allña'pa' entoset shonte' acheñenesha' ñeñt ano'tatse'tets, all yahuanrrortenet, atarr ya'na'teñet arromñať. ³⁹ Jesúsñapa' be'tosos pocollo, ñaña'pa' atet otosanet:

—Sapa' eso'mare'tña atarr sano'tatsen, čha atarr seyahuanrrortena. Añ shopshesha'pa' amaca'ye čhoje' rromueno, čhaca'ye muen.

⁴⁰ Ñetña pachmare'teñoťetpa' atta che'tatsetyesapet tarro'mar ñetpa' e'ñeca'ye eñotenet čhoca'ye rromuen. Allempoña Jesús'pa' čha'nmačha'tatosan allohuen acheñenesha' pocolloť. Ñaña'pa' be'tosos o'pono allo'tsen shopshesha' ñeñt rromuets. Ñapa' aña muenatos arromñať puepapar ñaña pachor ñaña ñeñt cota'huanene', ñeñña epuet be'tosčha'toset allo'tsen arromñať. ⁴¹ Allempoña Jesús'pa' rromota'tosan shopsheshañ pototpa' atet otos e'ñe ña po'ñoño:

—Talita cumi—ñeñt yoten ya yeñoño: O'ch nesñeťolle noto-sep̄ te'pa' čhoča tanterrtsa.

⁴² E'ñe otue' atetpa' allentepa'tcha' tanterra, čha chope'cherrets. Ñehua, ñeñt shopshesharpa' čharra' puechena epa po'charña. Allohuenetña'pa' čha atarr cohuanrrorteñet. ⁴³ Allempoña Jesús'pa' atet otanet:

—Po'ñočh te'pa' amach esesha' señoťatatsto ama't e'ñe puesheñarra.

Alla oterraneterr:

—Te'pa' serratallme'cherñaca'ye.

6

Allempo serrpare'tatan Jesús acheñenesha' all Nazareto
(Mt. 13.53-58; Lc. 4.16-30)

¹ Jesúsña ahuerrerr allotpa' o' alla çherrerr pa'nyo all Nazareto. Pueyochresha'ñapa' alla co'a'huanererr. ² Allñapa' allempo çherr yet allempocma amesenet, ñaña'apa' arr yeçhatuerraneterr judionesha' po'prahuo. Shonte' acheñenesha' ñeñt e'mñotapuerre' atet serrpare'tatuerranet all, ñetñapa' nanac cohuanrrortapueret, allempoñapa' atet otyeset ñocop:

—Ñapa' errahuañaca'yeña eñotanña ora allohuen ñeñt atet pa'yena. Eshesha'huañaca'yeña eñotatene'ña attot orrtatendan partsoteñets. Errotuaca'yeña huenaña ñeñt eñoteñtsor ñeñt orrtatyen ña. ³ Ñapa' añaca'ye ñeñt po'taruas pene' o'ch torrenana tsach attoch es yeçhcatyen pa'namen. Ñapa' añaca'ye María puechoyor. Pa'mo'nasheñpa'çho'ña añaca'ye Jacobo, José, Judas, ñaña Simón. Ñaña po'çhanesha'pa' e'ñeca'ye yechme'tenanet, parro'marneshayarramche'.

Ñeñto'marña all e'ñe ña pa'nyopa' ama eseshaye' acua'penaye entenaye. ⁴ Allempoña Jesús'pa' atet otanet:

—Ñeñt a'mtene' Yompor po'ñoñpa' çhocmaca'ye añcha'na'tpo' entyeñña allohuen acheñenesha'; arrña pa'nyo allo'tsen e'ñe ña pamo'tsna'tarnesha' ñeñt e'ñe pamo'tsna'tar penpa' ñetñapa' ama acua'penaye' enteñeto. Ama't ñaña ñeñt parro yeçhenet pa'pacleto, ñetpa'çho'ña ama acua'penaye' enteñeto.

⁵ Ama ame'ñeñeto ñeñto'marña allpa' ama atonocheye' orrtataneto po'partsoña. Allpa' ñaña orrtatyen attoch a'plla'yenan puesheña'tets atsnañet allpa' attoca'yeña a'crratenanet. ⁶ Ñeñto'marña Jesús atarr cotape'chateñ pamo'tsesha' atto ñetpa' ama acua'penaye' enteñeto, ñapa' çha muene'llecateñet. Allempoña Jesús'pa' alla chopeñe'chyerrerr yeçhatyerrtserr allemeñ anetso'mar.

Allempo Jesús'pa' llesensan pueyochresha' o'ch ahuanemye-
set allcha' serrpare'tyeneta'

(Mt. 10.5-15; Lc. 9.1-6)

⁷ Allempo çhapa'muen allempo Jesús agota'muenan pueyochresha' çharrasheña ñeñt puechetsa epsheña. E'ñe apçha'huet ñeshopa' ñaña'apa' apañet llesens attoch queçhpatyeset oneñeñeçhno atto chorra'yenana acheñenesha'çhno. Attoña llesensanet ñetpa' o'ch

ahuanemyeset e'ñe epsheña'ttsocmuet. 8-9 Ñaña atet otapanet:

—Ñerra'm o'ch sahuamapa' amach es sanmatsto ama't coñe'ta allcha' sechopeñe'chyes—ama't sebolsa, ama't ñeñfcha' serra'yenom, ama't seçllayora. Ama't e'ñe epma seshtampa' amach sanmatsche. Añach sanem secarr, sena'nomcha' ñaña sesapat.

¹⁰ Alla oterraneterr:

—Ama't errach pocollro seçhap allach sommosa allponmat esempohuach ahuerrser po'poñ anetso. ¹¹ Ñerra'm erra anetsro ñeñf allo'marnesha'ña ama cohuenaye' agapaseto ñerra'm amach mueneto o'ch e'mñnotapasetpa' o'ch semterrrer ñaña allot. Ñerra'm allempo semterrrer ñaña allot, ñeñfña setco'tsa'yen pañe'te' patspa' çhoch sepa'shetca'tyesnomña setac. Attochña allo'marnesha'pa' o'ch señoatnomanet ñetpa' amaca'ye pocteye' entenanetoña Yompor. Po'ñoçh o'ch notas: Eempohuañen allempoch acraretuerra allohuen acheñenesha', añña anetso'marnesha' ñeñf ama sagapaye ñetñapa' atarrcha' a'coñchatare'tterret. Elloch metana'tueret ñeñf atto a'coñchatare'tterra sodomo'marnesha' ñaña gomorro'marnesha'.

¹² E'ñe ñeñfa otare'tetuetpa' ñetñapa' allenta ahuanmuet o'ch chopeñe'chyeset erracmañen anetso'mar. Allñapa' serrpare'tyesnomuet ñeñf poctetsa allohuenacop o'ch cotape'cherret ello cohuen Yomporecop. ¹³ Ñaña all chopeñe'chyeset erracmañenpa' ñetpa' allña queçhpatyeset shonte' oneñe'feçhno atto chorra'yenana acheñenesha'çhno. Ñaña shonte' po'potantañeçhno acheñenesha' ñeñf atsna'tyets all, ñetñapa' a'yana'tyesoset atsnañe'feçhno olivoso'yo* e'ñe a'crratyesoset.

Allempo e'ñe cohuen es orrtatyes Jesús, Herodesñapa' cha otapañ Juanañe' o' tanterra ñeñf apataye't acheñ Yomporecop (Mt. 14.1-12; Lc. 9.7-9)

¹⁴ Allempoña añcha'taret Herodes ñaña'apa' atet e'mare'tenan Jesús ñeñf atet pa'yena, tarro'mar Jesús allohuen acheñenesha'pa' e'ñe e'mare'tueñet ñeñf atet pa'yena. Ñaña'apa' atet ot:

—Añepa'tca'yeña Juanañ ñeñf apataye't acheñ Partsocop. Ta'mca'ye çhate' tanterraña rromot. Ñeñto'marepa'tca'yeña te'pa' orrtaterranña partsoteñets.

¹⁵ Po'potantañña'apa' atet otyenet:

—Añepa'tca'yeña Elías ñeñf a'mtaye't Yompor po'ñoñ ahuat. Po'potantañña'apa' ñetpa'çho'ña atet otyenet:

* 6:13 Olivo ñeñf tsach allot yoreñet puerets pue'merot.

—Añepa'tca'yeña ñeñt' a'mtene' Yompor po'ñoñ, e'ñeca'ye atet ñerra'm ñeñt' a'mtaye't Yompor po'ñoñ ahuať.

16 Herodesña allempo e'mare'ch ñaña'pa' atet ot:

—Añepa'tca'yeña Juanañ ñeñt' nepechat ahuañmo'cha, chepa'trramche' tanterraña rromot.

17 Ñehua, allempo Herodespa' ahuañmo'chacma rromatenana' Juanañ o' huancachpa' allña yottam'psach attoch coshatan Herodías ñeñt' pa'mo'nasheñ Felipe puetapor. Tarro'mar allempo Herodespa' o'ca'ye puerraterran pa'mo'nasheñ puetapor. 18 Juanañpa' ñaca'ye otaye't Herodes:

—Amaca'ye pocteyaye o'ch peyoram'pes pemo'nasheñ puetapor.

19 Ñeñto'marña allempo Herodíaspa' atarr e'moñe'tane't Juan, atarr mueneñe't o'ch muetsatacheñ tarraña ama errot pe. 20 Tarro'mar Herodespa' mecha'na'tane't Juan, eñoche't ñapa' e'ñe pocte' es pa'yese't. Eñoche't ñapa' añe'cpa'na atarr torrena Partsocop. Ñeñto'mare'naña e'ñe cohuen cohuan'psache't allochñapa' amach muetseto. Allempo e'mñnoten Juan atto serrpare'te't atarr cohuen enteñeñ, tarraña ama e'ñeye' eñotenanoña ñeñt' atet cotape'chateñ Juan e'ñe cohuen. 21 Atteñapa' chapa'muen pam'tarr allempoch Herodías eñoteñ attotcha' muetsaterran Juan. Ñeñt'pa' tarrempo atet pa' allempo chapa'muen Herodes pue'ñalletño ñeñt' puerrollar pen Herodías. Allempoña Herodespa' hua'ñatyesan acheñenesha' ñeñt'cha' rrallme'chapretenaya'. Añ hua'ñatyes ñeñt' am'cha'tarete'chno ñaña ñeñt' solltar po'cap'tanrenesha' ñaña ñeñt' atarr e'cllayoretenesha' ñeñt' galileo'marnesha'. 22 Allempo rrallme'chetpa' allña be'tososña ñaña shopshesha' ñeñt' Herodías puechoyor. Ñaña'pa' allña tancsare'tosa. Herodesña'pa' ñeñta atarr cohuen ent ama't ñaña ñeñt' ahua'ñarete'chno. Ñeñto'marña am'cha'taret Herodespa' atet otan shopshesha':

—Ama't erra'tsena penamuenenpa' napa' napa'pcha'.

23 Elloñapa' e'ñe Yompor pa'so'chño nan po'ñoñ, allempoña'p' alla otererr:

—Po'ño'chca'ye napa' ama't es penamuen napa' napa'pcha' ama't puehmet nepatseñ all na'm'cha'tare'tena.

24 Allempoña shopshesha'pa' cha'nerr ahuer pachoresho, atet otosan pachor:

—Ta'm ¿escha' nenan'ña am'cha'taret?

Pachorñapa' atet och:

—Añcha' penam' Juan poñ ñeñt' apataye't ahuaña acheñ.

25 Allempoña shopshesha'pa' materra alla am'cha'taret Herodesesho atet otuerran am'cha'taret:

—Napa' añ nemnen o'ch pepechennana' Juan poñ ñeñt' apataye't acheñenesha' o'ch penon platopa' o'ch ðaphuerren e'ñe arrma.

²⁶ Allempo enamhue shopshesha' Juan poñpa' añcha'tareñña' ÷ha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt' hua'ñen ñeñt' e'muene' atet oten ñeñto'marña ÷hocmach a'pocatan po'ñoñ atet otuan ñorra' shopshesha'.

²⁷ Allempoñapa' allenta otan po'solltarer:

—Te'pa' o'ch pepecheññaña' Juan poñ all neyottamþsateñ; poñña'pehuapater arrma.

²⁸ Solltarña' allenta ahuo' pechenana' Juan poñ, o' huapater plato, aphuerran shopshesha'. Shopshesha'ñapa' apuenana' ñaña pachor.

²⁹ Allempoña Juan pueyochresha'pa' o' e'mare'chet o' pecheret pa'yochreshateret Juanañ, allempoña ñet ahuanmuet all pecheret Juanañ allempoña ñetpa' ereta' apecharet o'ch pampueñeta'.

Allempo Jesús'pa' rratenan shonte' acheñenesha'; ñeñt'ña acheñenesha'pa' allo'tsen amnaroch mil

(Mt. 14.13-21; Lc. 9.10-17; Jn. 6.1-14)

³⁰ Attotañapa' o' ÷haçherr ñeñt' llesensen Jesús. Ñetña' serrpare'tatueret Jesús allohuen ñeñt' atet ða'yaset. Serppare'tatueret ñaña atet yeçhatyaset acheñenesha' Yompor po'ñoñ. ³¹ Jesúsñapa' atet oterranerr pueyochresha':

—Te'pa' o'ch ahuey e'ñe yaptoche' all ama acheñempaño'yaye; sapa' allcha'ña samesuerr allponmat.

Ñeñt' allempopa' atet otan Jesús pueyochresha' tarro'mar allempo shonte' acheñenesha' ñeñt' hua'cha'tyetsa ñaña ñeñt' ÷hocma ahuanemyetsa ñeñto'mar ama't mameshapa' ama eshcaye' rreneto. ³² Allempoñapa' e'ñe ñaptochayet ahuanmamþset noñto, o'ch ahuanmuet all ama acheñempaño'yaye all otenanet Jesús. ³³ Allempoña shonte' acheñenesha'pa' alla enterraneterr all oñmamþpenet. Allempoña achme'tarettapuetpa' acheñenesha'ñapa' o' alla matrra'terrerr allohuen ñeñte anetso't. Ñetña' patso'mara oñma'cha'tet ñanmacmueta ÷ha'cha'tet all sechena Jesús pueyochreshohuen. ³⁴ Allempoña sehuosa Jesús allpa' alla entuerraneterr o' alla shonta'huerrerr acheñenesha'. Atarr nanac muera'huerraneterr Jesús, tarro'mar ñetpa' e'ñe atet entuerraneterr ñerra'mrrate' carrnero ñeñt' ama acumþsaret'yaye. Allempoña Jesús'pa' alla yeçhatuerraneterr pa'namen esocmañen ñeñt' Yompor

po'cohuenña. ³⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempaño yaye ñaña o'ca'ye ellerren. ³⁶ Te'pa' o'ch p'och acheñenesha' ahuanemyer-retepa' anetso'mar allcha' rañña'yesuerret puerraret ñeñtcha' rra'yesuerret tarro'mar arrpa' ama es eñalle.

³⁷ Tarraña Jesúsñapa' otan pueyochresha':

—Sachca'ye apa'yesahuet ñeñtcha' rret.

Ñetñapa' atet ochet:

—¿Añe't pemnen o'ch ahuey o'ch yepomuena' shonte' quelle ñeñt doscientos denario[†] alloch yerañtēna' pan ñeñtcha' yer-ratuerranet allohuenet?

³⁸ Jesúsñapa' atet otarraneterr:

—Ñehua, secua' pan, ¿errponte' sechen?

Ñetña cohuet panpa' atet otereterr:

—E'ñeca'ye amnara pan eñall ñaña epatoll cac.

³⁹ Allempoña Jesúsapa' atet otan acheñenesha':

—Te'pa' o'ch sanorrcha'tyes e'ñe sopa'ttsocma e'ñe all cohuen emmo'ratyen pasetma'.

⁴⁰ Ñetñapa' atetcho' pet. Anorrcha'tyeset e'ñe ñopa'ttsocmuet—charrasheña'ttsocma charrapa'tets ñaña amnarsheña'ttsocma charrapa'tets ñeñt anorrcha'tyesets.

⁴¹ Allempoña Jesúsapa' agapan ñeñt amnar pan ñaña epatoll cac, cohua' enonet parasyoso'tam'psan pan. Allempoñapa' shota'tan panpa' apanatyesan pueyochresha', ñetñapa' epatyaset allohuen acheñenesha' ñeñt anorrcha'tyets all, e'ñe epa'huet. Ñaña shetse'tan cac attoch epatyesanet allohuenet.

⁴² Allempoñapa' o' rrallme'chet allohuenet e'ñepa'tcha' yetrra'tuahuet. ⁴³ E'ñe yetuahuetpa' elloña cha a'pchatyaset cac ñaña pan ñeñt ashota'tyesare't. Ñeñtña a'yapa'cherretpa' chepa'tcha' chorrerrets charra' puechena epa cañter. ⁴⁴ Ñeñtña rrallme'chats atarr shonte' acheñenesha' allo'tsen amnaroch mil ñeñt e'ñe yacmaneshoche'.

*Allempo Jesúsapa' e'ñe cohuen chope'chnen enot oño
(Mt. 14.22-27; Jn. 6.16-21)*

⁴⁵ Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch se'pchaterra yot o'ch se'cherr anetso ñeñt pa'so'cheñ Betsaida.

Allempoña Jesúsapa' o' so'tnoman acheñenesha'.

⁴⁶ So'tuanmanetpa' ñañaapa' ahua' aspeno, allcha' ma'yochosa. ⁴⁷ Atteñapa' o' tsapuen, ñapa' allo'tsenara e'ñe ñapue't aspeno. Noñtapa'cho'ña ñeñt rro'chaso'tsenara

[†] 6:37 Denariopa' quelle ñeñt allpon tsa'tenet pam'tarr ñeñt taruaset all pa'nyo.

sa'po. ⁴⁸ Alloitña entenan pueyochresha' ñeñt noñto'tsa'yen. Ñetñapa' e'ñe po'muerochenñořeta echotnenet oñ țarro'mar orrnoñapa' ĉha a'puerrame'tam̃penanet. Atteña allempoña puetarenmochpa' huenanet Jesús ĉha chope'chnen enoř oño. Ahuo'ch metanenanetañ, ⁴⁹ allempoña pueyochresha'pa' entapueñet ĉha chope'chnen enoř oño. Ñetñapa' ĉha otenapuetañ choyeshe'matste' huapanet. ĉha rrannartet pueñchañoř. ⁵⁰ Allohuenetpa' e'ñe entuapet nanac yore'tosanet. Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta sem̃cha'tatstapno.

⁵¹ Allempoña Jesúsapa' a'tapos noñto allo'tsa'yen pueyochresha'. Huomenquęsha'ñapa' ĉhepa'tcha' muetsoñeñterrtsa. Ñetñapa' ĉha atarr cohuanrrortapueñet. ⁵² Ama ĉhenaneto pueyoĉhreto ama't atto Jesúsapa' atontatan pan, amaca'ye es ĉhenahueto pueyoĉhreto.

Allempo Jesúsapa' a'crratyesosan pa'namen atsnañeřeĉhno all Genesareto

(Mt. 14.34-36)

⁵³ Allempoña pechatam̃psetpa' arr etsotset all oteñet Genesareto. ⁵⁴ Allempo sohuaĉha'toset noñtoř, añña acheñenesha' ñeñt allo'tsa'yen, ñetñapa' cheme'tapet Jesúsapa' ⁵⁵ allenta matrra'tyeset ora erracmañen all yeĉha'yena acheñenesha'. Attotca'yeña huapatam̃pesyesoñetña atsnañeřeĉhno allem̃ateñ. Ama't erra e'mare'teñet o' ĉhap all, allcha'ĉho' anmoñetña patsnañeřer puechechnape'na. ⁵⁶ Ama't erra ĉhapyen all shontena acheñenesha' ñaña ñerra'm arr ĉhen all ama tama eñalle acheñ, ama't allecma oñen acheñenesha' ñetñapa' allcha'ĉho' na'yeneta' patsnañeřeret allcha' enamapet ama't poso'mota o'ch a'p̃llapoñet pa'shtam. Allpon ñeñt a'p̃lla'yepue' Jesús pa'shtampa' allponĉho' e'ñe corra'yesserrtsa.

7

Atto Jesúsapa' eñotatenanet ama añeye' ya'sosyatenaye Partso-cop ñeñt yerra'yen yenamot

(Mt. 15.1-20)

¹ Allempoña allpa' huĉha'toña fariseonesha' epuet ñaña puesheña'tets ñeñt huĉhetsa Jerusalénoř ñeñt atarr etsotayenayen ñoñets ñeñt atet anaret judioneshacop. ² Ñetña allpa' entosñañet Jesús pueyochresha' atarra'yenet ama e'pota'tyeneto pot Partsocop allempoch rrallme'chet. ³ (Ñehua, allohuen fariseonesha' ama't ñaña allohuen judionesha' ñetpa' atet yeĉhenet amach

rreneta'pa' o'ch e'pota'tyeset Partsocop. Tarraña ñeñt'pa' pa'tañneshaña yečhatnomahuet. ⁴ Ñaña po'poñ ellonetpa' atet yečhatanete't pa'tañneshañ ñerra'm esempo huerret allotecma pomatsre'tyenet, amach rreneta'pa' čoch ñanom a'cohuentatenetañ Partsocop. Ñaña shonte' po'poñečno ñeñt e'ñe yečhatyesanete't pa'tañneshañ. Ama't ñeñt porre't pa'yenet ñaña po'pajočnetpa' čochña e'ñe e'pame'tyeñetañ Partsocop, e'parro'tyenetañ ama't ñaña pa'srerrogachno Partsocop. Ama't ñaña all panrame'tyenet e'ñech e'pata'tueñetañ Partsocop.) ⁵ Añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop ñetña allempo entosñañet Jesús pueyochresha' atta rra'yenet ama e'pota'teneto Partsocop ñeñto'marña ñetpa' atet otoset Jesús:

—Peyochreshačhnoñapa' eso'mare'tña ama esesha' yečhenayeña ñeñt atet yeče't yatañneshañ. Ñetpa' atta rra'yenet ama e'pota'teneto Partsocop allempo rrenet.

⁶ Jesúsñapa' atet otanet:

—Sapa' atarruaca'ye ommoñañneshaste' tarro'mar atarr sešcare'ten, amaña Yomporeye' sesherbena. Isaíaspa' e'ñe cohuen a'mítane't Yompor po'ñoñ, saña te'ñapa' e'ñe atet sepena atet ote't allempo atet ot Yompor:

Ñeñt acheñenesharpa' e'ñe puenamoča cohuentatennanetañ; pueyočhretoñapa' ama čhenaneto ñeñt cohuen nentena.

⁷ E'ñe orrena ma'yochennet, ñeñt atet yečhatannenetpa' ñeñt'pa' e'ñe acheña naye't ahua't počta'pña.

⁸ Jesúsapa' alla oterraneterr:

—Sapa' čhaca'ye sequečhpuenña ñeñt atet otene'y Yompor ñeñt'cha' atet ye'pa'yen cohuen; sapa' añaca'yeña atarr setsotayen ñeñt atet yečhatyesnomues sa'tañneshañ; ñeñta atet se'pa'yen orrotečhno e'pame'tyese' ñaña sepajočhno. Ñaña po'poñečno pa'namen se'patse'tyeneñ ñeñt soten Partsocopaño'.

⁹ Jesúsapa' alla oterraneterr:

—Sapa' añaca'ye atarr señoten attoch sehuapore'toñ Yompor po'ñoñ ñeñt atet otene'y ña ñeñt'cha' atet ye'pa cohuen; ñeñto'marña sapa' e'ñe añña setsotayen ñeñt yečhatyesnomues satañneshañ. ¹⁰ Ñehua, Moisésapa' atetca'ye ote't: “Semorrenteño'pa' señcha'na'chcha' sompor ñaña sachor.” Elloña ñaña po'poñonetpa' atet ote't Moisés: “Ñerra'm esesha' sasare'tene' pompor ñaña pachor ñeñt'pa' muetsetepa'.” ¹¹ Tarraña sañapa' atet sotyen ñerra'm esesha' atet otene' pompor ñaña pachor: “Ñeñt nechen

o'ch napapeña' tarraña amach napape te'pa' o'ch nene' Yomporecop ñeñt otenet Corbán", ¹² ñeñtña acheñerpa' sañapa' atetcha' soteñ: "Pocoppa' ama pallteno o'ch es pa'p' p'amo'mte'." Attoña sapa' ama semnateñe ñeñt acheñer e'ñe ña puemorrenteño'pa' o'ch es apuenan pompor ñaña pachor. ¹³ Attoca'yeña sehuapore'teññañña Yompor po'ñoñ allochñapa' e'ñech aña setsoten ñeñt e'ñe sa seycheña. Ama't ellonetpa'cho'ña shonte' po'poñechno ñeñt atet sepatse'tyena pa'namena'tt socma.

¹⁴ Allempoña Jesús pa' chore'tan acheñenesha' ñeñt shontetsa, ñetñapa' atet otanet:

—Sañapa' po'ñoñ allohuenes e'ñepa'chña cohuen se'mñoten allochñapa' attoch e'ñe cohuen chaponasa seyochro. ¹⁵ Ama añeye' ya'sosyatenaye Partsocop ñeñt yerra'yen. Añca'yeña ya'sosyatene' e'ñe ya yoc'tape'chatse'teño' ñeñt pa' yeyochro'tca'ye huena. ¹⁶ Ñeñtes po'ñoñ ne'mñotene' chaponasepa'ch seyochro ñeñt atet netma'ntatensa añ ñoñets.

¹⁷ Allempoña Jesús pa' sa'nerran acheñenesha'pa' ñaña pa' be'tosuerrerr pocollo allña pueyochresha'pa' atet otoset:

—¿Eso'tña petma'ntatyenyña ñorra'?

¹⁸ Jesús ñapa' atet otanet:

—Sapa'cho'ña e'ñe'tña attecma'sañ, ama es se'chenoyo seyochro. Sapa' ama't se'notenoña ñeñt yerra'yen yenamot ñeñt pa' amate' errotent a'sosyatyeña Partsocop. ¹⁹ Tarro'mar ñeñt yerra'yen pa' amaca'ye yeyochroye' cheno, ya'taca'ye chen. Ñeñt pa' chocmachca'ye yener a'yo.

Ñehua, ñeñt pa' atet e'notateney Jesús allohuen rreñto'chnopa' e'ñeca'ye cohuenacma e'ñe arrapahuocma.

²⁰ Jesús ñapa' alla oterraneterr:

—Añña ñeñt cha'nets yenamot ñeñt atto yeñosatse'tyen ñeñt pa' e'ñe yeyochro't huena ñeñtña chocma ya'sosyatene'ña Partsocop. ²¹ E'ñe yeyochro't huena cotapñats

ñeñt ama't mameshapa' ama cohuenayaye, ñeñt pa' añ: chetapretanna'teñets taporets, cañoresha'teñets, muetsanna'teñets, ²² etatsre'tyeñets, ye'chapretanna'teñets, atsrre'mueñets, shecare'tanna'teñets, ottatse'teñets, moparrñats, sasare'teñets, ommo'cheñets, otatse'teñets.

²³ Ñeñt allohuen sosya'tsañechno ñeñt pa' yeyochro'tca'yeña huena, ñeñtca'yeña ya'sosyatene'ña Partsocop.

Atto puešeñarr coyanesha' ñeñt ama judioneshayaye ñapa' atarr yemtapana Jesús

(Mt. 15.21-28)

²⁴ Allempoñapa' ahuererr Jesús allotpa' alla chap allampaño anets Tiro ñaña Sidón. Allempo chap all pocolopa' ñapa' mueneñeñ e'ño'ch a'nahua chapañ. Tarraña ama er-rotenot chapo a'nahua, ²⁵ tarro'mar e'ñe allempo chap cha e'mare'te' puesheñarr coyanesha' ñeñt achoyoret. Puechoy-orñapa' penochor ñeñtñapa' cha chorreña oneñeñ. Ñeñtña coyanesha' huapapa' rromosa Jesús pa'rrpōt. ²⁶ Ñeñtña coy-anesharpa' ama judioneshayaye, ñapa' po'poñ acheñ ñeñt sirofenicio'marnesha'. All rromosa Jesús pa'rrpōtpa' atet otos:

—Nepapare, pequechpatataye'chapon nechoyor oneñeñ.

²⁷ Jesúsñapa' atet toma'ntatana acheñenesha' ñeñt ama judioneshayaye ñeñto'marña atet och:

—Ñanomcha' ya yacñeñar ya'yeta' tarro'mar ama pocteyaye o'ch yeprratam̄pes yacñeñar puerrar o'ch yehuapore'tam̄pes allo'tsen ochec o'ch rre' ñaña ochec.

²⁸ Coyanesha'ñapa' atet otererr:

—Ama't atteñ nepapareshacha' tarraña ama't ochepa'cho'ña rra'yenan cheshanesha' puerrar ñeñt a'shore'tatyenet po'mesañna'cho.

²⁹ Allempoña Jesúsapa' atet otererr:

—E'ñe pocte' atet pe'ñorena; e'ñepa't p̄ame'ñenna. Ñeñto'mar te'pa' o'ch ahuerreḡ e'ñe peñmañesha', te'ña oneñeñpa' o' quechpa'nerrnaḡ pechoyor.

³⁰ Allempoña coyanesha'pa' ahuer pa'paclo, o' cherrpa' alla entuerran puechoyor alla panena e'ñe cohuen po'mayo, oneñeñapa' o' quechpa'ner.

Allempo Jesúsapa' a'crraterran paquet ñeñt opanatets

³¹ Allempo puerrerra allot ñeñt allampañoḡ Tiroḡ, arr oñemhuanom anetso Sidón allot ñaña po'poñ anetso Decapoliso'mar. Attoña o' alla ahuer sa'ponet all Galileyasō.

³² O' cherr allpa' huapaterrñañeterr puesheñarr yacma ñeñtñapa' paquet ñaña ama e'ñeye' cohuenaye' eñeno. Ñeñtña huapate'pa' atet otosan Jesús:

—Añecopca' nehuapateñ o'ch p̄a'p̄lle' p̄otot attoch correrra.

³³ Jesúsñapa' allenta aneñ ñapueñ a'yenet, allñapa' esho'tosan potaḡ paquet pueto; ñaña o' senmare'pa' o' alla a'p̄llerrñañer ñaña pueñeñ. ³⁴ Allempoña Jesús cohua' enonetpa' enara. Allempoñapa' atet ot e'ñe ña po'ñoño:

—Efata —ñeñt yoten yeñoño: Pota'nerrepa' pet allochñapa' o'ch pe'muerra e'ñe cohuen.

³⁵ E'ñe otue'pa' cha pota'nerrets puetpa' e'ñe cohuen e'muerra. Ama't ñeñt echarrtatene' pueñeñpa' o' a'rroyer cha eñorerrtsa e'ñe cohuen. ³⁶ Jesúsñapa' atet otanet:

—Te'pa' amach esesha' sotaḡsa'tatsto ama't e'ñe puesheñarra.

Ama't atet otanetañ elloña ñetpa' a'metare'teñet. ³⁷ Allñapa' atarr nanac cohuanrrorteñet, atet otyenet:

—Jesúspa' atarro'trra cohuenña ñeñt' allohuen atet es ḡa'yen. Ama't paquetnesha'pa' ḡhocma e'ñe cohuen e'matuenanet. Ama't ñaña opananeshachnopa' ḡhocma e'ñe cohuen eñoratyenanet.

8

*Allempo Jesúsapa' rratenan shonte' acheñenesha' ñeñtña
acheñenesha'pa' allo'tsen pa'tatsoch mil*

(Mt. 15.32-39)

¹ Allempoña po'pocheño shonterrerr acheñenesha' Jesúsesho. Allempopa'ḡo'ña ama eñalle ñeñtcha' rret. Ñeñto'mar Jesúsapa' agotan pueyochresha'pa' atet otapanet:

² —Napa' ḡcha atarr nemuereña allohuen acheñenesha' ñeñt' shontetsa arr. O' ma'pamtoset nesho ama eñallmeñeto ñeñtcha' rret. ³ Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto toño tarro'mar patanta'tetspa' atarr baḡhayot huapyenet.

⁴ Pueyochresha'ñapa' atet ochet:

—Errahuachca'ye yentña rreñetsé' ñeñtcha' yerrach shonte' acheñ arrpa' amayaca'ye.

⁵ Jesúsñapa' atet oterraneterr:

—Sapa' ḡerrpona't sechenña pan?

Ñetñapa' atet otereterr:

—E'ñeca'ye canḡhrra yechen.

⁶ Allempoñapa' otan acheñenesha':

—Te'pa' sanorrḡha'tyes patso.

Allñapa' agapan ñeñt' canḡherr pan. Agaphuepa' o' parasyoso'tenanerr Pompor allo'tñapa' o' shota'tan pan, apanatyesan pueyochresha'. Ñetñapa' o' epatyeset ñamet allohuen acheñenesha' e'ñe epa'huet. ⁷ Apuanet panpa' eñall ñaña pate'tets cacatollesha'. Jesúsñapa' alla parasyoso'tanḡperranerr ñaña cacatollesha' allempoñapa' oterranerr pueyochresha':

—Sepatyerraneterr ñaña cacatollesha'.

⁸ Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' ḡcha a'pchatyeset ñeñtñapa' a'yapaḡheret. Ñeñtña a'yapaḡherretpa' ḡhepa'tcha' chorrats canḡherr cañer e'ñe tamo'yare'. ⁹ Ñeñt' rrallme'chats atarr aton acheñenesha' ñato' allo'tsente'pa'tatsoch mil acheñenesha'. Allempoña Jesúsapa' so'tnerran acheñenesha'pa' ahuerr, ¹⁰ a'tapos noñto pueyochreshohuen

ahuanm̄pset o'ch ahuanmuet anetso ñeñt̄ pa'so'cheñ Dalmanuta.

Atto fariseonesha' enamoset Jesús gatapanetepa'to' po'partsoña

(Mt. 16.1-4; Lc. 12.54-56)

¹¹ Allempoña Jesús pa' huacherrñañerr ñaña fariseonesha' ahuo'ch otnare'chet Jesús. Ñetña pa' čha mueneñet o'ch topa-
chet Jesús. Ñeñto'marña atet otoset:

—Yapa' añca'ye yemnen o'ch pegatapuey pepartsoña entot allochñapa' attoch yeñotosep̄ po'ñočh papa' Parets Puechemerep̄.

¹² Jesúsña pa' allenta enara čha muene' po'poñ entanet pueyočhro ñeñto'marña atet otanet:

—Eso'marte'ca'ye acheñenesha' ñeñt̄ corra'yetsa te' ñetña pa' añña atarr e'nenet o'ch norrtatanet nepartsoña entot. Po'ñočhca'ye na te'pa' o'ch notas, ama't coñe'ta amach es negataneto.

¹³ Allempoña Jesús sohuanerranetpa' a'taphuerr noñtopa' ahuanm̄pes, pechaterra yom̄ta'n.

Atto Jesús toma'ntaterraneterr ñeñt̄ po'chaser pen fariseonesha'

(Mt. 16.5-12)

¹⁴ Pueyochresha'ñapa' čha puesnomuet o'ch anmuet pocra-
rañ, noñtopa' ama es eñalle ñeñt̄cha' rret, e'ñe patr̄ra pan eñall. ¹⁵ Jesúsña pa' alla toma'ntaterraneterr, ñeñt̄ña pa' atet otanet:

—E'ñech seño'ta ñato't semeñe'teña'ña fariseonesha' ama't ñaña Herodes po'chaser allo tsetenet pan.

¹⁶ Ñetña cotape'chyesetpa' atet otanna'tyeset:

—Amaca'ye yechenoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

¹⁷ Jesúsña allempo eñotanet atet cotape'chyenet ñaña pa' atet oterraneterr:

—Eso'mare't sellquëñesha' sotanna'tyena año' eñalle ñeñt̄cha' serra'. ¿Ama't seño'teñe? ¿Ama't čhennasoña seyočhro? Teme'ttsena't se'charrtatenña seyočher. ¹⁸ Sapa' ama't aclo'yeteseñpa' čhaca'ye sottena ñerra'mrrate' ama senteno. Ama't etateseñpa' čhaca'ye sottena ñerra'mrrate' ama se'mueno. Ama't mameshapa' are'tña es seyerpueno.

¹⁹ Ñehua, ahuaña allempo neshota't amnar pan e'ñeca'ye epa'hua amnaroch mil yacmanesha'. Ellopa' ¿errpona'tña sapčha'huerrña ñeñt̄ ashota'tyesare't allempo e'ñe seyetua? ¿Errpona'tña cañter se'chorrer?

Ñetña pa' atet ochet:

—Charra'ca'ye puechena epa cañter.

20 —Ñaña allempo neshota't cancherr pan pa'tatsoch mil acheñ ñeñt rre' ¿errpona'tña sapcherrerrña ñeñt ashota'tyesaret allempo e'ñe seyetuerrerr? ¿Errpona'tña cañter se'chorrerrerr?

Ñetña atet ochet:

—Cancherrca'ye cañter ye'chorrerrerrña allempo.

21 Jesúsñapa' alla otterraneterr:

—Te'ñapa' ¿ama'tña o' chaponasoña seyoçhro? Ñeñt neñotatenes ñeñtpa' ama serrarecpaye' notenso.

Allempo Jesúsapa' a'crraterran aporo'yet all Betsaido

22 Allempoña chacha'tet anetso Betsaido, allñapa' huapaterñañeterr aporo'yet, ñeñtpa' atet otoset Jesús:

—Añecopca'ye yehuapateñña o'ch pa'pñacclle'chap attoch pecuater.

23 Allempoña Jesúsapa' echa'nman aporo'yet pototpa' anem a'yenet all ama eñalle pocoll. Allñapa' a'yacclle'chos pa'snemo, attoña a'pñacclle'chos, allñapa' atet och:

—¿Ama't coñe'tapa' ama't o' pento?

24 Aporo'yetña cohua'yestsapa' allenta otan Jesús:

—O'ca'ye nent acheñ alla chopeñen tarraña e'ñe atet nentyenanet ñerra'mrrate' tsach tomcha'tyets.

25 Jesúsñapa' alla a'pñacclle'chererr, aporo'yetñapa' cohua'yerrtserrpa' chepa'tcha' e'ñe cohuenterrtsaña pa'cclle'. E'ñe cohuen es entyesuahuer allohuen. 26 Allempoña Jesúsapa' atet och:

—Te'ña ñerra'm o'ch ahuerreþ pepaclopa' tarraña amach poñmatsterroña anetso'mar, allochñapa' amach esesha' potaþsa'tatsetnerro ama't e'ñe puesheñarra.

Atto Pedropa' otan Jesús, þapa' þaña Yompor Puechemereþ ñeñteþ Cristotosets

(Mt. 16.13-20; Lc. 9.18-21)

27 Allempoña ahuererr Jesús pueyochreshohuen. Arr sechenet all oteñet Cesarea ñeñtara Filipino allcha' chopeñe'chyeneta' all anetso'mar. Allña toñopa' a'þto'tnoman pueyochresha' ñeñtpa' atet otnomanet:

—¿Errofena't otyenenña allohuen acheñenesha', napa' eseshante'?

28 Ñetñapa' atet otyeset:

—Patantarr acheñenesha'pa' atetca'ye otyenpet þapa' Juanañþo'te' ñeñteþo' apatañtatset Yomporecop. Po'potantaññaapa' atet otyenpet þapa' Elíasoþo'te'; po'potantaññaapa' atet otyenpet þapa' añeþo'te' po'psheñeñ ñeñt a'mtaye't Yompor po'ñoñ ahuat.

29 Allempoñapa' alla a'þto'terraneterr:

—Sañapa' ¿errořena'tña sotenenna sa?

Pedroña eñoratsapa' atet och:

—Papa' ñeñteřca'ye Cristotosets.

³⁰ Allempoñapa' otan pueyochresha':

—Amach esesha' sotařsa'tatsto ama't puesheñarra napa' na ñeñten Cristotets.

Atto Jesúsapa' eñotatan pueyochresha' ñapa' amtsaretterrach (Mt. 16.21-28; Lc. 9.22-27)

³¹ Jesúsña e'ñe allempoteñpa' motetnomñ eñotatyesnomue' pueyochresha' ñeñt atet anareř ñocop, ñeñtpa' atet otanet:

—Na Ñeñten Acheñetosetsapa' atet anareř nocop, nanaccha' na'mueroçhtatareřterra. Amach esesha' pocteye' nenter-
raye—ama't ñeñt pompornesha' pen judionesha', ama't ñeñt
pa'micha'tareřter pen judionesha' po'cornanesha', ama't ñaña
ñeñt etsotayenayeñ ñoñets ñeñt atet anareř judioneshacop—
ama't ñetpa' amach eseshaye' neyemterraye. Attochña napa'
muetsataterretcha'. Tarraña poma'pamtañoçh o'ch alla ne-
tanterra.

³² Ñeñtpa' e'ñe eñotoçhen otnomanet ñapa' atetcha' ařareřterra. Pedroñaapa' allenta anemñ a'yenetpa' allñaapa' atet otos:

—Arepa'ch Partseshacha' atteye' perrpeto ama't errponaña.

³³ Jesúsñaapa' alla puerraperra cohuos pueyochresheshonet allñaapa' atet otan Pedro:

—Orrař a'yo neshoř oneñete; řapa' amaca'ye Yomporeye' atet poctape'chatenaye; ñeñtpa' acheñarramche' poctařña.

³⁴ Allempoña Jesúsapa' agotan acheñenesha' ñaña pueyochre-
sha' ñeñtpa' atet otanet:

—Ñerra'm esesha' muenene' o'ch cořerrnet na e'ñe po'ñoçh attoch neyochresha' neperranet añ poctetsa sohuanmuetepa'ña ñeñt atet muenenet e'ñe ñocpueta ama't e'ñe pocreñohuenet. Attochña ñetpa' o'ch e'ñe toma'nteret ñeñt checnene' po'corsoch allcha' mueroçhtet ñamet. Attochña cořerrnet e'ñe po'ñoçh. ³⁵ Tarro'mar ñerra'm esesha' e'ñe aña muenenet o'ch correnet atomat attoch e'ñe coshenet arr patsro, ñetñaapa' çhach a'chencatet ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop attoch epatuerret cohuen ñoñets ñeñtpa' alloch sequeshperra, ñeñtña acheñerpa' ñañaapa' corretsach e'ñe cohuen tayoteñ errponañohuen. ³⁶ Ama't errponenařaren esocmañen es yeyoratsetyes ora allpon ñeñt yentyen aña patsro, tarraña ñerra'm ñeñtach e'ñe ya'chencaterre' yecamquẽñohuen, ñeñtñaapa' ama't coñe'tapa' amach es sherberrye. Tarro'mar ama eñalle po'poñ ñeñt atarr sherbets, aña atarr nanac sherbets ñeñtcha'

a'queshpaterre' yecamquëñ. ³⁷ Tarro'mar yocoppa' ama es eñalle ñeñtcha' yepomuerr alloch alla yerañterra yecamquëñ. ³⁸ Tarraña ñerra'm erra'tsencha' nepenquënaya na te', neñoñpa'cho'ña cha apencochen entennanet, napa'cho'ña nepenca'huerranetcha' esempoch nohuerra. Shonte' acheñenesha' ñeñt corra'yetsa te' arr patsro ñetñapa' atarr ochñañeneshet tarro'mar ñetpa' po'poña po'yomporer pa'yenet. Tarraña ñerra'm esesha'ch puepenquëñotetan na amach a'metenneto all, ñeñtña acheñerpa' napa'cho'ña chach nepenca'huera ñerra'm esempoch nohuerra. Po'ñoch napa' Ñeñten Acheñetosetspa' nohuerrach e'ñe Nompore po'cohuenñot epan ñaña po'mllañoteñnashar ñeñt e'ñe torra'yetsa Partsocop.

9

¹ Allempoña Jesúsapa' alla oterraneterr:

—Po'ñochca'ye te'pa' o'ch notas, patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarrcha' ayochreshatterra ña e'ñe po'huamencot.

Allempo Jesúsapa' po'poñetañpsana pueyochresha'
(Mt. 17.1-13; Lc. 9.28-36)

² Allempo pechapmaterrerr, Jesúsñapa' ahuanerranerr pueyochresha'; añ anem Pedro ñaña Jacobo ñaña Juan. Ñetpa' arr anmanet atarr aspeno e'ñe ñaptochayet all aspeno. Allña Jesúsapa' machayotepa'tcha' e'ñe po'poñetañpsosanet. ³ Pa'shtampa' cha popta atarr nanac huallama't. Arr patsropa' ama eñalle alloch ya'huallama'ttat yeshtam atet ñerra'm ña pa'shtam atarr huallama'to poptena.

⁴ Allñapa' machayotepa'tcha' orrtanet Elías ñaña Moisés. Ñetñapa' alla serrpare'toset epuet Jesús. ⁵ Pedroña eñoratsapa' atet otan Jesús:

—Atarruaca'ye Maestrocha' cohueno'tseneyte' arr. Ama't pocte' penteñe yapa' o'ch ya'tomatonas ma'ppahua quërpachet, puepahuarrpa' p'ocopcha' po'ppahueñpa' Moisésocopcha', po'ppahueñpa' Elíasocopcha'.

⁶ Ñehua, Pedroña pueyorñot atta muene' otatse't, ama eñoche errotentcha' ot. ⁷ Allempo eñorena Pedropa' cha orrtosahuet os ñeñt atarr cohuen poptetsa chepa'tcha' a'pomam'psosanet. Cha e'morrtostsa ñoñets oso't; ñeñtña ñoñetspa' Yompor otosahuet; ñeñtpa' atet ot:

—Añmapa' ñeñt no Nechemer ñeñt atarr nemuerena, ñeñtcha'ña e'ñe cohuen se'mñoterr.

⁸ Allempoña o' cohua'yerretpa' arepa'tcha' eseshaye' entereto, ñap̄ta enteret Jesús.

⁹ Allempo onačherret aspen̄toť Jesúsña'p̄a' atet otrerranet:

—Te'pa' amach esesha' sotaḡsa'tatsto ama't e'ñe puesheñarra ñeñt̄ atet o' sentua. Tarrem̄pohuach allempoch netanterra na rromot̄ na Ñeñten Acheñetosets, allempochña seserrpare'taterña allohuen acheñenesha'. ¹⁰ Ñetña atet otanet Jesús'pa' atet'cho' pet, ama a'meteññañeto po'ñoñ. Tarraña ñetña'pa' at̄ta a'ḡto'tanna'tyesnerret:

—Ta'm ¿es̄te'ña oteneña Jesús o'ch tanterra rromot̄?

¹¹ Allempoña pueyochresha' atet otrerret:

—¿Eso'mare'tña oteneña ñeñt̄ atarr etsotene' ñoñets ñeñt̄ atet anaret, Elías'o'ch ñanom huerrtsa?

¹² Ñaña'pa' atet otrerraneterr:

—Elías po'ñočhpa' ñachca'yeña huerrtsa ñanom, ñapa' e'ñechca'ye a'cohuentatuer ora allohuen. Tarraña sapa' ama't señothenoña ñaña ñeñt̄ atet anaret quellco e'ñe nocop. Ñeñt̄ allpa' atetca' oten na Ñeñten Acheñetosets atarrcha' na'mueročhtataretterra, atarrcha' tsena'terrnet. ¹³ Tarraña napa' o'ch notas, Elías'pa' o'ca'ye huaphuerrañ arr, ñeñt̄apa' čhaña erroťuanen ḡpaueret ñeñt̄ atet muena'yenet ñet. At̄toca'yeña etsoterraña ñaña ñeñt̄ atet anaret quellco ñocop.

*Atto Jesús'pa' a'crraterran cheshachor ñeñt̄ otaten oneñt̄
(Mt. 17.14-21; Lc. 9.37-43)*

¹⁴ Allempoña čhačherret allo'tsa'yen pueyochresha' allña'pa' alla entuereterr shonte' acheñenesha' ñeñt̄ emchorrenaya po'potantañ pueyochresha'. Ñeñt̄ña etsotayenayeñ ñoñets ñeñt̄ atet anaret'pa' alla entuerraneterr all es otnare'teññañet pueyochresha'. ¹⁵ Allempoña entapuer allohuen acheñenesha'pa' čha atarr cohuanrrortapueret, matrra'tet ñeshopa' huom̄cha'tapueret. ¹⁶ Jesús'ña'pa' allenta otrerranet:

—Sapa' ¿erroťena'tña sotanna'tyena?

¹⁷ Puesheñarrña ñeñt̄ allo'tsenpa' ñaña'pa' atet otaḡ:

—Maestrocha' napa' o'ca'ye nohuapatonapeñña nechemer, čhaca'ye chorreña oneñt̄ čha opanatateñ. ¹⁸ Ñerra'm erroťeno rremueñpa' čhachca'ye ata'tateñ patso, čhach amtan pa'po'pa' o'ch rraso'tan pa's, o'ch e'ñe ečharra. O' notuosnaḡña peyochresha' o'ch quečhpateret oneñt̄ ñeshoḡpa' tarraña ñetpa' amaca'ye eshcaye' quečhpateño.

¹⁹ Jesús'ña'pa' atet otanet:

—Sa ñeñtes acheñres ama't mameshapa' ama ayemtenaye' sentpenno. O' allponmatuanen allo'tsenen arr patsro, napa'

atta atarr na'huantennas, atta necuenes ñato' attotpa' o'ch same'ñerrna.

Allempoñapa' atet otanet:

—Ama'tpa' sanmonca'ye chesha' arr.

²⁰ Allempoña anmoñet chesha'pa' oneñeñña'pa' entosan Jesús'pa' chepa'tcha' otatosanña chesha'pa' alla ata patso, cha pomero'ta, amtan ñaña pa'po'. ²¹ Jesús'ña'pa' allenta otoñ pompor:

—¿Esempoteñe'tña atet perra?

Ñaña'pa' atet och:

—Cheshoteñca'ye atet perra. ²² O'te' epaye' ata'tater ama't tso ama't ñaña oño attoch muetsereñ. Paña te'pa' ñerra'm errotentpa' e'ñe pemuereñoñ pebensañpsaye'cherrnan nechemer allochñapa' attoch metuer atto mueroçhtena.

²³ Jesús'ña'pa' atet och:

—Ñerra'm na peyemtena amaca'ye eñalleña ñeñt torrapo' añecop ñeñt e'ñe neyemtenaya na.

²⁴ Allempoña ñeñt pompor pen chesha'pa' rranapa' atet otererr:

—Napa' neyemtenpañca'ye, te'ñapa' peyenpa'n Ayochreshate attoch neyemterrpa e'ñe poctacma.

²⁵ Allempoña Jesús'pa' entapan shonte' acheñenesha' ñeñt mataçhetsa ñeshoneñ, ñaña'pa' allenta otan oneñeñ:

—Pa oneñeñe, opanatatañeñ, a'paquetatañeñ, te'ñapa' o'ch notañ: Pequeçhpa'ner cheshachor e'ñe tayecma, ama't erponaña amach alla pechorrere'te.

²⁶ E'ñe otue' atet oneñeñña'pa' chepa'tcha' rrana'n matsa, alla otatnerranerr cheshachorpa' çho queçhpa'nmue' o' ahuerr.

Cheshachorpa' ama pelleno cha otta ñerra'mrrate' o' rroma. Acheñenesha'ña'pa' atet otyes:

—Po'ñoçh te'pa' o'ca'ye rroma.

²⁷ Jesús'ña'pa' allenta chete' pototpa' o' tantach, chesha'ña'pa' çha terrets e'ñe cohuen.

²⁸ Allempoña Jesús'pa' ahuerr pueyochreshohuen, o' be'tosçha'tuerret pocollo, allpa' e'ñe ñapfoçhayet, pueyochresha'ña'pa' allenta otueret Jesús:

—Yapa' ¿eso'mare'tña ama eshcaye' yequeçhpatatereña oneñeñ?

²⁹ Ñaña'pa' atet otanet:

—Ñeñt atet oneñeñpa' amach errotent yequeçhpatatereña e'ñe atta. Chochña yema'yochena ñaña yema'yochreñoñ ama't yerrarpa' o'ch yequeçhpue' mame'. Atotcha'ña yequeçhpatatereña oneñeñ ñeñt atet.

*Jesús*pa' eñotaterraneterr puepochesho ñapa' chomach muetseret

(Mt. 17.22-23; Lc. 9.43-45)

³⁰ Ahuanerretterr allotpa' arr oñemhuanerret Galileo'mar. Jesúsñapa' mueneñeñ a'nahuoto'ch metañ ³¹ tarro'mar ñapa' mueneñ o'ch yechatnoman pueyochresha'. Ñeñtpa' atet otomanet:

—Na Ñeñten Acheñetosetspa' pomataterrenetcha' attochña errotuanencha' perrnet. Atteñapa' o'ch muetsataterrenet tarraña poma'pamtañoñapa' o'ch alla netanterra.

³² Ñeñña ñoñets ñetñapa' ama't puesheñarrofetapa' ama eseshaye' eñotenaye' enteñeto ñeñto'marña ama a'p'to'tenaye' enteñeto.

All eñotateney ñeñt'acheñer e'ñe po'ño'ch atarr asherben enteñ Yompor

(Mt. 18.1-5; Lc. 9.46-48)

³³ Allempoña cha'cha'tet ñaña Capernaumo. Allempoña chapuet pocollo Jesúsñapa' otanet:

—Sapa', ¿eso't sotanna'tyesnenaña ñorra' toño?

³⁴ Ñetñapa' ama eseshaye' anapuenaye' entaye tarro'mar ñetpa' aña'ye otanna'tyesnenetña toño:

—Yapa' erra'tsenoteyte'ñaca'yeña ñeñtey atarr sherbets, ñeñtey atarr añcha'taretoyen enteney acheñenesha'.

³⁵ Jesúsñapa' all anorrospa' allenta chore'tan allohuen pueyochreshachnopa' atet otanet:

—Ñerra'm erra'tsenotes ñeñtes atarr añcha'taretoyen entetsañ, ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt' atet pena ñeñt' atta atarr taruaset's po'potantañecop, ama't ñaña allohuenacop.

³⁶ Jesúsñapa' cheshatolla chore'tpa' tomach e'ñe alla, allenta enachpa' atet otanet:

³⁷ —Erra'tsenotes sa ñerra'm e'ñe cohuen saguëñ ama't ñeñt' ama asherbenaye' entyeneto atet ñerra'm añ cheshatoll tarro'mar sapa' na same'ñena, na'ñaña e'ñe cohuen saguëñ. Elloña ñaña erra'tsenotes sa ñeñtes naguëne' na, ama e'ñe naptocheye' saguëno, aña'ñaña saguënnan Nompor ñeñt' nellensene'.

Atto eñotateney ñeñt' ama choye' yepatare'tenaye ñeñña po'ño'chpa' e'ñe parrocmayeyenpanna

(Lc. 9.49-50; Mt. 10.42)

³⁸ Allempoña pueyochresha' ñeñt' Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt' quechpatene' oneñeñ. E'ñe puechore'teño'tep' pa peso'chñopa' quechpatan oneñeñ. Yañapa' ama pocteye' yeñche tarro'mar ñapa' ama parroye' yeyemteno. Ñeñto'marña yapa' atet yoch:

—Amach atet peřatsto.

³⁹ Jesúsña'pa' atet ot:

—Sapa' amachca'ye sepatare'tatsche tarro'mar ñerra'm erra'tsencha' orrtate' partsoteñets e'ñe na neso'chño, ñeñña'acheñer tsapaonetpa' amachca'ye muenere alla o'ch achmare'terren. ⁴⁰ Ñaña ñerra'm ama cho epatare'tenye yaña, ñeñña' po'ño'chpa' e'ñeca'ye parrocmayeyenpanna. ⁴¹ Po'ño'chca'ye notenes: Ama't erra'tsena acheñer ñeñcha' sapue' ama't coñe'ta oñ tarro'mar sapa' e'ñe na neyochresha' nepenes, ñeñña'acheñerpa' chocmach atsa'taretterra ñeñcha' atarr coshaterre' ña.

Atto chocmach huaponaya ñeñcha' yetpatyene' o'ch atet patyese' ñeññ ama pocteye' enteno Yompor

(Mt. 18.6-9; Lc. 17.1-2)

⁴² 'Ama't erra'tsena ñeññ ama pommo'cheño'teye' ame'ñenno atet ñerra'm cheshatoll ñeññ ama eñotenana' o'ch ommo'chena, tarraña ñerra'm esesha'ña po'psheñeñ o'ch atet patach ñeññ ama pocteye' enteno Yompor, ñeñña'acheñerpa' atarrcha' yoro'cheno'tsen tarro'mar ñapa' aña o'patenaya coñcheñets ñeññ atarr huomenc. Ama't ñocoppa' ama tama yoro'chenayayñe ñerra'm ama atet patenana' po'psheñeñ, e'ñech allorocma charachetañ mapue' añecmuen pa'chno'po allpon ñerra'm puetse'tamets o'ch huapore'chet oño epo allcha' ño'shach mapue'. ⁴³⁻⁴⁸ Ñaña o'ch noterrser: Ñerra'm sechets patyenes ñeññ ama pocteye' enteno Yompor atet ñerra'm sot, setac, seclle', añ poctetsa o'ch seque'chpuerr ñeññ chocma atet patse'tatyenes sechets. Ñeñtpa' e'ñe atet ñerra'mrrate' e'ñe allorocma o' sepecherr sot, setac, o' serrotter seclle', o'ch sehuapore'ter. Añ cohuen socop ama't e'ñe sepo'yotateño' corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch secherr coñcha'puetso all parraren tso' ñeññ ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeññ allo'tsenpa' ama amayaño ama't errponaña. Ñaña añ cohuen socop ama't e'ñe setcotpa' sepshem'tatqueño' corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeññ ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeññ allo'tsenpa' ama amayaño ama't errponaña. Ñaña añ cohuen socop ama't seclloyot sepshem'taclo'yeño' o'ch secherr all añcha'tarettena Yompor. Añña ama cohuenayaye socop esempohuañenpa' e'ñech ora epo'mar seclle'pa' o'ch

huapore'terrset coñcha'puetso all parraren tso'. Allpa' ama't pueñmochapa' ama rromueno; tso'pa'cho'ña ñeñt' allo'tsenpa' ama amayaño ama't errponaña.

⁴⁹ Ñeñt'ña Jesús'pa' atet toma'ntaterraneterr:

—Allohuen ñeñt'cha' cohuenterrtsapa' aña'ca'ye a'cohuentatene' tso'; ñaña allohuen ayarračno ñeñt' amsarettetsa Yomporecoppa' aña'yeña a'cohuentatene' pos. ⁵⁰ Ñehua, yapa' yeñoteñ pospa' atarr cohuen sherbeney. Tarraña ñerra'm posña po'poserrteña huañerretspa' yapa' amate' erro't yepe o'ch alla ya'poserrtater attoch alla sherberrey. Sapa' e'ñepa'chña cohuen sesherbannena e'ñech attes ñerra'm pospa' atarrcha' sherbeney. Attochña e'ñe cohuen sentannena e'ñech muechet seycha'yena.

10

Atto Jesús'pa' yeçhatosanet ama asanna'tpahuoyaye
(Mt. 19.1-12; Lc. 16.18)

¹ Allempoña Jesús'pa' err Capernaumotpa' ahuer anetso Judeo ñaña arre'na sen Jordanas yon'ta'n. Allñapa' alla shon-terrñañerr acheñenesha', ñaña'pa' yeçhaterraneterr Yompor po'ñoñ ñeñt' çhocma attecma penanet. ² Allñapa' o' alla huaçherrñañerr ñaña fariseonesha'. Ñetñapa' aña atarr e'nenet e'ñe puehquëño'tet po'ñoño'tetpa' o'ch eñorachet ñeñt' ama cohuenayaye. Ñeñto'marña ñetpa' atet otoset:

—Ta'm ¿pocte'te' o'ch yeser yetapor?

³ Ñaña'pa' atet otapanet:

—Sapa' ¿ama't señotenoña Moisés po'ñoñ ñeñt' atet nonase't?

⁴ Ñetñapa' atet ochet:

—Moisés po'ñoñ'pa' atetca'ye oten, çhoch yequellcoñ yetapor papell ñeñt'cha' ya'p allempochña yeser.

⁵ Jesús'ña'pa' atet otanet:

—Tarraña sa seyoçhropa' çhocmaca'ye po'poñ sentuena ñeñto'marca'yeña Moisés'pa' atet quellconase't attoch sese' setapor. ⁶ Ama't atet muenataseña' tarraña Yomporpa' e'ñe ahua'toteñ allempoteñ es yeçcatyes “allempo yeçcatan ñaña asheñorr, yeçcatan ñaña peno.” ⁷ Allempo Yomporpa' atet ot: “Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ pocte' o'huañcha' tama yemteñet pamo'mte' allochñapa' yacmapa' attochña e'ñe parrocmat epuet puetapor. ⁸ Attoña epsheño'maretpa' e'ñech patrra po'chets penet.” Atto'tcha'ña o'huañcha' puesheña'tetstet, allochñapa' o'ch e'ñe puesheñarratet. ⁹ Ñeñt' atto Parets e'ñe patrratatan yacma epuet puetapor amach çha ello'pa' alla sannerreto.

¹⁰ Allempo čhačerret pocollo, allña pueyochresha'pa' atet otueret:

—¿Erroñente'ña ñeñt atet p̄oten ñorra' año' asanna'tpahuo?

¹¹ Ñaña'p' oterraneterr:

—Ñerra'm esesha' serre' puetapor o'ch alla yorerran po'psheñeñ ñeñtcha' puetapor perr, ñeñtña yacmarpa' čhachca'ye ochña'tam̄perrana puetaporeshe'mañ. Ñeñtpa' ama pocteye' enteñe Yompor. ¹² Ñaña coyanesha' ñerra'm serran puerrollar o'ch yorer po'psheñeñ yacma ñeñtcha' puerrollar perr, ñeñtña coyanesharpa' čhachca'ye ochña'tam̄perrana ñaña puerrollareshe'mañ. Ñeñtpa'čo'ña ama't mameshapa' ama pocteye' enteñe Yompor.

Atto Jesús'pa' bensare'tam̄psapan cheshaneshash' ñeñt huapa-toñet

(Mt. 19.13-15; Lc. 18.15-17)

¹³ Allempoñapa' huacha'tachet ñaña shonte' cheshatollesha' Jesúsesho. Ñetpa' añecopña huacha'tachet o'ch a'p̄lla'yesapanet Jesús. Jesúsña pueyochresha' allempo entapan ñeñt huacha'tate' cheshaneshachno ñetñapa' ama pocteye' eñchet o'ch anmoset cheshatollesha' Jesúsesho ñeñto'marña ama amnataretapueto. ¹⁴ Tarraña Jesúsña allempo entan pueyochresha' čha epatare'tapan cheshatollesha', ñaña'p' ama't mameshapa' ama pocteye' entaneto. Ñaña'p' atet otanet:

—Pocte'ñačo' semnachñaca'yeña cheshaneshash' onosetepa' e'ñe nesho. Amachca'ye čha sepatare'tatstapaneto tarro'mar allohuen ñeñt atarr neyemtenaya na atet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña. ¹⁵ Po'ñočhpa' o'ch notas, ñerra'm esesha' ama e'ñeye' pueyemteñoŋeye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuan̄pene', ñetñapa' amach o'patenetoña Yompor po'cohuenña atto atarr ayochreshattena ña.

¹⁶ Allempoña Jesús'pa' a'čhono'tyesapan cheshaneshash'pa' allña a'p̄lla'yesapanetña e'ñe ña potot attoña bensare'tam̄psapanet.

Atto puesheñarr ñeñt huepueshameñ ñeñt atarr ečllayoret ñaña'p' eñorana'tosana Jesús

(Mt. 19.16-30; Lc. 18.18-30)

¹⁷ Allempoña Jesús'pa' o'ch ahuenñerr allenet sechena. Alente'pa'tcha' huapa'muena puesheñarr yacma e'ñe matenacma huapa. Alla concorpana'tosana Jesús'pa' atet otos:

—Maestro, p̄apa' atarr cohuen ačeñreṣ, te'pa' o'ch p̄otapuen ¿erroñena'tcha' nepaña na ñeñt e'ñe

cohuen attochña napa' corretsanach e'ñe tayoteñ ama't errponañohuen?

¹⁸ Jesúsñapa' atet otaḗ:

Eso'mare't ḗotenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapñaña Yompor ñeñt e'ñe po'ñoç cohuen. ¹⁹ Papa' e'ñe peñotuen Yompor po'ñoñ all oteney ñeñtcha' atet yepena e'ñe cohuen, ñeñt atet oteney: "Amach yechtapretyesatsto ḗaporets, amach yemtsanna'tatsto, amach yetyesatsto, amach yetoma'tamḗpsatsche yamo'ts e'ñe atta, yeshquẽñoḗpa' amach es yeprratamḗpsatsche po'psheñeñ, ñaña yemorrenteñoḗpa' yenñcha'na'chcha' yompor ñaña yachor."

²⁰ Ñeñtña a'ḗto'tene'pa' atet otererr:

—Maestrocha' napa' e'ñeca'ye cheshoteñ ora añeçhnopa' e'ñeca'ye netsotueñ.

²¹ Jesúsña e'ñe puemorrenteñoḗ cohue'pa' atet otererr:

—Eñallmeñca'ye paterr ñeñt pepalltena ñeñt ama atteye' pepeno. Te'pa' añcha'ña atet peḗa o'ch ahuerreḗ o'ch pepomhuerr ora allpon ñeñt pechyen o'ch ḗapa'yera' huocchañeshachno ñeñt atarr es pallta'yetsa, attochña ḗapa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch ḗoçterren attoch e'ñe neyochresha' neperreḗ e'ñe poçtacma.

²² O'ña e'mhuan ñeñt atet och Jesúspa' ñaña'pa' çha atarr nanac lleca tarro'mar ñapa' shonte' esocmañen echyen. Ñeñto'marña e'ñe puellquẽñesha' ahuer.

²³ Allempoña Jesús'pa' cohua'yesanetpa' atet otan pueyochresha':

—Ñeñt atarr eçllayoreḗpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña.

²⁴ Pueyochresha'ñapa' çha muene' yore'tanet ñeñt atet otenanet. Jesúsñapa' alla oterraneterr:

—Nechemerneshacha' o'ch notas: Añ acheñer ñeñt añach e'ñe yemtana ñeñt allpon echyen arr patsro ñeñtña acheñerpa' atarrca'ye nanac echarr o'ch agapoñet Yompor po'cohuenña ñeñt atto ayochreshattena ña. ²⁵ Ñehua, ñeñt'pa' atet'cha' netma'ntacha. Po'ñoç yapa' yeñoteñ berr añecmuen allpon ñerra'm huaquesh* atarrca'ye torrapo' o'ch esho'tosa añetollponatollo atet ñerra'mrrate' acosh puetatollo. Ñeñt'pa' atetca'ye penaña acheñ ñeñt eçllayoreḗ, ello atarr torrapo' o'ch agapan ñaña Yompor po'cohuenña

* **10:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquesh.

ñeñt̃ atto ayochreshattena ña (tarro'mar ñetpa' ama mueneñeto o'ch sehuanmuet ñeñt̃ atarr morrentenet ñet attoch pueyochresha' perranetañ Yompor).

²⁶ Pueyochresha'ña allempo e'met Jesús atet oten, ñetña'pa' cha muene' lleca'rrtetpa' atet otanna'tyeset:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteña'ye huaquëshpa' amaca' esho'tenoña acshequeto.

²⁷ Allempoña Jesús'pa' atta cohua'yesanetpa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalleña ñocop ñeñt̃ atarr torrapo' enten.

²⁸ Allempoña Pedropa' atet och:

—Partseshacha' po'ñoçh yapa' o' e'ñe yesuanom ora allohuen attoch e'ñe yocterrep̃.

²⁹ Jesús'ña'p̃a' alla oterraneterr:

—Allohuen erra'tsencha' acheñer ñeñt̃cha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pompor, pachor ñato' puetapor, ñato' pacñeñar ñato' po'patseñ attochña napa' e'ñech cohuen sherberrnet pueserrpare'teñoñet cohuen ñoñets alloch a'queshpataretterra acheñenesha', ³⁰ elloña ñetpa' o'ch alla aguërret shonte' esocmañen ñeñt̃ atarr cohuen. Ama't allponapa'tets sehuanomyesnomuet, elloña çharroch çharra'ch alla agapyerret, ama't e'ñe tayoteñ allempo correnet arr patsro—ama't ñeñt̃cha' pa'pacllaçhno perret ñaña ñeñt̃cha' pa'mo'nasheñnesha'çhno perret, ñaña ñeñt̃cha' po'chanesha'çhno perret, ñaña ñeñt̃cha' pachornesha'çhno perret ñaña ñeñt̃cha' pacñeñareçhno perret, ñaña ñeñt̃cha' po'patseñ perret. Tarraña ama'tcha' atet aparetterretañpa' çhocmach amuroçhtataretterret pame'ñeñoñetan na. Elloña tsapatoneña ñetña'pa' aguërretcha' ñeñt̃ alloch corretsetach beñecpuen pocsheñeshocmañen. ³¹ Te'pa' señoche'pa'ch eñall shonte' acheñ ñeñt̃ ama asherbenaye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt̃ atarr asherben sentyen sa te', tarraña ñetña allempopa' amach asherbenaye' enterraneto Yompor.

Allempo Jesús'pa' alla eñotaterraneterr ñapa' çhocmach amt-saretterra

(Mt. 20.17-19; Lc. 18.31-34)

³² Allempo ahuaneneterr ñaña Jerusaléñoneñ, all oñenet toño'mar Jesús'ña'p̃a' ña otetsa. Pueyochresha'ña'pa' cha toratsetyesnenet pueyoçhret, e'ñe puencha'ñañoña coteñ.

Pueyochresha' ñeñt̃ čharra' puechena epsheña ñeñt̃ña'papa' ahuanem̃ Jesús ellonet, allñapa' eñotaterraneterr ñeñt̃cha' huapoya ñocop. ³³ Ñeñt̃pa' atet otanet:

—Te'ña po'ñočhpa' o'ca'ye ahueney Jerusaléño. Allcha' pomataterrnet na Ñeñten Acheñetosets. Añcha' nerrmuerre' ñeñt̃ pa'mcha'tareternesha' pen allohuen judionesha' po'cornaneshar ñaña ñeñt̃ atarr etsotayenayeñ ñoñets ñeñt̃ atet anaret. Ñetñapa' atetcha' otyesnet na'mtsaretterrepa'to' o'ch pomuerrnet po'poñ acheñesho ñeñt̃ ama judione-shayaye. ³⁴ Ñetña pueche'tatseteñoŕetanpa' allcha'ña achm̃are'terrnet, ashterrnetcha', a'coshare'terrnetcha' attotcha'ña o'ch corso'tamperrnet, tarraña poma'pamtañočh alla netanterra.

Atto Jacobo ñaña Juan ñetpa' enamueñet Jesús attoch anorrcha'tyesuerret ñesho

(Mt. 20.20-28)

³⁵ Allempoñapa' atet oteña' Jacobo ñaña Juan ñeñt̃ Zebedeo puechemeresha' ñeñt̃pa' atet otoset:

—Maestrocha' yapa' aña'ye yemnen o'ch atet peḗa'y ñeñt̃cha' yotap̃.

³⁶ Ñañaapa' atet otanet:

—Sapa' ¿errot̃ena'tña semnen atetcha' neḗas?

³⁷ Ñetñapa' atet otereterr:

—Yapa' aña'ye yemnen te'pa' o'ch pemnatey o'ch yanorruerr pesho pecohuenño, puesheñarroŕeypa' pecohuenrot̃cha' yanorryesuerr, po'psheñeñpa' pe'chcoterot̃cha' anorruerr allcha' yecohuentapreterrpa.

³⁸ Jesúsñapa' atet otanet:

—Sapa' amaca'ye señoŕeñe ñeñt̃ po'ñočh senamuenen. Aña'yeña senamuenen attoch semueročhtapreterrna saña. Ta'm ¿e'ñete' po'ñočh pocte' senteñ o'ch semueročhterra saña tarro'mar napa' čhocmach na'mueročhtatareterra?

Ñeñt̃ mueročhteñetspa' Jesúsapa' atet toma'ntatanet ñerra'mrrate' atarr pesherr es yorren orran̄tso ñaña atto yapatareñt̃ena e'ñe atet ñerra'mrrate' čho' ya'mtsareterra Yomporecop.

³⁹ Ñetñapa' atet ochet:

—Yapa'čho'ña atetcha'ca'ye yeḗa.

Ñañaapa' alla oterraneterr:

—Ñehua, po'ñočhpa' sa'mueročhtatareterrach saña attescha' ñerra'm na, sa'mtsareterrach saña. ⁴⁰ Tarraña añaña attoch sanorryesuerr nesho necohuenrot̃ ñaña ne'chcoterot̃ allcha' secohuentapreterrna ñeñt̃pa' amaca'ye

naye' semnatenaye. Añcha'ña anorryesuerrets all ñeñt e'ñe o'patatenna Nompör.

⁴¹ Añña po'potantañ pueyochresha' ñeñt çharrasheña allempo e'met ñeñt atet enamuen Jacobo epuet pa'mo'nasheñ Juan, ñetñapa' ama pocteye' eñcheto çha muene' e'moñe'chet.

⁴² Allempoña Jesús pa' alla çhore'terranet allohuenet ñesho ñeñtpa' atet otanet:

—Sapa' señoñe' ñeñt atet pena po'poñ acheñenesha' ñeñt ama judioneshayaye. Ñet ñeñt pa'mcha'tareter penet e'ñech pa'mcha'noçhteñocmañen pomnaren pa'yenan allohuen pueyochresha'chno. ⁴³ Sapa' arepa'chña atteye' sepanna'tatsto e'ñe sommo'cheñoñ. Socoppa' añña poctetsa. Ñerra'm erra'tsenotes atarr amcha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruassets po'potantañecop. ⁴⁴ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen setorrena po'potantañecop ama't ñaña allohuenacop atet ñerra'mrrate' acheñ ñeñt atarr taruassets e'ñe atta. ⁴⁵ Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrrate' napa' atarr amcha'tare't sentenen. Napa' añecopña nehuapa allochñapa' nachña sesherbose'ña sa, ñeñto'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesús pa' a'crraterran pueheñarr aporo'yet ñeñtpa' añ pa'so'cheñ Bartimeo

(Mt. 20.29-34; Lc. 18.35-43)

⁴⁶ Allempoña'pa' o' çha'çha'tet Jericó. Allempo metererr Jericó epuet pueyochresha' ñaña shonte' acheñenesha' e'ñe allpona serreterra'p' allña e'ñe toñetopñopa' ahuepa't anorros pueheñarr aporo'yet ñeñt çhocma enamare'tets quelle. Ñeñtpa' añ pa'so'cheñ Bartimeo ñeñtpa' Timeo puechemer. ⁴⁷ Ñaña'pa' eñotatoset añ huetsa Jesús ñeñt nazareto'marnesha'. Ñeñtña aporo'yetpa' allenta rranare'ch atet otapan Jesús:

—¡Pemueraye'chnomna Jesúsocha' namña! Papa' ñeñte'p Davidna'tare'p.

⁴⁸ Acheñenesha'ñapa' çha muene' che'ptare'tnometña aporo'yetpa' atet otoset:

—O'hua pemma.

Aporo'yetñapa' ello alla rranare'terrerr atet oterrerr:

—¡Pemueraye'chnomnañaca'ye Ayochreshate! Papa' ñeñteþ Davidna'tareþ.

⁴⁹ Jesúsñapa' alla tomos atet otosan acheñenesha':

—Seçhore'chñaca'ye onepa' arr.

Ñetña chore'chet aporo'yetpa' atet ochet:

—Te'pa' choþa cosherrtsa, ñapa' o'ca'ye agotoseþ. Petant-noma e'ñe tayecma.

⁵⁰ E'ñe atet otuetpa' çha tantatsa çha a'meyanmue' allo ca'mañna'tenapa' allenta ahuo' Jesúsesho. ⁵¹ Jesúsñapa' atet otaþ:

—Papa' ¿eso'tña pemnen ñeñtcha' atet neþoseþ?

Aporo'yetñapa' atet och:

—Añca'ye Maestro nemnen o'ch pecuatnomuen attoch o'ch cohuen nenterrapa.

⁵² Jesúsñapa' alla oterrerr:

—Te'pa' ahuerreþ e'ñe peñmañesha' tarro'mar atto atarr peyemtapna na ñeñtca'yeña o' e'ñe a'crraterreþ.

E'ñepa'tcha' allorocma e'ñe cohuen enterra. E'ñe cohuerrt-sapa' çha cota'nmue' ñaña Jesús allenet sen.

11

Allempo çhap Jesús Jerusaléño

(Mt. 21.1-11; Lc. 19.28-40; Jn. 12.12-19)

¹ Atteñapa' o' çhaçha'tet allame'tets Jerusaléño. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé, po'poñpa'çho' allo'tsen anets ñeñtpa' añ pa'so'cheñ Betania. O'ña çhampochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch seçhap a'yenteye' e'ñe allara anetso. Allñapa' allcha' sentos ashen rre'ptor all huanquëñet; ñeñtpa' ama't puesheñarra acheñ amaca'ye monteña'. Ñeñtña ashenpa' o'ch sepyamþospa' o'ch sanerrnan. ³ Ñerra'm esesha' sotapue': "¿Eso'mare't sepyamþenña ashen?" sañapa' atetcha' sotosanet: "Yepartsesharca'ye muenene'ña añ ashen. Mameshapa' o'ch alla apuerrsa'."

⁴ Allempoña ñetpa' allenta ahuanmuet. O'ña çhapuet anet-sopa' all entoset ashen ehuanca'ret e'ñe opellrronita'note'tsen all ten e'ñe toñoñ. Ñetñapa' pueyamþoset.

⁵ Allempoña puesheña'tets ñeñt tomçha'tyets allpa' atet otapanet:

—¿Eso't sottenña arr? ¿Eso'mare'tcha' sepyamþosña ashen?

⁶ Ñetña atet otapanet Jesúsapa' atetçho' otoset. Allempoñapa' atet otarettet:

—Ñeñtepnäpa' sanerca'ye.

⁷ Allempoñäpa' allenta anerretña ashen Jesúsesho. Nohuerret pa'shtam ashnacheñöpa' Jesúsñäpa' allenta monta'nmana ashen. ⁸ Shonte' acheñenesha' ñetñäpa' totma'tyesoñet pa'shtam toño allcha' oñem Jesús. Po'potantañechnoñäpa' tsorrmo're'tyeset tsach pue'mo'rer allo topanetyeset toñ.

⁹ Allohuen acheñenesha' ñeñt otächetsa ñaña ñeñt cota'huanene' chenta' ñetñäpa' puerrannarteñoñetpa' atet atarr cohuentatyeseññañetpa' atet otenet:

—¡Acsherrapo'ch allohuene! ¡Aye'chochtaterrapo'ch Jesús ñeñt llesensen Yompor! ¹⁰ ¡Aye'chochtaterrapo'ch Jesús ñeñtcha' amcha'tarettertsa! Te'pa' o'ca' huerraña yatañ David pa'mcha'taretteña. ¡Aye'chochtaterrapo'ch ñaña Yompor Parets ñeñt pue'ntaño'tsen!

¹¹ Atteñäpa' chap Jesús Jerusaléñöpa' allenta ahuos Parets pa'paclo, all be'tosos, cohua'yesosan ora allohuen ñeñt allo'tsa'yen. Cohua'yesueña'pa' o' cha'nerrpa' ahuo' anetso Betanio allohuen pueyochreshohuen ñeñt çharra' puechena epsheña tarro'mar allempopa' o'ca'ye ellerren.

Allempo Jesúsäpa' eñora higochecop amach eñalletatsto pue'mer

(Mt. 21.18-19)

¹² Tsapañ allempo ona'cha'ta'muenet Betanioñ, Jesúsñäpa' cheporra'nma. ¹³ All oñenet Jesúsñäpa' a'yoteñ entosan higoch ñeñt taya o' asopanre'terr. Ñaña'pa' allenta ponerñya o'ch enteña' ñato' e'mereñte'. O'ña chap allame'tetspa' pasopanrepa'tcha' entosñañ tarro'mar ama çhena' allempo me'ten.

¹⁴ Jesúsña çhepa'tcha' eñorosta higochecop, ñeñt'pa' atet otos: —Ama't errponañäpa' amuepa'ch esesha' tsumuerraye añ higoch pue'mer.

Pueyochresha'ñäpa' e'ñe e'mueñet atet eños higochecop.

Atto Jesúsäpa' a'cohuentatosan Parets pa'paquëll

(Mt. 21.12-17; Lc. 19.45-48; Jn. 2.13-22)

¹⁵ Allempo entuanman Jesús higoch allempoñäpa' o' alla çhacheneterr Jerusaléño. Jesúsñäpa' be'tosuenerr Parets pa'paclo, allñäpa' allentepa'tcha' mueño'tuosan allohuen ñeñt pomatsre'tetsa all ñaña allohuen ñeñt rañta'yetsa. E'ñe cha'nma'cha'tatosanet allot, a'coye'tamñpsosanet po'mesachno allecma camñatyenet po'çllayoret, a'coye'tuosan ñaña allecma anorryen ñeñt pomuene'yepéchno. ¹⁶ Allempo Jesúsäpa' ama't puesheñarroña ama muenaterraneto o'ch es oñmatet all Parets pa'paclo'mar.

¹⁷ Allempoña yeçhatosanetpa' ñäpa' atet otosanet:

—Yompor po'ñoñ ñeñt atet anuaret ahuatoteñ allñapa' atetca'ye oten Yompor: “Añ ñeñt nepaquëll nepenpa' añecpaca'yeña sherben allecmach ma'yochennet ama't allohuen pa'namen acheñenesha'.” Tarraña sañapa' e'ñe atet sepeññañña Yompor pa'paquëll ñerra'mrrate' eñeñ ñeñt e'potyetsa mapueto.

¹⁸ Añña ñeñt pa'mcha'tareternesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret, ñetñapa' allempo atet e'mare'tetpa' Jesúsepa'tcha' atarr o'patet o'ch muetsatachet. Tarraña allempopa' ama errof peto cha mecha'na'chet tarro'mar allohuen acheñenesha'pa' atarrca'ye cosheññañet ñeñt atet yeçhatenanet, nanac cohuen enteñet. ¹⁹ Allempoña o' ellerrenpa' onaçheneterr Jerusaléño'pa' ahuaneneterr Betanio.

Arrpa' atto entuerret higoch o' e'ñe hueya'hua
(Mt. 21.20-22)

²⁰ Tsapaña ahua'ecma alla oñma'mueneterr allo'tsen higoch. Entueneterrpa' o' e'ñe hueya'huenaña higoch e'ñe puerçhohuen. ²¹ Allempoña Pedro allenta yerpana atet eños ellerro Jesús higohecop, ñañaapa' allenta otosan Jesús:

—Maestro, pecua' añ higoch ñeñt potnom ellerro ama't esesha'pa' amach tsumuerrñañeto pue'mer, te'ñapa' o' hueya'hua.

²² Jesúsñapa' atet otnomanet:

—Sapa'cho'ña e'ñeñaca'yeña seyemteraña Yompor. ²³ Po'ñoçca' na te'pa' o'ch notas: Ñerra'm ama çhoye' se'charrtateno seyoçher, ñerra'm po'ñoçh e'ñe seyemteña Yompor, ñachca'yeña atet pene'ña ñerra'm erroten es soten. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspenetecop “Añ aspenetpa' rrote'tepa'ch arroç, arrepachña esha'toso sa'po allcha' chencosa”, aspenetñapa' atetcha'cho' pñonasa. ²⁴ Ama't allohuen erra'tsencha' es senam sema'yocheñoç, ñerra'm çho senam e'ñe seyemteñoçmañen, ñeñtñapa' saga'pcha'. ²⁵ Ñaña te'pa' o'ch notnomues: Ñerra'm sema'yocheñoç çho sañen ñerra'm çho se'moñe'teñ po'psheñeñ çhosach peretnerre' seyoçhro allorocma, allochñapa' Sompom ñeñt ento'tsen peretnerrnascha' samña ñeñt atet sepatse'tyen ñeñt ama pocteye' enteno ña. ²⁶ Tarro'mar ñerra'm ama sepretnannenopa' Sompompa'cho'ña ñeñt ento'tsen amach peretnerrnasaso samña ñeñt atet sepatse'tyen ñeñt ama pocteye' enteno ña.

Atto allsensarettena Jesús
(Mt. 21.23-27; Lc. 20.1-8)

27 Allempoñapa' alla čhača'ta'mueneterr Jerusaléño. Jesúsñapa' all chopeñe'chen Parets pa'paclo. Allñapa' huacha'toña ñaña shonte' añcha'taretnesha' ñeñt pa'mcha'taretnesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'. 28 Ñetñapa' atet otoset Jesús:

—Ñehua, yapa' añecop yehuena yemneñ o'ch potey ¿erroťe't apuenpetña llesens? ¿Esesha'tña p̄apueñe'ña llesens attot p̄orrtayenña ñeñt čhocma attecma pepa'yena?

29 Jesúsñapa' atet otapanet:

—Ñehua, napa'čo'ña nemneñ o'ch na'p̄to'tapas samña ama't patrra ñoñets. Ñerra'm sanaposencha'pa' napa'čo'ña attochña notapas namña alloť apuennetña llesens ñeñto'marña atet nepena. 30 Sapa'čo'ña o'ch sotosen ñeñt atet soctape'chen sa, ahuañmo'cha allempo apate't Juanañ Yomporecop, ñapa' ¿eseshatña llesense' ñato' Yompor amapa' acheñate' apue'ña llesens? Nemnen o'ch sotosen ñeñt atet soctape'chen sa.

31 Ñetñapa' e'ñe a'nahua otanna'tyeset:

—Ta'm erroťcha'ca'ye yochte'. Ñerra'm čha yoch Yomporeshotca'ye apetña llesens, ñapa' čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” 32 Elloña amach yotatsche acheñeshoña apet llesens.

Ñehua, acheñenesha'ñapa' čhate' e'moñe'chet añcha'taretnesha' tarro'mar acheñenesha'pa' e'ñe cohuen eñchete't Juanañ ñeñto'marña čhocma otyeñet ñapa' ñeñtca'yeña po'ñoč a'mtose' Yompor po'ñoñ. 33 Ñeñto'marña añcha'taretnesha'pa' atet ochet Jesús:

—Ta'm yapa' amaca'yeña yeñoteñe; erroťte' huapaña Juanañ, erroťte' apetña ñaña llesens.

Allempoña Jesúsapa' atet oterraneterr:

—Napa'čo'ña te'pa' amach notaso samña alloť apareten namña attot atet nepa'yena.

12

Atet atma'ntatare'ttena ñeñt ataruasañechnopa' ama cohue-nayaye

(Mt. 21.33-46; Lc. 20.9-19)

1 Allempoña Jesúsapa' alla serrpare'taterranerr acheñenesha' toma'nteñtso, ñeñtpa' atet otanet:

—Eñall puesheñarr acheñ ñeñt nare'tanatatnomue' shonte' uvach; pa'muerñapa' e'ñe ora uvachmatatue. E'ñe

concha'tam̄pesue allotñapa' eñan ñaña allcha' a'pecho'toñet uva po'ñer. Allñapa' tomatatnoman torrepo' allotcha' cohuan̄p̄soñet pa'muer. Tomatuepa' na'nman ñeñtcha' taruasatats ñeñtcha' coyerrahuet allpon ñerra'm esempoch toteñet.

'O'ña nare'tanatatuepa' o' ahuo' po'poñ anetso baçhayo. 2 Chap allempo yen uvachllom̄pa' ñaña'p̄a' mueñerran po'psheñeñ pa'taruasañer o'ch enamuerra' uvachllom̄ po'psheñeñ pa'taruasañreneshesho ñeñt̄ cohuan̄pene' uvachma'. 3 Allempoña çhen allpa' enamosan ñeñt̄ allpon o'patena ña, arepa'tcha'ña es apapuenayeña uvachllom̄, elloña ñeñtapa' çha rremapueññañet pa'taruasañerpa' o' nalle'tapueñet, o' alla mueño'teret e'ñe atta. 4 Allempoña ñeñt̄ pamo'mte' pen uvachma'pa' o' alla mueñerranerr po'psheñeñ pa'taruasañer. Allempo çhenerr ñaña allpa' ñapa'çho'ña çha rrolle'tapetpa' o' atserrp̄apueñet poñopa' çha es otnatapueñet. 5 Allempo o' alla mueñerranerr po'psheñeñ pa'taruasañer. Ñeñt̄pa'çho'ña allempo çhenerr ñaña allpa' ñaña'p̄a' çhepa'tcha' muetsapueñet. E'ñe attecma p̄a'yeset po'potantañeçhno—patanta'tetspa' nalle'tapueñet, po'potantañeçhnoñapa' çha amtsanatarettapuenet.

6 'Ñeñt̄ pamo'mte' penetpa' eñallmeñ ñaña puesheñarr ñeñt̄ e'ñe ño puechemer ñeñt̄ atarr morrentena. Allempoñapa' atet̄ ot: "Te'pa' o'ch nemñe all ñeñt̄ e'ñe na nechemer. N̄ato'rraña ñeñt̄pa' mecha'na'tapetcha'." 7 Ñeñt̄pa'çho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet̄ otanna'tyeset: "Añmapa' ñeñt̄ca'yeña puechemer ñeñt̄cha' o'paterraya pompor puenarem̄ esempo. Ñapa'çho'ña te'pa' o'chca'ye yemtsap̄ allochñapa' yachca'yeña e'ñe o'paterrayaña pompor puenarem̄. Te'pa' o'ch ahuey o'ch yemtsap̄ ñaña." 8 Allempoña o' rremapoñet ñaña puechemerpa' o'çho' muetsapet, huapore'teret allot uvachmot. Arrpa' allohua atet̄ toma'ntata Jesús e'ñe ñañaña.

9 Jesúsñapa' atet̄ oterranerr acheñenesha':

—Ñehua, te'pa' o'ch notas, ñeñt̄ pamo'mte' pen ataruasañeçhnopa' ama't seño'teñeña sa atet̄cha' p̄ohuerranet. Ñerra'm esempoch huerranet, pamo'mtayetpa' a'çllatuerranetcha', narmetsma'ñapa' o'ch apuerran po'potantañ.

10 Allempoña Jesúsapa' atet̄ oterraneterr:

—Sapa' ama't ahuatapa' ama'tña selleyareña ñeñt̄ atet̄ anuaret̄ Yompor po'ñoñ ahuatoteñ. Tarro'mar ñeñt̄pa' atet̄ oten nocop, all atma'ntatareten mapue'. Ñeñt̄pa' atet̄ oten:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

11 Ñeñt'pa' Yomporca'yeña atet patene' ñeñto'marña yapa' e'ñe cohuen yenteñ.

12 Ñeñt e'moñe'tene' Jesús ñetñapa' eñoteñet ñeñt'pa' ñetca'ye atma'ntatarettenet, ñeñt'pa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rromuet Jesús e'ñe allorocma tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. Ñeñto'marña ñetñapa' quechpa'huaneret Jesús'pa' ahuanerret.

*Atto a'pto'chet Jesús, pocte'te' o'ch tsa'tet impuesto
(Mt. 22.15-22; Lc. 20.20-26)*

13 Atteñapa' chap allempo po'pocheño e'ñe a'nahua mueñeññañet puesheña'tets fariseonesha' ñesho ñaña puesheña'tets Herodes pueyochresha', tarraña ñetpa' añecpa amñareñtenet attoch e'ñe puehquẽñoñet po'ñoñotetpa' o'ch eñoratset ñeñt ama cohuenayaye. Allochñapa' attotcha'ña otteñe'chet. 14 Ñeñto'marña ñetpa' allempo chapuet ñeshopa' atet otoset:

—Maestrocha' yapa' yeñoteneñ papa' ama peshquẽno ama't mamesha ñaña ñeñt atto peychaten Yompor poctapña ñeñt'pa'cho'ña e'ñe cohuenacma, ama shequẽntsoyaye ama't mamesha. Papa' allohuen acheñpa' e'ñe cohuen pentueñ; ama aña ñapueñ pemorrenteno ñeñt atarr añcha'na'tpo' entyen allohuen acheñenesha'. Ñeñto'marña te'pa' yapa' yemneñ o'ch peñotatapuey erra'tsente'ña e'ñe po'ñoñch cohuentetsa. ¿Pocte'te' penteñña pa' o'ch yetsa'ta impuestos añecop ñeñt añcha'tarettetsa all anetso Romo ñeñt ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha añcha'tareñ romo'marnesha' ñeñt ama judioneshayaye.

15 Jesúsñapa' eñotapanet ñetpa' chaca'ye shecare'teñet, ñaña'pa' atet otapanet:

—Sapa' eso'mare'tña semneñña o'ch seshcare'tosen. Ñehua, ama't atet setpatennoñpa' sorratatca'yeña puetallarr quelle o'ch necue'.

16 Ñetña apetpa' ñaña'pa' atet oterraneterr:

—Ñehua, sapa' o'ch soten, ¿esesha't sentenña ñeñt atma'ntatarettetsaña all? ¿Esesha't pa'so'cheñ aquell-carettetsa all?

Ñetñapa' atet ochet:

—Anícha'taretca'ye atma'ntaretetsaña all, ñoca'yeña pa'so'cheñ ñeñt' aquellcarettetsa all.

¹⁷ Jesúsñapa' alla oterraneterr:

—Ñeñtepñapa' añ poctetsa o'ch yaḡ anícha'taret ñeñt' ño ñeñt' atet poctetsa gobiernocop, tarraña ellonetña ñeñt' Yomporo o'ch yaḡ ñaña ñeñt' atet poctetsa ñocop.

Ñeñtña shequënayeñ atta cohuanrrorteñet tarro'mar Jesúsapa' atarrca'ye cohuen anapuenanet.

Atto a'ḡto'chet Jesús, ñerra'm po'ñochte' atanterrapo' rromot, ta'm, allempopa' errotencia'ña yeperra

(Mt. 22.23-33; Lc. 20.27-40)

¹⁸ Allempoñapa' huacha'toña ñaña patantarr ñeñt' saduceoneshatets. Ñehua, ñeñt' saduceoneshatets ñetñapa' ellonet echenet poctaḡña ñeñto'mar atet otenet amate' errotenot yetanterroña rromot ama't errponaña. Ñetñapa' atet otoset Jesús:

¹⁹ —Maestrocha' ahuat Moisésapa' atet quellconay ñoñets ñeñt' poctetsa ñeñt'cha' atet yeḡa. Ñeñt'pa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñt'cha' puechemer perr pa'mo'nasheñeñ. Ñeñt'pa' atetca'ye quellca'nmonayña Moisés ahuat. ²⁰ Ñehua, te'pa' eñall cancherrsheña ñeñt' e'ñe poctacma pa'mo'nasheñecmuet. Ñeñt' puesheñarr popo'naretpa' o' yoran coyanesha' ñeñt' puetapor ḡa'. E'ñe allponmatatsapa' o' rromaña, yacma ama chemere'tnomo. ²¹ Allempoña ñeñt' po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña ñeñt'pa'cho'ña ama chemere'tnerrerro o' atta rromuerrerr. ²² E'ñe attecma ḡohuet cancherrsheño'maretpa' e'ñe pueyoruarochet ñeñt'ara puesheñarr coyanesha'. E'ñe allohuenetpa' e'ñe attecma pet rromayestset ama't puesheñarroḡetapa' ama chemere'tnomueto. O' rromapesuaña cancherrsheño'mar puerrollaresha'pa' cho' rromatsña ñaña coyanesha'. ²³ Te'ña ñerra'm po'ñochte' yetantena rromotpa' añña coyanesha' allempoñapa' ¿sesha'tcha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

²⁴ Allempoña Jesúsapa' atet oterraneterr:

—Sapa' ñeñto'marca'yeña čha atarr sepanteñ tarro'mar amaca'ye čhennasoña seyočhro ñeñt e'ñe po'ñočh atet yečhateney Yompor po'ñoñ ñeñt atet anuařet ahuatoteñ. Ñaña aña sepantatene' tarro'mar sapa' ama sepoctenñañe Yompor po'huamenc. ²⁵ Tarro'mar esempohuañen allempoch tanterret po'pocheño, allempopa' ama't puesheñarrořeta amach sena'terreto, ama't coyanesha'pa'čho' amach eseshaye' apuerraye ñeñt'cha' yorerrahuet. Tarro'mar allempopa' e'ñech attet ñerra'm Yompor po'millañořeññaneshar ñeñt pue'ntaño'tsa'yen. ²⁶ Sapa' ama'tña selleyareña ñeñt atet quellquë't ahuat Moisés attoch señočh ama't ñeñt o' colla'huapa' ñetñapa' corretseta. Ñehua, all aquellcareř tsachmo'r ñeñt e'ñe ñoña huortets. Alloñaca'yeña Yomporpa' eñorana'tanaña Moisés; ñeñtpa' atetca' oña Yompor allempo: "Napa' ñeñten Po'yomporer pen Abraham ñaña Isaac, ñaña Jacob."

²⁷ Jesúsñapa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma, ñapa' aña'yeña Po'yomporer pene' ačeñ ñeñt corretsach. Attoña Yomporpa' e'ñe allame'tsa entenanet allohuenet ñetñapa' bettetseta. Ñeñto'marca'yeña sapa' atarr sepanteñ.

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñečno ñoñets
(Mt. 22.34-40)

²⁸ Allempoña huapoña ñaña puesheñarr ñeñt etsotene' ñoñets ñeñt atet anareř, ñaña'apa' e'mosan ñeñt atet a'přo'tare'teñet Jesús. Ñaña'apa' e'mosan Jesús e'ñe cohuen anapuenanet. Ñeñto'marña ñapa'čho'ña allenta a'přo'tos, ñeñtpa' atet otos:

—¿Erra'tsena't ñoñtsor ñeñt atet anareř ñeñt atarr sherbets, ñeñt ello metana'tuene' ora allohuen po'poñečno ñoñets ñeñt e'ñe parro attecma anuařet ahuatoteñ?

²⁹ Jesúsñapa' atet otař:

—Ñeñt ñoñtsor ñeñt atarr sherbets ñeñt ello metana'tuene' po'poñečno ñoñetspa' ñeñtpa' atet oten: "Se'mñot israel-neshacha' attoch señočh: Ñeñt Yeyomporer yepenpa' ñapa' e'ñeca'ye patrra ñeñt Yepartseshar yepen. ³⁰ Ñeñto'marña atarrep'a'chña yemorrenteña Yeyomporer ñeñt Yepartseshar yepen e'ñe ora yeyočhrocmañen. Ñaña e'ñe yecamquëñoř yemorreñchach, ñaña yoctařñoñhuen, ama't ñaña e'ñe ora yehuamencohuen." ³¹ Allořpa' po'poñ ñoñets ñeñt atarr sherbets ñeñtpa' atet oten: "Atarrcha' yemorrenteña yamo'ts

e'ñe atet atarr yemorrentena yañeña." Añ epo'mar ñoñetspa' ñeñtca'yeña atarr sherbets, ñeñtña ello metana'tuene'ña po'poñechno ñoñets ñeñt atet anaret.

³² Allempoña ñeñt etsotene' ñoñets ñeñt atet anaret, ñaña'apa' atet otterranerr Jesús:

—Maestrocha' p'apa' e'ñeca'ye po'ño'ch atet p'oten. Po'ño'ch Yomporpa' e'ñeca'ye patrira ama eñalleña po'poñ Yeyomporer patrira'ye. ³³ Ñerra'm choch yemorrenteña Yompor e'ñe yeyo'chrocmañen e'ñe yeñoteñohuen, ñaña e'ñe yecamquëño'f yemorreñchach e'ñe yehuamencohuen ñaña ñerra'm atarr yemorrenteña ñaña yamo'ts e'ñe atet atarr yemorrentena yañeña, ñeñtca'yeña atarr nanac sherbets. Elloca'yeña metana'tuenan allohuen po'poñechno ama't ayarra'chno ñeñt yemtsayen Yomporecop, ama't ñaña allohuen ñeñt yachamuen allo yesherbeñ Yompor.

³⁴ Jesúsña'apa' atet eñch ñapa' atarr eñotenan ñeñt atarr sherbets Yomporecop, ñeñto'marña atet otererr:

—Papa' amaca'ye atarr atonaye' pepallteno attoch e'ñe p'agaphuerrñañ Yompor po'cohuenña atto ayochreshattena ña.

Allempoña'apa' ama't puesheñarrotetapa' ama eseshaye' a'p'to'tenaye' enterrayeña Jesús.

Atto Cristo ñeñt Po'partseshar pe't David, elloña'apa' o' alla po'm'reneñ per

(Mt. 22.41-46; Lc. 20.41-44)

³⁵ Allempoña Jesús'apa' alla ye'chaterraneterr all Parets pa'paclo. Ñeñt'apa' atet otterraneterr:

—Ñeñt atarr etsotayenayeñ ñoñets ñeñt atet anaret, ñetpa' eso'marte'ña otyenet ñeñtcha' Cristotosets ñapa' aña po'm'reneñ pene' David tarro'mar ñeñtcha' Cristoterrets ama aña po'm'reneñ pene' David tarro'mar ñapa' Po'partseshare'ñaña pe't David. ³⁶ Tarro'mar ama't Davidpa' allempo eñorache't Parets Puecamquëñ, allempopa' atetca'ye eñose'tña añecop ñeñtcha' Cristoterrets:

Yompor Parets atet otennan ñeñt Nepartseshar nepen na (ñeñtara ñeñtcha' Cristoterrets): "Te'pa' o'ch p'anorruerr arr necohuenrot allcha' pecohuentapreterrna. Attochña ama't ñeñt pe'moñe'tene' napa' o'ch name'ñatuerranet allochña'apa' o'ch atet perret ñeñt pemnen p'a."

³⁷ Ñeñt'apa' atetca'ye ote'tña David, ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoteñeña Cristo ñeñt Po'partseshar pe't Davidpa' ñeñtña te'pa' o' alla po'm'reneñ per ñaña.

Ñeñto'marña Jesús allempo yeçhatenan shonte' acheñenesha' ñetpa' e'ñe pocsheñesha' e'mñoteñet.

Atto Jesús'pa' a'metare'tenan ñeñt etsotayenayeñ ñoñets ñeñt atet anaref, ñeñt atet yeçhenet ñetpa' ñeñtpa' ama cohuenaye' entapretenaneto Yompor

(Mt. 23.1-36; Lc. 11.37-54; 20.45-47)

³⁸ All yeçhaterraneterr ñeñtpa' atet oterranneterr:

—Amach semeñe'tapretatsche ommoñañenesha' poçtaþña ñeñtareta ñeñtet atarr etsotayenayeñ ñoñets ñeñt atet anaref. Tarro'mar ñetpa' añe'naña atarr cohuen entenet o'ch chorrenet atarrom shetamuets o'ch atfa yorma'tatse'tenet pa'shtam. Ñaña pommo'cheñoçetpa' atarrcha' mueneñet o'ch e'ñe puenñcha'na'teñoç e'ñech cohuen huomñcha'tenanet acheñenesha' all chopeñe'chyenet. ³⁹ Ñaña ñetpa' añe'nach atarr muenenet o'ch anorrcha'tyenet judionesha' po'prahuo allecma anorryen ñeñt atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet. ⁴⁰ Tarraña ñetñapa' rretorrnanesha'naña puerratañpesyenetña pa'paquell. Elloña e'ñe pommo'cheñoçetpa' aña atarr muenenet o'ch atet penet ñerra'mrrate' ñetpa' atarr cohuen acheñret ñeñto'marña arr ma'yochyenet all shontena acheñenesha'pa' amach tematenayaya ma'yocheneto. Ñeñto'marña te' napa' o'ch notas ñeñt atet petsa pommo'cheñoç elloña atarrcha' a'coñcha'tare'tterret.

Atto rretorrnanesha' ñeñt atarr huocchañetets ñapa'çho'ña nosan quelle ñeñt Yomporcop

(Lc. 21.1-4)

⁴¹ Allempo Jesús'pa' alla anen a'yenteye' allecma na'yenet quelle Parets pa'paclo. Allñapa' shonte' entenan acheñenesha' ñeñt na'yene' quelle Partsocop, shonte' eçllayoretenesha' ñeñt na'yene' shonte' po'çllayor Partsocop. ⁴² Jesúsña allpa' atfa cohuenanet, huapa ñaña puesheñarr rretorrnanesha' ñeñt atarr huocchañetets. Ñapa'çho'ña nosan eptallatoll quellayetoll ñeñt cobretall, ñeñt quellayerpa' ama tsa'teno, ama es sherbeno. ⁴³ Allempoña Jesús'pa' agotan pueyochresha'pa' atet otanet:

—Te'pa' o'ch notas, añ rretorrnaneshar ama't atarr huocchaña' ñapa' po'ñoçhca'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet. ⁴⁴ Tarro'mar allohuenet ñeñt na'yenet quellepa' añaca'ye na'yenet ñeñt a'pcha'tyenet, ñaña'pa' ama't atarr huocchaña' e'ñe pomhuahuospan allohuen ñeñt

echyen ñeñt muenatenaneñ attoch yoran alloch correna arr patsro.

13

Atto Jesús pa' eñotatanet e'ñech a'mata'taretetuerra Partsopo' (Mt. 24.1-2; Lc. 21.5-6)

¹ Allempo cha'nerrerr Jesús Parets pa'pacllot puesheñarrña pueyochresha'pa' atet och:

—Maestro, pecuaye'ch, atarruaca' cochnesha'te' mapyet ñeñt allo orratyenet Partsopo', atarr cochnesha'chnote' Parets pa'paclechno.

² Jesúsñapa' atet och:

—Ama't sentyeñ te' ñeñt atarr cochneshare' pocolechno tarraña esempopa' cherrcha' allempoch e'ñe a'mata'taretetuerra. Ama't e'ñe puenñarra mapyetpa' amach a'puerña all allo orratenet Partsopo'.

Atto Jesús pa' eñotatanet shonte'ch entyerret pa'namen ñeñtcha' eñotaterahueta o' cherrmoch allempoch mellapoterra (Mt. 24.3-28; Lc. 21.7-24; 17.22-24)

³ Allempoña ahuenerr Olivopnopa' anorruenerr all, e'ñe alla yot Parets pa'pacllot. Allempo anen all e'ñe ñaptochayet allpa' aña epuet Pedro ñaña Jacobo ñaña Juan ñaña Andrés. Ñetñapa' atet oteñet:

⁴ —Te'pa' yemneñ o'ch potey, ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ño'chpa' o'ch cherrmoch allempoch e'ñe etsotuerra ñeñt atet poteny te'?

⁵ Jesúsñapa' atet otanet:

—E'ñech señoterra allochñapa' amach esesha' seshquërraye.

⁶ Tarro'mar shonte'ch orrterrtsa ñeñtcha' aycha'nataterre' neso'cheñ, ñeñtcha' otyerrets: “Napa' ñeñtencia'yeyña Cristotets.” Ñetñapa' shonte'ch shequëret acheñenesha'.

⁷ 'Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora erraparen anetso'mar. Saña allempopa' amach cha seyorenatsto ama't e'ñe mamesha. Ñeñtpa' atetcha'ca'ye e'ñe po'ño'ch perra. Tarraña allempopa' amach chena' allempoch e'ñe mellapoterra. ⁸ Pa'namen acheñ ñeñt e'ñe po'poñe'ttsoema mereñtsoret pa' ñetpa' quellaranna'terretcha'. Ñaña pa'namen anetsot añicha'taretechnopa' quellaraterrancha' pueyochrenesha'chno. Pella'yerrach pats ora erraparen. Orrterrach allemeñ muecheñets o'ch e'ñe chaporrñatsotyerr erraparen. Orrterrach ñaña atpare'teñtsochno attochña

atarrcha' ama'toçhtatanna'terret. Ñeñt' atet' o' notuas te'pa' ñeñtña allempopa' ñeñtcha'ña ñanom mueroçhtaterrahuetña allempo.

9 'Sapa' seño'tach allempoch atet' perrset. Sanmare'terrach añcha'tare'tesho allcha' otteñe'cherrset. Sashtare'terrach all judionesha' po'prahuo'mar. E'ñe same'ñeño'ten na sapa' çapaterrsetcha' añcha'tare'tneshesho'mar ñaña allo'tsa'yen ñeñt' nanac añcha'tare'tnesho'; sapa' allcha' sa'metosnanña neñoñ. 10 Ñaña allempoch ama mellapoterra'pa' añ cohuen ñoñets alloch sequeshperra ñeñtcha' ñanom serrpare'tatyeretña allohuen pa'namen acheñenesha' ora errañaren allohuanen añe patsro. 11 Ñaña allempoch sanmare'tetyesa allcha' otteñe'cherrset ama't mameshapa' amach çha sellca'psatsto, amach sota'psa'tatsto erro'tuachca'ye notoste' añcha'tare'tesho allempoch a'p'to'tare'tapuen. Allempopa' añcha'ña se'ñorato'se' Parets Puecamquëñ. Attochña amach e'ñe sotaye' se'ñoroso, añcha'ña se'ñorato'se' Parets Puecamquëñ. 12 Allempoch atet' perrsetpa' ñeñt' e'ñe semo'nasheñ sepen ñato' ñeñt'achca'ye sepomuere' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' pa'tparño'tpa' o'paterranach pamo'mte' attoch muetsatater. 13 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr mueroçhtaterrsetpa' tarraña esesha'ch e'ñe ahuantahuanmue' e'ñe pueyemteño'ten na, ñeñtcha'ña a'queshpatare'ttertsa.

14 'Ñehua, ahua't Daniel ñeñt' a'mtaye't Yompor po'ñoñ, ña po'quellcopa' atet' ote't: "Cherrcha' allempo ama't ñeñt' ama masosyaye' enteno Yomporpa' ñeñtña'pa' çherrcha' all ama't ñeñt' e'ñe Partsocpa anareteñ. Ñeñt'pa' ñeñt'achca'yeña e'ñe a'chenca'tuerrahuet." Ñehua, ñeñtcha' lleyerre' añ ñoñetspa' ñetña'pa' eñoteretepa'ch. Ñeñto'marña ñerra'm esempoch senter o' çherr all ñeñt' ama pocteyaye allempoña ñeñt' allpon Judeo'tsa'yen ñetña'pa' allorocmuepa'ch yettra'terret, ahuanerretepa'ña aspen'tareronet. 15 Atet' ñerra'mrrate' puesheña'tets ñato' ñetña allempopa' eno'tsa'yenetcha' pa'pacllato, ñetña'pa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet. 16 Ñaña puesheña'tets ñeñt' pa'mro'tsenpa' allempoña ñetpa' amachña onatsterreto attoch erreta' pa'shtamuet. 17 Allempopa' atarrcha' llequëñets añecop ñeñt' a'chomenare' coyanesha' ñaña ñeñt' allohuen emaretetollesha'çhno.

(Tarrow'mar ñocpuetpa' atarr torrapo' attoch yetrra'tet ñamet.)
 18 Ñaña Yomporcha'ña sema'yocha allochñapa' amach
 cha huapoto allempoch seyeta. 19 Allempopa' orrterrach
 muerochteñets ñeñtcha' atarr muerochtaterre' allohuen
 acheñenesha'. Ñeñt ama't ahuatapa' ama puemuerochtareto
 atet atarr nanac huomenc, ama't allempoteñ e'ñe errte'
 ye'chcatyene' Yompor allohuen pa'namen ñeñt yentyen arr
 patsro. Allempoña ellopa' amach atet alla muerochterrete'te
 ama't errponaña. 20 Allempoch atarr amuerochtataretterret.
 Tarraña allempoña Yomporpa' ñach oterrets "te'pa'
 allohuach." Ñerra'm amach oto allohuachpa' allempoña
 ama't puesheñarrapa' amach esesha' qeshperrtso. Tarraña
 ñeñtña ame'ñenaya ña ñeñt acrenpa' ñocpuetñapa' oterrrcha'
 "te'pa' allohuach."

21 Ñehua, allempoch orameñ muerochteñetspa' ñerra'm
 esesha' sote': "Secueña', arro'tsenca'yeña Cristo", amapa'
 o'ch otaset: "Secueña' tarro'tsenca'ye Cristo", sañapa'
 amach same'ñatstaneto. 22 Orretyerrachca'ye ñeñtcha'
 otyerrets ñapa' ño'ña Cristotets. Tarraña ñeñtpa' attachca'ye
 shecare'tyerranña acheñenesha'. Orretyerrach ñaña
 ñeñtcha' otyerrets ñapa' ño'ña a'mtene'ña Yompor po'ñoñ,
 tarraña ñeñtpa'cho'ña e'ñech attecma shecare'tyerran
 acheñenesha', amachña Yomporeye'ña po'ñoñ a'mteno.
 Ñeñtcha' atet shecare'tyerrets, ñetñapa' orrtatyerretcha'
 ñeñt ama't ahuata acheñenesha'pa' ama puentare, attochña
 cohuanrrortateretña acheñenesha'. Ama't ñeñt Yompor
 pa'crarnesharpa' mueneñetañcha' ñeñte'nachña shequërrer.
 23 Señoche'pa'ch ama't ama chena' muerochteñetsopopa' na
 allohuenpa' o' e'ñe notuas.

Atetcha' perra allempoch huerra Cristo ñeñt Acheñetsosets
 (Mt. 24.29-35, 42-44; Lc. 21.25-36)

24 'O'chña huañerr ñeñt muerochteñetspa' allempoñapa'
 choch mayerrets ñaña atsne'. Arrorrrpa'cho'ña o'huañcha'
 atsnom. 25 Rantochnopa'cho'ña shorcha'terrcha' entot. Ñaña
 ñeñt huomenc orra'yetsa ento te' allempoña ama't ñeñtpa'
 pella'yerrach. 26 Allempoñapa' entapuerrnetcha' na Ñeñten
 Acheñetsosets o'ch nesuanperra oso't e'ñe nepartsoteñohuen
 e'ñe necohuenteñesha'. 27 Nemñercha' nemillaño'teñaneshar,
 ñetñapa' a'yapa'cha'hueretcha' allenmateñ ñeñt acren Nompor
 nocop e'ñech pa'tatssheno'tmarohuen allotecma orrnotena.
 E'ñech allenmateñpa' a'yapa'cha'hueretcha' e'ñe allohuanen añ
 patsrot.

28 Ñaña te'pa' señoche'pa'ch ñeñt atet pena higo'ch. Ñehua,
 esempoch senteñ higo'ch o'ch emchachyen pueta'cretollesha'

allotcha' o'ch alla tapna'tyerrerr pasopaner, sañapa' ñeññaña señotatene'ña o' çhenmoch allempoch huorateterrerr. ²⁹ Attecmach perra ñerra'm esempoch sentyerr ñaña ñeññ allpono' notuas, sapa' ñeññcha'ña señotaterre' po'ñoçh o'ca'ye çherrmoch allempoch e'ñe etsotuerria, o'ca'ye e'ñe allame'ttsamerra. ³⁰ Napa' po'ñoçh o'ch notas, acheñenesha' ñeññ e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añeçhno. ³¹ Eempohuañen añ enet ñeññ senten te'pa' e'ñech chenca'huerra; patspa'çho'ña attecmach perra e'ñech chenca'huerra. Tarraña ñaña neñoña'pa' amach chenquerro ama't e'ñe ahuata.

³² 'Tarraña ñeññ yetroch nohuerrapa' ñeññña'pa' ama eseshaye' eñotenaye. Ama't erro'tsente' atsne' ama't erro'tsen tsapro ñeññpa' ama't mellañoñeñnesha' ñeññ pue'ntañ'o'tsa'yen ñetpa'çho'ña ama't puesheñarrofetapa' amaña eseshaye'ña eñotenaye allempoch nohuerrerr po'pocheño. Ama't na ñeññten Yompor Puechemeren napa'çho'ña te'pa' ama neñoteñe, ñaptaña Nompor Parets eñotene'.

³³ 'Sapa' seño'tach ñaña çhocmach seño'srtenna ñaña çhocmach sema'yochena tarro'mar sapa' amaña seño'teñe esempoch çherr ñeññeñpo allempoch nohuerra. ³⁴ Ñeññpa' e'ñe atet ñerra'mrrate' puesheñarr yacma ñerra'm esempo ta ñachayopa' o'ch na'nman pa'taruasañreçhno pa'paclo ñeññcha' apa'yenom taruas e'ñe puesheña'ttsocmuet. Ñaña po'poñ pa'taruasañer ñeññcha' cohuet yetarroñ ñapa' atetcha' otnom pamo'mte': "Papa' çhocmach peño'sretna."

³⁵ Ñeño'marña te'pa' o'ch notas: Chocmuepa'ch seño'srtenna na ñeññten Samo'mte' sepen ñeññten sena'nmue' na nepaclo tarro'mar sapa'çho'ña ama seño'tenno esempoch nohuerra. Ñato' ellerronetcha' nohuena, ñato' rroçh tsapo, ñato' puetarenmoch allempo eñen atollop, amapa' ñato' aromtañach nohuena. ³⁶ O'ch alla noterrerr: Chocmuepa'ch seño'srterrna, ñerra'm machayota nohuerrapa' ñato'rraña alla nentuerres sapa' cha atarr semanren. ³⁷ Ñeññ atet notenes sa ñeññpa' allohuenacpasca'ye, ñeño'marña o'ch alla noterrerr: Chocmuepa'ch seño'srterrna allohuenes.

14

*Atto atarr o'pateñet Jesús o'ch muetsatateret
(Mt. 26.1-5; Lc. 22.1-2; Jn. 11.45-53)*

¹ Epomtameñ palltena o'ch alla çherrerr pascuapo allempoch rrerranerr judionesha' pan ñeññ ama anareteyaye

chase'. Ñeñña pa'mcha'tareternesha' pen allohuen judionesha' po'cornaneshar epuet ñaña ñeñt etsotayenayeñ ñoñets ñeñt atet anaret, ñetñapa' aña atarr e'nenet attoch shequët Jesús e'ñe a'nahua esheccha' rremuetpa' o'ch muetsatachet.

² Ñetñapa' otanna'tyenet:

—Tarraña te' pascuapo allempo shontena acheñesha'pa' amachca'ye yerrmatsche allañaca'yeña cha ya'tsrre'moçhtateñ acheñenesha'.

Atto puesheñarr coyanesha'pa' shosan eñmosať Jesús poño
(Mt. 26.6-13; Jn. 12.1-8)

³ Pamtarrña Jesús pa' Betanio'tsen all Simón pa'paclo, ñeñña Simónpa' ñeñt ose't puetsarñats. Jesúsñapa' all anen all rrallme'chen. Allñapa' huapoña puesheñarr coyanesha', huapatan eñmosať ñeñtpa' e'ñe ñeñtoche' ñeñt otenet nardo puese' ñeñt ama matsa'to. Huapatam̄pes puetellm̄o ñeñña puetellem̄pa' añ socheñet alabastro. Allempoña ñeñt coyanesharpa' potam̄psosan eñmosať; ñeñña eñmosaťpa' alla she' Jesús poño all rrallme'chen. ⁴ Puesheña'tetsñapa' ñeñña cha atsrre'matanet, atet otanna'tyeset:

—Eso'mare'tña atta a'pertatosanña eñmosať. ⁵ Ñeñt eñmosaťerpa' amaca'ye matsa'to. Chochña'cho' pomoseñpa' ganañcha' shonte' quelle chachca'ye metananeñña ñeñt trescientos denario. Allempoñapa' apa'yesaneñcha' ñaña allohuen huocchañnesha'çhno.

Ñeñtpa' atet sasare'chet coyanesha'.

⁶ Allempoña Jesús pa' atet otanet:

—Semnachñaca'yeña coyanesha' ñeñt atet penen. Eso'mare'tcha' cha muene' satsrre'moçhtana'ta'pa. Ñapa' atarrca'ye cohuen p̄osen. ⁷ Tarraña ama'tcha' cho pomosaneñ eñmosať alloch es apa'yesaneñ huocchañnesha'çhno, tarraña chocmachca'ye eñallña huocchañnesha'çhno arr patsro. Ñerra'm esempo semneñ o'ch e'ñe cohuen sorrtatyesanet ñocpuet chocmach atet sepanet. Tarraña nañapa' po'ñoçhpa' amachca'ye allo'na sentenno arr patsro. ⁸ Añ coyanesharpa' aña'ye apuenen ñeñt allpon echyen. Ñeñt atto shosnan te' eñmosať nechtso, ñeñtpa' añe'cpa'naca'ye sherben tarremphua allempoch a'yana'terrnaneterr ñeñtcha' epuet pampa'pesnet. ⁹ Po'ñoçhca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpuenet.

Atto Judas pa' pomuerran Jesús
(Mt. 26.14-16; Lc. 22.3-6)

10 Allempoña pueyochresha' ñeñt' čharra' puechetsa epsheña, puesheñarrña ñeñt' pa'so'cheñ Judas Iscariote, ñaña'pa' allenta ahuo' allo'tsa'yen ñeñt' pa'm'cha'tareternesha' pa'yen allohuen judionesha' po'cornaneshar. Ñaña'pa' añecpa sen attoch pomataterran Jesús. 11 Ñeñt'ña atarr coshatenahuet. Ñetña'pa' allempocma a'pochtachet čhochca'ye tsa'chetña Judas allpon quelle. Allempoña ñapa' aña e'ñe cotape'chyen errotentcha' pomuerranña Jesús.

Atto Jesús'pa' rrallme'chatnenan pueyochresha' attoch čhocmach yerpueret ñeñt' yoten te' Santa Cena

(Mt. 26.17-29; Lc. 22.7-23; Jn. 13.21-30; 1Co. 11.23-26)

12 Allempoña čhapa'muen ñeñt' yetñatsro allempoch rrerretter pan ñeñt' ama anareteyaye chase' allempoch muetserretter ñaña carrnero; ñeñt'pa' pascuapo. Chapa'muen ñeñt' yeterpa' pueyochresha'ñapa' atet ota'mueñet Jesús:

—Te'pa' ¿erra't pemneñ allcha' yeta'muena allcha' ya'potonap' ñeñt'cha' perra' pascuapo?

13 Allempoña ñeñt' epsheña pueyochresha' ñeñt'cha' mueña, Jesúsñapa' atet otapanet:

—Te'pa' o'ch ahua'muenes anetso allcha' sepocte' puesheñarr yacma ñeñt' anmanpene' oñ porrtó. Ñeñt'ña acheñerpa' o'ch socta'ner. 14 Allcha' be'tosuerr allcha'ña sebe'tosos saña. Allña'pa' atet'cha' sotos ñeñt' apaclatesha': "Yemaestrorpa' atet' otene' atet'cha' yotosep': '¿Erro'tsena'tña pecuarto allcha' nerrallme'chos pascuapo epan neyochresha'?" " 15 Ñeñt' apaclatesha'pa' gatapascha' eno po'cuarto ñeñt' atarr a'yohuen e'ñe cohuen a'paret. Allcha'ña sañño'tosña ñeñt'cha' yerra' pascuapo.

16 Allempo atet' otuanet Jesús'pa' pueyochresha'ñapa' atet'cho' pet, čha ahuanmatset. O'ña čha'čha'tet anetso, e'ñe atet' otapanetpa' ñetña'pa' e'ñe'cho' atet' entoset. Allña añño'tosñañetña rreñets allcha' rrallme'chet ñeñte pascuapo.

17 Allempoña o'puenaso'tenpa' o'čhap ñaña Jesús all epuet pueyochresha' ñeñt' čharrasheña puechena epsheña. 18 All anorrčhenet all rrallme'choset, Jesúsñapa' atet' otanet:

—Po'ño'chca' notenes: Puesheñarrotes sa ñeñtescha'ca'ye nepomuerré'. E'ñe puesheñarr ñeñt' e'ñe parro nerren ñeñt'cha'ca'yeña nepomuerré'.

19 Ñetña'pa' čha atarr lleca'rrtet. A'p'to'tyeset e'ñe puesheña'ttset:

—Ta'm amate' na nepomuerrmochape.

20 Ñaña'pa' atet' oterraneterr:

—E'ñe puesheñarrotes ñeñtes çharrasheñas sepchena epsheña ñeñña netsapechapretene' nerrar, ñeñtcha'ca'ye nepomataterre'.²¹ Po'ñoçhca'ye te'pa' allo'na sen etsotnomtsa ñeñ atet anuaret Yompor po'ñoñ nocop na Ñeñten Acheñetosets; attotcha' muetsaterrnet. Tarraña nocoppa' e'ñe pocte'; añña po'ñoçh acheñer ñeñtcha' nepomuere' ñocopñapa' atarr llequëñets. Añ acheñrecoppa' e'ñeca'ye pocten amachñaço' eñalletatstañe.

²² All rrallme'chenet, Jesúsñapa' chetan pan parasyoso'tan Yompor. Parasyoso'tuepa' shota'tan panpa' apa'yesan pueyochresha'. Ñeñtpa' atet otanet:

—Sagapyes, añmapa' ñeñtcha'ña nechets sepen.

²³ Allotñapa' chetan ñaña orramets parasyoso'tuerrrrpa' apa'yerraneterr. Ñetña allohuenetpa' e'ñe orryesuahuet.²⁴ Jesúsñapa' atet otarraneterr:

—Añpa' nerrasca'ye sepeñ ñeñtcha' ashatarettatsa shonte' acheñeneshacop. Añ nerraspa' alloch e'ñe etserra a'pocatterra acheñenasha' Apuesho. ²⁵ Na te'pa' o'ch notas: Amach alla norrerre'te añ narmetsos tayoteñ tarrempohuach allempoch alla ello yorrerrerr parro allempoch añcha'taretetuerra Yompor.

Atto Jesúsapa' eñotatan Pedro ñapa' çhocmach a'nasocha (Mt. 26.30-35; Lc. 22.31-34; Jn. 13.36-38)

²⁶ Allempoña o' morrechuanmuet Yomporecoppa' ahuaneneterr Olivopno. ²⁷ Allñapa' atet otosanet Jesús:

—Añ tsaprocmach sa allohuenespa' sa'ypo'ña' huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: “O'ch nemtsater ñeñt cohuanpene' carrnero, po'carrnerorñapa' çhach matrra'tyesa allemeñ.”

²⁸ Jesúsñapa' atet otarraneterr:

—Tarraña esempoch alla netanterra napa' nanomcha' otertsa Galileo.

²⁹ Allempoña Pedropa' atet och:

—Ama't allohuenet ñerra'm a'ypo'ña' huerrpetcha'pa' naña ama't ahua'apa' amach na'ypo'ñerpe.

³⁰ Jesúsñapa' atet otererr:

—Po'ñoçhca'ye o'ch notaþ, añe tsaprocmach ama't e'ñe epocha amach eñena' atollop þaña'pa' o'ch ma'poch þa'nasotenna.

³¹ Pedroñapa' alla otererr:

—Ama'tcha' yerromhuanen parropa' naña po'ñoçhpa' ama't parrocha amach na'nasotaþo.

Allohuen pueyochresha'pa' ñetpa'çho'ña e'ñe attecma otyenetañ ñamet.

*Atto Jesús'pa' ma'yochuena all oteñet Getsemaní**(Mt. 26.36-46; Lc. 22.39-46)*

³² Alloñapa' chap Jesús pueyochreshohuen all narmetsño, ñeñtpa' añ pa'so'cheñ Getsemaní. Allñapa' otosanet:

—Te' sapa' allach sanorrcha'tos arrma, napa' o'ch nema'yochena'.

³³ Allñapa' aña anmos Pedro ñaña Jacobo ñaña Juan. Jesúsñapa' ama't mameshapa' ama eñmateno pueyoçhro, cha nanac allpatena. ³⁴ Allempoñapa' atet otosanet:

—Napa' cha chepoçhnen nellquëña neyoçhro, cha muene' nerromuen nellquëñoť. Sapa' allasa'tach arr secuapretosno'tach.

³⁵⁻³⁶ Ñaña' ahuo' a'yenteye' all rremosa patso atet ma'yochosa:

—Apa, pçocoppa' ama eñalle ñeñť ama erroten apen penteno; ñeñťo'mar te'pa' notenep amach pemnatatsche o'ch çhapona ñeñť atarr amueroçhtatañ* nenten na. Tarraña ñerra'm pçach muenatspa' añepa'chña atet pepaton ñeñť pemnen pa, amachña añeyaye ñeñť nemnen na.

³⁷ O'ña atet ma'yochuapa' o' ahuerr allo'tsa'yen pueyochresha' ma'psheña. O' çherr allpa' alla entuerranet ñetñapa' cha atarr manrrenet. Allempoñapa' otuerran Pedro:

—Cha't Simóna atarr pemos. Ama't mamesha are'tña acue-naye' penteno. ³⁸ E'ñe seño'se'rteño'pa' choña sema'yochosa allochñapa' attoch amach sañeña a'puerrataterro topateñets ñeñťcha' sehuapoya atarr huomenc. Ñeñťpa' ama't atarr semneñeñ tarraña sechetsñapa' amaca'ye ahua mencateye' penso, ñeñťo'marña notenes çhocmach sema'yochena.

³⁹ Jesúsñapa' alla ahuerrerr puepocheño o'ch ma'yocherrerr, ñeñťara atet otuerrerr. ⁴⁰ O'ña alla ma'yochuerra'pa' allempoñapa' huerrerr, alla entuerranerr pueyochresha' ñetñapa' o' alla manrretererr, cha nanac atserr moñe'tenet. Ama eñoteñeto errotencha'ña otapuereteť. ⁴¹ Jesúsñapa' alla ahuerrerr ma'yochatsa. O'ña ma'yochuerra'pa' allempoñapa' alla huerrerr poma'pocheño'hua, atet otuerranerr pueyochresha':

—Ama't teme'ttsenpa' alla't semanrren; ama'tpa' alla sames. Te'pa' ñeñťepa'ta, señoche'pa'ch o' çhap allempoch pomataterret na Ñeñten Acheñetosets attotcha' errotuane perren ñeñť atarr ochña'tenesha'. ⁴² Te'ñapa' setanterra o'ch ahuey o'ch yepocte'. Secue'ca'ye ñeñťcha' nepomue' ñeñťpa' alla'tsena.

* **14:35-36** Ñeñť amueroçhtatañ ñeñťpa' po'ñoçh ñeñťpa' añ atma'ntataret ñerra'mrrate' ñeñť atarr pesherr yorren orranťsoť.

*Allempo rromoset Jesús**(Mt. 26.47-56; Lc. 22.47-53; Jn. 18.2-11)*

⁴³ All atet eñorena Jesús pa' čha huapatsa puesheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñaña pa' huacha'tatan shonte' acheñenesha' occhelletareret ñaña etsachperetareret. Ñehua, añ ñeñt huacha'ttsapa' añ mueñenahuet ñeñt pa'mcha'tareternesha' pen allohuen judionesha' po'cornaneshar ñaña ñeñt etsotayenayeñ ñoñets ñeñt atet anaret ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rromuenaya' Jesús. ⁴⁴ Ñehua, Judas ñeñtcha' pomuerre' Jesús pa' ñaña pa' atet otnoman acheñenesha' ñeñt anom attoch cheme'toset Jesús. Ñeñt pa' atet otnomanet:

—Erra'tsencha' nehuomcha'tos e'ñe netso'ttsapa'teño'tpa' ñeñtca'yeña Jesús. Sañapa' ñeñtcha'ña serrmospa' o'ch sanem e'ñe sehuamencocma.

⁴⁵ Allempoña huapapa' čha ponmosaya Jesús huomcha'tos e'ñe puetso'ttsapa'teñesha', atet otos:

—Tsapo, Maestrocha'.

⁴⁶ Allempoña acheñenesha' pa' ponmosyet Jesús pa' rromoset e'ñe po'huamencocma.

⁴⁷ Allempoña puesheñarr ñeñt Jesús pueyochresha' ñaña pa' po'cchella cheta'pa' o'ch čhonto'tapanen cornesha' pueñañra puetepa'tcha' tsorroñ. Ñeñt pa' año pueñañra ñeñt pa'mcha'tareter pen allohuen judionesha' po'cornaneshar.

⁴⁸ Allempoña Jesús pa' atet otan acheñenesha':

—Eso'mare't sehuacha'tennanaña e'ñe occhelletareroches ñaña etsachperetareroches attoch serrma'n. Napa' ¿e'ñe't atet sentenen ñerra'mrrate' eñeten? ⁴⁹ O' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaña serrma'ne'te. Ama'tpa' attepa'ca'ye perra allochñapa' attoch e'ñe etsotuerra ñeñt allpon quellca'yese't nocop ñeñt a'mta'yese't Yompor po'ñoñ.

⁵⁰ Allempoña allohuen pueyochresha' pa' allorocma a'ypo'ña' huanmet, ñetñapa' yetrra'tuet.

Atto a'yetachet puesheñarr huepuesha' allempo muene' rromuetañ ñaña

⁵¹ Ñehua, allempopa' allo'tsen ñaña puesheñarr huepueshachor ñeñt epuet ta Jesús. Ñaña pa' čha muelle'mquën atta epamco'tnoma. Ñapa'cho'ña ahuo'ch rremuetañ pa' ⁵² ñaña a'meyampereta' allo epamco'tena, huepueshachorñapa' muelle'mco'ta a'yetachet.

Allempo chapata'mueñet Jesús all apcha'muena allohuen judionesha' pa'mcha'tareternesha' ñeñt a'pocatyene' ñoñets
(Mt. 26.57-68; Lc. 22.54-55, 63-71; Jn. 18.12-14, 19-24)

53 Acheñenesha'ña ñeñt rromose' Jesús pa' ñetña pa' arr anmet allo'tsen ñeñt pa'mcha'tareter pen allohuen judionesha' po'cornaneshar. Allña pa' all apcha ñaña ama't allohuen cornaneshachno ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñaña allohuen ñeñt atarr etsotayenayeñ ñoñets ñeñt atet anaret judioneshacop. Ñetña allohuenet e'ñe all apchenet. 54 Pedropa' ñapa'cho'ña cote' tarraña ñapa' chenta' en a'yoť. Cornesha' po'pampopa' allña pa' anorros epuet ñeñt guardianesha' all a'torenet tso' all shotoset parro.

55-56 Cornaneshachno ñeñt pa'mcha'tareternesha' ñaña allohuen ñeñt chocma a'pocatyene' allohuen ñoñets ñeñt judioneshacop, ñetña pa' aña atarr e'nenet ñeñtcha' a'metare'tam̄psose' Jesús allochña pa' attoch muetsatachet. Ama't shonte' huapatsañ ñeñtcha' toma'tam̄psosayeñ pa' amcha'taretnesha'ña ama't puesheñarroťetapa' ama eseshaye' entayeña attoch muetsatateret tarro'mar allohuenet ñeñt toma'tam̄psosayeñ pa' ama e'ñe attecma ye' otosetoña Jesúsocop. 57 Allempoña tomcha'tos ñaña po'potantañ; ñetpa'cho'ña toma'tam̄psoset Jesús; ñetña pa' atet otoset:

58 —Ya ahuaña pa' ye'me'tca'yeña Jesús atetca'ye ote't: "Napa' o'chca'ye na'materrñañ añ Parets pa'paquell ñeñt pa' acheñaca'ye pueye'chcatar; tarraña poma'pamtañoña pa' napa' o'chca'ye alla natomater po'poñ ñeñt pa' amachca'ye añeyaye ñeñt ye'chcaten acheñ."

59 Tarraña ama't atet toma'tam̄pesyesosetaña pa' ama e'ñe attecma ye' otoseto.

60 Allempoña cornesha' ñeñt nanac amcha'taret allenta tompa' atet otan Jesús:

—Paña pa' ¿ama'tcha'ña panapaneto? ¿Erroťenote'tña oteñe'chenpet?

61 Jesúsña pa' ama eñoreno, ama anapuenaneto. Allempoña cornesha' pa' alla otererr:

—Te'pa' o'ch notañ, nemneñ o'ch p̄oten p̄apa' ¿p̄a'tña ñeñte'p̄te' Cristotosets? ¿Ñeñte'p̄te' Parets Puechemerep̄, ñeñt Parets chocma ya'ye'cho'chtateññañ?

62 Jesúsña pa' atet och:

—Napa' ñeñtenca'ye. Elloña napa' o'chca'ye notas, senterrencha' na Ñeñten Acheñetosets o'chca'ye alla nanorruerr

Parets po'cohuenroŧ. Ñaña po'pocheño o'ch sentapuerren o'ch nesuanŧperra osot Yompor pue'ntañõ.

⁶³ Cornesha'ñapa' ñeñña e'mpa' allenta rrrarre'tan pa'shtam e'ñe patsrre'mueñoŧ, ñeñŧpa' atet ot:

—Te'pa' amachca'ye ye'natsche po'psheñeñ ñeñŧcha' a'metanŧpose'. ⁶⁴ Te' ama't sapa' o'ca'ye se'm atet achmare'tenan Yompor. ¿Erroñena't senteñña sa?

Ñetña allohuenetpa' atet otyeset:

—Ña po'ñoçhpa' atarrca'ye nanac achmare'tenan Yompor, pocte'ñaçho'te'pa' o'ch semtsatach.

⁶⁵ Allempoñapa' a'coshare'tyeset, huancacalle'chet pa'clloyotpa' çhota'tyeset. Pachmare'teñoŧet atet otyeñet:

—Te'ña eñoratenperrepa' Parets allochñapa' attoch ÷otey ese-sha'te'ña peçhota'tyene'.

Ama't guardianesha' ñetpa'çho'ña o'çhota'chet.

Atto Pedropa' a'nasotana Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedroña allempopa' patsoŧe'tsen pampaŧollo. Allempoña allpa' huapa puesheñarr coyanesha' ñeñŧ sherbene' cornesha'. ⁶⁷ Ñañaapa' entosan Pedro all shotenana tso'. Co-huana'tospa' atet och:

—Paca'ye e'ñe coŧaye'ñña Jesús ñeñŧ nazareto'marnesha'.

⁶⁸ Pedroña anapue'pa' çha a'nasochapa' atet och:

—Napa' amaca'ye nentareña, ama't napa' amaca'ye neñoteñeña ñeñŧ atet ÷otenen.

Allempoña Pedropa' ahuerr, çherr allotecma be'tenet o'ch çhapuet o'pono pampo. Allempoña allenta eñen atollop.

⁶⁹ Allñaapa' entuererr coyanesha' ñeñŧ cornesha' pueñaña. Ñañaapa' atet oterranerr ñeñŧ parro allo'tsa'yenet:

—Añ acheñerpa' ñeñŧca'ye e'ñe parro yemtenet ahuaña.

⁷⁰ Pedroñaapa' alla a'nasotererr. O'ña o'çhterrerrpa' ñeñŧ tomçha'tyets all, ñetpa'çho'ña atet otereterr:

—Po'ñoçhca'ye ÷apa'çho'ña e'ñeca'ye parro seyemtena tarro'mar ÷apa'çho'ña galileo'marnesha'ca'ye ñeñŧo'mar e'ñe atet peñen ñerra'm ña.

⁷¹ Allempoña Pedropa' e'ñe puehquëñoŧanetpa' atta otatse'tyerraneterr, ñeñŧpa' atet otanet:

—Napa' e'ñe Yompor pa'so'çhño notenes, ñerra'm amate' po'ñoçhoye' notensopa' te'pa' nerromuepa'. Napa' po'ñoçhca'ye ama nentareña añ yacmar.

⁷² O'ña atet otuanetpa' e'ñepa'tcha' allempocma puepocheño eñeñña atollop. Allempoña Pedropa' alla yerpuerrana ñeñŧ atet oteñ Jesús: “Ama't e'ñe epocha

amach eñena' atollop ðañapa' o'ch ma'poch ða'nasotenna." Allempoña Pedropa' allenta atarr yahuena huomenc.

15

Allempo çhapata'mueñet Jesús allo'tsen amcha'taret Pilato (Mt. 27.1-2, 11-14; Lc. 23.1-5; Jn. 18.28-38)

¹ Tsapañ o' taya puetarenpa' ñeñña pa'mcha'tareternesha' pen allohuen judionesha' po'cornaneshar ñetña pa' apcha'mueneterr parro epuet ñeñt pompornesha' pen allohuen judionesha' ñaña añ ñeñt atarr etsotayenayeñ ñoñets ñeñt atet anaret epuet ñaña po'potantañ ñeñt po'taruas pene' o'ch a'pocatan ñoñets judioneshacop. Ñetña pa' cotape'chatannetset, attoña o' e'ñe a'pocata'mueñet atetcha' ða'mueñet Jesús. Jesúsña pa' o' huancota'tuet allempoña pa' anma'mueñet allo'tsen amcha'taret Pilato (ñeñt nen gobierno' Romoñ ñeñt amcha'tarettetsa allo'marneshacop).

² Pilatoña a'p'to'tapan Jesús pa' atet och:

—Papa' ¿pa'tña amcha'tarettetsaña judioneshacop?

Jesúsña pa' atet och:

—Napa' ñeñtenca'ye atet p'toten.

³ Ñeñt pa'mcha'tareternesha' pen allohuen judionesha' po'cornaneshar, ñetña allpa' shonte' pa'namenot otteñe'cha'mueñet Jesús. ⁴ Pilatoña pa' atet otererr:

—Papa' ¿are'tcha'ña ðanapaneto? ¿Ama't pe'muenanetoña ñetpa' pa'namenot a'metare'tampenpet?

⁵ Jesúsña pa' ama't e'ñe parrocha ama anapuenaneto. Ñeñto'marña Pilatopa' cha atarr cohuana'tapan Jesús.

Atto amcha'taret Pilatopa' otanet, ama'tpa' çhosa muetse'ña Jesús

(Mt. 27.15-31; Lc. 23.13-25; Jn. 18.38-19.16)

⁶ Ñehua, ñetpa' atetca'ye yeçhenet. E'ñe pate'tets char allempoch çherrerr pascuapo, ñeñña amcha'taret ñeñt nen gobierno' Romo'tpa' ñaña pa' çhocmach a'rroyerran puesheñarr judioneshacop ñeñt ayottam'psarettetsa allempo, ñeñtara ñeñt pamo'ts penet ñet. O'ch apanet erra'tsencho' enamuenet ñeñt muenenet ñet. Ñeñt pa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'. ⁷ Ñaña e'ñe allempopa' allo'tsen puesheñarr judionesha' ñeñt ayottam'psarettetsa ñeñt pa' añ pa'so'cheñ Barrabás. Ñehua, ñeñt Barrabás ahuañmo'çoteñ yottam'peñet epuet po'potantañ tarro'mar ñetpa' ñetca'ye yeçhatenetña acheñenesha' atpare'chetepa'to' amcha'taret ñeñt nen gobierno' Romoñ. E'ñe patpare'teñoñet

o' muetset ñaña acheñ. ⁸ Allempoña acheñenesha'pa' čhača'tet Pilateshopa' ñetñapa' atet otoset:

—Te'pa' o'ch pa'rroyernay puesheñarr ñeñt atet čhocma peperrnaye't.

⁹ Pilatoñapa' atet otapanet:

—Sapa' ¿añe'tña semnen o'ch na'rroyernas ñeñt amča'tarettetsa judioneshacop?

¹⁰ Ñehua, Pilatopa' atet otapan acheñenesha' tarro'mar ñapa' eñotenan cornaneshachno pa'mča'tareternesha'pa' ñetpa' e'ñeca'ye pue'moñe'tateñme'čatsa pomueñetña Jesús.

¹¹ Tarraña ñeñt pa'mča'tareternesha' pen judionesha' po'cornaneshar ñetñapa' aña atarr cotape'chatenet acheñenesha' attoch ñetpa' allohuenetpa' o'ch ochet Pilato: "Añcha' pa'rroyernay Barrabás." ¹² Allempoña Pilatopa' alla oterraneterr:

—Ñehua, añ ñeñt soten judionesha' pa'mča'tareter, ñapa' ¿errofe'tcha'ña nepe'?

¹³ Ñetña puerranare'teñoťetpa' atet otyeset:

—Ñapa' ¡pecorso'tam̄psachñaca'ye!

¹⁴ Pilatoñapa' atet oterraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe'?

Ñetñapa' alla rrannarterreterr huomencpa' atet oterreterr:

—Ñapa' ¡čhořañaca'yeña corso'tam̄psate'!

¹⁵ Pilatoñapa' añ atarr muenen o'ch coshatan acheñenesha' ñeñto'marña a'rroyerranet Barrabás ñeñt enamueñet. Allempoña ashtatan ñaña Jesús alloťñapa' otan po'solltarneshar:

—Te'pa' o'ch secorso'tam̄peña'.

¹⁶ Ñehua, solltarnesha'ña ama aneñeta' allcha' corso'tam̄psoset arrña ñanom anmetña Jesús amča'tareťepahuo. Allña agotachet allohuen po'potantañ solltarnesha' ñeñt allo'tsa'yen o'ch e'ñe apčhet Jesúsesho.

¹⁷ Allñapa' pa'llocchame'teñoťet Jesús chorrachet shetamuets tsamamueno' quelluemamtena ñeñt pa'shtam pen ñeñt po'ñoč amča'tarettetsa. Pellta'toñet ñaña choyo'mets agrečhpa' ñeñtña choyo'mtachet ñeñt atet choyo'mtena ñeñt po'ñoč amča'tarettetsa. ¹⁸ Pachm̄are'teñoťetpa' atet oteñet:

—¡Puetare' amča'tareťecha' atarruaca' cohuenepťe'! pa ñeñteř judionesha' pa'mča'tareťereř.

¹⁹ Pueche'tatseteñoťet asto'tame'teñet tsachpo poño, a'coshare'teñet, allempoña concorpana'teñet, ottenetañ ñerra'mrate' čho' muechatse'teñet. ²⁰ O'ña achm̄are'tuahuetpa' allempoñapa' rrotam̄peret shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tam̄peñeta'.

*Atto corso'tam̄psoset Jesús**(Mt. 27.32-44; Lc. 23.26-43; Jn. 19.17-27)*

21 E'ñe ahuanmatsetpa' allña oñenetpa' o' poctet puesheñarr yacma ñeñt̄ cireneo'marnesha' ñeñt̄pa' añ pa'so'cheñ Simón ñeñt̄ errte' huerrtsa a'yoť. Ñaña'pa' allenta chechatnomet po'corsoch. Ñeñt̄ña Simónpa' ñeñt̄pa' añ pompor pen Alejandro ñaña Rufo.

22 Chapachet all socheñet Gólgota ñeñt̄ yoten yeñoño Poñetallep̄no. 23 O' chapachet allpa' Jesús'pa' aposetañ vinos ñeñt̄pa' añ atsetaret pueretso ñeñt̄ atarr pesherr ñeñt̄ otenet mirra tarraña Jesús'pa' ama mueno o'ch orr. 24 Allempoña o' corso'tam̄pesuetpa' solltarnesha'ñapa' allenta yellsheñe'chatoñet pa'shtam po'suertot̄ attoch orrtet e'ñe puesheña'ttsetpa' o'ch yorayesñañet pa'shtam puema'tets.

25 O'ña enome'ta'muen atsne' allempoca'ye corso'tam̄psa'mueñetña Jesús. 26 Ñehua, poñoťpa' all corsocho all noñet tsachtall aquellcareť attochña eñoteñet ñeñtecop corso'tam̄peñet. Ñeñt̄ña quellecpa' atet oten: "Añpa' ñeñt̄ca'yeña judionesha' pa'm̄cha'tareter." 27 Allña corso'tam̄pset epuet ñaña epsheña eñet̄, puesheñarrpa' nosñañet po'cohuenrot̄, po'psheñeñña'pa' nosñañet pue'chcoterot̄. 28 Attoca'yeña etsoterraña Yompor po'ñoñ ñeñt̄ atet anuaret̄ ahuatoteñ Cristocop; ñeñt̄pa' atetca'ye oten: "Ñapa'cho'ña e'ñech attecma enteret ñerra'mrrate' ñeñt̄ atet p̄atse'tyene' ñeñt̄ ama pocteyaye."

29 Ñeñt̄ña oñmachets allpa' ñetpa'cho'ña chocma achm̄are'tneñet. Pachm̄arñoťetpa' coño'coñtana'tyesneñet, ñeñt̄pa' atet otyesneñet:

—Pa ñeñtep̄ pommo'cheñoťpa' p̄otatse'te't̄ p̄o'ch a'materrayeñ Parets pa'paquell, poma'pamtañocmo'ch alla p̄atomatereñ, 30 te'ñapa' p̄a'queshp̄aterrañaca'ye e'ñe p̄añeña, pesuerrañaca'yeña tayecma corsochoť.

31 E'ñe attecma achm̄are'teñ, ñaña ñeñt̄ pa'm̄cha'tareternesha' pen judionesha' po'cornaneshar ñaña ñeñt̄ etsotayenayeñ ñoñets ñeñt̄ atet anaret̄. Ñetña'pa' e'ñe parrocm̄a pachm̄are'teñoťpa' atet otatse'tyeñet:

—Te'ña p̄apa' o' p̄a'queshp̄atyes po'potantañ, p̄aña'pa' eso'mare'tcha'ña te'pa' ama errotenot̄ p̄a'queshp̄aterroña e'ñe p̄añeña.

32 E'ñe pachm̄are'teñoťetpa' atet otyereterr:

—Papa' ñeñtepo'ca'ye Cristotostañ, ñeñtepo'ca'ye israelnesha' pa'm̄cha'tareterpeñ, pesuerrañaca'ye corsochoť allochña'pa' attoch yame'ña'pa' yaña.

E'ñe attecma pe' ñaña eñeñ ñeñt epuet corso'tampeñet, ñetpa'cho'ña atarr es otnare'chet alloṭ po'corsochoṭ.

Atto rroma Jesús all po'corsocho

(Mt. 27.45-56; Lc. 23.44-49; Jn. 19.28-30; Heb. 9.11-14)

³³ O'ña chap poctopa' o'huañ atsnom o' e'ñe checmetua ora errañaren añe patsro, o'ña ellerrotenmochapa' o' alla puetarerr. ³⁴ Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Eloi, Eloi, lama sabactani. Ñeñtña ñoñtsorpa' atet oten: Eso'maruachñaca'ye Neyompor-recha' pa'ypo'ñerren.

³⁵ Puesheña'tetsña ñeñt tomchets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—Se'mueñe't o' cha chore'tante' Elías ñeñt a'mtaye't ahuat Parets po'ñoñ.

³⁶ Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachpopa' allo'tña tsotso'tatosanña Jesús. Ñaña'pa' atet otanet:

—Te'pa' o'ch yecue' Elías ñato'rraña o'ch huapapa' ñach a'suatose'.

³⁷ Allempoña Jesús'pa' o' alla rranerrerr huomencpa' rroma.

³⁸ Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. ³⁹ Capitánña ñeñt romo'marnesha'pa' ñeñt tets allame'tets ñaña'pa' e'ñe entenan Jesús atto rroma, allempoña ñapa' atet ot:

—Po'ñochuaca'ye añ acheñerpa' Partsepa'tca'ye Puechemer.

⁴⁰⁻⁴¹ Allo'tsa'yen ñaña shonte' coyaneshačno, ñetñapa' a'yota cohuanrrortenet. Ñetpa' ñetca'yeña cota'huanmue'ña Jesús Galileoteñ ñeñt sherba'yesaye't. Ñeñtpa' María Magdalena ñaña po'psheñeñ María ñeñt Jacobo pachor ñaña José. Ñehua, ñeñt Jacobopa' puechoyomer peñ José. Allo'tsa'yen ñaña shonte' po'potantañ coyaneshačno ñeñt cota'yesaye't Jesús Jerusaléño.

Atto pampuet Jesús

(Mt. 27.57-61; Lc. 23.50-56; Jn. 19.38-42)

⁴² Atteñapa' o' ellerren. Ñehua, ñeñt yetñatsropa' allempoca'ye chocma añño'tena judionesha' ñeñt tsapatēcop allempoch ameserreterr. ⁴³ Ñeñto'marña allempopa' Joséña ñeñt arimateo'marnesha'pa' ñaña'pa' ama puencha'ñofoye' ahuoso Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. Ñehua, ñeñt Josépa' atarr cohuen acheñ, atarr añcha'na'tpo' enteñ allohuen ñeñt

parro a'pocatenet ñeñt llequëna allohuen judionesha'. Ñapa'cho'ña ñeñt atarr cohueñe' Yompor esempohuañencha' o'ch atarr ayochreshatterra. ⁴⁴ Allempo atet enamosan Pilato, Pilatoñapa' atet ot:

—Ta'm ¿po'ñoçhte' o' rromaña e'ñe mamecma?

Allempoñapa' agotan solltar po'cañtanerpa' a'p'to'ch:

—¿Po'ñoçha't o' rromaña Jesús?

⁴⁵ Capitánñapa' atet otos:

—Po'ñoçhca'ye o'ca'ye rroma.

Pilatoñapa' atet otan José:

—Ñeñtepñapa' p'a'suater corsocho'tpa' p'annerca'ye.

⁴⁶ Joséñapa' allenta rañtosana emarr shetamuets, çherr corsochopa' a'suaterranña Jesús corsocho't all rromuen. E'patse'ch shetamtso ñeñt e'ñe cohuen. Allempoñapa' aneñ allcha' pampueña'. All eñatenan mapuetpon allca'yeña nenana'ña Jesús. Allempoñapa' attome'tuerrñañ mapue' allo yottam'pesner ñeñt puepampuer p'ach. ⁴⁷ All cohueñ María Magdalena ñaña po'psheñeñ María, José pachor. Ñetñapa' e'ñe enteñet all na'neret Jesús.

16

Atto tanterra Jesús

(Mt. 28.1-10; Lc. 24.1-12; Jn. 20.1-10)

¹ O'ña huañ yet allempo amesenet, María Magdalena ñaña Salomé ñaña po'psheñeñ María ñeñt Jacobo pachor, ñetñapa' rañta'yesnenet eñmosañ ñeñtcha' anma'muenet tsapat Jesús puepampuro alloch a'yana'tereta' ama't rromota.

² Tsapat allempo motta'muena yetñats temenc ñetñapa' e'ñe ahuañecma ahuanma'muenet Jesús puepampuro. O' taya huapa'muena atsne'pa' allempo ahuanma'muenet. ³ Ñetñapa' otanna'tyesnomuet:

—Ta', esesha'ch a'rrote'te'ña mapue' añecmuen ñeñt allo yottam'peñet attoch yebe'tos all puepampuro esheccha' ya'yana'tera' eñmosañ.

⁴ Ñetña çapatseta all, cohuostseta entoset mapue' o' a'rrote'tarettena a'yenet, ama't ñeñt mapue'pa' añecmuen.

⁵ Ñetña allempo be'tososet puepampuro allñapa' all entoset puesheñarr huepuesha' all anen po'cohuenrot. Pa'shtamñapa' atarr huallama't, cha torats p' Janet pueyoçhret. ⁶ Ñeñtña mellañoñeñerpa' atet otapanet:

—Amach çha seyorenatsto. Napa' neñotenes aña'ye semen o'ch senta'mueñ Jesús ñeñt otenet nazareto'marnesha' ñeñt o' corso'tamperret. Tarraña ña te' o'ca'ye tanterra, ama arro'tsenaro. Secueña'ca'ye all neretañ, amaca'ye eñalle.

⁷ Allempoña mellañoñeñña' alla oterraneterr:

—Te'pa' o'ch ahuerres o'ch sotuer Pedro ñaña po'potantañ pueyochresha', Jesús oten o'ch ota o'ch ahuer Galileo. Choscha'ña ahuanmatsa samia allochñapa' allcha' senter ñeñ atet otase't ahuaña.

⁸ Allempoña coyaneshachno atet otaretet all Jesús puepampro, ñetña cha'nmacherretpa' matenacma ahuanerret po'yorñoñetpa' cha yonshema'tyesnerret. Poñchañofet ama't e'ñe eseshapa' ama errotenaye' otenaye' entnerreto.

Allempo tanterra Jesúsapa' añ ñanom orrterra María Magdalena

(Jn. 20.11-18)

⁹ Ñehua, ahuatecma tanterra Jesús añe yetro allempo motta'muenerr yetñats temenc. Allempo tanterrapa' añ ñanom orrterra María Magdalena. Ñeñña Mariapa' cancherrsheña oneñet ñeñt chorraye't Jesúsñapa' e'ñe quechpatamñsatuer. ¹⁰ Mariañaapa' allenta ahua' o'ch otenana' ñeñt epuet yemte't Jesús all puellqueñoñet atarr yahuanrrortenet. ¹¹ Ñetña allempo e'mare'chet o' tanterra Jesús, Mariapa' o'ca'ye enter, ñetñapa' arepa'tcha' ame'ñyeto.

Allempo Jesúsapa' orrterrana ñaña epsheña pueyochresha'
(Lc. 24.13-35)

¹² Po'pocheño Jesúsapa' e'ñe po'poñoñ orrterrana epsheña pueyochresha' allempo chopeñe'chnenet allampaño'mar. ¹³ Ñetñapa' allenta puerrerret o'ch otueret po'potantañ, arepa'tcha'ña ame'ñaretapuerreto ñeñt atet enteret ñamet Jesús.

Atto Jesúsapa' otnerran pueyochreshachno ñetpa' atetcha' pa'yerret

(Mt. 28.16-20; Lc. 24.36-49; Jn. 20.19-23)

¹⁴ Po'pocheño Jesúsapa' alla orrterrannerr pueyochresha' charrasheña ñeñt puechetsa paterr all rrallme'chenet. Ñañaapa' atet cotape'chatuenanetpa' atet otuenanet:

—Sapa' eso'mare'tña ama same'ñeñoña po'potantañ ñeñt sotene' napa' o'ca'ye netanterra tarro'mar ñetpa' choca'ye enternnet. Tarraña sapa' amaca'ye es sechenoyo seyo'chro.

¹⁵ Allempoña Jesúsapa' atet oterraneterr:

—Te'pa' o'ch auyeses ora errañaren allohuanen añ patser, seserrpare'tach allohuen acheñenasha' añ cohuen ñoñets alloch a'queshpataretterret. ¹⁶ Allohuen ama't erra'tsena ñeñtcha' ame'ñerraya añ cohuen ñoñets ñaña ñeñt pame'ñeñoñetpa' apataretterretcha' ñetñapa' a'queshpataretterretcha'. Tarraña ñeñtcha' ama ame'ñerrtso,

ñetñapa' amñare'tterrach coñcheñtso. ¹⁷Ñeñtcha' name'ñerraya ñocpuetpa' norrtaterranetcha' nepartsoña. E'ñe na neso'chñoch quechpatyesetcha' oneñe'techno, ñaña eñosyesetcha' po'poñe'ttsocma ñoñtso. ¹⁸Ñaña ñerra'm e'ñe pototet chetetcha' shecheþ, tarraña amach erroť þaneto; ñaña ama'tcha' añ orret ñeñt amsañtetsa tarraña amach erroť þaneto. Ñaña ñerra'm esempoch a'þlla'yeñet atsñañeť, atsñañeťñapa' acrrerroche'ch.

Allempo a'terr Jesús pue'ntaño

(Lc. 24.50-53)

¹⁹O'ña atet otuanerranet Partsesha' Jesúsþa' allenta a'tapater Pompor pue'ntaño, allñapa' anorrueñ e'ñe Pompor po'cohuenroť, all partsotapretuera. ²⁰Pueyochresha'ñapa' ahuanomyeset, serrpare'tyesnomuet erraþaren. Partsesha' Jesúsþa' chocma torrapretenanet, orrtatenanet po'partsoña attoch acheñenesha' e'ñech eñotenanet ñeñt atet serrpare'tyenet, ñeñtþa' e'ñe po'ñoch Parets po'ñoñ. Ñeñtþa' attetepa'ch Nompore. Allohua.

COHUEN ÑOÑETS ÑEÑT QUELLCA' SAN LUCAS

Ñehua, añpa' ñeñtca'yeyña e'ñe pa'moter penña serrparñats

1-4 Masheñe Teófilo, p̄apa' peñoteñ ahuañmo'chapa' pa'namen esocmañen ñeñt atet etsotayese't Jesús acheñeneshesho ñeñt e'ñe ñanom ame'ñaya ña, ama't teme'ttsen yocpa'naña ñeñtey o' yame'ñera yaña. Ñaña allempoteñ Jesús pa' orrtana pa'namen acheñenesha' ñeñt entyesaye't e'ñe allame'tets. Ñetñapa' e'ñe entuoñete't allohuen ñeñt atet p̄a'yese't. Ñetñapa' serrpare'tyesete't atet oten Yompor po'ñoñ. Attoña eñotaterretña yaña. Ñeñt atet eñotatyenet ñetpa' shonte' acheñenesha' quellca'yese'tañ ñeñt atet p̄osa Cristo allempo huapa. Ñeñto'marña napa'cho'ña e'ñe pocte' nenteñ o'ch nequellconap̄ e'ñe ora allpon ñeñt atet orrtatos Jesús, tarro'mar napa' ahuañmo'choteñ atarr noctape'cheñ o'ch e'ñe neñoche errotenete'ña ñeñt e'ñe po'ñoche atet p̄a'yese't Jesús. Ñeñto'marña te' arrpa' o'ch e'ñe neñotap̄ ora allpon ñeñt o' etsotua allochñapa' attoch e'ñe peñotuer p̄aña ñeñt allpon ye'chatenpetpa' ñeñtpa' e'ñe po'ñoche atet. Ñehua, arrpa' atet o' etsotua.

Ñehua, te'pa' o'ch neserrpare'tatap̄ atto mellaño'teñpa' eñotatanet o'ch eñalleta Juan ñeñtcha' apatañtatsa Yomporecop

5 Ahuat allempo añ am̄cha'tarettatse't Herodes all anetso Judeo, eñall ñaña puesheñarr ñeñt judionesha' po'corneshar. Ñeñtpa' añ pa'so'cheñ Zacarías ñeñt chocma yemtenana po'potantañ cornaneshachno ñeñt otenet Abíasona'tar ñeñt torratse't Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshap̄nor ñeñt po'mreñeñ pen Aarón ñeñt corneshatatse't ahuat. 6 Ñetña epsheño'maretpa' Yomporñapa' e'ñe pocte' entenanet ñeñt atet penet ñet, e'ñe cohuen etsotueññañet ora po'ñoñ ñeñt atet anaret ahuatoteñ acheñeneshacop ñeñtcha' atet pohuenet. Ñeñto'marña ama't puesheñarrapa' amach erroteno't otaretteto, "ama pocteyaye ñeñt atet sepena." 7 Ñetpa' ama eñalleto ama't puesheñarra pacñe'ter tarro'mar Elisabetpa' ama achoyore'tañeyaye. Ama't ñaña puerrollar epsheño'maret o' atta po'nme'tuenet.

8-9 Atteñapa' chap allempo torrena allohuen cornaneshachno ñeñt epuet parro yemtena Zacarías atto corneshatenet Yomporecop. Ñehua, allempopa'

allohuen ñeñt corneshatitse't Yomporecop, ñetñapa' añ yeçhete't ahuo'ch yellsheñe'chenet allohuenet attoch eñochet po'suertot erra'tsencha' puesheñarrer ñeñtcha' be'tosets Yompor pa'paclo allcha' a'crratan ñeñtcha' eñmosa'ttatsa Yomporecop. Allempoña pamtarrpa' añ orrtatsa Zacarías ñeñtcha' be'tosets Yompor pa'paclo allcha' a'crratan ñeñtcha' eñmosa'ttatsa Yomporecop. ¹⁰ Ñehua, allempo çhap allempoch be'tosos puesheñarr Yompor pa'paclo shonte' acheñenesha' ñetñapa' allach tomçha'tet a'yo't allcha' ma'yochrra'toset. Ama't allempo be'tosos Zacaríaspa' atterach ma'yochrra'tet a'yo't. ¹¹ Ñehua, Zacarías allempo sherbenan Yompor o'pono, allñapa' machayotepa'tcha' orrtoña Yompor po'mllañoñeñer. Arr tomos altar po'cohuenrot, ñeñt altarpa' allecma a'crratenet ñeñt eñmosa'ttetsa Yomporecop, ñeñtpa' atto sherbete't Yompor. ¹² Allempo orrtoña mellañoñeñ, Zacaríasñapa' atarr yoren, atarr nanac mecha'ch. ¹³ Mellañoñeññapa' atet otosan Zacarías:

—Zacarías, amach peyorenatsto tarro'mar Yomporpa' e'muennañ ñeñt atet penamueñ pema'yocheño't. Ñeñto'marña te' petapor Elisabetpa' eñalletaterrancha' paterr asheñorr ñeñt e'ñe po' pechemer, ñeñtñapa' pesochcha' Juan. ¹⁴ Papa' atarrcha' p'ocshena nanac. Shonte'ch acheñenesha' ñeñtcha' nanac p'ocshapretaya atto o' eñalleta pechemer. ¹⁵ Ñapa' atarrcha' asherben enteñ Yompor. Ñapa' amach orrarña'teyaye, ama't vinosapa' amach orreñe. Ama't ña'ma pa'namen ñeñt aposa'tpotetsapa' amach orreñe ama't mamesha. Ñapa' e'ñech añ chorraya Parets Puecamquëñ. Ama't allempoteñ pachor pa'to'tsen ñapa' e'ñech chorreña Parets Puecamquëñ.

¹⁶ Allempoña mellañoñeñpa' alla otererr:

—Ñapa' cohuencha' cotape'chaterran shonte' israe-lena'tarnesha' allochñapa' attoch cotape'cherret e'ñe cohuen Yomporecop ñeñtcha' Po'partseshar perret. ¹⁷ Ñeñtña Juanpa' ñeñtcha'ña ñanom orrtatsa Yomporecop. Ñapa' añcha' ahua'menca't pene' Yompor Puecamquëñ atet pe't ahua't Elías ñeñt a'mtaye't Yompor po'ñoñ. Allochñapa' attoch e'ñe cohuen amo'tstaterrana achemereteçhno puechemerasha'. Allochñapa' ama't ñeñt atpare'tetsapa' o'ch ame'ñaterranet ñeñt e'ñe pocte' es pets. Attochña cotape'chaterranet cohuen, allochñapa' attoch agapueret Partsesha' ñerra'm esempoch orrta.

¹⁸ Zacaríasñapa' ahuo' a'pto'tan mellañoñeñ, ahuo' och:

—Ta', ¿errotēnochña neñoch e'ñete' po'ñoch o'ch eñalleta cheshatoll? Tarro'mar napa' o' nepo'nme'ten; netaporpa'cho'ña e'ñe attecmay o' atarr yepo'nme'tuen.

¹⁹ Mellañoñeñapa' alla otererr:

—Napa' ñeñten Gabrielelets ñeñten sherbene' Yompor. Napa' ña nellsensene' attoch ne'ñorana'taḡa o'ch neñotataḡañ cohuen ñoñets. ²⁰ Tarraña ḡapa' ama ḡame'ñenno ñeñt atet noteneḡ, ñeñto'marña te' ḡapa' o'ch ḡo'panat, amach eshec pe'ñorero tayoteñ tarrempohuach allempoch eñalleta pechemer, allempochña pe'ñorerra. Tarro'mar po'ñoch et-soterrach ñeñt atet o' notuaḡ o'ch ḡhap allempo onañchareḡ. Arrpa' allohua ñeñt atet ot mellañoñeñ.

²¹ Atto' ellapes Zacarías o'ponopa' acheñenesha'ñapa' cohueñet a'yot ama ḡha'nerro. Atto' cohueñetpa' otanna'tet:

—¿Eso'marte' amo' ḡha'nerroña Yompor pa'pacloḡ?

²² Allempoña ḡha'nerrpa' ama eshcaye' eñorana'tuerraneto. Ñetñapa' otyenet pueyoḡhreto, ñato' ḡhoḡe' es orrtoya Yomporecop ñeñto'marte'ña atarr ellapes o'pono Yompor pa'paclo. Ñañaapa' ama eshcaye' eñorana'tuerraneto, potota eñotatuerranet ñeñt atet ent Yompor pa'paclo.

²³ Allempoña o' ḡhap allponmat ñeñt atto sherbenet Yompor pa'paclo, Zacaríasñapa' o' ahuer pa'paclo. ²⁴ E'ñe allponmatatsapa' o' aḡhomenta puetapor. Allempoteñña Elisabetpa' ama mueno o'ch orrterra acheñeneshesho. Ama't o' amnarmña arrorrpa' ñañaapa' ama orrteno. Ñañaapa' atet oten:

²⁵ —Te'ñapa' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyenet mueḡhopeno'.

Atto mellañoñeñapa' eñotatanet o'ch eñalleta Jesús

²⁶ Allempoña o' pechapña arrorr aḡhomenta Elisabet, Yomporñapa' o' alla mueñerranerr po'mllañoñeñer ñeñtara Gabriel. Arr mueñe anetso Nazareto ñeñtara Galilea. ²⁷ Allempoña ḡhap Nazareto, allñapa' orrtosana puesheñarr shopshesha' ñeñt ama a'ḡllareteyaye. Ñehua, ñeñt shopshesha'pa' añ o'patenaya yacma ñeñtapa' añ pa'so'cheñ José, ño'ch yore'. Ñeñtña shopshesha' arroḡ eñalletña David po'mñrenñoḡ; ñeñtapa' añ pa'so'cheñ María. ²⁸ Mellañoñeñña allempo ḡhap e'ñe ñeshopa' atet otos:

—O'ch noḡha nehuomḡcha'toseḡ. Yompor e'ñe puemuereñoḡeḡ ḡapa' atarrcha' coshaterreḡ, ñapa' e'ñe pesho'tsen. Yomporpa' atarr bensare'tamḡpeneḡ. Ello peḡtana'tueñ allohuen ḡacmanesha' atto bensare'tamḡpenanet ñet.

29 Allempo e'man atet och mellañoñeñ, ñaña'pa' cha moññe'tacha, cha cotape'ch pueyo'chro:

—Ta', ¿esfe' otenenña ñeññ atet huom'cha'tenen?

30 Mellañoñeñña'pa' alla otererr:

—María, amach pen'cha'tatsto, Yomporpa' atarr o morrenterrpa. 31 Te'pa' pa'chomentach, pechyore'tcha' ñeñtpa' asheñorrcha'. Ñeññña'pa' peso'chcha' JESÚS. 32 Ñeññcha' nanac am'cha'tarettatsa. Otyesetcha' ñapa' ña Ñeññ Nanac Parets Puechemer. Pomporña ñeññara Paretspa' ñachña ne' am'cha'taret atet am'cha'tarettet pa'tañ David.

33 Atteña ñapa' am'cha'tarettach Jacob po'm'renñecop ñeññara israelnesha'. Ama't errponañapa' amach huañerro ñeññ atto am'cha'tarettena ña.

34 Maríaña'pa' atet otapan mellañoñeñ:

—Ta'm ¿erroñenotcha'ña nechyore'tña? Napa' ama't puesheñarra encanesh'a' amarramtso yoreña'.

35 Mellañoñeñña'pa' alla otererr:

—Paretscha'ca'ye Puecamquëñ pe'chapoya. Ñeññ Nanac Parets po'huamencpa' a'pomam'psose'pcha' atet ñerra'mrrate' os pa'pomam'pene'. Ñeñño'marña cheshatoll ñeññcha' pe'ñalletatpa' ñapa' añach e'ñe ma'yo'chrosa ñeññ atet muenen Parets. Otyesetcha' ñapa' ña e'ñe Yompor Puechemer.

36 Ñaña Elisabetña ñeññ pamo'ts pepen, ñapa'cho'ña o' totana asheñorro'toll, ama't o' po'nme'ten. Ñaña ama't oteñet mue'cho'ppa' te'ñapa' o' pechapm'a' arorr o' a'chomenta.

37 Tarro'mar Yomporpa' ama eñalle ñocop ñeññ atarr torrapo' enten.

38 Allempoña María'pa' alla oterranerr mellañoñeñ:

—Ñehua, napa' e'ñe pocte' nenteñ o'ch nesherber Yepapar ñeññ Nepartseshar nepen. Ñeññpa' attetepa'ch nocop ñeññ atet potenen.

Allempoña mellañoñeñpa' o' ahuerr.

Atto María'pa' emo'tenana' Elisabet ñeññ e'ñe pamo'ts pen

39-40 Maríaña'pa' allenta ahua' poma'yorñecma o'ch emo'tenana' Elisabet. All ye'chenapa' all shonte' aspenrarer allara Judeo. Allempoña chap anetso all sechenapa' be'tosos Zacarías pa'paclo, huom'cha'tosan Elisabet.

41 Ñaña'pa' allempo e'mapan María ñeññ atet huom'cha'tospa' pue'mare'tollña ñeññ pa'to'tsenpa' allentepa'tcha' pella. Pachorña'pa' e'ñe chorreña Parets Puecamquëñ. 42 Ñeññña' eñoratene', pocsheñeshocmañen eñorena huamencpa' atet otapan María:

—Papa' o' atarr coshaterre'p Yepapar. Papa' o' e'ñe pen'tana'tue ora allohuen yacmanesha'chno atto

coshatenanet ñet Yepapar. Ñaña Yepaparpa' atarrcha' bensare'tam̄pennap̄ pechoyoretoll. ⁴³ Ama't na Yepaparpa' atarr coshatenen atfo pemo'tenen ama't ñeñteḡ pachor pen ñeñtcha' Yepartseshar yeperr. ⁴⁴ Tarro'mar e'ñe allempocma ne'maponap̄ peñoñ atet pehuom̄cha'tosen, ne'mare'tollpa' e'ñe pocsheñeshoḡpa' allentepa'tcha' pella nato. ⁴⁵ Paña te'pa' atarr cosheñtso'tseneḡ tarro'mar ḡapa' e'ñe ḡame'ña'huoña ñeñt atet otuenḡa' Yepapar. Ñeñto'marña ñeñtḡa' e'ñech atet etsoterra ḡocop.

⁴⁶ Maríañapa' alla otererr:

—Te'ñapa' e'ñech neyoḡhrocmañen na'ye'choḡtatoñ Yepapar.

⁴⁷ Necamquēñohuen atarr nocsheña Yepapar ñeñt Ya'quesḡpatañer yepen.

⁴⁸ Yepapar e'ñe puemuereñoḡen ñapa' entenen ama esoy-ayno, añana ñeñten torretsa ñocop. Tarraña te'pa' allohuen acheñenesha' ñeñtcha' mererrtsa arr patsro ñetñapa' atarrcha' coshapreterrnet atfo Yepaparpa' o' atarr coshaterren na.

⁴⁹ Tarro'mar ñapa' ñeñt atarr ahuamencattetsa atfoña o' orrtaton ñeñt nanac sherbets, ñeñtara Yepapar ñeñt otenet Ñeñt atarr nanac Parets.

⁵⁰ Allohuen ñeñt am̄cha'na'tpo' entene' Yepapar, ñañaapa' ḡocmach atarr muererranet ama't tayoteñ errponañohuen ama't allpon allohuen acheñenesha' ñeñtcha' mererrtsa arr patsro.

⁵¹ Ñaña ñapa' e'ñe etsotuenan ama't ñeñt atarr nanac echarr entyenet, ñaña allpon allohuen acheñ ñeñt atarr asherben entyetsa, ñañaapa' e'ñech pomnaren ḡohuerranet.

⁵² Ñaña ñeñt atarr ahuamencat entyetsa ñañaapa' e'ñech a'suatanrrortatuerranet alloḡ am̄cha'tareñtenet. Tarraña ñeñt ama esoshe'maye' entyetsopa' ñetñapa' Yepaparcha' nohuerrahuet attotcha' am̄cha'na'tpo' enter allohuen acheñenesha'.

⁵³ Ñaña ñeñt nanac es pallta'yetsa, ñetñapa' Yepaparcha' esocmañen aphuerrahuet. Tarraña ñeñt atarr esocmaneñ es echyets, ñetñapa' Yepaparcha' puerratañpesuerrahuet, amach es anerreto ama't coñe'ta. ⁵⁴⁻⁵⁵ Yepaparpa' añach ḡocma yenpuen israelena'tar ñeñt pueyoḡhresha' pen ña. Amach pueserrano ñeñt atet otane't ahuat yamo'mtayñeneshañ ñeñtcha' atet perranet ñaña allohuen ñeñtcha' po'm̄reneñ perret. E'ñe atet otane't ahuat Abraham po'm̄renñecop. Attoch ḡocma

muerenanet ama't errponohuañen. Arrpa' allohua ñeñt atet ačhotan María Yompor.

⁵⁶ Allempoñapa' ñato' ma'pmate' arrorr alla a'pa Elisabetesho. Allotña Mariapa' ahuerr pa'paclo.

Arrpa' atto eñalleta Juan ñeñt apatañtatse't Yomporecop

⁵⁷ Allempoña chap allempoch emare'ten Elisabet. Ñeñtña pue'marpa' asheñorroñoll. ⁵⁸ Allohuen acheñenesha' ñeñt yeçhetsa all ñesho ñaña allohuen pamo'tsesha' ñetñapa' e'ñe coshaprechet. Tarro'mar eñoteñet Yomporpa' o' orrtatoñ atto ñapa' atarr muereña. ⁵⁹ Allempoña o' posocmata'muen ñeñtña asheñorroñollpa' o' tsorratolle'ta'mueñet tarro'mar ñetpa' atetca'ye yeçhenet ñeñt judioneshet.* Allempopa' añ soçetañ Zacarías o'ch anmatoñetañ pompor pa'so'cheñ. ⁶⁰ Tarraña pachorpa' otanet:

—Napa' ama nemno o'ch sesochon ne'mar Zacarías. Napa' añcha' nesoch Juan.

⁶¹ Allempoña acheñenesha'pa' atet ochet:

—¿Eso'mare't pemneñña o'ch pesoch Juan tarro'mar ama't puesheñarra pamo'tspa' ama eñalle ñeñt soçhetsa Juan?

⁶² Allempoña acheñenesha'pa' e'ñe pototeta a'p'to'toñet ematoll pompor escha' sochanña puechemeretoll.

⁶³ Ñapa'cho'ña potota eñotatan acheñenesha' o'ch apēt quellcatets allcha' quellcan ñeñtcha' sochan puechemeretoll. Allempoñapa' apēt quellcatets, allñapa' atet quellca': “Añcha' yesoch Juan.” Acheñenesha'ñapa' atta cohuanrrorchet. ⁶⁴ E'ñe allempocma Zacaríasñapa' allenta eñorerra. Allorocma aye'choçhtaterran Yompor. ⁶⁵ Acheñenesha'ña ñeñt yeçhetsa allpa' allohuenet atarr mecha'na'teñet Yompor. Ñetñapa' serrpare'tatanna'tyeset all aspentarero Judeo. ⁶⁶ Ñaña ama't allohuen ñeñt e'mare'tyese' ñetñapa' cotape'chyeset pueyoçhreto, atet otyenet:

—Añ cheshatollpa' po'ñoçhcha' atarr sherberran Yompor tsapatonet.

Tarro'mar Yomporpa' atarr muereña.

Atto Zacarías atarr ačhotenan Yompor Parets

⁶⁷ Cheshatollña pompor ñeñt Zacaríaspa' añ chorrenaya Parets Puecamquēñ ñeñtña eñoraterre' Yomporecop ñeñtcha' atet perra ama't esempo. Ñeñtapa' atet ot Zacarías:

* **1:59** Añ ñoñets “atsorraret”, añ ñeñt otets atet yeçhe't judionesha'. Ñeñtapa' atet: Ñerra'm allempo eñalletena asheñorroñollesha' ñeñt e'ñe judionesha'pa' añña pomporpa' o'ch tsorrateñet po'çhtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'çhtso allcha' tsorret asheñorroñollpa' all e'ñech poteretollo e'ñe po'ñoç parrmatollo.

- 68 —Aye'chochtaterrapo'ch Yompor, ñeñtara ñeñt
Po'partseshar pen allohuen israelnesha', tarro'mar
te'ñapa' o' orrtaterrnay puemuereña ñeñtcha'
ya'queshpaterre' ñeñtey puechemer pen.
- 69 Ñapa' o' orrtatonay ñeñtcha' a'queshpatañterrtsa ñeñt atarr
ahuamencatesha' ñeñtara ñeñtcha' eñalletatsa David
po'mrenñot, ñeñtara David ñeñt atarr sherbaye't ahuat
Yompor.
- 70 Ñeñtpa' ahuatoteñ atet eñoratyeseñt ñeñt a'mta'yeseñt
po'ñoñ, ama't allohuen ñeñt e'ñe ma'yoçhra'yestse't
Partsocop.
- 71 Ama't ñaña allohuen allpon ñeñt ye'moñe'tene' ñeñt
añcha'noçhetyetsa yocop, ñachña ya'rroyataterre'.
- 72 Attochña etsotaterrnay ñeñt atet otane't ahuat yatañneshañ
ñeñtcha' atto çhocma muererrya. Atteña ñapa' amach
pueserrano ñeñt atet a'pocstat ahuatoteñ yocop
tarro'mar ñeñtpa' e'ñe Partseshot a'pocstataretta.
- 73 Ñehua, añpa' atet pa allempo Yomporpa' ahuat otan yatañ
Abraham ñeñtcha' atet perrnay e'ñe po'ñoçh.
- 74 Ñeñtpa' atet ote't Yompor yocop ama't ñeñt allpon ñeñt
ye'moñe'tene' ñeñt añcha'noçhen yentyen ya, ñaña
ñach ya'rroyataterre'. Allochña yapa' o'huañcha'
yeñcha'nañot yesherber Yompor.
- 75 Attoch yetsotoñ ñeñt e'ñe pocte' enten Parets allochñapa'
attochña pocte' enteney ñaña acheñenesha' atto e'ñe
cohuen es yepa'yen e'ñech tarremphua esempohuach
yocrrena arr patsro.
- 76 Te'pa' o'ch nechemeretolle notap: Papa' oterrpetcha'
ñeñtepo' ñeñtcha' eñorana'tena ñeñt nanac Parets.
Tarro'mar papa' panomcha' orrtatsa attoch
pa'cohuentatyeseñ allcha' oñmos Partsesha'.
- 77 Ñeñtpa' attoch poctape'chater acheñenesha' e'ñe cohuen
allochña ñetpa' esheccha' apretnaretterret po'chñaret
attoch a'queshpataretterret.
- 78 Te'pa' chapcha' allempoch Yompor e'ñe puemuereñoñey
çapaterrnaycha' ñeñt huetsa entot ñeñtcha'
yoctape'chaterre' e'ñe cohuen, ñeñtña cotapñatserpa'
ñeñtcha' ya'puetarsañperre'.
- 79 Attochña a'puetarsañpsaretterra allohuen acheñenesha'
ñeñt checmeto'tsa'yeneta, ñeñt ama eñotenaye
Yompor, ñetñapa' aña o'patenahuet rromueñets
ñeñtara coñcheñets. Ñeñt atto a'puetarsañpsaretey
ñeñtcha'ña yeñotatene' attoch e'ñe cohuen
yocsheñeshocmañen yeyçhena arr patsro. Arrpa'

allohua huañ atto Zacaríaspa' ačhotenan Yompor e'ñe pocsheñeshocmañen.

80 Añña cheshatoll Juanpa' allo'na sen atarretnomtsa. Puecamquëño'pa' atarr ahua menca tetnena. Ñaña'pa' alla ye'chena allapa' amayo tarremphua allempo orrta israelena'tarneshesho.

2

Atto eñalleta Jesús

(Mt. 1.18-25)

1 Allempopa' añ añcha'tarettatset romo'marnesha' ñeñ'pa' añ pa'so'cheñ Augusto. Ñaña'pa' nenan po'ñoñ ñeñ'pa' atet oten: Allohuen achenesha' erraparen añe patsropa' quellcatyesetepa' pa'so'cheñ. 2 Ñehua, allempo ñanom quellcatyeset pa'so'cheñpa', arrña anets Siriapa' añ añcha'tarettetsa ñeñ'pa' añ pa'so'cheñ Cirenio ñeñ'pa' añcha'tareter pen allohuen judionesha'. 3 Ñehua, allohuenet ahuanerret pa'tañesha' pa'netsro allochñapa' allcha' quellcatyerreta' pa'so'cheñ. 4 Ñeñ'pa' marña Josépa' on Nazaretot allara anets Galileo, o'ch ahua' all pa'netser pe't pa'tañeshañ, ñeñ'ña anetserpa' añ pa'so'cheñ Beléñ, allara Judeo, tarro'mar Beléño eñalleta ahua't pa'ta' David. Tarro'mar Josépa' Davidna'tarca'ye. 5 Allempoña Josépa' ahua' epuet María o'ch quellcateneta' pa'so'cheñ. María'pa' José o'patenaya ño'ch yore'. Allempoña María'pa' ačhomenepa'to'. 6 Allempoña allo'tsa'yenet Beléño, María'pa' ahuepa't chen allempoch emare'ten. 7 Alla emare't, ñeñ'ña pue'maretollpa' asheñorrofoll ñeñ' e'ñe po'moter pa'. Epe' po'ño'mopa' alla panatolle'ch huacshephua' allotecma apueñet huaquesh puerrar. Ñehua, tarro'mar alla emare'tos huacshephua'ña' muetsopahuopa' ama esesha' epatso e'ñe poctacma eshepena achen ñeñ' manrra'tosets all.

Atto Yompor po'mllaño'ñerpa' orrtana ñeñ' cohuan'pene' po'carrneror

8 Allempo emare'ten María all Beléño ñeñ' tsaprocma allampaño'tsen ñaña ñeñ' cohuan'pene' po'carrneror pastemo. 9 Allña'pa' machayotepa'tcha' orrtanet Yompor po'mllaño'ñer, cha poptana'tosanet. Ñeñ'pa' Yompor po'cohuenña ñeñ' cha a'puetarsam'psosahuet. Ñeñ'pa' atarr nanac mecha'trra'tapet. 10 Mellaño'ñeñ'pa' otosanet:

—Amach sem'cha'tatsetno choña se'mñnoten na, o'ch neñotatoses ñeñ'cha' atarr socshaterre' sa ama't ñaña allohuen erraparen acheneshacop. 11 Te'pa' socop o' eñalleta

ñeñtcha' Sa'queshpatañer seperr ñeñtpa' ñeñtcha' Cristotats ñeñt Yepartseshar yepen. Ñeñña cheshatollpa' arr eñalleta David pa'netsro allara Beléño. ¹² Te'pa' o'ch noterrerr attoch señoch ñeñt cheshatoller. Ñeñtcha' sentos cheshatoll eparet po'ño'mo all ñanatolle'teñet huacshepahuo, ñeñtca'yeña Yompor Puechemer.

¹³ Allempoñapa' machayotepa'tcha' orrterrerr po'potantañ shonte' mellañoñeñnesha' ñeñt o' sohuacherrerr entot. Ñeñña mellañoñeñnesha'pa' atarr aye'chochtatosñañet Yompor.

¹⁴ Ateñ otoset:

¡Aye'chochtaterrapo'ch Yeyomporer ñeñt pue'ntaño'tsen!
Ama't ñaña acheñnesha' ñeñt añe patsro'tsen
cosha'rrtetepa' ñamet ñeñt coshaten Yompor.

¹⁵ Allempoña mellañoñeñnesha'pa' sohuaneret ñeñt cohuanmpene' po'carrneror, ñetñapa' o' ahuanerret pue'ntaño. Allempoña ñeñt cohueña' po'carrnerorpa' allenta otanna'tyeset:

—Errotenuaca'yeña ñeñt otenya' Yompor. O'ch ahuey Beléño o'ch yenteña' ñeñt atet otenyeta'.

¹⁶ Allempoñapa' poma'yorñecma ahuanmuet, o'ña chapuet Beléño'pa' all entoset María ñaña José ñaña cheshatoll all ñanatolle'tena huacshepahuo. ¹⁷⁻¹⁸ Allempo entoset ñetñapa' serrpare'toset ñeñt atet o' otuenaneta' mellañoñeñ cheshatollecop. Allohuen ñeñt e'muene'pa' nanac cohuanrroreyeset, otanna'tyeset:

—Ta'm errotenoñte'ñaca' o' serrpare'tosña atet.

¹⁹ Maríañapa' e'ñe ñeñta nen pueyoçhro e'ñe ñeñta cotape'chen ñeñt allpon o' entua ahuañoñeñ. ²⁰ Allempoña ñeñt cohueña' po'carrnerorpa' o' ahuanerret. Ateñ otenaneta' mellañoñeñnesha'pa' ñetñapa' e'ñe po'ñoçh entoset. Allpon ñeñt atet e'muet, ama't ñaña ñeñt atet entet, ñeñto'marña ñetpa' e'ñe pa'ye'chochtateñeshet ahuanerret, attoña ñetpa' atarr cohuentatnerrñañet Yompor.

Atto amet cheshatoll Jesús Parets pa'paclo attoch a'pocatañeta' ñeñt Partsocop

²¹ Ñehua, allempoña o' posocmata'muen, ñeñt asheñorroñtollpa' o' tsorratatolle'chet, ñeñtpa' atet yeçhenaña allohuen judionesha'. Allempo ñeñña cheshatollpa' o' sochet JESÚS. Ñehua, ñeñt so'chñets ñeñtpa' atet otenana' mellañoñeñ María ama't ahuañmo'choteñ allempo ama a'chomentena'.

²²⁻²⁴ Allempoña chap allempoch a'pocachet ñeñt atet nane't Moisés po'ñoñ ñeñtcha' atet yeçha' judionesha'. Ñehua, ñeñña ñoñetspa' atet oten: “Ñerra'm esempoch cheyore'ten coyanesha', ñerra'm asheñorr pue'maretoll

ñeñt e'ñe po'moterpa' neñetepa' Partsocop." Ñaña po'poñ Moisés po'ñoñ ñeñt atet ne't, ñeñtpa' atet oten: "Muetsatenetepa' epña arot amapa' epña yepecho'ye' ñeñtcha' net Yomporecop." Ñeñto'marña allempo chap allempoch a'pocstatet Yomporecop ñeñt atet anaret po'ñoñ, ñeñtña cheshatollpa' allenta anmet Jerusaléño, allcha' a'pocstachet Yomporecop.

²⁵⁻²⁷ Allempoña chapuet Jerusaléñopa' o' be'tosotet Parets pa'paclo attoch a'pocstateneta' ñeñt atet yechenet ñeñt atet oten ñoñets ñeñt anaret ahuatoteñ. Allñapa' huapa puesheñarr yacma añ pa'so'cheñ Simeón ñeñtpa' jerusaléño'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt acheñerpa' atarr cohuen ñeñt atarr ma'yoçhrenaya ñeñt cohuentetsa Yomporecop. Ñapa' ñeñt atarr cohueñe' esempoch huapa ñeñtcha' a'rroyataterre' israelena'tarnesha' allochñapa' o'ch alla atarr cosherret. Atto chapoña Parets Puecamquëñ ñeñtña eñotate' ñapa' amach rromuena'pa' enterrancha' Yompor Puechemer ñeñt Cristo ñeñtcha' llesenserr esempo. ²⁸ Huapsapa' allenta enatatolle'tosan cheshatoll, atarr aye'choçhtatosan Yompor. Ñeñtpa' atet otos: ²⁹⁻³⁰ Te'ña po'ñoçh Nompore ama'tcha' nerromapa' e'ñech nocsheñeshocmañen nerroma tarro'mar te'pa' po'ñoçh o' nenterrnañ ñeñt o' pemñernay ñeñtcha' ya'queshpaterre' e'ñe atet potne't ahuañmo'choteñ na ñeñten atarr pesherbene'.

³¹ Ñeñtña o' porrtaterrnay allohuenacpay ñeñtey pa'nameney acheñeneshacpay añe patsro.

³² Ñapa' ñach sherberrets atet ñerra'mrrate' puetare' ñeñtcha' a'puetarsañperre' allohuen acheñeneshas' ama't ñeñt ama israelena'tareyaye attoch ñetpa'cho'ña o'ch eñoteret ñeñtcha' a'queshpatañterrtsa e'ñe po'ñoçh. Allochñapa' attotcha' e'ñe cohuen aye'choçhtaterrnañ ñaña peyochresha'chno ñeñtara israelena'tarnesha'.

³³ Ñeñtña pamo'mte' pen cheshatollpa' ñetñapa' atta cohuaña'teñet Simeón atet eñorana'tenanet pue'maretollet. ³⁴ O' eñorana'tuanet pue'maretolletpa' allempoñapa' enamatanet ñamet ñocpuet Yompor pa'nateña. Allempoñapa' otoñ pachor María, ñeñtpa' atet och:

—Peñoche'pa'ch añ cheshatoll ñeñtpa' ñeñtña onañche't ahuat Yompor. Ñocoppa' shonte'ch israelena'tarnesha' ñeñtcha' ama ame'ñerrayo ñeñtcha' chenquërrtsa. Tarraña eñall ñaña shonte' po'potantañ ñeñtcha' ame'ñerraya ñeñtcha' cohueno'tsenterrtsa. Tarro'mar Pomporpa'

añecopña mueñer allochñapa' ñach eñotaterrahuet ñapa' Pomporeshot huapa. Tarraña shonte'ch acheñ ñeñtcha' achmāre'terre'. ³⁵ Papa' ñeñtcha'ña atarr pellcaterre'ña pa. Atarrcha' atserr pe'muerr pellquēña e'ñech atet pe'muerr puellquēña atet ñerra'mrrate' cochllo patenpet peyočhro. Elloña puesheña'tetspa' eñotaterranetcha' erro'tente' ñeñt atet cotape'chyenet pueyočhreto.

³⁶ Allñapa' allo'tsen ñaña puesheñarr coyanesha' ñeñtpa' añ pa'so'cheñ Ana ñeñtecma a'mtene' Yompor po'ñoñ. Ñapa' año' po'señ ñeñt sochetsa Fanuel, ñeñtpa' Aserna'tar.* Ñeñtña Anapa' o' atarr nanac po'nme'ten. Ñehua, allempo shopshena'pa' some'ta, e'ñe cančherr charohua yečhañ epuet puerrollarpa' o' rromapes. ³⁷ Ñeñtña rretorrnanesha'pa' atta correna ñapueñ. O' poscoch čharra' puechena pa'tats char allponmat correna atta. Ñapa' e'ñe ellapene't sherbe' Yompor ama't ñaña tsapome'tets. All Yompor pa'pacłotpa' amach čha'nen. All atarr ma'yochenana Yompor. Erro'teno e'ñe poema'yocheñoñ Yomporpa' amach rreno ama't coñe'ta. ³⁸ Ñapa'čho'ña allempocma huapa all o' čhapachet chesatoll Jesús. Ñañapa' ma'yochosa, atarr parasyoso'tenan Yompor chesatollecop. Ñeñto'marña ñapa' atarr serrpare'tatosan acheñenesha' ñeñt chesatollecop tarro'mar o' huapa ñeñt atarr cohuen allohuen acheñenesha' ñeñtcha' a'queshpatose' israelnesha' ñeñt pa'netser pene' Jerusalén.

Allempo alla puerrerret anetso Nazareto

³⁹ Allempoña o' a'pocstatuet ora allpon ñeñt atet anaret Yompor po'ñoño ñeñtcha' e'ñe yečha' judionesha' ñetñapa' ahuanerret pa'nyeto Nazareto allara Galileo. ⁴⁰ Chesatollñapa' allo'na sen rrorranmats, allo'na sen huomencatnomuets, nanac eñotnenan ñeñt atarr cohuen enten Pompor Parets, ñeñto'marña Yomporpa' atarr muereña.

Allempo alla a'pa cheshachor Jesús Parets pa'pacłlo

⁴¹ Ñehua, ñeñt cheshachor pamo'mte' ñetpa' atet yečhenet pate'tets char pascuapopa' čhocmach senet Jerusaléño o'ch coshapreteneta' pascua ñeñt atet yečhena judionesha'. ⁴² Allempo čhap Jesús po'charña čharra' puechena epa ahuanerreterr Jerusaléño, ñetpa' atetca'ye yečhenet. ⁴³ O'ña huañ pascuapa' ñetñapa' o' ahuanerret. Ñeñtña cheshachor Jesúspa' alla't a'pa Jerusaléño. Pomporña ñaña pachorpa' ama eñoteñeto o'te' alla a'pa. ⁴⁴ Cha otapuetañ añte' co'ta'nen po'potantañ ñeñt parro onačhenet. O'ña chope'cherret

* 2:36 Ñeñtña Aserpa' Jacob puechemer.

pamtarrpa' allempoñapa' o' yerpueret, e' name'tyereta' pamo'tseshesho'mar. E' name'tyereta' allo'tsen ñeñt e' ñe cheme'tyen pompor ñaña pachor. ⁴⁵ O'ña e' name'tuet ama es enterrayepa' o' alla ahuerret Jerusaléño. Allpa'cho' e' name'tuereterr.

⁴⁶ Poma'pamtañoñapa' alla entereta' Parets pa'paclo. All anen e' ñe parro maestronesha' ñeñt atarr eñotyene' Yompor po'ñoñ ñeñt atet anaret. Jesúsñapa' all e' ñiñotyenanet ñeñt atet serrpare'tyenetpa' o'ch'cho' a' pto'tyerranet. ⁴⁷ Ñeñto'marña allohuen ñeñt e' muene'pa' cha atarr cohuanrrorteñet, otyenet:

—Errotenotuañaca'yeña atarr es eñoten ñeñto'mar atarr cohuen es anapyen.

⁴⁸ Allempo enter pompor ñaña pachorpa' atta cohuanat'oset. Pachorñapa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yellquëñesha' ye'nameneþ?

⁴⁹ Ñaña'pa' otapanet:

—Eso'mare'tña se' name'tenen. Ama't señotennoña napa' ñeñt poctetsa nocop o'ch netorreññaña ñeñt poctetsa Nom-porecop.

⁵⁰ Ñetñapa' ama es eñotaye ñeñt atet otanet.

⁵¹ Allempoñapa' o' coterran pamo'mte' o' cha'cherret Nazareto, ñapa' e' ñe cohuen ame'ñenana pompor ñaña pachor. Pachorñapa' allohuen ñoñetspa' e' ñe eñotueñ pueyo'chro. ⁵² Jesúsñapa' allo'na sen rrorranmats atarretnomtsa. Allo'na nanac eñotañetnena. Pomporña Paretspa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt serrpare'tosets all amayo
(Mt. 3.1-12; Mr. 1.1-8; Jn. 1.19-28)

¹ Ñehua, allempo chap allempoch añcha'taretta ñaña ñeñt pa'so'cheñ Tiberio all Romo. Allempo chap o' añcha'taretta charra' puechena amnar char allempoña Judeopa' añ añcha'tarettatsa ñaña Poncio Pilato. Galileoñapa' añ añcha'tarettatsa Herodes. Pa'mo'nasheña Felipepa' ñapa' epa anetsocop añcha'taretta, ñeñt'pa' arr añcha'taretta Iturea ñaña Traconite. Lisanciasñapa' arr añcha'taretta Abilinio. ² Ñehua, allempopa' judionesha' añ po'corneshar penet Anás ñaña Caifás, ñeñt po'corneshar pen ora allohuen cornaneshachno. E' ñe ñeñte chararocma añcha'taretetyenet allemeñ anetso'mar e' ñe allempocma Yomporpa' eñorana'tana ñaña Juan ñeñt Zacarías puechemer ñeñt

amayo'tsen. ³Ñeñto'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñtpa' atet otyesnomanet:

—Te'pa' o'ch soctape'cherr e'ñe ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapataretterra Yomporecop.

⁴Ñeñtpa' añ serrpare'tatosanet attoch etsoterra ñoñets ñeñt anaret ñeñt atet eñose't ahuat Isaías ñeñt a'mtaye't Yompor po'ñoñ. Ñeñt Isaías po'ñoñ ñeñtpa' atet oten:

E'morrterrach puesheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñtpa' atetcha' oterranet: “Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pačharretyesoñ pa'tep.

⁵ All rrapatse'tyen patspa' o'ch e'ñe sa'muepñetyes, all pocmo'yaretyenapa' o'ch e'ñe sa'muepñetuahue, all terepe'parretyenapa' o'ch e'ñe sa'pačharretyes, all arrotetyena toñpa' o'ch e'ñe sepampa'huahue.

⁶ Allempoña allohuen acheñenesha'pa' enteretcha' ñeñt o' mueñerrnay Yompor ñeñtcha' ya'queshpaterre'.” Arrpa' allohua ñeñt atet aquellcare't ahuatoteñ Cristocop.

⁷ Allempoñapa' shonte' acheñenesha' huačha'tet Juanesho. Ñetpa' tarro'mar huačhenet añ muenenet o'ch apatapanet Juan Yomporecop. Juanña serrpare'tatapanetpa' otapanet:

—Sapa' ama cohuenayayso atarr ashcarñañes, čha sotena ñerra'mrrate' shechpa sompor sepen. Po'ñočhca' ama eseshaye' sotenaye e'ñech sapataretteñoña o'ch sequeshperra allochñapa' amach coñchatuerrsso Yompor allempoch yoročhtatuer tsapatonet. ⁸Napa' añcha'ña notapas o'ch sortatyes ñeñt e'ñe cohuen enten Yompor ñeñt atet pena ñeñt po'ñočh o' cotape'cherran ello cohuen Yomporecop. Sapa' čha soteneñ seyočhro año' es sepallteno sapa' año' e'ñe seyemtena satañ Abraham. Tarraña napa' o'ch notas amach atet soctape'chatsto tarro'mar ñeñtpa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt senten arr o'ch a'pnasereñ Abraham po'mireneñ. ⁹Ñeñto'marña napa' o'ch notas ñerra'm amach soctape'cherro cohuen Yomporecop o' mameshamña o'ch čhaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'matamochet tsach. O' e'ñe onañchachet gach allcha' tet e'ñe allohua huañen puepal-lactar. Ñeñt allohuen tsachečhno ñeñt ama cohuenaye' me'tetsopa' a'mata'tueretcha' saprochetcha' all huorten tso' allcha' e'ñe a'poyatatuere't.

10 Allempoña acheñenesha'pa' a'p̄to'tyeset Juan, ochet:

—Ñehua, ¿eso'tña p̄octetsaña yocop attoch e'ñe yorrtatyes ñeñt̄ cohuentetsa Yomporecop?

11 Ñaña'pa' anapanetpa' otanet:

—Ñerra'm eseshas echene' epma seshtam o'ch saḡ ñeñt̄ ama echenaye ñeñt̄cha' chorrena. Ñaña ñerra'm eseshas echene' serrar o'ch saḡ ñeñt̄ ama echenaye ñeñt̄cha' rrenet.

12 Allempoña hua'cha'ta ñaña acheñenesha' ñeñt̄ po'taruas pene' atto cobrenan acheñenesha' quelle ñeñt̄ gobiernocop. Ñetpa'cho'ña añecop huenet Juanesho o'ch apatarettet Yomporecop. Ñetpa'cho'ña o' a'p̄to'toset Juan, atet otoset:

—Yocop Nomporcha' ¿eso'tña p̄octetsa attoch yorrtatyes yaña ñeñt̄ cohuentetsa Yomporecop?

13 Ñaña'pa' anapanetpa' atet otanet:

—Ñeñt̄ allpon quelle ñeñt̄ e'ñe allpona enamuen gobiernopa' e'ñech allpona secobreñña acheñenesha', amachña allo'na atarr aton secobra'neñe acheñenesha' quelle ñeñt̄ e'ñech socpa'na.

14 Allempoña patantarr guardianesha' ñeñt̄ allo'tsa'yenpa' a'p̄to'toset ñamet, ñetpa' atet otet:

—Yocoppa'cho'ña ¿eso'tña p̄octetsa ñeñt̄cha' attoch yorrtatyes yaña ñeñt̄ cohuentetsa Yomporecop?

Ñaña anapanetpa' atet otanet:

—Sapa' amach es seprratam̄psatsche acheñenesha' e'ñe se'mueñocma ñaña sa'metan̄peñoñ e'ñe seshquëño'pa'cho'ña amach es seprratam̄psatsto e'ñe attota. Ñaña ñeñt̄ allpon tsa'tenset gobierneshotpa' e'ñepa'chña ñeñt̄a cohuen socshena.

15 Acheñenesha'ña'pa' atta cohueñet, pueyo'chretoña'pa' atta cotape'chyenet cha otenapuetañ Juanpa' ñeñt̄e'ña Cristotets ñeñt̄ cohuenet ahuatoteñ ñeñt̄cha' mueñerranet Yompor.

16 Juanña'pa' atet otanet:

—Napa' ama añeyayno ñeñt̄ Cristotets, tarro'mar napa' ama't napatensoñ Yomporecop e'ñe oñochaya napatenes. Tarraña Cristo ñeñt̄cha' huapatsa chenta'pa' ñapa' añcha'ña chorratossa Parets Puecamquëñ ñeñt̄ atet ñerra'm tso'. Ñapa' ñeñt̄ atarr ahuamenca'tesha', ñaña'pa' ama tama ahuamenca'teyayno. Ñapa' ñeñt̄ña atarr sherbets, ñaña'pa' ama es nesherbeno attoch ama't po'sapatre'chapa' o'ch nepyoñ.*

17 Ñapa' atarr ahuamenca't, ñapa' ñach acrerre' allohuen

* 3:16 Ñeñt̄ atet po'taruas pe't ahuat esclavos o'ch pueyan pamo'mte' po'sapatre'ch.

acheñenesha'. Ñapa' añ toma'ntena ñeñt orrene' puehosh-nat alloch shoshnan po'trigo o'ch e'ñe pue'llonñrochayaña. Ñeñtña pue'llomerpa' o'ch a'yapa'che' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñtña tso'pa' ama emaya'pahuo ama't errponaña.

¹⁸ Juanña allpa' atet serrpare'tatyenanet cohuen ñoñets ñeñt huetsa Yomporeshot alloch yequeshperra. Ellonetña' shonte' pa'namen serrpare'tatan acheñenesha' ñeñt ama pocteye' enteno Yompor.

Allempo apataretta Jesús Yomporecop
(Mt. 3.13-17; Mr. 1.9-11)

¹⁹⁻²² Allempoña o' atarr apataretta shonte' acheñenesha' Yomporecoppa' cho apatarettatsa ñaña Jesús. E'ñe apataretetuatsapa' o' ma'yocha. Allempoña ma'yochenapa' enetña' ahuepa't atoraretta. Alotña e'ñe sohua'nma Parets Puecamquëñ e'ñe atet entapet ñerra'mrrate' yeþ o' sohua'nma entot. E'ñe arr chap Jesúsesho. Cha e'morrtatsa ñoñets entot atet eñorena Yompor. Ñeñtña ñoñetspa' atet oten:

—Papa' ñeñteþ Nechemereþ ñeñteþ atarr nemorrentena, þa atarr nanac nocshatene'.

Allempoña añcha'tareþ Herodespa' o' yottamþsatan Juan tarro'mar Juanpa' eñotach ama pocteye' enteñe ñeñt atet þatse'tyena. Ama't pa'mo'nasheñ Felipe puetaporpa' o' yoramþer. Ama't shonte' pa'namen ñeñt atet þatse'tyena Herodespa' elloñapa' o'cho' yottamþsaterranerr ñaña Juan.

Arrpa' all aquellcayet allohuen pa'so'chñechno ñeñt pa'tañneshañ pen Jesús
(Mt. 1.1-17)

²³ Ñehua, Jesús'pa' allempo orrta o' torra'mochana ñeñt po'taruas pen Pomporecop, allempoña po'charñapa' ñato' o'te' chap ma'poch charra' char. Acheñenesha'ñapa' añ pompore þateñet ñeñt José. Ñehua, José'pa' Elí puechemer, ²⁴ Elí'pa' Matat puechemer, Matatpa' Leví puechemer, Leví'pa' Melqui puechemer, Melquipa' Jana puechemer, Janapa' José puechemer, ²⁵ José'pa' Matatías puechemer, Matatías'pa' Amós puechemer, Amós'pa' Nahum puechemer, Nahumpa' Esli puechemer, Esli'pa' Nagai puechemer, ²⁶ Nagaipa' Maat puechemer, Maatpa' Matatías puechemer, Matatías'pa' Semei puechemer, Semeipa' José puechemer, José'pa' Judá puechemer. ²⁷ Judá'pa' Joana puechemer, Joanapa' Resa puechemer, Resapa' Zorobabel puechemer, Zorobabel'pa' Salatiel puechemer, Salatiel'pa' Neri puechemer, ²⁸ Neripa' Melqui puechemer, Melquipa' Adí puechemer, Adipa'

Cosam puechemer, Cosampa' Elmodam puechemer, Elmodampa' Er puechemer, ²⁹ Erpa' Josué puechemer, Josuépa' Eliezer puechemer, Eliezerpa' Jorim puechemer, Jorimpa' Matat puechemer, ³⁰ Matatpa' Leví puechemer, Levípa' Simeón puechemer, Simeónpa' Judá puechemer, Judápa' José puechemer, Josépa' Jonán puechemer, Jonánpa' Eliaquim puechemer, ³¹ Eliaquimpa' Melea puechemer, Meleapa' Mainán puechemer, Mainánpa' Matata puechemer, Matatapa' Natán puechemer, ³² Natánpa' David puechemer, Davidpa' Isaí puechemer, Isaípa' Obed puechemer, Obedpa' Booz puechemer, Boozpa' Salmón puechemer, Salmónpa' Naasón puechemer, ³³ Naasónpa' Aminadab puechemer, Aminadabpa' Aram puechemer, Arampa' Esrom puechemer, Esrompa' Fares puechemer, Farespa' Judá puechemer, ³⁴ Judápa' Jacob puechemer, Jacobpa' Isaac puechemer, Isaacpa' Abraham puechemer, Abrahampa' Taré puechemer, Tarépa' Nacor puechemer, ³⁵ Nacorpora' Serug puechemer, Serugpa' Ragau puechemer, Ragaupa' Peleg puechemer, Pelegpa' Heber puechemer, Heberpa' Sala puechemer, ³⁶ Salapa' Cainán puechemer, Cainánpa' Arfaxad puechemer, Arfaxadpa' Sem puechemer, Sempa' Noé puechemer, Noépa' Lamec puechemer, ³⁷ Lamecpa' Musalén puechemer, Musalénpa' Enoc puechemer, Enocpa' Jared puechemer, Jaredpa' Mahalaleel puechemer, Mahalaleelpa' Cainán puechemer, ³⁸ Cainánpa' Enós puechemer, Enóspa' Set puechemer, Setpa' Adán puechemer, Adánpa' Yompor puechemer.

4

Allempo oneñētpa' topatenan Jesús, mueneñ o'ch atē p̄atan Jesús ñēñt̄ ama pocteye' enteno Yompor

(Mt. 4.1-11; Mr. 1.12-13)

¹ Allempoña Jesúsapa' o' err Jordanasot. Ñañaapa' añ e'ñe chorrenaya Parets Puecamquēñ ñēñt̄ña anmue'ña all amayo. ² Attoña allpa' o' huapoña oneñē, mueneñ o'ch atē p̄atyes ñēñt̄ ama pocteye' enteno Pompor. Allñaapa' ama rreno e'ñe aña torrena attoch etsotuan ora allohuen ñēñt̄ cohuentetsa Pomporcop. Ñēñto'marña ama't o' pa'tatsoch çharramatpa' ama't coñe'tapa' ama es rreno. O'ña pa'tatsoch çharramatuapa' cho cheporratsa.

³ Allempoña oneñē atto topatosan Jesúsapa' atē otos:

—Pa ñerra'm po'ñoçhte' Parets Puechemereppa' o'ch p̄ot: Añ mapue' puenasepa' pan.

⁴ Jesúsñaapa' atē otaṗ:

—Napa' ama nemno o'ch atet neþa tarro'mar Yompor po'ñoñ ñeñt anuaret ahuatoteñ ñeñtpa' atet oteneý: “Allohueneý acheñenesohueneýpa' ama e'ñe rreñtsa ñapueñ yocrrañ yepeno. Añe'naña yocrrañ yepen yecamquëñcop ñeñt allohuen allpon oteneý Yompor.”

⁵ Allempoña oneñetpa' o' aneñ all atarr aspeno e'ñe a'noso. Allotña gatyuesuererr allohuen ñeñt allpon all añcha'taretetyena pa'namen acheñenesha' ñeñt yecha'yetsa erraparen añe patsro. Allotña ama't mamesha cohuospa' e'ñe orre'tuena erracmañen. ⁶⁻⁷ Oneñetñapa' alla oterranerr Jesús:

—Ora allohuen ñeñt o' pentyesua ñeñtpa' e'ñe nocma tarro'mar ñeñtpa' na aparet. Ñerra'm esesha' nemnen o'ch naþpa' napa' naþcha'ca'ye. Ñeñto'mar te'pa' o'ch notap, ñerra'm na pema'yochenoñen o'ch peconcorpana'tna, napa' napaþcha' ora all añcha'taretetyenet all atarr cohuentatyenet, e'ñe ora allohuen ñeñtpa' e'ñech þocma.

⁸ Jesúsñapa' alla otererr:

—Te'pa' o'ch orrerreþ oneñete. Napa' ama nemno o'ch atet neþa tarro'mar Yompor po'ñoñ ñeñt anuaret ñeñtpa' atet oteneý: “Añach ñapueñ yema'yochena Yeyomporer ñeñt Yepartseshar yepen, e'ñech ñapña yesherbe'.”

⁹ Allempoña oneñetpa' o' anerranerr Jesús Jerusaléño. Allñapa' a'tapatos nanac eno allohuanen Parets pa'paquëll. Allñapa' otuererr:

—Papa' ñerra'm po'ñochte' Parets Puechemereþ te'pa' þomacha arroþ tarro'mar amach þa'tserrþo ¹⁰ tarro'mar Parets po'ñoñ ñeñt anuaret ñeñtpa' ama'tña atet oten: Yomporpa' o'ch mueñonaþ po'mllañoñeñrenesha' ñeñtcha' pecuanþsapue'.

¹¹ Ñetcha' þagapapuet o'ch enatapapet attoch amach þa'tserrþatca'toso mapyo.

¹² Allempoña Jesúsapa' alla otererr:

—Añpa'cho'ña anuaret Yompor po'ñoño, ñeñtpa' atet oten: “Amach ya'llocchame'tatsche Yeyomporer ñeñt Yepartseshar yepen.”

¹³ Allempoña oneñet topatuahuan Jesús pa'namenotpa' o' ahuerr o' caþpa'ner allponmat tarro'mar oneñet chocma topach.

*Allempo e'ñe ñenmat torrena Jesús Partsocop all Galileo
(Mt. 4.12-17; Mr. 1.14-15)*

¹⁴ Allempoña Jesúsapa' o' alla ahuerr Galileo. Ñapa' añ atarr ahuamencaþ pene' Parets Puecamquëñ. Erraparen Galileo'mar o' e'ñe e'mare'tuet ñeñt atet þa'yena Jesús.

¹⁵ All apcha'yena judionesha' po'prahuetopa' ñañapa' all

yečhatyenanet. Attoña allohuen acheñenesha'pa' atarr cohuen enteñet.

*Allempo serrpare'tatan Jesús acheñenesha' all Nazareto
(Mt. 13.53-58; Mr. 6.1-6)*

¹⁶ Atteñapa' o' alla čherr Nazareto all yečhache't pompor allempo cheshena'. Pamtarrña allempo čhap yet allempo čhocma amesen judionesha', Jesúsñapa' o' ahuo' judionesha' po'prahuo, ñapa'čo' atet yečhena. O' čhap puerahuopa' allñapa' tomos allcha' lleyatan acheñenesha' Yompor po'ñoñ.

¹⁷ Allñapa' añ apat libro ñeñt allo'tsen Isaías po'ñoñ ñeñt a'mtaye't Yompor po'ñoñ ahuať. Ñaña' toran libropa' all entan ñoñets ñeñt atet aquellcareť ñocop, ñeñtñapa' atet oten:

¹⁸ Napa' añ nechorrenaya Nompor Puecamquëñ tarro'mar ña nellsense' nach serrpare'taterre' ora allohuen acheñenesha' ñeñt atarr es palltetsa. Napa' añcha' neñotatterranet cohuen ñoñets ñeñt'pa' alloch qeshperret. Ñaña añecopña llesenserren attoch nach a'crratyerre' allohuen ñeñt mueročhetyetsa puellquënoť pueyočhreto. Nach eñotatterre' ñaña ñeñt ayottam'psareťetyetsa allochñapa' o'ch atoram'psareťterret. Nach eñotatterre' ñaña ñeñt ama entetso allochñapa' o'ch enterret. Ñaña ñeñt amuročhtatareťetyetsa nachña a'rroyataterrahuet.

¹⁹ Ñaña napa' añecopña llesenserren nach eñotaterrahuet te'pa' o' čhap allempo pocte' enteñ Yompor o'ch atarr ortatterranet pemuereña. Ñehua, arrpa' allohua ñeñt allpon lleyatanet Isaías po'ñoñ.

²⁰ O' lleyatuanetpa' o' alla e'tam'perran libro apuerran ñeñt šerbets all puerahuo. Allempoñapa' o' alla anorruerr. Allohuenña acheñenesha' ñeñt puerahuo'tsa'yen ñetñapa' atarr cohuanrrorteñet Jesús. ²¹ Ñaña' atet otanet:

—Atto' o' se'mhua añ ñoñetspa' te'ñapa' o' e'ñe čherr attoch e'ñe etsoterra ñeñt atet aquellcareť ahuatoteñ.

²² Allohuenña acheñenesha'pa' e'ñe cohuen eñora'yenet Jesúsocop. Atarr cočnesha' enteññañet po'ñoñ ñeñt atet serrpare'tatyenanet. Ñetñapa' atet otanna'tyenet:

—Erroťenoťuañaca'yeña atarr cočneshare' serrpare'tatyeny. Ñapa' añaca'ye José puechemer.

²³ Jesúsñapa' atet oterraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' čha semneñ o'ch soten añ ñoñets ñeñtecma muene' yotannena ama't ahuatoteñ: "Pa ñeñte'p a'crratañtetsa te'pa' o'ch pa'crrata e'ñe pa'ñeña",

tarro'mar sapa' añte' semnen o'ch atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴ Tarraña napa' po'ño'ch o'ch notas:

—Ñeñt a'mtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro ye'chenet all e'ñe ñet pa'netsreto. ²⁵⁻²⁶ Napa' po'ño'ch te'pa' añcha' neyerpatasa ñeñt atet pe't Elías ñeñt a'mtaye't Yompor po'ñoñ ahua't. Ñehua, allempopa' o' ma'pa char ñaña po'poñ puehmet charpa' nanac chares ama't mameshapa' ama huateno ñeñto'marña orrta mue'cheñets erracmañen all anetso ñeñt Israel all ye'che't Elías. Ñaña ama't shonteñ israelena'tar ñeñt rretorrraneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretorrraneshat' ñeñt e'ñe pamo'ts pen ña. Arra mueñe po'poñ anetso ñeñt pa'so'cheñ Sarepta ñeñt allara Sidón allo'tsen puesheñarr rretorrraneshat', ñaña'pa' ñeñta yenpos. ²⁷ Elloña o'ch alla neyerpaterrser po'poñ ñeñt atet pe't ñaña Eliseo, ñapa'cho'ña ñeñt a'mtaye't Yompor po'ñoñ ahua't. Ñehua, allempopa' shonte' israelena'tarneshat' ñeñt osyen puetsarñats ñeñt otenet lepra all anetso Israel all ye'che't Eliseo. Tarraña ama't atteñ ama't puesheñarro'tapa' ama a'crratereña Eliseo e'ñe all Israelo. Ñapa' aña a'crraterr ñeñt po'poñena'tar acheñ ñeñtpa' añ pa'so'cheñ Naamán ñeñtpa' po'poñ anetso'marneshat'; ñeñt pa'netser penpa' añ pa'so'cheñ Siria.

²⁸ Acheñenesha'ña allempo e'met ñeñt atet yerpatanet Jesús'pa' ñeñtña atarr atsrre'matahuet allohuenet ñeñt puerahuo'tsa'yen. ²⁹ Ñetña tantrra'tetpa' o' mueño'teret allot pa'netsreto't. Cheta'neret, allotpa' arr anmet allohua huañen pocoll allot e'ñe atserettena allcha' huapore'chet attoch muetsatachet. ³⁰ Tarraña ama't huapore'chetañ, Jesúsñapa' o' chope'chnerr ama't all shontena acheñenesha'. Ñaña'pa' all cheta'tnerra rro'chopa' o' ahuer.

Allempo Jesús'pa' entap̄ puesheñarr yacma ñeñt chorrena oneñe't

(Mr. 1.21-28)

³¹ Allempoñapa' o' alla ahuererr anetso Capernaumo allara Galilea. Pam'tarrña allempo chap ye'ñats allempo amesen judionesha' ñaña'pa' o' ahuo' po'prahueto. Allña'pa' ye'chatyesosan acheñenesha'. ³² Ñeñt atet ye'chatenanet, acheñenesha'ña'pa' atta cohuanrrorteñet. Tarro'mar ñapa' atet ye'chatenanet ñerra'mrrate' ñeñt allsensarettetsa Partsesho't.

³³ Puesheñarrña yacma ñeñt allo'tsen puerahuo, ñeñtña'pa' añ chorrenaya oneñe't. Ñaña rranare'tapa' atet otapan Jesús:

34 —¿Eso'mare'tcha'ña erroť peřosey Jesúso, ęa ñeñteř nazareto'marneshapř? Añecopte' pehuapa o'ch ęa'chencaterrey. Napa' o' neñotapař. Papa' atarr Partsoř añ pellsensene' Pompor ñeñť atarr nanac Parets.

35 Tarraña Jesúsapa' ama muenache o'ch eñorana'cha. Ñañaapa' atet och:

—Pemma, te'pa' čhořaña cačhpa'nerre'ña añ acheñer.

Oneñeťñaapa' čha atanman yacmapa' alla o'shshe'ma e'ñe all shontena allohuen acheñenesha'. Allempoñapa' o' cačhpa'ner e'ñe atta, ama erroť pa'nme. 36 Acheñenesha'ñapa' čha atarr toratspanet pueyočhret. Ñetñaapa' atet otanna'tyeset:

—Ta'mca'ye, erroťente'ca'yeña Jesús po'ñoñ, atarrepap't huomenc po'ñoñ pen. E'ñe atet ñerra'mrrate' ñeñť allsensaretetsa ñeñť atarr ahuamencatesha'. Ama't oneñeť erroť otenpa' atetčho' ęateñ. Po'ñočhca'ye te'pa' o' čha'nerr oneñeť.

37 Allempoñapa' erracmañen allampaño'mar serrpare'tyeset ñeñť atet pena Jesús.

*Allempo a'crratosan Jesús Simón Pedro pa'so'mue
(Mt. 8.14-15; Mr. 1.29-31)*

38 Allempoña Jesúsapa' čha'nerr puerahuot o' ahuo' ñaña Simón pa'paclo. Allña Simón pa'so'muepa' čha atsna'ten, čha atarr nanac hueraten. Otapet Jesús:

—Te' yapa' yemneñ o'ch ęa'crratos atsnañeť.

39 Allempoña Jesúsapa' o' ponmosana atsnañeťpa' čha a'huañañpsose'ña po'urateña. Allempoña o' metua po'urateñaapa' allenta tanta o' agapapanet e'ñe cohuen o' yema'tapanet.

*Allempo Jesúsapa' a'crraterran shonte' pa'namen
atsnañeťečhno
(Mt. 8.16-17; Mr. 1.32-34)*

40 Ñeñte yetrocma allempo o' emuena atsne'pa' acheñenesha'ña allohuenet ñeñť atsna'tyets pamo'tsesha' ñetñaapa' o' huapatyesnenet atsnañeť e'ñe Jesúsesho. Ñañaapa' na'yesapanet pot ñesheto puesheña'ttset, atfoña a'crratyesapanet allohuenet. 41 Ñaña shonte' acheñenesha' cačhpatatyesapanet oneñeť ñeñť puerranaroť otnomue' Jesús:

—Papa' ñeñteř e'ñe po'ñočh Parets Puechemereř.

Tarraña Jesúsapa' a'mtsoñeñtanet, ama muenataneto o'ch eñorana'tnomet, tarro'mar ñetpa' e'ñe eñotnomet ñapa' ñeñť Cristotets.

*Allempo Jesúsapa' serrpare'tatyesnoman acheñenesha'
erraparen Galileo'mar
(Mr. 1.35-39)*

⁴² Tsapaña o' puetarenpa' Jesúsña' ahua'muen a'yo all ama acheñempaño'ye. Acheñenesha'ña' e' name'ta'mueñet. Atteña' o' čhapa'muenet allo'tsen Jesús. Ñetña' ama mueneñeto o'ch erra sa'nmanet. ⁴³ Ñaña' atet otapanet:

—Napa' añ poctetsa nocop o'ch ahuen po'poñ anetso'mar, allpa'čo'ña o'ch neserrpare'tatiesnomanet ñeññ' cohuen ñoñets, o'ch neñotatiesosonet Yompor po'cohuenña ñeññ' attoch ayochreshattena ña, tarro'mar napa' ñeññecopña llesenserren Nompör.

⁴⁴ Atteña' o' serrpare'tatiesnoman acheñenesha' errapären Galileo'mar all apča'yenet po'prahueto.

5

Atto Jesús rromatosanet shonte' cac

(Mt. 4.18-22; Mr. 1.16-20)

¹ Allempoña po'pocheño Jesúsña' e'ñe sa'patopño ten, ñeñña sa'ppa' añ pa'so'cheñ Genesaretas. Allña' huacha'toña shonte' acheñenesha' o' čha ečhta'tatse'tanna'toset. Attoña ama't Jesús'pa' o'ča ečhta'toset. Ñetpa' añ muenenet o'ch e'mñotosñañet Yompor po'ñoñ. ² Jesúsña' all entosan epna noññ' e'ñe all sohua'puetso. Ñeñña po'taruas pene' ñeññ' rremuene' cacpa' ñetña' ama po'noñño'tsa'yeneto. Ñetpa' o' ahuanmuet a'yenet allcha' tsama'teneta' po'terraya. ³ Jesúsña' allpa' a'tapos puenarr noñño, ñeññ' Simón po'noññ. A'tapospa' otan Simón:

—Pechtamñsen mame' rročha'sonet.

Jesúsña' anorros noñño'pa' allotña yečhatosan allohuen acheñenesha'. ⁴ Allempoña serrpare'tatuanet, o' alla o'terranerr Simón:

—Te'pa' o'ch ahuep rročha'sonet epopa' o'ch alla peterrayerrerr, te'pa' perrma'ch shonte' cac.

⁵ Simónña' atet och:

—Yapa' o' Maestrocha' e'ñe yarepen torratsa terrayats e'ñe orrena ama't parra cac ama yerrmueñe. Te'ña paca' notene' o'ch alla neterrayerrerr ama'tpa' atetča' nepa' o'ch alla neterrayerrerr.

⁶ Allempoña' atetčo' pet, o' alla terrayerreterr. Terrayaña' shonte' rroman cac nanac aton, čha muene' rrarre'tatan terraya. ⁷ Atteña' agochet po'potantañ pamo'tset ñeññ' po'noñño'tsa'yen o'ch huapuet ñeñña' romapretahuet cac. O'ña čhapuet o' esha'tanatet cac noñño e'ñe epno'mar chorreres cac noñño, čha muene' esha'tatan noññ. ⁸ Allempoña atet eñch Simón Pedro ñaña'

poma'yorñecma ponmana Jesús, concorposa pa'rrpōt, all otos:

—Amach Partseshacha' allo'na peyemtatsenno tarro'mar napa' ñeñten atarr ochñaen.

⁹ Atef otan Jesús pueyorñoť tarro'mar eñoteñ ñeñť atto rreman shonte' cacpa' Parets atef p̄atene'. Ama't allohuen ñaña ñeñť epuet taruasenetpa' atarr nanac yoren. ¹⁰ Ama't ñaña Jacobo ñaña Juan ñeñť Zebedeo puechemerasha' ñeñť parro taruasen Simón, atarr nanac yoren. Allempoña Jesús pa' atef oterranerr Simón:

—Amach čha peyorenatsto. Ñeñť atef pepena ahuatoteñ e'ne' cac te'ñapa' atefcha' peperra e'nerre' ñaña acheñ ñeñťcha' p̄ame'ñaterra.

¹¹ Allempoñapa' ahuañperret o'ch etsotuerret allecma etsotenet. Ñetñapa' allempocma sohuanmuet allohuen ñeñť allpon echyenet. Allempoñapa' coteret Jesús attoch pueyochresha' perranet.

Atto Jesús a'crraterran puesheñarr yacma ñeñť aptsarñat
(Mt. 8.1-4; Mr. 1.40-45)

¹² Allempo po'pocheño Jesúsñapa' alla čherrerr po'poñ anetso. Allñapa' huapoña puesheñarr yacma ñeñť osen puet-sarñats ñeñť otenet lepra, atarr apočhtateñ. Entosan Jesús pa' alla rromañpsosya. Allña rromuenapa' allotña enamosan Jesús, atef otos:

—Ayochreshate ñerra'm p̄a muenatspa' p̄a ñeñťep̄ atarr ahua mencateshap̄ p̄a'crrataye'cherren allochñapa' attoch e'ñe cohuen entuerren acheñenesha'.

¹³ Jesúsña anretapa' allenta a'p̄lle', atef och:

—Napa' nemneñca'ye, metuerrepa'ña peptsarña attoch e'ñe cohuen enterreḡ allohuen acheñenesha'.

Yacmañapa' allorocma metuer pueptsarña. ¹⁴ Jesúsñapa' alla otererr:

—Te' atto o' na'crraterreḡpa' ama't e'ñe puesheñarrapa' amach p̄otap̄sa'tatsche. Corneshachña pegatena' all peptsarse'ť. Atef nane'ť Moisés ñoñets añ acheñrecop ñeñťcha' a'crratareťterrtsapa' te'ñapa' o'ch es p̄anom ñeñťcha' p̄apos all ñeñť Yomporecop. Allochñapa' attoch e'ñe cohuen enterreḡ allohuen acheñenesha'.

¹⁵ Elloña atarr nanac serrpare'tyeñet, o' erracmañen epa'hua atto' pena Jesús. Ñeñťo'marña shonte' acheñenesha' huačha'toñet attoch e'ññoñet po'ñoñ ñaña attoch a'crratyesapanet allohuen pa'tsnañeteret. ¹⁶ Tarraña ñapa' errotenopa' o'ch ahuer a'yo all ama acheñempaño yaye allcha' ma'yochena.

Atto Jesús a'crraterran ñaña ñeñt echarraña
(Mt. 9.1-8; Mr. 2.1-12)

¹⁷ Po'pocheño allempo Jesús pa' all ye'chaterranerr shonte' acheñenesha', allña allpononetpa' all anorrcha'tyen ñaña patantarr fariseonesha' ñaña ñeñt atarr etsotayenayeñ ñoñets ñeñt atet anaret judioneshacop. Ñetpa' pa'namen anetsoť huach'a'tyenet—Galileot ñaña Judeot ñaña Jerusaléñoť. Jesúsña pa' atarr ahuamencat peñ Pompor, attoña a'crratyesan shonte' ñeñt atsna'tyets. ¹⁸ Atteña o' huapatoñet ñaña echarraña, huapatam̄pset puechecna'pot. Ñetpa' añ muenenetañ o'ch be'toset o'ch e'ñe noset Jesúsesho. ¹⁹ Tarraña shonte' acheñenesha' ñeñto'marña ama eshcaye' abe'tosetona atsnañet attoch chapachet e'ñe Jesúsesho. Atteña pa' a'tapatoset enot pocollato. Allña pa' o' a'rrote'toset pate'prarr echet allotña a'suatam̄pset echarraña puechecnape'na. Attoña chapachet e'ñe rrocho allo'tsen Jesús. ²⁰ Jesúsña pa' eñotapanet ñetpa' atarr nanac yemteñet, ñeñto'marña atet otapan echarraña:

—Masheñcha' te'ña pa' po'chñarpa' o' ap'retna'huareta.

²¹ Otue' atetpa' añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop, ñetña pa' otatse'tet ñañeñeta:

—Esesha'huañaca'ye o' achm̄are'tanña Yompor. Arr pat-sropa' ama't puesheñarra ama eñalleña ñeñt peretnene' ochñarets, ñapñaña Yompor peretnene' ochñarets.

²² Jesúsña pa' eñotanet ñeñt atet otenet ñocop, ñañapa' atet otanet:

—Sapa' eso'mare'tcha'ña atet soctape'chatse'tyesña seyo'chro. ²³ Ñehua, sapa' cha soten ñeñt atet o' notue echarraña po'chñarpa' o' ap'retna'huareta, ñeñtpa' ama torrapahuoyaye. Sapa' añña atarr torrapo' senten attoch na'crrater choncha'ña ote': "Petantena, pechope'chnen."

²⁴ Ñehua, napa' o'ch neñotatas na Ñeñten Acheñetosets, napa' apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

—Te'ña napa' o'ch nota'p: Petantena, pechta'nen pemue' o'ch pechope'chnen, ahuene'p pepaclo.

²⁵ E'ñe otue' atetpa' echarrañaña pa' cha tantetsa e'ñe allorocma. Allohuenña acheñenesha' e'ñe entueñet. O' cheta'nenan po'mue' pa'ye'chochtateñesha' Yompor o' ahuen pa'paclo. ²⁶ Allohuenña acheñenesha' pa' cha atarr cohuan-rortapueñet. Attoña ñetpa'cho'ña atarr cohuentatyeyññañet Yompor. Allohuenetña pa' atarr nanac yorenet, atet otyenet:

—Te'pa' o' yenterr ñeñt ama't ahuatapa' ama yentareña ya ñeñt atarr cohuen.

Allempo Jesús pa' hua'ña'nman Leví attoch pueyochresha' per

(Mt. 9.9-13; Mr. 2.13-17)

27 Allempoñapa' o' ahuerrerr Jesús. All oñempa' all entnoman puesheñarr ñeñt po'taruas pene' o'ch cobrenan acheñenesha' quelle ñeñt gobiernocop. Ñeñtñapa' añ pa'so'cheñ Leví*. Alla anen allecma apchenet quelle ñeñt gobiernocop. Jesúsñapa' otosan Leví:

—Te'pa' p̄octa'n attoch neyochresha' neperreḡ.

28 E'ñe otue' atet Levíñapa' čha tantnomtsa o' coťan Jesús. Attoña ñapa' e'ñe sohuanman ñeñt allohuen pa'namen.

29 Allempoñapa' čhapa'muen ñaña pamtarr allempo Leví pa'paclopa' yečcatatan shonte' rreñets attoch coshame'tam̄pesyet Jesús. All rrallme'chapreteñ shonte' acheñenesha'. Allo'tsa'yen ñaña ñeñt parro yemtena Leví. Ñetpa'čho'ña ñeñtareta ñeñt po'taruas penet o'ch cobra'yeñet acheñenesha' quelle ñeñt gobiernocop, tarraña ñetpa' puehquēñoťe'na cobreñet acheñenesha' aton. Ñeñt rrallme'chapretene' Jesús. 30 Fariseonesha' ñaña ñeñt atarr etsotayenayeñ ñoñets ñeñt atet anaret, ñetñapa' sasare'teññañet Jesús pueyochresha'. Atteñapa' otaretet:

—Ta'm, eso'marte'ña serrallme'chapreteñña añ acheñeneshar ñeñt puehquēñoťe'na cobra'yene' acheñenesha' aton quelle ñaña epas acheñenesha' ñeñt atarr ochñañeneshačhno.

31 Atet e'manet Jesús, ñañaapa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atсна'tetspa' ñetñapa' čhocma añ e'nenet ñeñtča' a'crraterrahuet. 32 Napa' ama añecpaye' nohuapo attoch nečhore'tos ñeñt e'ñe atet entetsañ ñetpa' e'ño' cohuen es p̄a'yenet. Napa' añecopña nohuapa attoch nečhore'tos ñeñt atarr ochñañ entyetsa. Allochñapa' attoch o'ch coťape'cherret ello e'ñe cohuen Yomporecop.

Allempo Jesús pa' eñotatanet atetča' tore'tet Yomporecop ñeñt e'ñe po'ñočh sherbets

(Mt. 9.14-17; Mr. 2.18-22)

33 Ñetñapa' alla otereterr Jesús:

—Ñeñt Juan pueyochresha'pa' čhocma tore'tenet Yomporecop,† čhocma ma'yochenet. Ñaña fariseonesha' pueyochresha'pa'čho'ña attecma penet. Tarraña p̄aña peyochresha'pa'

* 5:27 Levípa' ñeñtara ñeñt sochenet Mateo. † 5:33 Añ tore'teñetspa' añecop o'ch yetorra Yomporecop. Amach añecpayaye atomat, ñeñt pa' añecpa mameshacop o'ch yequečpa'yerrar.

eso'mare'tña ama atteye' peneto. Ñetpa' atta es rratse'tyenet, atta es orryenet.

³⁴ Jesúsña'p' alla toma'ntaterraneterrpa' atet otanet:

—Ñeñt' ahua'ñarefēchno all rrallme'chapreteñet ñeñt' e'ñe errete' sena'tetsa, ama pocteyaye o'ch yotamet "amach es serra'yesatsto", tarro'mar ñeñt'pa' atet coshapreteñet ñeñt' sena'tetsa. ³⁵ Tarraña ñerra'm esempo machayota sa'nerranet ñeñt' sena'tetsa, ñeñt'ña parro yemuetyena allempoña ñetpa' e'ñe puellqueñōtet cāchpa'huerretcha' puerrar, amach arrenaye' enterreto. Ñeñt'pa' attochña tore'terret allempo Yomporecop e'ñe po'ñōch. Arrpa' allohua huañ ñeñt' atet Jesús toma'ntata ña sena'tostsa.

³⁶ Elloñapa' o' alla toma'ntaterraneterr ñeñt' atet yechen judionesha' arr patsro ñeñt'ō'marña atet otanet:

—Ñehua, ñerra'm yechen epma yeshtam, paterr emarr ñaña po'poñ mellashaña' amach yerrarratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet ye'patsechpa' ñeñt'pa' e'ñech orrena. Ama't yeshtam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emarropa' amach alla cohuenterro tarro'mar ñeñt' allo o' yellterpa' ama mellashañecmayaye, ñeñt'ō'marña amach ñeñt'atere.

Ñeñt'pa' attoña Jesús'pa' eñotatanet ña poctapña e'ñe et-serra. ³⁷ Jesúsña'p' alla toma'ntaterraneterr po'poñ ñeñt' atet ye'chena judionesha' o'ch ye'chcatenet pa'rrom orrot. Ñeñt'ō'marña atet otanet:

—Ama't puesheñarrofeyapa' amach yeshtatstoña vinos emasa mellasha'mañ orroto ñeñt' aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' chach a'ptsan orrot, vinosña'p' e'ñech shebhua, ñeñt'ña orrotpa' ama't mamesha'pa' amach es sherberro. ³⁸ Añña ñerra'm emasa vinos, arrcha'ña yeshe' emerra orroto ñeñt' aye'chcataret pa'rrom. Allochñapa' ama'tcha' chasa' vinospa' amach cha potsa'psoña vinos ñeñt'pa' allach ye'chen epo'mar.

Ñeñt'pa'cho'ña attoña Jesús'pa' eñotatanet ña poctapña e'ñe etserra. ³⁹ Po'poñone'tpa' alla toma'ntaterraneterr Jesús, ñeñt'pa' atet otaterraneterr:

—Ñeñt' e'ñe ye'chenaya o'ch orran co'nes ñeñt' atarr chase'pa' ñapa' ama mueno o'ch orran co'nes emasa, tarro'mar ñapa' atet oten ñeñt' atet ye'chena ahuatoteña' ñeñt' e'ñe cohuen enten.

6

Allempo Jesús pueyochresha' taso'tam̄pesyesnomuet trigo añe yetro allempocma amesen judionesha'

(Mt. 12.1-8; Mr. 2.23-28)

¹ Allempoña çherrerr allempo çhocma amesen judionesha'. Allempoña Jesús^{pa}' arr oñem chetso'mar epuet pueyochresha'çhno. Allempo oñenet chetso'mar pueyochresha'ñapa' taso'tam̄pesyesnomuet puechm̄a'tets trigo a'she'challme'chyesnomet attoť rrocllome'chachet o' rra'yesnomet. ² Ñeñtña patanta'tets fariseonesha'pa' che'ptare'tanet, atet otaretet:

—Eso'mare'tña atet sepena ñeñt ama pocteyaye o'ch atet yeḡa tarro'mar te'pa' añe yetro ñeñt atet anaret ahuatoteñ allempocmach yamesen.

³ Jesúsñapa' otanet:

—Sapa' ama'trra selleyareña añ ñoñets all oten ñeñt atet ḡa ahuat David allempo cheporra'nma epuet ñaña allohuen ñeñt cotene'. ⁴ Ña allempopa' be'tosos Yompor pa'paclo, allñapa' chetosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch esesha' rre'. Ñeñtḡa' añach ñapueť rrene' cornaneshachno; ñeñtḡa' e'ñe atet anuaret judioneshacop. Ñeñtña panpa' o' chetos David, rros, rratosan ñaña allohuen ñeñt epuet.

⁵ Allempoña alla oterraneterr Jesús, ñeñtḡa' atet otanet:

—Ñeñto'marña te'pa' o'ch notas, na Ñeñten Acheñetosets ñeñten allsensareten, naca'ye atet otets este' poctetsaña ñeñtcha' atet yeḡa añe yetro allempocma yamesen.

Allempo Jesús^{pa}' a'crraterran ñeñt chelletsa pot

(Mt. 12.9-14; Mr. 3.1-6)

⁶ Allempoñapa' çherrerr po'pocheño ñeñt yetñatsro allempocma amesenet. Jesúsñapa' be'tosuener judionesha' po'prahuo. Allñapa' yeçhatyesuenanerr acheñenesha'. Allñapa' allo'tsen ñaña puesheñarr yacma ñeñt cha chellena pot po'cohuenrot. ⁷ Acheñenesha'ña ñeñt atarr etsotayenayeyñ ñoñets ñeñt atet anaret epuet ñaña fariseonesha' ñetña allpa' Jesús^a atarr cohuana'tyenet attoch enteñeterr ñato'rraña o'ch a'crratenanerr acheñ añe yetro allempocma amesenet. Ñerra'm o'ch a'crratenanerr ama't puesheñarra acheñ añe yetro allempo amesenet, allempoñapa' esheccha' a'metam̄peñeta' añcha'taretesho. ⁸ Jesúsñapa' eñotanet ñeñt atet cotape'chatse'tyenet pueyoçhreto. Ñaña'pa' atet otan yacma ñeñt chelletsa pot:

—Aþon þatomos arrma.

Yacmaña huapapa' o' tomos all rrocho. ⁹ Jesúsña' atet atanet:

—Ñehua, napa' o'ch na'þto'tas: ¿Erra'tsena'tña ñeñ e'ñe pocte' senten ñeñcha' atet yeþa añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yepoñ ñeñ ama pocteyaye. Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche çhachña yemtsatach.

Ñetña' ama't puesheñarrotetapa' ama eseshaye' ana-puenayé entaye.

¹⁰ Ñaña' cohua' yesan allohuen ñeñ anorrçhets all, allempoña' otan ñeñ chelletsa pot:

—Te'pa' o'ch notap: Petapuerr þot.

E'ñe otue'pa' ñaña' allentepa'tcha' tapuerran pot, o' e'ñe cohuenterra pot. ¹¹ Fariseonesha'ña' ñeñña atarr atsrre'matahuet. Allempoña' co'tape'chatanna'tet, atarr o'pachet Jesús.

Allempo Jesús'pa' acran çharrasheña ñeñ puechetsa epsheña ñeñcha' llesensa'

(Mt. 10.1-4; Mr. 3.13-19)

¹² Allempoña Jesús'pa' o' alla ahuerrerr a'yo aspeno allcha' ma'yochena'. Allña' arepen ma'yochaya Pompor.

¹³ Tsapaña puetarenpa' agota'muenan allohuen ñeñ pueyochresha'çno pen. Allempo çha'cha'tet ñeshopa' ñaña' o' acrapan ñeñ çharrasheña ñeñ puechetsa epsheña ñeñcha' llesensa' ñeñcha' serrpare'tyetsa' allemeñ anetso'mar.

¹⁴ Ñeñ llesensa' ñeñpa' añe'çno: Simón ñeñ socherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe, ñaña Bartolomé,

¹⁵ ñaña Mateo ñaña Tomás ñaña Jacobo ñeñ Alfeo puechemer, ñaña ñeñ po'psheñeñ Simón ñeñ cananistanesha' ñeñ atarr torratse't pa'netsrecop,

¹⁶ allotpa' ñaña Judas† ñeñ Jacobo pa'mo'nasheñ, allotpa' ñaña po'psheñeñ Judas Iscariote ñeñcha' pomuerre' tsapa'tonet Jesús.

Allempo Jesús'pa' yeçhatenan shonte' acheñenesha'

(Mt. 4.23-25)

¹⁷ Allempoña huerra Jesús aspeno't epuet pueyochresha', tom'cha'tuerret all aspenet pacñe'tpener poño po'mopñero. Allña' o' çha'cha't shonte' po'potantañ acheñenesha' ñeñ pueyochresha' pen. Ñaña allo'tsa'yen shonte' acheñenesha'

* **6:14** Jacobopa' ñeñtara ñeñ sochenet Santiago. † **6:16** Judaspa' ñeñtara sochenet Tadeo.

ñeñt̃ huačhetsa allemeñ anetsoť —Judeoť ñaña Jerusaléñoť, ñaña sa'patopño'marnesha' ñeñt̃ huetsa Tiroť ñaña Sidónoť. Ñetpa' añecopña huačhenet o'ch e'mñoteret ñamet Jesús ñeñt̃ atet serrpare'ten ñaña añecpa'naña huačhenet attoch a'crratyesapanet Jesús patsnañeferet. ¹⁸ Ama't ñaña allohuen ñeñt̃ mueročhtatyen oneñeť ñaña'pa' e'ñe a'crratyesuapanet. ¹⁹ Allohuenña acheñenesha'pa' atarr mueneñet o'ch a'p̃lloset Jesús tarro'mar ñapa' ña atarr ahuamencatesha', e'ñe ña po'huamencoť a'crratyen an allohuen acheñenesha'.

Atto atarr cosheñtso'tsa'yen patantarr ñaña atarr llequēñtso'tsa'yen po'potantañ
(Mt. 5.1-12)

²⁰ Allempoña Jesús'pa' cohua'yesan ñeñt̃ pueyochresha' pen, ñaña'pa' atet otanet:

—Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterr̃sach Yompor po'cohuenña atto atarr ayochreshattena ña.

²¹ 'Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe señmataterre'.

'Ñaña sapa' ñeñtes yahuetsa te' e'ñe sellquēñoť ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe seche'taterre' socsheñoť.

²² 'Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo puesasare'teñoťetas sochatse'tenset tarro'mar sapa' na same'ñena Ñeñten Acheñetosets. ²³ Allempo atet penset ñeñt̃ ama cohuenayaye, sañapa' socshepa'ch nanac ñaña señoche'pa'ch shonte' ñeñt̃ o'patatensa Yompor pue'ntaño ñeñt̃cha'ña atarr socshaterre'. Ñehua, ñetpa' pa'tañneshañpa' attecma mueročhtatyesete't̃ ñaña ñeñt̃ a'mta'yesaye't̃ Yompor po'ñoñ ahuat.

²⁴ 'Tarraña te'pa' o'ch notas sa ñeñtes atarr ečllayoret̃es ñeñtes echene' ora allpon ñeñt̃ e'ñe socpa. Sapa' ñeñtescha'ña atarr llequēñtso'tsa'yenes tarro'mar esempopa' huañerrcha' ñeñt̃ socshatene'.

²⁵ 'Ñaña atarr llequēñtso'tsa'yenes ñeñtes atarr esocmañen es echyets allo e'ñe señmatena seyeteñoť. Cherrcha' allempoch atarr sepallterra ñeñt̃cha' serrar seperr.

'Ñaña atarr llequēñtso'tsa'yenes sa ñeñtes te'pa' e'ñe socsheñesha' seche'tatsetyena. Cherrcha'ña allempoch seyahuerra sellquēñoť.

²⁶ 'Ñaña atarr llequēñtso'tsa'yenes ñerra'm esempo allohuen acheñenesha' e'ñech cohuen entapretenset, e'ñe cohuen

eñosyenet socop. Tarro'mar ñetpa' atet pete't pa'tañneshañ ahuat, e'ñe cohuen eñosyese't añ acheñreneshacop ñeñt ama't ama Yomporeye' po'ñoñ a'mita'yese'te.

Atto Jesús'pa' ye'chatosanet amorrentpo'ch yeñch ñeñt ye'moñe'tyene'

(Mt. 5.38-48; 7.12)

²⁷ 'Sa ñeñtes ne'mñotene' o'ch notas ñeñtcha' atet sepa e'ñe cohuen, semueryach ama't ñeñt se'moñe'tene'. O'ch atet sepe' e'ñe cohuen. ²⁸ Ñaña ama't erra'tsen ñeñt sarnomare'tenaya sañapa' o'ch senamaterrñañ Yompor pa'nateña. Ñaña ñeñt sesasare'tene' sañapa' o'ch sema'yochampenanet. ²⁹ Nehua, atet ñerra'm esempo esesha' pue'moñe'teño'tetas o'ch tacllaset setsa'po, sañapa' poctepa'chña señch tacllerrserrepa' ñaña po'pshenñtañoñ. Ñaña ñerra'm esempo esesha' seprratamñpse' seshtam, sañapa' poctepa'chña señch puerratamñpsasetepa' seshtam ñeñt muenenet ama't ñaña po'pmañ seshtam allo septmatena. ³⁰ Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tamñpse' sañapa' amach alla senamatstere apuerrsetepa' alla. ³¹ Nehua, ñerra'm erra'tsente' e'ñe cohuen senten ñeñt semnen sa ñeñtcha' atet ponas po'psheñeñ, sapa'cho'ña e'ñech attecma señanet saña.

³² 'Ñaña sa ñerra'm aña semorrentena ñeñt atarr semorrentenaya saña, ñeñtpa' amach e'ñeye' sorrdatenoña ñeñt e'ñe po'ñoñ cohuentetsa, tarro'mar ñeñt ama ame'ñenayo Yompor ñetpa' aña morrentenet ñeñt e'ñe morrentenahuet ñamet. Aña atarr cohuentetsa ama't ñeñt ama yemorrentenayepa' o'ch yemorreñcha e'ñe cohuen. ³³ Ñaña ñerra'm aña e'ñe cohuen seyepa'yen ñeñt seyepa'yene' saña, ñeñtpa' ama e'ñeye' sorrdatenoña ñeñt e'ñe po'ñoñ cohuentetsa, tarro'mar ñeñt ama ame'ñenayo Yompor ñetpa' aña yenpa'yenet ñeñt yenpa'yenahuet ñamet. ³⁴ Ñaña ñerra'm añe'cpa es sartanna'tyena attoch ellopa' o'ch alla apuerrset saña, ñeñt atet sepenapa' ama e'ñeye' sorrdatenoña ñeñt e'ñe po'ñoñ cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeñt ama ame'ñenayo Yompor ñerra'm eñoteñet o'ch alla apare'tterret ñamet esheccha'ña archet po'psheñeñ. ³⁵ Tarraña napa' o'ch notas, sapa' añe'nachña semorrentena ama't ñeñt se'moñe'tene'. Ñaña sapa' añe'nachña seyepuen ama't ñeñt ama seyepuenaye. Ñaña sapa' añe'nachña es saretyena ama't ñeñtcha' ama sapuerraye. Ñerra'm atetcha' sepa Yomporñapa' apuerrescha' ello ñeñtcha' atarr socshatuerre'.

Ñapa' allempoch e'ñe puechemer perres, ñeñtara Yompor Ñeñt Nanac Parets. Tarro'mar ñapa' aña'naña muerena ama't ñeñtcha' ama coshaterraye ña, ñeñtara ñeñt ama cohuenaye' es petso. ³⁶ Sapa'cho'ña atarrepa'chña semueranna'ta e'ñe atet pena ñeñt Yeyomporer yepen atarr muerenya yaña.

E'ñe attotapa' amach yotteñe'channa'tatsto

(Mt. 7.1-5)

³⁷ 'Sapa' amach sotatsche po'psheñeñ "ama pocteyaye ñeñt atet sepa'yena", allochñapa' amach otuerrso samña Yompor ama pocteyaye ñeñt atet sepa'yena samña. Ñaña e'ñe attotapa' amach sottene'chatsche po'psheñeñ allochñapa' Yomporpa'cho'ña amach otteñe'chuerrso samña, chochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres samña. ³⁸ Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres samña. Shonte'ch nanac es apuerres, atet ñerra'mrrate' cho es e'chorratenset soshaco atet ñerra'm chop e'charef. O'ch chorrapa' o'ch a'rrapuet esheccha' esha'tereter po'poñ, ñerra'm o'ch chorrerrerra' o'ch pa'shmuet attoch e'ñe a'tamo'yonaset. Ñeñtpa' añ toma'ntena atto es apueney Yompor nanac aton. Ñaña errponcha' sañ po'psheñeñ, sapa'cho'ña e'ñech allpon apuerres samña Yompor.

³⁹ Allempoña Jesúsapa' atet toma'ntaterraneter, ñeñtpa' atet otanet:

—Ñeñt aporo'yetpa' ñapa' amach errotenot echa'nmano po'psheñeñ ñeñt parro aporo'yetecmuet. Tarro'mar ñerra'm atet penet, ñerra'm arroroñta echa'nmanna'tnomuetpa' epsheño'maret chach shora'nmuet arroroto. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach errotenot yoctape'chache po'psheñeñ ñeñt ama eñotenaye ñeñt cohuen enten Yompor.

⁴⁰ 'Ñeñt aychatarettetsapa' ama't puesheñarra amach errotenot metanetoña ñeñt allpon eñoten ñeñt yechatene'. Ama't allempo e'ñe aychatarettapa' e'ñech allpona yecha' ñeñt allpon eñoten ñaña ñeñt yechate'. ⁴¹⁻⁴² Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet sepa'yena sa; ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno samñapa' amach sotatscheña po'potantañ: "Masheñcha' napa' o'ch noctape'chaterreñ e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr

ñeñt ama cohuenaye' sepeno sa, allochñapa' attoch seño ch cotape'chate' samo'ts e'ñe cohuen. Ñeñtpa' añ toma'ntena o'ch senten po'psheñeñ pa'clloyo'tsen puepachña ama't sa secloyopa' allo'tsen tsach; ñeñtñapa' ama senteñe. Ñerra'm atetpa' amach erroteno't socheña po'psheñeñ: "Masheñcha' napa' o'ch nechterrnaḡ pecloyo't pepachña." Tarro'mar añ tsach ñeñt secloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach secloyo't allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyo't.

Allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'

(Mt. 7.17-20; 12.34-35)

43 "Tarro'mar allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ño ch ama cohuenayaye ñetñapa' añach orrtatyenet ñeñt ama cohuenayaye. Ñeñtpa' atetcha' netma'ntaterrsa: Ora allohuen ñeñt e'ñe cohuen narmetsoch, pue'merpa'cho'ña e'ñech cohuenare'. Añña po'pchañechno narmetsoch ñeñt ama cohuenayayepa' pue'merpa'cho'ña amach e'ñe cohuenayaye. 44 Ñeñto'marña attoña yeñoten erra'tsente' ñeñt e'ñe cohuenare' narmetsoch ñaña ñeñt ama cohuenayaye, pue'mero'tña e'ñe yechme'teñ. Ñaña yapa' e'ñe yeñoteñ ama arro'teye' yetoquënoña llo'm ajcho't. Ñaña ama arro'teye' yetoquënoña ap rrenagachot. 45 Ama't erra'tsena acheñer ñeñt e'ñe po'ño ch cohuen, ñapa' añcha'ña orrtaten ñeñt e'ñe cohuenare' cotape'chen pueyo'chro tarro'mar pueyo'chro allña shonte' cotape'chenan ñeñt cohuentetsa. Tarraña po'poñ acheñer ñeñt po'ño ch ama cohuenayaye, ñapa'cho'ña añach orrtaten ñeñt atet cotape'chen pueyo'chro ñeñt ama cohuenayaye tarro'mar pueyo'chro allña shonte' pa'namen cotape'chenan sosya'tsañ. Tarro'mar ñerra'm shonte' yotape'chen yeyo'chro ñeñt cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yotape'chen ñaña yeyo'chro ñeñt ama cohuenayayepa' ñeñtpa'cho'ña e'ñech ñeñta yemnen o'ch yeserrpare'teñ.

Atto Jesús toma'ntatana acheñ ñeñt e'ñe eñotene' ñeñt po'ño ch sherbets ñaña ñeñt ama eñotenate ñeñt sherbets

(Mt. 7.24-27)

46 'Sapa' eso'maruañaca'yeña sotenen napa' Sa'yochresha'tero' sepenen, sapa' amaca' choye' same'ñenno

‡ 6:44 Ñehua, Jesús añ toma'ntatanet uva ñaña higo ñeñt puenarem penet all pa'nyo.

ñeñt atet o' notuas. ⁴⁷ Allohuen erra'tsencha' huapatsa nesho ñeñtcha' name'ñenaya na ñaña ñerra'm e'mñotennanet neñoñ ñeñt atet cohuen neyčatenanet ñerra'm atet e'ñe penet, ñetñapa' atarrcha' eñotenet ñeñt e'ñe po'ñoč sherbets. ⁴⁸ Ñeñt acheñer ñeñt atet petsa o'ch netma'ntacha atet ñerra'mrrate' puesheñarr yacma ñeñt atarr es eñotets ñeñt tomatene' pocoll ñeñt e'ñech echarr penan pa'paquell. Ñaña' atarrcha' o'pono eñan pats attoch e'ñe echarr ñan po'quellpach. Atteñapa' o' chap allempo apellchena oñ, pocollñapa' ama a'mato apellche' tarro'mar quellpachpa' atarr huomenc atomataret. ⁴⁹ Tarraña po'potantañ ñeñt e'muene' neñoñ ñetña ñerra'm ama atteye' peneto ñeñt atet notenanet, ñetñapa' e'ñech attet ñerra'mrrate' puesheñarr yacma ñeñt ama es eñoto. Ñapa'cho'ña o' tomataneñ pa'paquell tarraña ñaña' ama atarr o'ponoye' eñanoña pats attoch e'ñe echarr ñan po'quellpach. Allempoñapa' apellcha oñ apellche'ñapa' čepa'tcha' a'matanišpos pa'paquell. Pocollñapa' e'ñe poctacma muello'tstosa.

7

Atto Jesús'pa' a'crraterran capitán pa'taruasañer; ñeñt capitán'pa' romo'marnesha'

(Mt. 8.5-13)

¹ Allempoña Jesús'pa' serrpare'tatuerranerr allohuen acheñenesha' ñeñt e'mñotene', ñaña'pa' ahuerrerr, o' čherrerr Capernaumo. ² Allñapa' allo'tsen puesheñarr yacma ñeñt solltar po'cap'taner, ñeñt'pa' romo'marnesha', ama judioneshayaye. Ñeñtña capitán'pa' echenan puesheñarr pa'taruasañer čha atsna'ten atarr pa'na'tena, ñaña'pa' atarr morrentenana pa'taruasañer. ³ Ñeñtña capitán'pa' allempo e'mare'tan Jesús o' alla čherr Capernaumo, ñaña'pa' o' mueñan patantarr acheñ ñeñt pompornesha' pen judionesha', o'ch oteñeta' Jesús atto agotateñ capitán o'ch a'crraterrñaña' pa'taruasañer. ⁴⁻⁵ Allempoña chapuet Jesúseshopa' ñetñapa' atet otoset:

—Ñeñt capitán'pa' ñapa' atarr cohuen acheñ, ñapa' atarr morrentenya ya ñeñtey israelena'tarey, ama't yeprahuapa' o' tomatatuosnay. Ñeñto'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Attoña atarr enamueñet Jesús attoch yenpuenana' capitán.

⁶ Allempoñapa' co'ta'nerranet Jesús. Chapmochet capitán pa'paclo, capitánñapa' mueñerranerr po'potantañ acheñ ñeñt parro yemtena ñeñtcha' otapue' Jesús atet oten capitán:

—Yapa' atet otapuey capitán atto'ch yotapaḗ: “Amach Ayochreshate atsrre'mo'chen nentatatstapape tarro'mar napa' ama cohuenayayno attoch pebe'tosapo'tam'pesna nepaclo. ⁷ Napa' ama cohuenayayno ñeñto'marña aña nemñen po'psheñeñ ñeñtcha' nepoctatapaḗ, ñeñtcha' potap correrrepa' na'taruasañer, ñaña'apa' acrrerroche'ch. ⁸ Tarro'mar napa' ñeñten ñeñt atet petsa ñeñt atet otenen ñeñt neyechenaya. Ñaña napa'cho'ña eñall ñeñt neyechena namña ñeñt nesolltarer nepen. Ñerra'm puesheñarr solltar noteñ: Papa' o'ch ahueḗ a'yo, ñaña'apa' o'chcho' ahuo'. Ñaña po'psheñeñ solltar ñerra'm o'ch noch: Papa' aḗon arr, ñaña'apa' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña'apa' allcha'cho' taruasa'muen. Ñeñto'marña napa' neñoteneḗ ñerra'm erroten potenpa' e'ñechca'ye atet pena.”

⁹ Allempo e'man Jesús ñeñt atet oten capitán, ñaña'apa' alla cohua'yesan allohuen acheñenesha' ñeñt co'ta'nene'. Ñaña'apa' atet otanet:

—Errotenotuañaca'yeña atarr yemtenna, ñapa' amaca'ye judioneshayaye. Napa' o'ch notas, ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya. Ama'tpa' correrrepa' pa'taruasañer.

¹⁰ Allempoña ñeñt pocte' Jesús o' ahuanerret capitán pa'paclo. Ñetña'apa' entuerrñañet capitán pa'taruasañer o' e'ñe correrra.

Atto Jesús'pa' tantaterran arromñañ ñeñt rretorrnanesha' puechoyor

¹¹ Allempo allponmaterrerr, Jesúsña'apa' ahuererr po'poñ anetso, ñeñt añets añ pa'so'cheñ Naín. Alla co'ta'huanererr pueyochresha' ñaña shonte' po'potantañ acheñenesha'.

¹² O' chapmochet all allotecma be'tenet attoch chapuet anetso. Alloñña'apa' cha'nma'cha'tos ñeñt anene' arromñañ, o'ch pampueñeta'. Arromñañña'apa' asheñorr ñeñt e'ñe po'patrro' pen pachor. Pachorña'apa' rretorrnanesha'. Shonte' acheñ ñeñt allo'marnesha' ñeñt llecapretnenaya rretorrnanesha' all co'ta'neñet. ¹³ Partsesha'ña Jesús allempo entapan rretorrnanesha' puellcapreteño'pa' atarr muerosya. Ñaña'apa' atet otapan rretorrnanesha':

—Amach no'cha peyahuatsto.

¹⁴ Allempoña ponmapana arromñañ, a'pllata'tosñañ po'cajon. Ñeñña' anene'pa' alla tom'cha'toset. Jesúsña'apa' otan huepuesha' ñeñt rromuets:

—Napa' o'ch notap̄: ¡Te'pa' o'ch petanterra!

¹⁵ E'ñe otue'pa' ñeñña arromña'pa' allenta tanterra cha eñorerrtsa. Jesúsñapa o' alla apuerrñañ pachor.

¹⁶ Acheñenesha'ñapa' atarr nanac yorenet. Po'yorño'otepa' atarr aye'chochtateññañet Yompor. Ñetñapa' atet otyenet:

—Te'pa' o' orrtonaya puešeñarr ñeññ atarr sherbets ñeññ a'mtene' Yompor po'ñoñ. Yomporpa' o' yerpuerrya ñeññey e'ñe pueyochreshay peney.

¹⁷ Attoña acheñenesha'ñapa' epaye' serrpare'tyesuerret ñeññ atet pa'yena Jesús. O' e'ñe epa'hua ora Judeo'mar ñaña ora erracmañen allampaño'mar.

Juan ñeññ apatañtatse'tpa' mueñan pueyochresha' Jesúsesho (Mt. 11.2-19)

¹⁸ Añña Juan ñeññ ayottan̄psaret, ñaña'pa' chocma serrpare'tateñ pueyochresha' ñeññ atet pa'yena Jesús.

¹⁹ Atteña Juanñapa' agotatan epsheña ñeññ pueyochresha' pen ñeññcha' mueña Jesúsesho ñeññcha' a'p̄to'tenaya' Jesús po'ñochte' ñapa' ñeññ Cristotets ñeññ atarr cohuenet ahuatoteñ, ñato' amate' ñeññeyayepa' añcha' cohuet po'psheñeñ ñeññcha' huapatsa. ²⁰⁻²¹ Allempoña ñetpa' ahuanmuet. Allempo chapuet allo'tsen Jesús, Jesúsñapa' añ torra'yena a'crratanatyese' shonte' acheñenesha' ñeññ

atsna'tyets ñeññ pa'namen muerochtatyenahuet. Ñaña ñeññ chorra'yena oneñeñ ñapa' o' e'ñe ca'chpatatuerranet oneñeñ. Ñaña shonte' aporo'yetechno ñaña'pa' o' alla e'ñe cohuatyesuerranet. Ñeñña Juan pueyochresha'pa' a'p̄to'toset Jesús, atet otoset:

—Juan ñeññ apatañtatse't Yomporecop yapa' ñeñña yemñene' o'ch yotenpa', ñato' pate'ña ñeññepte' e'ñe po'ño'ch Cristotets ñeññ atarr yecuen ahuatoteñ o'ch huapa; ñerra'm amate' ñeññeyayepa' o'ch e'ñe p̄otey allochñapa' añcha' yecua' po'psheñeñ ñeññcha' huapatsa ñeññ e'ñe Cristo.

²² Jesúsñapa' otapanet:

—Te'pa' o'ch ahuerres seserrpare'tatuercha' Juan ora allpon ñeññ atet sentyesuennana' arr ñaña ora allpon ñeññ atet se'myesuennana' arr. O'ch e'ñe seserrpare'tatuer ora ama't atto aporo'yetechnopa' te'ñapa' o' e'ñe necuatyesuerranet, ñaña ñeññ checa'repayetspa' te'pa' o' e'ñe chope'chyesuerret, ñaña ñeññ osyen puetsarñats, te'pa' o' e'ñe a'cohuentataretetuerret ñamet, ñaña paquetneshachnopa' ama't ñetpa' te'ñapa' o' e'ñe e'myesuerret cohuen, ama't ñaña ñeññ rromayets te'ñapa' o' alla atantataretetuerret, ñaña ama't ñeññ huocchañneshachno te'ñapa' o' e'ñe

neserrpare'tatuerranet añ cohuen ñoñets alloch queshperret ñamet.

²³ Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes: Atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

²⁴ Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt atet pe't ahuaña Juan, ñeñtapa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ mōrr. ²⁵ Ñaña amaca' añecpaye' sete'teña all o'ch sentena' ñeñt atarr coçnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçnesha'tetsa pa'shtam. Yapa' yeñoteñ arrña yentenña ñeñt atarr coçnesha' chorra'yenaya shetamuets añcha'taretepahuo. ²⁶ Sapa' añecopca'yeña sete'tña amayo o'ch sentena' all ñeñt po'ñoçh a'mtene' Yompōr po'ñoñ. Napa' o'ch notas, Juanpa' atto atarr sherbenan Yompōrpa' ello metana'tuenan allohuen ñeñt atto a'mtenet Yompōr po'ñoñ.

²⁷ Tarro'mar Juanpa' ñocōp eñose't Yompōr ahuañ. Ñehua, allempopa' atet otne't na ñeñt atetcha' pōsa Juan nocōp esempoch huapa, ñeñtapa' atet anare't ñoñets ahuañoteñ:

Papa' peñochepa'ch napa' o'ch nemñonañ puesheñarr ñeñtcha' ñanom otatsa ñeñtcha' pa'cohuentatyese' pōcōp allcha' pōñmos.

²⁸ Ñeñto'marña na te'pa' atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese' ahuaña acheñenesha' Yompōrecōp. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompōr atto te'pa' o' ayochreshattena, ñeñtña acheñerpa' atarrca'ye sherben, ello metanenan atto atarr sherben Juan.

²⁹ Allohuen acheñenesha' ama't ñaña ñeñt ashcañetyestse't atto atarr cobra'yese'te't quelle ñeñt gobiernocōp ñeñt apatyese' Juan, ñetñapa' atto e'mñotenetpa' otyeset: "E'ñe pōcte' atet oteney Yompōr." ³⁰ Tarraña fariseonesha' epuet ñaña ñeñt atarr etsotayenayeñ ñoñets ñeñt atet anare't judione-shacōp, ñetñapa' ama't e'ñe mamesha ama pōcteye' enteñeto ñeñt atet muenen Yompōr ñocōpue't, ñeñto'marña ñetpa' ama apataneto Juan Yompōrecōp allempo.

Partsesha'ñapa' atet oterraneterr:

31-35 —Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtase't ñapa' ama rrane'te ñeñt yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' cha sotyese't chote' chorreña oneñet, ama't e'ñe mameshapa' ama pocteye' señche'te. Te'ñapa' o' norrterra naña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsña'ten ñaña atarro' orraña'ten napa' año'chña e'ñe neyemuetyena ñeñt atarr ochña'tenesha' ñaña ashcarña'techno ñeñt atarr cobra'yene' acheñenesha' quelle. Tarraña ama't atet sepennoñpa' Nomporna e'ñe eñotene' ñeñt po'ño'ch atarr sherbets ñocop. Ñaña allohueney ñeñtey e'ñe puechemerasha' pohueney ñeñtey cotene' ña poctapña yapa'cho'ña e'ñe yeñotuenña ñeñt po'ño'ch atarr sherbets. Ñeñto'marña yorrtatyeññañ ñeñt cohuen enten ña. Sañapa' ama't e'ñe mamesha ama acshatpahuoyayso, e'ñe attes ñerra'mrrate' cheshaneshá' ñeñt chocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequerca'hua allo yochshame'tenapa' sañapa' amaña seshe'rarampenye; allotpa' ama't o' yepoctorare'tua ñeñt ya'chpeñtsorecho allo yellcanrrortenapa' sañapa' amaña sellcapretenyo."

Allempo Jesús'pa' rrallme'chos fariseo pa'paclo ñeñt sochetsa Simón

36 Allempoña Jesús'pa' o' huapoña ñaña puesheñarr fariseo o'ch otenana' Jesús rrallme'chapreteñepa' pa'paclo. Jesúsñapa' allenta coterran fariseo. Allempoña chapach pa'paclo anorrcha'toset parro allcha' rrallme'chapretos. 37 Puesheñarrña coyanesha' ñeñt allo'marnesha' ñeñt atarr ecañoresha't, ñaña'pa' o' e'mare'ch o' chap Jesús fariseo pa'paclo all rrallme'chen. Ñaña'pa' huapa, huapatan ñeñt atarr eñmosa't ñeñt nanac tsa'te'; huapatampes puetellmño ñeñt otenet alabastro. 38 Allña'pa' pueya'chpeñesha' huapa, ponmosana Jesús pa'tco. All atarr yahuosa, puese'ñapa' cha tsopsa'tos Jesús pa'tco. Allempoña chetosanña pue'chpa' alloña alla a'porrarra'tquèr, tso'tsteca'tosan pa'tac, she'tatca'tos eñmosa'fo. 39 Añña fariseo ñeñt hua'ñene' Jesús,

ñañapa' eñchpa' atet ot pueyočhro: Tarraña añ yacma ñerra'm po'ñočh ñeñt' a'mtenayen Yompor po'ñoñpa' eñotapaneñcha'ña añ coyanesha' ñeñt' a'pllene'pa' atarr ecañoreshať, amach muenacheñe o'ch a'pllosñañ ama't pa'tca. ⁴⁰ Jesúsñapa' atet otan fariseo:

—Napa' nemneñ o'ch masheñe Simóna notap̄ allpon ñoñets. Fariseoñapa' atet och:

—E'ñe pocte' nenteñ Maestrocha' o'ch p̄oten.

⁴¹ Jesúsñapa' alla toma'ntacha, atet och:

—Napa' o'ch not, allo'tsen puesheñarr acheñ ñeñt' artetsa quelle. Ñañaapa' artana puesheñarr acheñ nanac shonte' quelle ñeñt' otenet quinientos denario*; po'psheñeññapa' archa po'poñ quelle ñeñt' ama tama atonayaye ñeñt' otenet cincuenta denario. ⁴² Attoña epsheño'maretpa' ama esh-caye' tsa'tuerreto ñeñt' allpon teña'yenet tarro'mar ama ech-eneto alloch tsa'terret. Ñañaapa' e'ñe atta peretna'huerranet epsheño'maret, e'ñe attecma ama eseshaye' tsa'terrtso. Te'ña masheñe Simóna o'ch na'p̄to'tap̄, añ epsheño'mar ñeñt' amor-rentaret attoch peretnerranet allpon tebenet ¿erra'tsena't pentenña p̄a ñeñt' atarr morrentenaya ñeñt' peretnene', ñato' añte' acheñer ñeñt' tebene' quinientos denario amapa' añte' ñeñt' e'ñe cincuenta denario tebene'?

⁴³ Simónñapa' alla anapuerranerr Jesús, atet otererr:

—Ñehua, añte'ca'ye atarr morrentenaya ñeñt' ap shonte' quelle, tarro'mar ñapa' shonte' o' atta ap̄retnare'tterra ñeñt' allpon shonte' teben.

Jesúsñapa' alla otererr:

—Atetca'ye masheñe.

⁴⁴ Allempoña Jesúsapa' cohua' allente'tsen coyanesha' al-lo'tñapa' alla oterranerr Simón:

—Pecue' añ coyanesha' ñeñt' atet p̄osen. Allempo nečhap pepacllopa' p̄añaapa' ama es p̄apapno ama't oñapa' ama p̄apapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña p̄ueso'yo allempoñapa' alla a'porrarra'tquërren e'ñe ña pue'cho. ⁴⁵ Ñaña allempo nečhap pepacllopa' p̄añaapa' ama't pehuom̄cha'teño'tapa' ama petso'ttsa'pa'tapno. Tarraña añ coyanesha' e'ñe allempo nečhap pepacllo ama atta cačhposno allorocma tso'tsteca'tosen attoña orrtatosan puemorrenteña nocop.

⁴⁶ Papa' ama't coñe'tapa' ama es peshapono noño ama't olivoso'ya ñeñt' ama tsa'teyaye. Tarraña ñañaapa' eñmosafo she'tatca'tosen ñeñt' atarr tsa'te'. ⁴⁷ Attoña te'pa' atarr orrtatosnan ñeñt' atto morrentosna. Napa' neñoteññañ

* 7:41 Denariopa' quelle ñeñt' allpon tsa'tenet pamtarr ñeñt' taruasets all pa'nyo.

ama't shonte' po'chñar te'ñapa' o' e'ñe aḗretna'huare'tta. Tarraña po'psheñeñ ama't ama tama ochña'teyaye attoña aḗretna'huare'tta po'chñarpa' ñaña'apa' ama e'ñeye' morrentapanoña ñeñt' o' peretnerrñañ po'chñar.

⁴⁸ Allempoña Jesús'pa' otan coyanesha':

—Te'ña po'ño'chpa' o' e'ñe aḗretna'huare'tterra ḗo'chñar.

⁴⁹ Allempoñapa' ñeñt' parro rrallme'chenet, ñetñapa' otanna'tyeset:

—Esha'huañaca'yeha añ yacmar atto peretnerraña ochña'rets.

⁵⁰ Jesúsñapa' alla oterranerr coyanesha':

—Papa' atto atarr peyemtenna ñeñtña o' a'queshpaterreḗ. Te'ñapa' o'ch ahuerreḗ e'ñe peñmañesha'.

8

Atto coyanesha'chnopa' es apa'yese'te't Jesús ñeñt' allpon echenet

¹ Allempoñapa' chopeñe'cherrerr Jesús erraḗaren serrpare'tyesnomue' cohuen ñoñets attoch chap allempo ayochresha'ttena Yompor. Erracmañen chopeñe'chyen, ora allemeñ anetso'mar all shonta'yena acheñenesha' ñaña all ama tama shonteyaye acheñ. Allñapa' co'ta'huanererr pueyochresha' charrasheña ñeñt' puechetsa epsheña.

² Allñapa' co'ta'huanemñ ñaña patantarr coyanesha'chno ñeñt' a'crratyesua Jesús ahuañmo'cha, puesheña'tetspa' ñeñt' ca'chpatatyerr oneñe't ñeñt' chorrahuete't, po'psheñne'chnopa' ñeñt' a'crratyes ñeñt' pa'namen atснаñtsor muero'chtatyesahuete't. Puesheñarr coyanesha' ñeñt'pa' añ pa'so'cheñ María Magdalena. Ñeñt' Mariarpa' Jesúsñapa' pueca'chpatataroñ can'cherr oneñe't.

³ Nehua, po'psheñeñ coyanesha' añ pa'so'cheñ Juana. Puerrollarñapa' añ pa'so'cheñ Chuza añ po'taruas pen atto sherbenan an'cha'tare't Herodes. Allo'tña po'psheñeñ coyanesha' ñeñt' co'ta'nene' Jesús ñeñt'pa' añ pa'so'cheñ Susana. Ellopa' shonte' po'potantañ coyanesha'chno ñeñt' es apa'yese'te't Jesús ñeñt' allpon echenet ñet.

All toma'ntatanet Jesús ñeñt' a'parre'tene' puerets (Mt. 13.1-9; Mr. 4.1-9)

⁴ Allema'teñ anetso't hua'cha'tyena acheñenesha' ñeñt' cha'chets Jesúsesho. Allempoñapa' o' cha shontoset nanac, Jesúsñapa' serrpare'tatapanet, ate't toma'ntatapanet:

⁵ —Ñeñtña a'parrene' puerets ñaña'apa' ahua' allcha' a'parre'tyenana' puepuer. All a'parre'tyeñ patanta'tetsñapa' alla chapyes toño'mar, ñeñtña'pa' atta atmama'tyes

acheñenesha'. Allñapa' hua'cha'tyesa ñaña o't e'ñe añyallme'chuenana' puerets. ⁶ Po'poñe'chñoñapa' alla çhapyes mapuetro'meso'mar. Ñeññapa' mameshapa' cheparesuañ, tarraña mameshapa' alla hueya'huerra tarro'mar all mapuetro'mesopa' ama eñalle ama't coñe'ta oñ ñeñtcha' a'yamosam'pse' narmets ñeñt o' cheparesua all. ⁷ Po'potantaña pueretspa' alla çhapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cllatuer. ⁸ Po'potantañe'chño ñeññapa' arr çhapyes all e'ñe cohuen patso. Ñeññapa' e'ñe cohuen chepares. Allempoña atesha'tuapa' atarr aton ellon're'tyes. Puecha'tetspa' çharroch çharra' pue'llomer.

Allempoña serrpare'tatuanet atetpa' o' alla o'terraneterr. E'ñe huomencocma eñorana'tanet, atet otanet:

—Ñeñfes po'ño'ch ne'mñotene', çhaponasepa'ch seyo'chro ñeñt atet netma'ntatensa añ ñoñets.

*Atet otanet Jesús ñeñte'cop atet toma'ntatyenanet
(Mt. 13.10-17; Mr. 4.10-12)*

⁹ Allempoña pueyochresha'pa' o'chet Jesús:

—Ta'm ¿es'te'ña petma'ntatenya? Yañapa' ama yeñoteñe.

¹⁰ Jesúsñapa' alla o'terraneterr:

—Sa te'pa' Yomporña o' muenaterres attoch seño'terr ñeñt ama eñotpahuoyaye ama't ahuatoteñ atet penaña Yompor po'cohuenña atto atarr ayochreshattena ña. Tarraña po'potantañe'chñoña ñeñt atta es puecha'yetsa, ñocpuetpa' ama eñoteñeto ñeñt atet atma'ntataret ñoñets. Attoña ama't enteñetañ ñetñapa' amach es çhenahueto pueyo'chreto. Ama't e'mueñetañ amaña çhenanetoña pueyo'chreto ñeñt atet ye'chateney Yompor po'cohuenña.

*Arrpa' all eñotatanet Jesús ñeñt toma'ntatenanet ñeñt
a'parre'tene' puerets
(Mt. 13.18-23; Mr. 4.13-20)*

¹¹ Ñehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet. ¹² Añ puerets ñeñt çhapyesets toño'mar ñeñtpa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotuetpa' allorocmach huapa oneñet o'ch alla puerratañperranet Yompor po'ñoñ pueyo'chreto. Attoña amach mueneñeto o'ch ame'ñenet, attochña ñetpa' amach a'queshpataretterreto. ¹³ Ñaña ñeñt çhapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech pocsheñesha' aguerrñañetañ Yompor po'ñoñ.

E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrrate' narmets ñeñt chepuets mapyo amach eñalle puerech. Tsapatoneña ñerra'm o'ch huapanet topateñets, ñetñapa' o'ch alla caçhpueññañet Yompor po'ñoñ. ¹⁴ Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. Ama'tcha' çhapanetañ mame' pueyoçhreto, tarraña ñetpa' allo'nach senet aña atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es echyenet attoch allo e'ñe cosha'yenet. Attoña ñetpa' amach errotenot orrtatoñeto ñeñt atarr sherbets Yomporecop. Ñetpa' e'ñe atteta ñerra'm narmets ñeñt çha ca'matuerr ajma' amach errotenot ellom're'tyeseto. ¹⁵ Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñetñapa' atto ame'ñeññañet Yompor po'ñoñ amach puesereto çhoch eñochet pueyoçhreto attoch e'ñe cohuen ma'yochroñet Yompor po'ñoñ. Chocmach orrtatyenet ñeñt atarr sherbets Yomporecop amachña çha caçhpueñeto. Attoña ñetpa' e'ñe atet penet ñerra'm narmets ñeñt atarr aton ellom're'tyets.

Arrpa' all toma'ntatanet lampareñ atto çhoyo'tampeney
(Mr. 4.21-25)

¹⁶ Jesús pa' alla toma'ntaterraneterr po'poñonet; ñeñtpa' atet otanet:

—Ñerra'm esempo ya'llchaten lampareñ ñeñtpa' ama añecpaye' ya'huortateñe o'ch alla ye'rramanper coyño. Ñaña ama añecpayaye o'ch alla yener o'ponot yemayeñnaçho. Añecopña ya'huortatenña lampareñ o'ch yene' enonet attoch çhoyo'tam'pesuan allohuen acheñ ñeñt be'tosçhets o'pono pocollo. ¹⁷ Tarro'mar allohuen ñeñt ama eñotpahuoyaye ama't ahuatoteñ, te'ñapa' o'ch e'ñe orrtataretterra attoch e'ñech eñotatarefetuerret e'ñe poctacma.

¹⁸ Ñeñto'marña sapa' señotenate' e'ñete' po'ñoçh cohuen se'mñoteññañ Yompor po'ñoñ ñato'pa' amate'. Esha'te' çhena pueyoçhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esha'ña ñerra'm ama çhenaneto pueyoçhro tarro'mar ñetpa' ama po'ñoçhaye' aguëññañeto Yompor po'ñoñ ama't allpon eñotenetañ pueyoçhro ñeñtña' çhach puerratanperranet Yompor.

Allempo huapoña Jesús pachor ñaña pa'mo'nasheñnesha'
(Mt. 12.46-50; Mr. 3.31-35)

19 Allempoñapa' huapa Jesús pachor epuet ñaña pa'mo'nasheñnesha'. Chapuet allpa' shonte' acheñnesha' ñeñt emchorrenaya Jesús. Ñeñto'marña ñetpa' ama eshcaye' entosetoña Jesús allame'tets. 20 Allempoña acheñnesha' ochet Jesús:

—O'ca'ye huapaña pachor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

21 Ñañaapa' atet otanet:

—Allohuen ñeñt e'mñotene' Nompore po'ñoñ ñetña ñerra'm atet pohuenet ñeñt atet oteney, ñeñtña e'ñe po'ñoñ nachor nepen ñaña ñeñtña e'ñe nemo'nasheñ nepen.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mt. 8.23-27; Mr. 4.35-41)

22 Allempo cherrerr pamtarr Jesúsñapa' a'tapos noñto epuet ñaña pueyochresha'. Ñañaapa' atet otanet:

—Te'pa' o'ch ahuañpsey yomta'n.

Allempoñapa' ahuañpset noñto. 23 Allempo ahuañpset Jesúsñapa' alla ma' noñto. All muenpa' machayota huomenquëshatañpesnomuet. Emo'yare'ñapa' cha esha'tena noñto, atteñapa' choramoch oñ noñto cha muene' esha'tatan noñt. 24 Atteña pueyochresha'ñapa' ponemyet Jesús all muenpa' opueret, atet ochet:

—Maestro, po'ñoñchuachca'ye yoclla'huerrate'.

Jesúsña tanterrapa' e'ñe po'ñoñoña a'mtsoññetuerran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muecheñtamperret. 25 Allempoña Jesúsapa' otanet:

—Eso'mare'tña sapa' ama e'ñeye' seyemtenno.

Ñetñapa' cha atarr nanac yorenet. Atta cohuanrrorteñet ñetñapa' atet otanna'tyeset:

—Ta'mca'ye añ acheñerpa' esona'tarte'ca'ye. Atarrepata' es a'mchechaten, ama't po'ñoñoñapa' a'mchechaterran huomenquësha' ama't ñaña emo'yare' oñ.

Atto gadaro'marnesha' ñeñt chorrena oneñeñpa' huapa Jesúsesho

(Mt. 8.28-34; Mr. 5.1-20)

26 Allempoñapa' o' etsotaset yomta'n all senet. Allpa' añ pa'ney pene' gadaro'marnesha' alla yot Galileot. 27-29 Allña sohuosa Jesús noñtoñpa' allñapa' huapoña puesheñarr yacma ñeñt allo'marnesha', tarraña ñapa' añ chorrenaya oneñeñ patoner. Ñeñtñapa' ahuatoteñ atta chopeñe'chyen muelle'mcot,

ama shetamteno. Ñapa' alla ye'chena all pampueñet arromña'te'chno ama pocolloye' ye'cheno. Ñehua, oneñe'pa' allempo rromuenan yacmapa' epaye' ottatse'tache't allempoteñ. Pamo'tsesha'ñapa' ahuo'ch rromuetpa' o'ch huanquëtañ attoch cohuanipeñet. Ñaña'pa' 'chach tsepe'tuanman allo huanquëññañet pot ñaña pa'tac oneñe'ñapa' ahuo'ch'cho' matach a'yo amayo. Allempoña entapan Jesús'pa' rrana'nma huomenc, mata Jesúsesho, rromosñaña allame'tets. Allempoña Jesús'pa' otosan oneñe'ñeñ't chorrenaya yacma:

—Te'pa' o'ch peca'chpa'ner añ acheñer.

Ñeñ'tña chorrena oneñe'pa' ñaña'pa' atet otapan Jesús:

—Eso'maruachca'ye Jesús'o pa'tsrre'mo'chtana'tosen, pa'pa' ñeñ'tep Ñeñ't Nanac Parets Puechemerep. Te'pa' notapa'pcha' amach pecoñ'chatatstosno.

³⁰ Jesús'ñapa' alla oterranerr ñeñ't chorrena oneñe't:

—Papa' ¿eso'tña peso'chena?

Ñaña'pa' atet oterranerr Jesús:

—Napa' añ neso'cheñ Legión.

Ñehua, añ so'chñets ñeñ't otenet shonte' nanac, tarro'mar ñeñ't nanac patoner oneñe't ñeñ't chorrenaya. ³¹ Ñehua, oneñe'te'chnoñapa' atet otare'tapet Jesús:

—Amach arra pemñatstosye o'pono coñ'cha'puetso.

³² Ñehua, allpa' a'yente'tsa'yen shonte' chañ'cho'chno ñeñ't rratse'tyets aspentone't. Ñeñ'to'marña oneñe'te'chnopa' atet otare'tapet Jesús:

—Ñerra'm 'choch muene' erro'ten pe'poseypa' arrña pemñaye'chosey chañ'chesho allochñapa' o'ch yechorra'yerr ñaña chañ'cho'chno.

Jesús'ñapa' allenta otanet:

—Ama'tca'ye orrasca'ye.

³³ Allempoña oneñe'te'chnopa' ca'chpa'huaneret yacmapa', alla chorretererr ñaña chañ'cho'chno. Chañ'cho'ñapa' allempo chorrosya oneñe'te'chnopa' 'chepa'tcha' matrra'tua allohuen ñegone't shor'cha'tuos allo'tpa' e'ñe ño'shrra'tuosa oño.

³⁴ Acheñenesha'ña ñeñ't cohuanipene' chañ'cho allempo eñchet atet pa' chañ'cho o' shor'cha'tua oño, ñetñapa' allenta matrra'tet ñamet pueyorño' ahuanmuet anetso. Allña'pa' serrpare'tyesoset ñaña ora allohuen allampaño'mar.

³⁵ Acheñenesha'ñapa' allenta ahuanmuet ahuo'ch enteñeta'. O' cha'cha'tet Jesúseshopa' allña'pa' entoset yacma ñeñ't chorre't oneñe't. Alla anen allame'tets Jesús pa'tco't ashtama't. O' eñoterra o' cohuenterra. Ñetñapa' cha atarr mecha'na'toset.

³⁶ Añña ñeñ't entene' Jesús atto ca'chpatatenan oneñe't acheñ, ñetñapa' allenta serrpare'tatapet ñeñ't hua'cha'ttsa anetsot.

³⁷ Allempoña allohuen acheñenesha' ñeñt̄ yečha'yetsa all ñeñt̄ gadaro'marnesha' ñetñapa' pueyorñofet atet̄ otoset Jesús:

—Te'pa' o'ch ahuerreṽ arrot.

Allempoña Jesúsapa' a'terr noñto o'ch ahuer. ³⁸ Yacmaña ñeñt̄ chorre't̄ oneñeñ ñañaapa' allenta otan Jesús:

—Napa' nemneñca'ye te'pa' o'ch nocterreṽ.

Tarraña Jesúsñapa' ama muenache, atet̄ och:

³⁹ —Allaṽach, te'pa' o'ch ahuerreṽ pepaclo ṽpamo'tsesho'mar o'ch peserrpare'tatuerranet ora allohuen atto Yompor atarr yenposeṽ.

Ñañaapa' atet̄ otue Jesúsapa' atet̄cho' ṽa. Allenta ahuer serppare'tyesnerrets ora anetso'mar atto Jesúsapa' atarr nanac yempos.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt̄ a'ṽlla'nmue' pa'shtam

(Mt. 9.18-26; Mr. 5.21-43)

⁴⁰ Allempoña alla čherr Jesús añeñta'n allot ta ahuaña. Acheñenesha'ña allpa' e'ñe pocsheñesha' agapapueñet tarro'mar o' atarr cohueret o'ch huerra. ⁴¹ Allempoña allpa' huapoña puesheñarr añcha'taret̄ añ pa'so'cheñ Jairo. Ñapa' ñeñt̄ puesheñarr ñeñt̄ añcha'tarettetsa judionesha' po'prahuo. Ñañaapa' alla rromosa Jesús pa'tcoṽpa' atet̄ otosan Jesús:

—Napa' nemneñ o'ch ṽocterren nepaclo, ⁴² tarro'mar ne-señ ñeñt̄ nepatrrorpa' čha atsna'ten o' a'po'ntsa'mocha.

Ñehua, ñeñt̄ po'señpa' allponte' echenan po'charña čharra' puechena epa char.

⁴³ Allempo coṽa'ner Jesús coṽa'huaner ñaña shonte' acheñenesha' čha emchorratse'tnomet, čha to'mama'tneñet. Allñaapa' coṽa'nmanet ñaña puesheñarr coyanesha' ñeñt̄ atsna'tets. Charra' puechena epa char ñeñt̄ atto čhocma yella'yena. Ama't epaye' partata o' a'gasta'huahuan po'čllayor atto parteñet amaña eseshaye' a'crraterraye.

⁴⁴ Ñañaapa' all coṽa'nenan Jesús pa'che'ñoṽ, allñaapa' a'ṽllerrñaña' pa'shtam pa'rre'pemoṽ. E'ñe a'ṽlla'hue' pa'shtampa' allorocma maserrña po'rراس, o' metuer ñeñt̄ atto muerochtena.

⁴⁵ Jesúsñapa' atet̄ otanet:

—¿Esesha'tña o' a'ṽlla'nmuenña neshtamot'?

Ama eseshaye' eñorats. Pedroña ñaña ñeñt̄ epuet yemtena, ñetñapa' atet̄ ochet Jesús:

—Maestrocha' p̄apa' penteñte' shonte' acheñenesha' ñeñt̄ al-
lotemeña peto' mama' tnene'. ¿Eso' mare'tña p̄otenña esesha'te'
p̄a'p̄llene' peshtamot'?

⁴⁶ Tarraña Jesús'pa' atet̄ otterraneterr:

—Napa' neñoteñ po'ñoçh puesheñarr acheñ e'ñe puen-
nenñot̄ a'p̄llenen neshtamot̄ tarro'mar napa' neñotena napa'
o' na'crrach e'ñe na nehuamencot̄ atto a'p̄llenen.

⁴⁷ Coyanesha'ña allempo ñapa' eñotena amach errotenot̄
a'ñasoto. Ñapa' ÷ha pa'shmuena pueyorñot̄ concorposa
Jesús pa'rrp̄ot. Allñapa' e'ñe a'meta'huosan ñapa' añecopña
a'p̄llenan Jesús pa'shtam attoch correrra e'ñe cohuen.
Allñapa' atet̄ otan allohuen acheñenesha':

—Na allempo na'p̄lloñ Ayochreshat̄ pa'shtampa' ñeñt̄ña
na'crraterre' allorocma.

⁴⁸ Jesúsñapa' atet̄ otan coyanesha':

—Papa' nesñeshacha' atto atarr peyemtenna na attoña
te'pa' o' e'ñe na'crratnomuep̄. Te'ñapa' o'ch ahuerreḡ e'ñe
peñmañesha'.

⁴⁹ Allempo eñorena atet̄pa' allñapa' huach'a'ta ñeñt̄ huetsa
añcha'taret̄ Jairo pa'pac̄lot̄. Ñetña huapuetpa' atet̄ otoset
Jairo:

—Peseñpa' o'ca'ye rroma. Te'ñapa' amach allo'na
p̄a'tsrre'moçhtana'tatsche Maestro o'ch coterreḡ pepac̄lo.

⁵⁰ Jesúsña ama't e'man atet̄ otoset Jairo'pa' ñañapa' atet̄ otan
Jairo:

—Papa' amach ÷ha pe'charrtatatsto peyoçher, nachña e'ñe
peyemta attoch correrraña peseñ.

⁵¹⁻⁵³ Allempoñapa' ahuanmuet Jairopahuo. Chapuet
pocollo allñapa' allo'tsa'yen shonte' acheñenesha' all
yahuanrrortenet, ya'na'teñet arromñañ. Jesúsñapa' otosanet:

—Amach atarr seyahuatsto. Añ shopshesha'pa' amaca'ye
çho'ye' rromueno ÷haca'ye muen.

Ñetña pachmare'teñoçetpa' atta che'tatsetyesapet
tarro'mar ñetpa' e'ñeca'ye eñoteñet çhoca'ye rromuen.
Allempoña Jesúsñapa' ama muenatano allohuen acheñenesha'
o'ch be'toset allo'tsen arromñañ. Ñapa' aña muenat Pedro
ñaña Juan, ñaña Jacobo ñaña arromñañ puepapar ñaña
pachor ñeññaña epuet be'tosçha'toset allo'tsen arromñañ.

⁵⁴ Allempoña Jesús'pa' rremota'tosan shopsheshañ pototpa'
po'huamencocma otos:

—O'ch nesñe notoseḡ, te'pa' çhoḡpa tanterrtsa.

⁵⁵ E'ñe otue' atet̄pa' allentepa'tcha' o'rrerrerra ÷ha tanter-
rtsa. Jesúsñapa' otanet:

—Te'pa' o'ch serratallme'cher.

⁵⁶ Puepaparña ñaña pachorpa' ñetñapa' atta cohuanr-
 rorteñet. Jesúsñapa' atet otanet:

—Amach esesha' sotaþsa'tatsto ama't puesheñarra ñeñt atet
 o' norrtatennasa' sepaçlo.

9

*Allempo Jesús^{spa}' llesensan pueyochresha' çharrasheña ñeñt
 puechetsa epsheña*

(Mt. 10.5-15; Mr. 6.7-13)

¹ Allempo çhapa'muen allempo Jesús agota'muenan
 pueyochresha' çharrasheña ñeñt puechetsa epsheña.
 E'ñe apçha'huet ñeshopa' ñañapa' atarr ahuamencat
 þa'yesanet, attoña apamet ñaña llesens attoch caçhpatatyeret
 oneñeñ acheñenesha' ama't erra'tsena ñeñt atarr
 mueroçhtatyenahuet. Ñaña ahuamencat þanet attoch
 a'çrratyaset acheñenesha' ama't erra'tsena ñeñt osyenahuet.

² Attoña llesensanet attoch ahuanemyeset pa'namen
 anetso'mar serrpare'tyesnomuet Yompör po'cohuenña atto
 atarr ayochreshattena ña. Ñaña añecpa'naña llesensenanet
 attoch a'çrratyesoset acheñenesha'.

³ Ñaña atet otapanet:

—Amach es sanmatsto ama't coñe'ta allcha' se-
 chopeñe'chyes—ama't secarra, ama't sebolsa, ama't ñeñtçha'
 serra'yesnom ama't seçllayora ama't e'ñe epma seshtampa'
 amach sanmatsche sechope'çpayo.

⁴ Alla oterraneterr:
 —Ama't errach pocollro seçhap allach sommosa allponmat
 esempohuach ahuerreserr po'poñ anetso. ⁵ Ñerra'm erra
 anetsro ñeñt allo'marnesha'ña ama cohuenaye' agapasetopa'
 o'ch señterrerr ñaña allot. Ñerra'm allempo señterrerrña
 ñaña allot ñeñtña setco'tsa'yen pañe'te' patspa' çhoch
 sepa'shetca'tyesnomña setac. Attochña allo'marnesha'pa'
 o'ch señotatnomanet ñetpa' amaca'ye pocteye' entenanetoña
 Yompör.

⁶ E'ñe ñeñta otaretetuetpa' ñetñapa' allenta ahuanmuet o'ch
 chopeñe'chyeset erracmañen anetso'mar. Allñapa' añ ser-
 rpare'tyesnomuet cohuen ñoñets alloch yequeshperra. Ñaña
 all chopeñe'chyeset erracmañenpa' allña a'çrratyeseñmet
 ñeñt atsna'tyets.

*Allempo e'ñe cohuen es orrtatyets Jesús, Herodesñapa' çha
 otapañ Juanañe' o' tanterra ñeñt apataye't acheñ Yomporecop*
 (Mt. 14.1-12; Mr. 6.14-29)

⁷ Ançha'tareña Herodespa' ñañapa' atet e'mare'tenan Jesús
 ora ñeñt allpon atet þa'yena. Ñañapa' çha atarr llequëna
 tarro'mar patanta'tets acheñenesha'pa' atet otyenet te'pa' o'
 orrterra Juanañ, o' tanterra rromot. (Herodespa' añña

atarr llecatene' tarro'mar ñapa' ña pechate' Juan ahuaña.) Ñeñto'marña ñapa' ñeñta nen pueyočhro atto acheñenesha' otenet ahuo' tanterra Juan rromot. ⁸ Po'potantañña' atet otyenet:

—Elíasoñca'ye o' orrterra.

Po'potantañña' ñetpa'cho'ña atet otyenet:

—Añpa' ñeñtca'ye a'mtaye't Yompor po'ñoñ ahuañ, te'ñapa' o' tanterra rromot.

⁹ Amicha'taretña Herodespa' atet ot:

—Napa' neñotena naca'ye pechate'ña Juan ahuaña. Ese-sha'huañaca'yeña ñeñt orrtatene' ñeñt ama't ahuañapa' ama yentare ñeñt atet atarr ne'mare'ten.

Ñeñto'marña ñapa' atarr mueneñ o'ch entan ñeñt Jesúsotets ñeñt orrtatyene' ñeñt ama puentare acheñenesha'.

Allempo Jesúsapa' rratenan shonte' acheñenesha'; ñeñtña acheñenesha'pa' allo'tsen amnaroch mil

(Mt. 14.13-21; Mr. 6.30-44; Jn. 6.1-14)

¹⁰ Allempo huacherra Jesús pueyochresha' ñeñt llesensa'yes ahuaña. Ñetña'pa' o' chačherret Jesúsesho, serrpare'tatiesueret Jesús allohuen allpon atet pa'yeset allemeñ anetso'mar. Allempoña Jesúsapa' ahuanman pueyochresha' e'ñe ñaptōchayet, chapuet all ama acheñempaño yaye all allame'tets anetso, ñeñt anetspa' añ pa'so'cheñ Betsaida. ¹¹ Tarraña acheñenesha'ñapa' allempo e'mare'chet o' ahuanmuet all, ñetpa'cho'ña allenta ahuanmuet ñamet. Chača'tet Jesúsesho ñañapa' e'ñe cohuen agapanet. Allña'pa' serrpare'tatiesapuerraneterr atet penaña Yompor po'cohuenña atto atarr ayochreshattena ña. Ñaña allpa' a'crratiesapuerranerr ñeñt atsna'tyets.

¹² Atteñapa' o' ellerren. Añña pueyochresha' charrasheña ñeñt puechetsa epsheña ñetña'pa' oteñeta' Jesús:

—Te'pa' o'ch pemueñhuer acheñenesha' ahuanemyerretapa' anetso'mar allampaño allcha' mayesuerret allcha' entyesuerret puerrar ñeñtcha' rra'yesuerret. Tarro'mar te'pa' arro'tseney all ama acheñempaño yaye.

¹³ Tarraña Jesúsña'pa' otan pueyochresha':

—Sachca'ye apa'yesahuet ñeñtcha' rret.

Ñetña'pa' atet ochet:

—Ya arrpa' amaca'ye es yecheno ama't coñe'ta. Yapa' e'ñe amnara pan yechen ñaña epatoll cac. Ñato' yapa' o'ch ahuey anetso allcha' yerañtēna' rreñets ñeñtcha' yerrach allohuen shonte' acheñenesha'.

¹⁴ Nehua, allo'tsen shonte' acheñenesha' amnarochte' mil yacmanesha'. Allempoña Jesúsapa' atet otan pueyochresha':

—Te'pa' o'ch soch acheñenesha' anorrcha'tyasetepa' e'ñe ñopa'ttsocmuet, e'ñech amnaroche'ttsocma çharrapa'tets anorrcha'tyaset.

¹⁵ Pueyochresha'ñapa' atet'cho' pet, anorrcha'tatyaset acheñenesha' allohuenet. ¹⁶ Allempoña Jesús'pa' agapan ñeñt amnar pan ñaña epatoll cac, cohua' enonet parasyoso'tamñsan pan. Allempoñapa' shota'tan pan, shetse'tan ñaña cac. Apanatyesan pueyochresha', ñetñapa' epatyaset allohuen acheñenesha' ñeñt anorrcha'tyets all. ¹⁷ O'ña epa'huet allempoña o' rrallme'chet allohuenet, e'ñe yetrra'tuahuet. O'ña yetuahuetpa' çha a'pchatyaset ñeñtñapa' a'yapaçheret. Ñeñtña a'yapaçherretpa' çhepa'tcha' chorrats çharra' puechena epa cañter e'ñe tamo'yare'.

Atto Pedropa' otan Jesús p'apa' p'aña Yompor Puechemerep ñeñtep Cristotosets

(Mt. 16.13-19; Mr. 8.27-29)

¹⁸ Allempoña pamtarrpa' allo'tsen Jesús all ma'yochena e'ñe ñaptochayet pueyochresha' epuet allo'tsen. Allñapa' atet otan pueyochresha':

—¿Errofena't otyenenña allohuen acheñenesha' napa' eshante'?

¹⁹ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtatset Yomporecop. Po'potantaññapa' atet otyenpet, p'apa' Elíasopo'te'. Po'potantaññapa' atet otyenpet p'apa' ñeñtepo' ñeñt a'mitaye't Yompor po'ñoñ ahuat. Te'ñapa' ahua' alla petanterra perromñoñ.

²⁰ Allempoñapa' alla a'pto'terraneterr:

—Sañapa' ¿errofena't sotenenna sa?

Pedroñapa' eñoratsapa' atet och:

—Papa' ñeñtepca'ye Parets Puechemerep ñeñtep Cristotosets.

Atto Jesús'pa' eñotatan pueyochresha' ñapa' amsaretterrach

(Mt. 16.20-28; Mr. 8.30-9.1)

²¹ Jesúsñapa' alla oterraneterr:

—Ama't puesheñarroña amach esesha' sotaþsa'tatsto napa' ñeñten Yompor Puechemeren ñeñten Cristotets. E'ñe po'ñoç notenes amach esesha' sotaþsa'tatsto.

²² Elloñapa' alla oterraneterr:

—Napa' Ñeñten Acheñetosets, atet anare't nocop, nanaccha' na'mueroçtatare'tterra. Amach esesha' pocteye' nenteraye—ama't ñeñt pompornesha' pen allohuen judionesha', ama't ñeñt pa'mcha'tare'ternesha' pen allohuen judionesha'

po'cornaneshar, ama't ñaña ñeñt etsotayenayeñ ñoñets ñeñt atet anaret judioneshacop. Ama't ñetpa' amach eseshaye' neyemterraye. Attachña napa' muetsataterretcha'. Tarraña poma'pantañopa' o'ch alla tantaterren Nompor.

²³ Elloñapa' alla oterraneterr allohuenet:

—Ñerra'm esesha' muenene' o'ch coterrnet na e'ñe po'ñoçh attoch neyochresha' neperranet, añ poctetsa sehuanmuetepa'ña ñeñt atet muenenet e'ñe ñocpueta. Attochña ñetpa' o'ch e'ñe toma'nteret ñeñt chechnene' po'corsoch ama't pate'tets yet allcha' mueroçhtet ñamet. Attochña coterrnet e'ñe poctacma. ²⁴ Tarro'mar ñerra'm esesha' e'ñe aña muenenet o'ch correna atomat attoch e'ñe coshenet arr patsro, ñetñapa' çhach a'chencatet ñañeñeta. Tarraña ñerra'm esesha' e'ñe pocte' entene' o'ch sohuanmuet ñeñt atet muenenet ñeñt e'ñe ñocpueta arr patsro attochña ñetpa' añach ma'yoçhret ñeñt cohuentetsa nocop, ñeñña acheñerpa' corretsach pocsheñeshocmañen tayoteñ e'ñe errponañohuen. ²⁵ Ama't errponenaparen esocmañen es yeyoratsetyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen ñeñtñapa' ama't coñe'tapa' amach es sherberrye. ²⁶ Tarraña ñerra'm erra'tsencha' nepenquënaya na te' neñoñpa'çho'ña çha apencoçhen entennanet, napa'çho'ña nepenca'huerranetcha' esempoch nohuerra. Po'ñoçh napa' Ñeñten Acheñetosets nohuerrach e'ñe na necohuenñot, ñeñtara Nompor po'cohuenña epan ñaña po'millañoñeñaneshar ñeñt e'ñe torra'yetsa Partsocop. ²⁷ Po'ñoçhca' te'pa' o'ch notas: Patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarr ayochreshatterra ña.

Allempo Jesúsapa' po'poñetañpana pueyochresha'
(Mt. 17.1-8; Mr. 9.2-8)

²⁸ Allempo met allponmat ñato' po'psocmatño Jesúsapa' ahuanman pueyochresha'; añ anem Pedro ñaña Juan ñaña Jacobo. Arr anmanet aspeno allcha' ma'yochena' Jesús. ²⁹ Allña ma'yochosapa' machayotepa'tcha' po'poñetañpsosanet. Pa'clloyotpa' çha po'poñ orrtosanet. Pa'shtamohuen atarr huallama'to poptosa. ³⁰⁻³¹ Allñapa' machayotepa'tcha' orrtanet Moisés ñaña Elías. Ñetpa'çho'ña atarr cohuen orretyenet. Allñapa' serrpare'toset epuet Jesús. Ñetpa' añ serrpare'tenet atto o' çhappoch attoch rroma Jesús o'ch ahuer pue'ntaño. Ñetpa' atet otyenet, arrcha' atet peret Jerusaléño. ³² Ñehua, Pedro ñaña ñeñt epuet allo'tsen,

ñetñapa' ama't atarr moñe'tenetañpa' alla e'ñe achñesuerret, attoña entoñet Jesús po'cohuenña ama't ñeññ parro tomchen. ³³ O' ma'naterrmocha Moisés ñaña Elías attoch sa'neret Jesús. Pedroñapa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch ya'tomatonas ma'ppahua quèrpachet, puepahuarrpa' p̄ocopcha', po'ppahueñpa' Moisésocopcha', po'ppahueñpa' Elíasocopcha'.

Pedropa' pueyorñoñ atfa muene' otatse't, ama eñocherotencha' ot. ³⁴ Allempo eñorena Pedropa' cha orrtosahuet os chepa'tcha' a'pomam̄psosanet. Atto a'pomam̄psosanet ospa' ñetñapa' atarr nanac yorenat. ³⁵ Cha e'morrtostsa ñoñets osot; ñeññña ñoñetspa' Yompor otosahuet; ñeññpa' atet ot:

—Añmapa' ñeññ no Nechemer ñeññ atarr nemuerena ñeññcha' e'ñe cohuen se'mñoterr.

³⁶ Allempo o'huañ e'morrrta ñoñetspa' o' e'ñe ñap̄tamerra Jesús. Pueyochresha'ña allempopa' atfa a'nasoteñet. Ama't puesheñarrofetapa' ama otuerreto ñeññ atet o' entuahuet.

*Atto Jesúsapa' a'crraterran cheshachor ñeññ otaten oneñeñ
(Mt. 17.14-21; Mr. 9.14-29)*

³⁷ Tsapatña allempo huachenet aspentotpa' allñapa' shonte' acheñenesha' ñeññ huacha'ttsa ñeññ pocterrahuet. ³⁸ Allo'tsen puesheñarr yacma ñañaapa' atet otosan Jesús:

—Maestro, napa' atarr nemneñ o'ch pentennana' nacñe'ter. Napa' e'ñe ñeññtetollapa nepatror. ³⁹ Ñapa' ñerra'm esempo rromueñ oneñe'tpa' chach rranare'ta o'ch otachpa' o'ch ata'tach patso chach amtan pa'po'. Attoña atarr at-serrpatse'tateñ. Ama mueno o'ch a'rroyer. ⁴⁰ Napa' o' no-tuosnañña peyochresha' o'ch ca'chpatateret oneñe't tarraña ñetñapa' ama erro't peto attoch ca'chpatateret oneñe't ñeññ atarr muero'chtatene'.

⁴¹ Jesúsñapa' atet ot:

—Sapa' ñeññes acheñres ama't mameshapa' ama ayemtenaye' sentpenno, chach po'poñ sentuena seyo'chro nocop. O' allponmatuanen allo'tsenen arr patsro napa' atfa atarr na'huantennas, atfa necuenes ñato' atto'tpa' o'ch same'ñerrna.

Allempoñapa' atet otan yacma ñeññ otene' o'ch a'crratoñ puechemer:

—Te'pa' o'ch p̄anmon pechemer arr.

⁴² Allempo anem̄ Jesúseshopa' oneñe'ñña' alla rromuer-ranerr cheshachor o' alla otatererr alla ata'tatererr patso. Jesúsñapa' atet otapan oneñe't:

—Te'pa' po'ño'ch o'ch nota'p̄, peca'chpa'nerñaca'yeña añ cheshachor.

Allempo a'crrater Jesús o' alla apuerrñañ pompor.
 43 Allohuen acheñenesha'pa' atta cohuanrrorteñet. Ñetpa' e'ñe eñoteñet Yompor po'partsoña orrtetsa.

Arrpa' atto Jesúsapa' eñotaterraneterr puepocheño ñapa' chocmach muetseret
 (Mt. 17.22-23; Mr. 9.30-32)

Atta epaye' cohuanrrorteñet atarr cohuen enteññañet po'partsoña, tarraña Jesúsña'pa' alla yerpaterranerr pueyochresha', ñeñtpa' atet otanet:

44 —Te'pa' se'mñoten e'ñe cohuen, amach sepsatsternano neñoñ ñeñt atet notenes te'. Na Ñeñten Acheñetosetspa' pomataterrnetcha' attochña errotuancha' perrnet.

45 Ñeñña ñoñetspa' ñetña'pa' ama't puesheñarrofetapa' ama eshcaye' eñotenaye' enteñeto tarro'mar ama chena' allempoch chapamet pueyochreto. Ñetña pueyorñotetpa' ama eseshaye' a'p'to'tenaye este' otenanetña atto eñorana'tenanet.

All eñotateney ñeñt acheñer e'ñe po'ño'ch atarr asherben enten Yompor
 (Mt. 18.1-5; Mr. 9.33-37)

46 Po'pocheñoña pueyochresha'pa' e'ñe ñagattseta otanna'tyeset:

—Ta'mca'ye erra'tsenoteyte'ñaca'ye ñeñtey atarr sherbets ñeñtey atarr añcha'taretoyen enteney acheñenesha'.

47 Jesúsña'pa' e'ñe eñotenanet ñeñt atet cotape'chatse'tyenet ñet pueyochreto atto e'ñe cohuen entyenet e'ñe ñañeñeta. Ñaña'pa' cheshatolla chore'tpa' tomach e'ñe ñesho, 48 allempoña'pa' atet otanet:

—Erra'tsenotes sa ñerra'm e'ñe cohuen saguëñ ama't ñeñt ama asherbenaye' enteneto atet ñerra'm añ cheshatoll tarro'mar sapa' na same'ñena, na'ñaña e'ñe cohuen saguën. Elloña ñaña erra'tsenotes sa ñeñtes naguëne' na, ama e'ñe naptocheye' saguëno, añe'ñaña saguënnan Nompore'ñeñt nellensene'. Tarro'mar ñerra'm erra'tsencha' pocte' entene' o'ch yenpuenan ama't ñeñt ama esoye' enteneto, ñetña'pa' atarrcha' po'ño'ch asherben entenanet Yompor.

Atto eñotateney ñeñt ama choye' yepatare'tenaye ñeñña po'ño'chpa' e'ñe parrocmayeyenpanna
 (Mr. 9.38-40)

49 Allempoña pueyochresha' ñeñt Juanpa' atet otan Jesús:

—Maestro, ya ahuaña'pa' atet yeñch puesheñarr yacma ñeñt caçhpatatene' oneñet acheñ. E'ñe puechore'teñotep pa peso'chño'pa' oneñetpa' caçhpa'nerran acheñ. Yaña'pa' ama

pocteye' yeñche tarro'mar ñapa' ama parroye' yeyemteno.
Ñeñto'marña yapa' yoch:

—Amach atet pepatsto.

⁵⁰ Jesúsñapa' atet otanet:

—Amachca'ye sepatare'tatsche tarro'mar ñerra'm ama cho epatare'tenye yama ñeñña po'ñoçhpa' e'ñeca'ye parrocmayeyenpanna.

Allempo Jesúsapa' cotape'chaterran cohuen pueyochresha' epsheña, ñeñña' Jacobo ñama Juan

⁵¹ Chapmoch allempoch o'ch alla ahuer Jesús pue'ntañopa' ñaña' atarr sechena o'ch ahuer Jerusaléño. Ñeñto'marña mueñan pueyochresha' ñeñcha' otrra'tatsa ⁵² o'ch ahuet samario'marnesha' pa'netsro o'ch e'noset muets allcha' chap ñama Jesús allcha' amesnom epuet pueyochresha'. ⁵³ Tarraña samario'marnesha'ñapa' ama mueneto o'ch agaparettet all pa'netsreto, tarro'mar ñetpa' eñoteñet arr sechenet o'ch ahuet Jerusaléño.* ⁵⁴ Ñeñto'marña Jacobo ñama Juan ñetñapa' atet ochet Jesús:

—Parteshacha' ¿ama't pocte' penteñe yapa' o'ch yenam huapuepa' tso' entot? allochñapa' ñeñcha' a'poyatatuerrahuet ñeñcha' e'ñe a'chencatuerrahuet ñeñ atet pe't Elías ñeñ a'mtaye't Yompor po'ñoñ ahuat.

⁵⁵ Jesúsñapa' atta cohuanetpa' atet otanet:

—Ñeñ atet soctape'chatse'tyenpa' ama't mameshapa' ama pocteyaye. Ama't señoteñeña Yomporpa' ama atteye' cotape'chatenyeña Puecamquëñoñ. Ñeñ semnen sapa' po'poña cotapñats. ⁵⁶ Na Ñeñten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'qeshpatos allohuen acheñenesha'.

Allempoñapa' o' metaçha'tet allotpa' ahuanmuet po'poñ anetso.

Allempo Jesúsapa' yeçhatan ñeñ muenene' o'ch coter (Mt. 8.19-22)

⁵⁷ Po'pocheñoñapa' allempo oñemyenet toño'mar allña' poctanet puesheñarr yacmapa' ñaña' atet otapan Jesús:

—Na te'pa' nemneñ o'ch noctare'tyeseñ ama't errohuanencha' pechophe'chyes.

⁵⁸ Jesúsñapa' atet och:

—Te'pa' napa' peñotencha' ama't nepaclapa' ama necheñe all neyçhenañ. Ro'quëppa' chocma eñall pa'pon allecma yeçhena.† Oteçhnopa'çho'ña chocma eñall pa'ma' allecma

* **9:53** Ñehua, yapa' yeñoteñ samario'marnesha'pa' ama mueno o'ch amo'tstana Jerusaléño'marnesha' ñeñfara judionesha'. † **9:58** Ñehua, Jesús añ toma'ntacha zorra ñeñf berrotets all pa'nyo.

yecha'yenet. Tarraña naña Ñeñten Acheñetosetspa' ama eñalle ñeñt e'ñe nepaquëll nepen allcha' neñanena.

⁵⁹ Po'pocheñoña Jesús'pa' atet oterranerr po'psheñeñ acheñ:

—Te'pa' o'ch p̄octa'n attoch po'ño'ch neyochresha' neperreḡ.

Tarraña ñeñtña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho, o'chña nepampa'huera' apañpa' allempochña nohuerrapa' o'ch noctaḡ.

⁶⁰ Tarraña Jesús'pa' atet och:

—Acheñenesha' ñeñt ama yerpa'penaye Yompor, ñetñapa' pampanna'tetepa' parro arromña'ecmuet. Tarraña p̄ocoppa' ñeñteḡ o' peyerpuera Yompor añ p̄octetsa o'ch auyeseḡ serrpare'tyese' Yompor po'cohuenña ñeñt atto atarr ayochreshattena ña.

⁶¹ Po'pocheño allempo serrpare'ten Jesús epuet ñeñt ame'ñenaya, ñeñtña acheñerpa' atet otan Jesús:

—Napa' Ayochreshate po'ño'chcha'ca'ye noctaḡ. Te'pa' ato't nasuerra' nepacillo attoch neso'tera' namo'tsesha'; allempochña alla nohuerrerrpa' o'ch noctaḡ.

⁶² Jesúsñapa' atet och:

—Ñeñt ama e'ñeye' ma'yo'chrenaye attoch torrenet e'ñe cohuen Yomporecop, ñeñtña acheñerpa' amach e'ñe cohuenaye' sherbeno attoch e'ñe epatuan Yompor po'cohuenña ñeñt atto atarr ayochreshattena ña. Ñeñt acheñerpa' atetcha' netma'ntacha: Ñerra'm esesha' orrene' etamapets attoch etaman pats e'ñe cohuen pa'charr pa'mro, ñerra'm pa'che'ñonña cohua'nom ama't mameshapa' amach etsotanoña etamapets attoch e'ñe pa'charr etaman pats allcha' nare'tatse't pa'mro.

10

Atto Jesús'pa' mueñan pueyochresha' ñeñt cançhroch çharrasheña ñeñtcha' otatsa

¹ Allempoña Partseshapa' alla llesenserranerr po'potantañ pueyochresha' cançhroch çharrasheña ñeñtcha' otrra'tatsa o'ch serrpare'tyesnomuet. Ñetpa' atetcha' pa'nmuet e'ñech epsheña'tsocma tet. Arrcha' ta'yeset ora allohuen anetso'mar ñaña ama't allampaño'mar; allochñapa' allcha' oñem ñaña tsapatonet Jesús. ² Ama ahuaneneta' Jesúsñapa' atet otanet:

—Shonte' narmets ñeñt nanac ellom're'tets ñeñtcha' a'yapaçhetañ. Tarraña ataruasañña ñeñtcha' a'yapaçhe'pa' ama atarr atonayaye. Te'pa' añcha'ña sanamoñ pamo'mte' mueñanepa'ña ñeñtcha' a'yapaçherrets pa'mro. Ñeñt'pa' atet toma'ntatanet Jesús atto atarr shonte' acheñenesha' ñeñtcha' ame'ñerrtsañ tarraña ñeñtcha' ame'ñaterrahuetpa' ama atarr

atonayaye. Añcha'ña yenam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar. ³ Ñaña sapa' ñerra'm o'ch ahues te'pa' señochocha' po'ñoch chocmach eñall ñeñtcha' se'moñe'te' ama't sapa' amach cho errof sepenanetañe ñet. Ñeñto'marña notenes te'pa' o'ch nemñas e'ñech attes ñerra'm carrnero o'ch ahuo' allo'tsen ma'yarrochno. ⁴ Ñaña amach sanmatsto quelle, ama't sebolsa, ama't po'ptaña sesapatpa' amach sanmatsche. O'ch ahues sema'yorñecma. Ama't esesha'ch sehuomñcha'tyesnom toño'marpa' amach alla so'chtatsto. ⁵ Allempoch sechap ama't erra'tsena anetsro all sesen, ama't erra'tsena pocoll allcha' sechappa' ñanomcha' atet seposa. E'ñe sehuomñcha'teñoñ ñeñt apacllatesha'pa' o'ch senamatosñañ Yompor pa'nateña. Ñerra'm ñetña po'ñoch e'neññañet Yompor pa'nateña, Yomporñapa' a'natenanetcha'. ⁶ Tarraña ñerra'm ñetña ama e'neññañeto Yompor pa'nateñapa' Yomporñapa' o'ch alla apuerres sa pa'nateña. ⁷ Ñeñte pocollro allcha' e'ñe cohuen agapaset allach sa'posa. Ñeñt rrenet ñet ñeñtcha' rratapaset, ñeñtach serros samña. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemeñ pocollo'mar, allach e'ñe sommosa puepahuarro. ⁸ Ama't erra'tsena anetsro allcha' secherrerr allcha' e'ñe cohuen aguèrrseterr, ama't errofena rreñets apasetpa' ñeñtach serros. ⁹ Allñapa' sa'crratyesoscha' ñaña ñeñt atsna'tyets. Allcha' seserrpare'tatyesosanet, atetcha' sotos: "Te'pa' o' yechapatonas Yompor po'cohuenña ñeñt atto ayochreshattena ña. Aña palltetsa o'ch same'ñera attoch e'ñe chaponasa seyocho." ¹⁰ Tarraña ñerra'm erra anetsro allcha' sechap ñeñt allo'marnesha'ña ama cohuenaye' agapaseto, allña toño allecma chopeñe'chyenet ñet o'ch señotatnomanet. Ñeñtpa' atetcha' sotnomanet: ¹¹ "Ama't pats ñeñt o' cheta yetco arr sa'netsro, te'ñapa' o'ch yepa'shetca'tyesnoma attoch señocho sapa' ama't mameshapa' ama pocteye' entenso Yompor. Tarraña ama't atteñpa' te'pa' o'ch neñotatnomues Yompor po'cohuenña autsa chaponasañ ñeñt atto ayochreshattena ña."

¹² Allempoña Jesúsapa' alla oterranerr pueyochresha' allempo ama seneta':

—Po'ñoch te'pa' o'ch notas, esempohuañen allempoch a'craetetuerra allohuen acheñenesha'pa' añ anetso'marnesha' ñeñt ama cohuenaye' sagapaye te', nanaccha' yorochno'tsenterret allempo. Ama't sodomo'marnesha'pa' amach tama yorochno'tsenterreto atet ñerra'm ñeñt anetso'marnesha' ñeñt ama cohuenaye'

sagapaye te'.

*Atto Jesús'pa' eños epo'mar anetsocop all ama ame'ñyeto
(Mt. 11.20-24)*

¹³ Allempoña Jesús'pa' alla oterrerr:

—Nanaccha' llequëñtso'tsa'yenes coraziño'marneshacha'; nanaccha' llequëñtso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'chuerroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ñe cohuen Yomporecop. Ñetpa' attochña e'ñe orrtetañ cha llecatenanet po'chñar, cotnashe'mach chorra'yesetañ, tsapñach epachshema'tyenetañ all anorrcha'tyenet puellquëño'tet. ¹⁴ Ñeñto'marña te'pa' notenes, esempohuañen allempoch a'crare'tetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatare'tterreto allempo. Coraziño'marneshacha' ñaña betsaido'marneshacha' saña allempopa' atarrcha' coñchatterret. ¹⁵ Ñaña sa capernaumo'marneshacha' chate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'pueso.

¹⁶ Jesúsña allempo ama sena' pueyochresha' o'ch serpare'tyeneta' anetso'mar ñaña'pa' alla oterranneterr:

—Ñerra'm esesha'ch se'mñotapue' sa, na'ñaña e'mñotenet. Tarraña ñerra'm esesha'ch ama sagapaye sa, na'ñaña ama aguëneto. Ñaña ñerra'm esesha' ama mueno o'ch agapnet na, Nompore'ñaña ama mueneñeto o'ch agapet tarro'mar ñapa'ña nellsensene'.

Arrpa' allohua ñeñt atet otan pueyochreshachno ñeñt cançhroch çharrasheña. Allempoñapa' mueñanet allcha' serpare'tatiesnomuet.

Atto huaçherra Jesús pueyochresha' ñeñt cançhroch çharrasheña

¹⁷ E'ñe allponmatatsapa' o' alla huaçherra pueyochresha' ñeñt cançhroch çharrasheña. Ñetñapa' e'ñe pocsheñeshocmañen huaçhenet Jesúsesho. Atet serpare'tatueñet:

—Partseshacha' ama't oneñe'feçhnopa' e'ñe yeçha'nmaçha'tatue e'ñe yeçhore'teño't pa peso'chño.

¹⁸ Ñaña'pa' otapuenanet:

—Napa' neñchca'ye oneñe't allempo aprratam'psaretta po'huamenc. E'ñe attema't ñerra'm ñapa' o' cha'nmachet entot atet pena meratste' huetsa entot o'ch çhap aña patsro.

19 Po'ñoçhca'ye napa' atarr ahuamencaŧ neŧa'yesapas. Ama't allohuen ñeñt se'moñe'tyene' sañapa' ñeñtecopña nellensa'yesas allochñapa' attoch e'ñe sa'mchechatyesuena' allohuen pa'namen, ama't shechpeçhno ñaña yellasochno, e'ñe satmama'teñoŧpa' e'ñe sa'peptse'tatse'tueña'. Allochñapa' amach eñalleterre'te ñeñtcha' semueroçhtate' ama't paŧra. 20 Ama't atarr ahuamencaŧeseñ atto o' sa'mchechatyesuahue oneñeŧeçhno, amachña ñeñta atarr socshatsto. Añcha'ña e'ñe socshena atto aquellca'yesaretes seso'cheñ Yomporesho ñeñt pue'ntaño'tsen.

Atto Jesús'pa' atarr pocsheñsha' ma'yochena
(Mt. 11.25-27; 13.16-17)

21 E'ñe allempoña Jesús'pa' atarr coshateñ Parets Puecamquëñ. Ñeñto'marña ñapa' e'ñe pocsheñeshoŧ ma'yochenana Pompor, ñeñt'pa' atet oten:

—Na Apacha' o'ch na'ye'choçhtatonap, p'apa' pa' ñeñteŧ atarr ayochreshattetsa pe'ntaño ama't ñaña arr patsro. Na'ye'choçhtatonap tarro'mar ora añeçhno ñeñt pecohuenña pepen, ñeñt'pa' ama arreye' peçhapateñe pueyoçhro ñeñt atarr eñotañ entyetsa. Papa' aña peçhapaten pueyoçhreto ñeñt ama eñotañeye' entetso. Tarro'mar Apa e'ñe pemuereñoŧ ñeñt'pa' atetña e'ñe pocte' penten pa. Arrpa' allohua ñeñt atet ma'yochenana Pompor.

22 'Nompor allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapña Nompor eñotenen. Nomporpa'cho'ña ama po'noçh eseshaye' eñotenaye, napña na ñeñten Puechemeren e'ñe neñoteñ Nompor, ñaña erra'tsencha' ñeñt e'ñe pocte' nenten na ñeñten Puechemeren ñeñt'ña'pa' o'ch neñotater Nompor.

23 Allempoñapa' alla cohueranerr pueyoçhresha'pa' atet otanet e'ñe ñocueta:

—Atarr cosheñtso'tsa'yenes sa tarro'mar e'ñe sa seclloyoŧpa' o' senterrñañ Yompor po'cohuenña. 24 Po'ñoçhca'ye notenes e'ñe ahuatoteña' shonte' ñeñt a'mta'yesaye't Yompor po'ñoñ ama't ñaña ñeñt amcha'tarettatse't allempo, ñetña'pa' atarr muenetañe't o'ch enterrñañetañ Yompor po'cohuenña ñeñt o' senterr sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te' tarraña allempo ñetpa' amaña eseshaye'ña e'muerrapayeña Yompor po'ñoñ.

Atto atarr cohuen orrtatos puesheñarr samario'marnesha'

25 Allempoña puesheñarr ñeñt atarr etsotene' ñoñets ñeñt atet anaret judioneshacop, ñaña tantapa' atet otan Jesús attoch eñoch errofente' yeçhaten ña, ñeñtpa' atet och:

—Maestrocha' ta', ¿errofena'tcha' nepaña na e'ñe cohuen attoch napa' corretsanach e'ñe tayoteñ ama't errponañohuen?

26 Jesúsña anaþpa' atet och:

—¿Errofena't otenña ñoñets ñeñt atet anaret ahuatoteñ? ¿Eso'tña ñoñtsor pelleyenña þa ñeñt anaret all?

27 Ñañaapa' atet och:

—Ñeñt ñoñetspa' atet oten: “Atarrcha' yemorrenteña Yeyomporer ñeñt Yepartseshar yepen e'ñe yeyoçhrocmañen. Ñaña e'ñe yecamquëñoñt yemorrenchach e'ñe yehuamencohuen, ama't ñaña ora yocþañohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

28 Jesúsñaapa' atet och:

—Atetca'ye e'ñe atet þoten. Ñerra'm atetcha' e'ñe peþohuapa' þañaapa' corretsaþach e'ñe tayoteñ ama't errponañohuen.

29 Ñeñtña acheñerpa' ñaña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'þto'terranerr Jesús:

—Ñehua, te'pa' o'ch þoten ¿eseshatña ñeñt e'ñe po'ñoçh namo'ts nepen?

30 Attoch eñotach ñeñt e'ñe po'ñoçh amotsot entetsa ñeñt e'ñe pamo'ts þannena, Jesúsñaapa' atet toma'ntacha, ñeñtpa' atet serrpare'tach:

—Eñall puesheñarr judionesha' ñeñt huetsa Jerusaléñoñt, ñapa' arr sen Jericó. Toñoñapa' alla rromaþ eñet e'ñe puerratañþsatsre'tuet ama't pa'shtam. Atarr atserrpet. Autsa muetsapuetañ allempoña ñeñt atserrþapue'pa' ahuanerret.

31 Allempoña tematenpa' puesheñarr judionesha' ñeñt cornesha' ñapa'cho'ña all oñem. Ñañaapa' ama't entospa' atta oñmatse'tañpesya a'yo'marpa' o' metane.

32 Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'cho'ña ama't entospa' atta oñmatse'tañpesya a'yo'mar o' metane ñaña.

33 Allempoña tematererr o' huapa ñaña puesheñarr ñeñt ama judioneshayaye ñeñtpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha'

ñeñt atserpenetpa' atarr muerosya. ³⁴ Allenta ponmosya, shosñañ olivose* ñaña vino allo partosñañ all atserpeñet.

Allempoñapa' huanquërrñañ all atserpeñet. Tantaterpa' montacha pashanoropa' anemñ allcha' mos. Allña'pa' all cohuañpsos. ³⁵ Tsapañña' cheta'mueñan epa denario apa'mueñan apaclatesha' atet ota'mueñ: "Te'pa' pecuañpescha', errponcha' pa'gasta' ello peçllayor, napa' netsa'tuerrpach esempoch nehuerra."

³⁶ Jesúsña'pa' alla oterranerr ñeñt acheñer:

—Ma'psheño'maretpa' pa'pa' ¿erra'tsena'tña pentenña ñeñt atarr amo'tsoñ entetsa ñeñt e'ñe pamo'ts pene' ñeñt rroma' eñet?

³⁷ Ñeñtña acheñerpa' atet oterranerr Jesús:

—Añca'ye e'ñe pamo'ts pene' ñeñt e'ñe pemuereñoñ par-tatse'terre'.

Jesúsña'pa' atet och:

—Te'pa' atetcha' peperra paña. O'ch ahuerreppa' atarrcha' pemorrentera ora allohuen acheñenesha'.

Allempo Jesúsapa' chap pocollo all yeçhena Marta epuet pa'mo'nerr María

³⁸ All oñen Jesúsapa' o' chap pa'terr anetso. Allña puesheñarr coyanesha' añ pa'so'cheñ Marta, ñaña'pa' e'ñe cohuen agapan Jesús pa'paclo. ³⁹ Ñeñtña Martapa' eñall ñaña pa'mo'nerr ñeñt'pa' añ pa'so'cheñ María. Maríaña'pa' all anen Partsesha' Jesús pa'rrpoñ allot e'mñoteññañ ñeñt atet serrpare'tatenanet.

⁴⁰ Pa'mo'nerrña Martapa' aña e'ñe ma'yoçhrena a'toramñpse' all puetare'tallme'chen. Ñaña'pa' ponmana Jesúsapa' atet otos:

—Ayochreshate, amate' pocte' penteñe napa' neptare'tallme'chen; nemo'nerrña'pa' ama yenpuenno. Te'pa' o'ch poçh a'toramñsapretnepa' natar.

⁴¹ Jesúsña'pa' atet och:

—Nocha Marta, shonte' pa'namen ñeñt petorra'yena, pa'pa' ñeñtña atarr pellcatene'. ⁴² Tarraña e'ñe patrraña ñeñt atarr sherbets; ñeñt'pa' atto e'ñe cohuen socshennana neñoñ. Pemo'nerr María'pa' ñapa' ñeñtña atarr e'nen. Ñeñt'pa' ama't e'ñe esesha amach errotenot puerratañpereto.

11

Atto Jesúsapa' yeçhatan pueyochresha' atetcha' ma'yochet (Mt. 6.9-15; 7.7-11)

¹ Po'pocheño Jesúsapa' alla ma'yocherrerr. O' ma'yochuapa' puesheñarrña pueyochresha'pa' atet och:

* 10:34 Olivo ñeñt tsach allot yoreñet puerets pue'merot.

—Partseshacha' te'pa' o'ch peychatey ma'yochatsa atet pe't Juanañ, ñapa' chocma yechatane't ña pueyochresha' atetcha' ma'yochet.

² Jesúsñapa' atet otanet:

—Ñehua, ñerra'm esempoch sema'yochena atetcha' sot:

Yompore Partso ñeñteḡ pe'ntaño'tsen, yentapepa'ch ḡa atarr Partsoḡ. Chapuepa'ch Nompore allempoch atarr ḡa'yochreshatterra arr patsro. Yetsonapepa'ch arr patsro ñeñt atet pemnen ḡa Nompore atet penet ñaña pe'ntaño.

³ Chocmuepa'ch Nompore ḡapueney ñaña yocrramñ ñeñt allpon yepallta'yena pate'tets ye't.

⁴ Peḡretna'huonayepa'ch Nompore allohuen yo'chñar ñeñt ama pocteye' pentapretenye, atto Nompore yapa'cho'ña yeḡretnannena ñerra'm esempo erro't yeḡannena. Ñaña amach Nompore pemnatatsche sosya'tañ o'ch atarr topateney. Añcha'ña choch Nompore ḡa'ypo'ñataterrey allohuen sosya'tsañechno.

⁵ Elloñapa' alla ye'chaterraneterr ñeñt atto e'ñe yenamueño't Yompor apueycha'. Ñeñtpa' atet serrpare'taterraneterr toma'nteñtso.

—Ñerra'm eñall puesheñarr ñeñt e'ñe cohuen yeyemtenaya, ama't rro'ch tsapo o'ch ahuey pa'paclo ye'chore'teño'tpa' atetcha' yotos: “Napa' masheñcha' añecop nohuena o'ch ḡapuen ama't coñe'ta rreñets, ⁶ tarro'mar o' chap puesheñarr namo'ts ñeñt huetsa ḡachayot, napa' ama es necheno ama't coñe'ta alloch neyema'cha.” ⁷ Tarraña ñapa' po'ponrotpa' ñato' chach otapuey: “Amach ḡa'tsrre'mo'chtana'tatstosno tarro'mar o' e'ñe echarr neyottamḡpesuena, allohuen nacñeñaretolleshohuenpa' o' yemanrra'tuen. Ñeñto'marña ama eshcaye' atantenno o'ch ne'cha'nmonaḡa attoch es napaḡ.” ⁸ Tarraña napa' o'ch notas, ama't ñeñt atarr yeyemtenaña' ñerra'm ama cha'nmaponayopa' yañapa' ñerra'm alla yenamuere'tpa' cha'nmaponayach attoch apapuey ama't erra'tsena ñeñt atarr yenamueñ attoch amach alla ya'tsrre'mo'chtana'tneñe es enamare'te'. ⁹ Ñeñto'marña napa' o'ch notas: E'ñe senamueño't, Yomporñapa' apascha'. Se'name'teño'tpa' señchcha', se'chore'teño't, Yomporñapa' e'ñe pue'mñnoteño'tespa' e'ñech cohuen toramḡspapas. ¹⁰ Tarro'mar ñeñt es enamare'tetspa' ñetña es agu'etset; ñaña erra'tsen ñeñt es e'nyetspa' ñetña' enteretcha', ñaña erra'tsen ñeñt chore'tyene' ñetña' e'ñech e'mñnotenatet Yompor.

11-13 'Yompor ñeñt pue'ntaño'tsen chocmach e'ñe cohuenare' es apa'yeney ñerra'm esempo es yenamueñ.

Ñapa' amach aña apuenye ñeñt ama cohuenaye' yenteno ya. Ama't sa ñeñtes arromñates atet sepeñ saña sechemer, eñech cohuen es sapueñ ñerra'm esempo es enamuenes. Atet ñerra'm allempo pa'chporrñoť es enamuenes, o'ch enamas mam* ñeñtcha' rra', sapa' ama't puesheñarrofesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarrofesapa' ama aña sapueñeña sechemer shechep ñeñt atarr amuerochtatañ. Amapa' ñerra'm pa'me' enamuenes sañapa' ama't puesheñarrofesapa' ama aña sapueñeña sechemer yellas. Ñeñto'marña sa ama't arromñates ama't ñaña atsrre'mñates sapa' e'ñe señoťeñ apa'yese' sechemerasha' e'ñe cohuenare'. Añña ñeñt Seyomporer sepen saña ñeñt pue'ntañ'o'tsen elloña ñapa' e'ñe eñoteñ atto e'ñe cohuenare' es apa'yenes saña. Ama't Puecamquēñ ñeñt e'ñe cohuen Parets attoña e'ñe cohuen chorratensa allohuenes ñeñtes enamyene' ña.

Atto puesheña'tets oteñet Jesús ñapa' oneñeto' po'huamencot cachpatenanña po'potantañ oneñetečno acheñenesha'
(Mt. 12.22-30; Mr. 3.19-27)

14 Po'pocheño allo'tsen puesheñarr acheñ ñeñt chorrena oneñeť, cha opanatateñ. Allempoña Jesúsapa' cachpatosan oneñeť atto chorrenana acheñ. Atto cachpa'ner oneñeť ñeñtña opanpa' o' alla eñorerra. Acheñenesha'ña allpa' atta cohuanrrorteñet, atarr cohuen enteñet. 15 Tarraña po'potantañečnoña acheñenesha'pa' ama't mameshapa' ama pocteye' eñcheto. Ñetñapa' atet otyeñet:

—Atto cachpatatenan oneñeť acheñpa' añaca'ye ahuamencat pene' Beelzebú ñeñt pompor pen allohuen oneñetečno.

16 Po'potantañ acheñenesha' ñetñapa' cha mueneñet o'ch topachet Jesús. Ñetpa' atet ochet:

—Yapa' añ yemnen o'ch pegatey pepartsoña entot allochñapa' attoch yeñotať po'ñoťh p'apa' Parets Puechemerep.

17 Jesúsñapa' eñotanet ñeñt atet cotape'chatse'tyenet pueyočhreto ñocop ñeñt atto otyeñet ñapa' oneñeťa pompor po'huamencot cachpatenanetña oneñetečno. Ñeñto'marña ñapa' atet otanet:

—Ñerra'm puesheñarr añcha'taret elloptannena pa'cheñer e'ñe ñagattsetapa' e'ñech poctacma a'cllatanna'tuerret. Attecmach p'annerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cllatanna'tuerret. 18 Attecmach p'annerra ñaña oneñeť

* 11:11-13 Ñehua, Jesús añ toma'ntatanet pan ñeñt puerrar penet all pa'nyo.

pueyochresha'chno ñerra'm oneñete'chno e'moñe'tannenet e'ñe ñagattseta, ñetña atto huomencatenetpa' chach huañerrets amach allo'na huomencatneneto. Ñeñtpa' atet o' notuas tarro'mar sapa' cha sotenen napa' Beelzebo' po'huamencot necachpatateñña e'ñe ña pueyochresha' ñeñt pompor pen allohuen oneñete'chno. Po'ño'ch oneñetpa' amaca'ye huapore'tanneno. ¹⁹ Sapa' atet sotenen napa' Beelzebo' po'huamencot necachpatateñña e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch cachpatachet oneñet acheñenesha' ñetpa'cho'ña amaña Beezebú po'huamencoteye' cachpatateñetoña oneñet acheñenesha'. Ñetpa'cho'ña Yomporoña po'huamencot cachpatatenetña oneñet. Ñeñtña o' eñotatas ñeñt atet sotenoñ ñeñtpa' amaca'ye po'ño'ch atteyaye. ²⁰ Po'ño'chca'ye Yompor po'huamencot necachpatateñña oneñete'chno acheñenesha' ñeñtcha'ña señotate' te'pa' o' nechapatonas Yompor po'cohuenña ñeñt atto po'ño'ch atarr ayochreshattena ña.

²¹ Ñeñtpa' o' e'ñe notuas atet tarro'mar yeñoteñ ñeñt atarr ahuamencattetsa atto atarr ahuamencattena oneñet, ñaña'pa' e'ñe po'huamencot cohuañpesyenan allohuen e'ñe cohuen ñeñt pa'paquell pa'yen. Napa' po'huamencocmañen na'yenan ñeñtcha' e'ñe cohuañpene' all añcha'tarettena ña. ²² Tarraña ñerra'm esempo o'ch huapoña ñeñt atarr ahuamencatesha' ñeñtcha' ello metanose'ña po'huamenc atet ñerra'm na Nompor, ñeñtcha'ña e'ñe a'mchechatose'. Attoña e'ñe pueratamposñañ ñeñt allpon moñenaya ñeñt atarr yemuetyena ña. Allochña'pa' o'ch be'tosos all ñeñt pa'paquell pa'yen o'ch e'ñe puerratam'peshuos ñeñt allpon o'patyena ña.

²³ Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñtña acheñerpa' chaca'ye epatare'tennan ñeñt atet netorra'yena na. Ñeñtpa' o'ch netma'ntatasa atet: Ñerra'm esesha' ama na'yapachapretenaye ñeñt na'yapachen na, ñeñtña'pa' cha a'parratse'tam'penen a'yenet.

Atto Jesús'pa' eñotatanet ñato' oneñetpa' o'ch alla chorrerran-err acheñ allot'cha'nom ahuaña (Mt. 12.43-45)

²⁴ 'Ellonetpa' o'ch alla neñotaterr'serr po'poñonef: Oneñet ñerra'm esempo cha'nom acheñeshot, ñeñtña oneñetpa' o'ch auyes erraparen ama't amayo'mar e'nyese' po'psheñeñ allcha' ye'cherrerr allcha' e'ñe amesurrerr cohuen. Tarraña ñerra'm amach erra eñche'pa' atteñapa' o'ch ot: "Napa'

o'ch alla ahuerren nepaclo allot necha'nom ahuaña." 25 Atetcha'cho' pa. O'ch alla ahuer allot cha'nom ahuaña. Allña o'ch cherrpa' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen año'tyesaret. 26 Allempoñapa' o'ch alla ahuer allo'tsa'yen pamo'tsesha'pa' o'ch enana' po'poñ cancherrsheña oneñe'techno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch ye'chagrecha. Allohuenetñapa' o'ch chorreñet ñeñt acheñer. Allempoña tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet p'atse'tyese't ñenma't.

27 Jesús allempo atet serrpare'tatenan acheñenesha'pa' puesheñarrña coyanesha'pa' machayotepa'tcha' rrana, ñeñtpa' atet ot:

—Ama't ñeñt p'achor pepen p'apa' atarr cosheñtso'tsen tarro'mar ñapa' ñeñt pe'ñalletate' pa' ñeñte'p atarr cohuen es peye'chcaten ñaña ñapa' e'ñe cohuen cohuan'psap allempo cheshatollenpa'.

28 Jesúsñapa' atet och:

—Elloña allohuenetpa' atarr cosheñtso'tsa'yenet ñeñt pue'mñoteño'tet Yompor po'ñoñ e'ñe atet p'ohuenet.

Atto Jesúsapa' otan acheñenesha' ñeñt ama cohuenaye' cotape'chetso ñetñapa' chocma e'nenet partsoteñets

(Mt. 12.38-42; Mr. 8.12)

29 Allempoña acheñenesha' emchorreñet Jesús, ñaña'pa' atet otanet:

—Acheñenesha' ñeñt corra'yetsa te' ñetñapa' ama cohuenaye' cotape'chyeneto. Tarro'mar ñetpa' año e'nenet ahua'ch norrtatanet nepartsoteña atto'chña eñotnet napa' po'ño'cho'te' Parets Puechemeren ñeñfeno'te' Cristotsets. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha' allempo a'mítane't Yompor po'ñoñ. 30 Tarro'mar atto eñotatane't Jonás nínivo'marnesha' ahua't ñapa' Yomporeshot huena, napa'cho'ña te'pa' atetcha' neñotach naña acheñenesha' ñeñt corretsa te' napa'cho'ña Yomporeshot nohuena.

31-32 Tarro'mar ahua't allempo serrpare'tatane't Jonás nínivo'marnesha' ñetñapa' allempocma cotape'cherret ello e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñto'marña esempohuañen allempoch a'craretetuerra allohuen acheñenesha', ñeñtña nínivo'marnesha' ñeñt e'ñe cohuen cotape'cherrets Yomporecop ahua't, ñetpa'cho'ña orrterretcha', ñeñtcha'ña señotaterre'ña sapa' ama't mamesha

ama pocteyayeña ñeñt atet sepa'yese't tarro'mar sapa' ama soctape'cherro ello cohuen Yomporecop. Ñaña te'pa' o'ch neyerpatasa ñeñt atet pa ahuat puesheñarr coyanesha' ñeñt añcha'tarettatset atarr bachayo allohuanen pats sa'ponet. Ñeñtña coyanesha'pa' allotēn on o'ch e'mñotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten ñaña, ello nemitanēn atto eñotañte't Salomón. Tarraña sañapa' amaña es sotapoteno. Ñeñto'marña esempohuañen allempoch a'crare'tetuerra allohuen acheñenesha', ñeñtña coyanesha' ñeñt e'ñe cohuen e'mñotatset ñapa'cho'ña orrterrach, ñeñtcha'ña señotaterre' sapa' ama pocteyayeña ñeñt atet sepa'yese't tarro'mar sapa' ama es sotapote'te ama't e'ñe mamesha.

Atto yecle'pa' añ toma'ntena ñeñt po'lampareñ pen allohuen yechets

(Mt. 5.15; 6.22-23)

³³ Jesús'pa' alla serrpare'taterraneter; ñeñt'pa' atet oterraneter:

—Ñerra'm esempo ya'llchaten lampareñ, ñeñt'pa' ama tarrecpaye' ya'huortateñe o'ch yene' o'pono e'ñe a'nareto. Ñaña ama añecpaye' ya'llchateñe o'ch ye'rramampes coyño. Ñeñt'pa' añecopña ya'huortatenña lampareñ o'ch yene' enonet attochña e'ñech choyo'tampesuan allohuen acheñenesha' ñeñt be'toschets all pocollo. ³⁴⁻³⁵ Yecle'pa' añ toma'ntena atet ñerra'm ñeñt po'lampareñ pen allohuen yechets. Ñerra'm e'ñe cohuen huomech yecle'pa' e'ñech cohuen entateney puetare' allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsam̄psarettenet. Tarraña yecle'ña ñerra'm ama e'ñe cohuen huom̄cheyayepa' amach e'ñe cohuenaye' entateney puetare' attochña amach eshcaye' torratyenano allemeñ yechets tarro'mar cha ottena ñerra'mrate' checmeto'tsa'yeneta. Attecma pena ñaña yeyo'cher. Ñerra'm e'ñe cohuen yoctape'chyen yeyo'chropa' attoña chennayaña yeyo'chro e'ñe ora allohuen Yompor pocta'ña ñeñt po'cohuenña pen. Attoña ora yocta'ñapa' e'ñech a'puetarsam̄psarettena Yomporeshot. Tarraña o'ch yeñota e'ñe yañeña tarro'mar ñerra'm ama cohuenaye' yoctape'cheno yeyo'chro, ñeñt'pa' amach erro'tenot a'puetarsam̄penyeña ñeñt yocta'ña yepen. Ñeñtña yocta'ña yepenpa' chach a'checmetam̄pennay yeyo'cher. ³⁶ Tarraña ñerra'm po'ño'ch e'ñe cohuen yoctape'chen yeyo'chro, attoña chennayaña yeyo'chro e'ñe ora allohuen Yompor pocta'ña attochña yeñoteñ orrtatyese' ñeñt e'ñe

cohuen enten ña. Attoña e'ñech cohuen es yeþa'yen atet ñerra'mrrate' lampareñ e'ñe cohuen çhoyo'tamþeney attoch e'ñe cohuen es yentyen. Allempopa' o'huañcha' allo'na yechecmetamþesnen.

Atto Jesúsapa' a'metare'tenan fariseonesha' ñeñt atet yeçhenet ñetpa' ñeñtpa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 20.45-47)

³⁷ O' serrpare'tatuanet Jesúsapa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'paclo. Allempo çhap Jesús allpa' be'tosos anorros allcha' rrallme'chapretosan ñeñt hua'ñene'. ³⁸ Ñeñtña fariseopa' entenan Jesús atto ñapa' ama e'pota'to ñeñt atet yeçhena judionesha'. Ñehua, ñetpa' atet yeçhenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet cotape'ch Jesúsocop:

—Ta'm, eso'marte'ca'ye amaña e'pota'tenoña ñeñt atet poctetsa Partsocop.

³⁹ Partseshañña Jesúsapa' atet toma'ntatana ñeñt atet pena allohuen fariseonesha', ñeñtpa' atet otan ñeñt hua'ñene':

—Ñeñtes fariseoneshas sapa' e'ñe se'pame'teneñña setaza eno'tpa' o'ponoñña'pa' ama se'parro'teñe. Seplatopa'çho'ña eno'ta e'ñe se'pata'teñ o'ponoñña'pa' ama se'pata'teñe. E'ñe atet sepena saña. E'ñe sa'cohuentatena ñeñt eno'mar ñeñt atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'pono't seyoçhropa' ama sa'cohuentateñe, allñapa' e'ñe chorren shonte' sosya'tsañeçhno ñeñt atto e'ñe seshquëño't çhocma es seprratamþesyen, seshonten pa'namen ñeñt ama pocteye' entapretenso Yompor. ⁴⁰ Cha sottena ñerra'm erra'tsen puesheñarr acheñ ñeñt ama es eñoteno. Ama't seño'teñeña Yomporña ñeñt yeçhcatyene' allohuen ñeñt allpon yentyen arr patsro, ñeñt a'yote'tsa'yen yesho't ñeñtara Yompor ñeñt yeçhcate' ñaña yeyoçher alloch e'ñe cohuen yoctape'chen o'pono yeyoçhro. ⁴¹ Ñerra'm o'ch po'ñoçh soctape'cherr cohuen seyoçhro Yomporecop attochña e'ñe cohuen seyoçhrocmañen es sapa'yen attoch seyempa'yeñ po'potantañ. Ñerra'm atetcha' seperrapa' Yomporña'pa' e'ñech cohuenare' enterres.

⁴² 'Atarr llequëntso'tsenes sa ñeñtes fariseoneshas tarro'mar ama atteye' sepeno ñeñt atet o' notuas. Ora allohuen ñeñt senareñ sepen ama't çhocma sapueñeñ Yompor allpon ñeñt poctetsa ñocop —mentapan ñaña rudapan. Tarraña añña ñeñt nanac sherbets Yomporecop

e'ñech pocte' es yepeññañ po'psheññ ñaña e'ñech cohuen yemorrenteña Yompor. Ñeñt atetpa' sañapa' ama soctape'cheñe ama't mamesha. Sapa' ñeñtña sepalltena o'ch e'ñe atet se'pohua. Tarraña ñeñt atto chocma es sapa'yen Yomporecop ñeñt'pa'cho'ña amach seca'hpatsche.

43 'Atarr llequëñtso'tsa'yenes sa ñeñtes fariseoneshas tarro'mar sapa' e'ñe sommo'cheñoñ atarr semneñ allohuen acheñenesha'pa' o'ch e'ñe cohuen entenset. Ñeñto'marña sapa' ñña atarr semnen o'ch sanorrcha'tyen judionesha' po'prahuo allecma anorryen ñeñt atarr amcha'na'tpo' enten allohuen acheñenesha'. Ñaña sapa' ñña atarr semnen allohuen acheñenesha'pa' o'ch huomcha'tenset puencha'nañoñ ñerra'm esempo sechopeñe'chen toño'mar allecma chopeñe'chyen allohuen acheñenesha'.

44 'Atarr llequëñets socop, tarro'mar sapa' e'ñe attes ñerra'mrrate' apampaña ñeñt amach orrteno enot all apamparettena arromñañ o'pono patso. Ñeñto'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromñañap all e'ñe chorren sosya'tsañ.

45 Allempoña puesheñarr ñeñt atarr etsotenayeñ ñoñets ñeñt atet anaret judioneshacop, ñaña'pa' atet otan Jesús:

—Maestro, ñeñt atet p'oten ya'ñaña cha muene' pepencaten.

46 Jesúsñapa' atet och:

—Sapa' ñeñtes atarr etsotenayeñ ñoñets ñeñt atet anaret judioneshacop, sapa'cho'ña atarr llequëñets socop, tarro'mar sapa' atarr es sena'yenñañ acheñenesha' ñeñt atarr echarrare' entyenet ñet, po'ño'chpa' amach errotenot e'ñe atet p'ohueto. Sapa' ama't mameshapa' ama ayenpuenaye' sentpenaneto.

47 'Llequëñtsa ñaña socop tarro'mar sa te'pa' satomaten enot ñeñt atarr cohuen senten sa all pampa'yesete't ñeñt a'mta'yese't Yompor po'ñoñ ahuat ñeñt muetsanatyese't ñeñt satañneshañ sepe't. 48 Sapa' e'ñe señoñeññañ sa'tañneshañ atto ñetpa' muetsanachete't ñeñt a'mta'yese't Yompor po'ñoñ tarraña sapa'cho'ña ñeññaña e'ñe pocte' senten saña ñeñto'mar te'pa' e'ñe sa'cohuenta'mpenanet all apamparettenet.

49 'Ama't Yompor ahuat, e'ñe pueñoñeño'pa' atet ote't: "Napa' o'ch nemñe acheñeneshesho ñeñtcha' a'mtene' neñoñ ñaña ñeñt nellensarnesha' ne'pa'yen. Tarraña patantarrña acheñenesha'ñapa' cha muetsanatanet, po'potantañña' cha cotare'tyeset." 50 Attoña e'ñe allempoteñ aye'chcataretta añ pats, ora allohuen ñeñt a'mta'yese't Yompor po'ñoñ allpon ñeñt amsanatyese'rettatse't ashataretetyese't po'r-ras,

sañapa' allempoteñ e'ñe sa'yohuarettena teme'ttsen sa ñeñtes corretsa te'. ⁵¹ E'ñe allempoteñ muetseret Abel tarremphua allempo muetseret ñaña Zacarías ñeñtpa' alla semtser Parets po'ponro puecha'petarot allo'tsen altar allotecma sherbete't Yompor. Po'ñoçhca'ye notenes añenesha' ñeñt corretsa te' atarr ayohuarettenet.

⁵² 'Llequëntsá socop ñeñtescha' e'ñe etsotenayeñ ñoñets ñeñt atet anaret judioneshacop tarro'mar sapa' cha seprrratampeñ acheñenesha' ñeñt alloch enteret ñeñt e'ñe po'ñoçh alloch qeshperret. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña çhocma sepatare'teñña po'potantañ ñeñt e'nene' Yompor po'cohuenña.

⁵³ Allempoña ñetpa' e'ñe pa'tsrre'mueño't atarr es a'p'to'tare'tyeset Jesús. ⁵⁴ Ñetpa' añ atarr e'nenet attoch otatse'tachet allochñapa' ñato' po'tatse'tateño'tetpa' attoch otteñe'cheñet.

12

Atto Jesús'pa' yechatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt huachenoya Jesús, shonte' nanac patoner. Cha che'muechoset Jesúsesho atta atmatca'tanna'tyesoset. Jesúsña ñanompa' alla serrpare'taterranerr pueyochresha', ñeñtpa' atet otanet:

—E'ñech seño'ta ñato't semeñe'teña' fariseonesha' poçta'pña, tarraña ñeñt poçta'pña penet ñetpa' ñeñtpa' ommo'cheñtsa. Ñeñtpa' mametollapa' o'ch epa'hua erraparen e'ñe atet pena ñerra'mrrate' chase' mametollapa' o'ch e'ñe es a'chasa'hua. ² Tarro'mar yapa' yeño'teñ allohuen ñeñt allo e'ñe a'nahua shecare'tyenet te' esempohuañeñapa' a'metam'psaretterretcha'. Ama't allohuen ñeñt e'ñe a'nasotyenet te'pa' esempohuañeñapa' e'ñech eñotatarëtetuerret. ³ Ñeñto'marña ama't erra'tsena seserrparen e'ñe a'nahua te' esempopa' seño'tatuercha' ora allohuen acheñenesha'. Ama't erra'tsena ñeñt atet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atet ñerra'mrrate' enot seserrpare'ten shelletot.

Atto amach yem'cha'tatsto ñeñt'cha' muetse' yechets, añcha'ña yem'cha'na't Yompor (Mt. 10.28-31)

⁴ Te'pa' o'ch notas masheñeshacha', amach añña sem'cha'tatsto ñeñt'cha' semtse'. Tarro'mar añach muetsonaset sechets, secamquëñña'pa' amach erro'tenot

muetsónaseto. ⁵ Añcha'ña sem'cha'na't Yompor tarro'mar ñerra'm ña muenats e'ñe ña po'huamencotpa' o'ch a'chencatonay ye'chets, yecamquëñpa'cho'ña o'ch mueñonay coñcheñtso all parraren tso'. E'ñe po'ño'ch notenes, Yomporcha'ña sem'cha'na'ten.

⁶⁻⁷ Elloña te'pa' napa' o'ch notas, chocmach seyemcha Yompor, po'ño'ch ñapa' ñach secuanñpene'. Ama't otetollesha'pa'cho'ña chocma cohuanñpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset, amnar otetollesha'pa' ñeñtpa' ama tsa'teyaye, e'ñe eptallatolla centavo tsa'tena. Tarraña ama't atteñ Yomporña ama't patra otetollpa' ama pueseñe. Ñeñto'marña notenes, ama't mameshapa' amach sem'cha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

*Atto ama a' nasotpahuo Jesucristo acheñesho'mar
(Mt. 10.32-33; 12.32; 10.19-20)*

⁸ Elloña napa' o'ch noterrser; allohuen ama't erra'tsencha' ñeñtcha' ama na' nasotenaye acheñeneshesho, napa'cho'ña Ñeñten Acheñetosetspa' amach na' nasotuerraneto namña Nomporesho allo'tsa'yen epuet po'mllaño'feñnashar. ⁹ Tarraña ñerra'm esesha' na' nasotenaya na arr patsro acheñeneshesho, napa'cho'ña na' nasoterranetcha' Nomporesho allo'tsa'yen epuet po'mllaño'feñnashar.

¹⁰ 'Ñerra'm esesha' nesasene' na Ñeñten Acheñetosets ñeñtpa' apretna'po' nenteñ. Tarraña ñerra'm esesha' añ achm'are'tenet Parets Puecamquëñ ñeñtñapa' ama apretna'pahuoye' nenteñe.

¹¹ Namña o'ch noterrser; ñerra'm esepoch anmaset judionesha' po'prahuo allcha' a'metare'tamñpsaset añcha'taretesho, sañapa' amach cha sellca'psatsto, amach cha sotapsa'tatsto: Errotuachca'ye notoste' attoch cohuen nanapos, esuachca'ye notte'. ¹² Sapa' añcha'ña se'ñoratose' Parets Puecamquëñ e'ñe allempo a'p'to'tare'tenset all.

Ñeñt e'ñe aña muenen o'ch esocmañen echyes, ñeñtpa' atarr yoro'cheno'tsen

¹³ All che'muechen shonte' acheñenesha' Jesúsesho, puesheñarrñapa' atet otan Jesús:

—Maestro, te'pa' o'ch p'ton nemo'nasheñ nepo'nar apuer-
rnepa'ñaca'yeña namña ñeñt allpon o'patatnomna nomporeñ.

¹⁴ Tarraña Jesúsñapa' atet och:

—Masheñcha' napa' ama eseshaye' nenaye ñeñtencha' a'pocstatene' ñoñets attoch soten o'ch napa'yesas allpon o'patatyenset.

¹⁵ Alla oterraneterr Jesús:

—E'ñech señota sañeña, ama't seyoçhrapa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen aña patsropa' ñeñtpa' ama añecpayaye alloch esocmañen es yechyerr ñeñtcha' atarr yocshatterre' tsapatonet.

¹⁶ Ñeñtpa' atet otanet toma'nteñtso:

—Eñall puesheñarr acheñ atarr nanac eçllayoreñ. Allña po'patsñopa' shonte' nanac aton a'yeçcaten. ¹⁷ Ñeñña eçllayoretpa' atet coñape'chen pueyoçhropa' atet oten: “Errotuachca'ye neña'ña, ñeñt atarr nanac aton netotaten amaca'ye eñalleña allcha' e'ñe nañño'tue.” ¹⁸ Allempo atet coñape'chenpa' alla oterrerr: “Te'pa' o'ca' neñoçh atetcha'ca'ye neña. O'chca'ye na'materrña pocollashe'm allecma nañño'te't coñe'ta'tets te'ñapa' o'ch alla natomaterr atarrpo' allcha' e'ñe nañño'tua allohuen ñeñt allpon netotaten ama't ñaña allohuen ñeñt allpon pa'namen esocmañen nechyen. ¹⁹ Allempoñapa' atetcha' not neyoçhro: Napa' ama es nepallteno ama't e'ñe mamesha. Ñeñt allpon shonte' o' nañño'tuapa' atarrcha' atomat char amach es nepallterre'te. Te'pa' o'ch names e'ñe pocacma. Nellapene'tcha' rrats, nellapene'tcha' orrare'tats; ñeñtcha'ña e'ñe nocshatene'ña na.” ²⁰ Tarraña ñeñt acheñerpa' Yomporpa' atet och: “Papa' atarr otatsñañeñ, ama es peñoteno ama't mamesha. Te'pa' aña tsaprocmach o'ch perromuen. Ñeñña shonte' o' pañño'tuapa' te'ñapa' esesha'huachñaca'ye o'paterraya.” ²¹ Ñeñño'mar yeñoteñ, ñeñt aña'tene' shonte' esocmañen ñeñt e'ñe ñocpa, ñeñña acheñer atetpa' ama echenanoña ñeñt sherbets Yomporecop.

Atto Yomporpa' ñach e'ñe cohuen cohuanpene' ñeñt puechemerasha' pen

(Mt. 6.25-34)

²² Allempoña Jesúsapa' alla oterranerr pueyoçhresha':

—Ñeñño'marña te'pa' o'ch noterrser, amach aña sellcatsto ñeñt atto yeychena arr patsro. Ama't seyoçhra amach sotatsto, esuachca'ye yerrerrerrte' tsapatonet. Ñaña amach aña sellcatsto ñeñt e'ñe sechtsoçpa, amach sotatsto, esuachca'ye yechorra'te'. ²³ Tarro'mar Yomporpa' ña yapuene' yo'rrerrña allo yocrrena ñeñña atarr nanac sherbets. Ñeñño'marña yeñoteñ ña yapuene' ñaña yerrar,

ñeñña ñocoppa' ama esoye' enteñe. Ñaña ña yečcatene' yechets ñeññ atarr sherbets. Ñeñño'marña yeñoteñ ña yapuene' ñaña ama't ñeññ yechorra'yena, ñeñña ñocop ama esoye' enteñe. ²⁴ Sentente' atto correna pa'namen otneshačno. Ñetpa' ama čoye' nare'tatse'teneto ñaña ama čoye' apča'yeneto puerrar ñeñña' rra'yenet. Ñetpa' ama es echenaye allcha' es añño'tyenet. Ama't atto correnetpa' Yomporña e'ñe yečcatyesuanet ñeñña' puerrar pa'yenet. Elloña sa Yomporpa' atarr morrentensa sa; ello señtaneñ ñeññ atto atarr morrentenana otneshačno. ²⁵ Ñaña amach sellcatsto attoch amach serromo, tarro'mar ama't sellquëñañ attoch atarr atomat socrra arr patsro tarraña ama't e'ñe puesheñarrotesapa' amate' errotenoť so'chtatoña socreña ama't e'ñe pamtarra. ²⁶ Ñehua, atto ama't e'ñe sellquëñoña sa ama erroť es sepeno, ñeññepña' amach pa'namena es sellca'yestatsto tarro'mar ñeñña' e'ñech orrena es sellca'yena.

²⁷ Ñaña sentente' atet yečquëna rorečno. Ñetpa' ama čoye' taruasa'yeneto ama't mamesha, ama čoye' taneneto ñeññ chorra'yenet atto e'ñe cohuen orretyenet. Tarraña napa' o'ch notas, ama't añcha'taret Salomón atto e'ñe a'cohuentateť ahuat, ama't ñapa' ama chorrane'teña ñeññ atarr cohuen ñeññ atet atarr cohuentena ror. ²⁸ Ñeññ ror pue'chorpa' ñeññara ta'te' ñeññ chepyets allemeñ ñeññ sentyen te' tarraña ñeñña' mamecpa. Ama't cohuen chepyeneñ te'pa' tsapatonetña'pa' o'ch etomanperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeññ e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño. ²⁹ Amach e'ñe patrra se'nenno ñeññ atto serren ñaña ñeññ atto es sorryen. Amach ñeññaña e'ñe paterr sellca'yestatsto. ³⁰ Tarro'mar allohuen achenesha' arr patsro ñeññ ama ame'ña'yetso, ñetpa' ñeññaña e'ñe paterr e'nenet. Ñehua, Somporña ñeññ pue'ntaño'tsen ñapa' e'ñe entuenes ñeññ allpon pa'namen sepallta'yena arr patsro. ³¹ Sapa' añcha'ña e'ñe ñanom sema'yočhrena Yomporecop attoch atarr ayochreshatterra ña allochña'pa' ñachña sapa'yene' ñeññ allpon sepallta'yena saña.

Atto ñeñña' seshonterr ñeññ atarr sherbets arrcha'ca'ye seshonteñ all Yompor pue'ntaño

(Mt. 6.19-21)

³² Amach neyochreneshačnocha' es sellcatsto ama't ama atarr shonteyayso, Yomporña atarr cohuen secuanpene' atet ñerra'mrate' e'ñe po'carrneror penes. E'ñe pocsheñesho'pa' apascha' attoch e'ñe cohuen socshapreterrñaña po'cohuenta

attoch atarr ayochreshatterra. ³³ Te'pa' o'ch sepomyen ñeñt allpon sechyen allochñapa' o'ch sapa'yes ñaña ñeñt atarr es pallta'yetsa. Ñerra'm atet sepena allo'nach atarr aton seshonta'nen ñeñt e'ñe po'ñoçh atarr sherbets Yomporecop. Ñeñtpa' ama atteyaye ñerra'mrrate' ñeñt seçllayepo'rer sepen arr patsro, ñeñtpa' atarr amllasha'tña. Tarraña ñeñt se-shonta'nen ñeñt atarr sherbets ñeñt ama ahuañaño, ñeñtpa' arr seshonteñ Yompor pue'ntaño. Allña ama't eñeñapa' amach çheno o'ch etatsre'tas ñaña ama't pomçapa' amach eñalle ñeñtcha' rrrerre' ñeñt seshonten all. ³⁴ Tarro'mar ñerra'm all pue'ntaño seshonta'nen ñeñt atarr cohuen senten, yeñoteñ e'ñe ñeñta paterr senen seyoçhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyoçhro ñeñtña' ama es sherbenoña Yomporecop.

Atto çhocmach yeñose'rteña Yepartseshar Cristo esempoch huerra

³⁵⁻³⁶ Te'pa o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puesheñarr yacma ñeñt atarr ayochresha. Ñapa' ahuo' allcha' rrallme'chapretenana' pacma ñeñt sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyaset po'lampareñ allochñapa' attoch ñerra'm esempoch huerra ñeñt pamo'mte' penet ñerra'm o'ch çhore'tuenanetpa' ñetña'pa' allorocmach toramçsapueñet attoch sherçapueñet. ³⁷ Atarr cosheñtso'tsa'yen pueyochresha' ñerra'm esempoch huerret pamo'mte' allña'pa' entuenanet çho atarr eñose'rteñet. Po'ñoçhpa' napa' o'ch notas, ñachca'yeña sherça'huene'ña ñeñt pueyochresha' pen ña. O'ch chana'huena ñañapa' o'ch anorrçha'tatuenanet allcha' rrallme'chatuenanet. ³⁸ Ñeñtpa' atetcha' perranet ama't rroçh tsapopa' o'ch huenanet amapa' o'ch puetarenmochpa' o'ch huenanet. Ñeñfo'marña notenes, ñerra'm alla entuenanet çho atarr eñose'rteñet, ñeñtña atarr eñose'retyenayapa' atarrcha' cosheñtso'tsa'yenet. ³⁹ E'ñech machayota nohuerra atet pena eñet allempo atta es sepçha'yena machayotach huaponasa o'ch yoratsre'tensa'. Tarraña sa ñeñtes apacllates ñerra'm señoteñeñ e'ñech esempo huaponasa eñet amach çha semanrra'teno attoch amach semnacheña o'ch toramçsas sepaclo o'ch be'tosamçsasa o'ch yoruennasa' ñeñt allpon semorrentyena. ⁴⁰ Ñeñfo'mar notenes, sapa'çho'ña çhocmuepa'chña señoser'tenna tarro'mar ñerra'm allempo

atta es sepcha'yenapa' allempochña nohuerra na Ñeñten Acheñetosets.

Atetcha' aḗparetterra ataruasañ ñeñt e'ñe cohuen etsotene' atet yecheña pamo'mte' ñaña atetcha' aḗparetterra po'poñ ataruasañ ñeñt ama etsotaye ñeñt atet yecheña pamo'mte'
(Mt. 24.45-51)

⁴¹ Allempoña Pedropa' atet a'ḗto'ch:

—Partseshacha' ñeñt atet petma'ntatena te' ñeñtpa' ¿eseshacpa'tña, ñato' yocpate' ñeñtēy peyochreshay pepeney amapa' ñato' allohuenacpa'nate'?

⁴² Partsesha'ñapa' alla toma'ntaterraneterr po'poñoneñ, atet oterraneterr:

—Allohuenespa' atetcha' seḗa e'ñe cohuen atet ñerra'mrrate' puesheñarr yacma ñeñt yechena ñeñt pamo'mte' pen all pa'paclo. Ñeñtcha' po'taruas pene' ḥocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttocop. Ñapa' attecmach pena ḥocmach apuenanet ñerra'm esempoch ḥerrerr allempo atet anaret ñocop o'ch alla apa'yerraneterr po'pocheño. Ñapa' ḥocmach atet pena amach caḥpuere tarro'mar ñapa' eñoteñ attoch e'ñe coshatenan pamo'mte'. ⁴³ Ñeñtña ataruasañpa' atarrcha' coshatueñ pamo'mte'; ñerra'm esempoch huerrapa' alla entuenan pa'taruasañer ama ḥo caḥpuenano ñeñt po'taruas apa'neñ ahuañmo'choteñ. ⁴⁴ Po'ñoḥ o'ch notas, atarrcha' coshatueñ. Añcha' coshaterre' o'ch nohuer pamo'mte' añcha'taret ñeñtcha' cohuanḗsaprete' ñeñt allpon echyen pamo'mte'. ⁴⁵ Tarraña ñeñt ataruasañer allempo ama huerra' pamo'mte' ñerra'm ñapa' atta oten pueyoḥro, namo'mte'pa' amach ahuen huerro, allempoña ñapa' ḥach ashtapechyenan ataruasañeḥno ñeñtcha' rratañ ama't ñaña coyanesohuen. Ñaña' attach allemeñ rrapretyen ñaña attach orrare'tapretyen allcha' atarr posa'tare'tyen. ⁴⁶ Ñeñtña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt ama es otapotetso ama't mamesha.

⁴⁷ 'Elloña napa' o'ch notas, ama't erra'tsena ataruasañer ñerra'm eñotenan ñeñt atet muenen pamo'mte' tarraña ñerra'm ama cohuen ame'ñenano pamo'mte' ñerra'm ama e'ñe cohuenaye' es ḗa'yeno attoch e'ñe cohuen aguerran pamo'mte' esempoch huerra, ama't erra'tsena ataruasañerpa' ñeñt atet petsapa' atarrcha' ashtaretterret. ⁴⁸ Tarraña

erra'tsencha' ataruasañer ñeñt' ama eñotano ñeñt' atet muenen pamo'mte' ama't ñetpa'cho'ña aña atet pa'yenet ñeñt' ama cohuenayaye ama't e'ñe pocten attecmach ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñoteneto ñeñt' atet muenen pamo'mte'. Allohueney erra'tsenotey ñeñtey atarr aparetey attoch atarr yeñoterrñañ ñeñt' atarr sherbets Yomporecop, ñeñteycha'ña atarrcha' cohueney Yompor o'ch e'ñe yesherbatoñ shonte' allohuen ñeñt' atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

*Atto Jesús'pa' orrtatosan e'ñe ño'mar elloptanna'teñets
(Mt. 10.34-36)*

49 'Te'pa' o'ch neñotaterrser po'poñ. Napa' atto nohuena arr patsro o'ch norrtatos elloptanna'teñets ñeñt' atarr huomenc atet ñerra'm tso' atarr atserrtetsa. Pocte' nenteñ o'ch orrtet e'ñe tayecma. ⁵⁰ Ñaña nocoppa' e'ñe atet anaret na'muerochtataretterrach e'ñe atarr huomenc atet ñerra'mrrate' cho chorratennet ñeñt'cha' atarr nemuerochtaterre'. Ñeñto'mar napa' ñeñt'ña atarr nellcatene' te' atta atarr na'huanteñ esempoch e'ñech etsotuerra. ⁵¹ Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñt'pa' ama ateyaye. Añecpa'ña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset. ⁵² Ñehua, ñeñt' noten te' e'ñe tayoteñ ñato' all yeçhena amnarsheña puepahuarro pocollopa' ñato' ñetpa' o'ch ellopa'tetstatet pocta'ña. Ñato' allo'tsen ma'psheña ñeñt'cha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñt'cha' name'ñerraya, ma'psheñañapa' amach mueno o'ch ame'ñerrnet. ⁵³ Ñato' e'ñe no'marpa' o'ch ellopa'tetstatenet pocta'ña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

*Atto Jesús'pa' orrtatosan ñeñt'cha' eñotatahuet o' chap Janet
Yompor po'cohuenña
(Mt. 16.1-4; Mr. 8.11-13)*

⁵⁴ Allempoña Jesús'pa' atet yerpatana acheñenesha' ñeñt' atet otyenet ñet pa'nyeto:

—Sapa' ñerra'm esempo senten arr chorren os all emuena atsne', sañapa' čhocmach atet sotyen: "Te'pa' čhach huatena." Atetča'čo' pa, o'ččo' huatena. ⁵⁵ Ñaña ñerra'm esempo senten huena mōrr topotoť, ñeñpa'čo'ña atetča' sotyen: "Te'pa' o' charenmoch." Atetča'čo' pa, o'ččo' huoraterr huomenc. ⁵⁶ Sapa' atarr señoteneña ñeñ sentyen ñaña arr patsro ñeñpa' e'ne señotueñeñ. Tarraña ñeñ atet norrtatyenas nepartsoteña, eso'marte'ña ñeñña'papa' amaña eñotatensoña ñeñ atet pennas Yompor te' o'ch orrtatonas po'cohuenña. Ñeñpa' attate' seshquēñ.

Atto eñotatanet čhoyach amo'tsterraya e'ne mamecma ñeñ ye'moñe'tene'

(Mt. 5.25-26)

⁵⁷ Elloña e'ne soťa señotepa'chña ñeñ pocte' enten Yompor socop ñeñča' atet sepannena. ⁵⁸ Ñato' o'ch netma'ntatasa atet ñerra'mrrate' esesha' setmantene' ñeñča' sanmue' añcha'taretesho allcha' sa'poctaterr señoñ. Añ pocetsa allempo ama sečhena' añcha'taretesho o'ch poch ñeñ petmantene': "O'ch ya'poctaterr yeñoñ e'ne cohuen tayecma tayepa'tña ama yečhena' añcha'taretesho." Tarro'mar ñeñ petmantene' ñerra'm o'ch čhapatař añcha'taretesho, añcha'tareñapa' čhate' pomař polickeyaneshesho, ñetñapa' čhate' abe'tapet cárcelo allcha' mueročtaterrpet. ⁵⁹ O'ch notas, ñerra'm čhoch yottamřsasetpa' allasach o'pono, alloñapa' amach ahuen čha'nmaterrseto. Esemphuañencha' čhoch sečha'nmaterret ñerra'm allempoch e'ne setsa'tuerra ora allohuen ñeñ allpon quelle muenenet. Ama't e'ne eptalla centavotollña ñerra'm ama setsa'tueña' amachca'ye čha'nmaterrseto alloť. Ñeño'marña notenes o'ch e'ne cohuen samo'tstera ñeñ se'moñe'tene' tayepa'tñapa' ama čhennasa' ñeñ atarr yoročhen senten socop.

13

Añ pocetsa yocop o'ch yoctape'cherr ello cohuen Yomporecop

¹ Allempo huapa puesheña'tets acheñenesha' Jesúsesho, ñetñapa' serrpare'tatoset Jesús atet entenet ñet; ñeñpa' atet otoset:

—Allponsheña ñeñ galileo'marnesha' allo'tsa'yenet allecma muetsatenet berr ñeñ Yomporecop. Allempoñapa' huapanet ñeñ mueñen añcha'tareť Pilato ñetñapa' čha muetsanatosanet e'ne all allempo muetsatenet berr ñeñ Yomporecop. Attoña ñetpa' allña atsetatse'tatařtet ñet po'rras epuet pueberrret po'rras.

² Jesúsña'papa' atet otanet:

—Sapa' čhate' sotenapañ ñeññ galileo'marnesha' allempo atet ařparettet ñato' ñetpa' atarrte' nanac ochñařet ellote' metana'tueñet allohuen po'potantañ galileo'marnesha' po'chñaret. Čhate' sotenapañ ñeñño'marte'ña atet ařparettet ñeññ atarr sosey apencočhen. ³ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'čho'ña attecmač seperra sečenca'huerrach e'ñe poctacma. ⁴ Ñaña ñeññ čharra' ñeññ puechetsa posocsheña ñeññ colla'huatsa ahuaña ñeññ a'tpetse't pocoll torrepo' allempo mata'nerr Jerusaléño e'ñe all oteñet Siloé. Ñehua, sapa' čhate' sotenapañ ñeññ a'cllatter torrepapa' ñetpa' atarrte' atparñařet ellote' metana'tueñet allohuen po'potantañ ñeññ atto atpare'tena jerusaléño'marnesha'. ⁵ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'čho'ña attecmač seperra sečenca'huerrach e'ñe poctacma.

Arrpa' all toma'ntatanet Jesús atet pena partech ñeññ ama me'tetso

⁶ Allempoña Jesúsapa' alla toma'ntaterraneterr po'pocheño, ñeññpa' atet otarraneterr:

—Puesheñarr ačeñ all puenareñmopa' allña'apa' ahuañmo'čoteñ nare'tatenan ñaña puecharr partech.* Atteñapa' čhap allempo huapa e'nosñañ pue'mer. Tarraña ama't pueñarrapa' ama entosñañe pue'mer. Partayechpa' ama me'teno. ⁷ Allempoñapa' atet otan ñeññ cohuanpene' puenareñma': "Te'pa' o' met ma'pa char čhocma nohuena e'nene' partech pue'mer. Teme'ttsen ama't pueñarra pue'merpa' ama nenteññañe. Te'pa' o'ch pa'mater tarro'mar e'ñe orrena quečhcare'tennay yepatseñ atto ama yenare'teno po'poñ narmets all." ⁸ Tarraña ñeññ cohuanpene' narmetspa' atet otan pamo'mte': "Allach nompocha' añ char ñeññ o' huerrerrpa' napa' o'ch na'mueñtsetañpes pats o'ch nenoñ amar. ⁹ Ñato'rraña atet nepe'pa' o'ch cohuen me't tsapač charo. Tarraña ñerra'm ama me'topa' pocte'ñačo' allempopa' o'ch pa'matater."

Atto Jesúsapa' a'crraterran coyanesha' ñeññ atta mo'quętsa ama't aña yetro allempocma amesenet

¹⁰ Allempo čhapa'muenerr allempo amesenet, Jesúsña'apa' yečhatenanet judionesha' po'prahueto. ¹¹ Allña'apa' allo'tsen puesheñarr coyanesha' ñeññ čha mo'quęna, ama eshcaye'

* 13:6 Ñehua, Jesús añ toma'ntatanet higo ñeññ puenareñ penet all pa'nyo.

pačharrteno. Ñeñtpa' oneñeñ atet p̄atene'. Ahuatoteñ at̄ta pena o' çharren char puechena posoc at̄ta mo'quëna.
 12 Jesúsñapa' all eñchpa' o' çhore'tospa' atet och:

—Nocha te'pa' pasaterrep̄cha' ñeññ at̄to atarr pemue-roçhtena.

13 Allempoñapa' a'p̄llamco'ch. A'p̄llamco'tue'pa' allorocma e'ñe cohuen pačharrterra. Ñañapa' atarr aye'choçhtaterran Yompor. 14 Allempoña ñeññ am̄cha'tarettetsa all judionesha' po'prahuo, ñapa' allempo entan atet o' a'çrratan Jesús at-snañeñ, ñañapa' ñeñña atarr atsrre'mate'. Ama't mameshapa' ama pocteye' eñche o'ch a'çrratan acheñ ñeññe yetro allempo amesenet. Ñeñño'marña ñapa' atet otan acheñenesha':

—Eñall pechapmat yet allempo pocte' o'ch yetaruasen. Ñeñtpa' pocte' o'ch sehuapa allempo at̄toch sa'çrrater at-snañeñ. Tarraña añ yetro allempo yamesen amach sehuapat-sto a'çrrate' atsnañeñ.

15 Partsesha'ñapa' atet och:

—Sapa' ñeññes e'ñe sommo'cheñoñpa' atarr seshcare'ten. Sapa'çho'ña ama't aña yetro allempocma yamesen çhocma setaruasen sam̄a. Sepyanñpeñ sehuacsher, sashanor al-lecma serrateñ o'ch sanem̄ ñaña oño allcha' sonayeñ oñ.
 16 Añ coyanesha' ama't ñeññ po'm̄reneñ pen yatañ Abraham ama't çharrā' puechena posoc char ñeññ allponmat o' huan-quër oneñeñ, pocte'ca'ye o'ch ya'rroyatater ama't aña yetro allempo yamesen.

17 Acheñenesha' allohuen ñeññ e'moñe'tene' ñetpa' ñeññña atarr pencatahuet. Po'potantañña acheñeneshaçhnopa' ñetñapa' atarr nanac coshenet. Atarr nanac cohuen entenet ñeññ atet p̄a Jesús.

Atto Jesúsapa' toma'ntaterranet atet pena pue'llomer ñeññ otenet mostazllom̄
 (Mt. 13.31-32; Mr. 4.30-32)

18 Ñeñño'marña allempopa' alla oterranelerr:

—Añ Yompor po'cohuenña ñeññ at̄to ayochreshattena ña, ñanompa' e'ñech puesheña'ttsa ame'ña'yetsa, allempoteññapa' allo'nach sen atonetnomtsa ñeññcha' ame'ñerrtsa at̄tochña e'ñe epa'huerra erracmañen Yompor po'cohuenña. Ñeññña te'pa' o'ch netma'ntatasa ñeññ atet pena ña. 19 Ñehua, ñeñtpa' atet pena ñerra'mrrate' pue'llomer ñeññ atarr añeñolleshallmerr ñeññ otenet mostazllom̄. Ñeññ pue'llom̄retollpa' puesheñarrñapa' o' anem̄ pa'mro allcha' nare'teña'. E'ñe allponmatatsapa' o' chop, ñeññña allo'na sen rrorranmats e'ñe cohuen atarrchetnom. Ñeññña

narmetsocherpa' o'ch hua'cha'toña ote'chno ñeñt'cha' ama'tanatyesosets puetacro'mar.

Atto Jesús'pa' toma'ntaterranet ñeñt' atet' pena chase'
(Mt. 13.33)

²⁰ Elloña alla oterraneterr:

—Po'poñonet' o'ch netma'ntatasa ñeñt' atet' pena Yompor po'cohuenña ñeñt' atto atarr ayochreshattena ña. Ñeñt'pa' ama't'cha' añet'olla ñeñt'cha' ñanom orrtatsa t'arraña e'ñe ña po'huamencot'pa' mame'tollapa' o'ch e'ñe epa'hua ora er-ra'paren.

²¹ Ñeñt'pa' añ' toma'ntaterraneterr atet' pena chase':

—Ñeñt' chase'pa' allo tsetenan coyanesha' harina' ñeñt' oñetsetstaten attoch a'chasatan harina' eshec'cha' e'ñe a'muesatue. Ñeñt'ña chase'pa' ama't'cha' añet'olla net, ama't'cha' aton harina' ñeñt' ma'pa arroga, mame'tollapa' o'ch e'ñe a'muesatuanña ama't' atarr aton harina'.

Atto Jesús'pa' toma'ntaterraneterr ñerra'mrrate' yetarro'tollo yebe'ten eshec'cha' ye'chap Yomporesho
(Mt. 7.13-14, 21-23)

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't' ñaña all ama'tama eñalleyaye acheñenesha'. Allña e'ñe serrpare'tatyesnomanet. Allempo oñemyen allemeñ anetso'mar ñapa' arr sen Jerusaléño all sechena. ²³ All oñen toñopa' allempoña puesheñarrpa' a'p'to'tnoñ, atet' och:

—Ayochreshate, ñeñt'cha' allpon a'queshp'ataretterrtsapa' ta'm ñetpa' ¿puesheña'ttsetate' ñato' amapa' atarr'cha' shonte'? Jesúsñapa' atet' och:

²⁴ —Sapa' añcha'ña e'ñe cohuen sema'yo'chrena ñeñt' cohuen enten Yompor attochña sesuanom ñeñt' ama' cohuenaye' enteno ña. Ñeñt'pa' o'ch netma'ntacha atet' ñerra'mrrate' allcha' yebe'tos eshec'cha' ye'chap ñesho ñeñt'pa' atarr añet'oll, atarr torrapo' o'ch yebe'tos all. Ñaña o'ch notas esempohuañen ama't'cha' shonte' acheñenesha' ñeñt'cha' atarr muenatseñ o'ch be'terretañ all attoch cherretañ Yomporesho t'arraña allempopa' amach eshec be'terreto attoch cherret all tarro'mar allempopa' o'ch huañerr atto atarr cohueney Yompor. ²⁵ Ñeñt'pa' o'ch netma'ntacha atet' ñerra'mrrate' esempo o'ch chen ñeñt' apacllatesha' ñaña'pa' o'ch tantuena o'ch e'ñe echarr yottam'pesuena. Allempopa' ama't' e'ñe eseshapa' amach eshec be'tosofña all. Allempoña ama't'cha' shonteseñ o'ch sehuacha'ta all petotach sechorros allotcha' se'chore'tos apacllatesha'. Allña sapa' atet'cha' sotos: “Ayochreshate petoram'psapuey.”

Ñapa' atetcha' otapas: "Napa' ama nentarso, erroŧte' sehuenaña sa." ²⁶ Sañapa' atetcha' sotererr: "Ama't parrocmá yerrallme'chyese'teña ahuañmo'cha ñaña ama't ya ya'netsro'mar allecma chopeñe'chyenet allca'yeña peychatyese't." ²⁷ Tarraña ñapa' atetcha' oterrerr: "Te'pa' o'ch notas, napa' amaca'ye po'ño'ch nentarso, erroŧte' sehuenaña sa. Te'pa' orrerres arroŧ neshoŧ allohuenes ñeñtes ma'yo'chrenaya ñeñt ama pocte' enteno Yompor." ²⁸ O'ch ahues all ñeñt o'patatenset sa. Allñapa' allcha' seyahuanrrortosa, sanmueñoŧ atserrpa' serraso'tyesoscha' sas. Allotcha'ña sentosña satañnesha'chno—Abraham ñaña Isaac ñaña Jacob ñaña allohuen ñeñt a'mta'yesaye't Yompor po'ñoñ. Ñetñapa' e'ñe Yomporesho'tsa'yenet all añcha'tarettena ña. Sañapa' cha'petoña huapore'tenset. ²⁹ Allñapa' allemateñcha' huacha'ta shonte' ñeñt ama judioneshayaye ñeñtcha' anorrcha'tyesosets all e'ñe Yomporesho all añcha'tarettena ña allcha' rrallme'choset all e'ñe cohuentena Yompor. ³⁰ Te'pa' seño'chcha' eñall acheñenesha' ñeñt ama asherbenaye' senteno sa te' tarraña allempoña ñetpa' atarrcha' asherben enterranet Yompor. Ñaña eñall acheñenesha' ñeñt atarr asherben sentyen sa te', tarraña allempoña ñetpa' amach asherbenaye' enterraneto Yompor.

Atto Jesús'pa' puellquëñoŧan jerusaléño'marnesha' atarr ya'na'tenanet

(Mt. 23.37-39)

³¹ E'ñe ñeñte yetrocma allempo huacha'toña patantarr fariseonesha'. Ñetñapa' atet otoset Jesús:

—Te'pa' o'ch peyeta arroŧ tarro'mar añcha'taret Herodespa' o'patenpa' ahuo'ch muetsataŧ.

³² Jesúsñapa' atet otapanet:

—O'ch ahuerrespa' atetcha' sotuer Herodes ñeñt atarr eñotene' shequëñets: "Te'pa' o'ch peño'ch, napa' atterach neca'chpatateññañ acheñenesha' po'neñefer ñaña atterach shonte' na'crratyes ñeñt atсна'tyets. Atet nepena te', tsapatonetpa'cho'ña attecmach nepena, o'chña tsapatonterrerrpa' o'ch e'ñe netsotatue allohuen."

³³ Nocoppa' añ poctetsa chocmach nesen ama't te', ama't tsapatonetpa'cho'ña, ama't ñaña o'ch tsapatonterrerrpa' chocmach nesen. Attotach ne'cherr Jerusaléño, tarro'mar allpa' allecma chocma muetsayese't ñeñt a'mta'yesaye't Yompor po'ñoñ.

³⁴ Allempoña Jesús e'ñe puellquëñoŧ judionesha'pa' atet eñorena ñocpuet, ñeñto'marña atet otanet:

—Sa jerusaléño'marneshacha' ñeñtes muetsanatyeyaye't ñeñt a'mta'yeyaye't Yompor po'ñoñ, sa ñeñtes rollapechyesaye't ñeñt amñare't sesho. Atarr atonoche'tats nemneñeñ o'ch na'yapa'cha'huerrsoñ allohuenes nesho attoch e'ñe cohuen necuam'pensoñ. Nemneñeñ o'ch na'yapa'cha'huerres atet ñerra'mrrate' atollop a'yapa'chene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno. ³⁵ Te'ñapa' all sey'chena sa, Yomporñapa' o'ch a'ypo'ñerres. Tarro'mar te'pa' o'ch alla noterrser: Na po'poche'ño'pa' amach alla senterrno te'. Esemphuañenñapa' senterrencha' allempoñapa' atet'cha' soterren: "Aye'cho'chtatpahu'epa'ch Jesucristo ñeñt huapatsa ñeñt llesensen Yeyomporer."

14

Atto Jesús'pa' a'crraterran puesheñarr yacma ñeñt 'cha ananen

¹ Allempoña 'cherrerr pam'tarr allempo amesenet. Jesús'ñapa' ahua' allcha' rrallme'chapretenana' puesheñarr fariseo ñeñt atarr añcha'tare'ttetsa. Chap all pa'paclopa' po'potantañña fariseonesha' ñet'ñapa' atarr cohua'na'tyesapet Jesús. ² All'ñapa' allo'tsen puesheñarr yacma ñeñt 'cha ananen. ³ Jesús'ñapa' all serrpare'tos epuet fariseonesha' ñaña ñeñt allo'tsa'yen ñeñt atarr etsotene' ñoñets ñeñt atet anaret judioneshacop. Ñaña'pa' atta a'p'to'tosanet e'ñe po'tomña, alloch'ñapa' o'ch eñoch ñato' erro'tencha' anapet. Ñeñt'pa' atet otosanet:

—¿Erro'tena'tña sotenña sa, ta'm pocte'te' o'ch na'crratos atснаñe't añe yetro allempo yamesen? ¿Atte't otenña ñoñets ñeñt atet anaret, ñato' ama'te'?

⁴ Fariseonesha'ñapa' ama eseshaye' anapuetso ama't puesheñarro'ta. Allempoña Jesús'pa' a'p'llamco'tosan atснаñe't. E'ñe a'p'llamco'tue'pa' 'cha corrrr'tsa allenta mueñer pa'paclo. ⁵ Allempoña Jesús'pa' alla otterranner fariseonesha':

—Sapa' ñerra'm sashanor amapa' sehuacs'her shora'nets aroroto all chorren oñ, ama't'cha'ña sechteneña allot e'ñe allorocma ama't añe yetro allempocma yamesen.

⁶ Ñet'ñapa' ama erro'tenaye' otenaye' enteñeto ama't e'ñe puesheñarro'ta.

Atto ahua'ñare'ttet o'ch rrallme'chapreteñeta' ñeñt sena'tetsa

⁷ Allempoña ñeñt ahua'ñare'ñesha' ñet'ñapa' añña atarr muenenet o'ch anorryesoset allecma anen ñeñt atarr añcha'na'tpo' entyenet. Jesús'ñapa' entapanet ñeñt atet muenenet ñet o'ch 'cha ommo'chy'esoset. Allempoñapa' atet otapanet:

⁸—Ñerra'm esempo ahua'ñaretes o'ch serrallme'chapreteña' ñeñt sena'tetsa, sommo'cheñoŕpa' amach arra sanorratsetyesoso allecma anen ñeñt atarr amcha'na'tpo' entyenet. Ñetña chenta'pa' o'ch huapuet ñamet. ⁹ Ane'tañ ñeñt sehua'ñene' allohuenes ñaña'pa' o'ch huapa pesho o'ch otaŕ: "Te'pa' o'ch petanterra arroŕ, all ŕanen te'pa' o' huapaña ñeñt panorrupte' pene' all ŕanen ñeñt atarr amcha'na'tpo' entyenet." Paña allempopa' atarrcha' pepenqueñoŕ petanterra o'ch ahueŕ allcha' ŕanorros allecma anorryen ñeñt ama esoshe'maye' entyeneto. ¹⁰ Sapa' atetcha'ña seŕa ñerra'm esempo hua'ñenset. Allempo seŕhap all hua'ñenset sapa' allach sanorros allecma anorŕcha'tyen ñeñt ama esoshe'maye' entyeneto. Allña'pa' o'ch huapa ane'tañ, ñapa' atetcha' otoseŕ: "Masheñcha' ŕapa' arrcha' ŕanorros allecma anen ñeñt atarr amcha'na'tpo' entyenet." Attochña allohuen ahua'ñareñnesha'pa' o'ch entapet ŕapa' atarr amcha'na'tpo' entyenpet. ¹¹ Tarro'mar allohuen ñeñt e'ñe cohuen entetsa e'ñe pommo'cheñoŕ ñetña tsapatoneŕpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapatoneŕpa' atarrcha' cohuen enteret.

¹² Allempoña'pa' atet otan ane'tañ ñeñt hua'ñene':

—Ñerra'm esempoch ŕorrtaten rreñets ñeñtcha' serra'muen aromtaña amapa' ellerronet amach e'ñe aña pehua'ñatsto ñeñt e'ñe parro peyemtena ñaña ñeñt pemo'nasheñ pepen ñaña po'potantañ ñeñt e'ñe ŕamo'tsesha' pepen ama't ñaña allo'marnesha' ñeñt atarr eçllayoretet. Tarro'mar ñerra'm ñeñt pehua'ñenpa' ñetpa'cho'ña tsapatonet o'ch alla hua'ñerrpet ŕaña. Attoch tsa'terrpet. ¹³ Tarraña ñerra'm esempoch ŕorrtat rreñets aña'nachña pehua'ña'yes ñeñt atarr huocchañetyets ñaña achocrañaçhno ñaña ñeñt checa're'paçhno ñaña aporo'yeteçhno. ¹⁴ Attochña ŕapa' atarrcha' cosheñtso'tseneŕ tarro'mar ñetpa' amach errotenoŕt alla tsa'terrpeto. Pa'pa' esempohuañencha'ña atsa'tareteŕ allempoch atantatareŕterra allohuen ñeñt e'ñe pocte' es ŕa'yestse't.

Arrpa' all atma'ntatareŕtena ane'tañ ñeñt atarr aton yeŕhcatatene' rreñets

¹⁵ Allempo e'mueñet Jesús atet serrpare'tatuanet, puesheñarrña ñeñt parro anorŕchenet ñeñt parro rrallme'chenet, ñaña'pa' atet otan Jesús:

—Atarrcha' cosheñtso'tseney allohueney ñeñteycha' rrallme'chapreterre' Yompor all amcha'tareŕtena pue'ntaño.

¹⁶ Jesúsña'pa' toma'ntaterraneter; ñeñt'pa' atet oterranelter:

—Eñall puesheñarr ane'tañ ñaña'pa' o'ch ye'chcatatan atarr shonte' aton rreñets. Allempoñapa' otyesan shonte' acheñenesha' ñeñ'cha' rrallme'chapretenaya' esempoch e'ñe a'potatuan rreñets. ¹⁷ O'ña chap allempo e'ñe a'potatuan rreñetspa' ñaña'pa' mueñan pa'taruasañer ñeñ'cha' hua'ña'yenaya' allohuen acheñenesha' ñeñ' otarettatsa ahuaña. Ñeñ'ña pa'taruasañerpa' atet otosan acheñenesha':

—Te'pa' o'ca'ye e'ñe a'potaretetuaña rreñets sona'cha't o'ch serrallme'chapretena'. ¹⁸ Tarraña ñeñ' ahua'ñarete'chnopa' ñetña'pa' ama esesha' tatso. Ñehua, ñeñ' ñanom puesheñarrpa' atet ot: “Napa' te'pa' o'ca'ye neraña pats, o'chca'ye ahuen o'ch necua'yeña'. Potuercha' pamo'mte' peretnerrnepa', napa' amachca'ye neto.” ¹⁹ Po'psheñeñpa'cho'ña atet ot: “Napa'cho'ña o'ca'ye neraña charrana toro po'yuntohuen e'ñe epna'ttso; o'chca'ye ahuen o'ch netpach taruasate'. Potuercha' pamo'mte' peretnerrnepa', napa' amachca'ye neto.” ²⁰ Po'psheñeñpa'cho'ña atet ot: “Napa' errenca'ye sena'tetsa ñeñ'omaña napa' amachca'ye eshec neto.” ²¹ Ñeñ'ña ataruasañer atet otyes acheñenesha'pa' ñaña'pa' ahurr pamo'mtayesho, serrpare'tatuerran pamo'mte' atet otyeset ñeñ' hua'ña'yeseñ. Ane'tañña'pa' ñeñ'ña atarr atsrre'mate'. Patsrre'mueño'pa' atet otterranerr pa'taruasañer: “Te'pa' o'ch ahurrperr e'ñe tayecma ñaña all anetso allecma atarr chopeñe'chyen shonte' acheñenesha'. Allotcha'ña pehuapaterr huocchañnesha'chno ñaña achocrañ'chno ñaña aporo'yete'chno ñaña checa'repa'chno.” ²² Pa'taruasañerña'pa' atetcho' perrerr. Allempo huerra atet otuerranerr pamo'mte': “Nompocha' ñeñ' atet potenpa' te'pa' o' e'ñe atet nepohua. Tarraña allcha' anorrcha'tyes ñeñ'cha' rrallme'chosetspa' orameñ.” ²³ Pamo'mte'ña'pa' atet otererr: “Te'pa' o'ch alla ahurrperr allampaño'mar all shonte' toñe'chno allecma chopeñe'chyen acheñenesha'. Allña'pa' atarrcha' potare'tyes acheñenesha' onetepa' arr nepacillo attoch e'ñe chorra acheñenesha' arr nepacillo. ²⁴ Po'ño'ch te' napa' o'ch notas, ñeñ' ñanom nehua'ñatyeseñpa' ñetña te'ña'pa' ama't e'ñe puesheñarro'tetapa' amach rrallme'chapreterrneto attoch cosherret nesho.”

Añ poctetsa o'ch e'ñe yesuanem ñeñ' e'ñe yocpa attoch yocter Cristo e'ñe poctacma

²⁵ All oñemyen Jesús'pa' shonte' acheñenesha' cota'huanene'. Ñaña'pa' cohua'nmanet allenet shontenetpa' atet otnomanet:

²⁶ —Ñerra'm esesha' muene' o'ch coterren e'ñe po'ño'ch, añ nemnen o'ch atarr nanac morrentennet. Elloch metaneñet atto atarr morrenteñet pompor, ama't ñaña pachor, ama't

ñaña puetapor ñaña puechemerasha', pa'mo'nasheñnesha', po'chanesha'. Atto atarr morrentennet ello metaneñet atto atarr morrentenet ñañeñeta ñeññ atto correnet arr patsro. Ñerra'm erra'tsen ama atteye' nemorrentenayepa' nañapa' amach errotenot neyochresha' neperraneto. ²⁷ Tarro'mar ñerra'm erra'tsen ama e'ñeye' sehuanmaye ñeññ atet muenenet e'ñe ñocueta attoch coterrnet e'ñe poctacma, nañapa' amach errotenot neyochresha' neperraneto. Ñeñtpa' añ toma'ntena atet ñerra'mrrate' cho sechechen secorsoch allcha' semueroçhta samã. ²⁸ Ñeñto'marña ñerra'm erra'tsenotes muenene' o'ch neyochresha' neperres, añ poctetsa çhoch ñanom soctape'ch, e'ñete' pocte' senteñ o'ch sesuanom ora allohuen ñeññ atet notenes. Ñeñtpa' atetcha' netma'ntacha atet ñerra'mrrate' eseshas muenene' o'ch satomat sepaquëll atarrpo'pa' añ sepalltena çhoch ñanom sanorr allcha' soctape'ch errponte' tsa'tena. Ñato' eñallte' allpon quelle attoch mameshapa' o'ch sa'pue'. ²⁹ Ñerra'm ama atet ñanom soctape'chenopa' ñato' o'ch satomatañ ñanom alloch echarr serrat sepaquëll, ñerra'm çha sehuañapes quelle attoch sa'pañ sepaquëllpa' attach secaçhpue'. Acheñenesha'ña ñeññ sentene'pa' çhach che'tatsetaset; ³⁰ ñetñapa' atetcha' otyeset: "Añ acheñerpa' o' tomataneña atarrpo' pa'paquëll, alla huañapes quellepa' ama esoye' a'patano pa'paquëll." ³¹ Ñeñtara cotapñatser o'ch alla netma'ntacha po'poñonef. Atet ñerra'mrrate' puesheñarr amcha'taret ñerra'm añ cotape'chen o'ch quellaratan po'solltarer epuet po'psheñeñ amcha'taret po'solltarer çhoch ñanom anorr allcha' e'ñe cohuen cotape'ch. Allempopa' atetcha' ot: "Napa' e'ñeca' çharra' mila nechen nesolltarer; po'psheñeña amcha'taretpa' echenan po'solltarer epoch çharra' mil. Ta'm, pocte'te' o'ch nemñe çharra' mil nesolltarer ñeñtcha' poctapue' epoch çharra' mil solltarnesha' ñeñtcha' yehuapoya. Ta'mca'ye a'mchechatuette'ca'ye—shonte'." ³² Allempoña o'ch atet cotape'chuapa' ñerra'm ama errof apenaye' eñchepa' allempo ama aponmarettaneta' ñaña'pa' o'ch mueñan allponsheña ñeñtcha' atet otosahuet: "Yapa' añecop yen o'ch ya'poctaterr ñoñets e'ñe cohuen e'ñe atta, amach yeçllaranna'tatsto." ³³ Ñeñto'mar notenes, ñerra'm eseshas ama e'ñe pocteye' senteñe o'ch sesuanom ora ñeññ allpon sechen, nañapa' amach errotenot neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteñapa' o'huañcha' sherba'
(Mt. 5.13; Mr. 9.50)

³⁴ Ñehua, yapa' yeñoteñ pospa' atarr cohuen sherbenan allohuen acheñenesha' arr patsro. (Allohuen ñeñt' po'ñoç neyochresha' nepen ñetñapa' atarr sherbenet attet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach errotenot ellopa' ya'poserrtatere. ³⁵ Attoña amach es sherberro ama't e'ñe coñe'ta. Ama't attoch yetnarrataterr allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' çhaponasepa'ch seyoçhro ñeñt' atet neyçhatenes.

15

Acheñ ñeñt' ama ame'ñetsopa' arrpa' all atma'ntatarettet atet ñerra'm carrnero ñeñt' chenquëtsa

(Mt. 18.10-14)

¹ Shonte' ñeñt' cobrets quelle gobiernocop ñeñtara ñeñt' atarr shecare'tyets ñaña shonte' ochñañenesha', ñetñapa' huaçha'tet Jesúsesho o'ch e'mñoteññañeta' ñeñt' atet serpare'tatenan allohuen acheñenesha'. ² Añña fariseonesha' ñaña ñeñt' atarr etsotayenayeñ ñoñets ñeñt' atet anaret judioneshacop, ñetñapa' ama't mameshapa' ama pocteye' enteñeto. Ñetñapa' atta sasare'teñet Jesúsapa' ñeñtpa' atet otanna'tyenet:

—Añ acheñer ama't ñeñt' atarr ochñañenesha'pa' eso'marte'ña e'ñe cohuen agapyenanet, ñaña alla rrallme'chapreteñet.

³ Ñeñto'mar Jesúsapa' alla toma'ntaterraneterr; ñeñtpa' atet oterraneterr:

⁴ —Sapa' ñerra'm eseshas echene' shonte' secarrneror, çharroç çharra' sechen tarraña ñerra'm pomocarrña machayota sa'chencachpa' ama't atet sepeno. O'ch sesa'nom allohuen po'potantañ ñeñt' o' noventa nuebaña all amayo ama't atarr a'yopa' o'ch ahues e'nerraya' pomocarr ñeñt' chenquëtsa. Allcha' se'name'tyera'pa' attotach senter. ⁵ Allña senterpa' o'ch senatner, e'ñech socsheñeshocmañen saner. ⁶ O'chña seçhapter sepaçllopa' allña'pa' o'ch seçhore'tuer samo'tsesha' o'ch onaçha'tet. Allña'pa' o'ch sotuerr: “Te'pa' o'ch socshapreterrna necarrneror, te'pa' o' nenterrña ñeñt' na'chencaten.” ⁷ Ñeñto'marña te'pa' notenes: Yamo'mte' ñeñt' pue'taño'tsen attecmaçh atarr nanac cosherrana ama't puesheñarra acheñ ñeñt' atarr ochñañ ñerra'm esempoch o'ch cotape'cherret ello e'ñe cohuen ñocop. Elloch metana'tuerran ñeñt' atto coshenana po'potantañ ñeñt' shonte' ñeñt' e'ñe

pocte' es p̄a'yenet ñocop ama't ñetpa' shontet atet ñerra'm noventa nueve carrnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatarettena puetallarr quelle ñeñt a'chencaten pamo'mte'

⁸ Ñeñtara cotapñats, te'pa' ñato' atetcha' netma'ntacha po'poñonet atet ñerra'm puesheñarr coyanesha' ñerra'm echenan çharratlla po'çllayor ñeñt atarr morrentena. Ñerra'm çho a'chencach puetallarrpa' ama'tcha' a'llchatanoña po'lampareñ attoch tarrapo'tenan pa'paquell allcha' e'name'tyerran puetallarr po'çllayor. Attocha'ña enter. ⁹ O'chña enterpa' allempoñapa' o'ch agotan pamo'tsesha' e'ñe pacmaneshoche', atetcha' otanet: "Te'pa' o'ch socshapreterrna ñeñt puetallarr neçllayor ñeñt na'chencat, te'pa' o' nenter." ¹⁰ Te'pa' o'ch noterrser, elloña atarrcha' nanac coshateret Yompor po'mllañoñeñreneshohuen ñerra'm esempo ama't puesheñarra acheñ ñeñt atarr ochñaïpa' o'ch cotape'cherret ello e'ñe cohuen Yomporecop.

Arrpa' all atma'ntatarettena puesheñarr yacma puechemer ñeñt atarr ottatsñaï

¹¹ Elloña Jesúsapa' alla toma'ntaterraneter, ñeñtapa' atet oterraneter:

—Eñall puesheñarr acheñ echenan epsheña puechemer. ¹² Ñeñtña puechoyomer penpa' atet otan pompor: "Apacha' ñeñt ora allpon pechen te' napa' nemneñ o'ch p̄apuen e'ñe tayecma ñeñt allpon p̄o'patatenna." Allempoña pompor ora ñeñt allpon echyenpa' o' apa'yesan epsheño'mar puechemeresha' ñeñt allpon o'patatyenanet e'ñe puesheña'ttset. ¹³ E'ñe allponmatatsa ñeñtña puechoyomer penpa' o' e'ñe pomhuahuanman ora allohuen ñeñt allpon ā pompor allo agapan shonte' quelle attoch ta ñachayo po'poñ anetso. Allempoña çhap ñachayopa' allñaapa' sosya'tsañeçhna atet p̄a'yesos. Attoña ama't shonte' po'çllayor ñeñt anem o' e'ñe a'gasta'huahue e'ñe pottatse'teñoñ. ¹⁴ O' e'ñe a'gasta'huan ora po'çllayorpa' allempoña allpa' o' orrta muecheñets all ñeñte anetsro. Ñañaapa' o'huañ erraye' entan puerrar ñeñtcha' rren. ¹⁵ Allempoña ñapa' o' ahuo' allo'tsen ane'tañ all e'nyenan taruas. Ane'taññaapa' aña ā po'taruas o'ch auyesos a'yenet allcha' cohuan̄pesyesoñ po'chañchor. ¹⁶ Ña pa'chporrñoïpa' atarr mueneñ o'ch rrapretosan chañcho puerrar attoch yetosa. Ama't chañchopa' pa'talle'tsa puerrar pen ñapa'çho'ña ñeñtña atarr muenen o'ch rros ñarraña ama't chañcho ama eseshaye' apuenaye puerrar ñeñtcha' rra'. ¹⁷ Atteñapa' machayoña çhaponña pueyoçhro, atet ot:

“Apa pa'taruasañer ama't shontetpa' echyenet puerrar, ello puechare'tyena. Naña arrpa' o' nerromuerrmoch nachporrñoť. ¹⁸ Te'pa' o'ch ahuerren apuesho; te' napa' atetcha' notuer: Apacha' napa' o' neṗohua ñeñť ama cohuenayaye Yomporecop ama't ñaña ṗocop. ¹⁹ Napa' ama cohuenayayno attoch pechemer peṗapuerren. Te' napa' aña poctetsa nocop ṗapa' ṗa'taruasañrach peṗapuerren.” ²⁰ O'ña atet cotape'chua ello e'ñe cohuen Yomporecoppa' allempoñapa' ahuen pomporesho.

'Ama't atarr ellaṗarmeñ allempo entapueñ pompor e'ñe puemuereñoť mata poctapueñpa' a'chono'tapueñ, tso'ttsapa'tapueñ. Ñeñťpa' atet huomńcha'tapuenan puechemer atto e'ñe cohuen agapapueñ. ²¹ Puechemerñapa' atet otueñ: “Apacha' napa' o' neṗohua ñeñť ama cohuenayaye Yomporecop ama't ñaña ṗocop. Na te'pa' ama cohuenayayno attoch pechemer peṗapuerren.” ²² Tarraña pomporñapa' e'ñe allorocma otan pueñañreshachno: “O'ch sena' e'ñe ŧayecma shetamuets ñeñť atarr cohuen cochnesha', o'ch sechorratapuennana nechemer. O'ch senatapueñ ñaña anillo potaṗo, o'ch senatapueñ ñaña sapatets pa'tco. ²³ O'ch sennana' ñaña nehuacsher ñeñť atarr ne'soya'taten o'ch semtse o'ch yerrallme'ch o'ch yocshame'tamṗsapueña. ²⁴ Tarro'mar añ nechemer ama't o' rromhuañ, te'ñapa' o' alla tanterra. Ama't o' chenca'huañpa' te'ñapa' o' alla nenter.” Allempoñapa' atarr nanac coshame'tamṗsapueñet.

²⁵ 'Ñehua, po'psheñeñ puechemer ñeñť popo'nar ñañaapa' pa'mro'tsen allempo čhen puechoyomer. Allempoña err pa'mrot e'ñe ya'rroterrtsa pocollopa' o' e'mhuerran coshamñats all requērquēnet ñaña ashe'rarañ. ²⁶ Allempoñapa' chore'tuerran cheshachorpa' a'ṗto'tuer: “¿Eso'mare'tña coshame'tenet? ¿Eso'tña atarr coshame'tamṗpenet? ²⁷ Cheshachorñapa' atet otapuer: “O' huena pemo'nasheñ, ṗomporpora' o' muetsatan becer ñeñť se'soya'taten tarro'mar atarr coshapuenana puechemer. Ama čhoye'rromueno, e'ñe huomech agapapueñ.” ²⁸ Ñañaapa' ñeñťa atarr atsrre'matuerre' ama mueno o'ch be'tosuerr all o' čhen pa'mo'nasheñ. Atteñapa' čha'nom pomporpa' allach otere't: “Pebe'tosuerr.” Ñañaapa' ama mueno o'ch be'tosuerr. ²⁹ Ñañaapa' atet otuerran pompor: “Napa' peñotenen o' shonte' char e'ñe cohuen name'ñenṗa; napa' ama't parrochapa' ama esempo naṗpare'tenpe. Tarraña ama't atet nepenpeñpa' ñañaapa' ama't esempapa' ama ṗapuennoña ama't pa'rra cabra attoch nocshame'ta namña epan ñeñť parro neyemuetyena na. ³⁰ Te'ña o' huena ñeñť

pechemerma't pepen ama't ora o' a'gasta'huona'p peçllayor e'ñe puecañoresha'teño't, te'ña p'apa' o' pemtsatapueñ becer ñeñ't ye'soya'taten." ³¹ Pomporñapa' atet otererr: "Po'ño'ch nechemercha' p'apa' çhocma arro'tseney parro. Amahuaca'ye nechemercha' peñoteñe'te' ñeñ't allpon nechenpa' e'ñerramche' p'ocma. ³² Ñeñ'to'marña te'pa' añ poctetsa o'ch yocshame'tam'psapueña pemo'nasheñ, o'ch atarr nanac yocshena tarro'mar ama't o' rromhuañ te'ñapa' o' alla tanterra; ama't o' chenca'huañ te'ñapa' o' alla yenter."

16

Atet atma'ntatarettena atet pena ñeñ't cohuan'psatsre'tene' pamo'mte'

¹ Elloña Jesús'pa' alla toma'ntaterranerr pueyochresha', ñeñ'tpa' atet serrpare'taterraneterr:

—Eñ'all yacma puesheñarr ñeñ't atarr eçllayoret. Ñapa' echenan pa'cheñer ñeñ't po'taruas pene' o'ch cohuan'psan ora allpon ñeñ't echyen pamo'mte'. Ñaña ñach quellquene' po'potantañ ñeñ't allpon te'ba'yeññañet pamo'mte'. Atteña allempoña puesheña'tets acheñenesha'pa' a'metañpeñeta' pamo'mtayesho, atet otoñet pamo'mte': "O'ca'ye atta a'chencatatsre'ta'pña ñeñ't penen ñeñ'tcha' pecuan'psatsre'tene'." ² Allempoña pamo'mte' atet e'mare'chpa' allenta agotach. Allempoña huapapa' atet ota'p: "Eso'maruañaca'yeña atet p'a'chencatatsre'tenen. Te'pa' o'ch peñotatnomuen e'ñe ora allohuen ñeñ't allpon petaruasen tarro'mar te'pa' ama nemno o'ch allo'na pecuan'psatsre'tenen." O' atet otue pamo'mte', ñaña'pa' allenta ahuerr.

³ Allempoña pa'taruasañer ña'p'opa' atet cotape'chen: "Te'pa' amach allo'na netaruasa'nenonamo'mtayesho; o'ca'ye mopa'tam'perrenña allo neganena. Te'pa' erro'tenuachñaca'ye ne'pate'. Napa' ama necheno nehuamenc attoch namre't ñeñ'tcha' netaruas neperreñ, ñaña ama nemno o'ch netaruas ne'pa' o'ch atta nenamare'tyen quelle atet p'a'yena po'psheñne'çhno ñeñ't po'taruas pene' o'ch enamare'tyeset quelle, tarro'mar na ñeñ'tpa' atarr apenco'chen nenteñ." ⁴ Allempoña o' e'ñe cotape'chuepa' atet ot: "Te'ña po'ño'chpa' o'ca'ye neño'ch atet'cha'ca'ye ne'pa' attoch acheñenesha'pa' e'ñech cohuen agapnet pa'pacillo tsapatonet allempoch huañ neçllayor ñeñ't allpon naguën te' netaruasot." ⁵ Allempoña atet cotape'chenpa' atet'cho' p'a. Ñeñ'to'marña agotatan allohuen allponsheña ñeñ't te'ba'yets pamo'mtayesho. E'ñe puesheña'ttsa ñanom a'p'to'tyesap, atet otapanet: "Papa'

¿errpona't petebeñña namo'mte'?" ⁶ Ñaña'pa' atet otos: "Napa' netebeñca'ye çharroch çharra' cilindro aceite'." Ñeñt patron pa'cheñerñapa' aþ allo quellquëññañ ñeñt allpon teben ahuatoteñ. Allempoñapa' atet otererr: "Te'pa' o'ch þanorr tecmapa' o'ch pe'sherrña ñeñt çharroch çharra' cilindro o'ch pequellquërr amnaroch çharra' o'ca'ye allponamaña ñeñt peteben." ⁷ Allempoñapa' oterranerr ña'ña po'psheñeñ: "Papa'cho'ña ¿errpona't petebeñña namo'mte'?" Ñaña'pa' atet otos: "Napa' netebeñ çharroch çharra' arroga trigo." Ñeñt patron pa'cheñerñapa' aþ ña'ña allo quellquëññañ ñeñt allpon teben ahuatoteñ allempoña ñapa'cho'ña atet otererr: "Papa'cho'ña þanorr tecma o'ch pe'sherrña ñeñt çharroch çharra' arroga o'ch pequellquërr poscoch çharra'; te'pa' o'ca'ye allponamaña ñeñt allpon petebeñ namo'mte'." ⁸ Allempo pamo'mte' eñotan ñeñt pa'taruasañer atta shecare'teñ, ñaña'pa' atet oten: "Añ acheñer ama't puehquëño'tpa' e'ñe eñoteñ o'ch entan ñeñtcha' atarr sherberre' ñocop tsapa'tonet." Po'ño'ch acheñenesha' arr patsro ñeñt ama ame'ñetso ñetñapa' atarr eñoteñet attoch e'ñech aña e'nenet ñeñtcha' atarr sherberrets ñocpuet tsapa'tonet. Tarraña ñeñtña ame'ñetsapa' ama tama eñoteñeto, ama es cotape'cheneto o'ch e'nenet ñeñtcha' atarr sherberrahuet ñamet tsapa'tonet.

⁹ Ñeñto'marña te'pa' o'ch notenes:

—Ñeñt allpon pa'namen sechyen seçllayorohuen ñeñt'pa' añecpuepa'chña sherbenes alloch seyenpueñ po'potantañ allochñapa' attochña e'ñech cohuen muererrset. Sapa' añecpuepa'chña setaruasatña sa seçllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ña'ña añecop ñeñt ama pocteye' enteno Yompor. Allochñapa' eñallcha' socop ñeñtcha' e'ñe cohuen sagüerre' e'ñe all Yomporepahuo esempoch seçhacherr all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen socrra'huerra Yomporepahuo ñeñt'pa' ama ahuañaño.

¹⁰ Elloña o'ch notas:

—Ama't e'ñe coñe'ta yechen ñerra'm añecop yesherbateñ ñeñt cohuen enten Yompor, ñaña'pa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñe ñocop, ñaña'pa' e'ñech eñoteny attoña ama'tcha' atarr aton yecheneñpa' atterach amach es yesherbateñe ñocop. ¹¹ Ña'ña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop

yesherbateñe ñeñt cohuen enten Yompor allempopa' amach errotenot alla apuerryerroña ñeñt po'ñoçh atarr sherbets ñeñt apueneý ña. ¹² Ñaña ñerra'm ama es yesherbateñaña ñeñt po'psheñño atet ñerra'm ñeñt Yomporo, allempopa' amach errotenot apyeña ñaña ñeñt e'ñe yocop ñeñtcha' e'ñe cohuen yocshatene'.

¹³ Ñeñt'pa' atetcha' netma'ntacha:

—Ama't puesheñarrofeyapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet ye'papa' puesheñarr e'ñech cohuen yemorrenteño't yocsheñeshocmañen yesherbeñ, po'psheñña'pa' amach e'ñeye' yemorrenteño; çhach yottena ñerra'm çha yetsena'teñ. Ñeñto'mar atet'pa' amach cohuenaye' yesherbeñe. Ñerra'm aña e'ñe sema'yoçhrena ñeñt e'ñe socpa attoch segana aton quelle, ñeñt atet'pa' amach errotenot sema'yoçhrona ñaña añecop ñeñt atarr sherbets Yomporecop.

¹⁴ Aña fariseonesha' ñeñt e'muene' Jesús ñeñt atet serrpare'tatenan acheñenesha', ñetñapa' aña atarr ye'chapretenet quelle. Ñeñto'marña ñet allempopa' puesasare'teño'tet Jesús'pa' çha atarr che'tatseteñet.

¹⁵ Jesús'ñapa' atet otanet:

—Sapa' çha sottenañ ñerra'mrrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporñapa' e'ñe eñotennas seyocher ñeñt atto sapa' atarr seshcare'tyeñ acheñenesha'. Tarraña ñeñt e'ñe ñañeñeta atarr cohuen entyetsat arr patsro, ñetñapa' atarr tsena'tenanet Yompor.

Moisés po'ñoñpa' ñeñt atet anaret ñeñt'pa' ñeñt'ña e'ñe yemtete't tarremphua allempo orrterra Yompor po'cohuenña ñeñt atto ayochreshattena ña

¹⁶ Allempoña Jesús'pa' atet serrpare'taterranerr acheñenesha' po'poñone't:

—Aña ñoñets Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yesaye't Yompor po'ñoñ, ñetpa' ñeñta e'ñe serrpare'tete't tarremphua allempo orrtosa Juan. Allempoteñ serrpare'tatosanet Juanpa' ñapa' añ serrpare'tatosanet atet penaña Yompor po'cohuenña atto atarr ayochreshattena ña, ñeñtara cohuen ñoñets alloch sequeshperra. Ñaña allohuen acheñenesha' e'ñe pueyoçhrocmañenet ñeñta atarr muenenet.

¹⁷ Tarraña ama't atteñpa' ñeñt atet anaret Yompor po'ñoñ ama't patrra quellec puehempotollohuenpa' amach chenquerro. Tarro'mar Yompor po'ñoñpa' amach erroteno

ya'huañatere ñeñt atto sherbeney. Patsña epuet enet ñeñt'pa' huañerrcha'.

*Atto Jesús'pa' ye'chatosanet ama asanna'tpahuoyaye
(Mt. 19.1-12; Mr. 10.1-12)*

18' Ama a'huañatpahuoyaye Yompor po'ñoñ ñeñt atet yotene' ama asa'pahuo yetapor tarro'mar ñerra'm esesha' serre' puetapor o'ch yorerran po'psheñeñ coyanesha' ñeñt'cha' puetapor perret'pa' ñeñt'ña'pa' çhach ochña'tamperrana puetaporeshe'mañ; ñeñt'pa' ama cohuenaye' enteñe Yompor. Ñaña ñeñt'cha' yorerre' coyanesha' asaret, ñeñt yacmarpa' çhach chetapreten taporets; ñeñt'pa'cho'ña ama cohuenaye' enteñe Yompor.

Atet a'paretta puesheñarr yacma ñeñt atarr eçllayoret; atet a'paretta ñaña po'psheñeñ yacma ñeñt atarr huocchañetets, ñeñt'pa' añ pa'so'cheñ Lázaro

19 Elloña Jesús'pa' atet serrpare'tatanet:

—Eñall puesheñarr ñeñt atarr eçllayoret ñeñt chorrenaya shetamuets atarr coçhneshare' ñeñt atarr cohuen apomotyasaret. Epaye' coshatse'tatyen ñeñt allpon echyen. E'ñe pocsheño'tpa' e'ñe ellapene't rrallme'chats. 20 Eñall ñaña puesheñarr ñeñt atarr huocchañetets ñeñt'ña'pa' çha ora puetsaren, ñeñt'pa' añ pa'so'cheñ Lázaro. Ñaña'pa' allach ellapene't a'yot yetarro't allotecma be'ten eçllayoret pa'pacillo. 21 Ñaña'pa' añach atarr ye'chena o'ch rra'yasan ama't coñe'ta'ttsa rreñets ñeñt a'shore'tatyen eçllayoret po'mesa'pna'cho. Allña ochecpa' o'ch huapoña o'ch tso'na'teñña'ña' pueptsarña. 22 Atteña o' çhap pam'tarr allempo rroma ñeñt huocchañeshar. O' rroma mellaño'feñnesha'ña hua'cha'tapa' o' aneret e'ñe Abrahamuesho, allña'pa' o' çhapachet atarr cosheñtso. Atteña'pa' çhap allempo rroma ñaña ñeñt atarr eçllayoret, ñeñt'ña'pa' pampueñeta'. 23 Ñaña'pa' alla çhap coñcha'puetso ñeñt o'patenaya ñeñt rromuets ñeñt ama ame'ñetso. Allña'pa' atarr mueroçhtosa all coñchosa. Atteña'pa' cohua' enonet'pa' allo'tña entosan Abraham allaparo'tsen ento. Allña'pa' allo'tsen epuet Lázaro. 24 Ñeñt'ña eçllayoret allenta çhore'tan Abraham, ñeñt'pa' atet och: “Nompore Abrahamama pemueraye'chna, pemñaye'chon Lázaro o'ch huapa arr attoch esha'tosan pota'p oño, ama't pota'potapa' o'ch onenapna' oñ attoch a'yamoserrapona' neñeñ o' e'ñe neporrarra'nmahuap. Atarr nanac o' nemueroçhtosa arr tso.” 25 Abraham'ña'pa' atet och: “Nechemerñecha' te'pa' o'ch peyerposa ora allpon pa'namen ñeñt pechyese't ñeñt atarr coçhneshare' pentyese't allempo pocrre't patso. Lázaro'ña'pa' ama es eche'te ama't coñe'ta ñeñt atarr cohuen enten

ñaña. Te'ña ñapa' o' atarr acshatare'tterra, ñaña' o' atarr ña'coñchatare'tterra. ²⁶ Elloña te'pa' ama't e'ñe eseshapa' amach errotentot çhapanĩpsapeto allo'tseneþ tarro'mar ñapa' atsereto'tsenþa yomĩta'n. Sapa'cho'ña te'pa' ama't e'ñe puesheñarrofesapa' amach errotentot seçhapanĩpesyo yaña. Amate' errot yepere'te ñeñĩpa' atet anaret attoch yello'tsentatare'tterra." ²⁷ Allempoña eçllayoretpa' atet oterranerr Abraham: "Tarraña ama't atteñ nomporepa' te'pa' o'ch notañ o'ch pemñer Lázaro all patsro nompore pa'pacillo. ²⁸ Tarro'mar all napa' nechen amnarsheña nemo'nasheñ. Ñeñto'marña nemneñ o'ch ahuerr o'ch cotape'chaterraneta' e'ñe cohuen te't ñetpa'cho'ña esempopa' alla çhapuet arr coñcha'puetso." ²⁹ Abrahamña'papa' alla otererr: "Ñetpa' echenet Yompor po'ñoñ ñeñt quellquë't Moisés ñaña allohuen ñeñt a'mtaye't Yompor po'ñoñ ahuat. Te'pa' e'mñoterrñañetepa' Yompor po'ñoñ ñeñt echenet." ³⁰ Ñaña'papa' atet oterranerr Abraham: "Ñato' amach e'mñoterrñañeto Yompor po'ñoñ, tarraña nompore Abrahama ñerra'm esesha' tanterrtsa rromot ñeñtcha' orrterrahuet allempoñapa' po'ñoçh ñeñtcha'ña cotape'chaterrahuet ello e'ñe cohuen Yomporecop." ³¹ Abrahamña'papa' alla otererr: "Ñerra'm amach e'mñoterrñañeto Yompor po'ñoñ ñeñt atet quellquë't Moisés ñaña allohuen ñeñt a'mtaye't Yompor po'ñoñ ahuat, te'ña ama't esesha'ch tanterrtsa rromotpa' amach eshec çhapanetoña pueyoçhreto attoch cotape'cherret ello e'ñe cohuen Yomporecop."

17

Atto çhocmach huaponaya ñeñtcha' yetpatyene' o'ch atet ñatyeseñ ñeñt ama pocteye' enteno Yompor

(Mt. 18.6-7, 21-22; Mr. 9.42)

¹ Allempoña Jesúsapa' alla serrpare'taterranerr pueyoçhresha', ñeñtapa' atet otanet:

—Chocmach huaponaya ñeñtcha' yetpatyene' o'ch atet ñatyeseñ ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet ñatyenanet ñamet ñeñt ama't mamesha ama pocteye' enteno Yompor. ² Ama't ñeñt e'ñe errote' name'ñenaya ñerra'm esesha' o'ch orrtatanet attoch o'ch atet ñatachet ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet ñatenana'

po'psheñeñ, e'ñech allorocma čharachetañ mapue' añecmuen pa'čhnoṑo allpon ñerra'm puetse'tamets o'ch huapore'chet oño epo allcha' ño'shach mapue'. ³ Ñeñto'marña sapa' e'ñech señaota, amach sorrtatatsto attoch sa'shoratach po'psheñeñ ama't erra'tsena.

'Elloña napa' o'ch alla noterrser, ñerra'm esempo samo'ts erroṑ pōnas sa ñeññ ama pocteye' enteno Yompor, socoppa' añ poctetsa o'ch soctape'chater e'ñe cohuen o'ch ṑoter ñeññ atet o' ṑohuonaṑpa' ama't mameshapa' ama pocteye' enteñe Yompor. Allochñapa' ñerra'm o'ch alla cotape'cherran cohuen Yomporecop, sañapa' añ poctetsa o'ch alla e'ñe cohuen seṑretner. ⁴ Ama'tcha' atonoche'tats atet penset, ama'tcha' pamtarrpa' cančhroche'tatscha' atet penset ñerra'm o'ch alla llequërrana ñeññ atet pennaset, ñerra'm ama't pamtarr cančhroche'tats o'ch alla oterrset: "Napa' o' atet neṑonaṑ ñeññ ama pocteyaye țarraña te'ña ellopa' amach alla atet neperre'te", socoppa'cho'ña añña e'ñe poctetsa o'ch alla e'ñe cohuen seṑretner ñeññ atet sepeñe'.

E'ñe yeyemteñot Jesús ñeñña ahuamencat yepene' attoch es yorrtatyen ñocop

⁵ Allempo atet otarettenet añña puellsensarnesha'ñapa' atet ochet Po'partsesharet Jesús:

—Elloña yapa' ahuamencatcha' peṑa'y allochñapa' e'ñech cohuen yeyemterrṑa.

⁶ Partseshañapa' alla oterranelerr:

—Ñerra'm po'ñočh e'ñe na seyemtenañ napa' e'ñeca'ye na'poctatenña neñoñ ñeññ atet notenes, ama'tcha' allponatolloṑa seyemtenna ñerra'mrrate' mostazllometoll, sañapa' ama't erra'tsena senamuennonñ ama't ñeññ atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot añ tsachecop sicómo'rech: "Bera'nmuepa'ch arroṑ all ten, arrepa'chña tomhuerrerr a'yo sa'po", tsachñapa' atetcha'cho'ña ṑañ e'ñe atet soteñ.

Atto atma'ntatarettena ataruasañpa' añ poctetsa ñocop e'ñech etsotenan ñeññ atet muenateñ pamo'mte'

⁷ Ellopa' alla toma'ntaterranelerr, ñeññpa' atet oterranelerr:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuellen amapa' ñato' ellapene'tcha' cohuañpene' sayaračhno ellerroneñña allempoch huerra po'taruasoṑpa' sañapa' ama't puesheñarroṑesapa' amach sotapuerena señañra: "Te'pa' o'ch pebe'tosuerr o'ch yerrallme'chnen parro." ⁸ Elloña ñeññapa' o'chcho' alla sotapuererr: "Te'ñapa' o'ch peptare'tuerren

ñeñtcha' nerra'nen, allotñapa' o'ch ña'cohuenetuerr peshtam attoch e'ñe cohuen peshërba'huerren choñcha'ña naphuerre' nerrar ñeñtcha' nerra'nen. O'chña nerruanen napa' allempoñapa' choñcha'ña rrallme'chnets ñaña." ⁹ Ama'tña sapa' atetca'ye sepena. Ñaña sa'taruasañer ñerra'm esempoch e'nuan ora po'taruas ñeñt seyecheña, sañapa' ama't puesheñarrotesapa' amach sotereña: "Parasyos o' pe'nuon netaruas." Ama't ama atarr socshateña ñeñt'pa' e'ñe pocte' ñocop tarro'mar ñapa' allpona o' e'nua ñeñt allpon seyecheña. ¹⁰ Sapa'cho'ña Yompor pa'taruasañer sepena'. Ñaña ama't allempoch setsotuen ora allohuen ñeñt atet otenes Yompor atterepa'chña sentena ama atarr atonaye' sesherbena. Aña setsoten ñeñt e'ñe poctetsa allohuen añecop ñeñt pa'taruasañer pen Yompor.

Atto Jesús'pa' e'ñe po'ñoñoña a'crratyésapan aptsarñatechno ñeñt çharrasheña

¹¹ Allempo sechena Jesús Jerusaléño arr oñem allohua temuena Samaria epuet Galilea. ¹² Allempoñapa' chap paterr anetso. Allñapa' hua'cha'toña çharrasheña ñeñt osyen puet-sarñats ñeñt otenet lepra. Ñeñtña aptsarñatechno a'yota tom'cha'tyesoset. ¹³ Ñetñapa' allotña rranare'tyesosetpa' atet ochet Jesús:

—Maestro Jesús'ocha' pemueraye'chosya yaña.

¹⁴ Jesús'ñapa' allenta cohuosanetpa' atet otosanet:

—Te'pa' o'ch ahues o'ch segatyena' sañeña judionesha' po'cornanesharesho attoch ñetpa' o'ch eñotaset te'pa' o' socrerra.

Atet otanet Jesús, ñetña ahuanmatsetpa' e'ñe allorocma acrra'yesserrochet. ¹⁵ Puesheñarrña allempo eñota o' correrrapa' alla puetallerrapa' o' alla ahuer Jesúseshoneñ atarr nanac pocsheñesha' aye'choçhtatnerran Yompor. ¹⁶ E'ñe pueparasyoso'teñesha' rromosa Jesús pa'rrpõt. Ñehua, ñeñt atet ñatsapa' ñeñt'pa' ñeñtña samario'marnesha'. ¹⁷ Allempoña Jesús'pa' atet otan acheñenesha' ñeñt allo'tsa'yen:

—Ama't çharrasheña ñeñt o' na'crratyésua te'. ¿Po'potantañña esconsheñapa'? Ñetñapa' ama es yerpa'pesnomayeña attoch aye'choçhtatoñet Yompor. ¹⁸ E'ñe puesheñarraña ñeñt puerrerrtsa attoch atarr aye'choçhtatan Yompor ama't ñapa' ama judioneshayaye.

¹⁹ Allempoña Jesús'pa' atet otan ñeñt a'crraterr:

—Te'ñapa' o'ch petanterra, e'ñech cohuen peserr tarro'mar ñapa' e'ñe peyemteñoten na o' pocrerra.

Atto fariseonesha'pa' a'p̄to'chet Jesús: ¿Esempo'tcha' orrterraña Yompor po'cohuenña allempoch atarr an'cha'taretterraña?

(Mt. 24.23-28, 36-41)

²⁰ Parrochña fariseonesha'pa' a'p̄to'chet Jesús:

—¿Esempo'tcha' orrterraña Yompor po'cohuenña allempoch atarr an'cha'taretterraña?

Jesúsñapa' atet otanet:

—Yompor po'cohuenña atto ayochreshattena ñapa' ñeñtpa' ama atteyaye ñerra'mrrate' ñeñt es yentyen yecloyot.

²¹ Ñeñto'marña amach errotenot oteto: “Arrca'yeña an'cha'tarettenaña Yompor”, amapa' “Tarroca'yeña an'cha'tarettenaña Yompor.” Tarro'mar Yompor po'cohuenña ñeñt atto ayochreshattena ñapa' ñeñtpa' o'ca'ye motetnoma orrtatsa e'ñe sesho ama't seyoçhro.

²² Elloña ñapa' atet otarranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostse't o'ch norrterrnsa ama't e'ñe pamtarra. Tarraña ama't e'ñe allempa amach senterrno. ²³ Saña allempopa' atetcha' otasetañ: “Te'pa' o' orrterraña Cristo allo'tsenca'ye”, amapa' “Tarro'tsenca'yeña Cristo.” Sañapa' amach setatstoña all, amach soçtatscheña ñeñt sets all. ²⁴ Tarro'mar ñerra'm esempo çherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atetcha' perra ñerra'mrrate' meratste', o'ch meratsta huomencpa' e'ñech a'puetaresuan ora enet erraparen. ²⁵ Ñehua, na te' ñeñt atet anaret nocop ñanompa' atarrcha' na'mueroçhtataretta, ama't namo'tsesha' ñeñt corretsa te'pa' amach eseshaye' naguënaye. ²⁶ Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé. ²⁷ Allempopa' ama es pueçha'yeneto aña e'ñe coçape'çhete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmaneshaçhno, coyaneshaçhno'pa'çho'ña apanatyese't ñeñt yoranatyese't. Ñetñapa' ñeñta e'ñe cohuen entete't. Atteñapa' çhap allempo be'tosos Noé po'huarcopahuo. Allempoñapa' huata, choça oñ erracmañen, e'ñe a'çlatuan allohuen acheñenesha' erraparen. ²⁸ Atteçma perreterr allempo corre't Lot, aña e'ñe coçape'çhyerreterr shonte' rrallme'çhyese't ñaña shonte' orrare'tyesete't, atarr es rañta'yese't, ñaña pomatsre'tyesete't. Shonte' esocmañen ñeñt pa'namen nare'tyesete't, tomatyese't ñaña shonte' pocollaçhno. Ñetñapa' e'ñe ñeñta cohuen entete't. ²⁹ Atteñapa'

čhap allempo čha'nom Lot ñeñt anetsrot. E'ñe ñeñte yetrocma allempo čha'nom Lot allot, Yomporña pue'ntañot a'shoranet tso' ñeñt shemashrepñeño' huorten, ñeñña e'ñe a'cllatuerrahueterr allempo. ³⁰ Attecmach perreterr allempoch norretuerra na Ñeñten Acheñetosets.

³¹ 'Tarraña allempoch norrterra na sapa' arepa'chña aña soctape'cheno ñeñt patso'marecpa, atet ñerra'mrrate' puesheñarr ñato' a'yote'tsenach pa'pacloť arepa'chña be'tosatsterro ama't e'ñe mamesha pa'paclo attoch yoratsre'tnoma. Amapa' ñerra'm puesheñarr pa'mro'tsenpa' arepa'chña onatsterro. ³² Seyerpuepa'chña atet pa'ahuat Lot pueťapor ñeñt atarr morrentnomaya ñeñt patso'marecpa. ³³ Ñaña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet ñeñt atet muenenet ñeñt e'ñe ñocpueta arr patsro ñeñña acheñerpa' corretsach pocsheñeshocmañen e'ñe tayoteñ errponañohuen.

³⁴ 'Po'ñočca'ye o'ch notas atetcha'ca'ye perra allempoch nohuerra, puesheña'tetspa' anmaretterretcha'; ama't ñeñt e'ñe pamo'ts pene', ñeñña' allach asa'nmareterra. Atet ñerra'm tsapo all manrrenet epsheño'maret, puesheñarrpa' anmaretterrach, po'psheñeñña' allach asa'nmareterra. ³⁵ Amapa' ñato' allempopa' allo'tsencha' epsheña coyanesha' ñeñt parro puetsetets mapyo ñeñtpa'cho'ña puesheñarrpa' anmaretterrach ñaña po'psheñeñña' allach asa'nmareterra. ³⁶ Amapa' ñato' allempopa' allo'tsencha' ñaña epsheña ñeñt e'ñe parro taruasenet pa'mro. Puesheñarrña' anmaretterrach, po'psheñeñña' allach asa'nmareterra.

³⁷ Allempoña pueyochresha'pa' a'pťo'chet, atet ochet:

—Partseshacha' ñeñtpa' ¿erra'tcha'ña atet perra?

Jesúsñapa' atet otanet toma'nteñtso:

—Ñerra'm erro'tsencha' ñeñt rromue'pa' allcha'ña shontaña tse'm.

18

Atto atma'ntatarettena rretorrnanesha' ñeñt chocma ena-mare'tene' juez attoch yenpue'

¹ Allempoña Jesúsapa' alla serrpare'taterraneterr toma'nteñtso attoch eñochet ñeñt poctetsa yocop chocmach yema'yochena amach yemuenme'chatsche ma'yochatsa.

² Ñeñto'marña allempopa' atet otanet:

—Paterr anetso allo'tsen puesheñarr juez ñeñt po'taruas pene' o'ch e'ñe cohuen a'pocťatan ñoñets

acheñeneshacop ñerra'm esempo e'moñe'tannenet. Tarraña ñeñña juezpa' atarr atsrre'mñañ. Ama't Yomporpa' ama amcha'na'tpahuoye' enteñe ama't e'ñe mamesha. Acheñenesha'pa'cho'ña ama't puesheñarrapa' ama acua'penaye' entenaneto. ³ Ñeñña anetsropa' all yeçhena ñaña puesheñarr rretorrnanesha'. Ñaña'pa' eñall po'psheñeñ ñeñ e'moñe'tene', çhocmach erroť peññañ ñeñ ama pocteyaye. Rretorrnanesha'ñapa' çhocmach sene't juezesho. Allcha' çhocma atet otare'tenan juez: "Te'pa' nemneñ o'ch e'ñe cohuen peyenpa'n attoch pa'poctaton cohuen ñoñets añecop ñeñ ne'moñe'tene'." ⁴ Juezñapa' ama't allponmat ama mueno o'ch yenpue'. Tarraña rretorrnanesha' ñapa' çhocmach sen juezesho enamare'tene' attoch a'poctatoñ ñoñets añecop ñeñ e'moñe'tene'. Atteñapa' çhap allempo cotape'ch juezpa' atet ot: "Napa' po'ñoçh ama't Parets ama nemcha'teñe; acheñenesha'pa'cho'ña ama't mameshapa' ama acua'penaye' nentaneto. ⁵ Tarraña añ rretorrnanesharpa' atarr atsrre'moçhtana'tenen, epaye' huapame'tennana, o'ca'ye atarr a'mñechna. Ñeñto'marña te'pa' o'ch neyenpue' allochñapa' amach alla huerrnane'te."

⁶ Allempoña Jesús'pa' atet oterrerr:

—Ama't se'mueñeña ñeñ atet oten juez ñeñ atarr atsrre'mñañ. Te'pa' oten ahuo'ch a'poctatan rretorrnaneshacop ama't ñapa' ñeñ acheñer ñeñ atarr atsrre'mñañ. ⁷⁻⁸ Ñeñto'marña te'pa' o'ch noterrser: Yomporpa' elloña nanaccha' cohuen a'poctatonay ñeñtey o' acrerrey ya ñeñteycha' e'ñe puechemer pen ñerra'm yapa' çhocmach yeçhore'teñ ama't yeto ama't ñaña tsapo. Napa' po'ñoçh o'ch notas, Yomporñapa' amach atomato, çhoch ye'mñote'; ñapa' e'ñechca'ye allorocma e'mñotey o'ch e'ñe cohuen a'poctatonay ñeñtey yocop. Tarraña te'pa' o'ch notas, ñerra'm esempoch nehuerra Ñeñten Acheñetosets, errponsheña'te'ña nentuerrña arr patsro ñeñ e'ñe cohuen name'ñenaya.

Atet ma'yochena fariseonesha' ñeñ e'ñe cohuen entetsa, all ma'yochañaña po'psheñeñ e'ñe puellquēñesha' ñeñ atarr ochñañ entetsa

⁹ Po'pocheñoña Jesús'pa' atet serrpare'tatan allpon acheñenesha' ñeñ e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetñapa' ama't mameshapa' ama cohuenaye' enteñetoña po'potantañ acheñenesha'. Ñeñto'marña Jesús'pa' alla toma'ntatanet, ñeñtpa' atet otanet:

¹⁰ —Eñall epsheña acheñ ñeñ sets Parets pa'paclo allcha' ma'yochoset. Puesheñarr ñeñtpa' fariseo ñeñ

e'ñe ñañaña cohuen entetsa; po'psheñeñña' ñeñt puehquēño'te'na cobra'yenan acheñenesha' quelle ñeñt gobiernocop. ¹¹ Ñeñtña fariseopa' tomos all ma'yochosañ, ñeñtpa' atet otos: "Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puerratañpsanna'tyenet, ama pocteye' es panna'tyeneto, atarrcha' cheta'yeñet coyanesha'chno ñeñt ama puetaporeyaye. Napa' ama atteye' Nompore nepeno. Napa' ama neshcare'teno atet pena añ acheñer ñeñt puehquēño'te'na cobra'yene' acheñenesha' quelle gobiernocop. ¹² Napa' pate'tets semanapa' epochcha' netore'tena Nompore pōcop, ñaña ama't ora ñeñt allpon naguēn chocma napuenep allpon poctetsa pōcop ama't nediezmo Nompore." Allohua huañ atet ma'yochena fariseo.

¹³ Po'psheñeñña ñeñt cobrets quelle ñaña'papa' alla tomos a'yo't. Ñapa' eñotena atarr ochñañ ñeñto'marña ñapa' ama cohuoso enonet Yomporeshonet. Ña puellquēño'tpa' nosan pot puesomapo. Ña puema'yocheño' atet otos: "Nompore, te'pa' o'ch pemorrenterrna attoch e'ñe pepretna'huerrnan allohuen no'chñar tarro'mar napa' atarrca'ye ochñañen."

¹⁴ Jesúsñapa' atet oterraneterr:

—Napa' o'ch notas, ñeñtña atet a'metene' po'chñar ñeñtña acheñerpa' e'ñe pocte' enteñ Yompor. Ñeñto'marña allempo ma'yochuapa' o' ahuer pa'paclo e'ñe cohuen apretna'huaretterra po'chñar. Po'psheñeñña fariseo ñeñt ama a'metosaye po'chñar, Yomporñapa' arepa'tcha' pocteye' eñche. Tarro'mar allohuen ñeñt e'ñe cohuen entetsa e'ñe pommo'cheño' ñeñtña tsapaonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapaonetpa' atarrcha' cohuen enteret.

Atto Jesúsapa' bensare'tam̄psapan cheshaneshā' ñeñt huapatoñet

(Mt. 19.13-15; Mr. 10.13-16)

¹⁵ Ñaña allempopa' shonte' hua'cha'tachet cheshatollesha' Jesúsesho. Ñetpa' añecopña hua'cha'tachet o'ch a'p̄lla'yapanet Jesús attoch bensare'tam̄psapanet. Jesúsña pueyochresha' allempo entapan ñeñt hua'cha'tate' cheshaneshachno, ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto. ¹⁶ Tarraña Jesúsñapa' allenta chore'tapanet, atet otapanet:

—Pocte'ña'cho' semnachñaca'yeña cheshaneshā' onosetepa' e'ñe nesho. Amachca'ye cha sepatare'tatstapaneto tarro'mar

allohuen ñeñt atarr neyemtenaya na e'ñe attet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña pue'ntañot. ¹⁷ Po'ñoçhpa' o'ch notas, ñerra'm esesha' ama e'ñeye' pueyemteñoñeye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuanpene', ñetñapa' amach pueyochreshaye' perraneto Yompor atto atarr ayochreshattena ña.

Atto puesheñarr ñeñt huepueshameñ ñeñt atarr eçllayoret ñaña'pa' eñorana'tosana Jesús

(Mt. 19.16-30; Mr. 10.17-31)

¹⁸ Po'pocheñoña puesheñarr ñeñt atarr añcha'tarettetsa a'p'to'tosan Jesús, atet otos:

—Maestro, p'apa' atarr cohuen acheñreþ, te'pa' o'ch p'otapuen çerrotena'tcha' neþaña na e'ñe cohuen attochña napa' corretsanach e'ñe tayoteñ ama't errponañohuen?

¹⁹ Jesúsñapa' atet otaþ:

—Eso'mare't p'otenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapñaña Yompor ñeñt e'ñe po'ñoçh cohuen. ²⁰ Papa' e'ñe peñotuen Yompor po'ñoñ all oteney ñeñtcha' atet yepena e'ñe cohuen; ñeñt'pa' atet oteney: “Amach yechtapretyesatsto taporets; amach yemtanna'tatsto; amach yetyesatsto; amach yetoma'tamþsatsche yamo'ts e'ñe atta; ñaña yemorrenteñoñ'pa' yemñcha'na'chcha' yompor ñaña yachor.”

²¹ Ñeñtña a'p'to'tene'pa' atet otererr:

—Napa' e'ñeca'ye cheshoteñ ora añechnopa' e'ñeca'ye net-sotueñ.

²² O'ña atet otua Jesúsñapa' alla otererr:

—Eñallmeñca'ye paterr ñeñt pepalltena ñeñt ama atteye' pepena'. Te'pa' añcha'ña atet peþa o'ch e'ñe pepomhuerr ora allpon ñeñt pechyen o'ch p'apa'yera' huocchañneshaçhno ñeñt atarr es pallta'yetsa attochña p'apa' pecherrcha' ñeñt atarr nanac sherbets Yompor pue'ntañot. Allempochña pehuerrapa' o'ch p'octerren attoch e'ñe neyochresha' neperreþ e'ñe p'octacma.

²³ O'ña e'mhuan ñeñt atet och Jesús'pa' ñaña'pa' cha atarr lleca tarro'mar ñapa' atarr eçllayoret, shonte' pa'namen echyen. ²⁴ Jesúsña eñch ñeñt atet atarr llecapa' ñaña'pa' puellcapreteñoñ'pa' atet ot:

—Ñeñt atarr eçllayoret'pa' atarr nanac echarr attoch agapoñet Yompor po'cohuenña ñeñt atto ayochreshattena ña. ²⁵ Ñehua, ñeñt'pa' atetcha' netma'ntacha. Po'ñoçh yapa'

yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt ecñlayoret ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Ñeñtña e'muene' atet oten Jesús ñetñapa' atet ochet:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca'ye esho'tenoña acshequeto.

²⁷ Jesúsñapa' atet oterraneterr:

—Sa arromñañeneshaspa' amach es erroñenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁸ Pedroñapa' atet och:

—Partseshacha' po'ñoçh yapa' o' e'ñe yesuanom ora allohuen ama't yepaclohuen attoch e'ñe yoc'terreþ.

²⁹ Jesúsñapa' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' puetapor, pa'mo'nasheñnesha' ñato' pompor, pachor, ñato' ama't ñaña puechemerasha' attoch e'ñe cohuen sherbaterrñañet Yompor po'cohuenña atto ayochreshattena ña, ³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapañonetñapa' o'ch aguërret ñeñt alloch ñetpa' corretsetach beñecpuen.

Allempo Jesúsapa' alla eñotaterraneterr ñapa' çhocmach amt-saretterra

(Mt. 20.17-19; Mr. 10.32-34)

³¹ Ñeñt pueyochresha' ñeñt çharra' puechena epsheña, Jesúsñapa' ahuanmanet ellonet, allñapa' atet otosanet:

—Te' po'ñoçhpa' o'ch ahueney Jerusaléño. All ora allpon quella'yesone't ñeñt a'mta'yesaye't Yompor po'ñoñ ahuat ñeñtcha' atet na'paretterra na Ñeñtencha' Acheñetosets, te'ñapa' o'ch e'ñe etsotuerra ñeñt atet anaret nocop.

³² Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achñare'terrnet, o'ch atserrpatse'terrnet, pue'moñe'teñotetanpa' o'ch a'coshare'terrnet. ³³ O'ch

* **18:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

nashtaretterra, attotcha'ña muetserrnet. Tarraña poma'pamtañoñapa' o'ch alla netanterra.

³⁴ Ama't atet otuanet, ñetñapa' ama eseshaye' eñotaye ñeñt atet serrpare'tatanet. Ama't puesheñarrofetapa' ama't mameshapa' ama chapanetoña pueyočhreto ñeñt atet otenanet.

Atto Jesús^{spa}' cohuaterran puesheñarr aporo'yet ñeñt jerico'marnesha'

(Mt. 20.29-34; Mr. 10.46-52)

³⁵ All oñenet o'ña chapmochet anetso Jericópa' allña e'ñe toñetoñña' all anen puesheñarr aporo'yet ñeñt chocma enamuets quelle. ³⁶ Ñeñtña aporo'yetpa' o' e'mapan shonte' acheñenesha' ñeñt metačhets all toño, ñaña' allenta a'p'to'tanet:

—¿Eso'mare't shonte' metačhenña acheñenesha'?

³⁷ Ñetñapa' atet ochet:

—Añca'ye huetsa Jesús ñeñt nazareto'marnesha'.

³⁸ Ñaña'pa' allenta rrana huomencpa' atet otapan Jesús:

—Pemueraye'chnomna Jesúsocha' naña. Papa' ñeñteř Davidna'tareř.

³⁹ Acheñenesha' ñeñt otačhetsa ñetñapa' čha muene' che'ptare'tnomet, atet otoset:

—O'hua pemma.

Aporo'yetñapa' elloña alla rranerrerr atet oterranerr Jesús:

—Ñeñteř Davidna'tareř, pemueraye'chnomnañaca'ye.

⁴⁰ Allempoña Jesús alla tomos otosan acheñenesha':

—Sanmon arr nesho.

O' huapapa' Jesúsñapa' atet otař:

⁴¹ —¿Eso'tña penmen ñeñtcha' atet neřoseř?

Ñaña'pa' atet och:

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

⁴² Jesúsñapa' alla otererr:

—Pecuerrepa'ch, țarro'mar atto atarr peyemtapna na ñeñtca'yeña o' e'ñe a'crraterreř.

⁴³ E'ñepa'tcha' allorocma e'ñe cohuen enterra. E'ñe cohuerrtsapa' čha coťa'nmue' ñaña Jesús, allenta atarr aye'chočtatnoman Yompor all coťa'nenan Jesús. Atto' enteñ allohuen acheñenesha' ñetpa'čo'ña e'ñe cohuen aye'chočtatneññañet Yompor.

19

Atto Jesús epuet ñaña Zaqueo eñorana'tannenet

¹ Allempoña Jesús pa' chap all anetso Jericó, all oñmos anetso'mar. ² Allñapa' allo'tsen puesheñarr yacma ñeñt sochetsa Zaqueo ñeñt pa'micha'tareter peñ allohuen ñeñt cobra'yene' acheñenesha' quelle gobiernocop. Ñaña pa' atarr ec'llayoret. ³ Zaqueoñapa' atarr mueneñ o'ch entapan ñeñt otenet Jesús. Ñehua, ñapa' amach errotenot entapano Jesús tarro'mar shonte' acheñ ñeñt emchorra'nenaya all oñen ñaña Zaqueopa' allponmetolla. ⁴ Ñeñto'marña ñapa' mata allenetcha' oñem, a'tapos tsacho ñeñt pa'so'cheñ sicómo'rech allotcha' entapan Jesús tarro'mar allcha' oñem.

⁵ Allempoña chap Jesús e'ñe ñesho, cohuostsa enonetpa' alla entos, ñaña pa' atet otos:

—Zaqueo, pesuerra tecma. Te' napa' e'ñe poctennana o'ch nechap pepaclo.

⁶ Ñaña pa' allenta sohuerra tecma e'ñe pocsheñsha' agapañ. ⁷ Allempoña acheñenesha' atet eñchet, ñetñapa' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tososña Jesús allcha' mos añ acheñer pa'paclo ñeñt atarr nanac ochñañ.

⁸ Zaqueoñapa' allenta tomhuerrpa' atet otapan Partsesha':

—Te'pa' o'ch pe'mñotosen Ayochreshate. Ñeñt ora allpon nechyen, te'ñapa' o'ch napa'yer pueshmet huocchañnesha'chno. Po'ño'ch allempo es neprratam pesyese't puesheña'tetspa' te'ñapa' pa'tatsoche'tatscha' napuerranet.

⁹ Jesúsñapa' atet otos:

—Te'ñapa' o' chapanet allohuenacop ñeñt ye'chetsa añ pocollro alloch a'queshpataretterret. Ama't ñapa'cho'ña Abrahamca'ye po'mreneñ. ¹⁰ Na Ñeñten Acheñetosets ñeñto'marña nohuapa a'ne patsro o'ch ne'nyesos acheñenesha' ñeñt chenquetsa ñeñtcha'ña na'queshpatyesos.

Arrpa' all atma'ntatarettena charrasheña ñeñt aparettatsa quelle e'ñe allponeshapa'ttsocma

¹¹ Acheñenesha' o' e'mñotenet shonte' ñeñt atet serrpare'tatanet Jesús ñeñt atet pena Yompor po'cohuenna, ñaña Jesús pa' o' chapmoch Jerusaléño. Ñeñto'marña ñetñapa' cha otenapuetañ allempocmach etsota allempopa' ñach añcha'tarettatsa Yomporeshot arr patsro. Ñeñto'marña elloña ñapa' toma'ntatanet po'poñ. ¹² Ñeñtpa' atet otanet:

—Eñall puesheñarr acheñ ñeñt e'ñe cohuen añcha'na'tpo' entyen allohuen acheñenesha' ama't e'ñe pamo'tseshohuen. Ñeñtña acheñerpa' arr sechena bachayo po'poñ anetso allotcha' apet llesens attoch esempoch huerrapa' o'ch añcha'taretetuerra all pa'nyo. ¹³ Allempo ama

sena'pa' agotatnoman ċharrasheña pa'taruasañer ñeñtcha' apa'yesnom allponeshapa'tets quelle e'ñe puesheña'ttsochmuet. Allempo apa'yesnomanetpa' atet otyesnomanet: "Añ quellepa' o'ch setaruasach nocop. Esemepoch nehuerrapa' allempochña e'ñe neñotuernas e'ñe puesheña'ttsos errponte' quelle segana'yesa ñeñt nocop."

¹⁴ Tarraña patantarr acheñenesha' ñeñt pa'nyo'marnesha', ñetñapa' atarr e'moñe'teñet. Ñeñto'mar allempo ta ñeñt anetsro, ñetñapa' mueñet allponsheña ñeñtcha' eñososets all sen o'ch oteñeta' allo'marnesha': "Yapa' ama yemno o'ch sene' añ acheñer o'ch amcha'taretta yocop."

¹⁵ Tarraña ama't atet petañ ñocopñapa' ċhocmach apet llesens attoch huerra o'ch amcha'taretetuerra all pa'nyo pamo'tseshacop. Allempoña ċherrpa' agotatuerran pa'taruasañrenesha' ñeñt apa'yesnom quelle ahuaña. Ñapa' añecopña agotatyesuerranet o'ch eñotuerranet errponte' quelle ganatyesñañet po'čllayor e'ñe puesheña'ttset.

¹⁶ Attoña apċha'huerranet ñeshopa' ñeñt ñanom huapatsapa' atet otos: "Ayochreshate, ñeñt allpon p'apa'nmuen ahuaña quelle, nañapa' ello neganaterrnaperr pečllayor ċharroch."

¹⁷ Pamo'mte'ñapa' atet otuer: "E'ñe pocte', p'apa' atarr cohuen pesherbennen. Ama't allponatolla napa'nmaḡ ahuaña, p'añaapa' atarr cohuen pesherbaton. Ñeñto'marña te'pa' o'ch nenuerreḡ ċharracop anets allcha' pa'mcha'taretterra p'a."

¹⁸ Allempoñapa' o' huapa ñaña po'psheñeñ pa'taruasañerpa' ñapa'cho'ña atet otos: "Ayochreshate, na ñeñt allpon p'apa'nmuen ahuaña quelle, nañapa' ello neganaterrnaperr pečllayor anmaroch."

¹⁹ Pamo'mte'ñapa' atet otuer: "E'ñe pocte', te'pa' o'ch nenuerreḡ p'aña amnarecop anets allcha' p'a'mcha'taretterra p'aña."

²⁰ Allempoñapa' huapa po'psheñeñ pa'taruasañer, ñapa'cho'ña atet otos: "Ayochreshate, arrpa' ñeñta allponara ñeñt e'ñe allpona p'apa'nmuen ahuaña quelle. Napa' alla nañño'tennaḡ e'ñe cohuen nepennaḡ pañello."

²¹ Napa' ċha nemcha'teneḡ tarro'mar neñoteneḡ p'apa' amaca'ye matsrre'mñaḡe. Papa' ċhocmaca'ye peprratamḡpesyen ama't ñeñt'pa' ama poyaye, ñaña ċhocmaca'ye petotatyenneña ñeñt ama p'aye' nare'tatyenaye."

²² Pamo'mte'ñapa' atet otuer: "Paña po'ñoċhpa' amaca'ye cohuenaye' pesherbennen ama't e'ñe mamesha. E'ñe atet p'otenen napa' atarro' atsrre'mñañen te'ñapa' po'ñoċh atetċha'ca'ye natsrre'moċhtana'tuerreḡċha'. Ñerra'm po'ñoċh peñotennoñ napa' atarr atsrre'mñañeneñ, ñerra'm po'ñoċh ċhocma neprratamḡpesyeneñ ñeñt ama noyaye, ñaña napa' ñerra'm po'ñoċh ċhocma neñotatyeneñ

ñeñt ama naye' nare'tatyenaye, ²³ ñerra'm po'ñoçh atet pentennoñpa', eso'maruañaca'yeña ama bancoye' penennanoña neçllayor allochñapa' te'ña o' nehuerrapa' nagapuerreñcha' neçllayor allo atontateñet." ²⁴ Allempoña pamo'mte'pa' atet otan ñeñt tomçha'tyets all: "Te'pa' o'ch seprratam̄pesuer quelle, o'ch sapuer ñeñt ganatene' çharroch neçllayor." ²⁵ Ñetñapa' atet ochet: "Ayochreshate, ñapa' echenanca'yeña shonte' quelle ñeñt ganena çharroch." ²⁶ Pamo'mte'ñapa' atet otarraneterr: "Tarraña ama't atteñpa' te'pa' o'ch notas, ñeñt es echets shonte' e'ñe puesherbateño'tet pamo'mte' ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt eçhyenetañ aprratam̄psaretterretcha'." ²⁷ Ñaña te'pa' añña ñeñt ne'moñe'tene' ñeñt ama muenenaye o'ch na'mçha'tare'tta ñocpuet, te'ña sapa' o'ch sehuapat Janet attoch semtsanatosanet e'ñe arr nesho."

Allempo çhap Jesús Jerusaléño

(Mt. 21.1-11; Mr. 11.1-11; Jn. 12.12-19)

²⁸ Allempoñapa' ahuerterr Jesús Jerusaléñoñet. ²⁹ Chapmochet aspeno ñeñt pa'so'cheñ Olivopen allo'tsen anets ñeñt Betfagé ñaña Betania. O' çhapmochet all Jesúsñapa' ³⁰ atet otosan epsheña pueyochresha':

—Sapa' o'ch sota o'ch seçhap a'yenteye' e'ñe allara anetso. O'ch seçhap allpa' allcha' sentos ashen rre'ptor all huanquëñet; ñeñtpa' ama't puesheñarra acheñ ama monteña'. Ñeñtña ashenpa' o'ch sepyam̄psospa' o'ch sanerrnan arr. ³¹ Ñerra'm esesha'ch sotapue': "¿Eso'mare't sepyam̄peñña ashen?" sañapa' atetcha' sotosanet: "Yepartsesharca'ye muenene'ña añ ashen."

³² Allempoña ñeñt mueñapa' ñetñapa' ahuanmuet all anetso. Allñapa' atetcho' entoset e'ñe atet otanet Jesús, allo'tsenca'ye ashen rre'ptor all huanquëñet. ³³ Allempo pueyam̄psosetpa' pamo'mte'ñapa' atet otapanet:

—¿Eso'mare'tcha'ña sepyam̄psosnayña yashanor?

³⁴ Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

³⁵ Allempoñapa' anerretña ashen Jesúsesho. Nohuerret pa'shtam ashnache'ñopa' montatueret Jesús. ³⁶ Allempo monta'nma Jesús allenet sen, acheñenesha'ñapa' totma'tyesoñet pa'shtam toño allcha' oñem. ³⁷ Atteñapa' o' çhapmochet Jerusaléño. Allempo a'nososet Olivopnot shonte' acheñenesha' ñeñt ame'ñenaya Jesúsapa' ñetñapa' allotet e'ñe cosha'rrtoset. E'ñe pocsheñesha' ahuanenet, pano'tatse'teñesha' aye'choçhtatneññañet Yompot, tarro'mar

atarr cohuen entnenet atfo Jesús'pa' atarr orrtatenanet Pomp'or po'partsoña. ³⁸ Ñetñapa' atet otyesnenet:

—¡Aye'chochtaterrapo'ch Am'cha'taret Jesús ñeñ' llesensen Yomp'or! ¡Cosh'erretepa'ch ama't ñeñ' pue'ntañ'o'tsen! ¡Aye'chochtaterrapo'ch ñaña Yomp'or Parets ñeñ' pue'ntañ'o'tsen!

³⁹ Fariseonesha'ña pue'sheña'tets ñeñ' allo'tsa'yen ñeñ' ama ame'ñenaye Jesús, ñetñapa' atet otapet Jesús:

—Maestro, peche'ptare'taye'chyesnom'ñaca'yehña peyochresha'chno attoch amach allo'na atfa a'chotatsetnenpeto.

⁴⁰ Tarraña Jesús'ñapa' atet otosanet:

—Napa' o'ch notas, ama'tcha' atet notatstanetañpa' muema'rrtetañcha', mapye'chnoñapa' puerranare'teño'etpa' načhotenayach.

⁴¹ Allempo o' e'ñe 'chapmochet atfo entosan anets Jerusaléñ, Jesús'ñapa' atarr ya'na'tosan jerusaléño'marnesha'. ⁴² Allpa' atet eñ'orosa ñocpuet:

—Atarr nemneñeñ ama't e'ñe 'tayecma po'ño'ch sapa'cho'ña o'te' seño'tereñ erro'tencha' seperra attoch Yomp'orpa' o'ch a'q'esh'paterrsoñ e'ñech socsheñesha' socrrerañ. Tarraña saña teme'ttsen ñeñ'ñapa' ama't mameshapa' ama 'chennaso seyochro. ⁴³ Tarro'mar napa' o'ch notas, po'ño'ch o'ch 'chap allempoch ñeñ' se'moñe'tene'pa' con'cha'tam'perrnasetcha' sa'netser attoch e'ñe rro'chtam'perrset allen'ateñ sate'potpa' hua'cha'tonasetcha', attoch amach errene't seyeterro ama't e'ñe pue'sheñ'arro'tesa. ⁴⁴ A'mata'tuerrnasetcha' ora allohuen sa'netser attoch sepa'clle'nachña e'ñe sa'tpetse'tuerre' allohuenes ama't sac'ñe'faretolleshohuen. Allo sorraten sepa'quell ama't pa'rra mapue'pa' amach a'puerro, tarro'mar sapa' ama semno o'ch sagu'errñañ Yomp'or pue'muereña allempo mueneñeñ o'ch yenpuerrsoñ saña.

Atfo Jesús'pa' a'cohuentatosan Parets pa'pa'quell

(Mt. 21.12-17; Mr. 11.15-19; Jn. 2.13-22)

⁴⁵ Allempo 'chap Jerusaléño Jesús'ñapa' ahuos Parets pa'paclo. Be'tosospa' allo'tñapa' 'cha'nma'cha'tatuosan ñeñ' pomatsre'tyetsa all. ⁴⁶ Allñapa' atet otosan ñeñ' pomatsre'tyetsa:

—Yomp'or po'ñoñ ñeñ' atet anuare't ahuatoteñ, allñapa' atet oten Yomp'or: “Añ ñeñ' nepaquell nepenpa' añe'cpaca'yehña sherben allecmach ma'yochennet”; tarraña sañapa' atet sepeññañña Yomp'or pa'pa'quell atet ñerra'mrrate' eñe't ñeñ' e'potyetsa mapuetpono'mar.

⁴⁷ Pa'te'tets yet Jesús'pa' 'chocmach sene't Parets pa'paclo all ye'chatenanete't Yomp'or po'ñoñ. Añña

ñeñt pa'micha'tareternesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret ñaña po'potantañ ñeñt anicha'taretetyetsa all anetso, ñetñapa' Jesús atarr o'patyenet attoch muetsatachet. ⁴⁸ Tarraña ñetpa' ama erroť peto tarro'mar allohuen acheñenesha'pa' atarr yemteññañet Jesús atto atarr cohuen serrpare'tatenanet Yompör po'ñoñ. Ñetpa' ñeñtña atarr cohuen entyenet.

20

Atto allsensarettena Jesús

(Mt. 21.23-27; Mr. 11.27-33)

¹ Po'pocheño pamtarr Jesúsñapa' alla yečhaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteñapa' huačha'toña shonte' anicha'taretnesha'—ñeñt pa'micha'tareternesha' pen allohuen judionesha' po'cornaneshar ñaña allponsheña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'. ² Ñetñapa' atet otoset Jesús:

—Ñehua, yapa' añecop yehuena yemneñ o'ch pötey ¿erroťe't apuenpetña llesens? ¿Eseshatña papueneña llesens attot pörrtatyenña ñeñt čhocma attecma pepa'yena?

³ Jesúsñapa' atet otapanet:

—Ñehua, napa'čho'ña nemneñ o'ch na'pťo'tapas saña ama't patrra ñoñets. Sapa'čho'ña o'ch sotosen, ⁴ ahuañmo'cha allempo apate't Juanañ Yomporecop ñeñtpa' ¿eseshatña llesense' ñato' Yompör amapa' acheñaťe' apue'ña llesens? Nemnen o'ch sotosen ñeñt atet soctape'chen sa.

⁵ Ñetñapa' e'ñe a'nahua otanna'tyeset:

—Ta'm erroťcha'ca'ye yochte'. Ñerra'm čha yoch Yomporeshotca'ye apetña llesens, ñaña'pa' čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” ⁶ Elloña ñerra'm čha yoch acheñeshoťa apet llesenspa' acheñenesha'ñapa' čhate' e'moñe'tyet. Pue'moñe'teñoťetaypa' čhate' rrollapečhyet tarro'mar ñetpa' e'ñe cohuen eñchete't Juanañ, čhocma otyenet ñapa' ñeñtca'yena a'mťose' Yompör po'ñoñ.

⁷ Ñeñto'marña ñetpa' atet ochet Jesús:

—Ta'm yapa' amaca'yena yeñoteñe; erroťte' huapaña Juan, erroťte' apetña ñaña llesens.

⁸ Allempoña Jesús'pa' atet oterraneterr:

—Napa'čho'ña te'pa' amach notaso saña allot aparetenña naña llesens attot atet nepa'yena.

Atet atma'ntatarettena ñeññ ataruasañechno ñeññ ama co-huenayaye

(Mt. 21.33-44; Mr. 12.1-11)

⁹ Allempoña Jesús pa' alla serrpare'taterranerr acheñenesha' toma'nteñtso, Ñeññpa' atet otanet:

—Eñall puesheñarr acheñ ñeññña nare'tanatatnomue' shonte' uvach, pa'muerñapa' e'ñe ora uvachmatatue. E'ñe allponmatatsapa' o' na'nman po'potantañ ñeññcha' taruasa-tats uvachmo ñeññcha' coyerrahuet allpon ñerra'm esempoch toteñet. Allempoña ñapa' ahua' bachayo po'poñ anetso alla atomat. ¹⁰ Chap allempo yen uvachllompa' ñaña'pa' mueñerran po'psheñeñ pa'taruasañer o'ch enamuerria' uvachllom' po'psheñeñ pa'taruasañesho ñeññ cohuanmpene' uvachma'. Allempoña chen allpa' enamhuenan ñeññ allpon o'patena pamo'mtayet arepa'tcha'ña es apapuenayeyña uvachllom', elloña ñeññapa' cha nalle'tapueñet, o' alla mueño'teret e'ñe atta. ¹¹ Allempoña ñeññ pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr allpa' ñapa'cho'ña cha es otnare'tapetpa' o'cho' nalle'tapet o' matateret e'ñe atta. ¹² Allempo poma'pocheño o' alla mueñerranerr po'psheñeñ pa'taruasañer. Ñeññpa'cho'ña allempo chenerr ñaña allpa' ñaña'pa' cha atarr atserrpatse'tapetpa' o'cho' alla matateret.

¹³ Allempoña ñeññ pamo'mte' penetpa' atet ot: “Te'pa' errotuachñaca'yeña nepe'te'. Te'pa' o'ch nemñe ñeññ e'ñe na nechemer ñeññ atarr nemorrentena. Ñato'rraña ñeññpa' mecha'na'tapetcha'.” ¹⁴ Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: “Añmapa' ñeññca'yeña puechemer ñeññcha' o'paterraya pompor puenarenñ esempo. Ñapa'cho'ña te'pa' o'chca'ye yemtsañ allochñapa' yachca'yeña e'ñe o'paterrayaña pompor puenarenñ.” ¹⁵ Allempoñapa' o' rromapet o' chetare'tnomet narmetsmo a'yoñ, allña muetsapoñetña ñaña puechemer. Arrpa' allohua atet toma'ntata Jesús e'ñe ñañaña.

Jesúsña'pa' atet oterranerr acheñenesha':

—Ñehua, te'pa' o'ch notas, ñeññ pamo'mte' pen ataruasañechnopa' atetcha' pöhueranet. ¹⁶ Ñerra'm esempoch huerranet, pamo'mtayetpa' a'cllatuerranetcha', narmetsma'ña o'ch apuerran po'potantañ.

Acheñenesha'ña'pa' allempo e'mueñet Jesús atet oten, ñetña'pa' atet ochet:

—¡Ñeññpa' arepa'chña atteye' patsterro, Neyompor-re!

¹⁷ Jesúsña'ña' atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt' anuaret' ahuatoteñ, ñeñtpa' e'ñechca'ye po'ñoñ atet perra. Tarro'mar ñeñtpa' atet oten nocop, all atma'ntatareten mapue'. Ñeñtpa' e'ñe atet anuaret' Yompor po'ñoñ ahuatoteñ:

Añ mapue' ñeñt' ama pocteye' entyeno ñeñt' tomatyene' pocoll, ñeñt'ña te'pa' o' anaretterra ñeñt'cha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹⁸ Elloñapa' atet otanet:

—Allohuen ñeñt' epoto'tetsa añ mapyopa' atarrcha' atserpenanet, ñaña añ mapue'pa' ñerra'm eseshesho mata'nompa' e'ñech a'tpetse'tuosanet.

Atto a'pto'chet Jesús, pocte'te' o'ch tsa'tet impuesto
(Mt. 21.45-46; 22.15-22; Mr. 12.12-17)

¹⁹ Añña ñeñt' atarr etsotayenayen ñoñets ñeñt' atet anaret' ñaña ñeñt' pa'm'cha'tareternesha' pen allohuen judionesha' po'cornaneshar, ñetña allempopa' o' eñochet ñetca'ye atma'ntatarettenet, ñeñtpa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. ²⁰ Tarraña ñetpa' aña atarr e'nenet attoch ama't parrochapa' o'ch eñorachet ñeñt' ama pocteyaye ama't ñaña gobiernocop, allochñapa' attoch rremuet o'ch pomueñeta' añcha'taretsho ñeñt' nen gobierno' Romot' ñeñt' añcha'tarettetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeñt' ottetsañ ñerra'mrrate' atarr cohuen acheñ, tarraña ñetpa' añecpa añarettet attoch e'ñe puehquēñoť po'ñoñotetpa' o'ch eñorachet ñeñt' ama cohuenayaye. ²¹ Allempoña chapuet ñeshopa' atet otoset:

—Maestrocha' yapa' yeñoteneñ ñeñt' atet peñen ñaña atto peychatyen Yompor poctapña ñeñtpa' e'ñe cohuenacma. Papa' allohuen acheñ e'ñe cohuen pentueñ; ama aña ñapueť pemorrenteno ñeñt' atarr añcha'na'tpo' entyen allohuen acheñenesha'. ²² Ñeñto'marña te'pa' yemneñ o'ch peñotatapuey erra'tsente'ña e'ñe po'ñoñ cohuentetsa. ¿Pocte'te' o'ch yetsa'ta impuestos añecop ñeñt' añcha'tarettetsa Romo, ñeñt' ama judioneshayaye? Ñato' amate' pocteyaye yocop ñeñtey judioneshay o'ch yetsa'ta añcha'taret' romo'marnesha' ñeñt' ama judioneshayaye.

²³ Jesúsñapa' eñotanet ñeñt' atet shecare'teñetañ, ñañaapa' atet otanet:

24 —Ñehua, segaten puetallarr quelle.

Gatuetpa' atet otanet:

—Ñehua, sapa' o'ch soten, ¿essha't sentenña ñeñt atma'ntatarettetsa all? ¿Esha't pa'so'cheñ ñeñt aquellcarettetsaña all?

Ñetñapa' atet ochet:

—Añcha'taretca'ye atma'ntatarettetsaña all ñaña ñoca'yeña pa'so'cheñ ñeñt aquellcarettetsa all.

25 Jesúsñapa' alla otterraneterr:

—Ñeñepñapa' añ poctetsa o'ch yaþ añcha'taret ñeñt ño ñeñt atet poctetsa gobiernocop; tarraña ellonet ñeñt Yomporo o'ch yaþ ñaña ñeñt atet poctetsa ñocop.

26 Attoña ama't puehquẽñoñtet atet otyenetpa' ama errotet eñoracheto ñeñt ama pocteyaye ama't ñaña gobiernocop tarro'mar allohuen acheñenesha' ñeñt allo'tsa'yen e'ñe cohuen enteñet atet anapuenanet Jesús. Ñeñña ashcañnesha'pa' atta cohuanrrorteñet tarro'mar atarr cohuen anapuenanet Jesús. Ñeñto'marña ñetpa' ama errotenaye' otenaye' entereterro.

Atto a'pto'chet Jesús, ñerra'm po'ñochte' atanterrapo' rromot, ta'm, allempoñapa' errotenchañña yeperra

(Mt. 22.23-33; Mr. 12.18-27)

27 Allempoñapa' hua'cha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctañña ñeñto'mar atet otenet amate' errotetot yetanterroña rromot ama't errponaña.

28 Ñetñapa' atet otoset Jesús:

—Maestrocha' ahuat Moiséspa' atet quellconay ñoñets ñeñt poctetsa ñeñtcha' atet yeþa. Ñeñtpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa' añ poctetsa pa'mo'nasheñcha' alla yorerre'ña po'norrar allochñapa' attoch eñalletterraña ñeñtcha' puechemer perr pa'mo'nasheñ. Ñeñtpa' atetca'ye quellca'nmonayña Moisés ahuat. 29 Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor þa'. E'ñe allponmatatsapa' o' rromaña, yacma ama chemere'tnomo. 30 Allempoña ñeñt po'rrocho'merpa' o' yorerran pa'mo'nasheñ puetapor. E'ñe allponmatatsapa' ñapa'cho'ña o' rromuerrerr ñaña, ñeñtpa'cho'ña ama chemere'tnomo. 31 Allempoña po'psheñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa'

ñapa'cho'ña o' rromuerrerr ñaña, ñeñtpa'cho'ña ama chemere'tnerrerro o' atta rromuerrerr. E'ñe attecma p̄ohuet cancherrsheño'maretpa' e'ñe pueyoruarochet ñeñfara puesheñarr coyanesha'. E'ñe allohuenetpa' e'ñe attecma pet colla'huet ama't puesheñarrofetapa' ama chemere'tnomueto. 32 Allempoña o' rromaña ñaña coyanesha'. 33 Te'ña ñerra'm po'ñochte' yetantena yerromño'tpa' añña coyanesha' allempopa' ¿eseshat'cha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

34 Allempoña Jesús otanet:

—Ñehua, atet ye'chen acheñenesha' arr patsro, chocmach sena'tenet, coyanesha'pa'cho'ña apueñet ñeñtcha' puerrollar pa'. 35 Tarraña esempohuañen allempoch tanterret po'pocheño allohuen ñeñtcha' e'ñe pocte' entuerr Yompor allochñapa' attoch o'ch alla correrret po'pocheño, ñetña allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. 36 Tarro'mar allempopa' amach arromña'terreto ama't ahuata attoch e'ñech atet perret ñerra'm mellaño'teñnanesha'. Yomporñapa' o'ch e'ñe puechemer perranet e'ñe poctacma tarro'mar allempopa' o' tanterret rromotpa' o'huañcha' arromña'terret ama't errponaña. 37 Elloña ama't Moisés atet eñotatane't acheñenesha' po'ño'ch ñeñt colla'huatsa allempo, ñetñapa' corretseta. Ñehua, all aquellcare't tsachmo'r ñeñt e'ñe ñoña huortets. Alloñaca'yeña Yomporpa' eñorana'tanaña Moisés; ñeñtpa' atetca' otña Yompor allempo: "Napa' ñeñten Po'yomporer pen Abraham ñaña Isaac, ñaña Jacob."

38 Jesúsñapa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma ñapa' añca'yeña Po'yomporer pene' acheñ ñeñt corretsach. Yomporñapa' e'ñe entenanet allohuenetpa' e'ñe corretseta.

39 Añña puesheña'tets ñeñt atarr etsotene' ñoñets ñeñt atet anare't, ñetñapa' atet ochet:

—E'ñe Maestrocha' e'ñe po'ño'ch atet p̄oten.

40 Ñeñto'mar allempoteñpa' ama't puesheñarrofetapa' ama eseshaye' a'p̄to'tenaye' enterraye.

Atto Cristo ñeñt Po'partseshar pe't David, elloñapa' o' alla po'n̄reneñ per

(Mt. 22.41-46; Mr. 12.35-37)

41 Allempoña Jesúsapa' atet otan ñeñt atarr etsotayenayeñ ñoñets ñeñt atet anare't:

—Eso'mare'tña otyenet ñeñtcha' Cristotosets ñapa' aña po'mreneñ pene' David tarro'mar ñeñtcha' Cristoterrets ama aña po'mreneñ peñe David tarro'mar ñapa' Po'partseshare'naña pe't David. ⁴² Tarro'mar ama't Davidpa' allempo quellquë't all libro Salmo allempopa' atetca'ye eñose'tña añecop ñeñtcha' Cristoterrets:

Yompor Paretspa' atet otenan ñeñt Nepartseshar nepen na (ñeñtara ñeñtcha' Cristoterrets):
 “Te'pa' o'ch ñanorruerr arr necohuenrot allcha' pecohuentapreterra.

⁴³ Attochña ama't ñeñt pe'moñe'tene' napa' o'ch name'ñatuerranet allochña'pa' o'ch atet perret ñeñt pemnen ña.”

⁴⁴ Ñeñtpa' atetca'ye ote'tña David ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoñeña Cristo ñeñt Po'partseshar pe't David ñeñtña te'pa' o' alla po'mreneñ per ñaña.

Atto Jesús'pa' a'metare'tenan ñeñt etsotayenayeñ ñoñets ñeñt atet anaret, ñeñt atet yeçhenet ñetpa' ñeñtpa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 11.37-54)

⁴⁵ Elloña shonte' acheñenesha' ñeñt e'mño'tene' allempo atet otenan Jesús pueyochresha':

⁴⁶ —Amach semeñe'tapretatsche ommoñañenesha' poçta'ña ñeñtareta ñeñtet atarr etsotayenayeñ ñoñets ñeñt atet anaret. Tarro'mar ñetpa' añe'naña atarr cohuen entenet o'ch chorrenet atarrom shetamuets o'ch atta yorma'tatse'tenet pa'shtam. Ñaña pommo'cheño'tetpa' atarrcha' mueneñet o'ch e'ñe puenicha'na'teño't e'ñech cohuen huomicha'tenanet acheñenesha' all chopeñe'çyenet. Ñaña ñetpa' añe'nach atarr muenenet o'ch anorrcha'tyenet judionesha' po'prahuo allecma anorryen ñeñt atarr añicha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet. ⁴⁷ Tarraña ñetña'pa' rretorranesha'naña puerratan'pesyenetña pa'paquëll. Elloña e'ñe pommo'cheño'tetpa' aña atarr muenenet o'ch atet penet ñerra'mrrate' ñetpa' atarro' cohuen acheñret ñeñto'marña arrcha' ma'yochenet all shontena acheñenesha', amach tematenayaya ma'yocheneto. Ñeñto'marña te' napa' o'ch notas, ñeñt atet petsa pommo'cheño'tpa' elloña atarrcha' a'coñcha'tare'tterret.

21

Atto rretorranesha' ñeñt atarr huocchañetets ñapa'cho'ña nosan quelle ñeñt Yomporecop

(Mr. 12.41-44)

¹ Allempo allo'tsen Jesús Parets pa'paclo, ñaña' arreneñ cohuen allecma nenet quelle Partsocop. Allña' entenan ecñlayoreñesha' ñeñt na'yene' shonte' po'çllayor Partsocop. ² Jesúsña allpa' atta cohuenanet, huapa ñaña puesheñarr rretorranesha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall. ³ Jesúsña' atet ot:

—Te'pa' o'ch notas, añ rretorranesha' ama't atarr huocchañ ñapa' po'ñoçhca'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet. ⁴ Tarro'mar allohuenet ñeñt na'yenet quelle, añaca'ye na'yenet ñeñt a'pchatyenet, ñaña' ama't atarr huocchañpa' e'ñe pomhuahuospan allohuen ñeñt eçhyen ñeñt muenatenaneñ allo'ch yoran attoch correna arr patsro.

Atto Jesús'pa' eñotatanet e'ñeçh a'mata'taretetuerra Partsopo' (Mt. 24.1-2; Mr. 13.1-2)

⁵ Allempoña puesheña'ttets ñetña'p' añña atarr serrpare'tyenet atto Parets pa'paquëllpa' atarr a'cohuentateñ. Mapyet ñeñt allo orratenet Partsopo' ñeñtpa' atarr coçhneshare' a'pa'yese't. Shonte' coçhneshare' ñaña allo'tsa'yen ñeñt pomyen acheñenesha' all Partsocop. Jesúsña' atet otanet:

⁶ —Ora ñeñt allpon e'ñe coçhneshare' sentyent te' çherra' allempoch e'ñe a'mata'taretetuerra. Ama't pueñarra mapyetpa' amach a'puerñoña all allo orratenet Partsopo'.

Atto Jesús'pa' eñotatanet shonte'ch entyerret pa'namen ñeñtcha' eñotaterahuet o' çherrmoch allempoch mellapoterra (Mt. 24.3-28; Mr. 13.3-23)

⁷ Pueyochresha' ñapa' a'p'to'chet:

—Maestro, ñeñtpa' ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet p'teney te'?

⁸ Jesúsña' otanet:

—E'ñeçh seño'terra, allochña' amach esesha' seshquërraye. Tarro'mar shonte'ch orrterrtsa ñeñtcha' ayçha'nataterre' neso'cheñ, ñeñtcha' otyerrets: “Napa' ñeñtencia'yena Cristotets; te'pa' o'ca'ye çherr allempoch norrtierra na ñeñtten Cristotets.” Tarraña sañapa' ñato'tña se'mñotenaneta'.

⁹ Ñaña allempopa' o'ch se'mare'tyerr o' quellareñtsotyerr

allemeñ anetso'mar ñaña o'ch se'mare'tyerr o' orrterra ñaña atparñats errañaren, saña allempopa' amach čha seyorenatsto ama't e'ñe mamesha. Ñeñtpa' atetcha'ca'ye e'ñe po'ñočh perra. Tarraña allempopa' amach čhena' allempoch e'ñe mellapoterra.

¹⁰ Jesúsñapa' alla oterraneterr:

—Pa'namen acheñ ñeñt e'ñe po'poñe'ttsocma mereñtsoret ñetpa' quellaranna'terretcha'. Ñaña pa'namen anetsof añcha'taretečhnopa' quellaraterrancha' pueyochrene-shačhno. ¹¹ Pella'yerrach pats huomenc ora errañaren, ñaña orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña pa'namen atснаñtsočhno ñeñt atarr apatanna'tpo'. Allempopa' atarrcha' añcha'nočhterra entot. Orrterrach ento ñeñt ama't ahuatapa' ama puentareto ñeñtcha'ña eñotaterrahuet o' e'ñe čherrmoch allempoch mellapoterra.

¹² Ñehua, allempoch ama orrtena' atetpa' saña allempopa' rremanaterrsetcha' attoch mueročhtaterrset, sanmare'tterrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñoten na sapa' sanmare'tterrach añcha'taretneshesho'mar ñaña allo'tsa'yen ñeñt nanac añcha'taretnesha'. ¹³ Tarraña allempopa' atarrcha' cohuen attoch sa'metosnanña neñoñ. ¹⁴ Ñeñto'marña allempo sanmare'tetyesa allcha' otteñe'cherrset ama't mameshapa' amach selca'psatsto, amach sota'psa'tatsto, erro'tuachca'ye notoste' añcha'taretesho allempoch a'pto'tare'tapuen. ¹⁵ Tarro'mar allempopa' nachca'yeña se'ñoratosenña all attoch e'ñe cohuen señotyeseña atetcha' sanapyesosanet. Allochñapa' ñeñt se'moñe'tene'pa' amach erro'tenaye' otenaye' entenseto. Ñaña amach erro'tenot otaseto ñeñt atet soten sapa' ñeñtpa' amaca' po'ñočhaye' atet soteno. ¹⁶ Elloña allempoch atet perrsetpa' ñeñt e'ñe sompor sepen ñaña sachor ñato' ñeñtchca'ye sepomuerre' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñt e'ñe parro seyemtena ñeñtchca'ye sepomuerre' tarro'mar ñetpa' ama parrocmaye' attecma soctape'cheno. Ñaña patanta'ttsospa' muetsatyerrsetcha'. ¹⁷ Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. ¹⁸ Napa' atarrcha' necuamípenes attoch amach erro'tenot sechenquërro ama't e'ñe ahuata. Attoña ama't e'ñe pueparra sechpa' ñeñtpa'cho'ña amach na'chencaterrnaso. ¹⁹ Tarraña ama'tcha' atarr mueročhtaterrset čhocmachña e'ñe

seyemteñoŧen napa' e'ñech sa'huanta'huanomña allohuen muerochteñets. Attochña sapa' corretsasach e'ñe po'ñoŧh.

20 'Ñerra'm esempoch senterr añ anetser Jerusaléñpa' o'ch e'ñe rroŧtampera solltarnesha' allempoña sapa' señochepe'ch o' çherrmoch attoch e'ñe a'mata'taretetuerra ñeñŧ anetser Jerusaléñ.

21 Allempoña ñeñŧ allpon Judeo'tsa'yenpa' ñetñapa' allorocmuepa'ch yetrra'tuerret ahuanerretepa'ña aspentareronet. Ñaña ñeñŧ allpon anetso'tsa'yen Jerusaléño, ñetpa'çho'ña ahuanemyesetepa'ch ñamet allot. Ñaña ñeñŧ allpon allampaño'tsa'yen all arepa'chña tatsterretoña all Jerusaléño.

22 Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñŧ atet anuaretatset atetcha' perra allempo.

23 Allempopa' atarrcha' llequëñets añecop ñeñŧ açhomenare' coyanesha' ñaña ñeñŧ allohuen emaretetolleshaçhno. (Tarro'mar ñocpuetpa' atarr torrapo' attoch yetrra'tet ñamet.) Tarro'mar allempopa' o'ch orrterra ñeñŧcha' atarr mueroçhtaterrahuet arr patsro.

Atarrcha' a'coñchatareŧterra allohuen acheñenesha' allempo.

24 Ñaña allempo shonte' acheñpa' e'ñech muetsanatuerranet ñeñŧcha' quellarerrahuet. Po'potantaññapa' rremanatuerranetcha' ñeñŧ quellarenahuet o'ch anmaretterret po'poñ anetso

baçhayo all yeçha'yena pa'namen acheñ. Acheñenesha' ñeñŧ ama judioneshayayepa' ñeñŧcha'ña e'ñe a'mtsoññetuerre'ña jerusaléño'marnesha', attoch e'ñe aŧmama'tueretña ñeñŧ anetser Jerusaléñ.

Atetcha'ca'ye perra ñeñŧ allponmat onañcharet ñeñŧ ama judioneshayaye o'ch añcha'noçhterret all Jerusaléño.

*Atetcha' perra allempoch huerra Cristo Ñeñŧ Acheñetosets
(Mt. 24.29-35, 42-44; Mr. 13.24-37)*

25 'Allempopa' orrterrach ento ñeñŧ ama't ahuatapa' ama sentare ñeñŧcha'ña señoaterre', ñeñŧpa' e'ñech atsnesho, orrterra ñaña arrorresho ñaña rantoçhnesho. Ñaña arr patsro ora allpon pa'namen acheñenesha' pueyorñoŧetpa' atarrcha' nanac lleca'rterret. Añcha' atarr yore'tame'terrahuet atto ñeñŧ añecmuen sa'ppa' o'ch emo'yarterra, atarrcha' huomenc ma'moreterr allempo.

26 Acheñenesha' e'ñe pomçhañoŧetpa' çhach muene' oŧanatyerret tarro'mar allempopa' o'ch eñoterret atarrcha' mueroçhterret allohuenet arr patsro.

Ñaña ñeñŧ huomenc orra'yetsa ento te', allempoña ama't ñeñŧpa' pella'yerrach.

27 Allempoñapa' entapuerrnetcha' na Ñeñŧen

Acheñetosets o'ch nesuam̄perra oso e'ñe nepartsoteñohuen e'ñe necohuenteñesha'. ²⁸ Ñerra'm esempoch senterr o' motetnerra orreyestsas ñeñt̄ allpon o' notuas, allempoña sapa' e'ñech socsheñesha' secuanrrorterr enonet tarro'mar allempo o'ch çherrmoch allempoch sa'queshp̄ataretterra e'ñe poctacma.

²⁹ Allempoña Jesúsapa' alla serrpare'taterraneterr toma'nteñtso, ñeñt̄pa' atet̄ oterraneterr:

—Señoten̄te' atet̄ pena tsach, higoch. ³⁰ O'ch senteñ allempo tapna'tyen pasopanerpapa' sañapa' ñeñt̄aña señoatene'ña o' çhenmoch allempoch huorateterrerr. ³¹ Attecmach perra ñerra'm esempoch sentyerr ñaña allpon ñeñt̄ o' notuas sapa' ñeñt̄cha'ña señoataterre' po'ñoçh o'ca'ye çherrmoch allempoch e'ñe etsoterra allempoch añcha'taretterra Yompor.

³² 'Napa' po'ñoçh o'ch notas, acheñenesha' ñeñt̄ corretsa te' ñetpa' amach e'ñe rromhuenetapa' allempocmach e'ñech etsoterra allohuen añeçhno. ³³ Esemppopa' añ enet ñeñt̄ sentenpa' e'ñech chenca'huerra; patspa'çho'ña attecmach perra e'ñech chenca'huerra. Tarraña ñaña neñoñpa' amach chenquërro ama't e'ñe errponaña.

³⁴ 'Tarraña te'pa' o'ch notas, sapa' çhocmachña e'ñe señoatnoma attoch sapa' amach ñaña soctape'chatsto ñeñt̄ sosya'tsañeçhno, posa'tare'teñets, ñaña atto e'ñe cohuen socrena añ patsro. Tarro'mar ñerra'm ñeñt̄ e'ñe soctape'chenpa' machayotach huaponasa añ yeter ³⁵ atet̄ ñerra'mrate' tamell e'ñech machayota rreman ñeñt̄ecop amencaret̄. Ñeñt̄e yetarocmach çherrana ora allohuen ñeñt̄ yeçha'yetsa añe patsro erraparen. ³⁶ Añcha'ña sapa' çhocmachña seño'srtena ñaña añcha'ña senamuen Yompor attoch sa'huanta'huanom allohuen ñeñt̄cha' sehuapoyapa'namen mueroçhteñtsoçhno allochñapa' sañapa' e'ñech señmañesha' satomhuerr nesho na Ñeñten Acheñetosets.

³⁷ Chocma atet̄ pe't̄ Jesús, ellapene'tcha' yeçhatats Parets pa'paclo, ellerronetñapa' o'ch ahuer Olivoño ñapa' allca'ye e'ñe a'pue't̄. ³⁸ Tsapat̄ puetaren ahuaetcmach huapa'muene't̄ ñaña shonte' acheñenesha' ñeñt̄ e'mñotyeyaye't̄ all serrpare'tatanete't̄ Yompor po'ñoñ all Parets pa'paclo.

22

*Atto atarr o'pateñet Jesús o'ch muetsatateret
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Allempoña çhapmoch allempoch çherrerr pascuapo, allempoch rrerranerr judionesha' pan ñeñt̄ ama anareteyaye

chase'. ²Tarraña allohuen ñeñt pa'mcha'tareternesha' pen allohuen judionesha' po'cornaneshar ñaña allohuen ñeñt atarr etsotayenayeñ ñoñets ñeñt atet anaretet ñocpuet, ñetñapa' Jesús a atarr o'patenet o'ch muetsatachet tarraña ñetpa' aña mecha'na'tenet acheñenesha'.

³ Allempoña oneñetpa' chorrenana Judas ñeñtara ñeñt sochetsa Iscariote. Ñehua, añ ñeñt Judaspa' Jesús pueyochresha' ñeñt parro yemtena po'potantañ ñeñt llesensen Jesús ñeñt allohuenet çharrasheñet puechenet epsheña. ⁴ Ñeñtña Judaspa' ahua' allo'tsa'yen ñeñt pa'mcha'tareternesha' pen allohuen judionesha' po'cornaneshar ñaña allo'tsa'yen judionesha' po'guardiarnesha' ñeñt cohuanpene' Parets pa'paquell. Allempo çhap allpa' Judasña'pa' serrpare'tos epuet ñeñt amcha'tareternesha'. Attoña eñotatosanet ñapa' mueneñca'ye o'ch poman Jesús attoch rromuet. Allempo ñetñapa' otanna'tyeset:

—Te'pa' errotuachñaca'ye yepe'te' attoch yerrmue'.

⁵ Allempoña ñeñt atarr amcha'tareternesha'pa' atarr coshenet, ñetñapa' a'pochtachet çhochca'ye tsa'chetña Judas allpon quelle. ⁶ Ñapa' e'ñe pocte' eñch. Allempoña ñapa' aña atarr e'nen errotenotcha' pomanña Jesús e'ñe a'nahua attoch amach eñche allohuen acheñenesha'.

Atto Jesús'pa' rrallme'chatnenan pueyochresha' attoch çhocmach yerpueret ñeñt yoten te' Santa Cena

(Mt. 26.17-29; Mr. 14.12-25; Jn. 13.21-30; 1Co. 11.23-26)

⁷ Allempoña çhapa'muen ñeñt yetñatsro allempoch rrerretterr pan ñeñt ama anareteyaye chase' allempoch muetserretterr ñaña carrnero; ñeñt'pa' pascuapo. ⁸ Chapa'muen ñeñt yeterpa' Jesúsña'pa' atet ota'mueanan pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñt'cha' yerra' pascuapo.

⁹ Ñetñapa' atet ochet:

—¿Erra'tña pocollo pemneñña allcha' ya'pota'ña rreñets?

¹⁰ Ñaña'pa' atet oterraneterr:

—Te'pa' o'ch ahua'muenes anetso allcha' sepocte' puesheñarr yacma ñeñt anmanpene' oñ porrtó. Ñeñtña acheñerpa' o'ch socta'ner; allcha' be'tosuerr pocollopa' allcha'ña sebe'tosos saña. ¹¹ Allña'pa' atet'cha' sotos ñeñt apacllatesha': "Yemaestrorpa' atet oteney atet'cha' yotosep: '¿Erro'tsena'tña pecuarto allcha' nerrallme'chos pascuapo epan neyochresha'?" " ¹² Ñeñt apacllatesha'pa' gatapascha' eno po'cuarto ñeñt atarr a'yohuen e'ñe cohuen a'paret. Allcha'ña saña'tosña ñeñt'cha' yerra' pascuapo.

13 Allempo atet otuanet Jesúsapa' pueyochresha'ñapa' atet'cho' pet, čha ahuanmatset. E'ñe atet otapanet, ñetñapa' e'ñe'cho' atet entoset. Allcha' añño'tosñañetña rreñets allcha' rrallme'chenet ñeñte pascuapo.

14 O'ña čhap allempoch rrallme'chet. Jesúsñapa' allña anorros epuet allohuen pueyochresha'. 15 Allñapa' atet otosan pueyochresha':

—Napa' atarr cohuen nenteñ o'ch yerrallme'chen parro añ pascuapo tayepa'tñapa' ama čhena' allempoch muetsataterret. 16 Tarro'mar napa' o'ch notas, napa' po'pocheño amach alla nerrallme'cherre'te pascuapo. Esemphuañencha' etsoterra ñeñt' po'ñočh toma'ntenaya pascuapo e'ñech allempocma añcha'taretetuerra Yompor. Allempoñapa' e'ñech parrocma o'ch alla yocsherrerr.

17 Jesúsña allempopa' chetan orramets, parasyoso'tan pompor, allempoñapa' atet otanet:

—Añ orrpapo'pa' o'ch saga'ppa' o'ch sepatanna'ta sa allohuenes. 18 Te'pa' o'ch notas, tayoteñ napa' amach alla norrerre'te añ orrpapo' ñeñt' narmetsos tarremphuach allempoch ello norrererr esempohuañencha' añcha'taretetuerra Yompor.

19 Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeñt'pa' atet otanet:

—Añpa' ñeñt'cha' nechets sepen ñeñt'cha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueño'ten na o'ch serreñ.

20 Allempoña rrohuet o' chetan ñaña orramets, ñeñt'pa'cho'ña atet oterraneterr Jesús:

—Añpa'cho'ña ñeñt'cha' nerras sepen ñeñt'cha' ashatarettatsa socop. Ñeñt'pa' alloch na'pocatonas e'ñe cohuen etserra Nomporešo.

21 'Te'pa' o'ch señočh ñaña ñeñt'cha' nepomuerre'pa' e'ñeca'ye parro yerrallme'chen. 22 Po'ñočhca'ye te'pa' allo'na sen etsotnomtsa ñeñt' atet onañchare't nocop, na Ñeñten Acheñetosets, attot'cha' muetsaterrnet. Tarraña nocoppa' e'ñe pocte'; añña po'ñočh acheñer ñeñt'cha' nepomuerre' ñocoppa' atarr llequëñets.

23 Allempoña atet otua Jesús, pueyochresha'ñapa' allenta otanna'tyeset e'ñe ñañeñeta:

—Ta'm, eseshaycha'ca'ye pomuerre'ña Ya'yochresha'ter.

Atto pommo'cheño'tetpa' otanna'tyenet erra'tsenoteyte'ña ñeñtey atarr asherben enten allohuen acheñenesha'

²⁴ Allempoña pueyochresha' e'ñe pommo'cheñoŧetpa' atet otanna'tyenet e'ñe ñagattseta:

—Erra'tsenoŧeyte'ña ñeñŧey atarr asherben enten allohuen acheñenesha' ñato' na, ñato' pa.

²⁵ Allempoña Jesúsapa' atet otanet:

—Sapa' señoŧeñŧe' ñeñŧ atet pena po'poñ acheñenesha' ñeñŧ ama judioneshayaye. Ñet ñeñŧ pa'micha'tareŧer penet e'ñech pa'micha'noçhteñoŧcmañen pomnaren pa'yenan allohuen pueyochresha'chno. Tarraña ama't atet penetañ pommo'cheñoŧpa' añach atarr muenen allohuen acheñenesha'pa' e'ñech mecha'na'tuenanet ñaña ñetpa' mueneñet acheñenesha'pa' o'ch entenanet, atarro' sherba'yenanet. ²⁶ Sapa' arepa'chña atteye' sepanna'tatsto e'ñe sommo'cheñoŧ. Ñerra'm erra'tsenoŧes ñeñŧes atarr añcha'taretoyen entetsa, ñeñŧes acheñespa' socoppa' añ poctetsa o'ch atet senterra ñerra'm ama esoshe'mayayso atet ñerra'm ñeñŧ atarr hupuesha'. Ñaña ñerra'm erra'tsenoŧes ñeñŧes muenene' o'ch atarr asherben entenset, ñeñŧesña acheñespa' añ poctetsa o'ch atet senterra ñerra'm ama esoyayso, allochñapa' attoch e'ñe cohuen setorrena po'potantañecop. ²⁷ Ñehua, yeñoŧeñ acheñenesha' arr patsro añca'ye atarr añcha'na'tpo' entenet ñeñŧ e'ñe cohueno anorrcha'tyets all rrallme'chenet, amaña ayeñeña añcha'na'tpoye' enteneto ñeñŧ puesherbeñoŧ epatyene' rreñets ñeñŧ anorrchets ñeñŧ rrallme'chets. Tarraña napa' o'ch notas: Ñeñŧecopca'yeña nohuapaña sesho attoch nema'yoçhrena torraya ñeñŧcha' po'ñoçh atarr sherberrets socop.

²⁸ Tarraña sañapa' ñeñŧes atarr nellcapretenaya ñeñŧ atarr llequëñets nenten na. ²⁹ Ñeñŧo'marña te'pa' o'ch nena'nerres sa ñeñŧescha'ña napuerr attoch sa'micha'tarettapreterrna e'ñe atet pena Nompör o' na'n naña ñeñŧencha' añcha'tarettapreterraya. ³⁰ Allcha' sanorrcha'tyesuerr e'ñe sa seconaño allcha' e'ñe sa'micha'tareŧetyesuerra. E'ñe puesheña'ttsos añecopcha'ña sa'micha'tareŧetyesuerra ñeñŧ mereñtsorecop israelena'tar ñeñŧ çharra' mereñtsor ñeñŧ puechetsa epsheña. Attoña allpa' o'ch na'micha'taretterra e'ñe necohuenño e'ñech cohuen yeparrocmatuerr, allñapa' e'ñech yocsheñeshocmañen yerrallme'chuerr e'ñe parro.

Atto Jesúsapa' eñotatan Pedro ñapa' çhocmach a'nasocha (Mt. 26.31-35; Mr. 14.27-31; Jn. 13.36-38)

³¹ 'Simón, po'ñoçh te'pa' o'ch notañ, oneñeŧpa' atarrca'ye enamuenen na socop, añ muenen o'ch topatenes o'ch atet pa'tenes ñeñŧ atet cotape'chen ña ñeñŧ ama pocteye'

enteno Yompor. O'ch atarr huomenc topatenes atet ñerra'm ñeñt shoshnene' po'trigo e'ñech huomenc pa'shmuenan puehoshnat. ³² Tarraña Simón o'ch notap, te'pa' napa' o' nema'yochua p̄ocop attoch amach e'ñe poctacma a'huañañp̄sonapeña p̄a atto atarr peyemtenna. Tarraña ama'tcha' huaponapañ topateñets ñeñt atarr huomenc, p̄aña allempopa' o'ch alla p̄octape'cherr cohuen Yomporecop. Allempoñapa' o'ch alla e'ñe cohuen peyempuer pemo'nasheñnesha' attoch ñetpa'cho'ña o'ch alla huomenc perret pueyo'cher Yomporecop.

³³ Pedroñapa' atet och:

—Partseshacha' napa' amach na'ypo'ñape, chocmach noctap ama't errach anmapet; ñerra'm cárceloch anmapet allcha' muerochtatapet, napa'cho'ña nemnen allcha' yemuero'hta parro. Ama'tcha' cho muetsapetpa' yerromuepa' parro.

³⁴ Jesúsñapa' atet otererr:

—Pedro, o'ch notap, e'ñech a'ñe tsaprocma amach e'ñena' atollop, p̄aña'apa' o'ch ma'poch p̄a'nasotenna. Ñeñtpa' atetcha' p̄oten, napa' año' pentarno.

Atto chapmoch allempoch atarr atserrp̄are'tterra Jesús ñeñt atarr topateñets enten

³⁵ Elloña Jesús'pa' yerpaterrana pueyochresha'; ñeñtpa' atet oterraneterr:

—Ñehua, ahuaña allempo nemñas atet notapas amach es sanmatsto ama't coñe'ta, ama't sebolsa, ama't seçllayor ama't ñaña sesapat. Ñehua allempopa' ¿eñalle'tña ñeñt sepalltena?

Ñetñapa' atet ochet:

—Allempopa' amaca'ye cho es yepallto ama't e'ñe mame-sha.

³⁶ Jesúsñapa' alla oterraneterr:

—Tarraña te'pa' o'ch notas po'poñ, ñerra'm eseshaste' ñeñtes echene' seçllayor te'pa' o'chca'ye sanem all sechopeñe'chyen ama't ñaña sebolsa. Ñaña ñerra'm ama secheno socchellpa' pocte'ca'ye o'ch sepom seshtam alloch seyora socchell. ³⁷ Tarro'mar te'pa' o'ch alla noterrser: Te'pa' o'chca'ye e'ñe etsoterra ñeñt atet anuare't Yompor po'ñoñ nocop. Allca'yeña oten napa' erro'tuanencha' perrnet atet ñerra'mrrate' napa' ñeñten amtsañen. Te'pa' ñeñtca'ye o' etsotmocha ñeñt e'ñe atet anare't nocop.

³⁸ Allempoña ñetñapa' atet otereterr:

—Partseshacha' yapa' yechenca'yeña epmeta cochell.

Jesúsñapa' atet otanet:

—Ñeñtachca'ye.

Atto Jesúsapa' ma'yochuena all oteñet Getsemaní
(Mt. 26.36-46; Mr. 14.32-42)

³⁹ Allempoñapa' o' rrallme'chuanenet ñeñte pascuapo, Jesúsñapa' cha'nerrpa' ahuenerr Olivopno; ñapa' attecma pena chocmach sen all. Pueyochresha'ñapa' cota'huaneñet.
⁴⁰ Allempoña chen et allpa' Jesúsñapa' atet otuenan pueyochresha':

—Te'pa' arrcha' sema'yochuena attoch e'ñe sa'huanta' ñeñtcha' sehuapoya te' ñeñtcha' atarr huomenc setpate'.

⁴¹ Allempoña ñapa' ahuo' mame' a'yenteye'. Ñaña' all concorpa'huenta o' ma'yochuena.

⁴² Puema'yocheñoñ atet otuen:

—Apa, ñerra'm p̄ach pocte' ente' arepa'chña pemnatatsche o'ch chapona ñeñt atarr amuerochtatañ nenten.* Tarraña ñerra'm p̄ach muenats añcha'ña atet pepaton ñeñt pemnen pa, amachña añeyaye ñeñt nemnen na.

⁴³ Allempoñapa' huapoña mellañoñeñ Yompor pue'ntañeñ ñeñtña ahua mencat̄ pose' attoch ahuantan puellquēña.

⁴⁴ Ñapa' atarr nanac puellquēñesha' ma'yochena; puema'yocheñoñpa' atarr nanac ñorra'ten. Po'ñorra'ña' cha huatena atet ñerra'mrrate' errasats tsopsa'tets patso.

⁴⁵ Allempoña ma'yochuapa' tanterra, ahuer pueyochreshesho. All entuerranet ñetñapa' cha atarr manrrenet ama't e'ñe puellquēñeshet. ⁴⁶ Ñaña' atet otuerranet:

—Sapa' eso'mare'tña cha atarr semanrra'ten. Te'pa' o'ch setanterrapa' choña sema'yochrra'ta attoch sa'huanta' ñeñtcha' sehuapoya topateñets atarr huomenc.

Allempo rromoset Jesús

(Mt. 26.47-56; Mr. 14.43-50; Jn. 18.2-11)

⁴⁷ All atet otyenan pueyochresha'pa' allempoñapa' hua'cha'toña shonte' acheñenesha'. Ñeñt̄ hua'cha'tatahuet ñeñt̄pa' ñeñt̄ sochetsa Judas ñeñtara ñeñt̄ pueyochresha' peneñ ñeñt̄ charrasheña ñeñt̄ a'pchenahuet epsheña. Ñaña'pa' cha ponmosaya Jesús, puetso'tstsapa'teñoñ huom̄cha'tos.

⁴⁸ Jesúsñapa' atet otaḗ:

—E'ñe'tcha' petso'tstsapa'teñoñen pepomuerren na Ñeñten Acheñetosets.

⁴⁹ Añña ñeñt̄ yemtenaya Jesús allempo atet eñchet o'ch rromoset Jesús, ñetñapa' atet ochet:

—Ayochreshate ¿ama'te' pocto o'ch yemoñsaḗa yocchello?

* **22:42** Ñeñt̄ amuerochtatañ ñeñt̄pa' po'ño'ch arr atma'ntatare't̄ ñerra'mrrate' ñeñt̄ atarr pesherr yorren orran̄tso.

⁵⁰ Puesheñarrña pueyochresha' allenta chetan po'cchell ahuo'ch chonto'tapan cornesha' pa'cheñer puetepa'tcha' tsorroñ po'cohuenroť. Ñeñtpa' año pa'cheñer ñeñť pa'mcha'tareter pen allohuen judionesha' po'cornaneshar. ⁵¹ Jesúsña allempo entan pueyochresha' atet papa' ñaña' atanet:

—Ñeñepa'ta, amach atet sepatsto.

Allempoña ñeñť tsorrqueta'tetpa' alla a'plerrñañ puet o' alla orrater o' e'ñe correrra. ⁵² Ñeñť hua'cha'toya ñeñťcha' rremose' Jesús'pa' ñeñťpa' a'ñca'ye ñeñť pa'mcha'tareternesha' pa'yen allohuen judionesha' po'cornaneshar, ñaña ñeñť judionesha' po'guardianeshar ñeñť cohua'mpene' Parets pa'paquell ñaña ñeñť pompornesha' pen allohuen judionesha'. Allempo hua'cha'toñetpa' Jesús'ña'pa' atet otapanet:

—Eso'mare't sehua'cha'tennanaña e'ñe occhelletareroches ñaña etsachperetareroches attoch serrma'n. Napa' ¿e'ñe't atet sentenen ñerra'mrrate' e'ñeñen? ⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña serrma'ne'te. Tarro'mar te' o' chap allempo ñeñť poctetsa socop ñeñťo'mar te' o' chap allempoch oneñetpa' o'ch orrtatennas po'huamenc, ñeñťpa' e'ñe atet ñerra'm checmete'.

Atto Pedropa' a'nasotana Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Allempoñapa' rremoset Jesús'pa' arr aneret amcha'taret pa'paclo ñeñť pa'mcha'tareter pen allohuen judionesha' po'cornaneshar. Pedroñapa' ñapa'cho'ña cote' tarraña ñapa' chenta' en a'yoť. ⁵⁵ Petoña rro'ch pampopa' all a'torenet tso' all anorrcha'tyen acheñenesha' ñeñť shotetsa. Pedroñapa' all anorros ñaña all shotosa. ⁵⁶ Allempoña huapa coyanesha' ñeñť amcha'taret pueñaña. Entosan Pedro all shotenapa' alla cohuos, atet otos:

—Añpa'cho'ña encanesharpa' ñeñťrramtso yemtaye'tña Jesús.

⁵⁷ Tarraña Pedroña cha a'nasochapa' atet otanña coyanesha':

—Napa' amaca'ye nentare.

⁵⁸ E'ñe o'chtapa' huapa ñaña po'psheñeñ entuererrpa' ñapa'cho'ña atet otuererr:

—Papa'cho'ña parroca'ye e'ñe peyemtena.

Pedroñapa' atet otan ñeñť yacmar:

—Napa' amarramche' erra neyemtenoña na epan ña.

59 O' tama o'chterrerrpa' o' alla huerrerr po'psheñeñ, ñapa'cho'ña atet otuererr:

—Po'ñoçha'ye añmapa' ñeñtca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm Jesús.

60 Pedroñapa' alla oterranerr ñeñt yacmar:

—Amarramche' neñoteñeña este'ña atarr potenen.

E'ñe allempo atet eñorena Pedro, e'ñepa'tcha' allempocma eñeña atollop. 61 Allempoña Partsesha' Jesús pa' cohua' alente'tsen Pedro. Pedroñapa' allenta yerpuerrana atet oteñ Partsesha': "Amach eñena' atollop ñeñte tsaprocma pañapa' o'ch ma'poch pa'nasotenna." 62 Allempoña Pedropa' ahua' a'yo all e'ñe puellquēñesha' yahuosa huomenc.

Atto atarr achmare'teñet Jesús

(Mt. 26.67-68; Mr. 14.65)

63 All yottam̄psateñet Jesús añcha'taret pa'paclo añña solltarnesha' ñeñt cohuan̄psachet ñetñapa' atarr achmare'teñet Jesús all cohuan̄peñet. Atarr çhota'teñet.

64 Huancacalle'cheñet, pachmare'teño'tetpa' atet oteñet:

—Ñehua, te'ña eñoratenperrepa' Paret allochñapa' attoch potey esesha'te'ña peçhota'tyene'.

65 Elloña pachmare'teño'tetpa' pa'namen esocmañen otyeñet, sochatse'tyeñet.

Allempo çhapata'mueñet Jesús all apçha'muena allohuen judionesha' pa'mcha'tareternesha' ñeñt a'pocatyene' ñoñets

(Mt. 26.59-66; Mr. 14.55-64; Jn. 18.19-24)

66 Tsapaña allempo puetarenpa' apçha'muena allohuen ñeñt pompornesha' pen judionesha' epuet ñaña ñeñt pa'mcha'tareternesha' pen allohuen judionesha' po'cornaneshar epuet ñaña ñeñt atarr etsotayenayeñ ñoñets ñeñt atet anaret. All apçha'muena allohuen judionesha' pa'mcha'tareternesha' ñeñt a'pocatyene' ñoñets, all anma'mueñetña Jesús. Allñapa' a'p̄to'tare'tapet, atet otapet:

67 —Yapa' te'pa' yemneñ o'ch potosey ñerra'm po'ñoçhte' pa' ñeñtep̄ Cristotets.

Jesúsñapa' atet otosanet:

—Ama't notatstas na po'ñoçh ñeñten Cristotets sañapa' amachca'ye poctey' sentno attoch same'ña'na. 68 Ñaña napa'cho'ña ama't o'ch es na'p̄to'tas saña sañapa' amachca'ye sanapñoña naña. Tarro'mar sapa' amachca'ye semno sa'rroyerren. 69 Tarraña te'pa' ama'tcha' atet sepa'noñ te'ñapa' o' e'ñe çhap allempoch o'ch alla nanorruerr Nomp̄or po'cohuenroñ ñeñt atarr ahua'mencattetsa, ama't na Ñeñten Acheñetosets.

70 Allempoña allohuenet atet oteñet:

—Ñeñtēpñapa' ¿p̄a'trraña Puechemer penña Yompor?

Jesúsñapa' atē oterraneterr:

—E'ñeca'ye po'ño'ch ñeñt atē sotenen sa.

⁷¹ Allempoña ñetpa' atē otanna'tyeset:

—Te' yapa' ama yemneñe po'potantañ ñeñtcha' a'metare'tam̄psose' tarro'mar te' yapa' allohueney e'ñe ye'mhuen ñeñt atē otena añ acheñer, ñapa' Yomporo' Puechemer. Ñapa' chaca'ye atarr achm̄are'tenan Yompor.

23

Allempo chapata'mueñet Jesús allo'tsen am̄cha'taret Pilato (Mt. 27.1-2, 11-14; Mr. 15.1-5; Jn. 18.28-38)

¹ Allempoña allohuenet tanrra'tuet, e'ñe parrocmā anmet Jesús allo'tsen am̄cha'taret Pilato (ñeñt nen gobierno Romoñ ñeñt am̄cha'taretetsa allo'marneshacop). ² Allñapa' atarr otteñe'choset, toma'tam̄pesyesoset, ñeñtpa' atē otyesoset:

—Ya añ acheñer chocma yenteñ yechatyenan yamo'tseshachno judionesha' ñeñt ama't mameshapa' ama cohuenayaye, ña'ña atē oteney año'ch yetsa'tatsto impuesto ñeñt romo'marneshacop ñeñt nen am̄cha'taret Romoñ. Ama't ñapa' atē otena ñapa' ño' Cristotets ño' atarr am̄cha'taretetsa arr.

³ Allempoña am̄cha'taret Pilatopa' a'p̄to'tapan Jesús:

—Papa' ¿p̄a'tña judionesha' pa'm̄cha'taretēreḡ?

Jesúsñapa' atē och:

—Atēca'ye atē p̄otenen.

⁴ Añña ñeñt pa'm̄cha'tareternesha' pen allohuen judionesha' po'cornaneshar ña'ña acheñenesha'chno, ñetñapa' atē otanet Pilato:

—Ñehua, napa' amaca'yeña nentoñeña ñeñt atto ama poct-eye' es penoña añ acheñer.

⁵ Judionesha'ña pa'm̄cha'tareternesha'pa' alla otereterr Pilato:

—Tarraña yañapa' chocmaña yenteñ ñeñt atē yechatyenan acheñenesha' attoch atpare'tatenanet gobierno. E'ñe Galileoteñ atē pena, ama't te'pa' o' chap ña'ña arr Judeo e'ñe attecma o' yechatuerrerr ñeñt ama cohuenaye' yenteno ya.

Allempo chapata'mueñet Jesús allo'tsen ña'ña am̄cha'taret Herodes

⁶ Atto' e'm̄ñotenan judionesha' atē otyenet e'ñe Galileoteñ yechaten, allempoña Pilatopa' atē a'p̄to'tanet:

—Jesúsapa' ñapa' ¿galileo'marnesha'tña?

⁷ Allempoña eñotachet ñapa' po'ño'chca'ye galileo'marnesha' allempoña Pilatopa' atē cotape'ch ñeñtpa' Herodesocpaca'ye

tarro'mar ñapa' ñeñt amcha'tarettetsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo chap Jerusaléño all emo'ten. ⁸ Herodesñaapa' e'ñe pocsheñesha' agapanenñ Jesús tarro'mar ahuaototeñ atarr mueneñ o'ch eñch tarro'mar ñapa' atet e'mare'tenan Jesús ñeñt atet pa'yena. Ñapa' añecopña atarr mueneñ o'ch orrtatoñ ñaña ñeñt atet pa'yena orrtatyese' ñeñt ama puentareto. ⁹ Atarr es a'p'to'tare'tapanenña Jesús tarraña ñapa' ama anapanoña Herodes ama't e'ñe parrocha. ¹⁰ All tomcha'toset ñaña allohuen amcha'taretnesha' ñeñt pa'mcha'tareternesha' pen allohuen judionesha' po'cornaneshar ñaña allo'tsen ñeñt atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr. ¹¹ Allempo Herodes ñaña allohuen po'solltarneshar ñetpa'cho'ña puerrapsoñet ñamet. Achñare'chet all che'tatseteñet. Pueche'tatseteñoñet chorrachet amcha'tare't pa'shtam ñeñt atarr cohuen. Allempoña Herodespa' o' alla mueño'ter Pilatesho. ¹² Ñeñto'marña Herodes epuet Pilatopa' e'ñe allempocma amo'tstannerret tarro'mar ahuañmo'chapa' cha e'moñe'tannenet.

Atto amcha'tare't Pilatopa' otanet ama'tpa' chosa muetse' Jesús

(Mt. 27.15-26; Mr. 15.6-15; Jn. 18.39-19.16)

¹³ Allempoña Pilatopa' alla apchaterran ora allohuen judionesha' pa'mcha'tareternesha' ñeñt po'cornaneshar pa'mcha'tareternesha' ñaña po'potantañ judionesha' pa'mcha'tareternesha' ama't ñaña allohuen acheñenesha'. ¹⁴ Pilatoñapa' alla otapuerraneterr:

—Añ acheñer ñeñt sehuapatennan ñeñt soten sa ahuo' yechatyesan acheñenesha' ñeñt ama cohuenaye' senteno sa, te'ña napa' o' na'p'to'tare'tue ama't allempo allo'tsa'yenes tarraña nañapa' ama't parrochapa' ama nentoñeña ñeñt atet sotyen atto' pena ñeñt ama cohuenayaye. ¹⁵ Ama't ñaña Herodespa' ama entoñeña ñeñt ama pocteye' ye'chcateno, ñeñto'marña o' alla mueñer nesho. Po'ño'chpa' amaca'ye eñalleña ñeñt atet pen ñeñt ama cohuenaye' yenteno allohueney attotcha' yemtsatach. ¹⁶ Ñeñto'marña na te'pa' attachca'ye necoñchach mame'pa' o'ch alla na'rroyer.

¹⁷⁻¹⁹ Tarraña allohuen judionesha' puerrannarteñoñet atet ochet Pilato:

—Pemtsatachñaca'ye, añcha'ña pa'rroyerrnay Barrabás.

Ñehua, ñeñt Barrabás ahuañmo'choteñ yottampeñet tarro'mar ña ye'chatene' acheñenesha' atpare'chetepa'

añcha'taret ñeñt nen gobierno' Romot. E'ñe patpare'teñoť o' muetsan acheñ. Ñehua, ñetpa' atet yechenet. Pate'tets pascuapo ñeñt añcha'taret ñeñt nen gobierno' Romotpa' o'ch a'rroyerrñañet judionesha' puesheñarr pamo'ts ñeñt ayottam̄psarettetsa ñerra'm erra'tsen muenenet ñet, ñeñtpa' añecop a'rroyenanet attoch coshatenan judionesha'. ²⁰ Ñeñto'marña Pilatopa' atarr mueneñeñ o'ch a'rroyerranet Jesús, ñeñto'marña alla a'pto'terranerr allohuenacheñenesha'. ²¹ Tarraña ñetñapa' ama't mameshapa' amaña pocteye' enteñeto. Elloña ñeñtapa' rrannartet allohuenet, atet oterete't:

—¡Pecorso'tam̄psach! ¡Pecorso'tam̄psachñaca'ye!

²² Poma'pocheño Pilatopa' alla oterraneterr:

—¿Eso'mare'tña semneñña o'ch necorso'tam̄psach? Napa' amaca'ye nenteññañeña ñeñt atto ama pocteye' es peno attoch yemtsatach. Ñeñto'marña napa' attachca'ye, necoñchach mame' allempopa' o'ch alla na'rroyer.

²³ Tarraña ñetpa' ama cañpueñeto otare'tet. Elloña ñetpa' e'ñe puerrannarteñoťet atarr enamueñet attoch corso'tam̄psach. ²⁴ Ñeñto'marña Pilatopa' ame'ñachet. Attoña ñapa' atet eñora:

—Te'pa' o'ch atet neponas ñeñt atet atarr semnen sa.

²⁵ Ñeñto'mar allempo a'rroyanet Barrabás ñeñt enamueñet ama't ñeñt patparñoť yottam̄peñet ñaña puemtseñoť acheñ. Tarraña Jesúsñapa' o' apanet attoch muetset ñeñt atarr muenenet ñet.

Atto corso'tam̄psoset Jesús

(Mt. 27.32-44; Mr. 15.21-32; Jn. 19.17-27)

²⁶ Allempo anmet Jesús a'yo allcha' corso'tam̄psoset. Allña oñenetpa' allñapa' poctet puesheñarr yacma ñeñt cireneo'marnesha' ñeñtpa' añ pa'so'cheñ Simón ñeñt errte' huerrtsa a'yoť. Ñeñtña rremapetpa' o' chechatnomet Jesús po'corsoch ñeñtña anmue'ña chenta'.

²⁷ Allñapa' coťa'huanem̄ shonte' acheñenesha', shonte' coy-aneshačno ñeñt atarr ya'na'tnene' Jesús chenta', atarr gogaretyesnenet puellquëñoťet. ²⁸ Tarraña Jesúsapa' allenta cohua'nmanet, atet otnomanet:

—Nočhanesha ñeñtes jerusaléño'marneshas, amach atarr seya'na'tatsteno na. E'ñe socpa atarr seyahuena sacñetareťolleshohuen. ²⁹ Tarro'mar esempopa' chocmach huaponasa ñeñtcha' atarr sellcaterre'. Allempoña coyanesha' ñeñt ama achoyore'tñepa' ñocpuetñapa' e'ñech cohuen entareťterret allempo tarro'mar ñetpa' ama eñallete puechyoreshet ñeñtcha' atarr mueročhterrtsa.

Ñeñto'marña allempopa' otyerrcha' allohuen acheñenesha': "O' atarr cosheñso'tsenterra muechoñnesha', ama't allohuen ñeñt ama achoyore'tñe, ama't allohuen ñeñt ama es moma'yeneto." ³⁰ Tarro'mar allempo puemuerochteño'tet e'ñe puellquëño'tetpa' atarrcha' ya'ñiameterret. Pueya'ñameteño'tetpa' e'ñech pocte' entyerret ñegatañperretepa'to' attoch pampuerranet e'ñe poctacma. Allochñapa' o'huañcha' allo'na atarr nanac muerochtetnet. ³¹ Tarro'mar te'pa' atto muerochtatennet na ama't napa' e'ñe cohuen es norrtatyeneñ, e'ñe atteneñ ñerra'm tsach e'ñe cohuen emmo'rate'. Ñeñto'mar te' napa' neñoteñ elloña atarrcha' amuerochtataretterra ñeñt ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tamñsotet.

³² All aneñet ñaña epsheña ñeñt amtsañ ñeñtcha' epuet corso'tamñsotet. ³³ Allempoña çhapachet all oteñet Poñetalleño, allña corso'tamñsotetña epuet ñaña epsheña ñeñt amtsañ, puesheñarr nosñañet po'cohuenrot, po'psheñeñña' nosñañet pue'chcoterot. ³⁴ E'ñe allempo corso'tamñsotetpa' Jesúsñapa' atet ma'yochamñsosana ñeñt e'moñe'tene', ñeñtapa' atet ot:

—Nompurcha' te'pa' pepretnanetepa'ch tarro'mar ñetpa' po'ñoçhpa' ama eñoteneto ñeñt atet yeçcatenet, ñeñt ama pocteyaye.

Allempoña solltarnesha'pa' yellsheñe'chatoñet pa'shtam po'suertot attoch orrta puesheña'tets ñeñtcha' yorayese' puema'tets. ³⁵ Acheñenesha'ñapa' atta cohuanrrorteñet all tomçhenet a'yenet. Pa'mcha'tareterneshet ñetñapa' atarr es otnare'teñet, atet otatse'tyeñet.

—Te'ña papa' o' pa'queshepatyes po'potantañ, te'ñapa' pa'queshepaterra e'ñe pañeña ñerra'm po'ñoçhte' ñeñteþ acren Yompor ñeñtcha' Cristotosets.

³⁶ Solltarnesha'pa'cho'ña atarr achmare'teñet, che'tatseteñet. Pueche'tatseteño'tetpa' ponemyetpa' aposet vinos ñeñt atarr chella'se'. ³⁷ Pachmare'teño'tetpa' atet otyeñet:

—Ñerra'm pa po'ñoçhte' ñeñteþ pa'mcha'tareter pen judionesha', te'ñapa' pa'queshepaterra pañeña.

³⁸ Ñehua, poñoñ all corsocho all noñet tsachtall aquellcareñ ñeñtña quellecpa' atet oten: "Añpa' ñeñtca'ye judionesha' Pa'mcha'tareter." Ñeñtña quellecpa' ñeñt anaret ma'po'mar ñoñets —griegaçh, latinaçh ñaña hebreaçh, e'ñe attecma oten.

39 Puesheñarrña amtsañ ñeñt̃ parro corso'tam̃peñet, ñapa'cho'ña achm̃are'ch. Potnare'teñoṭpa' atet oteñ:

—Ñerra'm po'ñochte' Cristoṭpa' ṑa'queshp̃aterra pañeña, yapa'cho'ña o'ch ṑa'queshp̃aterrey.

40 Po'psheñeñ amtsañpa' che'ptare'ch. Pueche'ptare'teñoṭpa' atet och:

Papa' eso'mare'tña ama pem̃cha'na'teñeña Yompor, ama't parro amuerochtatareṭey. 41 Tarraña yocoppa' e'ñeca'ye pocte' yemuerochtēna tarro'mar ñeñṭpa' añ tsa'tatenyet ñeñt̃ allpon yeyečcatyen ñeñt̃ ama cohuenayaye ama't e'ñe mamesha. Tarraña añ acheñer ñeñt̃ parro muerochtatenyet ñapa' ama es yečcateno ama't mamesha ñeñt̃ ama pocteyaye.

42 Allempoña ñapa' atet otan Jesús:

—Napa' peyerpa'huerrno'tach allcha' ṑa'm̃cha'tareṭetuerra.

43 Jesúsñapa' atet och:

—Napa' po'ñočhca'ye notaṑ, e'ñe tayecma parro'tseneycha' cosheñtso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

44-45 Allempoña čhap pocto atsne'pa' o'huañ atsnom, o' e'ñe checmetua erraṑaren añe patsro. O'ña ellerrotnenmochapa' o' alla puetarerr. Allempoña ñeñt̃ besom allo yottam̃peññañet Parets ṑa'paquell po'ponro ahuepa't rrrarra'nom e'ñe poc-tacma, o' e'ñe elloṑa'tetsta. 46 Allempoña Jesúsṑa' rrana. Puerranaroṭpa' atet ot:

—Nomp̃orcha' te'pa' o' nepomuerra e'ñe ṑocop e'ñe necamquēñohuen.

E'ñe ñeñta otuapa' o' rroma.

47 Solltar po'caṑtāner ñeñt̃ romo'marnesha' ñeñt̃ corso'tam̃pse', allempo atet ent atet o' ṑa, ñañapa' allenta aye'chočhtatan Yomporpa' ñapa' atet ot:

—Añ yacmarpa' po'ñočuaca'ye e'ñe attota o' yemtsatater, amaca'yeña eñalleña attoch yemtsataterēñ.

48 Ñaña allohuen acheñenesha' ñeñt̃ allo'tsa'yen ñeñt̃ ente' ñeñt̃ atet o' ṑach o' yoročhtach, ñetñapa' puellquēñesha' na'yesnerret pot puesomapo ahuanerret. 49 Allohuen ñeñt̃ atarr yemtaye't Jesús ahuañoṭeñ ñaña allohuen coyane-shačhno ñeñt̃ coṭa'huanmue' Galileoṭ ahuañoṭeñ, ñetñapa' alla tom̃cha'tyenet a'yenet allot̃ atta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

50 Eñall puesheñarr yacma ñeñtara judionesha' ñeñt̃ e'ñe cohuen acheñ e'ñe pocte' es ṑa'yen, ñeñṭpa' añ ṑa'so'cheñ José ñeñt̃ arimateo'marnesha'. Ñapa'cho'ña puesheñarr ñeñt̃

pa'micha'tareter pen allohuen judionesha' ñeñt parrocmachocmach apchenet epuet po'potantañ amicha'taretnesha' attoch a'pocstatenet ñeñt llequëna allohuen judionesha'.⁵¹ Ñehua, ña ahuaña allempo apchenet parro po'potantañ amicha'taretnesha' atto o'pateñet Jesús o'ch muetsatachet, ñaña'p' ama't mameshapa' ama pocteye' eñche. Tarro'mar ñapa' ñeñt atarr cohuene' Yompor esempohuañencha' o'ch atarr ayochreshaterra.⁵² Ñeñña Josépa' o' ahuo' Pilatesho o'ch oteña' pocte'ch eñch ñach a'suatose' Jesús ñeñt rromuets corsocho.⁵³ Pilatoña'p' e'ñe pocte' eñch, ñeñto'marña ñapa' a'suater corsocho' allempoña'p' epatse'ch shetamtso ñeñt e'ñe cohuen, allempoña'p' aneñ allcha' pampueña'. All eñaret mapuetpon all ama apamparettena' po'poñ arromña', allca'yeña nenana'ña Jesús.⁵⁴ Ñehua, allempo pampuet Jesús'p' ñeñtpa' a'ne yetro allempo chocma añño'tena judionesha' ñeñt tsapatcop allempoch ameserreter. Ñehua, allempo pampa'huet Jesús'p' o' ellerren, ñeñto'mar judionesha'p' o' moñtan ñeñt tsapatcop allempoch amesa'muenet e'ñe poctacma.

⁵⁵ Ñeñña coyaneshachno ñeñt atarr yemtenaya Jesús ñeñt cota'huanmue' ahuañoñeñ Galileot, ñetña'p' cota'huanmet all pampueñeta' attoch eñchet allcha' neret Jesús.⁵⁶ Allempoña ñet onacherret allotpa' o' chacherret pocollo, ñetña'p' allohuenetpa' yorayesuerret ñeñt atarr eñmosatechno alloch a'yana'tereta' Jesús ora po'chtsohuen attoch e'ñe cohuen eñmosatatereta'. Ñeñtpa' e'ñeca'ye atet yeçhenaña judionesha'. Ñetpa' alla añño'tuaneñetña eñmosatechno tarro'mar tsapatpa' amach serreto puepampro tarro'mar tsapatcha' çhapa'muen ñeñte yetro allempo chocma amesen judionesha' ñeñt atet anarettenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

¹ Allempo o' huañ yetñats allempo amesenet, allempo motta'muena yetñats temenc coyaneshachnoña'p' e'ñe ahuatecma ahuanma'muenet all pampueñet Jesús. Anma'mueññañet eñmosatechno ñeñt o'patateñet alloch a'yana'toset. Allña'p' cota'nma'muenanet po'potantañ coyaneshachno.² O'ña chacha'ta'muenet allpa' mapueña ñeñt allo mopamñset Jesús ñeñt puepampuer p'achet ama atteraye' entoseto ñeñt atet p'amñset po'poñ ellerro. Entoset mapue' o' a'rrote'tarettena a'yenet.³ Allempoña ñetpa' esho'trra'toset mapuetpono ñeñt puepampuer p'achet amaña

essha' entosayeña arromñañ all net. ⁴ Ñetñapa' čha muene' yoruoset ama eñoteñeto errotčha'ña p̄oset. E'ñe allempo atet cotape'chyenet ahuepa'tcha' orrtapanet epsheña yacma alla tomčha'toset e'ñe allo'tsa'yenet, atarr cohuen popuetyenet pa'shtamuet. ⁵ Ñetña pueyorñoñetpa' atta mo'crra'tyeset patso. Pomčhañotet ama eshcaye' cohua'p̄seto allenet ten. Ñeñña yacma epsheñapa' atet otosanet:

—Ñeññ ama arromñañeshayaye, eso'mare'tña se'name'teñña arr allecma nannena arromñañenesha'. ⁶ Te' ñapa' amaca'ye allo'tsenarayaye arr, o'ca'ye tanterra. Ama't seyerpueñoña ñeññ atet otase't ama't ahuañmo'choteñ allempo Galileo'tsenmeñ. ⁷ Ñeñtpa' atetca'ye otase't ñapa' ña Ñeññ Acheñetosets čhocmach pomueret attoch errotuanen per po'poñ acheñ ñeññ atarr ochñañenesha' attoch corso'tañperet, tarraña poma'pamtañoñapa' čhocmach tanterra.

⁸ Allempoña ñetpa'čo'ña allenta yerpueret atet otanete't ahuañmo'choteñ Jesús. ⁹ Allempoña coyaneshačhno'pa' onačherret puepamprot, čhačherret pocollopa' serrpare'tatueret Jesús puellsensarnesha' ñeññ čharrasheña ñeññ puesheñarraña o' puecherra ñaña po'potantañečhno ñeññ pueyochresha' pen. Coyaneshačhnoñapa' serrpare'tueret allohuen ñeññ atet enta'muenet Jesús puepampro. ¹⁰ Ñeññ serrpare'tatenaya' Jesús puellsensarnesha' ñeñtpa' añ María Magdalena ñaña Juana ñaña po'psheñeñ María ñeññ Jacobo pachor ñaña po'poñečhno coyaneshačhno. ¹¹ Tarraña Jesús puellsensarnesha' allempo serrpare'tatosanet coyaneshačhno ñeññ atet entua'muenet, ñetñapa' ama't mameshapa' ama ame'ñyetoña coyaneshačhno, čha otenapuetañ atate' otatse'tyen coyaneshačhno.

¹² Tarraña Pedroñapa' allenta ta e'ñe matenacma. O'ña čhap ñaña puepampropa' mo'cosa, cohuos o'pononet all net. Ñapa'čo'ña ama entose, shetamtsa entos allo e'patse'chet alla o'shshe'ma'yena a'yenet. Ñapa'čo'ña ahuerr pocollo ama eñoteñe ñato' erro'tsente'.

Atto Jesús'pa' rremuerrana' epsheña pueyochresha' toño allempo senet Emaúso

(Mr. 16.12-13)

¹³ Ñeñte yetrocma epsheña pueyochresha' ñetñapa' arr senet anetso ñeññ pa'so'cheñ Emaús. Ñehua, ñeññ pa'so'cheñ anets Emaúspa' Jerusaléñoñetpa' allo'tsente' čharra' puechena paterr kilómetro čhoycha' čhapats anets Emaúso. ¹⁴ Ñetñapa' e'ñe pueserrparñesha' senet, añ serrpare'tyesnenet ñeññ allpon atet o' p̄ohua. ¹⁵ All senet e'ñe

pueserrpare'teñeshetpa' anapanna'tyesnenet Jesúsñapa' alla rremuerraneta'. Allempoñapa' chope'chnomuet e'ñe parro o' ahuanmuet anetsonet. ¹⁶ Tarraña ama't entapetañña Jesúsapa' ñetñapa' čha ottenet ñerra'mrrate' ama amnataretteneto attoch cheme'tapet, ama esesha' cheme'taye. ¹⁷ Jesúsñapa' atet otosan pueyochresha':

—¿Eso'tña seserrpare'tyesnen? ¿Eso'mare'tña čha atarr sellca'nena?

¹⁸ Puesheñarrña ñeñt sochetsa Cleofas, ñañaapa' och:

—¿Ama't peñoteñeña allohuen ñeñt Jerusaléño'tsen ahuañoñeñ o' e'ñe e'mare'tuet ñeñt atet o' metua all? Papa' ¿paptate'ña ñeñteř taya čhapats all Jerusaléño ñeñteř ama eñotosaye ñeñt atet o' pöhuerrret Jerusaléño?

¹⁹ Ñañaapa' atet otnomanet:

—¿Eso'tña ñeñt atet o' pöhuerrretña all?

Ñetñapa' alla otnereterr:

—Añca'ye yeserrpare'tnen Jesús ñeñt nazareto'marnesha' ñeñt a'mtene' Yompor po'ñoñ ahuaña. Po'huamencot orrtatennay po'partsoña ñeñt ama't ahuaña yapa' ama yentare. Ñaña atet yečhatyese't ñeñtpa' atarr cohuen. Ñeñtpa' e'ñe pocte' entapreteñ Yompor; acheñenesha'pa'čho'ña e'ñe pocte' enteñet. ²⁰ Tarraña ya'miča'tareternesha' ñaña ñeñt pa'miča'tareternesha' pen allohuen judionesha' po'cornaneshar, ñetñapa' o' pomueret Jesús attočca'yeña o' muetsatateret, ñeñto'marña o' corso'tamperet. ²¹ Tarraña yapa' ñeñtca'yeña atarr yemneneñ ñato' ñach ya'rroyatatosayeña allohueney ñeñtey israelena'tarey (atto añcha'nočhtana'tenya romo'marnesha' ya ya'netsro). Tarraña te'ñapa' čhaña o' muetseret. Te'pa' o'ca'ye ma'pamta'muen. ²²⁻²³ Ñaña te'ña coyaneshačhnoña ñeñt parro yeyemtena, ñetñapa' ahuañecma ahuanma'muenet o'ch enta'mueñet puepampro ñetñapa' año' eseshaye' entosayeña puepampro all neretañ. Allempoña huačherret puepampro't atet serrpare'tatuerryet, allñapa' año' orrtahuet mellañoñeñ ñeñto'ña otahuet Jesúsapa' o'ca'ye tanterra o' alla be'tterra. Ñeñto'marña yapa' ñeñtña atarr yeyore'tene'. ²⁴ Allempoña ñaña allponsheña ñeñt parro yeyemtena, ñetpa'čho'ña allenta ahuanmuet ñamet puepampro. E'ñe atet otuerrey coyaneshačhno, ñetpa'čho'ña ama eseshaye' entosaye.

²⁵ Jesúsñapa' alla otnerraneterr:

—Sapa' ama es sečhenoyoña seyočhro, atarr se'charrtaten seyočher attoch e'ñe same'ña'huaña ora ñeñt atet eñosyese't Cristocop allohuen ñeñt a'mta'yese't

Yompor po'ñoñ ahuatoteñ. ²⁶ Ama't señotheñña ñeñtcha' Cristotatspa' atetca'ye anareña ñocop ñapa' atarrcha'ca'ye amuerochtataretetuanena čhoch rromats. Elloñapa' o'ch alla čherr esempo allempochña e'ñe cohuen a'cohuentataretterra.

²⁷ Allempoña Jesúsapa' o' yerpatnerraneterr ora allohuen ñeñt atet anaret añecop ñeñtcha' Cristotats. E'ñe Moisés po'ñoñoñeñ yerpatnomanet ñaña po'potantañečno po'ñoñ ñeñt eñosyestset Cristocop, ñeñfara ñeñt a'mta'yesayet Yompor po'ñoñ ahuat.

²⁸ Allempoñapa' chapmochet anetso all sechenet. Jesúsñapa' čha otetnena ñerra'm ñapa' añaťoch'ch. ²⁹ Ñetña alla puepateñoťtpa' atet ochet:

—Allachca'ye yečhap arr parro o'ca'ye tsapuenmoch.

Allempoña Jesúsapa' be'tosos allcha' chapuet. ³⁰ Allempoña anorrčha'toset allcha' rrallme'choset. Jesúsñapa' chetosan pan, parasyoso'tamřsosan pan, shota'tospa' apa'yesosanet.

³¹ Allempo atet řosa, pueyochresha'ña epsheñapa' čha e'ñe cheme'toset aña' ñeñťepa'tca'yeña Jesús. E'ñe allorocma ñetpa' o' amnataretteret atťoch e'ñe cheme'teret. E'ñe cheme'teretpa' allepa'tcha' ma'natañperranet.

³² Allempoña ñetpa' atet otanna'tyeset:

—Ñeñťo'marepa'tca'yeña atarr nanac coshatosey ñorra' ama't čha yellquena yeyočhro allempo serrpare'tatnomuey toño all yerpatnomya Yompor po'ñoñ ñeñt atet ana'yesaret e'ñe ñocop.

³³ Ñetña e'ñe allorocma tantra'teretpa' o' alla ahuanerret Jerusaléño. Allñaapa' o' čherret allo'tsa'yen po'potantañ puellsensarnesha' ñeñt o' čharrasheñaña puechena puesheñarr. Allo'tsen ñaña po'potantañečno. ³⁴ Allña ñetpa' atet otueret po'potantañ:

—Po'ñočhca'ye o' tanterraña Yepartseshar. Ellonetñaapa' orrterrana ñaña Simón.

³⁵ Allempoña ñetpa' serrpare'tueret ñeñt atet enteret toño ñaña all shota'tosan pan, atťoña ñetpa' allña e'ñe cheme'tosetña Jesús.

*Atto Jesúsapa' orrterrana allohuen pueyochresha'
(Mt. 28.16-20; Mr. 16.14-18; Jn. 20.19-23)*

³⁶ Ñeñta atarr otatsetyenetpa' Jesúsñapa' čhepa'tcha' tomhuets e'ñe all chorren allohuen pueyochreshačno. Alla huomčha'tuenanet, puehuomčha'tueñoťanetpa' atet otuananet:

—Te'pa' čhosaña e'ñe cosherrtsa seyočhro.

³⁷ Tarraña ñetñapa' čha atarr yore'tuenanet, čha atarr mecha'trra'tet, čha otenapuetañ choyeshe'matste' orrterranet. ³⁸ Jesúsñapa' atet otuenanet:

—Eso'mare'tña sañapa' čhaña seyoren. Eso'mare'tña sañapa' čhaña atarr se'charrtatenña seyočher. ³⁹ Te'pa' o'ch secuapuennan not ama't ñaña netac attoch e'ñe seño'tapuerren naca'ye. Sa'płlapuennan nechets, secua'yesapuennan nechets allochñapa' o'ch e'ñe seño'tapuenen. Napa' ñeñten echtso'ten, choyeshe'matspa' amaca'yeña echtso'teyayeto ñaña amaca'ye anpa'teyaye atet o' sentapuenen napa' echtso'tenca'ye ñaña anpa'tenca'ye.

⁴⁰ Allempoñapa' gatuenanet pot ñaña pa'tac. ⁴¹ Ñetñapa' atta cohuanrrortapueñet. Ama't atarr coshapueñetañpa' amaña e'ñeye' ame'ñapueñeto ñato' po'ñočhte' Jesús. Atta echarrtatenet pueyočher tarraña Jesúsñapa' atet o'terraneterr:

—¿Arrpa' ama't secheno ama't coñe'ta rreñets?

⁴² Ñetñapa' aña apapueñet pasheparr cac achmare't ñaña pets pocoyem' all nenan po'moñ. ⁴³ Ñeñña agaphuenpa' o' rrohueñ all chorrenet attoña ñetpa' entapueñet. ⁴⁴ Allempoñapa' atet o'terraneterr:

—Ñeñt atet notase't allempo orameñ allo'tseney e'ñe parro, ora allohuen ñeñt atet anaret ahuatoteñ Yompor po'ñoño nocop, ñeñña te'pa' o' e'ñe etsotuerra—e'ñe Moisésoteñ po'ñoñ ñeñt atet anaret ama't ñaña ora allohuen ñeñt quellca'yesone't ñeñt a'mta'yesaye't Yompor po'ñoñ, ama't ñaña ñeñt aquellcarettatse't libro Salmos, te'pa' ñeñña o' e'ñe etsotuerra ñeñt atet ana'yesaret nocop ahuatoteñ.

⁴⁵ Allempoñapa' o' čapat Janet pueyočhreto allohuen ñoñtsočhno ñeñt aquellca'yesaret ñocop. ⁴⁶ Jesúsñapa' alla o'terraneterr:

—Po'ñočhpa' allohuen ñoñets ñeñt aquellca'yesaret atetca'ye oten ñeñtcha' Cristotosetspa' čhocmach po'ñočh rromos, tarraña poma'pamtañoñapa' o'ch alla tanterra. ⁴⁷ Attochña serrpare'teret Cristo e'ñe Jerusaléño'teñ erraparen ora allemeñ allohuanen acheñenesesho'mar. Attočha'ña acheñenesha'pa' o'ch co'tape'cherret ello e'ñe cohuen Yomporcop allochñapa' attochña o'ch e'ñe ap'retna'huare'tterret allohuenet po'chñaret. ⁴⁸ Jesúsñapa' atet o'terraneterr:

—Te'ña sapa' o'ch sa'poterrnan ora ñeñt allpon atet sentyesne't ama't teme'ttsen. ⁴⁹ Ñaña sa te'pa' ellonet o'ch atet notnerres, po'ñočhca'ye napa' nemñohuernascha' Yompor Puecamquëñ entot ñeñtcha' e'ñe sechorra'yesaya e'ñe puesheña'ttsos ñeñt atet oten Yompor ñeñtcha' e'ñe apa'yerres. Tarraña sañapa' allasach anetso Jerusaléño,

esempohuach chorratasa Parets Puecamquëñ ñeñtcha'ña
 ahuaencať sepa'yese' ñeñtcha' apuerres Yompor
 pue'ntañõ.

Allempo a'terr Jesús pue'ntañõ

(Mr. 16.19-20)

⁵⁰ Allempoña Jesús err Jerusaléñoť, ahuanerran
 pueyochreshačno a'yo anetso Betanio. Allñapa'
 echantosan potpa' bensare'tam̄pesyesosanet. ⁵¹ E'ñe
 puebensare'tam̄peñoťanetpa' allñapa' a'tenoche' pue'ntañõ
 o' sohuanenanña pueyochreshačno. ⁵² Ñetña
 allempo atet entapueret Jesús ahuer pue'ntañopa'
 pa'ye'chočhtateñesha' ma'yochnerretpa' ahuanerret
 Jerusaléño e'ñe pocsheñeshocmañenet. ⁵³ Ñetña allempopa'
 ellapenete't Parets pa'paclo all atarr aye'chočhtateññañet
 Yompor. Ñeñtpa' attetepa'ch Nompore. Allohua.

COHUEN ÑOÑETS ÑEÑT QUELLCA' SAN JUAN

Ñeñt Po'ñoñ pen Parets ñeñña acheñetosets ñeñtara ñeñt Cristoterrets

¹ Ahuatoteñ e'ñe ñanom pa'motroteñ Cristoñapa' eñalla epuet Pompom Parets. Ñaña'pa' ñeñtara ñeñtcha' Po'ñoñ pa' Parets tarro'mar ñach eñotaterre' acheñenesha' atet oteñ Yompor Parets. Tarraña ñapa'cho'ña e'ñe attecma partsoten atet partsoten Pompom ñeñt atarr nanac Parets. ² Allempo errete' ayeçhcataretta pats, ñaña'pa' e'ñe parro allo'tsen epuet Pompom Parets. ³ Ñeñto'marña allohuen esocmañen ñeñt eñall, ñapa' ña e'ñe yeçhcatue' ñeñt atet muenet epuet Pompom. Ñeñt allpon eñallpa' ama eñalle ñeñt ama yeçhcato ña, ama't esotolla, ñocma pueyeçhcatar. ⁴ Ñaña'pa' añepa't ñeñt alloch e'ñe yocrrena. Ñeñtña alloch e'ñe yocrrenapa' ñeñtcha' yeñotaterre' allohuen ñeñt cohuen enten Pompom Parets. Ñeñto'mar ñapa' atet pena ñerra'mrrate' puetare' tarro'mar ñapa' ñach a'puetarsamperre' allohuen yocpaña. ⁵ Ama't atet pena sosya'tsañeçhno añe patsro ñerra'mrrate' checmete', ñaña'pa' e'ñe a'puetaresuos. Checmete'ña'pa' ama't ahuatapa' amach erroteno't a'checmetamperano ñeñt puetarñatser ñeñt Yompor po'cohuenña.

⁶ Ama't allempo ama orrtena' Cristo ñeñtcha' puetarñatsotosets arr patsro, ñanempa' añ orrtatsa puesheñarr yacma ñeñt'pa' añ pa'so'cheñ Juan; ñapa' Yompor llesense'. ⁷ Ñapa' añecop huapa ñach a'potose' attoch huapa Cristo arr patsro ñeñtcha' a'puetarsamperre' allohuen yocpaña. Attoña ña po'ñoño'tpa' ame'ñatosana acheñenesha'. ⁸ Tarraña Juanpa' ama añeyaye ñeñtcha' puetarñatsotosets arr patsro; ñapa' añecpa huapa attoch a'potosan ñeñtcha' a'puetarsampsañtosta. ⁹ Allempoña çhap añe patsro ñeñt puetarñatsotosets tarro'mar añ puetarñatser ñeñt e'ñe po'ñoçh ñeñtcha' a'puetarsam'psose' allohuen acheñenesha' poçpaña, ñeñt'pa' alletsa, o'ch orrtosa añe patsro.

¹⁰ Ama't añ patspa' ño pueyeçhcatareñ, acheñenesha'ña arr patsropa' arepa'tcha' cohuenaye' agapapeto tarro'mar ama eseshaye' eñotapaye. ¹¹ Ama't arr çhapañ e'ñe ña pamo'tseshesho, pamo'tsesha'ña'pa' arepa'tcha' cohuenaye' agapapeto. ¹² Tarraña puesheña'tets ñeñt e'ñe cohuen agapyesapue', ama't allohuen ñeñtcha' ame'ñerraya ña,

ñetñapa' apuerranet llesens attoch e'ñe puechemer perranet Yompor Parets. ¹³ Ñeñt atto puechemer perrey Yompor ñeñt'pa' ama atteyaye atet ye'ñalletena ya ñeñtey arromñatey. Tarro'mar ñeñt atto ye'ñalletena arr patsropa' ñeñt'pa' atet anaretey ya ñeñtey arromñatey. Ñaña atto puechemer o' perrey Yompor, ñeñt'pa' ama añoŕeyaye ñeñt atet cotape'chateney po'psheñeñ acheñ poctaŕña. Yapa' añoŕña o' puechemer perrey Yompor atto o' muenaterrey e'ñe ña poctaŕña.

¹⁴ Cristoña ñeñt Po'ñoñ pen Yompor o' acheñetos arr patsro, o' yeychañ e'ñe parro mame' aña patsro. Ñapa' atarr amuerañtosa. Ñaña atto yeçhatosey Yompor po'ñoñ ñeñtña ñoñetspa' e'ñe po'ñoçh atet, ama shequëñtsoyaye ama't mame-sha. Ñaña yapa' çhocma yentoñe't po'cohuenña. Ñeñtña po'cohuenñapa' atet ñerra'm Pompor ñeñt po'patrorr pene' ña. ¹⁵ Allempoña Juan puerranarotpa' a'poñan Cristo, ñeñt'pa' atet eñora ñocop:

—Añmapa' ñeñtca'yeña notase't ahuaña, ñeñtcha' huapatsa chenta' ñapa' atarr ahuamencatesha', nañapa' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña' eñalla. Ñeñt'pa' allohua atet ot Juan ñenmañ Cristocop.

¹⁶ Ñapa' atarr amuerañtosa ñeñto'marña allohueneypa' atarr bensare'tampeney. Allo'na sen yebensare'tampesnene'. ¹⁷ Ñoñets ñeñt atet anare't ahuatoteñpa' ñeñt quellconay Moisés ahua't. Tarraña Jesucristopa' ñaña orrtatose'ña muereñets ñaña ñapa' añ orrtatonay ñoñets ñeñt e'ñe po'ñoçh Yompor po'ñoñ alloch yequeshperra. ¹⁸ Yompor Paretspa' ama't ahuatapa' ama eseshaye' puentare. Po'patrorrña ñeñt Cristotosets ñeñt'pa'çho'ña Parets ñeñt e'ñe parro attecmuet; ñapa' ña yeñotaterre'ña atet penaña Pompor Parets.

Juan ñeñt apatañtetsa Yomporecop, ñapa' atarr cohuentatosan Jesucristo

(Mt. 3.11-12; Mr. 1.7-8; Lc. 3.15-17)

¹⁹ Allempo judionesha' pa'm'cha'tare'ternesha' ñetñapa' mueñet acheñ Jerusaléñoñ ñeñtcha' ahuanmatsa Juanesho. Añ mueñet judionesha' po'cornaneshar ñaña levitanesha' ñeñt po'taruas pene' o'ch torrenet Parets pa'paclo. Ñetpa' añecop amñare'ttet ñetcha' a'p'to'toset Juan ñapa' esesha'te'ña. O'ña çhapuet ñeshopa' atet otoset:

—Papa' çeseshape'tña, ama't añeyaype ñeñteŕcha' Cristoterrets?

²⁰ Juanñapa' ama a'nasoto; atto a'metapa' ñapa' atet ota-panet:

—Napa' amaca'ye añeyayno ñeñtcha' Cristoterrets.

²¹ Ñetñapa' alla otereterr:

—Ñeñtepnapa' ¿eseshape'tña, ama't añeyaype Elías ñeñt a'mtaye't ahuat Yompor po'ñoñ?

Ñañaapa' atet oterraneterr:

—Amaca'ye ñeñteyayno.

Ñetñapa' alla a'pto'tereterr:

—Amapa' ñato' ¿añepte' ñeñtepcha' a'mterre' Yompor po'ñoñ ñeñt yecuen?

Ñañaapa' alla oterraneterr:

—Amaca'ye ñeñteyayno.

²² Ñetñapa' alla otereterr:

—Ñeñtepnapa' ¿eseshape'tña pa? Yapa' yemneñca'ye o'ch potey allochñapa' o'ch yotera' ñeñt yemñene'. ¿Errotena'tcha'ña poteyña pocop?

²³ Ñañaapa' atet oterraneterr:

—Napa' nocopca'ye eñose'tña Isaías ñeñt a'mtaye't Yompor po'ñoñ ahuat. Allempopa' atetca' ote't:

E'morrterrach puesheñarr po'ñoñ all amayo allcha' ser-
rpare'taterranña acheñenesha'. Puerranarotpa' añcha'
toma'ntaterranet toñ ñapa' atetcha'ca'ye oterranet:
“Sa'cohuenetyes toñ allcha' oñmos Partsesha' o'ch e'ñe
sa'pačharretyesoñ pa'tep.”

²⁴ Ñehua, ñeñt amñarettatsa Juanesho, ñetpa' añca'ye mueñenahuet ñeñt fariseonesha' ñeñtara judionesha' pa'mcha'tareternesha'. ²⁵ Ñetñapa' alla otereterr Juan:

—Arep'a't Cristoyaypepa' eso'maruañaca'yeña ppatenña Yomporecop, arepa't Elíasoyaype, arepa't añeyaype ñeñtcha' a'mterre' Yompor po'ñoñ.

²⁶ Juanñapa' atet oterraneterr:

—Napa' ama't napatyen Yomporecoppa' e'ñeca'ye oñochaya napatyenanet. Tarraña o' chap sesho po'psheñeñ ñeñt ello atarr sherbets, tarraña sapa' amaca'ye señotheña sa.

²⁷ Ñapa' ama'tcha' chenta huapapa' ñapa' ñeñtca'yeña ello atarr sherbets; nañapa' ama es nesherbena attoch ama't po'sapatrečhapa' o'ch nepyanpes.

²⁸ Ñehua, allpa' atetca'ye penet all oteñet Betábara allara Jordanaso yonita'n tarro'mar Juanpa' allca'ye apatyenanña acheñenesha' Yomporecop.

Jesuspa' ñeñt atma'ntataret carrnero ñeñt amtsarettatse't ochñartsocop

29 Tsapatña Juan allempo entapan Jesús ñeshonẽ en, ñaña'pa' atẽ otan acheñenesha':

—Añca'yeña ñeñt o' llesenserr Yompor ñeñtcha' Po'carrneror pen, ñach yahuanmañperre' yo'chñar allohueney ñeñtey añe patsro'tsa'yeney, tarro'mar ñach rromuerrets yo'chñarecop atẽtcha' perra atẽ amtsareftena carrnero ochñartsocop. 30 Añmapa' ñeñtca'yeña notase't ahuaña: “Ñeñtcha' huapatsa chenta'pa' ñapa' atarr ahuamencatesha', ñaña'pa' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña'pa' eñalla.” 31 Ama't na ahuañmo'chapa' ama neñoteñe esesha'te'ña ñeñtcha' huapatsa chenta' ñeñtcha' Cristoterrets. Tarraña napa' añecpaña nohuena nach apatyenomue' acheñenesha' oño, attochña norrtaterrñañ israelena'tarneshacop ñeñt po'ño'ch Puechemer pen Yompor.

32 Allempoña Juanpa' eñotatan acheñenesha' ñapa' atẽ otanet:

—Na ahuaña allempo napata' Jesúspa' Yomporña Puecamquẽ e'ñe atẽ nenta' ñerra'mrrate' yep o' sohua'nma entot, chap e'ñe Jesúsesho. 33 Ama't allempo napa' ama neñoteñe ñeñt'e'ña Yompor Puechemer tarraña Yompor ñeñt o' llesenserren attoch napatyes acheñenesha' oño, ñapa' atẽtca'ye otenen: “Esempoch pent o' sohua'nma Necamquẽ o'ch chap e'ñe ñesho ñeñtcha' chorrosaya, ñapa' ñeñtcha'ca'yeña chorraterrahuetña Parets Puecamquẽ.” 34 Na po'ño'chpa' o'ca'ye neñch ñeñto'mar te'pa' neñotatenes ñeñtca'yeña Yompor Puechemer.

Ñeñt ñanom pueyochresha' pa' Jesús

35 Tsapatña'pa' po'pocheño all ten Juan epuet epsheña pueyochresha'. 36 Cohuanan Jesús all chopeñe'chen a'yenet, alla otterraneterr:

—Añca'yeña ñeñt Po'carrneror pen Yompor.

37 Ñeñtña epsheña pueyochresha' allempo e'met atẽ oteñ Juan, ñetña'pa' allenta cota'nmet Jesús. 38 Puetallesnomtsaña Jesúspa' entapanet cota'neñet chenta' ñaña'pa' atẽ otapanet:

—¿Eso'tña semnen?

Ñetña'pa' atẽ ochet:

—Maestro, ¿erra'tña pechap?

39 Ñaña'pa' atẽ otanet:

—Socterrenca'ye o'ch senteña'.

Ñetña'pa' allenta cota'neret Jesús o'ch enteñeta' all a'posa. Alla a'poset ñamet ñeñte yetro tarro'mar allempopa' o' mañamena o'ch ellerren.

40 Ñehua, ñeñtña epsheño'maret ñeñt e'mue' atẽ oten Juan ñeñt cote' Jesús, puesheñarr ñeñt'pa' Andrés ñeñt Simón Pedro

pa'mo'nasheñ. ⁴¹ Andrésñapa' allorocma ahuerr e'nerraya' Simón; o'ña entera'pa' atet otuerr:

—Yapa' o'ca'ye yenter Mesías. (Ñehua, ñeñña ñoñets Mesías añca'ye otenet ñeñcha' Cristoterrets.)

⁴² Andrésñapa' allenta anerran pa'mo'nasheñ Simón Jesúsesho. Jesúsñapa' cohuapue'pa' atet otaþ:

—Pa'tña Simón, ñeñteþ puechemer pen Jonás. Te'pa' ne-socherreþcha' Cefas (ñeñtara so'chñets ñeñt otenet griegaþo Pedro).

Atto Jesúsapa' chore'tan Felipe ñaña Natanael atoch puey-ochresha' perranet

⁴³ Tsapa'tña Jesúsapa' sechena o'ch ahuerr Galileo. Allña entuenan Felipe ñaña'pa' atet otueñ:

—Ama't pemno o'ch þoctenen.

⁴⁴ Ñehua, Felipepa'cho'ña galileo'marnesha', ña pa'netserpa' añ pa'so'cheñ Betsaida ñeñtara ñaña Andrés pa'netser ñaña Pedro. ⁴⁵ Felipeñapa' entuenan Natanaelpa' atet otueñ:

—Yapa' o'ca'ye yenter ñeñt ñocop quellquë't Moisés all ortatan ñoñets ñeñt atet anaret, ñaña ñocop quellquë't ñeñt a'mta'yesaye't Yompor po'ñoñ. Añepa'tca'ye Jesús ñeñt huetsa Nazareto't ñeñt José puechemer.

⁴⁶ Natanaelñapa' atet otapan Felipe:

—Nazareto'tpa' ama't ahua'tapa' amaca'ye huenoña ñeñt e'ñe cohuen acheñ.

Felipeñapa' atet otererr:

—Po'ñoçh orraca'ye o'ch penteña'.

⁴⁷ Natanaelpa' allenta ahuo' o'ch entenana' Jesús. Jesúsñapa' entapan Natanaelpa' ñaña'pa' atet eñora ñocop:

—Añca'yeña po'ñoçh puesheñarr israelnesha' ñapa' amaca'ye shequëno ama't mamesha.

⁴⁸ Natanaelñapa' atet otosan Jesús:

—Napa' ¿errotente'tña peñotenen? Amaca'ye pentarno.

Jesúsñapa' atet otererr:

—Allempo ama a'sechenþa' Felipe nesho, allempo þapa' alla þanen mañto higocho ñaña'pa' nenteneþca'ye.

⁴⁹ Natanaelñapa' atet otererr:

—Maestrocha' pepa'tña Yompor Puechemereþ. Pepa'tña Amcha'tare't ñeñt atarr cohuen allohuen israelnesha'.

⁵⁰ Jesúsñapa' otererr:

—Napa' o' notap napa' nenteneþ allempo þanen mañto higocho, ñeñto'marte'ña o' þame'ña'na. Te'ñapa' o'ch notas, elloña te'pa' nanaccha' senterrnan nepartsoña ñeñt ama tama sentennana'.

⁵¹ Jesúsñapa' alla otererr:

—Po'ñoçha' notenes, senterrcha' enet atorareŧ ña'ña Yompor po'millañoŧeñrenesha' a'ta'chenet ña'ña sohua'chenet e'ñe nesho, na Ñeñŧen Acheñetosets.

2

Allempo sena'ta puesheñarr yacma all anetso añ pa'so'cheñ Caná allara Galileo

¹ O'ña ma'pamuetuerr allempo çherr Jesús Galileo, allña anetso Caná atarr coshaprechet puesheñarr yacma ñeñŧ sena'tetsa. Jesúsña pachorpa' allo'tsen. ² Jesúsña epuet pueyochresha'pa' ñetpa'çho'ña ahua'ñareŧtet allcha' rrallme'chapreteneta'. ³ Allña'pa' çha huaña'pset vinos. Jesúsña'pa' atet och pachor:

—Te'pa' ama eñalle vinos, o'çha huaña'pset.

⁴ Jesúsña'pa' atet otan pachor:

—Achocha' eso'mare'tña atet p'otenenña na. Nocoppa' amaca'ye çhena' allempoch es norrtatyes.

⁵ Tarraña ama't atet otaña' pachorña'pa' atet otan ñeñŧ sherbets all:

—Ñerra'm errotencha' otas nechoyorpa' saña'pa' e'ñech atet sepa.

⁶ Ñehua, allpa' allo'tsen pechapña orrot mapyem. Ñeñŧña orroteçhnopa' tama ateshamerr, puenña'ttso orrotpa' ñato' sente' oñ epa galon amapa' ma'pate' galon sets oñ attoch chorreresua. Ñeñŧ orroteçhnopa' allecma nenet oñ alloña a'cohuentatena judionesha' Partsocop ñeñŧ atet anareŧtenet ñocpuet. ⁷ Allña'pa' atet otan Jesús ñeñŧ sherbets all:

—Te'pa' o'ch se'chorrayes oñ orroto.

Ñetña'pa' atetçho' pet e'ñe e'chorraresuahuet oñ.

⁸ Allempoña o' e'chorraresuetpa' Jesúsña'pa' atet otarraneterr:

—Te'ña'pa' o'ch seshe' coñe'tpa' o'ch sanem allo'tsen ane'tañ.

Ñetña'pa' atetçho' pet. ⁹ Allempoña ane'taña'pa' allenta amlan oñ ñeñŧ a'pnasareŧ vinos ñaña'pa' ama eñoche erroŧte' o' huapatetña vinos. Aña eñotene' ñeñŧ sherbenahuet all ñeñŧ etasote' oñ. Allempoña amlla'huan vinospa' ñaña'pa' allenta agotan ñeñŧ sena'tetsa. ¹⁰ Ñeñŧpa' atet och:

—Ñerra'm çho yorppa' añcha'ña ñanom yorrtat ñeñŧ e'ñe cohuen vinos. O'çhña yonuahue ahua'ñareŧ e'ñe cohuen vinospa' allempoçhña yapanet ña'ña ñeñŧ ama e'ñe cohue-nayaye. Tarraña paña'pa' amaña atteye' pepeno. Ñeñŧapa' çha'tña pañaño'tuaña vinos ñeñŧ e'ñe cohuen tayaño' porrtach. (Ane'tañña'pa' atet otan ñeñŧ sena'tetsa tarro'mar ñapa' ama eñoteñe.)

¹¹ All ñanom entatanet Jesús po'partsoñapa' ñeñt̃pa' arr Cano allara Galileo. Atfoca'yeña orrtatanetña Jesús po'partsoteña. Allempoña pueyochresha'pa' o' eñochet po'ñoche'pa't ñapa' Parets atfoña e'ñe ame'ñyet.

¹² Allempoña Jesús'pa' ahuo' Capernaumo pachore'na ñaña pa'mo'nasheñečno, ñaña allohuen pueyochresha'. Allña'pa' alla allponmateneta'.

Atto Jesús'pa' a'cohuentatosan Parets pa'paquëll

(Mt. 21.12-13; Mr. 11.15-18; Lc. 19.45-46)

¹³ Allempoña çhapmoch pascuapo allempoch alla cosherrerr judionesha'. Jesúsña'pa' ahuer Jerusaléño. ¹⁴ Allña Parets pa'paclopa' entuenan ñeñt̃ pomuene' po'huacsher, ñaña carrnero, ñaña yeḗ; ñaña ñeñt̃ cañya'yenahuet po'çllayoret'pa' ñet'pa'cho'ña alla anorrchenet. ¹⁵ Allña'pa' pellta'tosan apeçh pashtareçh. E'ñe matatuosan allohuen ñeñt̃ pomatsre'tyetsa Parets pa'paclo, e'ñe ahuanerret po'huacsher ñaña po'carrneroret. Ñaña ñeñt̃ cañya'yenahuet po'çllayoret'pa' e'ñe yo'patsetam̃pesuosanet po'çllayoret patso. E'ñe a'coye'tam̃pesuosanet all na'yenet po'çllayoret. ¹⁶ Allpa' atet otosan ñeñt̃ pomuene' yeḗ:

—Te'pa' sahanerr añ arrot. Amach atet sepatstono Nompor pa'paquëll atet ñerra'mrrate' ñeñt̃ e'ñe pocollenochaya allecma pomatsre'tyenet.

¹⁷ Allempoña pueyochresha'pa' allenta yerpuet ñoñets ñeñt̃ anaret ahuatoteñ ñocop, ñeñt̃pa' atet oten: “Napa' atarrcha' nempa'tonap̃ pepaquëll ama'tcha' ñeñt̃o'mare'na muetserrnetañ.”

¹⁸ Allempoña judionesha' pa'm̃cha'tareternesha'pa' atet ochet:

—Añña porrtatosnay pepartsoña allochña'pa' attochña yeñotaḗ po'ñoçhpa' papa' allsensareteḗ, te'ña'pa' atto'peposnayte' añečno.

¹⁹ Jesúsña'pa' atet oterraneterr:

—Sapa' ama'tcha' sa'matoñ añ Parets pa'paquëllpa' poma'pamtañoña napa' o'ch alla na'tomater.

²⁰ Judionesha'ña'pa' alla otereterr:

—Añ atto e'nuoñet Parets pa'paquëllpa' atarr atomat atorretta e'ñe pa'tatsoch çharrohua char puechena pechap. Ta', pañapa' çpo'ñoçhcha' e'ñech poma'pamtañoçma ye'pa' o'ch alla patomatuer?

²¹ Ñehua, Jesús'pa' añepa't otanet ña po'chets ñeñt̃epa't pa'paquëll pen Parets. ²² Ñehua, çhap allempo muetseret Jesús allempoña tanterrapa' pueyochresha'çhnoña'pa' allenta yerpuerret ñeñt̃ atet ote't Jesús allempo. Ñeñt̃o'marña allempo Jesús pueyochresha'çhno'pa' atarr yemterrñañet

Yompor po'ñoñ ñeñt anuaret ahuatoteñ, ama't ñaña Jesús po'ñoñ atarr ame'ñeret.

Jesús pa' e'ñe eñotueney allohueney ñeñt atet yoctape'chyen yeyochro

²³ Allempoña allo'tsen Jesús Jerusaléño, all coshapretenet pascuapo shonte' acheñenesha' enteññañet ñeñt atto orrtatenanet po'partsoña all, ñeñto'marña allpa' shonte' ame'ñaya.

²⁴ Tarraña Jesús pa' ama yemtanete'te ñet, tarro'mar ñapa' eñotanete't atet allohueney acheñey chocma yoctape'chyen ñeñt yemnen ya. ²⁵ Ñapa' ama e'nenano ama't puesheñarra ñeñtcha' ote' ñeñt atet yoctape'chyen allohueney acheñey. Tarro'mar ñapa' chocma eñoteney atet yoctape'chyen allohueney acheñey.

3

Allempo Nicodemopa' huapa Jesúsesho

¹ Allempopa' eñall puesheñarr yacma ñeñt fariseo ñeñt sochetsa Nicodemo. Ñeñtñaapa' puesheñarr ñeñt añcha'tarettetsa judioneshacop. ² Ñañaapa' huapa Jesúsesho tsapopa' atet otos:

—Maestrocha' yeñoteneþ papa' añ pellsensene' Yompor attoch peychatosey cohuen tarro'mar yapa' yeñoteñ añach orrtatyene' partsoteñets ñeñt ahuamencat pen Yompor.

³ Jesúsñaapa' atet otaþ:

—E'ñe po'ñoçh notañ, esesha'ch ama eñalleterrtso ello ñetñaapa' amach errotenot pueyochresha' perraneto Yompor.

⁴ Nicodemoñaapa' atet otererr:

—Amate' errotenot ye'ñallettererroña po'pocheñoña' o'ca'ye yepo'nme'ten. Errotenotuata'e'ñaca' yecherrerrña yachor pa'to atotcha' ye'ñallettererr po'pocheño.

⁵ Jesúsñaapa' atet otererr:

—E'ñe po'ñoçh noteneþ, erra'tsencha' ama eñalleterrtso oñoñ ñaña Yompor Puecamquëñoñ, amate' errotenot pueyochresha' perraneto Yompor ñeñto'marña amach eshec o'patapreteretoña Yompor po'cohuenña ñeñt atto ayochreshatena ña. ⁶ Ñeñt atto eñalletena arromñañenesha'pa' ñeñtpa' arromñaña. Tarraña ñeñtcha' eñallettertsa Parets Puecamquëñoñ, ñeñtpa' ñeñtña camuecñetsotets ñeñtñaapa' ama arromñañeshayaye. ⁷ Ñeñt atet noteneþ, “allohuenespa' añ sepalltena o'ch se'ñallettererr ello”, papa' amach cha pe'charrtatsto peyochro, amach cha þotatsto año'te' errotenot pe'ñallettererroña ello po'pocheño.

⁸ Ñeñtpa' e'ñe atet pena ñerra'mrrate' mïorr. Mïorpa' erra muene'pa' allcha' mïorraren. Pe'muente' atet ma'moreten,

ama peñoteñe errofite'ña huena ñaña errate'ña sen. Atetcha' perra ñaña allohuen erra'tsencha' eñalletertsa Yompor Puecamquëñoť.

⁹ Nicodemoñapa' alla a'pťo'tererr:

—Ñeñťpa' ¿errofena'tña añ?

¹⁰ Jesúsñapa' atet otererr:

—Papa' ama't aņepeñ israelnesha' po'maestror, ama't peñotenoña añ. ¹¹ E'ñe po'ñočh noteneņ: Allohueney ya ñeñť yeñotenpa' ñeñťcha'ña yeserrpare'ten ñaña ñeñť yentyenpa' ñeñťcha'ña ya'poten țarraña sapa' ama čhennasoña seyochro añ ñeñť ya'poten. ¹² Ñerra'm aña notenes ñeñť atet yeyčhena aņe patsro, saña ñerra'm ama same'ñennopa' errotenuate'ñaca'ye notasña ñaña ento'mar ñeñť Yomporecop.

¹³ 'Ama eñalle ama't puesheñarra ñeñťcha' a'tapuets ento ñaña ñeñťcha' sohuerrtsa ñeñťara entoť. Napťaña na Ñeñťen Acheñetosets ñeñťen sohuatsa entoť, napťa nentar Nompor pue'ntaño țarro'mar napa' ñeñť na'netser nepen. ¹⁴ Ñehua, ahuať Moiséspa' yečhcatan ñeñť atma'ntatareť shecheņ all amayo, ñeñťñapa' huanquë' tsachopa' o' echantaņpes enonet. Atto Moisés echantaņpsan shecheņ all amayopa', napa'čo'ña ñeñť poctetsa nocop atetcha' perrnet naña, corsochotcha' echantaņpsareten. ¹⁵ Allochñapa' allohuen ama't erra'tsena ñeñťcha' name'ñerraya na, ñetñapa' amach chenquërreto, e'ñech corretseta pocsheñeshocmañen e'ñe tayoteñ errponañohuen.

Atto atarr morrentenya Yompor allohueney acheñeneshay

¹⁶ 'Atto atarr morrentenya Yompor allohueney acheñeneshay arr patsro ñeñťo'marña apuey Puechemer ñeñť po'patror pen, allochñapa' allohuen ñerra'm esesha' ame'ñerraya ña amach chenquërreto, ñetñapa' corretsetach pocsheñeshocmañen e'ñe tayoteñ errponañohuen. ¹⁷ Yomporpa' amaca'ye aņecpaye' mueñanoña Puechemer arr patsro attoch mueñosan acheñenesha' coñcheñťso. Ñapa' aņecopña mueñe attoch ñach a'qeshpťatose'ña acheñenesha' arr patsro.

¹⁸ 'Erra'tsencha' ame'ñerraya ña ñetñapa' amach amñareťterreto coñcheñťso. Tarraña ñeñťcha' ama ame'ñerrayo ñocpuetñapa' anarettet attoch amñareťterret coñcheñťso țarro'mar ñetpa' ama ame'ñoñeto Yompor Puechemer ñeñť po'patror pen. ¹⁹ Ñaña'pa' o' huapa arr patsro attoch yečhatosey ñeñť e'ñe cohuen enten Yompor, attoña a'puetarsaņpsosnay yocťa'ña. Tarraña shonte' acheñenesha' ñetñapa' ama mueneto o'ch

a'puetarsam̄psarettet poctap̄ñet. Ñetpa' añña muenenet checmete' tarro'mar amaca'ye masosyaye' cotape'chyeneto. Ñeñto'marña ñetpa' attotcha'ña amñaretterret coñcheñtso. 20 Allohuen ñeñt ama masosyaye' cotape'chyeneto ñetpa' ama cohuenaye' enteñetoña Cristo ñeñt a'puetarsam̄pene' allohueney yoc̄tap̄ña. Ñeñto'marña ama eneto allo'tsen ñeñt a'puetarsam̄psañtetsa taye'to'te' orrtatarettet poctap̄ñet ñeñt ama masosyo. 21 Añña ñeñt e'ñe atet pene' ñeñt po'ñoçh cohuen enten Yompor, ñetpa' e'ñe pocte' enteñet o'ch onet allo'tsen ñeñt a'puetarsam̄psañtetsa tarro'mar ñetpa' añ muenenet o'ch eñotateret po'potantañ ñetpa' Yompor ahuamencañ penahuet ñeñto'marña ñetpa' añ orrtatyenet ñeñt cohuen enten Yompor.

Allempo Juan ñeñt apatañtetsa Yomporecop, ñapa' alla cohuentaterranerr Jesús

22 Allempoña Jesúsapa' ahuerrerr Judeo epuet pueyochresha'. Allñaapa' alla allponmat epuet pueyochresha'. Allña Jesúsapa' apatyesan acheñenesha' Yomporecop. 23 Ñaña allempo Juanpa'cho'ña arr apatyenan acheñenesha' all oteñet Enón e'ñe alla allame'tets Salimo, tarro'mar allpa' shonte' oñeçhno. Acheñenesha'pa'cho'ña shonte' huaçha'tyeset attoch apataretetyeset Yomporecop. 24 Ñehua, allempopa' ama yottam̄peñeta' Juan.

25 Allempoña Juan pueyochresha'pa' serrpare'tet epuet judionesha'. Allpa' añ serrpare'tatanna'tet este' poctetsaña attoch ya'cohuentataretta Partsocop, añte' ñeñt atto apatyen Juan amapa' ñato' añte' atto apatyen Jesús. 26 Ñeñto'marña ahuanmuet Juaneshopa' ñetñaapa' atet otoset:

—Maestrocha' ñeñt epaḡ ahuaña yon̄ita'n Jordanaso, ñeñt peserrpare'tatosey, ñapa'cho'ña ñepa'tca'yeña apatyets ñaña. Ñeñto'marña allohuenetpa' o'ca'ye ahuanmuet ñesho.

27 Juanñaapa' atet otapanet:

—Ama't puesheñarroḡeyapa' ama ahuamencateyayye ñerra'm ama Yompor ahuamencañ yeḡaye. 28 Sapa' ama't señoḡeñe ñeñt atet notuanmas ahuaña, napa' ama añeyayno ñeñtencha' Cristoterrets. Napa' atta mueñan nanom attoch nota. 29 Jesúsapa' e'ñech atet netma'ntacha atet ñerra'mrrate' yacma ñeñt sena'tetsa. Ñehua, ñeñt sena'tetsa ñeñtñaca'yeña aguëne'ña coyanesha' ñeñtcha' puetapor pa'. Tarraña ñeñtña pueyempa' ñeñt parro epuet ten ñerra'm añ e'm pueyem po'ñoñ ñeñt sena'tetsapa' ñañaapa' atarrcha' coshapretana pueyem. Ñeñto'marña na te'pa' atarr nocshapreteña Jesús. 30 Jesúsapa' e'ñe pocte' allo'nepa'ñaca'yeña enteñet po'ñoçhpa'

ñaca'yeña atarr sherbets. Nañapa' e'ñe pocte' allo'nepa'ña entennet napa' ama e'ñeye' nesherbena. Arrpa' allohua atet ot Juan Cristocop.

Atto yeñoteñ ñeñt huetsa entot Yomporeshot ñeñtca'yeña atarr sherbets

³¹ Ñehua, yeñoteñ ñeñt huetsa entot Yomporeshot eñchetepa' ñapa' atarrca'ye añcha'taret. Tarraña ñeñt patso'marnesha' ñeñtpa' alla eñorena patso'mar. Ñeñt huetsa entot Yomporeshot eñchetepa' ñapa' atarrca'ye añcha'taret. ³² Tarro'mar allohuen ñeñt entyen Pomporesho ñaña ñeñt allpon e'myen all, ñapa' ñeñtca'yeña serrpare'tateney, tarraña ama't pueheñarroñapa' ama eseshaye' chapahuetoña pueyoçhreto ñeñt atet otenanet. ³³ Ñeñt çhapa pueyoçhro ñeñt atet serrpare'tatenanet ñeñt huapatsa Yomporeshot ñetñapa' atet otet: Yomporpa' e'ñete' po'ñoçh atet oten Puechemerecop. ³⁴ Tarro'mar ñeñt llesensa' Yomporpa' Yomporo po'ñoño eñorena tarro'mar Yomporpa' ama atparetayaya chorratenanetoña Puecamqueñ. ³⁵ Yomporpa' atarrca'ye nanac muerenanaña Puechemer. Ñeñto'marña aphuahueñ allohuen allpon eñall allochñapa' ñach pomnaren penahuet. ³⁶ Eshesha'ch ame'ñenaya Yompor Puechemer ñetpa' corretsetach pocsheñeshocmañen tayoteñ ama't errponañohuen. Añña ñeñt atpare'tene' Yompor Puechemer ñetpa' amach enterreto ñeñt correñtsor. Ñetñapa' çhachca'ye coñchaterranet Yompor.

4

Allempo Jesús'pa' serrpare't epuet coyanesha' samario'marnesha'

¹⁻³ Allempoña Jesús'pa' atarr ayochreshatta nanac, ello metanenan atto yochresha'ten Juan. Ñaña atarr apatyenan acheñenesha' Yomporcop. Ñehua, ama ñaye' apatenahueto, aña apatenahueto pueyoçhresha'. Ñeñto'marña allempo e'mare'ch fariseonesha' ñeñtara judionesha' pa'm'cha'tareternesha'. Jesús'ña allempo eñoch atto fariseonesha' o' eñochet ña atarr nanac ayochreshatta, ñaña'ña' allenta queçhpa'nerran Judea, o' alla ahuerr Galileo.

⁴ Toñña'pa' e'ñe arr oñen Samario'mar, ñeñto'marña all oñerrña Jesús. ⁵ O'ña çhap Samariopa' allotñapa' o' ahuen paterr anetso ñeñt'pa' añ pa'so'cheñ Sicar. Añña anets Sicarpa' allame'ttso'tsena Jacob po'patseñ ñeñt apa'nman puechemer José ahuat. ⁶ Allña'pa' all poten oñ ñeñt po'ñeñ pe't Jacob. Jesús'ña'pa' nanac tsanom puechope'cheñot ñeñto'marña anorros e'ñe allame'tets apco'sato. Allempopa'

e'ñe pocto'tsen atsne'. ⁷⁻⁸ Allñapa' machayo'ta huapa puešheñarr coyanesha' ñeñt samario'marnesha' ñeñtcha' etenaya' oñ. Jesúsñapa' atet otaḗ:

—Napa' nemneñ o'ch ḗaposen oñ.

Ñehua, allempopa' pueyochrenesha'ñapa' o' ahuanmuet anetso o'ch rañteneta' ñeñtcha' rret.

⁹ Coyanesha'ña samario'marnesha'pa' atet otos:

—Papa' judioneshaḗpa' eso'mare'tcha'ña penamapuenña oñ o'ch napaḗ. Papa' peñotenen napa' ñeñten samario'marneshan.

(Ñeñto'marña atet otos tarro'mar judionesha'pa' ama amo'tstanneneto epuet samario'marnesha'.) ¹⁰ Jesúsñapa' atet otererr:

—Ñerra'm peñoteñeñ ñeñt e'ñe atta apueney Yompor, ñaña ñerra'm peñotenoñ na ñeñten ḗotene' ḗapuen oñ, ḗapa' o'ch penamuenoñ na nañapa' o'ch napospeñ oñ cohuen alloch e'ñe ḗocrañ.

Ñeñt oteñ o'ch aḗ cohuen oñ, añ oteñ Yompor po'cohuenña, tarraña coyanesha'ñapa' ama eñoch, ¹¹ ñeñto'marña atet otererr:

—Ama Ayochreshate pecheno alloch pet oñ. Oñpa' nanacramtso o'pono'tsen. Errotuamtsoch peyoraña oñ ñeñt e'ñe cohuen alloch e'ñe yocra. ¹² Ahuaḗ yatañ Jacoboñ ñeñt yapa'nmue' añ oñ ñapa' ñeñt orre't ñaña puechemerneshañ ñaña po'huacsherneshañ. Papa' añeḗhuate'ca'ye ñeñteḗ ello metanene' yatañ Jacoboñ atto amcha'tarete't ña.

¹³ Jesúsñapa' atet otererr:

—Allohuen ñeñt orrene' añ oñpa' elloch alla oñpa'terreterr. ¹⁴ Tarraña ñerra'm esesha' orre' oñ ñeñtcha' napanet na ama't ahuaḗapa' amach oñpa'terreto. Ñeñtcha' napanet na oñ, e'ñe pueyochretopa' puenasanetcha' atet ñerra'mrrate' allot poten oñ, amach huañerro ama't ahuaḗa. Attochña ñetpa' corretsetach tayoteñ ama't errponañohuen.

¹⁵ Coyanesha'ñapa' alla otererr:

—Ñeñteḗpa' Ayochreshate ḗapuen ñeñt oñer allochñapa' amach alla no'ñpa'terro allochñapa' amach alla nohuerre'te eterrayerr arr oñ.

¹⁶ Jesúsñapa' atet otererr:

—Te'pa' orrerreḗ, o'ch peçhore'tera' perrollar, allempochña alla pehuerra arr.

¹⁷ Coyanesha'ñapa' atet otererr:

—Napa' amarramtso arrollare'teno.

Jesúsñapa' atet otererr:

—E'ñe po'ñoçh atet ḗoten año' arrollare'teyaype. ¹⁸ Tarro'mar amnarsheña perrollareshe'mañ ñeñt

pueyoruarep̄. Ñaña ñeñt̄ peyorene' te'pa'cho'ña ama perrollareyaye. Ñeñtpa' e'ñe po'ñoçh atet̄ p̄oten.

¹⁹ Allempoña e'man atet̄ oteña' coyanesha'ñapa' atet̄ otererr:

—Ayochreshate, te'ña po'ñoçhpa' o' neñotaḡ p̄apa' añepepa't ñeñteḡ a'mtene' Yepapar po'ñoñ. ²⁰ Yatañneshañ samario'marnesha'pa' ñetpa' concorpuete't ma'yochatset arr añ aspen̄tero. Tarraña sa ñeñtes judioneshaspa' sapa' cha soten añ paterr poctetsa Jerusaléño'chña yeconcorpuena' allohueney.

²¹ Jesúsñapa' alla otererr:

—Noçheshacha' p̄ame'ñona ñeñt̄ atet̄ noteneḡ tarro'mar te'pa' o' çhap ñerra'm esempoch sema'yocheña Yompor, ama sepallteno o'ch seconcorpuena Apa añ aspen̄tero ama't ñaña Jerusaléño. ²² Saña ñeñtes samario'marneshas añ semchatse'tyen ñeñt̄ ama señoteno. Yaña ñeñtey judioneshay añ yeconcorpana'tena ñeñt̄ e'ñe po'ñoçh yeñoten, tarro'mar judionesha'pa' ñetpa' o' orrtateret ñeñt̄cha' a'queshp̄atañterrtsa. ²³ Tarro'mar te'pa' o' çhap ñeñt̄cha' e'ñe po'ñoçh aye'choçhtaterre' Yompor, arrcha'ca'ye aye'choçhtatoñet e'ñe ñet pueyoçhreto. Ñeñt̄cha' atet̄ aye'choçhtaterrñañet ñeñt̄ña e'ñe po'ñoçh atet̄ muenen Yompor. ²⁴ Yompor Paretspa' ñapa' ña camuecñetsotets amaca'ye entpahuoyaye. Ñeñto'marña ñeñt̄cha' e'ñe po'ñoçh aye'choçhtaterre' ña, arrcha'ca'ye aye'choçhtatoñet e'ñe ñet pueyoçhreto, ñeñtpa'cho'ña amaca'ye entpahuoyaye. Tarro'mar ñeñt̄cha' atet̄ aye'choçhtaterrñañet ñeñt̄ña po'ñoçh atet̄ muenen Yompor.

²⁵ Coyanesha'ñapa' alla otererr:

—Napa' neñoteñ añ Mesíaspa' huapach ñeñt̄ara ñeñt̄ yoten Cristo. Ñerra'm ña huapatsapa' e'ñech serrpare'tatuerrey ora allohuen ñeñt̄ esocmañen eñall.

²⁶ Jesúsñapa' alla otererr:

—Napa' naca'ye ñeñten peserrpare'tatene'.

²⁷ E'ñe allempo atet̄ otenpa' pueyoçhresha'ñapa' huaçherret. Ñetñapa' at̄ta cohuanrroretueret all serrpare'tatenan coyanesha'. Tarraña ñetpa' ama't puesheñarroçtapa' ama eseshaye' otuerraye ¿eso'tña pemnen? Ama't puesheñarroçetapa' ama otuereto ¿eso'mare't peserrparenña epaḡ coyanesha'? ²⁸ Coyanesha'ñapa' alla na'nerran porretpa' o' ahuerri alla pa'netsro. Allñapa' otuerran pamo'tsesha':

29 —Te'pa' socterren o'ch senteña' puesheñarr encaneshá' ñeñt' o' serrpare'tatuosen ora allpon ñeñt' atet ne'pa'yesara. Ñato' ñeñt'e'ña Cristotets ñeñt' atarr yecuen o'ch huapa.

30 Ñetñapa' allenta ona'cha'tet anetsotpa' o' ahuanmuet Jesúsesho. 31 Allempo ama 'cha'cheneta' ñesho pueyochresha'ñapa' atet otyeñet:

—Maestro ma'mate'tach rreñets.

32 Tarraña ñapa' atet otanet:

—Napa' nechencay'e ñeñt' nerrar nepen ñeñt'ña sapa' amaca'ye seño'teñe.

33 Pueyochresha'ñapa' atet otanna'tyeset:

—Amate' esesha' huapatoyeña puerrar.

34 Jesúsñapa' alla oterraneterr:

—Añca'yeña nerrar nepen o'ch ne'pa' atet muenen Nompor ñeñt' nellsensene', tarro'mar ñeñt'pa' attochña e'ñe netsotuoñ po'taruas. 35 Ama't sotenña sa: "Palltenmeñ pa'tatsña arorr o'ch e'ñe ya'yapa'cha'hua yenaremñ." Te'ñapa' o'ch notas: Te'pa' secue'ca'ye a'yo o'ch sentap shonte' acheñ ñeñt' ona'chets, o'ca'ye 'chap allempoch ame'ñerrnet. Te' ñetpa' e'ñeca'ye atet nentenanet ñerra'm yenarem'pa' o' pomella'huen o'ca'ye 'chap allempoch yap'cha'hue. 36 Ñeñt' ap'chets nocop ñeñt'pa' atsa'tarettetcha' ñeñt'cha'ña atarr coshaterrahuet. Ñaña allohuen ñeñt' ame'ñatenet ñetñapa' napanetcha' alloch e'ñe correrret tayoteñ ama't errponañohuen. Ñeñto'marña añ ñeñt' nare'tets ñaña ñeñt' ap'chets nocoppa' e'ñech parrocoma coshapretannenet, ama't ñeñt' ñanom epatue' neñoñ ñaña ñeñt'cha' torratta chenta' ñeñt' nocop. 37 Tarro'mar ñeñt'pa' e'ñe po'ño'ch atet yepena ñeñt' atet oten añ ñoñets ñeñt' 'chocma yotanna'tyena ya: "Puesheñarrpa' o'ch nare'tatse'tyes, po'psheñeñña' ñeñt'cha' ap'cha'yesets." 38 Ñaña sapa'cho'ña o'ch nemñas samña o'ch same'ñatera acheñenesha' ama't ama sanmaye' ñanom torratto all nocop, po'psheñeñña ñeñt' ñanom torrattse't all. Tarraña te'pa' sach ame'ñaterrahuet attoch setorrapretera ñeñt' ñanom torrattse't all nocop. Te'pa' sach ap'cherrets all ama't ama saye' nare'tatse'ttse'te all. Ama't po'psheñeñ nare'tatse'ttse't, te'ñapa' sach taruasapreterrahuet all.

39 Coyaneshapa' e'ñe po'ñoñoña ame'ñatana pamo'tsesha' samario'marnesha' allempo serrpare'tatuerranet atto Jesúsapa' o' serrpare'tatos ora allpon ñeñt' atet pue'pa'yesara.

40 Ñeñto'marña samario'marnesha' allempo hua'cha'tet ñeshopa' atarr nanac a'patare'tapet Jesús a'posanetepa'to' all pa'netsreto. Ñaña'pa' e'ñe epomta a'posa all.

41 Po'potantañe'chnopa' shonte' ñeñt' ame'ñapaya atto

serrpare'tatosanet Jesús all pa'netsreto. ⁴² Ñetñapa' atet oteñet coyanesha':

—Te'ñapa' ama e'ñe ña peñoñoŕeye' yame'ñeno. Te'pa' e'ñe ya e'muene' yaña allohueney. Ñeñto'marña te' yapa' o' yeñoŕ po'ñoŕ ñapa' ñach ya'qeshpaterre' allohueney ñeñŕey añe patsro'tseney.

Puesheñarr yacma ñeñŕ sherbene' añcha'tareŕ ñeñŕña puechemer a'crraterrña Jesús

⁴³ Allempoña epomta'muen Samario Jesúsñapa' o' alla ahuen Galileo all pa'ney peñ ña. ⁴⁴ Tarro'mar e'ñe po'ñoŕ atet eñorena Jesús ñocop, ñeñŕpa' atet ot: Ñeñŕña a'mŕtene' Yompor po'ñoñ pa'nyo'marnesha'ñapa' ama't mameshapa' ama mecha'na'teñeto. ⁴⁵ Allempoña çherrerr Jesús Galileo allohuenña galileo'marnesha'pa' e'ñe cohuen agapapueñet tarro'mar ñetpa' e'ñe entuoñet allohuen ñeñŕ atet ña'yesos Jerusaléño allempo entapreteneta' pascua all. Ñetpa'çho'ña allempopa' all ahuanmuet ñamet o'ch entapreteneta' pascua.

⁴⁶ Jesúsñapa' alla ahuererr po'pocheño Cano e'ñe allara Galileo all e'ñe ñanem a'pnasenana' oñ vinos. Allñapa' allo'tsen puesheñarr ñeñŕ sherbene' añcha'tareŕ. Ñaña puechemerpa' çha atсна'ten all anetso Capernaumo. ⁴⁷ Allempoña e'mare'tan Jesús o' huapa Judeot o' çhenerr Galileo, ñañaapa' allenta ahuo' o'ch enteña' attoch oteña' coterepa' pa'pacillo attoch a'crraterrñaña' puechemer, o' rromamoch. ⁴⁸ Jesúsñapa' atet och:

—Ñerra'm ama nentatasñe nepartsoña ñaña ñeñŕ ama sentarepa' amate' same'ñennañe.

⁴⁹ Ñeñŕña sherbene' añcha'tareŕpa' o' alla otererr:

—O'ch Ayochreshate pŕcterren tayepa'tñapa' ama rromuena' nacñe'ter.

⁵⁰ Jesúsñapa' atet otererr:

—Te'pa' ahuerreŕ, pechemerpa' o'ca'ye alla correrra.

Yacmañapa' e'ñe ame'ñana Jesús po'ñoñ ñeñŕ atet och, ñañaapa' allenta ahuer. ⁵¹ Allempoña ahuen toñoñaapa' poctenan pueñañresha'. Ñetñapa' atet otapueñet:

—Pacñe'terpa' o'ca'ye correna.

⁵² Ñañaapa' allenta otapanet:

—¿Esempo'tña pasateñ?

Ñetñapa' atet otereterr:

—Ellerro allempo coyatse'ten atsne' mame'pa' allempoca'yeña metueñña po'urateña.

⁵³ Allempoña pomporpa' o' yerepya ñañaapa' atet ot:

—Ellerropa' allponca'yeña atsne' otenña Jesús nechemerpa' o'ca'ye correrra.

Ñapa' ñeñña ame'ñate' ama't ñaña allohuen pamo'tsesha' ñeññ parro pa'paclo'tsa'yenet e'ñe ame'ña'huet ñamet.

⁵⁴ Arrpa' atto puepocheño Jesús'pa' entatanet po'partsoña allempo huapa Judeot o' alla çherrerr Galileo.

5

Atto Jesús'pa' a'crraterran puesheñarr atsnañet all Betesdaso

¹ Allempoña o' alla çherrerr allempoch alla cosherrerr allohuen judionesha' ñeññ atet anaretet ñocpuet. Jesús'ñapa' alla ahuererr ñaña Jerusaléño. ² All Jerusaléño e'ñe allame'tets allotecma a'be'teñet carrnero allñapa' allo'tsen oñ apco'sattataret ñeññ sochen hebreonesha' po'ñoño Betesda. Ñeññ'ñapa' eñall amnar puecha'petar. ³ Allña puecha'petaro'tpa' shonte' atsnañetnesha' ñeññ pena'rrartetsa all —ñeññ aporo'yete'chno ñaña ñeññ che'ca'repa'chno ñaña ñeññ echarretyetsa. Ñet'ñapa' añ cohuenet ñerra'm esempoch pelle'llchena oñ. ⁴ Tarro'mar ñerra'm esempoch pelle'llchena ñeññ oñerpa' mellaño'teño'ch sohuetsa all o'ch pelle'llchatosan oñ. Ñerra'm esesha' ñanom esha'tostsa all oño allempo pelle'llchena ñeñña atsnañeterpa' acrrerrochayo'ch, ama't erra'tsena atsnañtsor rromuenahuet. ⁵ Allñapa' allo'tsen puesheñarr yacma ñeññ ma'poch çharra' puechena posoc char atsna'ten. ⁶ Allempoña entos Jesús alla ñanena ñaña'ña' eñotos shonte' char atsna'ten ñeñño'marña atet otos:

—¿Ama't pemno o'ch pocrerra?

⁷ Atsnañet'ñapa' atet otan Jesús:

—Amaca'ye Ayochreshate eñalle ñeññ'cha' neshate' oño allempo pelle'llchena. Napa' o'ch taya ahuen po'psheñeñña' ahua'tcha' esha'tosa ñanom.

⁸ Jesús'ñapa' atet otererr:

—Te'pa' o'ch notosep: Petantena, pechta'nen allo pemuen, pechope'chen tayecma.

⁹ Yacmañapa' allorocmuepa'tcha' correna, ñaña'ña' allenta chetenan allo muenpa' allenta chope'chnen. Ñehua, ñeñña yetropa' allempo amesen judionesha'. ¹⁰ Ñeñño'marña judionesha'pa' atet ochet ñeññ o' correrra:

—Te' aña yetro allempocma yamesen. Amaca'ye pocteyaye o'ch ñanen pemue'.

¹¹ Tarraña ñapa' atet otanet:

—Ñeññ o' a'crratosenpa' atet'ca' otosen: “Pechta'nen pemue'pa' pechope'chnen.”

¹² Ñet'ñapa' allenta a'pto'chet:

—¿Esesha'tña p̄otose'ña, “O'ch pechta'nen pemue'pa' o'ch pechope'chen”?

¹³ Tarraña ñeñt̄ a'crratare'tterrtsapa' ama eñoteñe esesha'te'ña a'crraterre' tarro'mar Jesús'pa' ama allo'tsenaro, ñapa' o' ahuerr a'nahua, tarro'mar all shontosa acheñenesha' ñeñt̄cha' entenaya'. ¹⁴ O'ña atarr o'chetpa' Jesús'ñaapa' alla enterran ñeñt̄ a'crraterr ñorra' e'ñe alla Parets pa'paclo. Allñaapa' atet oter:

—Te'pa' o' p̄ocrrerra. Te'ñaapa' amach alla p̄o'chña'tatsterrerro ñato'rraña alla nanac pemuero'chterrerr.

¹⁵ Yacmañapa' o' ahuerr, atet otuerran judionesha':

—Jesúsepa'tca'yeña ñeñt̄ na'crraterre'.

¹⁶ Atet pena Jesús a'ñe yetro allempo amesen judionesha' ñeñt̄o'marña ñetpa' o'pateñet Jesús. ¹⁷ Jesús'ñaapa' atet otanet:

—Nomp̄or e'ñe teme'ttsen atarr torrena ñeñt̄o'marña napa'cho'ña atarr nemneñ o'ch ne'torra naña.

¹⁸ Ñeñt̄o'marña judionesha' pa'm̄cha'tare'ternesha'pa' ello atarr nanac o'pateñet o'ch muetset, tarro'mar ñetpa' atet otye'set:

—Ñapa' ama ñap̄faye' a'ñe yet̄er o' puesuerro allempocma yamesen, ñapa' a'ñe'naña oten e'ño' Pomp̄or penan Parets, ñapa' at̄taca'ye mueneñ o'ch Partsocoptartena.

Atto atarr ahua'mencattena Jesús ñeñt̄ Yomp̄or Puechemer

¹⁹ Jesús'ñaapa' atet oterraneterr:

—E'ñe po'ño'ch notenes, na ñeñt̄en Puechemer pen Yomp̄or amate' errotent̄ es ne'poña e'ñe nota. Napa' añña atet ne'pa'yen atet nenteññañ Apa, tarro'mar ñeñt̄ atet pen Apapa' napa'cho'ña ñeñt̄en Puechemerenpa' atet'cha' es ne'pa'yen naña. ²⁰ Apapa' atarr muerenna tarro'mar napa' e'ñeca'ye po'ño'ch Puechemeren, ñeñt̄o'marña gatyenen ora allohuen ñeñt̄ atet pa'yen ña. Elloña ñapa' añ gatyenen ñeñt̄ nanac torrapotyets ñeñt̄ atet etsotayen ña; ñeñt̄pa' añecop atet pennan attoña sapa' atarr'cha' secuanrrortenen. ²¹ Ñehua, yeñoteñ Apapa' tantaterran arromña'fenesha'pa' apuerranet allochña ñetpa' corretsetach.

Napa'cho'ña e'ñeca'ye atet nepenaña naña ñeñt̄en Puechemeren. Ñerra'm̄ erra'tsencha' nemna' na o'ch napanet allochña ñetpa' corretsetach atet'cha'ca'ye napuerranet.

²² Apapa' ama't puesheñarrapa' amach a'metam̄perraneto errotent̄cha' entyesuerranet. Naña apuen llesens ñeñt̄en Puechemeren nachña a'metam̄perrahuet errotent̄cha' nentyesuerranet e'ñe puesheña'ttset. ²³ Allochñaapa' at̄tochña allohuenet mecha'na'tennetcha' naña ñeñt̄en Puechemeren e'ñe atet mecha'na'tennanet Nomp̄or Parets. Ñerra'm̄

essha' ama nemcha'na'tenaye na ñeñten Puechemeren, Nompore'naca'yeña ama mecha'na'teneto ñeñt nellsensene'.

²⁴ 'Napa' e'ñe po'ñoçh atet notenes: Ñerra'm essha' e'mñote' neñoñ ñaña ñerra'm yemterrnanet Nompore' ñeñt nellsensene' ñetñapa' corretsetach pocsheñeshocmañen tayoteñ errponañohuen. Amach a'coñchatarefterreto ama't errponaña. Tarro'marña ñetpa' o' metanerretña ñeñt e'ñe po'ñoçh rromueñets, o' çherret allña ñetpa' corretsetach tayoten errponañohuen. ²⁵ E'ñe po'ñoçh o'ch noterrser: O' çherrmoch allempoch atet perra, ñeñt arromña'tenesha'pa' ñetñapa' e'muerrnanetcha' neñoñ ñeñten Yompor Puechemeren. Ñeñtcha' e'mñoterre' na neñoñ ñetñapa' corretsetach. ²⁶ Ñehua, Apapa' e'ñe ñoña correna, ña napuene'ña attoch napa'çho'ña corretsanach naña ñeñten Puechemeren. ²⁷ Ñaña ña napuene'ña llesens attoch nemñe patanta'tets acheñenesha' coñcheñtso, po'potantañña' amach nemñerraneto coñcheñtso. Atetca'ye allsensaretenña na Ñeñten e'ñe Acheñetosets. ²⁸ Ñeñt atet o' notuaspa' amach cha semoññe'tatsche tarro'mar esempopa' çherrcha' ama't ñeñt puepampro'tsa'yenpa' e'muerrnanetcha' neñoñ. ²⁹ Cha'nmaçherretcha' allot apamparettete't. Ñeñt atet pa'yesaye't e'ñe cohuen ñeñt poctetsa ñetñapa' añecopcha' tanterret attoch ello alla correrret. Ñeñtña pa'yesaye't ñeñt ama pocteyaye ñetñapa' añecpach tanterret attoch ello alla amñarefterret coñcheñtso.

Atto Jesús eñotatanet ñapa' Yomporeshot aparetta llesens

³⁰ 'Amate' errotenot es nepa'yesoña e'ñe nota. Atet eñotatenen Nomporpa' attochña nemñe patanta'tets acheñenesha' coñcheñtso, po'potantañña' amach. Ñaña errotencha' nentyesuerranetpa' ñeñtapa' e'ñe pocte' tarro'mar ama e'ñe na nemnenño'teye' es nepa'yeno. Nomporeña puemnenño't es nepa'yen tarro'mar ña nellsensene'. ³¹ Ñerra'm e'ñe nañeña a'potetsa, ñeñt atto na'potenapa' amate' es sherbeno. ³² Eñallña po'psheñeñ ñeñt e'ñe no Nompore' ñeñtña na'potene'ña na. Ñaña neñoteñ ñerra'm ña na'pote'pa' ñeñt atto a'potenen ñeñtña e'ñe po'ñoçh sherbets. ³³ Ñaña sa ahuañmo'chapa' semñe acheñ Juanesho ñeñt a'pto'tose' nocop. Juanña atto a'potanpa' ñeñtña e'ñe po'ñoçh atet. ³⁴ Napa' ama e'ñe nocpa ne'нено ñeñt na'pote'; añecpa'naña notenes sa ñato' sapa' same'ñoñate' Juan po'ñoñ atto a'potan na, allochñapa' attoch sequeshperra same'ñeñoten. ³⁵ Juanpa' e'ñe atet pe't ñerra'mrrate' lampareñ corretsa, attoña çhoyo'te't. Sañapa' sa muenatse't o'ch

socshame'ta mame' all a'puetarsañpsas. ³⁶ Tarraña atet na'poten napa' ñeñña nanac sherbets. Ello metanenan ñeññ atet a'potan na Juan. Allohuen es neña'yen ñeññ atet yehenna Apa o'ch e'ñe netsotoñ, añ netsotateña' ñeñña o' eñotatanet napa' Apa nellsensene'. ³⁷ Ñaña Apa ñeññ nellsensene' ñapa'cho'ña ñaca'yeña na'potene'. Sapa' ama't ahuatapa' ama se'maroneña po'ñoñ atet e'morrtena, ñaña ama sentareña atet orrtena ña. ³⁸ Sapa' ama't po'ñoñapa' ama chennasoña seyo'chro tarro'mar na ñeññen llesensen Apa, sañapa' ama same'ñenno. ³⁹ Sapa' añcha' setorra'yesa Yompor po'ñoñ ñeññ atet anuaret ahuatoteñ tarro'mar sapa' chate' sotenapañ e'ñe ñoñsochayotapa' sapa' corretsasate' errponohuañen. Tarraña Yompor po'ñoñ ñeññ anuaret ahuatoteñ ñeñña' naca'yeña a'pote't. ⁴⁰ Sañapa' amaña semnoña o'ch same'ñerna attochña e'ñe socrrerañ.

⁴¹ Tarraña napa' ama añeye' ne'nenno attoch aye'cho'chtatennan acheñenesha'. ⁴² Tarro'mar napa' neñotenes sapa' ama't mameshapa' ama semorrenteño Yompor ama't seyo'chra. ⁴³ Napa' atto nohuapa Nomporña nellsensene' tarraña sapa' amaña same'ñenno. Ñerra'm esesha'chña huapatsañ ñeññ e'ñe ñoña huena saña ñeñña' atarrte' same'ñyañ. ⁴⁴ Sapa' tarro'marña ama same'ñenno sapa' añaca'ye se'nen o'ch e'ñe sañeña aye'cho'chtatannetsa, amaca'yeña añeye'ña se'nenno attoch e'ñe cohuen entas ñapue't Yompor. ⁴⁵ Amach soctape'chatsche ñato' nach so'tteñe'cherre' esempohuañen Apuesho. Tarraña eñallca'yeña po'psheññ ñeñña'ch' so'tteñe'cherre' ñeñña' añca'ye Moisés, sañapa' ñeñña'ña atarr nanac seyemtena. ⁴⁶ Ñerra'm po'ño'ch same'ñeñañ Moiséspa' napa'cho'ña same'ñennañcha' tarro'mar ñapa' nocopca'ye quellconas. ⁴⁷ Tarraña ñerra'm ama same'ñeññaño ñeññ atet quellconase't ña, ñeñño'marña napa'cho'ña amach erro'teno't same'ñonoña naña neñoñ.

6

Allempo Jesús'pa' rratenan shonte' acheñenesha'; ñeñña' acheñenesha'pa' allo'tsen amnaroch mil
(Mt. 14.13-21; Mr. 6.30-44; Lc. 9.10-17)

¹ Allempoña Jesús'pa' ahuo' yom'ta'n sa'p Galileaso, ñeññara sa'p otenet Tiberias. ² Allñapa' cota'neñ shonte' acheñenesha' tarro'mar ñetpa' o' entuoñet po'partsoña atto a'crratyerran allohuen ñeññ atsna'tyets. ³ O'ña chap yom'ta'n Jesús'ña'pa' ahuos aspeno, allña anorros epuet pueyochresha'. ⁴ Allempopa' o' chapmoch pascuapo allempoch alla cosherrerr judionesha'.

⁵ Jesúsña cohuatsa a'yopa' entapan shonte' acheñenesha' ñeñt' onächets ñeshoneñ. Allempoñapa' atet otan Felipe:

—Errahuachca' yerañña pante' ñeñt'cha' rros acheñenesha' ñeñt' o' hua'cha'ta.

⁶ Ñehua, Jesúsapa' e'ñe po'tomña atet ot tarro'mar ñapa' eñoteñ atetcha' pa. ⁷ Felipeñaapa' atet och:

—Ama't epoch çharroch çharra' denario* alloch yerañña panpa' ama't pueshmetatollapa' amate' rra'yeseto.

⁸ Pueyochresha'ña Andrés ñeñt' pa'mo'nasheñ Simóm Pedropa' ñañaapa' atet och:

⁹ —Arr puesheñarr huepueshachorpa' echenanca'ye amnar pan ñeñt' cebada ñaña epa cac. Attapa' amate' yepataneto, acheñpa' shonte'ca'ye.

¹⁰ Jesúsñaapa' atet otanet:

—Te'pa' sotanet anorrcha'tetepa'.

Ñehua, allpa' e'ñe cohuen emmo'raten pasetma'. Ñetñaapa' anorrcha'tet. Yacmanesha'pa' ñato' amnarochte' mil eñall.

¹¹ Jesúsñaapa' chetan panpa' parasyoso'tam'pes, allempoñapa' apan pueyochresha'. Pueyochresha'ñaapa' epatyaset allohuen acheñenesha' ñeñt' anorrçhets all. Attecma pa allempo apa'yesanet ñaña cac. Allohuenetpa' e'ñe agaphuahuet ñeñt' allpon muena'yeset. ¹² Allempoña o' rrallme'chuetpa' allohuenetpa' e'ñepa'tcha' yetrra'tuahuet. E'ñe yetuahuetpa' Jesúsñaapa' atet oterranerr pueyochresha':

—Te'pa' o'ch sa'yapa'çherr ñeñt' shotna'tyets ñeñt' sa'pchatyets allochñaapa' amach es pertatso.

¹³ Allempoña a'yapa'çherret ñeñt' shota'tatyaset çhepa'tcha' chorrats çharra' puechena epa cañter ñeñt' a'pchatet all rratanet amnar pan cebada. ¹⁴ Atto orrtatanet po'partsoña acheñenesha'ñaapa' atet otyeset:

—Aña po'ñoçhpa' ñeñt'ca'ye a'mtene' Yompor po'ñoñ ñeñt' atarr yecuen o'ch huapa aña patsro.

¹⁵ Jesúsñaapa' eñotanet ñetpa' añ muenenet o'ch huapoñetpa' o'ch rromoset o'ch noset ñeñt'cha' pa'm'cha'tareter pet. Ñeñto'marña Jesúsapa' a'nahua ahuer all aspeno e'ñe ñapuëñ.

Atto Jesúsapa' e'ñe cohuen chope'çhnen enot oño

(Mt. 14.22-27; Mr. 6.45-52)

¹⁶ Allempoña ellerren pueyochrenesha'ñaapa' ahuanerret sa'patopño. ¹⁷ A'ta'cha'tuerret po'noñtopa' o'ch ahuan'perret yon'ta'n, Capernaumoneñ. Allñaapa' alla checmetam'pset. Jesúsñaapa' ama huerra' all allo'tsa'yenet. ¹⁸ Allñaapa' orrnotam'pesnomuet, sa'pñaapa' cha emo'yarerta. ¹⁹ Ñetñaapa'

* 6:7 Denariopa' quelle ñeñt' allpon tsa'tenet pamtarr ñeñt' taruaset all pa'nyo.

echothnomuet sa'p amnar amapa' pechapte' kilómetro allñapa' machayotepa'tcha' entapet Jesús chope'chnen enot oño. O' allame'ttsañña pan noñt. Ñetñapa' chepa'tcha' mecha'tapet. ²⁰ Tarraña ñapa' atet otosanet:

—Naca'ye o' nohuapa, amach atta semñcha'tatstapno.

²¹ Ñetñapa' mueneñetañ o'ch agapapet noñtot, eñotostsetpa' o' chapña noñt yomña'n all sechenet.

Allempo acheñenesha'pa' e'nereta' Jesús

²² Tsapañña acheñenesha' ñeñt alla a'patsa yomña'n ñetpa' eñoteñet e'ñe patrpa noñt allo a'tacha't Jesús pueyochresha' ñaña Jesúsapa' enteñet amaca' a'tapo noñto epuet pueyochresha' e'ñe ñaptochayeta ahuanmuet. ²³ Tarraña noñtechñoñapa' chocma huachena Tiberiasot, o' chapuet allame'tets all rret ellerro pan ñeñt parasyoso'tampes Partsesha' Jesús. ²⁴ Allempoña acheñenesha' ñeñt allo'tsen ñetñapa' o'huañ eñchet Jesús pueyochreshohuen. Ñetpa'cho'ña allenta a'tacha'tet ñamet noñto, ahuanm̄set Capernaumonet, o'ch e'nereta' Jesús.

Jesúsapa' ña yocrram̄ yepen yecamquēñecop alloch e'ñe yocrrama

²⁵ Allempoña entoset yomña'npa' atet otoset:

—Maestro, ¿esempo'tña pecherrña pa arrma?

²⁶ Jesúsñapa' atet otapanet:

—Na po'ño'chpa' o'ch notapas, sapa' amaca'ye añecpaye' se'nenno atto o' norrtatonas nepartsoña. Sapa' añecpaca'yeña se'nenen atto o' nerratuas pan o' e'ñe seyetua. ²⁷ Te'pa' o'ch notas, sapa' amach aña sema'yo'chratsto yocrram̄ ñeñt e'nuapo'. Añcha'ña sema'yo'chra socrram̄ ñeñt ama e'nuapahuoyaye; ñeñtña alloch sapa' corretsasach socsheñeshocmañen e'ñe tayoteñ ama't errponañohuen. Ñeñtña socrram̄pa' nach sapuerre' Ñeñten Acheñetosets tarro'mar Apapa' o' llesenserren na Ñeñten Acheñetosets arr patsro.

²⁸ Acheñenesha'ñapa' atet otereterr:

—Errotenuachca' yepaña ñeñt cohuen enten Yompor.

²⁹ Jesúsñapa' atet oterraneterr:

—Ñeñt cohuen enten Yomporpa' o'ch same'ña'na na ñeñten llesensen.

³⁰ Ñetñapa' atet otereterr:

—Errotenuachca' pegateyña pepartsoña ñeñtcha' yentpa' attotcha' yame'ña'pa. Papa' esuañaca' petsoten. ³¹ Ya yatañneshañpa' rra'yese't ñeñt maná all amayo atetca'ye anua'ret Yompor po'ñoñ ahua'toteñ: “Rratyesanete't pan ñeñt apanete't Yompor pue'ntañot.”

³² Jesúsñapa' alla oterraneterr:

—E'ñe po'ñoçh o'ch notas: Ama Moisésoye' apahuete'teña pan ñeñt huetsa entoť. Naca'ye Nompom sapuene'ña ñeñt e'ñe po'ñoçh socrram̄ sepen. Añ socrram̄pa' entoťña huena. ³³ Naña socrram̄ sepen ñeñten o' apuerres Nompom, napa'cho'ña entoť nohuapa Yomporeshoť allochñapa' acheñenesha'ña arr patsropa' ñetñapa' corretsetach.

³⁴ Ñetñapa' atet otereterr:

—Ayochreshate yapa'cho'ña çhocmach ðapuey ñeñt corramets.

³⁵ Jesúsñapa' alla oterraneterr:

—Napa' na corram̄tsotets alloch e'ñe socrra. Esha'ch huapatsa nesho ñetña ama't ahuaťapa' amach alla cheporrerrete'te. Esha'ch name'ñerraya na ñetña ama't ahuaťapa' amach alla oñpa'terrete'te. Ñehua, ñeñťpa' añ notenes, esha'ch name'ñerraya na ñetñapa' çhocmach e'ñe cosherret pueyoçhreto, ama't ahuaťapa' amach alla es e'nerrete'te. ³⁶ Tarraña napa' o' notuas: Sapa' o' sentnoñ amaña same'ñenno. ³⁷ Allohuen acheñenesha' ñeñt o'patatenna Apapa' ñetñapa' ame'ñerrnetcha'. Esha'ch name'ñerraya ñetñapa' amach alla nehuapore'terraneto.

³⁸ Tarro'mar napa' ama añecpaye' nohuapoña entoť attoch o'ch aña atet neþos ñeñt nemnen na. Napa' añecopña nohuapa o'ch atet neperr ñeñt atet muenen Nompom ñeñt nellsenserre'.

³⁹ Ñeñťpa' atet muenen Nompom ñeñt nellsenserre': Amachña çha na'chencatereña acheñenesha' ñeñt ora allpon o'patatenna na, çhochña ello netantaterrñañ esempohuañen.

⁴⁰ Añmapa' ñeñtña muenen Nompom: Erra'tsencha' neñoterre' ñerra'm ame'ñerrnetcha' na ñeñten Yompor Puechemeren, ñetñapa' corretsetach pocsheñeshocmañen tayoteñ ama't errponañohuen. Ñetñapa' çhocmach netantaterranet esempohuañen.

⁴¹ Atto Jesúsapa' otenanet, “Napa' na corram̄tsotets ñeñten huapatsa entoť”, judionesha'ñapa' pocuana'teñoťet otatse'tyeñet. ⁴² Ñeñťpa' atet otyeset:

—Añmapa' añaca'ye Jesús, José puechemer, ñeñt pompor ñaña pachor e'ñeca'ye yechme'teñ. Te'ñapa' eso'mare'tña oten ñapa' entoto' huapa.

⁴³ Jesúsñapa' atet otanet:

—Sapa' amach atta sotatse'tanna'tyesatsto. ⁴⁴ Ama't esehapa' amach errotenoť ame'ñerrneto ñerra'm Nompom ñeñt nellsensene' ñerra'm ña ama cotape'chaterrahueto cohuen. Ñetñapa' netantaterranetcha' esempohuañen.

⁴⁵ Atet quellquë't ñeñt a'mtaye't Yompor po'ñoñ ahuať, po'quellcopa' atet anuaret: “Allohuenetpa' Yomporcha'ña

eñotaterrahuet.” Allohuen ñeñtcha’ e’ mñoterre’ Nompör attoch cohuen cotape’ chaterranet, ñetñapa’ nachña ame’ ñerret.

⁴⁶ ‘Ama’t eseshapa’ ama puentareto Apa. Napñaña na ñeñten huapatsa Yomporeshot nentarca’yeña Apa. ⁴⁷ E’ñe po’ñoçh notenes: Esesha’ch name’ñerraya ñetñapa’ corretsetach pocsheñeshocmañen tayoteñ e’ñe errponañohuen. ⁴⁸ Napa’ na corramtsotets alloch e’ñe socrra. ⁴⁹ Satañneshañpa’ ama’t rra’yesete’t ñeñt maná all amayo, ñetñapa’ o’ colla’huenet. ⁵⁰ Tarraña ñeñten sotene’ te’ ñeñtña e’ñe po’ñoçh socrramñ ñeñten huapatsa ento’t allochñapa’ esesha’ch rre’pa’ ñetñapa’ corretsetach tayoteñ e’ñe errponañohuen. ⁵¹ E’ñe po’ñoçh napa’ na ñeñten corramtsotets alloch e’ñe socrra ñeñten huapatsa ento’t. Ñerra’m esesha’ rre’ añ corrametspa’ ñetñapa’ corretsetach tayoteñ e’ñe errponañohuen. Añ corramets ñeñtcha’ nepomuerr na acheñenesacop arr patsro alloch e’ñe correnet, ñeñtpa’ añca’ye nechets.

⁵² Judionesha’ñapa’ ñeñto’maraçho’ es otanna’tyeset. Ñetñapa’ atet otyeset:

—Errotenotuachñaca’ apueyña e’ñe ña po’chets ñeñtcha’ yerra’.

⁵³ Jesúsñapa’ alla oterraneterr:

—Po’ñoçh o’ch notas, ñerra’m ama serrerrnano nechets Ñeñten Acheñetosets, ñerra’m ama sorrerrnano ñaña nerras, sapa’ amate’ errotenot socroña sa. ⁵⁴ Ñerra’m esesha’ rrene’ nechets ñaña ñerra’m orrennanet nerras, ñetñapa’ corretsetach tayoten e’ñe errponañohuen, tarro’mar nañapa’ netantaterranetcha’ esempohuañen. ⁵⁵ Tarro’mar nechets ñeñt e’ñe po’ñoçh corramtsotets; ñerraspa’çho’ña ñeñt e’ñe po’ñoçh orrpapo’. ⁵⁶ Ñeñtcha’ rrene’ nechets ñaña ñerra’m orrennanet nerras ñetñapa’ e’ñech parrocmatenet na, napa’çho’ña e’ñech neparrocmatenanet ñet. ⁵⁷ Apa ñeñt nellsensene’ ñapa’ ama arromñañeshayaye, ñaca’yeña napuene’ña atto napa’çho’ña corretsanach. Atet nepena naña, allohuen ñeñt pocrramñ nepene’ napa’çho’ña añ napuenanet attoch ñetpa’çho’ña corretsetach ñamet. ⁵⁸ Na ñeñten socrramñ sepen ñeñten huapatsa ento’t. Ama atteyayno ñerra’mrrate’ pan ñeñt rre’t satañneshañ ahuat. Ñetpa’ o’ colla’huenet. Esesha’ch e’ñe pocrramñ nepene’ ñetñapa’ corretsetach tayoteñ e’ñe errponañohuen.

⁵⁹ Arrpa’ allohua ñeñt atet yeçhatenan acheñenesha’ judionesha’ po’prahuo all Capernaumo.

Jesús po’ñoñ ñeñtpa’ alloch yocrrena tayoteñ errponañohuen

⁶⁰ Allempoña atet e'mueñet atet oten, shonte' pueyochreshačhnopa' atet otyeset:

—Añ ñoñetspa' amaca'ye e'ñeye' pocteyaye, amate' esesha' ame'ñayo.

⁶¹ Jesúsapa' e'ñe pueyočhro eñotanet čha otatse'tyen pueyochreshačhno, ñeñto'marña atet oterraneterr:

—Ñeñt atet notenespa' are't pocteye' senteñe. ⁶² Ta'm, ¿errotena'tcha' sotña ñerra'm po'ñočh sentennoñ na Ñeñten Acheñetsosets o'ch alla na'terreñ ento allot nohuapa ahuat? ⁶³ Yecamquëñ alloña e'ñe po'ñočh yocrrena. Yechetspa' ama't coñe'tapa' ama sherbeno. Neñoñ ñeñt neserrpare'tatenespa' e'ñe po'ñočh secamquëñecop ñeñtña po'ñočh alloch e'ñe socrra. ⁶⁴ Tarraña pantanta'ttsospa' amaña same'ñenno.

Ñehua, Jesúsapa' e'ñe allempoteñ eñotenan ñeñtcha' ama ame'ñerrtso. E'ñe eñotenan ñaña ñeñtcha' pomuerre'.

⁶⁵ Jesúsapa' alla oterraneterr:

—Ñeñto'marña napa' notase't, amach esesha' name'ñerrayo ñerra'm ama Apa coťape'chaterrahueto attoch coťerrnet.

⁶⁶ Allempoteña shonte' Jesús pueyochreshačhno puerračherret ñeshoťpa' o'huañ chopeñe'chenet parro.

⁶⁷ Allempoña Jesúsapa' atet otan pueyochresha' ñeñt čharrasheña puechena epa:

—Sapa'čho' ¿semneñe't o'ch sepurrerra saña?

⁶⁸ Simón Pedroñapa' atet och:

—Partseshacha', esesha'huate'ñaca'ye yocťa'. Paptaca'ye pechenña ñoñets attochña yapa' corretsayach tayoteñ erponañohuen. ⁶⁹ Yapa' o'ca'ye yame'ñaña. Yapa' yeñoteneť papa' pepa'tca'ye Cristotets, ñeñteť Yompor Puechemereť.

⁷⁰ Jesúsña atet otanet:

—Napa' naca'yeña sa'crrer'ña sa, čharrasheñas sepchena epa. Ñeñtña puesheñarrpa' ñeñtapa' oneñeñena'tar.

⁷¹ Ñehua, Judasocop atet eñora. Ñeñt Judaspa' ñeñt Simón Iscariote puechemer. Ama't ñeñt a'pchenahuetañ epa pueyochresha', puesheñarrpa' ñeñtcha' pomuerre'.

7

Ama't ñeñt pa'mo'nasheñnesha' pen Jesúsapa' ñetpa' ama eseshaye' ame'ñenayo

¹ Allempoña Jesúsapa' alla chopeñe'chyen e'ñe alla Galileo'mar. Ama mueno o'ch chopeñe'chen ñaña all Judeo'mar tarro'mar judionesha'pa' čha o'pateñet o'ch muetset. ² Allempopa' o' čherrmocherr allempoch cosherrerr judionesha'; ñeñtcha' cosherretterr añ pa'so'cheñ

Manatpuetsopo', ñeñt atet yeçhenet ñet. ³ Allempoña Jesús pa' atet och pa'mo'nasheñnesha':

—Te'pa' orrerreḗ arroḗ, ahuerreḗ alla Judeo allochñapa' peyochreneshaçhno ñeñt allo'tsa'yen o'ch ḗorratuerranet ñamet pepartsoña ñeñt atet peḗa'yena te' arrma. ⁴ Ñehua, ñerra'm yemneñ o'ch yorrra allohuenacoppa' ama't puesheñarroḗyapa' amachña a'nahua es yeḗa'yeno. Ñerra'm po'ñoçh ḗorratyen pepartsoña arrpa' ḗorrtaçhñaca'ye ñaña allohuen acheñeneshaçop añ patsro.

⁵ Ama't pa'mo'nasheñnesha'pa'çho'ña tarro'mar atet ochet ñetpa'çho'ña amaca'ye ame'ñeñeto. ⁶ Jesúsñapa' atet otanet:

—Allempo ñeñt poçtetsa nocop o'ch norrra allohuenacoppa' amaca'ye e'ñeye' çhena'. Tarraña socoppa' e'ñeca'ye poçte' çhocmaca'ye eñall. ⁷ Tarro'mar acheñenesha'ña añ patsropa' amachca'ye errotenoḗ e'moñe'tasoña sa, tarraña napa' çhocma e'moñe'tyennet tarro'mar napa' añca'ye neñotatyenanet ñeñt atet ḗatse'tyenet ñeñt ama poçteyaye. ⁸ Sapa' orras socshapretena'. Napa' e'ñe tayecmapa' amachca'ye neto coshapretatsa. Tarro'mar nocoppa' ama e'ñeye' çhena' allempoch e'ñe poçta'huona.

⁹ Atet otuanetpa' ñapa' alla a'pa mame' Galileo.

Allempo Jesús coshapretena' ñeñt otenet Manatpuetsopo'

¹⁰ Allempoña pa'mo'nasheñeçhnopa' ñetñapa' ahuanmuet coshapretatset. O'ña tama o'chetpa' ahuo' ñaña, tarraña ñapa' ama orrtenaneto, a'nahua coḗa'nenanet chenta'.

¹¹ Judionesha'ña all coshenetpa' ñetñapa' e'neñet atet otyenet:

—Ta'mca'ye çerro'tsente'ña Jesús?

¹² Allña acheñenesha'pa' shonte' eñosyenet ñocop. Patanta'tetspa' atet otyenet: “Ñapa' e'ñe cohuen acheñer”; po'potantañeçhnopa' atet otyenet: “Amaca'ye cohuenayaye, attaca'ye shecare'tyenan acheñenesha'.”

¹³ Ñetpa' atarr mecha'teñet judionesha' ñeñto'marña a'nahua atet otanna'tyenet.

¹⁴ O'ña patma'nma atto coshenet Jesúsñapa' be'ḗosos Parets pa'paclo, yeçhatosanet all. ¹⁵ Allña' epaye' cohuanrrorch judionesha'. Ñetñapa' atet otyeset:

—Ta', erroḗente'ca'yeña añ, ama't ama ayçhatarete quel-leçpa' atarrepa't es eñotyen.

¹⁶ Jesúsñapa' otanet:

—Ñeñt atto neyçhatyenes ñeñtpa' amaca'ye noyaye noctañña, ñeñtpa' Yomporoña poçtaḗña ñeñt nellensene'.

¹⁷ Ñerra'm esesha'ña muene' o'ch atet pet ñeñt muenen Yompor ñetñapa' eñochetcha' neyçhateña' Yomporo amaca'ye notaye' neñeno. ¹⁸ Ñerra'm esesha' e'ñe ñoḗota eñenpa' ñetñapa'

añach e'nenet o'ch cohuentateññañ acheñenesha' e'ñe ñocop. Añña ñerra'm esesha' e'nene' o'ch cohuentatenan ñeññ llesensene' ñapa' ñeññña eñetsña ñoñtso e'ñe po'ñoçh ama shequëñtsoyaye.

¹⁹ Ama't apasoña Moisés ñoñets ñeññ atet anaret. Tarraña ama't apaseñ, sañapa' ama't e'ñe puesheñarrofesapa' ama sephuenoña ñeññ atet oten añ ñoñets, ñeññepñapa' eso'mare'tña te'pa' semneñña o'ch semtsan.

²⁰ Acheñenesha' ñapa' atet otereterr:

—Papa' çhate' chorrenpa oneñeñ. Amarramche' esesha' po'patenayeña o'ch muetsapet.

²¹ Jesúsña'papa' alla oterraneterr:

—Napa' ama't parrocha norrtatonas nepartsoña añ yetro allempo yamesen saña allempopa' atarr secuanrroretnoñ tarraña sañapa' ama pocteye' senteñe. ²² Moisés'apa' apa'nmas ñeññcha' seyçha' attoch setsorrannena. Ñehua, po'ñoçh ñeññpa' ama ñanom Moisésoye' sapaye, ñeññpa' satañneshañe'naña seyçhatnomue' ahuatoteñ. Ñeñño'marña sapa' çhocmach setsorratenñ asheñorrofoll ñerra'm o'ch posocmata'muen ama't añ yetro allempocma yamesen çhocmaña setsorratenña asheñorrofoll. ²³ Atto sapa' setsorratenñ asheñorrofoll ama't añ yetro allempocma yamesen attoch amach satpueno ñoñets ñeññ atet anaret Moisésot, ñeññepñapa' eso'maruañaca'yeña se'moñe'tenenña na allempo e'ñe na'crraten puesheñarr acheñ añ yetro allempocma yamesen. ²⁴ Ñerra'm esempo senteñ po'psheññ ñeññ atet penpa' amachña ñeññoña sottene'chatsche año' cohuenaye' es yeçcateno. Chochña ñanom señoçh errotenñe'ña ñeññ po'ñoçh atet pena.

Atto Jesús'apa' eñotatanet ñapa' Yomporeshot huapa

²⁵ Patanta'tets jerusaléño'marnesha'pa' atet otyenet:

—Ta'm amate' añeyayeña ñeññ o'patenet o'ch muetsset.

²⁶ Ñapa'çho'ña allo'tsenepa't arr, atta ama es pueçheno eñosets, amaña erroteye'ña oteñeto. Ñato' tarro'marte'ña ama't añcha'tareñnesha'pa' o'ca'ye eñotuet po'ñoçh ñapa' ñeññca'ye Cristotets. ²⁷ Tarraña añpa' yeñoteñca'ye allot huena. Tarraña esepoch huapa ñeññcha' e'ñe po'ñoçh Cristotats ñapa' amach eseshaye' eñotapaye errotcha' huapa.

²⁸ Jesúsña' allempo yeçhaten Parets pa'paclo, ñapa' puerranarot atet otanet:

—Sapa' sechme'tennoñte', señotennoñte'ña na errotte' nohuapa. Tarraña napa' ama notaye' nohuapo, eñallña ñeññ nellense'; ñapa' e'ñe po'ñoçh ñerra'm errof ot, ama puenesho po'ñoñ. Ñeññña sapa' ama señoteñeña sa. ²⁹ Nañapa'

e'ñe neñoteñ, ñeshotca'ye nohuapa. Ñapa' ñeñtca'yeña nellenserre'.

³⁰ Allempocma atarr mueneñet o'ch rromuetañ tarraña ama esesha' rromaye. Tarro'mar ama çhena' allempo ñeñt poctetsa ñocop attoch rromuet. ³¹ Shonte' acheñenesha' ñeñt ame'ñaya. Ñetñapa' atet otyenet:

—Añte'ca'yeña po'ño'ch Cristo ñeñt yecuen o'ch huapa. Yapa' o'ca'ye orrtatosnay po'partsoña, amate' errotenoñ huapo po'psheñeñ ñeñtcha' ello metanose' po'partsoteña ñeñt atet entatyeney añ yacmar.

Allempo fariseonesha'pa' mueñet guardianesha' ñeñtcha' rromuenayañ Jesús

³² Fariseonesha'ñapa' e'mare'teñet shonte' acheñenesha'pa' e'ñe cohuen eñosyenet Jesúsocop. Ñeñto'mar ñet ñaña ñeñt pa'micha'tareternesha' pen allohuen judionesha' po'cornaneshar, ñetñapa' mueñet guardianesha' ñeñtcha' rromuenayañ Jesús. ³³ Jesúsñapa' alla oterraneterr:

—O' mameshaña e'ñe parro'tseney. O'chña mamerrerrpa' o'ch alla ahuerren allo'tsen ñeñt nellensene'. ³⁴ Allempoña ama'tcha' se'name'terrenpa' amach senterrno. Allcha' neserr napa' sañapa' amate' errotenoñ seçhapo.

³⁵ Judionesha'ñapa' atet otanna'tyeset:

—Ta', ¿errach taña añma ñeñto'mar amach yentere? Ñato' arrcha' ta griegoneshesho all parratse'tyen yamo'tsesha' o'ch yeçhatenana' griegonesha' all. ³⁶ Ta', ¿esté'ña añma ñeñto'mar atet oten: “Ama'tcha' se'nerrna'pa' amach senterrno; allcha' neserr napa' sañapa' amach errotenoñ seçhapo”?

Allohuen ñeñt ame'ñenaya Jesús, Parets Puecamquëño'pa' e'ñe pueñmateño'et pueyoçhreto atet penet ñerra'mrrate' allot poten oñ ñeñt atarr cohuen

³⁷ O' e'ñe huañmoch all coshena judionesha'. Añe yetro allempo nanac coshenet, Jesúsñapa' tomos all, puerranaroñ atet otosanet:

—Erra'tsente' acheñer oñpa'tets e'ñe pueyoçhreto, onetepa' nesho orretepa'. ³⁸ Ñeñt name'ñenaya na e'ñe pueñmateño'et pueyoçhretopa' atet pena ñerra'mrrate' allot poten oñ aton ñeñt atarr cohuen, tarro'mar ñeñt'pa' atet oten Yompor po'ñoñ ñeñt anuaret ahuatoteñ.

³⁹ Ñehua, añ ñoñetspa' añecop serrpare'ten Yompor Puecamquëñecop ñeñtcha' chorrerraya allohuen ñeñtcha' ame'ñerraya ña. Tarraña allempopa' ama apare'tteneta' Yompor Puecamquëñ, tarro'mar Jesús'pa' ama çhena' allempoch alla ahuer Yompor pue'ntaño allcha' e'ñe cohuentaterrñañet.

Allempo acheñenesha'pa' ellopa'tetstatenet poctaḗña Jesúsocop

40 Allempo e'mhuet ñeñt atet oten Jesús, patantarrña acheñenesha'pa' atet otyeset:

—Po'ñočh añmapa' ñeñt'e'ca'ye a'mtene'ña Yompor po'ñoñ ñeñt čhocma yecuen.

41 Po'potantañpa' atet otyeset:

—Añmapa' ñeñt'e'ca'yeña Cristotets ñeñt čhocma yecuen.

Po'potantaññapa' atet otyenet:

—Ñeñt'cha' Cristoterretspa' amate' arrota huapo Galileot.

42 Ama't otenoña Yompor po'ñoñ ñeñt anuaet, Davidcha' po'mrenñoť huapaña ñeñt'cha' Cristoterrets; arrotcha' huapa anetsoť ñeñt Beléñ ñeñt pa'netser peť David.

43 Ñeñto'marña allohuen acheñenesha'pa' ellopa'tetstatenet poctaḗña Jesúsocop. 44 Patanta'tetsñapa' atarr mueneñet o'ch rromuet, țarraña ama esesha' rromaye.

Atto judionesha' pa'mcha'taretnesha' ama ame'ñeñeto Jesús

45 Guardianesha'ñapa' puerračherret allo'tsen ñeñt pa'mcha'taretnesha' pen allohuen judionesha' po'cornaneshar epuet ñaña fariseonesha'. Ñetñapa' atet otarettapuerret:

—Eso'maruaña'yeña amaña sehuapatere.

46 Guardianesha'ñapa' atet otuerret:

—Ama't eseshapa' ama pueñosaroña atarr cohuen atet eñen ña.

47 Fariseonesha'ñapa' atet oterraneterr:

—Tarro'marte' ama sehuapatere sapa'cho'ña čhote'ca'ye shecapas saña. 48 Ama't ñaña patantarr añcha'taretnesha'pa' ama't o' čha ame'ñyeto ñamet. Ama't ñaña patantarr fariseonesha'pa'cho'ña o'te'ca'ye čha ame'ñyet. 49 Tarraña ñeñt acheñeneshar ñeñt ama eñotenaye ñoñets ñeñt atet anaret ñetñapa' a'cmaretet.

50 Ñeñtña puesheñarr fariseo ñeñt Nicodemo ñeñt tatsa ahuaña Jesúsesho, ñañapa' atet otan pamo'tsesha' fariseonesha':

51 —Ñoñets ñeñt atet anaret yocoppa' atet oteneý, amach

errotenoť yecoñchache ama't puesheñarra acheñ e'ñe attota. Chochña ñanom ye'mñoch attoch yeñoch este' otatse'tyen ñeñt atarr sosey yenten esheccha'ña yecoñchach.

52 Ñetñapa' atet ochet:

—Eso'maruachca' pemoñesyaña galileo'marnesha', ñato' ḗapa' galileo'marneshaḗte'. Papa' amarramche' galileo'marneshayape. Te'pa' pelleya'yes Yompor po'ñoñ

allochñapa' o'ch peñoç Galileotpa' ama't puesheñarrapa' amach huapoña ñeñtcha' a'mtene' Yompor po'ñoñ.

Allempo puesheñarr coyanesha' huapachet Jesúsesho ñeñt chetapretene' pacma puerrollar

⁵³ Allempoña allohuenet ahuanemyerret pa'pacleto.

8

¹ Jesúsñapa' ahuer Olivoño. ² Tsapaña po'pocheño e'ñe ahuatecma alla çhenerr Parets pa'paclo. Shonte' acheñenesha' alla huacheneterr ñesho. Ñaña' anorros allña yeçhatenaterr. ³ Ñeñña etsotayenayeñ ñoñets ñeñt atet anaret judioneshacop ñaña fariseonesha' ñetñapa' huapatoñet puesheñarr coyanesha' ñeñt rromuet all eñchet chetapretenan po'psheñeñ pacma puerrollar. Nosñañet e'ñe rroçho. ⁴ Allña' atet otoset:

—Maestro, añ coyanesha'pa' o' yentaprech e'ñe all chetapretenan pacma puerrollar. ⁵ Moisés po'ñoñ ñeñt atet anaret ñeñtpa' atet oteneý, añpa' çhoch yarrolle'ch. Te'ña þapa' çerrofe'tcha'ña þoteyña þa?

⁶ Ñeñtpa' tarro'mara atet otoset ñato'rraña eñorachet ñeñt ama pocteyaye allochñapa' attoch a'metamþeñeta'. Jesúsñapa' allenta mo'capa' o' quellcan pats potaþo. ⁷ Ñetñapa' alla a'þto'tereter. Jesúsña echanterrtsapa' atet otanet:

—Ñerra'm erra'tsenoteste' ama eñalle so'chñarpa' sarrolle'chca'ye sanom.

⁸ Alla mo'quërrerr o' alla quellquërranerr pats potaþo. ⁹ Ñetñapa' o' e'met atet otanet Jesúsapa' e'ñe acopoñeñ ahuanemhuerret e'ñe puesheña'ttset. Añ ñanom ahuanerrtsa po'nmenesachno, attotapa' o' ñapñaña Jesús epuet coyanesha'. ¹⁰ Jesúsña echanterrrrpa' atet otan coyanesha':

—Noçheshacha' çerro'tsa'yeneta'tña? Ama't puesheñarrofeta ñetpa' are'tcha'ña coñchatape.

¹¹ Ñaña' atet otan Jesús:

—Ama Ayochreshate eseshaye' necoñchatape.

Jesúsñapa' alla otererr:

—Napa'çho'ña amach necoñchatape. Te'ña ñerra'm ahuerþpa' amach allo'na atet peþa'nenno ñeñt ama't mamesha amã pocteyaye.

Jesúsapa' ña a'puetarsamþene' acheñenesha' poctapña aña pat-sro

¹² Jesúsña po'pocheñoapa' serrpare'taterranerr acheñenesha', ñeñtpa' atet oterraneterr:

—Napa' na ñeñten a'puetarsamþene' acheñenesha' poctapña aña patsro. Esha'ch nocterre' o'huañcha'

allo'na cotape'chatnenanet pockapña ñeñt atarr sosya'tsañ; ñeñtpa' checmeta chopeñe'chyenet. Ñetñapa' Yomporcha' po'cohuenño correrret ñeñtara ñeñt puetarets.

13 Fariseonesha'ñapa' atet ochet:

—Papa' pañeña a'potetsa ñeñto'marña atto pa'potenapa' ama sherbeno.

14 Jesúsñapa' oterraneterr:

—Tarraña ama't nañeña a'potetsapa' atto na'potenapa' e'ñe sherben. Tarro'mar napa' neñoteñ allot nohuapa ñaña neñoteñ allcha' neserr. Sañapa' ama señotenno allot nohuapa ñeñto'marña ama señoteñe allcha' neserr. 15 Sa sotatseña' e'ñe orrena atet sepena, arromñaateneshasa atet petsa. Napa' ama't puesheñarrapa' ama notatse'tenaneto e'ñe atta. 16 Tarraña ñerra'm esempo na'metenanet ñeñt atet nentapreyenanet ñeñtpa' e'ñe po'ñoçh atet tarro'mar napa' ama napteye' es neña'yeno, napa' chocmaña epan Apa ñeñt nellensene'. 17 Ñoñets ñeñt atet anaret ñeñt sechen sa, ñeñtpa' atet oten: Ñerra'm epsheña a'potene' e'ñe attecma ñeñtpa' e'ñeca'ye po'ñoçh otenet. 18 Napa' ñeñt atet na'potena na, Apaña ñeñt nellensene' ñaca'yeña na'potene'ña nocop.

19 Ñetñapa' atet otereterr:

—¿Erro'tsena'tña pa Pompor?

Jesúsñapa' atet oterraneterr:

—Ama't napa' ama señotenno, Apapa'cho' ama señoteñe. Ñerra'm señotennoñ na Nompore'nañe' señoteneñ.

20 Allempopa' atet otanet Jesús all allecma añño'tenet quelle ñeñt Yomporecop allempo yeçhatanet allara Parets pa'paclo. Tarraña ama't puesheñarra ama eseshaye'rromaye tarro'mar ama çhena' allempoch ñeñt pocketsa ñocop o'ch rromuet.

Allempo Jesús otanet allcha' serr ñapa' acheñenesha'ñapa' amach errotenot çhapueto e'ñe allempocma

21 Allempoña Jesúsapa' atet oterraneterr:

—Napa' o'ch ahuerren, sapa' se'nerrencha'. Sapa' orach ochñaretes serromhua. Allcha' neserrpa' sañapa' amach seçhapo.

22 Judionesha'ñapa' atet otanna'tyeset:

—Ta'm ñapa' o'ch muetsa ñañeña, ¿ñeñto'marte' atet oten allcha' serrpa' yañapa' año'ch yeçhapo?

23 Ñañapa' alla oterraneterr:

—Sapa' alla ayeçhcañas arr patsro. Nañapa' ento'marneshan. Sapa' patso'marneshasa, nañapa' ama patso'marneshayayno. 24 Napa' o' notas sapa' orach ochñaretes serromhua tarro'mar ñerra'm amach same'ñernno

na ñeñten peretnene' ochñarets, po'ñoçh sapa' orach ochñaretes serromhua.

²⁵ Ñetñapa' atet otereterr:

—Papa' po'ñoçh ¿eseshape'tña?

Jesúsñapa' alla oterraneterr:

—Napa' ñeñtenca'ye po'ñoçh çhocma sotene'. ²⁶ Atarr nanac palltena çhocmach notenes atet sepna sa, shonte'ch neños añecop atet nentyen. Tarraña ñeñt nellsensene' ñapa' e'ñe po'ñoçh atet oten ña. Napa' añca'yeña ne'ñoreññaña acheñenesha' arr patsro ñeñt atet ne'mueññañ Apa.

²⁷ Ñetñapa' ama esesha' çchaphueto pueyoçhreto ñeñt atet otenanet Pomporecop ñeñt atarr Parets. ²⁸ Jesúsñapa' alla oterraneterr:

—Ñerra'm esempoch sapa' sechantañpsen eno corsocho na Ñeñten Acheñetosetspa' allempochña çchaponasa seyoçhro napa' ñeñten e'ñe po'ñoçh çhocma sotene'. Chaponasach ñaña napa' ama es nepeno e'ñe nota, añña ne'ñorena atet yeçhatenen Apa. ²⁹ Ñeñt nellsensene' ñapa' e'ñe parro'tsenen. Ama a'montsenno, tarro'mar napa' e'ñe çhocma atet nepena ñeñt muenen ña.

³⁰ Allempo atet serrpare'tatenanet allempopa' shonte' ame'ñaya all.

Atto ñeñt puechemer pen Yompor ñetñapa' atarr cohueno'tsa'yenet; ñeñtña ama puechemer peno Yompor, ñetñapa' po'chñara taruasatenahuet e'ñe atta

³¹ Allempoña Jesúsapa' atet otan judionesha' ñeñt ame'ñenaya ña:

—Ñerra'm çhocma soçtape'chon neñoñ po'ñoçhpa' neyochresha'ch nepenes. ³² Allempopa' señoterrcha' ñoñets ñeñt e'ñe po'ñoçh Yompor po'ñoñ. Ñeñtña ñoñets po'ñoçhpa' torañperrescha' e'ñech cohueno'tsenes.

³³ Ñetñapa' atet otereterr:

—Yapa' Abrahamca'ye po'mrenñey. Ama't ahuata yapa' ama't puesheñarrotayapa' ama ehuanca'reteye attoch esesha' yetaruasate' e'ñe atta. Eso'marte' pañapa' p'oteneña atorampsareteyo'ch.

³⁴ Jesúsñapa' alla oterraneterr:

—Po'ñoçhca'ye notenes: Allohuen ñeñt ochña'tare'tetspa' po'chñara huanquënahuet, ñetñapa' po'chñara taruasatenahuet e'ñe atta. ³⁵ Ñeñt ataruasatare' e'ñe atta amach çhocmaye' yeçherro e'ñe parro' epuet pamo'mte'. Tarraña na ñeñten Puechemeren çhocma e'ñe neyçhena epan Namomte' errponañohuen. ³⁶ Ñeñto'marña na ñeñten Puechemeren ñerra'm na setoramperre' sapa' atorampsarettescha' e'ñe

po'ñooh, amach alla taruasaterrse'te so'chñar. ³⁷ Na po'ñoohpa' neñotenes sapa' po'mrenñeseñ Abrahampa' tarraña sapa' aña semnen o'ch semtsan. Tarro'mar neñoñpa' ama't mameshapa' ama chennaso sa seyo'chro. ³⁸ Napa' añ neñeñ ñeñt atet nentapreteñ Apa. Sapa'cho'ña aña atet sepen ñeñt atet se'mapreteñ ñeñt sompor sepen.

³⁹ Alla otereterr:

—Ya yatañpa' Abrahamca'ye.

Jesúsñapa' atet oterraneterr:

—Sapa' ñerra'm po'ñooh Abraham po'mrenñeseñ soctape'cheneñte' atet e'ñe cohuen cotape'che't Abraham. ⁴⁰ Tarraña sa te'pa' cha so'patenna o'ch semtsan na ñeñten seserrpare'tatene' ñoñets ñeñt e'ñe po'ñooh ñeñt atet ne'mueññañ Yompor. Abrahampa' amaca' atteye' pe'te. ⁴¹ Sapa' e'ñe aña soctape'chen atet pena sompor.

Ñetñapa' alla otereterr:

—Yapa' amaca'ye ellapnaneshoteye' ye'ñalleto. E'ñe ñapña Yompor yepen ñeñtara Parets.

⁴² Jesúsñapa' alla oterraneterr:

—Ñerra'm po'ñooh Sompor sepeñeñ Parets atarrte' semorrentennañ na tarro'mar napa' Partseshotca'ye nohuapa o' nechap arr. Napa' amaca'ye notaye' nohuapo, napa' Yomporña nellense'. ⁴³ Eso'mare'tña sapa' ama chennasoña seyo'chro ñeñt notenes. Ñato' tarro'marte'ña ama semno o'ch se'mñoten ñeñt atet notenes. ⁴⁴ Sapa' oneñeñaca'ye ñeñt sompor sepen. Ñeñto'marña sapa' aña semnen o'ch sepa ñeñt muenen sompor. Ñapa' ahuatoteñ e'ñe pa'motroteñ amtsañta. Ñapa' ama't mameshapa' ama eñora'penoña Yompor po'ñoñ ñeñt e'ñe po'ñooh tarro'mar ñoñets ñeñt e'ñe po'ñoohpa' amaca'ye atanenoña ña pueyo'chro. Ñerra'm cho eñorenapa', shequēñtsach eñorena tarro'mar ñapa' e'ñe shequēñtsa eñoten. Po'ñooh sequēñtspa' pomporca' penanña oneñe't. ⁴⁵ Tarro'mar napa' añ notenes ñeñt e'ñe po'ñooh sañapa' amaña same'ñenno. ⁴⁶ Ama't puesheñarrotesa sa, napa' amach errotent sotno napa' eñallo' no'chñar. Atto napa' añ notenes ñeñt e'ñe po'ñooh eso'mare'tña sañapa' ama same'ñenno. ⁴⁷ Erra'tsente' Yomporena'tarpa' ñetñapa' chochca'ye e'mñoteññañet Yompor po'ñoñ. Ñeñto'marña sapa' ama se'mñoteññañe po'ñoñ, amaca'ye Yomporena'tareyayso.

Allempo Cristopa' atet otanet: Allempo ama eñalletena' Abraham, nañapa' eñallana

⁴⁸ Judionesha'ñapa' atet otereterr:

—E'ñe po'ñoçh atet yoteneþ, þapa' samario'marneshaþ, oneñeña pechorrenaya.

⁴⁹ Jesúsñapa' oterraneterr:

—Napa' ama çoye' chorrenno oneñeñ. Napa' atarr nanac nemcha'na'teñ Nompör Parets. Sañapa' ama señcha'na'tenno na. ⁵⁰ Napa' ama añeye' ne'nenno attoch necohuentata nañeña. Eñallña ñeññ necohuentatene' na. Ña eñoretsa atet es entyen arr patsro. ⁵¹ Po'ñoçhca' notenes: Ñerra'm esesha' e'ñe cotape'cherre' neñoñpa' ñetña ama't ahuatapa' amach e'ñe poctacma rromuerreto.

⁵² Judionesha'ñapa' alla otereterr:

—Te'ña po'ñoçh yapa' o' yeñotaþ þapa' çha chorrenþa oneñeñ. Ama't Abrahampa' o' rromuen ñaña ñeññ a'mta'yese't Yompör po'ñoñ ñeñtpa'çho'ña o' colla'huenet. Te'ña þapa' atet þoteny esesho'ch cotape'cherre' peñoñpa' ama't ahuatapa' año'ch rromuerreto. ⁵³ Papa' çhate' þotenapañ ellote' penñtaneñ atto amcha'tarette't Abraham ama't ñapa' o'ca'ye rromuen. Ñeññ a'mta'yese't Yompör po'ñoñpa' ñetpa'çho'ña o' colla'huenet. Papa' çhate' þotenapañ amate' arromñañeshayaye.

⁵⁴ Jesúsapa' atet oterraneterr:

—Ñerra'm na cohuentatetsa nañeña, necohuentateña e'ñe napa' amate' es sherbeno. Nompörpa' ña necohuentatene' ñeññara ñeññ soteneñ Seyompör-ro' sepeñ saña. ⁵⁵ Sapa' amaca'ye señoñeñe ñarraña napa' neñoñeñca'ye. Ñerra'm na otetseñ ama neñoñeñe napa'çho'ña atteneñte' ñerra'm sa, çhate' neshcare'tensoñ. Napa' e'ñe po'ñoçh neñoñeñ ñeñño'mar çhocma noctape'cheññañ po'ñoñ. ⁵⁶ Abraham ñeññ sa satañpa' atarr nanac cosha allempo eñoçh o' çhap allempo ñeññ poctetsa nocop o'ch nohuapa arr patsro. Allempoña eñoçh napa' o' neçhap arr patsro atarr nanac cosha.

⁵⁷ Judionesha'ñapa' alla otereterr:

—Papa' ama peçhena' amnaroch çharra' pecharña þañapa' eso'mare'tña þotenyña þapa' pentero' Abraham, ñeñtpa' ahuatrramche' corre't.

⁵⁸ Jesúsñapa' alla oterraneterr:

—Po'ñoçhca' napa' o'ch notas: Ama eñalletena'ña Abraham, nañapa' eñallana.

⁵⁹ Ñetñapa' allenta chetet mapue'pa' o'ch rrolle'çhetañ ñarraña Jesúsña a'nahua çha'nerr Parets pa'pacloþpa' o' ahuerr o' sohuannerranet.

9

Allempo Jesúsapa' a'crraterran puesheñarr aporo'yet ñeññ atta eñalletña

¹ All oñen Jesús^{pa} allña entnoman puesheñarr yacma aporo'yet. Ñeñña aporo'yet^{pa} atta eñalletña.

² Pueyochresha'ñapa' allenta a'pto'chet:

—Maestro, ¿eseshatña ochña'tats ñato' ña amapa' pamo'mte'te' ñeñto'mar eñalletaña atet aporo'yet?

³ Jesúsñapa' atet otanet:

—Amaca'ye po'chñaroteyaye ama't ñaña pamo'mte'; ñeñtpa' añecopña allochñapa' o'ch norrtatoñ Yompor po'partsoña ñesho. ⁴ Ñeñt poctetsa o'ch norrtatoñ po'partsoña ñeñt nellsense' tayepa'tñapa' puetarmeñ. Ñerra'm o'ch checmetenpa' amach eshcaye' yetaruaso. ⁵ Tayepa'tña añe patsro'tsenmeñenpa' na ñeñten a'puetarsamipene' acheñenesha' poctapña añe patsro.

⁶ Allempoña atet otuapa' allenta a'chonon pa'snom patso o' a'cha'chatach. Ñeñña cha'cha'te'pa' alloña a'yacлле'chanña aporo'yet. ⁷ O'ña a'yacлле'chuepa' atet och:

—Te'pa' orrap oño all apco'sattatareto ñeñtpa' añ pa'so'cheñ Siloés. Allcha' pe'pacлле'cha. (Ñehua, añca'ye otenetña Siloés ñeñt oñ ahua'ñaref.)

Ñaña^{pa} allenta ahuo' oño allcha' e'pacлле'chena'. E'pacлле'chuatsapa' e'ñe errtsapa' allentepa'tcha' cohuenterraña pa'cлле' e'ñe cohuen enterra. ⁸ Pamo'tsesha'ña ñaña po'poñechno acheñ ñeñt e'ñe cheme'tene' all allempo enamaren quelle, ñetñapa' atet otyeset:

—Añpa' ¿ama't añeyayeña ñeñt anorrtese't ñeñt enamare'tatse't quelle?

⁹ Patantarr acheñenesha'pa' atet otyenet:

—Ñeñtca'ye.

Po'potantañechnopa' atet otyenet:

—Amaca'ye ñeñteyaye, attaca' ñeñtema'ttena.

Aporo'yetñapa' atet otanet:

—Napa' ñeñtenca'ye.

¹⁰ Ñetñapa' atet otyeset:

—¿Errofenote'tña o' pecuerr?

¹¹ Ñaña^{pa} atet oterraneterr:

—Añ yacmar ñeñt otenet Jesús ñaca'ye a'cha'cha'te'ña pa'snomo patspa' alloca'yena a'yacлле'chen. Allempoñapa' oten nepacлле'chenepa'to' oño Siloés. Nañapa' allña ne'pacлле'chena'. E'ñe e'pacлле'chuatsanpa' allentepa'tcha' necuerr.

¹² Ñetñapa' alla otereterr:

—¿Erro'tsena'tña ñeñt yacmar?

Ñaña^{pa} ot:

—Ta'm, amaca'ye neñoteñe.

Atto fariseonesha'pa' a'p̄to'tare'tenan aporo'yeyt ñeñt a'crraterr Jesús

¹³ Allempoña ñeñt poro'ye'chatse'tpa' anmet allo'tsen fariseonesha'. ¹⁴ Ñehua, allempo a'cha'cha'tan Jesús pa'snomo pats allo a'yacлле'chan aporo'yeyt ñeñt cohuaterre' allempopa' añ yetro allempo amesenet. ¹⁵ Fariseonesha'ñapa' ello alla otereterr:

—¿Errofenote'tña o' cohuaterrpet?

Ñaña'pa' atet otosanet:

—Añoca'ye a'yacлле'cherrnet senmatso ñeñt a'cha'cha'taret epuet pats o'ña ne'pacлле'cherrapa' allenta necuerr.

¹⁶ Patantarrña fariseonesha'pa' atet otyeset:

—Ñeñt yacmarpa' amate'ca'ye Partseshoteye' huapo ñeñto'mar ama esoye' entenanoña ñeñt anaret paterr yet allempocma yamesen.

Po'potantañña'pa' atet otyeset:

—Ta', elloña ñerra'm ochñañ acheñ amate' errotenot orrtatonayeña partsoteñets.

Attoña e'ñe all ellopa'tetstatet pocta'p̄ña ñocop. ¹⁷ Ellopa' alla otereterr ñeñt poro'ye'chatse't:

—¿Errofena't p̄otenña p̄a añecop ñeñt o' cohuaterrep?

Ñaña'pa' atet ot:

—Ñapa' ñeñtca'ye a'm̄tene' Yompor po'ñoñ.

¹⁸ Judionesha'ñapa' atet otyeset:

—Ñapa' amaca'ye po'ño'ch aporo'yeyeyaye, e'ñeca'ye cohuen entena.

Allempoñapa' chore'toñet pamo'mte' ñeñt o' cohuer. ¹⁹ Ñetñapa' atet otapoñet pamo'mte':

—Añpa' ¿añe'tña sacñe'ter ñeñt sotyese't ahuo' eñalletaña sacñe'ter aporo'yeyt? Te'ñapa' ¿errofenote'tña o' cohuer?

²⁰ Pamo'mte'ñapa' atet otosanet:

—Po'ño'ch añca'yeña yacñe'ter ñeñt atta eñalletatsa aporo'yeyt. ²¹ Atto o' cohuerpa' yapa' amaca'yeña yeñoteñe. Ta', esha'te' o' cohuer, yapa' ama yeñoteñe. Sa'p̄to'ch e'ñe ña, ñapa' o'ca'ye atta po'napen, ñoñachca'ye eñora.

Judionesha'ña allempopa' atet otyeset:

—Po'ño'che'pa'tca'ye aporo'yeyt o' cohuer.

²² Ñehua, pamo'mte' atet otanet tarro'mar ñetpa' mecha'teñet judionesha'. Ñehua, judionesha' ñetpa' atet a'poc̄tatenet ñerra'm esesha' otets: Jesús'pa' ñeñtca'ye Cristotets, ñeñtña atet otetspa' o'ch mueño'chet ñet po'prahuot. ²³ Ñeñto'marña pamo'mte'pa' atet otanet:

—Ñapa' o'ca'ye atta po'napen, ñoñachca'ye eñora.

24 Puepocheño'pa' alla chore'tereterri ñeñt' poro'ye'chatse't atet otapet:

—Te' p'apa' o'ch pecohuentaterrñañ Yompor. Yapa' yeñoteñ añ yacmapa' atarrca'ye ochñañ.

25 Ñaña'pa' atet oterraneterr:

—Ta', ñato' ochñañeñte' napa' ama neñoteñe. Napa' añaca'ye neñoten napa' aporo'yeten te'ñapa' o' cohuen necuerr.

26 Ñetña'pa' alla otereterri:

—¿Errofe'tña perrep? ¿Errofenote'tña o' cohuafterrep?

27 Ñaña'pa' oterraneterr:

—Ama'tña napa' o'ca'ye notuas sañapa' are'tña señoñe. ¿Eso'mare'tña semneñ o'ch alla noterrserri? Ñato' ¿añecopte' semneñ o'ch yochresha'tasa saña?

28 Ñetña allenta otnare'chetpa' atet otereterri:

—Papa' pueyochresha' pene'p ñeñt' yacmar, yañapa' Moisésca'ye pueyochreshay. 29 Yapa' yeñoteñ Paretspa' eñorana'tana Moisés, tarraña ñeñt' yacmarpa' ama yeñoteñe errofte'tña huapa.

30 Ñeñt' poro'ye'chatse'tpa' atet oterraneterr:

—Errofenotuaca'ye ama señoñe'te'tña errofte' huapaña ama't napa' o'ca'ye e'ñe cohuen cohuafterren. 31 Yapa' yeñoteñ ñeñt' ochñañ acheña'pa' amaca'ye e'mñoteñe Yompor, tarraña ñerra'm ya yeñcha'na'teño't Yompor atet yepena ñeñt' muenen ñapa' chocmach e'mñoteney. 32 Ya ama't ahua'tapa' ama ye'mareña esesha'pa' o' cohuafterraña ñeñt' atta eñalletña aporo'yet. 33 Ñerra'm ñapa' ama Yomporeshot huapañe amate' errofenot cohuafternoñe.

34 Ñetña'pa' alla otereterri:

—Papa' pe'ñalleta e'ñe ochñañartso't. Te'ñapa' cha pemneñ o'ch peychatey ya.

Allenta mueño'chet e'ñe ñet po'prahuot.

Ñeñt' ama ame'ñetso Jesúsña'pa' atet entenanet ñerra'm aporo'yet

35 Jesúsña'pa' o' e'mare'ch ñeñt' aporo'yettatse'tpa' o' mueño'chet. Allempoña enter Jesús'pa' atet oter:

—¿Pame'ñeña't ñeñt' Yompor Puechemer?

36 Ñaña'pa' atet och:

—Ayochreshate, ¿esesha'tña ñeñt' Yompor Puechemer ñeñt'cha' name'ña?

37 Jesúsña'pa' atet otererr:

—Ñeñt' pecuen, ñeñten atet potene', naca'ye.

38 Ñaña'pa' allenta concorpa ñeshopa' atet otererr:

—Name'ñerrpach Partseshacha'.

³⁹ Jesúsñapa' alla oterrer:

—Napa' añecopña nohuapa arr patsro allochñapa' attoch acrareterra acheñenesha' errotench'a' nentyesanet, allochñapa' ñeñt ama entetsopa' o'ch e'ñe cohuen enterra. Ñeñtña entetsañpa' o'ch alla aporo'yetterra.

Ñeñtpa' añ toma'ntata, ñeñt atarr ochñañ entetsa ñerra'm ame'ñerrana Jesús, ñetpa' çherranetcha' Yompor po'cohuenña pueyoçhreto. Ñeñtña ama ochñañe'ye' entetsañe ñeñto'marña ñetpa' amach ame'ñereto Jesús, ñetñapa' amach çherraneto Yompor po'cohuenña pueyoçhreto.

⁴⁰ Patanta'tetsña fariseonesha' ñeñt allame'ttso'tsa'yenet ñesho, ñetñapa' e'mueñet ñeñt atet oten Jesús. Ñetpa' atet ochet:

—Ta'm yapa' ¿amañe' aporo'yete'ye' pentenye?

⁴¹ Jesúsñapa' atet otanet:

—Ñerra'm po'ñoçh sa aporo'yet sentenañ amate' eñallmeñeña so'chñar. Tarraña sapa' atet soten, sapa' año' aporo'yete'yaso, e'ño' cohuen secuen, ñeñto'marña te'pa' o'ch notas, so'chñarpa' çhocma eñall.

10

Atto Jesúsapa' añ toma'ntatanet all yottamñeñet carrnero

¹ Allempoña Jesúsapa' alla yeçhaterraneterr, ñeñtpa' atet toma'ntaterraneterr:

—Po'ñoçhca' notenes: All yottamñeñet carrnero ñerra'm esesha' ama be'tetso allotecma be'tenet ñerra'm po'pshemitañoña a'tenet, ñeñtña po'ñoçhpa' eñetca'ye ñeñt aprratamñpsañtetsa. ² Tarraña ñerra'm esesha' be'tets e'ñe allotecma be'tenet ñeñtña po'ñoçhpa' ñeñt cohuanmpene' carrnero. ³ Ñeñt cohuanmpene' yetarrpa' ñerra'm esempo huacherra ñeñt cohuanmpene' carrnero ñapa' çhocmach toramñpsapuerranet. Carrneropa' e'ñe eñoteññañet

pamo'mte' po'ñoñ. Ñaña'pa' o'ch çhore'tyesan po'carrneror pa'so'chñopa' o'ch çha'nmaçha'tatan po'carrneror.

⁴ Allempoña çha'nmatue allohuen a'yo'tpa' ñaña'pa' o'ch ota. Po'carrnerorñapa' allentach cota'huanemñ chenta'. Ñetñapa' e'ñe cheme'teññañet pamo'mte' po'ñoñ. ⁵ Tarraña ahuapñapa' ama coteñe, çhach matamñpesya tarro'mar ama eñotenano ahuapña po'ñoñ.

⁶ Ñeñtpa' atet oterranerr fariseonesha' toma'nteñtso tarraña ñetñapa' ama eñotoñeto ñeñt otenanet.

Atto Jesúsapa' añ toma'ntena ñeñt e'ñe cohuen cohuanmpene' po'carrneror

⁷ Alloñapa' alla oterraneterr Jesús:

—Po'ñoçhca' notenes: Napa' na yetarrotets allotcha' be'ten carrnero. ⁸ Allohuen ashcañnesha' ñeñt' huapyestset' allempo ama nohuena' na, ñetpa' eñeñareret ñeñt' aprratam̄psañtetsa, tarraña ñetpa' ama e'mñnotenetoña carrnero. ⁹ Napa' na yetarrotets. Ñerra'm esesha'ch be'tets nesho ñeñt'pa' queshperrach, be'terretcha' ñaña'cha'nerretcha' enterretcha' e'ñe cohuen puerrar.

Ñehua, ñeñt'pa' añ otenanet: Ñerra'm esesha'ch ame'ñaya ña ñetñapa' queshperretcha'. Ñachña cohuan̄perrahuet e'ñe cohuen amach es pallterreto.

¹⁰ Jesúsñapa' alla otterraneterr:

—Eñe'pa' amaca'ye huenoña e'ñe atta, añecopña huena o'ch etyes, o'ch es muetsa, o'ch es a'chencatua. Tarraña napa' añecopña nohuapa attochña sapa' corretsasach socsheñeshocmañen e'ñe tayoteñ errponañohuen. ¹¹ Napa' na ñeñten cohuen cohuan̄pene' carrnero. Ñeñt' e'ñe cohuen cohuan̄pene' carrnero ñapa' e'ñe ñañeña a'rroyeretsa o'ch rroma po'carrnerorecop. ¹² Tarraña po'psheñeñ ñeñt' atsa'tarettatsa attoch cohuan̄penan carrnero ñeñt'pa' ama pamo'mtayeyaye; ñaña'pa' ñerra'm entapan ma'yarrpa' çhach mata o'ch sa'nmanña carrnero. Ma'yarrñapa' o'ch rroma'yesosan carrnero, patantarrña carrneropa' o'ch atta a'parratset'ach. ¹³ Ñeñt' atta atsa'tarettetsapa' po'ñoçhpa' ama lleca'penanoña carrnero ama't mamesha. Ñeñto'marña çhach sa'nmanña carrnero.

¹⁴ 'Napa' na ñeñten cohuen cohuan̄pene' carrnero. Napa' e'ñe nechme'teñ ñeñt' necarrneror. Ñeñt'ña nopa' e'ñe cheme'tenen naña. ¹⁵ Atet' pena Apa e'ñe eñotenen, nañapa' e'ñe neñoteñ naña Apa. Napa' e'ñe nañeña o'ch na'rroyerra attoch nerroma necarrnerorecop. ¹⁶ Eñall po'poñeçhño ñeñt'cha' necarrneror neperr, ñetpa' ama parrocmateneto arr allo'tsen ñeñt' necarrneror nepen te'. Añ poctetsa o'ch nerraneta' attoch e'mñoternanet neñoñ, allochñapa' o'ch e'ñe parrocmaterret. Puesheñarrana ñeñtencha' cohuan̄perrahuet.

¹⁷ 'Apapa' ello atarr morrentenna tarro'mar napa' na'rroyena nañeña o'ch nerroma acheñenesacop, elloñapa' o'ch alla netanterra. ¹⁸ Ama't eseshapa' amach puerratañpesnoña nocrraña, napa' na ñeñten a'rroyetsa e'ñe nañeña. Napa' anareten attoch na'rroya o'ch nerroma; anareten ñaña attoch ellopa' o'ch alla netanterra. Ñeñt'pa' Apaña notene' atet'cha' nepa. Arrpa' allohua atet' toma'ntatenanet allohuen ñeñt'cha' ame'ñerraya ñeñt'ña po'carrneror pen ñeñt'cha' atarr cohuen cohuan̄pen.

19 Ñeñt atto serrpare'tatenanet Jesús, allña judionesha'pa' ellopa'tetstatenet poctapña Jesúsocop. 20 Shonte' acheñenesha' ñeñt atet otyesets:

—Añmapa' chaca'ye chorreña oneñeñ, chaca'ye mospuena. Eso'mare'tña se'mñoteñ.

21 Po'potantañechnoñapa' ñetpa' atet otyenet:

Ñerra'm cho chorreña oneñeñpa' amate' errotentof eñosoña atet e'ñe cohuen. Oneñeñpa' amate' errotentof cohuaterrañoña aporo'yet.

Allempo judionesha'pa' achmāre'teñet Jesús

22 Allempoñapa' cherrerr allempo alla cosherrerr judionesha' Jerusaléño allempoch yerpuerret ñeñt atto nete't ahuat Parets pa'paquell ñocop. Allempo alla cosherreterrrpa' allempopa' huapo. 23 Jesúsñapa' alla chopeñen Parets pa'paclo all oteñet Salomón puecha'petaro. 24 Allñapa' arrotanñpesya judionesha'pa' atet ochet:

—Esempohuachñaca'ye pe'nuaña ñeñt atto pe-moñne'tatenya. Ñerra'm po'ñochte' pa Cristotetspa' poteyñaca'ye e'ñe po'ñoçh.

25 Jesúsñapa' atet otanet:

—Ama't notatstas sapa' amachca' same'ña'no. Napa' e'ñe neyemteñof Apa atet es nepa'yen. Ñeñt norrtatyenpa' ñeñtcha'ña señotate' napa' ñeñten Cristotets. 26 Tarraña sapa' ama same'ñenno tarro'mar sapa' ama necarrneroreyayso ñeñt atet o' notuas. 27 Ñeñt po'ñoçh necarrnerorpa' e'mñotennanet neñoñ, nañapa' neñotenanet. Ñetñapa' cotennet. 28 Nañapa' napuerranetcha' attochña ñetpa' corretsetach tayoteñ errponañohuen, ñetñapa' ama't ahuatapa' amach chenquerreto. Ama't eseshapa' amach puerraterrnetoña e'ñe na notof. 29 Nomporpora' ña napuene'ña ñeñt name'ñenaya. Ñapa' atarr ahuamencatesha'. Ña po'huamencpa' ama eseshaye' metanenaye. Ama't eseshapa' amate' errotentof puerratanñpsetoña Nompopor e'ñe ña potof. 30 Napa' e'ñe parro attecman epan ña.

31 Ñeñto'marña allempo judionesha' ñetpa' chetet mapue' allo'ch rrolle'chet. 32 Jesúsñapa' atet oterraneterr:

—Shonte' coçhnesha' norrtatyesonas Nompopor po'huamencof. ¿Erra'tsenote'tña añ ñeñt e'ñe coçhnesharof sapa' semneñ o'ch sarrolla'n?

33 Judionesha'ñapa' atet otereterr:

—Ama porrtateñofoye' coçhnesha' yemneñe o'ch yarrolle'tap. Yapa' añecopña yemneñ o'ch yarrolle'tap atto papa' atarr pachmāre'teñ Parets. Papa' acheñofoaca'ye pemneñ o'ch pepartsocoptarta.

³⁴ Jesúsñapa' alla oterraneterr:

—Ñoñets ñeñt atet anaret ahuatoteñ socop allpa' atetca'ye anuaret añecop ñeñt e'ñe ñenmañ a'pote' Yompor po'ñoñ, ñeñtpa' atet otanete't Yompor: “Sapa' atetcha' entenes acheñenesha' ñerra'mrrate' yomporos.” ³⁵ Yompor po'ñoñ ñeñt anuaret ahuatoteñ ama puenesho. Atet otanete't ñetpa' yomporo'ch entenanet acheñenesha', ³⁶ naña ñeñten o' nerren Yompor ñeñten o' mueñerren arr patsro, sapa' achmārñañach sepenen tarro'marotña napa' noten Yompor Puechemeren. ³⁷ Ñerra'm amate' añeye' norrtateno Yompor po'partsoña ñeñtepnapa' amach same'ñatsetno. ³⁸ Tarraña atto po'ñoñ norrtateññañ po'partsoña ama't ñeñtpa' same'ñya, ama't napa' ama ame'ñoyen sentenno. Attochña po'ñoñ chaponasa seyochro atto Apapa' e'ñe parrocmatenna, napa'cho'ña neparrocmaten epan Apa.

³⁹ Ellopa' mueneñetañ o'ch rromuet tarraña ñet allempopa' cha a'qeshpachet.

⁴⁰ Allempoña Jesúsapa' ahuerr yomta'n Jordanaso all e'ñe ñenmañ apatyese't Juan Yomporcop. Allñapa' alla a'pa.

⁴¹ Shonte' hua'cha'tyests ñeshopa' ñetñapa' atet otyesoset:

—Juanpa' ama't coñe'ta ama orrtatano partsoteñets, tarraña allohuen allpon otyesy'e't Juan añecop ñeñtcha' Cristoterrets ñeñtña te'pa' e'ñe po'ñoñ atet pena.

⁴² Allñapa' shonte' acheñenesha' ñeñt ame'ñaya Jesús.

11

Allempo rroma Lázaro

¹ Allempo atsna'ten puesheñarr yacma ñeñtpa' añ pa'so'cheñ Lázaro ñeñt yeçheta anetso Betania epuet epsheño'mar po'ch, puesheñarra' María, po'psheñeñpa' Marta. ² Ñehua, ñeñtña Mariapa' ña a'yatcate'ña Partsasha' eñmosaño pa'tco allempoña e'ñe ña pue'chopa' alloña a'porrarratquër, ña po'se Lázaropa' cha atsna'ten. ³ Po'chanesha'ñapa' allenta mueñet acheñ Jesúsesho, ñetñapa' atet otoset Jesús:

—Partseshacha', ñeñt atarr pemorrentenapa' cha atsna'ten.

⁴ Jesúsña e'mare'chpa' ñapa' atet otapanet:

—Ña amaca'ye añecpaye' atsna'teno o'ch rroma, tarrecpa atet pena allcha' norrtatoñ Yompor po'partsoña, allochñapa' o'ch cohuentatennanet na ñeñten Yompor Puechemeren.

⁵ Jesúsapa' ama't atarr morrentenanañ Marta ñaña pa'mo'nerr ñaña Lázaro, ⁶ tarraña allempoña e'mare'tan Lázaropa' cha atsna'ten, ñapa' amaña allorocmaye' to, ñapa'

alla epomterr e'ñe all allo'tsen. ⁷ Allempoña epomta'muenpa' atet ota'muenan pueyochresha':

—Te'pa' o'ch ahuerrey alla Judeo allo'tsen Lázaro.

⁸ Pueyochresha'ñapa' atet ochet:

—Maestrocha' allpa' chaca'ye o'patenpa judionesha' o'ch rolle'tapet attoch muetsapet. Ta'm, ¿paña te'pa' o'ch alla pesechenerr o'ch alla ahuerrperr?

⁹ Jesúsñapa' atet otan pueyochresha':

—Ama'tña yetpa' o'ca'ye ellapen puetarsats. Ñerra'm yechope'ch yeto amach yepoto'teno tarro'mar e'ñe yenten puetare' aña patsro. ¹⁰ Añña ñerra'm yechope'ch tsapo yepoto'tena tarro'mar ama a'puetarsam̄psareteye. (Atto Jesúsapa' e'ñe eñotatenanet allponmatmeñ ñocop attoch e'ñe etsotuan Yompor po'taruas tarro'mar ama chena' allempo ñeñt̄ pocetsa ñocop attoch muetset.)

¹¹ Allempo otua atetpa' o' alla oterranerr pueyochresha':

—Lázaro ñeñtey e'ñe parrocoma atarr yemorrentannena ña te'pa' chaca'ye muen, ñeñto'marña te' napa' o'ch ahuen o'ch alla nopuera'.

¹² Allempoña pueyochresha' ñetñapa' atet otereterr:

—Ñerra'm Partseshacha' chate' e'ñe cohuen muenpa' ñeñtepa' correrrach.

¹³ Ñehua, Jesúsapa' añ otenanet atto Lázaroña' choca'ye rromuen; ñetñapa' cha otenapuetañ aña' otenanet ñeñt̄ atto chocma e'ñe yemuen betnatotey. ¹⁴ Allempoña Jesúsapa' alla oterraneterr attoch e'ñe eñochet:

—Te'pa' po'ñochca'ye o' rroma Lázaroñ. ¹⁵ Napa' te'pa' atarr nocshena tarro'mar ama allo'tsenno all. Atarr cohuen nenteñ socop allochñapa' attoch e'ñe cohuen sameñerrna. Ama'tpa' te'pa' o'ch ahuey Lázaroñesho, o'ch yenteña'.

¹⁶ Tomásña ñeñt̄ otenet Epanesha' ñapa' atet otan po'potantañ ñeñt̄ parro yochreshatsocmuet:

—Ama'tpa' ahuanmapo'ch yerromuepa' yaña epay Jesús.

Allempo Jesús eñotatanet ñapa' ña atantatañtetsa alloch e'ñe yocrrena

¹⁷ Allempoña chap Jesús all, ñapa' eñotos o'ca'ye pa'tatsmat pampa'huet. ¹⁸ Ñehua, Betania allame'ttsañ Jerusalem — o' ma'pañña kilómetro attoch yechap Jerusaléño. ¹⁹ Allñapa' shonte' judionesha' ñeñt̄ huachetsa allo'tsen Marta epuet pa'mo'nerr María ñeñt̄cha' emya'tenahuet atto ya'na'teñet po'sayañet Lázaroñ ñeñt̄ o' rromuerr. ²⁰ Allempoña Martapa' e'mare'tan Jesús o' huena ñañapa' allenta ahuo' o'ch pocenan Jesús. Maríañapa' allo'tsena pocollo all anen. ²¹ Martaña allempo pocenan Jesús atet otapueñ:

—Ñerra'm Partseshacha' arro'tsenpeñcha' amate' rromuerrñeña nesayañ. ²² Ama't te'pa' napa' neñoteneḡ ñerra'm erra'tsencha' penam̄ Yepapar, ñapa' čhocmach atet ḡonaḡ.

²³ Jesúsñapa' atet och:

—Po'ñočhpa' tanterrach pesayañ.

²⁴ Martañapa' atet otererr:

—Po'ñočh napa' neñoteñ tanterrach esempohuañen allem-poch atantatareḡey allohueney.

²⁵ Jesúsñapa' atet otererr:

—Napa' na ñeñten e'ñe po'ñočh atantatañen, napa' ñeñten alloch e'ñe socrena. Erra'tsencha' name'ñenaya na ama'tcha' rromuenañapa' ñetpa' ellochña alla correrret. ²⁶ Ama't ñaña allohuen ñeñt corra'yetsa te' erra'tsencha' name'ñerraya na ñetñapa' corretsetach tayoteñ e'ñe errponañohuen. Papa' ¿ḡame'ñenna't ñeñt atet noteneḡ?

²⁷ Martañapa' atet otererr:

—Partseshacha' napa' neñoteneḡ e'ñe po'ñočh ḡapa' ñeñteḡ Cristotoseḡ, ḡapa' Yepapar Puechemereḡ, ḡa atarr yecuen ahuatoteñ o'ch pehuapa arr patsro.

Allempo Jesús yahuosa Lázaroñ puepampro

²⁸ Allempo atet otuepa' ñapa' allenta ahuerr pocollo, atet otuerran pa'mo'nerr María, ñeñtpa' atet och a'nahua:

—Te'pa' o' huena Maestro, o' agotatueneḡ.

²⁹ Maríaña e'mare'te'pa' atantoche' allenta ahuo' ñaña o'ch poctenan Jesús. ³⁰ Ñehua, Jesúsapa' ama čhena' anetso, allo'tsenara all pocten Marta. ³¹ Judionesha'ña ñeñt allo'tsa'yen pocollo ñeñt emya'tene' ñetñapa' enteñet atantoche' María puema'yoreñ čha'nem ñetñapa' allenta cota'huanmet. Ñetpa' čha otenapuetañ arrcha' ta po'sayañ puepampro o'ch ya'na'teña'.

³² Allempoña čhap María allo'tsen Jesús, all entospa' concor-posa pa'rrpoḡ. Ñapa'čho'ña atet otos:

—Ñerra'm Partseshacha' arro'tsenpeñcha'pa' amate' rromuerrñeña nesayañ.

³³ Allempo entosan Jesús all atarr yahuena María ñaña judionesha' ñeñt cotose' ñetpa'čho'ña e'ñe parro attecma yahuanrrortenet, ñañaapa' pueyočhropa' atarr llecapretosanet ñeñto'marña čha enarosa. ³⁴ Ñañaapa' atet otapanet:

—¿Erra'tña sepampuer?

Ñetñapa' atet ochet:

—Ñehua, Ayochreshate o'ch ahuey o'ch penteña'.

³⁵ Allempoña Jesúsapa' yahuosa ñaña. ³⁶ Judionesha'ñapa' otyeset:

—Ñapa'cho' atarrepa'tca'ye morrenteña.

³⁷ Puesheña'tetsñapa' atet otyeset:

—Añmapa' ñeñtca'ye cohuaterre'ña aporo'yet. Ñerra'm arro'tseneñcha'pa' amachca'ye muenacheñe o'ch rromuerreñña Lázaroñ.

Allempo Jesús tantaterran Lázaroñ

³⁸ Jesúsña e'ñe puellqueño'pa' enarerrerr. Allempoñapa' chap puepampro all mapuetpono e'ñe all yottam'peñet mapyo. ³⁹ Allñapa' atet otosanet Jesús:

—Te'pa' sa'rrote't mapue' a'yenet.

Martaña ñeñt arromñañ po'chpa' atet oterranerr Jesús:

—Partseshacha' o'te' cha pomaña' o' pa'tatsmat pampa'huet.

⁴⁰ Jesúsñapa' otererr:

—Ama'tña napa' o'ca'ye notuosep ñerra'm pame'ña'nachpa' pentoñcha' Yompor po'partsoña.

⁴¹ Allempoñapa' a'rrote'tet mapue' a'yenet, Jesúsñapa' cohua' enonet atet ot:

—Apa, neparasyoso'tap tarro'mar te' papa' pe'mñotenen ñeñt atet nenamuenep. ⁴² Nehua, napa' neñoteñ chocma pe'mñotenen. Añña acheñenesha' ñeñt tom'cha'tets arr ñocpuet neparasyoso'tenep allochñapa' attoch eñotenpet pa ñeñtep nellensene'.

⁴³ Ñeñta otuapa' allempoñapa' rrana huomencpa' atet ot:

—¡Lázaroñe, te'pa' o'ch notap petantena, pe'cha'nen!

⁴⁴ Allempoñapa' chepa'tcha' cha'netsña Lázaro ñeñt o' rromhua, epota'tare't poto ñaña pa'rrp'ot, ñaña pa'clloy'pa' e'tacle'charet pañello. Jesúsñapa' atet oterraneterr:

—Te'pa' chosañaca'ye toram'perre' esheccha' chope'chnerr o'ch ahuerr.

Atto atarr o'pateñet Jesús o'ch muetsatateret

(Mt. 26.1-5; Mr. 14.1-2; Lc. 22.1-2)

⁴⁵ Allempoña shonte' judionesha' ñeñt cotose' María ñeñt ente' Jesús atto orrtatosanet po'partsoña ñetpa'cho'ña e'ñe allempocma ame'ñeret ñamet Jesús. ⁴⁶ Tarraña po'potantañe'chnoñapa' ahuanmuet fariseoneshesho ñetñapa' serrpare'tatoset fariseonesha' ñeñt atet o' pohua Jesús.

⁴⁷ Allempoña fariseonesha' ñaña ñeñt pa'm'cha'tare'ternesha' pen allohuen judionesha' po'cornaneshar, ñetñapa' ap'chachet allohuen ñeñt a'p'octatene' ñoñets judioneshacop. Ñetña allempopa' atet otyeset:

—Errotuachñaca' yepe'ña, ñeñt' yacmarpa' čhocmaca'ye orrtatyenanet partsoteñets. ⁴⁸ Ñerra'm atta yequečhpue' allohuenña acheñenesha'pa' čhate' ame'ñyet ña, allempoña po'ñočpa' čhate' huapa añcha'tareñnesha' romo'marnesha' čhate' puerratañpsosyet Parets pa'paquell ama't ñeñt' anareñ Partsocop, ama't e'ñe ya ya'netserpa' čhate' puerratañpsosyet.

⁴⁹ Puesheñarrñapa' ñeñt' sochetsa Caifás allempopa' ñeñt' pa'micha'tareter pen allohuen judionesha' po'cornaneshar ñaña'pa' atet otanet:

—Sapa' ama es señotheno, ama't coñe'ta. ⁵⁰ Ama't pocte' senteñeña ñerra'm puesheñarr yacmapa' o'ch rroma allohuen acheñenesnacop, allochñapa' allohuen yamo'tsna'tarpa' amach chenca'huerreto.

⁵¹ Ñapa' ama ñoñaye' eñosoña atet. Ña allempopa' ñeñt' pa'micha'tareter pen allohuen judionesha' po'cornaneshar ñeñto'marña ñapa' Parets eñosate'. Ñapa' añ a'potanet atto Jesús'pa' ñach rromuerrets allohuen pamo'tsna'tarneshacop.

⁵² Amach e'ñe ñap'ta pamo'tsna'tarecpayaya rromoña Jesús, añecpa'nachña rroma allohuenacop ama't erra'tsencha' puechemer perr Yompor arr patstro, ñachña parrocmataterrahuet. ⁵³ E'ñe allempoteña atarr o'pateñet Jesús o'ch muetsatachet.

⁵⁴ Ñeñto'marña Jesús'pa' o'huañ chopeñe'ch allo'tsa'yen judionesha' all Judeo. O' ahuo' amayarero'mar, čhap paterr anetso ñeñt' pa'so'cheñ Efraín. Allña'pa' alla a'posa epuet pueyochresha'.

⁵⁵ Allempoña o' čherrmocherr pascuapo allempoch alla cosherrerr judionesha'. Allampaño'marnesha' ñeñt' allo'tsa'yenet shontet ahuanmuet Jerusaléño. Ama čhena' pascuapo ñetpa' añecopña ahuanmuet attoch a'cohuentatoset e'ñe ñetañeña Partsocop. ⁵⁶ Ñetñapa' Jesús'a e'noset, a'p'to'tanna'tyesoset allempo tomčha'toset Parets pa'pacillo; allña'pa' otanna'tyenet:

—¿Erroñena't sotenña sa, ta'm huapachña Jesús, ñato' amach huapoña arr?

⁵⁷ Ñehua, ñeñt' pa'micha'tareternesha' pen allohuen judionesha' po'cornaneshar ñaña fariseonesha' ñetpa' atet otyeset acheñenesha':

—Ñerra'm eseshascha' eñote' erro'tsente'ña Jesús'pa' o'ch sotey ya allochñapa' o'ch yerrmach.

12

Atto puesheñarr coyanesha'pa' a'yatca'tosan Jesús eñmosaño (Mt. 26.6-13; Mr. 14.3-9)

1 O' pechapmataña o'ch čhapa'muen pascuapo, Jesús pa' alla čherr Betanio. Allña pa' allo'tsen Lázaro ñeñt rromats ahuaña ñeñt alla tantaterr Jesús. 2 Allña pa' all rrallme'chatneñet. Martaña pa' ña nenahuet rreñets. Lázaroña pa' ña rrets epuet Jesús ñaña po'potantañečno. 3 Allña Mariapa' chetan pueñarr eñmosať ñeñt otenet nardo puese' e'ñe ñeñtoche' ñeñtña pa' atarr tsa'te'. Ñaña pa' alloña a'yatca'tan Jesús. E'ñe ña pue'chopa' alloña a'porrarrat'quēr. Ñeñtña pa' ora eñmosaťtatan pocollohuen. 4 Judas Iscariote ñeñt Simón puechemer ñeñtara pueyochreshar ñeñtcha' pomuerre' ñaña pa' atet ot:

5 —Eso'marte'ña añ eñmosaťpa' ama čhoye'ña yepome, čhochñačo' yepomeña pa' yeganañcha' shonte' quelle ñeñt trescientos denario allempopa' yapa'yeseñcha' huocchañneshačno ñeñt atarr es pallta'yetsa.

6 Ñapa' ama puellquēñoťeye' huocchañneshačhnocop atet oto. Ñapa' tarro'mara atet ot, ñapa' atarrca'ye eñeť. Ñapa' e'ñe ñacma anmanpene' quellayepo'r ñeñt allohuenacop, ñapa' allotña etenña quelle ñeñt esha'tenet all. 7 Tarraña Jesúsña pa' atet otanet:

—Semnachñaca'yeña coyanesha' ñeñt atet penen. Ñapa' añecop añño'tennan ahuatoteñ eñmosať tarremphua allempoch a'yana'terrneterr ñeñtcha' epuet pampa'pesnet. 8 Tarraña ama'tcha' čho pomosaneñ eñmosať alloch es apa'yeseñeñ huocchañneshačno, tarraña čhocmachca'ye eñallña huocchañneshačno arr patsro. Tarraña ñaña pa' po'ñočpa' amachca'ye allo'na sentenno arr patsro.

Allempo o'pateñet Lázaro o'ch alla muetseret

9 Shonte' judionesha' allempo e'mare'chet o' alla čherr Jesús all Betanio, ñetña pa' huačha'tet. Ama e'ñe ñapťecpa Jesúsocop huačha'teto o'ch enteñeta', añecpa'ñaña huačha'tet o'ch enteñeta' ñaña Lázaro ñeñt rromats ahuaña ñeñt tantaterr Jesús. 10 Ñeñtña pa'm'cha'tareternesha' pen allohuen judionesha' po'cornaneshar ñetña pa' añe'na o'patenet Lázaro ña'nach muetset. 11 Tarro'mar allempo tanterra Lázaro shonte' judionesha' ñeñt ame'ñaya Jesús ñeñto'marña ñetpa' o' quečpa'hueretña ñet po'cornaneshar.

Allempo čhap Jesús Jerusaléño

(Mt. 21.1-11; Mr. 11.1-11; Lc. 19.28-40)

12 Tsapaťña shonte' achenesha' ñeñt shontetsa pascuacop Jerusaléño, ñetña pa' e'mare'teñet Jesús o' čhampoch ñaña Jerusaléño. 13 Ñetña pa' tsorro'tyesnomuet shequēpan ñeñt anemyeset allo topanetyesnomuet toñ allcha' oñmos Jesús.

Ñetñapa' puerranarshet ahuanmuet o'ch poctet Jesús ñeñt'pa' atet ofyesnomuet:

—¡Acsherrapo'ch allohueney! ¡Aye'chochtaterrapo'ch Jesús ñeñt' llesensen Yompor! ¡Aye'chochtaterrapo'ch Jesús ñeñt'cha' Pa'm'cha'tareter perr israelnesha'!

14 Ñehua, Jesúsñapa' all entnoman paterr ashnatollpa' alenta monta'nma allo. Ñeñt'pa' añecop atet pa ñeñt' atet anuaret' ahuatoteñ e'ñe ñocop, ñeñt'ñapa' atet oten:

15 Amach cha señcha'tatsto síono'marneshacha' ñeñtarasa jerusaléño'marneshas. Secue'tach te'chca'yeña huaponasaña ñeñt'cha' Sa'm'cha'tareter seperr. Ñapa' añaca'ye monta'nena ashen rre'ptorechor.

16 Ñehua, ñeñt' ñoñets allempoña pueyochresha'pa' ama çhapaneto pueyoçhreto. Tarraña tsapatoneña allempro roma Jesús, o' alla tanterra alla ahuerr pue'ntaño all atarr cohuentatapuer Pompor, ñetñapa' allempañña çherranetña pueyoçhreto te'ña po'ñoçhpa' o'ca'ye etsoterra e'ñe atet anuaret' ñocop ama't ahuototeñ.

17 Acheñenesha' ñeñt' allo'tsa'yen allempo çhore'tenan Lázaroñ puepampro't atto tantater, ñetñapa' ñeñt'a a'potayeset.

18 Ñeño'mare'naña ahuanmaña shonte' acheñenesha' o'ch poctet tarro'mar ñetpa' o' e'mare'chet ñamet ñapa' orrtatenanet po'partsoña. 19 Allempoña fariseonesha'pa' atet otanna'tyeset:

—Señch'te'ca'ye'm yapa' amate' erro't es ye'po ama't coñe'ta. Secue' shonte'ca'ye ña'ña acheñenesha' errap'arenot' o' e'ñe cota'huanmet.

Allempo griegonesha'pa' mueneñet o'ch eñchet Jesús

20 Patanta'tets griegonesha'pa' ahuanmuet ñamet o'ch coshapreteneta' pascua; ñetpa' añecop ahuanmuet o'ch concorposet all. 21 Ñetñapa' ponmosyet Felipe ñeñt' betsaido'marnesha' ñeñt'ara galileo'marnesha'. Ñeñt'ñapa' atet otoset:

—Nomp'orcha' yapa' añca'ye yemnen o'ch yeserrpare'tos epay Jesús.

22 Felipeñapa' allenta otenana' Andrés. Ñetña e'ñe epsheño'maretpa' ahuanmuet o'ch oteñeta' Jesús. 23 Jesúsñapa' atet otapanet:

—Te'ña po'ñoçhpa' o' etsoterra allempoch na Ñeñten Acheñetosetspa' o'ch alla cohuentaterren Nomp'or. 24 Ñeñt'pa' e'ñech po'ñoçh atet netma'ntatasa atet pena puerets. Ama't erra'tsena puertsor ama' cho pampallme'cho patso allcha' puetsohua pa'tall ñeñt'ach patrrara pue'llomer. Tarraña ñerra'm' cho pampallme'cha patso allcha' puetsa' pa'tall

attochña chop. Ama't puellñarra pampallme'chatsa atarrcha' aton ellomre'terr. Ñeñtpa' añ notenes e'ñe pocte' o'ch nerroma na ñeñten pueheñarrana attochña shonterra ñeñtcha' name'ñerraya. ²⁵ Ñeñto'marña notenes: Ñeñt atarr morrentenaya atto coshena arr patsro, ama pocteye' entenano o'ch es sohuanom Yomporecop, ñeñtña pocreña atarr morrentena, ñeñt atet petsapa' chach a'chencatena e'ñe ñañeña. Tarraña ñeñt ama morrentenaye atto coshena arr patsro, e'ñe pocte' enteñ o'ch es sohuanom Yomporecop ama't pocreñohuen, ñeñt atet petsa ñetña' corretsetach pocsheñeshocmañen tayoteñ e'ñe errponañohuen. ²⁶ Ñerra'm esesha' muenats o'ch torrenet nocop, co'ta'netepa' attochña e'ñe neyochresha' neperranet. Tarro'mar ñerra'm erro'tsenencha' na ñeñt torretsa nocop ñetpa'cho'ña allo'tsenetcha' ñamet. E'ñe allohuen erra'tsencha' torrerrtsa nocop, Nomporniapa' atarrcha' cohuentaterranet.

Allempo Jesús eñotatanet ñapa' choch muetseret

²⁷ Te' na neyo'chropa' cha atarr nellquëna. Tarraña ama't atteñpa' Nomporniapa' amach cha notatsche amach muenatano o'ch huapona ñeñt atarr amuero'chtatañ nenten. Ñeñt atetpa' amach notatsche tarro'marña napa' ñeñtecopca'yeña nohuapa nach amuero'chtataretterrtsa. Añcha'ña noch Nompör:

²⁸ —Te'pa' pepa'chña Apa aye'cho'chtataretterrtsa.

Allempoñapa' cha e'morrtatsa ñoñets ento't, Yomporniapa' atet ot:

—Napa' o' necohuentatua, elloña o'ch alla necohuentater-rerr ñañeña.

²⁹ Shonte' acheñenesha' ñeñt tom'chets all, ñetña atet e'mueñetpa' atet otyeset:

—Chote'ca'ye tecorena.

Po'potantañña' atet otyeset:

—Añca'ye eñorana'tenaya Yompör po'millaño'teñer.

³⁰ Jesúsñapa' atet oterraneterr:

—Ama nocpaye' huenoña añ ñoñets. Ñeñtpa' e'ñe socop huena. ³¹ Te'pa' o' anaretta allohuen acheñenesha' arr patsro ñeñt ama name'ñenaye ñetpa' amñare'terretcha' coñcheñtso. Ñaña oneñet ñeñt pa'm'cha'tare'ter pen acheñenesha' arr patsro, te' ñocoppa' o' anaretta ahupore'tare'terrach esempo-huañen. ³² Na ñerra'm esempoch echantañperrnet corsocho allempoña napa' ne'chore'tercha' allohuen pa'namen acheñ attoch ame'ñerrnet.

³³ Ñapa' añecopña eñorana'tenanet attoch eñotatanet ñapa' corsochoch rromuerr. ³⁴ Acheñenesha'ñapa' atet otyeset:

—Yapa' yeñoteñ añ ñoñets ñeñt atet anaret ahuatoteñ, ñeñtpa' atet oten ñeñtcha' Cristoterrets ñapa' ama arromñañeshayaye ama't errponaña. Ta', ¿eso'marte' pañapa' poten ñeñteþ o' Acheñetosetspa' echantamþsareteþo'ch corsocho allcha' perromuerr? Ta', ¿eseshate'ña ñeñt po'ñoçh Acheñetosets? amapa' ¿ñeñtarate' ñeñtcha' Cristoterrets?

³⁵ Jesúsña' atet oterraneterr:

—Mameshaña palltena arro'tsenmeñen na ñeñten a'puetarsamþsañtetsa. Soctape'cherrnan e'ñe tayecma neñoñ tayepa'tña arro'tsenmeñen ñeñtencha' a'puetarsamþerre' soctapña allochña' attoch amach cha sechencia'huerro. Po'ñoçh ñeñt ama ame'ñetso ñetpa' ama eñoteñeto attoch chencia'huerret. Ñeñto'marña ñetpa' e'ñe atet penet ñerra'mrate' checmeta chope'chenet ama eñoteñeto errenetcha' tet. ³⁶ Na ñeñten sa'puetarsamþene' soctapña' te'pa' arro'tsenmeñen. Soctape'cherrnan neñoñ tayepa'tña' arro'tsenmeñen. Allochña' o'ch seyeçhquerra sa acheñres ñeñtescha' atarr cohuen orrtatyerre' ñeñt cohuen enten Yompor tarro'mar sapa' e'ñech puetaró socrena.

Otua Jesús atetpa' ahuerr a'nahua; acheñenesha'ña' ama eñoçheto errate' ahuerr.

*Atto judionesha'pa' ama ame'nyeto Jesús ñeñtpa' añ etsoter-
tsa ñoñets ñeñt anaretet ñocpuet*

³⁷ Jesús'pa' ama't shonte' orrtatyenanet po'partsoña tarraña amaña eseshaye' ame'ñenayoña ña. ³⁸ Ñeñtpa' attoca'yaña etsotaña Isaías po'ñoñ ñeñt a'mtaye't ahuat Yompor po'ñoñ. Ñeñtpa' atet ote't ñocop:

Amach Nomporcha' eseshaye' yame'ñayo ñeñtcha' atet yeser-
rpare't. Ama Nomporcha' eseshaye' poctenaye pa pe-
huamenc.

³⁹ Ñeñto'marña amate' errotenot ame'ñeto. Tarro'mar ellonet Isaíaspa' atet ote't:

⁴⁰ E'ñe patpare'teñoçet Yomporña' muenatanet o'ch echarrtet pueyoçhret. Attochña ñetpa' çhach ottenet ñerra'm aporo'yetet ñeñt ama es enteno. Ñeñto'marña ama muenatenaneto o'ch es entet taye'to'te' çhapanet pueyoçhreto. Ñeñto'marña ama't mameshapa' amach es cotape'cheneto nocop attoch na'queshpaterranetañ.

⁴¹ Isaíaspa' tarro'mar atet ote't ñapa' e'ñe entane't Cristo po'cohuenña ñeñto'marña eñoçe'tña ñocop.

⁴² Tarraña shonte' acheñenesha' ñeñt ame'ñaya Jesús ama't ñaña amcha'tareteçhno. Tarraña ñetpa' mecha'çete't fariseonesha' ñeñto'marña ama a'metete'te. Añ mecha'tenet taye'to'te' muevo'tanet judionesha' po'prahuot. ⁴³ Tarro'mar

ñeñt ame'ñetsañ ñetpa' añe'na muenenet o'ch e'ñe cohuen entenanet acheñenesha'. Ama añeye'ña mueneneto o'ch e'ñe cohuen entanet Parets.

Atto Jesús po'ñoñ ñeñtcha'ña otteñe'cherre' acheñenesha' es-empohuañen

⁴⁴ Jesúsña rranapa' atet oterrerr:

—Ñerra'm esesha' name'ñenaya na, ama naptaye' ame'ñenneto. Añe'naña ame'ñenet Nompör ñeñt nellsensene'.
⁴⁵ Esesha' nentene' napa' añe'naña entenet ñaña Nompör ñeñt nellsensene'.
⁴⁶ Napa' añecopña nohuapa arr patsro nach a'puetarsañpene' acheñenesha' poctapña, allochñapa' ñerra'm esesha'ch name'ñaya na amach allo'tsenareto checmeto. Ñeñt checmeto'tsena ñetpa' ama eñoteñeto ñeñt cohuen enten Yompör.
⁴⁷ Ñerra'm esesha' e'mue' neñoñ tarraña ama't ama ame'ñerrnaneto neñoñ, napa' amach naye' mueñenahueto coñcheñtso. Tarro'mar napa' ama añecpaye' nohuapo arr patsro attoch nemños acheñenesha' coñcheñtso. Napa' añecopña nohuapa o'ch na'queshpatos acheñenesha' arr patsro.
⁴⁸ Esesha'chña nachmene' ñeñtcha' ama ame'ñerraye neñoñ, ñocpuetñapa' eñall attoch amñareñterret coñcheñtso. Ñeñtara añ ñoñets ñeñt neñen na te'pa' ñeñtcha'ña mueñaterrahuetña coñcheñtso esempohuañen.
⁴⁹ Tarro'mar napa' ama e'ñe notaye' neñeno. Apaña ñeñt nellsensene' ñapa' ñaña notene' atetcha' notas ñaña atetcha' ne'ñorapa'tasa.
⁵⁰ Napa' neñoteñ ñeñt atet otenen ña ñeñtpa' ñeñtcha'ña allochña sapa' corretsasach socsheñeshocmañen tayoteñ e'ñe errponañohuen. Ñeñt atet neñen napa' añca'ye neñen ñeñt atet otenen Apa.

13

Allempo Jesúsapa' e'patca'tyesan pueyochresha'

¹ Ama't ama çhena' pascuapo allempoch cosherrerr ju-dionesha', Jesúsñapa' eñoteñ e'ñech ñeñtshaña allo'tsen arr patsro o'ch ahurr Pomprosho. Ñapa' çhocma atarr morrentenana allohuen ñeñt pueyochresha' pen arr patsro. Ñeñto'marña allempopa' e'ñe poctacma morrentuenanet.

²⁻⁴ Ñehua, Judas Iscariote ñeñt Simón puechemer, oneñeñapa' ahuepa't cotape'chach pueyoçhro o'ch pomuerran Jesús. Jesúsñapa' e'ñe eñoteñ ñapa' tarro'mar llesenserña Pompor allohuenacop. Tarro'mar ñapa' e'ñe eñoteñ Yomproshotca'ye huapa, elloñapa' o'ch alla ahurr ñesho. Ñeñto'marña allempo rrallme'chneñet Jesúsña o' tompa' rrotana paterr pa'shtam ñeñt nen enot o' chetan paterr e'shmoco'tametspa' o' chana allo. ⁵ Alloñapa' o'

shan oñ huantejo alloña e'patca'tyesanña pueyochresha'. E'shmoco'tañtsoñapa' alloña a'porrarra'tcayerranet ñeñt' allochanena.

⁶ Atteñapa' ponmana Simón Pedro, ñañaapa' atet och:

—Partseshacha' amaca'ye pocteyaye o'ch pe'patca'tonña netac. Tarro'mar ñapa' ña atarr sherbets, napa' amaca'ye esoyayno.

⁷ Jesúsñapa' atet och:

—Ñeñt' atet nepenes te' sapa' amach señoche. Esemppopa' çhaponasach seyoçhro.

⁸ Pedroñapa' atet otererr:

—Ama't ahuata napa' amach nemnatape o'ch pe'patca'tenña na tarro'mar napa' amaca'ye nemno o'ch nepencna'ntatañ.

Jesúsñapa' atet otererr:

—Ñerra'm amach ne'patca'tapepa' amach errotent' e'ñeye' peyemtenno.

⁹ Simónña Pedropa' atet otererr:

—Ñerra'm po'ñoçhte' atet Partseshacha' amachña ñapña netac pe'patca'tono nota'nachña e'ñe ora noñohuen.

¹⁰ Jesúsñapa' atet otererr:

—Ñeñt' o' apuapa' amaca'ye es pallteneto, añaca'yeña palltenet o'ch e'patca'chet. Atet sepena sa a'cohuentatuaretes sa soçtaññoç. Sapa' e'ñe cohuen a'cohuentatuaretesañ tarraña ama allohuenacmaye' a'cohuentatuareteso.

¹¹ Ñehua, Jesúsapa' e'ñe eñotenan ñeñt'cha' pomuerre' ñeñto'mañña atet otanet: “Ama allohuenacmaye' a'cohuentatuareteso.”

¹² Allempoña e'patca'tuanet pa'tacpa' cheterran pa'shtampa' o' alla anerr. Allempoñapa' atet oterraneterr:

—Te'pa' o'ch neñotatas ñeñt' neyçhatenes ñeñt' atto ne'patca'tenes.

¹³ Ñehua, sapa' sotenen Maestro, ñaña sotenen Partseshacha'. E'ñe pocte' po'ñoçh sotenen tarro'mar po'ñoçhpa' ñeñtenca'ye.

¹⁴ Atto na ne'patca'tas sa, ama't na ñeñten Separtseshar sepen ñaña Semaestror sepenen, sapa'çho'ña ñeñt' e'ñe poctetsa socop se'patca'tanna'tepa'ch saña.

Ñehua, ñeñt' po'ñoçh notenes, ñeñt'pa' atet: Amach sañeña atarr cohuen entetso, attoçhña e'ñe cohuen sesherbannena.

¹⁵ O' neñotatas atet'cha' seña saña. Sapa'çho'ña attepa'ch seña atet o' nepohuas sa.

¹⁶ Po'ñoçhca'ye o'ch notas: Ñeñt' ayochreshat ñerra'm ama esoye' enteno ñañaña ama't e'ñe mamesha, ñeñt'ña pueyochresha'çhno pen e'ñepa'ch attecmuet amach esoye' enteneto e'ñe ñañañeta.

Ama't na ñeñten allsensareten ama esoye' nenteno ama't mamesha, ñeñt'cha' nellensa'yes

nañapa' amuepa'chña esoye' enteneto e'ñe ñañeñeta.
 17 Ñerra'm ñeñtña sechاپoya seyočhropa' ñeñt atet
 neyčhatenes, sañapa' atarrcha' cosheñtso'tsenes ñerra'm
 e'ñe po'ñočh atet sephoua.

18 'Ama allohuenacpayaysoye' neñeno. Napa' neñotenes
 e'ñe puesheña'ttsospa' atet soctape'chyen seyočhro. Ama't
 neñotensoñ atteseñpa' tarraña e'ñe atta na'cerrerres allochñapa'
 attoch etsoterra Yompor po'ñoñ ñeñt atet anuaret nocop
 ahuaťoteñ, ñeñtpa' atet oten: "Ñeñt parro yerrallme'chenpa'
 ñepa'tcha'ña tanterrtsa nocop." 19 E'ñe tayoteñpa' atet notenes
 ama't ama etsotena' allochñapa' esepoch etsoterra, sapa'
 same'ñach napa' ñeñten po'ñočh Cristotets. 20 Po'ñočhca'ye
 o'ch notas: Ñerra'm esesha' e'ñe cohuen aguëne' ñeñt
 nellsensen na ñetpa' na'naca'yeña aguënet e'ñe cohuen. Ñaña
 ñeñt e'ñe cohuen naguëne' na, ñetpa' Nompore'naca'yeña
 aguënet ñeñt nellsensene' na.

Allempo Jesúsapa' eñotatanet Judaspa' ñach pomuerre'

(Mt. 26.20-25; Mr. 14.17-21; Lc. 22.21-23)

21 Jesúsña allempo atet otuapa' pueyočhroñapa' čha
 lleca'huena. Allempoñapa' atet otanet:

—Po'ñočh te'pa' o'ch notas, puesheñarrotes sapa' ñeñtescha'
 nepomuerre'.

22 Pueyočhresha'ñapa' allenta cohuanna'tyeset. Amaña
 esesha' eñotaye erra'tsenacopte'ña eñen. 23 Puesheñarrña
 pueyočhresha' ñeñt atarr muerena Jesús, ñañaapa' e'ñe epuet
 Jesús anen all rrallme'chenet parro. 24 Ñeñto'marña Simón
 Pedropa' agotan ñeñt anets epuet Jesús, ñeñtpa' atet och:

—Ñehua, pa'p'to'ch yemaestror erra'tsenacopte'ña eñorena
 ñeñtcha' pomuerre'.

25 Ñañaapa' e'ñe allame'ttsa atet otan Jesús:

—Partseshacha' ¿erra'tsenacpa'tña pe'ñorena ñeñtcha' pepo-
 muerre'?

26 Jesúsñaapa' atet och:

—Ñeñtcha' nap añ pan ñeñtcha' ne'čhoma' ñeñtcha'ca'yeña
 nepomuerre'.

Allempoña e'čhoman panpa' apan Judas Iscariote ñeñt
 Simón puechemer. 27 Allempoña aphue panpa' allempoc-
 muepa't chorrya oneñet. Jesúsñaapa' atet och:

—Errotente' pepa'chpa' e'ñeñaca'yeña tayecma atet pepe'.

28 Pueyočhresha'ñapa' ama't puesheñarra ñeñtet
 allo'tsa'yenet, ñetñapa' ama eseshaye' eñotaye esocopte'
 atet otenan Judas. 29 Puesheña'ttsetpa' čha otapuetañ
 Jesúsapa' ñato' añte' oteñ o'ch rañtenana' ñeñt muenenet
 allcha' coshapretet, tarro'mar Judaspa' ñaca'ye

anmape'cham̄pene'ña quellayepo'r. Amapa' ñato' añte' oteñ
o'ch es apa'yesan huocchañeshachno. ³⁰ Allempoña Judaspa'
agapuan panpa' allenta'cha'nerr. Allempopa' o' tsapuen.

Atetcha' yepa' ñeñt' e'ñe etserra, yemueranna'tepa'ch

³¹ Allempoña Jesús'cha'nompa' atet'oterraneterr:

—Te'ña po'ño'chpa' e'ñe chapmoch allempoch cohuentater-
nran Parets na Ñeñten Acheñetosets. Attochña napa'cho'ña
necohuentaterrñañcha' Nomp'or Parets. ³² Atto napa' neco-
huentaterrñañ Nomp'or Parets, ñapa'cho'ña cohuentater-
rnancha' na, ñeñtpa' e'ñech mame'tolla o'ch e'ñe cohuentater-
nran.

³³ Jesúsñapa' alla otterranneterr:

—Na'cñeñarneshacha' o' e'ñe coñe'tañña pallta
allo'tsenmeñencha' na e'ñe arr parro. Napa' o'ch
ahuerren. Allempoña sapa' se'nerrna'ch. Atet' noteñ
ahuaña judionesha', allcha' neserr napa' sañapa' amach
errotent' se'chapo, te'pa'cho' sapa' e'ñe atet' notenes.

³⁴ Ñaña o'ch notas atetcha' se'pannena ñeñt' e'ñe etserra:
Semueranna'tepa'ch. Atet' nepenes sa atarr nemuerensa,
sapa'cho'ña atarropa'chña semuerannena. ³⁵ Allochñapa'
e'ñe semorrentanna'teño'tpa' eñotasetcha' sapa' sa e'ñe po'ño'ch
neyochreshas.

Atto Jesús'pa' eñotatan Pedro' ñapa' chocmach a'nasocha
(Mt. 26.31-35; Mr. 14.27-31; Lc. 22.31-34)

³⁶ Simónña Pedropa' atet' och:

—Partseshacha' p'apa' ¿erra'tcha'ña peserr?

Jesúsñapa' atet' och:

—Allcha' neserr napa' p'apa' amach errotent' p'octa'noña na
te'. Esempona po'ño'chpa' ama't chenta seserrcha' saña.

³⁷ Pedroñapa' atet' otererr:

—Partseshacha' ¿eso'mare'tcha'ña ama'ñayecma nocterrpe?
Napa' e'ñe pocte' nenteñ yerrromuepa' e'ñe parro.

³⁸ Jesúsñapa' atet' otererr:

—¿Po'ño'cha't e'ñe pocte' penteñ o'ch yerroma parro?
Po'ño'chca'ye te' napa' o'ch nota'p: Amach eñena' atollop
p'aña'pa' o'ch ma'poch p'ana'sotenna.

14

Jesús'pa' ña toñetets alloch yecherr Yomp'oresho

¹ Jesús'pa' alla otterranneterr:

—Seyochropa' amach cha sellcatsto. Atto seyemteña
Yomp'or napa'cho'ña choña seyemterrna. ² Nomp'or
pa'netsro all pue'ntañño allpa' shonte' pocoll allcha'
seycha'huerra. Ñerra'm ama' atteñepa' napa' amate'

notasñe. Ñeñto'marña napa' o'ch ahuerren attoch nañño'tuerrnas allcha' seycha'huerra. ³ Ñerra'm o'ch ahuerren napa' nañño'tuerrnascha' allcha' seycha'huerra. Ellochña nohuerrerrpa' allempochña e'ñe nahuerrsa' nesho allochñapa' allo'tseneycha' e'ñe parro. ⁴ Sapa' e'ñe señoiteñ allcha' neserr ñaña e'ñe señoiteñ attoch secherr saña all.

⁵ Tomásñapa' atet och:

—Ayochreshate yapa' amaca'ye yeñotenpe errachña peserr. Errotenotuachca'ye yeñochte' attoch yecherr yaña.

⁶ Jesúsñapa' atet och:

—Napa' na toñetets ñeñten alloch secherr Yomporesho, napa' na ñeñten sotene' ñeñt e'ñe po'ñoçh Yompor po'ñoñ, napa' na ñeñten alloch e'ñe socrena. Amach esesha' cherrtso Yomporesho ñerra'm ama nanom ame'ñerreto. ⁷ Ñerra'm o' señoterrnoñ na, Nompore'nate'ña señoerreñ. Tayoteña e'ñe po'ñoçhpa' o'ch señoeter tarro'mar te'pa' o' senter.

⁸ Felipeñapa' atet och:

—Partseshacha' pegatey ñeñt Apa, yapa' o' ñeñfama yepallta o'ch yeñoçh.

⁹ Jesúsñapa' atet och:

—Felipe, ahuatoteñ napa' allo'tseney parro. Pañapa' ¿ama't peñotenno? Ñeñt puentaren napa' Apa'naca'yeña o' enterret. Eso'mare'tña pñotenen o'ch negatapñ Apa. ¹⁰ Papa' ama'tña pñame'ñenno napa' e'ñe neparrocmaten epan Apa, Apapa'cho'ña e'ñe parrocmatenna. Ñeñt atet notenespa' ama no'taye' atet notenso. Apaña ñeñt neparrocmaten, ñapa' e'ñe etsotatennan ñeñt atet ne'pa'yen. ¹¹ Same'ña'na ñeñt notenes, napa' e'ñe neparrocmaten epan Apa, Apapa'cho'ña e'ñe parrocmatenna. Ama't napa' ama ame'ña'poye' sentenno tarraña atto po'ñoçh norrtatyehñañ Nompopor po'partsoña ama't ñeñtapa' same'ñyañaca'ye. ¹² Po'ñoçhca'ye o'ch notas, ñerra'm esesha' name'ñerraya ñetpa'cho'ña elloch atarr cohuen orrtatyerret ñeñt atet norrtatyen te'. Tarro'mar na te'pa' o'ch ahuerren Apuesho. ¹³ Ñerra'm escha' senamuen e'ñe na neso'chño e'ñe seyemteño'ten na, napa' e'ñech atet nepennas. Attochña na ñeñten Yompor Puechemerenpa' necohuentateññañcha' Apa. ¹⁴ Ñerra'm es senamuen e'ñe neso'chño e'ñe seyemteño'ten na, napa' e'ñech atet nepennas.

Atto Jesús'pa' otnerranet o'ch mueñuerranet Parets Puecamquëñ

¹⁵ Ñerra'm sa po'ñoçh semorrentennate'pa' o'ch same'ñerrnana neñoñ ñeñt atet notenes. ¹⁶ Napa' nenamonascha' Apa ñapa' apascha' po'psheñeñ ñeñtcha' soctape'chatterre' ñeñtcha'ña sechorrerraya errponañohuen.

17 Ñeñtña Yompor Puecamquëñ ñeñtcha'ña señotaterre' ñeñt e'ñe po'ñoçh Yompor poçtañña. Ñeñtña ama ame'ñetso arr patsropa' ñetpa' amach errotenoç chorrerranetoña Yompor Puecamquëñ tarro'mar ñetpa' ama enteñeto ñaña amach eñoteñeto. Tarraña sapa' o' señoter tarro'mar ñapa' allo'tsenes parro epas allcha' chorrerrsa. 18 Napa' amach cha nehuocchapotatnerrso. Ellochña alla nohuerrerr sesho. 19 O' mameshamerra palltenmeñ ñeñtña ama ame'ñetso arr patsro ñetñapa' amach eseshaye' nenterraye, tarraña sapa' çhocmach senterren. Tarro'mar napa' corretsana, ñeñto'marña sapa'çho'ña corretsasach. 20 Allempoch chorrerrsa Yompor Puecamquëñ allempochña señoter napa' e'ñe po'ñoçh neparrocmaten epan Apa, sañapa' separrocmaternach, nañapa' neparrocmatennasach. 21 Ñerra'm esesha' e'mñoterre' neñoñ ñaña e'ñech atet perret ñeñt atet notenanet ñetñapa' ñeñtet e'ñe po'ñoçh nemorrentenaya. Ñeñtña nemorrentenaya napa' ñetñapa' Apach atarr morrentenahuet. Napa'çho'ña atarr nemorrentenanet, nañapa' neñotaterranetcha' e'ñe po'ñoçh ñeñt atet pepena na.

22 Allempoña po'psheñeñ Judas ñeñt ama añeyaye Iscariote, ñañaapa' atet och:

—Partseshacha' yapa' ¿eso'mare'tcha'ña te'pa' o'ch peñotatey ya ñeñt atet pepena amachña añeye'ña peñotato ñeñt ama ame'ñetso arr patsro?

23 Jesúsñapa' atet oterraneterr:

—Ñerra'm esesha'ch nemorrentaya na e'ñechña atet perret ñeñt atet notenanet. Apañapa' atarrcha' morrentenanet. Ñeshetoñapa' yeçhapcha' attoch yeyçherra ñet pueyoçhreto.

24 Ñeñto'marña ñerra'm esesha' ama nemorrentayo amach atet perreto ñeñt notenanet. Añ ñoñets ñeñt atet se'muennan ñeñtpa' ama noyaye neñoñ, ñeñtpa' Apoña po'ñoñ ñeñt nellensene'.

25 'Añmapa' tarro'mar atet notenes tayepa'tñapa' allo'tsenmeñen na arr e'ñe sesho. 26 Tarraña Parets Puecamquëñ ñeñtcha' soçtape'çaterre', Apapa' mueñernascha' e'ñe na neso'chño e'ñe seyemteñoçen na. Ñapa' ñeñtcha' señotaterre'ña seyoçhro ora allohuen ñeñt çhocma neyçhatenes te'. Ñaña ñeñtcha' seyerpaterraya allohuen ñeñt atet notyesase't.

27 'Nocshateña nena'nernascha' alloch e'ñe socsherra seyoçhro, napa' çhochña atarr nocshaterres seyoçhro. Ñeñt atet nocshatenes na seyoçhro ñeñtpa' ama atteyaye ñerra'mrrate' añ patso'mar cosheñets. Ñeñto'marña

seyoçhropa' amach čha sellca'peno ama't mamesha, amach čha es semcha'teno. ²⁸ Te'pa' o' se'mhue atet o' notuas, na o'ch ahuerren, ellochña alla nohuerrerr sesho. Ñerra'm po'ñoçh semorrentennañ o'te' socshañ tarro'mar napa' o'ch ahuerren Apuesho. Tarro'mar ñapa' nanac ahuamencatesha', ello metanenen na. ²⁹ Te'pa' ama't ama etsotena', napa' o' notuas, allochñapa' ñerra'm esepoch etsoterra, sañapa' same'ñerach.

³⁰ 'Te' e'ñe parro'tseneypa' o'huañcha' allo'na neñosnen shonte' tarro'mar o' huapmocha oneñeñ ñeññ pa'mícha'tareter pen acheñenesha' arr patsro. Tarraña ama't o' huapañpa' e'ñe ñoñapa' amach errot posno. ³¹ Napa' añcha'ña atet neña ñeññ atet otenen Apa. Attochña acheñenesha' arr patsropa' eñochetcha' na po'ñoçhpa' e'ñe nemorrenteña Apa. Te'pa' satomcha't o'ch ahuey arrot.

15

*Jesús*pa' toma'ntata ñapa' ña uvachreçhmo'retets

¹ Jesúsñapa' alla yeçhaterraneterr ñapa' añ toma'ntata ña uvachreçhmo'retets. Ñeñño'marña atet otanet:

—Napa' na atten ñerra'mrrate' ñeññen uvachreçhmo'retets ñeññ e'ñe po'ñoçh cohuen sherbets. Nomporñapa' ña amre'tene' ñeññ uvachreçhmo'r. ² Sa ñeññes neyemtenaya na sapa' attes ñerra'mrrate' uvachmo'r puetaquër. Allohuen puetaquër erra'tsen ñeññ ama me'tetso, Nomporñapa' çhochña pecham̃psoñ puetaquër. Ñaña allohuen ñeññ me'tetspa' çhochña pechtacre'tyeset mamesha'tets attoch e'ñe cohuen e'shtacre'chet allochñapa' attoch atarrcha' nanac me'ten. ³ Ñeññ atet neserrpare'tatenes ñeññ neñoñpa' alloña o' sa'cohuentataretetua atet ñerra'mrrate' uvach o' e'ñe e'shtacre'tuet e'ñe cohuen. ⁴ Te'pa' attoña separrocmatenna attoña napa'çho'ña neparrocmatennasa. Atet pena tsachtaquër ñerra'm ama parrocmatenno pue'chorot amach me'to e'ñe ñoña, sapa'çho'ña ñerra'm ama separrocmatenno amach errotenot seme'toña saña e'ñe soña.

⁵ 'Napa' na atten ñerra'mrrate' uvachreçhmo'r pue'chor, sapa' sa puetaçres. Esesha' neparrocmaterre' ñaña napa' e'ñech neparrocmatenanet, ñeññcha'ña nanac me'tats. Ñerra'm a'yo'tsensa neshot amate' errotenot sorrtyatesoña ñeññ cohuen enten Yompor. ⁶ Esesha'ch ama neparrocmaterraye ahupore'tareçha' atet ñerra'mrrate' tsachtaquër ñeññ ama me'tetso çhochña pecha'tam̃psetña puetaquër o'ch e'ñe porrarrque'chua allempochña a'yapaçhetpa' o'ch chamuet tso allcha' poyua.

⁷ 'Ñerra'm separrocmaterrna ñerra'm çhocma soctape'chennan neñoñ escha' senamuen napa' napascha'.

8 Atto nanac cohuen seme'tenpa' ñeñtpa' allochña secohuentateññañ Nompor tarro'mar sapa' añcha' sorratyen ñeñt cohuen enten ña. Ñaña sapa' attochña eñoterres acheñenesha' po'ñoçh ñeñtes neyochreshas. 9 Atto Apapa' atarr nanac muerenna na, napa'cho'ña atarr nanac nemuerensa saña. Chocmuepa'ch seyemtennana ñeñt atto napa' chocma nemorrentensa. 10 Ñerra'm same'ñennana neñoñ ñeñt atet notenes e'ñech señotenen napa' atarr nemorrentensa. Atet nepena na e'ñe name'ñeññaña Nompor po'ñoñ ñeñt atet otenen, ñeñto'marña napa' e'ñe neñoteñ ñapa' atarr morrentenna naña.

11 'Añmapa' tarro'mar atet notenes allochñapa' ñeñt nocsheña napa' coshaterrescha' saña. Allochñapa' sapa' o'ch e'ñe socsherra e'ñe poctacma. 12 Añña ñeñt notenes: Atarrepach semorrentannena allohuenes atet nepena naña atarr nemorrentensa saña. 13 Añmapa' ñeñña e'ñe po'ñoçh morrenteñets, o'ch ya'rroya yañeña o'ch yerroma añecop ñeñt atarr yemorrentyena. 14 Ñerra'm e'ñe atet se'pohuen ñeñt atet notenes sañapa' ñeñtes e'ñe neyemtena. 15 Te'pa' o'huañ atteye' nentenes ñerra'mrrate' ñeñt ya'taruasañer yepen, tarro'mar ñeñt ya'taruasañer yepen ñapa' ama eñotenanoña ñeñt atet cotape'chen pamo'mte'. Tarraña na te'pa' e'ñe neyem nepenes tarro'mar ñeñt atet ne'mueññañ Apapa' sapa'cho'ña o' neñotaterres. 16 Sapa' ama saye' na'crreraye, napa' naña sa'crrer'e'ña sa. Attoña o' napuerresña llesens attoch seta me'tarsats attoch e'ñe cohuen es sorratyen ñeñt cohuen enten Yompor. Ñeñtpa' ñeñtcha' se'mer seperr ñeñña se'merpa' amach ahuañaña'terro ama't ahuata. Allochñapa' ama't erra'tsena senamueñ Apa e'ñe na neso'chño e'ñe seyemteñoten na, ñapa' apascha'. 17 Añca'yeña notenes: Chocmuepa'ch atarr cohuen semorrentannena.

Allempo Jesúsapa' eñotatan pueyochresha' chocmach e'moñe'tenanet acheñenesha' arr patsro

18 Jesúsña'p' alla o'terraneterr:

—Ñerra'm acheñenesha' añ patsro e'moñe'tenset sapa' señoche'pach na e'ñe nanom e'moñe'tenet. 19 Ñerra'm sa e'ñe parro attecmañeñ ñeñt ama ame'ñetso arr patsro, ñetña'p' e'ñete' cohuen muerensetañ tarro'mar e'ñeca'ye ñeñtena'tarecma. Tarraña sapa' ama e'ñe attecma'ye' separro'marneshacmateno atet pena allohuen acheñenesha' ñeñt ama ame'ñetso arr patsro. Sañapa' o' na'crreres ellonet nocop. Ñeñto'marña acheñenesha' añ patsropa' o' e'moñe'taset saña. 20 Seyerpach añ ñoñtsor ñeñt o' notuas:

“Allohuen ñeñt̃ yochreshats errottencha' perrñañet ñeñt̃ yochresha'tenahuet, ñetpa'cho'ña e'ñech attecma aḡaretterret ñamet.” Atto napa' coḡare'tennet pue'moñe'teñoḡetan, sapa'cho'ña pue'moñe'teñoḡetaspa' coḡare'tasetcha' saña. Atto napa' ama ame'ñerrnaneto neñoñ, sapa'cho'ña amach ame'ñerrnaseto saña señoñ. ²¹ Ñeñt̃pa' atetcha' perrset tarro'mar sapa' naca'ye same'ñena tarro'mar ama eseshaye' eñotenaye Yompor ñeñt̃ nellssense'.

²² 'Ñerra'm ama nohuapañe amach neser-
rpare'tatosanetañe, amate' eñallñeña attoch neyohua'yesanet
po'chñarotet. Ñeñt̃o'mar te'pa' ama eñalle attoch a'nasotet
po'chñaret. ²³ Ñeñt̃o'marña ñerra'm esesha' ne'moñe'tene'
na, Nompore'naña e'moñe'tennanet. ²⁴ Ñerra'm
amach norrtatanetañe cohuenñats ñeñt̃ ama't ahuata
po'psheññechnopa' ama orrtatanete'te e'ñe attotapa' amate'
eñallñeña attoch neyohua'yesanet po'chñarotet. Tarraña te'ña
ñetpa' ama't e'ñe entennetañpa' chaña e'moñe'tennet ñaña
Nompore'na e'moñe'tennanet. ²⁵ Tarraña ñeñt̃pa' tarro'mara
ateḡ penet allochñapa' attoch etsoterra ñoñets ñeñt̃ e'ñe atet
anuaret ahuatoteñ, ñeñt̃pa' atet oten nocop: “E'ñech attota
e'moñe'ternnet.”

²⁶ 'Ñeñt̃cha' soctape'chaterre' e'ñe cohuen seyoḡhro
ñeñt̃cha' nemñohuerrnas Apueshot. Ñeñt̃pa' ñeñt̃ña
Apa Puecamquẽñ ñeñt̃cha'ña señoḡaterre'ña ñeñt̃ e'ñe
po'ñoḡh Yompor poctapña tarro'mar ñeñt̃pa' Apueshot
huena. Ñerra'm esempoch ḡhaponasa ñachña na'potose'.
²⁷ Sapa'cho'ña sa'potancha' tarro'mar e'ñe allempoteñ
netorrosa, sapa' e'ñe allempoteñ parro'tseney.

16

¹ Ñeñt̃pa' tarro'marña o' atet notuas allochñapa' amach alla
ello sepurrerro. ² Tarro'mar esempopa' ḡhachpa' allempoch
huapore'tas judionesha' po'prahuot. Po'ñoḡh ḡhachpa'
allempo esesha'pa' ñato' o'ch muetsaset ḡhach otenapuetañ
ñetpa' allote' sherbeñetña Yompor. ³ Ñeñt̃pa' tarro'marcha'
ateḡ paset ñetpa' ama eseshaye' eñotenaye Apa ama't napa'
ama eñotenneto. ⁴ Añechnopa' o' notuas allochñapa' ñerra'm
esempoch ḡhach, sapa' seyerpuerrnanach ñeñt̃ atet notase't̃.

Atto Parets Puecamquẽñ ñachyoctape'chatyese' e'ñe cohuen
'Ahuañmo'cha añechnopa' ama notase'te tarro'mar
allempoteñpa' e'ñe parrocmā allo'tseney. ⁵ Na te'pa'
o'ch ahuerren allo'tsen ñeñt̃ nellssense'. Saña ama't
puesheñarrotēsapā' amaña sa'ḡto'tenno, errachña neserr.
⁶ Te'ña ñeñt̃ atet notenes saña seyoḡhropa' chaña atarr

sellquëna. ⁷ Te'pa' añ notenes ñeñt e'ñe po'ñoçh. Socoppa' añna nanac poctetsa napa' o'ch ahuerren. Tarro'mar ñerra'm amach neserro amate' errotenot huaponasoña Yompor Puecamquëñ ñeñtcha' soctape'chatterre' cohuen. Tarraña ñerra'm neserrcha' napa' añcha' nemñahuernnas Yompor Puecamquëñ ñeñtcha' soctape'chatterre' cohuen seyoçhro. ⁸ Ñerra'm esempoch huapa Yompor Puecamquëñ acheñenesha'ña arr patsropa' ñachña çhapatahuetña pueyoçhreto attoch eñoçhet ñet po'ñoçhepa't eñallet po'chñaret. Ñaña añcha'ña çhapatanet pueyoçhreto ñeñt e'ñe pocte' entyen Yompor. Ñaña añcha'ña çhapatanet pueyoçhreto attoch ñetpa' eñoteretcha' po'ñoçhpa' coñcheñtsach amñare'tterret ñeñt ama name'ñenayo na ñeñten Yompor Puechemeren. ⁹ Yompor Puecamquëñpa' eñotaterrancha' acheñenesha' po'ñoçh ñetpa' ama pocteye' entenaneto Yompor tarro'mar ama ame'ñenneto na ñeñten Yompor Puechemeren. ¹⁰ Ñaña ñach eñotaterrahuet ñeñt e'ñe pocte' entyen Yompor tarro'mar napa' amach allo'tsenarano sesho. Napa' o'ch ahuerren Apuesho amach alla senterrne'te. ¹¹ Paretsña Puecamquëñpa' ñachña eñotaterrahuet po'ñoçhpa' coñcheñtsach amñare'tterret ñeñt ama ame'ñetso tarro'mar oneñet ñeñt pa'mñcha'tareter pen shonte' acheñenesha' arr patsro, ñocoppa' e'ñe po'ñoçh anuaret amñare'tterrach coñcheñtso.

¹² 'Shontemeñ ñeñtcha' notaseñ tarraña te' sapa' amate' errotenot çhaponaso seyoçhro. ¹³ Tarraña ñerra'm esempoch huaponasa Parets Puecamquëñ, ñeñtcha'ña señotaterre' ñeñt e'ñe po'ñoçh Yompor po'ñoñ tarro'mar ñapa' ñachca'ye señotatene' ñeñt e'ñe po'ñoçh Yompor po'ñoñ ñeñt ama shequëñtsoyaye. Ñapa' amaca'ye e'ñe ñoña eñeno. Añca'yeña eñen ñeñt atet e'muen Partsesho. Ñapa' añcha' serrpare'tatas ñeñtcha' atet perra tsapatonet. ¹⁴ Ñapa' nachca'ye cohuentaterre'; e'ñe eñotennan ñeñt atet nepena na, ñapa' ñeñtcha'ña eñotatyerres. ¹⁵ Ora allohuen ñeñt atet pena Apapa' napa'cho'ña e'ñe atet nepena naña. Ñeñto'marña napa' notenes eñotennan ñeñt atet nepena na, ñapa' ñeñtcha' señotatyerre'ña samã.

Ñeñtña sellquëñapa' puenaserrach socsheña

¹⁶ Jesúsñapa' atet oterraneterr:

—Te'pa' mameshaña o'huañcha' allo'na sentnenen tarro'mar napa' o'ch ahuerren Apuesho. Tarraña sapa' e'ñe mameshapa' o'ch alla yentannerra.

¹⁷ Pueyoçhresha'ñapa' atet otanna'tyeset:

—¿Erroñente'ña añ ñeñto'mar atet oteneý, mameshamapa' o'huaño'ch allo'na yentneñ tarraña mameshapa' ahuo'ch alla yentannerra? ¿Erroñente'ña añ ñeñto'mar ñapa' atet oteneý, ñapa' ahuo'ch ahuer Pamporeho?

¹⁸ Alla otanna'tyenet:

—¿Eso'marte'ña atet oteneý, mameshamapa' o'huañcha' allo'na yentneñ? Amaca'yeña yeñoteñe este'ña oteneý.

¹⁹ Jesúsña eñotanet ñetpa' cho mueneñetañ o'ch a'pto'chet. Ñaña' otanet:

—¿Ñeñte'tña sotannena ñeñt atet notenes, o' mameshamña o'huañcha' allo'na sentnemen, tarraña mameshapa' o'ch alla yentannerra? ²⁰ Po'ño'chca'ye o'ch notas: Sapa' sellquëño'ipa' seyahuerrach. Acheñenesha'ña arr patsro ñeñt ama ame'ñetso ñetña' chach atarr coshet. Sapa' sellquërrach tarraña sellquëña sapa' puenaserrnasach socsheña. ²¹ Ñeñtpa' o'ch netma'ntatasa ñerra'mrrate' coyanesha' allempo cheññaña allempoch emare'ten, chach lleca tarro'mar o' chapoña allempoch atsotenana puechoyoretoll. Tarraña allempochña eñalletatuepa' o'ch alla atarr cosherra o'ch pueserranña atto atarr llecach pue'mare'toll, elloñapa' atarrcha' cosherra tarro'mar o' eñalletatuan pue'mare'toll arr patsro.

²² Jesúsña alla otterrannerr pueyochresha':

—Te'ña sapa' nanac llequëntso'tsenes, tarraña elloñapa' o'ch alla yentannerra. Allempoña sapa' o'ch alla atarr socsherra seyochro. Ñeñtña socsheñapa' ama't e'ñe puesheñarra amach errotenot puerratañperrseto.

²³ Allempopa' amach sepallteno o'ch alla es sa'pto'terrnerr. E'ñe po'ño'ch te'pa' o'ch notas: Ñerra'm es senamueñ Apa e'ñe na neso'chño e'ñe seyemteño'en na ñaña' apascha' ñeñt senamueñ. ²⁴ Sa teme'ttsenpa' ama es senamueno e'ñe seyemteño'en na e'ñe neso'chño. Te'ña ñerra'm senampa' saga'pcha' allochñapa' o'ch socsha e'ñe poctacma.

Atto Jesucristo a'mchechatuerran allohuen ñeñt e'moñe'tene' Yompor arr patsro

²⁵ 'Ñeñt allpon neserrpare'tatyese't ñeñtpa' e'ñe toma'nteñtso'chno notyese't. Tarraña chapcha' esempo allempopa' amach alla neserrpare'taterrserro toma'nteñtso. Allempopa' añcha' neserrpare'tatas Apacop ñeñtpa' amach toma'nteñtsoyaye, allochñapa' e'ñech seño'tue. ²⁶ Allempopa' senamueñcha' Apa e'ñe seyemteño'en na e'ñe neso'chño. Allempopa' amach pallteno o'ch nema'yochamñensa Apuesho. ²⁷ Apañapa' atarrcha' morrentensa atto sapa' semorrentenna, e'ñe seyemtenna atto napa' Apueshot nohuapa. ²⁸ Po'ño'ch napa' Apueshot nohuapa, o' nechap

añe patsro. Elloñapa' o'ch alla nesa'nerr añ pats, o'ch alla ahuerrren Apuesho.

²⁹ Pueyochresha'ñapa' atet ochet:

—Te'ñapa' ama toma'nteñtsoye' peñeno ñeñto'marña yapa' e'ñech yeñotue. ³⁰ Te'pa' yeñoteneþ þapa' ñeñteþ eñotuene' ora allohuen esocmañen. Ñeñto'marña yapa' amaca'ye pallteno o'ch alla ya'þto'terrperr po'poñoneñ. Tarro'mar te'pa' yeñoteneþ þapa' Partseshoþ pehuapa.

³¹ Jesúsñapa' atet oterraneterr:

—Sapa' taya'tña o' same'ña'na. ³² Te'pa' o' e'ñe çhapmoch sa ama't puesheña'ttsospa' o' çhaponasañ çhach sematrra'tyesa allemeñ. Chach sahanomyesa allcha' semna'yesa. Nañapa' sa'ypo'ña'huanmuencha'. Tarraña napa' ama e'ñe napteyaye, epañña Apa. ³³ Ora allohuen añeçhnopa' o' e'ñe notuas allochñapa' e'ñe seyemteñoñen napa' çhocmach socshena seyoçhro. Po'ñoçh añ patsropa' çhocmach semueroçhtena. Tarraña e'ñe seyoçhro sapa' çhocmuepa'chña socshena tarro'mar napa' o' na'mchechatue allohuen ñeñt e'moñe'tene' Yompor añe patsroñ.

17

Allempo Jesúsapa' ma'yochamþenana pueyochresha'çhno

¹ Allempoña atet otuanet añeçhno Jesúsapa' allenta cohua' enonetpa', ñeñtapa' atet otan Pompor puema'yocheñoñ:

—Apacha' te'pa' o' çhapona allempoch etsota ñeñt nocop. Te'pa' pecohuentatonepa'ch na tarro'mar Pechemer pepenen allochña napa'çho'ña necohuentatonaþcha' þañña.

² Atto þapuen llesenspa' alloña pomnaren nepeñña allohuen acheñenesha'. Allochñapa' allohuen acheñ ñeñt þo'patatenna, naña ñetpa' napuenanetcha' alloch ñetpa' corretsetach pocsheñeshocmañen tayoteñ e'ñe errponañohuen. ³ Añmapa' ñeñtña alloch ñetpa' corretsetach tayoteñ e'ñe errponañohuen ñerra'm esempo eñoterrpet þa ñeñteþ þapuet e'ñe po'ñoçh Yomporetets ñaña ñerra'm eñoterrnet na ñeñten Jesucristo þa pellsensaren.

⁴ Napa' o' e'ñe necohuentatuonaþ arr patsro. O' e'ñe netsotuonaþ ñaña petaruas ñeñt atet þoten. ⁵ Te'ña Apacha', pecohuentaterrnanepa'ch e'ñe alla pesho e'ñe atet allempo atarr a'cohuentatareñen pesho ahuat allempo ama eñalletena' añ pats.

⁶ 'Allohuen acheñ ñeñt neyochresha' peþatenen nañapa' añ neñotatenanet ñeñt atet pepena þa tarro'mar ñetpa' ñeñtet e'ñe allpona þo'patatna arr patsro. Ñetñapa' pepa'tña o'patenahuet ñeñtcha' neyochresha' peþaten naña.

Te'ña ñetpa' e'ñe ame'ñerrnapet peñoñ. ⁷ Ñaña ñetpa' e'ñe eñotueñet allohuen ñeñt atet ne'ñorenanet ñaña ñeñt es norrtatyenanetpa' ñeñtpa' e'ñe ora peshotecma huena. ⁸ Napa' añña ne'ñorenanet ñeñt atet potenen pa. Te'ña ñetpa' e'ñe cohuen ame'ñennet. Ñaña e'ñe po'ñoçh eñoteñet napa' e'ñe peshot nohuapa, pa ñeñteþ nellsenserre'.

⁹ 'Te'ña napa' o'ch nema'yochamþesnomanet ñet. Ama allohuenacpaye' acheñenesha' arr patsro nema'yochenþo, e'ñe añecpa nema'yochenþa ñeñt neyochresha' peþatenen tarro'mar ñetpa' ñeñtareta peyochresha' pepen paña. ¹⁰ Tarro'mar allohuen ñeñt e'ñe nocmapa' papa'cho'ña e'ñe þocma. Ñeñña e'ñe þocmapa' napa'cho'ña e'ñe nocma. Ñetña te'pa' e'ñe cohuentatapretennet.

¹¹ 'Te'ña nocoppa' o' çherrmoch e'ñech ñeñteshaña añe patsro'tsenen tarro'mar napa' o'ch alla ahuerren pesho. Tarraña ñetpa' allo'tsenaretach arr patsro. Pa Apa Partso, pecuamþsepa'ch allohuen ñeñt neyochresha' peþatenen. Pehuamenco'tcha'ña pecuamþsanet. Allochña ñetpa' o'ch e'ñe parrocmatet e'ñe atet yepena yaña. ¹² Allempoteñ e'ñe parro'tseney þoña pehuamenco't necuamþsanete't. Napa' chocma nemoñenanet. Ñeñto'marña ama't puesheñarroteta ñetpa' ama na'chencataneto, ñapña chenca añ ñeñt o'patena chenquëñets. Ñeñtpa' attochña Apa etsoterra peñoñ ñeñt anuare't ahuatoteñ.

¹³ 'Tarraña te' napa' o'ch ahuerren pesho. Napa' añecopña neñen añeçhno añ patsro attoch ñetpa' atarrcha' cosherret pueyoçhreto e'ñe atet nocshena na. ¹⁴ Napa' añ ne'ñorana'tenanet ñeñt e'ñe þo peñoñ. Acheñenesha'ña ñeñt ama ame'ñetso añ patsro, ñetña' cha e'moñe'tenanet tarro'mar ñetpa' ama allo'na parro'marneshateneto ñeñt ama ame'ñetso, atet nepena naña ama neparro'marneshatenaneto. ¹⁵ Ama añeye' nenamuenpe attoch þahuananeta' añ patsro't, añña nenamueneþ o'ch pecuamþsanet. Amach pemnatatsche oneñe't o'ch alla a'puerrataterranet. ¹⁶ Ñetpa' ama allo'na parro'marneshateñeto ñeñt ama ame'ñetso arr patsro atet nepena naña ama neparro'marneshatenaneto. ¹⁷ Pame'ñeño'tet pa peñoñ pa'cohuentamþsanetepa'ch e'ñe þocop. Pa peñoñpa' ñeñña e'ñe po'ñoçh ama shequëñtsoyaye. ¹⁸ Atto pa pemñan na arr patsro, te'ña napa' o'ch nemñanet ñamet attoch serrpare'tatyaset acheñenesha' arr patsro. ¹⁹ Ñeñto'marña ñocpuet nañapa' o' na'rroyerra þocop, attochña ñetpa'cho'ña a'cohuentataretterretcha' Partsocop. Ñeñtpa' e'ñe po'ñoçh atet poteney pa peñoñot ama shequëñtsoyaye.

²⁰ Tarraña amach e'ñe añecpa nema'yocho ñeñt e'ñe neyochresha' nepen te', añecpa'nachña nema'yocham̄pesnoma allohuen ñeñtcha' name'ñerraya tsapatonet e'ñe neyochresha' po'ñoñoñ. ²¹ Allochña allohuenetpa' parrocmatetcha' atet pepena pa Apa e'ñe peparrocmatennana ñaña napa' e'ñe neparrocmatennaña. Allochña ñetpa' o'ch e'ñe parrocmaterryet e'ñe parro epay. Attochña acheñenesha'ña arr patropa' ñetñapa' eñoteretcha' pa ñeñteḡ nellsenserre'. ²² Atet pepena pa pecohuentapretena napa'cho'ña e'ñe necohuentapretenanet ñet, attochña'ña ñetpa' e'ñech parrocmatet atet yepena yaña e'ñe yeparrocmaten. ²³ Napa' neparrocmatenanet, pañapa' peparrocmatenna. Allochña allohuenetpa' e'ñech parrocmatuenet e'ñe poctacma. Attoch acheñenesha' arr patsro ñetpa' eñoteretcha' papa' pa nellsenserre'. Ñaña eñoteretepa'ch papa' atarr pemorrentenanet e'ñe atet atarr pemorrentenna na.

²⁴ 'Apacha' allohuen ñeñt peyochresha'tatenna na, napa' añ nemnen erro'tsenencha' ñetpa'cho'ña allo'tsenacmayepa'chña e'ñe parro. Allochña'pa' attoch enterrnanet necohuenña allo o' alla pecohuentaterren na, tarro'mar papa' pemorrentenna allempoteñ ama ayeçcatarettena' añ patser. ²⁵ Apa, pa ñeñteḡ e'ñe pocte' es pets, acheñenesha' ñeñt ama ame'ñetso arr patsro ñetpa' ama eñotenpeto. Nañapa' e'ñe po'ñoçh neñotenḡ. Añña ñeñt e'ñe neyemtenaya ñetñapa' eñotenpet papa' pa nellsensene'. ²⁶ Napa' naña e'ñe eñotatenahuet ñet ñeñt atet pepena pa. Ellopa' allach neñotaterraneterr. Allochña'pa' ñetpa'cho'ña e'ñech morrentanna'terret e'ñe atet pepena pa atarr pemorrentenna na. Attochña napa' e'ñech neparrocmatenanet ñet. Ñeñt'pa' allohuach nema'yochaña Nompore.

18

Allempo rromoset Jesús

(Mt. 26.47-56; Mr. 14.43-50; Lc. 22.47-53)

¹ Jesúsña allempo ma'yochuanmapa' allenta ahuanman pueyochresha' o'ch ahuanmuet yom̄ta'n amañesre'to. Ñeñt amañesre'te'pa' añ pa'so'cheñ Cedrón. Allña yom̄ta'npa' allo'tsen narmetsma', all çapña Jesús epuet pueyochresha'. ² Nehua, Judas ñeñtcha' pomuerre' Jesús ñapa' e'ñe puentarña all, tarro'mar ahuañmo'çoteñ Jesús'pa' allecma apçhatenan pueyochresha'. ³ Judasña'pa' allenta anman solltarnesha' ñaña guardianesha' ñeñt mueñen fariseonesha' ñaña ñeñt pa'mcha'tareternesha' pen allohuen judionesha' po'cornaneshar. Ñetñapa' çacha'tet all elampañeñareret.

Orra'yesnenet ñaña po'urare. Orra'yesnenet ñaña alloch quellaret. ⁴ Jesúsñapa' e'ñe eñoteñ ora ñeñtcha' çhapoya allempo. Ñaña poctanetpa' atet otapanet:

—Sapa' ¿essha'tña se'nen?

⁵ Ñetñapa' atet otoset:

—Añca'ye ye'nen Jesús ñeñt nazareto'marnesha'.

Ñaña' alla oterraneterr:

—Napa' añenca'ye.

Judas ñeñt pomue'pa' ñapa'çho'ña allo'tsen. ⁶ Allempo otenanet Jesús: “Napa' añenca'ye”, ñetñapa' o' cheterret pa'che'ñone'tpa' allepa'tcha' a'trra'tet. ⁷ Elloñapa' alla oterraneterr:

—¿Essha'tña se'nen?

Ñetñapa' alla otereterr:

—Yapa' añ ye'nen Jesús ñeñt nazareto'marnesha'.

⁸ Jesúsñapa' alla oterraneterr:

—Napa' o'ca'ye notuapas napa' añen. Ñerra'm nate' se'nenpa' neyochresha'ñapa' semnatanet ñetpa' o'ch ahuanerret.

⁹ Ñeñt'pa' tarro'mar atet ot allochñapa' attoch etsota Jesús po'ñoñ atet o' otuanom: “Ñeñt allpon neyochresha' pe'patenen napa' ama't puesheñarrapa' amach na'chencache.”

¹⁰ Allempoña Simón Pedro ñeñt occhelle'tpa' ñaña'pa' po'cchella cheta'pa' o'ch çhonto'tapanen cornesha' pueñañra puetepa'tcha' tsorroñ. Ñeñt'pa' añ pa'so'cheñ Malco, ñeñt'pa' año pueñañra ñeñt pa'm'cha'tareter pen allohuen judionesha' po'cornaneshar. ¹¹ Tarraña Jesús'pa' atet otan Pedro:

—Pesha'terr p'occhell allecma peneñ. Pocte'ca'ye o'ch çhapon a ñeñt amueroçhtatañ* tarro'mar ñeñt'pa' atet muenatenen Nompör.

Allempo anmet Jesús allo'tsen ñeñt pa'm'cha'tareter pen allohuen judionesha' po'cornaneshar

(Mt. 26.57-58; Mr. 14.53-54; Lc. 22.54)

¹² Allempoña solltarnesha' epuet po'ca'ptáner ñaña judionesha' po'guardianeshar ñetñapa' rromoset Jesús'pa' o' huanquët. ¹³ Ñanompa' arr anmet allo'tsen Anás, tarro'mar ñapa' ñeñt Caifás pa'go'. Ñeñtña Caifás'pa' ña pa'm'cha'tareter pen allohuen judionesha' po'cornaneshar allempo ñeñte chararo. ¹⁴ Caifás'pa' ñapa' ñeñtña co'tape'chataye't judionesha' allempoteñ o'pateñet Jesús, ñeñt'pa' atet otanete't: Añ poctetsa puesheñarr ñeñt acheñerpa' o'ch rroma allohuen acheñeneshacop.

* **18:11** Ñeñt amueroçhtatañ ñeñt'pa' po'ñoçh ñeñt'pa' añ atma'ntataret ñerra'mrrate' ñeñt atarr pesherr yorren orran'tso.

*Atto Pedropa' a' nasotana Jesús**(Mt. 26.69-70; Mr. 14.66-68; Lc. 22.55-57)*

¹⁵ Simón Pedro ñaña po'psheñeñ pueyochresha' ñetñapa' cota'nmet ñamet Jesús chenta'. Ñeñña puesheñarrpa' e'ñe cheme'teñ cornesha' ñeññ nanac amcha'tarettetsa allempo. Ñapa'cho'ña o' be'tososet epuet Jesús all aconcha'tam̄psarettena cornesha' po'pamp. ¹⁶ Pedroñapa' alla tomos a'yoť allot be'tenet. Po'psheñeñña pueyochresha' ñeññ e'ñe cheme'ten cornesha' ñeññ nanac amcha'tareť, ñaña'pa' cha'nerr a'yoť, allñapa' eñosuerr epuet coyanesha' ñeññ cohuene' yetarr. Allempoñapa' errana' ñaña Pedro. ¹⁷ Coyanesha'ña ñeññ cohuene' yetarrpa' atet otapan Pedro:

—¿Ama't p̄apa'cho'ña pueyochresha'te'ca' penepña añ en-caneshar?

Ñaña'pa' atet otos:

—Napa' amaca'ye pueyochreshayayno.

¹⁸ Ñeñña taruaset all epuet guardianesha' ñetñapa' all tsoma'tenet quellmesha, a'huortatenet tarro'mar allpa' nanac senteten. Allña tomchenet all shotenet. Pedropa'cho'ña allo'tsen all shotena ñaña.

Allempo Jesús'pa' a'p̄to'tare'teñ cornesha' ñeññ nanac amcha'tarettetsa

(Mt. 26.59-66; Mr. 14.55-64; Lc. 22.66-71)

¹⁹ Cornesha'ña ñeññ nanac amcha'tarettetsa, ñapa' allenta a'p̄to'tapan Jesús pueyochreshacop ñaña añecop ñeññ atet yechatyen. ²⁰ Jesúsñapa' atet otos:

—Napa' ama a'nahuayaya neserrpare'tateñe acheñenesha' arr patsro. Chocma neychatyen judionesha' po'prahuo'mar ñaña Parets pa'pacillo allecma shontena judionesha'. Ama't parrochapa' ama esempo neñosoña a'nahua. ²¹ Eso'mare'tña nañeña p̄a'p̄to'ten. Añcha'ña p̄a'p̄to'tyes ñeññ ne'maye't erro'tente' neserrpare'tatyesanete't. Ñetpa' eñoteñette'ña ñeññ atet notyesanete't.

²² Allempoña atet otuanet Jesús'pa' puesheñarrña guardia ñeññ allame'tto'tsenapa' ñaña'pa' allenta tacle', atet och:

—Amarramch' atteye' yanapueñeña cornesha' ñeññ nanac amcha'tareť.

²³ Jesúsñapa' atet och:

—Ñerra'm añte' neñen ñeññ ama cohuenayayepa' p̄oten all ama cohuenaye' neñeno. Ñerra'm cohuenta' neñenpa' eso'marte'ña petacllenen.

²⁴ Allempoña Anás'pa' allenta mueñe e'ñe ehuanca'reť pa'ñachoresho Caifásesho. Ñeñña Caifás'pa' ñeññ e'ñe pa'mcha'tareťer pen allohuen judionesha' po'cornaneshar.

Allempo Pedropa' alla a' nasoterranerr Jesús
(Mt. 26.71-75; Mr. 14.69-72; Lc. 22.58-62)

²⁵ Simón Pedroña'p' alla ten all shotena. Ñetña'p' atet ochet:
—Papa' cho'ña ¿ama't pueyochresha' penpe?

Ñaña'p' cha a' nasochapa' atet ot:
—Napa' amaca'ye.

²⁶ Cornesha'ña ñeñt nanac amcha'taret puesheñarrña ñeñt pa'taruasañer ñeñt pamo'ts tsorrqueta't Simón Pedro, ñaña'p' atet och:

—Napa' ¿ama't pa nentoña narmetsmo? Papa' allo'tsene'pca'ye.

²⁷ Pedroña'p' alla a' nasotererr. E'ñe allempocmaña eñen atollop.

Allempo chapata'mueñet Jesús allo'tsen amcha'taret Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Allempoña Jesús'p' anereterr Caifásesho't. E'ñe ahua'ecma anma'mueñet amcha'taret po'palaciopahuo. Ñeñtña amcha'taretpa' ñeñt nen gobierno' Romo't ñeñt amcha'tarettetsa allo'marneshacop. Allohuen judionesha' ñetña'p' ama be'tososeto amcha'taret pa'paclo tarro'mar ñeñt amcha'taretpa' romo'marnesha' ama judioneshayaye allochña ñetpa' año'ch cha a'sosyateto ñañeñeta Partsocop esheccha' e'ñe cohuen rrallme'chet pascuapo. ²⁹ Ñeñto'marña Pilatopa' cha'nmanet a'yo't allo'tsa'yenet, atet otapanet:

—¿Erro'feno'te'tña sotteñe'cheñña añ acheñer?

³⁰ Ñetña'p' atet otyesoset:

—Ñerra'm ama añ pa'yeno ñeñt ama pocteyayepa' amate' erroteno't o' yehuapacheñeña pesho.

³¹ Pilatoña'p' atet oterraneterr:

—Chosa sañeña anmue' sachña ente' erro'tente' ñeñt atet pena ñeñt atet anaret ñoñets socop attotcha' sotteñe'ch.

Judionesha'ña'p' atet otyeset:

—Yocop ñeñtey judioneshaypa' ama pocteyaye o'ch yemt-sach acheñ ama't puesheñarra.

³² Ñeñto'marña ñetpa' atet otyeset allochña'p' attoch etsota Jesús po'ñoñ atet otuanet ahuaña allempo ñanom eñotatanet ñapa' corsochoch rroma. ³³ Allempoña Pilatopa' alla be'terrerr pocollo. Ñaña'p' agotatan Jesús'p' atet och:

—Papa' ¿pa't amcha'tarettetsaña judioneshacop?

³⁴ Jesúsña'p' atet och:

—Añpa' ¿e'ñe't pōta pōteneña atet, ñato' esesha'te' pōteneña añ nocop?

³⁵ Pilatoña'p' atet otererr:

—Napa' amaca'ye judioneshayayno, ama es neñotenoña socop. Paña pamo'tsna'tar ñaña ñeñt pa'micha'tareternesha' pen judionesha' po'cornaneshar ñetña te'pa' o' pomuerrpet nesho. ¿Eso'tña pepen ñeñt ama't mameshapa' ama pocteye' entapretenpeto?

³⁶ Jesúsñapa' atet otererr:

—Atto na'micha'tarettena napa' ama aña patsroyaye. Ñerra'm aña patsrach na'micha'tarettenaña' allempoña neyochreshachnopa' moñsa'netañcha', allempopa' amach pomnoñeña judionesha'. Tarraña atto na'micha'tarettena napa' ama arro'marecpayaye.

³⁷ Pilatoñapa' atet otererr:

—Ñeñtepñapa' pepa'tca'yeña amicha'taret.

Jesúsñapa' atet otererr:

—Na po'ñoçhpa' amicha'taretenca'ye e'ne atet potenen pa. Napa' ñeñto'marña ne'ñalletosa aña patsro attoch nach a'potose' ñeñt e'ne po'ñoçh Yompor poctaþña. Allohuen ñeñt muenene' ñeñt e'ne po'ñoçh Yompor poctaþña, ñetñapa' e'mñotennet.

³⁸ Pilatoñapa' alla otererr:

—¿Erra'tsena'tña ñoñets ñeñt e'ne po'ñoçh?

Atto amicha'taret Pilatopa' otanet ama'tpa' çhosa muetse'ña Jesús

(Mt. 27.15-31; Mr. 15.6-20; Lc. 23.13-25)

Ñeñta otuapa' o' alla cha'nerrerr allo'tsa'yen judionesha'. Allñaapa' atet otuerranerr judionesha':

—Napa' amaca'ye nenteññañeña ñeñt atto ama pocteye' es peno attoch yemtsatach. ³⁹ Tarraña atet seyçhenpa' e'ne pate'tets char allemPOCH çherrerr pascuapo nañapa' çhocmach na'rroyernnas puesheñarr socop ñeñt ayottamþsarettetsa allemPO, ñeñtara ñeñt samo'ts sepen. Te'pa' ¿añe't semnen o'ch na'rroyernnas ñeñt Sa'micha'tareter sepen sa ñeñtes judioneshas?

⁴⁰ Allempoña ñetpa' puerrannarteñoçetpa' atet otyeset:

—Tarraña Jesúsapa' amach þa'rroyatsche, añaña þa'rroyernay Barrabás.

Ñeñtña Barrabásapa' ñeñt atarr aprratañþsañtetsa.

19

¹ Allempoña Pilatopa' atet otan po'solltar-renesha':

—Te'pa' o'ch sanemñ Jesús allcha' sashte'.

² Solltarnesha'ña pa'llocchame'teñoçet Jesúsapa' pellta'toñet choyo'mets agreçh ñeñtña choyo'mtachet ñeñt atet choyo'mtena ñeñt po'ñoçh amicha'tarettetsa. Chorrachet

ñaña shetamuets ñeñt quelluemamueno tsamamtena ñeñt pa'shtam pen ñeñt po'ñoçh amcha'tarettetsa.
³ Pa'llocchame'teñoŕetpa' e'ñe atet p̄achet ñerra'mrrate' ñeñt po'ñoçh amcha'tarettetsa. Allña ponem̄yetpa' pachm̄are'teñoŕetpa' atet oteñet:

—Puetare' amcha'taretecha', atarruaca' cohuenep̄te' p̄a ñeñt̄ep̄ judionesha' pa'm̄cha'taretereŋ.

Allña'pa' taclapecheñet.

⁴ Pilatoña'pa' alla cha'nerrerr allo'tsa'yen judionesha'. Allña'pa' atet oterraneterr:

—Secue', te'pa' o'ca'ye alla nehuapaterrnaserr Jesús allochña'pa' o'ch señoçh napa' amaca'ye nenteññañeña ñeñt atto ama pocteye' es peno attoch yemtsatach.

⁵ Allempoña cha'nom ñaña Jesús achoyo'm̄tataret agreçh ñeñt apellta'taret, achorratareta ñaña shetamuets ñeñt quelluemamueno tsamamtena. Pilatoña'pa' atet oterraneterr:

—Secue' añca'yeña ñeñt yacmar.

⁶ Ñeñtña pa'm̄cha'tareternesha' pen allohuen judionesha' po'cornaneshar ñaña guardianesha' allempoña ñetña eñchetpa' puerranarotetpa' atet otyeset:

—Ñapa' ¡pecorso'tam̄psachñaca'ye!

Alla oterete't:

¡Pecorso'tam̄psachñaca'ye!

Pilatoña'pa' otterranneterr:

—Añca'ye seña', sañeña corso'tam̄pse' tarro'mar napa' amaca'ye nenteññañeña ñeñt atto ama pocteye' es peno attoch yemtsatach.

⁷ Judionesha'ña'pa' atet otereterr:

—Yapa' yechenca'ye paterr ñoñets ñeñt atet anaret. Ñeñtña ñoñetspa' atet oteney añ poctetsa ñapa' çhocmach rroma tarro'mar ñapa' pachm̄are'teñoŕ oten ñapa' ño' Parets Puechemer.

⁸ Allempoña Pilato e'man atet ñoñetspa' cha yoruen. ⁹ Alla be'terrerr pocollo atet otuerranerr Jesús:

—Papa' ¿erro'marneshape'tña p̄a?

Jesúsña'pa' ama anape.

¹⁰ Pilatoña'pa' alla otererr:

—Amahuachñaca'yeña p̄anapnote'. ¿Ama't peñoteñeña napa' allsensareten attoch na'rroyerrep̄, allsensareten ñaña attoch necorso'tam̄perrep̄?

¹¹ Jesúsña'pa' atet otererr:

—Amach errotenoŕ peŋa'noñeña ñerra'm ama Yompor p̄apayñe llesens atet. Ñeñto'marña ñeñt nepomue' peshopa' ñetpa' ello metanennapet p̄o'chñar.

12 Elloña Pilato atarr mueneñeñ o'ch a'rroyerran Jesús tarraña judionesha'ñapa' puerranarotetpa' atet otyerreterr:

—Ñerra'm añ p̄a'rroyerrpa' p̄apa' ama pemno o'ch p̄a'mcha'tareter pepe' ñeñt̄ atarr añcha'tarettetsa Romo. Tarro'mar allohuen ñeñt̄ ñañeña netsa añcha'taretpa' chocma mueneñ o'ch atpare'teñet ñeñt̄ atarr añcha'tarettetsa Romo.

13 Pilatoña allempo e'man ñeñt̄ atet otenet allenta cha'nmaterran Jesús a'yot̄ ñañapa' anorruerr all po'conaño allecma a'pocstatenan ñoñets, ñeñt̄ otenet Mapyeten. Hebreyachopa' oteñet Gabata. 14 Allempopa' añe yetro allempo añño'tena judionesha' ñeñt̄ attecma penet pascuapo. O'ña chap pocstapa', Pilatoñapa' atet oterranerr judionesha':

—Secue'ñaca'yeña añ ñeñt̄ sa'mcha'tareter sepen.

15 Ñetñapa' alla rrannarterreterrpa' atet otyerreterr:

—¡Ñapa' chepa' rromats! ¡Pecorso'tam̄psachñaca'ye allcha' rroma!

Pilatoñapa' atet oterraneterr:

—Sapa' ¿at̄t̄t̄ semnen o'ch necorso'tam̄psonas sa'mcha'tareter?

Ñeñt̄ña pa'mcha'tareternesha' pen allohuen judionesha' po'cornaneshar ñetñapa' atet otyeset:

—Yapa' amaca'ye eñalleña po'poñ ya'mcha'tareter, ñap̄ñaña ya'mcha'tarete yepen ñeñt̄ atarr añcha'tarettetsa Romo.

16 Allempoña Pilatopa' apañet Jesús attoch corso'tam̄pset. Ñetñapa' anmet allcha' corso'tam̄peñeta'.

Atto corso'tam̄psoset Jesús

(Mt. 27.32-44; Mr. 15.21-32; Lc. 23.26-43)

17 Atto sen Jesús allpa' anenan po'corsoch. Chapachet all oteñet Poñetallepno, ñeñt̄ otenet hebreyacho Gólgota.

18 Allña corso'tam̄psoset epuet ñaña epsheña acheñ. All corso'tam̄psetpa' rochtam̄psatoset epsheña. 19 Pilatoñapa' quellcatan ñoñets ñeñt̄pa' atet ot: “Añmapa' Jesús ñeñt̄ nazareto'marnesha' ñeñt̄ Pa'mcha'tareter pen judionesha'.” Ñeñt̄ña ñoñetspa' e'ñe corsocho ne'. 20 Shonte' judionesha' ñeñt̄ lleya'yese' ñeñt̄ quellec tarro'mar all corso'tam̄psetpa' e'ñe allame'ttsa anetso. Ñeñt̄ña quellecpa' e'ñe mapo'mar ñoñets aquellcaretta —hebreyach, griegaçh ñaña latinaçh, e'ñe attecma oten. 21 Ñeñt̄ña pa'mcha'tareternesha' pen allohuen judionesha' po'cornaneshar ñetñapa' atet ochet Pilato:

—Amachca' pequellcatstoña atet. Añcha'ña pequellca' ñocop, “ñapa' ñañeñaca'ye otetsa judionesho' Pa'mcha'tareter.”

22 Pilatoñapa' atet otanet:

—Ñeñt̄ o' nequellcatuapa' o'ca'ye aquellca'huaretta.

23 Allempoña corso'tañpesuet Jesús'pa' solltarnesha'ñapa' yoroñet ñeñt chorrena. Apanna'tyeset puema'tets pa'tatssheño'maret. Ñeñña pa'shtampa' ama eñalle all sepchena, ora apomotaret e'ñe patrra shetamuets e'ñe poñe'moteñ. 24 Ateť otanna'tyeset:

—Amachca'ye yerrarratsche, čhochña yeyellsheñe'chatoñ pa'shtam yesuertot attoch orrra erra'tsenoteycha'yore'.

Ñeñtpa' tarro'mar atet pohuet allochñapa' attoch etsoterra Yompor po'ñoñ ñeñt atet anuaret ahuatoteñ, ñeñtpa' atet oten: "Ñetpa' apanna'tyerretcha' ñeñt nechorrena. Neshtamñapa' yellsheñe'chatonetcha' po'suertot attoch orrra ñeñtcha'yore'." Ñeñtpa' atet o' e'ñe perra solltarnesha'.

25 Allña e'ñe allame'tets Jesús po'corsochopa' all tomčhen coyanesha'. Allo'tsen pachor, ñaña pachor pa'mo'nerr, ñaña po'psheñeñ María ñeñt Cleofas puetapor, ñaña María Magdalena. 26 Jesúsña entan pachor ñaña pueyochresha' ñeñt nanac morrentena all tomčhenet allame'tets. Allñapa' atet otan pachor:

—Achocha' añca'yeña pechoyor.

27 Allempoñapa' atet otan ñeñt pueyochresha':

—Añca'ye ñeñtcha' p̄pachor pepa'.

Allempoña ñapa' anerran Jesús pachor e'ñe ña pa'paclo allcha' cohuanpes.

Atto rroma Jesús all po'corsocho

(Mt. 27.45-56; Mr. 15.33-41; Lc. 23.44-49)

28 Allempoña Jesús'pa' o' eñoch o' etsotua ora allohuen ñeñt ñocop, ñaña'pa' atet ot:

—Cha no'ñpa'ten.

Ñeñtpa' tarro'mar atet ot allochñapa' attoch etsoterra Yompor po'ñoñ ñeñt atet anuaret ahuatoteñ.

29 Allñapa' allo'tsen pajo' all chorre' chase'. Allña e'čhomuetña ñeñt atsotso'tpo'. O'ña tsotso'tatuet ñeñtñapa' net tsachpo ñeñt otenet hisopochep alloña chapachet Jesús puenamo. 30 Allempoña Jesús'pa' agapan chase' ñaña'pa' atet oterrrer:

—Te'ñapa' o' e'ñe etsotuerra allohuen ñeñt atet anaret nocop.

Allempoña o' epapa' čha rromats.

Allempo puesheñarr solltarpa' enos po'panmeto puepotot

31 Allempopa' o' chap allempoch añño'terrerr judionesha' tsapatēcop allempocma amesenet. Ñeñto'marña ñetpa' ama pocteye' eñcheto o'ch alla ellapen ñeñtcha' rromanatats corsocho añ yetro allempo amesenet. Ñeñña yetro allempo amesenet o'ch alla atarr cosherreterr ñaña

pascua. Ñeñto'marña Pilatopa' enamueñeta' attoch cheno'tatoñet pa'tap o'ch rromuet e'ñe mamecma allochñapa' o'ch anmaretterret corsochoť. ³² Allempoña ponemña solltarpa' cheno'tosan pa'tap ñeñť parro corso'tampeñet e'ñe epsheño'mar. ³³ Allempoña ponemñyet ñaña Jesúsapa' ñaña'apa' entoset o' rroma. Ñeñto'marña ñapa' ama chenam̄pseto pa'tap.

³⁴ Tarraña puesheñarrña solltarpa' čhocma enos po'panmeto puepotoť. Allostña atarr čha'nom po'rras ama't ñaña oñsasen. ³⁵ Ñeñtña ente'pa' ñapa' serrpare'tatanet atet ent. Ñapa' e'ñe eñoteñ e'ñe po'ñočh ñeñť atet oten. Ñeñto'marña yapa' yeñoteñ ñeñť atet serrpare'tenpa' e'ñe po'ñočh. Attochña sapa'čho'ña same'ñerach ñeñť atet oten ña. ³⁶ Ñeñtapa' atet pa' attoch etsoterra Yompor po'ñoñ ñeñť anuaret ahuatoteñ, ñeñtapa' atet oten: "Ña ama't patrra puenepa' amach chenam̄pereto." ³⁷ Ama't ñaña Yompor po'ñoñ ellonetpa' atet ote't ahuat: "Ñetpa' enteretcha' ñeñtcha' enerret."

Atto pampuet Jesús

(Mt. 27.57-61; Mr. 15.42-47; Lc. 23.50-56)

³⁸ Allempoña José ñeñť arimateo'marnesha'pa' ñaña'apa' ahuos Pilatesho o'ch oteña' pocte'ch eñch ñach a'suatosé Jesús ñeñť rromuets corsocho. Ñehua, ñeñť Josépa' cotenan ñaña Jesús tarraña e'ñe a'nahua, tarro'mar ñapa' mecha'tenan judionesha'. Allempo atet enamosan Pilato, Pilatoña'apa' e'ñe pocte' eñch, ñeñto'marña alla ahuerri corsocho, čherr allpa' a'suatosan Jesús corsochoť all rromuen. ³⁹ Allña'apa' huapa ñaña Nicodemo ñapa' añ huapatoñ eñmosať, atsetaret ñeñť otenet mirra epuet ñaña áloe. Allo'tsente' ma'poch čharra' kilo. Ñehua, ñeñť Nicodemopa' ñeñťara ñeñť huapatsa ñanom Jesúsesho tsapo. ⁴⁰ Ñetña anerretña Jesús rromue'. Allña'apa' epatse'tueret shetamtstomo epuet ñaña eñmosať. Ñeñtapa' atet yečhena judionesha' ñerra'm čho pampueñet arromñať. ⁴¹ E'ñe allame'tets all corso'tam̄pset allña'apa' allo'tsen narmetsma'. Allña narmetsmopa' allo'tsen mapuetpon allña pampa'neretña Jesús allempo rroma. Ñeñť mapuetponpa' e'ñe etserra eñaret, tarraña allpa' ama pampueñeta' ama't patrra arromñať. ⁴² Allempopa' tarro'mara alla na'neret allame'tets tarro'mar allempopa' añ yetro allempoch añño'tena judionesha' tsapatecop allempocma amesenet.

20

*Atto tanterra Jesús**(Mt. 28.1-10; Mr. 16.1-8; Lc. 24.1-12)*

¹ Allempo moŧta'muenerr yetsñats temenc, Maríaña Magdalenapa' ahuaŧecma ahua'muen puepampro, allempopa' ama e'ñe puetaresuena'. Allñapa' amuepa'tcha' atteraye' entosanoña mapue' allo yottam̧pset. Ama allo'tsenarayaye, atta apmesaret a'yenet mame'. ² Ñeñta pa'che'ñera alla materra o' ahuerri allo'tsen Simón Pedro ñaña po'psheñeñ pueyochresha' ñeñt atarr morrentena Jesús. Maríañapa' atet otuerranet: —O' anerrnayette' Yepartseshareñ puepamproŧ. Ama yeñoteñe, errate'ña neret.

³ Allempoña Pedro epuet po'psheñeñ pueyochresha' ñetñapa' allenta ahuanmuet ñamet puepampro o'ch enteñeta'. ⁴ Epsheño'maretpa' matrra'tet all. Po'psheñeñña pueyochresha'pa' ñañaapa' ota, metanan Pedro. Ñañaapa' ñanmacma chap puepampro. ⁵ Epostsaña o'pononet o'ch cohuos all net Jesús ama entose, aña entosñañ allo epet alla o'yerrmuena. Tarraña ama be'toso. ⁶ Allempoña chap ñaña Simón Pedro ñeñt onets chenta'. Ñañaapa' allenta be'tosos puepampro ñapa'cho' aña entosñañ allo epet Jesús alla o'yerrmuena. ⁷ Añña allo huancoñet poñpa' ama parrocmaye' allo'tseno epuet allo epet. Ñeñtñapa' ñapueŧ a'tpuetena a'yenet. ⁸ Allempoñapa' be'tosos ñaña po'poñ pueyochresha' ñeñt ñanom chapats puepampro. Ñapa'cho'ña entos ama eñalle Jesús. Allempaña ame'ñya po'ñoche'pa't o' tanterraña Jesús rromot. ⁹ Tarro'mar ñet allempopa' ama chenaneñoña ñeñt atet anuaret ahuaŧoteñ Jesúsocop all oten Jesús'pa' chocmach tanterra po'rromñoŧ. ¹⁰ Allempoña pueyochresha'pa' ahuanerret pa'paclo.

Allempo tanterra Jesús'pa' añ ñanom orrterra María Magdarena

(Mr. 16.9-11)

¹¹ Maríañapa' allo'tsenara a'yot allame'tets puepampro all nanac yahuena. Allña yahuenapa' o' epa, o' cohua' o'pononet puepampro all net Jesús. ¹² Allñapa' aña ent epsheña mellañoñeñ, pa'shtamuet atarr huallama'tareret. E'ñe ñopa'tets anorryenet puesheñarrpa' poñoŧ anen, po'psheñeñña' pa'rrpōt anen all panet ahuaña Jesús.

¹³ Ñetñapa' atet ochet María:

—¿Eso'mare't nochesha nanac peyahuena?

Ñañaapa' atet otanet:

—Ahuo't anerrnanette' Nepartseshareñ ama neñoteñe errate'ña o' net.

14 Ñeñta otuapa' puetallerra pa'che'ñoneñ allentepa'tcha' enterran ñaña Jesús e'ñe all. Tarraña ñapa' ama cheme'che.
15 Jesúsñapa' atet och:

—¿Eso'mare't nochesha atarr peyahuena? ¿Esesha'tña pe'nen?

Ñañaapa' cha otenapañ añte' ñeñt cohuañpene' narmetsma' all. Ñeñto'marña ñapa' atet och:

—Ayochreshate ñerra'm pñate' anmue'pa' pegaterren errate' peneña', ñachña erraya'.

16 Jesúsapa' atet otererr:

—¡María!

Ñaña puetallerrtserrpa' cha e'ñe cheme'terre' ñeñto'marña atet ot po'ñoño hebreyacho:

—¡Raboni! —ñeñt atet otenet ñet Maestro.

17 Jesúsapa' atet otererr:

—Amach cha perrmatsetno, napa' ama na'tena' Apuesho. Arrña orrañ masheñneshesho o'ch pñotaneta' napa' o'ch na'terr Nomporecho ñeñt Neyomporer nepen ñeñtara ñeñt Seyomporer sepen saña.

18 Maríaña Magdalenapa' ahuerr serrpare'tatuerrñañ pueyochresha' ñeñtpa' atet otuerranet:

—Napa' o'rramtso nenta'mueñña Yepartseshar.

Serrpare'tatuerranet ñeñt atet och Jesús.

Atto Jesúsapa' orrterrana allohuen pueyochresha'
(Mt. 28.16-20; Mr. 16.14-18; Lc. 24.36-49)

19 Ñeñte yetrocma allempo motta'muena yetñats temenc, ellerroneña pueyochreshachnopa' ap'cha'nenet. Ñetpa' cha yore'tenanet judionesha' ñeñto'marña ñetpa' e'ñe echarr yottam'penet. Ama't atet yottam'penetañpa' Jesúsñapa' chepa'tcha' be'tosuets. E'ñe rrocho tomhuen allempoñapa' atet otuenanet:

—Te'ña po'ñoçhpa' çhosa cosherrtsa seyoçhro.

20 Allempoña atet otuenanetpa' gatyuesuananet pot ñaña all enareñ puepoto. Pueyochresha'ña atarr nanac coshapueñet allempo entapueñet Po'partsesharet. 21 Allempoña Jesúsapa' otuerraneterr alla:

—Te'ña po'ñoçhpa' çhosa e'ñe cosherrtsa seyoçhro. Atto na mueñan Apa, napa'çho'ña te'pa' o'ch nemñas saña.

22 Allempoña otuenanet ateñpa' allent'a a'torahuananet atet otuerraneterr:

—Te'ñapa' chorrasespa'ch Parets Puecamquëñ. 23 Ñerra'm esesha' sepretnataten po'chñarpa' Yomporpa'çho'ña o' peretner. Ñerra'm esesha'ña ama sepretnataten po'chñarpa' Yomporpa'çho'ña ama peretneñe.

Allempo Tomás'pa' entapuenan ñaña Jesús o' tanterra

²⁴ Pueyochresha'ña Tomás ñeñt otenet Epanesha' ñaña'pa' ama allo'tsenayaye all apchenet allempo huena Jesús. ²⁵ Ñapa' atña serrpare'tater po'potantañ ñeñt parro yochreshatsocmuet, ñeñt'pa' atet ochet:

—Yapa' o'ca'ye yenterña Yepartseshar.

Ñaña'pa' cha otanet:

—Napa' ñerra'm amach nentoñe pot all patet clavo, ñerra'm amach cho na'pilloñe e'ñe na notot all patet, amach cho neno not puepotot all enetpa' amate' errotent name'ñaso.

²⁶ Allempoña posocmaterrpa' pueyochresha'ñapa' alla apcherretter o'pono. Allempopa' allo'tsen ñaña Tomás. Ama't yetarrpa' e'ñe echarr ayotetuaret Jesús'ñapa' all be'tosuenerr tomhuenerr e'ñe allpa' alla otuenaneterr:

—Te'ña po'ñoçha' chosa cosherrtsa seyoçhro.

²⁷ Allempoñapa' atet otuenan Tomás:

—Pecuon not all pata'net, pa'pille'ca'ye. Pa'pilla'n ñaña nepotot all enanet. Amachña cha pe'charrtatatsto peyoçher choña pame'ña.

²⁸ Allempoña Tomás'pa' atet och:

—¡Nepartseshare, te'ña po'ñoçha' Neyomporer nepeneþ!

²⁹ Jesús'ñapa' alla otererr:

—Papa' cho e'ñe penterren ñeñto'maraña te'pa' pame'ñenna. Tarraña elloña añ atarr cosheñtso'tsen ñeñt ama't ama cho entennopa' ame'ñennet.

Añ libropa' añecop anaret ñeñtcha' yame'ñatene'

³⁰ Po'ñoçh shonte' po'poñeçhno ñeñt atet gatyesan Jesús pueyochresha' po'partsoña. Ñeñt'pa' ama aquellcareteyaye añ libro. ³¹ Allpon ñeñt aquellcarettatsa arr libro ñeñt'pa' añecop anaret ñeñtcha' same'ñate' po'ñoçh Jesús'pa' ñeñt Cristotets, ña po'ñoçh Yompor Puechemer. Tarro'mar e'ñe same'ñeñoña Cristo saña'pa' corretsasach tayoteñ e'ñe erponañohuen.

21*Allempo Jesús'pa' orrterrana cançherrsheña pueyochresha'*

¹ Allempoña Jesús'pa' orrterrannerr pueyochresha' e'ñe sa'patoþño Tiberiaso. Allpa' atet orrterrannet: ² Ñehua, allempo shontenet allpa' allo'tsen Simón Pedro ñaña Tomás ñeñt otenet Epanesha' ñaña Natanael ñeñt cano'marnesha' e'ñe allara Galileo. Ñaña allo'tsen Zebedeo puechemeresha' ñaña allo'tsen po'poñ epsheña pueyochresha'. ³ Simónña Pedropa' atet otanet:

—Napa' o'ch neterrayena'.

Po'potantañechnopa'cho'ña atet ochet:

—Yapa'cho'ña o'ch yocťap.

Allempoñapa' ahuanmuet a'tačha'toset noñto. Tarraña ama't arepenetañ terrayatsetpa' amaña es rromueneto.

⁴ Allempoña o' puetarenmoch Jesúsñapa' tomhuen pueme'taro. Tarraña pueyochreshačhnoñapa' ama esesha' cheme'tapaye. ⁵ Jesúsñapa' atet otosanet:

—Neyochreneshacha' ¿ama't eñalleña secacar ñeñtcha' serra'muen?

—Ñetñapa' atet ochet:

—Amaca'ye eñalle.

⁶ Ñaña' atet oterraneterr:

—Sehuapore't seterraya noñt po'cohuenrot allpa' serrmue'chca'ye.

Atet otanetpa' atetcho' pet. Arepa'tcha' eshcaye' cheterreto po'terraya o' rromuet nanac aton cac — shonte'. ⁷ Allempoña pueyochresha' ñeñt atarr morrentena Jesús'pa' ñaña' atet otan Pedro:

—¡Yepartsesharepa'tca'ye!

Simónña Pedropa' allempo eñotan Partseshepa't huetsa ñaña' puema'yoreñ chorrerrana pa'shtam tarro'mar ñapa' muelle'mcoťa terrayen. Ñaña' puema'yorñecma omacha oñopa' ahua' Jesúsesho. ⁸ Po'potantañechnoña pueyochresha'pa' chenta' onačherret noñto. Ñato' cien metroťe' allo'tsen attoch čherret toñña'so. Chetare'tnerret po'terraya e'ñe chorre' cac. ⁹ Allempo sohua'rretuerret patsopa' all entuerret quellmesh all huorten all achmarettena cac; allo'tsen ñaña pan. ¹⁰ Jesúsñapa' atet oterraneterr:

—Sacra' patantarr cac ñeñt serrmuen e'ñe errte'.

¹¹ Allempoña Simón Pedropa' alla a'terr noñto, chetan terraya noñtoť o' ne' masto, e'ñe chorre' atesha' cacačhno — allo'tsen ciento cincuenta tres ñeñt allpon rromuet cac. Tarraña ama't shonte' rromuet cacpa' ama rrarratano terraya. ¹² Jesúsñapa' alla oterraneterr:

—Te'pa' sonačherr o'ch serra'muen.

Puemcha'na'teñoťet ama't puešheñarroťeta ama esesha' otenaye: ¿Ešeshape'tña pa? tarro'mar eñoteñet po'ñočhpa' Partsesha'ca'ye. ¹³ Allempoña huapanet Jesús allame'tets, chetosan pan apa'yesosanet. Apa'yesosanet ñaña cac.

¹⁴ Ñeñt'pa' allempo poma'pocheñohua orrterrana pueyochresha' allempo tanterra rromot.

Allempo Jesús'pa' otenan Simón Pedro atarrte' morrenteña

¹⁵ Allempoña rrohua'muenet Jesúsñapa' atet otan Simón Pedro:

—Simón, Jonás puechemere, ¿papa' ¿atarríte' pemorrentenna, ellote' pemítana'tueñ añenasha'?

Ñaña'papa' atet otan Jesús:

—Po'ñočha'ye Partseshacha' peñotenen napa' nemorrentenpa.

Jesúsñapa' atet otererr:

—Ñeñte'pñapa' e'ñech cohuen peserrpare'tatyes allohuen ñeñt' name'ñenaya; ñetpa' e'ñe atet nentenanet ñerra'mrrate' necarrneroretollesha'.

¹⁶ Puepocheñoñapa' alla otererr:

—Simón, Jonás puechemere, ¿po'ñočha't atarr pemorrentenna?

Ñaña'papa' alla otererr:

—Po'ñočh Partseshacha' e'ñe peñotenen napa' nemorrentenpa.

Ñaña'papa' alla otererr:

—Ñeñte'pñapa' e'ñech cohuen pecuanñpson allohuen ñeñt' name'ñenaya; ñet po'ñočhpa' e'ñe atet nentenanet ñerra'mrrate' necarrnerorečno.

¹⁷ Poma'pocheñoñapa' alla otererr:

—Simón, Jonás puechemere, ¿ama't e'ñe mamecpa pemorrentenno?

Pedroñapa' llequënana atto alla poma'pocheño otererr e'ñe ñeñtara, ¿pemorrentenna't?, ñeñto'marña ñapa' otererr:

—Partseshacha' allohuenpa' e'ñepa't peñotueñ. E'ñe peñotenen napa' nemorrentenpa.

Jesúsñapa' alla otererr:

—Ñeñte'pñapa' e'ñech cohuen pecuanñpson necarrnerorečno. ¹⁸ Po'ñočha'ye te'pa' o'ch notaḡ, pa allempe huepueshenpa' pechorre't e'ñe ḡota, all peseche'tpa' all pechopeñe'chyese't. Tarraña esempoch pepo'nme'tenpa' pañapa' o'ch attaña peyopen peque' attochña o'ch po'psheññaña pechorratenaya allempopa' anerrpetcha' all ama pesecheno.

¹⁹ Ñeñtapa' tarrecop atet eñorana'tenanet allochñapa' attoch eñochet errotentochá' rromuerr Pedro attotcha' cohuentateran Yompor. Ñeñta otuepa' alla oterran Pedro:

—Papa' chocmuepa'ch e'ñe ḡoctenen.

Atto Jesús eños Juanacop ñeñt' pueyochreshar atarr muerena

²⁰ Pedroñapa' puetallerrtsa entapan o' co'a'neñ po'psheñeñ pueyochresha' ñeñt' atarr morrentena Jesús, ñeñt' e'ñe anorrtse't epuet ahuañmo'cha allempe rrallme'chete't ñeñtara pueyochresha' ñeñt' otaye't ahuaña: "Partseshacha' ¿erra'tsenacpa'tña pe'ñorena ñeñt'cha' pepomuerre'?"

²¹ Allempoña entaḡ Pedro, ñaña'papa' allenta otan Jesús:

—Partseshacha' ñocoppa' ¿ama't eñalleña ñeñtcha' huapoya ña?

²² Jesúsña' atet otererr:

—Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, ñeñtpa' ama p̄ocpayaye. Pocoppa' añ poctetsa ch̄ocmuepa'ch p̄octenen.

²³ Ñeñto'marña epa'hua añ ñoñets errañaren allo'tsa'yen masheñnesha', ñeñto'marña ñetpa' atet otanna'tyenet, ñeñt̄ pueyochresha'pa' año'ch rromuerro ama't errponaña. Tarraña Jesús'pa' ama atteye' oteno amach rromuerro. Ñapa' aña oteñ: “Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, amaña po'psheññecpayaye.”

²⁴ Napa' ñeñten pueyochreshan ñeñten atet eñotatets atet ñeñtarana quellquë' añ. Te'ña ya allohueney yeñoteñ ñeñt̄ atet na'potapa' ñeñtpa' e'ñe po'ñoçh atet.

²⁵ Shonteñ po'ñoñeçhno ñeñt̄ atet pa'yesa Jesús. Ñerra'm e'ñech yequellca'hueñ ora allohuen ñeñt̄ atet pa'yese't̄ Jesús eñalleñte' shonte' nanac libros. Napa' noten shonteñte' nanac libros'pa' e'ñech epa'huañ ora errañaren añe patsro ñerra'm allponcha' yequellcañ libros. Ñeñtpa' attetepa'ch Nompore. Allohua.

ATET PA'YESA JESÚS PUEYCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcotpa' o'ch neserpare'taterrperr po'pocheño. Ahuaña ñeññ nequellconap̄ all neñotataḡ ora allpon atet pe't Jesús allempo añe patsro'tsenmeñ. Ñaña ora allpon yeçhate't Jesús, ñeñtpa'çho' o' notuaḡ nequellcot.

² Tarraña allempoteñ a'terr pue'ntañopa' palltena o'ch notap̄ ñaña. Te' añ nequellcotpa' o'ch notap̄. Tarraña ama't allempo ama a'terra' Jesús pa' añña ñeññ pueyochresha'pa' o' otuanet atetcha' pet. E'ñe Parets Puecamquëño'pa' o' llesensa'huanerran pueyochresha' ñeññ acra' ña. ³ Ama't pomueroçhteño' o' rromua ahuaña, allempoñapa' o' orrterrana pueyochresha' e'ñe beḡnatot. Ñeñño'marña ñetpa' eñochet e'ñe po'ñoçh añpa' ñeññara Jesús ñeññ rromats ahuaña. Tarro'mar pa'tatsoch çharramatnerr atto orrtame'tnerranet mamesha'tets. Ñaña çhocma eñchete't allame'tets. Allempoña ñapa' a'poḡanet atet penaña Parets po'cohuenña atto ayochreshattena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arrot, allasach arrma Jerusaléño. O'ch secueñ esempoch çhaponasa ñeññ Parets Puecamquëñ. Tarro'mar Parets pa' o' otuas o'ch mueñonas Puecamquëñ. Ñeñño'mar napa' o' na'potuonas Parets po'ñoñ ahuaña.

⁵ Allempopa' añña ñeññ notuas: Juanañpa' añoñña apate't oño, tarraña na tsapaḡone'tpa' añcha'ña nechorratas a Parets Puecamquëñ. Añpa' allohua atet ot Jesús.

⁶ Po'pocheño all apçhenet aspenḡo pa'so'cheñ Olivopen. Pueyochresha'ñapa' atet a'ḡto'chet Jesús:

—Te'pa' Partseshacha' ñato' pocte' penteñ o'ch ḡapaterrey ñeññey israelneshay yepatseñ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeññ socoppa' ama pocteyaye o'ch señoçh. Añña Yompor po'partsoḡeño' e'ñe eñotueñ. Ñapa' o' ne' allempoch etsotuerra ora allohuen añeçhno.

⁸ Jesús pa' alla otnerraneterr:

—Añña pocte' o'ch señoçh, ñerra'm esempoch huaponasa Parets Puecamquëñ sesho, ñach ahuamencat sepose'. Allempopa' sa'poḡoncha' neñoñ erraḡparen—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntañö

⁹ Ñeñña otuanenanetpa' allempoñapa' a'tenochayo' enonet. Añña pueyochresha' pocuanrrorteño'tetpa' o' ma'natena oso. O'huañ orrta, ama't mamesha. ¹⁰ Ama't allempo o'huañ orrta Jesús, ñetpa' allo' cohuanrrortenet enonet allenet o' chenca'huanena Jesús. Allempoñapa' cohuerretset patsonetpa' alla entet epsheña yacma o' tom'cha'toset e'ñe parro. Pa'shtamuetpa' nanaco' huallama'tareret. ¹¹ Ñetñapa' atet otosanet:

—Esuañaca' galileo'marneshacha' secuanrrortenna enonet. Añ Jesús ñeñt' o' a'terr entopa' huerrerrcha' po'pocheño atet senteño o' ahuerrento.

¹² Allempoña o' a'ten Jesús'pa' añña pueyochresha'pa' o' ahuanerret alla Jerusaléño. O' ona'cherret Olivopnot allot' a'terr Jesús. Tarro'mar ñeñt' aspenet Olivopenpa' allame'ttso'tsena Jerusaléño't, Olivopnotpa' ñato' allo'tsente' paterr kilómetro attoch ye'chap Jerusaléño. ¹³ O'ña 'chacherret anetso Jerusaléño all pocollo allecma a'puenetpa' o' be'tos'cha'tuerret, a'tapuet eno all tama a'yohuen ßat. Allñapa' ap'chet allohuenet. Ñeñt' ap'chatsa ñeñt'pa' añe'chno: Pedro, ñaña Jacobo*, ñaña Juan, ñaña Andrés, ñaña Felipe, ñaña Tomás, ñaña Bartolomé, ñaña Mateo, ñaña Jacobo ñeñt' Alfeo puechemer, ñaña Simón ñeñt' cananistanesha' ñeñt' atarr torratset pa'netsrecop, ñaña allo'tsen Judas ñeñt' Jacobo pa'mo'nasheñ. ¹⁴ Allña ap'chenetpa' e'ñe ñeñña nete't pueyo'chro cohuen ñoñets. Allotpa' e'ñe poma'yo'chreño'tet cohuenpa' 'chocma ma'yo'chete't. Allo'tsen ñaña coyanesha'chno, ama't Jesús pachor María, ñaña pa'mo'nasheñesha' allo'tsenet ñamet.

Atet pa Jesús puellsensarnesha' allempo net Matías ñeñt'cha' epuet a'potoñet Yompor po'ñoñ

¹⁵ Parrochña Pedropa' o' tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

¹⁶ —O'ch masheñeshacha' notas: Po'ño'ch o' etsotua Yompor po'ñoñ ñeñt' anaret' ahuatoteñ. Tarro'mar Parets Puecamquëño't eñose't David. Ama't ahuatpa' ote't David atet'cha' pa Judasoñ ñeñt' anmue' ñeñt' rromue' Jesús. Ñehua, pocte'ñ'acho' o'ch etsota Yompor po'ñoñ. ¹⁷ Judasoñpa' ahuaña allempo allo'tseney e'ñe parro ñapa'cho'ña acreñña Jesús o'ch pueyochresha' pe'. ¹⁸⁻¹⁹ Ñehua, Judasoñpa' tsa'chet allpon quelle atto poman Jesús. Tarraña ñeñt' quellepa' allo rañtet pats. Tarraña allempo shora'nom Judasoñ 'chap patsopa'

* 1:13 Jacobopa' ñeñt'ara ñeñt' sochenet Santiago.

potsa'nmos pa't, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o' rroma. Añña pats ñeñt rañtet Judasoñ po'çllayoro'tpa' o' sochet Acéldama. Añ ñoñets ñeñt otenet Acéldama ya yeñoño yoteñ Errasatsotnanen. ²⁰ Añña ñeñt quellquë't ahuat David ñeñtpa' anuare'tta añ libro Salmos. Añña ñeñt atet oteney:

All ye'chena, puenasepa'ch amara't, all amach eseshaye' ye'chatstatso. Ñeñt po'taruas pa' attoch sherb'aneñ Yomporpa' tarraña ñeñtpa' apanepa'ch po'psheñeñ. Atet oten añ libro Salmos.

21-22 Alla o'terraneterr Pedro:

—Ñeñto'mar te'pa' añ poctetsa o'ch ye'ñ po'psheñeñ ñeñtcha' parro ya'pota atto Jesús'pa' o' tanterra. O'ch ye'ner puesheñarr ñeñt çhocma parro yechopeñe'che't ahuaña allempo arro'tsenmeñ Yepartseshar Jesús. O'ch ye'ner puesheñarr ñeñt çhocma yoc'taye't ama't allempoteñ Juanaña' apatapan Jesús tarremphua allempo a'terr Jesús.

²³ Allempoñapa' o' neñet epsheña, puesheñarr añ pa'so'cheñ José Justo, ñeñfara José oteñet ñaña Barsabás. Po'psheñeñpa' añ pa'so'cheñ Matías. ²⁴ Allempoñapa' o' ma'yochet. Puema'yocheño'tetpa' atet otet:

—Yompore, ñeñte'p entene' allohueney yeyo'cher. Te'pa' o'ch peñotatey erra'tsente' pemnen pa' ñeñtcha' ello alla sherberrets p'ocop atet ñerra'm pellsensar. ²⁵ Judasoñpa' o' sa'nmuey o' ahuo' all ñeñt o'patatare'ttena ña e'ñe ña po'chñarot.

²⁶ Allempoñapa' yellsheñe'chet e'ñe ñet po'suertot attoch eño'chet erra'tsente' muenenña Yompor ñeñtcha' alla sherberrayerr. Allempoña yellsheñe'chenet aña orrtatsa Matías ñeñtapa't muenenña Yompor. Allempoteñ Matías'pa' ahuo' aguëñ po'poñe'chno ñeñt çharrasheña puechetsa paterr ñeñt puellsensar Jesús.

2

Allempo çhapanet Parets Puecamquëñ

¹ Allempoñapa' o' meterrerr allponmat amnaroch çharramat, o' çhap allempo coshena judionesha' ñeñt otenet Pentecostepo. Allempoña ñetpa' alla ap'cherreterr e'ñe parro ñeñtet ame'ñetset. ² Allempoñapa' machayo'ta e'mapuet atet ñerra'm huomenquësha' ma'more'tos entot. Allohuenet ñeñt allo'tsa'yen pocollo e'ñe e'mhuet. ³ Añña ñeñtet ap'chetsetpa' o' huapanet atet ñerra'm tso'. Huapapa' çha çhapa'rrtosa po'huorter ñesheto. Chapyesanet e'ñe puesheña'ttso'cmuet atet ñerra'm huorte'. Añña huorte'pa' alla a'prra'ta ñesheto.

⁴ Añña ñeñt̃ chapyesahuet e'ñe puesheña'ttsocmuetpa' añepa't Parets Puecamquẽñ ñeñt̃cha' chorrahuet. Allempoñapa' allorocma eñosyaset po'poñ ñoñtso ñeñt̃ ama eñosete'te ahuaña. Añña Parets Puecamquẽñpa' ahuo' eñoratyesanet po'poñe'ttsoocma attoch serrpare'tachet pa'namen acheñ e'ñe ñet po'ñoñeto.

⁵ Allempo Jerusaléñopa' allo'tsa'yen shonte' judionesha' ñeñt̃ huachetsa pa'namen anetsoť. Ñetpa' cohuen cotape'chete't Partsoocp. ⁶ Allempoña e'marettet̃ cha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt̃ ano'tatsets. Chapuet all ano'tatsenetpa' o' entoset ñeñt̃ ame'ñetsapa' año eñosyenet e'ñe ñet po'ñoñeto. Allempoñapa' atta cohuanrrortoset. ⁷ Puemoññe'teñoťetpa' atet otyeset:

—Ta', erroťenote'ca' e'myennayetña yeñoñ. Yapa' yeñotenanet ñetpa' galileo'marnesheta. ⁸ Ama't po'poñ ñeñt̃ yenyoma' ñeñt̃spa' e'mueñet. Allohueneypa' o' e'ñe ye'myes atet eñosyenet e'ñe cohuen yeñoñ.

⁹ Allempopa' alla otanna'tyerreterr:

—Yapa' yeñen po'poñe'ttsoocma ñeñets tarro'mar yapa' pa'namen anetsoť yehuena. Allot̃ anetsroť yehuapyena ñeñt̃pa' pa'namen pa'so'chñečno—ama't Partioť ñaña Medioť ñaña Elamoť ñaña Mesopotamioť, Judeoť, Capadocioť, Pontoť, Asioť, ¹⁰ Frigioť, Panfilioť, Egiptoť ñaña Africo'maroť, alla allame'tets Cireneo. Ñaña ñeñt̃ huetsa Romoť ñeñt̃ chocma a'puetsa arr. ¹¹ Ama't ñaña judionesha' shonte', ñaña ama't ñeñt̃ ame'ñaten judionesha'. Ñaña ñeñt̃ huetsa Cretioť ñaña Arabioť. Ya te'pa' o' e'ñe ye'myes e'ñe yocma yeñoñ atet aye'chochtateññañet Parets po'cohuenña e'ñe yeñoñ.

¹² Otanna'tyerreterr alla:

—Ta'm, ñetpa' erroťenette'ca'yete'. Yapa' ama't ahuatapa' ama yentareña galileo'marnesha'pa' o'ch eñosyesña e'ñe cohuen yeñoñ. Ta', esocopte'.

¹³ Añña po'potantañ acheñenesha'pa' o' achm̃are'tanet atet otarettet̃:

—Tarro'mar ottenetña' choca'ye posa'tyenet.

Atto Pedropa' serrpare'tatan acheñenesha'

¹⁴ Añña Pedropa' tanta o' tom e'ñe alla epuet po'poñečno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléño, te' o'ch notas: Se'mñnoten o'ch neñotatas attoť atet yepena ya. ¹⁵ Yapa' ama yeposañoťeye' o' yo'notapsa'mueno atet soteney sa, tarro'mar ama choye' o' yarepeno orrats. ¹⁶ Añña ñeñt̃ sentyen te' ñeñt̃pa' añ o' etsota

ñeñt atet ote't Joel ñeñt a'mtaye't Yompor po'ñoñ ahuat. Añña ñeñt quellquë't ahuat Joel:

17 Añ atet oteney Yompor: Allempoch mellapoterrmocha, atetcha' perra, o'ch nenanet Necamquëñ pueyoçhreto, allohuen arromñañenesha' o'ch nechorratanet Necamquëñ. Añña pemreneñpa' ñetcha' a'poterret neñoñ ñeñtcha' neñotatuanet, ama't ñaña coyaneshaçhno a'poterrnancha' neñoñ. Añña ñeñt hupueshare' çhocmach es norrtatyesanet ñeñtcha' entyesonet neshot. Añña ñeñt po'nmeneshare'pa' es norrtatyesanetcha' pueçhopoñeto.

18 Ama't allohuen ñeñt nesherbene', ñaña ama't coyaneshaçhno nenuanetcha' Necamquëñ pueyoçhreto attoch a'po-tonet neñoñ.

19 Allempoña enopa' o'ch nentatyesanet ñeñt ama't ahuatapa' ama puentareto. Patsopa'çho'ña o'ch norrtatyesanet ñeñtcha' eñotaterrahuet. Quellareñtsoñpa' norrtatcha' errasats. Pue'tomamñsanna'teño'tet pa'netserpa' orrterrach tso' erracmañen, chepoterrcha' amos ñaña errañaren.

20 Ama't ñeñt yeçhoyo'tamñene'te' allempopa' puenaserrach checmete'. Arrorrrpa'çho'ña allempopa' tsama'tterrach atet ñerra'mrrate' errasats. Atetcha' yoroçhterra allempoch huerrmocha Yompor.

21 Allempopa' ama't erra'tsena çhore'te' Yompor pueyoçhroçmañen attoch a'queshpachpa', Yomporñapa' a'queshpatanetcha'. Arrpa' allohua atet quellquë't ahuat Joel.

22 Añpa' ñeñtara alla otterraneterr Pedro:

—O'ch masheñe judioneshacha' noterrser: Sapa' seño'teñ ahuañapa' orrte't Jesús ñeñt nazareto'marnesha'. Ñapa' çhocma orrtatonase't po'partsoteña, ñaña çhocma orrtatyesonase't ñeñt ama sentare ñeñtcha' seño'tate' ñapa'çho'ña nanac Parets. Pompom apuene'ña po'partsoña attoch seño'toñ Puechemer ña nanac Parets. ²³ Añña ñeñtara Jesús sañapa' o' sepomhuer attoch corso'tamñset. Sañapa' o' sañ po'poñ acheñenesha' ñeñt atpare'tene' Yompor attoch ñetpa' o'ch muetset. Atet o' seño'hua, Yomporpa' ahuatoteñ eñotuase't atetcha' seña, tarro'mar atet muene't ña. ²⁴ Tarraña ama't rromuapa' Pompompa' o' alla tantater. Tarro'mar amate' erro'teno te'pa' alla a'po rromue'. ²⁵ Ama't atet ote't David ahuat, atet ñerra'm Jesús eñoratse't. Atet ote't:

Ñapa' neño'teñ Nompom çhocma allo'tsenen parro epan. Ñach nanac ahuamenca't nepe' attoch amach neñcha'to.

26 Ñeñto'marña nanac nocshena neyoçhro, nocsheñeshocma neñen. Ama't nerromapa' neñoteñ amach alla na'pò rromue'.

27 Napa' neñoteñ amach a'ypo'ño no necamquëñ alla o'pono. Nomporpa' amach mueno o'ch puetsohua alla nechets tarro'mar ñapa' entenen e'ñe cohuenare' es nepen ñocop.

28 Añcha'ña o'ch entaterren attoch yocrrerra e'ñe cohuen. Poparrocmateño' epan ñapa' ñach nocshaterre' nanac. Allohua atet ote't David ahuat atet ñerra'm Jesús eñostse't.

29 Allempopa' alla oterraneterr Pedro:

—O'ch masheñeshacha' noterrser, añ pòctetsa e'ñe eñotoçhen o'ch notas: Yatañ David ahuatpa' rroma. Rromapa' pampuet. All pampuetpa' yenteñ ama't teme'ttsen. Ñeñto'mar yeñoteñ ahuat allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te't Jesúsocop. ³⁰⁻³¹ Tarro'mar David ñapa' ña a'mtaye't ahuat Yompor po'ñoñ. Ñapa' e'ñe eñotue't atetcha' pa ñeñtcha' Cristotats allempoch çhap añe patsro. Ñeñto'mar ama't ahuaototeña' eñose't atetcha' tanterra ñeñtcha' Cristotats. Pomporpa' amach a'ypo'ño no Puechemer o'pono. Amach muenatoñe o'ch puetsohua po'chets. Yomporpa' ama't ahuatpa' atet otan David o'ch noñ puesheñarr po'mrenño' ñeñtcha' añcha'tarettatsa esempo. Davidpa' eñotane't Yompor ñapa' ama pueno po'ñoñ. ³² Te'ña yapa' o' yeñch Yomporpa' o' tantaterran Puechemer Jesús. ³³ Te'ña ñapa' e'ñe allo'tsen epuet Pompor Parets all partsoten ento. Pomporpa' o' e'ñe aphue Puecamquëñ. Te'ña' añ ñeñtara Puecamquëñ o' chorratya yaña atet otnerrey ahuaña. Ñeñto'marña o' orrtonaya atet sentyes ñorra', ñaña atet se'myes cohuen ñoñets e'ñe sa señoño. ³⁴ Ñeñto'marña yeñoteñ ama añecpaye' serrpare'te'te David e'ñe ñocop, tarro'mar ñapa' rromapa' ama tanterro allo'tpa' ama a'terro ento atet ñerra'm Jesús. Ñaña po'pocheño ahuatpa' eñose't David, atto' ote't:

Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets):
 “Te'pa' o'ch panorruerr arr necohuenrot allcha' pecohuentapreterrna.

35 Attochña ama't ñeñt pe'moñe'tene' napa' o'ch e'ñe name'ñatuerranet allochña'pa' o'ch atet perret ñeñt pemnen pa.” Añpa' allohua atet ote't David ahuat.

36 Allempoña' alla oterraneterr Pedro:

—Sapa' israelena'tares. Ñeñto'marña señoche'pa'ch e'ñe eñotochen atto Yompor Parets o' nan Puechemer Jesús. Ñapa' ña Partshatets, ñeñtara Cristotats. Añ ñeñt Jesús sañapa' o' secorso'tamñsach. Añpa' ñeñta allohua serrpare'tatanet Pedro.

³⁷ Allempoñapa' ñeñt matrra'tatsa allpa' o' çhapanet pueyoçhro añ ñoñets. Nanac llecanrrortet. Ate't ochet Pedro ñaña po'potantañeçhno Jesús puellsensar. E'ñe puellquëño'tet atet otet:

—Masheñeshacha', errotenuachca'ye yeperraña te'.

³⁸ Pedroñapa' atet otanet:

—Te'pa' aña poctetsa ñeñtcha' seperra allohuenes. Te' sellquëño't o'ch soçtape'cherr ello cohuen Yomporcop. Allochñapa' Yomporpa' peretna'huernascha' so'chñar. E'ñe same'ñeño't Jesucristo añ pocte' te' o'ch sapataretterra Part-socop. Allochñapa' Paretspa' chorraterrsach Puecamquëñ. ³⁹ Ñeñtpa' pocte' atetcha' sepa, tarro'mar atet o'tnerrey Jesús o'ch chorratuerrya e'ñe puesheña'ttsoy Puecamquëñ, allohueney ñeñtfe'y o' hua'ñerrey Yeyomporer Parets o'ch yame'ñera. Ñaña o'ch chorratuonasa ama't sa sechemerasha' Puecamquëñ, ñaña allohuen ama't ñeñt ella'paro'tsa'yenet.

⁴⁰ Allempoñapa' o' alla serrpare'taterraneterr attoch otanet pa'namen ñoñets. Attoch co'tape'chatanetpa' atet otanet:

—Amach soçtape'chatsto atet co'tape'chen po'poñ acheñenesha' ñeñt ama'ame'ñetso. Attotcha' sequeshperrach.

⁴¹ Allempoña allohuen ñeñt ame'ñaya Pedro atet otanetpa' o' apatarettet. Allempopa' ñato' allpon ame'ñatsa ma'pa mil acheñenesha'. Cha shontena ñeñt ame'ñatsa. ⁴² Allempoteñ ñeñt ame'ñatsapa' e'ñe ma'yoçhrenet atet yeçhatanete't Jesús puellsensar. Nanac cohuen entanna'tete't allecma apçhete't parro. Pueyerpueño'tet Jesús o' toma'ntatet pan atet ñerra'm Jesús po'chets. Nanac ma'yoçhete't e'ñe parro.

Ate't corre't ahuat ñeñt ame'ñatse't

⁴³ Ñeñt Jesús puellsensarpa' orrtatanete't shonte' pa'namen ñeñt ama'puentareto, orrtatanete't partsoteñets attoch eñoçhet añmapa' Partsepa't. Ñeñto'marña allohuen acheñenesha'pa' nanac mecha'na'tete't. ⁴⁴ Ñeñt ame'ñatsapa' çhocma apçhete't parro, pocsheño't apanna'tyesete't ñeñt es palltatse't. ⁴⁵ O'ch venda'yesete't ñeñt eçhyenet ñaña allpon ñeñt o'patyesete't ñeñtpa'çho'ña venda'yesete't. Allpon gana'yesete'tpa' o'ch apanna'tyesete't ñerra'm esesha' es palltatse't. ⁴⁶ Pate'tets yetpa' o'ch ahuanenet e'ñe parro Parets pa'paclo. Errotenopa' pueyerpueño'tet Jesús o'ch toma'ntachete't pan atet ñerra'm Jesús

po'chets. Ñaña chocmach rrallme'chapretanna'tete't pa'paclo. E'ñe pocsheñeshet pueyo'chretopa' chocmach rrallme'chete't. Allempopa' nanac amuerañterret. 47 Ñaña chocmach aye'cho'chtatoñete't Yompor. Allohuen acheñenesha'pa' e'ñe cohuen entapretanete't ñeñ't atet pete't. Pate'tets yet Yomporotpa' chocmach ame'ñachete't po'poñe'chno acheñenesha'. Atteñapa' o' cha shonta ñeñ'tcha' a'queshpatarettatsa.

3

Atto Pedropa' a'crraterran ñeñ't echarttetsa

1 Pamtarrpa' chap allempocma ma'yochenet Parets pa'paclo, atet ñerra'm allempopa' ñato' o' ellerrenmoch. Pedroñapa' ahua' Parets pa'paclo epuet Juan, o'ch ma'yochoset all. 2 O'ña chapuet allpa' a'taposet Parets pa'paclo. Allempoña a'tapmochet allpa', allempocma huapachet ñaña puesheñarr ñeñ't echarttetsa pa'tco't, ama eshcaye' chope'cheno. Allempoteñ eñalleta ama chope'cheno. Chocmach pamo'tsesha'pa' o'ch aneñet allecma be'tenet Parets pa'paclo. O'ch na'nmet allotecma be'tosete't ñeñ't otete't Ama Macohueno. Allñapa' allcha' enamare'tyenan quelle ñeñ't be'tostse't Parets pa'paclo. 3 Ñeñ'tña echarttetsapa' entapan Pedro epuet Juan. Ñetpa'cho'ña be'tosmochet Parets pa'paclo. Ñaña'pa' enamapanet quelle. 4 Pedroñapa' alla o'chet cohue' epuet Juan. Allempoña Pedropa' atet otan ñeñ't ama chope'chetso:

—Ñehua, pecua'y alla.

5 Ñeñ'tña echarttetsapa' alla e'ñe cohuanet, ñapa' otapañte' o'ch apet quelle. 6 Tarraña Pedroñapa' atet och:

—Napa' ama necheno quelle, tarraña ñeñ't nechenpa' ñeñ'tcha'ña napa'p. O'ch nota'p, e'ñe po'partsoteño'f Jesucristo ñeñ't nazareto'marnesha' o'ch nota'p, pechope'cherrepa'.

7 Pedroñapa' chete' potot po'cohuenrotpa' o' echañch. Allempocma corra'huena pa'tco't, ama't all meya'nen yetacpa' o' corra'huena poctacma. 8 Corra'huetsa pa'tco'tpa' pocsheño'tpa' omacha enonet, o' ten e'ñe cohuen. Allempoñapa' chopeñe'chen. Ama't all chopeñe'chen omachme'tetsa all aye'cho'chtatenan Yompor. Atteñapa' be'tos Parets pa'paclo epuet Pedro ñaña Juan. 9 Allohuen acheñenesha' ñeñ't allo'tsa'yen, ñetpa'cho' enteñet atto pa'ye'cho'chtateñesha' Yompor all chopeñe'chen. 10 Ñetpa' cheme'teñet añmapa' ñeñ'tara ñeñ't anorrtse't allotecma be'tosete't Parets pa'paclo, ñeñ't otenet Ama Macohueno, allecma enamare'te't quelle. Ñetñapa' atta cohuanrrorteñet.

Atto Pedropa' serrpare'tatan acheñenesha' Parets pa'paclo

11 Añña ñeñt correrrtsapa' ama a'rroyen enterrano Pedro ñaña Juan. Allempoña all tomchenet all oteñet Salomón Popellrraro. Acheñenesha' po'yorñoŕetpa' matrra'tet allo'tsen Pedro ñaña Juan ñaña ñeñt a'crraterr Pedro. 12 Allempoña čhača'tet all tomchenetpa', añña Pedropa' otapanet, atet ot:

O'ch masheñe israelneshacha' notas, eso'marte' secuanrrorteny. Chate' sotenapañ e'ñete' ya yehuamencot yechope'chater, amapa' čhate' sotenapañ e'ñete' ya, ya'cohuentateñoť yechope'chater. Añmapa' ama atteyaye.

13 Añcha'ña o'ch notas: Añmapa' Yompor orrtatene' ñeñt o' sentua. Añña Yomporpa' ñeñtara Po'yomporer peť ama't Abraham ñaña Isaac ñaña Jacob, ñaña allohuen yatañneshañ. Yomporpa' e'ñe pocte' eñch o'ch cohuentatan Puechemer Jesús. Ñeñto'marña o' orrtatonas ñeñt o' sentua. Tarraña sa ñeñtara Jesúsapa' o' sepomhue. Ama't allempo Pilatopa' pocte' enteñeñ o'ch a'rroyereñ, tarraña sañapa' čha sa'nasotañpesya allohuenes. 14 Ama't ñeñt nanac Parets, ñaña ama't ñeñt e'ñe pocte' es pets, sañapa' čha sa'nasotañpesya. Allempo Pilatopa' ama't mueneñ o'ch a'rroyer, sañapa' aña sanañ ñeñt amtsañ ñeñtča' a'rroyonaset. 15 Ñaña'pa' čhaña semtsach ñeñt alloch e'ñe yocrra. Tarraña ama't muetsetañpa' añña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra. 16 Ya yeyemteñoť e'ñe Jesús o' correrra ñeñt ama chope'chetso ñorra'. Ama't sapa' señoťeñ atto ahuañapa' ama chope'che'te. Tarraña te'pa' o' senter o' chopeñe'cherr. Yapa' o' yame'ñera Jesús ñeñt o' a'crrataterran ñeñt echarrtatset ahuaña. Te'ña ama't sapa' o' sentuer allohuenes.

17 'Te'ña masheñneshacha' napa' neñotenes ahuaña sapa' ama es sečhapoyo seyočhro allempo semtsach Jesús. Ama't ñeñt sa'mča'tareťernesha' ama es čpahueto pueyočhreto ñamet. 18 Tarraña ñeñt atet seřohua te'pa' o' etsoterra Yompor po'ñoñ. Tarro'mar allohuen ñeñt a'mťayeť Yompor po'ñoñpa' attecma oteteť, ñeñtča' Cristotats Partsocoppa' mueročhtachetcha' esempo. Ñeñto'marña te'pa' o' etsota Yompor po'ñoñ ñeñt aquellcareť. 19 Ñeñto'marña te'pa' añ poctetsa e'ñe sa sellquėñoťpa' o'ch soctape'cherr ello cohuen Yomporecop. O'ch sesuanom ñeñt ahuatoteñ soctañña. Attotča' Yomporpa' e'shohuerrnascha' so'chñar. 20 Attochña separrocmateñoť epas Yomporpa' socsherrach seyočhro. Ñaña Yomporpa' o'ch alla mueñerrnaserr Cristo Jesús ñeñt anarettatsa ñaña socop. 21 Tarraña te'pa' e'ñe

pocte' allach pue'ntaño tarremphua esempohuañencha' a'pocataretetua ora allohuen ñeñt atet eñose't Yompor ahuat. Ama't ahuat Yomporpa' eñorana'tane't acheñ ñeñt e'ñe pocte' ente't Parets ñeñtcha' a'mte' po'ñoñ, ñeñtcha' etsoterrtsa esempohuañen. ²² Añmapa' ñeñt atet ote't ahuat Moisés: "Yompor Paretspa' orrtatonascha' ñeñtcha' a'pote' po'ñoñ, ñeñtara sa samo'tsna'tarotpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa chocmach se'mñoter errotencha' oterres. ²³ Tarraña ñerra'm esesha' amach e'mñoterraye ñeñtcha' orrterrtsa, ñeñtña acheñerpa' ahuo'ch a'chencataretterrach. Pamo'tsesha'ña israelnesha'pa' amach allo'na entneñeto." Añpa' allohua atet ote't Moisés ahuat.

²⁴ Alla oterrerr Pedro:

—Ama't allohuen ñeñt a'mtaye't Yompor po'ñoñ ahuatpa', eñose'te't ñeñt o' etsotuerra te'. Ama't Samuel ñeñt a'mtaye't Yompor po'ñoñ ahuat, ñaña allohuen ñeñt allempoteñ a'mtaye't Yompor po'ñoñ, añña eñose'te't ñeñt o' etsotuerra te'. ²⁵ Añña ñeñt a'mtaye't Yompor po'ñoñ ahuatpa' ñeñtara samo'tsna'tar sepe't ama't sa. Atet Yompor a'pocatan ñoñets ahuat satañneshacoppa' añ ñeñtara ñoñets attecma a'pocatare'tta ñaña socop. Atet ñerra'm ahuat atet otan Yompor sato' Abraham: "Ñeñt puesheñarrof penrenño'tpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'." ²⁶ Yomporpa' o' orrtatonay Puechemer o' mueñonay ñeñtey judioneshay yanom. Allochñapa' ña o'ch coshaterrey nanac atet ñerra'm allempo o' cotape'chaterrey e'ñe cohuen, ñaña allempoteñ o' yeque'chpa'huerr ñeñt ama pocteyaye Yomporecop.

4

Allempo anmet Pedro ñaña Juan allo'tsa'yen a'mcha'taretnesha'

¹ Allempoña serrpare'tatenanet Pedro epuet Juanpa' machayo'ta huacha'toña a'mcha'taretnesha'. O' huapa cornanesha', huapa ñaña guardia pa'mcha'tareter ñeñt cohuanpene' Parets pa'paquell. O' huapoña ñaña saduceonesha' ñeñt otets e'ñe ñet pocta'pño'tpa' amach erroteno't yetanterro. ² O' huacha'tetpa' cha e'moñe'toset, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerroma, yame'ñeño'tpa' yetanterrach.

³ Pa'tsrre'mueño'tetpa' o' armaretet epsheño'maret, abe'tarettet cárcelo. Allempopa' o' ellerren ñeño'marña

tsapa'tach a'p'to'tyesarettet erroteno'tte' serrpare'tenet atet.
 4 Tarraña ama't atet a'pareteta'pa' añña ñeñt' e'mue' atet
 serrpare'tatanetpa' shonte' ame'ñyet. Allempoña ñeñt'
 ame'ñetsa ahuañohuenpa' o' çhap allempo amnaroch mil
 ñeñt' ame'ñatsa.

5 Tsapañapa' o' apçha añcha'taretnesha' ama't
 ñaña ñeñt' pompornesha' penet ama't ñaña ñeñt'
 etsotene' ñoñets ñeñt' atet anaret. Ñeñt'pa' arr apçhet
 e'ñe alla Jerusaléno. 6 Allempopa' allo'tsen ñaña
 cornesha' ñeñt' nanac añcha'taret ñeñt' pa'so'cheñ Anás.
 Allo'tsen ñaña Caifás, ñaña Juan, ñaña Alejandro ñaña
 po'poñechno añcha'taretnesha' ñeñt' e'ñe pamo'tsna'tarecma
 cornesha' ñeñt' nanac añcha'taret. 7 Allempoña e'ñe
 apçha'huetpa' huapachet Pedro ñaña Juan e'ñe all
 apçhena añcha'taretnesha'. Allempoñapa' a'p'to'taretet
 epsheño'maret. Atet otanet añcha'taret:

—Sapa' ¿esesho'tña po'huamencot' o' sa'crraterña acheñ?
 ¿Esesha'tña sapuene'ña llesens atot' atet sepena?

8 Allempoña Pedro e'ñe ahuamencat' puepeño't Paret's
 Puecamquëñpa' atet otanet:

—Añcha'taretneshacha' ñaña ñeñtes pompornesha' penet,
 te'pa' o'ch notas: 9 Sapa' atto sa'p'to'teney errotene'tte' o' ye'pa
 ya cohuen añecop ñeñt' muerochtetsa, ñaña atto sa'p'to'teney
 erroteno'tte' o' ya'crrater, 10 ñehua, te'pa' o'ch se'mñoten attoch
 neñotatas sa ama't ñaña allohuen israelnesha'. E'ñe añ Je-
 sucristo ñeñt' nazareto'marnesha', ñeñtña ña po'huamencot'
 te'pa' arr ten e'ñe huomech, ñeñt' ahuaña çha echarrena.
 Añ ñeñtara Jesús sañapa' çhaña secorso'tampes attoch rroma.
 Tarraña Pomporpa' o' tantater ama't rroma. 11 Sapa' çha sot-
 tena atet ñerra'm acheñ ñeñt' tomatene' pocoll. Ñeñtña acheñ
 ñeñt' tomatene' pocollpa' çha huapore'tan mapue' ñeñt' nanac
 sherbets, tarro'mar ama es çhapahueto pueyoçhro. Tarraña
 Jesúsapa' ama't atteñ ñerra'm mapue' ñeñt' ahupore'taret
 ñeñtara Jesús ñeñtña nanac sherbets atet ñerra'm mapue' al-
 loch orratet pocoll nanac echarr. 12 Po'psheñeñpa' ama eñalle
 alloch yequeshperra, tarro'mar ama eñalle po'psheñeñ ñeñt'
 anaret ñeñt'cha' yeçhore't attoch o'ch a'queshpatey. Ama't
 ora erracmañen añe patsro ama eñalle attoch yequeshperra,
 ñapñaña Jesús. Ñeñt'pa' allohua atet otanet Pedro.

13 Añña Pedro ñaña Juanpa' ama puen'cha'nañofeye'
 eñoseto. Ama't mameshapa' ama mecha'teneto. Allempoña
 añcha'taretechnopa' o' eñochet ama puen'cha'nañofeye'
 eñenetopa' ñetpa' atet otet:

—Errotenotuaca'ye eñenetña atet. Yapa' yeñotenanet ñetpa' ama ayçhataretteto attoch eñotet quelled huomenc. Ñetpa' atteta ñerra'm po'potantañ acheñenesha' ñeññ ama tama es eñotetso. Errotenotuañaca'ye eñenetña atet ñerra'm ayçhataretet.

Allempoñapa' o' çhapanet pueyoçhro atto Pedro ñaña Juanpa' ahuaña çhocma chopeñe'che't epuet Jesús. ¹⁴ Añña ñeññ correrrtsapa' ñapa'çho' e'ñe alla ten allame'tets. Ñeñto'marña añcha'taretnesha'pa' ama erroteno't che'ptare'taneto. ¹⁵ Allempoñapa' mueñerranet a'yenet. Allempoña añcha'taretnesha'pa' serrpare'tatanna'tet e'ñe ñañañeta. ¹⁶ Atet otanna'tyeset:

—Errotenuachña' yeñanetña te'te'. Ama't arr ora Jerusaléñopa' o' e'ñe eñotuarettet atto ñetpa' orrtatet ñeññ ama't yapa' ama yentare. Ñeñto'marña te' yapa' amach erroteno ya'nasochoña', e'ñe po'ñoçh atet. ¹⁷ Tarraña ama'tcha' ama erro't yeñanetopa' te'pa' añ poctetsa o'ch yeche'ptare'tyesanet o'ch yot Janet amach allo'na serrpare'tnenetoña ñeññ atet pena Jesús. Tarro'mar yapa' ama yemno allohuen acheñenesha' o'ch e'mare'tarettuet ñeññ atet penet te' ñet arr. O'ch yot Janet ama't puesheñarra acheñ amach serrpare'tatatscheto.

¹⁸ Allempoñapa' alla agotare'tterret. Atet otare'ttapuerret e'ñe eche'çharro, atet otet:

—Te'pa' amach seserrpare'tatatsto ñeññ atet pena Jesús, ama't e'ñe mamesha. Ñaña amach seyçhatatsto ama't mamesha atet yeçhate't Jesús ahuaña.

¹⁹ Allempoña Pedro ñaña Juanpa' atet ot Janet:

—Ñehua, te'pa' o'ch soçtape'ch sa, allotpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor. ²⁰ Yapa' amach erroteno't yemmo. Añña pocte' çhocmach ya'pota ñeññ o' yentua ñaña ñeññ o' ye'mua.

²¹ Allempoñapa' atta che'ptare'tuapuenanet po'pocheño, allotña'pa' a'rroyare'ttenet. Añcha'taretnesha'pa' ama't mueneñetañ o'ch castiganaña'pa' tarraña ama erroteno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'choçhtatoñet Yompor añecop ñeññ o' entuet atto Yompor orrtat Janet po'partsoña. ²² Tarro'mar añ yacma ñeññ o' correrrapa' ñapa' o' pa'tatsoch çharra' po'charña.

Ñeññ ame'ñetsapa' atet pet allempo enamet Yompor po'huamenc

²³ Allempoña a'rroyeret Pedro ñaña Juanpa' ahuanmuet allo'tsen ñeñt parro ame'ñenet. Allempoña chapuet allpa' serppare'tatosanet atet otanet ñeñt pa'micha'tareternesha' pen allohuen judionesha' po'cornaneshar ñaña ñeñt pompornesha' penet. ²⁴ Allempoña serrpare'tatuosetpa' ñetña allohuenet parropa' o' ma'yocheret Yompor. Puema'yocheno'tpa' atet otet:

—Yompore, ñeñteþ nanac Partsoþ, þa ñeñteþ yeħcatue' enet ñaña ama't añ pats, ñaña ora erracmañen sa'p þa yeħcatue', ñaña ama't ora esocmañen ñeñt yentyen e'ñe alla e'ñe þocma peyeħcatuar. ²⁵ Ahuat yatañ Davidpa' nanac sherþape't. E'ñe Pecamquëño't pe'ñorache't, ñeño'mar atet ote't ña ahuat:

Errotenote' atsrre'muenaña po'poñ acheñenesha' ñeñt ama ame'ñetso. Errotenote' o'pateñetña ama't Parets, ñeñtpa' e'ñe orrena atet penet.

²⁶ Ñeñt añcha'tarettetsa arr patsro ñetpa' apçhet attoch o'pachet Yompor, o'pachet ñaña ñeñt llesensa' ñeñtara Cristo. Añpa' allohua atet ote't David ahuat.

²⁷⁻²⁸ Alla ma'yochereterr Yompor, atet oterretterr:

—Ñeño'marña te'pa' po'ñoçh o' etsota atto arr Jerusaléño o' apçhet attoch o'patonapet Pechemer Jesús ama't ñeñt e'ñe cohuen Parets penten þa, ñeñtña Jesús ñeñt e'ñe cohuen pesherþaye't ñeñt e'ñe þo pellsensar. Atet ahuatoteñ e'ñe peñotuanete't ñetpa' o'ç etsotaterrnapet peñoñ atet ñerra'm Herodes, ñaña Poncio Pilato, ñaña po'poñeçhno acheñ ñeñt ama ame'ñetso, ama't ñaña israelnesha'. Tarraña ñeñt atet o'pachetpa' te'pa' o' etsotuerra peñoñ. ²⁹ Ama't te'pa' Yompore peñoteny ñetpa' nanac mueneñet o'ç yore'tame'tyetye yaña. Te'pa' o'ç yenamaþ ahuamencat peþa'yepa'ch ñeñtey torretsas þocop attoch amach yenicha'tatsto. E'ñepa'ch huomencocma yeserrpare'tonaþ peñoñ. ³⁰ Porrtatonayepa'ch pehuamenc attoch corra'huerra ñeñt atsna'tyets. E'ñe yeçhore'teño't Jesús þorrtatonayepa'ch pepartsoña, ñaña ñeñt ama yentare þorrtatanetcha' attoch eñochet þapa' ñeñteþ nanac Partsoþ —e'ñe yeçhore'teño't Pechemer Jesús, ñeñt e'ñe cohuen Parets penten þa, ñeñt e'ñe cohuen pesherbene'. Añpa' allohua atet ma'yochet.

³¹ Allempoña ma'yochuetpa' allña apçhenetpa' o' pella ora all anorrçhenet. Allempocma allohuenetpa' o' chorraret Parets Puecamquëñ, attoch e'ñe huomencocma o'ç serppare'toñet Yompor po'ñoñ.

Atto es apanna'tyese'te't pame'ñeño'tet Yompor

32 Allempoteñña ñet ñeñtet ame'ñatsete'tpa' o' parrocmatuet e'ñe cohuen. E'ñe parra cotapñats anmuete't pueyoçhreto ñeñt amuerañtetsa. Ama eseshaye' otatsete ñeñt'pa' ñapfetach es o'patet, añña çhocma apanna'tyesete't ñerra'm esesha' es palltatsete't. 33 Jesús puellsensarnesha'pa' e'ñe po'huamencocmañen a'potoñete't atto tanterra Yepartseshar Jesús. Yomporpa' nanac mueranete't, ñaña nanac ahuamencat ñanete't. 34 E'ñe ñeshetopa' ama esesha' es palltatsete. Añña ñeñt allpon echyese'te't po'patseñ, amapa' pa'paquellpa' o'ch venda'yese'te't. Ñeñña allpon gana'yese'te'tpa' o'ch huapachet 35 allo'tsen allsensare't. Allotñapa' o'ch aposet ñeñt allsensare't. Allsensare'tñapa' o'ch apa'yesan ñeñt es palltatsete't. 36 Añpa' ñeñt atet pe't puesheñarr añ pa'so'cheñ José, ñeñt chipro'marnesha' ñaña ñeñtara levitana'tar. Añña ñeñt allsensare'tnesha'pa' o' socheret José Bernabé. Añña so'chñets Bernabépa' ñeñt otets yeñoño amuerañana'tar. 37 Ñaña'pa' echane't allpon pats. Allempoñapa' venda'huepa' o' huapatan allpon quelle ñeñt ganapa' o' aposan ñeñt allsensare'tnesha'.

5

Atet pa Ananías epuet puetapor Safira

1 Tarraña eñall po'psheñeñ ñeñt atet ñatsete't po'poñ, ñeñt'pa' añ pa'so'cheñ Ananías epuet puetapor ñeñt pa'so'cheñ Safira. Añña Ananíaspa' o' vendan allpon po'patseñpa' 2 o' huapatan quelle, aposan ñeñt allsensare't. Tarraña ama oraye' huapatuano quelle çchach shequënet. Tarro'mar ñet epuet puetaporpa' atet a'pocetachet o'ch yoret allpon quelle e'ñe ñocpuet. 3 Allempoña aposan allsensare't ñeñt o' allponañña quellepa', Pedroñapa' atet och:

—Eso'mare't pemnateñ oneñe't o'ch cotape'chatañ po'poñ peyoçhro. Papa' pemneñeñ o'ch peshquëñ ama't Parets Puecamquëñ atto ñapa' ahuo't peyorañ allpon quelle. 4 Ñeñt pepatseñpa' e'ñe po'ñoçh ñeñt'pa' po. Tarraña ñerra'm ama ña muenatsñe o'ch pevendeñpa' ñeñt'pa' e'ñe pocteñ. Ñaña ama'tcha' pevendeñpa' ñerra'm ama ña muenatsñe o'ch ñapyeñ ora allpon quelle ñeñt ñagappa', ñeñt e'ñe pocteñ ñaña. ¿Errotenote'ña poctape'chña atet peyoçhro? Ama yapteye' pemnenñe o'ch peshca'yeñ, Yompore'ñaña pemneñeñ o'ch peshquëñ ñaña.

5 Allempoña Ananíaspa' ñeñña e'muapa' ataco'roche' e'ñe allpa' o' rroma. Añña po'potantañ acheñenesha' allempo e'mare'chetpa' nanac yorenet huomenc. 6 Añña yacmanesha'

ñeñt po'nare'pa' o' huapuetpa' ñetñapa' e'patse'chet ñeñt rromats o' anmet a'yo all pampueñeta'.

⁷ Tematenpa' o' huapa ñaña puetapor ñeñt rromats. Ñapa' ama eñoteñe o'te' rroma puerrollar. ⁸ Allempo huapa Pedroñapa' o' a'p'to'ta'p:

—Ñehua, p'toten, ¿po'ñochte' allpona quelle sagap allempo sevenda'hua sepatsen?

Puetaporñapa' atet och:

—Allponaca'ye quelle ñeñt yagap.

⁹ Pedroñapa' atet otererr:

—Tarraña sapa' ahuo't sa'pochtach epa'p perrollareñ atetcha' se'pa. Cha't sotapañ ñato' o'ch seshquëñ ñaña ama't Parets Puecamquëñ. Pecue' o' be'toscha'tuerrmoch ñeñt o' pampa'huenna'pa' errte' perrollareñ. Papa'cho' attecmapa' anmapetcha' a'yo.

¹⁰ E'ñe allempocma puetaporpa'cho'ña o' t'aco'ra ñaña e'ñe alla Pedresho, o' rroma ñaña. Allempo be'toscha'tuerr ñeñt anmue' puerrollareñ, allñapa' entuerrñañet puetaporpa'cho'ña o' rroma. Ñapa'cho'ña anmetpa' o' pampueñeta' a'yo epuet puerrollareñ. ¹¹ Atarr mecha'na'tet allohuenet ñeñt pame'ñeño't ap'chetsa, ama't allohuen ñeñt e'mare'te'pa' cha yorenat nanac. Añpa' ñeñta allohua atet pa Ananíasoñ.

Atto Jesús puellsensarnesha'pa' orrtatete't Yompor po'partsoña

¹² Añña ñeñt Jesús puellsensarpa' nanac orrtatete't Yompor po'partsoña, ama't ñeñt acheñenesha'pa' ama puentare attoch eñochet añmapa' Partsepa't. Añña ñeñt parro ame'ñenetpa' arr ap'chenet all ochete't Salomón Popellrraro. ¹³ Po'potantañ acheñenesha' ama't e'ñe pocte' eñchete't ñeñt ame'ñetsapa', allempoña ñet puen'chaño'tetpa' ama ap'cherreto parro. ¹⁴ Allempoñapa' allo'na atonetnena po'poñe'chno acheñenesha' ñeñt o' ame'ña. Shonte' o' ame'ñana Yompor, ama't coyanesha'chno ñaña yacmanesha'chno. ¹⁵ Añña ñeñt atsna'tyetspa' o' anmet a'yenet allecma chopeñe'chenet. Allñapa' o' pa'rrra'tyesoset topantso, ñaña puesheña'tetspa' ñato' ora po'maye'na. Tarro'mar anmare'tetyeset allecma chopeñe'chenet allochñapa' ñerra'm mache' huena Pedropa' esheccha' ama't pa'choyeshe'ma po'poma'mteñapa' chapcha' ñesheto, ñato' attotpa' o'ch correrret. ¹⁶ Ñaña ama't allampaño't Jerusaléño'ipa' huapatoñ acheñenesha' atsnañe'fe'chno ñaña ama't ñeñt chorrena oneñet. Allochñapa' allohuenetpa' o'ch corra'huerret.

Allempo Pedro ñaña Juanpa' abe'tarettet cárcelo

17 Allempoñapa' ñeñt cornesha' ñeñt nanac amcha'taretpa' e'moñe'tan allohuen ñeñt ame'ñetsa. Ñaña allohuen ñeñt parro e'ñe attecmuet cotape'chenet ñeñt otenet saduceonesha'pa' o' e'moñe'chet ñeñt ame'ñetsa. Tarro'mar sope'chapretenetña', acheñenesha'pa' e'ñe cohuen enteñet ñeñt ame'ñetsa.

18 Allempoña allsensaretnesha'pa' rromueñetpa' o' abe'tarettet cárcelo e'ñe allecma abe'teñet acheñenesha'. 19 Tarraña ama't abe'tarettetpa' tsapoñapa' o' huapanet Yompor po'millañoñeñer ñeñt huetsa pue'ntañot' o' toram̄perranet, o' chapaterranet a'yenetpa' atet otanet:

20 —Añ poctetsa o'ch ahues Parets pa'paclopa' o'ch satomos all o'ch seserrpare'tach allohuen acheñenesha' ora atet yocrena etserra cohuen Partsocop.

21 Allempoña ñeñta e'mhuetpa' e'ñe ahuatecma ahua'muenet Parets pa'paclo, o' be'toscha'toset, allña yeçhata'muenet.

Añña ñeñt cornesha' ñeñt nanac amcha'taretpa' o' çhapa'muen ñaña ellonet allotcha' agotatan amcha'taretnesha'. O'ch çhapa'muen ñaña allohuen ñeñt cotene'. Allotcha' agotatan allohuen amcha'taretnesha' ñeñt çhocma a'poctatyene' ñoñets ñeñt pompornesha' penet israelena'tarnesha'. O'ña çhaçha'tuetpa' o' serrpare'tatanna'tet attoch a'poctachet atetcha' pet. Allempoñapa' o' agotachet ñeñt abe'tatenet cárcelo. 22 Tarraña allempoña çhap cárcelo ñeñt mueñenetpa' ama es entosetoña cárcelo. O' puerreretpa' atet otueret amcha'taretnesha':

23 —Yapa' allempo yeçhap cárcelopa' o' yentos cárcel e'ñe poctacma echarr ayottam̄psaret, ñaña ñeñt cohuan̄pene'pa' alla tomçhenet allot be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

24 Allempoña ñeñta e'mua amcha'taretnesha' ñeñt po'cap'táner penet ñeñt cohuan̄pene' Parets pa'paquell ñaña ñeñt pa'mcha'taretnesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' çha'nmaçhenette'. Te'pa' erro'tuanencha' pette' tsapa'tonet.

25 Allempoñapa' huapa puesheñarr atet otosanet:

—Añña ñeñt sabe'tat ellerro cárcelopa' te'ñapa' alla tomçhenet Parets pa'paclo yeçhatetset all.

26 Allempoña añña capitán ñaña ñeñtcha' yenpue'pa' o' ahuanmuet allo'tsen allsensaretnesha'. O'ña çhapuetpa' o' ahuananeta' e'ñe cohuenacma. Tarraña ama erro't paneto tarro'mar capitánpa' çha mecha'tenan acheñenesha'. Ñato' çho'te' rrolle'chet. 27 O'ña chapaterranetpa' nosanet e'ñe

allo'tsa'yen ñeñt̄ chocma a'pocatyene' ñoñets. Añña corne-sha' ñeñt̄ nanac añcha'taretpa' atet otanet:

28 —Ahuañapa' ama't e'ñe eche'charro yotuas amach seser-ppare'tatsterrero ñeñt̄ pocapña Jesús. Tarraña sapa' ahuo't̄ alla seserppare'tatuerrerr ñeñt̄ so socapña. Ama't allohuen ñeñt̄ yeçhetsa arr Jerusaléño o' alla seserppare'tatuererr. Te'ñapa' allo' seyohuerryerr ahuo' yemtsach añ Jesús.

29 Allempoñapa' otanet Pedro ñaña ñeñt̄ epuet, ñetñapa' atet ochet:

—Añña e'ñe pocte' amach acheña yame'ño, añña Yomporcha'ña yame'ña. ³⁰ Sapa' o' sepata'pes Jesús tsacho attoña o' semtsatach. Tarraña Pomporpa' ña tantaterre'. Añpa' ñeñt̄ara Yompor ñeñt̄ Po'yomporer pete't̄ ñaña ahua't̄ yatañneshañ. ³¹ Te'ña Pomporpa' o' nanac ahuamencat pe', e'ñe po'cohuenrotpa' all partsoten. Allochñapa' attoch cotape'chaterran israelena'tarnesha' ñaña attoch cotape'cherret cohuen e'ñe etserra attoch peretnerranet po'chñar. Ñeñto'marña Yomporpa' nan Jesús ñeñt̄cha' Ya'queshpatañer yepen. ³² Ñeñto'marña te'ña yapa' ya'poteññañ atet pena Yompor. Yompor Puecamquëñpa'cho'ña ñeñt̄ eñotatets. Ñeñt̄ara Puecamquëñ ñeñt̄ nennay yeyochro, allohueney ñeñt̄ey ame'ñenaya ña. Añpa' allohua atet otanet Pedro.

³³ Allempoña ñeñt̄a e'mhuet ñeñt̄ atet ot Pedropa' añña añcha'taretnesha' nanac atsrre'matanet, atarr mueneñetañ ahuo'ch muetsuet ñeñt̄ allsensaretnesha'. ³⁴ Allempoñapa' añña puesheñarr fariseo ñeñt̄ e'ñe parro a'pocatyene' ñoñetspa' o' tomos attoch eños. Ñeñt̄ tomosetspa' añ pa'so'cheñ Gamaliel, ñapa' ña ñeñt̄ yeçhatets ñoñets ñeñt̄ atet anaret, tarro'mar ñeñt̄ po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensaretnesha' mame' a'yenet. ³⁵ Ñeñt̄ epuet cotape'chatannenetpa' atet otanet:

—Masheñe israelneshacha' o'ch notas: E'ñech cohuenacma ya'pocach ñeñt̄ atetcha' yepanet. ³⁶ Sapa' ama't seyerpueñoña atto ahuaña o' orrta puesheñarr ñeñt̄ pa'so'cheñ Teudas. Ñapa' atarr muene't̄ o'ch ayochreshatta. Shonto' acheñenesha' ñato' allo'tseno'te' cuatrocientos ñeñt̄ ame'ñata. Allempoñapa' allponmaterrerrpa' o' muetsset. Ñeñt̄ña pueyochresha'pa' o' ahuanomyerret ñopa'ttsocmuet. Allempoñapa' o'huañ es cotape'chet. ³⁷ Allempoña allponmaterrerrpa' orrta ñaña po'psheñeñ ñeñt̄ pa'so'cheñ Judas ñeñt̄ galileo'marnesha'. Ñapa' tarrempo orrta allempo quellcatyenet pa'so'chñechno añcha'taretsho.

Ñapa'cho'ña tama yochresha'tana allpon acheñenesha'. Allponmaterrerrpa' ñapa'cho'ña o' chenca. Añña ñeñt pueyochresha'pa' o' parratse'tuerret. ³⁸ Ñeñto'marña te'pa' o'ch notas, o'ch sa'rroyer ñeñt serrpare'tene' ñeñt atet pena Jesús. Amach erroť sepatstaneto, tarro'mar ñerra'm e'ñe ñoťoťeta poctapñoť atet penetpa' ñeñtpa' mameshapa' o'ch huañerr. ³⁹ Tarraña ñerra'm poctapñetpa' Yomporeshot huenapa' amach erroťenoť sehuapore'tache. Ñato' sapa' čha se'moñe'teññañ ama't Yompor poctapña. Añpa' ñeñt atet otan Gamaliel añcha'taretnesha'.

⁴⁰ Atet coťape'chatanet Gamalielpa' e'ñe pocte' eñchet. Allempoñapa' alla agotaterran allsensaretnesha'. Allempoña huačherretpa' o' nalle'tatanet añcha'taretnesha'. O' nalle'tatuanet añcha'taretnesha'pa' allotña'pa' otarettet ñaña e'ñe eche'čharro:

—Te'pa' amach seserrpare'taterrerro ñeñt atet pena Jesús. Allempoñapa' a'rroyarettenet. ⁴¹ Allempoñapa' o' ahuanenet, o' sa'neñet ñeñt čocma a'poctatyene' ñoñets. E'ñe pocsheñeshocmañen ahuanenet tarro'mar Yompor e'ñe pocte' entanet ñeñto'mar muenatanet o'ch mueročtet ñocop. ⁴² Allempoteñ pate'tets yetpa' čocmach yečhateteť Parets pa'paclo ama't ñaña e'ñe alla pa'pacleto. Nanac serrpare'teteť atto Jesús'pa' ña Cristotats.

6

Arrpa' allempo net cančherrsheña ñeñt'cha' epatyeshahuet rreñets

¹ Allempoteñña'pa' allo'na sen atonetnomtsa ñeñt ame'ñetsa. Tarraña e'ñe allempopa' o' sope'channa'tet. Ñehua, tarro'mar allempopa' atet peteť. Pate'tets yet Jesús pueyochresha'pa' o'ch apa'yesan allohuen rretorrnanesha' rreñets ñeñt pallta'yesatseť rreñets. Ñeñt e'muene' griegačhpa' ñetpa' atet otyeset:

—Ñeñt yamo'ts rretorrnanesha'pa' ñetpa' ama allponeshac-maye' rreñets agapueto allpon agapyes ñeñt e'muene' hebreačh. Yamo'ts rretorrnanesha'pa' coñe'ta agapyeset. Ñeñtña rretorrnanesha' ñeñt e'muene' hebreačhpa' shonte' rreñets agapyeset. Attoña sope'channa'tet. ² Allempoñapa' ñeñt čharrasheña puechena epa ñeñtara Jesús puellsensarpa' ñetña'pa' agotatuet allohuen ñeñt ame'ñetsa. O'ña apčha'huetpa' atet otarettapuet:

—Yapa' ama tama pocteye'yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten attoch yapa'yes allohuen rretorrnanesha' rreñets. ³ Añña pocte' masheñeshacha', o'ch se'ñ cančherrsheña ñeñtara

ñeñtey ameñetsa arr parro—erra'tsente' cohuen acheñ senten ñaña ñeñt chorrena Parets Puecamquëñ ñaña ñeñt atarr eñotene' ñeñt cohuentetsa Yomporecop. Añ ñeñtara cancherrsheña ñeñtcha' po'taruas pet attoch epatyaset ñeñt pallta'yetsa rreñets. ⁴ Allochñapa' yapa' añach yema'yochra ma'yochatsa ñaña o'ch ya'potoñ Yompor po'ñoñ. Ñeñtach paterr yetorrena. Ateñ otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt nanac ameñetsa ñeñt e'ñe chorrena Parets Puecamquëñ. Allotpa' neñet ñaña Felipe, ñaña Prócoro ñaña Nicanor ñaña Timón ñaña Parmenas ñaña Nicolás ñeñt antioquio'marnesha' ñeñt ahuatoteñ ameñate't judionesha'. ⁶ Añña ñeñt cancherrsheña acheñpa' o' ahupatarettet allo'tsen Jesús puellsensarnesha'. Añña allsensaretnesha'pa' allenta ma'yochamñpesyet, o' net pot ñesheto, atet otarettet ñeñtcha' po'taruas pet.

⁷ Allempoñapa' o' e'ñe epa'hua Yompor po'ñoñ ora. Allempoñapa' allo'na sen shonta'nmatsa ñeñt ameñetsa all Jerusaléño. Allempopa' shonte' judionesha' po'cornaneshar ameñatsa.

Allempo rromuet Esteban

⁸ Añña Estebanpa' Yompor pomuereño'tpa' nanac amueraña. E'ñe Parets po'huamencotpa' orrtatanet ñeñt ama puentareto atto eñochet añmapa' po'ñoñ Parets po'huamencot orrtena. ⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeñtara oteñet libertinanesha'. Ñetñapa' alla apchenet po'prahuo. Ñaña po'potantañ judionesha' ñeñt huetsa Cireneot ñaña Alejandrío't ñaña Cilicio't ñaña Asio'tpa' — ora allohuenetpa' e'ñe parrocmachmñare'toñet Esteban po'ñoñ. ¹⁰ Tarraña Estebanpa' nanac es eñot atto serrpare'ten. Ñetpa' ama errotent anapeto. Estebanpa' añ chorraye't Parets Puecamquëñ, ñeñto'marña ama errotent anapete'te. ¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeñt atsa'taretpa' atet otet:

—Yapa' o' ye'm Esteban añ achmñare'ten Moisés po'ñoñ ama't ñaña Yomporpa' achmeñ. Ateñ toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeñt pompornesha' pen judionesha', huapa ñaña ñeñt etsotene' Moisés po'ñoñ. Huapapa' o' rromueñeta' Esteban o' anmet añcha'taretneshesho allecma a'pocatenet ñoñets. ¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' čhocma achm̄are'tenan Parets pa'paquëll ñaña čhocma achm̄are'tenan Moisés po'ñoñ.

¹⁴ Alla oterreterr ñeñt atsa'tareť:

—Yapa' o' ye'm̄ Esteban atet oten añ Jesús ñeñt nazareto'marnesha'pa' o'ch a'matam̄psey Parets pa'paquëllpa' o'ch huapore'tatonay atet yečhatye't Moisés.

¹⁵ Allempoñapa' allohuenet ñeñt allo'tsa'yen o' cohuanr-rorchet Esteban. Tarraña o' eñchet e'ñe cohuen orrtena pa'clloyot atet orrtena ñerra'mrrate' Yompor po'millañoteñer ñeñt huetsa entot.

7

Atto Estebanpa' serrpare'tatan am̄cha'taretnesha'

¹ Allempoñapa' añña cornesha' ñeñt nanac am̄cha'taretpa' a'p̄to'tan Esteban, atet och:

—¿Po'ñoča't atet?

² Estebanñapa' atet och:

—Ñehua, masheñeshacha' allohuenes nomporneshacha' o'ch se'm̄ñoten, o'ch notas ñeñt atet p̄a'yese't ahuat yatañneshañ. Ahuatpa' Yompor ñeñt nanac Paretspa' orrtane't yatañ Abraham all anetso Mesopotamia. Allempopa' ama čhena' Haráno allcha' yečherra. ³ Allempo orrtana Abrahampa' atet och ñeñtcha' atet p̄a: “Te'pa' o'ch ahuep̄ arrot o'ch pesa'nom añ peney, o'ch pesa'neñ ñaña p̄amo'tsesha', o'ch ahuep̄ allcha' notaḡ.” Atet och Yompor, atetčo' p̄a yatañ Abraham. ⁴ Allempoñapa' a'ypo'ña'nman all yeche't all yečhanate't ñaña caldeo'marnesha' atto čhap allo'tsen anets Harán all yečherra. Allempo o' rroma pomporeñpa' Yomporpa' o' alla anererr arrma Canaáno all yeyčhena ya te'. ⁵ Tarraña allempo čhap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch aḡ añ pats, e'ñe ñocop, ama't puechemerecop, ñaña po'm̄renñecop. Tarraña allempopa' yatañ Abrahampa' ama chemere'tena'. ⁶ Allempocma Yomporpa' o' eñotatan Abraham attoch esempo po'm̄reneñpa' ahuanmuetcha' arrot, čhapuetcha' po'poñ anetso Egipto all ama pa'nyempañooyaye, allcha' yeča'huerret, allñapa' mueročhtatapanetcha' allo'marnesha' acheñ. Ñaña añ eñotatan Abraham attoch ataruasatarettach e'ñe atfa po'm̄reneñ, e'ñe cuatrocientos char amueročhtatarettet. ⁷ Tarraña Yomporpa' o' eñotatan Abraham ñaña po'poñ. Ahuo't och Yompor: “Tarraña napa' netsa'taterach ñeñtcha' mueročhtate' pem̄reneñ. Allempoñapa' huačherretcha' alla arr Canaáno allcha' ma'yocherrnet.” ⁸ Ñaña allempo Yomporpa' ahuo't otan

Abraham po'poñ ñeñtcha' atet yecha' judionesha' allempoteñ errponohuañen, attoch eñochet Yomporpa' ama pueno po'ñoñ. Añmapa' ñeñt atet otan Abraham: "Añ pocte' o'ch setsorre allohuen asheñorrofollesha'." Ñeñto'mar allempo chemere't Abrahampa' puechemeretoll ñeñt soch Isaacpa' ahuo't tsorreñ. Po'psocmatñopa' o' tsorre. Isaacñapa' allempo o' po'npa' o' chemere'tana Jacob. Jacobñapa' chemere'tana çharrasheña puechena epa ñeñtara yatañneshañ yepen ya ñeñtey israelena'tarey.

9 'Tarraña allempopa' añña ñeñt yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñtña agapue'pa' o' aneñ ßachayo all anets Egipto. 10 Tarraña Yompor ña a'nataya. Yomporpa' o' a'pocatuoñ ora allohuen atto mueroçhtachete't. Añña ñeñt añcha'tarettatset Egiptopa' e'ñe cohuen entane't José. Añ ñeñt añcha'tarettatset Egipto ñeñtpa' oteñet Faraón. Faraónpa' eñotan José ñapa' nanac es eñoten. Ñeñto'mar añcha'taret Faraónpa' o' nan José ñeñtcha' añcha'tarettapretaya all Egipto. Ñaña ora allpon ñeñt taruaset Faraón pa'paclo'marpa' o' nan José ñeñtcha' yechenahuet.

11 'Allempoñapa' orrta muecheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'çho'ña nanac cheporrare'tet. Pa'chporrñoftepa' nanac mueroçhtete't. Yatañneshañpa' ama echete'te pocrramet ama't coñe'ta. 12 Allempoñapa' yatañ Jacobpa' o' e'mare'tan orameñ rreñets Egipto. Ñeñto'marña mueñan puechemeresha' ñeñtara yatañneshañ yepen ya. Ñetpa' o' ahuanmuet Egipto o'ch rañteneta' rreñets. 13 Rañña'hueneta' rreñetspa' o' puerraçherret. Atomatpa' o' huañaperret pocrrañpa' o' alla ahuanerreterr Egipto. Allempoña çhaçherreterr Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoñapa' o' cheme'chet pa'mo'nasheñ José. Pa'mo'nasheñña'pa' o' anmanet añcha'taretesho attoch cheme'tatanet. 14 Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José: "Onetepa' allohuenet Egipto." Ñeñto'marña allohuen cançhroch çharra' puechena amnarsheña pamo'tsesha' ñetñapa' ahuanmuet Egipto allo'tsen José. 15 Allempoñapa' çhaçha'tet Egipto. O' met allpon charpa' o' rroma yatañ Jacoboñ all Egipto. Meterrerr allpon charpa' o' colla'hua ñaña puechemereshañ ñeñtara yatañneshañ yepen. Colla'huetpa'

alla apamparettet all Egipto. ¹⁶ Ñehua, meterrerr allpon charpa' o' ahuanmaretterret puenpa'ts anetso Sicño allcha' apamparetterret ello puenpa'ts. All apamparetterretpa' ñeñtpa' ñeñtara pats ñeñt o' rañta'hua Abrahamañ ahuat. Añña patspa' ñeñto' vendon Hamor puechemereshañ ahuat all Sicño.

¹⁷ Alla oterraneterr Esteban, atet ot:

—Allponerrerr charpa' chapmoch allempo o'ch etsota atet Yomporpa' otane't ahuat Abraham allempo huomenc nane't po'ñoñ. Ñetpa' allempo nanac merete't all Egipto. ¹⁸ Atteñapa' o' met shonte' charpa' o' orrta po'poñ añcha'taret Egipto ñeñt ama puentarano José, tarro'mar Josépa' ahuatoteñ o' rroma. ¹⁹ Añña añcha'taretpa' nanac muerochtatyesonay yatañneshañ. O' nanet ñoñets attoch pamo'mtayetpa' o'ch a'ypo'ñet puechemeretoll a'yo. Añepo'ch atet peñet attoch muetsatachet puechemeretoll. Allochñapa' amach nanac mereto. ²⁰ E'ñe allempopa' o' eñalleta Moisés tarraña Yomporpa' e'ñe cohuen entane't Moisés. Pamo'mte'pa' e'ñe a'nahua cohue' ma'pma arorr all pa'paclo. ²¹ Allempoñapa' o' chap allempo amach erroteno cohueñeto pa'paclo a'nahua. Allempopa' a'ypo'ñet a'yenet. Añña añcha'taret Faraón po'señpa' ahuo' huapa all neñet ahuo' entos, nanac amuerochen eñch, allenta aner attoch ñañrecha. Atteñapa' o' atarrtach pa'paclo atet ñerra'm puechoyor e'ñe ño. ²² Ñeñto'marña Moiséspa' aychataretta ora allpon ñeñt atet eñotyese't egipto'marnesha'. Nanac eñotañte't ñerra'm allempo eñose't, nanac eñotañte't ñerra'm allempo es pa'yese't.

²³ 'Allempo chap pa'tatsoch charra' po'charña Moiséspa' nanac yerpane't pamo'tsesha' ñeñtara israelena'tarnesha'. Atarr seche't o'ch abchenaneta'. Allempoña parrochpa' o' ahuo' allo'tsa'yen pamo'tsesha'. ²⁴ O'ña chap allpa' all entosan puesheñarr egipto'marnesha' nanac coñchatenan puesheñarr israelena'tar. Ñañaapa' o' moñsosana pamo'ts. O' chote huomencpa' cha rroma. Atto chemnatanaña pamo'ts. ²⁵ Añña Moiséspa' otapañ pamo'tsesha'pa' e'ñech cohuen entapet. Otapañ o'te' eñochet Yompor mueñe' attoch a'queshpatan pamo'tsesha'. Tarraña ñetpa' ama eseshaye' pocte' entaye. ²⁶ Tarro'mar tsapañña' alla ahuenerr, allempopa' o' entuenanerr epsheña pamo'tsesha' cho' orrotenet e'ñe ñañeñeta. Ñañaapa' mueneñ o'ch amo'tstaterranet, atet otanet: “Esuañaca' masheñneshacha' sottenña arr. Añña pocte' e'ñech semo'nasheñ sepannena.” ²⁷ Ñeñt chetene' pamo'tspa' o' a'mchech Moiséspa' ñañaapa' atet ot: “Eseshahuañaca' peneneña pa' añcha'taret arr yocop. Eseshahuañaca' potene' o'ch pa'tsrre'mochta arr. ²⁸ Ñato' añte' pemnen

o'ch pemtsan namña atet pepe' muetse' egipto'marnesha' ellerro." 29 Allempoña o' e'man añ ñoñets Moisésñapa' o' yeta puenmchañoñ. O' ahuo' a'yo allo'tsen pats pa'so'cheñ Madián. O' ye'cha'huerra allañar. Allñapa' all sena'tapa' o' chemere't epsheña.

30 O' alla oterraneterr Esteban, atet ot:

—Allempoñapa' o' meterrerr pa'tatsoch çharra' char. Parrochpa' amarato'tsen Moisés allame'tets aspeno Sinaíño. Allñapa' entosan tsachmatoll all ñoña huorten. E'ñe huortot tso'pa' allot orroña Parets po'mllañoñeñer. 31 Ñeñt entos Moiséspa' atet ot: “¿Ešte' huortetsña tarro?” E'ñe çhapatsa allame'tets o'ch enteña'pa' o' e'man ñoñets. Partsepa't eñets, atet och: 32 “Napa' ñeñten Po'yomporer pen ama't patañneshañ ñeñtara Abraham ñaña Isaac ñaña Jacob.” Moiséspa' çha yoren. Puenmchañoñpa' ama cohuano huorte'. 33 Yomporñapa' atet otererr: “Penmcha'na'teñoñpa' perrote't pesapat tarro'mar all pãtenpa' ñeñtpa'çho' nanac Parets tarro'mar allo'tsenen na.” 34 O' alla otererr Yompor: “Napa' nenteñ atto mueroçtatennanet ñeñt nechemeresha' nepen ñeñtara israelena'tar. Napa' ne'muenanet atet yahuanrrortenet. Ñeñto'marña te'pa' o' nohuapa o'ch na'qeshpãtanet. Te'ñapa' o'ch nemñañ pã Egipto.” Añpa' ñeñta atet otan Yompor Moisés.

35 'Añña Yompor po'mllañoñeñer ñeñt orrtetsa all huorten tsachmopa' ñeñtña eñotate' Moisés atet muenen Yompor. Ñeñto'mar yeñoteñ Yomporpa' ahuo't llesensan Moisés o' alla mueñer pamo'tseshesho ñeñtcha' amcha'tarettatsa ñocpuet ñaña ñeñtcha' a'qeshpãtahuet allot amuroçtataretete't. Añ ñeñtara Moisés ñeñt ama pocteye' ento ahuaña pamo'ts ñeñt otet ahuaña: “Esesha'huañaca' penene' pã amcha'taret arr yocop. Esesha'huañaca' p̄otene' o'ch pã'tsrre'moçhta arr.” 36 Añ ñeñtara Moisés ñeñt anerrahuet Egiptot. Ñeñtara Moiséspa' orrtatanet ñeñt ama puentareto all Egipto. Ñaña sa'pot ñeñt Tsasasen all orrtatanet ñeñt ama puentareto, atto eñotatanet añmapa' ñeñt atet pena Parets. Ñaña all chopeñe'chen amarato'mar pa'tatsoch çharra' char Moiséspa' all orrtatyasanet ñeñt ama puentareto. Añpa' ñeñt eñotatanet atet penaña Parets. 37 Añ ñeñtara Moisés ahuatpa' o' otan israelnesha' atet: “Yomporpa' orrtaterrnascha' puesheñar ñeñtcha' a'mterre' Parets po'ñoñ, ñeñtara ñeñt e'ñe samo'ts sepen e'ñech attecma orrtaterr e'ñe atet orrtatenen namña. Ñeñtcha'ña çhocma se'mñoterrña sa.” 38 Ama't allempo yatañneshañ chopeñe'çhete't amaratareropa' añña Moisés allo'tseneta parro ama't allpa' çhocmach apçhete't

Yomporecop. Ñapa' allo'tsena aspento Sinaíþno allempo orrtoña Yompor po'millañoñeñer ñeññ eñorana'taya ñaña o' yeçhach ñoñets alloch e'ñe yocrra Partsocop. Ñeññña ñoñets allempo puerrerra Moisés aspentoþpa' o' yeçhatuerran ñaña pamo'tsesha'.

³⁹ 'Tarraña ama't atet pe't Moiséspa' yatañneshañpa' ama muenete'te o'ch ame'nyet Moisés. Ama eseshaye' pocteye' entaye'te. E'ñe pueyoçhretopa' atarro' muenete't o'ch alla puerrerret Egipto. ⁴⁰ Ama't allempo aspento'tsen Moiséspa' yatañneshañpa' atet otoñet pa'mo'nasheñ Aarón: "Te'pa' o'ch peyeçhcatonay ñeññcha' yeyoser yeperr ñeññcha' yanerre' alla Egipto. Añ Moisés ñeññ yanmue' Egiptoþpa' yapa' ama yeñoteñe, ta', ¿errate' o' ahuo'?" ⁴¹ Allempoñapa' o' yeçhcatanet ñeññ atet ñerra'mrrate' añ ayeçhcatare't oro. O' muetset carrnero o' neññañeta' e'ñe ñesho. Nanac cohuen entet ñeññ yeçhcatet e'ñe potot. ⁴² Allempoña Yomporpa' o' a'ypo'ña'nmanet, o' muenatanet attoch muechatse'tet ñeññ yeçhoyo'tamþene' ama't arrorr ñaña ranto. O' pet atet quellquë't ñeññ a'mtaye't Yompor po'ñoñ ahuat. Añmapa' ñeññ quellquë't ahuat, atet ñerra'm Yompor otets:

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeññpa' ama neshoye' sehuapache. Ama't ora añ pa'tatsoch çharra' char all sechopeñe'chen amaratarero atet es seþa'yen.

⁴³ Añ seyomporer sepen po'poñ, ñeññ ayeçhcatare't ñeññ soten allo' yeçhena seyoser ñeññ sesochen Moloc. Amapa' atet ñerra'm ayeçhcatare't rantoma't ñeññ soten añmapa' seyosro' ñeññ sesochen ñaña Refán. Shonte' ayeçhcatare'teçhno ñeññ seconcorpana'tena. Ñeñño'marña te'pa' o'ch nemñas nanac allañar, all Babilonio. Añpa' allohua ñeññ atet quellquë't ahuat ñeññ a'mtaye't Yompor po'ñoñ.

⁴⁴ O' alla oterraneterr Esteban, atet ot:

—Ahuat yatañneshañpa' allempo chopeñe'çhete't amaratareropa' anmuete't pocoll shetamtsopo' allecma apçhete't Yomporecop. O'ponopa' all nete't mapuettall allo' aquellcare't ñoñets ñeññ poctetsa Yomporecop. Añ pocoll shetamtsopo' Moiséspa' ña yeçhcataye't e'ñe atet oche't Yompor po'millañoñeñer e'ñe atet gache't Yompor. ⁴⁵ Allempo rromanom Moisés puechope'chpayopa' o' na'nmet Josué ñeññcha' anmue' yatañneshañ. Apa'nmet ñaña shetamtsopo' ñeññña' çhapachet allo'tseno' pats ñeññ otanete't Yompor ahuatoteñ o'ch apanet. Po'poñ acheñnesha'

ñeñt yeçhetsa allpa' Yomporpa' o' muevo'tuerranet attoch yatañneshañpa' o'ch yeçha'huerret all. Allempopa' o' çapatet all shetamtsopo' allecma apçhenet Yomporecop. Shetamtsopahuopa' allecma apçhete't tarremphua allempo orrta David. ⁴⁶ Allempo orrta Davidpa' ñapa' e'ñe cohuen enteñ Yompor. Ñaña'pa' o' enaman Yompor pocte'te' enteñ o'ch yeçhcaton pa'paquell ñeñt e'ñe cohuen echarr. Mueneñ o'ch yeçhcatan Yompor pa'paquell, ñeñtara Po'yomporer pe't ñaña pa'tañ Jacoboñ. ⁴⁷ Tarraña ama't mueneñeñ ñapa' Yomporpa' ama mueno. Añña muenatoñ puechemer Salomón, ñach tomate' pa'paquell. ⁴⁸ Tarraña Ñeñt nanac Paretspa' ama yeçheno pocollo ñeñt yeyeçhcaten ya, arromñatey. Ama't atet ote't ñeñt a'mtaye't Yompor po'ñoñ, atet ñerra'm Yompor eñets, atet oten:

⁴⁹ Napa' nanac Partson. Napa' nenten enet atet ñerra'm neconañ, patsñapa' nenteñ atet ñerra'm allcha' nenen netac. Errotenohuachñaca' seyeçhcatonña pocoll allcha' neyçha. Ama nepallteno allcha' neyçha, atet oten Yompor.

⁵⁰ Napa' nehuamencot neyeçhcatua ora allohuen ñeñt sentyen. Añpa' allohua atet ot Yompor.

⁵¹ Alla oterraneterr Esteban:

—Sapa' nanac se'charrtena, seyoçhropa' ama soçtape'cheno atet ñerra'm Yomporena'tares. Ama semno o'ch se'ññoñoñ Yompor po'ñoñ. Chocma satpare'teññañ Parets Puecamquëñ. Atet pe't satañneshañ ahuat te'pa' atetçho' sepena saña. ⁵² Ama't allohuen ñeñt a'mtaye't Yompor po'ñoñ ahuat satañneshañña' çha mueroçhtatyesanete't. Ama't ahuat allempo ama orrtena' Jesúsapa' ñeñt a'poçaye't atto esempohuañen o'ch huapa Cristo ñeñt e'ñe pocte' es pets, ñeñtpa'çho'ña satañneshañpa' çha muetse. Te'pa'çho'ña añ Cristo ñeñt e'ñe pocte' es petspa' ahuo' sepom saña attoch semtsach.

⁵³ Alla oterraneterr Esteban:

—Ama't Parets po'mllañoñeñer ñeñt señoñate' ñeñt poctetsa Yomporecop sañapa' satpare'toñ Yompor po'ñoñ. Añmapa' allohua ñeñt atet serrpare'tatanet Esteban.

Allempo muetset Esteban

⁵⁴ Allempoña ñeñta e'mhuet atet ot Estebanpa' nanac atrre'matanet. Pa'tsrre'mueñoçetpa' çha rraso'tyeset pa's. ⁵⁵ Allempo Estebanpa' e'ñe chorreña Parets Puecamquëñ. Ñaña'pa' o' cohua' enonet, allña'pa' all entan Yompor po'cohuenña. Entan Jesús e'ñe po'partsoteñoñ all ten Pompor po'cohuenroñ. ⁵⁶ Allempoñapa' oterrer Esteban:

—Napa' o' nent enet atoraref. O' nent ñaña allo'tsen Ñeñt Acheñetosets, po'partsoteñoŕpa' all ten Parets po'cohuenroŕ.

⁵⁷ Acheñenesha'ña pa'tsrre'mueñoŕetpa' rranare'tet. Puerranare'teñoŕetpa' mopaqueta'tyeset, o' matrra'tet ñesho attoch o'ch rromuet. ⁵⁸ O' rromuetpa' o' anmet a'yenet all ama eñalle pocoll allcha' rrolle'chet. Ñeñtcha' rrolle'te'pa' o' rrorrra'tyeset pa'shtam, o' na'yaset e'ñe allo'tsen puesheñarr yacma ñeñt huepueshameñ ñeñt pa'so'cheñ Saulo. ⁵⁹ Allempoñapa' rrolle'chet. Rrolle'chetpa' Estebanñapa' o' ma'yochapa', atet ot:

—Nepartseshare Jesús, pagaponcha' necamquëñ.

⁶⁰ Allempoñapa' concorpa. Concorpapa' eñora huomenc, atet ot:

—Amach Nepartseshare petsa'tatatstaneto.

Allempoñapa' ñeñña otuapa' o' muechecha, o' rroma.

8

Allempo Saulopa' nanac mueneñ ahuo'ch a'cclatuan ñeñt ame'ñetsa

¹⁻² Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeñt nanac ame'ñenaya Yomporpa' puellquëñeshetpa' o' huapuet, o'ch eñeta' arromñañ attoch pampueñeta'. Nanac ya'na'teñet Estebanañ. Allempoteñ nanac muerochtachete't ñeñt pame'ñeñoŕet Cristopa' apçhete't Jerusaléno. Ñeñto'marña shonte' acheñenesha' ñeñt yetrra'tatsa po'poñ añetso'mar. O' parratse'tuet allemeña—Judeo'mar ñaña Samario'mar. Tarraña añña Jesús puellsensarnesha'pa' ama esesha' yetatso ama't puesheñarra. ³ Sauloñapa' nanac mueneñ o'ch a'cclatuan allohuen ñeñt ame'ñetsa. O'ch be'tosam̄psanet pa'pacletopa' o'ch rromanet, o'chçho' chetare'tnerranet. O'chçho' be'tosuerrerr ñaña po'ppauño'pa' o'chçho' rroma'huerraneterr, o'chçho' chetare'tnerraneterr, o'ch anmanet cárcelo allcha' abe'tatuanet. Ama't coyaneshaçhno e'ñe abe'tatuanete't cárcelo.

Atto Felipepa' serrpare'tatanete't Samario

⁴ Añña ñeñt yetrra'tatsa Jerusalénoŕpa' all çhapyeset, erra ta'yenetpa' allcha' serrpare'teññañet Yompor po'ñoñ.

⁵ Atef ñerra'm Felipe. Ñapa' o' ahuo', o' çhap anetso ñeñt pa'so'cheñ Samaria. Allñapa' all serrpare'tatosanet añepa't Cristotats ñeñtara Jesús. ⁶ Felipepa' orrtatanet ñeñt ama puentareto. Atef eñchetpa' o' eñochet añpa' po'ñoçh

* **8:1-2** Saulopa' ñeñtara Pablo.

Parets po'huamenc orrtaten. Ñeñto'marña allohuen acheñenesha'pa' e'mñoteñet e'ñe cohuen atet otanet. ⁷ Shonte' acheñ ñeñt chorra'yese't oneñeñ allempopa' e'ñe queçhpatyesueretña oneñeñ atto chorrenana acheñ. Allempo queçhpatyesueret oneñeñña'pa' o'ch rranare'tnoma. Ñaña shonte' acheñ ñeñt echarreyestse'tpa' o' corra'huerret. Ama't ñeñt checare'payestse'tpa' o' a'crratyesuahuerranet Felipe. ⁸ Ñeñto'marña nanac coshyete't Samario.

⁹ Allempopa' allo'tsen puesheñarr ñeñt achyo'tañ ahuaña ñeñt'pa' añ pa'so'cheñ Simón. Allohuenet samario'marnesha' ama't ahua'toteñ'pa' cohuanrrortoñete't atet orrtate't ñeñt ama puentareto. Ñapa' o'ch shequënanet. Ñetña'pa' çha otenapuetañ ñapa' nanacte' po'ñoçh ahuamencat, atet oten ña. ¹⁰ Allohuen acheñ'pa' e'mñochete't atet ote't ahuaña—ama't ñeñt añcha'tarettetsa ñaña ñeñt ama esoshe'mayaye acheñ. Ochete't:

—Po'ñoçh añ acheñ'pa' ñeñt Partsoçoptartetsa.

¹¹ Ñeñto'marña acheñenesha'pa' nanac ame'ñyete't. Ama't ahua'toteñ cohuanrrortoñete't atet orrtate't ñeñt ama puentareto. ¹² Tarraña allempo serrpare'tatanet Felipe cohuen ñoñets o' ame'ñatanet allohuen—yacmanesha'çhno ñaña allohuenet coyaneshohuen. Serrpare'tatanet atet penaña Yompor po'cohuenña ñeñt atto atarr ayochreshattena ña, ñaña atet pena Jesús ñeñt Cristotats. O' ame'ñatuanet allempoñapa' apatare'ttet Yomporecop. ¹³ Ama't achyo'tañ ñeñt soçhetsa Simón'pa' o' ame'ñerra ñaña. Ñapa'çho'ña apataretta Yomporecop. Apatare'tetuapa' allempoteñña'pa' yemterrana Felipe errohuanen çhopeñe'çhen. All orrtatanet Felipe ñeñt ama puentareto attoch eñoçet añmapa' ñeñt po'ñoçh huetsa Partsesho't. Simónña'pa' o'ch entan atet'pa' atet'cha' ot:

—Erroteno'tuañaca' atet penate'.

¹⁴ Allempoña Jesús puellsensarnesha'pa' e'mare'çhet Jerusaléño't shonte' samario'marnesha' ame'ñeññañet Yompor po'ñoñ'pa' o' mueñet Pedro ñaña Juan all Samario. ¹⁵ Allempo çhap Pedro ñaña Juan Samariopa' ma'yocham'psosyet samario'marnesha' ñeñt ame'ñetsa. Enamet Yompor chorratanetepa' Parets Puecamquëñ. ¹⁶ Tarro'mar allempopa' ama chorrenaneta' Parets Puecamquëñ. O'ña apatare'tetuet pame'ñeñote't Yepartseshar Jesús. ¹⁷ Allempoña Pedro ñaña Juan'pa' o' net pot ñesheto ñeñt ame'ñetsa. Nohuet pot ñeshetopa' Yomporña Puecamquëñ'pa' ahuepa't chorraret.

¹⁸⁻¹⁹ Añña Simón ñeñt achyo'tañtetsa ahuaña o' çhapoña pueyoçhropa' atet ot:

—Añecpuepa't nenet pot attoch chorr Janet Parets Puecamquëñ.

Allempoñapa' atet ot Janet Simón:

—Llesenscha' nomporneshacha' o'ch nenanet namia not attoch chorr Janet Parets Puecamquëñ. O'ch napas quelle attoch sapuen llesens.

²⁰ Pedroñapa' atet och:

—Peçllayorpa' chenquëpa' alla, allotpa' pechenquëpa' pama tarro'mar papa' p'otenapaañ o'ch perañtoña Parets Puecamquëñ. Neñtpa' amach errotenot petsa'cho. Añña Yomporpa' o'ch apuey e'ñe atta. ²¹ Ama pocteyaye o'ch pagap pa llesens tarro'mar Yomporpa' ama pocteye' entennape peyoçher. ²² Te'pa' aña poctetsa o'ch poctape'cherr ello cohuen, o'ch pequeçhuerr añ sosya'tsañ o'ch penamuer Yompor peretneñets. Nato' Yomporpa' o'ch peretnerrnaþ atto poctape'chen sosya'tsañ.

²³ Pedropa' alla otererr:

—Napa' neñoteneþ nanac sosey poctape'chen peyoçhro, cha p'ottena atet ñerra'm po'chñarpa' huanquëneþ.

²⁴ Simónñapa' alla otererr:

—O'ch sanamon Yompor nocop attoch amach es netantoyo atet sotenen. Añpa' allohua atet pena Simón.

²⁵ Pedro ñaña Juanpa' nanac a'pofoñet Yompor po'ñoñ all Samario. Serrpare'tueneta'pa' alla ahuanerret Jerusaléño. All oñenet samario'marpa' ñeñt yeçhetsa toño'marpa' e'ñe acoþoteñ serrpare'tatyesuaneret.

Allempo Felipepa' ame'ñatana etiopo'marnesha'

²⁶ Allempoña añ Felipepa' orrtoña Yompor po'mllañoñeñer atet otos:

—O'ch çhapmoch poctopa' o'ch ahueþ a'yo, o'ch peçhap amarato allo'tsen toñ ñeñt sets Jerusaléño't attoch yeçhap anetso añ pa'so'cheñ Gaza.

²⁷ Ñañaapa' atet och Yompor po'mllañoñeñerpa' atetçho' pa. Allempoñapa' o' ahuo'. O' çhap all toño ñeñt sets Gazopa' o' entosan puesheñarr etiopo'marnesha'. Añ etiopo'marnesha' ñeñtpa' ñeñt añcha'taret aña po'taruas pen o'ch cohuanþenan ora allpon quelle ñeñt gobiernocop alla pa'nyo. Pa'neypa' añ pa'so'cheñ Etiopía. Neñt nanac añcha'tarettetsa all pa'nyopa' añ pa'so'cheñ Candace ñeñtpa' coyanesha'. Añ yacma ñeñt entos Felipepa' ñeñtpa' acaparet acheñ. Añña etiopo'marnesha'pa' errte' asuena' Jerusaléño allempo entos Felipe. Tarro'mar ta all o'ch ma'yochenana' Yompor. ²⁸ Allempoña o' alla puerrerra pa'nyo. Napa' alla anen po'carro. Neñña carropa' cahualla matatene'. All

anenpa' all lleyen Yompor po'ñoñ ñeñtara ñoñets lleyen ñeñt quellquë't ahuat Isaías ñeñt a'mtaye't Yompor po'ñoñ.
 29 Añña Parets Puecamquëñpa' eñotatan Felipe, ñeñña ote':

—O'ch penteña' ñeñt anets tarro e'ñe all carro.

30 Felipeñapa' o' mata. Matapa' chap allame'tetspa' o' e'mosan cho' lleyen añ Yompor po'ñoñ ñeñtara ñoñets ñeñt quellquë't Isaías ñeñt a'mtaye't Yompor po'ñoñ ahuat. E'mos Felipepa' atet otos:

—¿Eñotochena't penteñ ñeñt atet oten ñeñt pelleyen?

31 Ñaña' atet och:

—Errotenohuate'ca'ye neñochna' amaca'ye eñalle ñeñtcha' neñotate'. Ñato' o'ch pa'tap pa' o'ch yanorr parro.

32 O' a'tap Felipepa' o' cohuos all lleyen. Añ lleyen Yompor po'ñoño ñeñtapa' añ ñoñets ñeñt quellquë't Isaías:

Atetcha' pa' ña atet ñerra'm carrnero. Ñehua, carrneropa' o'ch yanemñ allcha' yemtsepa' amach ama'tochto. Amapa' ñerra'm yetsorroñ pue'chpa' amach ama'tochto. Atetcha' pa' ña, amach es oto.

33 Nanac muerochtachet, ama pocteye' ñeñt atet poñet. Ama erroteno o'ch yotua ora allohuen ñeñt atet sosey pa'yes pamo'tsna'tarnesha'. O' muetsetpa', o'huañ corra añe patsro. Añpa' allohua atet quellquë't Isaías.

34 Allempoña ñeñt etiopo'marnesha'pa' o' a'p'to'ch Felipe:

—Ñehua, p'toten, ¿eseshocpa'tña eñen arr Isaías, ñato' ñocpa'e' amapa' po'psheññecop'te'?

35 Allempoña Felipepa' o' serrpare'tach cohuen ñoñets atet pena Jesús. Eñotach añ ñeñtara Isaías po'ñoñpa' eñen Jesúsocop. Allempoñapa' o' eñotach ñaña po'poñ Yompor po'ñoñ ñeñtara ñeñt atet pena Jesús. 36 Allña allenet matam'penetpa' o' entoset oñ, atet ot etiopo'marnesha':

—Ta'm, ¿pocte'te'te' o'ch napataretta Partsocop?

37 Felipeñapa' atet och:

—Ñehua, ñerra'm po'ñoñ pame'ñena peyo'chrocmañenpa' e'ñe pocte' o'ch papataretta Partsocop.

Etiopo'marnesha'ñapa' atet ot:

—Napa' po'ñoñ name'ñena. Te'pa' neñoteñ Jesucristo ñeñtapa' ñeñt Yompor Puechemer.

38 Allempoñapa' o' tomatoset po'carro sohua'rrtosetpa' o' ahuanmuet oño. Allña apatos Felipe. 39 O'

cha'nerret oño'pa' Yompor Puecamquëñña'pa' o' anman Felipe a'yo. Allña' machayota ma'nata alla. Ñeñt etiopo'marnesha'pa' ama enterrano Felipe. Allempopa' o' ahuerri etiopo'marnesha' e'ñe pocsheñesha'. Añpa' allohua ñeñt atet pa' etiopo'marnesha'. 40 All anetso Azotapa' all

orrterraña Felipe. Allña'pa' serrpare'tatosanet cohuen ñoñets alloch yequeshpa. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

Allempo Saulopa' cotape'cherr ello cohuen Yomporecop
(Hch. 22.6-16; 26.12-18)

¹ Allempoña Saulopa' nanac e'moñe'tenan ñeñt ame'ñenaya Yepartseshar Jesús. Pa'tsrre'mueño'tpa' atet ot:

—Napa' o'ch na'cclatueña' ñeñt ame'ñenaya Jesús.

Ñeñto'marña o' ahuo' allo'tsen ñeñt nanac añcha'taret cornesha' e'ñe all Jerusaléño. ² Chap allo'tsenpa' o' enamos orden attoch a'cclatuan ñeñt ame'ñetsa. O' enam orden ñeñtcha' anom a'yo anetso Damasco allecma apchenet judionesha' po'prahuo. O'ch chap allpa' o'ch aposan ñeñt añcha'tarettetsa puerahuo. Attoch apet all llesens attoch rromanatan acheñ ñeñt cotene' Jesús poctapña. Ama't coy-anesha'chno ñaña yacmanesha'chno o'ch rromanatanet o'ch huancatanet o'ch anmare'tterret Jerusaléño. Atet cotape'chña Saulo. ³ Allempoña agapuan orden allempoñapa' o' ahuo'. O' chap allame'tets Damascopa' machayota ñeñt nanac poptetsa entotpa' o' choyo'tam'pes e'ñe ñesho. ⁴ O' choyo'tam'pespa' ñaña'pa' alla rromopra patso. Chap patsopa' e'man ñoñets ñeñt atet oten:

—Esomare't Saule pemuero'chtatennanña ñeñt name'ñenaya.

⁵ Sauloñapa' atet ot:

—¿Eseshape't Ayochreshate eñets?

Ñeñt eñetspa' alla otererr:

—Napa' ñeñten Jesúsena, ñeñtara ñeñten pemuero'chtaten. Añpa' pañeña muero'chtatetsa. Tarro'mar cha pottena ñerra'mrrate' ashen ñeñt e'ñe patpare'teñoñ ñañeñachña atserrpatetsa.

⁶ Sauloñapa' po'yorño'tpa' cha pa'shmuena allempoñapa' atet ot:

—Partseshacha' te'pa' ¿errofena't penmen ñeñtcha' atet nepena?

Partsesha'ña Jesúsapa' atet otererr:

—Te'ñapa' o'ch petanta, ahuep Damasco. Allcha'ña otapet ñeñtcha' atet peña.

⁷ Ñeñt parro epuet sen Saulo ñetñapa' atta cohuanrrortenet. Pocuanrrorteño'tetpa' ama errof oteto. Ñetpa'cho'ña e'muet ñeñt e'morrtatsa tarraña ama es enteto. ⁸ Allempoña Saulopa' o' tanta. Tantapa' o'ch cohua'yespa' ama ento. Ñeñto'marña

atta echa'nmet pototpa' o' anmet Damasco. ⁹ O' chap Damascopa' ma'pamuet Sauloñapa' ama enteno, ñaña ama es rreno, ñaña ama es orreno, ama't coñe'ta.

¹⁰ Damascoñapa' allo'tsen puesheñarr ñeñt nanac ame'ñenaya Yepartseshar Jesús. Ñaña' añ pa'so'cheñ Ananías. Añña Ananíaspa' Yepartseshar Jesús orrtoña atet ñerra'm puechopoñoť o' chore'chpa' atet och:

—¡Ananías!

Ananíasña anappa', atet ot:

—Napa' Nepartseshare añen.

¹¹ Yepartsesharñapa' alla otererr:

—O'ch notap atetcha' pepa. O'ch ahuep allo'tsen toñ ñeñt nanac pa'charr allcha' pentos Judas pa'paquell. Pechap all pa'paclopa' o'ch pa'p'to'tos erro'tsente'ña ñeñt Saulo ñeñt tarso'marnesha'.

Alla otererr Yepartseshar:

—O'ch notap ñaña, añ ñeñtara Saulo e'ñe te'pa' allo'tsen ma'yochetsa. ¹² Napa' o' norrtatuoñ ñeñt o' entua neshot. O' entuan atet ñerra'mrrate' acheñ añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuerr.

¹³ Ananíasñapa' alla anapuererr:

—Partseshacha' napa' o' ne'mare'ch atet o' pa añ ñeñtara Saulo. Shonte' acheñ o' e'mare'tatnet atto ñapa' nanac muerochtatenan ñeñt pame'ñenaya Jerusaléno.

¹⁴ Te'pa' ñapa' echenan orden o'ch huancatyese y allohueney ñeñtey pame'ñenaya, o'ch anmatey cárcelo. Ñeñt pa'm'cha'taretnesha' pen allohuen judionesha' po'cornanesharpa' o' apet Saulo añ orden.

¹⁵ Yepartsesharñapa' alla otererr:

—Tarraña ama't atet te'pa' o'ch ahuep all, ñeñt atet o' notuap. Te'pa' o' nene' Saulo ñeñtcha' na'potene' neñoñ añcha'taretneshesho. Ama't po'poñechno acheñeneshopa' ñapa' a'potoncha' neñoñ. Ñaña ama't israelena'tarneshopa' o'ch a'poton neñoñ. ¹⁶ Ñaña o'ch neñotach Saulo ñapa' o'ch muerochta nanac nocop, tarro'mar te'pa' o'ch ame'ña'na na. Añpa' allohua ñeñt atet serrpare't Yepartseshar epuet Ananías.

¹⁷ Allempoñapa' o' ahuo' Ananías o'ch entenana' Saulo. Chap allpa' o' be'tosos pocollo allo'tsen Saulo. O' ponmosyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeñtca'ye porrtoya allempo poñen toño. Te'pa' añ ñeñtara Yepartseshar Jesús

o' mueñan na o'ch non attoch alla pecuerr, ñaña attoch chorraña Parets Puecamquëñ.

¹⁸ Ñeñña otuapa' allorocma rrata'nom pa'clloyot ñeññ atet ñerra'mrrate' es pa'tall, o' alla cohuerr e'ñe cohuen. Alla cohuerr e'ñe cohuenpa' allempoñapa' apataretta Yomporecop. ¹⁹ O' apataretetuapa' o' rrallme'cherr. O' alla çherr po'huamenc. Allempoñapa' allponmaterrerr alla Damascopa' o' serrpare't epuet ñeññ ame'ñetsa.

Allempo Saulopa' e'ñe ñenmã serrpare'terr all Damasco

²⁰ Ñaña Saulopa' çhocma sen judionesha' po'prahuo allcha' serrpare'tatenanet atet pena Jesús. Otanet añ Jesús'pa' po'ñoçh ñeññpa' ñeññña Parets Puechemer. ²¹ Allohuenet ñeññ e' muene'pa' otyeset:

—Ta', errotenuañaca'yeña te' ñeññ yacmar. Añmapa' ñeññca'ye mueroçhtataye't ahuaña ñeññ ame'ñenaya Jesús all Jerusaléño. Ñeñto'marña te'pa' huena arr, mueneñ o'ch rromanatenana' ñeññ ame'ñetsa o'ch anmarettet cornaneshesho ñeññ pa'ñcha'tareternesha' pen allohuen judionesha' po'cornaneshar.

²² Saulopa' allo'na sen huomenc ãa'nmue' pueyoçher attoch serrpare'tan Yompor po'ñoñ. Nanac serrpare'tatanet atto po'ñoçh Jesús'pa' ñeññara Cristotats. Ama't judionesha' ñeññ yeçhetsa Damascopa' ama erroteno anapeto.

Allempo Saulopa' a'yetater judionesha'

²³ Atteña o' allponmatpa' añña judionesha'pa' o'pachet o'ch muetset. ²⁴ Saulopa' e'mare'ch o' o'pachet, o'ch cohuet attoch o'ch muetset. Arr cohuet allotecma be'tenet all aconcha'tamñsare't ora anets. Ellapenete't cohua'me'tet ñaña arepenete't. ²⁵ Tarraña ñeññ pueyochresha' Saulopa' o' anmet tsapo allo'tsen pocoll e'ñe all aconcha'tamñsare't anets, allñapa' eñall ventana allot a'suatamñperet atarret cañtro't.

Allempo Saulopa' puerrerra alla Jerusaléño

²⁶ Allempoñapa' ahuer Jerusalem. Cherr Jerusaléño'pa' atarr mueneñ o'ch entenana' ñeññ ame'ñetsa. Ñeññña ame'ñetsapa' ama mueneto o'ch entenaneta' tarro'mar nanac mecha'teñet, otenapuetañ atto'te' shequënanet o' ame'ña.

²⁷ Añña puesheñarr ñeññ pa'so'cheñ Bernabépa' ñaña'pa' o' anemñ allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasconet. Yepartsesharepa't epuet serrpare't. Ñaña'pa' ama mecha'to ñeñto'mar atarr serrpare't Damasco atet pena Jesús.

²⁸ Allempoteñña' e'ñe pocte' eñchet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr

nanac serrpare'tan Jesús po'ñoñ. ²⁹ Chocmach serrpare'ten epuet judionesha' ñeñt e'muene' griegačhp'a' tarraña amach pocteye' enteñeto. Allempoñapa' o' pachet ñaña all o'ch muetset. ³⁰ Allempoña ñeñt parro ame'ñenetpa' anmet Saulo po'poñ anetso Cesareo. Alločpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

³¹ Atteñapa' o' muetsoñeñtuerra ñeñt amueročhtatañ. All Judeo ñaña Galileo ñaña Samariopa' o'huañ amueročhtatarettet atet pete't ahuaña. Allohuen ñeñt ame'ñetsa allo'na senet huomenc p'a'nmuet pueyočhret. Atteñapa' o' shonta'nma ñeñt ame'ñetsa. Pame'ñeñoftpa' allo'na senet mecha'na'tnomuet Yompor. Ñaña allo'na Parets Puecamquēñpa' nanac coshatenanet. ³² Atteña Pedropa' čhocmach ta'yena emo'tyese' ñeñt ame'ñetsa. Parrochpa' o' čhap allo'tsen ñeñt ame'ñetsa all anetso pa'so'cheñ Lida. ³³ Allñapa' entosan puesheñarr yacma añ pa'so'cheñ Eneas. Ñapa' ahuatoteñ echarrtena alla p'anena o' posoc char. ³⁴ O' entos Pedropa' atet otos:

—O'ch Eneaso notač, Jesucristopa' o'ch a'crraterreč. Te'ñapa' o'ch petanta o'ch p'añño'ten pemue'.

Allorocma correna, o' tantena. ³⁵ Allohuen ñeñt yečhetsa Lido ñaña Sarónopa' allempoña eñchetpa' čha puesuerret ñeñt ahuač poctapñet o' ame'ñerrñañet Yompor po'ñoñ.

Allempo Pedropa' tantaterran Tabita allempo rroma

³⁶ Eñall puesheñarr coyanesha' ñeñt ame'ñetsa añ pa'so'cheñ Tabita, añ ñeñtara so'chñets Tabita ñeñt otenet griegačho Dorcas. Ñapa' arr yečhena anetso ñeñt pa'so'cheñ Joje e'ñe alla allame'tets Lido. Ñañaapa' nanac amueraña, čhocmach yenpuenan ñeñt huocchañetyets. ³⁷ Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet yečhenet ñet. Apatuetpa' o' p'anet enonet all tama a'yohuen čač. ³⁸ Allempoña ñeñt ame'ñetsa allpa' o' e'mare'chet Pedro allame'ttso'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña čhapuet Pedreshopa' ³⁹ Pedroñapa' o' coterranet. Chap allpa' o' anmet all cuarto eno allo'tsen arromñač. All tomčhen shonte' rretorrñanesha' ñeñt llecanrrortetsa. Allñapa' all gatanna'tyenet ñeñt chorra'yenet ñeñt sepechyesanet ahuaña Tabitañ. ⁴⁰ Pedroñapa' mueñuanet allohuenet a'yenet. O' mueñuanet a'yenetpa' o' concorposa, o' ma'yocha. Ma'yochuapa' o' puetallsa arromñačeshonetpa' atet och:

—O'ch Tabita notač, petanterra.

Allempoñapa' acuerroche'. O' enterran Pedropa' cha anerrets. ⁴¹ Pedroñapa' cheter pototpa' echanter attoch terr. Allempoñapa' o' chore'terran ñeñt ame'ñetsa ñaña rretornaneshachno. O' be'toscha'terretpa' o' gaterranet o' tanterra ñeñt rromats. ⁴² Allohuenet ñeñt yeçhetsa all Jopopa' o' e'mare'chet atet pena Pedro. Ñeñto'marña shonte' acheñ o' ame'ñeret Yepartseshar Jesús. ⁴³ Pedroñapa' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet pa capitán Cornelio epuet Pedro

¹ Eñall puesheñarr capitán, añ soche't Cornelio. Ñañaapa' allo'tsen anetso añ pa'so'cheñ Cesarea. Allñapa' ña mueñanatene' charroch charra' guardianesha' ñeñt oteñet Guardia Italiana. ² Añña Cornelioñapa' nanac cohuen cotape'che't Partsocop, ñaña nanac mecha'na'teñ. Ama't ñeñt yeçhetsa e'ñe parro ñetpa'cho'ña cotape'chete't cohuen Partsocop. Ñapa' nanac amueraña, shonte' es apa'yesane't ñeñt es palltatse't. Ñaña chocmach ma'yochenana Parets. ³ Atta yeçhena ama't ahuatoteñ. Parrochpa' o' coya'nen atsne'pa' orrtoña ñeñt Yompor po'mllañoñeñer. Orrtoña atet ñerra'm pueçhopoño't, tarraña ama'choye' chopo'teñe. Tarraña o' orrtoñapa' e'ñe cohuen eñch. O' huapapa' atet otos:

—¡Cornelio!

⁴ Ñañaapa' pueñcha'naño'tpa' atta cohue', allo'tñapa' atet otaþ:

—¿Eso'tña Partseshacha' pemnen?

Mellañoñeñapa' alla otererr:

—Pema'yocheño't te'pa' o' yerpaþa Yompor. E'ñe pocte' antennapþ atto es þapa'yeñ ñeñt es palltetsa. ⁵ Te'ñapa' añ pocte' o'ch pemñe acheñ Jopo o'ch þagotach puesheñarr añ pa'so'cheñ Simón, ñeñtara oteñet Pedro. ⁶ Ñapa' all a'puena po'psheñeñ Simón pa'paclo. Te'pa' ñachña þoterre' ñeñtcha' atet peperra. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquellpa' ontapo'tsen. Añpa' allohua atet ot Yompor po'mllañoñeñer.

⁷ Ñeñta otuapa' o' ahuerr. Ahuerrpa' Cornelioñapa' chore'tan epsheña ñeñt taruaset e'ñe alla pocollo, chore'tan ñaña puesheñarr po'solltarer ñeñtþa' aña po'taruas penet attoch cohuañpeñet po'caþtánret. Añpa' ñeñt cohuen cotape'chets Partsocop ñaña. ⁸ Allo'tpa' o' serrpare'tatanet ora atto orrtoña Yompor po'mllañoñeñer.

Ñeñta serrpare'tatuanetpa' o' mueñanet Jopo. Allempoñapa' ahuanmuet. ⁹ Tsapañña' o' chapmochet Jopo. O' chapmochetpa' Pedroña e'ñe alla pocollopa' o' a'tap eno allcha' ma'yochosa. Allempopa' chapmoch pocto. ¹⁰ O' chapmoch poctopa' cheporra Pedro. Atarro' mueneñeñ o'ch rra'pa' tarraña ama potena'ña rreñets. Alla cohuenpa' o' huapoña ñeñt atet ñerra'm cho' es chopo'ten. ¹¹ Entoñapa' o' entan ñeñt atet ñerra'm atarr shetamuets. Enotpa' cha sohuanpesnena, ačharampsareť pa'tats po'topñe'marot. Añña ñeñt ačharampsareťpa' sohua'netsa patsonet e'ñe ñeshonet. ¹² Allña shetamtso e'ñe o'ponopa' allo'tsa'yen shonte' pa'namen berročno, ama't po'poñ berročno ñeñt ama arrapoye' eñche'te judionesha'. Ñaña allo'tsa'yen pa'namen shechpečno ñaña pa'namen otečno. ¹³ O' chap allame'tets ñesho, Pedroñapa' e'man ñoñets, atet oten:

—Pedro o'ch pemtsa añ berr o'ch perre'.

¹⁴ Pedroñapa' atet ot:

—Ama Nomporcha', nerreñe. Napa' ama't ahuaťapa' ama nerrare ñeñt ama arrapahuoyaye atet yeyčhena ya ñeñtey judioneshay.

¹⁵ Allempoñapa' o' alla oterrerr ñeñt eñets, atet ot:

—Ñeñt o' a'cohuentatua Yomporpa' p̄apa' amach p̄otatsto añmapa' ama cohuenayaye.

¹⁶ Añpa' e'ñe ma'pocha e'm̄pa' allempoñapa' o' alla a'terr enonet, o' alla chenquerra. ¹⁷ Allempoñapa' Pedropa' nanac moñne'tacha, o' cotape'chpa' atet ot:

—Esuañaca' otenenña ñeñt o' nentua.

Ñeñt nanac moñne'tenapa' allempocma chap ñaña ñeñt mueñen Cornelio. Netpa' o' a'p̄to'tnomuet errate' yechenaña Simón. Allempoña entoñet Simón pa'paquellpa', o' chapuet allot be'tenetpa' ¹⁸ o' chore'toset atet otoset:

—¿Arre't a'puenaña ñeñt sochetsa Simón ñeñtara ñeñt otenet Pedro?

¹⁹ Pedroñapa' e'ñe alla enopa' ama't orameñ moñne'tenana ñeñt o' entuapa' añña Parets Puecamquẽña' atet och:

—O' chap ma'psheña acheñ ñeñt pe'nene'. ²⁰ Te'pa' o'ch pesuerra tayecma o'ch p̄octerranet. Amach penčha'tatsto. Napa' na mueñenahuet atto huapuet arr. Añpa' atet ot Parets Puecamquẽñ.

²¹ Ñeñta otuepa' Pedroñapa' asuerroche' patso. O' chap allo'tsen añ ma'psheña atet otapanet:

—Napa' naña ñeñten se'nen. ¿Esocpa'tña sehuena?

²² Netñapa' atet ochet:

—Yapa' añ yemñene' capitán Cornelio. Capitánpa' oten pñonepa'to'. Ñapa' orrtoña Parets po'millañoñeñer atet och: "Pagotach Pedro onepa'. Ñaña pocte' o'ch pe'mñoch ñeñcha' atet otañ." Atet och Parets po'millañoñeñer. Ñeñto'marña yapa' o' yehuapa. Tarro'mar capitán Corneliopa' ñapa' e'ñe cohuen cotape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

²³ Allempoña Pedropa' atet otapanet:

—Ñehua, sebe'tos allach sa'pa, tsapa'tachña ahuey parro.

Allñapa' alla moset, tsapa'tñapa' ahuanenet. Po'potantaña'cho'ña ñeñt ame'ñetsa e'ñe alla Jopopa' o' cota'huanmuet ñamet.

²⁴ Tsapa'tñapa' o' chapuet Cesareo. Cornelioñapa' alla cohuan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt epuet yemtena. Ñetñapa' all cohueñet e'ñe parro. ²⁵ O' huapa Pedro. O' huapapa' Cornelioñapa' o' tantnoma attoch o'ch poctañ. O' concorposñaña o'ch ma'yochapya. ²⁶ Tarraña Pedroñapa' o' cheterpa' atet och:

—Petanterra, amach pema'yochatsetno. Napa'cho'ña aromña'tena.

²⁷ O' tanterrapa' serrpare'tatanna'tet mame'pa' allo'tñapa' o' be'toscha'tet pocollo. Allñapa' o' entosan shonte' acheñ ñeñt o' cha'cha't. ²⁸ Allempoñapa' otanet Pedro:

—Sapa' seño'teñ ya judioneshaypa' ama pocteye' yenteñe o'ch yeyemcha po'poñ acheñ ñeñt ama judioneshayaye. Tarro'mar yapa' atet yeychena amach yeya'rrotatsche acheñ ñeñt ama judioneshayaye. Tarraña te' Yomporpa' o' ye'chatuan amach yentatsche po'psheñeñ atet ñerra'mrrate' ñeñt ama cohuenayaye. ²⁹ Ñeñto'marña te'pa' o' nohuapa arr tayecma allempo agotatenet. Te'ñapa' o'ch na'p'to'tañ ¿esocopte' pagotatenen?

³⁰ Allempoñapa' Cornelioñapa' atet ot:

—Ahuaña o' taya pa'tatmat met, napa' alla nema'yochena, ñaña nema'yocheño' o' neque'chpa' nerrar mame'. Ñeñt attecma nepena allempocma nema'yochena nepacillo atet ñerra'm te' coya'nen atsne'. Allempopa' machayota orrtona puesheñarr yacma e'ñe allame'tets. Pa'shtampa' añ chorrena ñeñt nanac cohuen poptetsa. ³¹ Ñaña'pa' otosen: "Cornelio, pema'yocheño' te'pa' e'muene'p Yompor. E'ñe pocte' enten-na'p atto es p'apa'yeyñ ñeñt es palltetsa. Ñeñto'marña te'pa' o' yerpa'pa. ³² Te'ñapa' o'ch pemñe acheñ Jopo o'ch pagotach puesheñarr ñeñt pa'so'cheñ Simón ñeñtara ñeñt otenet Pedro. Ñapa' alla a'puena po'psheñeñ Simón pa'pacillo. Ñach huapatsapa' ñapa' serrpare'tatose'pcha'. Ñehua, ñeñt Simón

all a'puena Pedro ñeñtca'ye a'cohuenetyene'ña pa'rrom. Pa'paquëllpa' ontapo'tsen." Añpa' allohua atet oten ñeñt nor-toya. ³³ Ñeñto'marña nagotatenep̄. Te'pa' e'ñe pocte' o' pehuapa. Te'pa' Yompor eñoteney ñeñtey arro'tsa'yeney yemneñ o'ch ye'mñotaḡ o'ch peserrpare'tatey errponṡe' Yompor yeçhateneḡ.

Allempo Pedropa' serrpare'tatosanet Cornelio pa'paclo

³⁴ Pedroña' alla oterrerr:

—Po'ñoç te'pa' o' neñoç tarro'mar o' çhapona neyoçhro, ama ñapña judionesha' morrentenoña Yompor. ³⁵ Añña ama't erra'tsen pa'namen acheñ, eñallcha'ña puesheña'tets ñeñtcha' mecha'na'tene' Yompor ñaña ñeñtcha' e'ñe cohuen es pets Yomporecop. Ñeñtpa' e'ñech pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' señoṡeñe'tña Yomporpa' o' mueñonay Puechemer Jesucristo, ñeñtey judioneshacpay. Añ ñeñtara Jesús pa' o' a'pocatuonay e'ñe cohuen Partsocop attoch cosheñtso'tseneycha'. Te'ñapa' ñach Yepartseshar yeperr allohueney. Añ cohuen ñoñetspa' o' serrpare'tuet erracmañen Judeo'mar. Ñanompa' serrpare'çhete't Galileo allempo apate't Juanañ.

³⁸ Alla oterranneterr Pedro:

—Señoṡeñe' Yomporpa' o' nan Puechemer Jesús ñeñt nazareto'marnesha'. O' chorracha Parets Puecamquëñ ñaña nanac ahuamencat pe'. Alloṡpa' all chopeñe'chyese'tpa' nanac amuerañte't. A'crratyese't allohuen ñeñt mueroçhtatyese't oneñe't, tarro'mar Pomporpa' nanac yenpue't.

³⁹ Alla oterranneterr Pedro:

—Yapa' o' yentuoñ ora allpon atet pa'yese't all yeçhena judionesha' ñaña all Jerusaléño. Yapa' o' yentue ñeñto'marña te'pa' o' ya'potoñ ñeñt atet pa'yese't. Alloṡña'pa' o' corso'tañḡset tsacho, atto muetset. ⁴⁰ Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop. ⁴¹ Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'potoñ ñeñt atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

⁴² Alla oterrerr Pedro:

—Ñapa' o' otey o'ch yeserrpare'tach acheñenesha', o'ch ya'potoñ atto yeñoç Yomporpa' o' nan Puechemer Jesús ñach acre' allohuen acheñenesha' —errotencia' corret puesheña'ttset. Acrancha' allohuen acheñenesha' ama't ñeñt corretsa ñaña ama't ñeñt o' colla'huen.

⁴³ Alla oterrerr Pedro:

—Ñeñt ama't ahuat ñeñt a'mtaye't Yompor po'ñoñpa' ñeñtara Jesús a'potete't. Ama't ahuat ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorranet Parets Puecamquëñ ñeñt ama judioneshayaye

⁴⁴ Ama't allempo serrpare'ten Pedropa' añña Parets Puecamquëñpa' ahuepa't chorranet allohuenet ñeñtet e'mñote'. ⁴⁵ Añña judionesha' ñeñt ame'ñetsa ñeñt parro huapa Pedro, ñetña'pa' atfa cohuanrrortenet, o' otet:

—Errotenotuata'e'ca'ye chorranet ñamet Parets Puecamquëñ e'ñe atfo'ta, ñetpa' amaca'ye judioneshayayeto. Atet otet ñet.

⁴⁶ Tarraña po'ñoçhpa' ahuepa't chorranet ñamet Parets Puecamquëñ tarro'mar ñetpa'cho'ña ahuepa't eñosyaset po'poñ ñoñtso. E'ñe po'poñ ñoñtso aye'choçhtachet Yompor. Atto e'manet judionesha'. Allempoñapa' atet ot Pedro:

⁴⁷ —Ama't pocte' senteñe o'ch apatarettet Partsocop. Tarro'mar o' chorranet Parets Puecamquëñ e'ñe atet ñerra'm ya.

⁴⁸ Allempoñapa' otanet Pedro:

—Te'pa' e'ñe pocte' same'ñeñoñ Jesucristo o'ch sapataretta.

Allempoña apatarettetuetpa' atet ochet Pedro a'puepa'to' alla allponmat.

11

Allempo Pedropa' serrpare'tatuerranet Jerusaléño

¹ O' allponmat Jesúsña puellsensarnesha' o' e'mare'chet atto po'poñ acheñ ñeñt ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñeçhno acheñ ñeñt ame'ñetsa all Judeo.

² Allempoña ahuer Pedro. Allempo çherr Jerusaléño'pa' judionesha' ñeñt ame'ñetsa allpa' o' che'ptare'tapueret Pedro.

³ O' che'ptare'chet Pedro, atet ochet:

—Eso'mare'tña petaña allo'tsen ñeñt ama judioneshayaye, ama't allpa' o'te' cha perrallme'chapretos—anet.

⁴ Allempoña Pedropa' o' serrpare'tatuerranet ñeñt e'ñe atet pa; ⁵ atet otanet:

—Napa' allo'tsenen Jopo. Allempo nema'yochena huapona ñeñt atet ñerra'm cho' es yeçhopo'ten. Entoñapa' o' nent ñeñt atet ñerra'mrrate' shetamuets. Eno'tpa' cha sohua'nena açharampsaret e'ñe pa'tats po'to'pñe'marot. Añña ñeñt açharampsaretpa' sohua'netsa patsonet e'ñe neshonet.

⁶ Napa' o' necue'pa' allña o'ponopa' nent pa'namen berroçhno ñaña ñeñt puetsato'mar, ama't po'poñ berroçhno ñeñt

ama arrapahuoye' yenteno ya ñeñtey judioneshay. Nent ñaña pa'namen shechpečno, ama't ñaña pa'namen otečno. ⁷ Allempoñapa' ne'm ñoñets, atet oten: "Pedro o'ch pemtsa añ berr o'ch perre'." ⁸ Tarraña napa' not: "Ama Nompocha' nerreñe. Napa' ama't ahuatapa' ama nerrare ñeñt ama arrapahuoyaye atet yeychena ya judioneshay." ⁹ Allempoñapa' alla oterrerr ñeñt eñets entoť, atet ot: "Ñeñt o' a'cohuentatua Yomporpa' p'apa' amach potatsto añmapa' ama cohuenayaye." ¹⁰ Añpa' e'ñe ma'pocha ne'm'pa' allempoñapa' o' alla a'terr enonet o' alla chenquerra —ora. ¹¹ Allempocma o' chap ñaña ma'psheña acheñ. Chapuet all pocollo all nommuena. Añ ma'psheña acheña' arrot mueñonet Cesareot. ¹² Añña Yompor Puecamquëñña' oten o'ch nocterranet. Oten amach nemcha'tatsto. Añ pechapsheña ñeñt arro'tsen te' o' yahuanma parro. Allempoñapa' yechap pa'paclo ñeñt nagotatene'. ¹³ Allempoña o' yechap pa'paclopa' ñaña'pa' o' serrpare'tatapuey atto' orrtoña Yompor po'mllañoñeñer. Orrtoña'pa' atet otos: "Añ pocte' o'ch pemñe acheñ Jopo o'ch pagotach puesheñarr añ pa'so'cheñ Simón ñeñtara ñeñt otenet Pedro. ¹⁴ Añña Pedropa' ñeñtcha' peñotate' attoch pequeshperra ñaña allohuen p'amo'tsesha'." Atet oten Yompor po'mllañoñeñer. ¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamquëñña' ahuepa't chorr Janet. O' chorr Janet ñet e'ñe attecma chorra'ya ahuaña yaña. ¹⁶ Allempoñapa' o' neyerepya atet otey ahuaña Yepartseshar Jesús: "Juanañpa' e'ñe oñochaya apate't tarraña na añcha'ña nechorratasa Parets Puecamquëñ." ¹⁷ Ñehua, Yomporpa' e'ñe pocte' enteñ o'ch chorr Janet ñet e'ñe attecma atet chorra'ya ya allempo yame'ña Yepartseshar Jesucristo. Ñehua, ñerra'm e'ñe pocte' enteñ Yomporpa' nañapa' errotenotuete'ca'ye neche'ptare'chña Yompor.

¹⁸ Ñeñta otuapa' allempoñapa' alla moma'huet allohuenet. Allempoñapa' o' aye'chochtatoñet Yompor, atet otet:

—Ama't po'poñ acheñ ñeñt ama judioneshayaye Yomporpa' mueneñ o'ch cotape'cherret ello cohuen alloch ñetpa'cho'ña corretsetach pocsheñeshocmañen e'ñe tayoteñ errponañohuen. Allohua ñeñt atet p'a Pedro ñaña Cornelio.

Atto epa'hua Yompor po'ñoñ erraparen

¹⁹ Allempo muetset Estebanpa' allempoteñña orra muerochteñets. Nanac muerochtachete't ñeñt ame'ñetsa. Ñeñto'marña yetrra'tyeset allemeña, parratse'tyeset po'poñ anetso'mar. Puesheña'tetspa' ahuanmuet Fenicio'mar,

po'potantañña'pá' ahuanmuet Chipro, po'potantañña' ahuanomyeset Antioquíu. All chopeñe'chyesnomuetpa' all serrpare'tyesnomuet Yompor po'ñoñ, tarraña aña serrpare'tatnomuet ñapueñ judionesha'.²⁰ Tarraña puesheña'tets chipro'marnesha' ñaña cireneo'marnesha' ñeññ ame'ñetsapa' o' chapuet Antioquíu. Allñapa' aña serrpare'tatoset ñeññ griegonesha'. Añ serrpare'tet ñeññ atet pena Yepartseshar Jesús.²¹ Yomporpa' nanac ahuamencat panet. Ñeñño'marña shonte' acheñ ame'ñachet Yepartseshar Jesús, o' a'ypo'ña'huerret ñeññ ahuat poctapñet.²² Añña ñeññ ame'ñetsa Jerusaléñopa' o' e'mare'chet atto shonte' ame'ñetsa Antioquíu. Ñeñño'marña mueñet Bernabé Antioquíu, o'ch yenpuenaneta'.²³ Allempo'chap Bernabé allpa' entosan po'ño'ch o' orrta Yompor pemuereña all. Ñeñño'marña nanac coshosa. O' coñape'chatosanet, atet otanet:

—Amach seque'chapstere Yompor po'ñoñ. Huomenccha' sepa' seyocher.

²⁴ Añña Bernabépa' ñapa' nanac amueraña, nanac chorreña Parets Puecamquëñ. Atarr ame'ñena. Ñeñño'marña shonte' ame'ñatana acheñenesha' attoch coteret Yepartseshar.

²⁵ Allempoña ahua' Bernabé. O' chap Tarso allcha' e'nerrana' Saulo. Allña entospa' a'secher o'ch aner Antioquíu.²⁶ Epsheño'maret alla a'puet paterr char Antioquíu. Allñapa' nanac ye'chachete't ñeññ a'p'chatse't all pame'ñeño'tet Yompor. Shonte' acheñ ame'ñatsa all. All Antioquíopa' añ asochare'ttet ñeññ ame'ñetsa "Cristona'tarnesha'." Ñanom arr Antioquíu asochare'ttet atet.

²⁷ Allempoña Jerusaléñopa' allo'tsen puesheña'tets ñeññ a'mtene' Yompor po'ñoñ. Parrochpa' ona'cha'tet. Chapuet Antioquíopa'²⁸ añña ñeññ pa'so'cheñ Agabopa' o' tomospa' serrpare'tatosanet, atet otanet:

—Orrtach mue'cheñets esempo errañaren patso. Añpa' allohua ñeññ atet ot Agabo.

Añ eñotate' Yompor Puecamquëñ, ama't allempopa' ama orrtena' mue'cheñets. Allempo añcha'taretta Claudiopa' allempo'ña orrta mue'cheñets.²⁹ Ñeñño'marña allohuen ñeññ ame'ñetsa Antioquíopa' o' a'poctachet o'ch mueñet ñeññcha' yenpue' pa'mo'nasheñnesha' ñeññ ye'chetsa Judeo.³⁰ Allpon echyenetpa' allpon apa'yeset. Atet a'poctachetpa' atet'cho' pet. O' apueñet Bernabé ñaña Saulo, ñetñapa' anmet Jerusaléño, allñapa' aposet ñeññ pompornesha' pen ñeññ ame'ñetsa Jerusaléño.

12

Allempo am̄cha'taret Herodes muetsaterran Jacobo, yotam̄psatan ñaña Pedro

¹ Allempopa' añña am̄cha'taret Herodespa' rromatan puesheña'tets ñeñt̄ ame'ñetsa attoch muerochtachet. ² Rromuet Jacobo o' muetset. Añ Jacoboñpa' ñeñtara ñeñt̄ Juan pa'mo'nasheñ. Atto muetsetpa' cho pechoñet poñ. ³ Ñeñña muetse'pa' nanac coshatan judionesha' ñeñt̄ ama ame'ñetso. Allempoña am̄cha'taretpa' nanac mueneñ o'ch alla coshaterranerr judionesha'. Ñeñto'marña pascuapopa' allempoch rrerretterr pan ñeñt̄ ama a'chasareteyayepa' o' alla rromaterranerr ñaña Pedro. ⁴ Rromuet Pedropa' o' abe'tet cárcelo. Net çharra' puechena pechap solltarnesha' ñeñt̄cha' cohuan̄pse'. Ñanompa' o'ch neñet pa'tatssheña solltarnesha' ñeñt̄cha' cohuan̄pene'. Allotpa' o'chña muenme'cheñetpa' o'ch huena po'potantañ pa'tatssheña ñeñt̄cha' cohuan̄pene' ñaña. Ñeñña çharra' puechena pechap solltarpa' attach penet, çhach cam̄yannenet. Añ coñape'chña Herodes o'ch metua pascuapopa' o'ch orrtatan Pedro allo'tsa'yen acheñenesha'. ⁵ Atteñapa' nanac huomenc cohueñet Pedro cárcelo. Tarraña ñeñt̄ ame'ñetsapa' atarr ma'yocham̄peñet Pedro.

Atto Yompor po'mllañoñeñerpa' çha'nmaterran Pedro cárcelo't

⁶ Atteñapa' allponmat o' çhap allempoch tsapatcha' Herodespa' o'ch orrtata'muenan Pedro allo'tsa'yen acheñenesha'. Tsapoña Pedropa' all muenpa' all rrochtam̄peñ epsheña guardia all rromam̄peñet allo ehuncaret cadeno epo'mar pueçot. Ñaña a'yotpa' all cohuan̄peñ po'potantañ solltar e'ñe allot be'tenet. ⁷ Atteñapa' machayota puetaresua e'ñe alla o'pono. Orrtoña Yompor po'mllañoñeñer. Añña mellañoñeñpa' o' a'p̄llan Pedro puepoto'tpa' o' opuepa' atet och:

—Petanta tecma.

Añña cadena allo' huanquẽñetpa' çha pueya'nets e'ñe ñoña.

⁸ Añña mellañoñeñpa' atet och:

—Pechana'pena peshtam, o'ch penen ñaña pesapat.

Atet och mellañoñeñpa' atto'cho' p̄a. Allempoñapa' alla otererr:

—Te'pa' pechorrena ñaña peshtam ñeñt̄ penen enot. Allempoñapa' o'ch p̄octenen.

⁹ Allempoñapa' o' çha'nen coña'nenan mellañoñeñ. Pedroñapa' çha otenapañ attate' çhopo'teñ, tarraña ama çhoye' çhopo'teñ. Allempoñapa' o' ahuanenet.

¹⁰ Ahuanenetpa' o' metenet all cohuen puesheñarr

guardia. Ahuerreterr allponpa' o' meterreterr all cohuen po'psheñeñ guardia. Allempoñapa' o' chenet allot e'ñe cha'nenet allecma chopeñe'chen acheñenesha'. Chenet yetarropa' ñeñña yetarropa' asret nanac echarr. O' chenet e'ñe allpa' añña yetarropa' o' tora'nom e'ñe ñoña. Tora'nenpa' ñetñapa' o' cha'nenet. Chenet a'yotpa' allñapa' all chope'chnomuet e'ñe parro mame'pa' allotñapa' o' ahuerrña Yompor po'mllañoñeñer allotñapa' o' ñapfamina Pedro. 11 Allempoñapa' chapoña Pedro pueyoçhro, atet ot:

—Po'ñoçhepa't ama çhoye' neçhopo'teñe. Yomprepa't mueñene' po'mllañoñeñer attoch a'queshpaten. Te'pa' Herodespa' amach errot pa'no. Judionesha'pa'cho'ña e'ñe orrena o'patenna.

12 O' chapoña pueyoçhro tematenñapa' o' çhap allo'tsen María pa'paquell. Añña Mariapa' ñeñt pachor Juan Marcos. Chap all pa'paclopa' allñapa' allo'tsa'yen shonte' acheñ all ma'yochenet o'pono. 13 O' çhap allot be'tenetpa' çhore'tosanet. O'ponotñapa' cha'nom puesheñarr shopshe-sha' añ pa'so'cheñ Rode. 14 Huapapa' o' cheme'tan Pedro po'ñoñ. Pocsheñesha' materra o'pono o'ch oterrana' acheñenesha' ñeñt o'pono'tsa'yen. Tarraña ama toramñpsano Pedro. Cherr o'ponopa' atet otanet:

—Pedrepa't o' huena, allo'tsena a'yot.

15 Ñetñapa' cha otet:

—Amate'ca'ye ñeñteyaye, atta potyen çhate' pemospuena.

Ñañaapa' alla oterrerr:

—Po'ñoçhca'ye Pedro.

Ñetñapa' oterreterr:

—Amate' Pedroyaye. Ñato' añte' Yompor po'mllañoñeñer ñeñtcha' cohuanmñse' Pedro.

16 Atteñapa' Pedroñapa' alla çhore'terraneterr yetarrot. Allempoñapa' toramñset. Toramñsetpa' añepa't Pedro. Allempoñapa' atta cohuanrrortet. 17 Pedroñapa' o' echantan pot attoch o'ch muetsoñeñtet allochñapa' o'ch serrpare'tatuenanet. Allempoña o' muetsoñeñtuetpa' atet otanet atto Yomporpa' o' cha'nmater cárceloñ. Otanet ñaña:

—O'ch soteña' Jacobo ñaña po'potantañ masheñnesha' atto cha'nmaterren Yompor po'mllañoñeñer.

Allempoñapa' alla ahuerr Pedro.

18 Atteñapa' o' puetaren. Arrña cárcelo solltarnesha'ñapa' puenmchañoñetpa' otanna'tyeset:

—Errotenotuañaca'ye cha'nenña Pedro. Errahuañaca'ye o' ahuen.

19 Atteñapa' o' e'nater Herodespa' ama esesha' entaye. O' alla a'p̄to'tare'tereter solltarnesha' ñeñt̄ cohue'ne' cárcel ama esesha' entaye errotenote' o' ahuen. Allempoña Herodesñapa' o' mueño'tuan solltarnesha' a'yo allcha' muetsanatatuanet. O' allponmat Herodesñapa' o'cho' ahuo' Judeot o'ch ahuo' Cesareo allñapa' allach allponmatena'.

20 Allempoña Herodesñapa' nanac e'moñe'tenan tiro'marnesha' ñaña sidóno'marnesha'. Ñeñto'marña o'huañ apanet rreñets ñeñt̄ nanac palltenet pa'nyeto. Ñeñto'marña ñetpa' mueneñet o'ch alla amo'tsteret Herodes attoch o'ch alla apuerranet ñeñt̄ palltenet. Ñeñto'marña hua'cha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñaña'pa' o' a'p̄octatanet attoch ñetpa' serrpare'tet epuet añcha'taret. 21 Chap allempo'ch serrpare'tet epuet añcha'taretpa' Herodesñapa' o' chorrana nanac co'chnesha' pa'shtampa' anorros po'conañopa' eñosos. O' eños atet ñerra'm ñeñt̄ añcha'taret nanac. 22 O'ña eñosua acheñenesha'ñapa' o' rrannartetpa' atet otyeset:

—Ama acheñenocheye' eñetso, Partsepa't eñets.

23 E'ñepa'tcha' allempocma huapoña Yompor po'millaño'feñer o' atsna'tatosan Herodes. O' atsna'tpa' e'ñe rrohue pueñpa' o' rroma. Tarro'mar Herodespa' mueneñ o'ch Partsocoptarta. Acheñenesha'ñapa' o' aye'cho'chtatoñet atet ñerra'm Parets. Amaña čhoye' otaneto eñallña paterr Yompor. Añpa' allohua atet pe't̄ Herodesoñ.

24 Allempoñapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

25 Añña Bernabé epuet Saulopa' o' asueneta' Jerusaléno, pomhueneta' quelle. Pomhueneta' quellepa' o' puerra'cherret Jerusaléno. Añña Juan Marcospa' o' coterranet.

13

Allempo Pablo ñaña Bernabépa' ahuo't serrpare'tatoset anetso Chipro

1 Ñeñt̄ pame'ñeño'tet ap'chatse't̄ Antioquíopa' allo'tsen puesheña'tets acheñ ñeñt̄ a'mtene' Parets po'ñoñ, ñaña allo'tsen ñeñt̄ nanac cohuen ye'chatatse't̄ Yompor po'ñoñ ñeñt̄ atet ñerra'm añ: Bernabé, ñaña Simón, ñeñt̄ Simónpa' oteñet ñaña Negro, ñaña allo'tsen Lucio ñeñt̄ cireneo'marnesha' ñaña allo'tsen Manaén ñeñt̄ parro cheshat Herodes ñeñt̄ añcha'tarettetsa all Galileo, ñaña allo'tsen Saulo. 2 Allempo čhocma cohuentatoñete't̄ Yompor, ñaña errotenopa' čhoch

tore'tete't. * Atteña añña Parets Puecamquëñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtcha' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquëñoñpa' ahuanmuet Seleucio. Seleucioñapa' ahuanm̄set boto, o' chapuet Chipro.

⁵ Allña pueblo all chapuetpa' añ pa'so'cheñ Salamina. Chapuet Salaminopa' o' ahuanmuet judionesha' po'prahuo allcha' serrpare'tosñañet Yompor po'ñoñ. Ñaña coñenanet Juan Marcos ñeñtcha' yenpahuat. ⁶ Atteñapa' o' ahuanmuet serrpare'tats erracmañen all oteñet Chipre. Chapuet po'poñ anetso añ pa'so'cheñ Pafos. Allñapa' entoset puesheñarr judionesha' ñeñtpa' achyo'tañ añ pa'so'cheñ Barjesús. Ñaña' nanac serrpare'taten, tarraña ama Yomporeye' po'ñoñ a'mteno.

⁷ Ñaña' chocma yemtenana ñeñt añcha'tarettetsa atet ñerra'm gobierno' ñeñt allo'tsen. Añña añcha'taretpa' añ pa'so'cheñ Sergio Paulo, ñeñtpa' nanac es eñot. Añña añcha'taretpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet.

⁸ Tarraña ñeñt achyo'tañpa' ama muenatano añcha'tare't o'ch ame'ña. Ñaña' mueneñ o'ch a'mcheñtanet attoch amach ame'ñacheto añcha'tare't. Añ ñeñt achyo'tañpa' ñeñtara oteñet ñaña Elimas. ⁹ Allempoña Saulopa' o' huomenc cohuanan ñeñt achyo'tañ. Ñehua, Saulopa' ñeñtara oteñet ñaña Pablo. Ñaña' e'ñe chorreña Parets Puecamquëñ. ¹⁰ O' cohuan achyo'tañpa' atet och:

—Papa' nanac peshquëñ acheñ, nanac peyeçhcaten ñeñt ama cohuenayaye. Aña p̄ompor pepen oneñet. Nanac pe'moñe'teñ ñeñt poctetsa Yomporecop. Esemphuachñaca' peuna'ña atto p̄oten ama cohuenaye Yompor po'ñoñ. Añpa' ñeñtña po'ñoçh ñeñt cohuentetsa. ¹¹ Te'ña Yomporpa' o'ch tsa'tatapa. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' attach otyenanet:

—Sanmuen, o'ch secha'nmuen.

¹² O' entan añcha'tare't atetpa' o' ame'ña. Atarr huomenc entan Yompor po'ñoñ. Allohua atet pete't all Pafoso.

* **13:2** Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch yequeçhpa' yerrar.

Allempo ñanom asena' Pablo Asio

13 Allempoña Pablo ñaña ñeñt cõtene'pa' o' ahuañpset boto o' chapuet Pergo ñeñt allara Panfilio. Chapuet Pergopa' Juanña Marcospa' o' sa'nerranet. O' alla ahuer Jerusalem. 14 Allempoña Pablo ñaña Bernabépa' ahuanerreterr, o' chapuet anetso ñeñt pa'so'cheñ ñaña Antioquía ñeñt allara Pisidio. Allempopa' o' chapa'muen allempo amesen judionesha' Pabloña ñaña Bernabépa' o' ahuanmuet judionesha' po'prahuo. Allñapa' anorrcha'toset ñamet. 15 Allña judionesha' po'prahuopa' o' lleyoñet Moisés po'ñoñ ñaña po'poñ ñeñt a'mtaye't ahua't Yompor po'ñoñ. Allempoña o' lleya'huetpa' añña ñeñt amcha'tarettetsa puerahuopa' atet otanet:

—Eshaste' masheñneshare echene' ñoñets attoch soctape'chateypa' ñato' o'ch seserrpare'tatey.

16 Allempoña Pablopa' o' tomospa' echantan pot attoch muetsoñeñtuet atet otanet:

—Masheñnesh judioneshacha' ñaña allohuenes ñeñtes mecha'na'tene' Yompor, se'mñoten, o'ch notas: 17 Yapa' israelena'tarey ahua't Yomporpa' e'ñe pocte' entane't yatañneshañ. Nanac a'mratanet allempo a'puete't Egipto. E'ñe Yompor po'huamenco'tpa' o' ahuanerranet Egipto. 18 Ama't atomat char allempo chopeñe'chete't amaratareropa' chocma cohuañpsanet e'ñe cohuen, ñato' pa'tatsoch charra' char'te' cohuañpsanet. 19 Allempoña chacherret alla Canaáno Yomporpa' o' huapore'tatuerran cancherr po'poñe'ttsochma acheñ ñeñt ye'cha'yestse't all attoch apa'yerran yatañneshañ po'patseñ, e'ñe ñocpuet ama't ñaña puechemereshacpuet. 20 Allempoteñ ñato' cuatrocientos cincuenta char'te' o' nanet ñeñtcha' amcha'tarettatsa ñocpuet. Atteñapa' o' chap allempo orrta ñeñt a'mtaye't Yompor po'ñoñ ahua't, añ pa'so'cheñ Samuel. 21 Allempoña acheñneshapa' enamet Yompor o'ch apanet puesheñarr rey ñeñtcha' nanac amcha'tarettatsa. O' nanet añ pa'so'cheñ Saúl ñeñt Cis puechemer ñeñtara pamo'tsna'tar Benjamín. Añña Saúlpa' o' amcha'tarettatsa pa'tatsoch charra' char. 22 Allempoña Yomporpa' o' pueratamper attoch o'huañ amcha'tarettatsa Saúlpa' o' alla nerran po'psheñeñ ñeñt pa'so'cheñ David ñeñtara Isaí† puechemer. Añ Davidpa' e'ñe pocte' eñch Yompor ñeñto'marña atet ot ñocop: “Davidpa' e'ñe attecma co'tape'chen atet noctape'chen na neyo'chro. Ñeñto'mar neñoteñ ñapa' o'ch ame'ña'na na e'ñe poctacma.”

23 Alla o'terraneterr Pablo:

† 13:22 Isaípa' ñeñtara ñeñt sochenet Jesé.

—Ñeñt̄ puesheñarr David po'mrenñoť Yomporpa' o' orrtatonay yocop ñeñtey israelena'tarey ñeñt̄cha' ya'queshpaterre'. Añ pa'so'cheñ Jesús. Te'pa' o' etsota atet otye't Yompor ahuat. ²⁴ Tarraña ama čhena' allempoch serrpare'tos Jesússpa' añ ñanom orrtatsa Juanañ. Ñapa' serrpare'te't̄ atet oche't̄, añ pocte' o'ch yoctape'cherr ello cohuen etserra allempoñapa' o'ch yapataretta Partsocop. Atet serrpare'tatey allohueney ñeñtey israelena'tarey. ²⁵ O' e'nuamochan ñeñt̄ po'taruas p̄a'pa' Juanaññapa' atet otanet: “Napa' ama añeyayno ñeñt̄ soten ñeñt̄cha' Cristotats. Ñapa' te'pa' ñeñt̄ña nocta'nene' chenta'. Napa' ama esoshe'mano attoch ama't̄ po'sapatrechapa' o'ch nepyoñ.”

²⁶ Alla oterraneterr Pablo:

—Sapa'cho'ña masheñeshacha' pamo'tsna'tarecmas penes Abraham. Ñaña arro'tsa'yen puesheña'tets acheñ ñeñt̄ mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yequeshperra allohueney. ²⁷ Ama't̄ o' chap ñeñt̄ Cristotatspa' añña ñeñt̄ jerusaléño'marnesha', ñaña ñeñt̄ pa'mcha'tareternesha' penet, ñetñapa' ama esesha' eñotaye. Ama chapaneto pueyočhreto atet ote't̄ ahuat ñeñt̄ a'mtaye't̄ Yompor po'ñoñ ñeñt̄ chocma lleyenet añ yetro allempocma amesenet. Ñeñto'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetset. ²⁸ Ñapa' ama't̄ ama eñalle po'chñar at̄ta otteñe'chet attoch muetsachet. E'ñe attota enamet Pilato muetsachepa'to'. ²⁹ Allempoña o' etsotatuoñet ora allpon atet aquellcareť ahuatoteñ ñocoppa' o' a'suachet corsochoťpa' o' net mapuetpono. ³⁰ Tarraña Yomporpa' o' tantater ama't̄ o' rromua. ³¹ Allempoña tantaterpa' allponmat orrtame'tnerrana ñeñt̄ ñanom coťa'nmue' Galileoť allempo on Jerusaléño. Te'pa' ñetpa' o' a'potoñet atto tanterra Jesús, o' a'potoñet allohuen acheñeshesho.

³² Yapa'cho'ña te'pa' o'ch yeserrpare'tatas saña añ ñeñt̄ara cohuen ñoñets. Ama't̄ ahuat Yomporpa' otane't̄ yatañneshañ atetcha' p̄a esempo ³³ te'ñapa' o'cho' etsota yocop ñeñtey yatañneshañ po'mrenñey. O' etsota po'ñoñ allempo tantaterran Puechemer Jesús, tarro'mar atet oteney ñeñt̄ Salmos 2, atet Yompor otan Puechemer: “Papa' Nechemerep̄, te'ñapa' o'ch neñotach acheñenesha' po'ñočh p̄apa' Nechemer nepenep̄.” ³⁴ Ama't̄ ahuat Yomporpa' ote't̄ o'ch tantaterpa' amach alla rromuerre'te. Ñeñt̄pa' atet oteney añ ñoñets ñeñt̄ ahuatoteñ aquellcareť: “Po'ñočh o'ch na'natapa p̄aña atet na'nacha David.” ³⁵ Ñaña po'poñ capítulo Salmos all oten atet: “Yomporpa' amach muenatano Puechemer ñeñt̄ nanac

Parets o'ch puetsohua po'chets." 36 Añ ñoñetspa' yeñoteñ ama añecpayaye David tarro'mar yeñoteñ David allempo e'nuan allpon atet muenach Yompor pamo'tsna'tarecoppa' allempoñapa' o' rroma. Allempo rromapa' o' pampuet allo'tsen pa'tañneshañ, po'chetspa' o' puetsohua epuet. 37 Tarraña Jesús po'chetspa' ama puetso ama't coñe'ta tarro'mar Pomporpa' o' tantater. 38 Ñeñto'marña añ poctetsa o'ch masheñneshacha' señoche añ Jesús ñeñt atet pena. Ñach yepretnerre' yo'chñar. Ñeñto'mar te'pa' o' neserrpare'tatas. 39 Añ Moisés po'ñoñ ñeñt anaret ahuatoteñpa' amach errotenot yepretnaterro allo yo'chñar. Tarraña te'pa' añña yame'ñeñot Jesúsapa' añepa't alloch e'ñe apretna'huaretterra yo'chñar.

40 Alla oterrerr Pablo:

—Te'pa' secuach, o'ch soctape'ch cohuen te't huaponasa ñeñt atet ote't ñeñt a'mtaye't ahuat Yompor po'ñoñ. Atet otete't ahuat:

41 Se'mñot ñeñtes achmare'tets, te't secuanrrorteñoña sechenca'huerra. Te'pa' allempo ora socrenmeñpa' napa' o'ch norrtatonas ñeñt ama sentare. Tarraña ñato' sapa' amach same'ñyo ama'tcha' serrpare'tataset. Añpa' allohua huañ atet serrpare'tatanet Pablo.

42 Allempoña cha'nmaçherret acheñenesha'ñapa' atet ochet Pablo huapuepa'to' po'poñ semana o'ch serrpare'taterraneterr po'pocheño añ yetro allempocma amesenet. 43 Allempo ahuanerretpa' shonte' judionesha' o' co'ta'huaneret Pablo ñaña Bernabé. Ñaña o' co'ta'huaner shonte' ñeñt ama judioneshayaye tarraña ñetpa' o' ame'ñatanet judionesha' ahuañacma. Añña Pablo ñaña Bernabé serrpare'tatanet o' co'tape'chatanet attoch çhocma o'ch co'tape'choñet Yompor pomuereña.

44 Po'poñ semana o' çherrerr allempo amesenet. Huaçhenerr shonte' acheñenesha' o'ch e'mñoteneterr Yompor po'ñoñ. Autsa ora allohuen acheñenesha' ñeñt yeçhetsa all e'ñe huaçha'tuet. 45 Allempoña judionesha' ñeñt ama ame'ñetsopa' o' eñchet shonte' acheñ huaçha'tatsapa', puesope'cheño'tetpa' o' cohuana'chet Pablo. Ñeñt atet oten Pablopa' ñetñapa' o'ch otenet ama atteyaye. Nanac achmare'chet. 46 Tarraña ama mecha'to Pablo ñaña Bernabé. O' serrpare'tet huomenc, atet otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judioneshas. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach erro't ye'paso. Te'pa'

añach yeserrpare'tat ñeñt ama judioneshayaye. ⁴⁷ Tarro'mar atet oteneY Yompor po'ñoñot, arr oteneY atet:

Napa' o'ch nenas sa atet ñerra'm puetare', sach a'puetarsam̄psats. O'ch sa'puetarsam̄psoñ po'poñ acheñ poctap̄ña ñeñt ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch qeshperret.

⁴⁸ Allempoña ñeñta e'mhuet añ ñoñetspa' añña ñeñt ama judioneshayaye atarr coshet, nanac cohuen eñchet Yompor po'ñoñ. Allempoñapa' o' ame'ñenet allohuen ñeñt o' anaretta attoch ñetpa' corretsetach tayoteñ e'ñe errponañohuen.

⁴⁹ Atteñapa' o' epa'hua Yompor po'ñoñ erracmañen.

⁵⁰ Tarraña puesheña'tets judionesha' o' cotape'chachet acheñenesha' attoch o'ch huapore'tateret Pablo ñaña Bernabé. Añña ñeñt atet cotape'ch coyaneshachno ñeñt cohuen entaprete' acheñenesha' tarro'mar añ coyaneshha' e'ñe cohuen cotape'che't Partsocop. Ñaña ñeñt añcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé. ⁵¹ Ahuanenetpa' o' pa'shetca'tnenet po'patser pa'tcoñ attoch eñoch judionesha' ama pocteye' entaretteto ñeñt atet o' pohuet, te'ñapa' amach alla huacherrete'te. Allempoñapa' ahuanmuet ñaña Iconio. ⁵² Tarraña ñeñt o' ame'ña'hua all Antioquíopa', ñetñapa' nanac coshenet, ñaña o' chorranel Parets Puecamquëñ.

14

Allempo chapuet ñaña anetso pa'so'cheñ Iconio

¹ Allempoña chapuet Iconiopa' o' be'toscha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha' —ama't judionesha' ñaña ama't ñeñt griegonesha'.

² Añña judionesha' ñeñt atpare'tene' Yompor po'ñoñ ñetñapa' toma'tam̄pset Pablo ñaña Bernabé. Nanac sasare'teñet taye'to' acheñenesha' ñeñt ama judioneshayayepa' cohuen enteññañet atto serrpare'ten.

³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet ñeñt acheñenesha' ama puentareto ñeñtña eñotatahuet po'ñoñ atto serrpare'tenetpa' añmapa' Yompor pomuereñot huapanet añ ñoñets.

Yomporpa' nanac ahuamencat panet. ⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña' ama.

Ñetñapa' aña ame'ñatahuet judionesha'. Ñeñto'marña ama patrraye' cotape'chenoña acheñenesha' all. ⁵ Atteñapa' o'pacha shonte' judionesha' ama't ñaña ñeñt ama judioneshayaye ñaña ñeñt añcha'taretechnopa' o'pacha o'ch rromuet huomencpa' o'ch rrolle'chet. ⁶ O' e'mare'chet cha o'patarettenetpa' añña Pablo ñaña Bernabépa' o' yeterretpa' ahuanmuet ñaña Listro. Chapuet Listropa' cha asuanmuetpa' o' metet ñaña Derbo. Añpa' ñeñtara anets all otenet Licaonia. Erracmañen chopeñe'chet allo'mar. ⁷ All chopeñe'chneenetpa' all serrpare'tnenet Yompor po'ñoñ.

Allempo chapuet ñaña anetso pa'so'cheñ Listra

⁸ Allempo Listro'tsenetpa' allñapa' allo'tsen puesheñarr acheñ, cha echarrtena pa'tac, ama eshcaye' chope'cheno, ama't ahuatoteñ ñapa' atta eñalletña. Ñañaapa' alla anen. ⁹ Allña anenpa' alla e'mñnotenat atet serrpare'ten Pablo. Pabloñapa' cohue' allapa' o' eñoch añ acheñpa' o' yemtana Yompor ñapa' o'ch a'crrater. ¹⁰ Ñeñto'marña Pablopa' atet och huomenc:

—O'ch notap, o'ch p'aten.

Ahuepa'tcha' tanta allempocma allorocma cha chope'chnets. ¹¹ Allempo eñch allohuen acheñenesha'pa' cha rrannartet. Pocsheñoetpa' atet otet:

—¡Partsepa't! Ñeñt Parets yepen ñeñtapa't puenasetsa acheñ. Te'pa' o' chap e'ñe yesho. Añpa' atet otet po'ñoñeto ñeñt Licaonaçh.

¹² Añña Bernabépa' o' sochet, atet otet:

—Añepa't ñeñt yeyomporer Júpiter.

Pabloñapa' sochet ñapa' añ ñeñt po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio. ¹³ Nehua, acheñenesha' allpa' echenet po'prahua' allecmach ma'yochyete't po'yompor-ret ñeñt otenet Júpiter. Ñeñtapa' e'ñe ñehuapoñ anaret allem-popa' o'ch taya yerrota'nmos pa'netsreto. Ñeñt corne-shatets puerahuopa' o' huapa. Huapatan huaquësh, huapatan ñaña shonte' ror. Mueneñ o'ch muetset huaquësh Pablocop ñaña Bernabécop tarro'mar chocma muetsete't huaquësh po'yompor-recop. Ñaña tarro'mar atet muenen acheñenesha'. Ñetpa' cha otenapuetañ Pablo ñaña Bernabépa' añte' ñeñt po'yomporer penet. ¹⁴ Allempoña eñoch Pablo ñaña Bernabé ñeñt atet pena acheñenesha'pa' nanac lleca'rrtet. Puellquëñoetpa' o' rrrarre'tet pa'shtampa' o' mattrra'tet allo'tsa'yen acheñenesha'. O' rrannaretnomuet, puer-ranarotetpa' ¹⁵ atet otet:

—Eso'marte'ca'ye masheñeshacha' atet sepena. Yapa'cho' arromñañeya attey ñerra'm sa. Ñeñto'marña o'

yeserrpare'tatas cohuen ñoñets attotcha' sequechpuerr ñeñt atet sepena ñeñt e'ñe orrena. Te'pa' añña poctetsa o'ch same'ñera Yompor ñeñt ama arromñañeshayaye, ñeñtara Yompor ñeñt yeçhcate' enet ñaña pats ñaña ñeñt añecmuen sa'p. Ñaña ora allohuen ñeñt yentyen ento ñaña ñeñt yentyen patsopa' ña yeçhcatue' ñaña ñeñt sapo'tsen ña yeçhcatue'.

¹⁶ Alla oterraneterr Pablo:

—Ahuat Yomporpa' muenatan acheñenesha' o'ch ãa'yeset ñeñt atet muena'yenet e'ñe ñañeñeta. ¹⁷ Tarraña ama a'yopo'ñano acheñenesha'. Chocma apanete't attoch eñochet po'ñoçh eñall Yompor. Chocma mueranete't ñeñto'marña çhocma huatache't ñocpuet attot yeçhcanete't puenarmet, atto eñalletete't puerraret atto coshete't. Añpa' ñeñta ñeñt atet otan Pablo allohuen acheñenesha'.

¹⁸ Tarraña ama't atet otan acheñenesha'pa' o' alla muenereterr o'ch muetset huaquësh ñocpuet atet pete't po'yompor-recop. Tarraña Pablo ñaña Bernabépa' ama muenañaneto.

¹⁹ O' atomatpa' huaçha'ta puesheña'tets judionesha' ñeñt huetsa Antioquíot ñaña Iconíot. Coñape'chatoset acheñenesha' po'poñ. E'moñe'tachet Pablo. Atteñapa' rrolle'chet Pablo. Rrolle'tuetpa' çha otapuetañ o'te' rroma. Chetare'tnomet pueblot a'yenet. ²⁰ Ñeñña ame'ñatsapa' alla arrotampeñet alla cohueñetpa' ñañapa' ahuepa'tcha' alla tanterra, o' alla ahuerret pueblo. Tsapatñapa' Pablo ñaña Bernabépa' ahuanerret alla Derbo.

²¹ Chapuet Derbopa' serrpare'tuerreterr Yompor po'ñoñ ñaña all. Shonte' acheñ ñeñt allo'tsen ame'ñenet ñamet. Allempoñapa' ahuanerreterr Listro, ñaña asuerreta' Iconio ñaña Antioquíot. ²² Ora allohuanen ta'yeset yenpuet ñeñt ame'ñetsa attotcha' huomenc pet pueyoçher. O' coñape'chatanet ñaña attoch çhocma yemchet Yompor ama't esempo huapanet mueroçhteñets. Tarro'mar e'ñe yemueroçhteñoñ yeçhapcha' all añcha'tarettena Yompor. ²³ O' na'yeset puesheña'tets acheñ ñeñtcha' pompor ãa'yes ñeñt pame'ñeñoñ apçha'yetsa. Puetore'teñoñetpa' o' ma'yochampesyet ñeñtcha' pompornesha' ãa'yeset, atet ochet:

—Yomporepa'ch seyempue', ñeñtara Yompor ñeñt o' same'ña'huerra.

Atet ãa'yeset ora allohuen anetso all ame'ña'yesa acheñenesha'.

Allempo çhaçherret alla Antioquíot allot ahuanmuet ahuaña

²⁴ Allempoñapa' asuanerret Pisidio'mar allotpa' ahuanerret Panfilio. Cherret anetso ñeñt pa'so'cheñ Perge.

²⁵ Serrpare'tuerreterr Yompor po'ñoñ all Pergo, allempoñapa' ahuanmuet ñaña Atalio. ²⁶ Chapuet Ataliopa' allotñapa' ahuanm̄set boto, o' alla čhačherret Antioquío ñeñfara anets allot ahuaña ñeñt ame'ñetsa all ma'yocham̄psapanet attoch yenpanet Yompor esheccha' etsotoñet po'taruas. Te'ñapa' o' e'nuet. ²⁷ O' čhačherret allpa' apčhachet allohuen ñeñt ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'pocatanet, añe'na serrpare'tatet ñeñt ama judioneshayaye, añecop attoch ame'ñerret ñamet. ²⁸ Alla atomatet parro epuet ñeñt ame'ñetsa.

15

Allempo a'pocachet Jerusaléño ñeñtcha' atet pet

¹ Atteñapa' čhap ñaña acheñ ñeñt huetsa Judeot. Chapuetpa' o' yečhatoset ñeñt ame'ñetsa all, atet otosanet:

—Te'pa' añña sepalltena attoch sequeshperra o'ch setsorranna'ta ñeñtes asheñorres atet yeyčhena ya allempoteñ atet yečhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñočhaye' añ palltetso o'ch yetsorranna'ta ñeñfey asheñorrey.

Ñetñapa' alla nanac es otanna'tet. Ama a'pocacheto. Ñeñto'marña allempopa' o' net Pablo ñaña Bernabé ñaña po'poñečno acheñ attoch ñetpa' o'ch ahuanmuet Jerusaléño o'ch enteñeta' Jesús puellsensarnesha' ñaña ñeñt pompornesha' pen ñeñt ame'ñetsa all. Añecop tet attoch o'ch a'p̄to'teneta' erra'tsente' pocte' ñeñtcha' atet pet.

³ O' so'tuanma ñeñt ame'ñetsapa' ahuanmuet. Arr oñmuet Fenicio'mar allotñapa' ahuanmuet Samario'mar. Allña oñemuanmuetpa' all serrpare'tyesnomuet. Añ serrpare'tyesnomuet atto o' ame'ña ñeñt ama judioneshayaye. Pame'ñeñotetpa' o' a'ypo'ña'huerret ñeñt ahuať poctap̄ñet. Ñeñtña nanac coshate'ña allohuen ñeñt ame'ñetsa.

⁴ O' čhapuet Jerusaléño'pa' e'ñe cohuen agapanet Jesús puellsensarnesha' ñaña ñeñt pompornesha' pen ñeñt ame'ñetsa all. Ñaña allohuen ñeñt ame'ñetsa allpa' o' agapanet e'ñe cohuen. Allempoñapa' serrpare'tatoset ora allohuen atet yenpanet Yompor. ⁵ Tarraña patantarr fariseonesha' ñeñt ame'ñetsapa' o' tantapa' atet ot:

—Acheñ ñeñt ama't ama judioneshayaye, añ palltetsa o'ch atsorrareťta allohuen asheñornesha', ñaña allohuenetpa'

otarettetepa' añ palltetsa o'ch ame'ñeññañet ñaña Moisés po'ñoñ ñeñt atet anaret ahuatoteñ.

⁶ Ñeñto'marña Jesús puellsensarnesha', ñaña ñeñt pompornesha' pen ñeñt ame'ñetsa allpa' o' apçhet attoch a'pochtachet este' pochtetsa ñeñtcha' atet pet. ⁷ Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet otanet:

—Sapa' señoñe'tña masheñneshacha' ahuaña Yomporpa' o' na'n na. Añecop na'n o'ch neserrpare'tach ama't ñeñt ama judioneshayaye. O'ch neserrpare'tatanet Yompor po'ñoñ attoch ame'ñerret ñamet. ⁸ Ñehua, Yomporpa' entennay yeyoçher. Ñapa' eñoñeñ ama't añ ñeñt ama judioneshayaye o' ame'ñyet pueyoçhreto. Ñeñto'marña o' chorratanet Puecamquëñ attecma atet chorrenya yaña. Attoña eñotatey e'ñe pocte' entenamet ñamet. ⁹ Ñeñto'mar yeñoñeñ ama yaptayaya morrentenyo Yompor. Añña ama't ñetpa' morrentenamet ama't ñeñt ama judioneshayaye. Pame'ñeñoñetpa' ahuo't e'shohuerranet po'chñar ñeñt pueyoçhro'tsa'yenet. ¹⁰ Te'ñapa' eso'mare'tña ama pocteye' senteñe ñeñt atet o' pòhua Yompor. Añecop ñeñt ame'ñetsapa' eso'mare'tña semneñ o'ch senamet ñeñt nanac torrapo' entenet. Ama't ya judioneshayapa' amach erroteno o'ch yetsotua allohuen ñeñt atet anaret. Ama't yatañneshañpa'cho'ña ama etsotete'te. ¹¹ Añcha'ña yeñoñ e'ñe Yepartseshar Jesús pomuereñoñpa' o'ch yequeshpa, attecmaçh queshpet ñamet.

¹² Ñeñta e'm allohuen ñeñt apçhatsa allpa' alla moma'rrtet. Atto e'mñoçhet. Bernabé ñaña Pablopa' ña nanac serrpare'tatahuet. Añ serrpare'tatanet atto Yomporpa' nanac ahuamencat panet ahuaña allempo serrpare'teneta' allo'tsa'yen ñeñt ama judioneshayaye. Ñeñto'marña orrtatanet ñeñt ama puentareto ñeñtcha' eñotatahuet añmapa' po'ñoçh Yomporeshoñ huena. ¹³ O' serrpare'tuetpa' allempoñapa' atet ot ñaña Jacobo.

—O'ch masheñneshacha' se'mñnoten naña. ¹⁴ Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt ama't ama judioneshayaye. Ñaña ahuo't orrtatan pomuereña añecop ñeñtcha' ame'ñatahuet attoch aye'choçhtatoñet Yompor pa'so'cheñ ñamet. ¹⁵ Po'ñoçh te'pa' o' etsota ñeñt atet oteney ñeñt a'mtaye't Yompor po'ñoñ ahuañ. Añpa' ñeñt atet quellquë't ahuañ atet ñerra'm Yompor otatse't:

¹⁶ Allempo o'ch meten shonte' charpa' napa' o'ch alla norrtaterr puesheñarr ñeñt David po'mrenñoñ ñeñtcha'

ahuamencañtatsa atet ahuamencañteñ ahuat pa'tañ David. Tarro'mar shonte' char ama't puesheñarrapa' ama orrteno David po'nrenñoñ ñeññ nanac ahuamencañ.

17 Añecopcha' norrtater allochñapa' ama't po'poñechno acheñenesha' ama't ñeññ ama judioneshayaye o'ch ame'ña'hueret ñamet Yompor, ñaña allohuen erra'tsencha' muenats.

18 Atet ot Yompor ñeññara ñeññ eñotatey ahuatoteñ ñeññcha' atet pa. Añpa' allohua ot ñeññ a'mñtayeñ Yompor po'ñoñ ahuat.

19 Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeññ ama judioneshayaye ñeññ o' puesuerran ñeññ ahuat poctañña attoch ame'ñeret Yompor. ²⁰ Te'pa' añña pocte' o'ch yequellcanet ñeññcha' ama pñatsteto ñeññpa' añ: Amach rratsteto po'chets ñeññ muetsenet ayeñcataretecop ñeññ po'yomporer pen ñeññ ama judioneshayaye ñeññara ñeññ ama ame'ñetso. Ñaña o'ch yot Janet amach chetapretatsteto taporets. Ñaña o'ch yot Janet amach rratsteto ñeññ muetsenet ñeññ atta a'pañaret, ñaña amach rratsteto ñeññ ño'shetsa oño. Ñaña amach es rratsteto es po'rras.

21 Alla oterrerr Jacobo:

—Añpa' ñeññach atet yequellcanet. Tarro'mar ahuatoteñ o' serrpare'tuoñet Moisés po'ñoñ ora allohuen anetso'mar. Ñaña pate'tets semana añ judionesha'pa' çhocma lleyeññañet Moisés po'ñoñ all po'prahueto. Añpa' allohua atet ot Janet Jacobo.

22 Allempoñapa' o' a'poctachet o'ch net puesheña'tets ñeññ e'ñe allo'marnesha' ñeññcha' mueñet Antioquío, o'ch coteret Pablo ñaña Bernabé. Atetpa' e'ñe pocte' eñch allohuen—Jesús puellsensarnesha' ñaña ñeññ pompornesha' penet, ama't ñaña allohuen ñeññ ame'ñetsa all. Añ net Judas Barsabás ñaña Silas. Añña epsheña acheñpa' e'ñe cohuen eñch allohuen ñeññ ame'ñetsa. ²³ Ñetpa' o' anmuet, ñeññ atet oten carta:

“Masheñeshacha' ñeññes yeçhetsa anetso Antioquío ñaña Sirio ñaña Cilicio: Allohueney ñeññey ame'ñetsa o'ch yehuomñcha'tas sa añ yecartot —ñeññey Jesús puellsensarneshay ñaña ñeññey pompornesha' pen ñeññ ame'ñetsa arr. O'ch yehuomñcha'tas sa ñeññes ame'ñetsa saña ñaña ama't ñeññes ama judioneshayayso. ²⁴ O'ch yotas, yapa' o' ye'mare'ch o' çhap sesho puesheña'tets acheñ arroñ ñeññ muenets o'ch a'mñechatasa. Ñetñapa' o' nanac moññe'tatasa soctañña. Tarraña te'ñapa' o'ch

yotas, añ acheñpa' ama yaye' mueñenaye. ²⁵ Ñeñto'mar pocte' yenteñ allohueney o'ch yene' epsheña acheñ ñeñtcha' yemñonas epuet Bernabé ñaña Pablo ñeñt nanac yemuerena. ²⁶ Tarro'mar nanac yemorrenenanet ahuañapa' all serrpare'teneta' autsañ muene' amtsanataretetuet all. Tarro'mar e'ñe puemorreneteñofet Yepartseshar Jesucristo atet aparettet. ²⁷ Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr. ²⁸ Parets Puecamquëñpa' o' eñotatey ñeñt e'ñe pocte' yenten ñeñtcha' yenonas. Amach aña yenonaso ñeñt nanac torrapo'. Te'pa' añ palltetsa ñeñtcha' atet sepa. ²⁹ Amach serratsto po'chets ñeñt muetsenet ayeçcataretetecop ñeñt po'yomporer penet. Ñaña amach serratsto ñeñt muetsenet ñeñt atta a'pamaret. Ñaña amach serratsto es po'rras. Ñaña amach sechtapretatsto taporets. Ñerra'm amach atet sepo ñeñt'pa' e'ñech pocte'. Añpa' ñeñt'ach yotas. Yomporepa'ch sa'nataya." Añpa' allohua huañ ñeñt atet oten carta.

³⁰ Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquío. Chaçherret Antioquíopa' o' apçhatuet allohuen acheñenesha'pa' o' aposanet añ carta. ³¹ Ñeñt apçhatsapa' o' lleyet añ carta. Lleya'huetpa' nanac coshatanet ñeñt atet actape'chatarettet cartot. ³² Añña Judas ñaña Silas, ñetpa'cho'ña nanac a'potoñet Yompor po'ñoñ ñamet. Ñetpa'cho'ña a'mtenet Yompor po'ñoñ. Nanac serrpare'tatet. O' cotape'chachet e'ñe cohuen ñeñt ame'ñetsa allochñapa' huomenccha' pet pueyoçher. ³³ O' allponmatet allpa' allempoñapa' secherret allot amñarettet ahuaña. Ñeñt ame'ñatsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

³⁴ Tarraña Silaspa' mueneñ o'ch a'pa all, Judaspa' o'ch ahuerr. ³⁵ Añña Pablo ñaña Bernabé allponmaterret Antioquío. Yeçhatapretereta' epuet po'poñeçhno ñeñt yeçhatets all. Serrpare'tapretereta' Yompor poñoñ epuet po'poñeçhno.

Allempo puepocheño ahuererr Pablo serrpare'tats allemeñ anetso'mar

³⁶ Atteñapa' o' atomat Pabloñapa' otan Bernabé:

—O'ch ahuerrey, o'ch yaçchera' ñeñt ame'ñetsa ora allohuen anetso all yeserrpare'toñ Yompor po'ñoñ ahuaña attoch yeñoç errottenette'ña te'.

³⁷ Bernabéñapa' aña e'ñe pocte' ent o'ch coña'ner Juan Marcos. ³⁸ Tarraña Pablopa' ama pocteye' eñche tarro'mar ahuaña allempo çhapuet Panfilio, Juan Marcospa' cha sa'nerranet, o' puerrerra. Ama allo'na yenpuenaneto all serrpare'tyeset.

³⁹ Ama erroteno a'pochtacheto, čha sa'nmannerret. Bernabépa' aña aner Marcos. O' ahuanñset boto, čhačerret Chipro. ⁴⁰ Pabloñapa' aña e'ñe pocte' ent o'ch anerran Silas. Ñeñt ame'ñetsa allpa' o' so'tneret, e'ñe cohuen otneret:

—Yompor e'ñe pomuereñoťpa' a'natyepa'ch.

Allempoñapa' ahuanenet. ⁴¹ Asueneta' Sirio'mar ñaña Cilicio'mar. Alloťña' yenuet allohuen ñeñt pame'ñeñoť apčheta parro. O' yenuet añecop attoch huomenccha' pet pueyočer.

16

Allempo Timoteopa' cota'nerran Pablo ñaña Silas

¹ Pablo ñaña Silaspa' asuerreta' anetso añ pa'so'cheñ Derbe. Alloťña' ahuanerret alla Listro. Allña' allo'tsen puesheñarr acheñ ñeñt ame'ñetsa añ pa'so'cheñ Timoteo. Ñeñt Timoteopa' añ pachor pen judionesha' ñeñt ame'ñetsa. Pomporñapa' ama judioneshayaye aña griegonesha'. ² Ñeñt ame'ñetsa Listro ñaña Iconiopa' nanac cohuen enteñet Timoteo. ³ Ñeñto'marña e'ñe pocte' eñch Pablo o'ch cota'nerranet Timoteo. Tarraña ato'tña anemhueta' allcha' tsorreñet atet yečhena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch atsrre'mach judionesha'.) Allohuenetpa' o' eñotuet ñeñt Timoteo pomporpa' ñeñt ama judioneshayaye aña griegonesha'. ⁴ All oñomyeset allemeñ añetsopa' otuosanet añ ñoñets atet a'pocatat Jesús puellsensarnesha' ñaña ñeñt pompornesha' penet Jerusaléño. Añ eñotatuosanet ñeñtcha' atet pet. ⁵ Atteñapa' allohuen ñeñt ame'ñetsapa' e'ñe pame'ñeñoťet allo'na senet huomenc pa'nmuet pueyočer. Pate'tets yetpa' allo'na sen atonetnomtsa ñeñt ame'ñetsa.

Allempo Pablopa' entan macedonio'marnesha' atet ñerra'm cho čhopo'teñ

⁶ Allempoñapa' arr asuerreta' ñaña Frigio'mar ñaña Galacio'mar tarro'mar Parets Puecamquēñpa' ama muenataneto o'ch serrpare'toñet Yompor po'ñoñ all Asio'mar. ⁷ Allempoñapa' ahuanmuet ñaña tenoneť, čhappochet Misio ñaña arr sechet Bitinio'mar, tarraña Jesús Puecamquēñpa' ama muenataneto. ⁸ Atteñapa' metuet Misio'mar o' čačha'tet Troaso. ⁹ Čačha'tet Troaso tsapoñapa' añña Pablopa' orroña atet ñerra'm cho es yečhopo'ten. Atet ñerra'm puečhopoñoťpa' o' entan puesheñarr acheñ macedonio'marnesha' alla ten, atet otare'ch: "O'ch sonačha't arr Macedonio, o'ch seyenpuenya'." ¹⁰ Allempoña errete'

orretuoña macedonio'marnesha'pa' yañapa* o' yesecha o'ch ahuey Macedonio, tarro'mar yoten po'ñochte' chore'teney Yompor allochñapa' o'ch yeserrpare'teññaña' po'ñoñ all Macedonio.

Allempo chap Pablo ñaña Silas Filiposo

¹¹ Allempoña Troasotpa' año ahuanpsey boto. E'ñe pacharra yepe' o'ch yechap anetso añ pa'so'cheñ Samotracia. Allñapa' all yetsoatnoma. Yahuanerrerr allotpa' tsapatñapa' o' yechap ñaña anetso Neápoliso. Allñapa' all yetsoatuererr. ¹² Yahuanerrerr allotpa' o' yechap ñaña anetso añ pa'so'cheñ Filipos allpa'cho' all yetsoatosa. Añ anets Filipospa' nanac atarr anets. Po'poñechno anets alla Macedonio'marpa' ama atarroyaye. Allñapa' allo'tsa'yen shonte' solltarnesha' ñeñt romo'marnesha'. Yapa' alla ya'llponmatos all. ¹³ Allempoña chap allempo amesen judionesha'pa' yañapa' yahuanma anetsoť a'yo. O' yechap ontapo all ye'nen ñato' allcha' ma'yochet. Yaña allpa' yentos puesheña'tets coyanesha'chno all anorrchenet. Yañapa' o'cho' yanorrcha'tos yaña. Allempoña yapa' yeserrpare'tatanet Yompor po'ñoñ. ¹⁴ Puesheñarr coyanesha' ñeñt allo'tsen añ pa'so'cheñ Lidia ñeñt huetsa anetsoť añ pa'so'cheñ Tiatira. Ñañaapa' año po'taruas pen atto vendenan shetamuets yetsoñorromamuen. Ñañaapa' ame'ñenana Parets. Allempoña e'mñotan Pablo ñeñt atet serrpare'ten añña Yomporpa' o' chapatoñ pueyo'chro ñeñt atet serrpare'ten Pablo. ¹⁵ Lidiaña pame'ñeñoťpa' allenta apataretta, ñaña o' apataretta ñeñt parro ye'chenet pocollo. Ñañaapa' o'cho' hua'ña'nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepaclo ñato' allcha' sommosa.

Ñañaapa' otare'tey yonepa'to' ñeñto'marña yapa' o' ahuey.

¹⁶ Parrochñapa' allempo yeta ontapo allecma ma'yochenet toñoñapa' yentnom' puesheñarr shopshesha' ñeñt chorrena oneñeñ. Añña oneñeñpa' ñach eñoratene' shopshesha' ñeñto'marña ñerra'm erroten otanetpa' atto'chcho' pa. Amach pueno po'ñoñ ama't mamesha. Añña shopshesha'pa' eñall ñeñt pamo'mte' pen po'poñechno acheñ. Ñetñapa' nanaccha' ganatenanet quelle atto eñotañtena. ¹⁷ Ñañaapa' chocmach cota'nomye't epay Pablo. O'ch cota'nmueypa' o'ch rranare'tnoma chenta'pa' atetcha' ot:

—Añ encaneshachnopa' añ sherbenet Yepapar Ñeñt Nanac Parets. Arrpa' añecop huenet attoch o'ch serrpare'tataset attoch sequeshperra.

* **16:10** Ñehua, e'ñe allempocmapa' o' cota'nmanet ñaña Lucas, ñeñfara ñeñt quellquë' añ ñofñets.

18 Atteñapa' ama't atomatpa' attemmach pena. Atteñapa' o' a'mñechatana Pablo. Pabloñapa' allenta puetallsapa' o' otan oneñeñ:

—Te'pa' e'ñe po'huamencot Jesucristopa' o'ch notap, pequechpa'ner shopshesha'.

Allempocmuepa'tcha' quechpa'nerran shopshesha'.

19 Añña pamo'mtaynesha'pa' cotape'chetpa' otet:

—Te'pa' llequëñtsa, o' huañerr allo yeganena quelle.

Allempoña pa'tsrre'mueñoñetpa' o' rromuet Pablo ñaña Silaspa' anmarettet e'ñe po'huamencocma, o' achapataretet allo'tsa'yen añcha'tareñnesha' allecma a'pocatenet ñoñets. 20 Allempoña achapataretet allo'tsa'yen guardia pa'mcha'tareñnesha'pa' o' otoset:

—Añmapa' ñeññ judionesha'. Nanac atsrre'mochtenet arr ya'netsro. 21 Ñetpa' yechatenyet atet yeçhenet ñet ñeññpa' ama pocteye' yenteñe ya. Yapa' romo'marneshaypa' ama cohuen yenteñe o'ch atet yeña.

22 Allohuen acheñenesha'pa' nanac atsrre'mateñet. Ñeññña guardia pa'mcha'tareñnesha'pa' atet otan pueyochresha':

—Te'pa' o'ch serrotanetpa' o'ch senallanet.

23 Allempoñapa' o' nallet Pablo ñaña Silas nanac huomenc. Allempoña o' anallaretetuetpa' o' abe'taretet ñaña cárcel; atet ochet ñeññ cohuanpene' cárcel:

—O'ch secuanpñsanet e'ñe huomenc.

24 Allempoña atet otaretetuetpa' añña ñeññ cohuanpene' cárcelpa' o' abe'tanet nanac o'pono. Allñapa' nanac echarr pñanpñsanet ñaña o' arrmatamñsaretet pa'tcot tablat e'ñe echarr.

25-26 Atteñapa' o' ma'yocha Pablo ñaña Silas. Ñaña o' morrechet, puemorrecheñoñetpa' nanac aye'chochtateññañet Yompor. Añña po'poñechno acheñ ñeññ abe'taret ñaña allpa' ñetñapa' o' e'mñotanet. Allempoña chap rroch tsappa' machayotepa'tcha' pella pats nanac huomenc, ama't allo' tomatenet echarr cárcelepopa' cha pa'shma huomenc. Puepelleñoñ pats huomencpa' o' torna'tua ora allpon all ayottamñsarettenet. Ñaña ora allpon allo huanquëñet acheñpa' o' pueyna'tuen. 27 Allempoña ahuo't e'mansa ñeññ cohuanpene' cárcelepopa' ahuo't entan o' torna'tuen allo ayottamñsarettenetpa' o' chetan po'cchell o'ch muetsa ñañaña. Ñapa' cho' otapañ ñeññ ayottamñsaretpa' o'te' yetuena. 28 Añña Pablopa' o' chore'ch huomencpa' atet och:

—Amach erroñ peñatsto ama't mamesha. Yapa' allo'tsa'yenya allohueney.

29 Allempoñapa' añña enamnom lampareñpa' mata allo'tsen Pablo ñaña Silas. Puenmchañoñpa' cha pa'shmuena ñaña

e'ñe puen'cha'na'teño'pa' o' concorposa e'ñe ñesheto. ³⁰ O' cha'nma'cha'tatanetpa' atet otanet:

—Nomporneshacha' ¿este'ña pocte' te' ñeñ'cha' atet ne'pa attoch nequeshperra na'ña?

³¹ Ñet'ñapa' atet ochet:

—Añ pocte' o'ch pame'ñera Yepartseshar Jesucristo, alloch'ñapa' attoch pequeshperra. Ña'ña attoch queshperra ñeñ' parro pey'chena pepaclo.

³² Allempoña ñeñ' cohua'mpene' cárcelepopa' o' a'secherranet pa'paclo, all'ñapa' serrpare'tachet Yompor po'ñon, ña'ña allohuen ñeñ' pa'paclo'tsen o' e'mñotet ñamet. ³³ Allempocma ñeñ'te tsaprocma o' e'pana'tyerranet all atserrparettet. Allempoñapa' o' apataretta ña, ña'ña allohuen ñeñ' pa'paclo'tsa'yenpa'cho'ña o' apatarettet ñamet. ³⁴ A'tapatanet pa'paclopa' rratanet. Pame'ñeño' Yompor atarr nanac cosha. Ña'ña allohuen ñeñ' pa'paclo'tsenpa' atarr coshet ñamet.

³⁵ Tsapa' puetarenpa' añña guardia pa'm'cha'tareternesha' o' mueñet puesheñarr guardia, ñeñ'cha' otosets:

—O'ch sa'rroyer Pablo ña'ña Silas.

³⁶ Ñeñ' cohua'mpene' cárcelpa' atet otan Pablo:

—Oten a'm'cha'taret se'cha'nerrepa'to'. Te'ñapa' orrerres, Yompor'e'pach sa'nataya.

³⁷ Tarraña Pabloñapa' atet otanet:

—Yapa' romanona'tarey ya'ña. Ñeñ' ñoñets anaret Romo'tpa' oten ama pocteyaye o'ch yecoñchach acheñ ñerra'm ama yeñoteña' po'ño'chte' eñall atto otteñe'cheñet acheñ. Tarraña añña a'm'cha'taretnesha' ama e'nano ñeñ' e'ñe po'ño'ch atet yepena. Atta nallatyet allo'tsa'yen shonte' acheñenesha' allot'ñapa' o'cho' atta yottam'psatyet arr cárcelo. Te'ña ñetpa' mueneñet o'ch cha'nmaterryet e'ñe a'nahua. Ñeñ'tpa' ama pocteyaye atet. Te'pa' o'ch sotuer a'm'cha'taret huapuetepa' arr cha'nmaterryetepa' e'ñe ñet.

³⁸ Añña guardiapa' otuerran pa'm'cha'tareternesha' atet oten Pablo. Ñet'ñapa' cha yorenet allempo e'mare'chet ñetpa'cho'ña romanona'taret ñamet. ³⁹ Allempoña huacha'tetpa' enamare'tterret peretneñets. Allempoña cha'nmatenanetpa' atet otanet:

—Te'pa' orrerres, sahuannerra ba'chayo.

⁴⁰ Allempoña cha'nenet cárcelo'tpa' ahuanerret o'ch alla abchereta' Lidia. Allempoñapa' serrpare'tuerret parro ñeñ' ame'ñetsa, cotape'chatuanerret cohuen, allempoñapa' ahuanerret allot.

17

Allempo chap Pablo ñaña Silas Tesalónico

¹ Allempoña ahuanerret alloṭpa' ahuanmuet anetso Anfípoliso, alloṭñapa' ahuanmuet ñaña anetso Apolonio. Alloṭñapa' o' chapuet ñaña anetso ñeñṭ pa'so'cheñ Tesalónica. Allñapa' allo'tsen judionesha' po'prahua'. ² Pabloñapa' o' be'tosos ñeñṭ attecma pena. Allñapa' serrpare'tatosanet Yompor po'ñoñ. Allñapa' ma'panerr semana. Allempoña chen yet allempo amesenetpa' o'ch'cho' serrpare'tatanet Yompor po'ñoñ ñeñṭ atet aquellcareṭ. ³ Allpa' añ ye'chatanet atet anaretta ñeñṭcha' Cristotats ñerra'm esempoch huapa añ patsropa' nanaccha' muerochtachet. Tarraña o'ch muerochtatuetpa' elloch alla tanterra ama'tcha' rroma. Ateṭ otanet:

—Te'ñapa' o'ch notas, añ Jesús ñeñṭara ñeñṭ o' neserpare'tatuaspa' ñeñṭña Cristotets.

⁴ Puesheña'tetspa' pocte' eñchet o' ame'ñyet Jesús ñeñṭo'mar ñetpa' yemteñet Pablo ñaña Silas. Ñaña shonte' griegonesha' ñeñṭ ahuatoteñ cohuen cotape'chets Partsocoppa' o' ame'ñeñet Jesús. Ñaña shonte' coyaneshachno ñeñṭ e'ñe cohuen entyen acheñenesha' ñetpa'cho'ña o' ame'ñerret ñañet. ⁵ Judionesha'ña ñeñṭ ama ame'ñetsopa' ama pocteye' enteñeto attoch acheñenesha'pa' o'ch yemchet Pablo, ñeñṭo'marña puesope'cheñoṭetpa' o' e'moñe'chet. Ñeñṭo'marña a'sechet puesheña'tets acheñ ñeñṭ ama tama es sherbetso ñeñṭ atta ellapetse't anorrets all shontena acheñenesha'. A'sechet o'ch ap'chachet shonte' acheñ attoch e'moñe'tachet Pablo. Ñetña pa'tsrre'mueñoṭetpa' ahuanmuet Jasón pa'paclo all a'posa Pablo ñaña Silas. O'pachet errotenoṭpa' o'te' cha'nma'cha'tet a'yoṭ attoch acheñenesha'pa' o'ch rromuet. ⁶ Allempoña cha'cha'tet Jasón pa'paclopa' tarraña ama entareṭteto. Ñapṭa rromuet Jasón ñaña po'poñe'chno acheñenesha' ñeñṭ ame'ñetsa. Ñetaña anmarettatset añcha'tareṭesho. Pa'tsrre'mueñoṭetpa' nanac ama'to'chetnomuet attota'cho' chapuet allo'tsen añcha'tareṭnesha'. Allñapa' atet otoset:

—O' chap acheñ ñeñṭ muenene' o'ch a'po'poñeterrnay yoctaṭña. Atto' pohuanmuet ama't po'poñ anetso'mar, te'pa' o' chapuet ñaña arr.

O' alla oterreterr:

—Añ Jasónpa' o' agapanet e'ñe cohuen te'pa' ñaña pa'paclo a'puenet. ⁷ Ñetpa' ama pocteye' enteñeto atto añcha'tareṭ o'ch nan ñoñets all anetso Romo. Ñetpa' añña otenet eñallo' po'poñ añcha'tareṭ ñeñṭ nanac ahuamencaṭ ñeñṭpa' año' pa'so'cheñ Jesús.

⁸ Acheñenesha'ñapa' ñeñta e'muetpa' nanac atsrre'muet ñaña ama't amcha'taretnesha'. ⁹ Allempoña Jasón ñaña po'poñechno acheñpa' o' ayorañpsarettet allpon po'çllayoret. Allo'tpa' otarettet:

—Añ quellepa' allach yapuerres ato't ahuerra' Pablo ñaña Silas.

Allempoñapa' a'rroyeret Jasón ñaña po'poñechno acheñ.

Allempo chap Pablo ñaña Silas anetso Bereo

¹⁰ Allempoña acheñenesha' ñeñt ame'ñetsapa' o' mueñeret Pablo ñaña Silas Bereo. Tsapocma amñare'ttenet a'nahua. O' chapuet Bereopa' be'toscha'toset judionesha' po'prahuo.

¹¹ Añña judionesha' ñeñt Bereo'tsa'yenpa' ñetñapa' e'ñe cohuen cotape'chenet ama atteyayeto atet ñerra'm judionesha' ñeñt Tesalónico'tsa'yen. E'ñe pocsheñesha' e'mñotoñet Yompor po'ñoñ, allotña ñetpa' o' e'nyeset Yompor po'ñoño all aquellcaret ahuatoteñ. Tarro'mar ñetpa' mueneñet o'ch eñochet ñato' po'ñochte' atet serrpare'ten Pablo ñaña Silas. Pate'tets yetpa' attecma pete't. ¹² Ñeñto'marña shonte' acheñenesha' ñeñt ame'ñatsa. Shonte' ñaña coy-anesha'chno ñeñt griegonesha' ñeñt nanac sherbetspa' o' ame'ñenet ñamet. Ñaña po'potantañ shonte' yacmanesha' o' ame'ñenet. ¹³ Añña judionesha' ñeñt yeçhetsa Tesalónicopa' o' e'mare'chet Pablo o' alla serrpare'tuerranerr Yompor po'ñoñ ñaña Bereo. Ñeñto'marña hua'cha'tet ñamet all attoch atsrre'matachet acheñenesha' o'ch e'moñe'tachet Pablo. ¹⁴ Añña acheñenesha' ñeñt o' ame'ñapa' o' mueñet Pablo tepa'to' on-tapo allo'tsen sa'p atarr. Añña Silas ñaña Timoteopa' alla a'pa Bereo. ¹⁵ Puesheña'tets acheñpa' o' cota'nmet Pablo. Ñetpa' alla neñeta' Pablo anetso ñeñt pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo chap Pablo ñaña Silas Atenso

¹⁶ Pabloñapa' alla cohuanet Atenso. Allña cohuanetpa' shonte' entosan aye'chcatare'techno all Atenso, ñeñt po'yomporer pa'yen acheñenesha'. Ñaña'nanac llecachet. ¹⁷ Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñechno acheñ ñeñt cohuen cotape'chets Partsocop. Pate'tets yetpa' o'ch'cho' ahua' all shontena acheñenesha' pueblo allña'pa' o'ch'cho' serrpare'tet parro ñeñt allo'tsa'yen. ¹⁸ Parrochpa' aña huapatsa ñeñt ame'ñenaya Epicuro poctapña, allotpa' o' huapa ñaña ñeñt ame'ñenaya po'poñ cotapñats ñeñt otenet estoico. Ñetñapa' atet otet:

—¿Esté'ca'ye cotape'chenña añ acheñ ñeñt'atta nanac eñets? Po'potantaññapa' atet otet:

—Ñato' añte' muenen o'ch ye'chatey po'poñ po'yomporer ñeñt'ama yentare ya.

Tarro'mar Pablopa' añ serrpare'tatenanet atet pena Jesús ñaña ama't atto tanterra Jesús. ¹⁹ Ñetñapa' o' anmet Pablo all oteñet Areópago allecma ap'chena eñotañnesha'. Allñapa' otoset:

—Ñehua, te'pa' o'ch p'otey este'ña p'otape'chen pa. Yapa' te'pa' yemneñ o'ch yeñoch. ²⁰ Tarro'mar ñeñt' peserrpare'tenpa' ama ye'mare. Yapa' yemneñ o'ch yeñoch este' nanac p'oten.

²¹ Ñehua, allohuen atenso'marnesha' ñerra'm añ serrpare'tats ñeñt'ama puentaretopa' ellapenetcha' e'mñotet. Ñeñtach paterr ma'yochret. Ñaña ñeñt' ye'cha'huerra Atensopa' ñeñt' huapyetsa po'poñ anetsotpa' te'pa' atta penet ñamet.

²² Allempoña Pablopa' tomos rro'cho all oteñet Areópagopa' atet otanet:

—Atenso'marneshacha' napa' neñotenes sapa' aña atarr sema'yochrena ñeñt' seyomporer se'pa'yen. ²³ All nasuanempa' shonte' nentyesnom ñeñt' sema'yochyena ñeñt' seyomporer sepen. Paterr allecma sema'yochenapa' napa' nent all oten añ ñoñets: "Añpa' añecop Yompor ñeñt' ama yeñotena'." Ñeñt' sema'yochena ñeñt' ama señotena'pa' ñeñt'ara Yompor te'pa' ñeñt'cha'ña neserrpare'tatas.

²⁴ 'Añ ñeñt'ara Yompor ñeñt' ye'chcate' añ pats. Ñaña ye'chcatan allohuen ñeñt' yentyen aña patsro. Ña Pamo'mte' pen enet ñaña pats. Ñeñto'marña ya ñeñtey arromña'teypa' ama pallteno o'ch yeye'chcatoñ allcha' ye'cha. ²⁵ Ñaña ama pallteno o'ch es ya'p. Ñocop ama es palltetso. Elloña ñaña yapuene' allohuene'y atto yocrrena, apuene'y ñaña atto yo'rerrerena. Ñapa' apuene'y ora esocmañen.

²⁶ 'Ora allpon pa'namen acheñ ñeñt' ye'cha'yetsa aña patsro Yomporpa' ña ye'chcatue' e'ñe puesheñarro'ta acheñ. Ñapa' o' nohuanet e'ñech allempohua corra'yeset. Ñaña o' na'yesuanet e'ñech erra ye'cha'yeset aña patsro. ²⁷ Tarro'mar Yomporpa' ye'chcatan pa'namen acheñ tarro'mar añ cotape'ch allochñapa' allohuen acheñpa' ñerra'm e'ñe aco'pa e'neretpa' po'ñochpa' enteretcha'. Ñapa' allame'ttso'tsenate' yesho't. ²⁸ Tarro'mar e'ñe ñesho't te'pa' yocrrena ñaña e'ñe ñesho'tpa' ye'chope'chen, ñaña e'ñe ñesho'tpa' ye'ñalleta. Ama't atet quellqu'e't ahua't puesheñarr samo'ts sa ñeñt' etsotaye't

ñoñets. Añmapa' ñeñt̄ quellquë't samo'ts ahua't: "Te'ña po'ñoçh Yomporpa' puechemerasha' peney."

²⁹ Alla oterrerr Pablo:

—Ñehua, ñerra'm po'ñoçh Yompor puechemerasha' peney ya, ama pocteyaye o'ch yoch Yomporpa' arrot ayeçhcataret̄ orot̄, amapa' arrot ayeçhcataret̄ asretot̄, amapa' arrot ayeçhcataret̄ mapyo't. Añmapa' ñeñt̄ ayeçhcataret̄pa' e'ñe ya yocta'pño'fa ayeçhcataret̄, atet̄ es yetma'ntatena ya. ³⁰ Ahua't acheñpa' ama't ama eñotenano ñeñt̄ cohuentetsa Yomporecop, Yomporpa' amach errot̄ paneto. Tarraña te'ñapa' otene yoytapa'cherrepa' ello cohuen Yomporecop, allohueney acheñey ñeñtey corra'yetsa aña patsro. ³¹ Yomporpa' tarro'mar mueneñ o'ch yoctape'cherr etserra tarro'mar ñapa' o' ne' esempoch allohueneypa' yorrterrach ñesho. Te'pa' o' nan Jesús ñach acrerre' allohuen acheñ ñeñt̄ e'ñe po'ñoçh atet̄ pete't. Acrancha' ñeñt̄ cohuen acheñ ñaña ama't ñeñt̄ ama cohueno acheñ. Ñeñto'marña te'pa' o' eñotatuay Jesúsapa' ñach acrerrets tarro'mar Pomporpa' o' tantater ama't o' rromua ñaña Jesúsapa' e'ñe pocte' es pen. Te'pa' o' eñotatuay allohueney acheñey.

³² Allempoña serrpare'tan Pablo attoch yetanterra ellopa' aña puesheña'tets acheñpa' o' achm̄are'chet. Tarraña po'potantañña'pa' atet̄ otet:

—Ñehua, ñato' esempochña ye'mñoterrperr po'pocheño.

³³ Allempoñapa' ahuer Pablo. ³⁴ Tarraña puesheña'tetspa' yemchet Pablo ñaña o' ame'ñet. Aña puesheñarr ñeñt̄ ame'ñatsa añ pa'so'cheñ Dionisio ñeñt̄ara ñeñt̄ añcha'tarettetsa ñeñt̄ a'poctatene' ñoñets all oteñet Areópago. Ñapa' o' ame'ña, ñaña po'psheñeñ coyanesha' ñeñt̄ pa'so'cheñ Dámaris. Ñaña po'poñechno acheñ o' ame'ñet ñamet.

18

Allempo chap Pablo Corinto

¹ Allempo ahuo' ñaña anetso all oteñet Corinto. ² Chap Corintopa' entosan puesheñarr judionesha' añ pa'so'cheñ Aquila. Ñapa' errte' huetsa Italiot epuet puetapor ñeñt̄ pa'so'cheñ Priscila. Año'mar huenet Italiot tarro'mar añcha'taret̄ Claudiopa' o' nan paterr ñoñets all Italio. Ñeñt̄pa' atet̄ ot: Allohuen judionesha'pa' ahuanerretepa'to' Romot̄. Aquilapa' arr eñalletña Ponto. Pabloñapa' ahuo' o'ch entenana' Aquila epuet puetapor. ³ Ñetpa' ñeñfa po'taruas penet atto yeçhcatenet shetamtso'po'. Pabloñapa' alla a'pa epuet attoch taruaset parro. ⁴ Pate'tets semana allempo chen yet allempo amesenet Pabloñapa' o'chcho' ahuo' judionesha' po'prahuo. Allña'pa'

allcha' serrpare't epuet judionesha' ñaña ñeñt ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedonioṭ. Allempopa' añ nanac torrena Pablo serrpare'te'. Ñapa' añ eñotatenan judionesha' Jesúsṑa' ñeñtaraca'ye Cristoterrets ñeñt atarr cohuenet ahuatoteñ. ⁶ Judionesha'ñapa' nanac e'moñe'chet Pablo, o' achmāre'chet. Allempoña Pablopā' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeñt ama judioneshayaye.

⁷ Allempoñapa' ahuer. Chap añ ñeñt pa'so'cheñ Justo pa'paclo ñeñt ame'ñenaya Yompor. Pa'paquëllpa' allame'ttso'tsen allo'tsen judionesha' po'prahua'. ⁸ Ñeñt añcha'tarettetsa judionesha' po'prahuo ñeñtpa' añ pa'so'cheñ Crispo. Crispopa' o' ame'ñerrana Yepartseshar Cristo ñaña allohuen ñeñt pa'paclo'tsen. Shonte' corinto'marnesha' e'mñotoñet Yompor po'ñoñ, o' ame'ñerret ñaña o' apatarettet Yomporecop. ⁹ Atteñapa' orroña Pablo atet ñerra'm cho es yeçhopo'ten. Yomporpa' ahuo't otan Pablo:

—Amach peñcha'tatsto, chocmach peserrpare't, amach atta pemamtetatsto. ¹⁰ Napa' o'ch necuanpeneṑ attoch amach esesha' erroṭ es peṑaye. Tarro'mar napa' nechen shonte' acheñ añ anetsroṭ ñeñtcha' name'ñaya.

¹¹ Allñapa' allena alla paterr char ñaña meterrerr pechapña arorr. Allpa' nanac yeçhatanet Yompor po'ñoñ.

¹² Allempoña añcha'taretta Galión e'ñe alla Acayopa' judionesha'ña o' apçhetpa', o'pachet Pablo. Allempoña o' rromuetpa' anmet añcha'taretesho allecma a'pocstatenet ñoñets.

¹³ Chapuet allpa' atet otoset:

—Añ acheñpa' añña yeçhatenan acheñenesha' atto'ch ame'ñyet Yompor, tarraña ñeñtpa' ama atteyaye atet oteney Moisés po'ñoñ ñeñt atet anareṭ.

¹⁴ Ahuo'ch eñoñ Pablopā' Galiónñapa' atet otanet:

—O'ch notas ñeñtes judioneshas, ñerra'm añ acheñ añte' o' ṑohua ñeñt ama cohuenopa' amapa' atet ñerra'm cho muetsenan acheñ, ñehua, pocte' napa' o'ch ne'mñotas atto sotteñe'cheñ. ¹⁵ Tarraña ñerra'm amate' atteyaye, añpa' e'ñe socpa—atet seyçhaten sa ñeñtes judioneshas, amapa' esesha'te' same'ñena, amapa' ñeñt atet oten ñoñets ñeñt atet anareṭ socop. Ñeñto'marña napa' notenes ñeñtpa' socpa. Ñeñto'marña napa' amach neñoso añecop ñeñt e'ñe socpa.

16 Allempoñapa' o' čha'nmača'taterranet. 17 Allempoña acheñenesha' aña rromuet Sóstenes. Sóstenespa' ñeñ añcha'tarettetsa judionesha' po'prahuo. O' rromuetpa' o' nalle'chet e'ñe alla allame'tets añcha'tareťsho. Añcha'tareť Galiónpa' ama cohua'psaneto.

Allempo čherrerr Pablo Antioquíu

18 O' atomaterrerr Pablo alla Corinto allempoñapa' o' so'tnerran ñeñt ame'ñetsa. Aña coterre' Priscila ñaña Aquila. Alloťpa' año ahuanpset boto, arrcha' tet Sirio'mar. Arr asuanmuet anets Cencrea. Allñapa' o' shopena'tatosa Pablo. Añecop shopena'tata attoch eñochet o' etsotuan po'ñoñ ña ñeñt atet otan ahuaña Yompor ñeñtcha' atet pa Yomporcop. 19 Allempoña čhapuet Efesopa' allñapa' o' sa'nerran Aquila ñaña Priscila. Ñañaapa' o' ahuo' judionesha' po'prahuo allcha' serrpare'tet parro judionesha'. 20 Allñapa' otare'chet Pablo a'puepa'to' alla atomat, tarraña Pablopa' amo' mueno. 21 Allempoña so'tnerranetpa' atet otanet:

—Napa' o'ch alla ahuerren Jerusaléño allcha' nocshapretuerra añ yeter ñeñt anareť Partsocop allempoch alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoñapa' ahuanperrerr boto. 22 Allempoñapa' arr etso-tanpřsosa Cesareo. Cesareoťñapa' asuanom Jerusaléño allcha' abechnoman ñeñt ame'ñetsa all. Allempoñapa' o' alla ahuer Antioquíu.

Allempo poma'pocheño ahuererr Pablo serrpare'tats allemeñ anetso'mar

23 Antioquíopa' alla allponmatnerr; alloťñapa' o' ahuererr. Arr asuanerr Galacio'mar alloťpa' ahuer Frigio'mar. Ñeñt ame'ña'yetsa allpa' o' yenpanet attoch huomenc perret pueyočer.

Allempo Apolos atarr cohuen serrpare'tatosanet all anetso Efeso

24 Ñehua, allempopa' eñall puesheñarr judionesha' añ pa'so'cheñ Apolos ñeñt huetsa Alejandriot. Ñañaapa' o' čhap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcareť ahuatoteñ. 25 Ñapa' ayčhatareť ñeñt atetcha' perra Yepartseshar ñeñtara ñeñt Cristotats. Ñapa' e'ñe po'ñočh serrpare't huomenc, yečhatanet ñeñtcha' atet perra Jesús. Añaña ama e'ñe eñotueno ora atet pena Jesús. Aña eñoten atet yečhateť Juanañ ñaña atet apateť Juanañ. 26 Ñapa' serrpare'teť huomenc judionesha' po'prahuo. Allempoña e'm Priscila

ñaña Aquila, ñetña'pa' anmet ellonet allcha' eñotachet e'ñe ora ñeñt atet pa Yompor ñeññaña palltena o'ch eñoch e'ñe poctacma. ²⁷ Allempoña'pa' secha Apolos Acayo. Añña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo attoch ñetpa' o'ch agapet Apolos e'ñe cohuen. Allempoña o' chap all Acayopa' nanac yenpan ñeñt ame'ñenaya cohuen ñoñets all. ²⁸ O' eñotatanet po'ñoch Jesús'pa' ñeñtca'yeña Cristoterrets ñeñt atarr cohuenet ahuatoteñ. Yompor po'ñoñt ñeñt aquellcayet ahuatoteñ o' gatyesanet atto Jesús o' etsotatuan ñeñt aquellcayet ahuatoteñ. Ñeñt allo'tsa'yen allohuen acheñpa' e'ñe po'huamencocma yeçhatanet. Allempoña ama't puesheñarra judionesha'pa' ama erro' otenaye' enteto.

19

Allempo cherrerr Pablo Efeso

¹ Allempo Corinto'tsenmeñ Apolos, Pabloña'pa' alla chopeñe'chen aspentarero. Atteña'pa' o' alla cherr Efeso. Allña'pa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ.

² Pabloña'pa' a'p'to'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetña'pa' o' anapuet:

—Yapa' ama ye'mareña ñato' eñall'e' Parets Puecamquëñ.

³ Pabloña'pa' alla oterrerr:

—¿Erro'fenote'tña sapataretta?

Ñetña'pa' atet otet:

—Yapa' yame'ñeño't atet otye't Juanañ attotña yapataretta.

⁴ Pabloña'pa' alla oterrerr:

—Añoñña apaten Juanañ atto o' cotape'cherret ello cohuen Yomprecop allotña'pa' o'ch apatarettet attoch ame'ñeret ñeñtcha' huapatsa chenta'. Añña ñeñt huapatsa chenta'pa' añepa't Jesús.

⁵ E'muet atetpa' apatarettterret pame'ñeño'tet Yepartseshar Jesús. ⁶ Allempoña Pablopa' o' a'p'llanet potot. Allempoña'pa' ahuepa't chorraret Parets Puecamquëñ. Allempoña'pa' o' eñosyeset po'poñ ñoñtso, o' a'potoñet atto eñorana'tanet Yompor. ⁷ Ñeñt eñosyesets po'poñ ñoñtsopa' allo'tsen ñato' çharrasheña puechena epsheña.

⁸ Pablopa' nanac serrpare'tate't all Efeso. Pate'tets semana o'chcho' be'tosos judionesha' po'prahuo o'chcho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha.

O'chcho' yechatanet allochñapa' o'ch ameñatanet. Atteñapa' o' ma'pña arrorr. ⁹ Tarraña puesheña'tets acheñpa' nanac atpare'chete't ama ameñyeto atet serrpare'tatanet Pablo. Patpare'teñoftpa' ama't all shontena acheñenesha'pa' o' sasare'toñet Jesús pocta'ña. Allempoñapa' ahuer Pablo. Ñeñña ameñetsapa' o' coferet. O' ahuanmuet allo'tsen Tiranno pue'scuela. Allñapa' pate'tets yetpa' añña Pablopa' o'chcho' serrpare'tatanet pue'scuelapahuo. ¹⁰ Atteñapa' o' met epa char. Allohuen asio'marnesha' o' e'mare'toñet Yompor po'ñoñ—allohuen judionesha' ama't ñaña allohuen ñeñt ama judioneshayaye. ¹¹ Yomporpa' nanac ahuaencat pan Pablo. Ñeñto'marña nanac orrtatanet Yompor po'partsoña ñeñt ama puentareto. ¹² Atteñapa' añña acheñenesha'pa' o'chcho' anerret ñeñt es a'plla'yen Pablo, atet ñerra'm es pañell amapa' pañoshe'm. O'chcho' anmet allo'tsen ñeñt atsna'tets. O'ch chapachet allpa' o'chcho' correrraña atsnañeñ. Ama't po'neñeteretpa' o'chcho' quechpa'nerranet.

¹³⁻¹⁴ E'ñe allempopa' allo'tsen puesheña'tets judionesha' ñeñt achyo'tañnesha' ñeñt chocma chopeñe'chets erracmañen. Nehua, ñetpa' añ puechemereshanet ñeñt puesheñarr judionesha' ñeñtara ñeñt cornesha' nanac añcha'taret añ pa'so'cheñ Esceva. Allo'tsen cancherrsheña puechemerasha'. Ñetpa'cho'ña o' topachet ahuo'ch quechpatachet ñamet acheñenesha' po'neñeter e'ñe pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt chorrena oneñetpa' otoñet po'neñeter:

—Napa' o'ch nota'p, e'ñe pa'so'chño Jesús ñeñt serrpare'ten Pablo o'ch pequechpa'ner añ acheñer.

¹⁵ Allempoña atet ochet oneñetpa' ahuepa'tcha' eñoraña, oneñetpa' atet ot:

—Jesúsapa' neñoteññañ po'huamenc, Pablopa'cho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

¹⁶ Allempoña acheñ ñeñt chorrena oneñetpa' omachana'tanet, orrotet parro epuet achyo'tañnesha'. Oneñetpa' nanac atserrpatse'tanet allohuenet. Muelle'mco't atserrpatse'tuanet o' matrra'tuet pocollot. ¹⁷ Añña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt ama judioneshayaye. Atarr yore'tanet. Allempoñapa' añcha'na'tpo' enteñet Yepartseshar Jesús.

¹⁸ Shonte' acheñ ñeñt ameñetsset allempoñapa' huapyeset, o' a'meta'yesoset atto achyo'tyesete't. ¹⁹ Patantarrpa' o' huapateset po'libro ñeñt allo eñotet achyo'tatset. E'ñe all shon-

tena acheñenesha' o' chama'tuet po'libro. Allempoñapa' o' somuerret errponte' tsa'tena allpon libropa' o' sala amnaroch çharra' mil poçllayoret. Ñeñt allpon tsa'tena allohuen libro.
²⁰ Ñeñto'marña atarr añcha'na'tpo' entoñet Yompor po'ñoñ. Atarr ame'ñet.

²¹ Allempoña e'ñe Yompor Puecamquëño'tpa' o' secherrerr Pablo o'ch ahuererr Macedonio ñaña Acayo, allotña o'ch asuanerrpa' o'ch ahuer ñaña Jerusaléño. Allotñaapa' atet ot Pablo:

—Te'pa' aña palltetsa o'ch ahuen ñaña Romo.

²² O' mueñan epsheña acheñ ñeñt yenpuene' ñeñtcha' ñanom tatsa Macedonio. Añña ñeñt epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toçhtena acheñenesha' all Efeso

²³ Allempopa' o' atsrre'ma puesheña'tets acheñ. Añ atsrre'matahuet atto' pena ñeñt ame'ñetsa. ²⁴ Allo'tsen puesheñarr añ pa'so'cheñ Demetrio ñeñt ñanom e'moñe'te' ñeñt ame'ñetsa. Ñapa' añ po'taruas pen o'ch yeçhcatyesan pocollatollesha' añ toma'ntatena pocoll ñeñt allecma muechatse'tenet ñeñt po'yachorer penet ñeñt otenet yachor Diana. Añ pocollatollesha'pa' arrotto' ayeçhcataretta asertalloç. Shonte' acheñ ñeñtara po'taruas penet, Demetrio ña apahuete't po'taruas atet. Shonte' quelle ganete't po'taruasot. ²⁵ Atteñapa' Demetriopa' o' apçhatuan allohuen pa'taruasañer ñaña po'psheññeçhno, ñetpa'cho'ña ñeñtara po'taruas penet. Apçhatuanetpa' atet otanet:

—Masheñeshacha' sapa' señoñeñ añ yetaruas ñeñtapa' alloch yegana shonte' quelle. ²⁶ Te'pa' señoñeñ ñaña añ ñeñt otenet Pablopa' ahuo't otuan acheñenesha' añ ñeñt yeyoser ñeñt yeyeçhcaten yapa' ñapa' oten amo' Partsoyaye. Ñapa' o' cotape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt yapuenanet ñeñtcha' ma'yochet. Sapa' o' sentue atet penet arr Efeso ñaña o' se'mare'ch atet pa'yenet ora erraparen Asio'mar.

²⁷ Alla oterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñtapa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt puerahuo'tsen. Ñato' allempopa' ama't yachor Dianapa' o'huañcha' añcha'na'tpo' eñchet, ama't ñaña ora allohuen asio'marnesha' ñeñt po'yachorer pene'.

28 Ñeñta e'm allohuen acheñenesha'pa' nanac atsrre'matanet. Pa'tsrre'mueño'tetpa' o' rranare'tyeset, alla oterrete't:

—¡Paretsña'cho' yachor Diana!

29 Shonte' acheñ nanac ama'to'chttenet allohuenet. O' rromuet Gayo ñaña Aristarco ñeñt macedonio'marnesha' ñeñt parro chopeñe'chen Pablo. O' matrra'tet allo'tsen pocoll atarrpo' allecma ap'chena acheñenesha'. 30 Pabloñapa' mueneñ o'ch be'tos ñaña all ama'to'chttenetpa' tarraña añña ñeñt ame'ñetsapa' ama muenacheto. 31 Ñaña puesheña'tets ñeñt am'cha'tarettetsa all Asio ñeñt muerenaya Pablopa' o' mueño'ñet ñoñets attoch amach tatsto all ap'chenet te't muetseñet. 32 Allña ap'chenetpa' atfa rranare'tyenet. Puesheña'tetspa' atet otyeset atet cotape'chyenet ñet, po'potantañña'pa' atet otyeset po'poñ ñeñt atet cotape'chyenet ñamet. Allohuenet ama't ama eñotueñeto esocopte'ña ap'chenet, tarraña atfaña nanac ama'to'chttenet. 33 Puesheña'tets judionesha' o' cheta'nmet Alejandro o' huapachet attoch eñosachet. Ñaña'pa' o' echantosán pot attoch o'ch muetsoñeñtet añecop attoch o'ch a'pocatan ñoñets judioneshacop. 34 Tarraña allempo acheñenesha' ñeñt ama judioneshayaye o' eñchet Alejandro ñapa' judionesha' ñetña'pa' alla rranare'terretterr. Atarr tematen rrannartenet. O'ch'cho' alla oterret allohuenet parro:

—¡Paretsña'cho' yachor Diana! ¡Paretsña'cho' yachor Diana!

35 Allempoñapa' puesheñarr am'cha'taret ñeñt taruasetsets gobiernocoppa' o' emma'huanet, atet otanet:

—Masheñeshacha', o'ch notas ñeñtes ye'chetsa arr Efeso. Ama't allohuen acheñenesha' errap'aren e'ñe eñotueñet efeso'marneshayapa'yapa' ñeñtey cohuan'pene'yachor Diana ñeñt puerahuo'tsen, ñeñtara yachor Diana ñeñt nanac Parets, ñeñt sohuatsa ento't. 36 Ñeñtpa' yeñotueñ allohueney acheñey. Amate' erro'teno't yoto ama atteyaye. Ñeñto'marña e'ñe pocte' o'ch semtsoñeñta. Amachña'cha sama'to'chtatsto.

37 O' alla oterraneterr am'cha'taret, atet otanet:

—Secua' ahuo't sehupach arr añ epsheña acheñ. Tarraña ñetpa' ama es yoreneto yachor po'prahuot ñaña ama achn'are'teñeto yachor. 38 Ñeñto'marña te'pa' o'ch notas, ñerra'm mueneñ Demetrio ñaña pa'taruasañre'chno o'ch otteñe'chatanetpa' te'pa' e'ñe pocte' temantanetepa'. Tarro'mar te'pa' atoraret allcha' a'pocatatet ñoñets. Ñeñt'cha' a'pocotate' ñoñetspa' allo'tsena. 39 Tarraña ñerra'm este' semnen o'ch sa'pocatat po'poñpa' ñeñtpa' añ pocte' o'ch sa'pocatach allecma ap'chena ñeñt nanac am'cha'tarete'chno.

40 Ñato' temanta'yeta ya tarro'mar yapa' e'ñe attota yama'toçhtena.

41 Ñeñta otuanetpa' o' mueñhuerranet. Allempoñapa' ahuanomhuerret.

20

Allempo çherrera Pablo alla Macedonio

¹ Allempoña o' muetsoñeñtuerret Pabloñapa' agotatuan ñeñt ame'ñetsa. O' cotape'chatnenanet e'ñe cohuen. Allempoña e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuerro Macedonio. ²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteñapa' o' çherr Grecio ñeñtara all oteñet Acayo. Allpa' alla a'pohuerra ma'pña arorr. Autsaño' tanpsatsañ ñaña Sirio botopa' tarraña o' e'mare'ch allpa' cha o'pateña judionsha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr). ⁴ Allempoña ahuerro Macedoniopa' allpon acheñ o' coteret. Ñeñtpa' ñeñtara a'neçhno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ coterre'. ⁵⁻⁶ Arr çhaçha'tet Filiposo. Allempoña ñetpa' ahuanmuet o'ch otet, arrcha' cohuosyet Troaso. Yapa' alla ya'pa Filiposo epan Pablo allponmat.* Allempoña o' huañ allempo coshenet allempo rrenet pan ñeñt ama achasareteyaye allempoñapa' o' yahuanma yaña. Allempo ahuanpsey botopa' pa'mnarmatñoñapa' o' yeçhap yaña Troaso. Allñapa' allo'tsa'yen ñeñt otatsa ahuaña. Allñapa' alla ya'posa cançhermat.

Allempo Pablopapa' emo'tnom anetso Troaso

⁷ Allempoña çhap allempo mo'tta'muena yetñats temençpa' yapçha allohueney ñeñtey ame'ñetsa. Yeyerpueñoñ Yepartse-shar Jesúsapa' o' yerra' pan ñeñt ashota'tareñ ñeñt atet anareñ Yomporecop. Allempoña Pablopapa' nanac serrpare'tatanet. Ñapa' otanet:

—O'ch ahuenen tsapat.

Ñeñto'marña ama't o' rroçh tsapuenpa' alla serrpare'tatenanet. ⁸ Allña yapçhena pocollo enopa' nanac a'yohuen bat. Allpa' shonte' lampareñ ñeñt corra'yetsa. ⁹ Allñapa' allo'tsen puesheñarr huepuesha' añ pa'so'cheñ Eutico. Ñañaapa' alla anen ventanoñ. Atto nanac serrpare'ten

* 20:5-6 Lucas ñeñt quellquë' añ ñoñets ñapa' co'ta'nman ñaña Pablo.

Pablopa' Euticoña'papa' ahuo't alla ma' anaot. Ahuo't alla ma'pa' machayota shora'nom patso. Ma'pa piso allot shora'nom. Allempoña echantsetpa' o' rroma. ¹⁰ Allempoña sohuerra ñaña Pablo. O' huapa o' mo'capa' a'chono'tos allempoñapa' otanet:

—Amach sellcatsto, Yomporpa' o'ch alla tantater.

¹¹⁻¹² Añña huepuesha'ña ñeñt o' shora'nemuapa' o' alla aneret e'ñe huomech. Allempoña allohuenetpa' atarrepata'cha' coshet. Allempoñapa' o' alla a'terr Pablo. Allñapa' o' rrallme'chet. O'ña rrallme'chuetpa' o'huañ tematen all serrpare'tatannenet. Atteñapa' o' puetarespenet. O'ña puetaresuenpa' o' ahuen Pablo.

Allempo ahuanerret Troasot arr cha'cha'tet anetso Mileto

¹³ Allempoña yapa' o' yahuanma o'ch yota o'ch yerrma' añecmuen noñt ñeñt otenet bote o'ch ahuañpsey Asóno allcha' yecuos Pablo. Tarro'mar otey Pablopa' ñapa' arro'ch oñom patso'mar o'ch chap Asóno. Allotñapa' o'ch a'tap ñaña boto, tarro'mar atet o' ya'pocstat epay Pablo ahuañacma. ¹⁴ Atteñapa' o' ye'chap Asóno. Allñapa' all yentanna'ta epay Pablo. Allotñapa' a'tap ñaña boto, allotñapa' ahuañpsey parro. Atteñapa' o' ye'chap Mitileneo. ¹⁵ Mitileneotñapa' o' alla ahuañperryerr boto. Tsapatñapa' a'yo'mara yoñem Quío. Allotña tsapatenerrrpa' alla yetstosa Samsó. Yen'terrerr Samsotpa' alla yamesuerrerr Trogilio. Allotña tsapatenerrrpa' alla yetstouerrerr Mileto. ¹⁶ Allñapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch ye'chap tecma Jerusaléno añecop o'ch yentapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

¹⁷ Ñeñto'marña allempo Mileto'tseneypa' Pabloñapa' agotatan ñeñt pompornesha' pen ñeñt ame'ñetsa Efeso, onetepa' Mileto all o' ye'chap ya. ¹⁸ Allempoña o' hua'cha'tet Pabloñapa' o' serrpare'tatanet, atet otanet:

—Sapa' se'notenen atet o' ne'pohuanma sesho, ama't ahua'otoñ allempo ñanom ne'chap Asio all sey'chena. ¹⁹ Sapa' se'notenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñt e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemuero'chteño'pa' chocma netorrena Yomporecop. ²⁰ Se'notenen ñaña napa' o' neserrpare'tatuas ora allohuen ñeñt pocetsa socop. Ama es na'nasotañpsaso ama't coñe'ta. Napa' o' ney'chatuas allohuenes parro allempo sap'chena ñaña o'

neychatyesnomues e'ñe sepacllo'mar. ²¹ O' neserrpare'tatuas añ pocte' o'ch soctape'cherr ello cohuen Yomporecop ñaña añ pocte' o'ch same'ñera Yepartseshar Jesucristo. Ñeñtpa' atet o' notuas allohuenes ñeñtes judioneshas ñaña ama't ñeñtes griegoneshas. ²² Te'pa' o'ch ahuerren Jerusaléno, tarro'mar o' sechaterren Yompor Puecamquëñ. Tarraña o'ch necherr Jerusaléno'pa' ama neñoteña' ñeñtcha' allohuen nehuapoya all. ²³ Aña neñoten o' eñotaten Parets Puecamquëñ ñeñtcha' atet pa'net o'ch yottam̄pesnetpa' o'ch muerochtatnet. Ora allpon anetso attec̄mach pa'net. ²⁴ Tarraña ama't atetpa' napa' ama neñcha'teno. Ama'tcha' nerromapa' pocte' nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuon ora allohuen ñeñt atet llesensa'n Yepartseshar Jesús. Ñeñt atet llesensa'n Yepartseshar Jesús'pa' ñeñtpa' attoch neserrpare'tach acheñenesha' ñeñt cohuen ñoñets atto Yompor pomuereño'tpa' a'queshp̄atterreycha'.

²⁵ O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno. ²⁶ Ñeñto'marña te'pa' o'ch neñotatas ñerra'm eseshas chenquërrtsapa' tarraña napa' ama es na'chencatam̄psase'te tarro'mar napa' chocma neserrpare'tatase't attoch amach sechenquërrro. ²⁷ O' neserrpare'tatuas ora allohuen atet cotape'chateney Yompor. Ama es na'nasotam̄psaso ama't coñe'ta.

²⁸ Allempoñapa' alla oterraneterr ñeñt pompornesha' penet:

—Te'pa' seño'tach. Te'pa' añ pocte' o'ch secuam̄peñ cohuen allohuen ñeñt ame'ñenaya Yompor. Atetcha' sepa atet ñerra'm ñeñt cohuan̄pene' po'carrneror. Sapa'cho'ña atetcha' sepa sam̄a o'ch secuam̄peñ ñeñt ame'ñetsa. Ñeñtcha' setaruas sepa' atet llesensenes Parets Puecamquëño't. Tarro'mar Yepartseshar Jesús'pa' o' rroma ñocpuet ñamet. ²⁹ Napa' neñoteñ allempoch ama allo'tsennopa' o'ch huaponasa ñeñtcha' seshquë', ñapa' mueneñcha' o'ch a'psatas Yompor po'ñoñ. Atetcha' huapuet atet ñerra'm ma'yarrpa' ñerra'm huapapa' o'ch a'chencatuan allohuen carrnero. ³⁰ Ama't e'ñe sagattsapa' orrtetcha' ñeñtcha' seshquë', ñeñt ama Yomporeyaye po'ñoñpa' ñeñtpa' serrpare'tatasetcha'. Tarro'mar ñetpa' mueneñetcha' o'ch ame'ñatuaset e'ñe ñet poctapña.

³¹ O' alla oterraneterr Pablo:

—Te'pa' seño'tach. Chocmach seyerpa'na tarro'mar sapa' seño'teñ o' ma'pa char chocma noctape'chatas cohuen—ama't

yeŧo, ama't ñaña tsapo. Ama't neya'chpeñsha' čhocma noctape'chatase't.

³² 'Te' Yomporpa' cohuanpsasepa'ch. Yomporepa'chña po'ñoñ señoŧate' pueŧuereña. Yomporepa'chña po'ñoñ seyčhate' attoch huomenc sepa' seyočher. Yomporepa'chña po'ñoñ sa'queshpaterre' atet ñerra'm ñeñt allohuen ñeñt pame'ñeñoŧet o' a'cohuentatuare'tterret. ³³ Ñaña napa' ama neye'chapreto po'psheñeñ po'čllayor, amapa' pa'shtam ama neye'chapreto. ³⁴ Sapa' señoŧenen ñeñt allpon nepalltenapa' e'ñe notoŧ netaruasa' atto nechen ñeñt nepallta'yena. Ñaña e'ñe na netaruaso'tpa' es napa'yeñ ñaña ñeñt noctene'. ³⁵ E'ñe na netaruaso'tpa' čhocma neñoŧatenes ñeñt poctetsa o'ch yetaruasa' attoch es yechyes alloch yeyenpue' ñaña po'psheñeñ ñeñt es palltetsa. Añ pocte' o'ch yeyerpueña atet otye't Yepartseshar Jesús. Ñapa' atet ote't: "Nanac yocshena ñerra'm esempo es yapa'yeñ po'psheññečno, añña ama tama yocsheno ñerra'm esempo po'psheñeñpa' o'ch es apueney ya."

³⁶ Ñeñña otuapa' o' concorpa o' ma'yochatnenanet. ³⁷ Añña acheñenesha'pa' pomorrenteñoŧet Pablopa' o' yahuanrrortet. A'čhono'chetpa' o' tso'tstsapa'chet. ³⁸ Atarr llequët nanac. Atet o' otanet Pablo ñeñña nanac llecatahuet tarro'mar ñapa' otanet "amach senterrno arr patsro." Allempoñapa' o' coŧa'neñet Pablo arrohua allo'tsen bote.

21

Allempo o'ch alla čherrerr Pablo Jerusaléño

¹ Allempoña o' yesa'nenanetpa' o' ahuanperryerr boto. Allotñapa' pačharra yepe'pa' o' yečhap Coso. Tsapa'tñapa' arr yečhap Rodaso. Allotñapa' arr yetsotosa Pátaro. ² Pátaroñapa' o' yentos po'poñ bote ñeñtcha' tatsa Fenicio. Yañapa' o'čho' ya'tapos allotñapa' ahuanperryerr boto. ³ Allempoña yetam'pena sa'popa' yentnom coñe't pats ñeñt pa'so'cheñ Chipre, e'ñe arroŧ yentnom' ye'chcoŧeroŧ. Atteñapa' o'čho' yen'tam'pes boto, arr yesechena Sirio. Allempoñapa' arr yetsotosa all oteñet Tiro, tarro'mar allpa' o'ch a'suatatsre'tet botoŧ. ⁴ Yañapa' o' yesua attoch yentnom' ñeñt ame'ñetsa all. Allñapa' alla ya'posa cančherrmat. Ñeñña ame'ñetsa allpa', ñetñapa' ochet Pablo:

—Amach petatsto Jerusaléño.

Tarro'mar Parets Puecamquëñpa' ahuo't eñoŧatanet atetcha' pet Pablo all Jerusaléño. ⁵ Tarraña allempoña o' met cančherrmatpa' o' alla yahuanerrerr. Allempoña allohuen yacmanesha'pa' coŧa'nemyet puebloŧ a'yeneŧ, ñaña pueŧaporeshohuenet ñaña puechemerneshet. Allñapa' all

yeconcorposa ontapopa' o' yema'yochosa all. ⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetñapa' o' ahuanerret pa'paclo.

⁷ Allempoña o' yener Tiroṭpa' arr yetsotuenerr Tolemaido. Allñapa' all yehuoñcha'tnoñ ñeñt ame'ñetsa. Allñapa' all yepatrranom yet. ⁸ Tsapatñapa' o' yahuanenerr, allempoñapa' arr yeḥap Cesareo. Allñapa' o' yebe'tosos Felipe pa'paclo, allpa' allcha' yommosa. Añ Felipepa' ñeñt serrpare'tene' cohuen ñoñets. Ñaña ñeñtara Felipe ñeñt net ahuaña ñach epatyesahuet rreñets epuet po'psheññeḥno pechapsheña. ⁹ Añ ñeñtara Felipepa' echenan pa'tatssheña po'sñesha'. Ñetpa' ama arrollare'teto. Ñetñapa' nanac a'poteññañet ñamet Yompor po'ñoñ. ¹⁰ Allempoña ya'llponmotos allpa' o' huapa ñeñt a'mtene' Yompor po'ñoñ añ pa'so'cheñ Agabo. Ñapa' Judeot huapa. ¹¹ Allempo huapapa' o' pueyosan Pablo po'chanar. Añña chanaretspa' Agabo ñañaña huancatatsa e'ñe potot ñaña pa'tcoṭ. O' huanca'huapa' atet otan Pablo:

—Ñeñtapa' atet oten Parets Puecamquēñ, ñeñteṭ echene' añ chanaretspa' judionesha' ñeñt Jerusaléño'tsa'yenpa' atetcha' huancapet atet nehuanca te' ñañeña. Ehuancare'tcha' o'ch pomapet allo'tsen acheñenesha' ñeñt ama judioneshayayeto.

¹² Ñeñtña atet ye'mpa' yotare'ch Pablo:

—Amach petatsterro Jerusaléño.

Ñaña ñeñt acheñenesha' ñeñt allo'tsa'yenpa' atet otare'chet Pablo ñamet. ¹³ Allempoña Pablopa' otanet:

—Eso'mare'tña nanac seyahuena, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléño, attoch nerroma e'ñe neserpare'teñoṭ Yepartseshar Jesús po'ñoñ.

¹⁴ Pabloñapa' ama e'mñotyey. Allempoña ama erroṭ yepepa' o'huañ erroṭ yoch, aña yoter:

—Ñehua, ñerra'm atette' muenen Yomporpa' ama'tpa' attepa'ch.

¹⁵ Allempoñapa' o' yañño'tatsre'tena. Allempoña o' yañño'tatsre'tuapa' yahuanenerr Jerusaléño. ¹⁶ Añña puesheña'tets cesareo'marnesha' ñeñt ame'ñetsapa' allenta coṭa'nenyet, arr nehuerryeta' all yeḥena Mnasón ñeñtara ñeñt chipro'marnesha'. Ñañaapa' ahuatoteñ ame'ña'hua. Pa'pacloñapa' all ya'posa.

Allempo Pablopa' emo'tuerr Jacobo ñeñt Jesús pa'mo'nasheñ

¹⁷ Allempoña o' yeḥerr Jerusaléñoapa' añña ñeñt ame'ñetsa allpa' e'ñe pocsheñesha' agapyet. ¹⁸ Tsapatña pueta'ren pa'

yahuanma parrocoma Pablo o'ch yenteña' Jacobo. Añña allohuen ñeñt pompornesha' pen acheñenesha' ñetpa'cho'ña alla yentosanet, allo'tsa'yenet ñamet. ¹⁹ Pabloñapa' o' huomñcha'tosanet allohuenet. Huomñcha'tuanetpa' allempoñapa' serrpare'tatuerranet e'ñe ora allpon Yompor po'huamenco' o' etsotuoñ e'ñe ñocop. Serrpare'tatuerranet atto acheñenesha' ama't ñeñt ama judioneshayayetopa' o' ame'ñatuanet ñamet.

²⁰ Ñeñta e'mhuetpa' nanac aye'chochtatoñet Yompor. Tarraña allempoñapa' atet ochet:

—Tarraña masheñe, ahuo't peño'ch te'pa' shonte' mil judionesha' o' ame'ñenet ñamet. Ñetpa' e'ñe huomenco otenet añ palltetsa allohuene' ñeñtey judioneshay o'ch ye'pohua atet otye't Moisés. ²¹ Ñetpa' o' e'mare'tonapet peñoñ añe'no' pey'chaten judionesha' ñeñt ye'cha'yetsa po'poñ anetso all ye'cha'yena ñeñt ama judioneshayaye atto año' pocte' o'ch puesuerret Moisés po'ñoñ. Ñaña o' e'mare'tapet ahuo' potuanet amach tsorratsteto puechemeretollesha', ñaña amo'ch patsteto atet yey'chena ahuato'eñ.

²² Allempoñapa' alla otereterr Pablo:

—Ñehua, te'pa' ¿errote'tcha'ña yepaña te' tarro'mar po'ño'chpa' o'ch e'mare'tapet o' pe'cherr arr? ²³ Ñehua, te'pa' o'ch pe'mñotey o'ch yotap' ñeñt'cha' atet pe'pa. Ñehua, arpa' arro'tsen pa'tatssheña ñeñt netset ñetañeña ñeñt'cha' atet pet Yomporecop, ñeñt atet yey'chena ya ñeñtey judioneshay. ²⁴ Te'pa' añ pocte' ñeñt'cha' atet pe'pa. O'ch panem' añ pa'tatssheña e'ñe epaspa' o'ch sa'cohuentatena' ñeñt atet anaret Yomporecop ñeñt atet yey'chena ya ñeñtey judioneshay. Ñaña añ pa'tatssheñapa' o'ch petsa'tanet atoch shopena'tatet, ñaña ora ñeñt palltetsapa' o'ch petsa'tanet. Allochñapa' allohuen judionesha' o'ch e'ño'chet po'ño'chpa' ama atteyaye ñeñt atet e'mare'tet pocop, tarro'mar allempopa' o'ch e'notapet papa'cho'ña o' pepohua ñeñt atet oteney Moisés po'ño'ño't. ²⁵ Tarraña añecop ñeñt ama judioneshayaye ñeñt o' ame'ñapa' yapa' o' yemñanet carta, o' yotuanet cartot ñeñt pocte' yenten ñocpuet ñeñt'cha' atet pet. Ñeñtpa' añe'chno: Amach rratsteto po'chets ñeñt muetsenet aye'chcatare'fecop ñeñt po'yomporer penet. Ñaña o' yotuanet amach rratsteto es po'r'ras, ñaña amach rratsteto ñeñt muetsenet ñeñt atta a'pan'aret. Ñaña o' yotuanet amach chetapretatsteto taporets. Ñeñta yotanut yecartot.

Allempo rromapueret Pablo all Parets pa'pacillo

26 Allempoña Pablopa' o' anman añ pa'tatssheña. Tsapatñapa' o' a'cohuentatet e'ñe parro, ñeñt atet yeçhena judionesha'. Allempoñapa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablopa' o'ch muetsatanet Partsocop carrnero puesheña'ttsocmuet, ñeñtpa' atet pena judionesha' Yomporecop.

27 Tarraña o' taya çhappmoch cançherrmat allempoch o'ch a'cohuentatuetpa' añña judionesha' ñeñt huetsa Asiotpa' o' eñchet Pablo all Parets pa'paclo. Ñetñapa' o' atsrre'matachet acheñenesha' attoch o'ch e'moñe'chet Pablo. Allempoñapa' o'ch rromuet Pablo. 28 Pa'tsrre'mueñofteta' o' rranare'tyeset, otyeset:

—Masheñnesha judioneshacha' o'ch seyenpa'y. Te'pa' o' yenter añ acheñ ñeñt ye'moñe'tene' ñeñtey judioneshay ñeñtara ñeñt o' puesuerran Moisés po'ñoñ ñaña ñeñt o' a'sosyatuan Parets pa'paquëll. Te'pa' o' erracmañen atet o' yeçhatyesuan acheñenesha'. Elloña te'pa' o' abe'tatan ñaña acheñ ñeñt ama judioneshayaye arr Parets pa'paclo. Allochñapa' ahuo'ch a'sosyatuan Parets pa'paquëll.

29 Tarro'mar atet otet o' eñchet Pablo epuet Tróximo all chopeñe'chen epuet Jerusaléño. Tróximo ñeñtpa' efeso'marnesha', ama judioneshayaye. Ñetpa' çho' otenapuetañ ñato' Pablopa' o'te' abe'tatan Tróximo all Parets pa'paclo ñeñt ama pocteye' enteno judionesha'.

30 Allempoñapa' allohuen acheñenesha'pa' o' atsrre'muetpa' matrra'tet allo'tsen Pablo o' rromuetpa' o' cheta'nmet a'yenet Parets pa'paclo. Allorocma yotetuet Parets pa'paclo.

31 O' muetsamochet Pablopa' añña ñeñt solltarnesha' pa'mcha'tareterpa' o' e'manet atet nanac ama'toçhtena allohuen acheñenesha' all Jerusaléño.

32 Ñañaapa' o' anman allpon solltarnesha' ñaña allpon capitánnesha'pa' o' matrra'tet allo'tsa'yen acheñenesha'. Allempoña acheñenesha'pa' o' entapan solltarnesha' epuet pa'mcha'tareterpa' o'huañ çhota'chet Pablo. 33 Allempoña çhap añcha'taretpa' o' rromatan Pablopa' o' huanquët epa cadeno. Allempoñapa' a'p̄to'tanet:

—¿Eso'tña pa'so'cheñ añ acheñer?

Ñaña o' a'p̄to'tanet:

—¿Esté'ña o' p̄ohua ña?

34 O' anapyeset po'poñe'ttsocma. Puesheña'tets acheñpa' otyeset atet cotape'chet ñet, po'potantaññaapa' atet otet po'poñ ñeñt atet cotape'chenet ñamet. Nanac ama'toçhtenet ñeñto'marña ama eñocheto e'ñe po'ñoçh ñeñt atet o' p̄ohua

Pablo. Ñeñto'marña añcha'taretpa' anmatan Pablo pocollo all shontena solltarnesha'. ³⁵ Allempoña o' chapuet allot a'tenet pocollopa' añña solltarnesha'pa' o' enatnomet Pablo eno, tarro'mar taye'to' acheñenesha' pa'tsrre'mueño'pa' muetseñet. ³⁶ Tarro'mar acheñenesha'pa' o' co'a'huanmet. Puerranare'teño'f otyesnomuet:

—¡Semtseñaca'ye!

Allempo Pablopá e'ñe cohuen eños ñocop allo'tsa'yen ñeñt e'moñe'tene'

³⁷ A'tapachet pocollopa' Pabloñapa' otosan solltarnesha' pa'micha'tareter, eños griega'cho, ot:

—Te' napa' nemneñ o'ch notap' paterr ñoñets.

Añcha'taretñapa' och:

—¿Po'ño'cha't pe'muen griega'ch?

³⁸ Alla otererr añcha'taret:

—Papa' ¿ama't añeyaype egipto'marnesha' ñeñt atsrre'mate' ahuaña acheñenesha' atto ñetpa' atpare'chet gobierno', ñeñtara ñeñt ahuanmue' pa'tatsoch mil amtsañnesha' a'yo amarato?

³⁹ Pabloñapa' alla otererr:

—Napa' amaca'ye ñeñteyayno, napa' judioneshan ñeñten tarso'marneshan, ñeñtara anets nanac atarr ñeñt allara Cilia. Napa' o'ch notare'tap' attoch pemnaten o'ch neños acheñeneshacop.

⁴⁰ Allempoñapa' o' muenatan Pablo o'ch eños. Pabloñapa' alla tomos allotecma a'tenetpa' echantosan pot attoch muetsoñeñtua acheñenesha'. Allempoña o' muetsoñeñtuetpa' Pabloñapa' o' eños hebrea'cho, atet otanet:

22

1 —Masheñneshacha' ñaña nomporneshacha', o'ch se'mñoten ñeñtcha' atet neños e'ñe nocop.

² Allempoña e'mhuet atto o' serrpare'tatanet e'ñe ñet po'ñoñetopa', allempoñapa' o' e'ñe muetsoñeñtuet poctacma. Pabloñapa' alla oterraneterr:

³ —Napa' judioneshan, arr ne'ñalleta Tarso e'ñe alla Cilia. Tarraña arrña e'ñe eñotñan Jerusaléño. Ñeñt ney'chate' napa' ñeñt'pa' Gamaliel. E'ñe ña puey'chateño'tenpa' netsotuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa' yatañneshañ. Nanac nema'yo'chra ñeñt Yomporecop ñeñt atet sepena te' sa. ⁴ Napa'cho'ña ahuañmo'chapa' nanac nemuero'chtache't ñeñt cotene' Jesús poctap'ña. Napa' o'ch nerrmanatanet, allotñapa' o'ch'cho' nehucatanet, ñaña o'ch'cho' nabe'tatanet ñaña cárcelo. Ñaña nemtsatatu'e't —yacmanesha' ama't ñaña coyanesha'cho. ⁵ Ama't cornesha'

ñeñt nanac añcha'taretpa' eñotuane't ñeñt atet nepe't. Ñaña allohuen ñeñt pompornesha' penetpa' e'ñe eñotuennet ñamet ñeñt atet nepe't. Ñet allempopa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñt'pa' alloch mueñanet attoch o'ch nerrmanatue ñeñt ame'ñaye't Jesús. Ehuancaretetpa' o'ch nahuanmanet Jerusaléño allcha' yecoñchatuanet.

Allempo Pablopa' serrpare'tatanet atto ello cotape'cherran cohuen Yomporecop

(Hch. 9.1-19; 26.12-18)

⁶Atteñapa' o'cho' ahuen Damasco. Allempoña nechapmoch Damascopa' allempo o' chapmoch pocto. Ñeñtña nanac poptetsa entotpa' machayotepa'tcha' choyo'tamñsapuen. ⁷Allempoña choyo'tamñsen e'ñe neshopa' nañapa' alla nerrmopra patso. Allempoña nechap patsopa' ne'm ñoñets ñeñt atet oten: "¿Eso'mare't Saule, pemuerochtatennañña ñeñt name'ñenaya?" ⁸Nañapa' o' not: "¿Eshape't Ayochreshate eñets?" Ñeñt eñetspa' alla oterrnerr. "Napa' ñeñtñen Jesús en ñeñtñen nazareto'marneshan, narramche'ña atarr pemuerochtaten." ⁹Ñeñtña allo'tsenen e'ñe parropa' ñetpa'cho'ña entetca'yeña ñeñt nechoyo'te' ñeñtñapa' cha yore'tanet tarraña ñetñapa' ama eñochetoña ñeñt atet notaretta. ¹⁰Nañapa' o' alla noterrerr: "¿Est'e' Partseshacha' poctetsa ñeñtcha' atet nepa'?" Partseshaña Jesús pa' alla oterrnerr: "Te'ñapa' o'ch petanta o'ch ahuep' Damasco. Allcha'ña otapet allohuen ñeñt anaret ñeñtcha' atet pepa'." ¹¹Allempoñapa' o'huañ nenta tarro'mar o' rrechaten ñeñt po'ptetsa ñeñt nechoyo'tamñse'. Ñeñtña noctene' ñetñapa' echa'nomnet notof. Attoña chapatnet Damasco.

¹²⁻¹³'Ye'chap Damascopa' allempoñapa' huapa puesheñarr añ pa'so'cheñ Ananías. Añña Ananíaspa' nanac ame'ñenana ora allohuen ñoñets ñeñt atet anaret yocop ñeñtey judioneshacpay ñeñtcha' atet ye'pa. Añña judionesha' ñeñt ye'cha'yetsa Damascopa' nanac cohuen enteñet Ananías. Ñaña' huapa neshopa' allenta ponmosnapa' otosen: "Te'pa' masheñe Saule pecuerrepa'ch." Nañapa' allorocmuepa'tcha' necuerr, allempoñapa' neñch Ananías. ¹⁴O' alla oterrnerr Ananías: "Añ Yompor ñeñt Po'yomporer pe't yatañneshañ, ñaca'yeña pa'crerre'ña pa' ama't ahuatoteñ añecop o'ch peñotuerrñañ atet muenen ña. O' muenatap' ñaña o'ch penterrñañ paña Puechemer ñeñt e'ñe pocte' es pets. Ñaña o' muenatap' o'ch pe'mñotoñ e'ñe ña po'ñoñ ñeñt atet o' otuap'. ¹⁵Te'pa' ñeñt'pa' atet'cha' pe'pa, o'ch pa'potoñ

Jesús po'ñoñ erracmañen ñeñt atet o' pentua ñaña ñeñt atet o' pe'mua. ¹⁶ Te'pa' añ palltetsa o'ch petanta, e'ñe pame'ñeñoñ Yepartseshar Jesús'pa' o'ch p'apataretterra, attochña e'shohuaretterra p'o'chñar." Neñtpa' allohua atet oten Ananías.

Atto Pablo'pa' eñotatanet ñapa' ña serrpare'tatene' ñeñt ama judioneshayaye

¹⁷ O' alla oterraneterr Pablo:

—Allempoña o' met allponmatpa' o' nohuerrerr arr Jerusaléño. Parrochña allempo nema'yochena Parets pa'paclopa' allña'pa' orrtona atet ñerra'm cho es ye'chopo'ten. ¹⁸ Allempoña o' orrtona Yepartsesharpa' atet oten: "Tayecma o'ch ahuerre'p arro' Jerusaléño't, tarro'mar arrpa' amach esesha' pe'mñotaye allempoch p'a'poton neñoñ." ¹⁹ Nañapa' alla notererr: "Partseshacha' ama't atetpa' allohuen acheñenesha'pa' e'ñe eñotuennet atet o' nepohua. Eñotuennet atto napa' nebe'tose't judionesha' po'prahuo atto nenalle'tache't ñeñt pame'ñenaya, ñaña atto nabe'tatanete't cárcelo. ²⁰ Ama't allempo muetset Estebanañ ñeñt p'a'potaye't peñoñpa' napa'cho'ña allempopa' e'ñe pocte' neñch muetsetepa'. Napa' allña necuam'psanet pa'shtam ñeñt rrolle'te'. All necuapretpa' napa'cho'ña e'ñe pocte' neñch attepa'ña pet." ²¹ O' alla oterrnerr Yepartseshar: "Ama't atetpa' te'pa' o'ch ahue'p o'ch nemña'p allapar allo'tsa'yen acheñenesha' ñeñt ama judioneshayayeto."

Allempo solltarnesha' pa'm'cha'tareterpa' abe'tatan Pablo o'pono

²² Ñeñta otua Pablo'pa' añña acheñenesha' ñeñta e'muetpa' o'huañ e'mñochet. O' alla rrannarterreterr, atet otet:

—¡Semtseñaca'ye! Ama pocteyaye o'ch corra ñeñt atet acheñ arr patsro.

²³ Pa'tsrre'mueño'tetpa' alla rrannarterreterrpa', o' gogo'tyeset pa'shtam enonet, allotpa' a'rrotsetyeset ñaña patspa' o' huapore'tyeset enonet. ²⁴ Allempoñapa' añña ñeñt solltarnesha' pa'm'cha'tareterpa' o' abe'tatan Pablo o'pono. O'ch ashtet attotcha' a'meta'huan ñeñt atet o' p'ohua. Ñapa' mueneñ o'ch eñoch esocopte' nanac ama'to'chtenet ñocop. ²⁵ Allempoñapa' o' huanquët Pablo attoch ashtet. Huanca'huet Pabloñapa' otan capitán ñeñt tets allame'tets:

—Ta', ¿pocte't senteñ o'ch sashte' acheñ ñeñt romanona'tar, ñaña ama seño'teña' ñeñt atet pena? Ñoñets ñeñt atet anaret Romo'tpa' ta', ¿pocte'te'?

²⁶ Ñeñta e'm capitánpa' o' ahuo' allo'tsen pa'm'cha'tareterpa' atet otos:

—¿Erroñena't p̄octape'cheññañ añ acheñer? Añpa' romanona'tarca'ye.

²⁷ Añña ñeñt̄ solltarnesha' pa'm̄cha'tareterpa' o' huapapa' atet otosan Pablo:

—¿Po'ñocha't romanona'tarep̄?

Pabloñapa' o' anaḗ:

—Napa' ñeñfenca'ye.

²⁸ Ñeñt̄ña am̄cha'taretpa' alla oterranerr Pablo:

—Napa' o' netsa'ta shonte' quelle attoch a'punta'net attoch napa' romanona'tar pennet.

Pabloñapa' alla otererr:

—Napa' attoḗ ne'ñalleta, tarro'mar na nomporpa' romanona'tar.

²⁹ Añña solltarnesha' ñeñt̄ autsa ashtayen Pablopa', al-lorocmo' alla cheta'yerret a'yenet. Ñeñt̄ pa'm̄cha'tareterpa' ñapa'cho'ña cha yoren, tarro'mar o' chapoña pueyoḗhro o' huanca'huet acheñ ñeñt̄ romanona'tar.

Allempo eños Pablo allo'tsa'yen ñeñt̄ ḥocma a'pocatyene' ñoñets

³⁰ Tsapañña puetarenpa' añña am̄cha'taretpa' o' agotatan cornaneshas' ñeñt̄ pa'm̄cha'tareternesha' pen allohuen judionesha' po'cornaneshar, ñaña o' agotatan ñeñt̄ ḥocma a'pocatyene' ñoñets judioneshacop. Allempoña ap̄chetpa' o' pueyam̄peret Pablo allo huanquētpa' o' anmet allo'tsa'yen am̄cha'taretnesha'. O' chapachetpa' o' tomatoset e'ñe al-lame'tets. Añña am̄cha'tareḗ romanonesha'pa' mueneñ o'ch eñoch e'ñe po'ñoḗ escopte' otteñe'cheñ judionesha'.

23

¹ Pabloñapa' o' cohua'yesan allohuen ñeñt̄ ḥocma a'pocatyene' ñoñets. Allempoñapa' atet otanet:

—Masheñeshacha', napa' ḥocma nocrrena cohuen Yomporecop, ama't ahuatoteñ ama't ñaña teme'ttsen. Yomporpa' entennante' e'ñe cohuen neyoḗer.

² Añña cornesha' Ananías ñeñt̄ara ñeñt̄ nanac am̄cha'taretpa' atet otan ñeñt̄ tets e'ñe allame'tets Pableshe, atet otanet:

—Chosañaca'ye asnama'te'.

³ Allempoña Pablopa' otan am̄cha'tareḗ, atet och:

—Yomporpa' tsa'tatuerrpepa'ch, tarro'mar ama't p̄orrtenañ e'ñe cohuenpa' peyoḗhropa' ama masosyape. Ñaña ñeñto'marña anareteḗ p̄a arr attoch p̄apa' peñotaten ñato' ḥate' nepena ñeñt̄ ama p̄octeyaye ñeñt̄ atet oteney ñoñets ñeñt̄ atet anareḗ. Tarraña p̄añapa' o' at̄ta pasnama'taten. Tarraña ñeñt̄pa' ama p̄octeyaye ñeñt̄ atet oteney ñoñets ñeñt̄ atet anareḗ.

4 Añña ñeñt̄ tom̄cha'tets allame'tetspa' o' che'ptare'chet Pablopa' atet ochet:

—Papa' atarro't cohuen penteñña o'ch pesochatse'ch corne-sha' ñeñt̄ nanac añcha'taret̄ ñeñt̄ nen Yompor.

5 Pabloñapa' anapanetpa' atet otanet:

—Napa' ama masheñneshacha' neñoteñe añmapa' ñeñt̄te' cor-nesha' ñeñt̄ nanac añcha'taret̄. Ñerra'm neñoteñeñpa' amach nochñe atet, tarro'mar anaret̄ Yompor po'ñoño atet: “Ama asochatse'tpahuo acheñ ñeñt̄ añcha'taret̄tetsa socop.”

6 Allempoñapa' o' cotape'ch Pablo. Añña ñeñt̄ chocma a'pocatyene' ñoñets patantarrñapa' saduceonesha', po'potantañña' fariseonesha'. Allempoña Pablopa' o' eñoch atetpa' allempoñapa' o' eños huomencpa', atet otanet:

—Masheñneshacha', napa'cho'ña fariseoneshan. Natañneshañpa'cho'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantattereycha' esempohuañen.

7 Ñeñta otua Pablopa' allempoñapa' ama patrraye' cotape'cheto ñeñt̄ actape'chatañnesha'. Añña ñeñt̄ fariseonesha' ñetpa'cho'ña cotape'chet paterr, po'potantañña ñeñt̄ saduceonesha'pa', ñetpa'cho'ña o' cotape'chet po'poñ. Amaña patrraye' cotape'cheto. 8 Ama patrraye' cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'mllañoñeñer ñeñt̄ huetsa entot, ñaña ñetpa' otenet ama eñalle yecamquëñ. Tarraña fariseonesha' ñetpa' cotape'cheñet po'ñoçh ñerra'm yerromapa' yetanerrach. Ñaña ñetpa' otenet po'ñoçh eñall Yompor po'mllañoñeñer ñeñt̄ huetsa entot, ñaña po'ñoçh eñall yecamquëñ. 9 Allempoñapa' ñetañeño' nanac ama'tocht̄et. Atteñapa' puesheña'tets fariseonesha' ñeñt̄ nanac etsotene' ñoñets ñeñt̄ atet anaret̄ o' tomosetpa' eñososet Pablocop, atet otet:

—Añ acheñer yapa' ama yenteññañe erra'tsente'ña po'chñar. Po'ñoçhpa' ñato' orrtoña Yompor po'mllañoñeñer ñeñt̄ huetsa entot amapa' ñato' es ñeñt̄ camquëñets ñato' ñeñt̄ orrtenoya. Ñeñto'marña yapa' amachña cha yepatare'tatsche Yompor ñerra'm ñate' atet muenatene'.

10 Allempo nanac ama'tocht̄enetpa' añña solltarnesha' pa'm̄cha'tareterpa' o' cotape'ch, atet ot:

—Ñato' o'ch rraquët Pablo.

Ñeñto'mar o' chore'tan po'poñ solltarnesha' o'ch huapuet o'ch chetereta' Pablo allotpa' o'ch aneret pocollo all shontena solltarnesha'.

11 Tsapañña tsapopa' o' alla orrteññañerr Pablo Yepartse-shar, atet otos:

—Amach pellcatsto, tarro'mar Romopa'cho'ña all palltena o'ch pa'poton neñoñ atet o' pa'potuon arr Jerusaléño.

Allempo judionesha'pa' atarr o'pachet Pablo o'ch muetset

12 Tsapañña puetarenpa' añña judionesha'pa' atarr o'pachet Pablo ahuo'ch muetset. Ñetpa' o' a'pochtachet, atet otet:

—Yapa' amach yerroña' ñerra'm amach o' yemtso Pablo ñaña amach es yorro. Atteña ñerra'm amach attetopa' ama'tpa' esepa' yetantoya.

13 Ñeñña o'patenayapa' ñato' metente' pa'tatsoť charrasheña. 14 Allempoña o' a'pochtatueta' ahuanmuet ñaña allo'tsa'yen cornanesha' ñeñt pa'mcha'taretnesha' pen allohuen judionesha' po'cornaneshar ñaña allo'tsa'yen ñeñt pompornesha' penet. O' chapuet allpa' atet otoset:

—Yapa' o' ya'pochtatueta atet: Yapa' yoten ñerra'm amach o' yemtso Pablopa' amach yerro. O' ya'pochtata ñaña atet: Atteña ñerra'm amach attetopa' ama'tpa' esepa' yetantoya.

15 Alla oterreterr:

—Ñehua, te'pa' o'ch yotas ñeñtcha' atet sepa. O'ch soteña' ñaña ñeñt chocma a'pochtatyene' ñoñets allotpa' e'ne parrocmapa' o'ch semña ñoñets allo'tsen solltarnesha' pa'mcha'tareter, o'ch soch huapachetepa' Pablo sesho attoch o'ch señoñ este' o' pohua. Tarraña ama'tcha' atet seshcanetpa' yañapa' allo'tsa'yeneycha' toño attoch yapa' o'ch yerrmañ.

16 Añña Pablo pa'ñachorpa' o' e'mare'ch cha o'pateññañet pa'go'pa' o' ahuo' solltarnesha' pa'paclopa' o' otenana' pa'go' Pablo. 17 Allotña Pablopa' o' chore'tan puesheñarr capitán, atet och:

—Añ huepuesha'pa' o'ch panemñ allo'tsen pa'mcha'tareter tarro'mar ñapa' atarr mueneñ o'ch es a'metena'.

18 Capitánñapa' o'cho'ña anman huepuesha' allo'tsen pa'mcha'tareter. Allempoña chappa' atet otosan pa'mcha'tareter:

—Añ Pablo ñeñt ehuancaetpa' ahuo't chore'ten allotpa' oten ahuo'ch nanemñ añ huepuesha' pesho tarro'mar ñapa' nanac mueneñ o'ch es a'metena' pesho.

19 Añña añcha'taretpa' o' echa'nman huepuesha' pototpa' o' anemñ a'yenetpa' atet otos:

—Ñehua, o'ch poten este' pemnen o'ch poten.

20 Huepuesha'ñapa' atet och:

—Añña judionesha'pa' o' a'pochtachet attoch o'ch enamapet o'ch pemne Pablo tsapat allo'tsa'yen ñeñt chocma a'pochtatyene' ñoñets. Ñaña o'ch otapet añecpo'ch pemne

atto'ch eñochet e'ñe po'ñočh este' o' p̄ohua. ²¹ Tarraña amach p̄ame'ñatstaneto errotēncha' otospet tarro'mar metente' pa'tatsot čharrasheña judionesha' ñeñtcha' camroya toño ñeñtcha' rromapue' go'. Ñetpa' o' a'poc̄tchet amach rrerreto ñaña amach es orreto ñerra'm amo'ch muetseto go'. Ñaña o' a'poc̄tchet ñerra'm amo'ch attetopa' ama'tpa' esepa'to' tantahuet. Te'pa' aña palltetsa ñeñtcha' atet p̄otanet.

²² Anicha'tareñapa' atet otan huepuesha':

—Tarraña amach esesha' p̄otatsto p̄apa' o' p̄otuenna'.

Ñeñta otuepa' allempoñapa' o' mueñer.

Allempo čhapachet Pablo allo'tsen gobernador Félix

²³⁻²⁴ Allempoña anicha'taretpa' agotatan epsheña po'captáner. Allempoña o' čhapuetpa' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñt montenaya cahuall, allotpa' ñaña doscientos ñeñt orrene' muetsamets alloch quelaret. Allotpa' o'ch sanem pa'terr cahuall amapa' epa alloch monta'nma Pablo. Allotñapa' o'ch sahanma Cesareo attoch sečhapach cohuen Pablo allo'tsen gobernador Félix.

²⁵ Allotpa' quellcan ñaña carta ñeñtpa' atet ot: ²⁶ “Gobernador Félix ñeñtep̄ nanac cohuenep̄ anicha'tareť, na Claudio Lisiaspa' o'ch nehuom̄cha'tař añ necartoť. ²⁷ Añ yacmapa' ahuo't rromue' judionesha' o'ch muetsetañpa' nañapa' o' neñočh ñapa' romanona'tar. Nañapa' nehuapa epan nesolltarnesharpa' o' na'rroyatatos. ²⁸ Napa' nemneñ o'ch neñočh esocopte' nanac otteñe'cheñet, ñeñto'marña napa' o' nanem̄ allo'tsa'yen ñeñt čhocma a'poc̄tatyene' ñoñets ñeñt atet yečhenet ñet. ²⁹ Tarraña napa' neñotoñ ñeñtecop otteñe'cheñet, tarro'mar ñetpa' otenet ama atteye' peno atet anaretet ñocpuet. Ñeñtecpaña otteñe'cheñet tarraña ama añecpayaye attoch o'ch yemtsach amapa' o'ch yeyottam̄psach. ³⁰ Allempoña napa' o' ne'mare'ch judionesha'pa' čha o'pateña o'ch muetset. Ñeñto'mar te'pa' o'ch nemñe pesho tayecma. Ñaña o' notueña ñeñt otteñe'chene' arppa', te'pa' a'meteñetepa' pesho esocopte' otteñe'cheñet. Te'pa' ñeñtach notap̄.” Allohua huañ po'carta.

³¹ Allempo atet otanet pa'm̄cha'tareterpa' añña solltarnesha'pa' e'ñe a'nahua anmet Pablo tsapocma. Allotñapa' o' čhapuet all anetso pa'so'cheñ Antípatris. ³² Tsapatña añña solltarnesha' ñeñt chope'chets pa'tcopa' allota puerračherret Antípatrisoť. Allotpa' aña anmue'ña Pablo Cesareohua ñeñt montetsa cahuallo. ³³ Allempoña čhapuet Cesareopa' o' aposet gobernador carta. Ñaña o' čhapachet Pablo e'ñe ñesho.

³⁴ Allempoña gobernadorpa' o' lleya'huan cartapa' a'p̄to'tan Pablo:

—¿Erra'tsena'tña anetsroṭ pehuapa?

Ñaña'pa' atet och:

—Arroṭ nehuapa Ciliciot.

Allempoña gobernadorpa' o' eñoch allot huapa
³⁵ allempoña'pa' otan Pablo:

—Te'pa' allach ya'poc̄tachña' ato't hua'cha'ta' ñeñṭ potteñe'chene'.

Allempoña'pa' o' mueñan po'solltarneshar cohuanṭp̄setepa' Pablo allara añcha'taret Herodes po'palaciopahuo.

24

Allempo judionesha'pa' otteñe'choset Pablo allo'tsen añcha'taret Félix

¹ Pa'mnarmatñoña'pa' huapa ñeñṭ pa'm'cha'tareter pen allohuen judionesha' po'cornaneshar, ñeñṭpa' añ pa'so'cheñ Ananías. O' huapa ñaña allponsheña ñeñṭ pompornesha' penet. Allotpa' huapa ñaña puesheñarr ñeñṭ pa'so'cheñ Tértulo ñeñṭpa' ñeñṭcha' eñosapretahuet. Allempoña huapuetpa' o' ahuanmuet allo'tsen gobernador attoch otteñe'choset Pablo. ² Allempoña'pa' huapachet ñaña Pablo'pa' o' chore'chet ñanom Tértulo attoch eños ñanom. Ñaña'pa' añe'ca eños attoch otteñe'chet Pablo. Ñanomp'a' o' eños e'ñe cohuen gobernadorocop ñeñṭ Félix, atet ot:

³—Pa gobernadoro, nanac cohuen yenteneṭ tarro'mar e'ñe p̄otot yocrrena e'ne cohuen ama eñalle attoch yeçllaranna'ta. Ñaña p̄apa' o' p̄a'poc̄tatony e'ñe cohuen ñeñṭ yepalltena arr yenyoy. Ñeñto'mar ya te'pa' yemneñ o'ch yeparasyoso't p̄ocop attoch chocma peyenpueney cohuen. ⁴ Te'pa' attoch amach alla nellaṭso eñosetspa' napa' nemneñ e'ñe pemorrenteño'ṭpa' o'ch pe'mñnoten mame' ñeñṭcha' notaṭ.

⁵ Yapa' yeñoteñ añ yacmapa' nanac atsrre'moçhtena, nanac moññe'tatyenana ora allohuen judionesha' atto te'pa' ama patrraye' cotape'cheneto. Ñaña añmapa' ñeñṭ pompor pen allohuen ñeñṭ cotene' poc̄taṭña ñeñṭ huapatsa Nazaretot. ⁶ Elloña te'pa' mueneñeñ o'ch a'sosyatuanenñ ñaña Parets pa'paquëll, tarraña yañapa' o' yerrmue'. Ñaña yapa' yemneñeñ o'ch ya'poc̄tacheñ atet anaret yocoppa' ⁷ tarraña o' huapa añcha'taret Lisias epuet po'solltarnesharpa' e'ñe po'huamencocma o' puerratanṭpenyeta'. ⁸ Allotña'pa' atet otey ñeñṭey otteñe'chene' yehuapuepa'to' pesho. Te'pa' pachña a'p̄to'tare'te' attoch peñoch p̄aña ora allohuen

attoŧ yotteñe'cheñ. Añpa' allohua atet eños Tértulo ñeñt eñosapretahuēt.

⁹ Judionesha'pa'cho'ña atet otet:

—Po'ñočha'ye atet.

¹⁰ Allempoña gobernadorpa' o' yochan Pablo attoch eños ñaña. Allempoña Pablopa' atet ot:

—Napa' e'ñe nocsheñesha' o'ch neños pesho e'ñe nocop, tarro'mar napa' neñoteneṗ o' shonte' char atto ṗa'mcha'tarettena arr yenyo. ¹¹ E'ñe taya o' met čharramat puechena epomuet atto o' nema'yochuena' Parets pa'paclo all Jerusaléño. Ama't esesha' ṗa'ṗto'tpa' atetcha' otapet. ¹² Tarraña allempo ñetpa' ama entneto o' esesha' notnare't, ñaña ama na'tsrre'močhtana'che acheñenesha'.

Ñaña ama na'tsrre'močto ama't Parets pa'paclo, ama't ñaña judionesha' po'prahuo, ñaña ama't all chopeñe'chyen acheñenesha'. ¹³ Ñeñto'marña te'pa' amate' erroten eñotatapeto añmapa' ñeñt e'ñe po'ñoč attota otteñe'chennet. ¹⁴ Napa' te'pa' añach na'meta' pesho, napa' name'ñena ñeñt e'ñe alloch yequeshperra. Po'ñoč napa' añ name'ñena ñeñtara Yompor ñeñt Po'yomporer pe't yatañneshañ. Ñaña añ name'ñena ora allohuen ñoñets ñeñt atet anaret judioneshacop. Ñaña añ name'ñena ñeñt atet quellquét ahuat ñeñt a'mtaye't Yompor po'ñoñ.

¹⁵ Ñaña napa' añ name'ñena ñeñt attoch esempohuañen Yomporpa' tantaterrancha' allohuen acheñ—ñeñt e'ñe cohuen acheñ ñaña ama't ñeñt ama cohuenayaye acheñ. Ñetpa'cho'ña ñeñtara ame'ñenet. ¹⁶ Ñeñto'marña napa' chocma nema'yochrena attoch Yomporpa' enten e'ñe cohuen, ñaña attoch acheñenesha'pa'cho'ña o'ch entennet e'ñe cohuen ñamet.

¹⁷ 'Napa' shonte' char chocma nechopeñen erraṗaren anetso'mar. Te'pa' o' taya nohuerra arr attoch napa'yesuer namo'tsesha' quelle ñeñt huocchañneshačno. Añ quellepa' ñeñtara apa'yesen ñeñt ame'ñenaya Yompor. Napa'cho'ña eñalleñ ñeñtcha' nepomañ Yomporecop.

¹⁸ O' taya čhampochañ allempoch o'ch na'cohuentatuañ Yomporecoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye acheñ ñeñto'mar ama tama esesha' ama'točtetso. ¹⁹ Tarraña e'ñe allempopa' o' čhača't ñaña judionesha' ñeñt huačhetsa Asioť. Ta', te'ñapa' eso'marte'ña ama ñetaye'ña huapatseto arr attoch ñerra'm po'ñoč mueneñet o'ch otteñe'chnet na. ²⁰ Tarraña te'pa' ama huapueto ñetpa' ñehua, te'pa' otetepa' ñeñt huača'tatsa te'. A'metetepa' ñerra'm po'ñočte' este' nepanta' allempo natomos allo'tsa'yen

ñeñt̃ chocma a'pocatyene' ñoñets. ²¹ Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetanerrach esempo. Ñehua, ñato' ñeñtecpate' otteñe'chennetña te'.

²² Ñeñta otua Pablopa' añña Félixpa' ama mueno o'ch alla serrpare'terreterr, tarro'mar ñapa' o' eñotmoch atet ame'ñena ñeñt̃ cotene' Cristo. Ñeñto'marña atet otanet:

—Ñehua, te'pa' ñeñtach yot. EsemPOCHña huapa ñaña añcha'taret Lisiaspa' allempochña ya'pocata ñoñets.

²³ Allempoña atet oterran po'cap'táner:

—Te'pa' allach secuan'pererr Pablo. Amach tama sa'montsatsche. Ñaña chocmach semnach ñeñt̃ yemtenaya o'ch es aḗ ñeñt̃ palltena.

²⁴ Allponmaterrerrpa' o' huerra Félix Cesareo epuet puetapor ñeñt̃ pa'so'cheñ Drusila, ñeñtpa' judionesha'. O'ña cherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo errotente' ame'ñenana Jesucristo.

²⁵ Allempoña chap Pablopa' o' serrpare'tatanet cohuen ñeñt̃ atet yepena ya ñeñtey ame'ñetsa. Ñaña atet otanet añcha' yema'yochra attoch e'ñe pocte' es yeḗa'yen, ñaña amach yeḗpatsto ñeñt̃ ama cohuenayaye tarro'mar Yomporpa' tsa'tatuerryach allempoch acerrran allohuen acheñenesha'. Ñeñta otua Pablopa' añña Félixpa' cha yoren. Allempopa' alla oter:

—Te'pa' orrerreḗ, esempochña e'ñe pocta'huerrnanerrpa' o'ch alla neçhore'taterrper.

²⁶ Félixña'p' atta cohuan Pablo ñato' o'ch aḗ quelle añecop attoch a'rroyer. Ñeñto'mar errotenopa' o'ch cho'ña agotach attoch serrpare'tet epuet. ²⁷ Atteña'p' o' met epa charpa' o' canyerra gobernador, huapa po'psheñeñ añcha'taret añ pa'so'cheñ Porcio Festo. Ñaña'p' nanac mueneñ o'ch coshatan judionesha' ñeñto'marña ama a'rroyerrano Pablo, atet ot:

—Allepa' preso.

25

Allempo chapachet Pablo allo'tsen añcha'taret Festo

¹ Allempoña añcha'tareḗta Festo all Cesareopa' poma'pamtañoñapa' o' ahuo' Jerusaléno. ² O' chap Jerusaléno'p' añña cornanesha' ñeñt̃ nanac añcha'tareḗnesha' ñaña epuet ñeñt̃ nanac sherbets judioneshacoppa', o' serrpare'tatapet Festo atto otteñe'cheñet Pablo. ³ Ñetpa' atet ochet Festo agotatanepa'to' Pablo attoch

huapa Jerusaléño, tarro'mar ñetpa' ahuañacma a'pocstatuet o'ch cohuet Pablo toño attoch muetsapueret all. ⁴ Festoñapa' atet otanet:

—Pablopa' allo'tsena all yottamñeñet Cesareo. Napa' o' nesecherra o'ch ahuerren Cesareo. Ñato' e'ñech na'llponmatena o'ch ahuerren. ⁵ Te'pa' ñeñt nanac añcha'tarettetsa socoppa' co'a'nerrnetepa' allochñapa' otteñe'cheñetepa' Pablo all, ñerra'm po'ñochte' eñall alloch otteñe'chet.

⁶ Festoñapa' alla a'pa Jerusaléño allponmat. Ñato' po'psocmatño amapa' po'charramatño'pa' o' ahuerren Cesareo. Cherr Cesareopa' tsapatña e'ñe ahuatecmapa' o' anorros allecma a'pocstatenet ñoñets. Alloña agotatan Pablo. ⁷ Allempoña huapachet Pablopa', añña judionesha' ñeñt hua'cha'tatsa allpa' cha arrotamñesyet. Allempoñapa' otteñe'choset. Shonte' esocmañen nanac sosey toma'tamñesyesoset Pablo, tarraña ama errotenot eñotacheto añcha'taret Festo attoch otoset e'ñe po'ño'ch. ⁸ Pabloñapa' o' eños ñaña ñocop atet ot:

—Napa' ama cho nachmāre'teno ñoñets ñeñt atet anaret judioneshacop. Ñaña napa' ama cho na'sosyateññañe Parets pa'paquell. Ñaña napa' ama cho natpare'teno ñoñets ñeñt nen añcha'taret Romot.

⁹ Tarraña Festopa' nanac mueneñ o'ch coshatan judionesha', ñeñto'marña otan Pablo:

—¿Pocte't penteñ o'ch ahuep Jerusaléño allñapa' allcha' nentonap atto po'ñochte' alloch otteñe'chapet?

¹⁰⁻¹¹ Pabloñapa' alla anapuererr, atet ot:

—Napa' añña pocte' nenten o'ch a'pocstaton añcha'taret ñoñets ñeñt romo'marnesha', tarro'mar amate' errotenot neto Jerusaléño, tarro'mar ama errot nepeñeña judionesha', ama't papa' peñotueñ. Ñeñto'mar aña pocte' nenten o'ch a'pocstaton añcha'taret ñoñets ñeñt romo'marnesha'. Te'pa' arro'tsenen pesho ñeñtep eñets epap añcha'taret romo'marnesha' ñeñt pocte' nenten na, ñach a'pocstateña ñoñets nocop. Tarraña ñerra'm po'ñochte' añ o' ne'pohua ñeñt ama pocteyaye amapa' atet ñerra'm alloch muetsanet ñeñtpa' e'ñe pocte' muetsanetepa'. Tarro'mar ama nemno o'ch na'qeshpata nañeña. Tarraña ñerra'm e'ñe attotapa' ama pocteyaye o'ch pepomuen judioneshesho. Ñeñto'mar napa' nemneñ o'ch a'pocstaton añcha'taret ñoñets ñeñt romo'marnesha' e'ñe ñapueñ.

¹² Allempoña Festopa' o' serrpare'tet epuet ñeñt parro cotape'chatannenet. Allempoñapa' atet otan Pablo:

—Te'pa' nanac añcha'taretesho pesechenapa' ama'tpa' allcha'ca'ye peta.

Atto eños Pablo allempo huapa añcha'taret Agripa

¹³ O' allponmaterrerra' huapa añcha'taret Agripa epuet po'ch Berenice. O' chapuet Cesareo all emo'teñeta' añcha'taret Festo. ¹⁴ O' allponmatosetpa' allempoña Festopa' serrpare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeñt na'nom Félix ahuaña all yottampeñet. ¹⁵ Allempoña napa' Jerusaléño'tsenenpa', añña cornaneshá' ñeñt pa'mcha'tareternesha' pen allohuen judionesha' po'cornaneshar, ñaña po'potantañ ñeñt pompornesha' penet, ñetñapa' o' serrpare'tatnet atto otteñe'cheñet Pablo, ñaña otnet napa' nemtsachepa'to' Pablo. ¹⁶ Nañapa' atet notanet: “Ñeñt ñoñets anaret Romotpa' ama pocteyaye o'ch yemtsach acheñ ñerra'm ama eñorena' e'ñe ñocop attoch eñotatanet atto otteñe'cheñet.” ¹⁷ Ñeñto'marña allempo huacha'ta judionesha' nesho, allempoña na tsapañña' o' nanorros allecma ya'poclatan ñoñets. Allempoña napa' o' nagotach Pablo. ¹⁸ Añña ñeñt huacha'tatsapa' allenta tomcha'toset attoch o'ch alla otteñe'chueñeterr Pablo, tarraña amaña añeye' a'meta'yeseto atto ñeñt poctetsa o'ch yemtsach acheñ. ¹⁹ Aña a'meta'yeset ñeñt e'ñe ñocpueta atet yechenet ñet judioneshet. Ñaña aña a'meta'yeset ñeñt poctañña puesheñarr ñeñt pa'so'cheñ Jesús, tarraña ñeñtpa' o' rroma, tarraña Pablopa' cha oten ñeñtpa' o' tanterra. ²⁰ Ñeñto'marña napa' ama tama neñoche attoch na'pocstat ñoñets ñocpuet. Ñeñto'marña atet noch Pablo po'tomña: “¿Pocte'te' penteñ o'ch ahuep Jerusaléño allcha' ya'poctatena' ñoñets?” ²¹ Tarraña Pablopa' ama mueno. Ñapa' aña muena' allach arr, allotcha'ña esempopa' entateñetepa'to' añcha'taret Augusto all Romo. Ñeñto'marña napa' not: “Te'pa' allepa' arrma, esempochña napa' o'ch nemñe añcha'taretesho Romo.”

²² Allempoña añcha'taret Agripapa' atet otan Festo:

—Napa' atarr nemneñ o'ch ne'm ñaña erro'tente' serrpare'ten Pablo.

Allempoña Festopa' atet och:

—Tsapañña'ña pe'mñota'mueñ.

²³ Tsapañña' huapa'muena añcha'taret Agripa epuet ñaña po'ch Berenice. Ñetñapa' cha cohuenetyesoset. Allempoñapa' be'toscha'toset allecma serrpare'tatannena añcha'taretnesha'. O' be'toscha'tet epuet ñaña solltarnesha' pa'mcha'tareternesha' ñaña po'poñechno acheñenesha' ñeñt nanac sherbets all anetso. Allempoña Festopa'

o' agotatenanerr Pablo. ²⁴ Allempoña huapa Pablopa' Festoñapa' eñoratsapa' atet ot:

—Amicha'tarete Agripa, ñaña allohuenes ñeñtes arro'tsa'yenes: Te'pa' o' sentue añ yacma ñeñ nanac e'moñe'ten allohuen judionesha'. Ñetpa' o' otteñe'chuet e'ñe nesho allempo Jerusaléño'tsenen ñaña arrpa' o' otteñe'chueñeta' allempo ne'cherr ñaña arr. Ama't arrpa' o' che'chame'tueñeta', atet otyeset: “Chosa muetse', tarro'mar añ acheñerpa' ama pocteyaye o'ch alla corra.” ²⁵ Tarraña allempoña napa' na'p'to'tare'chpa' ama nentoñeña ñeñ atto pocte' o'ch nemtsach. Ñaña e'ñe ña muenats o'ch entateñeta' amicha'tarete Augusto all Romo ñeñto'marña napa' pocte' nenteñ o'ch nemñe all. ²⁶ Tarraña napa' ama neñoteñe ñeñtcha' atet nequellcoñ ya'micha'tareter ñocop tarro'mar ama eñalle errotentcha' yotteñe'cheñ. Ñeñto'marña te'pa' o' ne'chore'tach arr all seshontena te'.

Allotña Festopa' atet otan amicha'tarete Agripa:

—Te'pa' pach ñanom a'p'to'tare'te' attoch napa' o'ch neñoch errotentcha' nequellca' carta amicha'taretecop. ²⁷ Napa' noctape'cheñ ama pocteyaye o'ch yemñe acheñ ehuanca'ret ñerra'm ama eñalle errotent o'ch yotteñe'cheñ.

26

¹ Allempoña amicha'tarete Agripapa' atet otan Pablo:

—Ñehua, te'pa' pocte' nenteñ o'ch peños pñaña p'ocop.

Allempoña Pablo e'ñe puehuomicha'teño'pa' o' echantan pot, allempoñapa' eños ñocop, atet ot:

² —Te'pa' nocshena amicha'tarete Agripa tarro'mar eñall attotcha' neños pesho nocop, añecop tarro'mar cha otteñe'chenen judionesha'. ³ Napa' nocshena tarro'mar te'pa' o' peñoch pñaña atet yeychena ya ñeñtey judioneshay. Ñaña o' peñoch attot ama patrraye' yoctape'chyeno. Ñeñto'marña te'pa' o'ch nenamañ attoch pe'mñoten cohuen.

Atet atarr cotape'che't Pablo allempo ama ame'ñerra'

⁴ 'Allohuen judionesha'pa' eñotuennet atet nocre't ahuat, ama't allempoteñ ne'ñalleta nenyoy, ñaña ama't allempo cheshenna' allempo yeyche't Jerusaléño epan namo'tsna'tarnesha'. ⁵ Ama't ahuatoteñpa' eñotuanete't napa' fariseoneshan ñeñtara ñeñ nanac etsotene' cotapñats nanac echarr allo yoctape'chen Partsocop. Ñeñt atet entnete't atet nocre'tpa', atetcha'ñacho' a'meta'netañ. ⁶ Ñeñto'mar te'pa' arro'tsenen attoch sa'p'to'tare'ten, atto napa' name'ñena ñerra'm yerromapa' Yomporpa' tantaterreycha' esempohuañen. Añmapa' ñeñtara atet otane't ahuat Yompor

yatañneshañ. ⁷ Ama't çharrasheña puechena epa ñeñtara ñeñt yatañneshañ yepen ñeñt chemere'tyesahuetpa', ñeñtña po'mrenñetpa' e'ñe ame'ña'huenet ñeñt atet o' notuas. Ñeñto'marña ñet te'pa' nanac ma'yoçhrenet Yomporecop—yeto ama't ñaña tsapo. Tarraña ama't atet penetañ allohuen judionesha'pa' te'ñapa' e'moñe'tennet ama't napa' ñeñtara name'ñena atet ame'ñenet ñamet. Attoñña añcha'tarete Agripa otteñe'chennetña te'. ⁸ ¿Eso'marte' sapa' soten amach errotenot tantaterrano Yompor arromñañnesha'?

Atto Pablopa' atarr mueroçhtatane't ñeñt ame'ñenaya Cristo

⁹ 'Napa'çho'ña ahuañmo'chapa' notenapañ ñato' ñeñtfe' poctetsa o'ch yemueroçhtach ñeñt cotene' Jesús pocta'ña ñeñtara Jesús ñeñt nazareto'marnesha'. ¹⁰ Ñeñto'marña napa' nanac nemueroçhtatyese't acheñ Jerusaléno ñeñt ame'ñaye't Jesús pocta'ña. Shonte' acheñ ñeñt nabe'tate't cárcelo, tarro'mar cornanesha' ñeñt pa'mcha'tareternesha' pen allohuen judionesha' po'cornaneshar, ñetñapa' o' apnet orden ñeñtecop. Ñaña allempo otyese't añcha'taretnesha' ahuo'ch muetsachet ñeñt ame'ñenaya Jesús pocta'ñapa', napa'çho'ña o'chçho' not, pocte'ñaçho' muetsetepa'. ¹¹ Chocma nemueroçhtatanete't ama't judionesha' po'prahuo'mar, ñaña nanaccha' nemne't o'ch nachm're'tach ñeñt ame'ñatse't. Nanac natsrre'mueño'tpa' noctare'tanete't erracmañen anetso'mar.

Allempo Pablopa' ello serrpare'taterraneterr atto ello cotape'cherran cohuen Yomporecop

(Hch. 9.1-19; 22.6-16)

¹² Alla o'terraneterr Pablo:

—Atteñapa' o'çho' ahuen ñaña Damasco. Allempopa' napa' nechen orden ñeñt apuen ñeñt pa'mcha'tareternesha' pen allohuen judionesha' po'cornaneshar. ¹³ Ñaña añcha'tarete te'pa' o'ch notap ñeñt atet norrtoya allempo. Allempoña o' yeçhapmoch Damasco allempopa' o' çhap pocto. Ñeñtña nanac poptetsa ento'tpa' machayo'tepa'tcha' çhoyo'tam'psapuen ama't ñeñt epan nesen. Atet poptenapa' metanenan atsne'. ¹⁴ Allempoña yapa' alla yerrmopra'yesa patso. Allempoña alla yerrmopra'yena patsopa', nañapa' o' ne'm ñoñets hebreyach'o ñeñt'pa' atet oten: “Eso'mare't Saule pemueroçhtatennañña ñeñt name'ñenaya. Añpa' pañeña mueroçhtatetsa. Tarro'mar cha pottena ñerra'mrrate' ashen ñeñt e'ñe patpare'teño't ñañeñachña atserrpatetsa.” Añpa' atet oten ñeñt norrtoya. ¹⁵ Nañapa' not: “¿Eshape'tña Ayochreshate eñets?” Ñaña' alla otrerrerr: “Napa' ñeñten Jesús en ñeñtara pemueroçhtaten. ¹⁶ Te'pa' petanterra alla, ñeñto'mar te'pa' o' norrta pesho attoch

o'ch nenaḗ ḗa, ḗach torratsa nocop, ḗaña ḗach a'pote' ḗeñt' o' pentua te' ḗaña ḗeñt'cha' neñotataḗ allempoch norrterrerr pesho. ¹⁷ Te'pa' o'ch nemñaḗ allo'tsa'yen ḗeñt' ama judioneshayayeto, tarraña napa' ḗhocmach necuamḗpsaḗ ḗerra'm esempo o'pataḗa judionesha' ḗaña ama't ḗeñt' ama judioneshayaye. ¹⁸ Tarro'marcha' nemñaḗ allo'tsa'yen ḗeñt' ama judioneshayayeña' allochña'pa' attoch peserrpare'tatuanet attoch ḗhapanet pueyoḗhro, attoch o'huañcha' chope'chet checmeto. Añcha'ña o'ch alla chope'cherret puetaro. ḗaña attoch o'huañcha' ahuamencat ḗanet oneñeḗ, añcha'ña ahuamencat penahuet Yompor. Allochña'pa' o'ch ame'ña'huerrnet na, allempoña'pa' neḗretna'huerranetcha' po'chñar, attoch o'ch parrocmatuerret e'ñe attecma atet ḗerra'm ḗeñt' o' na'cohuentatua."

Atto Pablopa' ama atpare'tenano ḗeñt' atet gateñ Partsessa' Jesús

¹⁹ Alla oterraneterr Pablo:

—ḗeñto'marña añcha'tarete Agripa te' napa' ama naḗpare'teñe Jesús ḗeñt'ara ḗeñt' norrtoya entot. ²⁰ ḗnanompa' o' neserrpare'tatanet Damasco attoch cotape'cherret ello cohuen Yomporecop. Allochña'pa' o'ch ḗa'yenet ḗeñt' cohuentetsa Yomporecop, attoch yeñoch po'ñoḗ o' cotape'cherret etserra. Attecma neserrpare'tatanet ama't Jerusaléño, ḗaña ora erracmañen Judeo'mar, ama't ḗaña allo'tsa'yen ḗeñt' ama judioneshayaye. ²¹ Attoña judionesha'pa' o' rroma'net Parets pa'paclo o'ch muetsanetañ. ²² Tarraña Yomporpa' ahuo't a'natna nanac atto teme'ttsen nocrena, attoch neserrpare'tach allohuen acheñenesha'—ama't ḗeñt' ama esoshe'mayaye, ḗaña ama't ḗeñt' añcha'taretnesha'. Tarraña ama aḗeye' neyḗchatenaneto ḗeñt' ama cohuenayaye. Añña attecma neyḗchatenanet atet serrpare'teḗ ama't ḗeñt' a'ñtayeḗ Yompor po'ñoñ ahuaḗ. ḗeñt'pa' ama't Moisés'pa' atet oteḗ ḗeñt'cha' atet perra esempo. ²³ ḗeñt'ara serrpare'tataneteḗ ahuo'ch huapa Cristo añ patsropa' nanaco'ch mueroḗchtachet, alloḗpa' ahuo'ch rroma, tarraña ñapa' tanerrach. Atto'chña tanterra ḗnanompa' o'ch a'puetarsamḗpsanet pueyoḗcher allohuen judionesha', ḗaña ama't po'poñeḗhno acheñ.

Allempo Pablopa' atarr mueneñ o'ch ame'ñatana añcha'taret Agripa

²⁴ Allempoña atet eñen Pablo ñocoppa', Festoña'pa' atet och e'ñe huomenco:

—Chate' Pablo pemospuena tarro'mar nanac es p̄octape'chenpa' ñato' ñeñite' o' mospaterreḡ.

²⁵ Pabloñapa' atet och:

—Ama Ayochreshate Festo čhoye' nemospueno. Añña nerrpare'tatenes ñeñt e'ñe po'ñočh. ²⁶ Ama't am̄cha'taret Agripapa' e'ñe eñotueñ atet noten. Ñeñto'marña te'pa' o' neyemcha ña tarro'mar napa' neñoteñ, ñapa' o' entuon ñeñt atet nepena, ñaña tarro'mar ama a'nahua es neḡa'yeno. ²⁷ Am̄cha'tarete Agripa, ḡapa' ¿ḡame'ñeña't ñeñt a'mitaye't ahuat Yompor po'ñoñ? Napa' neñoteneḡ ḡapa' ḡame'ñeña.

²⁸ Allempoña Agripapa' atet otan Pablo:

—Cha't ḡotenapañ tayecmapa' o'ch ḡame'ñatna Cristo.

²⁹ Pabloñapa' alla otererr: Ama't tayecma amapa' tsapatonetpa' napa' atarr nemneñ Yomporpa' o'ch ame'ñaterrḡa, ñaña ama't allohuenes ñeñtes ne'mñotene' te'. Atarr nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm na, sapa' amuepa'chña ehuancaḡeyayso.

³⁰ Allempoñapa' o' tom̄cha'terret allohuenet—am̄cha'taret Agripa, ñaña gobernador Festo, ñaña Berenice ñaña allohuen ñeñt allo'tsa'yen. ³¹ Allempoña ahuanerretpa' atet otanna'tyeset:

—Añ yacmapa' ama es peno attoch o'ch yemtsach amapa' attoch yemñe cárcelo.

³² Allempoña am̄cha'taret Agripa otan Festo:

—Amach ña muenetsñe o'ch a'pocatenana' ñoñets am̄cha'taretesho Romopa' yapa' o'te' ya'rroyereñ e'ñe tayecma.

27

Allempo anmet Pablo Romo

¹ Allempoña o' a'pocatauet o'ch mueñet Pablo anetso Romo allara Italiapa' o' anmet allo'tsen capitán ñeñt pa'so'cheñ Julio, ñeñt po'caḡtaner penet ñeñt emchorrenaya am̄cha'taret Augusto. Ñaña o' anmet po'poñečhno ñeñt ayottam̄ḡsaretečhno o' apueñeta' Julio, allñapa' ñach cohuanḡpesnomahuet. ² Allempopa' allo'tsen ñaña Aristarco ñeñt macedonio'marnesha' ñeñt huetsa Tesalónicoḡ. Ñeñtcha' parro yoc'ta'neñ Pablo.* Allempoñapa' o'cho' yebe'toscha't boto ñeñt huetsa anetsoḡ Adramitioḡ, ñeñtña botepa' o'ch etsotyesnoma allemeña sohua'puetso'mar ora Asio'mar. Allempoñapa' o'cho' ahuanḡḡsey boto. ³ Tsapañapa' arr yetsotosa all oteñet Sidóno. Allña capitán

* **27:2** Lucas ñeñt quellquē' añ ñoñets ñapa' cota'nman ñaña Pablo.

Juliopa' morrentnomana Pablo ñeñto'mar o' muenach o'ch emo'tnoman pamo'tsesha', ñeñt ye'cha'yetsa all Sidóno, attoch ñetpa' o'ch apapet Pablo ñeñt palltena. ⁴ Allempoña ahuanperryerra' nanac yorrnotampesnoma. Morra' ama muenaty'e o'ch yemet attoch o'ch ahuey e'ñe pa'charr all oñenet, ñeñto'marña yepotesampesuanma coñe't pats ñeñt pa'so'cheñ Chipre. Tarro'mar yepotesuanma attoch ñeñt patspa' o'ch a'npamsey mōrr. ⁵ Allempoñapa' arr yoñemuanom allame'tets Cilicio'mar, ñaña allame'tets Panfilio'mar. Allempoñapa' ye'chap ñaña Miro all yetsotosa, allara ñeñt pa'netser Licia.

⁶ Allña capitán Juliopa' entosan po'poñ bote ñeñt huetsa Alejandriot ñeñtcha' tatsa Italio. Ñaña allempopa' otey ahuo'ch ya'ta'cha't all. ⁷ Allempoña o' allponmat ahuanpsey e'ñe aco'papa' e'ñe yemuerochenño'a yemet ñaña Gnidot. Allo'pa'cho'ña ama muenaterryerro mōrr o'ch ahurryerr e'ñe pa'charr, ñeñto'marña yepotesampesuanerrerr coñe't pats ñeñt pa'so'cheñ Creta attoch ñeñt patspa' o'ch a'npamsey mōrr. Allña'pa' allpono'mar yoñom allecma etsotenet ñeñt pa'so'cheñ Salmón. ⁸ Yemuerochenño'a yemetua ñaña allot e'ñe aco'pa. Atteñapa' ye'chap ñaña all oteñet Cohuen Sohua'puetso. Allo'pa' e'ñe allame'ttsa anetso Lasea.

⁹ Yemuerochtame'teño'pa' o' ya'llponmatnom ñeñto'mar allempopa' o' chen allempo nanac añcha'no'chtana o'ch ahuanpsey sapo'mar. Ñaña o' met allempo anare't judione-shacop allempocma ahuantenet pa'chporrña Yomporecop, ñeñto'marña yapa' o' ye'noch o' chen allempo nanac orrnotena sapo'mar. Ñeñto'marña Pablo'pa' o' yerpatanet, ¹⁰ atet otanet: —Masheñeshacha', napa' noctape'chen arepoña es yehuapoya toño allempoch ahuanperryerr. Napa' noctape'cheñ ñato' o'ch yechencatsre'tnoma, ama't ñaña yebotepa' chach chenca; ama't yapa'cho'ña arepoña cha yechenca.

¹¹ Tarraña capitánña'pa' o' ame'ñenana atet otanet ñeñt maneja'nene' bote ñaña ñeñt atet otanet ñeñt pamo'mte' pen bote. Ama ame'ñyeto atet otanet Pablo. ¹² Ñaña all Sohua'puetso Cohuenpa', ama tama cohuenayaye o'ch allaya allempo chen orrnoteñtsopo. Ñaña allohuenetpa' o' e'ñe pocte' entuet o'ch ahuanperryerr allot. Arro'chña ye'chap sohua'puetso all oteñet Fenice, tarraña allara anetso Creta. O' sechet Sohua'puetso Feniceo tarro'mar allpa' ama tama orrnoteno. Allña'pa' allach ya'posa tarremphua o'ch metuen orrnoteñtsopo.

Allempo huomenquëshatampesnomuet sapo'mar

¹³ Allempoñapa' o' huapa mōrr po'pshemtañoť, tarraña ñeñťpa' mamesha mōrraren. Allempoñapa' otyeset:

—Te'pa' pocte' o'ch ahuerryerr.

Allempoñapa' o'cho' cheterret ñeñť rremuene' botepa' o'cho' ahuanperryerr. Alloťña' e'ñe to'pñã'so'mara yoñmañpes allara anetso Creta. ¹⁴ Tarraña e'ñe o'chtapa' ahuepa'tcha' huapa ñãña mōrr onnatot allente'tsen anets Creta. Allempoñapa' o'cho' yorrnotamñpesnoma nanac huomenc. ¹⁵ Botepa' ama eshcaye' to allenet anmanñpenyet allempoña ama errot yepepa' o' anmanñpsey orrno a'yenet. ¹⁶ Orrnoñapa' o' chapatey po'pshemtañoť allo'tsen coñe't rrochpe'chañ añ pa'so'cheñ Clauda. O' chapatey allotemta'n ama tama hueno mōrr. Allña e'ñe yemuerochenñoťa yechant noñť ñeñť cheta'nen atarr bote. Alloťpa' yesha'ch atarr boto. ¹⁷ Allempoña o' yesha'tua noñťpa' ñetñapa' huancatsetet atarr bote attoch amach tare'che orrno. Ñãña ñetpa' añ mecha'tet ñato' botepa' o'ch chap muelle'sato allo'tsen mueñ ñeñť ama echarroyaye ñeñť otenet Sirte. Ñeñťo'marña o' pueyhuet enot shetamuets ñeñť chope'chatene' bote attoch botepa' amach errenet to. ¹⁸ Allempoñapa' ahuepa'tcha' yorrnotamñpes nanac huomenc. Tsapaťña' chetanatet cargapa' saprochet sa'po. ¹⁹ Poma'pamtañoñapa' o' saprotet ñãña ñeñť allpon echyen bote. ²⁰ Allempopa' allponmat ama orrterro atsne' ama't ñãña rantochno, ama't mamesha. Nanac yorrnotamñpsa. Atteñapa' yot:

—Te'pa' amach erroťeno yequeshperro.

²¹ Ñãña allponmat ama es yerro. Allempoña Pablopa' tompa' ot:

—Ñerra'm amach masheñneshacha' satpa'noñe atet notaseñ, amach yonñe Cretot, te'pa' amate' es yeyore'tenayñe ñãña allempopa' amate' yechencatsre'tañe. ²² Tarraña te'pa' o'ch notas, amach sellcatsto tarro'mar yapa' yequeshpach allo-hueneý. Añachña chencatsre'tatsa bote. ²³ Napa' neñoteñ tarro'mar tsapopa' orrtona mellañoťeñ ñeñť huetsa Yompore-shot ñeñťara Yompor ñeñť puechemer nepene', ñãña ñeñťara ñocop netorrena. ²⁴ Ñeñť norrtoyapa' atet oten: “Amach Pablo pellcatsto tarro'mar pe'chapcha' allo'tsen añcha'taret all Romo. E'ñe potpa' Yomporpa' o'ch a'natana allohuen ñeñť epa' sechope'chamñpen boto.” ²⁵ Ñeñťo'marña notenes amach sellcatsto. Tarro'mar napa' neyemteña Yompor, ñerra'm erroten otenpa' atetcha' pa. ²⁶ Tarraña ama't atetpa' chocmach yepotamñpsa allempo o'ch ye'chapmoch patso. Añpa' allohua atet otanet Pablo.

²⁷ Allempoña o' met čharramat puechena pa'tatsmat, atfa yetañpena sa'po ñeñt otenet Adria. Allempopa'cho'ña yor-rnotañpesnoma. Allempo chap rroch tsapopa' añña ñeñt taruaset botopa' atet otet:

—Ñato' o' yečhapmoch allo'tsen pats.

²⁸ Allempoñapa' o' topaso'tet sa'p. Allempoñapa' ahuo't eñochet allo'tsen ma'poch čharra' puechena pechap metro. Allempoñapa' o'cho' ahuaryerr allpononetpa' allpa'cho'ña o'cho' topaso'tuereterr. Allñapa' otet allo'tsen epoch čharra' puechena cančherr metro. Allempoñapa' añ mecha'tet ſaye'to' yeto'mañpsa mapyo. ²⁹ Allempoñapa' o'cho' a'shore'tet puequë'nare'toť pa'tatsmaga ñeñtcha' rremue' bote. Allempoña a'shore'tuetpa' o' cohuet ato't puetarena'. ³⁰ Añña ñeñt taruaset botopa' a'suaterret e'ñe a'nahua noñt tarro'mar ñetpa' añ muenenet o'ch cačhpa'nmuet alla bote. Ama't ahuepa't a'suaterret noñtpa' ñetpa' čha ottenet ñerra'mrrate' po'poñ a'shore'tenet ñeñtcha' rromue' bote poñe'magoť. ³¹ Allempoña Pablopa' eñotanet atet cotape'chen ñeñt taruaset botopa' atet otan capitán ñaña po'poñečno solltarnesha' atet otanet:

—Ñerra'm ama alla a'pueto botopa' sapa' amate' errotenoť sequesherro ama't puesheñarroťesa.

³² Allempoña solltarnesha'pa' o' tsorrañpset noñt pochar attoch ahuo' a'yenet. ³³ E'ñe puetaresuanetsapa' añña Pablopa' atet otanet allohuenet:

—Te'pa o'ch serra'muen tarro'mar o' čharramat puechena pa'tatsmat sema'yochreñoť po'poñpa' ama semueno, ama es serreno. ³⁴ Ñeñto'marña o' nota'muenes serra'muen attoch čherr sehuamenc, tarro'mar amach eseshas chencatso, ama't puesheñarroťesa.

³⁵ Ñeñta otuanet o' chetan panpa' o' ma'yocha e'ñe alla all shontena acheñenesha'. Allotpa' shotan panpa' o' rre'. ³⁶ Allempoñapa' o' ye'chatanetpa' o' rret ñamet. ³⁷ Ñeñtey boto'tseney allohueneypa' allo'tsen doscientos setenta seis acheñenesha'. ³⁸ Allempoña ocha'huanet puerrarpa' alla saprotteneterr trigopo'r oño attoch o'huañcha' tama eñerra bote.

Allempo tarañpsanet sa'p po'bote

³⁹ Allempoña e'ñe puetaresuenpa' o' entet pats, tarraña ama puentareto ñeñt pats, tarraña allempo o' entet ñaña a'yohuen mueyapo's allñapa' a'yohuen ñaña pueme'tar. Allempoñapa' cotape'chetpa' otet:

—Ñato' yečhapcha' all allochñapa' allcha' yetsotosa cohuen.

⁴⁰ Alloitña'p' tsorro'tet ñaña ñeñt' rromuene' botepa' o' a'ypo'ña'nmet alla sa'po. Allempoñapa' o' pueyamperet allo huanquët ahuaña bote puepopa'. Allempoñapa' echantet ñaña poñe'magoť shetamuets attoch mörp'a' o'ch matatan bote. Allempoñapa' o'cho' ahuanpsey pueme'taronet. ⁴¹ Allempoñapa' o' chap bote all epchacra'stena sa'p all nanac epopa' rrochoñapa' cha muelle'sattena. Chap all botepa' cha ačhtosa poñe'magoť, ama erroť yepere. Arroťña puequë'nare'toť nanac emo'yarertena sa'p. Po'huamencpa' o' tarampsey yebote. ⁴² Allempoña solltarnesha'pa' mueneñ o'ch muetsanatuan ñeñt' ayottampsaret' taye'to' ñerra'm patetpa' ahuo'te' yetet. ⁴³ Tarraña capitánpa' nanac mueneñ o'ch a'quesp'atan Pablo ñeñto'marña ama muenataneto o'ch muetsanachet. Ateť otanet:

—Ñerra'm esesha'te' eñotene' patatsapa' o'ch sepaťa sanom attoch seřchata yomta'n. ⁴⁴ Alloitña'p' samã ñeñtes ama eñotenaye patatsapa' ñato' o'ch sanemyes tabla amapa' po'poñečno ñeñt' echyen bote, allochñapa' attoch seřchata samã.

Allempoñapa' o'cho' pechatuet allohuenet.

28

Allempo chapuet coñe't pats pa'so'cheñ Malta

¹ Allempoña o' yequesp'a'hua allohueneypa' allempoñapa' otyet añ coñe't patspa' año' pa'so'cheñ Malta. ² Añña acheñenesha' ñeñt' yečheta allpa' nanac muerapyet ñeñto'marña a'toronayet tso' allcha' yeshotosa, tarro'mar allempopa' cha huatena o' yesnate't. Tarraña e'ñe cohuen agapapuey allohuen acheñenesha'. ³ Pabloñapa' allenta tsella'tpechospa' o' a'tamo'ye' tso. Allempoñapa' machayota cha'nom shecheř e'ñe tsoť. Ahuo't atserr e'man tso'pa' o' cha'nompa', cha ačhan Pablo pototpa' alla a'sope'ch. ⁴ Acheñenesha' ñeñt' yečheta allpa' eñchet Pablo cha a'sope'cheñ shecheř pototpa' atet otanna'tyeset:

—Añ acheñpa' amtsañte'ca'ye ñeñto'mar te'pa' ama't o' quespa'hua sa'potpa' te'ña Yomporpa' o'ch tsa'tacha.

⁵ Tarraña Pablopa' pa'shque'cherra shecheřña'pa' o' shora'nerr tso, amaña erroťeye' pe ama't mamesha. ⁶ Allempoña acheñenesha'pa' atta cohueñet Pablo ñato' machayotach añecmuenta potpa' o'ch t'aco'ra rromue'. Allempoñapa' o' cohua'huet o'chet ama es atsoto, allempoñapa' o' cotape'cherret po'poñ, atet otet:

—Añpa' po'ñoč Paretste'.

⁷ Ñeñtña ane'tañtetsa allpa' añ pa'so'cheñ Publio. All yečhap yapa' allotpa' allame'ttsa all yečhena Publio,

allpa' allo'tsen po'patseñ. Ñapa' o' agapapuey e'ñe cohuen ñeñto'mar allpa' yema'pamuetnom pa'paclo. ⁸ E'ñe allempopa' añña Publio pomporpa' čha atsna'ten, nanac huoraten ñaña čha chemotse'ten, ama achñeno. Allempoña Pablopa' o' ahuo' o'ch enteña'. Allempoña čhap Pablopa' ñaña' ma'yocham'psosya. Allempoña Pablopa' o' a'plana'čpa' añña ñeñt atsna'tetspa' allenta correna. ⁹ Allempoña e'mare'ch allohuen acheñenesha' atet o' p'osa Pablopa' huapyesa acheñenesha' ñeñt atsna'tyets. Ñetpa'čho'ña e'ñe a'crratyesianet Pablo. ¹⁰ Ñeñto'marña acheñenesha'pa' shonte' regala'yesyet pa'namen. Ñaña allempo ahua'm'perryerr botopa' nonayet allpon ñeñt yepalltena.

¹¹ Allempoña o' met ma'p'ña arorrpa' o' alla ahua'm'perryerr po'pnañ boto. Ñeñtña botepa' ñeñt cohueñe' o'ch metuen allempo orrnoteñtsopoten. Añ botepa' ñeñt huapatsa ahuaña Alejandriot. Ñaña añ botepa' echenan poñe'magot acheñma't ñeñt epuesha' ñeñt toma'ntatenet po'yosret; ñeñt'pa' añ pa'so'cheñ Cástor; po'psheñeñpa' añ pa'so'cheñ Pólux. ¹² Allempopa' arr yetso'tnoma all oteñet Siracusa. Allña'pa' alla yema'pamuetnom. ¹³ Allotpa' allampaño'mara yoc'atopñe'ch pats, atteñapa' yečhap all oteñet Regio. Allpa'čho' all yetso'tnoma. Tsapa'tña'pa' o' m'orrarenerr mamesha'tets. M'orrpa' arro't huena yecha'ñeñta'not. Allempoña'pa' o'čho' alla ahua'm'penyerr. Allotña'pa' e'ñe puepomtañocma yečhap all oteñet Puteoli. Allpa' all yetso'tosa. ¹⁴ Allña'pa' yentos ñeñt ame'ñetsa. Ñetpa' a'patapyet all yečhenet, ñeñto'marña yapa' alla yecančherrmatnom ñesheto. Atto'tapa' o'čho' yeya'rrota ñaña Romo. ¹⁵ Añña ñeñt ame'ñetsa all Romopa' ahuo't e'mare'tyets o' yečhap allampaño'pa' allenta't onačha'tet o'ch poctapyet. Puesheña'tetspa' o' čhapuet all oteñet Foro ñeñtara Apio. Po'potantañña'pa' alla't čhapyeset rrocho all oteñet Ma'ppahua Pocoll. Allña'pa' all pocta'yets. Allña'pa' all entosanet Pablopa' nanac parasyoso'tan Yompor tarro'mar allempopa' nanac coshatapet Pablo. ¹⁶ Allempoña o' yečhap Romopa' atet otapet Pablo yečhosepa'to' ellonet, tarraña čhocma net solltar ñeñt'cha' cohua'm'pse'.

Allempo Pablopa' serrpare'tatosanet allempo čhap anetso Romo

¹⁷ Poma'pamtañoña'pa' añña ñeñt añcha'tarettetsa judione-shacop allpa' Pabloña'pa' agotatanet allohuenet. Allempoña o' e'ñe ap'čha'huetpa' Pabloña'pa' atet otanet:

—Masheñeshacha', ama't napa' ama erroť nepeñeña judionesha' ñaña ama čho nehuapore'tateno ñeñť atet yeche't yatañneshañpa' te'ña judionesha'pa' o' atta rroma'net all Jerusaléno, o' pomnet allo'tsen romanonesha'.
 18 Ñetpa' a'pťo'tare'tnet, tarraña amaña entoneto atto alloch muetsatnet, ñeñťo'mar ñetpa' mueneñetañ o'ch a'rroyernetañ. 19 Tarraña judionesha'pa' ama pocteye' eñcheto o'ch a'rroyernnet. Ñeñťo'marña napa' nesecha o'ch entatenneta' añcha'tareť arr Romo. Tarraña napa' ama čho notteñe'cheñe namo'tsna'tar. 20 Ñeñťo'marña te'pa' o' nagotatuas allochñapa' o'ch neserrpare'tatuas ñeñť atet pennet. Ñaña napa' name'ñena atto ñerra'm yerromapa' Yomporpa' o'ch tantaterrey esempohuañen. Ñeñťo'marña te'pa' o' sentuan napa' ehucareten, tarraña ama't allohuen judionesha'pa' attecma ame'ñenetañ.

21 Ñetñapa' atet ochet Pablo:

—Tarraña yapa' ama yaguëna' carta Judeoť ñeñť atet otenet p̄ocop. Ñaña ñeñť ame'ñetsa ama't huapyenet arrpa' ama esesha' erroť otetso p̄ocop ñeñť ama cohuenayaye. 22 Yapa' aña yeñoten po'ñočh čocma e'moñe'teñet erracmañen ñeñť cotene' Jesús poctap̄ña. Ñeñťo'marña yapa'čho'ña yemneñ te'pa' o'ch ye'mñotaṗ yaña errotente' p̄octape'chen ṗa.

23 Allempoñapa' a'poctachet allempoch huačha'tet allo'tsen Pablo allempo'ch serrpare'tatanet. Allempoña o' čhap allempoch huačha'tetpa' allempopa' shonte' ačeñ huačha'tatsa Pableshe. Allempoña Pablopa' e'ñe ellapen serrpare'tatahuet; a'poťanet atet pena Yompor po'cohuenña ñeñť atto ayochreshattena ña. Ñaña lleyatyesanet Moisés po'ñoñ all oten atetča' ṗa ñeñťča' Cristotats. Ñaña lleyatyesanet po'ñoñ ñeñť a'mťaye't ahuat Yompor po'ñoñ all oten ñaña atetča' ṗa ñeñťča' Cristotats. Ñapa' nanac mueneñ o'ch ame'ñatanet atto Jesúspa' po'ñočh ñeñť Cristotats. 24 E'ñe allempopa' ame'ña'yesyet puesheña'tets, tarraña po'potantañpa' ama es ame'ñatso. 25 Atteñapa' ñañeñeta achm̄are'tanna'tyeset. Allempo ahuanerrmochetpa' allempoña Pablopa' otanet:

—E'ñe po'ñočh atet ote't Isaiás ahuat allempo Parets Puecamquëñoťpa' otan satañneshañ:

26 O'ch soteña' judionesha' añ ñoñets: Ama'tča' čocma e'mñotenetpa' ama't ahuatapa' amach čapaneto pueyočhreto. Ñaña ama'tča' čho es entuetpa' amach čapaneto pueyočhreto.

27 Alloṭpa' o'ch sotenaneta', te'pa' pueyočhretopa' nanac echarretenet attoch amach es čhapanueto pueyočhreto. Te'pa' amach mueneto o'ch es e'mñotet taye'to' čhapanet pueyočhreto. Te'pa' amach mueneto o'ch es entet taye'to' čhapanet pueyočhreto. Attetach amach es coŧape'cherreto nocop ama't mamesha attoch na'qushpaterranet. Añpa' allohua atet ote't Isaiás ñeñt a'mtaye't Yompor po'ñoñ ahuat.

28 Allempopa' alla otterranelerr Pablo:

—Te'pa' o'ch neñotatas añ, tayoteñ Yompor po'ñoñpa' o'ch yeserrpare'tach po'poñ achen ñeñt ama judioneshayaye. Tarro'mar ñetpa' ñerra'm e'moñet Yompor po'ñoñpa' o'ch ame'ñet. E'ñe pame'ñeñoŧetpa' qeshperretcha'.

29 Ñeñta otuanet Pablopá' añña judionesha'pa' e'ñe pachmare'tanna'teñoŧetpa' o' ahuanerret.

30 E'ñe epa char all yečha Pablo Romo. Allpon pallta'yese'tpa' e'ñe tsa'tuauye't. Ñaña e'ñe cohuen agapyesane't ñeñt huapyestse't. 31 Ñaña e'ñe cohuen serrpare'tatanete't atet pena Yompor po'cohuenña atto ayochreshattena ña, ñaña yečhatanete't atet pena Yepartseshar Jesucristo. Tarro'mar allpa' ama esesha' epatare'taye'te. Allohua.

AÑ SAN PABLO PO' CARTA ÑEÑT QUELLCAN ROMO' MARNESHA' ROMANOS

Atto Pablo pa' quellcanet carta añecop ñeñt ame'ñetsa netso Romo

¹ Masheñeshacha' ñaña nochaneshacha' ñeñtes allohuenes yechetsa anetso ñeñt añ pa'so'cheñ Roma ñeñtes Yomporpa' ahuo't nanac muererrsa, attoña o' hua'ñerres attoch sapa'cho'ña o'ch e'ñe poctacma pueyochresha' perres. Na Pablon sequellquëne'ña añ carta, ñeñten nanac torretsa Jesucristocop tarro'mar ñeñtecopña llesenserrenña Yompor, nach ma'yochrerraya serrpare'tyene' añ cohuen ñoñets ñeñt huetsa Yomporeshot alloch po'ño'ch yequeshperra.

² Añ cohuen ñoñetspa' ñeñtara ñoñtsor ñeñt ama't ahua't Yomporpa' e'ñe eñotatuane't ñeñt a'mta'yese't po'ñoñ ñeñtcha' atet perrnay te' añeño. Ñeñto'marña ñetpa' quellca'yese't ñeñt atet otanete't Parets. ³ Ñaña añ cohuen ñoñets alloch yequeshperra, ñeñtpa' añ serrpare'ten Jesucristo ñeñt Puechemer pen Yompor. Tarraña allempo acheñetos arr patsropa' ñapa' e'ñe David po'mrenño' eñalleta, ñeñtara David ñeñt añcha'tarettatse't ahua't. ⁴ Tarraña Parets Puecamquëño'tpa' nanac ahua'mencat'tache't añecop ñeñt cohuenetyetsa Partsocop. Ñaña chemerrña allempo Pomporpa' ahuo't tantater po'rromño'tpa' allempoña e'ñe eñotuare'tta ñapa' po'ño'ch Yompor Puechemer ñeñtara Jesucristo ñeñt Yepartseshar yepen. ⁵ Ñaña yame'ñeño't ñeñtara Jesucristo, Pomporña e'ñe puemuereño'teypa' ahuo't apuey llesens, allochñapa' yach ame'ñatyenahuet ama't errañaren allohuen anetso'mar. Attochña e'ñe cosha'yeyññañet Yompor Puechemer. ⁶ Atet ñerra'm sa ñeñtes yechetsa Romo, sapa'cho'ña ahuo't sa'hua'ñare'tterra attoch soçter Jesucristo.

⁷ Te'pa' e'ñe nehuom'cha'teño'fes sa, napa' o'ch notas: Yomporepa'chña sebensare'tañpene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyo'chro allohuenes.

Atto Pablo pa' mueneñ o'ch emo'tenana' romo'marnesha'

⁸ Ñehua, e'ñe ñanompa' añcha' notas, e'ñe neyemteño't Jesucristopa' çhocma neparasyoso'teñ Yompor allohue-nacpas, tarro'mar ora allemeñ anetso'marpa' çhocma serrpare'tyenet atto sapa' ahuo' e'ñe cohuen same'ñena.

⁹ Yomporpa' e'ñe eñotenen, napa' čhocma nema'yochena socop. Ñaña añ Yomporpa' ñeñña nanac neshoben, e'ñe neyočhocmañen neserrpare'tateñoť po'ñoñ, ñeñť atet perrnay Jesucristo ñeñtara ñeñť Puechemer pen ña. ¹⁰ Napa' čhocma nenamueñ Yompor attoch ama't esempopa' o'ch nabčhensa' ñerra'm ñach muenats. ¹¹ Napa' atarr nemneñ o'ch nabčhensa', o'ch neyčhatensa' attoch Parets Puecamquëñoťpa' allote' sesen huomenctatsa ñocop. ¹² Ñehua, añ noten, e'ñe yame'ñeñoť parropa' e'ñe pocte' o'ch yeyčhatanna'ta ñeñť cohuentetsa Yomporecop attoch yeyenpanna e'ñe yame'ñeñoť Yompor.

¹³ Ñaña te'pa' o'ch masheñeshacha' ñaña nočhaneshacha' notas, ama't ahuañmo'choteñ nesechenañ o'ch nabčhensa' tarraña teme'ttsenpa' ama erroť nepeñe. Napa' añecop nesechena ñaña attoch seshopa'čho'ña o'te' name'ñateña' acheñenesha' atet nepa'yena po'poñ anetso'mar. ¹⁴ Tarro'mar ñeñť poctetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeñť nanac ayčhatarettetsa amapa' ñaña acheñenesha' ñeñť ama ayčhatareteyaye, ama't ñaña acheñenesha' ñeñť nanac es eñotenet amapa' ñaña ñeñť ama es eñotetso. ¹⁵ Ñeñto'marña e'ñe nocsheñeshocmañen nemneñ o'ch neserrpare'tatas samña añ cohuen ñoñets alloch yequeshperra ñeñtes yečhetsa anetso Romo.

E'ñe añ yame'ñeñoť ñeñť cohuen ñoñets, ñeñťpa' allochña Yomporpa' a'queshpaterrey

¹⁶ Tarro'mar napa' ama apenca'pahuoye' nenteno añ cohuen ñoñets atto Jesucristo roma yocop alloch yequeshperra, tarro'mar ñerra'm esesha' ame'ñenaya añ cohuen ñoñets, ñeñťpa' ñeñña Yompor po'huamenc alloch a'queshpaterrey allohueney ñeñtey ame'ñenaya ña, ñeñtey judioneshay e'ñe yanom allotpa' ñaña ñeñť ama judioneshayaye. ¹⁷ Ñaña añ ñeñtara cohuen ñoñetspa' eñotateney, e'ñe yeyemteñoťa Jesucristopa' Pomporñapa' e'ñech pocte' enteney, allochñapa' allo'nach yesen e'ñe yemtenaya ña. Tarro'mar añpa' ñeñtara anuaret ahuatoteñ e'ñe Yompor po'ñoño allohuenacpay, ñeñť otets atet: Ñeñtey ame'ñenaya Yomporpa' e'ñech pocte' entueney ñaña e'ñe yeyemteñoť ñapa' yañapa' corretsayach, ama't tayoten errponhuañen.

Atto allohuen acheñenesha' atpare'chete't Yompor

¹⁸ Tarro'mar yapa' yeñoteñ Yompor ñeñť pue'ntaño'tsen e'ñe po'yoročhenño'tsa'yena allohuen acheñenesha' ñeñť ama

pocteye' es peneto ñocop, ñeñt' sosya'tsañach eñotyenet. Ñaña e'ñe atet puep'atse'teñotetpa' ñeññaña ama muenatenahueto o'ch orrtanet Yompor po'cohuenña ñeñt' e'ñe po'ñoçh.

¹⁹ Ñehua, ama't sosya'tsañach eñotyenetpa' tarraña ñetpa' e'ñe eñotueñet ñaña atet penaña Yompor, tarro'mar ñapa' ñaña eñotatenahueto e'ñe pueyoçhreto ñeñt' atet penaña ña.

²⁰ Ama't yeñoteñ Yomporpa' ama entpahuoyaye tarraña yenteññañ pueyeçhcatarot po'partsoña ñaña allotña yenteññañña po'huomenc atarr. Ama't ahuatoteñ allempo e'ñe errete' yeçhcatene' pats, allotñaña yenteññañña po'ñoçh po'partsoteña ñeñt'ña' errponohuañen. Ñeñto'marña acheñenesha' ñeñt' yeçhene' sosya'tsañpa' amate' errotenot oteto amo' eñoteñetoña ñeñt' atet penaña Yompor po'partsoteña.

²¹ Ñaña ama't eñoteñetañ ñeñt' atet penaña Yomporpa' tarraña ama mecha'na'teñetoña Parets, ñaña ama coshateñeto ñeñt' ora añecop. Attoña o'huañcha' cotape'chenet ñeñt' sherbets Partsocop. Ñeñto'marña pueyoçhretopa' o'huañcha' eñoteñet ñeñt' cohuentetsa Yomporecop; atet ñerra'm pueyoçhretpa' nanac a'cheçmetam'psaret.

²² Ama't otenetañ atarro' es eñotenet, tarraña po'ñoçh ñetpa' ahuo'tatta allo'na otatsña'etnenet.

²³ O'huañcha' cosheñet ñeñt' po'ñoçh Parets ñeñt' ama arromña'eshayaye. Añachña e'ñe coshenet ñeñt' yeçhcatyenet ñet. Tarraña ñetpa' e'ñe arromña'otoa atet es yeçhcatyenet atet ñerra'm acheñma't ñaña otma't, ñaña po'yallopma't ñaña es berrma't. Ñetña'pa' ñeñt'ach e'ñe ma'yochyenet ñeñto'ña e'ñe po'yomporer penet.

Atto acheñenesha' allo'na senet muenatse'tyese' ñeñt' nanac sosey enten Yompor

²⁴⁻²⁵ Attoña o'huañcha' ame'ñeñet ñeñt' po'ñoçh Parets, añachña ame'ñenet ñeñt' ama po'ñoçhoyaye. O'huañcha' ma'yocheñet ñeñt' e'ñe Yompora', añachña ma'yocheññañet ñeñt' e'ñe ña pueyeçhcatuar. Ñaña o'huañcha' sherbeñet ñeñt' e'ñe Yompora', añachña sherbeññañet ñeñt' e'ñe ña pueyeçhcatar. Tarraña Yomporepa'chña ñapue't aye'choçhtatarettatsa tayoteñ ama't errponohuañen. Ñeñt'pa' attetepa'ch. Tarraña atto a'ypo'ñeñet Yomporpa' ñapa'cho'ña e'ñe pa'ypo'ñeñotanet ña'napa' ahuo't muenatyesanet o'ch allo'na senet muenatse'tyaset ñeñt' nanac sosey enten Yompor. Ñeñt' atto muenatse'tyenet atto o'ch agapannenet, ñeñt'otpa' nanaccha' apencoçhen yeçhenet.

²⁶ Ñeñto'marña Yompor e'ñe pa'ypo'ñeñotanetpa' ahuo't muenatanet o'ch allo'na senet muenatse'tyestset ñeñt' nanac apencoçhen enten ña. Attoña ama't coyanesha'pa' o'huañcha'

aguënan puerrollar atto ñeñt e'ñe pocte' atet anareteyeñ. Ñagattsetach muenannetset o'ch agapanna'tyenet ñeñt e'ñe parro pacmacmuet. Ama't ñeñtpa' ama atteye' anareteye. ²⁷ Ñaña ama't yacmapa' attecma ch penet. O'huañcha' aguënan puetapor atto ñeñt e'ñe pocte' atet anareteyeñ. Añachña atarr muenen o'ch aguënan pacma e'ñe ñagattsa pacmacma, ama't ñeñtpa' ama atteye' anareteye. Ñeñt atet p'annet yacma parro yacmacmapa' ñeñtpa' nanac apenco'chen enteñ Yompor. Ñañeñetach coñchatetset ñeñt atet p'atse'tyenet.

²⁸ Attoña ama't mamesha o'huañcha' mueneñet o'ch yerpa'pesyet Yompor. Ñeñto'marña Yomporña'pa' pa'ypo'ñeñoñanetpa' ahuo't muenatanet o'ch cotape'chatse'tyeset ñeñt ama pocteye' enteno ña. Añachña p'atse'tyenet ñeñt ama a'pahuoyaye. ²⁹ Añachña nenet pueyo'chreto ñeñt esocmañen ñeñt ama't mameshapa' ama pocteyaye ñeñtara pa'namen sosya'tsañe'chno. Ñeñtpa' añe'chno: agapanneñets ñeñt ama puerrollareyaye ñaña ñeñt ama puetaporeyaye, ñaña cotape'chatse'tyeñets ñeñt ama cohuenayaye, ñaña ye'chatse'tyeñets, ñaña ye'moñe'tanneño'tpa' o'ch erro't ye'poñ po'psheñeñ, ñaña yeye'chapreteño'tpa' o'ch ye'moñe'ch po'psheñeñ, ñaña muetsanna'teñets, eñoseñe'cheñets, ñaña shecanna'teñets, ñaña atsrre'mo'chen entanna'tueñets, ñaña a'metam'psare'tanna'teñets, ³⁰ ñaña sasare'tanna'teñets, ama't Yomporpa' ello e'moñe'teñet, ñaña ama't po'psheñeñpa' amach mecha'na'teñeto ama't mamesha, attachña e'ñe ñañeñapa' cohuen entetset, ello'pa' ommo'chenetcha'. Añach e'nyenet ñeñt ama cohuenayaye, attotcha'ña ama ame'ñeñeto ama't pomporet ama't ñaña pachoret. ³¹ Amach chenaneo pueyo'chreto ñeñt cohuentetsa Yomporecop, amach a'poc'atateneto po'ñoñ ñeñt atet otenet. Amach es amorrentenaye' enteneto ama't mamesha, amach es a'p'rentenaye' enteneto ama't mamesha, ñaña amach es amuerenaye' enteneto ama't memesha. ³² Ñeñt p'atse'tyetsa atetpa' ama't eñoteñetañ e'ñe Yomporesho't anaretetua ama't coñcheñets añecop ñeñt p'atse'tyetsa atetpa' tarraña ñetña'pa' ñeñtarach atet p'atse'tyesnenet. Ama't pamo'tseshetpa' ñerra'm e'ñe attecma p'ohuenet ñametpa' chemerrña allempopa' ñeñfach erronaye' coshapretannenet.

2

Atto ama't judionesha'pa'cho'ña atpare'toñete't Yompor po'ñoñ

¹ Ñeñto'mar te'pa' o'ch notas allohuenes ñeñtes judioneshas, ñato' sapa' çhate' sotenapañ sapa'çho'ña año'te' atteye' seyçheno sosya'tsañ atet pena po'potantañ. Tarraña amate' errotentof soto atet tarro'mar allohueneypa' e'ñe attecma yepena. Ñerra'm çha yoten po'psheñeñpa' ama cohuenayaye, tarraña atetpa' yañeña atet otetsa ama't erra'tsenoteya ñeñtey atet otets. ² Tarraña ama't atetpa' yeñoteñ Yomporpa' çhocmach tsa'taterrana allohuen ñeñt atet es p̄atse'tyets, errotench'a' e'ñe pocte' ent ña. ³ Sapa' çhate' sotenapañ saptate' atarr morrentensa Yompor, amachña tsa'taterrso sa, ama't sapa'çho'ña attecma se p̄atse'tyen sosya'tsañ ñeñt atet pena po'potantañ, tarraña sapa' çha sotenanet ñetpa' amo' cohuenayayeto. ⁴ Amapa' sapa' çhate' sotenapañ Yompor pueuereñoñ nanacpa' amach tsa'taterrso tarro'mar teme'ttsen ama errot penso, atta cohuenes. Ama't señoñe añecopña teme'ttsen muerensa Yompor attoch ellopa' o'ch e'ñe soctape'chuerr cohuen allohuenes. ⁵ Tarraña ñerra'm atta se'charrtena seyoçhro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney errotench'a' e'ñe pocte' entyesuerrey e'ñe puesheña'ttsoy. Allempoña allohuen acheñenesha'pa' o'ch e'ñe eñotueret ñeñtcha' e'ñe atet tsa'tatuerrya e'ñe puesheña'ttsoy, ñeñt'pa' e'ñech pocte'. ⁶ Ñaña tsa'tuerryach allohueney ñeñtey corra'yetsa arr patsro errotente' ye'pa'yena e'ñe ñocop. ⁷ Ñerra'm çhocma yoctape'chen e'ñe cohuen Yomporcop, ñaña ñerra'm çhocma yocteññañ po'cohuenña, ñaña ñerra'm añ ye'nen attoch ñapa' e'ñech cohuen entuerrey, ñaña attoch aphuerreycha' ñeñt alloch yocrrerra errponhuañen, allempoña po'ñoçhpa' aphuerreycha' attoch yapa' corretsayach yocsheñeshocmañen tayoten e'ñe errponañohuen. ⁸ Tarraña ñerra'm yapa' aña cohuen yenten ñeñt yemnen ya, Yomporña po'ñoñña' ñerra'm çha yatpare'teñ, aña yocten ñeñt ama cohuenayaye Yomporcoppa' ñaña po'yoroçhenñoñ po'ñoçhpa' çhocmach tsa'tatuerrya. ⁹ A'coñchatare'terrach allohuen ñeñt cotene' ñeñt ama cohuenayaye arr patsro, amuroçhtatare'tterretcha' allohuenet ñeñt atet petset, ama't ñanom atet ñerra'm judionesha' allotpa' ñaña ñeñt ama judioneshayaye. ¹⁰ Tarraña allohuen ñeñt cotene' ñeñt cohuentetsa Yomporcop arr patsropa' Yomporña' cohuencha' enterranet, aphuerranetcha' alloch e'ñe cohuentapreteret, aphuerranetcha' ñaña attoch cosha'huerret e'ñe cohuen pueyoçhreto. Atetcha' perran

allohuen ñeñt e'ñe cohuen corra'yetsa, ama't ñanom atet ñerra'm judionesha' allotpa' ñaña ñeñt ama judioneshayaye.

11 Tarro'mar Yomporpa' ama ñapfa judionesha' morrenteno, añña ñaña allohuen acheñenesha'pa' e'ñe morrentueña. Ñaña attecma Yomporpa' ama ñapfa coñchatenano ñeñt ama judioneshayaye, ñapa' ama't judionesha'pa' e'ñech coñchatuer. 12 Ama't atet ñerra'm ñeñt ama judioneshayaye ñeñt ama echenaye Moisés po'ñoñ, ñerra'm añ co'tenet ñeñt ama cohuenayayepa' elloña ñetpa' chenca'huerretcha', tarraña ñetpa' amach añeye' a'chencaterrahueto Moisés po'ñoñ. Tarraña judionesha'ñapa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt ama cohuenayaye, ñetpa' añachña a'chencaterrahueto ñeñtara Moisés po'ñoñ. 13 Tarro'mar Yomporpa' ama pocteye' entenano ñeñt atta e'muene' orrena po'ñoñ all serrpare'teññañet. Añña pocte' enten Yompor, o'ch atet penet ñeñt e'ñe atet oten po'ñoñ. 14 Ñehua, o'ch yoctape'ch ñeñt atet pena acheñenesha' ñeñt ama judioneshayaye, añenesha' ñeñt ama echenaye Yompor po'ñoñ. Ñetpa' ama't ama echeneto Yompor po'ñoñpa' errottenopa' e'ñe pueyoçhretoť poctape'cheñoïetpa' ahuo'tcha' atet pa'yenet ñeñt e'ñe cohuentetsa Yomporcop, ñeñt e'ñe atet o' anuaretetua Yompor po'ñoño ñeñt atet poctetsa ñocop. Ama't ama echeneto Yompor po'ñoñ ñeñt atet aquellcaretpa' tarraña pueyoçhretoñapa' e'ñe eñoteñet erra'tsente' ñeñt cohuentetsa. 15 Ñeñt atet pa'yene' ñeñt cohuentetsa, yapa' yeñoteñ pueyoçhretoña eñoteñet ñeñt atet cohuentetsa, ñeñtara ñeñt atet oten Yompor po'ñoñ ñeñt o' anaretetua. Ñehua, o'ch yetma'ntacha atet ñerra'mrrate' Yompor po'ñoñpa' e'ñech pueyoçhreto aquellcarettena. Tarro'mar e'ñe ñet pueyoçhretoťpa' eñotenet ñerra'm esempopa' o'ch pohuerret ñeñt ama cohuenayaye, ñaña eñotenet ñerra'm esempopa' o'ch atet penet ñaña ñeñt e'ñe cohuen. 16 Tarro'mar yeñoteñ esempohuañen Yomporpa' eñotatuerreycha' ñeñt ora allpon ya'nasotena te'. Yompor Puechemerña ñeñt Jesucristo ñach otats attoch tsa'tatya. Ñeñtpa' e'ñe atet ñeñt o' notuas ñeñtara noten allempo neserrpare'ten añ cohuen ñoñets alloch yequeshperra.

Atto judionesha' ama't echenetañ Yompor po'ñoñ patpare'teñoïetpa' nanac ayohuarettenet

17 Te'pa' o'ch alla neserrpare'taterrerr ñeñtes judioneshas. Ñehua, sapa' cha soten sapa' judioneshaso' ñaña aña atarr seyemtena ñeñt nonase't Moisés, ñaña atarr sommo'chena

tarro'mar sapa' soteneñ e'ño' puechemer penes Yompor.
 18 Ñaña soteneñ e'ño' señotueñ ñeñt atet muenen ña. Ñaña
 po'ñoñ ñeñt atet anaretpa' ñeñto'ña seychatene' ñeñt atarr
 cohuentetsa Yomporecop. 19 Ñeñto'marña sapa' soteneñ,
 po'ñoçh atarro' es señoten, attoch seychateñ po'potantañ
 ñeñt ama es eñoteneto. Cha sottena ñerra'm ñeñteso'
 echa'nene' ñeñt ama entetso, amapa' ñerra'm ñeñteso'
 çhoyo'tam'pene' ñeñt chopeñe'chets checmeto. 20 Ñaña
 sapa' çhate' sotenapañ po'ñoçh atarrte' cohuen seychateñ
 po'potantañ ñeñt ama eñotenaye ñeñt cohuentetsa, ñeñt atet
 petsa ñerra'mrrate' cheshatollesha' ñeñt ama eñotenana' ñeñt
 cohuentetsa. Ñaña sapa' soteneñ po'ñoçho' esocmañeno'
 señotuahuen, ora ama't allpon ñeñt po'ñoçhotets, tarro'mar
 sapa' secheññaño' Yompor po'ñoñ ñeñto'ña esocmañen
 señotatene'. 21 Ñehua, te'pa' o'ch notas, sapa' ama't o' atarr
 seychateñ po'potantañpa' tarraña amaña seychatenoña
 e'ñe sañeña ñeñt cohuentetsa Yomporecop. Ñaña sapa'
 ama't o' atarr seserrpare'ten atto ama etanna'tpahuo,
 tarraña sañapa' çhocma setanna'tyena. 22 Ñaña sapa' ama't
 seserrpareneñ atto amo' achtapretpahuo taporets, tarraña
 elloña sapa' çhocma sapretannena setapor. Ñaña sapa'
 ama't setsena'teneñ ñeñt ayeçhcataret, tarraña sañapa'
 ahuo't seyorayesña puerahuot ñeñt atarr coçhnesha'
 ñeñt allo arca'tam'penet ñeñt po'yoser penet. Ñeñt
 atet etetspa' ñeñtpa'çho'ña attecma enteñ Yompor ama
 a'papahuoyaye atet. 23 Ñaña sapa' nanac sommo'chena
 tarro'mar sapa' secheññaño' Yompor po'ñoñ ñeñt atet
 anaret ama't ahuatoteñ. Tarraña ama't atteñpa' amaña
 atteye'ña sepeno ñeñt atet oteney añ ñoñets ñeñt'cha' atet
 sepa. Yomporña'pa' çha sottatateñ ñerra'mrrate' ñapa' ama
 es eñotpeno ama't mamesha. 24 Ama't atet oten Yompor
 po'ñoñ ñeñt atet anuaret ahuatoteñ, ñeñtpa' atet oten: "Ama't
 ñeñt ama judioneshayayepa' achm'are'teñet Yompor e'ñe
 sesharrmorot, e'ñe se'patse'tyeño' ñeñt ama't mameshapa'
 ama pocteye' enteneto ama't ñame'ttseta."

Atto ñeñt po'ñoçh puechemer pen Yompor

25 Po'ñoçhña ñerra'm añ semnen o'ch setsoteññañ
 Moisés po'ñoñ ñeñt atet anuaretpa' añ poctetsañ o'ch
 setsorrannena, tarro'mar ñeñtpa' sherbeneñ. Tarraña
 ñerra'm elloña satpare'teññañ po'poñ Moisés po'ñoñ
 ñeñt atet oteney ñeñt'cha' atet ye'papa' ama't atto o'
 sa'tsorraretetuapa' ñeñtpa' e'ñe orrena, attecma ñerra'm
 ama atsorrareteyayye. 26 Ñeñto'marña yeñoteñ ñaña, ama't

ñeñt ama atsorrareteyayepa' ñerra'm añ atet penet ñeñt atet otene y Yompor po'ñoñoŋpa' ama't ama atsorrareteyayye, Yomporña'pa' atetcha' entene y ñerra'm e'ñe puechemer peney po'ñoçh. Attecmach entene y ñerra'mrrate' ñeñt atsorrareŋ, tarraña e'ñech puechemer perrey po'ñoçh. ²⁷ Ñeñto'marña yeñoteñ ama't ñeñt atŋ corretsa atet eñalleta, ama atsorrareteyaye, ñerra'm añ atet penet po'ñoçh ñeñt atet otene y Yompor po'ñoñoŋpa' ñetña'pa' pencaterrsetcha', tarro'mar ñetpa' ello metanennaset ñeñt allpon cohuen o' seŋohua Yomporecop. Tarro'mar sapa' satpare'teññañ po'ñoñ ñeñt atet anaret. Metanenset sa, ama't sapa' secheññañeñ Yompor po'ñoñ ahuatoteñ, ñaña ama't sapa' e'ñe atsorruareteseñ. ²⁸⁻²⁹ Ñeñt e'ñe po'ñoçh puechemer pen Yomporpa' ama ñapŋayaye ñeñt eñalletetsa judionesheshot. Añña po'ñoçh e'ñe puechemer pen ñeñt e'ñech cohuen cotape'chenet pueyoçhreto ñocop. Ñaña tsorranneñets e'ñe atŋ yechsopa' ama esoyaye Yomporecop. Añña sherbets Yomporecop atŋ cohuen es yoctape'chen e'ñe yeyoçhrot. Ñaña ñeñtŋpa' huena e'ñe Parets Puecamquëñoŋ, ama añoŋeye' hueno o'ch e'ñe yeŋa'yesua ñeñt aquellca'yesaret esheccha'ña puechemer perrey Yompor. Ñerra'm atetcha' yoctape'cherr cohuen yeyoçhro Yomporecoppa' attochña Yomporpa' e'ñech pocte' entuerrey, ama'tcha' acheñenesha'pa' ama pocteye' entenyeto.

3

¹ Te'ña sapa' çhate' sotenapañ judionesha'pa' amate' atarr sherbeno amapa' çhate' sotenapañ ñeñt atŋ tsorranenetpa' amate' es sherbeno. Tarraña ñeñtŋpa' ama atteyaye. Po'ñoçhca'ye atarr sherba'yen judionesha'. ² Ñehua, o'ch yot ñanome ñeñt atŋ sherbenet. Ñetña aparetet Yompor po'ñoñ ñanome atŋ ñetcha' a'potenet ñeñtara ñoñets. ³⁻⁴ Tarraña ama allohuenacmaye' ame'ñeneto ñeñt atet otene y Yompor po'ñoñoŋ. Tarraña ama't atet pohuanenetpa' amate' errotenot a'psateretoña Yompor ñeñt atet otene y po'ñoñoŋ, ama't mamesha. Ñapa' çhocmach a'poctatuonay po'ñoñ ñeñt atet o' otueney. Ama't allohuen erra'tsen acheñerpa' ama'tcha' ama a'poctatueneto ñeñt atet eñorenepa' tarraña señoche'pa'ch, Yompora e'ñe ñapŋa, ama puenesho po'ñoñ. Ama't atet otene y Yompor po'ñoñ ñeñt atet aquellca'huaret ahuatoteñ, ñeñtŋpa' all atet otene y:

Allohuen acheñenesha'pa' eñotetepa'ña atŋ Yomporpa' ama puenesho po'ñoñ, ñaña ñerra'm esesha' atŋ

otatse'tyets atto Yomporpa' año' pocteye' es peno,
tarraña eñochetepa'ña Yomporña e'ñe pocte' es pets.

⁵ Ñeñto'mar napa' o'ch notas, e'ñe ya yepeñoñ ñeñt ama
cohuenayaye, attoña yorrtateññañ Yompor ñapa' ñaña e'ñe
cohuenare' es pa'yets. Ñehua, ñerra'm yo'chñaroñ atet yeyen-
papreteñ Yompor orrtate' po'cohuenñapa' sañapa' çhate'
sotenapañ, Yomporpa' amate' pocteyayeña o'ch tsa'taterrya
yo'chñaro'mar. Ñehua, aña'p'atta notenes atet tarro'mar
ñeñtpa' atet eñosatse'tyen acheñenesha'. ⁶ Po'ñoçh yeñoteñ e'ñe
pocte' atetcha' tsa'taterrya Yompor. Tarro'mar ñerra'm ama
pocteyaye ñeñt atet pena Yomporpa' ñeñtepñapa' amate'çho'
erroteno eñoteñe ñaña atetcha' entyesuerrey allohueney es-
empohuañen.

⁷ Ñaña yaña ñerra'm esempo yeñosatse'tyen es ñeñt ama
attheyayepa' attoña yorrtateññañ Yompor ñapa' ñaña e'ñe
po'ñoçhare' ñeñt atet es otyen. Ama't e'ñe yeñosatse'teño'pa'
nanaccha' yecohuentateññañ Yompor. Ñehua, ñato' sapa'
çhate' atet soten, ñerra'm atet yeyenpapreteñ orrtate' Yompor
po'cohuenña, amate' pocteyayeña o'ch attera enteney
Yompor ñerra'm ñeñtey atarr sosey es pa'yets. ⁸ Sapa' aña
sotatse'tyen, ama'tpa' a'papo'ch ñeñt ama cohuentetsonña
allochñapa' e'ñe attotpa' o'ch yorrtaten ñeñt cohuentetsa.
Puesheña'tets acheñ e'ñe pueyllatate'teñme'chatset
neñoñpa' otyenet, ñeñtñaçho' atarr otenña Pablo. Tarraña
Yomporcha'ña tsa'taterrahuet ñeñt atet otatse'tyenet. Ñaña
ñeñtpa' e'ñe pocte' atsa'tataretterretepa'chña.

Atto allohueney ñeñtey acheñey çhocma ochña'ecmay

⁹ Ñehua, sapa' çhate' sotenapañ yapa' po'ñoçhte'
Yomporpa' enteney ñeñtey judioneshay e'ñe cohuenare'
es ye'pa'yen. Ñaña çhate' sotenapañ po'potantañ ñeñt ama
judioneshayayepa' ñetñapa' amo' attheye' entenaneto Yompor.
Tarraña ama't mameshapa' ama attheyaye. Tarro'mar napa' o'
neñotatuanmas atto ama't allohueney ñeñtey acheñey çhocma
ochña'ecmay ama't ñeñtey judioneshay. Ama't ñaña ñeñt
ama judioneshayayepa' e'ñe attecmay ochña'ecmay. ¹⁰ Ama't
Yompor po'ñoñ ñeñt atet aquellca'huaret ahuatoteñpa' e'ñe
attecma oteney, ñeñtpa' atet oten:

Ama't puesheñarroteyapa' ama eñallyeña ñeñtey e'ñe pocte'
pene' ñeñt poctetsa Yomporecop.

¹¹ Ñaña ama't puesheñarroteya ama çhennayo yeyoçhro
attoch yeñotoñ Yompor po'cohuenña. Amachña
añeye' ye'nen ñeñt atet muenen Yompor, ama't
puesheñarroteya.

- 12 Ama't allohueney ahuo't yesa'nenñ Yompör, ama't mamesha o'huañ yesherbã' ñocöp, ama't allohueney. Ama't puesheñarrotëya ama eñallyeña ñeñtey e'ñe cohuen es pets Yompörecöp.
- 13 Atto e'ñe ya yeñosatse'teñoť sosya'tsañečno yeñyapñapa' čha ottena ñerra'mrrate' apampaña ñeñť atorañpsaret. Atto yeñen yenamoťpa' nanaccha' yeshcannena. Atto yeshquëñ yamo'ts yenamoťpa' čhach yottena ñerra'mrrate' shecheř amtsañeř atserr yepene' puenamoť.
- 14 Ñaña ñetpa' añach eñotenet parrnomarña, ñaña čhach chemama'tannenet.
- 15 Ñaña pa'tsrre'mueñoťetpa' machayotach muetseñet acheñ.
- 16 Pottatse'teñoťetpa' čhach nanac mueročhtatyënet acheñenesha', nanaccha' llecatyënet.
- 17 Ama't ahuatoteñpa' ama añeye' yečheneto attoch e'ñe muetsoññoťpa' cohuen yemtannenet.
- 18 Ñaña ama't mameshapa' amach amčha'na'tpahuoye' enteñeto Yompör. Arrpa' allohua ñeñť notenes e'ñe Yompör po'ñoňoť ñeñť atet aquellca'huaret ahuatoteñ.
- 19 Ñaña yapa' yeñoteñ ñeñť atet otyen Yompör po'ñoň ñeñť aquellca'huaret ahuatoteñpa' añecöpña oten ñeñť eche'ne' po'ñoň, amaña añecpayaye ñeñť ama echaye'te po'ñoň allempo. (Atet ñerra'm judionesha'pa' ama't ahuatoteñ echeññañet Yompör po'ñoň, ñeñťara ñoñets ñeñť o' notuanmas ñorra' arr.) Ñeñťo'marña ama't puesheñarrotësa sa ama't ñeñtes judioneshaspa' amate' errotenoť soto, sapa' e'ño' cohuen entenes Yompör. Attoña yeñoteñ ama't allohueney ñeñtey corretsa añe patsropa' ama pocteye' entenye Yompör ñeñť atet yeřa'yena. ²⁰ Tarro'mar yeñoteñ e'ñe yetsotateñoťa añ ñoñets ñeñť atet anaret ahuatoteñpa' amach errotenoť ama't puesheñarrotëya e'ñe ya'poctatoña yañeña attoch e'ñe pocte' enteney Yompör. Añecpaña sherbeney añ ñoñets ñeñť atet anaret, ñeñťcha' yeñotatene' po'ñočh yapa' nanac ochñať enteney Yompör.

Atto Yompörpa' e'ñech pocte' entueney, e'ñe yeyemteñoťa Jesucristo

²¹ Tarraña te'ña Yompörpa' o' eñotatey atto ellonetpa' eñall po'poñ attoch pocte' entueney Yompör, ñeñťpa' ama añeyaye o'ch yetsotatuena ora ñoñets ñeñť atet anaret ahuatoteñ. Tarraña Yompör po'ñoň ñeñť anuaret ama't ahuatoteñpa' ñeñťarecpa eñen añecöp. ²² Attochña Yompörpa' e'ñech pocte' entenanet ama't allohuen erra'tsencha' yemtenaya Puechemer ñeñťara Jesucristo. Ama't allohueney

attecmach e'ñe pocte' entueneý, e'ñe yeyemteñoña Jesucristo. ²³ Tarro'mar allohueney attecmay e'ñe yo'chña'tuen. Ama yetso'teññañe Yompor po'cohuenña ñeñt e'ñe atet muenen ña. ²⁴ Ñeñt attoch e'ñe pocte' enteneý Yomporpa' ñeñtpa' atet: E'ñe pueuereño'tey ahuo't apuey Puechemer ñeñt Cristo Jesús atto ñachña e'ñe yetsa'tuoya allohuen yo'chñar. Ñeñtpa' e'ñe atta apuey Yompor, ama eso yetsa'teño ama't coñe'ta. ²⁵ Ñaña Yomporpa' ahuo't orrtatan Puechemer Cristo ñeñtcha' rromosets añe patsro, o'ch ashataretta po'rراس e'ñe yocop. Allochñapa' e'ñech e'shohuaretterra yo'chñar ñerra'm yeyemterach ña. Ñaña ahuo't atet pa Yompor attoch yeño'ch, ñapa' e'ñe pocte' atet pe't ahua't, tarro'mar acheñenesha' ñeñt corratse't ahua'tpa' Yomporpa' atta ahuantenanet po'chñar, ama ahuenaye' atsa'tatarettuerrreto po'chñaret. (Tarro'mar ñapa' e'ñe eñoteñ, Cristochña tsa'tuerrahuet po'chñaret ñamet ñeñt allpon ame'ñaye't ña ahua't.) ²⁶ Ñaña ahuo't atet pa Yompor allochñapa' attoch yeño'ch ñapa' e'ñe pocte' atet pena; teme'ttsen attochña e'ñech pocte' enteneý e'ñe yeyemteñoñ Jesús.

Atto e'ñe ye'pa'yeñoña yañeña ñeñt cohuen yenten ya, Yomporñapa' amach cohuenaye' entenye

²⁷ Ñehua, atto e'ñe yeyemteñoña Cristo Yomporñapa' e'ñech pocte' enteneý, ñeñto'marña o'huañcha' eñalleta ñeñt allo yommo'chena e'ñe yañeña, ñeñt e'ñe yetsotateñoñ. Tarro'mar e'ñe ye'pa'yeñoña yañeña ñeñt e'ñe cohuen yenten ya, Yomporñapa' amach pocteye' entenye. ²⁸ Ñeñto'marña te'pa' e'ñe po'ño'ch yeñoteñ e'ñe yeyemteñoña Cristopa' e'ñech pocte' enteneý Yompor ama't ama yetsoteno ñoñets ñeñt atet anaret ahua'toteñ.

²⁹ Ñehua, o'ch noterrser masheñnesha judioneshacha', ñato' sapa' chate' sotenapañ Yomporpa' saptate' Seyomporer sepeñ ñeñtes judioneshas, amate'ña añecpa'nayaye ñeñt ama judioneshayaye. Tarraña napa' o'ch notas, ama't ñeñt ama judioneshayayepa' ñetpa'cho'ña Po'yomporer peñet. ³⁰ Tarro'mar e'ñe patrra Yompor. Ñaña ama't erra'tsena judionesha' ñeñtcha' ame'ñerraya Cristopa' Yomporñapa' e'ñech pocte' entenanet. Ñaña attecma ama't erra'tsena ñeñt ama judioneshayaye ñeñtcha' yemterrayera Cristo, ñetpa'cho'ña e'ñech pocte' entenanet Yompor. ³¹ Ñato' sa te'pa' chate' sotenapañ yeyemteñoñ Cristo, te'pa' Yompor po'ñoñ ñeñt atet anaret ahua'toteñpa' o'ch yehuapore'ch, o'huañcha' sherba'y. Tarraña o'ch notas, elloña attoña e'ñe yeñoten, ñeñto'marña Yompor po'ñoñpa' atarr sherbeney.

4

Atto Yompor ahuatpa' e'ñe pocte' entane't Abraham

1-2 Ñehua, te'pa' o'ch neyerpatasa ñeñt atet pe't ahuat yatañ Abraham. Ñapa' ama añoŕeye' pocte' eñche'teña Yompor e'ñe ñañaña puetsotateñoñ ñeñt cohuen ente't ña. Ñeñto'mar yatañ Abrahampa' ama eñalle ama't mamesha attoch ommo'chena ama't Yomporesho. 3 Tarro'mar yeñoteñ ñeñt atet oten Yompor po'ñoñ ñeñt aquellca'huaret ahuatoteñ. Ñeñtpa' atet oten: "Abrahampa' e'ñe atta yemtane't ñeñt atet oche't Yompor, ñeñto'mar allempoteñña Yomporpa' e'ñe pocte' eñche't e'ñe atta." 4-5 Ñeñto'marña yeñoteñ yapa'cho'ña ama añoŕeye' e'ñe pocte' entenye Yompor e'ñe yetorreñoñ ñeñt cohuen yenten yañeña. Añoŕcha'ña e'ñech pocte' enteney Yompor e'ñe atta, ñerra'm esempo yapa' o'ch e'ñe yeyemtera ñeñt atet oteney; allochñapa' attoch e'ñech pocte' entueney ya ñeñtey ochñatey. Tarro'mar e'ñe pocte' enteney e'ñe atta, ama es yetorreñoŕeye' ñeñt cohuen yenten yañeña. Ñehua, ñato' o'ch yetma'ntacha atet. Ñerra'm esempo yetaruasen yepatronaresho, ñerra'm allempoch tsa'tyetyetaruasoŕpa' ama yoteno e'ñe atta apuenyet quelle, yetaruasoŕña tsa'tenyet. Tarraña attoch pocte' enterrey Yomporpa' ama atteyaye. Ñapa' e'ñe atta pocte' enteney, ama e'ñe ya yetorreñoŕeye' ñeñt cohuen yenten ya attoch pocte' enteney Yompor. 6 Ñaña ama't yatañ Davidpa' ñeñtecpaña eñose't ahuat. Ñapa' atet ote't nanac cosheñtso'tseney ñeñtey e'ñe pocte' enteney Yompor e'ñe atta, ñeñtpa' ama añoŕeyaye o'ch es cohuen yeŕa'yes e'ñe yañeña. 7 Ñeñtpa' atet ote't David: Nanac cosheñtso'tseney ñeñtey o' aŕpretna'huaretterra yo'chñar, ñeñtey amach allo'na yerpuernaye'te Yompor yo'chñar.

8 Ñaña nanac cosheñtso'tseney ñeñtey Yomporpa' amach allo'na otteñe'chneye yo'chñaro'mar. Arrpa' allohua ñeñt atet ot ahuat yatañ David.

9 Ñaña añ cosheñetspa' yeñoteñ ama ñapŕtecpayaya ñeñt judioneshacop ñeñtara ñeñt atsorraretnesha'. Añeŕpa'naña ñeñt ama judioneshayaye ñeñt ama atsorrareteyayeto. Ñehua, ñeñtpa' attoña yeñoteñ. O' notuanmas atto Abrahampa' e'ñe atta yemtane't ñeñt atet oche't Yompor, ñeñto'marña Yomporpa' e'ñe pocte' eñche't e'ñe atta. 10 Ñehua, te'pa' o'ch yoctape'ch allempo Yomporpa' e'ñe pocte' entane't Abrahampa' allempo Abrahampa' ama atsorraretnena', tarro'mar allempopa' ama orrtena' atteñats. 11 Tarraña elloñapa' ahuo't tsorratena Abraham; ñeñtpa' ñeñtcha'

eñotaterrahuet po'ñoçh Yomporpa' o' pocte' entenan Abraham e'ñe pueyemteñoťa, ama't allempo ama atsortrare'ttena'. Ñeñto'marña atet pa ahuať attoch pompor pohueret ama't ñaña allohuenet ñeñť ama atsortrare'teyaye; țarraña ama't ama atsortrare'teyayeto, e'ñe pueyemteñoťeta Yomporpa' e'ñech pocte' entenanet e'ñe atfa. ¹² Ñaña ñeñto'mar atet pa attoch pompor pohuer allohuen ñeñť atsortrare't, țarraña añach ñapueť pompor perre' ñeñť po'ñoçh yemtenaya Yompor. Tarro'mar ama añecpaye' pompor peñeto atto atsortrare'ttenet, añecopña pompor peñet e'ñe pueyemteñoťeta Yompor ñeñť e'ñe atet pete't pompor et Abraham, ama't allempo ama atsortrare'ttena'.

¹³ Yapa' yeñoteñ ahuať Yomporpa' ahuo't otan Abraham o'ch apuer erracmañen pats allohuen puechemereshohuen esempohuañen. Ñaña atet otan Yompor Abrahampa' ama puetsotateñoťeye' añ ñoñets ñeñť atet anareť ocheña Yompor. Añña e'ñe pueyemteñoťa Yompor atet och, țarro'mar Yomporpa' e'ñe pocte' eñch. ¹⁴ Ñerra'm po'ñoçh yetsotateñoťa añ ñoñets ñeñť atet anareť aphuerryeñ añ patspa' yapa' e'ñeťe' orrena yeyemteñañ Yompor; țarro'mar ñerra'm atteñpa' Yomporpa' amate' a'pocatanñeña po'ñoñ ñeñť atet otan ahuať Abraham. ¹⁵ Ñaña ñerra'm añ yocten añ ñoñets ñeñť atet anareťpa' nanaccha' a'coñchatareťey ñerra'm ama yetsotueno ora allpon ñoñets. Ñaña ñerra'm ama eñallñe añ ñoñets ñeñť atet anareťpa' amate' erroťenoť coñchatyeto țarro'mar amate' eñallñe ñoñets ñeñťcha' ya'pote' ñeñť ochñartsotets.

Attoch a'naterrya Yomporpa' ñeñpa' e'ñech yeyemteñoťa ña

¹⁶ Ñeñto'marña yeñoteñ attoch a'naterrya Yompor ñeñť atet otahuapa' ñeñť po'ñoçhpa' e'ñech yeyemteñoťa ña attochña e'ñe puemuereñoťey e'ñech a'natuerrya allohueney. Amach ñapťayaya judionesha' ñeñť cotene' añ ñoñtsor ñeñť atet anareť, añecpa'naña allohueney ñeñťeycha' yemterraya Yompor e'ñe attecoptar atet pe't ahuať yatañ Abraham. Tarro'mar ñapa' po'ñoçh yatañ yepeñ allohueney. ¹⁷ Ama't Yompor po'ñoño ñeñť atet anuareť ahuaťoteñpa' all orrtena ñeñť atet Yomporpa' otan ahuať Abraham, ñeñťpa' atet oche't: "Shonte' pa'namen acheñpa' ñetñapa' pomporcha' pohuerrpet. Añpa' e'ñe na atet o' neponať." Ñeñto'mar yeñoteñ Abraham e'ñe pueyemteñoť Yomporpa' atet eñche't Yompor ñapa' pomporcha' per shonte' pa'namen acheñ. Ñeñťñapa' ñeñťara Yompor ñeñť nanac ahuamencat ñeñť eñotene' o'ch tantaterran ama't ñeñť rromuets, ñaña ñeñť

eñotene' e'ñe po'ñoñoŕpa' o'ch orrtatan ama't ñeñŕ ama eñalle te'.

18-19 Allempo Yomporpa' atet otan Abraham "peshoŕpa' merenach shonte' pa'namen acheñ ñeñŕcha' ŕomporterraya" allempo Abrahampa' o' nanac po'nme'ten—ĉharroch ĉharra' charte' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña puetapor Sarapa'ĉo'ña o' nanac po'nme'ten, amate' errotenoŕ cheyore'terro, tarraña Abrahampa' ama queĉhpuenano atto yemtenana ñeñŕ atet otue Yompor. E'ñe pueyemteñoŕ Yomporpa' allo'na sen cohuene' Yompor o'ch aŕ ama't patrra puechemer. ²⁰ Ama echarrteno pueyoĉhro ama't mamesha añecop ñeñŕ atet o' otue Yompor. Allo'na sen yemuetnomaya Yompor ñeñŕ nanac ahua mencat pene'. E'ñe pueyemteñoŕan Yompor, ñapa' ĉhocmach otaŕsa'tyesaneteŕ Yomporpa' ñaŕŕa atarr ahua mencat. ²¹ Tarro'mar eñocheŕ e'ñe Yompor po'huamencot, po'ñoĉhpa' o'ch aŕ ama't patrra puechemer ñeñŕ atet o' otue. ²² Ñeñŕo'marña Abraham e'ñe pueyemteñoŕan Yompor Yomporña' e'ñe pocte' eñcheŕ.

²³ Tarraña añ ñoñetspa' ama ñaŕŕeĉpayaye Abrahama-cop anarete. ²⁴⁻²⁵ Yocpa'ñaña anareteŕ allohueney ñeñŕey yemtenaya Yompor, atto ñapa' a'rroyonay Puechemer ñeñŕ Jesús ñeñŕcha' rromats e'ñe ya yo'ĉhñarecop, ñeñŕara Jesús ñeñŕ Yepartseshar yepen, ñaña atto Yomporpa' tantaterran Puechemer po'rromñoŕ, attoch yeñoĉ yo'ĉhñarpa' o' e'ñe atsa'taretetua. Ñeñŕo'marña te'pa' e'ñe yeyemteñoŕ Yompor ñeñŕ atto a'poctatonay, yapa'ĉo'ña e'ñech pocte' enteney yaña.

5

Atto e'ñe yeyemteñoŕ Yompor; e'ñech pocte' enteney, atarrcha' cosheñso'tseney

¹ Ñeñŕo'marña te'pa' yeñoteñ e'ñe yeyemteñoŕa Jesucristo, Yomporña' e'ñe pocte' enteney, o'huañcha' yoroĉheno'tseney Yomporeshoŕ, tarro'mar Yepartseshar Jesucristopa' ahuo't a'poctatuerrnay yo'ĉhñar Yomporesho. ² E'ñe attoña Cristopa' ĉhapterrey Yompor pueyuereño attoch ĉhocma bensare'tamŕpeney; ñeñŕpa' e'ñe yeyemteñoŕ Cristo. Ñaña yapa' e'ñech yocsheñsha' yecueñ esempohuañencha' e'ñe poctacma yecohuentapretera Yompor. ³ Ñaña ama't yemueroĉhteñoŕ o'ch yocshena tarro'mar yeñoteñ e'ñe yemueroĉhteñoŕpa' allempoña yocŕape'chen attoch ahua mencat ŕa'y Yompor attochña ya'huanten allohuen ñeñŕ echarr yentyen. ⁴ Ñaña attoña

ya'huanten allohuen ñeñt' echarr yentyenpa' yapa' yeñoteñ Yomporñapa' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe yeyemteño' o'ch yecuerr ñeñt' o'patatenya Yompor. ⁵ Ñaña e'ñe yecueño' ñeñt' o'patatenya Yompor ñapa' 'chocmach a'poccatenan po'ñoñ ñeñt' atet oten yocop. Yapa' ama't esempapa' amach es ye'naterraye'te po'poñ, tarro'mar Yomporpa' ahuo't apuey Puecamquëñ ñeñt'cha' yechetsa yeyo'chro ñeñt'cha'ña yeñotatene' atto Yomporpa' nanac morrentenya.

⁶ Yapa' yeñoteñ nanac morrentenya Yompor tarro'mar ahua'tpa' ama es yoc'tape'chpeno ama't mamesha Yomporecop attoch yequeshperrañ. Tarraña Yomporñapa' e'ñe allempocmapa' ahuo't mueñan Puechemer Cristo aña patsro ñeñt'cha' rromosets e'ñe yocop ñeñt'ey ama es co'tape'chetso cohuen ama't mamesha Yomporecop.

⁷ Ñehua, yapa' arromña'teypa' yeñoteñ atarr torrapo' attoch yerroma po'psheññecop, ama't añ acheñrecop ñeñt' atarr cohuen. Tarraña erro'tenopa' ama tama torrapahuoye' yenteno o'ch yerroma añ acheñrecop ñeñt' atarr amueraña.

⁸ Tarraña yapa' ama't allempo ora ye'patse'tyen sosya'tsañpa' e'ñe allempocmaña Cristopa' ahuo't rroma yocop. Attoña Yomporpa' eñotaterrey yapa' nanac morrentenya.

⁹ Ñeñto'marña te'pa' e'ñe pocte' enteney Yompor tarro'mar Cristopa' ahuo't rroma yocop. Elloña attotña a'queshpatey allochñapa' amach a'coñchatare'teye ama't errponaña.

¹⁰ Ama't allempo ora ye'moñe'teñ Yomporpa' Puechemerña po'rromño'tpa' ahuo't e'ñe yamo'tstannerra epay Pompor. Elloña te'pa' atto correna Cristopa' attotña yapa'cho'ña a'queshpaterreycha'. ¹¹ Elloña te'pa' e'ñe yocsheña Yompor tarro'mar Puechemer ñeñt'ara Yepartseshar Jesucristopa' ahuo't amo'tstaterrya e'ñe ña Pompor.

Atto yamo'mte' Adánpa' ñapa' 'cha a'chencatey; Yamo'mte'ña Cristopa' ñaña ya'queshpaterre'

¹² Ahua't puesheñarr yacma ñeñt' pa'so'cheñ Adánpa' ahuo't orrtatan atpare'teñets aña patsro Yomporecop. Ñeñto'marña allempoteñ allohueney ñeñt'ey acheñeypa' e'ñe attecma ye'pohua. Ñaña allempopa' ahuo't anare'tta attoch yo'chñaro'tpa' o'ch yerroma. Ñeñto'marña allohueney ñeñt'ey acheñeypa' o'patuaya rromueñets tarro'mar allohueneypa' ñeñta yeñot ñeñt' atet pa' ñanom yamo'mte' Adán. ¹³ Ñaña allempoteñ corre't Adán, acheñenesha' arr patsropa' ñeñta eñotet ñeñt' atet atpare'tan Adán Yompor. Tarraña allempopa' ama eñalletena' ñoñets ñeñt' atet anaret alloch

a'coñchatare'tterret. ¹⁴Tarraña attera o'patenanet rromueñets e'ñe allempoteñ corre't Adán ñeñta attera ñaña tarremphua allempo corre't ñaña Moisés ñeñt nahuet ñoñets. Ama't ama atpare'teññañeto Yompor po'ñoñ e'ñe atet atpare'te't Adán, tarraña attera o'patenanet rromueñets. (Ñeñto'mar yeñoteñ Adán po'chñaro'tpa' ahuo't anare'tta attoch o'patuaya allohueney rromueñets.) Ñeñña yamo'mte' Adánpa' aña o'patuaya ñeñt ama cohuenayaye, tarraña Yamo'mte'ña Cristopa' allempo huapapa' ñapa' aña o'patatosya ñeñt e'ñe cohuenare'.

¹⁵Tarro'mar e'ñe patparñesharmorot Adánpa' ama atteyaye ñerra'm ñeñt atet atarr muerenya Cristo. Tarro'mar e'ñe puesheñarra po'chñarot o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñtara Jesucristo ñeñt yemuererraya. Attoña Yomporpa' orrtatonay puemuerena yocop alloña nanac cohuen es apatuene'y e'ñe atta allohueney pa'namen ñeñtey acheñey. ¹⁶Ñaña ñeñt atet muererrya Yompor, ñeñtpa' ama atteyaye ñerra'm ñeñt atet o'patuaya ochñarets ama't e'ñe puesheñarro'ta. Tarro'mar ñeñt atet pa Adán ama't parrochapa' ñeññaño yo'patatuenaya coñcheñets. Tarraña ñeñt atet a'queshpaterrey Yomporpa' ñeñtpa' atet pa. Ama't shonteñ yo'chñarpa' ñañaapa' e'ñech pocte' enteney e'ñe atta tarro'mar ñeñtpa' o' a'pocatuonay Cristo. ¹⁷Ñaña atto e'ñe puesheñarro'ta po'chñarot o'patenya rromueñets, tarraña elloña nanac muererrya Yompor attotña a'royernay Puechemer ñeñtara Jesucristo ñeñt o' a'pocatuernay yo'chñar Yomporesho attochña yapa' corretsayach.

¹⁸Ñeñto'marña yeñoteñ atto e'ñe puesheñarro'ta po'chñarot ahuo't o'patatyet coñcheñets, attecma ñaña puesheñarr ñeñt Jesucristopa' ahuo't phua ñeñt e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen. ¹⁹Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharmorot Yomporñaapa' e'ñe ochña'toche' entuene'y ama't shonte' pa'namena'ttsocmay ñeñtey acheñey. Tarraña puesheñarr ñeñt Cristo ñeñt e'ñe cohuen ame'ñenaya Yompor, ñeñtñaapa' alloch e'ñe pocte' enteney Yompor, ama't shontey pa'namena'ttsocmay ñeñtey acheñey.

²⁰Ñaña allempo chap allempoch anare'tta ñoñets ñeñtcha' eñotaterrahuet ñeñtcha' atet pet ñaña ñeñtcha' ama atet apapahuo elloña allempopa' ñetpa' o' eñoterret atarr atparña'tterret. Tarraña ama't atto nanac yatpare'tena elloña Yomporpa' nanac muererrya. ²¹Attoña e'ñe ye'patse'tyeñot

ñeñt ama cohuenayayepa' ahuo't anaretta rromueñets ñeñtcha' yo'patenaya ñeñtñapa' coñcheñets. Tarraña elloña Jesucristo ñeñt Yepartseshar yepen ahuo't orrtatonay atto Yomporpa' nanac muererrya attoña a'pocatuerrnay yo'chñar. Attochña yapa' corretsayach yocsheñeshocmañen tayoteñ errponohuañen.

6

Atto ñeñt toma'ntena allempo yapataretta Cristocop

¹ Te'pa' e'ñe yeñoteñ ama't atet ye'patse'tyese't ñeñt ama cohuenayaye, Yomporpa' elloña nanac muererrya, atto peretna'huerrnay yo'chñar. Tarraña ama't atteñpa' amach yotap'sa'tatsto "ñeñepñapa' o'ch allo'na ye'patse'tyenesna ñeñt sosya'tsañ tarro'mar Yomporpa' nanquëpa't muerenana ñeñt p'atse'tyene' ñeñt ama cohuenayaye ñaña ellopa' o'ch'cho' alla muererrya." ² Tarraña amach erroteno't allo'na yeseno p'atse'tyenomue' ñeñt ama cohuenayaye tarro'mar o' ya'ypo'ñerr yo'chñar allempoteñ o' yaguër Cristo. ³ Ama't señoñeña ñeñt toma'ntena allempo yapataretta Cristocop. Añ toma'ntena atto o' yeparrocmaterr epay Cristo, atet ñerra'mrrate' cho yerromapreteña Cristo allohueney ñeñtey apatarettetsa e'ñe yame'ñeño't Cristo Jesús. ⁴ Allempo yapatarettapa' e'ñe atet ñerra'mrrate' cho yerromapreteña Cristo ñaña atet ñerra'm cho yepampapreteña Cristo. Allempoña Yomporpa' ahuo't tantaterran Puechemer e'ñe po'huamenco't ñeñt atarr cohuen, yapa'cho'ña ñeñtara po'huamencaro'tña e'ñe cohuen o' etserrataterrnay yoc'tap'ña, ñeñtcha' atet yocrrena.

⁵ Tarro'mar e'ñe yeparrocmateño't epay Cristo o' yerromaprecha. (Attochña ya'ypo'ñerr ñeñt ama cohuenaye' entapretenye Cristo.) Ñaña ñerra'm yerromapreteña Cristo yeñoteñ o' yetantapretera attochña yocrrerra e'ñe cohuen ñocop. ⁶ Tarro'mar yeñoteñ ñeñtey acheñey ñeñt yeyo'chro'tsen ñeñt yoc'tape'chataye't sosya'tsañ ahuat ñeñt'pa' o' a'mchechataretetuerra atet ñerra'mrrate' acorso'tam'psaretta epuet Cristo. Attochña o'huañcha' cotape'chatse'tatnenedy yo'chñarañeña. Amach allo'na taruasatnenedy yo'chñar. ⁷ Ñato' o'ch yetma'ntacha atet pena arromñat. Ñehua, yapa' yeñoteñ ñerra'm esesha' rromatspa' amach erroteno't allo'na cotape'chyesnenano sosya'tsañ. Yapa'cho'ña atet'cha' yentena ñerra'mrrate' cho yerromuen, amach erroteno't allo'na yoc'tape'chyesneno ñeñt sosya'tsañ enten Yompor. ⁸ Ñaña atto o' yerromaprecha Cristo, yapa' yeñoteñ ñaña e'ñe yeparrocmateño't Cristopa'

alloña corretsayach, atet pena ñapa' e'ñe corretsa. ⁹Tarro'mar yapa' yeñoteñ Cristopa' o' tanterra po'rromñoť, amach alla rromuerre'te. Amach errotenoť alla o'patere'te rromueñets. ¹⁰Tarro'mar ñapa' atto rroma yo'chñarecoppa' ñeñťpa' e'ñe parrocha rroma ama't allohuenacop. Ñaña atto correna te' ñeñťpa' e'ñe ora Pomporecpa. ¹¹Yapa'cho'ña attecmuepa'ch yentena yaña yañeña. E'ñe yerromapreteñoť Cristo Jesúspa' o'ch ya'ypo'ñerr yo'chñar ñeñťo'marña amach errotenoť alla taruasaterryerro yo'chñar. Ñaña te'pa' e'ñe yeparrocmateñoť Yepartseshar Cristopa' o'ch yocrraprecha e'ñe cohuen Yomporecop.

Attoch amach semnatatsche so'chñar o'ch alla taruasaternaserr sa'rromña'techets

¹²Ñeñťo'marña te'pa' o'ch notas, amach semnatatsche so'chñarpa' o'ch alla taruasaternaserr sa'rromña'techets. Allochñapa' amach allo'na seřatse'tyesneno ñeñť atet mue-natse'tatyenes sechets. ¹³Amach semnatatsche sechets o'ch aña torrena ñeñť ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeñť e'ñe cohuen enten ña. Ñato' o'ch yetma'ntacha atet ñerra'mrrate' cho yerromuen țarraña te'pa' o'ch alla yocrrerra cohuen Yomporecop. ¹⁴Tarro'mar te'pa' amach errotenoť allo'na taruasatnenye yo'chñar, țarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama aņeye' yeyemteno ñoñets ñeñť atet anareť ñeñťcha' atet yeřohua esheccha' cohuen enteney Yompor.

¹⁵Te'pa' yeñoteñ ama aņeye' yeyemteno ñoñets ñeñť atet anareť. Añña yeyemtena Yompor puemuereñoť e'ñe yenpueney. Țarraña ama't atteñpa' ama pocteyaye o'ch allo'na yesen řatse'tyerrayerr ñeñť ama cohuenaye' enteno Yompor ama't mamesha. ¹⁶Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeñťcha' yetaruasatene' aņe patsro, ñeñťpa' po'ño'ch ñeñťcha' yepatronar yepen, ñaña e'ñech pauner yentatena attochña ñeñťach yame'ñena ñeñť yepatronar yepen. Ñaña attec-mach yepena ñerra'm añ yemnen yo'chñarach yetaruasatene', țarraña ñerra'm añ yetaruasatene' yo'chñarpa' ñeñťpa' tsa'taterryach rromueñtso ñeñťara coñcheñtso. Țarraña ñerra'm añ yame'ñena Yompor ñeñť atet otene y po'ñoñoť, ñeñťpa' alloch yorrtatyen e'ñe cohuen ñeñť e'ñe atet muenen ña. ¹⁷Ñaña sapa' ahuaťpa' aña setaruasataye't so'chñar, țarraña te'ñapa' e'ñe seyo'chrocmañen o' same'ñera ora ñeñť atet pena Yompor pa'poteñ ñeñťara ñeñť

serrpare'tatasete't. Ñeñto'marña te'pa' napa' atarr nocshena, atarr neparasyoso'teñ Yompor socop. ¹⁸ Ñaña te'pa' o'huañcha' taruasaterrser so'chñar. Añcha'ña setaruasaterre' Yompor erra'tsente' muenen ña. ¹⁹ Ñehua, Yompor pocta'ño'pa' atet netma'ntatensa atto yocrrena acheñey arr patsro allochñapa' cohuencha' çhaponasa seyoçhro Yompor pocta'ña. Ñeñt notenes po'ño'chpa' ñeñtpa' atet sepe't ahua't e'ñe pocte' sente't e'ñe ora sechtsohuen allo'na sete't patse'tnomue' sosya'tsañ ñeñt ama cohuenaye' enteno Yompor. Te'pa'cho'ña attecmeupa'ch e'ñe pocte' senteñ ora sechtsohuen o'ch sepomuerra Yomporecop, allochñapa' attoch sa'cohuentataretterra e'ñe cohuen Partsocop ñeñt e'ñe atet muenen ña.

²⁰ Ñehua, ahua't allempo ña setaruasataye't so'chñarpa' ama añeye' soctape'che'te ñeñt e'ñe cohuen enten Yompor. ²¹ Tarraña ñeñt atet sepatse'tyese't sosya'tsañ ahua'tpa' ama es sherbase'te ama't mamesha, ñeñtara ama't te'pa' pencna'ntatenes. Yapa' yeñoteñ ñeñtpa' allach tsa'taterryañ rromueñtso, ñeñtara coñcheñtso. ²² Tarraña te'pa' o'huañcha' alla taruasaterryerr yo'chñar. Añcha'ña yetorratene' Yompor po'taruas attoch yesherbeñ. Allochñapa' ñach yetsa'tenaya alloch ya'cohuentataretterra e'ñe cohuen ñocop aña patsro. Allochñapa' attochña aphuerrey allochña yapa' corretsayach yocsheñeshocmañen tayoteñ errponañohuen. ²³ Tarro'mar yo'chñarpa' allach tsa'taterrya rromueñtso, ñeñtara coñcheñtso. Tarraña e'ñe yeparrocmateño' epay Yepartseshar Cristo Jesús'pa' Yomporñapa' aphuerreycha' e'ñe atta allochña yapa' corretsayach yocsheñeshocmañen tayoteñ errponañohuen.

7

Atto o'huañ amcha'noçhtana'tenya añ ñoñets ñeñt atet anaret ahua't Moisésesho't

¹ Te'pa' o'ch masheñeshacha' ñaña noçhaneshacha' netma'ntatasa po'poñ co'ta'ñats. Ñehua, sapa' o' e'ñe seño'tueñ atet pena ñoñets ñeñt atet anaret arr patsro ñeñtcha' atet yepena. Sapa' seño'ten añ ñoñetspa' sherben tarremphuach allempo yocrrena aña patsro. Tarraña ñerra'm esempo yerromapa' añ ñoñetspa' amach erro'tenot allo'na yame'ña'neño. O'huañcha' yame'ñeña. ²⁻³ Atet ñerra'mrrate' ñeñt otene'y paterr ñoñets ñeñt atet anaret. Ñeñtpa' atet otene'y: Coyanesha' arrollare'tañpa' amach satstano puerrollar allempo correna aña patsro. Ñaña ñerra'm allempo correna puerrollar, ñerra'm o'ch yorer

po'psheñeñ ñeñtcha' puerrollar perrpa' ñeñtpa' ama pocteyaye tarro'mar ñeñtpa' o'chña'tampeñets enteñ Yompor. Tarraña ñerra'm esempo ch rromapes puerrollarpa' allempoñapa' o'huañcha' ameñatacha añ ñoñets ñeñt atet anaret puerrollarecop. Ñaña ñerra'm allempo yorer po'psheñeñ ñeñtcha' puerrollar perrpa' allempo ñeñtpa' e'ñe pocte' tarro'mar allempo, ñeñtpa' ama o'chña'tampeñtsoye' enteñe Yompor.

⁴ Ñeñto'marña o'ch masheñnesha ñaña nochanesha notas, yapa'cho'ña o'huañcha' amcha'nochtana'tenya añ ñoñets ñeñt atet anaret ahuat Moiséseshoñ, tarro'mar ñeñtey o' yameñerrapa' o' yerromapretera Cristo. Ñeñto'marña te'pa' e'ñe pocte' o'ch yo'patera po'psheñeñ. Ñaña ñeñt o' yo'patera te', ñeñtpa' Cristo ñeñtara ñeñt tanterrtsa rromot. Allochñapa' attoch yorrtatyen ñeñt e'ñe cohuen atet muenen Yompor. ⁵ Tarro'mar ahuat allempo e'ñe yañeña yoctapña ora yoctenpa' ama't yeñoteneñ añ ñoñets ñeñt atet anaretpa' attera muenateney o'ch allo'na taruasatnenedy yo'chñar. Attoña allach chapatterryeñ rromueñtso attoch e'ñe yechenca'huerrañ. ⁶ Tarraña te'pa' e'ñe yerromapreteñoñ Cristo añ ñoñets ñeñt atet anaretpa' o'huañ amcha'nochtana'tenya atet ñerra'm ahuat. Ñeñto'marña te'pa' e'ñe cohuen yocrrena Yomporecop. Te'pa' ama añecpayaye ñeñt atet yepet ahuat attoch e'ñe ya'muerochtame'teñoñ yetsotatuañ ñeñt atet otye't ñoñets ñeñt atet anaret. Añecopña yocrrena e'ñe cohuen Yomporecop tarro'mar te' Parets Puecamquëñpa' o' etserrataterrnay yoctapña.

Atto yo'chñarpa' atarr mopa'teney; amach muenatenye o'ch atet yepohua ñeñt atet oteney ñoñets ñeñt atet anaret

⁷ Ñehua, ñato' sapa' chate' sotenapañ napa' noteneste' Yompor po'ñoñ ñeñt atet anaretpa' ñeñtpa' amate' cohuenayaye. Tarraña ñeñtpa' ama atteye' notenso ama't mamesha. Atet napa' ñerra'm ama eñallñeña añ ñoñets ñeñt atet anaret, napa' amate' chaponañeña neyoçhro ñeñt ama pocteye' enteno Yompor. Atet ñerra'm ama eñallñeña añ ñoñets ñeñt yotene' "amach yeye'chapretanna'tatsto", napa' amate' chaponañeña neyoçhro ñeñt ama pocteye' enteno Yompor ñerra'm esempo es yeye'chapretannena. ⁸ Tarraña allempo chapona neyoçhro po'ñoçh atet oteney ñoñets ñeñt atet anaret ama es aye'chapretanna'tpahuo, no'chñar ñeñt neyoçhro'tsenpa' elloña nanaccha' es ye'chatse'tatyenen. Ñerra'm ama neñotenñe añ ñoñets ñeñt yotene' ama es

aye'chapretanna'tpahuo, ñerra'mañpa' amate' neñotenñe ñeñt' atet neye'chapreteña po'psheñeñ ñeñtpa' ñeñtña po'ñoç no'chñar entapretenen Yompor. ⁹ Ahuat napa' allempo ama neñotena' ñoñets ñeñt' atet anaret, nañapa' nanac cosheñtso'tsennoñ allempo. Tarraña allempoña neñoter ñeñt' atet oteney ñeñtcha' atet yeña cohuen ñaña ñeñt' ama atet aþapahuopa' allempoteñña napa' neñotena po'ñoçhpa' shonte' no'chñar ñeñt' neyoçhro'tsen. Allempoteñña napa' atarr nellquerra nanac. Neñoteñ aña no'patenaya rromueñets ñeñtara coñcheñets. ¹⁰ Ñaña añ ñeñtara ñoñets ñeñt' atet anaret allo'ch yocrrenañ e'ñe cohuenpa' tarraña arepa't atteyaye, naña no'chñar allo natpare'ten ñoñets ñeñt' atet anaret ñeñtach nanmayeñ rromueñtso.

¹¹⁻¹² Tarro'mar allempoteñ neñoterr añ ñoñets ñeñt' atet anaretpa' no'chñar ñeñt' neyoçhro'tsenpa' elloña nanac cotape'chatse'tatenen sosey. Ama't nanac cohuenañ Parets po'ñoñ ñeñt' atet anareteñ, ñaña atet oteney Parets ñeñtcha' atet yeña' cohuen, ñaña ñeñtcha' ama atet aþapahuoyaye, ñeñtpa' e'ñe cohuen, pocteñ. Tarraña na no'chñarpa' ama muenatenno o'ch cohuen es neþa', ñeñtpa' atepa't sheca'ne't. Napa' ama erro't nepeno, neñoteñ aña no'patenaya rromueñets ñeñtara coñcheñets. ¹³ Te'ña sapa' çhate' sotenapañ añ ñoñets ñeñt' e'ñe otets cohuenpa' ñeñtapa'tña yo'patatenaya rromueñets. Tarraña ñeñtpa' ama atteyaye. Añña ñeñt' yo'patatenaya rromueñets, ñeñtpa' yo'chñar. Ñaña Yompor po'ñoñ ñeñt' atet anaret ñeñt' e'ñe cohuenpa' ñeñtña o' a'poterrnay yo'chñar. Attochña yeñoterr yo'chñarpa' nanac sosey entapreteney Yompor.

Atto eñall epa ñeñt' huomenc yepene' yeyoçhro

¹⁴ Yapa' yeñoteñ añ ñoñets ñeñt' atet anaretpa' Partseshot e'ñe cohuen anareteñ, tarraña atet ñerra'm napa' arromña'to'a atet nepena, çhocmach neþatse'tyen ñeñt' ama cohuenaye' enteno Yompor. E'ñe atet nepena ñerra'mrrate' aña netaru-asatene' no'chñar. ¹⁵ Ama neñoteñe eso'marte'ña atet nepena, tarro'mar ama't ñeñtcha' atet o' neþohuapa' ama't napa' amach e'ñe pocteye' nenteñe. Tarro'mar ama't nemneñeñ añte' atet neþohua ñeñt' e'ñe cohuen enten Yompor, tarraña arepa'tña atteye' nepeno. Añepa't atet nepen ñeñt' ama nemnenñe, ñeñt' po'ñoçh ama cohuenaye' enteno Yompor. ¹⁶ Ñaña esempo o'ch neþohua ñeñt' ama cohuenayaye, ñeñt' ama't napa' ama nemnenñe, nañapa' neñoteñ attoña o' natpare'tua ñoñets ñeñt' atet anaret ñeñt' e'ñe cohuen. ¹⁷ Ñeñto'marña neñoteñ ñerra'm esempo o' atet neþohua ñeñt' ama't napa' netsena'ten, ñeñtpa' neñoteñ ama e'ñe naye' atet petso. Añña

atet neḡatene' no'chñar ñeññ allo'tsenara neyočhro. ¹⁸ Napa' neñotena e'ñe atta eñalletñan, neyočhroñapa' ama eñalle attoch cohuen enten Yompor, ama't coñe'ta. Ama't nemneñeñ o'ch atet neḡañ ñeññ e'ñe cohuen enten Yompor, tarraña ama errot nepeñe atet ḡatsa ñeññ atet cohuentetsa. ¹⁹ Ñeññ atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet neḡohua ñeññ e'ñe cohuen enten Yompor, tarraña arepa'tña atteye' nepeno. Añach atet nepena ñeññ ama nemnenñe ñeññ po'ñočhpa' ama cohuenaye' enteno Yompor. ²⁰ Ñeñño'marña neñoteñ, ñerra'm esempo o' atet neḡohua ñeññ ama't napa' ama nemnenñe, ñeññpa' neñoteñ ama e'ñe naye' atet petso. Añña atet neḡatene' no'chñar ñeññ allo'tsenara neyočhro. ²¹ Ñeñño'marña te'pa' neñotena ñerra'm esempo yemneñeñ o'te' atet yeḡañ ñeññ e'ñe cohuen enten Yompor, tarraña yo'chñar ñeññ yeyočhro'tsenpa' čhocmach coḡape'chateney ñeññ ama cohuenaye' enteno Yompor. ²² Tarraña atto Yompor o' coḡape'chaterrey cohuen yeyočhropa' ñeññpa' alloch e'ñe yocsheññaña po'ñoñ. ²³ Tarraña ama't atetpa' yapa' yeñotena eñall po'poñ ñeññ huomenc yepene' yeyočhro ñeññ čhocmach e'moñe'tenan ñeññ atet yoctape'chen cohuen Yomporecop. Ñaña yo'chñar ñeññ huomenc yepene' yeyočhropa' ñeññña nanac mopa'tene' yechets.

²⁴ ¡Ee-say! Nanac llequëñtso'tseney ya. Esha'huachca' ya'huañamperre'te' yo'chñar ñeññ nanac yemueročhtatene' ñeññcha' yanerre'te' rromueñtso. ²⁵ Nanac neparasyoso'teñ Yompor tarro'mar neñoteññañ Puechemer ñeññ Yepartseshar Jesucristo ñepa'tña e'ñe ya'huañamperre' yo'chñar. Ñeñño'marña e'ñe yeyočhropa' yemneñeñ o'ch yoctape'cherrñañeñ Yompor po'ñoñ, tarraña yo'chñarñapa' ñeññaña čhocmach yetaruasatene' e'ñe yechtso.

8

Atto Parets Puecamquëñpa' ñeññña huomenc yepene' yeyočhro

¹ Ñeñño'marña te'pa' yeñoteñ amach a'coñchatareḡeye ama't puesheñarroḡeya ñeññey o' yeparrocmaterra Cristo Jesús. Ñehua, ñeññey o' yeparrocmaterra Cristo, ñeññpa' añ, atto o' coḡape'chaterrey Parets Puecamquëñ, amaña aḡeye' yoctape'chatenaye yo'chñar ñeññ yeyočhro'tsen. ² Tarro'mar te'pa' atet ñerra'm napa' e'ñe neparrocmateñoč Cristopa' añña Parets Puecamquëñpa' ñeññña huomenc nepene' neyočhro, allochña napa' corretsanach tayoteñ ama't ñaña erponohuañen. Attotña o' a'huañamperren atto no'chñarpa'

ñeñta huomenc neḡaye't neyočhro, ñeñtcha' nanmayeñ rromueñtso, ñeñtara coñcheñets. ³ Ñehua, añ ñoñets ñeñt atet anare't ñeñtcha' yetsotateneñpa' amach erroteno't a'quesḡpaterrye, tarro'mar ya arromña'fey yo'chñarpa' ama muenatenye o'ch atet yeḡohua ora ñeñt atet oteney añ ñoñets. Tarro'mar añ ñoñetspa' ama eñalle attoch huomenc ḡonay yeyočher esheccha' yetsotue ora allpon ñeñt atet oteney ñeñtcha' atet yeḡohueneñ. Tarraña atto Yomporpa' ahuo't a'pocatuonay yo'chñar ñeñt'pa' atet ḡa. Ñapa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñtey arromña'fey, ñeñtey ochña'fey. Allochñapa' ñach rromosets yo'chñarecop; allochñapa' attoch tsa'tuonaya yo'chñar. Attochña a'huaña'mperrey atto yo'chñara ñeñta huomenc yepene' yeyočhro. ⁴ Atet o' ḡonay Yompor attoch te' yapa' o'ch atet yeḡa cohuen ñeñt atet oteney Yompor po'ñoñ, allohueney ñeñtey atet petsa atet cotape'chateney Parets Puecamquëñ, ñeñtey o'huañ atet yeḡatse'tyesa ñeñt atet cotape'chatse'tateney yo'chñar ñeñt yeyočhro'tsen.

⁵ Tarro'mar ñeñt atet petsa ñeñt atet cotape'chatenanet sosya'tsañ ñeñt pueyočhro'tsenet'pa' añachña e'nenet ñeñt atet muenatse'tatenanet po'chets. Tarraña ñeñt atet petsa ñeñt atet cotape'chatenanet Parets Puecamquëñpa' añcha'ña e'mñnotenet ñeñt atet muenatenanet Parets Puecamquëñ. ⁶ Tarro'mar ñerra'm añach ye'nen ñeñt atet muenatse'tateney yechetspa' ñeñt'pa' ñeñtcha'ña yanerre' rromueñtso ñeñtara coñcheñtso. Tarraña ñerra'm añ ye'mñnoten ñeñt atet cotape'chateney Parets Puecamquëñpa' ñeñt'pa' ñeñtcha'ña allochña yapa' corretsayach e'ñe cohuen yocsheñeshocmañen.

Atto ñerra'm añach ye'nen ñeñt muenatse'tateney yechetspa' amach erroteno't yame'ñeroña Yompor

⁷⁻⁸ Tarro'mar ñerra'm añach ye'nen ñeñt atet muenatse'tateney yechetspa' ñeñt'pa' atet yepena ñerra'mrrate' čha ye'moñe'teñ Yompor, ñeñto'marña čhach yatpare'teññañ po'ñoñ. Amach erroteno't yame'ñeroña Yompor ñerra'm añach ye'nen ñeñt atet muenatse'tateney yechets. Ñaña ñerra'm attach yepenapa' amach erroteno't yocshacheña Yompor.

⁹ Tarraña sapa' ama aḡeye' soctape'chatenaye sechets; añña soctape'chatene' Parets Puecamquëñ ñerra'm po'ñočh Puecamquëñpa' o' yečherra seyočhro. Tarraña ñerra'm eseshas ama echenaye Cristo Puecamquëñ seyočhropa' ñeñtesña po'ñočhpa' ama puechemereyayso Yompor. ¹⁰ Ñehua, ya arromña'feypa' čhocmach yerroma arr patsro

ochñartso'marecop. Tarraña ñerra'm Cristo yeçhena yeyoçhro yecamquëño'tpa' çhocmach yocrrena tarro'mar Yomporpa' e'ñe pocte' enteney. ¹¹ Yapa' yeñoteñ Yomporpa' ahuo't tantaterran Puechemer ñeñt' Cristo Jesús po'rromño. Ñaña ñerra'm Yompor Puecamquëñ yeçhena ya yeyoçhro, ama't arromña'teypa' yapa'çho'ña tantatuerreycha' yerromño. Parets Puecamquëño'tñapa' yocrra'huerrach, ñeñt'ara Puecamquëñ ñeñt' yeçhetsa te' yeyoçhro.

¹² Ñeñto'marña masheñnesha ñaña noçhanesha, te'pa' añ e'ñe poctetsa o'ch e'ñe atet yepena ñeñt' atet co'tape'chateney Parets Puecamquëñ, ama pocteyaye o'ch atet yepena ñeñt' atet co'tape'chateney yechets. ¹³ Tarro'mar ñerra'm allo'na yocrra'nena ñeñt' atet co'tape'chateney yechetspa' ñerra'm yerromapa' yechenca'huerrach yo'chñaro't, tarraña ñerra'm Parets Puecamquëño't o'ch ya'ypo'ñerr ñeñt' atet p'atse'tateney yechetspa' yañapa' corretsayach.

Atto ñeñtey e'mñotene' ñeñt' atet co'tape'chateney Parets Puecamquëñ, ñeñteyñapa' o' po'ño'ch puechemer perrey Yompor

¹⁴ Tarro'mar allohueney ñeñtey e'mñotene' ñeñt' atet co'tape'chateney Parets Puecamquëñ, ñeñteyñapa' o' po'ño'ch puechemer perrey Yompor. ¹⁵ Ñeñto'marña amach alla yem'cha'terroro atet ñerra'mrrate' ñeñt' ñañrets, atarrcha' mecha'tenan pamo'mte'. Tarro'mar yapa' allempoteñ o' yaguërrñañ Yompor Puecamquëñ yañapa' o' puechemer perrey po'ño'ch. Ñeñto'marña amach yem'cha'nañoteye' yema'yocheño'tpa' o'ch yeçhore'ch, o'ch yoch: "Apa." ¹⁶ Tarro'mar ñeñt'ara Parets Puecamquëñ ñeñt'ña yeñotatene' yeyoçhro po'ño'chpa' o' puechemer perrey Yompor. ¹⁷ Ñaña yapa' yeñoteñ atto o' puechemer perrey Yomporpa' yapa'çho'ña yagapapretercha' Cristo ora ñeñt' allpon o'patatenya Yompor. Ñerra'm çho yemueroçhta Cristo'marecop te', atet pe't ña atarr mueroçhte't ahua't añe patsro, esempohuañen yapa'çho'ña yecohuentapreterach.

Atto ama't yemueroçhetuanena añe patsro, ñeñt'pa' ama esoye'yenteñe

¹⁸ Ama't yemueroçhetuanena añe patsro, ñeñt'pa' ama esoye' nenteñe. Tarro'mar neñoteñ esempohuañenpa' ellochña nanac yecohuentapretera Cristo. ¹⁹ Ama't ora allpon ñeñt' yentyen arr patsro ñeñt' yeçhcatua Yomporpa' ñetpa'çho'ña elloña atarr cohueñet esempohuañencha' Yomporpa' orrtatuerreycha' ñeñtey o' puechemerasha' perrey, attoch allempochña o'ch yecohuentapretera Cristo. ²⁰ Tarro'mar ahua't allempo atpare'te't Adán, Yomporña'pa'

ahuo't a'huañatan atto atarr sherbañ nanac ñeñt ora allpon pueyečcatar. Allempoñapa' o'huañ tama sherba'. Tarraña pueyečcatarpa' ama erroť po, tarro'mar atet muenen Yompor. Tarraña ama't atet panetaña' elloña te'pa' čhocma cohueñet attoch esempohuañen Yomporpa' o'ch alla a'cohuentatuerranet. ²¹ Tarro'mar ora allpon ñeñt yentyen aňe patsropa' atet anaretet ñamet čhocmach mellasha'tuet, allempoñapa' o'huañcha' sherbet. Tarraña ñerra'm esempohuañencha', ñeñtey o' puechemer perrey Yompor o'ch yecohuentapretera Cristo, ñaña allempoña ora allpon Yompor pueyečcatarpa' ñetpa'čo'ña o'ch alla a'cohuentataretetuerret ñamet. ²² Yapa' yeñoteñ ora allpon ñeñt yentyen aňe patsropa' čhocma mueroče'tyenet ama't teme'ttsen, tarro'mar ama a'cohuentatuareterra'. Nanac llecanrroetyenet atet ñerra'mrate' coyanesha' ñerra'm o' čhap allempoch cheyore'ten nanaccha' atsotenana pue'mar. Nanac llequēñtso'tsen tarremphuach allempoch eñalletatuan pue'mar. Allempoñapa' nanaccha' cosheñtso'tsen, tarro'mar o' eñalletatuan pue'mareťoll. Atetcha' perraña ñaña Yompor pueyečcatarečno, nanaccha' cosha'rterret esempohuañencha' allempoch a'cohuentataretetuerret. ²³ Ama ñapťayaya Yompor pueyečcatar mueročtetso. Yapa'čo'ña čhocma yemueročetyena arr patsro, amach e'ñeye' yeñmateno yeyočhro. Tarraña ama't atetpa' o' yechen Parets Puecamquēñ ñeñt yechetsa yeyočhro ñeñt ñanom apueney Yompor, allotña'p' orameñ ñaña ñeñt o'patatenya pa'namen. Ñeñto'marña yeñoteñ esempohuañenpa' aphuerreycha' ora allpon ñeñt o'patatenya. Ñeñto'marña yecueñ esempohuañen Yomporpa' o'ch orrtatuernay ñaña atto yapa' o' puechemerasha' perrey. Allempoña ya yechetspa' a'po'poñetuernaycha' attochña yecohuentapretera Cristo. ²⁴ Allempoteñ o' yaguerrñañ Yompor Puechemer ñeñt Cristo yapa' yeyemteññaña ñeñt o'patatenya ñeñtcha' atet perrnay esempohuañen. Ñeñto'marña allempoteñ o' ya'queshpatareterra čhocmach yecueñ esempohuañen allempoch a'po'poñetuernay yechets attochña yecohuentapretera Cristo. Po'ñočhpa' ama a'po'poñetuernaya' yechets, ñeñto'marña teme'ttsen yecueñ. Ñerra'm o' a'po'poñetuernayeñ yechetspa' allempoñapa' amate' palltenaňe o'ch yeyemteññaña ñeñt atet muenateney ña. ²⁵ Tarraña ñerra'm čhocma yeyemteña Yompor ñeñt atet oteneý yeñoteñ atetcha'ña perrnay esempohuañen. Nehua, ama't ama orrtena', te'pa' yeyemteñoť ñapa' e'ñepa'chña yocsheñeshocmañen yecueñ. Amachña čha yemuenme'chatsche.

Atto enamuennay Parets Puecamquëñ Yomporeshot

26 Ñaña attecma Yompor Puecamquëñ ñach yeyenpuene' ñerra'm esempo ama errof es apen yenteno. Ñehua, atet ñerra'mrrate' allempo yellquëñsha' yema'yochena ñato' ama yeñoteñe escha'ña yenamña Yompor ñeñt e'ñe pocte' enten ña. Allempoña Parets Puecamquëñpa' ñachña enamats yocop e'ñe puellcapreteñoŕey ya, e'ñech pue'narña'teñoŕ, amach çhoye' eñoreno attoña enamatennay Yompor yocop. 27 Tarraña Yomporpa' cohuennay allohueney ñeñt atet yocape'chen yeyochro, ñeñto'marña ñapa' eñoteñ ñeñt atet enamuennay Puecamquëñ, tarro'mar Puecamquëñpa' añach enamuennay ñeñt e'ñe pocte' enten Yompor yocop ñeñŕey o' pueyochresha' perrey Parets.

Ñeñŕey e'ñe eñotuaye't ahuat Yomporpa' ñapa' atarr coçhnesha' o'patatenya

28 Ñaña ama't es yehuapoya, yapa' yeñoteñ Yomporpa' ñach a'poctatene' yocop, allohueney ñeñŕey morrentenaya ña, ñeñŕey acrareŕey o'ch atet yepeññañ ñeñt atet muenen ña. 29 Tarro'mar allohueney ñeñŕey e'ñe eñotuaye't Yompor ahuat, ñeñŕeycha' ame'ñerraya esempo, ñañapa' cotape'che't ahuat yocop ñeñŕicha' atet muenatey, allochña' yach cotape'cherrets cohuen attochña yeyeçhquërra e'ñe ora atet ñerra'm Puechemer ñeñt Cristotets. Allochña' allohueney yepo'narcha' yepeñ Cristo ama't shontey ñeñŕey ame'ñetsa. 30 Ñehua, allohuen ñeñt atet cotape'che't Yompor yocop ahuatpa' allempoña ahuo't çhap allempoch çhore'terrey o'ch yame'ñera. Allochña ñeñŕey açhore'tareteypa' ñañapa' oten yocop e'ño' pocte' enteney e'ñe yeyemteñoŕt Cristo. Allochña' allohueney ñeñŕey e'ñe pocte' enteney, Yomporña' oten yocop yecohuentapretero'ch Cristo esempohuañen.

31 Ñeñto'mar te'pa' o'ch notas, Yomporpa' atarr cohuen morrentenya. Ñaña yapa' yeñoteñ atto nanac morrentenya Yomporpa' ama't eseshapa' amach errotent o' huañañperetoña atto morrentenya. 32 E'ñe puemorrenteñoŕey ya ama't e'ñe ña Puechemerpa' ama mopa'tamŕesye, elloña a'rroyonay Puechemer ñach rromosets yocop allohuenacpay. Atto atarr morrentenya attoña yapa' yeñoteñ elloña attecma esocmañencha' apa'yeney e'ñe allempoteñ apuerrey ñaña Puechemer Cristo. 33 Ñeñŕey acerrr Yompor ñeñŕeycha' puechemer perr, ama't esesha' muenenayeñ o'ch otteñe'chenyetañ, tarraña ñeñŕpa' ama esoye' yenteñe yocop, tarro'mar Yomporpa' oten e'ño' pocte'

enteny. Amach errotenoť esesha' yetsa'taterrayo yo'chñar,
³⁴ tarro'mar Cristo Jesús'pa' ña rromats yo'chñarecop, elloña
 ñaña tanterrtsa po'rromñoť, ñaña te'pa' ña partsotapretenaya
 Pompor po'cohuenroť; alloťeñña ñapa' eñorena yocop
 Pomporesho attoch es e'ñe a'pocstatennay. ³⁵ Atarr nanac
 morrentenya Cristo. Ama't eseshapa' amach errotenoť
 puerratañpesyetoña atto nanac morrentenya Cristo.
 Ñaña ama't erroteno'tsenya amach huañerroña atto nanac
 morrentenya Cristo. Ama'tcha' añ yečapoya mueročhteñets,
 ama'tcha' nanac llequēntso'tseney, ama'tcha' ñerra'm
 esempo pue'moñe'teñoťetay coťare'tenyet, ama'tcha' ñerra'm
 esempo yepallta'yena ñeñťcha' yerren, ama'tcha' ñerra'm
 esempo yepallta'yena ñeñťcha' yechorrena, ama't ñerra'm
 esempo añcha'nočheno'tseney, ama'tcha' ñaña allempoch
 muetsayet, amach errotenoť puerratañpesyetoña atto nanac
 morrentenya Cristo. ³⁶ Ateťcha' perryetña ya esempo e'ñe
 atet anaret Yompor po'ñoño ñeñť aquellca'huaret ahuatoteñ.
 All anuaret ñeñť atto puesheñarr ñeñť ame'ñatse'tpa' otane't
 Yompor, ñeñťpa' e'ñe atet ot:

E'ñe yame'ñeñoťeť papa' yellapene'tcha' e'ñe autsa yemt-
 sanate' ñeñť ye'moñe'tene'. Ñetpa' e'ñe amtsen entenyet
 e'ñe atet ñerra'm carrnero ñeñť čocmach aneñet
 allcha' muetsanachet.

³⁷ Ama't yemueročhetuahuapa' elloña nanaccha'
 ahuamencat perrey Cristo ñeñť nanac amorrentña yenten.
³⁸ Ñeñťo'marña napa' neñoteñ, ñeñťey ame'ñenaya Cristo
 Jesús ñeñť Yepartseshar yepenpa' ama't erroteno'tsenya
 amach errotenoť huañerroña ñeñť atto nanac morrentenya
 Yompor. Ama't allempoch yerroma, ama't allempo ñaña
 yocrrenmeñpa' čocmachña morrentenya. Ama't Yompor
 po'millañoťeñnaneshar ñeñť huetsa pue'ntañoťpa' amach
 errotenoť puerratañpesyetoña ñeñť atto morrentenya.
 Ama't ora allpon ñeñť añcha'nočhetyetsa, ama't ñaña ora
 allpon ñeñť añcha'tareťetyetsa arr patsropa' ñetpa'čho'ña
 amach errotenoť puerratañpesyetoña ñeñť atto Yomporpa'
 nanac morrentenya. Ama't ñeñťcha' yehuapoya te' ama't
 ñaña ñeñťcha' yehuapoya tsapatonet, ñeñťpa'čho'ña
 amach errotenoť a'huañañpesyetoña atto Yomporpa' atarr
 morrentenya. ³⁹ Ama't errponenaparen yetuanena atarr
 eno, amapa' ñaña o'pono patso ama't ñaña oño o'pono,
 allpa'čho'ña amach errotenoť yesa'nmoña atto Yomporpa'
 nanac morrentenya. Ama't ora allpon ñeñť yečcatua
 Yompor añe patsropa' ñetpa'čho'ña amach errotenoť
 a'huañañpesyetoña ñeñť atto nanac morrentenya Yompor,

allohueney ñeñtey ameñenaya Puechemer ñeñt Cristo Jesús ñeñt Yepartseshar yepen.

9

Atto Pablopa' atarr llequënana pamo'tsna'tarnesha' ñeñt israelnesha' ñeñt acrañ Yompor ñeñtcha' pueyochresha' pañ

1 Ñaña ñeñtcha' notas te'pa' ñeñtpa' e'ñe po'ñoçh atet, ama çhoye' neshquënso, tarro'mar napa' o' nameñera Cristo. Ñaña Parets Puecamquën ñeñt yeçhetsa neyoçhro, ñeñtña e'ñe eñotenen ñeñtcha' atet notas ñeñtpa' e'ñe po'ñoçh atet. ²⁻³ Napa' atarr nanac nellquëña nemo'nasheñnesha' ñeñtara judionesha' tarro'mar ñetpa' shontetañpa' ama ameñeñeto Cristo. Ñeñtña nenen neyoçhro atto atarr nellquënanet. Ñerra'm errotenot na'queshpatanet o'te' na'queshpaterranetañ. Ama't pocte' nenteñeñ o'ch na'cmareñtañ ñañeña attoch nechenquërra allochñapa' amach nentere Cristo, ñerra'm atet neñapa' ñetpa' ñato' o'te' na'queshpaterranetañ. Tarraña ama't atet neñatstañpa' amach errotenot na'queshpaterraneto. ⁴ Ñaña namo'tseshä' judionesha' ñeñtara israelena'tarnesha' ñeñt acrañ Yompor ahuat ñeñtcha' puechemereshä' pañ, ñaña ñetpa' çhocma entoñetañe't Yompor po'partsoña ahuat. Ñaña ñet Yomporpa' çhocma a'pocatanetañe't ahuat attoch çhocmach a'natenanet. Ñaña ñetpa' apanetañe't Yompor po'ñoñ ahuat, ñeñtña eñotatahuete't ñeñt atet pocte' enten Yompor. Ñaña ñeñtara judionesha' ñeñt eñotaye't attoch nanac e'ñe coçhneshot sherbeñetañ Yompor pa'paclo. Ñaña ñeñtara judionesha' Yompor ahuatpa' ahuo't otanetañ ñeñtcha' atet apuerranet esempohuañen. ⁵ Ñaña ñeñt ñanom yamo'mtayñeneshañ* yepe't ñeñt nanac sherbaye't Yompor ahuatpa' ñetpa' ñeñtara judionesha' pamo'tsna'tarneshañ. Ñaña ama't judiona'tareshotpa' ahuo't eñalletosa Cristo arr patsro ñeñtara ñeñt nanac Partsotets ñeñt pomnaren pene' allohuen esocmañen. Ya'ye'choçhtatoñepa'ch tayoteñ ama't errponohuañen. Ñeñtpa' attetepa'ch Nompore.

⁶ Tarraña ama't allohuen judionesha'ña ama'tcha' ama ameñereto Cristopa' Yomporñapa' amach errotenot huañerroña po'ñoñ ñeñt atet otanete't ahuat; ñeñtpa' çhocmach etsota ñeñt atet otanet, tarro'mar ñapa' ama puenesho po'ñoñ. Ñaña allohuen ñeñt israelena'tarpa' ama allohuenacmaye' Yomporena'tareyayeto. ⁷ Ñaña

* 9:5 Pablo otatse't yamo'mtayneshañ tarro'mar ñapa' judionesha'.

ora allpon po'mrenña Abrahampa' ama allohuenacmaye' po'noch Abraham puechemer entapreteñe Yompor. "Aña e'ñe puechemer entapreteñ Yompor ñeñt Isaac po'mrenña", ñeñt atet otan Yompor Abraham ahuat. ⁸ Ñeñto'marña yeñoteñ allohuen Abraham po'mreneña' ama allohuenacmaye' po'noch puechemer penaneto Yompor. Añachña puechemer pen ñeñt yemtenaya Yompor ñeñt atet otenanet. ⁹ Ñehua, yapa' yeñoteñ atet ahuat Yomporpa' otan Abraham ñeñtcha' aḗ, ñeñtḗpa' atet ot: "Tsapat charo atet ñerra'm te' añempo, o'ch nohuerra allempoñapa' petapor Sarapa' cheyore'tcha' ñeñtḗpa' asheñorrcha' ñeñtcha' Isaacatats." Arrpa' allohua ñeñt atet Yomporpa' otan Abraham.

¹⁰⁻¹³ Elloña te'pa' o'ch alla neyerpaterrser attō yatañ Isaacpa' ahuo't yoran Rebeca ñeñtcha' puetapor ḗa'. Ñaña allempo Rebecapa' totana Isaac puechemer ñeñt epuesha' Yomporñapa' otan Rebeca, atet och: "Ñeñtcha' eñalletatsa ñanom pechoyorpa' añcha' pomnaren pene' ñeñtcha' eñalletatsa chenta'." Arrpa' allohua ñeñt atet Yomporpa' otan Rebeca. Ñaña allempo ama eñalletena' puechoyoresha' Yomporñapa' ahuo't ye'choña paterr puechoyor ñeñt muenen ña, ama't allempopa' ama es ye'chcateneta' ama't ñeñt cohuen enten Yompor amapa' ñeñt ama cohuenayaye. E'ñe attā ahuo't ye'chana puesheñarr ñeñt muenen ña; cheshatollpa' ama pueye'chcateño'feye' cohuen ye'chyoña Yompor, tarro'mar cheshatollesha'pa' ama es ye'chcateneta' ama't coñe'ta. Attoña ahuo't etsota Yompor po'ñoñ ñeñt atet aquellca'huaret ahuatoteñ, ñeñtḗpa' atet oten Yompor: "Jacobpa' atarr nemorrenteña, pa'mo'nasheñña Esaúpa' ama tama nemorrenteño." Atet ḗa attoch ye'noch Paretspa' ña acrañtetsa ñapuef añecop ñeñt e'ñe ye'chena ña.

Atto Yomporpa' e'ñe pocte' entan o'ch puechemer ḗan ñaña ñeñt ama judioneshayaye

¹⁴ Te'ña ñato' sapa' chate' sotenapañ ñeñt atet ote't Yompor, ñeñtḗpa' amate' pocteyaye. Tarraña o'ch notas ñeñtḗpa' e'ñe pocte' atet ote't Yompor. ¹⁵ Tarro'mar yapa' yeñoteñ atet Yomporpa' otan ahuat Moisés, ñeñtḗpa' atet och: "Ñerra'm esesha' neye'cha na ñeñtcha'ña neyenpa'. Ñaña ñerra'm esesha' neye'cha na ñeñtcha'ña atarr nemorrentena." ¹⁶ Ñeñto'marña yapa' yeñoteñ ñerra'm esesha' muenen Yompor ñeñtcha'ña a'natena, ñeñtḗpa' e'ñe pocte'. Ñeñtḗpa' ama añofeyaye ñeñt atet yemnen ya acheñey, ñaña ama ya'muerochtame'teñoña ye'chenyoña Yompor. E'ñechña puemuereñoña ye'chenana erra'tsen muenen

ña. ¹⁷ Ñaña yeñoteñ ñeñt atet Yomporpa' otan ahuat ñeñt añcha'tarettatset Egipto. Ñeñtpa' atet otan añcha'tarett Faraón: "Na pene', ñeñtep añcha'tarettetsa, attoch peshoch norrtat nehuamenc acheñeneshesho. Attochña ñetpa' o'ch serrpare'tyesonet erracmañen atto na ñeñten nanac ahuamencañtetsa." ¹⁸ Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor o'ch echarrtenet pueyo'chreto, ñachña muenatenahuet.

¹⁹ Te'ña ñato' sapa' chate' sotenapañ: "Ñerra'm Yompor ñach yemnatene' ñeñt e'ñe atet muenen ñapa', yapa' amach errof yepe, ñeñto'marña amate' pocteyaye o'ch enteney yapa' amo' cohuenayayye, ñerra'm ña yemnatatene' o'ch es atet yepa." Ñato' sapa' attate' soctape'chatsetyen seyo'chro. ²⁰⁻²¹ Tarraña masheñeshacha' ñaña no'chaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atet: Ñato' esesha'pa' o'ch ye'chcatan coyemñ ñeñt patsrro'. Ñeñt e'ñe atet muenen ña, ñapa' ñeñtcha' atet ye'chcat. Ñato' o'ch ye'chcatan eprroga coyemñ, puerrogarrpa' atarrcha' cohuen, e'ñech cohuenof sherbenan pamo'mte'. Alloñtapa' ñeñt a'pchat patspa' o'ch alla ye'chcaterranerr po'prroguen puecoyemñ. Ñato' ñeñtpa' amach tama cohuenaye' pe, tarro'mar ñeñt ye'chcate'pa' ama mueno o'ch orrtach acheñeneshesho. Tarraña coyemñpa' ñerra'm eñoreña'pa' amach sasare'tanoña pamo'mte', amach oche: "Eso'marte' peye'chcaten atet, ama cohuenaye' pe'pa'no." Tarro'mar ñerra'm pamo'mte' muenets atetcha' pan puecoyemñ, coyemñapa' amach errof es po. Ñeñto'marña yeñoteñ Yomporpa' ama't erroten muena' o'ch atet ponay, ñeñtpa' e'ñe pocte' ñocop, tarro'mar Parets añecoppa' ña otets ñapuef. Ñaña yapa' amach yesasare'che, tarro'mar Paretpa' ama asasare'tpahuoyaye.

²² Ama't atteñpa' elloña Yompor ahuatpa' atarr ahuantane't atto nanac atpare'che't ñeñt o'pate't chenquenets. Ñerra'm ña muenatseñ e'ñe pocten attoch tsa'taterranetañ e'ñe allem-pocma po'yoro'chenño. Attochña entatanetañ po'huamenc tarraña ama atteye' paneto, atña ahuantanete't po'chñaret. ²³ Allochñapa' attoch esempopa' chap o'ch orrtaterrnay allohueney po'cohuenña, ñeñtey o' muererrya yaña, ñeñtey ahuat Yomporpa' cotape'chonaye't yecohuentapretero'ch esempohuañen. ²⁴ Atet ñerra'm ya ñeñtey judioneshay, ama't ñaña ñeñt ama judioneshayaye, tarro'mar ama judioneshayaya ñapuef chore'tenoña Yompor ñeñtcha' ame'ñaya. Al-

lohueneyña te'pa' o' chore'terrey o'ch e'ñe yame'ña'huera.
 25 Ama't atet ote'teña Yompor ahuat, allempo otan Oseas ñach serrpare'te' ñeñt atet och Yompor, ñeñtpa' atet ot Yompor:

Ama't ñeñt ama nechemereyaye te'pa' tsapatonetñapa' e'ñech nechemer neṣohuerranet. Ama't po'poñ acheñ ñeñt ama nemorrenteno te'pa' tsapatonetñapa' e'ñech nemorrentuerranet ñamet.

26 Ama't e'ñe all ahuat Yomporpa' otanete't: "Sapa' ama nechemereyayso", te'ña allpa' o'ch eñotueret, te'ñapa' e'ño' puechemerasha' o' ṣohuerranet Yompor, ñeñt Yompor ñeñt ama arromñateshayaye ama't ahuata.

27 Elloña Isaías ñeñt a'mtaye't Yompor po'ñoñ ahuatpa' ñapa'cho'ña atet eñose't, ñeñtcha' atet perra israelena'tarnesha', ñeñtpa' atet ot: "Israelena'tarnesha'pa' merenach nanac shonte' atet ñerra'mrrate' atet yenteññañ ontap po'mñer nanac shonte'. Tarraña ama'tcha' shontetañpa' amachña allohuenacmaye' a'quesḥpataretterreto; patanta'ttsachña ñeñtcha' a'quesḥpataretterrtsa.

28 Tarro'mar Yomporpa' e'ñech tsa'tatuerrana shonte' acheñ arr patsro ñeñt atet otane't ñeñt e'maye't po'ñoñ. Amach allo'na ahuanta'nenaneto po'chñar."

29 Ñeñtpa' e'ñech atet perra ñeñt atet ote't Isaías, ñeñtpa' atet ot:

Ñeñt nanac Paretspa' ahuo't a'quesḥpaterrey ama't puesheña'ttso'teya. Ñerra'm ama atet ṣa'yeñepa' allohueneypa' e'ñech yoclla'huerrañ e'ñe poctacma, atet ṣanet ahuat allempo a'cllatuaretta allohuenet ñeñt ye'chatse't añetso Sodomo ñaña Gomorro.

Arrpa' atto Yomporpa' ama pocteye' entenano judionesha'

30 Ñeñto'marña te'pa' yeñoteñ acheñenesha' ñeñt ama judioneshayaye ama't ama e'neñeto attoch e'ñe pocte' entanet Yomporpa' ñetñapa' ahuepa't enteret ñeñt e'ñe atto pocte' enteney Yompor allohueney ñeñtpa' ñeñtña atto yeyemteña ñeñt atet oteney Yompor. 31 Tarraña judionesha' ama't e'neñetañ attoch pocte' entenanet Yomporpa' tarraña ñetñapa' ama entereto, tarro'mar aña e'ñe yemtenet o'ch e'ñe etsotuetañ ora allpon ñoñets ñeñt atet anarettenet; tarraña ama es etsotuenaye ora allohuen. 32-33 Yeñoteñ ama enterreto attoch pocte' entenanet Yompor, tarro'mar ama yemteñeto Yompor ñeñt atet otenanet. Ñetpa' aña e'ñe yemtenet o'ch ye'chcatyenet ñeñt e'ñe cohuen entenet ñet. Ñeñtpa' e'ñe atet ṣohuet ñeñt atet oten Yompor po'ñoñ, ñeñt anua'ret ahuatoteñ, ñeñtpa' atet ot Yompor ahuat:

Napa' o'ch nemñanet puesheñarr ñeñtcha' atarr sherberrets all añetso ñeñt pa'so'cheñ Sión ñeñtara Jerusaléñ. Tarraña ñetpa' chach tsena'chet. Puetsena'teñoŕetpa' o'huañ yemtenanet ñeñt atet noctape'chatanetañ. Tarraña ama't erra'tsena ñeñtcha' ame'ñerraya ñapa' ñetñapa' ellopa' amach alla es e'nerrete'te.

Ñeñtapa' atet toma'ntachet ahuat: Cristopa' ñach anarettatsa arr patso atet ñerra'mrrate' mapue' ñeñt atarrcha' sherben. Tarraña judionesha'ñapa' ama asherbenaye' eñcheto ama't mamesha, cha ottet ñerra'mrrate' atta epoto'tatse'tyeset ñesho ñeñt atma'ntataret mapue'.

10

¹ O'ch masheñneshacha' ñaña nochaneshacha' notas, napa' neyo'chrocmañen nemneñ namo'tsesha' ñeñtara israelena'tarpa' o'te' queshpa'huerret ñamet. Ñeñto'marña ñocpuetpa' chocma nema'yochamŕpenanet Yompor. ² Napa' neñotenanetañ e'ñe po'ño'ch mueneñetañ o'ch e'ñe sherberet Yompor, tarraña ama't atet muenenetañpa' po'ño'chpa' ama chenaneoña pueyo'chreto ñeñt po'ño'ch atet muenen Yompor. ³ Po'ño'chpa' ama chenaneo pueyo'chreto ñeñt atet muenen Yompor atetcha' ye'pa attoch pocte' enteney ama't e'ñe allohueney. Ñetpa' otenapuetañ e'ñe pueye'chcateñoŕet ñeñt cohuen entenet ñetpa' Yomporñapa' pocte'te' entapretenanet. Elloña ñetpa' ama mueneñeto o'ch yemterrñañet ñeñt atet oteney Yompor, ñeñtcha' attoch e'ñe po'ño'ch pocte' enterrey ña. ⁴ Tarro'mar te'pa' o' huapa Cristo ñaña atet oteney Yompor ñerra'm yame'ñerrñaña Puechemer ñeñt Cristotetspa' attochña e'ñech pocte' enterreyña, ama't erra'tsena ñeñtcha' ame'ñerraya. Allochñapa' o'huañcha' aña yeyemtena o'ch atet yepohuen e'ñe cohuen ora allpon ñoñets ñeñt atet anaret attochña pocte' enterryeñ Yompor.

Arrpa' attoch e'ñe pocte' enteney Yompor ama't eseshaya

⁵ Ama't Moiséspa' atet ote't ahuat: "Ñerra'm yepohuenach e'ñe poctacma ñeñt atet anaretpa' esheccha'ña corretsayach errponohuañen." ⁶ Tarraña attoch po'ño'ch pocte' enteney Yompor ñeñtapa' e'ñech yeyemteñoŕt ña ñeñt atet oteney: "Amach yoctape'chatsto yeyo'chro, ñato' este' yepalltena tarro'mar ama yepallteno o'ch ahuey ento attoch ya'suater Cristo arr patsro. ⁷ Amaña yepallteno o'ch ahuey ñaña arromñañeshesho ñeñt o'pono'tsa'yen patso o'ch yetantatera' Cristo tarro'mar ñapa' ahuatoŕeñ o' tanterra, ama arromñañesho'tsenayaye." ⁸ Tarro'mar Yompor po'ño'ñapa' atet oten: "Añ cohuen ñoñets alloch

yequeshperra, ñeñtpa' ama torrapahuoyaye attoch yenter, tarro'mar ñeñtpa' e'ñe yesho'tsen. Ñaña ama echarroyaye attoch ye'ñoroña, tarro'mar ñeñtpa' e'ñe yeyo'chro'tsen." Ñeñtpa' ñeñtara ñoñets ñeñt o' neserrpare'tatas atet añ poctetsa o'ch yame'ñera Cristo. ⁹ Tarro'mar ñerra'm cho ye'ñorena atto Jesús'pa' Yepartseshar yepeñ, ñaña ñerra'm e'ñe yeyo'chrocmañen yame'ñeña atto Yomporpa' ahuo't tantater po'rromño'pa', allochñapa' yapa'cho'ña a'queshpatareteycha'. ¹⁰ Tarro'mar ñerra'm yame'ñera Cristo yeyo'chrocmañen, Pomporñapa' e'ñech pocte' enteney, ñaña ñerra'm chochña ye'ñorena atto o' yame'ñera Cristo, attochña yapa' a'queshpatareteycha'.

¹¹ Ñaña Yompor po'ñoñ ñeñt aquellca'huaret ahuatoteñ, ñeñtpa' atet oten: "Ama't erra'tsena ñeñtcha' ame'ñerraya Yomporpa' ñetña ellopa' amach alla es e'nerrete'te."

¹² Tarro'mar ama judioneshayaya ñapue't ame'ñenayoña Yompor. Ama't ñeñt ama judioneshayaye, ñetpa'cho'ña attecma ame'ñeñet Yompor. Tarro'mar e'ñe patrra Yepartseshar ñeñt e'ñe allohuenacpay. Shonte'ch esocmañen apa'yesuay ama't eseshaycha' ñeñtey enamuene'.

¹³ Tarro'mar atet oten Yompor po'ñoñ: "Allohuenoteypa' ama't erra'tsenoteta chore'te' Yompor pueyo'chrocmañen attoch a'queshpatareterretpa' Yomporñapa' a'queshpateranetcha'." ¹⁴ Tarraña amach errotenot ye'chore'cheña Cristo ñerra'm ama cho yeyemteño. Ñaña amate' errotenot yeyemterona ñerra'm ama es ye'mare'tperro Cristocop. Ñaña amach errotenot ye'mare'che ñerra'm ama eñalle ñeñtcha' a'pote' po'ñoñ.

¹⁵ Ñaña amach errotenot a'poteññañetoña Yompor po'ñoñ, ñerra'm ama ña llesensenahueto. "Nanac cosheñtso'tseney ñerra'm esempo huapa ñeñtcha' a'potose' cohuen ñoñets ñeñt huetsa Yomporeshot alloch yocsherra e'ñe cohuen yeyo'chro." Añpa' allohua ñeñt e'ñe atet aquellca'huaret Yompor po'ñoño ahuatoteñ.

¹⁶ Tarraña ama't ñeñt pue'maran Yompor po'ñoñ amaña allohuenacmaye' ame'ñereto añ cohuen ñoñets ñeñt huetsa Yomporeshot. Ama't atet ote't Isaiás ahuat, ñeñtpa' atet ot: "Ama Nompore eseshaye' ame'ñenayo ñeñt atet o' neserrpare'tatuanet." Arrpa' allohua ñeñt atet ote't Isaiás ahuat.

¹⁷ Tarraña ama't atteñpa' elloña napa' o'ch notas, e'ñe yeserrpare'teño't Cristo po'ñoñ, acheñenesha'ñapa' o'ch e'mñoteñet. Allochñapa' e'ñe pue'mñoteño'tetpa' o'ch ame'ñeret Cristo.

¹⁸ Ñato' sapa' chate' sotenapañ judionesha'pa' ñato' amate' pue'mareto añ cohuen ñoñets ñeñt huetsa Yomporeshot.

Tarraña napa' o'ch notas, po'ñoçhca'ye pue'maret tarro'mar atet oten Yompor po'ñoñ:

Ñeñt' a'potene' Yompor po'ñoñpa' o' eñotatyaset erracmañen arr patsro, o' epa'huamocha Yompor po'ñoñ erraparen.

19 Te'ña sapa' ñato' çhate' sotenapañ judionesha' ñeñtara israelena'tarpa' ñato' amate' çhenaneto pueyoçhreto ñeñt' atet cotape'chen Yompor. Tarraña napa' o'ch notas, po'ñoçhca'ye eñoteñetañ Yomporña'pa' o'ch ame'ñaterrana ñaña po'poñ acheñ ñeñt' ama judioneshayaye. Ñehua, ñanompa' o'ch neyperpaterrsa ñeñt' atet ote't Moisés. Moisés ahua'tpa' ahuo't quellcanet añ ñoñets ñeñt' atet och Yompor, ñeñt'pa' atet ot Yompor:

Napa' o'ch name'ñatera po'poñ acheñenesha' ñeñt' sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es eñoteneto. Tarraña napa' o'ch name'ñatuerranet ñetpa' sañapa' e'ñe sempa'teño'tenpa' o'ch se'moñe'terranet, tarro'mar allempo ñetpa' o'ch nechemeresha' neperranet ñamet. Arrpa' allohua ñeñt' Moisés po'ñoñ ñeñt' atet och Yompor ahuat.

20 Allo'tpa' ñaña Isaías ahua't ñaña'pa' ama mecha'tenano judionesha'. Ñapa' ahuo't eñotatanet ñeñt' atet och Yompor, ñeñt'pa' atet ot Yompor:

Po'poñ acheñ ñeñt' ama judioneshayaye ama't ñetpa' ama eseshaye' ne'nenaye, ñetña'pa' o' enterrnet. Ama't ama eseshaye' na'p'to'tenaye errotene'te'ña na ñeñt' atet nepena, tarraña nañapa' o'ch neñotaterranet ñeñt' atet nepena.

21 Ñaña ellonet Isaíaspa' serrpare'te't atetcha' perra judionesha' ñeñt' atet eñorena Yompor ñocpuet, ñeñt'pa' atet ot Yompor: "Napa' nellapene'tcha' çhore'tame'tene' añ acheñeneshar attoch ñetpa' o'ch ame'ñernnet. Tarraña amachña eseshaye' name'ñenayo, çhachña po'poñ entuennet allohuenet."

11

Atto judionesha'pa' a'ypo'ñare'ttenetañ, tarraña ama poctacmaye' a'ypo'ñenanetoña Yompor

¹ Tarraña ama't atteñ, napa' o'ch notas, po'ñoçh Yomporpa' ama e'ñe poctacmo' a'ypo'ña'huerrano pueyoçhresha'çhno, ñeñt'areta ñeñtet israelena'tarnesha'. Ate't ñerra'm na, napa'çho'ña israelena'taren tarro'mar napa' po'ñrenñen Abrahamañ ñeñtara Benjamíneñ mereñtsoren. ² Yomporpa' ama a'ypo'ña'huerrano pueyoçhresha'çhno. Ñetpa' e'ñe

eñotuanete't ahuat ñeñtcha' pueyochreneshachno pa'. Ñaña napa' neñoteñ amach a'ypo'ña'huerraneto, tarro'mar ñeñtpa' atet aquellca'huaret Yompor po'ñoño ama't ahuatoteñ. Sapa' ama't seyerpuenoña ñeñt atet pe't Elías ahuat. Ñapa' ahuo't otteñe'chan israelnesha' e'ñe puema'yocheño't Yompor. ³ Ñeñtpa' atet otan Yompor ahuat: "Nompore, namo'tsesha' ñeñtara israelena'tarpa' epaye' muetsanatennapet ñeñt pa'mtene' peñoñ. Ama't ñaña Nompore ñeñt altar ñeñt allot yeshervenpeña' o' e'ñe tore'tatuonapet. Ama't napa' o' e'ñe naptama' ñeñten pame'ñenaya. Ama't te' Nompore napa'cho'ña o'patennet ahuo'ch muetsanet nama'." Arrpa' allohua ñeñt atet otteñe'chane't Elías pamo'tsesha' Yomporesho ahuat. ⁴ Arrña'pa' atto eñorana'tana Yompor Elías ñeñtpa' atet och: "Amaca' paptayaya ñeñte'p name'ñenaya, elloña eñallmeñ canchrroch mil israelena'tarnesha' ñeñt name'ñenaya ñeñt ama concorpana'tenana' ma'yochaya ñeñt aye'chcataret ñeñt sochenet Baal. Ñetña'pa' nenenanet ellonet nocop." Arrpa' allohua ñeñt atet neyerpatensa atet ote't ahuat Yompor allempo eñorana'tana Elías. ⁵ Ñaña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña'pa' ama't puesheña'ttsapa' ahuo't ye'cherranet allochña'pa' attochña e'ñe puemuereño'fanetpa' o'ch a'queshpaterranet. ⁶ Tarraña e'ñe puemuereño'fanet ahuo't a'queshpatanet. Amaña año'feyaye atto cohuen es ye'chcatyenet ñet. Tarro'mar ñeñt cohuen ye'chcatyenet ñerra'm allo a'queshpatenetaña'pa' Yomporña puemuereña'pa' amate' a'queshpatañeye' yenteñe.

⁷ Ñeñto'marña yeñoteñ, israelena'tarpa' ama allohue-nacmaye' enterreto ñeñt e'nenet. Ñehua, ñeñt e'nenetpa' ñeñtpa' attoch e'ñe pocte' enterranet Yompor. Puesheña'ttsa enterre' ñeñt ye'chena Yompor. Tarraña po'potantañña'pa' ama enterreto ñeñt atet muenen Yompor ñeñt attoch e'ñe pocte' entuerrey tarro'mar ñetpa' chocma echarrtenanet pueyo'chreto o'ch pet ñeñt atet muenen Yompor. ⁸ Ñetña'pa' o' e'ñe atet pohuet ñeñt e'ñe atet anuaret Yompor po'ñoño ama't ahuatoteñ. Ñeñtpa' atet oten: "Yomporpa' ñach ama muenatahueto o'ch es chapahuet pueyo'chreto. Ama'tcha' cho es entenetañ ñeñt atet pena Yomporpa' amach chenaneo pueyo'chreto ñeñt atet muenen Yompor. Ñaña ama'tcha' e'mñoteññañetañ Yompor po'ñoña'pa' amach chapaneto pueyo'chreto ama't ahua'a ñeñt atet muenen Yompor. Ama't teme'ttsenpa' attecma penet." Arrpa' allohua ñeñt atet ote't Isaias ñeñtcha' atet perra judionesha'. ⁹ Elloña Davidpa'cho'ña

ñapa' atet ote't ahuat, ñeñtpa' atet ot:

Judionesha'pa' nanac a'nateña Yompor. Shonte' esocmañen echenet ñeñt alloch rrallme'chapretannenet. Tarraña ñeñtpa' cha shequënanet tarro'mar ñetpa' otenapuetañ Yomporpa' e'ñete' pocte' entenanet. Tarraña ñeñtpa' ama atteyaye. Ñeñtpa' ñeñtcha'ña a'chencaterrahuet. Attoch e'ñe tsa'tatuerranet.

¹⁰ Ellopa' alla oterrerr David ñocpuet, ñeñtpa' atet ot:

Arepa'ch es chapahueto pueyoçhreto ñeñt atet muenen Yompor, attetach ñerra'mrrate' aporo'yet ñeñt amach enteno. Chocmuepa'ch amueroçhtatarettenet e'ñech attet ñerra'mrrate' eñerr a'mo'ca'nenahuet ñeñt nanac amueroçhtatañ.

Atto Yomporpa' a'ypo'ñaneñ judionesha', ñeñtpa' añecop attoch a'queshpaterran ñaña ñeñt ama judioneshayaye

¹¹ Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar e'ñe patpare'teño'tet ñetpa' attoña Yomporpa' ahuo't ame'ñaterrana po'poñ acheñ ñeñt ama judioneshayaye attoch a'queshpaterranet ñamet. Attochña judionesha'pa'cho'ña e'ñe puempa'teño'tet Yomporpa' ñato' o'ch alla ame'ñeret Yompor e'ñe cohuen. ¹² Atto atpare'tenan judionesha' Yomporpa' po'poñeçhnoña acheñenesha' arr patsropa' ahuo't chap Janet attoch ame'ñeret ñamet Yompor. Ñehua, atto ama't patpare'teño'tetpa' yenpueñet po'poñ acheñ ñeñt ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueño'tetpa' nanaccha' yenpueret po'poñ acheñ ñeñt ama judioneshayaye.

¹³ Ñeñtpa' atet notenes ñeñtes ama judioneshayayso tarro'mar napa' allsensareten nach serrpare'tene' Yompor po'ñoñ socop ñeñtes ama judioneshayayso. Ñeñto'marña napa' nocshena, atarr cohuen asherben nenteñ ñeñt atet llesensenen Yompor. ¹⁴ Tarro'mar allochñapa' attoch name'ñatera ñeñt ama't ama judioneshayaye. Attochña ñato' judionesha' ñeñt e'ñe namo'tsna'taranetpa' e'ñe puempa'teño'tet Yomporpa' o'ch alla mueneret o'ch ame'ñerret ello atet sepena sa. Allochñapa' attochña a'queshpataretterret ñamet, ama't puesheña'ttsoa.

¹⁵ Tarro'mar ñeñt atto Yomporpa' ahuo't a'ypo'ñan judionesha', ñeñtpa' añecop attoch amo'tsterrana po'poñeçhno acheñenesha' arr patsro ñeñt ama judioneshayaye. Ñaña yapa' yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor,

attochña o'ch alla aguërranet; ñetña allempopa' çhach otterret ñerra'mrrate' rromot o' tantuerret. ¹⁶ Tarro'mar atto ñeñt ñanom judioneshatatset' ahuatpa' ñetpa' anarettete't Partsocop, allochñapa' po'mrenñenesha'pa'çho'ña ñetpa' acraretterretcha' ñamet e'ñe attecma. Ñato' o'ch yetma'ntacha atet pete't ahuat pocrramñ ñeñt nete't Partsocop. Ñeñt ñenmañ pocrrametpa' ahuo'ch yoreñet coñe't ñeñt nanac cohuen ñeñtcha' nenet Yomporecop. Ñaña atto ñeñt ñanom pocrramñ yorenet Partsocoppa' ñeñt'pa' e'ñe cohuen, añña allot yoret pocrrametpa' ñeñtña pocrramet orapa' e'ñech cohuenare'. Ñaña ñato' o'ch yetma'ntacha po'poñ ñeñt atet pena tsachreçh. Ñehua, ñerra'm erra'tsen tsach ñerra'm puerçhoçhno e'ñe cohuenare' puetacreçhnopa'çho'ña e'ñech cohuenare'.

¹⁷ Te'pa' ñeñtes ama judioneshayayso napa' o'ch notas, Yomporpa' ahuo't ellopa'tetstatan patantarr judionesha' ñeñt atpare'tene' ña. Allochñapa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoch. Ñehua, judionesha'pa' ñetpa' atet ñerra'mrrate' olivoch ñeñt e'ñe cohuen narmets. Tarraña ñato' ñeñt allpon puetaquërpa' ahuo't pecha'tamñset ahuo't huapore'chet. Allochñapa' attoch a'tapa'llateret epuet ñeñt puetsato'mar olivochtaquër ñeñt ama narmetsoyaye. Sa ñeñtes ama judioneshayaysopa' sapa' aña puetaquër sepene' ñeñt puetsato'mar olivochtaquër. Te'ñapa' o' a'tapa'llataterretset olivochtacro allot apecha'taret ñeñt ahupore'taret. Allochñapa' attochña sapa'çho'ña o'ch separrocmaterr epas ñeñt ame'ñenaya Yompor, ñaña attoch sagapapreter Yompor pa'nateña ñeñt atet otane't Yompor judionesha' pa'tañneshañ ahuat. ¹⁸ Tarraña ama't atteñpa' sapa' amach sañeña nanac asherben sentatsterro. Ñaña amach sotatsto o'huañte' sherbenña añ judionesha' ñeñt toma'ntenaya olivochtaquër ñeñt ahupore'taret, tarro'mar sapa' señoche'pa'ch allotca'yeña huenaña sa sehuamenc tsachreçhoçh ñeñt atma'ntataret judionesha' pa'tañneshañ ahuat. Ama atteyayso ñerra'm ñeñt e'ñe pueta cres o'ch ahua mencañ sepoñ puereçh, tarro'mar ama atteyaye, puereçhña e'ñe ahua mencañ sepene'ña sa.

¹⁹ Ñeñtes ama judioneshayayso, sapa' çhate' sotenapañ so'te'ña nanac sherbets ñeñto'maro' Yomporpa' ahuo't pecha'tamñsan judionesha' olivochtacroçh allochñapa' atto'ch sapa' o'ch e'ñe separrocmaterr. ²⁰ Tarraña napa' o'ch notas, ama't po'ñoçh o' a'ypo'ñareñta judionesha' añecopña a'ypo'ñare'terret e'ñe patpare'teñoçet Yompor. Ñehua,

te'ña sapa' e'ñe seyemteñoña Yompor o' separrocmaterr sa. Ñeñto'marña o'ch notas, amach sommo'chatsto, e'ñepa'chña semicha'na'teñoñ same'ñeña Yompor. ²¹ Tarro'mar atto Yomporpa' ahuo't huapore'tan olivochtaquër ñeñt e'ñe puetacra ñeñt toma'ntenaya judionesha' ñeñt ama ame'ñenayo ña, sapa'cho'ña ñerra'm attach sepna samapa' ahupore'taretéscha' samña. ²² Señoche'pa'ch po'ño'ch Yomporpa' atarr cohuen amueraña. Tarraña ama't amuerañaña'pa' ama allocchama'metsoyaye, tarro'mar ñapa' chocmach tsa'taterrana ñeñt ama ame'ñenayo ña. Ñerra'm chocmach seyemteña atto nanac muerensa ñaña'pa' e'ñech cohuen entenes. Ñerra'm amach atet se'papa' sapa'cho'ña ahupore'taretéscha' atet ñerra'm tsachtaquër. ²³ Ñaña ama't judionesha' ñeñt a'ypo'ñare'tetsapa' ñerra'm o'ch alla ame'ña'hueret Yompor, ñaña'pa' o'ch alla parrocmataterranet po'pocheño. Tarro'mar Yomporpa' nanac ahuamencat, ña po'huamencotpa' o'ch alla parrocmataterranet po'pocheño. ²⁴ Tarro'mar sa ñeñtes ama judioneshayayso Yomporpa' e'ñe pocte' e'ñch o'ch parrocmataterres, ama't sapa' atet entenes ñerra'mrrate' nanac allaparo'tsenes atet pena ñeñt puetsato'mar olivoch. Ñaña sapa' apechtacre'charetés po'pchañoñ, ñaña'pa' ahuo't a'parrocma'terres olivochtacro ñeñt narmets olivoch ama't sapa' ama e'ñe puetacreyayso ñeñt narmets olivoch. Atto pocte' e'ñch Yompor ñeñt atet p'onas sa, elloña judionesha'pa' nanaccha' cohuen enterranet o'ch alla parrocmataterranet, o'ch alla puetaquër p'aterranet olivoch ñeñt e'ñe ño puetaquër.

Atto judionesha'pa' a'queshpataretterretcha' ñamet esempohuañen

²⁵ Te'pa' o'ch masheñneshacha' ñaña no'chaneshacha' neñotatas ñeñt ahua'toteñ ama eñotpahuoyaye. Ñeñtes ama judioneshayayso napa' nemneñ o'ch e'ñe seño'ch allochña'pa' attoch amach sota'psa'tatsto sapa' atarro' es seño'ten. Ñeñt atet atpare'tena patantarr israelena'tarpa' ñeñt'pa' mamecpa atet muenatenanet Yompor tarrem'pohuach allempoch e'ñe etsotua attoch ame'ña'huerra allpon acheñenesha' ñeñt ama judioneshayaye. ²⁶ Allempochña allohuen israelena'tarnesha'pa' a'queshpataretterretcha' ñamet. O'ch etsoterra e'ñe atet aquellca'huaret Yompor po'ñoñ ahua'toteñ, ñeñt'pa' atet ote't Yompor:

Ñeñt'cha' a'queshp'aterrahueta'pa' huapach. Arro'tcha' huapa ñeñt anetserpa' añ pa'so'cheñ Sión. Ñeñto'marña pamo'tsna'tarcha' p'osan israelena'tarnesha'. O'ch

huapapa' a'huañaamperrancha' Jacoboñ po'mñreneñ* ñeñt atto nanac atpare'teñet Yompor. ²⁷ Allempochña nahuanmampperranet po'chñaretpa' allempochña et-soterra ñeñt atet notanete't ahuat ñeñtcha' atet neper-ranet esempo. Arrpa' allohua ñeñt atet ot Yompor ahuat.

²⁸ Tarraña te' Yomporpa' atet entenanet ñerra'mrrate' ñeñt e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñt alloch po'ño'ch yequeshperra. Tarro'mar atet pena allochñapa' o'ch sa'queshpataretterra saña ñeñtes ama judioneshayayso. Tarro'mar Yomporpa' ahuatoteñ acrane't judionesha' ñeñtcha' atarr morrentena tarro'mar ñeñt pa'tañneshañ pete'tpa' ña a'crahuete't ahuat ñeñtcha' atarr morrentena. ²⁹ Tarro'mar Yomporpa' ama puenesho po'ñoñ. Atet otanete't ahuat ñeñtcha' o'pataterranetpa' e'ñech etsotuerra. Ñaña atet otanete't ñeñtcha' atet chore'terranet attoch e'ñe ame'ña'hueretpa' ñeñtpa'cho'ña e'ñech etsotuerra. ³⁰ Ahuat sapa' atarr satpare'che't Yompor, te'ñapa' judionesha' atet petsa atet satpare'te't sa ahuat. Tarraña te'pa' allempo atpare'ta judionesha'pa' ñeñtpa' attoch Yomporpa' o'ch muererrsa saña. ³¹ Ñaña te'pa' atto judionesha' attecma atpare'teñet Yompor atet satpare'che't saña ahuat, ñetpa'cho'ña muererranetcha' atet muerensa saña te'. ³² Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allohuenet.

Atto Yomporpa' ama eñotpahuoyaye ñeñt e'ñe atet cotape'chen ña

³³ Yomporpa' puemorrenteño'tpa' esocmañen apa'yeney, ñeñtara Parets ñeñt atarr eñotañtetsa. Shonte' esocmañen eñoten pa'namen. Ya arromñateypa' amate' errotentot yeñotuoñeña ñeñt atet penaña ña. Ñaña ama't mameshapa' amate' errotentot chaponayoña ya yeyo'chro ñeñt ora allpon ñeñt atet cotape'chyen ña. ³⁴ "Tarro'mar yapa' ama't puesheñarrofeya amate' errotentot yeñotuoña ora ñeñt atet cotape'chen Yompor. Ñaña yapa' ama't puesheñarrofeya amate' errotentot yoctape'chacheña Parets. ³⁵ Ñaña yapa' ama't puesheñarrofeyapa' amate' errotentot yetsa'choña Yompor attoch aphuerrey ñeñt yemnen ya." ³⁶ Tarro'mar ama't allohuen ñeñt allpon es eñalletyetsa e'ñe Yomporeshotecma huena, e'ñe ña po'huamencot eñalletena,

* **11:26** Ñeñt otenet israelena'tarnesha', ñaña sióno'marnesha', ñaña Jacob po'mñreneñ, ñaña jerusaléño'marnesha' ñetpa' ñeñtareta judioneshet.

ñaña e'ñe ñocop ye'hcatur. E'ñepa'ch ya'ye'chochtateñañ
tayoteñ ama't errponañohuen. Ñeñtpa' attetepa'ch Nompore.

12

Atto añ poctetsa o'ch e'ñe yaphuer Yompor yechets

¹ Ñeñto'marña te'pa' o'ch masheñneshacha' ñaña
no'chaneshacha' notas, atto Yomporpa' atarr muerenya,
yapa' añ e'ñe poctetsa o'ch yaphuer Yompor yechets. O'ch
yaphuer allohuen yechets atet ñerra'mrrate' ñeñt muetsete't
ahuat Yomporecop ñeñtcha' nenet ñocop. Tarraña ya yechets
e'ñech be'natot yaphuer Yompor tarro'mar ñeñtpa' e'ñech
ñocpa, ñeñtcha' nanac coshatene' ña. Attochña e'ñech
yeyochrocmañen cohuen yocter Yompor. ² Allochñapa'
amach allo'na atet es yepatse'tyesneno ñeñt atet yeychen
ya añe patsro, ellochña yoctape'cherr etserra attoch
etserrataterrnay Yompor yoctaña. Attochña e'ñe cohuen
señoch erra'tsente'ña muenen Yompor ñeñt e'ñe cohuen
enten ña, ñaña ñeñtcha'ña coshatene' e'ñe poctacma.

*Atto Yomporpa' ama pocteye' entenye o'ch yot yañeña yo'ña
nanac sherbets*

³ Yompor puemuereño'tenpa' ahuo't llesensenen attoch
nach torretsa ñocop. Ñeñto'marña te'pa' notenes ñeñt atet
muenen Yompor. Ama't puesheñarrotesapa' amach sentat-
sto sañeña ñeñteso' ello nanac sherbets. Añcha'ña pocte'
sentena allpon sesherven atto puesheña'ttsos Yomporpa'
ahuo't apa'yesas attoch e'ñe seyemteño't setorra'yesa ñocop.
⁴ Ñato' o'ch yetma'ntacha ñeñt atet pena yechets. Ñehua,
yechetspa' ama e'ñe patrrayaya, atet ñerra'm yecle' ñaña
yot ñaña yetac. Ñaña ama e'ñe patrrayaye sherbenye, e'ñe
po'poñe'ttsocma sherbeney. Tarraña ama't po'poñe'ttsocma
sherbeneypa' e'ñe yocma yechets yepohueñ, tarro'mar e'ñe
patrra yechets atet petsa. ⁵ Ñaña attecma yepena allohueney
ñeñtey ame'ñenaya Cristo. Ama't shonteyeñ ñaña ama'tcha'
po'poñe'ttsocma yetorra'yesa ñocoppa' ñaña'apa' e'ñech patrra
enteney, atet ñerra'mrrate' e'ñe po'chets peney. Attochña
e'ñech yeparrocmaten e'ñe puesheña'ttsoy epay Cristo. Attoña
e'ñe yeparrocmateño't Cristopa' o'ch yeparrocmatuahua allo-
hueney ñeñtey ame'ñenaya Cristo.

⁶ E'ñech po'poñe'ttsocma yetorra'yena Yomporecop,
tarro'mar ñapa' ahuo't apa'yesey e'ñe po'poñe'ttsocma
ñeñtcha' atet yesherbe' e'ñe cohuen. Ñehua, ñerra'm añ
apueney alloch ya'potoñ po'ñoñpa' ya'potepa'ch errponcha'
yemtatenya. ⁷ Amapa' ñerra'm añ apueney attoch yesherbe'
po'psheñe'chno e'ñepa'chña cohuen yesherbenanet. Amapa'

ñerra'm añ apueneý attoch yeyčhateñ po'psheññečno e'ñepa'chña cohuen yeyčhatyenanet. ⁸ Amapa' ñerra'm añ yeñoten attoch yoctape'chatyesanet ñeñt cohuentetsa Yomporecop, e'ñepa'chña cohuen yoctape'chateñ acheñenesha'. Amapa' ñerra'm añ yeñoten attoch es yapa'yes acheñenesha' ñeñt es pallta'yetsapa' e'ñepa'chña yeñmañeshocmañen es yapa'yenanet, amachña čha yempa'tana'tatsche. Amapa' ñerra'm añ yeñoten attoch ya'miča'tarettena, e'ñepa'chña yocsheñeshocmañen ya'miča'tarettena, amachña čha yemuenme'chatsche. Amapa' ñerra'm añ yeñoten attoch yeyenpue' ñeñt mueročhtetsa, e'ñepa'chña yocsheñesha' yeyenpuenanet.

Atetcha' pa'yesa ñeñt pueyochresha' pen Cristo

⁹ Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeñt ama cohuenaye' enteno Yompor o'ch e'ñe ya'mñechya nanac attoch ya'ypo'ñe'. Tarraña allohuen ñeñt e'ñe cohuen enten Yomporpa' amach čha ya'ypo'ñatsche. ¹⁰ Ñaña añ poctetsa amorrentanna'tpo'ch yentannena allohueney atet ñerra'm po'ñočh e'ñe yemo'nasheñ yeñannena. O'ch atet yeñch po'psheñeñ ñapa' atarr sherben, amachña yañeña nanac asherben entetso.

¹¹ Amach čha sečllana'tatsto torraya ñeñt cohuen enten Yompor. Añcha'ña e'ñech seyočhrocmañen sesherbe' Yepart-seshar atto ahuamencat penes Parets Puecamquëñ.

¹² Ñaña e'ñepa'ch socshena tarro'mar yapa' e'ñe yeyemteñoť yecuenña ñeñt o'patatenya Yompor. Ñaña ñerra'm esempo huaponasa mueročhteñets e'ñepa'chña sa'huante'. Ñaña čhocmuepa'chña sema'yocheña Yompor.

¹³ Ñaña ñeñt pueyochresha' pen Yompor ñerra'm esempo es pallta'yenet, sañapa' sapa'yesanetcha' ñeñt pallta'yenet. Ñaña e'ñepa'chña cohuen sagapannena sepacllo.

¹⁴ Ñaña añ poctetsa o'ch senamoñ Yompor attoch a'natana ñeñt se'moñe'tene'. Amachña čha sarrnomare'tatscho.

¹⁵ Ñaña ñerra'm esempo esesha' atarr coshetsa, sapa'čo'ña socshapretanetepa'ch. Ñaña ñerra'm esempo esesha' yahuetsa puellquëñoť, sapa'čo'ña sellcapretanetepa'ch.

¹⁶ Amachña čha atsrre'močen sentanna'teno. Ñaña amach aña se'natsto attoch sommo'chena. Añcha'ña poctesenten o'ch seyemteña ñeñt ama esoshe'maye' entyeneto. Ñaña amach sentatsto sañeña, so'ña e'ñe sapuet atarro' es señoten.

¹⁷ Ñaña ñerra'm po'psheñeñ erroten paspa' sapa' amach setsa'tatatsche ama't coñe'ta. Sapa' añcha'ña e'ñe

sema'yočhra ñeñt̃ chocma sepena ñeñt̃ cohuen enten allohuen acheñenesha'. ¹⁸ E'ñe puesheña'ttsospa' čhochña se'nyes ñeñt̃cha' atet sepa'yes ñeñt̃ pocte' enten allohuen acheñenesha'; attochña e'ñe cohuen sentannena. Allochñapa' o'ch socrena e'ñe cohuen muechet e'ñe sagattsa ñeñt̃ parro'marneshas. ¹⁹ Te' o'ch masheñeshacha' ñaña nočhaneshacha' e'ñe nemorrenteñoťespa' o'ch notas, ñerra'm esempo po'psheñeñ erroť p̃aspa' sañapa' ama't coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñt̃pa' atet oten Yompor po'ñoñ ñeñt̃ anuaret̃ ahuaťoteñ. Allempo atet otanete't Yompor, ñeñt̃pa' atet ot: "Napa' ñaña ñeñt̃en atsa'tatañen, napa' nach tsa'tatuerrahuet." Arrpa' allohua ñeñt̃ atet ote't Yompor. ²⁰ Añcha'ña atet sepoñ ñeñt̃ se'moñe'tene' ñeñt̃ e'ñe atet oteney Yompor po'ñoñ. Ñehua, ñeñt̃pa' atet oten: "Ñeñt̃ se'moñe'tene' ñerra'm esempo cheporrenapa' sañapa' sapepa'ch ñeñt̃cha' rra'. Ñaña ñerra'm esempo oñpa'ten sañapa' sapepa'ch ñeñt̃cha' orr. Ñerra'm atetcha' sepe'pa' ñaña'apa' o'ch penquēna nanac. Atarrcha' atserr e'man atto penquēna. Allempoñapa' ñato' e'ñe puepenquēñoťpa' ñeñt̃cha'ña cotape'chatterre' cohuen." ²¹ Ñeñto'marña notas, ñerra'm esempo po'psheñeñ erroť p̃aspa' sapa' amach sañeña muenatstaye o'ch alla setsa'tatera. Añcha'ña atet sepa' ñeñt̃ e'ñe cohuentetsa. Ñerra'm atet yepenapa' e'ñe yepeñoť cohuenpa' o'ch ya'huañat ñeñt̃ ama cohuenayaye.

13

Atto añ poctetsa o'ch yame'ñeña ñeñt̃ añcha'taretetyetsa añe patsro allochñapa' attoch yocrrena e'ñe cohuen muechet

¹ Ñaña añ poctetsa e'ñe puesheña'ttsoypa' o'ch yame'ñya ñeñt̃ añcha'taretetyetsa ñeñt̃ pueyochresha' pen gobierno'. Tarro'mar amach eñallñeña ñeñt̃cha' añcha'taretetyetsa ñerra'm ama Yompor muenatenahueto o'ch atet pet. Tarro'mar ñeñt̃ añcha'taretetyetsa arr patsropa' ñetpa' Yompor muenatenahueto o'ch atet pet. ² Ñeñto'marña yeñoteñ ñerra'm esesha' atpare'tene' ñeñt̃ añcha'taretetsa arr patsro ñapa' añe'na atpare'ten Yompor, tarro'mar Yomporpa' ña muenatenahueto o'ch añcha'taretetyenet arr patsro. Ñaña ñeñt̃ atpare'tene' ñeñt̃ añcha'taretetsa arr patsro ñapa' e'ñe ñañaña patpare'teñoť atsa'tatarettach. ³ Ñaña ñerra'm chocma ye'pa'yen ñeñt̃ cohuen enten añcha'tareťpa' amach añcha'nočhenaye' yenteñeña ñeñt̃ añcha'taretetsa, tarro'mar e'ñe attotapa' amach erroť pa'ye.

Tarraña ñeñt atpare'tene' ñeñt atet muenen añcha'taretpa' ñetñapa' atarrcha' añcha'nochen enteñetña añcha'taret tarro'mar añcha'taretpa' chocmach tsa'taterranaña ñeñt atpare'tene' ña. Ñehua, ñerra'm ama semno o'ch añcha'nochen señch añcha'taretpa' e'ñechña cohuen es sepa'yen, attochña añcha'taretpa' e'ñech cohuen entenes, amach errof paso ama't mamesha. ⁴ Tarro'mar ñeñt añcha'tarettetsa arr patsropa' añ torrenet ñeñt atet muenatenanet Yompor, allochñapa' attoch a'pocstatenet esheccha' e'ñe cohuen yocrrena arr patsro. Tarraña ñerra'm añ atet sepen ñeñt ama cohuenayayepa' pocte'ñacho'ña allochñapa' attoch semcha'teñ añcha'taret, tarro'mar ñapa' ama orrena añcha'tareteno, chocmach tsa'tatana ñeñt atpare'tene'. Tarro'mar ñapa' Yompor muenatene' ñapa' ñach tsa'tatenaya allohuen ñeñt atet pene' ñeñt ama cohuenayaye. ⁵ Ñeñto'marña añ pocte' o'ch yame'ñya ñeñt añcha'tarettetsa arr patsro, allochñapa' attoch amach tsa'taterrye Yompor e'ñe ya yatparñoť. Elloña ñeñt atet yame'ñena, tarro'mar e'ñe yeyochropa' yeñotena ñeñtpa' e'ñe pocte' o'ch e'ñe yame'ñena. ⁶ Ñeñto'marña ñaña añ pocstetsa o'ch yetsa'ta impuesto, ñeñt atet anaret ñoñets ñeñt cobrenyet añcha'tareteshot tarro'mar ñeñt añcha'taretetyetsa añ patsro, ñeñtpa' atet muenatenanet Yompor ñeñtcha' atet torrenet ñeñt po'taruas penet.

⁷ Chocmach setsa'ta allohuen ñeñt atet anaret ñoñets atto cobrenyet atet ñerra'm allpon quelle ñeñt enamueney añcha'taretnesha' atet ñerra'm impuestočno, chocmach setsa'cha. Ñaña acheñ ñeñt añcha'na'tpo' entenetpa' chocmuepa'ch semcha'na'tueñ. Ñaña acheñ ñeñt atarr amorrentaretpa' chocmuepa'ch semorrentueña. ⁸ Amach esesha' setebatsto, ama't puesheñarra. Añcha'ña sepa ñeñt pocstetsa socop, o'ch semorreñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompor po'ñoñ ñeñt atet anaret ñeñtcha' atet yepenamet e'ñe cohuen. ⁹ Atet ñerra'm paterr ñoñets ñeñt atet anaret ñeñtpa' atet oten: "Amach sechtapretanna'tatsto setapor." Po'poñ ñoñetspa' ñeñtpa' atet oten: "Amach semtsanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tañpsatsche samo'ts." Po'poñpa' atet oten: "Amach seye'chapretanna'tatsto", ñaña eñall po'poñečno ñoñets ñeñt atet yechateney. Allohuen añ ñoñets ama't po'poñe'tsocma atet yechatenyeñ, tarraña po'ñoçhpa' e'ñe patrra oteney, ñeñtpa' atet oteney: "Atarrepa'chña yemorrenteña yamo'ts e'ñe atet atarr yemorrentena yañeña."

Ñerra'm chocma yemorrenteña yamo'tspa' allempoña po'ñoçpa' yetsotuach ora allohuen ñeñt atet yeçhatyenyey po'poñe'ttsocma ñoñets ñeñt atet anaret. ¹⁰ Tarro'mar ñerra'm po'ñoç chocma yemorrenteña yamo'tspa' amach yemno o'ch errot yeñanet te't çha yellcatenanet. Añeçhno atetpa' ama morrenteñtsoyaye. Ñeñto'marña yeñoteñ ñerra'm po'ñoç chocma yemorrenteña yamo'tspa' ñeñtpa' attochña e'ñe yetsotua ora allohuen ñoñets ñeñt atet anaret ahuañoteñ Yomporeshot.

¹¹ Atetcha' señoçhua ñeñt atet o' notuas, tarro'mar yeñoteñ o' çhampoch allempoch huerra Cristo, ñeñto'mar socoppa' añ poçtetsa o'ch alla setanterra Cristocop amachña seçllañoña es seña'yeno atet ñerra'm çha semuen. Tarro'mar ahuañmo'cha allempo ñanam yame'ñera Cristopa' allempo atarr atomat palltenmeñ attoch ya'qushpataretterra. Tarraña te'pa' ama atarr atomatmeñeyaye. O' mameshamerra attoch ya'qushpataretterra. ¹² Arr patsropa' eñall shonte' sosya'tsañeçhno. Ñato' o'ch yetma'ntacha atet ñerra'mrrate' yapa' checmeta yeyçhena. Tarraña te'pa' e'ñe atet pena ñerra'mrrate' o' metuamoch checmete' o' puetarenmoch, tarro'mar yapa' yeñoteñ o' çhampoch allempoch huerra Cristo. Ñeñto'marña añ poçtetsa o'ch yesuanom allohuen ñeñt ama cohuenayaye ñeñt atet atma'ntataret checmete'. Añcha'ña atet yeña'yen ñeñt cohuen enten Yompor ñeñt atet atma'ntataret puetare'. Attochña yetorrena Yomporecop atet ñerra'mrrate' çho yeçllarena ñocop. ¹³ Añepa'chña yeña'yen cohuen ñeñt atet penet yeño, ñeñt ama apencoçhenayaye ñeñtpa' ama atteyaye ñerra'm ñeñt atet penet tsapo. Amach yocapretatsto all nanac coshena aposañeçhno, e'ñe porrare'teñoçtet all atarr pa'namen coshatse'tyenet. Ñaña amach yechta'yestatsto coyaneshaçhno, amach atet yeñatsto ñeñt pa'namen sosya'tsañeçhno. Amach ye'natsto atsrre'moçhen, ñaña amach ye'moñe'tanna'tatsto e'ñe yesope'cheñoç. ¹⁴ Añcha'ña ahuañmencañ sepene' Yepartseshar Jesucristo, allochña'pa' attoch amach semnatatsto seçhets o'ch muenatse'tatas ñeñt ama cohuenayaye.

14

Atto eñall ñeñt epuoye' ame'ñenayañ Cristo tarro'mar ama huomencaye' penano pueyoçher Yomporecop

¹ Ñaña te'pa' o'ch notas po'poñ ñeñtcha' atet seña. Ñerra'm eñall sesho acheñ ñeñt ame'ñetsañ tarraña ñapa' ama huomencaye' penano pueyoçher Yomporecop tarro'mar ama e'ñe eñoteñe po'ñoç atet yeyemteña Cristo, sañapa' o'ch

sagaḗ e'ñe cohuen attochña e'ñech parrocmá seyemteña Cristo. Tarraña amach añeḗpa sagape attoch sapa' o'ch sotnare'ch tarro'mar ñapa' po'poñoneḗ cotape'chyen. ² Atet ñato' eñall acheñ ñeñḗ ama huomencaye' penano pueyoḗcher Yomporecop tarro'mar ama e'ñe eñoteñe ñeñḗ atet po'ñoḗch yeyemteña Cristo; ñeñto'marña ñapa' ḗchach oten ama pocteyaye o'ch yerra'yes berr po'chets, añach paḗerr yerren narmetsoḗchno. Elloña po'psheññeḗchno e'ñe pueyemteñotet Cristo ñetñapa' otenet e'ñe pocte' o'ch yerra'yes ama't erra'tsena rreñets. ³ Ñeñḗey pa'namen es rra'yetspa' amuepa'ch yentatsche ñeñḗ tore'tetsa ñapa' ama es eñoto. Ñaña ñeñḗ es tore'tetsapa' amuepa'ch otatsetye ya ñeñḗey pa'namen es rra'yets ama pocteyaye o'ch yerratse'tyes pa'namen ñeñḗ ama arrapahuoyaye. Tarro'mar Yomporpa' ñaña o' aguërrey attoch pueyochresha' perrey. ⁴ Ñeñto'marña yapa' yeñoteñ ama pocteyaye o'ch yotanna'tena e'ñe yagattsa Yompor pueyochresha'pa' ama pocteyaye ñeñḗ atet penet. Tarro'mar ñetpa' Ayochreshatecpuet tarro'mar ñapa' ñaña ñapueḗ otets atto pocte' entenan pueyochresha' amapa' ñerra'm ama pocteye' entenano pueyochresha'. Ñaña Ayochreshat Cristopa' ḗchocmach e'ñe pocte' entenan pueyochresha' tarro'mar ñapa' ñach ahua mencat paḗhuet pueyoḗchro.

⁵ Ñaña ñato' eñall acheñ ñeñḗ ama e'ñe eñotenaye ñeñḗ atet e'ñe po'ñoḗch yeyemteña Cristo, ñeñto'marña ñetpa' ḗcha otenet añ poctetsa o'ch yonañcha'yen paḗe'tets yet ñeñḗcha' atet yetsotayes attochña e'ñe pocte' enteney Yompor. Ñaña ñato' po'psheññeḗchno ñeñḗ atet ñerra'm yapa' otenet ama yepallteno o'ch yonañcha'yen paḗe'tets yet ñeñḗcha' atet yetsotayes tarro'mar allpon yetpa' Yomporecma pueyeḗcatuar. Tarraña puesheña'ttsoypa' yeñochepa'ch ñeñḗ e'ñe pocte' yentyen ya e'ñe yeyoḗchro ñeñḗcha' atet yeḗpa. ⁶ Tarro'mar ñerra'm esesha' onañcha'yene' yet ñeñḗcha' atet etsotayes, ñapa' atet oten ñeñḗtpa' atet yame'ñeña ya Yompor. Attecma yepena yaña ñeñḗey ama onañcha'yenaye yet, yapa'ḗcho'ña atet yame'ñeña Yompor. Ñaña ñeñḗey pa'namen es rra'yetspa' yapa'ḗcho'ña atet yame'ñeña Yompor, tarro'mar yeparasyoso'teñesha' Yompor es yerra'yen. Attecma pena ñaña ñeñḗ es tore'tetsa, ñetpa'ḗcho'ña atet ame'ñeñet Yompor ñaña ñetpa' e'ñe pueparasyoso'teñeshet Yompor es tore'tyenet.

⁷ Tarro'mar ama e'ñe ya yemneññeñeḗye' atet es yeḗpa'yeno añe patsro. Atto yocrrena añe patsropa' ñeñḗtpa' ama e'ñe yapḗtecpayaye, ñaña allempoch yerromapa' ñeñḗtpa'ḗcho'ña

ama yemneññoteye' yerromueno. ⁸ Tarro'mar atto yocrrena allponmat añe patsro ñeñtpa' añecop attoch yesherbeñ Yepartseshar. Ñaña allempo yerromuenpa' ñeñtpa' tarro'mar atet muenateney Yepartseshar. Ñeñto'marña yapa' yoten allempo yocrrena añe patsro ñeñtpa' ama yaptecpaye' yocrreno, ñeñtpa' Yepartsesharecop. Ñaña allempo yerromuen, ñeñtpa'cho'ña ama yaptecpayaye, ñeñtpa'cho'ña Yepartsesharecop. Ñeñto'marña ñeñtpa' chocma atet pena tarro'mar ñapa' e'ñe o'paterrya ñaña e'ñe ñocpay. ⁹ Tarro'mar Cristopa' ñeñtecop rroma, elloñapa' alla correrra attochña ñapa' ñach yamo'mte' yepen allohueney. Ama't allempo yocrrenmeñ, ama't ñaña allempo yerromuen, atterach yamo'mte' yepeñ, tarro'mar ñapa' pueñotuaran atet peney rromueñets ñaña atto yocrrena ñeñtey arromñaatey.

¹⁰ Ñeñto'marña amach yotatsche yemo'nasheñ ñeñt atet pena ñapa' ñeñtpa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotencia' entyerrey esempohuañen allempoch yapcherra allohueney ñesho. ¹¹ Tarro'mar Yompore po'ñoñ ñeñt anuařet ahuatoteña' ñeñt allpa' Yompore otatset atet:

Napa' na ñeñten ama arromñaateshayayno ñaña ama puenesho neñoñ. Po'ñoçhpa' atetcha' perra esempohuañen. Ora allohuen acheñenesha'pa' concorpanrrorterrnetcha'. Allña'pa' otuerrnetcha':
 "Pa Yomporep ñeñtep atarr Partsop."

¹² Attoña yeñoteñ allohueney puesheña'ttsoy Yomporepa' a'metataterreycha' ñeñt atet o' yepohuahuaena arr patsro.

Atto ama pocteyaye e'ñe atet yepeñoť ya o'ch alla ya'puerratater yemo'nasheñ

¹³ Ñeñto'mar ama pocteyaye o'ch yañeña yotanna'ta ñeñt atet yentannena arr patsro. Añcha'ña yañeña e'ñech yeñotena ñeñt atet yeña'yena ya tarro'mar ñeñt atet yeña'yena yapa' ñato'rraña çhate' ya'puerratater yemo'nasheñ ñerra'm ñapa' ama pocteye' entenano ñeñt atet yeña'yen ya. ¹⁴ Napa' e'ñe neyemteñoť Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñt allohuen rreñetspa' e'ñe ñocoppa' ama pocteyaye o'ch rrenan ñeñt rreñets. ¹⁵ Ama't e'ñe pocteñ o'ch yerra'yes, tarraña ñerra'm yemo'nasheña'pa' ama arrapahuoye' enteñe, yapa' e'ñe ya yerreñoťpa' ñato' o'ch yeye'chateña allempoña'pa' o'ch rre' ñaña, ñaña'pa' çhach enteñ ñeñtpa' ochña'teñets Yomporecop. Atteña'pa'

ñato' o'ch alla puesuerran Yompor. Ñato' yerreñoñ ama't e'ñe cohuenēpa' o'te' yequečpatater yemo'nasheñ Yompor. Ñeñto'marña notenes, amach yerratsto allempo, te't ñeñto'mara yequečpatater yemo'nasheñ Yompor. Ñaña ñerra'm atet yepen yemo'nasheñpa' po'ñočpa' ama yemorrenteño, ñeñtara yemo'nasheñer ama't Cristopa' ñocpa'na rroma. ¹⁶ Ñeñto'marña notenes, ama't pocten ñeñt atet pepa'yena, tarraña ñerra'm yemo'nasheñpa' ama pocteye' enteñe, ñaña'pa' ñeñto'tach sasare'teney. Ñehua, ama't e'ñe pocten o'ch atet yepenañ, tarraña amach atet yepatsche. ¹⁷ Tarro'mar ñerra'm añ yoctenñañ Yompor po'cohuenña atto pueyochresha' peney, ñeñt atto es yerra'yen amapa' atto es yetore'tyena, ñeñtpa' ama esoyayeña Yomporecop. Añña ñeñt nanac sherbets attoch yoctenñañ Yompor po'cohuenña, ñeñtpa' atto e'ñe pocte' es yeñannena añe patsro, ñaña atto e'ñe cohuen yentannena attochña yocrrena e'ñe cohuen muechet, ñaña attochña Parets Puecamqueñpa' chocmach coshateney yeyoçhro. ¹⁸ Ñerra'm atetcha' yame'ñeña Cristo, Pomporñapa' e'ñech cohuen enteney, ama't allohuen acheñenesha'pa'cho'ña e'ñech cohuen enteneyet.

¹⁹ Ñeñto'marña napa' notenes, añepa'chña ye'nen ñeñt attoch e'ñe yeparrocmaterr allohueney ñaña attochña e'ñe cohuen yeyenpannena. Allochñapa' allo'nach e'ñe huomenc yeñanna'tnena yeyoçher Yomporecop. ²⁰ E'ñe ya yerreñoñ po'chetspa' amach ya'huañatatsterrñañe po'psheñeñ ñeñt atet ame'ñenanañ Yompor. Ama't allohuen rreñtoçhno cohuenacmañ ñeñtcha' yerra'yeneñ, tarraña ñerra'm yerreñoñ o'ch alla ya'puerratater po'psheñeñ attoch o'huañcha' ame'ñenana Cristo, ñeñtepñapa' e'ñe pocte' amach yerratsto ñeñtcha' a'puerrataterre' po'psheñeñ, tarro'mar atetpa' ama cohuenaye' enteñe Yompor. ²¹ Ñeñto'marña notenes, ama't erra'tsena ñeñt atet yepeñoñ po'psheñeñpa' o'ch alla ya'puerratater, ñeñtepñapa' amach atet yeñatsto, allochñapa' amach puerrero ama't puesheñarra ñeñt ame'ñenaya Cristo. Atet ñerra'm allempo yerren berr po'chets ñaña allempo yorren co'nes,* ñerra'm atet yepeñoñ o'ch alla ya'puerratater yemo'nasheñ, ñeñtepñapa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor. ²² Ñerra'm e'ñe pame'ñeñoñ Yompor peñotena ñeñt atet pepa'yena ñeñtpa' e'ñe pocte' entapreteneñ Yompor, tarraña p'apa' e'ñech peyoçhro poctape'cheñ

* 14:21 Ñehua, Pablo añ toma'ntatanet vino ñeñt poco'nes penet all pa'nyo.

Yompor atet, amachña čha pe'matare'tatstoña allo. Nanac cosheñso'tseney ñerra'm yeñotena po'ñočh e'ñe pocte' entapreteney Yompor ñeñt atet es yeḡa'yen, tarro'mar yeyočhropa' ama epuoye' es yeḡa'yeno. ²³ Tarraña ñerra'm esesha' ñeñt epuoye' es rra'yenpa' ñocoppa' ama pocteyaye o'ch rren, ñañaapa' ñeñtaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yeḡa'yeno, ñeñtpa' ñeñta yo'chñar entennay Yompor.

15

Atto añcha'ña ye'nen ñeñt e'ñe pocte' enten yemo'nasheñ

¹ Ñeñto'marña napa' notenes, ñeñtēy e'ñe huomenc pene' yeyočher Yomporecop, ñeñtēy ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñt ama huomencaye' penaye pueyočher Yomporecop ñeñt čhocma epuoye' ame'ñenana Yompor. Ñeñtpa' atetcha' yeyenpueñ, amachña aña atet es yeḡa'yeno ñeñt atet yemnen ya. ² Añcha'ña ye'nen o'ch atet yepen ñeñt e'ñe pocte' enten yemo'nasheñ. Ñeñtpa' atetcha' yeyenpueñ allochñapa' o'ch e'ñe huomenc pā'nman ñaña pueyočher Yomporecop, allochñapa' amach allo'na epuoye' ame'ñenano Yompor. ³ Amach aña atet es yeḡa'yeno ñeñt atet yemnen ya tarro'mar Cristopa' ama aña atet pā'yese'te ñeñt atet muene't e'ñe ñañeña. Añña pā'yese't ñeñt muenache't Pompor. Tarro'mar ñapa' ñeñtecopña mueročhte't ñeñt atet muenache't Pompor. Ñeñto'marña Cristopa' atet otane't Pompor, ñeñtpa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñt atet aquellca'huaret ama't ahuatoteñ. ⁴ Ñaña allohuen añ ñoñets ñeñt atet aquellca'huaret ahuatoteñ, ñeñtpa' yocpa'ñaña atet anaret. Allochñapa' attoch yapa'čho'ña o'ch yečhaterryet ñeñt atet muenen Yompor. Allochñapa' attochña huomenc yepen yeyočher Yomporecop. Ñaña añ ñoñets ñeñt atet aquellca'huaret ahuatoteñpa' nanaccha' coshaterrey allochñapa' attotcha'ña e'ñe yocsheñesha' yeyemteññaña Yompor ñeñt o'patatenya. ⁵ Yompor ñapa' ñeñt ahuamenca't yepene' ñaña ñapa' ñeñtña yocshatene' yeyočhro. Ñaña ñepa'chña e'ñe seño'taterre', allochñapa' attoch e'ñe cohuen seyčherr ñeñt atet muenen Cristo Jesús, allochñapa' e'ñech cohuen sentannena. ⁶ Allochñapa' allohuenespa' e'ñech parrocmā sa'ye'chočhtateññañ Yompor, ñeñtara Yepartseshar Jesucristo Pompor.

Atto ama't ñeñt ama judioneshayayepa' ahuo't aserrpare'tatarettet añ cohuen ñoñets alloch yequeshperra

7 Ñeñto'marña napa' notenes, eñech cohuen es sepanna'tyena allohuenes eñe atet cohuen o' perrey Cristo, allochñapa' attoch seyemteñoť parro cohuencha' sa'cshapretarettena Yompor. 8 Ñaña te'pa' o'ch notas, Cristopa' ahuo't huapa arr patsro attoch torrosa judioneshacop. Allochñapa' attoch allohuen acheñenesha'pa' o'ch çhapanet pueyoçhreto, Yomporpa' ama puenesho po'ñoñ. Ñeñt eñe atet otaneť judionesha' pa'tañnesañ ahuatpa' ñeñtcha' atet muenaterranet esempo, ñeñtpa' çhocmachña eñe etsoterra poctacma. 9 Ñeñtecopña huapa ñaña attochña acheñenesha' ñeñt ama judioneshayaye ñetpa'çho'ña o'ch aye'choçhtatoñet ñamet Yompor tarro'mar Yomporpa' ahuo't muerenanet ñamet. Attoña etsoterra ñoñets ñeñt quellca'huet ahuat atet ñerra'mrrate' eñe Cristo ote' Pompor, ñeñtpa' atet ot:

Ñeñto'marña napa' o'ch na'ye'choçhtatonať allo'tsa'yen acheñenesha' ñeñt ama judioneshayaye, allñapa' na'çhoteneťcha' nemorreñesha'.

10 Ñaña po'poñ ñoñets ñeñt atet aquellca'huaret ahuatoteñ, ñeñtpa' atet oten:

Ñaña sa ñeñtes po'poñ acheñes ñeñtes ama judioneshayaysopa' socshepa'ch saña, atet coshena judionesha' ñeñt pueyochresha' pen Yompor.

11 Ñaña po'poñ ñoñets ñeñtpa' atet oten:

Ñeñtes ama judioneshayaysopa' sa'ye'choçhtatoñepa'ch Yompor, ama't allohuenes pa'namen acheñres sa'ye'choçhtatoñepa'ch Yompor.

12 Elloña Isaíaspa'çho'ña atet ote't ahuat:

Esempopa' orrterrach puesheñarr ñeñt Isai* po'mreneñ. Ñapa' orrterrach allochñapa' ñeñtcha' pa'mcha'tareter perr allohuen pa'namen acheñenesha', ñaña allohuenet ñachña atarr yemterret. Arrpa' allohua ñeñt atet a'potete't Cristo ahuat.

13 Yomporpa' ñachña atarr ayemuetpoterrtsa. Ñaña ñepa'chña socshatene' eñe poctacma. Allochñapa' amach eñalle ama't coñe'ta ñeñtcha' sellcatene' atto same'ñeña ña. Allochñapa' Paretsña Puecamquëñpa' ñachña ahuamencat sepepe'. Attochña eñech socsheñesha' secuen ñeñt o'patatensa Yompor.

* 15:12 Isaípa' ñeñfara Jesé. Ñehua, ñapa' ñeñt puechemeran David ñeñt añcha'tarettatse't Jerusaléño.

Atto Pablopa' ahuo't llesenseñ Jesucristo attoch amach puencha'ñoŕeye' alla yerpaterraneto ñeñt e'ñe pocte' enten Yompör

14 Ñaña te'pa' o'ch masheñnesha ñaña nočhanesha notas, napa' neñotenes sapa' atarr semorrentannena ñaña neñotenes o' e'ñe čhaponasa seyočhro ñeñt atet muenatenes Yompör. Allochñapa' attochña e'ñe cohuen soctape'chatannena erra'tsente' cohuentetsa Yomporecop. 15 Tarraña ama't atetpa' ama nemčhañoŕeye' o' notuanmaso pa'namen arr necartot ñeñt atet pocte' enten Yompör. Attoña o' alla neyerpaterrser ñeñt atet muenen Yompör. Ñeñto'marña atet nepenes, tarro'mar e'ñe Yompör puemuereñoŕenpa' 16 ahuo't muenatenen nach torretsa Jesucristocop. Erracmañen allemeñ anetso'mar neŕorrana, allo'tsa'yen acheñnesha' ñeñt ama judioneshayaye. Napa' na a'potenahuet Yompör po'ñoñ ñeñt po'ñočh alloch yequeshperra. O'ch name'ñatuera ñeñt ama judioneshayaye, allempoñapa' attochña nehuapat Janet Yomporesho atet ñerra'mrrate' čho es yapueñ Yompör, ñañaapa' ñeñtča'ña atarr coshatene'. Alloñapa' Paretsña Puecamquëññaapa' ñachña a'cohuentatuerrahuet. Attochña e'ñe cohuen enteñet Yompör.

17 Ñeñto'marña te'pa' e'ñe neyemteñoŕ Cristopa' e'ñe pocte' nenteñ o'ch e'ñe nocsheña ñeñt allo neŕorrana Yomporecop. 18 Napa' aña paŕerr noten atto Cristopa' e'ñe ahua-mencat penen, ñeñto'marña čhocma name'ñateña ama't ñeñt ama judioneshayaye. Atto neserrpare'tatanet Yompör po'ñoñ, ñetñaapa' ahuo't e'ñe name'ñatuanet. Ñaña atto napa' e'ñe cohuenare' es norrtatyen, ñetñaapa' ahuo't e'ñe cohuen ame'ñeñet Yompör. 19 Ñaña ñetpa' aña ame'ñatahuet ñeñt atto e'ñe ahua-mencat penen Cristo attoña norrtatanet Yompör po'partsoña ñeñt ama puentareto. Ñetpa' ñeñtña eñotatuahuet, ñeñtpa' po'ñočh e'ñe Parets Puecamquëñoŕ ñeñt e'ñe ahua-mencat yepene'. Atteñapa' ora erracmañen o' ne-serrpare'tua añ cohuen ñoñets atto e'ñe yame'ñeñoŕ Cristopa' o'ch yequeshperra. Ateña neserrpare'tyesnom allemeñ anetso'mar e'ñe Jerusaléñoŕeñ Ilirico'marohuen. 20 Napa' aña atarr nemnen o'ch neserrpare'tyen añ cohuen ñoñets erraparen bačhayo'mar all ama pue'mareto ñeñt Cristotets. Attochña napa' amach arra neseno serrpare'tats all o' serrpare'tatuahua po'psheñeñ. 21 Attochña etsoterra añ ñoñets ñeñt atet aquellca'huareŕ ahuaŕoten, ñeñtpa' atet oten Cristocop:

Acheñnesha' ñeñt ama't ahuaŕapa' ama aser-rpare'tatareñteneto ñeñt atet pena ña, ñetñaapa'

enteretcha'. Ñeñtara acheñer ñeñt ama pue'marano ñeñt atet pena ña, ñetñapa' cherranetcha' pueyoçhreto ñeñt atet pena ña.

Atto Pablopa' atarr sechena o'ch ahuo' anetso Romo o'ch emo'tenana' ñeñt ame'ñetsa all

22 Napa' shonte' neserrpare'tatyen erracmañen arr, ñeñto'marña ama eshcaye' neseno sesho. Ama't ahuañoñeñ atarr nesechenañ o'ch nabchensa', ama errof nepeñe. 23 Tarraña na te'pa' o' ne'nua netaruas ñeñt atto neserrpare'tyen arro'mar allemeña. Ñaña napa' ahuañoñeñ nesechena o'ch nabchensa'. 24 Ñeñto'marña te'pa' e'ñe po'ñoçh nesechena o'ch ahuen sesho o'ch nabchensa'. Allochñapa' o'ch yabchanna'ta allponmat, allempoñapa' ñato' attotpa' o'ch seyepa'n attoch neçhap ñaña Español. 25 Ñehua, te'pa' ñanomcha' Jerusaléño neta, attoch nanmanet allpon ofrenda masheñneshacop ñeñt ame'ñetsa all. 26 Tarro'mar allpon ñeñt ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeñtcha' oñmachtet masheñneshas' Jerusaléño ñeñt nanac es pallta'yenet. 27 Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeñt Jerusaléño'tsa'yen ñeñt nanac es pallta'yenet. Napa'cho'ña e'ñe pocte' nenteñ tarro'marña ñeñt judionesha' ñetpa' ñetña serrpare'taterret ñanom ñeñt ama judioneshayaye Yompor po'ñoñ. Ñeñt atet aparettet ñetpa' ñeñtapa' puecamquëñecop. Ñeñto'marña te'pa' e'ñe pocte', ñeñt ama judioneshayayepa' o'ch alla yenpuerran ñaña ñeñt judionesha' ñeñt poctetsa po'chtsocpuet alloch correnet arr patsro. 28 Allempoch neçhap Jerusaléño o'ch napos masheñneshas' ofrenda. O'ch naphuerranet attochña e'ñe ne'nua ñeñt netaruas nepen. Allempoñapa' o'ch ahuen ñaña Español. Ñehua, amach neçhena' Españolpa' o'ch nemo'tnomues allponmat, allotcha' nem'terrerr seshotpa' allempochña o'ch ahuen Español. 29 Ñaña neñoteñ ñerra'm esempoch neçhap sesho e'ñe neserrpare'tateñoñes Cristo po'ñoñ, sapa' nanaccha' nocshatterres e'ñe nanac Yompor pa'nateñoñ.

30 Ñaña te'pa' o'ch masheñneshas' notas, e'ñe seyemteñoñ Yepartseshar Jesucristo, ñaña attoch apueney Parets Puecamquëñ alloch e'ñe yemorrentannena, sapa' çhocmach sema'yocham'pesna. Nanaccha' sema'yochapretna, 31 o'ch senamaton Yompor attoch cohuañpsen allochñapa' amach cha rromapno judionesha' ñeñt ama ame'ñetso

all Judeo. Ñaña o'ch senamaton Yompor añecop judionesha' ñeñt ame'ñetsa Jerusaléño, attoch e'ñe cohuen entapretapnet ñeñtcha' naposanet. ³² Allochñapa' ñerra'm Yompor muenatspa' e'ñech nocsheñsha' neçhap sesho. Allñapa' namesoste' e'ñe cohuen allponmat, ñaña e'ñe yabchanna'teño'pa' o'te' alla e'ñe nocsherra neyoçhro. ³³ Yomporepa'chña e'ñe cohuen sa'nataya allohuenes, ñeñtara Yompor ñeñt e'ñe cohuen yocshatene' yeyoçhro. Ñeñtpa' attetepa'ch Nompore.

16

Atto Pablo arr po'cartotpa' e'ñe huom'cha'tuan ora allohuen ñeñt ame'ñenaya Cristo all anetso Romo

¹ Ñaña te'pa' añ necartotpa' nemneñ o'ch neñotatas ñeñt yoçh yepen ya arr ñeñtpa' añ pa'so'cheñ Febe. Ñapa' ña sherbets Yompor pa'pacillo allecma apçhenet Yomporecop añ anetso Cencreo. ² Ñapa' mueneñ ahuo'ch ahuo' sesho. Ñerra'm esempo çhap seshopa' o'ch sagaç cohuen, ñeñt atet poctetsa o'ch yagapannena e'ñe cohuen, ñeñtey ame'ñenaya Yepartse-shar Cristo. Ñaña ñerra'm o'ch çhap sesho, ñerra'm escha' palltosa ama't erra'tsena, añ poctetsa sapa' o'ch seyempueñ tarro'mar ñapa' atarr cohuen ayenpañ; ama't napa' nanac yenpuenen.

³ Napa' nemneñ añ necartot o'ch nehuom'cha'ch noçh Priscila puerrollare'na ñeñtara masheñ Aquila, ñeñt parro netorrena ahuañmo'cha Cristo Jesúsocop. ⁴ Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ attot a'queshtëpatnet na allempo muene' muetsaneñ ñeñt ne'moñe'tene'. Ñeñto'marña napa' atarr neparasyoso'tenanet ñaña ama naptayaya añña ñaña ñeñt allohuen ñeñt ama judioneshayaye, ñeñt e'ñe pame'ñeñofet apçha'yenet allemeñ anetso'mar, ñetpa'çho'ña atarr parasyoso'teñet noçh Priscila ñaña masheñ Aquila, tarro'mar ñetpa' ahuo't a'queshtëpatnet, attot ellopa' o' alla neserrpare'tatererr ñeñt ama judioneshayaye. ⁵ Ñaña te'pa' o'ch nehuom'cha'ch allohuen masheñnesha' ñeñt pame'ñeñofet çhocma apçhenet masheñ Aquila pa'pacillo, all yeçhena epuet puetapor Priscila. Ñaña arr necartotpa' nemneñ o'ch nehuom'cha'ch masheñ Epeneto ñeñt nanac nemorrentena. Ñapa' ña ñanom ame'ñenaya Cristo all anetso Acayo. ⁶ Allo'tpa' o'ch nehuom'cha'ch ñaña noçh María ñeñt nanac torretsa sesho parro. ⁷ Te'ñapa' o'ch nehuom'cha'ch ñaña namo'ts ñeñtara masheñ Andrónico ñaña masheñ Junias, tarro'mar ñet ahuañmo'chapa' ñeñt

parro ehuanca'retey. Ñetpa' ama't allsensaretnesha'pa' nanac asherben entarettet, tarro'mar ñetpa' ahuatoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

⁸ Allotpa' nemneñ o'ch nehuom'cha'ch ñaña masheñ Amplias ñeñt atarr nemuerena e'ñe yame'ñeñoť Yepartseshar parro. ⁹ Allotpa' ñaña masheñ Urbano, o'ch nehuom'cha'ch ñaña ñeñt parro yetorrena ñeñt po'taruas pen Cristo Jesús. Allotpa' e'ñe nemorrenteñoťpa' o'ch nehuom'cha'ch ñaña masheñ Estaquis. ¹⁰ O'ch nehuom'cha'ch ñaña masheñ Apeles ñeñt chocma ahuantene' allohuen pa'namen topateñets attoña e'ñe cohuen cotenan Cristo. Allotpa' ñaña o'ch nehuom'cha'ch allohuen ñeñt pamo'ts pen Aristóbulo. ¹¹ Allotpa' ñaña namo'ts Herodión, allotpa' ñaña ñeñt pamo'tsesha' pen Narciso. Ñetpa' atarr ame'ñeñet Yepartseshar. ¹² Te'ñapa' nemneñ o'ch nehuom'cha'ch ñaña no'ch Trifena ñaña no'ch Trifosa. Ñetñapa' nanac torreññañet Yepartseshar po'taruas, allotpa' no'ch Pérsida ñapa'cho'ña nanac yemorrenteña atto nanac torrena ñaña Yepartsesharecop. ¹³ Ñaña arrpa' o'ch nehuom'cha'ch ñaña po'psheñeñ masheñ Rufo ñeñt pame'ñeñoť nanac asherben yenteñ Yepartsesharecop. Ñaña pachore'na o'ch nehuom'cha'ch, tarro'mar ñapa' e'ñe atet nenteñ ñerra'mrrate' ñeñt e'ñe nachor nepen. ¹⁴ Te'ñapa' o'ch nehuom'cha'tererr po'potantañ masheñnesha' ñeñt añ Asíncrito, ñaña Flegonte ñaña Hermas, ñaña Patrobas, allotpa' ñaña Hermes, ñaña po'potantañ masheñnesha' ñeñt parrompaño'tsa'yenet. ¹⁵ Te'pa' o'ch alla nehuom'cha'tererr ñeñt masheñ Filólogo ñaña no'ch Julia, allotpa' ñaña masheñ Nereo epuet ñaña po'ch, allotpa' ñaña Olimpas, ñaña ama't allohuenet masheñnesha' ñeñt parrompaño'tsa'yenet.

¹⁶ E'ñe semorrentanna'teñoťpa' atet'cha' sehuom'cha'tanna'tena* ñeñt atet pochtetsa Partsocop. Ñaña allohuenet masheñnesha' ñeñt ap'cha'yetsset allemeñ anetso'mar e'ñe pame'ñeñoťet Cristo, ñetpa'cho'ña mueneñet o'ch huom'cha'taset ñaña arr necartot.

Atto Pablo arr po'cartotpa' o' alla cotape'chaterraneterr po'pocheño

¹⁷ O'ch masheñneshacha' ñaña no'chaneshacha' noterr serr po'poñ añ necartot. Señoťcha' añ acheñeneshar ñeñt muenene' o'ch ellopa'tetstatonaset soctañña ñeñt atto same'ñeña Cristo, tarro'mar ñetpa' mueneñet o'ch coťape'chataset ñeñt ama atteyaye ñeñt atet o' yey'chatuas. Ñeñt acheñer

* **16:16** Po'ño'ch oteneý, "E'ñe semorrentanna'teñoť choc setso'ttsa'pa'tannena ñerra'm esempo sehuom'cha'tanna'tena." Ñeñtpa' atet yechete't ahuat.

atētpa' o'ch sellō'tsentach seshōt, amach seyemtātstaneto ñēñt atē yečhatenet. ¹⁸ Tarro'mar ñetpa' ama añeye' sherbeneto Yepartseshar Jesucristo. Aña cotape'chenet ñēñt atē muenenet ñet po'chets atto correnet. Atto serrpare'tenet cočnesha' ñoñets, ñēñtpa' atta shequēñet acheñenesha' ñēñt ama huomencaye' penaye pueyočher. ¹⁹ Ñehua, allohueney yeñotenes sapa' o' same'ñera Cristo ñēñto'marña napa' atarr nocshensa. Añña nemnen o'ch e'ñe señot ñēñt e'ñe cohuentetsa Yomporecop. Allochñapa' amach soctape'chatsto ñēñt ama cohuenayaye. ²⁰ Allochñapa' Yomporpa' ahuencha' a'huañam̄psonas ñēñt atto atarr shequēnes oneñet, ñēñtara Yompor ñēñt e'ñe cohuen yocshatene' yeyočhro. Yepartsesharepa'chña Jesucristo e'ñe sa'natenaya.

²¹ Te'pa' o'ch alla neñotaterrser añ necartoť, masheñ Timoteopa'cho'ña mueneñ o'ch huom̄cha'tas ñaña, ñapa' ñēñt epan netorrena. Allotpa' ñaña añ namo'ts ma'psheño'maret ñetpa'cho'ña mueneñet o'ch huom̄cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

²² Napa'cho'ña ñēñten sochetsa Tercio, e'ñe name'ñeñōť Yepartseshar nemneñ o'ch nehuom̄cha'tas añ masheñ Pablo po'cartoť. Napa' ñēñten quellcaten masheñ Pablo.

²³ Masheñ Gayopa'cho'ña muenen o'ch huom̄cha'tas ñaña. Na te'pa' e'ñe pa'paclo'tsenen ña, tarro'mar all nečhap. Ñapa' atē otenanet čocmach apčhenet allohuenet pa'paclo ñēñt ame'ñetsa arr. Ñaña masheñ Erasto mueneñ o'ch huom̄cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom̄cha'tas ñēñtara añ necartoť.

²⁴ Yepartsesharepa'chña Jesucristo sa'nataya allohuenes. Ñēñtpa' attetepa'ch Nompore.

Atto all huañen Yompor po'ñoñ añ cartotpa' ya'ye'chočhtatoñepa'ch ora allohueney

²⁵ Te'ñapa' ya'ye'chočhtatoñepa'ch Yompor tarro'mar ñapa' ñach ahuamencat sepene', ñēñt e'ñe atē oten añ cohuen ñoñets alloch yequeshperra. Ñēñtara añ cohuen cotapñats ñēñt neserrpare'tatenes ñēñt e'ñe atē pena Jesucristo ñēñt ahuatoteñ ama eñotpahuo. ²⁶ Tarraña te'pa' Yompor ñēñt ama arromñateshayayepa' muenaterrey o'ch yeñoter ñēñt ama eñotpahuo ahuatoteñ. Ñehua, ñapa' ahuatpa' añ eñotateť ñēñt a'mta'yesayeť po'ñoñ, ñetñapa' ahuo'ch quellquēnet ñēñt atē eñotatenanet Yompor. Attochña yeñoter yaña, ama't ñaña

allohuen pa'namen acheñenesha'; allochñapa' attoch e'ñe yame'ña'huerra ora erraparen, ñeñtey pa'namen acheñey.

²⁷ E'ñe pemuereñoñtey Jesucristo aye'chochtatarettepa'ch Yompor errponohuañen, ñeñfara Yompor ñeñt ñapueñ e'ñe eñotañtetsa. Ñeñtpa' attetepa'ch Nompore. Allohua huañ añ necarta.

Pablo

AÑ ÑANOM SAN PABLO PO' CARTA ÑEÑŦ QUELLCAN CORINTO' MARNESHA' 1 CORINTIOS

Atto Pablopa' quellcan carta añecop ñeñŦ ame'ñetsa anetso Corinto

¹⁻² Masheñeshacha' ñaña nochaneshacha' ñeñŦes allohuenes e'ñe same'ñeñof Yompor chocma sapçhena parro all anetso Corinto, ñeñŦes o' hua'ñerres Parets attoch pueyochresha' perres atto e'ñe separrocmateñoŦ epas Cristo Jesús pa' sañapa' sa'cohuentatareterra Partsocop. E'ñe parrocmahua'ñerres Parets attoch pueyochresha' perres, e'ñe attecma o' hua'ñerran allohuen ama't erra'tsena acheñer ñeñŦ e'ñe pame'ñeñof chore'tene' Yepartseshar Jesucristo ama't errate' yecha'yenet. ÑeñŦña Jesucristo ñeñŦ Yepartseshar yepen ora allohueney ñeñŦey ame'ñenaya. Na Pablón sequellquene'ña añ carta epan masheñ Sóstenes. Napa' Jesucristo puellsensaren tarro'mar Yomporpa' ñeñŦecopña o' chore'terren attoch nesherber. ³ Te'ña e'ñe nehuomñcha'teñoŦespa' o'ch notas: Yomporepa'chña sebensare'tam̄pene' ñeñŦara Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Arrpa' all parasyoso'tam̄psanet

⁴⁻⁵ Te'pa' o'ch notas, napa' chocma neparasyoso'teñ Yompor socop tarro'mar ña puemuereñoŦpa' atarr bensare'tam̄penes. E'ñe separrocmateñoŦ Cristo Jesús pa' o' eñotaterres pa'namen coçhnesha' cotapñats seyoçhro. ÑeñŦo'mar te'pa' ama't ora allpon señosyen e'ñe ñeshoŦpa' e'ñech cohuenare' señosyen. Ñaña ama't allohuen cohuen cotapñatspa' o' señoŦuer. ⁶ ÑeñŦ atet yotuanmas ñeñŦcha' atet ponas Cristo, te'pa' atetçho' o' etsotatuonas. ⁷ ÑeñŦo'marña te'pa' ama es palltetsa ñeñŦcha' apuerrser po'poñ Yompor. Te'pa' aña palltetsa o'ch secuame'teñ esempohuañencha' huerra Yepartseshar Jesucristo. ⁸ ÑeñŦara Jesús ñeñŦcha' allo'na huomenc sepa'nene' seyoçher. AttoŦach çhap allemPOCH huerra Yepartseshar Jesucristo. Attochña allempopa' amach eñalle alloch otteñe'charetes ama't mamesha. ⁹ Tarro'mar Yomporpa' ama puenesho po'ñoñ, erroŦ oŦpa' atetcha' pa. ÑeñŦara Yompor ñeñŦ o' hua'ñerrey o'ch yeyemterñaña Puechemer ñeñŦara Yepartseshar Jesucristo.

Arrpa' all yeçhatanet attoch e'ñe patrra cotapñats anmuet

10 Te'pa' o'ch masheñneshacha' ñaña no'chaneshacha' notas ñeñtcha' atet sepa, e'ñech patrra soctape'ch allohuenes. Amach allo'na soctape'chyesatsto po'poñe'ttsochma. E'ñech patrra cotapñats soctape'ch allohuenes; erra'tsen soctape'chpa' ñeñfach cohuen sent allohuenes. E'ñe patrra soctapñotpa' o'ch separrocmatua allohuenes. E'ñe yame'ñeñoñ Yepartseshar Jesucristo ñeñto'marña notenes ñeñtcha' atet sepa. 11 Tarro'mar ñeñt parro ye'chena Cloépa' ñetpa' e'mare'tatnet atto' sepene. Ñeñt'pa' atet otet atto sa masheñneshacha' chocma po'poñ sentanna'tyena. 12 Ñeñt notenespa' ñeñt'pa' atet sepene: Puesheña'ttospa' atet sotyen: "Napa' añcha' name'ña masheñ Pablo." Po'potantaññapa' ñeñt'pa' atet otyenet: "Napa' añcha' name'ña masheñ Apolos." Po'potantaññapa' ñeñt'pa' atet otyenet: "Napa' añcha' name'ña masheñ Pedro."* Po'poñe'chnoñapa' atet otyenet: "Napa' añcha' name'ña Cristo." 13 Ñehua, ama't señoñeña, po'ño'chpa' ama eñalle attoch yellopa'tetstach Cristo. Po'ño'chpa' amaca'ye naye' corso'tampseto ñeñt e'ñe socop attoch na'queshpatas. Ñaña ama naye' same'ñeñoñ o' sapatare'tterroña Partsocop. 14 Napa' atarr neparasyoso'teñ Yompor tarro'mar napa' ama muenatno o'ch napatas ama't puesheñarrotesa Partsocop. Ñehua, napa' e'ñe epsheña napat Partsocop, ñeñt'pa' masheñ Crispo ñaña masheñ Gayo. 15 Napa' e'ñe nocshena tarro'mar te'pa' amach erro'tenot sotno e'ño' na same'ñeñoñ sapatare'tterra. 16 Ñehua, po'ño'ch ellopa' napach masheñ Estéfanos epuet pamo'tsesha'. Ñerra'm eñallte' po'poñe'chno ñeñt napatpa' tarraña ñeñt'pa' ama neñoñe. 17 Napa' ama añe'cpaye' llesensa'noña Cristo o'ch napatyes Partsocop ñeñt allpon ame'ñetsa, añe'cpaña llesensa'n attoch o'ch neserrpare't cohuen ñoñets alloch ye'queshperra. Ñaña ama añeye' co'chnesha' na neñoñ neserrpare'tatenso, tarro'mar ñerra'm aña neserrpare'tatenes co'chnesha' neñoñ name'ñatasapa' chate' soten atto rroma Cristo corsochopa' ñeñt'pa' amaca'ye es sherbeno attoch yame'ñera Cristo.

Añ ñoñets atto rroma Cristo corsocho, ñeñtña ñoñets Yomporo po'huamenc alloch a'queshpatyerran acheñenesha'

18 Po'ño'ch ñerra'm esempo yeserrparen atto Cristo rroma corsocho e'ñe ya yo'chñaro'pa' añña acheñenesha' ñeñt chenquetsapa' chach otenapuetañ attate' yotatse'tyen. Tarraña ya ñeñtey a'queshpatare'teypa' añña ñoñets atto rroma Cristo corsochopa' ñeñtña ñoñetspa' yeñoteñ allotña

* 1:12 Añ Pedropa' ñeñfara otenet Cefas.

huena Yompor po'huamenc attoch a'queshp̄atyerran acheñenesha'. ¹⁹ Tarro'mar añ ñoñetspa' e'ñe anuaret ama't ahuatoteñ, ñeñtpa' atet oten Yompor:

Ñeñt entetsa ñapa' nanaco' es eñoten patso'marecoppa' napa' o'ch na'huañampesuanet ñeñt pueñoteñ. Ñaña ama't ñeñt entetsa ñapa' nanaco' eñotañtenapa' napa' o'ch nehuapore'tam̄pes atto es eñotatse'tyenet.

²⁰ Ñehua, ama't señoñeña, ama't ñeñt nanac es eñotatse'tyets arr patsro ama eñalleña ñeñt atarr asherben enten Yompor. Ñaña ñeñt atarr etsotayenayeñ ñoñets ñeñt atet anuaret ahuatoteñ ñaña ñeñt nanac eño'ñatetsañ añe patsro ama eñalleña ñeñt atarr asherben enten Yompor. Ñetpa' chate' otenapuetañ atarrte' es eñotenet tarraña Yompor o' eñotatuay po'ñoçh ñeñtpa' e'ñeca'ye orrena atet otatse'tyenet arr patsro. ²¹ Tarro'mar Yomporpa' e'ñe pueñoteñoñ ñapa' ama pocteye' enteñe e'ñe ya yoc̄taññōtpa' o'ch yenter Yompor, ama't yapa' yoteneñ atarrte' es yeñoten. Añmapa' ñeñtña pocte' enten Yompor: ñeñtara cotapñats ñeñt atto rroma Jesucristo yocop ñeñt chach enteñet ñerra'mrrate' atta yotatse'tyen, añ ñeñtara cotapñats ñeñtña muenen Yompor o'ch yeserrpare'toñ alloch a'queshp̄aterrey allohueney ñeñtey ame'ñenaya.

²² Ñerra'm esempo yeserrpare'tach judionesha' atto Cristo rroma yocop, ñetñapa' amach asherbenaye' entenetoña yoc̄tañña tarro'mar ñetpa' añach muenet yorrtatanetepa'to' Cristo po'partsoña. Ñaña ñerra'm esempo yeserrpare'tateñ ñeñt ama judioneshayeyeto atto Cristo rroma yocop ñetpa'cho'ña amach asherbenaye' entonayetoña yoc̄tañña tarro'mar ñetpa' añach muenet yorrtatanetepa'to' ñeñtcha' eñotatahuet e'ñe'e' po'ñoçh atet yoten. ²³ Tarraña yapa' añcha'ña yeserrpare'tatanet atto Cristo rroma corsocho yocop. Tarraña añña judionesha' puetsena'teñōf̄etpa' amach cohuenaye' enteñeto. Ñaña ñeñt ama judioneshayeye ñetpa'cho'ña attach enteñet ñerra'mrrate' atta yotatse'tyen. ²⁴ Tarraña acheñenesha' ñeñt o' ame'ñerra ñetpa' o' chap Janet pueyoçhreto po'ñoçhpa' Cristo e'ñe Pompor po'huamencotpa' o'ch a'queshp̄aterrey, ñaña e'ñe Pompor pueñoteñōtpa' o'ch a'queshp̄aterrey. Attecma o' chap Janet pueyoçhreto ñeñt o' ame'ñerra ama't ñeñt judionesha' ñaña ama't ñeñt ama judioneshayeye. ²⁵ Ñeñt ama ame'ñetsopa' ama't otenapuetañ Yompor poctapñapa' attate' otatse'tyen, tarraña ñeñtara poctapña e'ñe ña pueñoteñ ñeñtña nanac sherbets. Acheñpa' ama't atarr es eñoteneñpa' tarraña poctapñetpa' ama tama sherbeno tarro'mar acheñpa' ama tama es

eñoteneto. Ñaña ama't otenetañ Yompor po'huamencpa' ama a'ñshe'maye' orrtenopa' tarraña yocoppa' ello metanennay allohueney yehuamenc tarro'mar yapa' arromñañaya. ²⁶ Ñehua, masheñneshacha' ñaña noçhaneshacha' soctape'ch allempo hua'ñerres Cristo o'ch same'ñera. Allempo ama't acheñneshapa' entasete't sapa' ama esoye' señote'te tarraña Yomporpa' o' hua'ñerres, ñaña ama't ama sesherbena, ñaña ama't ama añeyayso puechemeres añcha'taret. Ñehua, ñato' puesheña'ttsospa' ñeñtes, tarraña ama allohuenacmaye' attecmaso. ²⁷ Añña pocte' enten Yompor o'ch a'queshpatan acheñ ñeñt' acheñneshapa' çhach otenapuetañ ñeñtpa' amate' es eñoteno. Tarrecop pocte' enteñ Yompor allochñapa' o'ch pencatan acheñneshapa' ñeñt' nanac es eñotatse'tyets. Añpa'çho'ña pocte' enteñ Yompor o'ch a'queshpatan acheñ ñeñt' acheñneshapa' çhach otenapuetañ ñeñtpa' amate' esoyaye. Tarrecop pocte' enteñ Yompor allochñapa' o'ch pencatan acheñneshapa' ñeñt' çhach otenapañ ñetpa' atarrte' es sherbenet. ²⁸ Añpa'çho'ña pocte' enteñ Yompor o'ch a'queshpatan acheñneshapa' ñeñt' entenet ñeñt' ama esoshe'mayaye ñaña ñeñt' atsena'taret. Ñaña añ acheñer muenen Yompor ñeñt' ama es echeno attoch sherba' ama't mamesha. Tarrecop mueneñ Yompor allochñapa' ñotetpa' o'ch huapore'tañpsan acheñ poctañña ñeñt' añ patso'mara. E'ñech orrena enteret acheñ poctañña. ²⁹ Ñeñto'marña ya acheñeypa' ama't puesheñarrotëya ama pocteyaye o'ch e'ñe yañeña cohuen yentena tarro'mar Yomporpa' ama atteye' entenye. ³⁰ Tarro'mar ñapña Yompor yapuene'ña attoch yapa' corretsayach. E'ñe yeparrocmateño't Cristo Jesús a'crrateney Pompor. Ñaña Yomporpa' atto nan Puechemer Cristo ñach yeñotaterre' ñeñt' cohuentetsa Yeyompor-recop, ñaña ñeñtara Cristo ñeñtcha' e'ñe cohuen a'poctatene' yocop attoch cohuen entueney Pompor ñaña ñeñtara Cristo ñeñtña a'cohuentaterrey Partsocop, ñaña ñeñtara Cristo ñeñt' yetsa'terroya yo'chñar attoch yequeshperra. ³¹ Ñeñto'mar atet anuaretta Yompor po'ñoñ ahua't: "Ñerra'm eseshaycha' es aye'choçhtatetspa' Yomporecpuepa'chña es ya'ye'choçhtaten."

2

Arrpa' all yerpaterranet atet serrpare'tatenaneta' ahuaña ñeñt' atto Jesucristo rroma yocop corsocho

¹ O'ch notas masheñneshacha' ñaña noçhaneshacha', ahuaña allempo neçhap seshopa' neserrpare'tatoses cohuen allempo na'pothonas Yompor poctañña. Allempopa' ama

cochneshoteye' neñoñoť na'poťonaso Yompor po'ñoň atet noňets cochnesha' entyen acheñenesha'. Ñaña ama cochneshoteye' noctapñoť na'poťonaso Yompor poctapña atet ñerra'mrrate' acheñ ñeñť nanac eñotañ entueñ allohuen acheñenesha'. ² Añña e'ñe patrra cotapñats neserrpare'tatenes ñeñť atto Jesucristopa' rroma yocop corsocho. Tarro'mar allempopa' atet noten neyočhro ñeñťach paterr o'ch neserrpare'tatanet. ³ Ama't allempopa' ama asherbenoteye' norrtoso sesho. Ñaña allempopa' atarr nemcha'ten, čha neyoruos nellquěñoť. ⁴ Ñaña ama ne'ñoreñoťeye' e'ñe cohuen neserrpare'tataso attoch same'ña'na e'ñe neñoñoťa ñeñť atet pena ñeñť čhach otenapañ ñapa' nanacte' es eñoten. Añña e'ñe neserrpare'teñoťa norrtatonas ñeñť atet pōnay Parets Puecamquěñ e'ñe po'huamencoť Yompor. ⁵ Ñaña ya acheñeypa' ama't cochnesha'tatsta yoctapñapa' tarraña napa' ama nemno e'ñe na neñoteñoťpa' o'ch name'ñatasa. Napa' añña nemnen o'ch name'ñatasa e'ñe Yompor po'huamencoť.

Yompor Puecamquěñpa' ñeñťña es yeñotatene'

⁶ Tarraña ama't atetpa' esempopa' o'ch neserrpare'tach ñeñť o' ame'ñerra huomenc. O'ch neserrpare'tatanet e'ñe cochnesha' cotapñats, ñeñťara Yompor poctapña ñeñť atarr es eñotets. Tarraña añ cotapñatspa' amach patso'mareyaye, ñaña amach añeyaye añcha'taretečno poctapña ñeñť añe patsro'tsen. Tarro'mar ñetpa'čho'ña huañerretcha' esempo. ⁷ Yomporepa'chña poctapña ya'poťa ñeñť atarr es eñotets, ñeñťara ama't ahuatoteñpa' ama eñotpahuo poctapña. Tarraña ama't allempo ama ayečhcatarettena' patspa' ñeñťñapa' o' anaretetua attoch cohuencha' ya'queshpataretterra esempo-huañen. ⁸ Añña añcha'taretnesha' ñeñť añe patsro'tsa'yenpa' ama čhapaneto Yompor poctapña. Ñerra'm čhapanetañcha' ahuaña pueyočhretopa' amate' corso'tamperetañeña Yepart-seshar ñeñť atarr nanac cohuen. ⁹ Tarro'mar atet anuaretta Yompor po'ñoň ahuať, ñeñťpa' atet oten:

Ama't ahuaťa ya ñeñťey arromñaťeypa' ama yentare ñeñť o'patatenya Yompor ñeñť cochnesha'tetsa yocop, ñaña ama ye'mare, ñaña ama čhaponaye'te yeyočhro ñeñť o'patatenya Yompor ñeñťeycha' morrenterraya ña.

¹⁰ Tarraña ñeñťeyña ame'ñerraya ñeñťey allohueneypa' o' eñotaterrey Yompor e'ñe ña Puecamquěñoť ñeñť chorratenya. Po'ñočh yeñoteñ Yompor Puecamquěñpa' ña eñotuene' allohuen Yompor poctapña ñaña ama't ñeñť ama eñotpahuoyaye.

¹¹ Attecma yepena yaña ñeñťey acheñey. Amach errotent po'psheñeñpa' eñotonay atet yoctape'chen ya yeyočhro, e'ñech yapta yeñoteñ. Attecma pena ñaña

po'potantañ amach errotenoť eñotano Yompor poctařña, e'ñečh Yompora ñapueť Puecamquëñ eñotene'. ¹² Yapa' o' yagapoñ Yompor Puecamquëñ, amaña acheña poctařña yaguërro ñeñť patso'marecpa. Ñeñťara Yompor Puecamquëñ ñeñť čhapatene' yeyočhro ñaña ñeñť yeñotatene' atto ña muerenya. E'ñe puemuerenötey shonte' es apa'yeney. ¹³ Ñaña ñeñť ñoñets ñeñť yečhateney Yompor Puecamquëñpa' ñeñťara ñoñets o'ch yeserrpare'tatas saña ama't ñaña po'potantañečhno. Ñeñťpa' ama añeyaye ñoñets ñeñť atet yečhatyen acheñenesha' ñeñť eñotañetyetsa. Ñaña ñeñť ñoñets atto yečhateney Yompor Puecamquëñoťpa' ñeñť yeyčhatenes saña ñeñťes o' chorrersa saña Yompor Puecamquëñ.

¹⁴ Tarraña acheñenesha' ñeñť ama chorreña' Yompor Puecamquëñpa' amach errotenoť čhapaneto Yompor poctařña ñaña amach errotenoť agapoñeto ñeñťcha' apañetañ Yompor Puecamquëñoť. Ñerra'm yeserrpare'tatanet atto es apueney Yompor Puecamquëñoťpa' ñetpa' čhach otyeset atto' yotatse'tyen. Tarro'mar ñapťa čhenana pueyočhro ñeñť chorrena Yompor Puecamquëñ. ¹⁵ Tarraña añña ñeñť chorrena Yompor Puecamquëñpa' ñetpa' čhenanet pueyočhreto ora ñeñť atet pena Yompor. Tarraña ñeñť ama chorreno Yompor Puecamquëñ, ñetñapa' amach errotenoť čhapaneto pueyočhro esocopte' atet penaña ñeñť chorrena Yompor Puecamquëñ. ¹⁶ E'ñe attecma oteney Yompor po'ñoñ ñeñť anuaret ahuatoteñ, ñeñťpa' atet oten: "Esesha'huate'ca' eñote'ña ñeñť atet cotape'chen Yompor attoch ñetpa' o'ch cotape'chateret ñamet Yompor." Tarraña te'ña yapa' attecma yoctape'chen atet cotape'chen Cristo.

3

Arrpa' all ama patrraye' cotape'cheno corinto'marnesha'

¹ Ñaña o'ch notas masheñneshacha' ñaña nočhaneshacha' ama't ahuañoteñ noteneñ o'ch noctape'chatas e'ñe cohuen, atet noctape'chateñ acheñ ñeñť e'ñe chorrena Yompor Puecamquëñ. Tarraña amach errotenoť noctape'chataso tarro'mar sapa' atťa socrrena atet muenatenes sechets. Cha sottena atet ñerra'm cheshatoll ñeñť ama eñotena'. Sapa' ama e'ñe čhennasa' ñeñť cohuentetsa Cristocop. Ñeñťo'mar teme'ttsen atťa noctape'chatenes atet ñerra'm cheshatolleshasa. ² Ñeñťo'marña ahuañoteñ atťa neñotatenes ñeñť ama torrapahuoyaye Yomporcop. Ñeñťo'marña amach errotenoť noctape'chaterrserro ello ñeñť nanac echarr cotapñats. Atťa sottena ñerra'mrrate' ematoll, napa' attach nemomatenes semomos atet peñet ematoll,

ñeñtara yoten coṭaṭñats Yomporecop ñeñt ama echarro. Ñaña ama echarroye' serrar napuenso, tarro'mar amate' erroteno setsoto, ama't teme'ttsenpa' ama setsoteññañe Yomporecop ṭaṭaṭña ñeñt nanac echarr. ³ Tarro'mar teme'ttsen atta socrrena atet muenatenes sechets. Po'ñoḥ ñerra'm esempo es yeye'chapretannena, amapa' ñerra'm ḥo ye'moñe'tannena, ñeñtṭpa' atta yocrrena atet muenateney yechets. Ñeñtṭpa' ama'tña attera sorrteno atet pena acheñ ñeñt ama ame'ñenayo Cristo. ⁴ Tarro'mar ñerra'm ḥa yotyen: "Napa' añcha' name'ña Pablo", po'psheñeñña' ñato' oten: "Napa' añcha' name'ña Apolos." Ñeñt atet sepena ḥachca'ye sottena ñerra'mrrate' ñeñt ama Cristona'tareyaye.

Puesheña'ttsoypa' añ yetorra'yena Yomporecop ñeñt atet yechyenyaya

⁵ Ñaña o'ch notas, yapa' ama esoyayye ama't Apolos, ama't na, añayaca'ye ñeñtey torretsa Yomporecop. Yapa' amñareṭeya attoch o'ch yame'ñatasa. Puesheña'ttsoypa' añ yetorra'yena Yomporecop ñeñt atet yechyenyaya. ⁶ Atet ñerra'm napa' na ñanom same'ñate' Yomporecop po'ñoñ. Allotñapa' ahuo't huapa ñaña Apolos, ñapa' ña seserrpare'tate' attoch allo'na sesen huomenc pa'nmue' seyoḥer. O'ch netma'ntacha atet: Napa' atten ñerra'mrrate' ñeñt nare'tets. Allotñapa' o'ch huapa po'psheñeñ ñeñtḥa' she'tamo're'tosets, Yomporecop ñach a'ḥpate' narmets. ⁷ Ñeñto'mar yeñoteñ ñeñt nare'tetspa' ama esoyaye, ama't ñaña ñeñt she'tamo're'tetspa' ama esoyaye. Añña Yomporecop ñeñtña es a'ḥpate' ñaña sherbets. ⁸ Ñeñto'marña yeñoteñ ñeñtey nare'tets ñaña ñeñtey she'tamo're'tetspa' e'ñe parroccma yetorra'yena Yomporecop. Elloña Yomporecop apa'yerreycha' puesheña'ttsoy cohuen ñeñtḥa' atarr yocshaterre'. Apa'yerreycha' erroteno yetorra'yena ñocop. ⁹ Yomporecop enteney atet ñerra'mrrate' parroccma yetarra'yena ñocop. Sapa' Yomporecop entenes atet ñerra'm ña pa'mres, allcha' nanac torrena ña.

Ñaña Yomporecop entenes atet ñerra'm pocoll o'ch tomatey ña. ¹⁰ Atet ñerra'm na, Yomporecop puenereñoṭpa' o' yeḥaten na o'ch neñoch e'ñe huomenc, attoch nanomcha' ame'ñaterraya acheñenesha' Jesucristo. Ñehua, o'ch netma'ntacha atet ñerra'm Yomporecop o' yeḥatenen attoch o'ch neñoch tomate' pocoll e'ñe huomenc. E'ñe neñoteñoṭ o'ch natomat ñanom quellpach e'ñe echarr. Allotñapa' o'ch huapa po'psheñeñ ñeñtḥa' allo'na yeḥcatnomue'. Tarraña ñeñtḥa' allo'na yeḥcatnomue'pa' coṭape'che'pa' ñanom, pocte'te' atet peñ, ñato' amate'. ¹¹ Ñehua, añ quellpach ñeñt anareṭ

ñanompa' ñeñt toma'ntenaya atet ñerra'm ya ñanompa' o'ch yame'ñera Jesucristo. Ñap'ach Cristo yame'ñerra. Ama eñalle po'poñ ñeñtcha' yame'ñerra, tarro'mar amach errotent' yame'ño po'poñ ñeñt ama Cristoyaye, añcha'ña ñeñtara Cristo ñeñt o' yotuanmas. ¹² Ñeñt o' yame'ñata Cristo, ñetpa' allo'nach yeychatnenanet aco'pa attoch huomenc pa'nmuet pueyo'cher. Ñehua, o'ch netma'ntacha atet: Ñerra'm cho yeye'chcaten pocoll ñanemcha' quellpach yatomat. O'chña echarr yatomatua quellpachpa' allo'nachña yesen yechcatnomue' pocoll. Erra'tsenpa' ñato' o'ch yechcatenan oropo' pocoll ñeñt atarr nanac cohuen, ñato' po'psheñeñpa' o'ch yechcatan asrepo' ñeñt nanac cohuen ñaña, po'psheñeñña'pa' o'ch yechcatan cohuen mapyepo' ñeñt nanac tsa'te'. Tarraña ñato' po'psheñeñña'pa' o'ch tomatan tablapo' ñeñt ama tama cohuenayaye, ñato' po'psheñeñpa' aspanapo'ch, ñeñt'pa'cho'ña amach tama cohuenayaye, ñato' po'psheñeñpa' attach yechcatan atet ñerra'mrate' posho'llpo' ñeñt ama cohuenayaye ama't mamesha. ¹³⁻¹⁴ Esemphuañenña allempoch huerra Cristopa' entatuare'teycha' allohueney ñato' espo'te' yeye'chcatyes yepaquell, ñato' oropo', ñato' tablapo' amapa' ñato' atet ñerra'm posho'llpo'. Ñehua, añcha'ña yeñotate'tso'. Yompor poyoro'chenño'tpa' o'ch etoman'pesyesonay yepaclachno. Ñehua, yeñoteñ ñeñt oropo' amach poyo, asrepo'pa'cho'ña amach poyo, mapyepo'pa'cho'ña amach poyo. Tarro'mar ñeñt'pa' ama acraño, ñeñto'marña nanac sherben. Tarraña tablapo'pa' ñeñt'pa' poyuach, aspanapo'pa'cho'ña poyuach, posho'llpo'pa'cho'ña poyuach. Tarro'mar ñeñt'pa' ama es sherbeno, attochña eñotuare'teycha' e'ñe puesheña'ttsoy errotente' yeye'chcatyes, ñato' cohuenta' ñato' amate' cohuenayaye allempo es yetorra'yeshnoma Cristocop. Ñerra'm esempoch etoman'pesyesonay yeye'chcatar ñerra'm amach poyo yeye'chcatar, allempochña yeñoch atto es yetorra'yeshnoma Cristocoppa' ñeñt'pa' e'ñe cohuen. Ñeñto'marña allempopa' aphuerreycha' e'ñe puesheña'ttsoy ñeñtcha' atarr yocshaterre'. ¹⁵ Tarraña ñerra'm yeye'chcatarña cha poyuapa' o'ch yeñoch atto yetorra'yeshnoma Cristocoppa' ama es sherbeno, chach a'chencatonay yeye'chcatar ñeñt Cristocpañ. Tarraña ama'tcha' a'chencatonay yeye'chcatar, yaña yecamquëñpa' queshperrach. Tarraña e'ñech yemuero'chenño'ta yequeshperra atet ñerra'm cho poyen pocoll yañapa' o'ch yequeshpa'.

¹⁶ Te'pa' o'ch notas po'poñ: Sapa' ama't seño'teñeña

Paretspa' o' pa'paquëll perres allohuenes ñeñtes ame'ñetsa. Yeparrocmatueñot allohueneypa' te'pa' e'ñe atet enterrey atet ñerra'm pa'paquëll, allcha' yeçhena Puecamquëñ ña. 17 Tarraña ñerra'm esesha' alla soctape'chaterre' ñeñt ama cohuenaye' enteno Yompor ñeñtña atet petsa çhach ottena ñerra'mrrate' cho a'matenan Parets pa'paquëll. Ñerra'm esesha'ña a'matene' Parets pa'paquëll ñeñtña Yomporpa' çhocmach a'chencater. Tarro'mar Parets pa'paquëllpa' ñeñtpa' Partsocpa, saca'yeña o' pa'paquëll perresña Parets ñeñt e'ñe ñocpa.

18 O'ch noterrser po'poñ: E'ñech señota sañeña. Ñerra'm eseshas otets, napa' atarr es neñoten aña patsro, añ pocte' o'huañepa'ch es eñotatse'tyes e'ñe patso'mara. Añña pocte' o'ch orrta atet ñerra'mrrate' ama es eñoteno. Añepa'chña eñot ñeñt huetsa Yomporshot. 19 Tarro'mar ñerra'm esempo ñeñtey acheñey aña patsro ñerra'm cha yotenapañ yapa' atarrte' es yeñoten, Yomporñapa' atet enteney ñerra'mrrate' cha yotatse'tyen. Ñeñtpa' anuaret ñaña ahuatoteñ Yompor po'ñoño, ñeñtpa' atet oten: "Ama't atto es eñotatse'tyenetpa' Yomporñapa' o'ch eñotanet atta otatse'tyenet, ama't ñetpa' otenapuetañ nanacte' es eñotenet tarraña ñeñtpa' shequëñtsa." 20 Añ ñoñetspa'cho'ña anuaret ahuatoteñ, ñeñtpa' atet oten: "Ñeñt cha otenapañ nanacte' es eñotenpa' añña Yomporpa' eñotenanet ñeñt atet cotape'chenet ñetpa' e'ñe orrena." 21 Ñeñto'marña te'pa' o'ch alla noterrser: Amach ellocma sa'ye'choçhtatanna'tyesatsto atet yoctape'chen ya ñeñtey arromña'tey. Tarro'mar allohuen ñeñt apuenes Yompor ñeñtcha' soctape'chate' cohuen. 22 Ama't na Pablonpa' Yompor o' na'n ñeñten allohuenacpas, ñaña ama't masheñ Apolos, ñaña ama't masheñ Pedro. Yomporpa' apueney allohuen ama't ñeñt yentyes aña patsro ñeñtcha' yeyenpue' ñeñt alloch yocsheña Yompor. Yocsheñepa'ch ama't allempo yocrrena, ñaña ama't allempoch yerroma, ñaña ama't ora allpon ñeñt eñall te' çhocmuepa'ch coshateney. Ñaña ora allpon ñeñtcha' eñalletatsa tsapa'onetpa' ñeñtpa'cho'ña coshatasepa'ch. Ama't allohuen ñeñt pa'namen esoçhno ñeñtpa' yocop ñeñtcha' yeyenpue'. 23 Elloña yapa' e'ñe pueyochresha' pohueney Cristo allohueney, Cristoñapa' Parets Puechemer pene'.

4

Atet pena ñeñt torretsa Cristocop

1 Ñeñto'marña te'pa' notenes, epsheño'marey na epan masheñ Apolos, añ pocte' o'ch senteney atet ñerra'm ñeñtey torretsa Cristocop. Ñaña añ pocte' o'ch senteney atet ñerra'm yapa' eyecharetey o'ch ya'potoñ Yompor po'cohuenña. 2 Ñehua, yeñoteñ ñerra'm erra'tseney eyechareteypa' añcha'ña atet yepena atet yechenyet. 3 Ñato' sapa' sentenente' napa' nepena atet eyechareten ñato' amate', ñeñtpa' ama añecpayaye ñeñt atet nellquëna na. Ama't acheñenesha' ñeñt amcha'taretetyetsa, ñerra'm erro'tente' entennet ñeñt atet nepenapa' ñeñtpa'cho'ña ama añeyaye ñeñt atet nellquëna na. Ama't napa'cho'ña ama neyemteno ñeñt atet nentena e'ñe nañeña. 4 Ñehua, e'ñe cohuenare' nenteñeñ allohuen ñeñt atet es ne'pa'yen, tarraña ñeñtpa' ama añeyaye alloch yeñoch e'ñete' cohuenare' es ye'pa'yen. Añña e'ñe pocte' nenten Yepartsesharcha'ña otats e'ñete' pocte' entenen, amapa' ñato' amate'. 5 Ñeñto'marña notenes, amach sotatsto atet: añ acheñer nanac cohuen, po'psheñeñpa' ama cohuenayaye. Te'pa' amach sotatsto atet, tarro'mar esempohuañencha' huerra Yepartseshar. Allempopa' ñachña eñotatuerrets ñeñt ya'nasotyena te'. Ñaña ñachña eñotatuerrets ama't ñeñt atet yemna'yen yeyo'chro. Errponeycha' ñeñtey cohuen entuerr Yomporpa' allponeycha'cho' aye'cho'chtatuerr.

6 O' notuas ñeñt poctetsa ñeñtcha' atet sentey ya epan masheñ Apolos. Masheñneshacha' ñaña no'chaneshacha' tarro'mar atet notenes, allochñapa' attoch seño'ch añ pocte' e'ñech attecma senteñ ama't allohuen acheñ, e'ñe atet oteney Yompor po'ñoñ ñeñt atet anuaret ahuatoteñ. Allochñapa' amach yommo'chatsche acheñ ñeñt cohuen yenten e'ñe yañeña. 7 Sapa' atarr cohuen sentena sañeña tarraña amaña po'psheññeye' atarr eñotañ sentenaye ama't puesheñarra. Ama't allpon seño'tyenpa' amaca'ye e'ñe sotaye' es seño'tyeno; Yomporca'ye seño'tatene'. Po'ño'chpa' atto Yompor es eñotatenespa' eso'mare'tña sommo'chyenaña atet ñerra'm e'ñe so'a es seño'tyen.

8 Cha't sotenapañ o'te' nanac setsotoñ Yompor pocta'pña. Cha sottena atet ñerra'm ama es sepallteno ama't coñe'ta Yomporeshot. Yañapa' o'huañ acua'psenaye' senterrey. Sañapa' o' cha amcha'taretoyen sorrtena. Ñehua, e'ñe pocte' sa'mcha'tare'ttepa' tarro'mar ñerra'm po'ño'ch o'ch sa'mcha'tare'tterrapa' ñato' attotpa' o'ch semnatey yaña o'ch ya'mcha'tare'ttapre'terra. 9 Tarraña napa' noctape'chen ñato' ya ñeñtey allsensareteypa' Yomporpa' ñato' o'ch muenatan acheñenesha' yapa' o'ch a'ypo'ñerryet. Acheñenesha'ñapa' chach amtsen entenyet. Attach cohuaña'tyenyet allohuen

acheñenesha' arr patsro, ama't ñaña ñeñt Yompor po'mllañoñeñaneshar o'ch cohuanatyet ñamet. ¹⁰ E'ñe yame'ñeñoñ Cristopa' añña acheñenesha'pa' chach otenet yapa' amo' es yeñoteno, tarraña sapa' chaña atet sentena ñerra'mrrate' atarr nanac eñotañes. Ñaña yapa' chach otenyet amo' esoshe'mayayye, tarraña sañapa' atña ahuamencañoyen sentena. Ñaña sapa' nanac añcha'na'tpo' entenset, yañapa' amach acua'psenaye' entenyeto. ¹¹ Yañapa' teme'ttsen yemuerochtena ama't yachporrñoñ, yo'ñpañoñe'na yemuerochtena ñaña yemuelleñoñe'na. Atta epaye' atserrpenyet, ñaña ama yechedo allcha'yeycha. ¹² E'ñe yetorreñoñ nanac yetaruasen e'ñe ya yotoñ. Ñaña ñerra'm esempo sasare'tenyetpa' yañapa' o'ch yenamatenanet Yompor pa'nateña ñocpuet. Ñaña ñerra'm esempo pue'moñe'teñoñet cotare'tenyetpa' yañapa' attach ya'huantenanet. ¹³ Ñaña ñerra'm esempo sochatse'tenyetpa' yañapa' chach yamo'tstanet cohuen. Ñaña ama't teme'ttsen entenyet atet ñerra'mrrate' es ahuapore'taret, ñeñt ama es sherbetso ama't mamesha arr patsro.

¹⁴ Napa' ama añeçpaye' nequellquënnaso añ ñoñets attoch o'ch nepencatas, añeçopña nequellquënnas attoch noctape'chaterres e'ñe cohuen atet ñerra'm e'ñe nechemeres ñeñt nanac nemuerara. ¹⁵ Na po'ñoçhpa' atet nentenes ñerra'mrrate' e'ñe nechemereshas. Tarro'mar ahuaña allempo neserrpare'tatoses cohuen ñoñets ñeñt Yomporshotpa' o' name'ñatasa Cristo Jesús, ñeñtpa' atet ñerra'm cho nechemere'tensa Cristocop. Ñeño'marña te'pa' notenes, ama't eñall shonte' acheñ ñeñtcha' soctape'chaterre' ñeñt cohuentetsa Cristocop, tarraña e'ñe patrra sompor sepen ñeñt ñanom same'ñate', ñeñtpa' atet ñerra'm na. ¹⁶ Ñeño'marña napa' notenes: Atet sentenen atet nepena na e'ñe cohuen, sapa'cho'ña atetcha' sepa saña.

¹⁷ Ñeño'marña nemñonas masheñ Timoteo; ñapa'cho'ña nechemer nepeñ. Ñapa' nanac nemorrenteña, ñapa' chocma ame'ñenana Yepartseshar. Ñapa' ñach seyerpate' Cristo pocta'pña ñeñtara cota'pñats neychatyes erracmañen errate' pame'ñeñoñet apchenet Yomporecop. ¹⁸ Patanta'ttsospa' nanac sommo'chena atto es señoñyen. Sapa' cha't sotenapañ ñato' napa' amach neçhapaña sesho. ¹⁹ Tarraña po'ñoçhcha' neçhap sesho ñerra'm Yomporcha' muenats. Ama't tayecmapa' pocte' o'ch ahuen ñerra'm ña muenats. EsemPOCH neçherrerra' allempochña neñotos ñeñt ommo'chetsa, ñato' po'ñoçhte' ahuamencañet Yomporecop, amapa' ñato' attate' ommo'chenet. ²⁰ Amaña e'ñe ñapña yeserrpare'teñoñ

yorr Tateññañña Yompor po'cohuenña attoch atarr ayochreshattena ña; po'huamencote'nachña yorr Tateññañ po'cohuenña. ²¹ Ñehua, te'pa' o'ch na'p'to'tas: ¿Erroñena't semnen ñeñtcha' atet ne'poses allempoch ne'chap sesho? Ñato' o'ch necoñchatoses, ñato' o'ch soctape'cherr cohuen tayecma attoch esempoch ne'chappa' amach eñalle attoch o'ch necoñchatoses. Allempopa' ñato' ellochña chach nemuerossa e'ñe cohuen.

5

Atto Pablo pa' ama pocteye' entano atto puesheñarr corinto'marnesha' orrtatan ñeñt ama pocteyaye tarraña pamo'tsesha'ñapa' ama erroteye' oteñeto

¹ Ñehua, te'pa' o'ch notas po'poñ. Tarro'mar atet otyenet, po'ño'ch eñallo' sesho puesheñarr yacma ahua' yorerran pachoret sore'. Ñeñt pa' nanac ochña'teñets atet, tarro'mar ama't ñeñt ama ame'ñetsopa' ama pocteye' entenetoña atet. ² Tarraña sapa' chocmo' cohuen senteñ ñeñt atet sepena. Eso'mare'tña ama choye'ña llecatenso. Tarro'mar ñeñt ochña'tets atet pa' amach allo'na senteñe attoch o'ch allo'na separroc matnen epas. ³⁻⁴ Ama't napa' ama allo'tsenno parro, tarraña e'ñe neyerpueño'fespa' allo'tseney parro. Ama't ama allo'tsennopa' napa' o'ch notas necartot ñeñt pocte' nenten na, attecma ñerra'm allo'tseney parro. Napa' o' neño'ch ñeñtcha' atet sepe' ñeñt ochña'tets atet. O'ch notas ñeñtcha' atet sepe': O'ch sap'cha allohuenes e'ñe same'ñeño'f Yepartseshar Jesús; napa'cho'ña e'ñe neyerpueño'fespa' allo'tseneycha' parro. Allochñapa' e'ñe Yepartseshar Jesús po'huamencotpa' ⁵ o'ch sepom ñeñt yacmar o'ch sapuer oneñet attoch a'coñchatoñ po'chets. Allochñapa' puecamquëñpa' queshperrach esempohuañencha' huerra Yepartseshar Jesús.

⁶ O'ch alla noterr serr: Sapa' ama't sommo'chenañ atto e'ñe cohuenare' es sepeneñpa' tarraña ñeñt pa' ama pocteyaye, tarro'mar atta e'ñe semnateñ acheñ o'ch allo'na ochña'tnen. Ama't señoteñe ñerra'm allo'na yemnatneñ o'ch ochña't ama't e'ñe puesheñarro'fapa' tsapatonetpa' o'ch pet allohuenet atet. Ñato' o'ch netma'ntacha atet: “Ñerra'm yena' coñe't chase' allempo yeye'chcaten pan, ama't e'ñe coñe'ta yena'pa' o'ch epa'hua ora, attoch e'ñe rropa'ptatuan ora pan.”

⁷ Ñeño'marña o' notas o'ch sa'ypo'ñerr ñeñt ahuat soctapña ñeñt nanac sosey. Añcha'ña o'ch setserrataterr soctapña. Tarro'mar po'ño'ch etserra o' ye'hcaterres Yompor. O'ch netma'ntacha atet pete't ahuat allempo o'ch cherr pascuapo

čhocmach huapore'tuet allohuen pan ñeñt a'chasareť. O'ch yečcatet etserra pan ñeñt ama a'chasareteyaye. Ñaña pascuapopa' čhocmach muetsete't carrneroťoll, tarraña te'pa' Cristoña o' amsaretta yocop. ⁸ Ñaña ahuat pascuapo añ coshatahuete't pan ñeñt ama a'chasareteyaye tarraña te'pa' añcha'ña yocshaterre' attoch o'ch ya'ypo'ña'huerr ñeñt ahuat yocťapña ñeñt allo yo'chña'tare'te't ñaña ñeñt nanac sosey Yomporecop. Añcha'ña o'ch yocťape'cherr etserra ñeñt e'ñe cohuenare' cotapñats Yomporecop ñeñtara cotapñats ñeñt e'ñe po'ñoč cohuen.

⁹⁻¹⁰ Te'pa' o'ch notas po'poñ. Ahuaña po'poñ necartoťpa' atet notuas: Amach seyemtatscho ñeñt cheta'yene' coyanesha' amach puetaporeyaye. Ñehua, allempo notas necartoťpa' añecop noten ñeñt ame'ñetsa tarro'mar ñerra'm attera cheta'yenan coyanesha', amach seyemtatsche ačeñ ñeñt atet petsa. Tarraña ama añecpaye' atet noteno ñeñt ama ame'ñetso ñeñt atet petsapa' amach seyemtatsche. Tarro'mar añe patsropa' čhocmach yeyemcha ama't ñeñt ama ame'ñetso, atet ñerra'm ñeñt cheta'yene' coyanesha' ñeñt ama puetaporeyaye, ñaña atet ñerra'm ñeñt atarr es ye'chapretetsa, amapa' ñaña eñeť, ñaña ñeñt ma'yochenaya ayečcataret. Ñerra'm ama yeyemt Janetopa' amate' erroťeno yocroña añe patsro. ¹¹ Añña notenes amach seyemtatsche ñeñt otets ame'ñenano' Cristo tarraña ñeñt attera cheta'yene' coyanesha' ñeñt ama puetaporeyaye, amapa' ñeñt attera es ye'chapretyetsa, amapa' ñeñt attera ma'yochenaya ayečcataret, amapa' ñeñt attera sasare'tets, amapa' ñeñt attera posa'tarets, amapa' ñeñt attera etyets. Ñeñt atet p'a'yetsapa' amach seyematstero, ñaña ama't atťapa' amach serrallme'cherro epas. ¹² Ñehua, añecop atet o' notuas, tarro'mar yocoppa' ama pocteyaye o'ch yotteñe'cheñ ñeñt ama ame'ñetso. Yocoppa' añña e'ñe pocte' o'ch yotteñe'cheñ ñeñt pame'ñeñoťet atterach es pantenet. ¹³ Yomporpa' ñachña otteñe'cherre' ñeñt ama ame'ñetso. Sapa' añña poctetsa socop sehupore'ch ñeñt atterach sosya'tsañach orrtatyenet.

6

Atto ama pocteyaye o'ch yetmantanna'ta

¹ Te'pa' o'ch noterrerr po'poñ. Ñaña o' ne'mare'tas atto sapa' čhocmo' setmantannena ñerra'm esempo erroť seřannena, ñaña ama't ñeñteso' pueyochresha' o' perrsoñ Parets. Eso'mare't čhocma soteñña añcha'taret ñeñt ama

ame'ñetso o'ch a'pocatonas ñeñt atto se'moñe'tannena. So-coppa' añña pocte' o'ch soch puesheñarr ñeñt e'ñe par-rocma same'ñena ñetcha'ña a'pocotate' ñeñt atet sepañnena. ² Ama't seño'teñe ya ñeñtey o' pueyochresha' perrey Paretspa' yach añcha'tare'tterrtsa allohuen acheñenesnacop arr pat-sro esempohuañen. Ñehua, ñerra'm po'ño'ch yeñoteñ o'ch ya'm'cha'tare'tterra allohuen acheñenesnacop arr patsro es-empohuañenpa' eso'mare'tña ama seño'teñe o'ch sa'pocatat ñoñets e'ñe sañeña ñeñt ama torrapahuoyaye. ³ Ñaña ama't seño'teñe esempohuañenpa' yach añcha'tare'tterrtsa ama't Yompor po'm'llaño'teñnanesharecop. Ñeñto'marña te'pa' notenes e'ñe pocte' o'ch ya'pocatatanna'ta ya yeñoñ ñeñt atet yeychena te' arr. ⁴ Ñerra'm esempo esocop setmantannenapa' eso'mare'tña o'ch sene' puesheñarr ñeñt ama cohuenaye' enteno ñeñt ame'ñetsa, ñach a'pocotate' señoñ socop. ⁵ E'ñe nepencna'ntateño'tes sapa' ñeñto'marña atet notenes: Se-shopa' ¿ama'tña eñalleña ama't puesheñarra ñeñt ame'ñetsa ñeñt eñotene' o'ch a'pocatan ñoñets? Ñeñt eñotene'pa' e'ñe pocte' ñach a'pocatatene' señoñ ñeñtes parro same'ñena. ⁶ Tarraña te'pa' ama atteye' sepeno. Chocmo' setmantannena ama't ñeñteso' parro same'ñenañ. Sapa' ahuo'ch'cho' ahues tomantanna'ttsa a'yo allo'tsen acheñ ñeñt ama ame'ñetso, ñapa' ahuo'ch'cho' a'pocatonas señoñ socop.

⁷ Tarraña ñeñtpa' ama pocteyaye ama't mamesha o'ch setmantannena. Tarro'mar ñerra'm chocma yetmantannenapa' ñeñtpa' ama añeye' yepeno atet muenen Yompor. Añña ñerra'm esempo erro't p'onas po'psheñeñpa' eso'mare'tña amaña alla sa'huantannenoña ñeñt atto erro't es sepañna'tyena. Ñaña ñerra'm esempo es puerrata'mpensetpa' eso'mare'tña amaña alla sa'huantenaneto. Añ poctetsa o'ch alla ya'huantenanet alla. ⁸ Tarraña sañapa' ama atteye'ña sepeno. Añña sapa' chocmo' erro't sepañnena, ñaña chocmo' es seprrata'mpsannena ama't e'ñe sagattsa ñeñtes ame'ñetsañ.

⁹ Ama't seño'teñeña ñeñt ama cohuen es petsopa' amach es o'paterroña all añcha'tare'ttena Yompor. Amach semnatatsche po'psheñeñ o'ch atta shecare'tas. Po'ño'ch atet notenes, ñeñt cañoresha'tetspa' amach es o'paterro all añcha'tare'ttena Yompor. Ñaña ñeñt po'yomporer pa'yene' aye'chcateretpa' ñetpa'cho'ña amach es o'patata're'tterretoña all añcha'tare'ttena Yompor, ñaña ama't ñeñt apretets taporets, ñaña yacmanesha' ñeñt agapannetsa e'ñe ñagattset. ¹⁰ Allo'tpa' ñaña ñeñt etyets ñaña ñeñt atarr es ye'chapretyetsa, ñaña ñeñt posa'tare'tyets, ñeñt atet pa'yetsapa' amach es

o'patatare'tterreto all añcha'tare'ttena Yompor. Allo'tpa' ñaña ñeñt achm'are'tets ñaña ñeñt puerratarñpesyets ñetpa'cho'ña amach es o'patatare'tterreto all añcha'tare'ttena Yompor. ¹¹ Sapa'cho'ña puesheña'ttsos attecma sepe't saña ahuaña. Tarraña te'pa' o' e'sshouare'tterra so'chñar, attoña o' sa'cohuentatare'tterra Partsocop. E'ñe seyemteño't Yepartseshar Jesucristo te'ña Pomporpa' o' pocte' enterres. Ñaña e'ñe puechorreño'tes Yompor Puecamquëña' o' pocte' enterres Yompor.

Añ pocte' o'ch e'ñe yecuen cohuen yechets tarro'mar ñeñtara yechetspa' po'chets peñ ñaña Cristo

¹² Te'pa' o'ch noterr'serr po'poñ. Ñehua, napa' neñotenes puesheña'ttsospa' atet sotatse'tyen, "e'ño' pocte' ye'pa'yes ama't erra'tsente' yemnen." Ñehua, yapa' yeñoteñ Yompor po'ñoñpa' ama't ama atet otenyeñe amach es ye'pa'yesatsto, ñeñto'marña "e'ñe pocteñ allohuenpa' o'ch es ye'pa'yeneñ." Tarraña ama't e'ñe pocteñ o'ch atet es ye'pa'yeneñ allohuenpa' tarraña ñerra'm ñeñtpa' ama añecpayaye alloch yeyenpueñ yamo'ts attoch e'ñe huomenc ye'panna yeyo'cher Yomporecoppa' ñehua, ñeñtepñapa' amach atet ye'patsto. Ñaña ama't pocteñ allohuenpa' o'ch es ye'pa'yespa', tarraña ama pocteyaye o'ch nanac es yayomatse'tyesa tarro'mar ñerra'm es nanac yayomenapa' ñeñtaña pomnaren pene'ña yechets. ¹³ Ñaña neñotenes puesheña'ttsospa' atet sotatse'tyen, e'ño' pocte' senteñ o'ch señmatat sechets e'ñe sa secañoresha'teño't tarro'mar ñeñtecpo' yechquëñaña sechets o'ch atet se'pateñ. Ñeñto'marña atet setma'ntatenaña sechets ñerra'mrrate' allempo sachporrena choch serra' serrar attochña e'ñe señmatat sa't e'ñe ora sechtsohuen tarro'mar sa'tpa' ñeñtecpo' yechquëña. Tarraña te' napa' o'ch notas, ama't pocteñ o'ch yeñmatateneñ ya't arr patsropa' chapcha' esempohuañen allempopa' o'huañcha' yemna' ya't ñaña yerrar, tarro'mar atet ne' Yompor. Tarraña ama't pocteñ o'ch yeñmatateneñ ya'tpa' tarraña ama pocteyaye o'ch e'ñe yeñmataten yechets yecañoresha'teño't tarro'mar ama añecpaye' aye'chcatare'teña yechets attoch yecañoresha'ten. Yechetspa' añecopña aye'chcatare't attoch yetorra'yesa Yepartsesharecop. Ñaña ñapa' ñach yecuañpene'ña yechets. ¹⁴ Ñeñto'mar Yomporpa' o' tantaterran Puechemer ñeñt Yepartseshar yepen ya. Ñeñto'marña yeñoteñ yapa'cho'ña esempohuañenpa' tantaterrnaycha' yaña yechets. E'ñe po'huamenco'tpa' tantatuerreycha'.

¹⁵ Ama't señoteñeña e'ñe yeparrocmateño't Cristopa' ñeñt ya yechetspa' po'ño'chpa' ñeñtara po'chets pen ñaña Cristo.

Ñeñto'marña notenes, atto ñeñt po'chets pen Cristo ñeñtara ya yechetspa' eso'mare'tña e'ñe pocte' sentenña e'ñe ya yechtso'tpa' o'ch yecañoresha'tach Cristo. Amaca'ye pocteyaye o'ch yetsetach Cristo po'chets epuet yecañoresha'. ¹⁶ Ñehua, ama't señoñeña ñerra'm esempo yo'chña't epay ottatsña'ipa' epsheño'marey o'ch e'ñe yeparrocmatash yechtso. Po'ño'ch atet enteney Yompor atet oteney po'ño'ño' ñeñt anuaret ahuatoteñ, añmapa' ñeñt atet oten: "ñeñt epsheño'maretpa' e'ñech pa'rra po'chets penet." ¹⁷ Tarro'mar e'ñe yeparrocmateño' Yepartsesharpa' epsheño'mareypa' e'ñech pa'rra yoctape'chen yeyo'chro ñeñt yecamquëñecop.

¹⁸ Ñeñto'marña notenes añ pocte' o'ch sa'ypo'ñer cañoresha'teñets. Po'poñe'chno ñeñt ye'pa'yen soseypa' ñeñt'pa' ama yechtsoye' ya'sosyateno. Tarraña añña cañoresha'teñetspa' ñeñt'pa' e'ñe ya yechets ya'sosyaten. ¹⁹ Ama't señoñeña ye'narpa' ñeñtara pa'paquëll pen Parets Puecamquëñ ñeñt chorratenya Yompor. Ñeñto'mar yeñoteñ yechetspa' ama yoyaye, ñeñt'pa' Yomporo tarro'mar ²⁰ ñapa' ahuo't rañterrya. Atto rañterryapa' nanac muero'chta Puechemer attoch tsa'tuerrnaya yo'chñar. Ñeñto'marña notenes, ama't atto yocrrena yechtso'tpa' Yomporopa'chña yecohuentaten e'ñe yecamquëño'huen tarro'mar ñeñt epo'marpa' Yomporo.

7

Atetcha' ye'pa ñerra'm yemneñ o'ch yesna'ta

¹ Te'pa' o'ch neserrpare'tatas ñeñt atet sa'p'to'ten ahuaña secartot. Ahuo't sa'p'to'ten pocte'te' o'ch yesna'ta. Ñehua, ñanom o'ch notas atet, e'ñe pocteñ amate' yeyoratsche coyanesha' ñeñt'cha' yetapor ye'pa'. ² Tarraña ellopa' añ pocte' ñaña allohueney yacmaneshay o'ch yeyore puesheñarr coyanesha' ñeñt'cha' yetapor ye'pa'. Coyanesha'pa'cho'ña pocte' ñaña echanepa' e'ñe ña puerrollar. O' notas atet tarro'mar ñerra'm ama cho seyoro puesheñarr ñeñt'cha' setapor se'pa'pa' attate' allo'na secañoresha'tnen. ³ E'ñe pocte' epas setaporpa' sagapanna'tepa'ch. ⁴ Tarro'mar coyanesha' ñeñt arrollaretpa' ama e'ñe ñap'tayaye po'chets, ñeñt'pa' puerrollaro'nach. Ñaña yacmapa'cho'ña amach ñap'tayaye po'chets, ñeñt'pa' puetaporo'nach. ⁵ E'ñe pocte' chocmach sagapannena. Tarraña ñerra'm erro'teno esempo pocte' senteñ epsheño'mares o'ch sa'p'octat ñoñets e'ñe sañeña amach sagapanna'terro allponmat attoch añach sema'yochra ma'yochatsa. Tarraña ñerra'm o' met allponmat allempo o' sa'p'octatuepa' pocte' o'ch alla sagapannerra. Tarro'mar

ñerra'm ama ahuen sagapannerropa' chate' oneñetpa' topatas amate' sa'huanto.

⁶ Tarraña ama notenso ñeñtach paterr poctetsa o'ch yesna'ta, añpa' atta notenes ñerra'm semneñ o'ch sesna'tapa' pocte' sena'tepa'. ⁷ Tarraña napa' e'ñe pocte' nenteñ ñerra'm allohuenes atteseñ ñerra'm na.* (Tarro'mar Yomporpa' ahuo't apuen attoch amach nemno coyanesha'.) Tarraña allohueneypa' ama attecmayayye. Tarro'mar Yomporpa' ahuo't apa'yesey ellocma atetcha' yesherbe' e'ñe cohuen.

⁸ Ñaña o'ch notas, ñeñtes ama ataporetosopa' e'ñe poctehn amate' sesna'tatsto. Ñaña ñeñtes rretorraneshaspa' e'ñe poctehn ñaña amate' sesome'terro. E'ñe poctehn o'te' socrañ e'ñe atta atet nepena na. ⁹ Tarraña ama't notensoñ atetpa' ñerra'm ama erroteno sa'huantopa' e'ñe pocte' sesna'tepa'. Ama pocteyaye o'ch atta nanac yemneñ coyanesha'. Añña pocte' yesna'tepa'. Tarraña añña nanac cohuen ñaña amach yesna'to.

¹⁰ Te'pa' o'ch notas ñeñtes arrollaretes ñeñtcha' atet sepa. Ñehua, po'ñoçh ama naye' otetso, añña Yepartsesharña otets. Añ pocte' amach sesatstere serrollar. ¹¹ Tarraña ñerra'm eseshas serre' serrollarpa' añ pocte' amach sesome'tatsterro ello, amapa' o'ch alla samo'tstera serrollareshe'mañ. Ñaña o'ch notas samña ñeñtes ataporetos, amach sesatstere setapor.

¹² Te'pa' o'ch notas ñeñt atet pocte' nenten na. Ama't Yepartsesharpa' ama otenñe ñeñt poctetsa añecop, tarraña napa' o'ch neñotatas ñeñt pocte' nenten na. Ñerra'm puesheñarr yacma ñeñt o' ame'ñerra ñeñt atapore'tañ, tarraña ñerra'm puetaporpa' ama ame'ñeno, añ pocte' amach satsterrano puetapor ñerra'm puetaporpa' ama mueno o'ch ahuer.

¹³ Attecma ñaña puesheñarr coyanesha' ñeñt o' ame'ñerra ñeñt arrollare'tañ, tarraña ñerra'm puerrollarpa' ama ame'ñeno, añña pocte' amach satsterrano puerrollar ñerra'm puerrollarpa' ama mueno o'ch ser.

¹⁴ Tarro'mar ñerra'm puetaporpa' ame'ñena, chocma eñall attoch o'ch ame'ñatana puerrollar. Attecma ñaña ñerra'm puesheñarr yacma ñeñt ame'ñetsa, chocma eñall attoch ame'ñatana ñaña puetapor. Ñaña ñerra'm sesannenapa' ñato' sechemeresha'pa' amach es eñoterro Partsocop. Tarraña ñerra'm ama sesannerropa' sacñefarnesha'ñapa' o'ch so'patacha ñaña Parets. ¹⁵ Tarraña ñerra'm puesheñarr yacma ñeñt ama ame'ñetso, ñerra'm mueneñ o'ch serran puetapor ñeñt ame'ñetsa, ñehua, pocte' serepa'. Tarro'mar puetapor ñeñt ame'ñetsapa' ama es palltetso

* 7:7 Ñehua, Pablopa' ama eñalle puetapor.

puerrollarecop. Ñaña Yomporpa' ama mueno ellopa' o'ch allo'na ye'moñe'tanna'tnena yerrollarecop. Attecma ñerra'm puesheñarr coyanesha' ñeñt' ama ame'ñetso, ñerra'm mueneñ o'ch serran puerrollar ñeñt' ame'ñetsa, ñehua, pocte' serepa'. ¹⁶ Ateť notenes sesannerrepa' tarro'mar ñeñtes arrollaretespa' po'ñočhpa' amach erroteno señoche ñato' sa'qeshpachcha' serrollar, ñato' amate'. Ñaña ñeñtes ataporetespa' amach erroteno señoche ñato' sa'qeshpachcha' setapor, ñato' amate'.

¹⁷ Ñeñto'mar te'pa' o'ch noterrser, erroteno'tseneste' ama't allempo errte' same'ñera Yepartsesharpa' atterasepa'ch. Ñaña atet muenatyeney Yomporpa' atepa'ch yepena puesheña'ttsoy. Ñeñtpa' attecmač neyčhatyes ama't ñaña ora allohuen ñeñt' pame'ñeñoťet apčha'yetsa allemeñ anetso'mar. ¹⁸ Ateť ñaña ñerra'm puesheñarr yacma allempo errte' ame'ñerrtset, ñerra'm allempopa' o' atorraretetuet atet yeche't judionesha'pa' te'pa' ama pallteno o'ch a'huañerran all tsorret ahuať. Attecma ñaña po'psheñeñ allempo errte' ame'ñerrtset, ñerra'm ñetpa' ama atorrareťeto, te'pa' ama pallteno o'ch atorrareťtet atet yečhena judionesha'. ¹⁹ Ama't ya'tsorrareťtatstapa' ñeñtpa' ama es sherbeno. Ñaña ama't ama ya'tsorrareťtatstopa' ñeñtpa'čo'ña ama es sherbeno. Añña nanac sherbets o'ch yeđa ñeñt' atet oteney Yompor. ²⁰ Ñeñtpa' o'ch alla noterrser, añ pocte', ama't erroteno'tseneste' allempo errte' same'ñerrapa' atterasepa'ch. ²¹ Ama't allempo errte' pame'ñerra, ama't añepte' ñeñt' ataruasatareť e'ñe atapa' e'ñe pocte', amach pellcatsto. Atterach petaruasen pepatronarecop, tarraña ñerra'm errotenoť o'ch pa'rroyaterra pepatronareshotpa' e'ñech pocte' a'rroyerrpetepa' allot taruasatenpet e'ñe atťa. ²² Ñato' o'ch netma'ntacha atet: Eñall puesheñarr yacma ñeñt' ataruasatareť e'ñe atťa, tarraña o' čhap allempo agapan Yepartseshar ñeñt'cha' Pamo'mte' perr. Allempopa' ama't attera taruasateñeñ ñeñt' po'patronar pen arr patsopa' tarraña te'ña Cristopa' a'rroyatamper po'chñar ñeñt' nanac taruasataye't ahuaña. Te'pa' añcha'ña taruasaterre' Cristo ñeñt' Yepartseshar yepen. Ñaña eñall puesheñarr yacma ñeñt'ñapa' cohueno'tsen ñeñt' ama ataruasatareťeyaye. Ñapa'čo'ña o' čhap allempoch aguerran Yepartseshar Cristo ñeñt'cha' Pamo'mte' perr. Te'ña Pamo'mte' Cristopa' ñachña taruasaterre' e'ñe cohuen ñeñt' ahuañapa' ama ataruasatareťe e'ñe atťa. ²³ Cristopa' o' rañterrya. Atto rañterryapa' nanac mueročhta attoch tsa'tuerrnaya yo'chñar. Ñeñto'marña

notenes, amach acheña ñapueĩ samo'mte' seřatsto, añña e'ñe po'ñoçh Yamo'mte' yepen Cristo. ²⁴ Ñeñto'marña masheñneshacha' ñaña noçhaneshacha' o'ch noterrser alla, ama't erroteno'tseneste' allempo errote' same'ñera Cristopa' pocte' atterasepa'ch. Tarraña Yomporepa'chña seyenpue'.

²⁵ Te'pa' o'ch noterrser po'poñ. Añpa' ñeñt atet sa'p'to'ten ahuaña ñato' pocto'te' ahuo'ch some'ta ñeñt shopsheshare'. Ñehua, napa' o'ch notas, Yepartsesharpa' ama otenyeñe ñeñtcha' atet yepe' shopshesharecop, tarraña napa' o'ch neñotatas ñeñt pocte' nenten e'ñe na, tarro'mar Yepartseshar puemuereno'tpa' ahuo't eñotañ pa'n attoch sapa' seyemuetna. ²⁶ Ñehua, ñanompa' o'ch notas: Ama't te'pa' çhocma huen-naya shonte' esocmañen ñeñt echarr yentyen ñeñto'marña pocte' nenteñ amate' sesome'to, ñaña amate' sesna'to. Añña poctetsa attate' yocrra. ²⁷ Tarraña ñerra'm o' seyore coyanesha'pa' e'ñe pocte'; te'pa' amach sesatstere. Atteña ñerra'm ama seyoreña' coyanesha'pa' pocte' ñaña; te'pa' amach sey-oratsche. ²⁸ Tarraña ñerra'm esempo semne' o'ch sesna'tapa' e'ñe pocte'. Ñaña ñerra'm esempo coyanesha'pa' mueneñ o'ch some'ta, ñeñtpa'çho'ña e'ñe pocte', tarro'mar ñeñtpa' ama ochña'teñtsoyaye Yomporecop. Tarraña ñerra'm yacmapa' o'ch sena'ta, ñaña ñerra'm coyanesha'pa' o'ch some'ta ñaña, allempopa' o'ch echan shonte' ñeñtcha' llecatyese' attoch cor-ret arr patsro. Ñeñto'marña notenes amach sesna'tatsto, coy-anesha'pa'çho'ña amach some'tatsto, tarro'mar napa' ama nemno o'ch sechen shonte' ñeñtcha' sellcatyene'.

²⁹ Ñeñto'marña masheñneshacha' ñaña noçhaneshacha' nemneñ o'ch alla noterrser. Te'pa' ama atonaye' pallteno char attoch yetorrena Yomporecop. Ñeñto'marña o'ch notas ñeñtes o' setapore't, ama't o' setapore'tpa' añña poctetsa e'ñe tayoteñ amach patrra sellcatsto ñeñt setaporecpa. Añecpa'nachña setorrena Yomporecop. ³⁰ Ñaña ñerra'm esempo huaponasa llequëñetspa' amach ñeñto'ta yequeçpatsterro atto yetorrena Yomporecop. Ñaña ama't esempo es nanac yocshatene'pa' amach ñeñto'ta yepsatstere Yompor. Ñaña ñerra'm esempo yapa' esocmañen yechenpa' tarraña amach ñeñto'ta yepsatstere Yompor. ³¹ Ñaña ñerra'm esempo es ye'pa'yen ñeñt patso'marecpapa' amach e'ñe ñeñta yocshatsto ñeñt patso'marecpa. Tarro'mar ñeñt atet yeychen añ patso'marpa' ñeñtpa' huañerrcha' esempo.

³² Ñeñto'marña notenes añeçhno, tarro'mar nemneñ sapa' amach eñalletatsto po'poñ ñeñtcha' nanac sellcate'. Atet pena yacma ñeñt ama ataporetepa' añach e'ñe llequëna ñeñt

Yomporecop. E'ñech ma'yočhrenana attoch coshatenan Yepartseshar. ³³ Tarraña yacmaña ñeñt ataporetpa' añach e'ñe llequëna ñeñt atto yocrrena añe patsro. Ñaña añach ma'yočhrena attoch coshatenan puetapor. ³⁴ Ñeñto'marña amach errotenot patrra ma'yočhreno ñeñt Yomporecop. Attecma pena ñaña coyanesha' ñeñt ama arrollarete. Añach ma'yočhrena ñeñt Yomporecop. E'ñe po'chtsohuenpa' mueneñcha' o'ch a'rroya Partsocop. Ñaña ama't ora pocta'ñohuenpa' o'ch ma'yočhrena Partsocop. Tarraña coyanesha' ñeñt arrollaretpa' añach lleca ñeñt atto yocrrena añe patsro, ñaña añach lleca attoch coshatan puerrollar.

³⁵ Ñeñt notenespa' ama añecpayaye attoch o'ch nompata's amach sesna'tatsto. Añecopña atet notenes attoch napa' neyenpas, attoch čhocma cohuenare' es sorrtyaten. Ñaña čhocmach socsheñsha'pa' o'ch sema'yočhrena Yomporecop, amach eñalletatsto ñeñtcha' sepatene'.

³⁶ Te'pa' o'ch noterrser po'poñ: Ñerra'm eseshas echene' seseñ ñeñt o' po'natuena, ñaña ñerra'm pocte' senteñ o'ch some'tapa' ñehua, pocte' some'tepa'. E'ñe pocte' o'ch semnach some'tepa' tarro'mar ñeñtpa' ama ochña'teñtsoyaye Yomporecop. ³⁷ Tarraña ñerra'm erra'tsenotespa' sechen seseñ, ñaña ñerra'm ama semno o'ch some'ta, ñaña ñerra'm seseñpa' e'ñe pocte' enteñ amach some'tatstopa' ñehua, pocte' ñaña amach sesome'tatatsche. Ñerra'm po'ñočh señoteñ seyočhro aña' e'ñe pocte' atet, ñehua, amach sesome'tatatsche. Elloña ñeñtpa' nanac cohuen. ³⁸ Ñeñto'marña te'pa' o' notas: Ñerra'm erra'tsenotes muenate' seseñ o'ch some'tapa' ñeñtpa' pocte'. Tarraña ñerra'm erra'tsenotes ama some'tataye seseña' elloña ñeñtpa' nanac cohuen.

³⁹ Te'pa' o'ch noterrser po'poñ. Ama't esempapa' ama pocteyaye coyanesha'pa' o'ch serran puerrollar. Ama't errponmatcha' correna puerrollarpa' amach satstere. Tarraña ñerra'm esempo rroma puerrollar, allempopa' e'ñe pocte' o'ch some'terra ello, tarraña ñerra'm erra'tsencha' muenerr ñeñtcha' yorerre' ñeñtpa' ame'ñenach ñaña. ⁴⁰ Tarraña ama't o' notuaseñ e'ñe pocte' o'ch some'terra rretorrnanesha', elloña napa' noctape'cheñ ñerra'm o'ch some'terra, ñato' allempopa' cosherrañcha' mame'. Tarraña ñerra'm amach some'terro, napa' noctape'cheñ ñato' allempopa' ellochña nanaccha' cosherra ñapueť. Napa' noten Yompor Puecamquëñoť neñoten atet.

Arrpa' all cotape' chatan corinto' marnesha' añecop ñeñt amt-saret ayečcataretecop

¹ Te'pa' o'ch neserrpare'tatas po'poñ ñeñt atet sa'p̄to'tenen ahuaña, ñeñtpa' atet sotenen: Ñeñtey ame'ñenaya Cristopa' ñato' ¿poc̄to'te' o'ch serra' po'chets ñeñt muetsenet ayečcataretecop? Napa' neñotenes puesheña'ttsospa' sotyen sapa' señoteno' ñeñt cohuentetsa Yomporecop. Ñehua, po'ñočh allohueneypa' yeñoteñ ñeñt cohuentetsa Yomporecop. Tarraña ñerra'm esempo yoten: "Napa' e'ñe neñotuen ñeñt cohuentetsa Yomporecop", ñerra'm e'ñe yommo'cheñoña yotenpa' ñeñtpa' e'ñech orrena atet yoten. Yommo'cheñoñpa' amach čhoye' yeyenpanno attoch huomenc yeḡa' yeyočher Yomporecop. Yemorrentanna'teñoñpa' čhochña yeyenpanna'ta. ² Tarro'mar ñerra'm esempopa' čhach yotenapañ o'te' e'ñe es yeñotua poc̄tacma, tarraña yeñoteñ po'ñočhpa' čhocma yepalltena o'ch e'ñe yeñotua poc̄tacma ñeñt cohuentetsa. ³ Tarraña e'ñe yemorrenteñoñ Yomporpa' ñapa' eñoteny yapa'čho'ña yeñoteñ ñeñt cohuentetsa ñocop.

⁴ Te'pa' o' notuas atet te'ñapa' o'ch neserrpare'tatas ñeñt cohuentetsa Yomporecop. Ñeñtey ame'ñenaya Cristopa' poc̄te'te' o'ch yerren po'chets ñeñt amtsaret ayečcataretecop, ñato' ama'te' poc̄teyaye. Ñehua, yeñoteñ ñeñt ayečcataret ñeñt toma'ntatenet ñetpa' po'ñočhpa' ama eñalle Yompor ñeñt atet. Yapa' yeñoteñ Yomporpa' e'ñe patrra. ⁵ Po'ñočhpa' ñetpa' pa'namen po'yomporer ḡa'yenet ama't atet ñerra'm ñeñt ento'tsa'yen, ñaña ama't ñeñt aña patsro'tsa'yen. Ñetpa' pa'namen po'yomporer ḡa'yenet, ñaña pa'namen po'partseshar ḡa'yenet. ⁶ Tarraña ya yocoppa' yeñoteñ Yompor Apapa' e'ñe patrra, ñeñt Yompor ñeñt yečcate' allohuen ñeñt yentyen, ñaña yapa' ahuo't yečcatey e'ñe ñocop. Ñaña yeñoteñ Yepartsesharpa' e'ñe patrra ñeñtara Jesucristo ñeñt yečcate' allohuen ñeñt yentyen. Te' yapa'čho'ña apueney atto yocrrena.

⁷ Tarraña acheñenesha'pa' ama allohuenacmaye' yoc̄tape'chueno atet. Ñeñto'marña puesheña'tetspa' ahuañoteñ yečhete't o'ch nenet es po'chets ayečcataretecop. Ñeñto'marña ñerra'm esempo rrenet ñeñt po'chets ñeñt muetsenet ayečcataretecoppa' e'ñech atta rreñet po'tomña. E'ñe po'tomñapa' otenet ñato' ama poc̄teyaye o'ch yerren po'chets ñeñt nenet ayečcataretecop. Ñetpa' atta enteñet ama arrapahuoyaye ñeñt Yomporecop. Tarro'mar ama čhenaneto pueyočhro atto ñeñt e'ñe poc̄tetsa Yomporecop.

⁸ Ñehua, yapa' yeñoteñ ñeñt yerrenpa' ama añecpayaye

attoch e'ñe cohuen entey Yompor. Ama't yerreñ, ñaña ama't ama yerreñe ñehua, e'ñe attecma enteney Yompor. ⁹ Tarraña e'ñech señota: E'ñech acoṓa es seṓa'yes. Ama't yapa' yeñoteñ Yomporpa' e'ñe pocte' enteñeñ o'ch yerren po'chets ñeññ anaret ayeḥcataretocoppa' tarraña ñato' yerreñoñ añeḥnopa' ḥate' alla ya'puerratatuer ñeññ ama tama huomenc penaye pueyoḥcher Yomporecop. ¹⁰ Tarro'mar ñato' sapa' atette' sepene. Ñato' o'ch ahuenes puerahuo allo'tsen ayeḥcataret, allñapa' ñato' o'chḥo' serros po'chets ñeññ amtsaret ayeḥcataretocop. Ñaña ñato' sapa' e'ñech socsheñesha' serreñ tarro'mar sapa' señoteñ ñeññpa' ama esoye' enteñe Yompor. Tarraña ñato' e'ñe allempoña serreñpa' ñato' o'ch entas po'psheñeñ ñeññ parro same'ñena. Tarraña ñapa' ñato' ama pocteye' enteñe o'ch yerren po'chets ñeññ amtsaret ayeḥcataretocop. Ñato' o'ch peye'chateña ñaña pemo'nasheñ o'ch rreñ ñaña ñato' ama't ñapa' ama pocteye' enteñe. ¹¹ Tarraña ñerra'm ñapa' o'ch rrenan po'chets ñeññ anaret ayeḥcataretocoppa' ñapa' o'ch enteñ atetpa' ochña'teñets Yomporecop. Atteñapa' ñato' o'ch alla puesuerran Yompor. Ñeñño'marña notenes, ñato' e'ñe yeñoteñoñ ñeññ cohuentetsa Yomporecoppa' o'te' ya'chencatach yemo'nasheñ ñeññecop Jesús'pa' rroma ñaña. ¹² Ñerra'm esempo atet yeṓapa' ḥate' yeyora yo'chñar yemo'nasheñecop tarro'mar o' yeye'chatera o'ch perra ñeññ ama pocteye' enteno ña. Ñehua, ñerra'm esempo yeyora yo'chñar yemo'nasheñecoppa' e'ñe ñoṓpa' o'ch yo'chña't ñaña Cristocop. ¹³ Ñeñño'marña te'pa' o'ch notas atet, ñerra'm esempo yerren po'chets ñeññ anaret ayeḥcataretocop, ñerra'm yerreñoṓpa' ñato' ya'puerratater yemo'nasheñpa' e'ñe pocteñ amach yerratsto ñeññ po'chets. Ñeñño'marña napa' ama't esempapa' amach nerratsto ñeññ po'chets te'ta' neyoren no'chñar nemo'nasheñecop attotcha' na'puerratater.

9

Atto e'ñe pocteñ ñeññ torretsa Yomporecoppa' o'ch esyesherebeñ

¹ Te'pa' o'ch neñotatas po'poñ ñeññ atet nepena na. Napa' e'ñe pocteñ o'ch neṓa'yes e'ñe erra'tsencha' nemnen na tarro'mar sapa' señotenen atto napa' ama eñalle ñeññ neyechare'tenaya na, tarro'mar napa' allsensareten Yomporeshot. Ñaña señotenen napa' o' orrterrnan Yepartseshar Jesús, ñaña señotenen ña ahuamencat nepene' tarro'mar e'ñe na netorreñoñ ñocop attoña same'ñerra saña. ² Ñehua, ama't po'potantañpa' otyenetañ napa' amo'

allsensareteyayno tarraña sapa' señotenen po'ñoçh napa' allsensaretenca'ye tarro'mar napa' ñeñten same'ñaterraya saña. Atto sapa' e'ñe cohuen same'ñera Yompor, attoña señotateña allohuen po'ñoçh napa' Yomporeshot allsensareten. Ñeñto'marña e'ñe pocteñ o'ch nepa'yes e'ñe erra'tsencha' nemnen na ñeñten allsensareten, tarraña ñeñtpa' ama atteye' nepeno tarro'mar napa' ama nemno e'ñe atet nepeñoť o'ch nepatare't cohuen ñoñets alloch Cristopa' a'queshpaterres.

³ Ñeñto'marña te'pa' o'ch notas ñeñtcha' atet nanapanet ñerra'm esempo a'p'to'tare'tnet, pocto'te' ñeñť atet nepa'yena. ⁴ Po'ñoçhpa' e'ñe pocteñ nocop o'ch serratallme'chennoñ allempo neserrpare'tatenes. Ñaña pocteñ sapa' o'ch sapnoñ ñeñtcha' norryen. ⁵ Ñaña nocop e'ñe pocteñ ñerra'm eñalleñ netapor o'ch nanemñ ñeñť parro yame'ñena all nechopeñe'chyen. Atet pena po'potantañ allsensareñnesha', ñaña atet pena Yepartseshar pa'mo'nasheñnesha', ñaña ñeñť atet pena Pedro. ⁶ Ñaña sapa' ñato' çhate' soten e'ñe pocte' e'ñe epsheño'marey epan masheñ Bernabé yapťach yetaruasen attoch yechen ñeñtcha' yerren. Po'ñoçhpa' po'potantañeçhno ñeñť torra'yetsa Yomporecoppa' ñetñapa' arratare'ttenet e'ñe atta. ⁷ Po'ñoçhpa' ñeñť atet pena solltarnesha'pa' ñetpa' e'ñe atta aparettenet ñeñť palltenet, amach es tsa'teneto. Ñaña atet pena ñeñť nare'tene' narmets. Ñetpa' e'ñe puenare'teñoťpa' çhocmach tsomueññañet puenaremñ pue'mer. Ñaña atet pena ñeñť po'taruas pene' o'ch cohuanpenan carrnero ñaña cabra. Ñetñapa' çhocmach orreññañet puemomos. ⁸ Sapa' çhate' sotenapañ ñeñť atet notenes, ñeñtpa' e'ñeťe' nañeña noctapñoť atet notyenes ñeñť atet yoctape'chyen ya allohueney ñeñtey arromñaťey. Tarraña ñeñtpa' amaca'ye atteyaye tarro'mar ñeñtpa' ñeñtara ñoñets ñeñť atet anaret ahuatoteñ. ⁹ Tarro'mar Moisés po'ñoñ ñeñť atet anuaret ahuatoteñ, ñeñtpa' atet oten: "Ñerra'm esempo sařmama'tateñ huaquesh attoch es serrocllome'chach pa'tcot allempopa' amach sempanma'tatsche attoch ñapa'çho' rranepaña ñeñť serrocllome'chateñ." Ñehua, yapa' yeñoteñ Yomporpa' ama e'ñe ñapťecpa huacshecop eñose'te. ¹⁰ Po'ñoçhpa' yocpa'naña eñose't ñeñtey torra'yetsa ñocop. Tarro'mar e'ñe puemorrenteñoťey yapa' Yomporpa' e'ñe pocte' enteñ arratare'teycha' yaña all yetorra'yena ñocop. O'ch netma'ntacha atet: Ñerra'm çho yetamuenpa' çhocmach yeyemtena ñeñtcha' yenare't all, o'ch choppa' ñeñtcha'ña

yetsomuerr. Ñaña ñerra'm cho es yerrocllome'chenpa' chocmach yeyemtena ñeñt yerrocllome'chen, tarro'mar yapa' yeñoteñ chocmach apuerryet allpon. ¹¹ Ñehua, o'ch alla netma'ntatererr po'poñ. Allempo yeserrpare'tatenes Yompor po'ñoñ ñeñtpa' attecma ñerra'm cho yenare'ten narmets pue'lllomer sesho. Ñeñt atet nare'teñetspa' sherben attoch e'ñe yocrra Yomporecop. Ñehua, ñerra'm yapa' o' yeñotatas ñeñt sherbets errponohuañen yecamquëñecoppa' ama'tña pocte' senteñeña sapa' o'ch sapueneñ ama't coñe'ta ñeñt yepalltena alloch yocrra aña patsro. ¹² Po'ñoçhpa' po'potantañeçhno ñeñt seserrpare'tatene', ñetpa' enamuenset o'ch sapanet ñeñt alloch correnet. Ñehua, ñeñtpa' e'ñe pocte'. Atto ñetpa' es enamuensetpa' elloña yocoppa'cho'ña e'ñe pocte' o'ch es yenamas yaña.

Tarraña ama't e'ñe pocteñ o'ch es yenamaseñpa' po'ñoçhpa' ama't coñe'ta ama es yenamuenso. Chocma ya'huanteñ ñeñt echarr yenten yocop. Ama't e'ñe pocteñ o'ch es yenamuenespa' tarraña amaña es yenamuenso tarro'mar ñerra'm ama pocteye' señchepa' yeñoteñ amate' se'mñoto Yompor po'ñoñ ñeñt atet yeserrpare'tatenes. Yapa' ama yemno o'ch yepatare't cohuen ñoñets alloch Cristopa' a'queshpaterres. ¹³ Elloña sapa' señoñeñ ñeñt torretsa Parets pa'paclopa' e'ñe allara Parets pa'paclopa' chocmach entenet puerrar. Ñaña añ cornesha' ñeñt muetsene' huaquësh amapa' carnero Yomporecoppa' ñetpa'cho'ña e'ñe allotpa' rrenet ñeñt amsaret Yomporecop. ¹⁴ Attecma ñaña Yepartsesharpa' nan po'ñoñ. Ñeñtpa' atet ot: Ñeñt serrpare'tene' cohuen ñoñets alloch sequeshpapa' e'ñe pocte' pueserrpare'teñoñ ñeñt e'mñotene'pa' pocte' o'ch apueñet ñeñt palltena alloch corra. ¹⁵ Ñehua, ama't e'ñe pocteñ o'ch sapuennonñ ñeñt nepalltenapa' tarraña napa' ama't ahuatapa' ama es notase'te o'ch es sapuen. Ama't te'pa' ama ñeñtecpaye' nequellquënnaso atet. Tarro'mar ama nemno o'ch huañ atto neserrpare'tatenes e'ñe atta. E'ñeçhña nocsheñesha' neserrpare'tatenes e'ñe atta. Ñerra'm o'ch huañ atto neserrpare'tatenes e'ñe attapa' aña'te' pocte' nenten o'ch nerroma. Tarro'mar napa' ama nemno ama't eseshapa' o'ch puerratañpsenña ñeñt allo e'ñe nocshena.

¹⁶ Ñaña e'ñe neserrpare'teñoñ cohuen ñoñets napa' amate' errotenoñ e'ñe atta nommo'cho, tarro'mar napa' e'ñe atet eyechare'ten. Ñerra'm ama atet ne'papa' napa' nanacte' llequëntso'tsenen. ¹⁷ Ñerra'm e'ñe na nemneñño'ta neserrpare'teneñpa' ñehua, pocteñ o'ch tsa'tenna Yompor attoch coshaterren. Tarraña ñerra'm atet otenen Yomporpa' ñeñtpa'

ama nañeña nemneññoteye' neserrpare'teno. Po'ñoçhpa' allsensareten ñeñto'marña neserrpare'taterña acheñenesha'.
 18 Ñeñt ellonet apuenen Yompor ñeñtcha' atarr nocshate' na, ñeñtpa' attot neserrpare'tatenes cohuen ñoñets e'ñe atta. Ama't e'ñe poctet o'ch setsa'tnapa' tarraña napa' ama nemnoña atet.

19 Ñaña ama't ama eñalle puesheñarr ñeñtcha' neyechayapa' po'ñoçhpa' añña nanac ne'torratenaya allohuen acheñenesha' tarro'mar na atet muenets. Ñaña tarro'mar ne'torrana ñocpuet attoch name'ñacha shonte' acheñenesha'.
 20 Ñaña allempo allo'tsenen parro epan namo'tsesha' judionesha'pa' napa' o'ch nepena atet yeçhenet ñet. Allochñapa' ñetpa' o'ch e'mñoternnet; e'ñe pue'mñoteño'tepa' ñato'rraña o'ch name'ñatera namo'tsesha' judionesha'. Ñerra'm esempo allo'tsenen parro epan ñeñt cotene' Moisés po'ñoñ ñeñt atet anaretpa' napa' ama'tcha' ama nocteno ñeñt atet cotape'chenet ñetpa' tarraña napa' amach nachmāre'taneto ñeñt atet penet ñet, allochñapa' ñato' attotpa' o'ch name'ñatanet ñamet.
 21 Ñaña ñerra'm allempo allo'tsenen parro epan ñeñt ama cotape'chenaye ñoñets ñeñt atet anare't Partsocop, napa'cho'ña o'ch nepena atet ñerra'mrrate' ama nocteno ñoñets ñeñt atet anare't Partsocop. Ñehua, po'ñoçhpa' nocteneñña ñeñt ñoñets ñeñt atet anare't Partsocop tarro'mar añcha'ña e'ñe nocten Cristo po'ñoñ. Atetcha' nepeñña ñeñt ama es cotape'chetso Partsocop allochñapa' attotcha' name'ñaterranet ñamet Cristo ama't ñeñt ama es cotape'cheno Partsocop ama't mamesha.
 22 Ñaña ñerra'm esempo allo'tsenen parro epan ñeñt ama huomenc penaye pueyoçher Yomporecoppa' napa'cho'ña o'ch nepena atet ñerra'mrrate' ama huomencayaye namā neyoçher Yomporecop, allochñapa' attoch noctape'chach cohuen ñeñt ama huomenc penaye pueyoçher Yomporecop. Ñaña ama't erra'tsena acheñ errotentcho' cotape'chenpa' napa'cho'ña allempo allo'tsenen parro epan atetcha' nepena namā atet pocte' entenet ñet, allochñapa' attoch ama't errotentette' attochña na'queshpateranetcha' ama't patanta'tsa.
 23 Atetcha' nepena attoch name'ñatanet ñerra'm esempo neserrpare'tatanet cohuen ñoñets atto Cristopa' ñach ya'queshpaterre'. Attoch napa'cho'ña e'ñe name'ñeño't Cristopa' nocshapretanetcha' ñerra'm ame'ñeret ñamet Cristo.

24 Te'pa' o'ch noterrser po'poñ, ñato' o'ch netma'ntacha atet. Ñehua, po'ñoçh sapa' seño'teñ ñerra'm esempo o'ch eñoçhet esesha'te' nanac matetsapa' shonte'ch acheñ matatsa. Allohuenetpa' mueneñetcha' o'ch meshe'tuet po'poñeçhno

acheñ attoch ganet premio. Tarraña ama'tcha' shonte' matatsapa' eñallachña pueseñarr ñeñtcha' ganatuaya allohuen ñeñt parro matacha'tet. Ñeñto'marña te'pa' añ poctetsa o'ch yetorrena yaña e'ñe cohuen Yomporecop attoch yegana ñeñt o'patatenya ña. ²⁵ Ñaña yeñoteñ allohuen ñeñt po'taruas pene' johueñetspa' ñetpa' o'ch pohuanmuet ora ñeñt atet poctetsa attoch echet po'huanmenc esheccha' ganet. Ñeñto'marña ñetpa' o'ch quechpa'huet ñeñt ayorampsañ yehuamenc. Ñeñtpa' añecop atet penet attoch ganet premio atet ñerra'm copa.* Ñehua, ñeñt atet penet ñet attoch ganet copa, ama't ñeñt copapa' ahuañaña, ñeñtepñapa' yapa' o'ch yetorra yaña Yomporecop attoch yegana ñeñt o'patatenya ñeñt ama ahuañaño. ²⁶ Atet pena ñeñt matetsapa' e'ñech pa'charr matena. Ñehua, napa'cho'ña e'ñech pa'rra nema'yo'chra Yomporecop. Atet ñaña ñerra'm esempo ye'hotna'tena, ñerra'm atta ya'mtapechpa' amach erro'tenot yegano. Ñeñtepñapa' napa' amach atta na'mtapechatsto ñeñt Yomporecop. ²⁷ Chochña neunat nañeña nechets. E'ñe nach taruasate' nechets Yomporecop. Atetcha' ne'pa' tarro'mar ama't na serrpare'tate' po'psheññe'chnopa' ñato'rraña ellopa' te't alla ahupore'tare'ten nañeña tarro'mar ama netsotoñe ñeñt muenen Yompor.

10

Arrpa' all yerpatanet ñeñt atet patse'tyese't ahua't israe-lena'tarnesha'

¹ Ñeñto'mar te'pa' masheñneshacha' ñaña no'chaneshacha' o'ch noterrser po'poñ. Nemneñ o'ch neñotatas ñeñt atet pe't ahua't yatañneshañ. Allempo chopeñe'chyesete't amare'tarero'marpa' añ anmahuete't os ñeñt cohuanm'psatanete't Yompor e'ñe allohuenet. Ñaña Yomporpa' ellopa'tetstata sa'p attoña orrtatanet toñ allcha' e'ñe cohuen oñmuet patso. Attoña metanuet sa'p ñeñt otenet Sa'p Tsasasen. ² Ñaña ahua't na'nmet Moisés ñeñtcha' pa'm'cha'tare'ter pet. Ñaña e'ñe pame'ñeñotet Moisés allohuenetpa' ahua't a'natenanet os. Ñato' o'ch netma'ntacha atet, ñetpa' allohuenet apatare'ttet oñot ñaña osot e'ñe pueyemteñotet Moisés. ³ Ñaña allohuenet Pare'tspa' apanete't puerrar ñeñt rrete't allohuenet ñeñt mueñanete't entot. ⁴ Ñaña allohuenetpa' chocmo' apanete't Pare'ts ñeñt orrete't allohuenet. Tarro'mar ahua't allempo potanet oñ e'ñe mapueto't allot orrete'pa' ñeñtña mapue'pa' toma'ntenana

* 9:25 Po'ño'ch aña'pa' oten choyo'mets tarro'mar ñeñt po'premio pete't ahua't.

Cristo ñeñt Partsoets ñaãa. Po'ñoçh Cristo ñeñt onahuete't ñaãa ñeñtara ñapa' ña cota'nmahuete't. ⁵ Ama't Yomporpa' nanaco' a'natanetañe'tpa' tarraña ñapa' amo' pocteye' entane'te atto ñetpa' atpare'tyesete't. Ñeñto'marña ahuo' a'cclatuanet e'ñe alla amarato. Puesheña'ttso' pocte' ente't Yompor ñeñt e'ñe cohuen cotape'chyestse't.

⁶ Ñaãa ñeñt atet patse't ñeñt ama pocteyayepa' añ yeçhateney yaña amach yeye'chapretatsto yaña atet. ⁷ Ñaãa amach yeyomporer ye'patsche ñeñt ayeçhcataret ñeñt ma'yochyesete't ñet patanta'tets. Yapa' yeñoteñ añecop atet pete't, tarro'mar atet anuaret Yompor po'ñoñ, ñeñtpa' atet oten: "Acheñenesha'pa' o' anorrcha'tet, o'ña anorrcha'tuetpa' o' rrallme'chapretet. Allo'tpa' orryeset ñaãa. Allempoña o' rrallme'chapretuetpa' o' tantra'terret o'cho' alla coshame'tamperret pueyeçhcatar." ⁸ Ñaãa ama pocteyaye o'ch yecañoresha'ten atet pete't ñet patanta'tets. Ñeñto'marña shonte' acheñenesha' colla'huatsa allempo, e'ñe vientitrés mil acheñenesha' rromats e'ñe pamtarrocma. ⁹ Ñaãa ama pocteyaye e'ñe po'tomñapa' o'ch ya'llocchame'ch Yompor. Ñeñt atet pe't patanta'tets acheñenesha'pa' ñeñto'maro'ña shonte' acheñenesha' ñeñt achanatyes shecheppa' e'ñe colla'huet. ¹⁰ Ñaãa ama pocteyaye o'ch yetanmare'cha Yompor. Ñeñt atet pe't ñaãa patanta'tets acheñenesha'pa' ñeñto'maro'ña amñare'tet ñeñt amtsañpa' o' a'cclatuanet.

¹¹ Tarro'mar ñetpa' atet huapyesanete't pa'namen allochña yapa'cho'ña o'ch yeñoçh yaña ama pocteyaye o'ch atet ye'pa yaña. Ñeñto'marña ama't ahua'tpa' atet quellquët atet pete't allempo, ñeñtpa' e'ñe yocpa'naña ñeñtey te'pa'cho'ña huaponayach allempoch mellapoterra. Añpa' ñeñt atet yeçhateney yaña amach ye'patsto atet pete't ñet. ¹² Ñeñto'marña te'pa' o'ch notas, e'ñech seño'ta. Amach sota'psa'tatsto, napa' amach ne'po ñeñt atet pete't ahua't. Tarro'mar ñerra'm esempo yot atetpa' ñato'rraña machayo'ta alla atet yeperra yaña ñeñt ama pocteyaye. ¹³ Tarro'mar allohueneypa' çhocmach huaponaya topateñets, ñeñtara topateñets ñeñt yeçhenoya allohueney ñeñtey arromña'tey. Tarraña Yomporpa' çhocmach yeyomcha tarro'mar ñapa' ama muenatenye o'ch topatey attoch metanonay yehuamenc. Tarraña ñerra'm esempoch çhaponaya topateñetspa' ñapa' çhocmach orrtatonay attoch ya'huante' attoch amach metanonaye yehuamenc.

¹⁴ Ñeñto'marña masheñeshacha' ñaãa noçhaneshacha' notenes, e'ñe pocte' o'ch sa'ypo'ña'huerr ñeñt ayeçhcatare'teçhno ñeñt po'yomporer penet ñet. ¹⁵ Sapa' seño'tueñ ñeñt cohuentetsa Yomporcop. Ñeñto'marña o'ch

notas, ¿ama't pocte' senteñe ñeñt o' notuas? ¹⁶ Ñeñto'marña allempo yorreññañ ñeñt toma'tnenaya Cristo po'rras ñeñt atet anaret Yomporecoppa', choch ñanom yema'yochanpesya attoch yeparasyoso'ch Yompor. Allempo yorreñ allohueneypa' e'ñech yeyemteñoñ Cristo ñeñt rromats yocop po'ño'chpa' o'ch yeparrocmatua allohueney ama't ñaña Cristo. Ñaña attec mach yepena ñerra'm esempo yerren pan ñeñt toma'tnenaya Cristo po'chets. Allempo yeshota'ten pan, o'ch yerreñ parro allohueneypa' e'ñech yeyemteñoñ Cristo ñeñt a'rroye' po'chets yocop po'ño'ch allempopa' e'ñe yeparrocmatuen allohueney ama't ñaña Cristo. ¹⁷ Ñaña ama'tcha' shonteypa' e'ñech patrra pan yeshota't ñeñtcha' yerra'yes ama't allohueney. Ñeñto'marña yeñoteñ ama't shonteypa' e'ñe yeparrocmateñoñ Cristopa' e'ñe patrra enteney allohueney, ñaña ñeñtara e'ñech po'chets peney.

¹⁸ Ñehua, o'ch yoctape'ch ñaña ñeñt atet pe't israelena'tarnesha'. Ñetpa' o'ch muetset huaquësh amapa' carrnero Yomporecop. Allotñapa' o'ch rrenet ñeñt puecha'yetsa. Allempo rreñetpa' po'ño'ch e'ñech pueyemteño'tet Yomporpa' o'ch parrocmatet epuet Parets. ¹⁹⁻²⁰ Ñehua, po'ño'chpa' ama notenso ñerra'm esempo serren po'chets ñeñt amtsaret aye'chcataretecoppa' o'ch separrocmat epas, tarro'mar ama't toma'tnateñetañ Paretspa' ama Partsoyaye. Añña notenes ñerra'm esempo ñeñt ama ame'ñenayo Cristopa' o'ch es muetset aye'chcataretecop, tarraña po'ño'chpa' añe'cpa muetseñet oneñe'fecop, ama añe'cpaye' muetseñeto Yomporecop. Ñeñto'marña napa' notenes ñato' amach serratsche tarro'mar ama nemno e'ñe serreño'pa' te't separrocmaten epas oneñe'. ²¹ Po'ño'chpa' amate' erro'teno't yeparrocmatona epay Yepartseshar Cristo ñerra'm cha yeparrocmaten epay oneñe'. Ñeñto'marña notenes amate' erro'teno't e'ñe yeyemteñoñ Cristopa' o'ch yorr ñeñt ñocop, ñaña ñerra'm aña yetsoten ñeñt oneñe'fecop. Ñaña amate' erro'teno yerroña parro ñeñt anaret Yepartsesharecop, ñaña ñerra'm aña yetsoten ñeñt oneñe'fecop. ²² Ñerra'm atet ye'papa' chate' ya'llocchame'ch Yompor ñaña e'ñe puempa'teño'teypa' chate' ya'tsrre'mach. Chate' yotta ñerra'm yapa' nanac ahuamencatey, ñaña'pa' amate' ahuamencateye'yenteñe.

Atto ama't e'ñe pocteñ o'ch es ye'pa'yeseñpa' tarraña amach ye'patsto

²³ Ñeñto'mar te'pa' o'ch alla noterrser, e'ñe pocteñ o'ch yerreneñ po'chets ñeñt amtsaret aye'chcataretecop,

tarro'mar Yompor po'ñoñpa' ama otenñe amach yeḡatsto atet. Tarraña ama't eñalleñ pa'namen ñeñt e'ñe poctet o'ch yeḡapa' tarraña ñerra'm ñeñtpa' ama añecpayaye alloch huomenc yeḡa' yeyo'cher Yomporecoppa' ñehua, ñeñtepñapa' amach atet yeḡatsto. Ama't eñalleñ pa'namen ñeñt e'ñe poctet o'ch yeḡapa' tarraña ñerra'm ñeñtpa' ama añecpayaye alloch yeyenpue' po'psheñeñ attoch huomenc ñan pueyo'cher Yomporecoppa' ñehua, ñeñtepñapa' amach atet yeḡatsto. ²⁴ Añcha'ña o'ch yepena attoch yeyenpue' yamo'ts attoch o'ch huomenc pet pueyo'cher. Amachña aña yellcatsto ñeñt e'ñe yocpa.

²⁵ Ñaña o'ch notas ñeñtcha' atet seḡa: Ñerra'm esempo seta allecma vendenet po'chetspa' amach sa'ḡto'tatsche ñeñt vendets, amach sotatsche atet: "Añ po'chetspa' ¿añe't ñeñt amtsaret ayeḡcataretecop?" Amach sa'ḡto'tatsto allochñapa' esheccha' serre' e'ñe cohuen. ²⁶ E'ñe pocte' o'ch yerren ama't erra'tsente' po'chets tarro'mar allohuen es yentyen arr patsro ñeñtpa' Yomporo pueyeḡcatuar. Ñaña ama't ora patspa' e'ñe ñocma.

²⁷ Te'pa' o'ch notas po'poñ ñeñtcha' atet seḡa. Ñerra'm esempo ñeñt ama ame'ñenaye Cristopa' o'ch hua'ñas o'ch serrallme'chapreteña' ñaña ñerra'm sapa' sesechapa', e'ñe pocte' o'ch ahues ñaña o'ch serra' ama't erra'tsencha' po'chets apaset. Po'tomña amach sotatsto atet: "Ta', ¿pocte'te' o'ch yerren añ po'chets? Ñato' ñeñtara añ po'chets ñeñtte' amtsaret ayeḡcataretecop." ²⁸⁻²⁹ Tarraña o'ch notas po'poñoneñ: Ñerra'm allo'tsen puesheñarr ñeñt ama pocteye' entenaye o'ch yerren po'chets ñeñt amtsaret ayeḡcataretecoppa' ñerra'm ñapa' o'ch otas: "Añ po'chetspa' ñeñt amtsaret ayeḡcataretecop", ñehua, allempopa' añ pocte' amach serratsche. Amach yerratsche tarro'mar añ pocte' amach yeḡatsto ñeñt ama pocteye' enteno po'psheñeñ, ñato' ama't yapa' e'ñe pocte' yenteñeñ o'ch yerre'.

Ñehua, ñato' sapa' o'ch sot: "Ta', ¿eso'marte' pocte' yapa' o'ch yeḡa ñeñt atet pocte' enten po'psheñeñ? ¿Eso'marte'ña ama pocteyaye o'ch yeḡa ñeñt atet pocte' yenten ya?" ³⁰ Ñaña ñato' o'ch sot atet: "Ñerra'm po'ño'ch neparasyoso'teño'pa' nerren nerrarpa' ¿eso'marte'ña otenet ama pocteyaye o'ch nerra' ñeñt o' neparasyoso'tam'pesua?" ³¹ Ñeñto'mar te'pa' o'ch notas: Ama't erra'tsena es yeḡa'yenpa' añ pocte' o'ch yorrtena e'ñe cohuen, attoch acheñenesha' o'ch aye'chochtateññañet ñamet Yompor. Ama't allempo es yerra'yen, ñaña ama't allempo es yorrienpa' añ pocte' o'ch yorrtaten e'ñe cohuen Yomporecop. ³² Añ pocte' amach yeḡatsto ñeñt ama pocteye'

enteno judionesha'. Ñaña añ pocte' amach yepatsto ñeñt' ama pocteye' enteno ñeñt' ama judioneshayaye. Ñaña amach yepatsto ñeñt' ama pocteye' enteno allohuen acheñenesha' ñeñt' ame'ñenaya Yompor. Tarro'mar ñerra'm atet yepa ñeñt' ama pocteye' entenetopa' čhate' ya'psatateranet Yompor. ³³ Ñeñto'marña napa' ama't erra'tsena nepa'yenpa' añña nemneñ o'ch nocshach allohuen acheñ ñeñt' atet pocte' entenet ñet. Tarro'mar napa' ama ne'neno ñeñt' e'ñe nocpa, añña ne'nen ñeñt' sherbets allohuen acheñeneshacop. Tarro'marña napa' čhocma ne'nen atet, allochñapa' attoch na'queshpaterranet.

11

¹ Ñeñto'marña napa' notenes: Atet sentenen ñeñt' atet nepena napa' ñeñt'pa' e'ñe pocte' ñeñt'cha' atet sepa saña, tarro'mar napa' añ nepena ñeñt' atet pena ñaña Cristo.

Ñeñt' poctetsa ñeñt'cha' atet pa coyaneshačno allempo yapčhena Parets pa'paclo

² Te'pa' o'ch masheñeshacha' ñaña nočhaneshacha' notas po'poñ. Napa' e'ñe pocte' nentenes atto sapa' ama sepseno ñeñt' atet neyčhatuanmas ñeñt'cha' atet sepa, ñaña atto čhocma seyerpuenna. ³ Te'ña añmapa' ñeñt' nemneñ o'ch señoč saña, atto ya allohueney ñeñtey asheñorreypa' añ pomnaren yepene' Cristo. Añña coyanesha'pa' añ pomnaren penahuet puerrollar. Cristoñapa' añ pomnaren pene' Pompor. ⁴ Ñeñto'marña yoten ama pocteyaye ya ñeñtey asheñorreypa' o'ch yeca'mataño'ta allempo yema'yochena, amapa' allempo ya'poteññañ Yompor po'ñoñ. Tarro'mar ñerra'm esempo yeca'mataño'tenapa' čhach yottena ñerra'mrrate' po'psheñña acheñ pomnaren yepene', amach añeye' pomnaren yepenaye Cristo. Atteñapa' o'ch čha yepencna'ntach Cristo ñeñt' po'ñoč pomnaren yepene'. ⁵ Yapa' añña yoten coyanesha'pa' e'ñe pocte' o'ch ca'mataño'ta ñerra'm esempo ma'yochena, amapa' ñerra'm allempo a'potenan Yompor po'ñoñ. Tarro'mar ñerra'm ama ca'mataño'topa' čhach ottena ñerra'mrrate' ama puerrollareye' pomnaren penaye. Ñeñto'marña yapa' atarrcha' pencna'ntateney poñ tarro'mar ama čchoye' ca'mataño'teno. Ñerra'm ama ca'mataño'topa' añ poctetsa penquēpa' tarro'mar čha ottena atette'ña ñerra'm ashopena'taret. ⁶ Atteña ñerra'm coyanesha' ama mueno o'ch ca'mataño'tapa' ñehua, ama'tpa' shopena'tatepa'. Attochña ñerra'm o'ch čha pencana atto shopena'tenapa' ñehua, ama'tpa' ca'mataño'tepa'.

Ñaña ñerra'm puetsorrmō'tateñoŕpa' o'ch pencapa' ñehua, ama'tpa' ca'matamō'tepa' ñaña. ⁷ Yocopña ama pocteyaye ñeñŕey asheñorreypa' o'ch yeca'matamō'ta, allempo yeserrpare'ten Yompor pa'paclo tarro'mar ya Yomporpa' puetma'ntatarey ña, ñaña yapa' chocma po'cohuenña peney. Tarraña coyanesha'pa' aña po'cohuenña pene' puerrollar. ⁸ Ñehua, tarro'mar ahuaŕ Yomporpa' asheñorroŕ yeŕhcatan coyanesha'. Asheñorrpa' ama coyaneshoteye' yeŕhcache. ⁹ Ñaña yeñoteñ asheñorrpa' ama añecpaye' yeŕhcache coyanesnacop. Añecopña yeŕhcatan coyanesha' attoch o'ch yenpa'y ya ñeñŕey asheñorrey. ¹⁰ Ñeñŕo'marña añ pocte' coyanesha'pa' o'ch ca'matamō'tena attoch ama't Yompor po'millañoŕeñnanesharpa' o'ch eñochet añ po'ñoŕh pomnaren pene' puerrollar. ¹¹ Tarraña e'ñe yame'ñeñŕoŕ Yepartsesharpa' añ pocte' ya ñeñŕey asheñorreypa' o'ch yeyenpueñ yaña coyanesha'. Coyanesha'pa'cho'ña pocte' o'ch yenpueney ya ñeñŕey asheñorrey. ¹² Ñeñŕo'marña yeñoteñ ahuaŕ Yomporpa' asheñorroŕ yeŕhcatan coyanesha'. Ñaña e'ñe allempoteñ ama't ya ñeñŕey asheñorreypa' ahuo't eñalletateney coyanesha'. Tarraña po'ñoŕhpa' yeñoteñ ñeñŕpa' e'ñe Yomporeshotecma huena.

¹³ Ñehua, o'ch na'pŕo'tas: Ñeñŕ atet seyŕhena sa ¿ama't pocteye' senteñeña coyanesha'pa' o'ch ma'yochenana Yompor ñerra'm ama ca'matamō'teno? ¹⁴ Ñeñŕ atet yeyŕhena yapa' ñeñŕpa' añ yeñotatene' ñerra'm ya ñeñŕey asheñorreypa' esempo atesha'ta yechpa' o'ch pencateney. ¹⁵ Tarraña ñerra'm coyanesha'ña atesha'tatsa pue'chpa' e'ñech cohuen entapreteñ allohuen acheñenesha'. Ñaña ñerra'm ateshet pue'chpa' ñeñŕpa' alloch ca'matamō'tenet, tarro'mar ñetpa' atet yeŕhcatanet Yompor. ¹⁶ Ñehua, ñerra'm eseshas ama pocteye' entaye ñeñŕ atet o' notuaspa' ñehua, pocte' o'ch alla noterrser, tarro'mar ñeñŕ atet o' notuaspa' ñeñŕpa' atetcha' sepa tarro'mar ama eñalle po'poñ ñeñŕ pocte' yenten. Ama't ñaña allohuen ñeñŕ pame'ñeñŕoŕet Yompor ñeñŕ apŕha'yetsapa' ñetpa'cho'ña pocte' enteñet ñeñŕ atet o' notuas.

Añpa' ñeñŕ ama aŕapahuo allempo yorren ñeñŕ toma'ntenaya Cristo po'rras

¹⁷⁻¹⁸ Te'pa' o'ch notas po'poñ ñeñŕcha' atet sepa allempocma sapŕhena. Tarraña ñanompa' o'ch notas, ama pocteye' nentenso ñeñŕ atet sepena te' allempocma sapŕhena. Tarro'mar ñeñŕ atet sepenapa' ama añecpayaye attoch seyennpannena e'ñe cohuen, elloña ñeñŕpa' cha epatenes. Tarro'mar napa' o' ne'mare'tas ñeñŕ atet sepena.

Ñerra'm esempo sapçhena e'ñe same'ñeño'tpa' amo'ch patrraye' soctape'cheno. Elloña sapa' atto'ch nanac es sotnare'tannena. Ñeñto'marña napa' noten ñato' po'ñochte' atet sepena. ¹⁹ Po'ñoçh ñeñtey ame'ñetsapa' çhocmach eñall ñeñtcha' ama paçharroye' ame'ñatso, ñeñto'marña ya allempopa' o'ch yeñoçh ñeñt e'ñe paçharr cotape'chets, ñaña o'ch yeñoçh ñeñtcha' ama paçharroye' cotape'chatso. ²⁰ Ñaña ñerra'm esempo sapçhenapa' e'ñe seyerpueño't Yepartsesharpa' ahuo'ch serrallme'chen, tarraña po'ñoçhpa' ama Yepartsesharecpaye' serrallme'cheno. ²¹ Tarro'mar puesheña'tets e'ñe pa'chporrño'tetpa' ahuo'chçho' rrenet ñanmacma, amo'chña parrocmaye' serrallme'cheno. Ñeñto'marña ñato' puesheña'tetspa' ahuo'ch atta nanac cheporrena, ñato' po'psheñeñña' ahuo'ch çha posa'tyes. ²² Ñeñt atet sepenapa' ama pocteyaye tarro'mar sapa' sechenca'yeña sepaquëll allcha' serren ñaña allcha' es sorryen. Eso'mare'tña amaña añcha'na'tpahuoye' senteññañeña Yompor pa'paquëll. Allña'pa' o'ch atta sepencateñ ñaña ñeñt ama es echetso. Te'ña po'ñoçh napa' o'ch notas, amaca'ye nocshapretensoña sa ñeñt atet sepena.

Atet pa Jesús allempo ñanom toma'ntatana po'rras orrpapo' (Mt. 26.26-29; Mr. 14.22-25; Lc. 22.14-20)

²³ Añmapa' ñeñtña atet yeçhatnerrey Yepartseshar ñeñtcha' attoch yeyerpueña. Ñeñtara ñoñets sapa' o' neñotatuas ahuañacma. Ñeñtpa' atet oten: Ñeñte tsaprocma allempo Judaspa' pomuerran Yepartseshar Jesús, ñaña'pa' chetan pan. Chetan panpa' ²⁴ parasyoso'tam'pes allotña'pa' shota'chpa' atet otanet: "Añmapa' ñeñt toma'ntenaya nechets ñeñtcha' at-serrparetterrtsa socop. Añmapa' ñeñtcha' atet sepa. Ñerra'm esempo serren pan atetpa' e'ñech seyerpueño'ten napa' o'ch serre'." ²⁵ Allempoña o' rrohuetpa' attecma pa o' chetan ñaña orramets allocma orrete'tpa' atet otanet: "Añ ñeñtcha' sorrpa' ñeñt toma'ntenaya nerras ñeñtcha' etserra anaret allochña'pa' attoch a'pretna'huaretterra so'chñar. Añmapa' ñeñtcha' atet sepa: Ñerra'm esempoch sorren ñeñt toma'ntenaya nerraspa' e'ñech seyerpueño'ten napa' sorreñcha'." Añpa' allohua ñeñt atet otnerrey Yepartseshar. ²⁶ Ñeñto'marña te'pa' ñerra'm esempo yerren añ pan, ñaña yorren añ orrpapo'pa' çhocmach yeñotach acheñenesha' atto rroma Yepartseshar yocop. Ñeñtpa' e'ñech tayoteñ atet ye'pa tarremphuach esempohuañencha' huerra.

Añpa' ñeñtcha' atet ye'pa allempo yorren ñeñt toma'ntenaya Cristo po'rras

27 Tarraña ñerra'm yapa' ama yeyerpueñoŕe' e'ñe ña yerreno pan, ñaña o'ch yorr ñeñt toma'ntatana Yepartseshar po'rraspa' yapa' chate' yeyora yo'chñar e'ñe ya'llocchame'teñoŕ Yepartseshar po'chets ñaña po'rras. 28 Ñeño'marña te'pa' o'ch notas, amach sorreña'pa' o'ch soctape'ch ñanom, o'ch señoŕa sañeña ñeñt atet o' seŕohua. 29 Tarraña ñerra'm atŕa ama es yepcheno rre', ama yoctape'cho ñanom ñeñt toma'ntatana Yepartseshar po'chetspa' ñerra'm atŕa yerre' ñaña atŕa yorrpa' e'ñe yerreñoŕ ñaña yorreñoŕpa' atsa'tatareŕeycha'. 30 Ñeño'marña seshopa' shonte' acheñenesha' ñeñt ama a'ñshe'mtetso, ñaña po'potantañpa' cha atsa'tyeset, po'potantaññapa' o' rromayeset. 31 Tarraña ñerra'm cho ñanom yoctape'ch e'ñe cohuen, o'ch yeñoŕa yañeña ñanompa' allempoña po'ñoŕhpa' amach atsa'tatareŕeye. 32 Tarraña ñeñtcha' atet tsa'tatya te' Yomporpa' ñeñtŕpa' añecop attoch coŕape'chaterrey e'ñe cohuen attoch esempohuañenpa' amach a'coñchatareŕeye epay ñeñt ama ame'ñetso arr patsro.

33 Ñeño'marña masheñeshacha' ñaña noŕhaneshacha' te'pa' o'ch noterrserre: Ñerra'm esempo sapcha allohuenes o'ch serra' ñeñt anareŕ Yepartsesharecoppa' añ pocte' choch ñanom secuanna'ta attoch o'ch serreñ e'ñe parrocmá. 34 Tarraña ñerra'm eseshas cheporratsapa' e'ñe pocte' o'ch serrerra' sepacllo. Tarro'mar ama pocteyaye e'ñe sapcheñoŕpa' o'ch secoñchatanna'ta. Ñaña po'poñechno ñeñt palltetsapa' allach neserrpare'tatoses ñerra'm esempoch neŕhap sesho.

12

Atto Parets Puecamquẽñpa' apa'yeney po'poñe'ttsocma attoch yetorra'yesa Yomporecop

1 Te'pa' masheñeshacha' ñaña noŕhaneshacha' o'ch yeserrpare't ñaña atto Parets Puecamquẽñpa' ñach ahuamencat yeŕa'yese' attoch yetorra'yesa po'poñe'ttsocma Yomporecop. Tarro'mar napa' nemneñ o'ch señoŕ ñeñt e'ñe atet pennay Parets Puecamquẽñ.

2 Ama't sapa' señoŕeñ ahuañmo'cha allempo ama same'ñerra'pa' atŕa sema'yochatse'tyese't ayeŕhcatareŕechno. Ñaña ayeŕhcatareŕechnopa' ama't ama eñoŕenopa' atŕa nanac ame'ñatasete't, ama't all seta'yese't. 3 Tarraña ñerra'm machaya esesha' eñoŕatsa, napa' nemneñ chochña e'ñe señoŕ ñato' po'ñoŕhte' añ eñoŕatene' Parets Puecamquẽñ, ñato' amate'. Ñeño'marña o'ch neñoŕtatas atet attoch sapa' señoŕ: Ñerra'm esesha' achmãare'tene' Jesúsapa' ñeñtña sapa' o'ch

señoch ama añeye' eñoratenaye Yompor Puecamquëñ. Tarraña ñerra'm esesha'ña otets: "Jesúspa' ñeñt po'ñoch Yepartseshar yepen", ñeñña po'ñoçhpa' o'ch señoch añ eñoratene' Parets Puecamquëñ.

4 Ñaña Yomporpa' ama't e'ñe patrra Puecamquëñpa' tarraña ñapa' o'ch ahuamencat pa'yese y attoch yetorra'yesa e'ñe po'poñe'ttsocma Yomporecop.

5 Ama'tcha' po'poñe'ttsocma yetorra'yesañpa' tarraña ñeñtarach paterr Yepartseshar yesherba'huen allohueney.

6 Ñaña ama't eñalleñ po'poñe'ttsocma atto ahuamencat pohueney allohueney tarraña e'ñe patrra Yompor ñeñt ahuamencat yepene' allohueney.

7 Ñaña allohueney Parets Puecamquëñpa' ahuo't apa'yese y attoch yorrtatyesoñ Yompor po'huamenc. Ñeñtpa' añecop aparetey attoch yeyenpanna'ta alloch huomenc yeña'yes yeyoçher Yomporecop.

8 Atet ñerra'm ñato' puesheñarr Parets Puecamquëño'tpa' o'ch aþ attoch e'ñe eñotan ñeñt cohuentetsa Yomporecop, attoch ñapa' o'ch cotape'chatan pamo'tsesha'.

Ñato' po'psheñeñ añ Parets Puecamquëñpa' o'ch nanac çapatoñ pueyoçhro ñeñt cohuentetsa Yomporecop, attoch ñapa'cho'ña o'ch yenpan pamo'tsesha'.

Tarraña ñeñtara Parets Puecamquëñ ñeñña eñotatenahuet.

9 Ñato' po'psheñeñpa' nanaccha' yemtenana Yompor. Ñeñtara Parets Puecamquëñpa' o'ch aþ attoch yemcha nanac. Ñato' po'psheñeñpa' o'ch aþ po'huamenc attoch a'crratyesan atsnañeteçhno.

Tarraña ñeñtara Parets Puecamquëñ ñeñña apuene' attoch a'crratyes.

10 Ñato' po'psheñeñpa' o'ch aþ attoch orrtatyesan Yompor po'partsoña. Ñato' po'psheñeñpa' nanaccha' cohuen a'potan Yompor po'ñoñ.

Ñato' po'psheñeñpa' o'ch eñotyesan pa'namen cotapñats, attoch ñapa' o'ch eñoch erro'tte' huena ñeñt cotapñats, ñato' Parets Puecamquëño' amapa' oneñeñate' poctapña.

Ñato' po'psheñeñpa' Parets Puecamquëñcha' eñotatene' eñosysets po'poñ ñoñtso. Amapa' ñato' po'psheñeñpa' o'ch a'mtan ñoñets atet eñenet po'poñ ñoñtso.

11 Tarraña allohueneypa' e'ñe patrra Parets Puecamquëñ ñeñtcha' yeñotatene' ñeñtara ñeñtcha' yapa'yese' puesheña'ttsoy erra'tsencha' muena' ña attoch yetorra'yesa pa'namen ñocop.

Ama't e'ñe po'poñe'ttsocma yetorra'yena Yomporecoppa' tarraña ñapa' e'ñe attecma cohuen enteney

12 Ñato' o'ch netma'ntacha ñeñt atet yeçhquëna yechets. Ñehua, allemeñ yechetspa' ama'tcha' ellopa'tetstenañpa' tarraña allohuenpa' e'ñe patrra yechtsot. Attecma yepena

yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa' tarraña e'ñe yame'ñeñoñ Cristopa' o'ch yeparrocmatuahua allohueney. ¹³ Tarro'mar allempo o' yapataretetuapa' Parets Puecamquēñpa' o'ch parrocmataturrey allohueney. Ama't ñaña po'poñe'ttsocmay acheñey atet ñerra'm patanta'tsoypa' judioneshay, ñato' po'potantañpa' amach judioneshayaye. Tarraña allohueney e'ñe puechorreñoñey Parets Puecamquēñpa' e'ñe allempoteñpa' o'ch yeparrocmatua allohueney. Ama't ñaña acheñ ñeññ ataruasataret e'ñe atta ñeññ ama esoye' enteñeto ñaña acheñ ñeññ e'ñe cohueno'tsen. Tarraña e'ñe puechorreñoñey Parets Puecamquēñ ñeññ e'ñe patrrapa' e'ñe allempoteñpa' o'ch yeparrocmatua allohueney.

¹⁴ O'ch alla netma'ntatererr ñeññ atet yeçhquēna yechets. Ñehua, atet ñerra'm allemeñ yechetspa' ama patrraye' yeçhquētso, shonte'ca'ye yeçhquētsa. Tarraña ama't shonte' yeçhquēnañ yechetspa' e'ñe patrra yechets ottetsa. Attecma yepena yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa' tarraña e'ñe yame'ñeñoñ Cristopa' o'ch yeparrocmatuahua. ¹⁵ Ñehua, o'ch netma'ntatererr po'poñ: Ñato' atet ñerra'm yetacpa' o'ch ot: "Napa' ama es nesherbena atet sherben otats, ñeñto'marña ama pocteye' nenteñe o'ch neparrocmat epan ye'nar." Tarraña ama't atet oteneñ yetacpa' ñeñtpa' ama atteyaye, çhocma parrocmaten. ¹⁶ Amapa' ñato' atet ñerra'm yetpa' o'ch ot: "Napa' ama es nesherbena atet sherben quēllo'yets ñeñto'marña napa' ama pocteye' nenteñe o'ch neparrocmat epan ye'nar." Tarraña ama't atet oteneñ yetpa' ñeñtpa' ama atteyaye, çhocma parrocmaten ñaña. ¹⁷ Ñerra'm yechetspa' e'ñe yeçlloyochayapa' amate' erroteno ye'mueno. Ñaña ñerra'm yechetspa' e'ñe yetochayapa' amate' erroteno es yemosyeno. ¹⁸ Tarraña po'ñoçhpa' ama atteye' yeçhcatye Yompor. Ñapa' ahuo't ne' attoch yeçhca'yesa allemeñ yechets ñeññ atet pocte' ent ña. Ñeñto'marña yeñoteñ ama't errotençho' yetorra'yesa Yomporecop puesheña'tsoypa' ñeñtpa' çhocma sherba'yen. ¹⁹ Po'ñoçhpa' ñerra'm yechetspa' aña yeçhcatsa paterr atet ñerra'm e'ñe yeçlloyochayapa' amate' erroteno orroña e'ñe cohuen ora yechets. ²⁰ Tarraña po'ñoçhpa' ama atteye' ayeçhcatareteye. Añña çhocma eñalleyesa allemeñ yechets. Tarraña ama't ellopa'tetstenañpa' e'ñe patrra yechets ottetsa. Ñeñtpa' attecma yepena yaña allohueney ñeñtey ame'ña'yenaya Cristo. Ama't po'poñe'ttsocma yetorra'yesa Yomporecoppa' tarraña e'ñe yame'ñeñoñ Cristopa' o'ch yeparrocmatuahua

allohueney.

²¹ Ñato' o'ch netma'ntatererr po'poñ: Atet ñerra'm yecle'pa' ama pocteyaye o'ch otan yot: "Napa' ama nepallteno ñeñt atet pesherven pa." Ñaña yoñpa' ama pocteyaye o'ch otan yetac: "Napa' ama nepallteno ñeñt atet pesherven pa." ²² Ñeñto'marña ama pocteyaye o'ch yoctape'chyes atet, tarro'mar ora allohuen yechetspa' e'ñe sherba'huen. Ñato' yapa' chach yotenapañ ñato' erra'tsen yechetspa' amate' es sherbeno. Tarraña ñato' ñeñtara yechetspa' ello metana'tuenan atto sherben po'poñechno yechets. Attecma yepena yaña allohueney ñeñtey ame'ña'yenaya Cristo. Ñato' yapa' chach yotenapañ ñato' erra'tsen acheñpa' amate' es sherbeno. Tarraña ñato' ñeñtña acheñpa' ello metana'tuenan atto sherben po'poñechno acheñ. ²³ Ñaña ñerra'm erra'tsen yechets ama tama cohuenaye' yentenopa' ñato' o'ch yechorrataña e'ñe cohuen attoch ellopa' o'ch yorrta nanac cohuen. Ñaña ñato' erra'tsen yechets ñeñt yepencatene'pa' ñato' o'ch ya'nach e'ñe cohuen. ²⁴ Tarraña ñeñt e'ñe cohuen yechetspa' amach yemno o'ch ya'nach, añña chochña yorrtañ. Atet ye'chcatonay Yompor yechets attoch ama't ñeñt ama tama cohuenaye' yentenopa' o'ch yañño'teñ e'ñe cohuen attoch ellopa' o'ch orrta nanac cohuen. ²⁵ Allempoña allemeñ yechetspa' o'ch parrocmatet e'ñe cohuen, ñaña allempopa' o'ch e'ñe cohuen yenpannenet. ²⁶ Ñeñto'marña ñerra'm esempo paterr yechetspa' atserrena allohuen yechetspa'cho' o'ch atsotapretannenet. Ñaña ñerra'm paterr yechetspa' o'ch orrta e'ñe cohuen allohuen yechetspa'cho' o'ch coshapretannenet. Attecma yepena yaña ñeñtey ame'ña'yenaya Cristo. E'ñe yeparrocmatanna'teñoñ ñerra'm puesheñarr yamo'ts cha llequena ñeñt parro yame'ñenapa' allohueney ñeñtey ame'ñetsapa' o'ch yelcapretannena. Amapa' ñerra'm puesheñarro'teypa' nanac yocshenapa' allohueneypa'cho'ña o'ch yocshapretannena.

²⁷ Ñehua, añ yechets ñeñt o' notuapa' añ toma'tena ya allohueney ñeñtey o' yame'ñera, Cristopa' o' enterrey atet ñerra'm e'ñe ña po'chtsoy, tarro'mar o' yeparrocmat epay Cristo. Ñaña ama't shonteyeñ e'ñe po'poñe'ttsocmaypa' tarraña e'ñe yeparrocmateño'pa' o' atet yeperra atet ñerra'm Cristo po'chtsoy. ²⁸ Ñaña allohueney e'ñe yame'ñeñoñ Yomporpa' e'ñe po'poñe'ttsocma yetorra'yena Yomporecop. Tarro'mar Yomporpa' atto na'yesonay pa'namen attoch yetorra'yesa ñocop. Ñanompa' ahuo't nan puesheña'tets allsensaretnesha'. Allo'tpa' ahuo't nan po'poñechno ñeñtcha'

a'pote' po'ñoñ. Allo'pa' ahuo't nan ñaña po'potantañ ñeñtcha' ye'chatenahuet Yompor po'ñoñ. Allo'pa' ahuo't nan po'potantañ ñeñtcha' orrtate' po'partsoña. Allo'pa' ahuo't nan po'potantañ ñeñtcha' torratsa attoch a'crratyaset ñeñt atsna'tyets. Po'potantaññapa' ahuo't ne' ñeñtcha' torratsa yenpue' allohuen acheñenesha'. Po'potantaññapa' ahuo't ne' ñeñtcha' yechenahuet allohuenet. Po'potantaññapa' ahuo't ne' ñeñtcha' eñosyets pa'namen ñoñtso. ²⁹ Po'ño'chpa' ama allohuenacmaye' allsensareteye. Ñaña ama allohuenacmaye' ya'po'teno Yompor po'ñoñ. Ñaña ama allohuenacmaye' yey'chateno. Ñaña ama allohuenacmaye' yorrtateññañe Yompor po'partsoña. ³⁰ Ñaña ama allohuenacmaye' ya'crratyene' atsnañete'chno. Ñaña ama allohuenacmaye' yeñosyeno po'poñ ñoñtso. Ñaña ama allohuenacmaye' ya'mteno ñoñets ñeñt eñets po'poñ ñoñtso. ³¹ Tarraña ama't ama allohuenacma atteyepa' e'ñe pocte' o'ch yeye'chena ñeñtcha' yetorra'yena e'ñe cohuen puesheña'ttsoy Yomporecop. Tarraña ellopa' o'ch neñotatas po'poñ ñeñt nanac sherbets Yomporecop.

13

Eñall paterr ñeñt nanac sherbets, ñeñt'pa' añ: atto amor-tannanna'tpahuepa'ch allohueney

¹ Ama't yeñosyetsatset e'ñe cohuen pa'namen acheñ po'ñoñetoña' ñerra'm ama yemorrencho yamo'tspa' e'ñe yeñosyeño'tpa' añña Yomporpa' attach enteney atet ñerra'mrrate' con ñeñt atta ama'to'chtetsa. Tarro'mar ama yemorrenteño'teye' yeñosyeno pa'namen ñoñets. Ñato' ama't yapa' yeñosatsetyes e'ñe cohuen atet ñerra'm Yompor po'mllaño'teñnanesharña' ñerra'mña ama yamo'ts yemorrentenopa' e'ñe yeñosyeño't Yomporpa' attach enteney atet ñerra'mrrate' patashtalla challachallatspenet. Tarro'mar ama yemorrenteño'teye' yeñeno. ² Ñaña ama't yapa' yeñotatset a'mite' Yompor po'ñoñ, tarraña ñerra'm ama yemorrencho yamo'ts, atet'pa' amach esoye' entenye. Ñaña ama't yeñotatset o'ch ya'pota ñeñt ñap'ta eñoten Yompor tarraña ñerra'm ama yemorrencho yamo'tspa' ñeñt'pa'cho'ña amach esoye' entenye Yompor. Ñaña ama't yeñotatset ora allpon ñeñt eñall, tarraña ñerra'm ama yemorrencho yamo'ts, ñeñt'pa'cho'ña amach esoye' entenye Yompor. Ñaña ñato' nanac yeyemteño't Yomporpa' aphueney allohuen ñeñt yenamueñ, ama't ñeñt echarr yentyen. Ñato' o'ch netma'ntacha atet: Ñato' o'ch yoch Yompor, añ aspenet'pa' chenquëpa'. Ñato' e'ñe

yeyemteñoť Yomporpa' o'ch'cho' chenca. Tarraña ama't yeyemteñoť Yomporpa' o' yeřohua atet, tarraña ñerra'm ama yemorreñcho yamo'tspa' attecma enteney Yompor, ama esoyayye. ³ Ñaña ama't es yapa'yestatsech huocchañesha' ora allohuen ñeñť yechyenña', ñerra'm ama yemorrenteñoťeye' es yapa'yenanetopa' ama't atet yeřatstapa' Yomporpa' amach cohuenaye' entenye. Ñaña ama't e'ñe yame'ñeñoť pocte' yentatsech pue'moñe'teñoťetay o'ch chamayet ora beñnatoteypa' tarraña ñerra'm ama yemorrenteño yamo'ts, ama't atet yeřatstapa' Yomporpa' atterach amach cohuenaye' entenye.

⁴ Tarraña ñerra'm esempo po'ñočh čho yemorrenteña yamo'tspa' e'ñech acořa es yeřa'yenanet, attach ya'huantenanet ñaña čochña ya'muerañtena. Ñaña amach čha es yeye'chapretyenaneto, ñaña amach čha yommo'chana'tatstaneto. ⁵ Ñaña amach yañeña entatstatso e'ñe cohueney. Ñaña ñerra'm esempo po'ñočh čho yemorrenteña yamo'tspa' e'ñechña pocte' es yeřa'yenanet, ñaña amach aña ye'natsto ñeñť e'ñe atet yemnen ya. Añcha'ña ye'nen ñeñť atet muenen po'psheñeñ. Ñaña ñerra'm esempo po'ñočh čho yemorrenteña yamo'tspa' amach čha ye'moñe'tyenaneto, ñaña amach čha atsrre'močen yentuenaneto. ⁶ Ñaña ñerra'm esempo es řohua po'psheñeñ ñeñť ama pocteye' enteno Yomporpa' ñerra'm po'ñočh amuerañaypa' yapa' amach čha yocshatsto. Añcha'ña yocshapretena ñerra'm esempo e'ñe cohuenare' es penet. ⁷ Ñerra'm po'ñočh čho yemorrenteña yamo'tspa' ama't čho erroť řonaypa' yapa' čhocmach ya'huantoñ. Ñaña ñerra'm po'ñočh čho yemorrenteña yamo'tspa' čhocmach yeyemcha ñeñť atet pena amapa' ñeñť atet oten. Ñaña ñerra'm po'ñočh čho yemorrenteña yamo'tspa' e'ñe yeyemteñoťanet čhocmach yeyenpuenanet attoch huomenc pet pueyočer ñamet Yomporecop. Ñaña ñerra'm po'ñočh čho yemorrenteña yamo'tspa' čhocmach ya'huanta'huanom pa'namen topateñťsočhno.

⁸ Atto yemorrentannenapa' ñeñťpa' amach ahuañañaťto ama't errponaña. Ñaña te'pa' ama't ya'poteññañeñ Yompor po'ñoñ tarraña esempohuañenpa' huañcha' atto ya'poteñ te'. Ñaña ama't atto te'pa' yeñosyen po'poñ ñoñťsopa' ñeñťpa'čho'ña esempohuañenpa' huañcha'. Ñaña ama't atto yeñotañtena te'pa' ñeñťpa'čho'ña esempohuañenpa' huañerrcha'. ⁹ Tarro'mar ama't allpon es yeñotyen te'pa' ama e'ñe yeñotueñe poctacma. Ñaña ama't te'pa' ya'poteññañ

Yompor po'ñoñ ñeñtpa'cho'ña ama e'ñe yeñotueñe poctacma. ¹⁰ Tarraña ñerra'm esempoch huerra Cristo ñeñt e'ñe eñotañtetsa poctacmapa' allempoña yapa' o'ch e'ñe es yeñotuahua yamã.

¹¹ Ñehua, ñato' o'ch netma'ntacha atet: Napa' allempo cheshenna'pa' atta neñosatse'tyese't atet eñen cheshatollesha'. Ñaña allempopa' atta noctape'chatse'tyese't atet cotape'chyen cheshaneshã'. Ñaña añach cohuen nentapretyese't atet cohuen entyen cheshatollesha'. Tarraña te'pa' o' nepo'npa' o'huañ noctape'chatse'tyes atet pena cheshatollesha'. ¹² Ñaña yapa' ama yeñotueno e'ñe ora atet pena Parets. Ñehua, ñato' o'ch netma'ntatererr atet: Yapa' cha yottena atet ñerra'mrrate' rerpatofa yecueñ Yompor, amach tama yechme'teñe. Tarraña esempohuañenpa' yentercha' e'ñe allame'tets. Ñaña te'pa' atto es yeñotyen mamesha'tets, tarraña esempohuañenpa' yeñotuerrcha' ñeñt e'ñe atet pena Parets, e'ñech yeñotañetuerra atet pena te' Yomporpa' e'ñe eñotueneñ ñeñt atet yepena. ¹³ Ñeñto'mar te'pa' yeñoteñ eñall ma'pa ñeñtcha' ama ahuañañatso ñeñtpa' añ: atto yeyemteña Yompor, ñaña atto yeyemteñoñ yecuame'teñ ñeñt o'patatenya, ñaña atto yemorrentannena. Tarraña añ ma'po'marpa' añña nanac sherbets Yomporecop atto yemorrenteña allohuen acheñenesha'.

14

Ama't yeñosatsetyes po'poñ ñoñtsopa' ñeñtpa' ama tama sherbeno

¹ Ñeñto'marña te'pa' añ poctetsa o'ch yema'yoçhrena attoch yemorrentanna'ta e'ñe poctacma. Ñaña añ pocte' o'ch yeye'chaprecha Yompor attoch o'ch apa'yeseñ e'ñe Puecamquëñoñ attoch yetorra'yesa ñocop. Añña e'ñe pocte' o'ch yeye'chaprecha nanac attoch apueñ o'ch ya'potoñ po'ñoñ e'ñe eñotochen. ² Tarro'mar ñeñt eñets po'poñ ñoñtsopa' añeçpa sherben attoch eñora epuet Yompor, tarro'mar añña acheñenesha' ñeñt e'mñnotenahuetañpa' amach esesha' eñotenaye ñeñt atet oten. Ama't añ ye'ñoratate' Parets Puecamquëñ ñeñt ama eñotpahuo ñoñetsña' ñerra'm acheñenesha'pa' ama eñoteñeto atet yotyenanet, ñeñtpa' e'ñe Yompora ñapueñ e'muene'. ³ Tarraña ñerra'm esempo ya'potoñ Yompor po'ñoñ e'ñe eñotochenpa' ñeñtpa' po'ñoñ çhoch es yeñotatenanet attoch huomenc penet pueyoçher Yomporecop. Ñaña çhoch yeñotatenet ñeñt atet oteney Yompor po'ñoñ ñeñtcha' atet yepa e'ñe cohuen. Ñaña çhoch yeñotatenet Yompor po'ñoñ attoch ñetpa' coshenet Yomporecop. ⁴ Tarraña

ñeñt eñets po'poñ ñoñtsopa' ñeñtpa' amach atteye' peno. Añecpach eñen e'ñe ñocpa attoch huomenc ñan pueyoçher e'ñe ñañaña. Tarraña ñerra'm esempoña ya'poññañ Yompor po'ñoñ e'ñe eñotoçhenpa' ñeñtpa' çhoch po'ñoçh es yeñotateñ allohuen ñeñt ame'ñetsa attoch huomenc penet pueyoçher Yomporecop.

⁵ Ñehua, po'ñoçhpa' pocte' nenteñ o'ch seños po'poñ ñoñtso allohuenes, tarraña ñeñt nanac nemnen o'ch señospa' ñeñtpa' añ: o'ch sa'potoñ Yompor po'ñoñ e'ñe eñotoçhen ñeñt allo yeñen. Tarro'mar ñerra'm esempo ya'potoñ Yompor po'ñoñ e'ñe eñotoçhenpa' nanaccha' yesherven Yomporecop. Tarraña ñerra'm esempoña yeñen po'poñ ñoñtsopa' amach tama yesherbena. Ñehua, pocte' enteñ Yompor ñerra'm po'ñoçh eñall puesheñarr ñeñt a'mtene' ñoñets e'ñe ya yeñoño, attoch allohueney ñeñtey ame'ñetsapa' o'ch çhaponaya Yompor po'ñoñ yeyoçhro attoch huomenc yepa' yeyoçher. ⁶ O'ch notas masheñeshacha' ñaña noçhaneshacha' ama't napa' ñerra'm machayoña neçhap seshopa' ñerra'm nañapa' añña neserrpare'tatoses po'poñ ñoñtso ñeñt ama yeñenopa' errotenotuate'ñaca'yeña señoçh tarro'mar amaca'ye se'muenoña ñeñt ñoñtsor ñeñt atet notenes attoch e'ñe cohuen neyenpas. Tarraña añña pocte' socop napa' çhocmach na'potoñas e'ñe eñotoçhen ama't coñeña'ttsa ñeñt atet eñotatenen Yompor. Ñaña napa' elloña çhochña es neñotatyesas po'poñ ñeñt ama señoteno sa. Ñaña napa' çhochña na'potoñas mamesha'tets Yompor po'ñoñ, ñaña çhochña es neyçhatas ñeñt cohuentetsa.

⁷ Ñato' o'ch netma'ntacha ñeñt atet pena pencoll, ama't pencollpa' ama acheñeyaye. Atet ñerra'm napa' esempo nepenclla'tenña' ñerra'm ama cohuenaye' na'poçhe'teno nepencollpa' amach esesha' eñotaye errotenente' neçchateñ. Amapa' atet ñerra'm napa' esempo netoca' yetarra,* ñerra' ama atteye' netoco atet toquëñetpa' amach esesha' eñotaye errotenente' neçchateñ. ⁸ Ñehua, ñato' o'ch netma'ntatererr po'poñ. Atet ñerra'm esempo o'ch ahuanmuet quellarat-sapa' çhoch ñanom puesheñarr solltarpa' o'ch corrneta't quellareñtsoreçho, attoch solltarnesha'pa' o'ch eñoçh o' çhap allempoch ahuanmuet quellaratset. Tarraña ñerra'm solltarpa' ama cohuen a'poçhe'tano po'cornetpa' añña solltarnesha'pa' amach eñoçheto ñato' añecopte' a'toreñet attoch ahuanmuet quellaratset. ⁹ Attecma pena ñaña yocop ñerra'm esempo yeserrpare'ten po'poñ ñoñtso ñeñt ama allo eñeno acheñenesha', ñetpa' amach errotenot çhapaneto pueyoçhreto

* 14:7 Po'ñoçh añpa' oten arpa.

ñeñt atet yotenanet. Atetpa' chach yottena atette'ña ama eñalle acheñenesha' ñeñt ye'mñotene'. ¹⁰ Po'ñoçhpa' eñalleñcha' shonte' po'poñe'ttsoçma ñoñets ñeñt atet yeñosyen añ pat-sro. Ñaña po'poñe'ttsoçmay acheñey ñeñtey eñotyene' ñeñt e'ñe yeñoñ allo yeñosyen. ¹¹ Tarraña ñerra'm po'psheñeñpa' o'ch serrpare'tatey e'ñe ña po'ñoño ñeñt ama allo yeñeno yapa', ñeñtpa' amach yeñoche errotente' oteney ña po'ñoño. Yapa' attach ye'mueñ ñerra'mrrate' atta otatsen. Ñaña attecmay yaña ñerra'm yapa' o'ch yeserrpare'tach ñeñt ama eñetso yeñoñopa' amach eñoche errotente' yoteñ yeñoño. Ñapa'cho'ña attach e'mueney ñerra'mrrate' atta yotatsen. ¹² Napa' tarro'mar atet notenes tarro'mar sapa' chocma seye'chyena atto Parets Puecamquëñpa' o'ch patyesas ñeñt atet semna'yen sa. Tarraña napa' añcha'ña o'ch notas, añña pocte' o'ch seye'chena attoch señoť e'ñe cohuen alloch huomenc sepoñ pueyoçher allohuen ñeñt ame'ñetsa.

¹³ Ñeño'tmar te'pa' o'ch notas: Ñerra'm esesha' eñosets po'poñ ñoñtsopa' añ pocte' ma'yochanepa' Yompor attoch eñotach o'ch a'mtan ñoñets e'ñe eñotoçhen añ ñeñfara ñoñtso. ¹⁴ Tarro'mar ñerra'm esempo yema'yochena po'poñ ñoñtsopa' ama't e'ñe Parets Puecamquëñ yema'yochatatste'pa' tarraña allempo po'ñoçhpa' amach aye'yoctape'cheno attoch yeyenpue' yamo'ts. ¹⁵ Ñehua, ñeño'tmarña te'pa' o'ch notas ñeñtcha' atet ye'pa'yesa e'ñe cohuen. Po'ñoçhpa' e'ñe pocte' o'ch ma'yochatey Parets Puecamquëñ po'poñ ñoñtso, tarraña añ e'ñe pocte' ñaña o'ch yema'yochena e'ñe eñotoçhen. Ñaña attecma e'ñe pocte' Parets Puecamquëño'tpa' o'ch yemorreacha Yomporecop po'poñ ñoñtso, tarraña añ pocte' ñaña o'ch yemorreachena allo e'ñe yeñen. ¹⁶ Tarro'mar ñerra'm po'poñ ñoñtsa ya'ye'choçhtateññañ Yompor atet eñoratey Puecamquëñ, tarraña ñerra'm allo'tsa'yen po'poñeçhno acheñenesha' ñeñt e'ñe errote' e'mñotetspa' amach errotent pocte' entapretyeto atto ya'ye'choçhtateññañ Yompor, tarro'mar ama e'muennayeto yeñoñ. ¹⁷ Ñaña ama't e'ñe cohuen yeparasyoso'teñeñ Yomporpa' tarraña ñerra'm po'poñ ñoñtsa yema'yochena, ñeñtpa' ama añeçpayaye alloch huomenc ye'poñ po'psheñeñ pueyoçher, tarro'mar ama eñoteñeto errotente' yoten. ¹⁸ Napa' atarr neparasyoso'teñ Yompor, tarro'mar ama't napa'cho' neñoteñ eñosets po'poñ ñoñtso. Ñato' ñeñtpa' ello metanennas allohuenes atto señosyen po'poñ ñoñtso. ¹⁹ Tarraña allempo yapçhena allohueney ñeñtey ame'ñetsapa' napa' añña pocte' nenten o'ch neserrpare't ama't e'ñe coñe'ta ñoñets ñeñt eñotoçhen attoch e'ñe yeñotue. Añña ama tama cohuenaye' nenteno

ama'tcha' neserrpare'ten shonte' ñoñets, tarraña ñerra'm po'poñ ñoñtsa neñenpa' ñeñtpa' amach choye' neyenpueñe namo'ts.

²⁰ Ñeñto'marña masheñneshacha' ñaña noçhaneshacha' amach soctape'chatsto atet cotape'chen cheshaneshach' ñeñt ama eñotenaye ñeñt atet cohuentetsa. Ñehua, po'ñoçh ñerra'm esempo yoctape'chyen sosya'tsañ allempoña pocte' o'ch yoctape'chen ñeñt atet cotape'chen cheshatoll, tarro'mar cheshatollpa' ama tama cotape'cheneta' sosya'tsañ. Tarraña allempo yoctape'chen ñeñt cohuentetsa Yomporecoppa' allempoña po'ñoçhpa' o'ch yoctape'chen atet cotape'chen po'naneshach' ñeñt atarr es eñotets. ²¹ Añpa' ñeñt Yompor po'ñoñ ñeñt atet anaret ahuatoteñ allempo Yomporpa' atet otane't israelena'tarneshach'. Ñeñtpa' atet otanete't: "O'ch noñmatas po'poñ acheñ ñeñtcha' seserrpare'tatene' e'ñe ñet po'ñoñeto tarraña ama'tcha' atet neponaspa' amach esesha' name'ñerraye tarro'mar amach eseshaye' eñotaye ñeñt atet aserrpare'tatarettenet." Ñeñtpa' Yompor atet otahuete't ahuat. ²² Ñeñto'marña te'pa' atet notenes ama't yeserrpare'tatset po'poñ ñoñtsopa' ñeñtpa' ama añecpayaye attoch yame'ñacha ñeñt ama ame'ñetso tarro'mar añ ñoñets ñeñt ahuatoteñ anaret ñeñtña yeñotatene'ña ama'tcha' yeserrpare'tatset po'poñ ñoñtso amach esesha' yame'ñerrayo. Ñeñtcha'ña yeñotate'ña erra'tsente' po'ñoçh ñeñt ama ame'ñetso. Tarraña ñerra'm esempo ya'poteññañ Yompor po'ñoñ e'ñe ya yeñoño ñeñt atarr eñotochen, añña ñeñt ame'ñetsa ñetñapa' e'ñech cohuen e'mñoteñet allochña huomenc yepenamet pueyoçhret Yomporecop. Ñeñtcha'ña yeñotate'ña ñetpa' po'ñoçh ame'ñenet tarro'mar ñeñt po'ñoçh ama ame'ñetso, ñetpa' amach mueneñeto o'ch e'mñotet ama't ñeñt atarr eñotochen ñoñets. ²³ Ñaña o'ch notas, ñerra'm esempo sapçhena allohuenes ñeñtes ame'ñetsa, ñerra'm allohuenespa' atta señosyen po'poñe'ttsoçma ñoñtsopa' ñerra'mña machaya huapa ñaña ñeñt ama ame'ñetso amapa' ñeñt errte' e'mñotetspa' ñetpa' ama'tte'ña cha otaseto cho'te' semospuena. ²⁴ Tarraña ñerra'm esempoña sa'poten allohuenes Yompor po'ñoñ e'ñe eñotochen ñerra'm allempoña huapa ñeñt ama ame'ñetso amapa' ñeñt errte' e'mñotetspa' ñeñtña atet seserrpare'ten Yompor po'ñoñpa' ñato' allohuenetpa' o'ch çhapanet pueyoçhro, o'ch eñotet ñañeñeta ñeñt atet cotape'chyenet ñetpa' ñeñtpa' ama pocteyaye Yomporecop. ²⁵ Allempoñapa' ñato' o'ch yore'tanet po'chñaret ñeñt cotape'chatyenahuet pueyoçhro e'ñe a'nahua ñato' puellquëñoñetpa' o'ch concorpuet ñato' o'ch

aguëret ñamet Yompor. Tarro'mar ñato' allempopa' o'ch ot: "Po'ñoçhepa't Yompor se'ñoratyene'."

Parets pa'paclopa' ama aserrpare'tpahuo e'ñe parrocmá

²⁶ Ñehua, masheñeshacha' ñaña noçhaneshacha' ñeñtcha' atet sepa cohuen ñeñtpa' atet: Sapa' allempo sapçhenapa' ñato' puesheña'ttsospa' o'ch semorrechena, ñato' po'psheñeñpa' o'ch yeçhatenet, ñato' po'psheñeñpa' o'ch a'potan ñeñt atet eñotateñ Yompor, ñato' po'psheñeñpa' o'ch eños po'poñ ñoñtso, ñato' po'psheñeñpa' o'chçho' a'mitan añ ñoñets. Tarraña ñeñtpa' añecopcha' atet sepa attoch huomenc sepoñ po'psheñeñ pueyoçher. ²⁷ Tarraña ñerra'm eseshas eñosets po'poñ ñoñtsopa' ama pocteyaye o'ch seños e'ñe allohuenes, ñato' e'ñech epsheña eñosets amapa' ma'psheña allotpa' ñeñtach. Ñaña añ pocte' ñeñtcha' eñosetspa' ñaptepa'tetscha' eñoset. Tarraña añ pocte' ñaña eñallcha' ñeñtcha' eñotatenahuet ñoñets ñeñt atet eñenet. ²⁸ Tarraña ñerra'm ama eñalle ñeñtcha' eñotatahuet ñoñetspa' amach eñosatsteto e'ñe alla allempo sapçhena allohuenes ñeñtes ame'ñetsa. Allempopa' eñorana'chetepa' Yompor e'ñe ñapçteto e'ñe pueyoçhreto. ²⁹ Ñaña añ pocte' e'ñech epsheña, amapa' ma'psheña ñeñtcha' a'pote' Yompor po'ñoñ. Po'poñeçhno acheñenesha'pa' añ pocte' çoch e'mñoçhet, ñaña çoch cotape'chet po'ñoçhte' atet oteney Yompor. ³⁰ Ñaña ñerra'm esempo po'psheñeñ mueneñ o'ch a'potan ñeñt eñotateñ ñaña Yompor Puecamquëñpa' añ pocte' allempopa' amach serrpare'tatsto ñeñt ñanom serrpare'tets. ³¹ Attochña o'ch sa'potuoñ allohuenes Yompor po'ñoñ e'ñe saptepa'tets, ñaña attoch allohuenespa' o'ch e'ñe señoçh, ñaña attoch allo'na coshatnenes Yompor po'ñoñ. ³² Tarro'mar ñeñtey a'potene' Yompor po'ñoñpa' çocmach eñall attoch yeunata yañeña ñanom attoch çocma yemnatannena. ³³ Yomporpa' ama mueno o'ch atta yano'tatse'ten allohueney, añña muenen o'ch yesen e'ñe cohuen.

Ñaña atet pena allemeñ anetso ñeñt apçha'yetsa ñeñt pueyochresha' pen Parets. Ñaña allempo sapçhena allohuenes ñeñtes ame'ñetsapa' ³⁴ coyaneshaçhnopa' amach serrpare'tatsteto, tarro'mar ñeñtpa' ama pocteyaye. Añña pocte' çoch ame'ñyet ñeñt añcha'tarettetsa, ñeñtpa' atet oteney ñoñets ñeñt atet anaret ahuatoteñ. ³⁵ Ñehua, ñerra'm mueñenet o'ch es eñotetpa' a'pçto'chetepa' puerrollaret allempo çherret pa'paclo, tarro'mar ama pocteyaye coyanesha'pa' o'ch serrpare't allempo yapçhena ñeñtey ame'ñetsa.

³⁶ Ñehua, ñerra'm ama pocteye' senteñe ñeñt atet o' no-tuaspá' ñehua, o'ch notas atet: Yompor po'ñoñpa' ama e'ñe

sa soctaṗñoteye' hueno, ñaña ama e'ñe saptecpa hueno. ³⁷ Ñaña ñerra'm esesha' otats, "napa'cho'ña na'poteññañ Yompor po'ñoñ", ñehua, eñotanepa' ñeñt atet noten necartotpa' ñeñtpa' po'ñoçh atet oteneý Yepartseshar ñeñtcha' atet yeṗa. Ñaña ñerra'm esesha' otats, "napa'cho'ña chorrenna Parets Puecamquëñ", ñehua, ñapa'cho'ña eñotanepa' ñeñt atet noten necartot ñeñtpa' po'ñoçh atet oteneý Yompor ñeñtcha' atet yeṗa. ³⁸ Tarraña ñerra'm esesha' ama name'ñayo ñeñt atet o' notuaspa' ñehua, ñapa' amach se'mñotatsche.

³⁹ Ñeñto'marña te' masheñneshacha' ñaña noçhaneshacha' o'ch noterrser: Añ pocte' o'ch sema'yochrena a'pote' Yompor po'ñoñ e'ñe eñotoçhen ñoñtso, tarraña pocte' o'ch semnatamet eñosetepa' po'poñ ñoñtso. ⁴⁰ Tarraña ama't erra'tsencha' seṗa'yespa' e'ñech cohuen sesen ñeñt poctetsa, ñaña çhocmach semnatanna'ta o'ch es seṗa'yes e'ñe saptepa'tets.

15

Allempo tanterra Cristopa' ahuo't orrterrana shonte' acheñenesha'

¹ Te'pa' o'ch masheñneshacha' ñaña noçhaneshacha' notas po'poñ. Napa' nemneñ ellopa' o'ch alla neýerpaterrser e'ñe erroente'ña ñeñt e'ñe atet pena cohuen ñoñets ñeñt neserrpare'tatuanmas, ama't ahuatoteñ. Ñeñtpa' ñeñtara cohuen ñoñets ñeñt o' same'ñerra, ñaña ñeñtara ñoñets ñeñt allo o' huomenc seperr seyocher. ² Ñaña ñeñtara ñoñets allo o' sa'queshpataretterra ñerra'm amach sequeçpuere, tarraña ñato' po'ñoçhpa' ama çhoye' same'ñeno.

³ Ñaña ñeñt neserrpare'tatas ama't ahuatoteñpa' ñeñtara cotapñats ñeñt atet eñotatenet naña, ñeñt nanac sherbets, ñaña ñeñtara ñoñets ñeñt atet anuaret Yompor po'ñoño ama't ahuatoteñ. Ñeñtpa' atet o' neserrpare'tatuas: Cristopa' rroma yo'chñarecop, ⁴ alloṭpa' apampareta, tarraña poma'pamtañoṗa' alla tanterra. Ñeñtpa' attecma oten ñaña ñeñt atet anuaret ahuatoteñ Yompor po'ñoño. ⁵ Allempo tanterrapa' ñanempa' orrterrana Pedro, alloṭpa' orrterrana allohuen pueyochresha'. ⁶ Alloṭpa' orrterrana ñaña shonte' acheñenesha' ñeñt ame'ñetsa. Ñato' metanenante' quinientos acheñenesha' ñeñt enterre' allempo e'ñe parrocmuet. Ñeñt enterre' allempopa' ama't teme'ttsen shontet corra'yenet. Tarraña puesheña'tetspa' o' colla'huenet. ⁷ Alloṭñaṗa' orrterrana ñaña Jacobo, alloṭpa' orrterrana ñaña allohuen po'poñeçhno ñeñt allsensareñnesha'.

⁸ E'ñe chenta'ñapa' orrtona naña, ama't napa' ama esoyayo. Atta nentena ñerra'mrrate' sapeñtsoma'toṭa ne'ñallettera

Yomporecop. ⁹ Po'poñechno allsensaretnesha'pa' ñetpa' nanac sherbenet, tarraña napa' ama't allsensareteneña' ama tama nesherbena. Ñaña napa' pocte' nenteñ amach otatsetneto allsensareten, tarro'mar napa' nanac na'muerochtache't ñeñt' ame'ñenaya Yompor. ¹⁰ Tarraña ama't atet nepe'tpa' Yomporpa' atarr morrentna. E'ñe puemuereño'tpa' attoña a'pnaserren ñeñt' nanac sherbets ñocop. Tarraña ama orrena morrentno Yompor, tarro'mar te'pa' nanac netorrena Yomporecop. Po'potantañ allsensaretnesha'pa' ama't torra'yenet Yomporecoppa' tarraña napa' ello nanac netorrena atet torrenet ñet. Ñehua, ama't noteneñ napa' netorrena Yomporecop, po'ñoçhpa' ama naye'torretso, añña Yompor puemuereño'tpa' ñeñt'ña torretsa na nechtso't. ¹¹ Ñehua, amach yoto ñeñtey nanac sherbets, ñato' na amapa' po'poñechno allsensaretnesha'. Añcha'ña yot ñerra'm ya po'ñoçh yeserrpare'teño't o' same'ña'huerrapa' ñeñt'ña nanac sherbets.

Atto esempohuañenpa' yetantuerrach rromot

¹² Ñehua, ñerra'm po'ñoçh o' same'ñerra ñeñt' atet yeserrpare'tatenes atto Cristopa' o' tanterra allempo rroma, eso'mare'tña soten ñerra'm yerromapa' amach errotenot yetanterro. Po'ñoçh ñeñt'pa' atet oten puesheña'tets ñeñt' sesho'tsen. ¹³ Ñehua, ñerra'm po'ñoçh ama eñalle attoch yetanterra yapa', Cristopa'cho'ña amate' tanterrañe ama't teme'ttsen. ¹⁴ Ñerra'm po'ñoçh Cristopa' teme'ttsen rromueneña' ñeñt' atet yeserrpare'tatenes te'pa' amate' es sherbenñe. Ñaña ñerra'm po'ñoçh ama tanterrañe Cristopa' te'pa' e'ñe'te' orrena yeyemteñañ. ¹⁵ Ñaña ñerra'm po'ñoçh ama tanterrañe Cristopa' yapa' atfate' yeshquënsoñ atto' pena po'ñoçh Yompor, tarro'mar yapa' o' yeserrpare'tuoñ Yompor atto ñapa' o' tantaterran Puechemer Cristo. Tarraña ñerra'm po'ñoçh ama eñallñe attoch yetanterra rromotpa' ñeñt'ña atet o' yeserrpare'tatuas atto Yomporpa' o' tantaterran Puechemer Cristo, ñeñt'pa' amate' po'ñoçhoyayñe. ¹⁶ Po'ñoçhpa' ñerra'm amach yetanterro yapa', Cristopa'cho'ña teme'ttsente' ama tanterrañe. ¹⁷ Ñaña ñerra'm po'ñoçh teme'ttsen amach tanterrañe Cristopa' e'ñe'te' orrena seyemteñañ, ñaña so'chñarpa' amate' ap'retnareteñe teme'ttsen. ¹⁸ Ñaña allohuen ñeñt' o' colla'huena ñeñt' ame'ña'nmaya Cristopa' ñetpa' o'te' e'ñe poctacma chenca'huerretañ. ¹⁹ Ñaña ñerra'm añecpa yeyemteñañ Cristo allempo huomñchenya', ñaña ñerra'm po'ñoçh amach yetanterro, ñerra'm atteñpa' nanacte'

llequëñtso'tsenyeñ. Ñeñt llequëñetspa' ellote' metanenaneneñ ñeñt atet yellcatyene' aña patsro.

20 Tarraña ñeñtpa' ama atteyaye, tarro'mar po'ñoçh Cristopa' o' tanterra ñanom. Atto tanterrapa' amach alla rromuerre'te allochñapa' esempohuañen allohueney ñeñtey ame'ña'nmaya Cristopa' yapa'cho'ña attec mach yetanterra.

21 Atet pa ñaña ahuat Adán e'ñe ña po'chñarot' o' anaretta attoch yerroma, ama't e'ñe puesheñarroña. Te'pa'cho'ña e'ñe puesheñarrotpa' o' orrterra attoch yetanterra ama't esempoch yerroma.

22 Tarro'mar e'ñe po'chñarot' Adán ñeñtey pamo'tsna'tareypa' yocoppa'cho'ña o' anaretta attoch yerroma yaña allohueney. Tarraña te'pa' e'ñe yeparrocmateñoñ Cristopa' elloch alla yocrra'huerra allohueney.

23 Tarraña ñeñtpa' atetcha' perra: Cristo ñanom o' tanterra allochñapa' ñerra'm esempoch huerra, yapa'cho'ña ñeñtey ame'ñenayapa' attec mach yocrra'huerra allohueney. 24-28 Allempoña Cristopa' o'ch puerratanpesuan po'huamenc allohuen ñeñt añcha'taretetyetsa, ama't ñaña ñeñt añcha'noçhetyetsa, ñaña ñeñt ahuamencatetyetsa. Tarro'mar añ poctetsa Cristopa' ñach añcha'taretterrtsa e'ñe ñapueñ esempohuañencha' yoranpesuan po'huamenc allohuen ñeñt e'moñe'tene'.

Ñaña esempohuañen e'ñe chenta'pa' o'ch a'huañañperrey rromueñets ñeñt o'patatarey te' allohueney. Tarro'mar Cristopa' o' aphue Pomp por po'huamenc attoch pomnaren penan allohuen esocmañen. Ñehua, ama't oteneñ Yompor po'ñoñ Cristopa' pomnaren penano' allohuen esocmañenpa' tarraña yeñoteñ amach pomnaren pano Pomp or, tarro'mar Pomp orpa' ña apuene' po'huamenc. Esempohuañencha'ña pomnaren pohan allohuen esocmañen allempoña Cristopa' o'ch aphuerran Pomp or ñeñt nanac Parets atto añcha'tarettena. Allempoña Pomp orpa' o'ch alla pomnaren perran Cristo ñeñtara Pomp or ñeñt o' ahuamencat o' pöhue. Allempoña Pomp orpa' ñach añcha'taretterrtsa, ñaña allempopa' ñach pomnaren perre' allohuen esocmañen. Allempopa' o'ch mellapoterra.

29 Te'pa' o'ch alla noterrser po'poñ. Ñerra'm po'ñoçh ama eñalle attoch yetanterra esempohuañenpa' eso'mare'tña puesheña'tets acheña' apatarettenaña añecop ñeñt o' rroma. Po'ñoçh ñerra'm amach errotenoñ tanterro ñeñt o' rromapa' eso'mare'tña apatarettenetña ñeñtecop.

30 Ñaña ñerra'm po'ñoçh amach errotenoñ yetanterropa' eso'mare'tña pocte' nenteñ e'ñe name'ñeñoñpa' ama't chocma nemueroçhtena ñocoppa' e'ñe pocte' nenteñ. 31 Napa'

ateġ noten tarro'mar pate'tets yetpa' e'ñe na'llpuepñoġa ama muetsayenneto. Ñehua, neñoteñ ñeñtpa' attec mach pa'net. Tarraña masheñneshacha' ñaña noġhaneshacha' errponcha' nemueroġhtapa' allponcha' nocshapretensa saña, tarro'mar e'ñe yeparroc mateñoġ epay Yepartseshar Jesucristo. ³² Ñaña arr Efesopa' e'ñe na'llpuepñoġa a'queshpa'tnet ateġ ñerra'mrate' ġho norrotena epan ma'yarr. Tarraña ñerra'm amach errotenoġ yetanterropa' ñeñña atto na'llpuepñoġa a'queshpa'tyennetpa' amach es sherba'no, tarro'mar ñeñġ patso'marecpapa' ama sherbeno. Po'ñoġpa' ñerra'm amach eñallñe attoch yetanterraña' e'ñe poġte' o'ch yoteneñ: "Te'pa' acsha'yespahuepa'ġh, ñaña o'ch yotanna'ta arrallme'chapretyespahuepa'ġh, ñaña o'ch yotanna'ta orrare'tyespahuepa'ġh tayepa'tña' huomġchay. Tsapatonetña o'ch yerromapa' amach allo'na ateġ yepa'nenno."

³³ Tarraña amach sota'psa'tatso ateġ, tarro'mar yeñoteñ "ñerra'm esempo yeyemteña ñeñġ atta coġape'chatse'tyets ñeñġ ama cohuenayaye Yomporecop yapa'ġho'ña ġhach shequēnyet tarro'mar tsapatonetpa' ñato' o'ch alla ateġ yeperra yaña ateġ pa'yenet ñet, ama't te' yapa' e'ñe cohuen yoġtape'chen Yomporecop." ³⁴ Añña poġte' o'ch soġtape'cherr ello, ñaña o'ch sequeġpuerr ñeñġ ateġ sepa'yese't ñeñġ ama poġteyaye Yomporecop. Te'pa' sepenquēpa' tarro'mar ñato' po'ñoġh ama señoteñe Yompor allohuenes.

Atetġha' yepo'poñet allempoġh yetanterra rromoġ

³⁵ Te'pa' o'ch notas po'poñ. Ñehua, ñato' puesheñarroġespa' ateġ sotenen: "Amaġe' errotenoġ yetanterroña rromoġ. Ñerra'm po'ñoġh atanterra'po' rromoġ, yechetsña allempopa' ġerroġena'tġha'ña orrterra?" ³⁶ Sapa' are'tña es señoġeno. Ñehua, ñato' o'ch netma'ntacha ateġ: Yeñoteñ ñerra'm es yenare't pue'llomerpa' amach ahuen chopo. Choch ñanom puetsa' pa'tall eshecġha'ña chop. ³⁷ Ñaña ama añeye' yenare'teno narmets ora ñeñġ e'ñe ateġ chopuets. Ateġ ñerra'm ġhop* yenare'tpa' pue'llomġrach yenare'teññañ. ³⁸ Ñaña ñeñtpa' Yomporġha' a'ġhpaġe', tarraña ñeñġġha'ña chopatspa' o'ch po'poñet ñeñġ ateġ orrtena ahuaña pue'llomer. Ñeñtpa'ġho' Yompor a'po'poñetatene' tarro'mar ateġ muenen ña. Ñaña ñerra'm po'poñe'ttsocma es yenare't pue'llomerpa' e'ñeġh po'poñe'ttsocma chopyes ñaña narmets ñeñġ e'ñe ateġ anare't. ³⁹ Añpa'ġho' ġhetsotspa' e'ñe po'poñe'ttsocma ġhetsots, ama e'ñe

* 15:37 Po'ñoġh añpa' oten trigo.

attecmayaye. Atef ñerra'm ya acheñeypa' po'poñcho' yechets yechen. Ñaña es berrochnopa' po'poñcho' po'chets pen. Ñaña otechnopa'cho' po'poñ po'chets pen ñaña. Cacachnopa'cho'ña po'poñcho' po'chets pen ñaña. ⁴⁰ Ñaña ñeñt allpon ento'marnesha' ama e'ñe attecmayayeto ñerra'm patso'marnesha'. Tarraña ñeñt ento'tsa'yenpa' ellonetcho' cochnesha'tyenet tarro'mar atef anaretet. Ñeñt patso'tsa'yenpa'cho'ña ellonetcho' cohuenetyenet ñamet tarro'mar ñetpa'cho'ña atef anaretet. ⁴¹ Ñaña atef cohuentena atsne'pa' ñeñtpa' po'poñ poptena tarro'mar atef anaret ñaña. Arrorrpa'cho'ña po'poñonefcho' cohuentena tarro'mar atef anaret. Rantochnopa'cho'ña po'poñonefcho' cohuenetyenet. Ñaña pate'tets rantopa' po'poñettocma cohuenetyenet ñamet tarro'mar atef anaretet. ⁴² Attecmach yeperra yaña ñerra'm esempohuañencha' yetanterra. Ñeñt atef orrtena te' yechetspa' allempoch yetanterra'p' amach atteraye' yorrterro. Te'pa' arromñatayapa' chocmach yerroma allotpa' o'chcho' pampa'yet allcha' puetsouerr yechets. Tarraña esempoch yetanterra'p' amach alla ya'rromñafterre'te. ⁴³ Ñaña te' yechetspa' atarr pencna'ntateney tarro'mar chocmach yatsna'ten. Ñerra'm yatsna'tpa' o'chcho' yerroma, allotñapa' o'chcho' pampa'yet. Tarraña ñerra'm esempoch yetanterra'p' allempo yechetspa' amach alla pencna'ntaterrye'te. Allempopa' e'ñech cohuen yorreyena. Ñaña te'pa' ama ahuaencateye ñeñto'marña chocma yerromuen, allotñapa' o'chcho' pampa'yet. Tarraña ñerra'm esempoch yetanterra'p' allempopa' nanaccha' ahuaencatey. ⁴⁴ Atef yeyeçquëna te' arr patso'marpa' ñeñtpa' chocmach yerroma, allotñapa' o'chcho' pampa'yet. Tarraña ñerra'm esempoch yetanterra'p' allempopa' camuecñetsofach yorrterra. Po'ñoçh yeñoteñ atef yorrtena te' yechtsofpa' yeñoteñ ñaña yecamquëñoftpa'cho'ña yorrterrach esempohuañen.

⁴⁵ Ñeñto'marña ama't Yompor po'ñoño atef anuaret ahuatoteñ, ñeñtpa' atef oten: "Allempo Adánpa' yeçcach Yompor allempoñapa' ahuo't aþ po'rerrerña attoch corra e'ñe po'chtsof. Ñeñto'mar Adánpa' ñeñt ñanom acheñetats." Tarraña chenta'ñapa' acheñetos ñaña Cristo attoch ñach yapuerre' ello o'ch alla yocrra'huerra yecamquëñoft. ⁴⁶ Tarro'mar Yomporpa' atef na'y. Ñanompa' o'ch yocrra e'ñe yechtsof, esempohuañenñapa' o'ch alla yocrra'huerra ñaña yecamquëñoft. ⁴⁷ Tarro'mar ñeñt ñanom acheñ ñeñtara Adánpa' patsa ayeçcataret, ñeñto'marña ñapa'

atta patso'marneshat. Tarraña puepañ ñeñt' acheñetosets ñeñtara Yepartseshar Jesucristo ñeñtpa' entot huapa. ⁴⁸ Ñaña ñeñtey arromñañeshaypa' yapa'cho'ña attaya ñerra'mrrate' Adán ñeñt' ayeçhcataret' pats. Tarraña ñeñtey ame'ñenaya Cristo ñeñt' huaptsa entotpa' yapa'cho'ña yocrra'huerrach yecamquëñoñt' ento atet ñerra'mrrate' Cristo ñeñt' huaptsa entot. ⁴⁹ Atteña te'pa' atta yeyeçhquëna yechtsot' atet ñerra'mrrate' Adán ñeñt' ñanom ayeçhcataret' pats tarraña esempohuañenpa' yeyeçhquërrach ello atet ñerra'mrrate' Cristo ñeñt' huaptsa entot.

⁵⁰ Ñeñto'marña masheñeshacha' ñaña noçhaneshacha' notenes: E'ñe yechtsotpa' amach es yo'pato all amicha'tarettena Yompor. Tarro'mar allempo arromñañayapa' amate' errotenot' es yo'patoña ñeñt' ama ahuañaño. ⁵¹ Ñehua, o'ch neñotatas ñeñt'cha' atet perra esempo, ñeñt' ñapña eñoteñ te' Yompor. Po'ñoçhpa' amach e'ñe allohueney yerromhuo. Tarro'mar ñeñtey orameñ corretsa allempoch huerra Cristopa' amach yerromo. Allempopa' attach yepo'poñet ⁵² e'ñech machayoña e'ñe allempocma esempoch e'morrterra Yompor po'pactor e'ñe allohuanen. Ñehua, ñeñtpa' atetcha' perra allempo. Ñanompa' o'ch e'morrterra Yompor po'pactor. Allempoñapa' o'ch tanrra'tuena ñeñt' colla'huatsa ahuatoteñ. Allempochña tanterretpa' amach alla arromñañatterrete'te. Yaña ñeñtey orameñ corretsapa' yapa'cho'ña o'ch yepo'poñet e'ñe allempocma. ⁵³ Tarro'mar yechets ñeñt' aptsañapa' añ palltetsa o'ch puenasa ñeñt' ama aptsañ. Tarro'mar ñeñtey arromñañeypa' añ palltetsa o'ch yepnasa ñeñt' ama arromñañeyaye. ⁵⁴ Ñerra'm esempo yechets ñeñt' aptsañapa' ñerra'm o'ch puenasa ñeñt' ama aptsañ, ñaña ñerra'm esempoch ñeñtey arromñañeypa' o'ch yepnasa ñeñt' ama arromñañeyayepa' e'ñe allempopa' o'ch e'ñe etsotua ñoñets ñeñt' atet anaret' ahuatoteñ, ñeñtpa' atet oten: "Allempo o'ch huañerrña ñeñt' atto o'patenya rromueñets. ⁵⁵ Ñeñto'marña allempopa' amach yerromuerre'te, tarro'mar amach eñalletterre'teña ñeñt'cha' alla ya'tserrperrayerr ama't yerromñoña."

⁵⁶ Tarro'mar te'pa' yo'chñaroñ o'patenyaña rromueñets, tarraña allempopa' amach eñalle yo'chñar. Ñaña yatpare'teñoñt' ñoñets ñeñt' atet anaretpa' ñeñtña yo'patataye'tña rromueñets allempo nanac yeyore't yo'chñar. ⁵⁷ Ñeñto'marña te'pa' yeparasyoso'chepa'ch Yompor tarro'mar atto apuey Puechemer ñeñtara Yepartseshar

Jesucristo ñeñtcha' chocma ya'pocstatene' allohuen pa'namen ñeñt yocop.

⁵⁸ Ñeñto'mar e'ñe nemorrenteño'tpa' o'ch masheñneshacha' ñaña nochaneshacha' noterrerr: Te'pa' huomenquëpa'ch sepa' seyo'cher, amach seque'chpatstere. Ñaña chocmuepa'ch setorrena Yomporecop. Ñaña sapa' señoche'pa'ch ñeñt atto yetorrena Yomporecoppa' ama orrena yetorreno.

16

Añ quellepa' ñeñt apete't huocchañneshachno

¹ Te'pa' o'ch notas po'poñ. Añ allpon quelle ñeñt chocma senen huocchañneshachnocop ñeñt ame'ñetsa, ñeñtpa' attec'mach sepa. Tarro'mar ñeñt ame'ñetsa Galaciopa' o' neñotatuanet ñeñtcha' atet pet, ñeñto'marña sapa'cho'ña atetcha' sepa samã. ² Ñeñtpa' atetcha' sepa: Pa'tetets temencpa' añ pocte' chocmach sena'yes ellopa'tets errponcha' semna'yes o'ch sena'yes Yomporecop. Ñaña errponte'ña sechyen ñeñtcha' sena'yes Yomporecop, ñato' aton amapa' ñato' coñe't. Ñeñtpa' o'ch sañño'tue e'ñe ellocma attotach o'ch satontatyes. Allochñapa' ñerra'm esempoch nech'ap seshopa' amach pallteno e'ñe allempopa' o'ch taya sena'yes. ³ Ñaña ñerra'm esempoch nech'ap seshopa' o'ch nequellca' carta ñeñtcha' nemña Jerusaléño. Ñaña o'ch nemñe acheñ ñeñtcha' anmue' quelle, ama't erra'tsena acheñ ñeñtcha' pocte' senten sa. ⁴ Ñaña ñerra'm pocte' senteñ o'ch ahuen namapa' e'ñe pocte' o'ch yahuanena e'ñe parro.

Allempo sechena Pablo o'ch ahuo' po'poñ anetso'mar

⁵ Ñaña ñerra'm esempoch ahuen arro't attoch nech'ap seshopa' napa' noctape'cheñ arrcha' noñem Macedonio'mar. ⁶⁻⁷ Añ atarr nemnen ñerra'm Yomp'or muenatspa' allate' na'llponmat sesho, ñato' allate' nech'ara'pena. Tarro'mar napa' ama nemno o'ch atta nepomuetnom sesho, añña napa' nemneñ ñerra'm Yomp'or muenatspa' allate' natomat. Ñaña ñato' e'ñe allo'tpa' o'te' sanemyesen errach'cho' neshecha allempo. ⁸⁻⁹ Tarraña te'pa' amach erra neto. Allanach arr Efeso tarro'mar te'pa' eñall attoch o'ch neserrpare'tatyes shonte' Yomp'or po'ñoñ. Ñaña te'pa' neñoteñ ñato' o'ch ame'ñenna shonte' acheñ, tarraña chocma eñall ñaña shonte' ñeñtcha' nepatare'tene'. Tarraña o'ch chap Pentecostepopa' o'ch ahuerren arro't.

Atet otanet Timoteocop

10 Ñaña o'ch notas, ñerra'm esempoch chap masheñ Timoteopa' o'ch sagaḡ e'ñe cohuen, allochñapa' amach cha llecoso sesho. Tarro'mar ñapa'cho'ña nanac torrena Yomporecop atet ñerra'm na. 11 Ñaña ñerra'm esempoch chap seshopa' añ pocte' chocmach se'mñoch e'ñe cohuen. Ñaña e'ñech cohuen seyempue' allochñapa' ñerra'm esempo puerterra allotpa' e'ñech pocsheñesha' cherr nesho. Tarro'mar napa' chocma necueñ masheñ Timoteo epan po'poñechno masheñeshachno.

12 Ñaña masheñ Apolospa' nanac nemñare'teñ o'ch emo'tensa' epuet po'poñechno masheñesha'pa' tarraña te'pa' ñapa' ama mueno. Tarraña esempopa' chomach chap sesho ñerra'm esempoch pocta'huoña.

Allempo so'terranet po'cartot

13 E'ñe allohuanenpa' o'ch noterrser: Te'pa' e'ñech señota, tarro'mar chocma eñall ñeñtcha' ya'psaterre' Yompor. Ñaña e'ñe same'ñeñoḡpa' huomenquēpa'ch seḡa' seyocher. Ñaña amach semcha'tatsto, chochña seumencta Yomporecop. 14 Ñaña ora allpon ñeñt seḡa'yenpa' e'ñepa'ch semorrentanna'teñoñ es seḡa'yen.

15 Te'pa' o'ch masheñeshacha' ñaña nochaneshacha' notas po'poñ. Sapa' señoteñ ñaña atto masheñ Estéfanaspá' ña ñanom ame'ñerresa ahuat all Acayo. Ñaña ahuo't ame'ñerret epuet pamo'tsesha'. E'ñe allempoteñ ñetpa' ahuo't torra'yenet añecop attoch yenpuet allohuen ñeñt pueyochresha' o' perr te' Parets. 16 Ñeño'mar te'pa' o'ch notas: E'ñe pocte' o'ch se'mñoch Estéfanas, ñaña ama't allohuen po'poñechno acheñ ñeñt chocma torrapretetsa Yomporecop. 17 Napa' te'pa' atarr nocshena tarro'mar o' huapa arr nesho masheñ Estéfanas ñaña Fortunato ñaña Acaico. Tarro'mar sapa' ama't ama sehuapopa' ñetpa' o' huapuet. 18 Ñetpa' atarr coshatosnet neyo'chrocmañen. Ñato' sapa'cho'ña o'te' coshataset. Cohuenepa'ch señch acheñ ñeñt atet petsa.

19 Ñaña allohuen ñeñt ame'ña'yetsa arr Asio'marpa' mueneñet o'ch huomñcha'taset ñamet añ necartot. Masheñ Aquilapa'cho'ña mueneñ o'ch huomñcha'tas epuet puetapor Priscila. Ñaña allohuen masheñesha' ñaña nochaneshachno ñeñt pame'ñeñotet apchetset Aquilapahuo mueneñet o'ch huomñcha'taset ñamet. Tarro'mar e'ñe yeparrocmateñoñ epay Yepartsesharpa' o' huomñcha'taset añ necartot. 20 Ñaña allohuen masheñeshachno ñaña nochaneshachno ñeñt arro'tsa'yenpa' mueneñet o'ch huomñcha'taset ñamet. E'ñe

semorrentanna'teñoŕpa' atetcha' sehuomŕcha'tanna'tena ñeñŕ atet poctetsa Partsocop.*

²¹ Añ coñe'tpa' o'ch nequellca' naña e'ñe na notot, attoch o'ch nehuomŕcha'tas naña.

²² Ñerra'm esesha' ama morrentenaye Yepartseshar Jesucristo ñeñŕña atet petsa a'coñchatareŕtepa'ch. Te'pa' ñeñŕach notas, huerrnayepa'te' ñeñŕ Yepartseshar yepen.

²³ Yepartsesharepa'chña Jesucristo sa'natenaya allohuenes. ²⁴ E'ñe name'ñeñoŕ Cristo Jesús atarr nemorrentensa. Te'pa' ñeñŕach notas, ñeñŕpa' attetepa'chña Nompore. Allohua.

Pablo

* **16:20** Po'ñooh oteneŕ, "E'ñe semorrentanna'teñoŕ ŕhoch setso'ttsa'pa'tannena ñerra'm esempo sehuomŕcha'tanna'tena ñeñŕ atet poctetsa Partsocop." Ñeñŕpa' atet yeŕhete't ahuat.

AÑ PUEPAÑ SAN PABLO PO' CARTA ÑEÑŦ QUELLQUËRRANERR CORINTO MARNESHA' 2 CORINTIOS

Atto Pablopa' alla quellquërranerr carta añecop ñeñŦ ame'ñetsa anetso Corinto

¹ Masheñeshacha' ñaña nočhaneshacha' ñeñŦes allohuenes ame'ñenaya Yompor ñaña e'ñe same'ñeñot čocma sapčhena Yomporecop all anetso Corinto. Ñaña añ cartapa' añecpa'ñaña nequellquëñ allohuenacop ñeñŦ o' pueyochresha' perranet Parets ñeñŦ apčha'yetsa allemeñ anetso Acayo'mar. Na Pablon o'ch alla nequellquërrnaserr po'poñ carta epan masheñ Timoteo. Napa' ñeñŦen Jesucristo puellsensaren tarro'mar atet muenen Yompor. ² Te'pa' e'ñe nehuomčha'teñofes sa napa' o'ch notas: Yomporepa'chña sebensare'tam'pene' ñeñŦ nanac Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyočhro allohuenes.

Yomporpa' ñachña čocma yocshatene' allempo es yehuenoya

³ Aye'chočhtaterrapo'ch Yompor, ñeñŦara ñeñŦ Pompor pen Yepartseshar Jesucristo. ÑeñŦara Yompor ñeñŦ atarr amueraña, ñeñŦcha' čocma yocshaterre' allempo es yellcatene' yeyočhro. ⁴ Ñerra'm esempo huennaya pa'namen ñeñŦ amueročhtatañtetsa ñapa' ñachña čocma yocshaterre'. Tarro'mar o' coshaterrey Yompor, allochña yapa'čo'ña attoch yeñoteñ o'ch yocshater yaña masheñnesha' ñerra'm esempo huapanet ñamet ñeñŦcha' mueročhtatahuet. Añ poctetsa o'ch yocshaterranet ñet atto Yomporpa' o' coshaterrey yaña. ⁵ Atto nanac yemueročhtapreteña Cristo tarraña ñachña ello atarr yocshaterre'. ⁶ ÑeñŦo'marña te'pa' o'ch notas, ñerra'm esempo nemueročhtena na, ñeñŦpa' e'ñe po'ñočh socop, tarro'mar ñerra'm esempo nemueročhtena napa' ñeñŦpa' alloch socsherra samña attočha'ña sequeshperra. Ñaña ñerra'm esempo coshaterren Yompor ñeñŦpa'čo'ña alloch nocshaterres samña. Allochñapa' e'ñe socsheñeshocmañen čocmach sa'huanten allohuen mueročhteñets ñeñŦ atet nepena na. ⁷ ÑeñŦo'mar napa' neñotenes čocmach sa'huanta' ñeñŦ echarr senten. Tarro'mar napa' neñoteñ ñerra'm allpon semueročhtapretna, elloña allempopa' o'ch alla e'ñe socshapreterrna atto Yomporpa' ñachña čocma yocshaterre'.

⁸ Ñehua, te'pa' nemneñ o'ch masheñneshacha' señoten ñeñt atet nemueroçhtosa ahuaña all anetso Asia. Allempopa' napa' atarr nanac nellquëna. Napa' notapañ çhach nerroma, amach errot nepe o'ch na'queshpata nañeña. ⁹ Po'ñoçh napa' neñoteñ neyoçhro te'pa' o' çhapona ñeñt nocop allempoch nerroma. Tarraña añecpa huapona echarteñets atet, allochñapa' attoch e'ñe neñoteñ Yomporcha'ña neyemtena. Amachña nañeña yemtetso. Tarro'mar Yompor po'huamencoť ama't arromña'pa' çhocmach tantater. ¹⁰ Tarraña ama't muene' nerromañ Yomporpa' allorocma tantaterren po'huamencoť attoch ama nerromo. Ñeñto'marña napa' neñoteñ Yomporpa' çhocmach a'queshpaterrey. Ñeñto'marña te'pa' ñachña çhocma neyemtena. Neñoteñ allo'na sen na'queshpätnene' ñerra'm esempo es nohuerroyerr ñeñt atarr echarr. ¹¹ Ñaña añ poctetsa o'ch sema'yochan'penna attoch seyenpa'n. Ñaña shonte' acheñenesha' ñerra'm esempo eñotennet atto Yomporpa' çhocma a'natenna e'ñe puema'yocheñoťet ñet, allempopa' çhocmach parasyoso'teñet Yompor atto a'natenna.

Atto Pablopa' ama eñotenano pueshquëñ

¹² Ñehua, te'pa' o'ch notas po'poñ ñeñt atet noctape'chen. Napa' ñeñtña atarr nocshatene' nanac. Napa' neñotena neyoçhro po'ñoçh arr patsropa' çhocma noctape'chen ñeñt atet pocte' enten Parets. E'ñe name'ñeñoť Yompor, napa' ama nemno o'ch esesha' neshca'y es ama't mamesha. Elloña sapa' ama nemno o'ch neshcas ama't e'ñe mamesha. Ama añ neyemteno ñeñt atet yoctape'chen ya acheñey arr patsro, añcha'ña neyemteñoť Yompor attoch ñach neyenpuene'. E'ñe puemuereñoť ñachña neñotatene' ñeñt cohuen enten ña. ¹³ Ñehua, sapa' çhate' sotapañ napa' attate' neshquënes ñeñt notenes necartoť. Tarraña ñeñt allpon notenes necartoťpa', o'ch selleye' allochñapa' esheccha' señoçh ñeñt'pa' e'ñe po'ñoçh atet, añ ñoñetspa' ama shequëñtsoyaye. Napa' necuenes esempohuañen o'ch e'ñe seyemtenna e'ñe poctacma, o'ch e'ñe señoçh ñeñt atet notenes necartoť ñeñt'pa' e'ñe po'ñoçh atet. Napa' ama çhoye' neshquënsa. ¹⁴ Ama't te'pa' ama e'ñe poctacmaye' seyemtenno, tarraña ñerra'm seyemtenna e'ñe poctacma, allempoñapa' ñerra'm esempoch huerra Yepart-seshar Jesús'pa' atto socshenna na, napa'çho'ña allempopa' nocsherrsach saña.

Atto Pablopa' sechenañ o'ch emo'tenana' corinto'marnesha'

15-16 Napa' notenapañ chocmate' seyemtenna, tarro'mar napa' ama choye' neshquënso. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempoña noctape'cheñ o'ch nerr Macedonioṭpa' o'ch alla nemo'tnerrser. Attoch puepocheño o'ch nocshaterres, ñaña attoch seyempa'n saña o'ch alla ahuerren Judeo. 17 Tarraña ama't atet noctape'cheneñ o'ch nemo'terraña' tarraña ama neseno o'ch nabcherrsa'; ñeñto'marña sapa' chate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeñt attach es puechena arr patsro. Ama'tcha' otenan acheñenesha' ñeñtcha' atet pa, tarraña pueyoçhroñapa' cotape'chenayach po'poñ. 18 Tarraña napa' ama atteye' noctape'cheno. Ñerra'm es notenes ñeñtcha' atet neṭapa' neyoçhroñapa' ama esoye' noctape'cheno po'poñ. Tarro'mar Yompör ñerra'm es oteney ñeñtcha' atet ṭonaypa' atetcha'cho' pennay tarro'mar ñapa' ama puenesho po'ñoñ. 19 Ñaña Yompör Puechemer ñeñtara Cristo Jesús ñerra'm es oteney ñeñtcha' atet ṭonaypa' atetcha'cho' pennay, chocmach orrtateñ e'ñe po'ñoçh, tarro'mar ñapa'cho'ña ama puenesho po'ñoñ. Ñeñtara Jesucristo ñeñt chocma yeserrpare'tatenes epan masheñ Silvano ñaña masheñ Timoteo. 20 Tarro'mar allohuen ñeñt allpon atet oteney Yompör ñeñtcha' atet perrnay, Puechemerña ñeñt Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompore yocop" yeñoteñ Cristopa' ñaña e'ñe etsotatuene' Pompör po'ñoñ yocop. Allochñapa' attoch e'ñe cohuen ya'ye'choçhtateññañ Yompör. 21 Ñeñtara Yompör ñeñt ahuañecat pene' allohueney yeyoçher e'ñe yame'ñeñot Puechemer Cristo. Ñeñtara Yompör ñeñt yellsensene' attoch yetorra'yesa ñocop. 22 Ñaña ñapa' ahuo't apuerrey attoch yeñoter o' puechemer perrey ña. Ñeñtṭpa' ñato' o'ch netma'ntacha atet ñerra'mrrate' aynatuaretey Yomporecop. Ñaña ahuo't apuerrey Puecamquëñ ñeñtcha' yeçherrtsa yeyoçhro ñeñtṭpa' ñeñtcha'ña yeñotatene' orameñ shonte' ñeñt o'patatenya Yompör.

23 Te'pa' o'ch neñotaterrser ñeñt atet noctape'chen ñeñto'marña ama nemo'terrso ahuaña. Yompörpa' eñotenen ñeñtcha' atet notas ñeñtṭpa' e'ñe po'ñoçh atet. E'ñe nemorrenteñoñes sapa' ama neçherro all seyçhena Corinto. Tarro'mar ama neto, ñerra'm netañ o'ch neçhap seshopa' chate' muene' neche'ptare'tyesoses e'ñe sa satpare'teñoñen. Ñerra'm atetpa' chate' alla nellcaterres.

Ñeñto'mar te'pa' o'ch notas e'ñe nemorrenteñotes sapa' attoña ama neçherro sesho. Ñerra'm po'ñochte' ama atteye' notensopa' Yomporepa'chña na'chencaterre'. ²⁴ Ama añeçpaye' notenso attoch sapa' o'ch sa'm'cha'tareter seperren na, ñeñtes ame'ñenaya Yompor. Añcha'ña netorrapretasa attoch neyenpas. Ama't atto o' huomenc same'ñeñañ Yompor, napa' çhocmach netorrena socop allochñapa' attoch señmañeshocmañen socter Yompor e'ñe poctacma.

2

¹ Ñehua, ama'tcha' nemneñeñ o'ch alla neçherrerr sesho tarraña napa' ahuo't alla noctape'cherr ello neyoçhro, noten amach neto tarro'mar ama nemno o'ch neçhap nellquëñesha' sesho te't sapa' o'te' alla nellcaterrser saña. ² Tarro'mar noten ñerra'm ne'ñotare'teñotes na o'ch alla nellcaterrespa' attoch nellcaterres sa, sellquëñapa' amach nocshapretaso, tarro'mar sapa' sañeña e'ñe nocshatene'. ³ Ñeñto'marña ama neçherro sesho ahuaña, aña nequellconas carta ñeñtcha' soctape'chaterre' e'ñe cohuen. Allochñapa' ñerra'm machayota neçherr sesho ñerra'm o'ch alla soctape'cherr cohuen, ñeñtcha'ña atarr nocshapretuerra. Allochñapa' amach tama nellquënsa tarro'mar añ poctetsa socop çhocmachña e'ñe socshaterren. Ñaña neñotenes ñerra'm esempo nocshena na sapa'çho'ña allohuenespa' o'ch e'ñe socsherra. ⁴ Ñaña allempo nequellconas añ carta ahuañapa' e'ñe nellquëñesha' nequellquënnas. Ama neñmateno neyoçhro ama't mamesha, e'ñe ñeñta nenen neyoçhro. Elloñapa' e'ñe neya'chpeñesha' nequellquënnas ñeñt carta. Napa' ama añeçpaye' nequellquënnaso carta attoch nellcatas sa; añeçpaña nequellquënnas attoch sapa' o'ch señoçh atarr nanac nemorentensa.

Arrpa' all cotape'chatanet attoch peretnet atparñaĩ

⁵ Ñaña añ acheñer ñeñt atpare'tetsa seshopa' ama naptayaya llecatenno na, añañña ama't sapa'çho'ña allohuenespa' çhocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atfa atarr natontaten ñoñets ñeñt ama atteyaye po'ñoçh. ⁶ Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte' entenayeñ o'ch secoñchatererr ñeñt atparñaĩ, tarraña te'pa' ñeñtach. ⁷ Te'pa' añañña poctetsa o'ch alla sepretner, allochñapa' attoch socshater, te't atfa nanac llequëna, puellquëño'pa' o'te' alla queçhuerran Yompor. ⁸ Ñeñto'mar te'pa' notenes añ poctetsa o'ch sorrtaoñ cohuen ñocop attoch eñoter

po'ñoçhpa' atarr semorrenteña. ⁹ Ñeñtecpaña noctape' chatas ahuaña necartot ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ñoçhte' e'ñe same'ñena ñeñt poctetsa Yomporecop, ama't erroteno'tsensa. ¹⁰ Ñaña o'ch noterrser, ñerra'm esesha' sepretnerr sa, napa'çho'ña e'ñech pocte' nenteñ namã apretnaretterrepa'ch. Ñeñt çhocma natpare'tene' ahuaña te'ña ñapa' o' nepretnerr, ñeñtpa' e'ñe socop. Ama't Cristopa' e'ñe entenen. ¹¹ Ñaña añ e'ñe poctetsa o'ch yepretnannena. Allochñapa' ama't oneñe'pa' amach alla a'psaterrye Yompor. Tarro'mar ñapa' yeñoteñ çhocma e'nenan attoch shequëney.

Atto Pablopa' atarr llequënana corinto'marnesha' allempo ama huerra' Tito Corintot

¹² Te'pa' o'ch neñotaterrser ñeñt atet nepa ahuaña. Ahuaña allempo neçherr Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepartseshar po'ñoñ, ¹³ tarraña napa' ama't mamesha ama neñmateno neyoçhro tarro'mar allpa' ama nentose masheñ Tito. Ñeñto'mar ama na'po all, atta neso'tnerranet, o'ch neçherr all anetso Macedonia.

Yomporpa' çhocma moñenya allempo es yehuenoya

¹⁴ Yeparasyoso'chepa'ch Yompor tarro'mar ñapa' çhocma moñenya allempo es yehuenoya. Ñaña e'ñe yeyemteño't Puechemer Cristo Jesúsapa' çhapterreycha' cosheñtso. Ama't yapa' o' muenaterrey attoch ya'poterrñañ po'ñoñ erraparen, allochñapa' attoch epa'huerra po'cohuenña erracmañen. Ñato' o'ch netma'ntacha atet ñerra'mrrate' ñeñt atarr es eñmosa'ttetsa, çhach epa'hua e'ñe cohuen erracmañen pue'ñmosa'tteña. ¹⁵ Tarro'mar ñeñtey a'potene' Cristo, Pomporñapa' e'ñe atet enteney ñerra'mrrate' ñeñt eñmosa'ttetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeñotetpa' a'queshpataretterretcha', patanta'tetsña ñeñtcha' ama ame'ñerrtsopa' ñetpa' chenca'huerretcha'. ¹⁶ Acheñenesha' ñeñtcha' chenquërtsapa' e'ñech atet enteññañet Yompor po'ñoñ ñeñt yeserrpare'ten ñerra'mrrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompor po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrrate' ñeñt atarr eñmosa't ñeñtcha'ña ya'crraterre' errponohuañen. Esesha'huachñaca' pocte' enterrña Yompor ñeñtcha' serrpare'terre' po'ñoñ. ¹⁷ Añ pocte' enten Yompor ñeñtcha' serrpare'tene' po'ñoñ ñeñt e'ñe pueñmañeshocmañen

serrpare'tene'. Atef ñerra'm ya, tarro'mar yapa' ama çhoye' yetseteno Yompor po'ñoñ acheñ poctapño ñeñt atef pena shonte' po'potantañ acheñenesha'. Ñetpa' atef penet attoch pocshateñoñ acheñenesha'pa' o'ch es apa'yenanet. Añcha'ña e'ñe yeñmañeshocmañen yeserrpare'teññañ po'ñoñ atef llesenseny Yompor. Ñapa' enteney ñeñt atef ye'ñorena ñocop e'ñe yeyemteñoñ Puechemer Cristo.

3

Atto Pablopa' ama pallteno o'ch quellcoñet carta attoch cohuen enteñ acheñenesha'

¹ Sapa' çhate' sotenapañ napa' o' alla neñerrerr e'ñe cohuen, ñato' nocpate', ñato' çhate' nommo'chena. Tarraña ñeñtpa' ama atteyaye. Amapa' ñato' sapa' çhate' sotenapañ aña' nepalltena carta ñeñtcha' señoatate' atto po'poñ anetso'marnesha'pa' e'ñech cohuen entapretennet atto napa' cohuen netorrena Yomporecop. Tarraña napa' ama es nepallteno. Ñehua, ñaña çhate' sotenapañ aña' nepalltena carta ñeñtcha' sequellcon sa alloch señoatich po'potantañ acheñ atto e'ñe cohuen sentenen na, atef pena po'psheñneçhno ñeñt serrpare'tets attoch cohuen enteñ acheñenesha' e'ñe ñañeña. ² Tarraña napa' ama nepallteno ñeñt po'poñ carta ñeñtcha' eñoatate' po'potantañ acheñenesha' ñeñt atto netorrena na Yomporecoppa' ñeñtña atarr sherbets. Tarro'mar sapa' saña e'ñe sherbets atef ñerra'mrrate' necarta nepenes. Tarro'mar allempo acheñenesha' eñoatenset sa atto te'pa' o' soctape'cherr cohuen Yomporecop, ñeñtcha'ña eñotatenahuet ñeñt atto netorrena na, ñeñtpa' ñeñtña e'ñe sherbets Yomporecop. Ñato' o'ch netma'ntacha atef: Na necarta ñeñtña eñotatenahuet ñeñtpa' all aquellcaret e'ñe neyoçhro ñeñtcha' lleyen allohuen acheñenesha' ñeñtcha'ña eñotatenahuet. ³ Ñaña sa atto te'pa' sorrntaten ñeñt e'ñe cohuentetsa, acheñenesha'ñapa' o'ch eñotapretaset ñeñtpa' po'ñoçh Cristo po'taruas pene'. Ñato' o'ch netma'ntacha atef: Sapa' atef sesherben ñerra'mrrate' yecarta ñeñtcha' eñotatenahuet, ñeñt cartapa' o' quellca'huonay Cristo e'ñe ña. Añ cartapa' ahuo't aquellca'huaretta ahuañmo'choteñ allempo yapa' yeçhapatonas Yompor po'ñoñ ñeñt same'ñatate' Yompor. Tarraña añ cartapa' ama añaoye' aquellcaretto tinto, añaña Yompor Puecamquëñoñ anaretta, ñeñtara Yompor ñeñt ama arromñaateshayaye. Tarraña añ cartapa' ama arreye' aquellcarete mapyettallo. Aña' arrña aquellcaret e'ñe ya yeyoçhro ama't ñeñtey arromñaatey.

Atto Yomporpa' a'pocdaterrnay e'ñe etserra

4-5 Napa' neñoteñ ama nepallteno po'poñ carta ñeñtcha' eñotatenahuet. Saña ñeñtes e'ñe necarta nepenes. Ama notenso e'ñe nañeña nohuamencoť es nepa'yen. Añña e'ñe neyemteñoť Cristo napa' neťorrena Pomporecop. Ora allohuen es nepa'yen Yomporña ahuamencat nepene'. 6 Ñeñtara Yompor ñeñť ahuamencat yepene' allochñapa' attoch yeserppare'terrñañ poctapña ñeñť atet a'poctaterrnay e'ñe etserra. Añpa' ama atteyaye atet pa' ahuat Yompor allempo apan Moisés po'ñoñ ñeñť anarettatse't ñeñtcha' e'ñe yetso-tuañ esheccha' a'queshpateney Yompor. Ñeñť ama etso-taye'te, ñocpuetpa' o' anarettet rromuetcha', chenguërretcha'. Tarraña ñeñť atto a'pocatuerrnay Yompor etserra, ñeñťpa' atto apueney Puecamquëñ alloch yocrra'huerra, tayoteñ erponohuañen.

7 Añ ñoñets ñeñť aquellcarettatsa mapyettallo, ñeñť ama etsotenaye, ñocpuetpa' o' anarettet rromuetcha', chenguërretcha'. Ñaña ahuat allempo Yomporpa' apan Moisés po'ñoñ atet, e'ñe po'cohuentañoť apan Moisés. Moiséspa' atet orrta pa'clloyoť cha poptena, atarr a'rrechatañ. Ama't israelnesha'pa' ama eshcaye' cohuacclle'cheto. Tarraña ama't atet pañpa' acopoteñ maya'huanerr ñeñť atto poptena. 8-9 Ama't añ cotapñatser ñeñtcha' ya'chencaterrayeñpa' tarraña Yomporpa' atarr cohuenoť orrtach allempo. Te'ña e'ñe ellonetpa' o' alla orrtaterrnayerr ña poctapña attoch e'ñe pocte' entuerrey. Ñeñťpa' e'ñe Parets Puecamquëñoť orrtatuerrnay ñeñto'marña ñapa' ello cohuentena nanac. 10 Ñeñť atet popta ahuat Moisés pa'clloyoť allempo a'p Yompor po'ñoñ, te'ña ñeñťpa' o'huañ e'ñeye' cohuenaye' yeñch tarro'mar te'pa' eñall Cristo po'ñoñ ñeñť atarr cohuen yenten, ello metanenan atto cohuenta't Moisés po'ñoñ. 11 Tarro'mar ñeñť atet cohuenta't Moisés ñeñťpa' acopoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñťpa' amach ahuañañat'erro, ñeñto'marña ñeñťpa' ello metanenan Moisés po'cohuenña.

Atto Cristo po'cohuenña ñeñťpa' amach ahuañañat'erro

12 Yapa' o' yeñoterrñañ Cristo po'cohuenña ñeñťpa' amach ahuañañat'erro. Ñeñto'marña yapa' ama yepenquëñoťeye' yeserppare'teññañe po'ñoñ. 13 Yapa' ama atteye' yepeno atet pa' ahuat Moisés. Ñapa' cha huañerr atto popta pa'clloyoťpa' ahuo't ca'macclle'cha allochña israelnesha'pa' amach eñcheto pa'clloyoť o' huañerr atto poptena. 14 Israelnesha'pa' ama chapaneto pueyočhreto attoch cotape'cherret cohuen Yomporcop. Ama't teme'ttsen ñerra'm esempo lleyeññañet

ñeñt a'pocstat Yompor ahuat attaretach amach çhapaneto pueyoçhro ñeñt atet muenen Yompor. Po'ñoçhpa' añoñcha'ña çhaponaya yeyoçhro ñeñt atet muenen Yompor e'ñe yeyemteñoñ Puechemer ñeñt Cristo. Israelnesha' ama cohuenaye' enteñeto Cristo ñeñto'mar noten ñetpa' teme'ttsen atet penet ñerra'mrrate' çho ca'macлле'chenet. ¹⁵ Po'ñoçh ama't teme'ttsen ñerra'm esempo e'mñotenet all lleyeññañet Moisés po'ñoñ amach es eñoteneto. Chach ottenet ñerra'mrrate' çha es a'npuenahuet attoch amach eñotoñeto Yompor pocçapña. ¹⁶ Tarraña ama't puesheñarroñeya ñeñtey erra'tseney acheñrey, allempoteñ yaguèr Yepartseshar Cristo, allempoteñcha'ña çhaponaya yeyoçhro ñeñt atet muenen Yompor; Cristopa' ñachña yehuapore'tamñse'ña ñeñt ya'npuenayeñ. ¹⁷ Ñeñt yoten Parets Puecamquèñ, ñeñtara Yepartseshar Cristo Puecamquèñ. Ñaña atarr cosheñso'tseney ñerra'm esempoçh çhaponaya Cristo Puecamquèñ yeyoçhro. O'huañcha' yemueroçhtame'ta attoch puechemer perrey Yompor, e'ñech yocsheñesha' yocter Yompor. ¹⁸ Allohueney ñeñtey ame'ñenaya Yepartseshar Cristo, ña Puecamquèñpa' ñachña ya'po'poñeterre', allochñapa' allo'nach yesen cohuentapretaya Cristo. Yapa' ama atteyaye ñerra'mrrate' ñeñt a'natacлле'charet attoch amach enteññañeto Cristo po'cohuenña. Yapa' e'ñe yecueñoñ Cristo po'cohuenña, yapa'çho'ña o'ch yecohuentapreteña yaña, atet ñerra'mrrate' rerep optetsa ñerra'm çho yecuach atsrretonet.

4

Atto Pablopa' atarr cohuen yeçhatenanet Yompor po'ñoñ

¹ Yomporpa' e'ñe puemuereñoñ muenatenen o'ch netorreññaña ñeñt nanac sherbets ñocop. Ñeñto'marña napa' ama nellquèñoñteye' neserrpare'teññañe po'ñoñ. ² Ñeñt a'nahua es pa'yenet ñeñt apencoçhen yenten yocop ya ñeñtey torretsa Yomporecoppa' ñeñtña napa' o' na'ypo'ñañper. Ñaña napa' ama es neshquèñoñ nepa'yeno masheñeshacop. Ñaña napa' allempo neserrpare'tateñ acheñenesha' ama çhoye' na'po'poñeteññañe Yompor po'ñoñ. Añcha'ña e'ñe na'poteññañ Yompor po'ñoñ e'ñe po'ñoçh ñeñt atet oten po'ñoñ. Yomporpa' entenen ñeñt atet notenes ñeñtpa' e'ñe po'ñoçh atet. Ñaña ama't erra'tsena acheñer ñeñt eñotene' ñeñt e'ñe pocte' entenet ñet pueyoçhretopa' ñetpa'çho'ña e'ñech cohuen entapretennet. ³ Atto yeserrpare'teññañ Yompor po'ñoñ ñeñt po'ñoçh alloch yequeshperra tarraña patantarr acheñenesha'pa' amach çhapaneto pueyoçhreto ñeñt alloch yequeshperra. Ñeñt atet petsapa' allo'na

senet allcha' chenca'huerret. ⁴ Ñeñtara acheñenesha' ñeñt ama ame'ñetso, ñetpa' añña po'yomporer penet arr patsro ñeñt oneñet, ñeñtña ama muenatenaneto o'ch çhapanet pueyoçhreto Yompor po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuentena ñerra'mrrate' Pompor Parets ñeñt ama entpahuoyaye. Ñeñt po'cohuenñapa' ñeñtara yoten cohuen ñoñets alloch yequeshperra. Ñato' o'ch netma'ntacha atto oneñetpa' a'nataclle'chenanet attochña amach eshcaye' cohuen enteññañeto Cristo po'puetarenña. ⁵ Tarro'mar ñeñtey e'ñe yeñmañeshocmañen seserrpare'tatene'pa' ñeñtapa' ama añecpaye' atet yepeno attoch senteney ya ñerra'mrrate' samo'mte' sepeney. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr yetorrena socop e'ñe yemorrenteñoñ Jesús. ⁶ Ñehua, yapa' yeñoteñ atet ot ahuat Yompor, ñeñtapa' atet ot: "Eñalletepa'ch pueta're' allochñapa' o'huañcha' checmet." Ñeñtara Yompor te'ñapa' o' a'puetarsam'perrnay yaña yeyoçher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayaye e'ñe yeyemteñoñ Yomporpa' ñapa' çhocmach ahuamencat peney

⁷ Ñeñtapa' atto Yomporpa' ahuo't chorrerrya yeyoçhro po'cohuenña, ama't yapa' arromñañaya, ama esoshe'mayaye. Añecopña o' chorrerrya ya ama't ñeñtey ama esoshe'mayaye, allochñapa' attoch eñochet ñeñt atto atarr ahuamencat yentenapa' ñeñtapa' ama yoyaye yehuomenc, ñeñtapa' Yomporeshot huena. Ñato' o'ch netma'ntacha atet ñerra'm ahuat po'poñ acheñ ñerra'm esempo atarr es morrentenetpa' o'ch esha'teñet patsrrogo ama't ñeñt coyem'pa' ama e'ñe cohuenayaye. ⁸ Ñehua, ama't allemateñcha' huaponaya ñeñtcha' atarr ya'llpatate', tarraña çhocmach eñall attoch yesuanem. Ñaña ama'tcha' atarr yellquënañ nanacpa' tarraña çhocmach eñall attoch yesuanem allohuen ñeñt allcatañtetsa. ⁹ Ñehua, ama'tcha' cotare'teney ñeñt ye'moñe'tene' tarraña Yomporpa' amach a'ypo'ñenye ama't mamesha. Ama'tcha' o'shshe'mayet patsopa' çhocmach alla yetanterra. ¹⁰ Chocmach muene' yerromañ atet pete't Jesús. Tarraña atto Jesúsapa' o' alla tanterra yapa'çho'ña attoña o' a'queshpaterrey allempo es yehuenoya. Attochña yeñotach acheñenesha' atto Jesús te'pa' o' betterra. ¹¹ Atto allponmat yocrrena añe patsro yapa' çhocmach pomatatenyet yerromuepa'to'. E'ñe

yemorreneteño Jesús atet penyet. Tarraña atto Jesús pa' o' alla tanterra, yapa'cho'ña attoña a'queshpaterrey allempo es yehuenoya ama't yapa' arromñaateneshaya. Attochña yeñotach acheñenesha' atto Jesús te'pa' o' betterra. ¹² E'ñe netorreño Cristocop chocmach nanac nemuerochetuanena autsancharromuets. Tarraña ñeñtpa' atarr cohuen socop tarro'mar ñeñtpa' alloch e'ñe sequeshpa'huerra sanña.

¹³ Añmapa' ñeñt atet oten Yompor po'ñoñ ñeñt atet anuaret ahuatoteñ ñeñtpa' atet oten ñeñt quellquë' libro Salmos, "Napa' atarr neyemteña Yompor ñeñto'mar atet ne'ñorena ñocop." Yapa'cho'ña e'ñe attecma yoctape'chen yanña. E'ñe attecma yeyemteña Yompor, ñeñto'mar yapa'cho'ña attecma ye'ñorena yanña. ¹⁴ Yapa' yeñoteñ Yomporpa' ahuo't tantaterran Puechemer ñeñfara Yepartseshar Jesús. Ñeñto'mar yeñoteñ yapa'cho'ña tantatuerreycha' Yompor e'ñe atet pan Puechemer Jesús, allochñapa' ama't sapa' o'ch chapatuerres allohuenes e'ñe parro ñesho. ¹⁵ Ñeñto'marña napa' Yomporña nemnate' o'ch nemuerochtame'ta; ñeñtpa' e'ñe socop, allochñapa' attotcha' Yompor puemuereña chapcha' shonte' acheñeneshesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'chochtateññañ Yompor.

¹⁶ Ñeñto'marña napa' ama nellquëñofoye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquëñña' allo'na sen huomencatnomuets e'ñe pate'tets yet. ¹⁷ Tarro'mar ñeñt atto allpon yemuerochtame'tyena añe patsro, ñeñtpa' ama esoyaye, e'ñe mamecpa. Ñeñtpa' añe CPA huennaya allochñapa' attoch huapatuerrnay ñeñt atarr nanac cosheñets ñeñt ama ahuañaño ama't errponaña, ñeñt ello nanac atarr cochnesha'tetsa, ñeñt atarr nanac cohuen. ¹⁸ Tarro'mar yapa' ama añeye' yeyemteno ñeñt allpon cochnesha'yentyen arr patsro, tarro'mar añechno ñeñt allpon yentyenpa' huañerrcha'. Yapa' añña yeyemtena añechno ñeñt cohuentetsa Yomporecop ñeñtpa' ama entpahuoyaye ñaña ñeñtpa' amach huañerro ama't errponaña.

5

Atto Yomporpa' o' añño'terrnay ñeñtcha' yepaquëll yeperr allpue'ntaño

¹ Yapa' yeñoteñ ñeñtey arromñaatey, yechetspa' chocmach huañerr. E'ñe mamecpa sherbeney añe patsro, atet ñerra'mrrate' yequërpachet ñeñt pocollashe'm all yemanatena. Ñeñt pocollashe'mpa' mamecpach sherba'y.

Yechetspa'cho'ña mamecpa sherbeney atto yocrrena añe patsro ñeñt' yepacllashe'm yepen. Tarraña yapa' o' yeñoter ñerra'm esempoch yerroma, Yomporpa' o' añño'terrnay ñeñt'cha' yepaquëll yeperr all pue'ntaño allcha' yeycha'huerra, ñeñt'pa' amach ahuañaña'terro. Ñeñt'cha' yepaquëll yeperr allpa' ama arromña'ateshaye' yechcatenaye, Yomporña yechcatene'. ² Po'ño'ch arr patsro yechets ñeñt' yepaquëll yepenpa' chocmach es e'mnatatuene'. Ñeñto'marña yapa' atarr yemneñ o'ch yechorrerra ñeñt'cha' yepaquëll yeperr Yompor pue'ntaño. ³ Tarro'mar yemneñ yecamquëñpa' o'ch chorrerrana ñeñt'cha' pa'shtam perr Yompor pue'ntaño, allochñapa' yecamquëñpa' amach atta huocchapoterro chocmach eñall ñeñt'cha' chorrena. ⁴ Tarraña atet ñerra'm te' orameñ yechets ñeñt' yepaquëll yepen atto yocrrena arr patsro, chocmach eñall ñeñt'cha' e'mnatatuene'. Ñeñto'marña yapa' atarr yemneñ ama't ama yerromuena', yechetspa' o'ch a'po'poñeterrnay Yompor tayoteñ ama't esempo huerra, ñeñt'cha'ña pa'shtam perr yecamquëñ. Allochñapa' attoch yocrrerra etserra correñets ñeñt' amach ahuañaña'terro, ñeñt'cha'ña a'huañaterre'ña ñeñt' atto ya'rromña'ate't. Ñato' o'ch netma'ntacha atet ñerra'mrrate' o'ch yechorra shetamuets ñeñt' e'ñe etserra emarr ñeñt'cha' yena' enot' o'ch yepmata. Allochñapa' ñeñt'cha' yena' enot', ñeñt'cha'ña a'natie'ña mellashañ ñeñt' yechorre't ahuaño'teñ. Allochñapa' attoch eñall ñeñt'cha' yechorratenaya. ⁵ Ñeñt' yemnatene' e'ñe atet ñeñt'pa' Yompor ña atet yepatene', tarro'mar ñapa' chorrenya Puecamquëñ ñeñt'ña yeñotatene' orameñ eñall cohuenñats ñeñt' o'patatenya ñeñt'cha' aphuerrey Yompor.

⁶ Ñeñto'marña e'ñe yeyemteño't Yompor chocmach yecueñ ñeñt'cha' atet perrnay esempo. Yeñoteñ yechets yepaquëll yepenmeñ arr patsro alla'paro'tsenmeñey attoch yeycha'huerra Yepartsesharesho. ⁷ E'ñe yeyemteño't Yomporpa' allo'nach yesen eñotnomue' ñeñt'cha' atet perrnay ña, ama añeye' es yeñotatenaye ñeñt' yentyen arr patsro. ⁸ E'ñe yeyemteño't Yompor chocmach yecuen ñeñt'cha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñt' yepaquëll yepen arr attoch yechap allcha' yocrra'huerra Yepartsesharesho. ⁹ Yapa' ñeñt'ach paterr yema'yo'chrena chocmuepa'chña yocshateñ Yepartseshar, ama't allempo orameñ yocrrena e'ñe yechtso arr patsro, ñaña ama't allempoch yerroma o'ch yesa'nom yechets e'ñepa'ch Yepartsesharesho'tseney attoch yocshateñ e'ñe all pue'ntaño.

10 Tarro'mar o' anaretta allohuenacpay yehuapuepa'to' Cristesho allcha' eñotatare'tey e'ñe puesheña'ttsoy. Allochñapa' allcha'ña atet p̄a'yese'y erro'tencha' entapretuerrey, ñato' e'ñech cohuen entapretuerrey atto e'ñe cohuen es yepa'yen e'ñe yechtsof allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

11 Ñeñtpa' ama't atarr yoro'chen yenteñeñña Yompor, tarraña nocoppa' ama yoro'chenayaye tarro'mar Yomporpa' entenen e'ñe cohuen ñeñt atet nepena. Te'pa' aña palltetsa o'ch noctape'chater allohuen acheñenesha' attoch ñetpa'cho'ña e'ñech cohuen entapretennet. Ama't sapa'cho'ña te'pa' necuenes, nemneñ o'ch seño'ter saña e'ñe seyo'chro atto e'ñe neñmañesha' cohuen es nepa'yen. 12 Ñeñt atet notenes te'pa' ñeñtpa' ama añecpayaye o'ch alla neñerrerr cohuen ñeñt e'ñe nocpa. Añecopña o' alla neñerrerr atet allochñapa' o'ch alla socshapreterrna, allochñapa' attoch seño'ch ote' ñeñt e'ñe ñañeña cohuen entetsa e'ñe pocta'pño'mara. Ama a'ñeye' eñoteno pueyo'chro ñeñt cohuentetsa Yomporecop. 13 Ñehua, sapa' chate' sotenena napa' cho' muene' nemospuena. Ñerra'm po'ño'ch cha nemospuenapa' ñeñtpa' e'ñe pocte' Yomporecop. Ñaña ñerra'm ama choye' nemospueno atto e'ñe cohuenare' es noctape'chen ñeñtpa'cho'ña e'ñe pocte' allo nesherbene'sa. 14-15 Ñaña atto Cristopa' atarr morrentenya ñeñtña ama yemnatenaye o'ch allo'na yesen corratsa e'ñe yocpa. Ñaña atto te'pa' yeñoteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ñe yocpa. Ñeñtpa' ñeñtara yoten o' yerromaprecha Cristo, allohueney ñeñtey ame'ñenaya. Añcha'ña atet yocrrena e'ñe ñocop, ñeñt rromats yocop, elloñapa' alla tanterra yocop. 16 Ñeñto'marña napa' ama't puesheñarrapa' o'huañcha' cohuen nenteñ ñeñt e'ñe cohuen enten po'potantañ acheñenesha' arr patsro e'ñe ñet pocta'pño'maret, ñeñtpa' arromña'ta pocta'pña. Tarraña ama't na ahuatpa' cohuen nentapretanete't pocta'pña. Ñeñto'marña napa'cho'ña tsena'tatnete't Cristo allempo, tarraña te'pa' o'huañ atet neñch Cristo. 17 Ñeñto'marña ñeñtey o' yeyemtera Cristo, Yomporpa' o' etserrataterrnay yocpa'pña e'ñe poctacma. Ñeñt atet yocape'che't ahuat, ñeñtpa' o' huañerr, te'ñapa' o' e'ñe yocape'cherr ñeñt e'ñe cohuenare' etserra.

18 Ñeñtña o' atet perrnay Yompor ñeñt muenatan Puechemer Cristo, ñachña yamo'tstaterre' Pomposesho. Ñeñtara Yompor ama't napa' ahuo't llesensa'n attoch

neñotach acheñenesha' allochñapa' ñetpa'cho'ña o'ch amo'tsterranet ñamet Yompor. ¹⁹ Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomposesho. Allochñapa' o'huañcha' allo'na ochñañenesha' enteney Yompor. Attoña yapa' apuerrey llesens ellonet attoch yach eñotatyese' pa'namen acheñenesha' allochñapa' ñetpa'cho'ña attoch e'ñe amo'tsterranet Yompor. ²⁰ Ñeñto'marña yapa' allsensaretey ñeñtcha' yetaruas yeperr ñeñteycha' eñosets cohuen Cristocop attoch yame'ñacha allohuen acheñenesha'. Ñeñtpa' atto Yomporpa' o' hua'ñerres o'ch same'ñera, tarraña ñeñtpa' e'ñe ya yeserrpare'tateñotes o' hua'ñerres Yompor. Ñeñto'mar te'pa' o'ch notas Cristocop, ñach same'ñerra allochñapa' attoch e'ñe amo'tsterrsa Yompor e'ñe poctacma. ²¹ Añ ñeñtara Cristo ñapa' ama't parrochapa' ama ñano ñeñt ama pocteye' enteno Pompor Parets, tarraña Pomporñapa' ahuo't muenateñ o'ch atet aparetta ñerra'mrrate' acheñ ñeñt atarr ochñañ. Tarraña ñeñt atto aparettapa' ñeñtpa' e'ñe yocop. Allochñapa' e'ñe yeyemteñoñ Puechemer Cristo, Pomporña yapuerre' alloch e'ñe pocte' enterrey.

6

Ñeñt torretsa Yomporecoppa' añ poctetsa ñocop chocmach orrtatenan ñeñt e'ñe pocte' enten Yompor

¹ Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puenmuereña. ² Ñehua, ñeñtpa' atet oteney Yompor po'ñon ñeñt anuaret ahuatoteñ, ñeñtpa' Yompor atet otets:

Allempo seçhore'tenen napa' e'ñe ne'mñotenes ñeñt atet soten, tarro'mar allempopa' o' chap ñeñt poctetsa o'ch saguërren. Nañapa' o'ch naguërres samña. Attoña napa' ahuo't neyenpas tarro'mar allempopa' o' chap ñeñt poctetsa attoch na'qeshpaterres.

Ñeñto'marña na te'pa' o'ch notas, o' e'ñe chap allempo ñeñt poctetsa o'ch saguër Yompor, tarro'mar te'pa' o' chap allempoch a'qeshpaterrey.

³ Ñehua, yapa' yeñoteñ ñeñtey ame'ñetsa ñerra'm o'ch yepa'yen ñeñt ama pocteyaye Yomporecop ñeñtña ama ame'ñetsopa' çhach ya'npare'teñ attoch ame'ñerret ñamet. Ñeñto'marña yapa' ama yemno ama't mamesha o'ch ya'npare'ch ama't puesheñarra allochñapa' attoch ame'ñeret ñamet Yompor. Ñaña ya atto yetorrena Yomporecoppa' ama yemno o'ch atet entapretyet ñeñt ama cohuenayaye. Allochñapa' amach achmãare'teññañeto Yompor po'taruas

e'ñe ya atet yeḡatse'tyeñoť. ⁴ Yapa' añña yemnen ama't erroteno'tsenya ḡhocmach yemneñ o'ch yeñotach acheñenesha' po'ñoč e'ñe cohuen yetorrena Yomporecop ñeñť atet poctetsa yocop ñeñťey torretsa Yomporecop. Ñeñťpa' añečno ñeñťcha'ña eñotaterrahuet: allpon es yehuapoyapa' ḡhocmach ya'huanteñ e'ñe cohuen, ama't allpon atto yemueročhtame'tyena, ama't allpon ñeñť yepallta'yena, ḡhocmach ya'huanteñ allohuen. Ama't ora allohuen ñeñť allpon ñeñť allcatañtetsa, tarraña ñeñťpa' ḡhocmach ya'huanteñ. ⁵ Ñaña atto ashta'yenyet, atto yottam̄penyet, atto ama'točhtana'tenyet pa'tsrre'mueñoťet, atto atarr nanac yetaruasen, atto yarepen torratsa Yomporecop, atto yemueročhtena yachporrñoť, ñeñťña eñotatene'ña allohuen acheñenesha' atto yapa' e'ñe cohuen yetorrena Yomporecop. ⁶ Ñaña atto yeñmañesha' yocrena, ama sosya'tsañeye' yoctape'chyeno, ñaña atto yeñoten ñeñť e'ñe po'ñoč Yompor po'ñoñ ñeñť ama shequēñtsoyaye, ñaña atto es ya'huanta'yen, amachña čha atsrre'matenye, ñaña attochña e'ñe ya'muerañtēna, ñaña atto chorrenya Parets Puecamquēñ, ñaña atto e'ñe cohuen yemorrenteña allohuen masheñneshachno, ñeñťpa'čo'ña ñeñťña eñotatene'ña acheñenesha' atto yapa' e'ñe cohuen yetorrena Yomporecop. ⁷ Ñaña atto ye'ñorena ñeñťpa' e'ñe po'ñoč atet. Yomporña po'huamenc ñeñť ahuamencat yepene'. Ñaña ñeñť e'ñe pocte' enten Yompor, ñeñťpa' ñeñťña allo ḡhocma es yeḡa'yen, alloña yečllarena Yomporecop, ñeñťpa' alloña yemoñeññaña Yompor poctapña. ⁸ Erroteno e'ñech cohuen entapretenyet, tarraña errotenoñapa' amach cohuenaye' entapretenyeto; erroteno e'ñech cohuen eñosyenet yocop, errotenoñapa' čhach sasare'tenyet. Errotenopa' attach entenyet ñerra'mrrate' atta yeshquēñ, ama't amach čhoje' yeshquēno. ⁹ Errotenopa' e'ñech cohuen emchorrenyet, errotenoñapa' amach acua'psenaye' entenyeto. Errotenopa' autsaycha' rromuets, tarraña ḡhocmach allo'na yesen huom̄chetsa. Erroteno ama'tcha' a'coñchatarefey, yañapa' corretsayach. ¹⁰ Ñaña erroteno ama'tcha' yellquēnañpa' tarraña ḡhocmach alla yocsherra. Ñaña ama't e'ñe huocchañeypa' shonte'ch cočhnesha' cotaḡñats yapa'yes po'potantañ. Ama't ama es yechenñe arr patsro, tarraña shonte' esocmañen es yechen Yomporeshoť.

Atto Pablopa' e'ñe pueyočhrocmañen morrentenana allohuen ñeñť ame'ñenaya Yompor

¹¹ Te'pa' masheñneshacha' corinto'marnesha o' neñotatuas ora allpon ñeñť atet noctape'chen neyočhro. E'ñe

neyoçhrocmañen nemorrentensa. ¹² Nocoppa' ama palltenmeñe ama't mamesha attoch nemorrenterrsa e'ñe poctacma. Añña sapa' çhocmate' sepalltena attoch semorrenterrna naña. ¹³ Napa' e'ñe nechemerasha' nepenes. Ñeñto'marña o'ch nenamas, o'ch notas, atto napa' e'ñe neyoçhrocmañen nemorrentensa sa, sapa'çho'ña añ poctetsa e'ñe seyoçhrocmañenpa' o'ch semorrenterrna naña.

Atto ama ayemuetpahuo ñeñt ama ame'ñetso

¹⁴ Te'pa' o'ch noterrser po'poñ, amach e'ñe seyemtatsche ñeñt ama ame'ñetso, tarro'mar amach patrraye' soctape'chueno. Acheñ ñeñt e'ñe pocte' es pa'yetspa' amate' errotent yemtanoña acheñ ñeñt ama cohuenaye' es pa'yetso, tarro'mar ama attecmaye' es pa'yeneto. Ñato' o'ch netma'ntacha atet ñerra'mrrate' checmete'pa' amate' errotent alla epteto parro epuet puetare'. ¹⁵ Ñeñt atet pena Cristo ñaña oneñeñ amate' errotent cohuen amo'tstanna'teto. Attecma ñaña ñeñt ame'ñetsapa' amach patrraye' cotape'chueneto epuet ñeñt ama ame'ñetso.

Atto yapa' pa'paquell peney Yompor

¹⁶ Ñaña ñeñt pa'paquell pen Yomporpa' ama atteyaye ñerra'mrrate' ñeñt ayeçhcataret ñeñt po'yomporer pa'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquell peney Yompor ñeñt ama arromñateshayaye. Añpa' ñeñt atet oten Yompor:

Napa' çhocmach neyçhena e'ñe ñesheto parro allcha' nechopeñe'chen. Napa' Po'yomporer pennet, ñetpa'çho'ña e'ñe neyochrenesha' nepenanet.

¹⁷ Ñeñto'marña Yomporpa' oteney:

Añ poctetsa o'ch sesuanemñ ñeñt ama ame'ñetso, allochñapa' o'ch sellopa'tetstatua soctapña. Amach seyçhapretatsto sosya'tsañ ñeñt orrtatyenet. Allochñapa' attochña napa' o'ch naguërres e'ñe nocsheñesha'.

¹⁸ Allochña sapa' attochña e'ñe Sompör seperren na, napa'çho'ña o'ch nechemerasha' nepohuerres ama't ñaña allohuen nesñenesohuen. Ñeñtpa' atet ot Yompor ñeñt nanac partsotets.

7

¹ Ñehua, e'ñe nemorrenteñotes, masheñeshacha' ñaña noçhaneshacha' o' notuas atet oteney Yompor ñeñtcha' atet perrnay. Ñeñto'marña te'pa' añ poctetsa yocop yapa' o'ch yesuanem ora allohuen ñeñt çhocma a'sosyatene' yechets

ñaña ñeñt̃ chocma a'sosyatene' ama't yecamquëñ. Añña e'ñe yenicha'na'teñoť Yomporpa' añcha'ña yema'yochrena ñeñt̃ pocte' enten ña.

Atto Pablopa' o' alla atarr coshater corinto'marnesha' tarro'mar o' cotape'cherret cohuen e'ñe etserra

² Napa' atarr nemneñ, masheñneshacha' o'ch alla semorrenterrna e'ñe seyočhrocmañen. Napa' ama't puesheñarroťesapa' ama čho erroť neřaso, ñaña ama't puesheñarroťesa ama añeye' neyčhataso ñeñt̃ ama cohuenayaye, ñaña ama't puesheñarroťesapa' ama čhoye' neshcare'taso ama't e'ñe mamesha. ³ Ñeñtpa' ama añecpaye' notenso o'ch neyohuare'tasa. Añecopña o' alla noterrser e'ñe nemorrenteñoťes ñeñt̃ atet o' notuanmas. Po'ñočhpa' atarr nemorrentensa e'ñe neyočhrocmañen. Ñeñto'marña napa' e'ñe pocte' nenteñ e'ñech parrocmayocrena ama't ñaña e'ñech parrocmayerroma. ⁴ Napa' neñotenes sapa' čhocmach seřa'yen ñeñt̃ cohuentetsa Yomporecop. Ñeñto'marña napa' atarr nocshapretensa. Ama't nellquënañ nemueročhteñoťpa' elloña o' alla nanac socshaterren.

⁵ Ama't allempo nečherr Macedoniopa' chocma atarr nellca'huerrerr alla. Allpa'čo'ña chocma es nehuapoya pa'namen ñeñt̃ña ama't mameshapa' ama eshcaye' neñmatataye neyočhro attoch e'ñe cohuen nellařsos muechet. ⁶ Atteñapa' o' čherr masheñ Tito. Atto čherr masheñ Titopa' allempoña Yomporpa' alla coshaterren neyočhro, ñeñt̃ara Yompor ñeñt̃ chocma yocshatene' allempo es yellcatene'. ⁷ Ama e'ñe aña nocshataye atto čherr Tito, añña atarr nocshatene' ñeñt̃ atto e'ñe cohuen entapretensa', ñapa'čo'ña atarr socshater. Ñehua, ñapa' eñotatuerrren atto sapa' atarr o' seyerpuenna, ñaña o' eñotatuerrren atto sellquëñoť sapa' o' alla same'ñerra e'ñe cohuen, ñaña o' eñotatuerrren atto o' alla sellcapreterrna ñeñt̃ atto sellcatenen na. Ñeñt̃ allpon serrpare'tatuerrren, napa' ñeñt̃ña ello atarr nanac nocshaterre'.

⁸ Carta ñeñt̃ nequellconas ahuaña, ñeñt̃pa' čha llecatas. Ñeñto'marña allempo napa'čo'ña čha muene' llecaterna ñaña tarro'mar o' nemñonas atet carta. Ama't te'pa' neñoteñ añ necarta čha llecatenes tarraña ñeñt̃pa' e'ñe mamecpa, ñeñt̃ e'ñe pocte' nenteñ. ⁹ Attoña te' napa' e'ñe cohuen nocshena. Ñeñt̃pa' ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëñoť o' alla same'ñerra e'ñe cohuen. Tarraña atto sellquëna sapa' ñeñt̃pa' atet senteñ ñerra'm Yompor sellcatene' ñeñt̃cha'ña same'ñaterraya e'ñe cohuen ñocop.

Ñeñto'marña ñeñt atet neponas, ñeñtpa' e'ñe cohuen socop, ñeñt allopa' ama choye' erroten nepenso ñeñt ama pocteyaye ama't mamesha. ¹⁰ Tarro'mar ñerra'm esempo atet yenteñ Yomporña atet yellcatene' ñeñtpa' e'ñech pocte' yenteñ tarro'mar ñeñtpa' alloch yoctape'cherr cohuen ñocop, allochñapa' attochña yequeshperra. Tarraña atto yellquëna arr patsro, ama Yomporecpaye' yellquëno ñeñtpa' ñeñtña allo'na aneney rromueñtso, allcha' yechenquërra poctacma. ¹¹ Sa sellquëñapa' e'ñe atet senteñ ñerra'm Yompor e'ñe sellcatene'. Ñeñto'marña allempoteñ yoroçhen senten sa so'chñar ñeñto'marña sapa' semneñ o'ch alla cohuen nentapreterres. Ñaña ñeñtpa' apencoçhen senteñ ñeñt atarr atparñañ. Ñeñto'marña semchaño'tpa' atarr semneñ o'ch alla senterren, attoch e'ñe cohuen na'poctatonas. Ñaña allempoteñña e'ñe pocte' senteñ o'ch secoñchach ñeñt atparñañtetsa. Ñeñto'marña te'pa' atet o' seponhuerra ñeñt e'ñe pocte' nenten, allochñapa' amach allo'na sa'yohuaretteno. ¹² Ñaña o'ch notas, ahuaña allempo nequellquërrnaserr añ necartapa' ama atparñañtecpaye' nequellquërrnaserro ñaña ama nocpaye' nequellquërrnaserro ñeñten atarr atpare'tenet. Añe'pa'ñaña nequellquërrnaserr carta allochñapa' attoch çhaponasa seyoçhro po'ñoçh sapa' atarr semorrentenna. Ama't Yomporpa' e'ñotenes. ¹³ Ñeñto'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyoçhrocmañen o' atarr cosherra. ¹⁴ Ñehua, ahuaña allempoch ahuo' masheñ Tito sesho, napa' atet noch sapa' atarrcha' cohuen same'ña. Allempoña çhap seshopa' e'ñe atet same'ña ñeñt atet noch. Ñeñto'marña napa' ama't mameshapa' amach erroteno't sepencatno, ama atta nommo'chenso. E'ñe po'ñoçh atet seponhuena ñeñt atet noch Tito. Ñaña ñeñt ora allpon atet notas, ñeñtpa' e'ñe po'ñoçh atet. ¹⁵ Ñaña e'ñe semcha'na'teño'tpa' ahuo't sagap Tito e'ñe cohuen. Ñaña ñeñt ora allpon co'tape'chatas Tito sapa' ahuo't e'ñe cohuen ame'ñaterra. Ñeñto'marña te' Titopa' e'ñe pueyerpueño'tes, ñapa' atarr morrentensa nanac. ¹⁶ Ñeñto'marña napa' atarr nocshena tarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporecop

1 Ñehua, te' masheñeshacha' ñaña nochaneshacha' o'ch neñotaterr serr atto Yomporpa' orrtaterranet puemuereña allohuenacop ñeñt' pame'ñeñotet chocma ap'cha'yenet all anetso Macedonio'mar. 2 Ñehua, macedonio'marnesha'pa' ama't shonte' pa'namen huenanet ñeñt' atarr topatenahuet, tarraña ñetpa' chocma atarr coshenet. Ñaña ama't atarr huocchañetyenet, tarraña ñetpa' chocma apa'yeñet po'potantañ ñeñt' atarr es nanac palltetsa. Apa'yeñet e'ñe pocsheñeshocmañen atet ñerra'mrrate' ñetpa' shonte' esocmañen echenet po'checom. 3 Napa' neñotenanet ñetpa' ahuo't pomyenet ñeñt' allpon muena'yenet ñet puesheña'ttset. Ama't ñocpuetpa' palltenetañ tarraña ellonetñapa' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puemnenñotet atet penet. 4 Ñetpa' chocma a'p'to'tennet pocte'te' o'ch notanet attoch yenpuet ñamet ñeñt' masheñeshachno huocchañeshachno. 5 Napa' e'ñe allpona notanet ñetña ellonetpa' atarr shonte' pomyeset, tarraña ama't allempo ama pomueneta' po'çllayor Yomporecop, ñetñapa' ñanmacmuet o' e'ñe pomhuerret Yomporecop, allotpa' ñaña yocop ñeñt' atet muenateney Yompor allohueney. 6 Atet nenteñ macedonio'marnesha' atarr es pomuenet Yomporecop, ñeñto'marña te'pa' o' alla notererr masheñ Tito o'ch alla ahuererr sesho, allochñapa' attoch allo'nach seño'tnen e'ñe cohuen pomuene' Yomporecop, ñeñt' allpon ye'chatensa' ahuaña Tito. 7 Ñaña sapa' atarr setsoteññañ allohuen ñeñt' cohuen enten Yompor. Ñanompa' atarr seyemteña Yompor, ñaña atarr cohuen seserrpare'teññañ po'ñoñ, pa'namen esocmañen es seño'tyen, ñaña e'ñe socsheñesha' es se'pa'yen Yomporecop, ñaña e'ñe cohuen semorrentenya. Ñaña e'ñe setsotuen ñeñt' atet cohuentetsa Yomporecop. Ñeñto'marña te'pa' aña sepalltena paterr attoch o'ch setsota eñote' apa'yese' po'potantañ ñeñt' es pallta'yetsa.

8 Napa' ama neyechare'teño'feye' notenso atet, añña nenen o'ch neñotatas ñeñt' atet pena po'potantañ ñeñt' e'ñe pocsheñeshocmañen es apa'yeñet ñeñt' es pallta'yetsa. Allochña ñerra'm ñeñt' seño't, napa' neñotenes atet'cha' se'pohuerra saña. Attoña neñotenes e'ñe po'ño'ch semueranna'tuena allohuenes. 9 Ñehua, sapa' o' seño'ter ñeñt' atet p'a Yepartse-shar Jesucristo. Ñapa' atarr amuerañtosa, ñapa' esocmañen echeneñ Pomporesho, tarraña e'ñe puemorrenteño'fey ya, ñaña'pa' atta huocchañetos. Allochña e'ñe puehuocchañeteño'f yocop, yañapa' shonte'ch esocmañen yecherr Yomporesho't.

10-12 Ñehua, sa ahuaña charopa' atarr semneñ o'ch es

sapa'yeñ acheñenesha' ñeñt̃ es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeñto'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yesahuet, e'ñe allpon semna'yen puesheña'ttsos, e'ñech allpon sapa'yesanet. Tarro'mar ñerra'm e'ñe yemneññoť es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamy e aton ñerra'm ama yecheñe. Allochñapa' o'ch senue e'ñe poctacma. Attotcha'ña setsotua allohuen ñeñt̃ atet poctetsa Yomporecop.

¹³ Napa' ama notenso tarrecopcha' es sapa'yen allochñapa' o'ch atta atarr es sepalltena sa. ¹⁴ Añecopña notenes o'ch satecmatua. Ateť ñerra'm te'pa' shonte' sechen, socoppa' añ poctetsa o'ch sapa'yeñ ñeñt̃ es pallta'yetsa te'. Allochñapa' ñerra'm esempo es sepalltena samapa' añ poctetsa o'ch apuerrset ñamet, allochñapa' attochña e'ñech satecmaten. ¹⁵ Ñeñtpa' atet oteney Yompor po'ñoñ ñeñt̃ atet anuaret̃ ahuaťoteñ, ñeñtpa' atet oten: "Ñeñt̃ echene' shonte'pa' amach es a'pchateno. Ama't ñaña ñeñt̃ echene' coñe'tpa' amach es pallteno."

Atto Titopa' alla ahuererr po'pocheño Corinto

¹⁶ Napa' chocma neparasyoso'teñ Yompor tarro'mar añ nenan masheñ Tito pueyočhro atto ñapa'cho'ña chocma llecapretensa atet ñerra'm na. ¹⁷ Ñeñto'marña allempo noteñ o'ch ahuer sesho, ñapa' e'ñe pocte' enteñ. Elloña ñapa' e'ñe puemneññoť atarr sechena o'ch alla ahuererr o'ch abcherra'.

¹⁸ Ñaña yapa' o'ch yemñererr masheñ Tito epuet ñaña po'psheñeñ masheñ. Ñehua, añ masheñerpa' allohuen ñeñt̃ apcha'yetsa pame'ñeñoťetpa' atarr cohuen enteñet atto serrpare'tatenanet añ cohuen ñoñets ñeñt̃ alloch yequeshperra. ¹⁹ Elloña ñeñt̃ masheñerpa' allohuen ñeñt̃ apcha'yetsa pame'ñeñoťetpa' o' net o'ch yechopeñe'ch parro attoch ñach yeyenpuene' ñeñt̃ atto yetorrena o'ch yeyenpuen po'potantañ. Ñeñtpa' añecop sherben attoch aye'chočhtateññañet Yompor, ñaña añecop sherben attoch eñoteñet e'ñech yocsheñesha' yemneñ o'ch yeyenpanna e'ñe cohuen. ²⁰ Ñeñto'marña o' net ñaña po'psheñeñ masheñ allochñapa' atto yapchaten quellepa' amach cha sasare'tenyeto quellayo'mara. ²¹ Tarro'mar yapa' añña yema'yočhrena o'ch yorrtat ñeñt̃ e'ñe cohuen enten Yompor, ama't ñaña ñeñt̃ cohuen enten acheñenesha'.

²² Ñehua, te'pa' o'ch yemñonas po'poñ masheñ ñeñt̃cha' tatsa, ma'psheña. Ñeñt̃ po'psheñeñ masheña' napa'

neñoteñ ñapa' e'ñe pocsheñeshocmañen atarr cohuen es ma'yochra'yena ñeñt' cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmatsa e'ñe cohuen Yomporecop. ²³ Ñaña ñerra'm esesha' sa'p'to'tene' o'ch otaset, "¿ama't se'mare'teñe masheñ Tito, erro'tsente'?" sañapa' o'ch soch "ñapa' añ epuet torrena masheñ Pablo taruasats Yomporecop attoña e'ñe sherbeney yaña." Amapa' ñerra'm a'p'to'taset ñaña añ po'psheñeñ masheñecop, sañapa' o'ch señotatanet ñetpa' arro't amñare'ttenet all ap'chena allohuen masheñeshachno ñeñt' ame'ñetsa all Macedonio. Ñetpa' e'ñe cohuen orrtatenet Cristo po'cohuenña. ²⁴ Ñeñto'marña te'pa' o'ch notas e'ñech cohuen saga'p añ masheñnesha', allochña ñetpa' esheccha' eñotaset sapa' po'ño'ch atarr semuerenanet, attochña eñotas ñaña allohuen masheñnesha' ñeñt' pame'ñeñotet ap'cha'yetsa allot amñare'ttenet. Allochñapa' o'ch eñotaset po'ño'ch e'ñe cohuen same'ñena ñeñt' atet notenanet socop.

9

Yomporpa' añ atarr morrentena ñeñt' e'ñe pocsheñeshocmañen es apa'yets ñocop

¹ Ñaña ñeñt'cha' sap'chen alloch seyenpue' masheñnesha' ñeñt' atarr es pallta'yetsa Jerusaléño, napa' neñotenes ama sepallteno o'ch alla noctape'chaterrser necartot' ñeñt'cha' atet se'pa. ² Tarro'mar napa' neñotenes ñeñt'pa' atet atarr semnen sa. Ñeñto'marña arr Macedonio chocma noteñ macedonio'marnesha' sapa' chocma semneñ o'ch es sapa'y es añecop ñeñt' atarr es pallta'yetsa. Ñeñto'marña napa' e'ñe nocsheñeshocmañen neñotateñ macedonio'marnesha' ñeñt' atet sepena sa ñeñtes acayo'marneshas ñeñtarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'p'octat attoch es sapa'y es ñeñt' atarr es pallta'yetsa. Atto sapa' atarr semneñ o'ch seyenpue' ñeñt' atarr es pallta'yetsa, ñeñto'marña all Macedoniotpa'cho'ña te'pa' eñall shonte' ñeñt' muenets o'ch es apa'yenet ñamet. ³ Tarraña ama't napa' neñotenes atarr semneñeñ o'ch seyenpue' ñeñt' atarr es pallta'yetsa, ñeñto'marña napa' o'ch nemñonas añ masheñnesha' ñeñt'cha' otatsa. Ñetpa' o'ch yenposset attoch sap'cha' añecop ñeñt' es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeñt' e'ñe cohuen notenanet socop, ñeñt'pa' e'ñe po'ño'ch atet se'pohuena. ⁴ Allochñapa' ñerra'm esempo nechap naña sesho epan ñaña masheñnesha'chno

macedonio'marnesha' ñerra'm yentoses ama sapchatueña', allempoña yapa' čhate' parrocmá yepencna'ntatanna'ta. Allempoña e'ñete' orrena neyemtensa. ⁵ Ñeñto'marña napa' añ pocte' nenten o'ch noch po'psheñeñ masheñnesha' ñetpa' otetepa' ñanmacmuet, ñeñtcha' sabcherraya' attoch ñetpa' o'ch yenposset attoch e'ñe sapcha'hua ñeñt semnen sa o'ch e'ñe saphue ñeñt es pallta'yetsa Jerusaléño, ñeñt atet sot ahuatoteñ. Tarro'mar napa' e'ñe pocte' nenteñ sa e'ñe semneññoñ e'ñech señmañesha' es sapa'yés ñeñt atarr es pallta'yetsa. Amachña čha es enamare'tyenseto attoch es sapuenanet.

⁶ Chocmach seyerpuena añ ñoñets, ñeñtpa' atet oten: Ñerra'm ya atarr coñe't es yapa'yen Yomporecop, yapa'čho'ña o'ch alla yaguërr ñeñt atarr coñe't. Ñerra'm atarr aton es yapa'yen Yomporecop, yapa'čho'ña o'ch alla yaguërr ñeñt atarr aton. Ñehua, ñato' o'ch netma'ntacha atet ñerra'mrrate' čho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapačherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapačherr ñerra'm esempo po'nen. ⁷ Ñaña añ poctetsa e'ñe puesheña'ttsoy o'ch yapa'yen e'ñe allpon ñeñt pocte' yentyen e'ñe ya yeyočhro. Amachña yempañoña es yapa'yeno ñaña amachña puenamare'teñofteta es yapuenaneto. Tarro'mar Yomporpa' añña atarr morrentena ñeñt e'ñe pocsheñeshocmañen es apa'yets. ⁸ Ñaña Yomporpa' shonte' esocmañen echen ñeñtcha' apuerres allochñapa' attoch čhocma sechencha' shonte' ñeñt atarr cohuen socop, ñaña sechencha' shonte' attoch seyenpuen pa'namenot ñeñt cohuentetsa Yomporecop. ⁹ Añpa' ñeñt atet oten Yompor po'ñoñ ñeñt anuaret ahuatoteñ, ñeñtpa' atet oten:

Ñeñt atarr es apuene' huocchañnesha' ama't ahuatapa' amach apsaletterro ñeñt atto e'ñe cohuen es pen.

¹⁰ Yomporpa' apuenescha' shonte' esocmañen allochñapa' attoch čhocma sechencha' shonte' attoch seyenpuenanet pa'namenot ñeñt cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yenpuene' pa'namenot ñeñt cohuentetsa Yomporecop. Ñeñtpa' ñerra'm netma'ntacha ñato' o'ch not: Ñeñtara Yompor ñeñt yapuene' puerets ñeñtcha' yenare'ten o'ch čhap allempo po'nenpa' allempochña yeyoren ñeñtcha' yerrar yepen, ñeñtpa' Yomporña a'torene' attoch ya'yapačheñ o'ch yeshonteñ. ¹¹ Attochña sapa' sechencha' allohuen shonte' esocmañen allochñapa' attochña shonte'ch esocmañen

sapa'yeñ ñeñt es pa'namen pallta'yetsa. Ñerra'mña atet seřapa' yañapa' yach aphuerrahuet attochña ñetpa' chore'teñet Yompor o'ch ochet "Parasyos Nompore, řa yapuene' ora allohuen." ¹² Ñerra'm atetcha' sepena es apa'yese' masheñnesha' ñeñt ame'ñetsa, ama e'ñe añecpa sherbeno attoch es sapuenanet ñeñt palltenet. Añecpa'naña sherben attoch ñetpa'cho'ña atarrcha' chore'chet Yompor o'ch ochet: "Parasyos Nompore, řa yapatene' ñeñt allpon yepalltena." ¹³ Ñaña attoña ñetpa' aye'chochtateññañetcha' Yompor, tarro'mar o'ch eñotenset sapa' po'ñoçh attera same'ñeññaña Cristo po'ñoñ. Tarro'mare'naña ñetpa' aye'chochtateññañetcha' Yompor, atto sapa' sapuenanet pa'namen ñeñt allpon palltenet ñet, ñaña po'potantañecop. ¹⁴ E'ñech pueyerpueñořetas sapa' ñetpa' atarrcha' nanac chore'tatonaset Yompor, tarro'mar sapa' o'ch sorratanet Yompor puemuereña allo atarr muerenya. ¹⁵ Yeparasyoso'chepa'ch Yompor tarro'mar ña yapuene' Puechemer, ñeshoña huena ora muereñets ñeñt atarr coçhneshare'. Ama't yemneñeñ o'ch ya'ye'chochtatue e'ñe poctacma, tarraña ya arromñařeypa' amach erroř yepe, ñaña ama yeno yeñoñ attoch ya'ye'chochtatuoñ e'ñe poctacma ñeñt atet yocshena yeyoçhro.

10

Atto Pablopa' eñotatan corinto'marnesha' ñapa' e'ñe po'ñoçh allsensaret Yomporeshot

¹⁻² Ñehua, te'pa' na Pablon o'ch alla noctape'chaterriserr e'ñe nemuereñořes atten ñerra'm Cristo ñeñt nanac amuerañtostsa. Puemuereñořey ya ñapa' e'ñe pocte' eñche't o'ch atet enteñet ñerra'm ñapa' ama esoshe'mayaye. Ñehua, sapa' patanta'ttsospa' attach sentenen ama erroř notenso atsre'moçhen ñerra'm esempo allo'tsenen sesho. Tarraña ñerra'm esempo allaparo'tsenen, allempo nequellquënnas cartapa' allempoña sapa' atet sentenen ñerra'mrate' ama çoye' neñcha'tenso ama't e'ñe mamesha, e'ñech eche'çharr notenes necartoř. Tarraña ñeñtpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñe'e eche'çharr ne'ñorennasa. Ñeñto'marña te'pa' e'ñe neyoçhrocmañen o'ch notas, soçtape'cherr cohuen e'ñe řayecma allochñapa' ñerra'm esempoçh neçherr seshopa' amach çha se'ñoratno eche'çharr. Tarro'mar ñerra'm ama soçtape'cherro cohuen, po'ñoçh ñerra'm esempo neçherr seshopa' çhach se'ñoraten eche'çharr, ñeñtes notene' napa' e'ño' nañeña noctapñoř atet es nepatse'tyen ñeñt atet pa'yena acheñnesha' arr patsro, ñeñtpa' e'ñe ñocpueta sherben.

Tarraña napa' ama atteye' nepeno. ³ Ñehua, ama't napa' nocrrrena arr patsro atet yocrrrena allohueneý acheñey tarraña ñeñt atet nema'yoçhrena Yomporecop, ñeñtpa' ama atteyaye ñeñt atet ma'yoçhrena acheñenesha' arr patsro. ⁴ Tarro'mar ñeñt atet yema'yoçhrena Yomporecoppa' ñeñtpa' ama añeyaye ñeñt atet yoctape'chen ya acheñey arr patsro. Añña atto yema'yoçhrena ñocop, e'ñe ña po'huamencot atet yepena. Attochña yehuapore'toñ allohuen ñeñt epatare'tene' Yomporecop. ⁵ Ñaña allohuen serrparñatsoçhno ñeñtña epatare'tene' Yomporecop po'ñoñ ñeñtcha'ña yehuapore'tua. Ñaña allohuen cotapñatsoçhno atto nanac ommo'chenet, ñeñtña ama muenatenahueto attoch enteret Yomporecop, ñeñtpa'cho'ña Yomporecop po'huamencot o'ch yehuapore'tue. Ñaña ñeñt allpon yoctape'chyen arr patsro ñeñtña atpare'tatene' Yomporecop poctapña, ñeñtcha'ña ya'meta'huerr Cristesho, allochñapa' attochña Cristopa' o'ch ame'ñatera. ⁶ Ñaña ñerra'm o' alla name'ñatuerra e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeñt atet atpare'tetsa.

⁷ Sapa' ñaña cohuen senten ñeñt allpon sentyen seclloyot. Ñerra'm esesha' entetsa atet ñapa' Cristo mueñene', ñeñt acheñerpa' eñochepe' napa'cho'ña Cristoña nemñene'. ⁸ Ama't atarr natontaten neñoñ atto alla noterrser napa' Cristo puellsensaren, tarraña napa' ama çhoye' neyllateno neñoñ attoch nepenca. Tarro'mar atto llesensa'n Yepartseshar Cristopa' ñeñtpa' añecopña attoch neyenpas attoch allo'na sesen huomenc pa'nmue' seyoçher Yomporecop. Ñeñtpa' ama añecpayaye alloch na'puerrataterres ñeñt atto same'ñena. ⁹ Napa' ama nemno o'ch añcha'noçhen sentenen e'ñe necartota. ¹⁰ Tarro'mar patanta'ttsos atet sentennan necarta ñerra'mrrate' atarr eche'çharrot es notenes ñeñt atarr echarr senten. Ñaña ñerra'm esempo allo'tsenen sesho sapa' ama ahuamencatoyenaye' senteno ama't mamesha, ñaña atto neserrpare'tatenespa' ama't e'ñe mameshapa' ama asherbenaye' senteñe. ¹¹ Tarraña acheñenesha' ñeñt atet otetspa' eñochetepa'ch ñerra'm erroñ notas necartot ama't atarr allaparo'tsenen atetcha'cho' po'ñoçh nepennas ñerra'm esempoçh necherr sesho.

Atto Yomporecopa' ama pocteye' entenano acheñenesha' o'ch cohuen entenet e'ñe ñañeñeta

¹² Napa' ama't mameshapa' ama nemno o'ch sentenen napa'cho'ña ñato' attente' ñeñt atet pena po'potantañ ñeñt atarr cohuen eñosyets e'ñe ñocpueta. Napa' ama nemno o'ch

not napa' e'ñe attecma nepena atet penet ñet. Tarro'mar ñeñt atet penet ñetpa' ama cohuenayaye. Ñetpa' e'ñe ñañeñeta poctaḡñetpa' coshapretannenet e'ñe ñagattseta. E'ñe ñañeñeta poctaḡñetpa' cohuen entapretanna'tyenet, ñeñtpa' atta otatse'tyenet. ¹³ Tarro'mar yapa' ama yoyaye yoctaḡña ñeñt atarr yocshapretannena. Añña Yompor poctaḡña ñeñtpa' allohua onañchareḡ yocop ñeñtcha' e'ñe cohuen yocshapretannena. Ñaña Yompor poctaḡña ñeñt atet onañchennaypa' ñeñtpa' añeḡpa'ñaña sherben attoch yeḡhapatonas Yompor po'ñoñ e'ñe seshohuen ñeñtes corinto'marneshas. ¹⁴ Ñeñto'marña yapa' ama ḡo yatontateññañe Yompor poctaḡña tarro'mar ñeñt allpon onañchennay, ñeñtpa' e'ñech allohua yetorrera ñocop. Ñeñtpa' añeḡpa'ñaña sherben attoch yeḡhapat Yompor po'ñoñ ama't seshohuen. Ñeñto'marña ya ahuatpa' yanom ḡhapate' Yompor po'ñoñ sesho ñeñtara añ cohuen ñoñets alloch yequeshperra e'ñe yame'ñeñoḡa Cristo. ¹⁵ Ñaña ya e'ñe yocoppa' ama yemno o'ch yommo'ḡoña po'psheñeñ po'taruas ñeñt ñanom torratta all Yomporecop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrerra sesho. ¹⁶ Attoḡña ama't allpon anetsoḡhno ñeñt allemeñ allo'tsa'yen ellonet seshoḡpa' allña nesechena ñaña allcha'ña neserrpare'tatyesosanet Yompor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompor po'ñoñ all ama aserrpare'tataretteneta' alloḡña'apa' amach ḡha nommo'ḡoñe po'psheñeñ po'taruas ñeñt ñanom serrpare'tats all.

¹⁷ Ñerra'm esesha' muenetseñ o'ch e'ñe cohuen eños puesheñarrocop tarraña ñeñtpa' Yomporecopcha'ña e'ñe cohuen eñen. ¹⁸ Tarro'mar añ acheñer ñeñt eñoretsa e'ñe cohuen ñocpapa' ñeñtpa' ama pocteye' enteñe Yompor. Tarraña ama't erra'tsena acheñer Yomporcha' eñosets cohuen ñocop, ñeñtña e'ñe pocte' enten ña.

11

Atto ommoñateñesha'pa' ahuo't shequënan corinto'marnesha' ñetpa' allsensareteto'

¹ Napa' atarr nemneñ o'ch se'mñoton atto ḡha muene' atta es notatse'tyen. Po'ñoḡh o'ch notas, se'mñoton ñeñt atet es notatse'tyen, alloḡña'apa' attoch neñotatas ñeñt atet noctape'chen. ² Tarro'mar napa' atarr necuenes atet ñerra'm Yompor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas

poctacma. Atto o'patataretes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' puesheñarr yacma ñeñt esñeñ. Po'seññapa' o'ch o'patacha puesheñarr yacma ñeñtcha' puerrollar pa'. Ñapa' o'ch cohuanpenan po'señ e'ñe cohuen tarrempohuach esempoch huapa ñeñt o'patenaya allempochña pomanña po'señ ñeñt ama a'plareteyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñtcha' e'ñe serrollar sepa' ñapueñ. ³ Tarraña napa' cha sellcatenen. Napa' noten sapa' o'te' cha semnatena o'ch shecaset saña, atet pa' ahuat shechep allempo shecan Eva tarro'mar ñeñt shecheppa' atarr etsotenan shequēñets. Ñerra'm sapa'cho'ña puehquēñofetaspa' añach yechatenset ñeñt ama cohuenayaye cotapñats, ñeñto'marña o'huañcha' allo'na sesen ame'ñenaya Cristo ñapueñ ñeñt e'ñe cohuen. ⁴ Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñtpa' ama atteyaye ñeñt atet yeychatuas ya ahuañmo'cha, sañapa' eso'mare'tña allorocma e'ñe socsheñesha' same'ñeña. Ama't serrpare'tatenset po'poñ cotapñats ñeñtpa' ama añeyaye Yompor poctapña, sañapa' allorocma'tña e'ñe pocte' senteñ o'ch same'ñya. Ama't serrpare'tatensetañ po'poñ ñoñets alloch sequeshperrañ, ñeñtpa' ama añeyaye ñeñt e'ñe cohuen ñoñets ñeñt same'ña'hua ahuañmo'cha, tarraña sañapa' e'ñe't pocte' senteñ o'ch ame'ñataset po'poñ ñoñets. ⁵ Ñaña ñetpa' atta ommo'chenet allsensareteto' Yomporshot, ñetpa' atarro' sherbenet. Tarraña napa' elloña atarr asherben nentena. ⁶ Ama't napa' ama aychatareteno attoch neserrpare't cochneshare' ñoñets tarraña napa' e'ñe neñotueññañ Yompor po'ñoñ. Sapa' señotenen ñeñt atet notenes ñeñtpa' e'ñe po'ñoñ atet tarro'mar shonte' pa'namen norrtatyen erracmañen ñeñtña e'ñe señotatene'.

⁷ Ñehua, sapa' amate' pocteye' sentenno tarro'mar ama't ahuañmo'chapa' ama choye' necobraso atto neserrpare'tatensa' Yompor po'ñoñ ñeñt alloch yequeshperra. Ñato' amate' asherbenaye' sentenno atto ama necobraso. Tarraña ñeñtpa' añecop sherben attoch sapa' o'ch tantaterres Yompor sosya'tsañoñ allochñapa' o'ch puechemer perres saña. ⁸ Ñehua, po'poñ anetso all apcha'yenet pame'ñeñoñet Yompor, na errotenopa' chocma naguēnanet ñeñt allpon muenenet o'ch tsa'tnet e'ñe ñet poctapñoñet. Ñeñto'marña ama pallteno o'ch setsa'tna saña atto neserrpare'tatenes. Ñeñt napa' atet nenteñ

ñerra'mrrate' po'poñ anetso all apcha'yenet pame'ñeñoťet Yompor, napa' ahuo't neprratamřsanet ñet attoch nesherbasa. ⁹ Ahuañmo'cha allempo na'posa seshopa' ñerra'm esempo nanac es nepalltena, sapa' ama't puesheñarroťesapa' ama na'tsrre'moťhtana'taso es senamare'te' ñeñť nepalltena. Tarraña allempo atarr es nepalltenapa' o' huaťha'ta masheñnesha' Macedoniot, ñetñapa' o' aposnet allpon ñeñť atarr nepalltena. Attoña allponmat na'puena sesho ahuañmo'cha, napa' ama't mameshapa' ama nemno o'ch na'tsrre'moťhtana'tasa ama't e'ñe puesheñarroťesa. Ñaña napa' ĥocmach atet nepena. ¹⁰ Napa' neñotena Cristopa' entenen e'ñe po'ñoťh cohuen ñeñť atet nepena, ñeño'tmarña napa' ama't eseshapa' amate' erroťenoť queťhpatatnetoña atto e'ñe cohuen neserrpare'teññañ Yompor po'ñoñ e'ñe atta ñeñť allo atarr nocshena, ama't errařaren nesen Acayo'mar. ¹¹ ¿Eso'marte'ña atet notenes? ¿Ama't señoťeñe? Čate' sotenapañ amate' nemorrentenso. Tarraña ñeñťpa' ama atteyaye. Yomporña nentene' atarrca'ye nemorrentensa.

¹² Napa' ĥocmach atet nepena amach necobrenso ñeñť atet pena po'potantañ ñeñť pommo'cheñoťeta serrpare'tatyenset. Alloťhña ñetpa' amach erroťenoť otneto napa'ĥo'ña ahuo' na'tsrre'moťhtana'ch naña acheñenesha' atet penet ñet. Tarro'mar napa' ama pocteye' nenteñe o'ch otet e'ño' attecma yetorrena Yomporecop. ¹³ Tarro'mar ñeñť atet acheñpa' ama Yomporeye' llesensenaye, ñetpa' aña po'taruas penet shequēñets attoch ganenet e'ñe atta. Atta mueneñet o'ch po'poñetet ahuo'ch orrtet atet ñerra'm Cristo puellsensar. ¹⁴⁻¹⁵ Ñehua, yapa' yeñoteñ oneñeťpa' ĥocma atet pena ñaña o'ch po'poñet attoťha' shequēney. Oneñeťpa' ĥocma orrtatennay ñeñťcha' cohuen yenten ya, o'ch orrtatennay atet ñerra'mrrate' ñapa' Yompor po'puetarenñoť amñareť ñeñť atarr cohuen. Ñeño'tmarña yeñoteñ oneñeť pueyochresha' ñeñť torretsa ñocoppa' ñetpa'ĥo'ña atarrcha' ashcañareret, mueneñet o'ch po'poñetet attoťha' orrtenet atet ñerra'm añ acheñer ñeñť e'ñe po'ñoťh torretsa Yomporecop. Tarraña ñeñť atet petsapa' añ o'patenahuet coñcheñets ñeñť poctetsa añecop ñeñť atet řatse'tyetsa.

Atto Pablopa' pa'namenot mueroťhtateñet e'ñe pame'ñeñoť Cristo

¹⁶ Ñehua, te'pa' o'ch alla noterrser. Amach sentatsetno napa' attate' notatse'tyen. Ñehua, ama't sentenen atet ñerra'm otatsñaatenpa' notatse'teñoťñapa' se'mñoten. Tarro'mar napa'ĥo'ña o'ch e'ñe cohuen neños ñeñť e'ñe nocpa atet ñerra'mrrate' ĥo nommo'chena mame'. ¹⁷ Ñehua, ñeñť atet

notenes te'pa' ama cohuenayaye tarro'mar ama añecpaye' llesensa'noña Yepartseshar o'ch e'ñe cohuen neñen ñeñt e'ñe nocpa. Te'pa' e'ñe na notatse'teñoñ e'ñe cohuen neñen ñeñt e'ñe nocpa atet ñerra'mrrate' cho nommo'chena. Tarraña ñeñt atet notenes neñoteñ ñeñt'pa' e'ñe po'noch netsotueñ. ¹⁸ Atto shonte' po'potantañ ommo'chyenet ñeñt atet etsotenet ñet arr patsro, napa'cho'ña o'ch neñosatse'tapretyesamet atet ñerra'mrrate' cho nommo'chapretyenanet. ¹⁹ Sapa' e'ñe atet sentena sañeña atarro' es señoten ñeñto'marña e'ñe pocte' senteñ o'ch se'mñoteññañ ama't otatsñañ ñeñt atto ommo'chena. ²⁰ Ama't ñet atto pomnaren penset, sañapa' e'ñech pocte' senteñ. Ama't es puerratanpsaset ñeñt allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puetsena'teñoñetaspa' sañapa' e'ñech pomnaren sepatena. Ñerra'm esempo ama't cho taclapechenset, sañapa' e'ñech pocte' senteñ atto atarr pencna'ntatenset. ²¹ Napa' ama nepenquëñoñeye' notenso, napa' ama nemno nehuamencotpa' o'ch pomnaren nepenes, atet penes po'potantañ.

Ñehua, tarraña ama't errotenote' ommo'chyenetpa' napa'cho'ña o'ch atet neñosatse'tapretyesamet. Notatse'teñoñpa' chach nottena atet ñerra'mrrate' cho nommo'chapreteña ommoñañenesha'. ²² Ñetpa' pommo'cheñoñetpa' otenet ñetpa' hebreonesheto'. Ñehua, napa'cho'ña o'ch notas, hebreoneshan naña. Ñetpa' pommo'cheñoñet otenet israelena'tareto'. Ñehua, napa'cho'ña o'ch notas israelena'taren naña. Ñaña ñetpa' otenet po'mrenñaneto' yatañ Abraham. Ñehua, napa'cho'ña po'mrenñen yatañ Abraham. ²³ Ñetpa' pommo'cheñoñet otenet ñetpa' atarro' torrenet Cristocop. Ñehua, napa'cho'ña elloña atarr nanac netorrena Cristocop. Ama't e'ñe notatse'teñoña noten, ñeñt'pa' e'ñe po'ñoñ atet. Ama't allpon torrenet ñet, elloña napa' atarr nanac netorrena na. Ñaña ama't allpon amuerochtataretetyenet ñet elloña napa' atarr nanac amuerochtatareñen. Allpon ayottampsareñen all coñchatennet, ñeñt'pa'cho'ña nanac atonoche'tats. Ñaña allpon ashtennetpa' ñeñt'pa'cho'ña atarr nanac atonoche'tats. Ñaña ñeñt allpon autsanca' rromuetseñ, ñeñt'pa'cho'ña atarr nanac atonoche'tats. ²⁴ Ñaña judionesha' e'ñe pue'moñe'teñoñetan napa' atet ashtennet e'ñe amnaroche'tats. Allempoña ashtennetpa' ma'poch charra' puechena escon ñeñt atto pacapacatspennet.

25 Ñaña ellonetpa' o'ch'cho' alla nallerrneterr ñaña tsachpo, e'ñe ma'poche'ttsocma nallennet. Po'pocheñopa'cho'ña parrochpa' o'cho' alla rrolle'terrneterr. Po'pocheñopa'cho'ña allempo nesen noñto sapo'marpa' alla nepotamperrerr ma'poche'ttsocma. Allempopa' alla narepen alla nellapen oño enopa'rrtatsa. 26 Napa' chocma nechopeñe'chyen ellañar allo'tsa'yen pa'namen ñeñt atarr añcha'nochenare', atet ñerra'm allempo netampena noñto oño'mar, ñaña allempo nechap all añcha'nochtana eñe'te'chno, ñaña allempo añcha'nochtana'tenen namo'tsesha' ñaña po'poñ acheñ ñeñt ama judioneshayaye. Ñaña ñeñt añcha'nochetsetsa all anetso'mar, ñaña ñeñt añcha'nochetsetsa all puetsato'mar, ñaña ñeñt añcha'nochetsetsa all oño'mar. Ñaña ñeñt atto añcha'nochtana po'potantañ ama't otenetañ masheñpa' tarraña ama masheñeyayeto, ñetpa' ama ame'ñeñeto Yompor. 27 Elloña chocma atarr netaruasen, ñaña shonte' ñeñt atarr echarr nentyen. Ñaña atonoche'tats atarr nanac na'huanten nemoñ torratsa Yomporecop. Ñaña epaye' nemuerochtana nachporrñoñ, ñaña no'ñpañoñ tarro'mar ama eñalle ñeñtcha' nerren ñaña ñeñtcha' norren. Ñaña epaye' muerochtatenen senet tarro'mar ama eñalle neshtam ñeñtcha' nechorra, o' e'ñe neptsapesua.

28 Ñaña ellonet napa' chocma nellquëña ñeñt pame'ñeñoñet allemeñ ap'cha'yetsa. Napa' aña'ñaña chocma nellcatene' ñeñt atarr torrapo' nentyen pa'namen. 29 Ama't erra'tsena acheñer ñerra'm ama huomencaye' penano pueyoçher Yomporecop, nañapa' atarrcha' nellcapreteña. Ñeñtña atet nellcapreteña nañapa' o'ch atet ne'muen neyoçhro ñerra'mrate' o'huañ huomenc neña' neyoçher Yomporecop. Ñaña ama't erra'tsena acheñer ñerra'm o'ch a'puerratateret o'ch atet perran ñeñt ama pocteye' enteno Yompor, ñaña nepencapreteño'tpa' ama't mameshapa' amach pocteye' nenteñe. 30 Ñato' te'pa' o'ch noterrser po'poñoneñ co'tapñats. Sapa' po'ño'ch señosatse'tatyenen cohuen ñeñt e'ñe nocpa. Añña cohuen nenten attoch neños cohuen ñeñt e'ñe nocpa, ñeñt'pa' atto ama ahuamencatoyenaye' entenno acheñenesha'. 31 Yomporpa' eñotenen ñeñt atet notenes, ñeñt'pa' ama shequëntsoyaye. Ñeñtara Yompor ñeñt Pompor pen ñaña Yepartseshar Jesucristo ñeñtcha'ña ya'ye'chochtaterr tayoteñ errponohuañen. 32 Ñehua, napa' o'ch neyerpatasa atet a'pareten ahuañmo'cha allempo Damasco'tsenen. Ñehua, ñeñt añcha'tarettatse't all Damasco, ñeñt'pa' ñeñtara añcha'tare't Aretas pueyoçhresha'. Ñeñtña nene'ña guardianesha' ñeñt

camretsa allemeñ yetarroť. Ñetpa' añecop camrenet attoch rroma'netañpa' o'ch yottam̄pesnetañ allcha' coñchatnetañ. ³³ Tarraña napa' arr esha'tnet cañfro attoña čha'nmaterrnet ventanoť allotña a'suatam̄perrnet cončhtot. Attoña e'ñe cohuen nequeshperra, ñeñfo'marña ama eshcaye' rroma'noña guardia.

12

Atto Pablopa' a'tapataretta Yompor pue'ntaño ñeñt e'ñe poma'ptaño hua

¹ Ñeñt atto señosatse'tatyenen e'ñe cohuen nocpa, ñeñtpa' ama es sherbeno. Tarraña ama't atteñpa' o'ch alla neserrpare'taterrerr atto Yepartseshar ñaña es negatyene' ñeñña es neñotatyene'. ²⁻³ Ñehua, napa' neñoteñ na puešeñarrana ñeñten ame'ñenaya Cristo te'pa' o' met čharra' puechena pa'tats char, allempoña napa' a'tapaten Yompor pue'ntaño ñeñt e'ñe poma'ptaño hua. Napa' ama neñoteñe, ñato' orate' nechtso a'tapatareten, amapa' ñato' necamquēñoťate' a'tapatnet. Ñeñtpa' Yomporña eñotene'. Napa' e'ñe neñoteñ po'ñočh a'tapatareten Yompor pue'ntaño all atarr nanac cosheñtso'tsa'yenet. ⁴ Ñoñets ñeñt ne'muena' allpa' ama aserrpare'teno tarro'mar ya arromñaŕey ama pocteyaye o'ch yeserrpare't allo. ⁵ Ñeñt atet aġareteneñ allempo, ñeñtpa' e'ñe poctet o'ch cohuen neñoseñ e'ñe nocpa, tarraña amach atet neġatsto, añachña nocshena atto ama ahuamencaťoyenaye' entenno acheñenesha'. ⁶ Ñehua, ñeñt atet aġareteneñ allempo ñeñtpa' e'ñe poctet o'ch cohuen neñoseñ e'ñe nocop, ñeñtpa' ama čhoje' notatse'teno, tarro'mar ñeñtpa' e'ñe po'ñočh atet aġareten. Tarraña napa' ama nemno o'ch cohuen neños e'ñe nocpa. Añachña nemnen ñeñtcha' cohuen entapretennet ñeñt e'ñe allpona entapretennet ñeñt atet es neġa'yen cohuen ñaña ñeñt e'ñe allpona e'mñotapretennet ñeñt atet e'ñe cohuen neserrpare'ten.

⁷ Atto Yepartseshar ñaña es negatyene' ñeñña es neñotatyene' ñeñtpa' atarr cohuen nanac yenteñ. Tarraña napa' attoch amach nocsheno e'ñe nañeñapa' Yomporña nemnatene' e'ñe nechtso ñeñña atarr nemueročtatame'tene' nanac. Ñeñt atto nanac nemueročhtena, napa' atet nenteñ ñerra'mrrate' aj nechtso tam̄pena ñeñtpa' oneñešeshoťña huennana ñeñña atarr atserr nepene'. Attoña Yomporpa' ama muenatenno o'ch nocshena e'ñe nañeña. ⁸ Napa' o' ma'poche'tats nenamueñ Yompor a'huañañperrnepa' ñeñt atarr nemueročtatene'. ⁹ Tarraña ñapa' ahuo't otenen:

“Amach na’huañañpsatsterrpe, tarraña napa’ atta chocma atarr nemuerenpa, papa’ ñeñña pepalltena. Tarro’mar ñeññ ama eñalle e’ñe ña po’huamencpa’ ñeññcha’ña orrtatene’ na nehuamenc.” Ñeññpa’ atet otenen Yompor. Ñeñño’marña atto napa’ ama eñalle e’ñe na nehuamenc, ñeññpa’ ñeññña atarr nocshatene’ na, tarro’mar neñoteñ ñerra’m attenpa’ Cristo po’huamencña ñeññ nechorrenaya; ñeññña norrtatenpa’, ama noyaye nehuamenc, ñeññpa’ Cristo. ¹⁰ Ñeñño’marña napa’ añ atarr nocshatene’ atto napa’ ama ahuamencatoyenayayno ñaña atto atarr pencna’ntatennet tarro’mar ama esoye’ entenneto. Ñaña napa’ añña nocshatene’ ñeññ allpon atarr echarrare’ nentyen, ñaña atto chocmach cotare’tennet, ñaña ama’t allpon ñeññ nehuenoya ñeññña atarr nocshatene’. E’ñe pocté’ nenteñ o’ch nemueroçhta Cristocop. Tarro’mar neñoteñ ñerra’m esempo ama ahuamencatoyenaye’ yenteno e’ñe ya, allempoña Cristopa’ ahuamencat peney.

Atto Pablopa’ atarr llequënana corinto’marnesha’ ñeññ ame’netsa

¹¹ Sapa’ atto señosatse’tatyenen e’ñe cohuen ñeññ e’ñe nocpa, tarraña ama’t atteñpa’ napa’ e’ñe po’ñoçh notatse’tyen, tarro’mar napa’ ama nepallteno o’ch neños e’ñe cohuen ñeññ e’ñe nocpa. Añña palltetsa sa o’ch señosapreten cohuen ñeññ e’ñe nocpa. Tarro’mar sapa’ señotenen atarr asherboyenen. Ama’t po’potantañ ñeññ atarr se’mñnotatene’ atarr ommo’chenetañ, ñetpa’ allsensarefeto’ Yomporeshot, ñetpa’ atarro’ nanac sherbenet, elloña napa’ atarr asherben entenen Yompor, ama’t napa’ ama esoye’ nenteno. ¹² Tarro’mar ahuañmo’cha allempo na’puena sesho, napa’ allña norrtatyesonas Yompor po’huamenc ñeññ atarr echarrare’ ñeññ sapa’ ama’t ahuatapa’ ama sentare ñeññcha’ña señotate’ ñeññpa’ Parets po’huamenc ñaña ñeññcha’ señotate’ napa’ po’ñoçh Yomporña nellsensene’. Ñeñño’marña e’ñe cohuen na’huantennas ñeññ atarr torrapo’ sentyen. ¹³ Attecma es norrtatyennas ñeññ atet nepa’yes po’potantañ ñeññ pame’ñeñotet apcha’yetsa allemeñ anetso’mar. Añña ama na’tsrre’moçhtana’taso es senamare’tyese’. Tarraña ñerra’m ama pocteye’ sentono ñeññ cohuenare’ neponaspa’, ñehua, ñato’ o’ch sepretnerren.

¹⁴ Te’pa’ poma’pocheñopa’ o’ch ahuerrnerr sesho. Attecmach nepohuerrerr, amach na’tsrre’moçhtana’taso es senamare’té’ ñeññ nepalltena na. Tarro’mar napa’ ama añeye’ ne’nen ñeññcha’ es sapuen na; napa’ añña nemnen o’ch sepomhua sañeña Cristesho. Tarro’mar napa’ atet nentenes ñerra’mrrate’ po’ñoçh e’ñe nechemer nepenes. Ñehua,

cheshaneshap' ama añeye' pallteneto o'ch es a'yapaçhet ñeñtcha' añño'tet pamo'mtayecop. Añña nanac palltetsa, pamo'mte'chña es a'yapaçhets ñeñt puechemereshacop. ¹⁵ Ñeñto'marña e'ñe nocsheñsha' o'ch nepomhua e'ñe nañeña ñeñtpa' e'ñech socop. Allochñapa' attoch sequeshperra saña. Ñaña allpon nechyen, e'ñe nocsheñsha'pa' o'ch nepomyeñ e'ñe socop. Ama't napa' elloña atarr nemorrentensa sañapa' o'huañ e'ñeye' semorrentenna na.

¹⁶ Sapa' señotenen napa' ama na'tsrre'moçhtana'taso es senamare'te' ñeñt e'ñe nocop. Tarraña sapa' çate' sotenapañ napa' atarrte' neñoteñ attoch neshcare'tas ñeñt e'ñe po'poñe'ttsoçma shecare'teñets. ¹⁷ Ñeñt nemña ahuañmo'cha epsheña sesho, çate' sotenapañ ñeñtpa' tarrecpate' attoch shecare'taset. ¹⁸ Ñehua, na te'pa' o' nesechach masheñ Tito ñeñtcha' tatsa sesho, epuet po'psheñeñ masheñ o' nemñanet epsheño'maret sesho. Sapa' çate' sotenapañ masheñ Titopa' o'ch shecare'tensa'. Ama't señoteñeña yapa' attecma cohuen yoçtape'chen yeyoçhro epan masheñ Tito ñaña attecma es ye'pa'yennas e'ñe cohuen.

¹⁹ Sapa' çate' sotenapañ añecpate' neñen cohuen nocop allochñapa' attoch o'ch alla cohuen sentuerren. Tarraña e'ñe nemorrenteño'es masheñeshacha' ñaña noçhaneshacha' o'ch notas, ñeñtpa' ama nocpayaye. Añecopña notenes ñeñt e'ñe socop allochñapa' o'ch alla huomenc seperr seyoçher Yomporecop. Napa' e'ñe neyemteño' Cristo, Yomporñapa' entenen ñeñt atet notenes. ²⁰ Tarro'mar e'ñe nellquëño'es sa noten, ñato' esempoç necherr sesho, ñerra'm attera nentyesuerrser ñeñt atet se'patse'tyena, napa' ñeñtcha'ña atarr nellcatuerrayerr sesho. Attoña ñerra'm sentapuerren nellquëñsha' necherr seshopa' ñeñtcha'ña sellcate' saña. Ñato' o'ch nentuerrser attera se'moñe'tannena, attera es seye'chapretannena, attera sa'tsrre'mare'tatannena sañeña attoch o'ch sa'mcha'tare'tta; ñato' attera sesasare'tanna'tyena, attera sa'metare'tam'psannena, ñaña e'ñe puesheña'ttsos attera atarr cohuen sentena sañeña, ñato' attera se'moñe'tanna'teño'pa' seche'çhame'tanna'tyena. ²¹ Ñaña napa' nellquëño'es sa noten, ñerra'm esempo necherrerr sesho po'pocheño'pa' ñato'rraña o'te' alla pencna'ntaterrnerr Yompor e'ñe so'mara. Tarro'mar ñato' patanta'ttsos ama sequeçhpueno ñeñt ama poçteye' enteno Yompor ñeñt atet seyçha'yen sa sosya'tsañeçhno, ñaña atto seçhta'yen coyaneshachno ñeñt ama se'aporeyaye, ñaña coyaneshap'a'cho'ña aguënan yacma ñeñt ama puerrollareyaye, ñaña atto sayom'atse'tyena ñeñt po'ñoçh

ama atet aṗapahuoyaye. Ñato' attera seṗatse'tyena atet sepe't ahuat ama llecatensoña so'chñar attoch soctape'cherr etserra cohuen. Ñeñto'marña ñerra'm esempo ne'cherrerr sesho ñerra'm attera nentuerrerr, nellqueñoṗa' chate' neya'na'tuerres.

13

E'ñe allohuanen atet cotape'chatyesnerranet pa'namen esocmañen

¹ Ñato' poma'pocheño o'ch alla ahuerrnerr sesho. Ñaña o'ch notas po'poñ, ñeñt otteñe'charettetsa, ñerra'm epsheña a'metare'tamṗene' amapa'ma'psheña, allempopa' pocte' o'ch ye'mñoch ñato' po'ñochte' atet ṗatse'tyena. ² Ahuañmo'cha allempo puepocheño ne'cherr sesho, ñeñt attera ṗatse'tyetsa ñeñt ama pocteyaye, napa' o' notuanet allempo ñeñtcha' atet aṗarettet ñerra'm atteretach. Ñehua, te'pa' necartotpa' o'ch alla noterraneterr ñet, ama't e'ñe allohuenes o'ch notas, ñerra'm esempo ne'cherrerr po'pocheño'pa' o'ch ne'ñotare'tuerres allohuenes ñeñtes attera ṗatse'tyetsa. ³ Allochñapa' sapa' e'ñech seño'tuenen po'ño'ch nach eñorostsa ñeñt atet muenatenen Cristo. Ñehua, ñeñtṗa' tarro'mar sapa' chocma senamuenen o'ch norrtatennasa' attoch seño'ten napa' po'ño'ch Cristo ne'ñoratene'. Ñaña Cristopa' e'ñe po'huamencoña chocmach erro'ten es ṗa'yennas, ñaña atarr ahuamencat penes. ⁴ Ñehua, po'ño'ch yeñoteñ allempo corso'tamṗset Cristopa' ama ahuamencateye' enteñeto tarraña Pomporña e'ñe po'huamencot alla tantater. Yapa'cho'ña attecma yeñotena ama ahuamencateye' yenteno ñerra'm ña, tarraña te'ña yapa' o' yocrrerra po'huamencot Yompor attey ñerra'm ña. Attoña po'huamencot Yompor e'ñe cohuen yesherbenes.

⁵ Te'pa' o'ch noterrerr, socoppa' añ poctetsa o'ch seño'ta sañeña, ¿po'ño'chte' same'ñena? O'ch seño'ta esheccha' seño'ch po'ño'chte' sapa' same'ñena. Ama't seño'teñe Jesucristoña sechorrenaya. Ñehua, ñerra'm po'ño'ch ama same'ñeño, amachña erro'teno't chorraso. ⁶ Tarraña napa' chocma necuenes o'ch chaponasa seyo'chro attochña seño'ten po'ño'ch napa' añ nellsensene' Yompor. ⁷ Napa' nema'yocheñoṗa' chocma nenamuennas Yompor socop attoch amach allo'na atet seṗatsto ñeñt ama cohuenayaye Yomporecop. Ñeñtṗa' ama añecpayaye attoch sapa' o'ch seño'tenen napa' po'ño'ch allsensareten Yomporeshot. Añecopña nenamuennas Yompor socop attoch sapa' chocmach seṗa'yen ñeñt cohuen enten Yompor, tarro'mar ñeñtṗa' ñeñtña e'ñe cohuentetsa

Yomporecop. Ñeñt'pa' atetña nemnen socop ama't napa' atet sentennoñ atet ñerra'mrrate' ama allsensareteno Yomporeshot. ⁸ Tarro'mar napa' ama nemno o'ch nepatare't ñeñt e'ñe po'ñoçh cohuentetsa Yomporecop. Napa' añña atarr nemnen o'ch nepatuahuoñ ñeñt e'ñe po'ñoçh cohuentetsa ñocop. ⁹ Ñerra'm soctape'cherr cohuen attochña huomenc seperr seyoçher Yomporecop amach nepallteno o'ch norrtatonas nehuamenc atto allsensareten Yomporeshot. Tarraña atetpa' e'ñe pocte'. Ama't napa' ama ahuamencatoyenaye' sentenno, tarraña ñerra'm sapa' ahuamencat perres Yompor, ñeñt'pa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc pa'nmue' seyoçher Yomporecop. ¹⁰ Ama't ella'paro'tsenen o'ch nequellquërrnaserr necarta, ama't ama nesena' sesho, allochñapa' o'ch alla soctape'cherr cohuen Yomporecop. Attochña ñerra'm esempo neçherr seshopa' amach cha muene' neche'çhame'tyesuerrso attoch señoton ñeñt atet llesensenen Yepartseshar. Tarro'mar atet allsensareten, ñeñt'pa' ama añecpaye' sherbeno alloch na'puerratatuerres, ñeñt'pa' añecopña sherben attoch neyenpas huomenc pa'nmue' seyoçher Yomporecop.

Arrpa' all e'ñe poctacma so'tnerranet po'cartot

¹¹ Te' masheññeshacha' ñaña noçhaneshacha' allohuach notas añ necartot. E'ñe neso'teñotespa' o'ch notas, Yomporepa'chña sa'nataya. Te'pa' ñeñt'ach noterriserr mame'. Allo'nepa'chña sesen cotape'chnomue' ñeñt e'ñe cohuentetsa Yomporecop. Ñeñt atto o' noctape'chaterriserr añ necartot, se'mñotonepa'ch neñoñ attoch socsherra e'ñe poctacma. E'ñepa'chña patrra soctape'chuen allohuenes, attochña e'ñech cohuen sentannena. Yomporepa'ch sa'nataya ñeñfara Yompor ñeñt atarr amorrentña ñeñfña atarr yocshatene' yeyoçhro. ¹² E'ñe semorrentanna'teño'pa' atetcha' sehuonñcha'tanna'tena ñeñt atet poctetsa Partsocop.* ¹³ Ñaña arrpa' allohuen ñeñt o' pueyochresha' perr Parets, ñetpa' mueneñet o'ch huonñcha'taset ñamet arr necartot.

¹⁴ Yepartsesharepa'chña Jesucristo sebensare'tamñpene' allohuenes, ñaña Yomporepa'chña semorrentaya attoch semorrentannena saña, ñaña Puecamquëñepa'chña sechorrenaya attoch e'ñe separrocmatuahua allohuenes epas Cristo. Te'pa' ñeñt'ach notas, ñeñt'pa' attetepa'chña Nompore. Allohua.

* **13:12** Po'ñoçh oteneý, "E'ñe semorrentanna'teño' ÷hoch setso'ttsa'pa'tannena ñerra'm esempo sehuonñcha'tanna'tena ñeñt atet poctetsa Partsocop." Ñeñt'pa' atet yeçhete't ahuat.

Pablo

AÑ SAN PABLO PO' CARTA ÑEÑT QUELLCAN GALACIO MARNESHA, GÁLATAS

Atto Pablopa' quellcan carta añecop ñeñt ame'ñetsa anetso Galacio

¹⁻² Masheñneshacha' ñaña nochaneshacha' ñeñtes allohuenes same'ñeñoť apcha'yetsa allemeñ anetso Galacio'mar. Na Pablon sequellquene'ña añ carta ñeñten Jesucristo puellsensaren. Napa' ama acheñeye' nellsensenaye, Jesucristoña nellsensene' epuet Pompor Parets ñeñt tantaterre' Puechemer rromot. Ñaña allohuen masheñneshachno ñeñt parro arro'tsenen, ñetpa'cho'ña mueneñet o'ch huom'cha'taset ñamet añ necartot. ³ Te'pa' e'ñe nehuom'cha'teñoťes o'ch notas: Yomporepa'chña sebensare'tam'pene' ñeñt atarr Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyo'chro allohuenes. ⁴ Ñeñtara Jesucristo ñeñt e'ñe pocte' ente' o'ch rroma yo'chñarecop attochña yapa' cohueno'tseneycha' ama't añ patsropa' sosya'tsaño'tsenya, țarro'mar ñeñtpa' atet pocte' eñch Pompor ñeñtara Yompor ñeñt nanac Parets. ⁵ Ñeñtara Paretspa' aye'cho'chtaterrapo'ch e'ñe țayoteñ errponohuañen. Ñeñtpa' attetepa'ch Nompore.

All eñotatanet atto ama eñalle po'poñ alloch yequeshperra

⁶ Te' napa' o'ch notas: Eso'mare'tña e'ñe mamecmapa' o' alla soctape'chyerr po'poñ. Sapa' cha semneñ o'ch seque'chpuer Yompor ñeñt o' hua'ñerres o'ch same'ñerrñaña Puechemer Cristo ñeñt rromats attoch sequeshperra. Tarraña sañapa' cha semneñ o'ch alla soctape'cherr po'poñ ñeñto'ch sa'queshpaterrayeñ. ⁷ Po'ño'chpa' ama't ama eñalle po'poñ alloch yequeshperrapa' añña ñeñt huapyetsa seshopa' ñetpa' cha mueneñet o'ch alla moñne'taterrset soctapña. Ñaña ñetpa' mueneñet o'ch a'po'poñetonaset soctapña ñeñt cotapñats po'ño'ch alloch yequeshperra e'ñe yame'ñeñoťa Cristo. ⁸⁻⁹ Tarraña napa' o'ch notas: Ama't erra'tsencha' seserrpare'tate' po'poñ cotapñats ñeñt ama ñeñtarayaye ñeñt atet o' same'ñerra ahuañapa' ñeñt acheñerpa' amuepa'ch yenpueñe Yompor. Ama't yapa'cho'ña ñerra'm o'ch alla yeserrpare'taterrser ello ñeñt ama ñeñtarayaye ñeñt atet o' neserrpare'tatuas ahuaña ñeñt po'ño'ch alloch yequeshperra yapa'cho'ña amuepa'ch allo'na yenpa'nenye Yompor. Ñaña

ama't añ atet patsa ñeñt Yompor po'millañoñer entotpa' ama't ñapa'cho'ña amuepa'ch yenpueñe Yompor. Ama't ñeñtpa' o' notuaseñ ahuatoteña' tarraña te'pa' o'ch alla noterrser, amuepa'ch yenpueñe Yompor ñeñt atet petsa.

¹⁰ Te' sapa' señotenen napa' ama añeçpaye' notenso attoch cohuen entenen acheñ, añña nemnen o'ch cohuen entenen Yompor. Ñaña ama acheñeneschaye' nemneno o'ch nocshach tarro'mar ñerra'm añña orameñ nemneñ o'ch nocshach acheña' ñeñtepa' amate' erroteno noto napa' pueyocher penen Cristo.

Atet pa Pablo allempo errte' allsensaretterra

¹¹ Napa' nemneñ masheñneshacha' ñaña nochaneshacha' o'ch señoçh ñeñt atet neserrpare'tatas ahuaña' ñeñtpa' ama acheñoçyaye poçtaña alloch yequeshperra. ¹² Napa' ama acheña neñotatenaye atet, ñaña napa' ama esesha' neyçhatenaye. Añña e'ñe Jesucristo ñaña e'ñe neñotatene' atet.

¹³ Sapa' o' se'mare'tuan atet nepe't ahuaño'mo'cha allempo noctoñe't judionesha' poçtaña. Napa' allempo nanac noctare'che't ñeñt ame'ñenaya Yompor. Napa' atarrcha' nemne't o'ch na'cllatuanet. ¹⁴ Napa' e'ñe netsotoñe't judionesha' poçtaña. Napa' ello nemtana'tue't shonte' nacmanesha' judionesha' ñeñt parro neyemte't. Napa' nanac nema'yoçhroñe't judionesha' poçtaña ñeñt atet yeche't ahuañneshañ, ñaña ñeñtara atet yeçhatyesete't ñaña puechemereshañ. ¹⁵⁻¹⁶ Tarraña Yomporpa' ahuo't acrerren ahuatoteñ ama't allempo ama ne'ñalletena'. Tarro'mar allempo çhap allempoch eñotaterrenpa' o' yematerrna Puechemer ñeñtara Jesús. E'ñe puemuereñoten nanacpa' o' çhore'terren attoch nach serrpare'te' po'ñoñ allo'tsa'yen ñeñt ama judioneschayaye. Ñaña allempo e'ñe poçte' enteñ Yompor o'ch eñotaten atetpa' napa' ama esesha' na'p'to'to ama't puesheñarra. ¹⁷ Ñaña ama't Jerusaléña' ama neto o'ch nenteña' ñeñt allsensaretnesha' ahuatoteñ. Elloña napa' arra ahuen all oteñet Arabia, allpa' ama acheñempañoçyaye. Allña' all na'llponmatena' e'ñe alla; allotña' alla nepuerrerra Damasco.

¹⁸ O'ña met ma'pa char allempaña' ahuen Jerusaléno o'ch nenteña' masheñ Pedro. * Allña' alla na'pa ñesho çharramat puechena amnarmat. ¹⁹ Tarraña allempo allo'tsenenpa' ama nenteño po'psheññeçhno ñeñt allsensaretnesha', ñap'ta nenteña' masheñ Jacobo† ñeñtara ñeñt pa'mo'nasheñ pen Yepart-seshar Jesús. ²⁰ Po'ñoçhpa' ama't Yomporpa' eñotenen ñeñt atet notenespa' ñeñtpa' e'ñe po'ñoçh atet.

* **1:18** Añ Pedropa' ñeñtara otenet Cefas. sochenet Santiago.

† **1:19** Jacobopa' ñeñtara ñeñt

21 Allempoña nerr, arr nasuanerr Sirio'mar ñaña Cilicio'mar. 22 Tarraña ama't allempo ñeñt ame'ñenaya Cristo all Judeo'marpa' ñetñapa' ama eseshaye' nechme'tenaye. 23 Tarraña ahuo't e'mare'chet ñeñt cotare'tahuete't ahuaña te'ñapa' o' serrpare'terran attoch yame'ñerra ñeñtara cotapñats ñeñt chocma mueneñ ahuaña o'ch huapore'tater. 24 Ñeñto'marña te'pa' e'ñe no'marpa' nanac aye'chochtateññañet Yompor.

2

Atto po'psheññechno allsensaretnesha' e'ñe pocte' eñchet Pablo

1 Allempoña o' meterrerr çharra' char puechena pa'tatspa' o' alla ahuernerr Jerusaléno epan ñaña masheñ Bernabé. Ñaña o' nanemñ masheñ Tito. 2 Napa' ahuernerr alla tarro'mar atet oten Yompor. Allempoña nechap Jerusaléno'pa' neserrpare'tatosanet ora allohuen ñeñt atet o' neserrpare'tatue ñeñt ama judioneshayaye. Neñotach ñaña jerusaléno'marnesha' ñeñt atet neserrpare'tatyen acheñenesha' e'ñe yame'ñeñoña Cristopa' o'ch yequeshperra. Ñehua, ñanompa' neserrpare'tach ñeñt añcha'taretetyetsa Jerusaléno e'ñe ñapfeto. Napa' tarro'mar notanet atet allochñapa' attoch neñoç ñato' pocte'ch entapretnet ñeñt atet nepena, allochñapa' atto neserrpare'tatyenpa' amate' e'ñe orrena neserrpare'tyeno. 3 Allempoña neserrpare'tatuanet atetpa' e'ñe pocte' eñchet ñeñt atet neserrpare'tyen. Ñeñto'marña ama't allo'tsen masheñ Tito ñeñt ama judioneshayayepa' ama't e'ñe puesheñarrofetapa' amaña eseshaye' notaye netsorrachepa'to' masheñ Tito tarro'mar ñapa' ama judioneshayaye.* 4 Tarraña ama't allempopa' ama eñallñeña ñeñt torrapo' yentyenpa' añña puesheña'tetspa' o' huapyesa yesho. Ñaña ñetpa' ama't otenetañ ahuo' ame'ñerret atet ñerra'm ya tarraña e'ñe a'nahuapa' mueneñetañ ahuo'ch nonayet ñoñets ñeñt nanac torrapo' yenten. Ñetpa' añeçpa huapuet a'nahua o'ch e'monayet atto yapa' yoten e'ñe yame'ñeñoña Cristo Jesúsapa' o'ch yequeshperra. Tarraña ñetpa' añña mueneñetañ o'ch alla nerrnayet judionesha' poçtapña ñeñt nanac torrapo' yenten. 5 Tarraña yapa' ama yemnataneto ama't e'ñe mamesha, tarro'mar yapa' ama

* 2:3 Añ ñoñets "atsorraret", añ ñeñt otets atet yeche't judionesha'. Ñeñpa' atet: Ñerra'm allempo eñalletena asheñorrofollesha' ñeñt e'ñe judionesha'pa' añña pomporpa' o'ch tsorratenet po'chtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'chtso allcha' tsorret asheñorrofollla' all e'ñech poteretollo e'ñe poñoç pa'rrmatollo.

yemno o'ch alla ya'po'poñetañperres ñeñt cohuen ñoñets ñeñt e'ñe po'ñoch alloch yequeshperra.

6 Allempoña neñotach añcha'taretnesha' ñeñt Jerusaléño'tsa'yen ñeñt atet o' nepohuapa' tarraña amaña errof otneto ñeñto' nepalltena ñeñtcha' atet neña. Ñehua, po'ñoch napa' ama nepallteno o'ch e'mñotaten añcha'taret tarro'mar ama ñapña añcha'taret pocte' entenoña Yompor. Ñeñto'marña ñeñt pa'mñcha'taretneshar penet ñeñt ame'ñetsa amaña errof otneto ñeñto' nepalltenmeñ ñeñtcha' atet neña. 7 Añña ñetpa' e'ñe pocte' entnet, tarro'mar o' eñochet napa' po'ñoch allsensareten o'ch neserrpare'tach acheñenesha' cohuen ñoñets, ama't ñeñt ama judioneshayaye. Attecma ñaña masheñ Pedro allsensaret o'ch serrpare'tan cohuen ñoñets judioneshacop, napa'cho'ña attecma allsensareten o'ch neserrpare't cohuen ñoñets añecop ñeñt ama judioneshayaye. 8 Tarro'mar ñeñtara Yompor ñeñt llesense' Pedro o'ch serrpare'tatan judionesha', napa'cho'ña ñeñtara Yompor ñeñt nellense' ñaña o'ch neserrpare'tach ñeñt ama judioneshayaye.

9 Ñeñto'marña ñeñt añcha'taretetyetsa atet ñerra'm masheñ Jacobo ñaña masheñ Pedro ñaña masheñ Juanpa' ñetpa' e'ñe eñochet po'ñoch napa' Yompor o' yenpuerren. Ñeñto'mar ñetpa' e'ñe cohuen agapyet epan masheñ Bernabé. Pagapueño'taypa' orratyet pot po'cohuenrof attoch yeñotanna'ta e'ñe attecma yoctape'chen Yomporecop. Allempoña ñetpa' e'ñe pocte' entyet yeserrpare'tachepa'to' ñeñt ama judioneshayaye, atet ñerra'm ñetpa' o'ch serrpare'tachet ñeñt judionesha'. 10 Ñetpa' aña paterr otyet, es yapa'yese'pa'to' huocchañnesha'chno; ñeñtña ama't napa' e'ñe pocte' neñch ñaña.

Allempo Pablopa' muene' che'ptare'tan Pedro

11 Tarraña allempo chap ñaña masheñ Pedro Antioquíopa' napa' cha muene' neche'ptare'ch allempo yeserrpare'ten parro, tarro'mar allempo ñapa' añ pa ñeñt ama pocteyaye. Ñeñtpa' atet pa, 12 allempo e'ñe errete' chets masheñ Pedro Antioquíopa' ñapa' allenta rrallme'chapretosan ñeñt ama judioneshayaye. Tarraña allempoña cha'cha't ñaña puesheña'tets ñeñt huetsa masheñ Jacobueshotpa' allempoña masheñ Pedropa' o'huañ rrallme'chapretan ñeñt ama judioneshayaye, tarro'mar ñapa' añ mecha'ten ñeñt cotene' judionesha' poctapña. Ñeñto'marña e'ñe allempopa' o'huañ rrallme'chapretanet, ñaña o'huañ yemtanet. 13 Añpa'cho'ña judionesha' ñeñt ame'ñetsapa' ñetpa'cho'ña o' atet pa'yaset

ñamet ñeñt atet pena masheñ Pedro. Ñeñto'marña allempopa' ama't masheñ Bernabépa' o' p̄achet ñaña ñeñt atet penet ñet. Po'ñoçhpa' ama't eñoteñetañ ama atet āpapahuo. ¹⁴ Tarraña allempo nentanet ama e'ñe paçharroye' peneto ñeñt cohuen ñoñets ñeñt po'ñoçh Yompor po'ñoñ allempoña napa' atet noch masheñ Pedro e'ñe allo'tsa'yen allohuen acheñenesha', ñeñtpa' atet noch: "Papa' ama't judioneshapeñpa' tarraña o' pēpohua ñeñt atet pena ñeñt ama judioneshayaye, te'ñapa' eso'mare'tña p̄añaapa' pemneñ o'ch penoñña ñeñt ama judioneshayaye añ ñoñets ñeñt atet anaret judioneshacop ñeñt ama't p̄apa' ama atteye' pepeno atet anaret añ ñoñets."

Ama't judionesha'pa' e'ñech attecma a'queshp̄ataretterret ñerra'm ame'ñeretcha' Jesús

¹⁵ Yapa' e'ñe judiona'tareshot e'ñalletñay. Tarraña yapa' ama atteyaye ñerra'm ñeñt ama judioneshayaye ñeñt nanac ochñañ. ¹⁶ Tarro'mar ya ama't judioneshaypa' yeñoteñ e'ñe yame'ñeñoña Jesucristopa' o'ch pocte' enterrey Yompor, ñeñtpa' ama añofeyaye o'ch e'ñe yepohua ñeñt atet anaret judioneshacop. Añña e'ñe yame'ñeñoña Jesucristopa' o'ch pocte' enterrey Yompor, ñeñto'marña o' yame'ñera Cristo, tarro'mar yeñoteñ e'ñe yetsoteñoña ñeñt atet anaret judioneshacoppa' amach pocte' enterreye Yompor ama't puesheñarroñeya.

¹⁷ Ñaña te' yapa' e'ñe yame'ñeñoñ Cristopa' yeñoteñ e'ñech pocte' enterrey Yompor. Tarraña ama't atarr yeyemteñapa' çhocmach yentena yapa' ochñañey. Ñeñto'marña sapa' çhate' sotenapañ Cristopa' ñeñtte'ña ochña'tatañtetsa. Tarraña ñeñtpa' amaca'ye atteyaye. ¹⁸ Tarraña ñerra'm o'ch alla yoctape'cherrerr ora allohuen ñoñets ñeñt atet anaret judioneshacop ñeñt o' yepuesuanom ahuañapa' elloña allempopa' o'ch alla yenterra yapa' nanac ochñañey. ¹⁹ Tarro'mar ñeñt ñoñets ñeñt atet anaret judioneshacop ahuatpa' te' napa' neñoteñ ñeñtpa' ama añecpayaye attoch o'ch ya'queshp̄aterra yañeña. Ñeñto'marña ya ñeñtey o' yame'ñera Cristo yapa' o' ya'ypo'ñamper attochña te'pa' o'ch yocrrerra cohuen Yomporecop e'ñe yeyoçhrohuen. ²⁰ Ñeñto'marña yapa' o' yequeçhpa'huerr atet muenatse'tatyese't yechets. Ñeñto'marña o' e'ñe atet yeperra ñerra'mrrate' o' corso'tam̄perryet epay Cristo. Te'pa' ama't ora yocrrenañpa' tarraña ama yaye' corretso, añña Cristo ñeñt yechorrenayapa' ñeñtña corretsa te' yechtso. Te'pa' e'ñe yeyemteñoñ Yompor Puechemerpa' yocrrena e'ñe cohuen arr patsro, tarro'mar ña yemorrenterraya, ñaña ña rromats yocop. ²¹ Ñeñto'mar te'pa' ama yemno o'ch yehuapore'terrñañ Yompor puemuereña

atto apuey Puechemer alloch yequeshperra. Tarro'mar ñerra'm eñalleñ attoch yequeshperrañ e'ñe yetsoteñoña ñoñets ñeñt atet anaretpa' ñeñtepñapa' atto rroma Cristopa' amate' es sherbeno.

3

E'ñe yame'ñeñoña Cristopa' o' yequeshperra, ama añ yet-soteñoñe ñoñets ñeñt atet anaret judioneshacop

¹ Sapa' nanac galacio'marneshacha' sepanteñ. Po'ñoçh sa o'ca'ye çha shecaset attoña te' sapa' o'huañ same'ñenaña ñeñt e'ñe po'ñoçh alloch yequeshperra. Ama't ahuaña allempo yeserrpare'tatensa'pa' yapa' añ yeñotatuas atto po'ñoçh Jesucristopa' o' acorso'tamñpsareña e'ñe yocop. Ñeñña po'ñoçh same'ñaña sa allempo. ² Ñeñto'marña te'pa' nemneñ o'ch neñotatas ama't añ paterr ñoñets: Sapa' e'ñe seyemteñoñ ñeñt Cristo po'ñoñ attoña chorrasaña Parets Puecamquëñ. Amaña añoñeye' chorraso e'ñe setsoteñoñ añ ñoñets ñeñt atet anaret judioneshacop. ³ Eso'mare'tña sapa' nanac sepanteñ. Atto sa ahuañapa' añ seyemtena Parets Puecamquëñ ñeñt ahuañmentat añaña' eso'mare'tña te'ñapa' o'ch alla seyemterrerr e'ñe sañeña setsotateñ. ⁴ E'ñehuachñaca' orrena atarr semuerochetyesa. Po'ñoçh ñato' ñeñtpa' amate' e'ñe orrenayaye ñerra'm o'ch alla soctape'cherr cohuen. ⁵ Ñaña allempo Yomporpa' chorratasa Puecamquëñpa' ñapa' añ orrtatonas partsoteñets e'ñe sesho. Ñehua, ñeñtpa' amaca'ye añoñeye' orrto e'ñe sa setsoteñoñ ñeñt atet anaret judioneshacop, ñeñtpa' añoñca'yeña orrta e'ñe same'ñeñoña ñeñt atet yeserrpare'tatuas.

Abrahampa' e'ñe pueyemteñoñ Yomporpa' o' pocte' eñch Yompor

⁶ Ñehua, Abrahampa' nanac yemtane't ñeñt atet och Yompor, ñeñto'marña Yomporpa' e'ñe pocte' eñche't. ⁷ Ñeñto'marña yeñoteñ ñeñt nanac yemtenaya ñeñt atet oten Yompor ñeñña Yomporpa' e'ñe pocte' enteñ atet ñerra'm puechemereshanet Abraham. ⁸ Yomporpa' e'ñe eñotue't ahuatoteñ ama't ñeñt ama judioneshayayepa' o'ch ame'ñeret esempo, ñaña e'ñe pame'ñeñoñetpa' pocte'ch enterranet. Ñeñto'marña ama't ahuatoteñpa' e'ñe anuaret po'ñoño. Yomporpa' atet otan Abraham: "E'ñe peshotpa' o'ch nebensare'tamñpes allohuen pa'namen acheñ." Ñeñto'marña yeñoteñ ama't ahuatoteñ Yomporpa' serrpare'tatane't Abraham ñeñt cohuen ñoñets alloch yequeshperra. ⁹ Ñeñto'marña yeñoteñ te'pa' allohuen ñeñt ame'ñenaya

Cristopa' e'ñe attecma cohueno'tsenacma atet ñerra'm Abraham ñeñt nanac ame'ñaye't Yompor ahuat.

¹⁰ Tarraña allohuen ñeñt yemtenaya ñoñets ñeñt atet anaret judioneshacop o'ch e'ñe etsotuet ñetñapa' o' anarettet allohuenetpa' a'coñchatare'tetcha' tarro'mar atet anuaret Yompor po'ñoño ama't ahuatoteñ, ñeñt'pa' atet oten: "Allohuen ñeñt ama etsotuenaye e'ñe poctacma allohuen allpon ñoñets ñeñt atet anaret quellco, ñaña ñerra'm ama pohueto allohuen ñeñt atet anaret'pa' a'coñchatare'tetepa'ch."

¹¹ Ñeñto'marña yeñoteñ amach pocteye' enterrye Yompor e'ñe yemneñño'a o'ch yetsotua añ ñoñets ñeñt atet anaret, tarro'mar amach errotenot yetsotuo ora allpon ñeñt atet anaret. Ñeñto'marña ama't puesheñarro'teyapa' amach pocteye' enterrye Yompor. Ñeñto'mar ama't Yompor po'ñoño'pa' atet anuaret ahuatoteñ, ñeñt'pa' atet oten: "E'ñe yeyemteño'a Yompor ñapa' o'ch pocte' enterrey attoch ello yocrrerra errponohuañen." ¹² Tarraña ñeñt ñoñets ñeñt atet anaret judioneshacoppa' ama atteye' oteno, ñeñt'pa' atet oten: "Ñerra'm yepohuencha' e'ñe poctacma ñeñt atet anaret'pa' esheccha' ello yocrrerra errponohuañen."

Cristopa' e'ñe pocte' eñch attoch ñach arrnomarettatsa yocop

¹³ Ñoñtsopa' ama't o'patatenyañ coñcheñets tarraña Cristopa' ñaña coñcherrtsa e'ñe yocop attochña yapa' amach yecoñcherro. Ñeñt'pa' yeñoteñ tarro'mar ama't ahuatoteñ'pa' atet anuaret Yompor po'ñoño, ñeñt'pa' atet oten: "Ama't erra'tsena acheñer puepencateñme'chatset cho echañchet tsachopa' ñeñt'pa' a'coñchatare'icha' entyes acheñenesha'." ¹⁴ Ñeñto'marña yeñoteñ e'ñe pame'ñeñotet Jesucristopa' o'ch eñalleta attoch Yomporpa' e'ñech pocte' entanet ñamet ñeñt ama't ama judioneshayaye, attecma pe't ahuatoteñ Yompor e'ñe pocte' entane't Abraham. Ñaña e'ñe yame'ñeñot'pa' attoña eñall attoch chorrerrya allohueney Parets Puecamquëñ, atet Yomporpa' otan ahuat Abraham.

Ñeñt atet Yomporpa' otan ahuat Abraham ñeñt'cha' atet poñ

¹⁵ Ñehua, masheñneshacha' ñaña nochaneshacha' te'pa' o'ch alla neñotaterrser po'poñ. Ñehua, ñato' o'ch netma'ntacha ñeñt atet yocrrena añ patsro. Atet ñerra'm puesheñarr yacmapa' o'ch a'poctachet epuet po'psheñeñ, o'ch quellcatet, allotpa' o'ch quellca'huet pa'so'cheñ all, allochñapa' amach errotenot esesha' a'po'poñeterroye po'ñoñ ñeñt atet o' quellcatuet, ñaña attoch amach esesha' huapore'terroye po'ñoñ. Atet yepena yama' ama't acheñaya atet petsa ellohuate'ñaca'

Yomporpa' ama pueno po'ñoñ. ¹⁶ Yompor ahuatpa' atet otan Abraham ñeñtcha' atet poñ e'ñe puesheñarroñ po'mrenñoñ. Tarraña ama allohuenaye' po'mrenñecop atet och, e'ñe puesheñarrocpa atet och, ñeñtpa' yeñoteñ ñeñtara ñeñt Cristotats. Ñeñtpa' attecma oten ama't ahuatoteñ Yompor po'ñoñ. ¹⁷ Añmapa' ñeñtña atet neychatenes. Ñehua, yapa' yeñotueñ atto Yomporpa' a'pochtachet ama't ahuatoteñ epuet Abraham. Allostña'p' allempo o' met cuatrocientos treinta charpa' allempoñapa' chap allempoch anaretta añ ñoñets judioneshacop ñeñt atet quellcanet Moisés. Tarraña ama't o' anaretta añ ñoñets ñeñt quellcanet Moiséspa' tarraña ñeñtpa' yeñoteñ amach erroteno huapore'tatereto ñeñt atet o' anaretetua ñeñt atet o' a'pochtata Yompor epuet Abraham ama't ahuatoteñ, tarro'mar Yomporpa' ama puenesho po'ñoñ. ¹⁸ Ñaña ñerra'm eñalleñ attoch yequeshperrañ e'ñe yetsoteñoña añ ñoñets ñeñt atet quellca' ahuat Moiséspa' ñeñtepñapa' amate' palltenañe attoch Yomporpa' otan ahuat Abraham o'ch eñalleta e'ñe ña po'mrenñoñ puesheñarr ñeñtcha' ya'queshpaterre' e'ñe yame'ñeñoña ñeñt atet oteney.

¹⁹ Añ ñoñets ñeñt atet net allempopa' ñeñtpa' atet pa: Yomporpa' ahuo't mueñan po'mllañoñeññaneshar attoch ñetpa' o'ch eñorana'chet Moisés attoch ñach a'mte' añ ñoñets judioneshacop. Tarraña añ ñoñetspa' e'ñe tarremphua sherba' allempo huapa Cristo atet Yompor otan ahuat Abraham. E'ñe po'ñoñch yame'ñeñoñ a'queshpaterreycha'. Te' ellonetpa' o'ch neñotatas ñeñtecop nanña ellonet Moisés po'ñoñ. Ñehua, ñeñtpa' añecpa anaretta attoch yeñoch ñeñt allpon ochña'teñets enten Yompor ñaña attoch ñeñtcha' yeñotatene' ñerra'm esempo o' yeñohua ñeñt ama pocteye' enteno Yompor. ²⁰ Tarraña allempo Yomporpa' eñorana'tana Abraham ñeñtcha' atet poñpa' allempopa' e'ñe ña ote' allame'tets. Allempo Yomporpa' ama esesha' oto po'psheñeñ ñeñtcha' a'mtahuet añ ñoñets.

Añ ñoñets ñeñt atet anaret ahuatoteñ judioneshacop añecopña sherben ñeñtcha' yame'ñaterraya Cristo

²¹ Ñehua, ñato' sapa' o'ch soten, ñeñtepñapa' añ ñoñets ñeñt atet quellcanet Moiséspa' ta', chote' epatenan Yompor po'ñoñ ñeñt atet otan ahuat Abraham. Ñeñtpa' amaca'ye atteyaye. Tarro'mar ñerra'm eñalleñ e'ñech ñoñtsoña ñeñt atet anaret o'ch etserrataterrnayeñ cohuen yeyocher Yomporecoppa' amate' palltenañeña po'poñ attoch pocte' enterrey Yompor; ñeñtpa' e'ñete' ñoñtsoña ñeñt atet anaretpa' o'ch pocte' enterreyeñ Yompor; tarraña ñeñtpa' ama atteyaye. ²² Tarro'mar

Yompor po'ñoñ ñeñt anuaret ahuatoteñpa' oteneý, allohueneypa' e'ñe yo'chña'tuen, amach errotenot e'ñe yetso-tuoñe ñeñt atet anaret Yomporecop. Ñeñto'marña ñeñtpa' ama añecpayaye alloch yequeshperra. Añña e'ñe yame'ñeñoña Jesucristopa' o'ch yequeshperra, ñeñtara Cristo ñeñt atet Yomporpa' otan ahuat Abraham.

²³ Ahuat allempo ama huena' Cristo ñeñtcha' yame'ñerrapa' amach errotenot ya'ypo'ñerro añ ñoñets ñeñt atet anaret. Atta yepet tarremphua allempo huapa Cristo attoña e'ñe yame'ñeñoña ñapa' o'huañcha' allo'na añcha'noçhta ñoñets yocop. ²⁴ Ñehua, ñato' o'ch netma'ntacha atet. Añ ñoñets ñeñt atet anaret judioneshacoppa' ña yecuanñpsaye't ahuat. Ñeñtpa' tarremphua atet pa' allempo huapa Cristo, ñaña añ ñoñetspa' añepa sherba' attoch ame'ñaterrya Cristo, allochñapa' e'ñe yame'ñeñoña ñapa' o'ch pocte' enterrey Yompor. ²⁵ Tarraña te'ña o' yame'ñera Cristopa' ama yepallteno ñeñtcha' allo'na yecuanñps'e'.

E'ñe yame'ñeñoña' atetcha' enterrey Yompor ñerra'mrrate' e'ñe puechemery Abraham

²⁶ Tarro'mar te'pa' e'ñe yeparrocmateñoñ Cristo Jesúspa' o'ch puechemer perrey allohueneý Pompor, tarro'mar e'ñe yame'ñeñoñ Puechemer. ²⁷ Ñaña allohuenes ñeñtes o' sapataretterra e'ñe same'ñeñoñ Cristopa' o' chorrerrsa Cristo. ²⁸ Ñaña te'pa' e'ñe yeparrocmateñoñ epay Cristo, Yomporpa' ama po'poñe'ttsocmaye' entenye, e'ñe attecma enteney allohueneý, ama't judionesha', amapa' ñeñt ama judioneshayaye, amapa' ñeñt ataruasataret e'ñe atta, amapa' ñeñt ama ataruasatareteye e'ñe atta. E'ñe attecma enteney allohueneý ama't asheñorrey, ama't ñaña coyanesha'. Tarraña Yomporpa' e'ñe attecma enteney. Tarro'mar e'ñe yeparrocmateñoñ epay Cristo Jesús e'ñe puesheña'ttsoypa' o'ch e'ñe yeparrocmatua allohueneý e'ñe parro. ²⁹ Ñaña ñerra'm yapa' Cristona'tareypa' añña Yomporpa' e'ñe atet enteney ñerra'mrrate' po'mireneñ peney Abraham. Ñeñto'marña yapa' o'ch yagapapreter ñeñt atet Yomporpa' otan ahuat Abraham ñeñtcha' atet a'nacha.

4

Atto Cristopa' a'huañamperran acheñenesha' atto añcha'noçhtanete't ahuat ñoñets ñeñt atet anaret

¹⁻² Ñeñt notenespa' ñato' o'ch netma'ntacha atet. Ñerra'm puesheñarr yacma eñall puechemer, esempoña o'ch po'nerr allempoch o'paterrana ora allpon echen pompor. Ñehua,

ama't yeñoteñ ñapa' o'ch o'paterrana ora allpon echen pomporpa' tarraña allempo ama po'nenapa' amach es o'patena' ama't coñeta. Ñaña allempo ama po'nenapa' amach errotent es pa'yeseña e'ñe ñoña, tarro'mar allempopa' chocma eñall puesheñarr ñeñt cohuañpene', ñaña allempopa' chocmach es tsa'teññañet ñeñt cheshar. Allempoña atet penapa' chach ottena ñerra'mrrate' atta ñañreteñet, ama't ora allpon echeneñ pomporpa' ñocpañ. Tarraña esempoña chap pompor ponañcho allempoch po'n puechemerpa' allemponapa' o'ch agapan ora allpon echen pompor. ³ Ñeñtpa' atet yepe't yaña ahua't. Allempopa' atet yepe't ñerra'mrrate' cheshaneshá'. Ñaña allempopa' aña yame'ñataye't ñeñt pocta'pña pa'yese't ahua'tnanesha' arr patsro. ⁴ Tarraña allempoña o' etsota allempo onañche' ahua't Yomporpa' o' mueñonay Puechemer arr patsro. Arrña'pa' eñalletach puesheñarr coyanesha' ñeñt judiona'tar. Añña ñoñets ñeñt atet anaret judioneshacoppa' nanac añcha'nochte't allempo ama't ñocop. ⁵ Tarraña Cristopa' añecop eñalleta attoch a'huañañperrey atto añcha'nohtena añ ñoñets yocop. Ñeñtpa' añecop atet pa' attoch puechemer perrey Yompor.

⁶ Te'ña Yomporpa' o' puechemer perrey ñeñto'mar o' mueñernay Puecamquëñ ñeñtcha' yeçherrtsa yeyoçhro. Ñeñtña Puechemer Puecamquëñpa' ñeñtcha' yeñotatene' ñerra'm esempo yeçhore'ch ama't Paretspa' e'ñe pocte' o'ch yoch, "Apa." ⁷ Ñeñto'marña te'pa' yeñoteñ o' puechemer perrey Yompor, ama pueñañrayaya penye. Ñeñto'mar yeñoteñ ñerra'm po'ñoçh o' puechemer perrey Yompor, yapa' yo'patapreterach ora allpon o'patatenya te' Yompor.

Ñerra'm yapa' o'ch alla yeyemterrerr añ ñoñets ñeñt atet anaret judioneshacoppa' ñeñtpa' e'ñech orrena nanac yetorrerra

⁸ Ahua't allempo ama seño'terra' ñeñt e'ñe po'ñoçh Yomporpa' aña seyomporer sepe't ñeñt po'ñoçh ama Yomporeyaye. Sañapa' ñeñtña nanac ame'ñatasete't. ⁹ Tarraña te'pa' o' senterr ñeñt e'ñe po'ñoçh Yompor, amapa' ñato' o'ch yot, Yomporpa' o' enterres sa. Te'ñapa' eso'mare'tña semneñ o'ch alla sepurrerra, o'ch alla same'ñerra añ co'ta'pñats ñeñt ama es sherbeno sañapa' allo'ch po'noçh sequeshperra. Eso'mare't semneñña o'ch alla setorrerrerr nanac ñeñt e'ñe orrena. ¹⁰ Ñaña sapa' chocma sonañcha'yen yet ñeñtcha' atet setsotayen atto'ch sequeshperrañ—puema'tets arrorr, ñaña pate'tets char, amapa' allempo chocma coshena judionesha'. ¹¹ Ñeñto'marña nellquëño'tpa' atet noten, ñeñt atto netorrrena ahuaña socoppa' ñato' amach es sherberro.

Arrpa' all yerpatanet atto ñetpa' e'ñe cohuen agapet allempo ñanom asena' Galacio

¹² Te'pa' o'ch masheñeshacha' ñaña nochaneshacha' notas, atarr nemneñ o'ch soctape'cherr atet noctape'chen na. Tarro'mar napa' o' na'ypo'ñerrñañ judionesha' poctapña. Te'pa' o' noctape'cherr ñeñt atet sepe't ahuat sa, allempo ama soctape'cherrñaña' judionesha' poctapña. Ahuañmo'cha allempo allo'tsenen seshopa' e'ñe cohuen semuera'ne't.

¹³ Sapa' seño tuenen atto napa' allempo ñanom nechap seshopa' napa' cha natsna'tos ñeñto'mar allempopa' eñall attoch neserrpare'tatas añ ñoñets alloch yequeshperra.

¹⁴ Ñaña ama't añ atsnañtsorpa' nanac sosey nenteñpa' tarraña sapa' ama setsena'tno, ñaña ama sa'ypo'ña'no. Elloña sapa' o' sagapuen e'ñe cohuen atette'ña ñerra'm Yompor po'mllañoñer huetsa sesho, ñaña e'ñe atet sagapuen ñerra'mrrate' ñaña Jesucristotets.

¹⁵ Ñehua, te'pa' eso'mare'tña o'huañ tama socsha'na. Ahuañmo'chapa' nanac semuera'ne't, ñaña allempopa' ama't esa nepalltapa' sañapa' o'ch'cho' sapuen, ñaña ama't añcha' nepalltañe't necle'pa' napa' neñotenes ñerra'm errotenot serrotañ seclle'pa' ama't ñeñtpa' ñeñte' sapnoñe't.

¹⁶ Ñato' sapa' chate' sotenapañ chote' o' ne'moñe'tas, tarro'mar napa' o' neserrpare'tatas ñeñt e'ñe po'ñoçh atet noten.

¹⁷ Po'potantañ ñeñt seychatene' judionesha' poctapña'pa' ama't nanac ma'yoçhretenañ socoppa' tarraña ñeñtpa' ama añecpayaye attoch yenpaset e'ñe po'ñoçh. Ñetpa' añecpa mopa'tenset attoch o'ch socshapretanet nanac e'ñe ñañeñeta.

¹⁸ Ñehua, napa' e'ñe pocte' nenteñ o'ch yemneñ acheñenesha' o'ch coshapretenyet ñerra'm po'ñoçh añecop yema'yoçhrena attoch yeyenpanet e'ñe po'ñoçh. Atet napa'cho'ña nemneñ çhocmach socshapretna ama't allempo ama allo'tsenye parro.

¹⁹ E'ñe nemorrenteñoñes atet nentenes ñerra'mrrate' nechemereshas, ñaña te'pa' alla nemueroçhterrerr socop. Atet nanen atserr atette'ña coyanesha' atsotenaya pue'mar.

Tarraña napa' çhocmach nemueroçhta esempohuach e'ñe chorrasa Cristo, attoch ñach soctape'chatterre' e'ñe poctacma cohuen.

²⁰ Esuaca' alla nene' tayecma sesho attote' neserrpare'tatas e'ñe cohuen, allochña'pa' amate' cha muene' neche'ptare'taso. Tarraña ñeñtpa' amach errotenot, po'ñoçhpa' çhocma sellcatenen.

Te'pa' e'ñe yame'ñeñot Cristopa' o'huañcha' yeyemta añ ñoñets ñeñt atet anaret; ñeñtpa' añ toma'ntena Agar ñaña Sara

²¹ Ñehua, te'pa' o'ch se'mñnoten sa ñeñtes muenets o'ch alla seyemterra añ ñoñets ñeñt atet anaret ahuatoteñ. Sapa'

ama't señoñe ñeñ atet oten añ ñoñets ñeñ atet anaret.
²² Ñehua, te'pa' o'ch neñotatas ñeñ atet oten ñoñets ñeñ
 atet anuaret Yompor po'ñoño ahuatoteñ. Ñeñtpa' atet
 oten: Abrahampa' eñall epsheña puechemer. Puesheñarrpa'
 arrot chemere't pueñañreshoñ ñeñ pa'taruasañer pe't. Ñeñ
 coyanesha'pa' añ sochena Agar. Po'psheñeññapa' e'ñe
 puetaporeshoñ chemere't ñeñ ama pa'taruasañreyaye.
²³ Ñeñ puechemer ñeñ eñalletatsa pueñañreshoñpa' atet
 eñalleta ñeñ e'ñe attecma yeyeçquëna allohueney acheñey.
 Tarraña po'poñ puechemer ñeñ eñalletatsa puetaporeshoñ
 ñeñ ama pa'taruasañreyaye ñeñtpa' añecop eñalleta
 attoch etsota Yompor po'ñoñ ñeñ atet otan ahuatoteñ
 Abraham. ²⁴ Ñeñ atet papa' ñeñtpa' añ yeçhateney
 tarro'mar añ epsheño'mar coyanesha'pa' añ toma'ntena
 atto Yomporpa' epsheño' a'pocatonay. Ñeñ Agarpa' añ
 toma'ntena atto Yomporpa' eñorana'tanet ahuat Sinaíño.
 Allempoteñ anaretta añ ñoñets ñeñtcha' atet etsotetañ.
 Ñeñña ñoñetspa' añ toma'ntena Agar, tarro'mar ña
 puechoyoresha'pa' añ amcha'noçhtana'tenahuet añ
 ñoñets ñeñ atet anaret. ²⁵ Agarpa' po'ñoç shallchenana
 aspenet Sinaípen ñeñ Arabio'tsen. Ñaña ñeñtara
 Agarpa' toma'ntenana judionesha' ñeñ pa'netser pene'
 Jerusaléñ. Tarro'mar allohuen judiona'tarpa' teme'ttsen
 añ amcha'noçhtana'tenahuet añ ñoñets ñeñ atet anaret
 ahuatoteñ. ²⁶ Tarraña ñeñtey ame'ñenaya Cristopa' añ ñoñets
 ñeñ atet anaret ahuatoteñpa' ama amcha'noçhteno yocop.
 E'ñe yame'ñeñoña allohueney Cristopa' e'ñe cohueno'tseney.
 Ñaña ñeñtpa' e'ñe cohuen yenteñ atet ñerra'mrrate'
 yachor. Ñaña ñeñtpa' atetcha' netma'ntatererr atet: E'ñe
 yeparrocmateñoñ allohueney epay Cristopa' e'ñe attey
 ñerra'm Yompor pa'netser etserra Jerusaléñ, ñaña ñeñtpa'
 e'ñe atet yenteñ ñerra'mrrate' yachor. ²⁷ Ñeño'marña
 atet anuaret Yompor po'ñoñ ahuatoteñ, ñeñtpa' atet oten
 toma'nteñtso:

Coshepa' coyanesha' mueçhoñ ñeñ ama achyore'tño, ñaña
 pocsheñeshoñpa' rranare'tepa' ñeñ ama't ahuatapa'
 ama patsotarano pue'mar, tarro'mar ama't añ coy-
 anesha' ñeñ aqueçparet mame' (ñeñtara Sarapa')
 shonte'ch acheñenesha' pachor perre'. Elloch metan-
 erran allpon puechoyor echen ñeñ agapue' puerrollar
 (ñeñtara Agar).

Ñeñ ñoñetspa' añ toma'ntena atto te'pa' yame'ñeñoñ Cristo
 ñeñña nanac sherbets attoch atonterra acheñ ñeñtcha' puey-
 ochresha' perr Yompor. Tarraña ñoñets ñeñ atet anaret

ahuatoteñpa' ñeñtpa' ama tama sherbeno attoch atonterra ñeñtcha' pueyochresha' perr Yompor.

²⁸ Ñehua, o'ch notas masheñneshacha' ñaña nochaneshacha', allohueney ñeñfey ameñenaya Cristo, yapa' attey ñerra'm Abraham puechemer ñeñt Isaac ñeñt eñalletatsa attoch etsota Yompor po'ñoñ ñeñt atet otoñ pompor Abraham. Tarro'mar yapa'cho'ña attoña yeñalletterra ello attoch etsota Yompor po'ñoñ ñeñt atet ote't ama't ahuatoteñ. ²⁹ Tarraña ñeñt eñalletatsa ahuat ñeñt e'ñe attecma yeyeçquëna allohueney acheñey (ñeñt sochet Ismael) ñapa' çhocma e'moñe'tane't ñeñt eñalletatsa atto etsota Yompor po'ñoñ. Attecmach perra ñaña te'. Ñeñtcha' eñallettertsa ñeñt e'ñe attecma yeyeçquëna allohueney acheñey ñeñtara ñeñt muenene' o'ch etsotan judionesha' poçtaþña ñetpa' çhocmach e'moñe'tenyet ñeñfey eñallettertsa Yompor Puecamquëñoç.

³⁰ Ñehua, ama't señoñeña ñeñt atet oteneý Yompor po'ñoñ ñeñt anuaret ahuatoteñ. Po'ñoçh oteneý atto Yomporpa' otan ahuat Abraham ñeñtpa' atet och: "O'ch pehuapore'ch peñañra epuet puechoyor, tarro'mar ña puechoyorpa' amach es o'patapretaþo, amach atteye' þo puechoyor ñeñt eñalletatsa petaporeshoç ñeñt ama þa'taruasañreyaye." ³¹ Ñeño'marña te' masheñneshacha' ñaña nochaneshacha' o'ch alla noterrser: Ama pallteno o'ch yame'ña judionesha' poçtaþña. Ñato' o'ch netma'ntacha atet: Ama puechoyoreyaye Abraham pueñañra ñeñt pa'taruasañer e'ñe atta. Añña puechoyorey Abraham puetapor ñeñt ama pa'taruasañreyaye. Ñeñtara ñeñt yoten e'ñe yame'ñeñoña Cristopa' e'ñech cohueno'tseney.

5

Atto te'pa' atarr cohueno'tseney, te'ñapa' amach yequeçpatstere

¹ Cristopa' o' a'poçtaterrnay attoch e'ñe yame'ñeñoñpa' cohueno'tseneycha'. Attoch yocoppa' amach añcha'noçhteno ñoñets ñeñt atet anaret judioneshacop. Ñeño'mar te'pa' amach allo'na same'ñatsterrerro judionesha' poçtaþña ñeñt nanac amuerochtatañ. E'ñepa'chña huomenc seþa' seyoçher Cristocop.

² Ñehua, te'pa' o'ch se'mñoten na ñeñten allsensareten ñeñtcha' atet notas: Ñeñt atet seyemtenañ atto'ch sequesterra e'ñe setsorranna'teñoçapa' tarraña ñeñtoç Cristopa' amach erroçenoç yenpaso.* ³ Tarraña te'pa' o'ch alla noterrser, ñeñt muenets o'ch atsorrarettapa' ñehua, po'ñoçh

* 5:2 O'ch secue' nota 2.3.

añ palltetsa ñaña o'ch e'ñe etsotuan ama't ñaña allohuen ñoñets ñeñt atet anaret judioneshap. ⁴ Ñeñtes muenets o'ch pocte' entas Yompor e'ñe setsoteñoñ ñoñets ñeñt atet anaretpa' sañapa' o' alla sequechpuerna Cristo. Ñeñto'marña te'pa' amach errotenoñ muererrso Yompor. ⁵ Tarraña yapa' e'ñe yeyemteñoñ Cristopa' e'ñe yocsheñesha' yecuen esempohuañencha' yechaçherr Yomporesho tarro'mar yeñoteñ o' pocte' entuerrey Yompor. Ñaña e'ñe ña Puecamquëñoñ te'pa' o' ya'pocataretterra. ⁶ Ñerra'm o' yeparrocmaterr epay Cristo Jesús'pa' ama sherbeno atto yetsorranna'tena, ñaña ama't ama atsorrareteyepa' ñeñtpa'cho'ña ama sherbeno Yomporecop. Aña ñapueñ sherbets e'ñe yame'ñeñoñ Cristopa' o'ch yemorrentanna'ta.

⁷ Sa ahuañmo'chapa' e'ñe cohuen same'ñye't Cristo. Te'ñapa' po'ñoçhca'ye o'cha a'psaterrsetña añ ñoñets ñeñt e'ñe po'ñoçh Yompor po'ñoñ. ⁸ Ñeñtpa' ama Yomporeye' sa'psatenaye, tarro'mar ñapa' o' hua'ñerres o'ch same'ñerrñaña Puechemer Cristo. ⁹ Ama't señoñeñe ama't puesheñarra yeçhatats po'poñ ñeñt ama po'ñoçhoyayepa' mameshapa' o'ch epa'hua erracmañen ñeñt atet yeçhaten. Ñato' o'ch netma'ntacha atet pena chase'. Ama'tcha' coñe'ta chasetoll yena'pa' mameshapa' o'ch a'chasa'huan emasa. ¹⁰ Tarraña ñeñt semoññe'tatene'pa' tsa'taterach Yompor, ama't erra'tsena atet petsa. Tarraña na e'ñe neyemteñoñ Yepartsesharpa' neñotenes te'pa' o'ch alla sequechpuerr ñeñt atet yeçhatenes po'psheñeñ, o'ch alla same'ñerra ñeñt neyçhatenes.

¹¹ Ñato' napa'cho'ña çhate' otyennet año' neserrpare'taten o'ch yetsorranna'ta attoch yequeshperra. Ñehua, masheñneshacha' ñaña noçhaneshacha' ñerra'm po'ñoçh ñeñtara neserrpare'tateneñ atetpa' amate' errotenoñ e'moñe'tennoñeña judionesha' ñeñt serrpare'tene' o'ch yetsorranna'ta. Tarraña po'ñoçhpa' ama atteye' neserrpare'tateno. Añña neserrpare'taten atto Cristopa' rroma corsocho yocop atto tsa'tuernaya yo'chñar, allochñapa' e'ñe yame'ñeñoña ñapa' o'ch yequeshperra. Ñeñtña atet neserrpare'teñoñ añña ñeñt serrpare'tene' o'ch yetsorranna'tapa' ñetñapa' ñeñtña nanac atsrre'matenahuet. Ñerra'm o'huañcha' atet neserrpare'tañpa' o'huañte' e'moñe'tnetañ. ¹² Napa' atarr nemneñ ñeñt çhocma semoññe'tatene'pa' o'te' alla quechpa'nerres.

E'ñe yemorrenteñoñ yamo'tspa' o'ch e'ñe yetsotua allohuen ñoñets ñeñt atet anaret Yomporeshot

13 Tarro'mar sa masheñneshacha' ñaña noçhaneshacha' o' hua'ñerres Yompor attoch cohueno'tsenescha'. Ñapa' ama mueno o'ch an'cha'noçhtena socop ñoñets ñeñt atet anaret. Tarraña ama't o' hua'ñerrey Yompor attoch cohueno'tseneypa' ñeñtpa' ama añecpayaye o'ch yeþa'yesa nanac sosey ñeñt atet muenateney yechets. Ñapa' mueneñ e'ñe yemorrentanna'teño'þpa' o'ch yeyenpanna'ta, tarro'mar yapa' cohueno'tseney. 14 Ñerra'm çho yemorrencha yamo'tspa' ñeñtpa' attoch ama't e'ñe parrotapa' o'ch yetsotua ora allohuen ñoñets ñeñt atet anaret ahuatoteñ Yomporeshot, tarro'mar Yompor po'ño'þpa' oteney: "Atarrepa'ch semorreñcha samo'ts e'ñe atet atarr semorrentena sañeña." 15 Tarro'mar ñerra'm sapa' çhocma se'moñe'teñ samo'ts, amapa' çha amtsen senteñ samo'ts, ñeñtpa' ama pocteyaye atet sepena, tarro'mar ñerra'm atet sepenapa' señocheþa'ch attoçha'ña çhach sa'çencatannerra e'ñe sagattsa.

Ñeñt atet coþape'chateney Parets Puecamquëñ, ñaña ñeñt atet muenateney yechets

16 Tarraña napa' o'ch notas ñeñt poctetsa ñeñt'cha' atet seþa. E'ñeþa'chña cohuen socrrena Partsocop ñeñt atet coþape'chatenes Parets Puecamquëñ. Allochñapa' amach allo'na seþa'yesneno ñeñt atet muenatyenes sechets. 17 Tarro'mar ñeñt atet muenatse'tateney yechetspa' ñeñtpa' ama yemtenano ñeñt atet coþape'chatyeney Parets Puecamquëñ. Añpa'çho'ña Parets Puecamquëñpa' ama yemtenano ñeñt atet muenatse'tateney yechets. Ñeñto'marña amach errotenot yocþape'cho e'ñe patrra coþapñats, tarro'mar ñetpa' çha e'moñe'tannenet. 18 Tarraña ñerra'm po'ñoçh yeþa atet coþape'chateney Parets Puecamquëñpa' allempopa' amach errotenot an'cha'noçhto yocop añ ñoñets ñeñt atet anaret ahuatoteñ, tarro'mar ñapa' añcha' þateney ñeñt atet muenen Yompor.

19 Ñehua, yapa' o' yeñotuer ñeñt atet muenatse'tateney yechets. Ñeñt allpon yemnatse'tyenpa' ñeñtpa' atet ñerra'mrrate' erra'tsente' cheta'yene' coyanesha' ñeñt amach puetaporeyaye, atet ñaña erra'tsente' coyaneshar ñeñt cheta'yene' yacma ñeñt ama puerrollareyaye, ñaña atet ñerra'mrrate' ñeñt nanac coþape'chyene' sosya'tsañ, ñaña ñeñt nanac yomenaya ottatsñats. 20 Ñaña ñeñt po'yomporer þa'yene' po'poñeçhno ñeñt ama po'ñoçh Yomporeyaye, ñaña atet pena achyo'tañeçhno, amapa' ñeñt atet pena pa'llerrnanesha' ñaña ñeñt atet pena amase'ñeñ. Ñaña po'poñ ñeñt atet muenatse'tyen yechetspa' ñeñtpa'

atef ñerra'mrrate' e'moñe'tanna'teñets, ñaña orroteñets, ñaña ye'chapretanna'teñets, ñaña atsrre'mare'teñets, ñaña moparrñats, ñaña elloptanneñets atfo amach e'ñe amo'tstanneneto, ñaña atef pena ñeñt cotape'chyene' po'poñ cotapñats ñeñt ama po'ño'choyaye. ²¹ Ñaña po'poñe'chno ñeñt atef muenatse'tyen yechetspa' atef ñerra'm ye'chapreteñets, ñaña muetsanna'teñets, ñaña posa'tarñats, ñaña arepsarñats porrare'teñoť, ñaña eñallmeñ po'poñe'chno shonte' attema't ñeñt atef o' notua. Te'pa' o' alla noctape'chaterrser ñeñtara atef notuanmas ama't ahuaña, ñeñt atef petsapa' amach es o'patatereto all añcha'tarettena Yompor.

²² Tarraña ñeñt pene' cohuen ñeñt atef ye'chateñ Parets Puecamquëñpa' ñeñtpa' atetcha' pena, o'ch morrentenana pamo'ts, ñaña e'ñech cosha'huen pueyo'chro Yomporecop, ñaña amach es llecatenaye ama't e'ñe mamesha, e'ñech ahuenta'huenan allohuen ñeñt echarr entyen. Ñaña ñeñt pene' cohuen ñeñt atef ye'chateñ Parets Puecamquëñpa' o'ch amuerañtena, ñaña o'ch yenpa'yenan pamo'tsesha', ñaña erroť o'pa' atetcha'cho' pena. ²³ Ñaña amach atsrre'ma'peno ñaña e'ñech puetpara es pa'yen. Ñerra'm ñeñtña atef o' ye'pohuapa' o'ch yetsotua allohuen ñoñets ñeñt atef anaret Yomporeshot. ²⁴ Ñaña ñeñt po'ño'ch o' pueyochresha' perr Cristo Jesús'pa' o' hueneran ñeñt atef muenatse'tyen yechets ñeñt atfo es yeye'chyena ya acheñey. Ñeñtpa' e'ñech atef yentena ñerra'm acorso'tam'psaretey. ²⁵ Atfo Parets Puecamquëñpa' o' apuerrey atfoch yocrrerra e'ñe cohuen Yomporecop, te'pa' añ pocte' o'ch ye'pa'yena e'ñe cohuen ñeñt atef cotape'chateney Parets Puecamquëñ.

²⁶ Amachña čha yommo'chueno, ñaña amach čha es yotnare'tanna'tyeno, ñaña amach čha yeye'chapretanneno.

6

Añ pocte' čhocmach yeyenpanna'ta atfoch yemesha allohuen topateñets

¹ Ñaña o'ch masheñeshacha' ñaña no'chaneshacha' notas, ñerra'm esempo seño'teñ po'psheñeñ o' p'ohua ñeñt ama pocteye' enteno Yomporpa' sa ñeñtes o' cotape'chaterrres cohuen Yompor Puecamquëñpa' sach alla cotape'chaterrahuet cohuen atfoch alla tanterret Yomporecop. Tarraña e'ñe semuereño'pa' e'ñech aco'pa soctape'chatanet cohuen. Tarraña sapa'cho'ña e'ñech seño'ta, te't sapa'cho'ña attecma se'pa samña ñerra'm esempo topatenes oneñet o'ch p'atenes ñeñt ama pocteye' enteno Yompor. ² Ñaña añ poctetsa čhocmach yeyenpanna'ta atfoch ya'huanta'hua allohuen topateñets. Ñerra'm

atetña yeṓohuapa' o'ch yetsotuoñ Cristo po'ñoñ ñeñt atet oteney o'ch yemorrentanna'ta.

3 Ñerra'm esesha' pommo'cheñoť oten, "napa' ama čho es neyečcateno Yomporecop ñeñt ama pocteyaye", ñeñtpa' ñañeñach shequętsa, tarro'mar po'ñočh ñeñt atet acheñpa' amach es sherbeno Yomporecop. 4 Tarro'mar puesheña'ttsoypa' čhoch ñanom yeñota errotente'ña yocrrena. Ñerra'm yeñotena e'ñe po'ñočh cohuen yoctape'chen yeyočhropa' ñeñtña nanac acsha'po'. Tarro'mar ama acsha'pahuo ñerra'm esempo yeñch po'psheñeñpa' o' ṓohua ñeñt ama pocteye' enteno Yompor. 5 Ñaña añ pocte' e'ñe puesheña'ttsoy o'ch ya'huanten topateñets ñeñt yehuenoya.

6 Ñaña te'pa' o'ch notas po'poñ: Ñeñt e'mñotene' Yompor po'ñoñpa' añ pocte' o'ch es cohuen apa'yeset ñeñt yečhatenahuet Yompor po'ñoñ.

7 Amach sepantatsche, o'ch señočh po'ñočh Yomporpa' ama allocchame'tpahuo. Tarro'mar ñerra'm yeyečcaten ñeñt cohuentetsa Yomporecop arr partsropa' ñach yapuerre' ñeñtcha' yocshaterre' tsapatonet. Tarraña ñerra'm yeṓa'yes ñeñt ama cohuenayaye, ñeñtpa'čho'ña ñach yetsa'taterraya esempohuañen. Ñato' o'ch netma'ntacha atet. Ñerra'm es yenare'tpa' ñeñtcha'čho' emere'tats tsapatonet. 8 Attecma ñaña ñerra'm añ yeṓatse'tyen ñeñt atet muenatse'tyen yechetspa' ñeñtara ñeñt yeṓa'yenapa' a'chencataterreycha'. Tarraña ñerra'm añ yoctape'chen cohuen ñeñt atet cotape'chateney Parets Puecamquęñpa' ñeñtara Puecamquęñoťpa' yocrrerrach esempohuañen. Ñato' o'ch netma'ntatererr atet: Ñerra'm te'pa' e'ñe cohuen yenare'ten, tsapatonetpa' nanaccha' coshaterrey. Tarraña ñerra'm te'pa' ama cohuenaye' yenare'teno, tsapatonetña'pa' nanaccha' llecaterrey. 9 Ñaña amach yemuenme'chatsche ṓa'yeset' ñeñt cohuenetyetsa Yomporecop. Tarro'mar esempohuañen allempoch e'ñe pocte' enteñ Yomporpa' apuerreycha' ñeñtcha' yocshaterre' ñerra'm amach čha yequečhpue. Ñato' o'ch netma'ntatererr atet: Ñerra'm te'pa' ama yemuenme'cheñe nare'tatspa' tsapatonetña'pa' nanaccha' shonte' me'tarsats. 10 Ñeñto'marña te'pa' o'ch notas: Chocmach yeyenpa'yes allohuen yamo'tsesha' tayepa'tña orameñ attoch yeyenpanna'ta. Ñaña añña nanac cohuen ñerra'm čho yeyenpueñ yamo'ts ñeñt parro o' yame'ñera Cristo.

Arrpa' all so'terranet añ cartot

11 Te'pa' e'ñe na nototpa' o'ch nequellconas mame'. Sapa' o'ch sent ñeñt ateshaclo'yerr quellecpa' ñeñtpa' na quel-lquëne'. 12 O'ch alla noterrser: Ñeñt muenene' o'ch tsorraspa' añe'cpa mueneñet attoch judionesha'pa' o'ch cohuen entanet. Tarro'mar ñetpa' ama mueneñeto o'ch e'moñe'tanet judionesha'. Ñetpa' eñoteñet ñerra'm o'ch ser-ppare'tet atto e'ñe yame'ñeño'ta Cristo ñeñt rromats yocop o'ch yequeshpapa' añña judionesha'pa' o'ch e'moñe'tanetpa' o'ch cotare'tanet. 13 Tarraña ama't ñeñt o' atso'rrare'tetuapa' ama ame'ña'hueneto allohuen ñoñets ñeñt atet anaret ju-dioneshacop. Ñetpa' añña muenenet e'ñe same'ñeño't ñetpa' o'ch tsorratatenset attoch ñetpa' o'ch ommo'chuernaset ju-dioneshesho sechets. 14 Tarraña napa' ama't ahua'tapa' ama nemno o'ch atet nommo'chena. Napa' añña nemnen chocmach na'ye'chochtatoñ Yepartseshar Jesucristo ñeñt rromats cor-socho yocop. Ñeñtña name'ñeño't o' neunerr ñeñt atet nem-natse'tyese't ahuañmo'cha ñeñt patso'marecpa. Te'pa' o'huañ nommo'cha ñeñt patso'marecpa. Napa' atet nentena ñerra'm acorso'tam'psare'ten. 15 Ama't ya'tso'rrare'ttatstapa' ñeñtpa' ama es sherbeno. Ñaña ama't ama ya'tso'rrare'ttatstopa' ñeñtpa'cho'ña ama es sherbeno. Añña nanac sherbets Yomporecop, o'ch yeterrataterr yoc'p'ña, o'ch yeye'chquerra etserra Yomporecop. 16 Yomporepa'chña sa'nataya allo-huenes ñeñtes atet petsa ñeñt atet o' notuas ñeñt cohuentetsa Yomporecop. Ñaña Yomporepa'chña semueraya allohuenes ñeñtes po'ño'ch Yomporena'tares.

17 Te'pa' ama pocteyaye ama't puesheñarrapa' o'ch alla orrtaterrnanerr ñeñt atarr echarr nenten nocop tarro'mar ñeñt atet ney'chatenpa' ñeñtña po'ño'ch Yompor poctap'ña. Tarro'mar teme'ttsen orretyena nechets all mare'tayena all aterrpatse'tyesnet ahuañmo'cha. Te'pa' ñeñtña eñotatyenahuet po'ño'ch napa' netorrena Jesúsocop ñeñt Yepartseshar yepen.

18 Te'pa' ñeñtach masheñeshacha' ñaña no'chaneshacha' notas, Yepartsesharepa'chña sa'nataya, ñeñtara Jesucristopa' ñepa'chña semueraya. Ñeñtpa' attetepa'chña Nompore. Allo-hua.

Pablo

AÑ SAN PABLO PO' CARTA ÑEÑT QUELLCAN EFESO MARNESHA' EFESIOS

Atto Pablopá' quellcan carta añecop ñeñt ameñetsa anetso Efeso

¹ Masheñeshacha' ñaña nochaneshacha' ñeñtes allohuenes pueyochresha' o' perres Parets ñeñtes ameñenaya Cristo Jesús all anetso Efeso. Na Pablon sequellquêneña añ carta ñeñten Jesucristo puellsensaren tarro'mar ñeñtpa' atet muenen Yompor. ² Te'pa' e'ñe nehuomícha'teñotes sa, napa' o'ch notas: Yomporepa' chña sebensare'tam'pene' ñeñt nanac Parets epuet Puechemer Jesucristo ñeñt Yepartseshar yepen. Ñetepa' chña socshatene' e'ñe sa seyochro allohuenes.

Atto Yomporpa' e'ñe pa'nateño'tey chocma apueney ñeñt atarr cohuen sherbets yecamquëñecop

³ Te'pa' aye'chochtatpahuépa'ch Yompor ñeñt Pompor pen Yepartseshar Jesucristo. E'ñe yeparrocmateño't epay Cristo, Pomporñapa' e'ñe pa'nateño'tey chocma cotape'chateney ora allpon ñeñt esocmañen cochnesha'tetsa all pue'ntaño ñeñt atarr sherbets yecamquëñecop. ⁴ Ate't ahuat pa'motroteñ allempo ama aye'chcatarettena' añe patserpa' Yomporñapa' allempoteñña acramperrey parro epay Puechemer Cristo attoch yapa' a'parrocmataterreycha' epay Puechemer. Tarro'mar añecop acramperrey Puechemereshot allochña yapa' añach e'ñe yema'yo'chrena ñeñt cohuentetsa Partsocop. Allochñapa' attochña e'ñe pocte' entueney Yompor, amach eñalle attoch otteñe'cherrey ama't e'ñe mamesha. ⁵ Ñapa' atarr morrentenya; e'ñe puemorrenteño'teyapa' o' e'ñe a'pocatonay yocop ama't ahuatoteñ. Ñeñtpa' attochña e'ñe puechemer perrey. Ñeñtpa' añña e'ñe etsotatuierre' Puechemer Jesucristo. Yomporpa' e'ñe atet a'pocatuonay tarro'mar ñeñt atto morrentya ñapa' atetña muenen. ⁶⁻⁷ Aye'chochtatpahuépa'ch Yompor atto ñapa' atarr nanac cohuen muerenya. Atto ñapa' ahuo't mueñonay Puechemer Cristo ñeñt rromosets yocop. Atto ashataretta po'rras ñeñtpa' alloña tsa'tuerrnaya yo'chñar. Te'ña ya e'ñe yeyemteño't Puechemer, Pomporñapa' attoña o' e'shohuerrnay ñeñt yo'chñar yepe't. Ñeño'marña yapa' yeñoteñ ñapa' atarr morrentenya. Atto atarr morrentenana Puechemer Jesúsapa' yapa'cho'ña attecma atarr morrentenya e'ñe

yeparrocmateñoŧ Yompor Puechemer. ⁸⁻¹⁰ Yapa' yeñoteñ Yomporpa' atarr morrentenya tarro'mar ña te'pa' o' eñotatuerrey e'ñe ora ñeñŧ atet cotape'chen ña ama't ñeñŧ ama eñotpahuo ahuaŧoteñ. Ñapa' o' e'ñe eñotaterrey yeyochro ñeñŧ atet muenen ña. Ñeñŧpa' añña atet muenen ña: Ñerra'm esempoch čhap allempoch etsoterra allempo onañche' ahuaŧ Yomporpa', allempoña Cristo ñach etsotatuerre' allohuen ñeñŧ allpon eñall, ama't ora allpon ñeñŧ pue'ntaño'tsa'yen ama't ñaña ora allpon ñeñŧ añe patsro'tsa'yen. E'ñech Cristesho a'yapa'cha'huerret allcha'ña e'ñe yeparrocmatuerr allohueney.

¹¹ Yomporpa' atarr cočhnesha' o'patatenana Puechemer Cristo. Ya'ñaña e'ñe o'patatena atto e'ñe yeparrocmateñoŧ Cristo. Ñehua, ñeñŧpa' atet cotape'che't Yompor ahuaŧ yocop. Ñeñŧo'marña te'pa' atetña o' perrnay ñeñŧ atet cotape'che't ña ñeñŧ e'ñe pocte' ente't e'ñe ña pomnenñoŧ. Tarro'mar Yomporpa' ama puenesho po'ñoñ, čhocmach e'ñe etsotuerra ñeñŧ allpon atet onañchen ña. ¹² Ñeñŧpa' atet e'ñe cohuen ponay Yompor allochñapa' attochña ya'ye'chočhtaterrñañ ora allohuen ñeñŧ po'cohuenña pen ña, allohueney ya ñeñŧey yanom o' yeyemterrñaña Puechemer ñeñŧara Cristo. ¹³ Sapa'čo'ña te'pa' o' se'muerrñañ Yompor po'ñoñ ñeñŧ ñoñets e'ñe po'ñočh alloch sequeshperra saña. Attoña sapa'čo'ña o' same'ñera Cristo. E'ñe seyemteñoŧa sa, Yomporñapa' o' chorraterrsa Puecamquëñ ñeñŧcha' señotate' po'ñočh o' puechemer perres. Ñehua, ñeñŧpa' ñeñŧara Parets Puecamquëñ ñeñŧ atet ote't ahuaŧ Yompor ñeñŧcha' aphuerrey esempo. ¹⁴ Ñeñŧara Puecamquëñ ñeñŧ apueney ñanom ñeñŧpa' ñeñŧcha'ña yeñotate' orameñ ñeñŧ o'patatenya Yompor. Attochña ñerra'm esempo a'queshpaterrey poctacma ñeñŧey o'patatena, allempochña yaguërr ñeñŧ allpon orameñ o'patatenya. Ñeñŧo'marña añ poctetsa ya'ye'chočhtatoñepa'ch ora allohuen ñeñŧ po'cohuenña pen ña.

Arrpa' atto ma'yochamĭpenanet Pablo

¹⁵ Ñeñŧo'marña na te'pa' o'ch notas, napa' o' ne'mare'tas atto sapa' atarr same'ñeña Yepartseshar Jesús ñaña ne'mare'tenes atto sapa' e'ñe cohuen semuerannena allohuenes ñeñŧes pueyochresha' perres Parets. ¹⁶ Ñeñŧo'marña napa' čhocma neparasyoso'teñ Yompor allempo nema'yochamĭpensa. ¹⁷ Ñaña nenamuennas Yompor ñeñŧ Pompor pen Jesucristo, ñeñŧara Yompor ñeñŧ atarr cohuen Partsotets. Añ nenamuennas, Yompor

Puecamquëñoṭpa' eñotatasepa'ch ñeñt e'ñe atet pena ña poctaṭña. Attochña sapa' esheccha' señoṭerrña ñeñt atarr cohuen sherbets ñocop ñeñt ama't ahuata sapa' ama señoṭeñe. ¹⁸ Ñaña ñapa' chapatonascha' seyoçhro attochña señoṭerrñañ ora allpon ñeñt po'cohuenña ñeñt yecuen ñeñtcha' aphuerrey Yompor esempo tarro'mar yapa' ñeñtecopña çhore'terrey ahuatoteñ. Ñaña o'ch señoçh atarr nanac cohuen ñeñtcha' aphuerrey Yompor, ñeñtṭpa' alloch yapa' corretsayach errponañohuen allohueney ñeñtey pueyochresha' pen. ¹⁹⁻²⁰ Ñaña te'pa' o'ch señoṭerrñañ Yompor po'huamenc atarr nanac huomenc ama atpa'huapahuo ñeñt atet ahuamencat peney allohueney ñeñtey ame'ñenaya ña. Ñeñtṭpa' ñeñtara po'huamenc ñeñt atarr huomenc orrtatan allo tantaterran Puechemer Cristo allempo rroma. O' tantater ñeñtara po'huamencot attoña çhapter ñesho allña' anorruerr Pompor po'cohuenrot all pue'ntaño allña e'ñe partsotuerr epuet Pompor. ²¹ Ña te'pa' atarr amcha'tareṭtena nanac. Atto amcha'tareṭtena ñapa' ñeñtṭpa' e'ñe metana'tuenan ora allpon allohuen ñeñt amcha'tareṭetyetsa ñaña ora allpon allohuen allsensareṭetyetsa ñaña ora allpon allohuen ñeñt ahuamencatetyetsa ñaña ora allpon allohuen ñeñt ayochreshatetyetsa ñaña ora allpon allohuen ñeñt cohuen entyetsa ama't allohuen so'chñetsoçhno. Cristoña po'huamencot e'ñe metana'tuenanet allohuenet. Ñaña ñapa' ama mamecpayaya atet peno, ñapa' tayoteñña ñaña errponañohuencha' atet pena. ²² Ñaña Yomporpa' o' nan Puechemer Cristo allochña' ñach pomnaren pene' ora allpon ñeñt esocmañen eñall. Ñaña allohuen allpon ñeñt ame'ñenaya, Yomporpa' attoña apanet Puechemer allochña' ñach yochresha'tenahuat allohuenet. ²³ Ñato' o'ch netma'ntacha atet: Allohueney allponey ñeñtey ame'ña'yenaya Cristo, Cristoña' e'ñe yeyoçher* yeṭohueñ allohueney, yaña' Cristo po'chets yepene' allohueney. Ñeñto'mar ñeñtey ame'ñenaya Cristo e'ñe allohueney e'ñe parrocmay, Cristoña' e'ñe ña yechorra'huenaya, tarro'mar ñapa' e'ñe po'chets ṭohueney allohueney.

2

Atto Yomporpa' e'ñe pueuereñoṭey ya o' a'quesṭaterrey

¹ Ama't atet ñerra'm sa. Sapa'çho'ña ahuatpa' aña soctape'chyese't ñeñt ama cohuenaye' enteno Yompor. ² Aña seyche't ñeñt atet ṭatse'tyena acheñenesha' arr patsro

* **1:23** Ñehua, po'ñoçh Cristopa' arr atma'ntataret atet ñerra'mrrate' ñeñt yoñ yepen.

ñeñt ama ame'ñetso. Allempo sapa' aña same'ñataye't oneñeñ ñeñt pa'm'cha'tareter pen allohuen ñeñt erracmañen añcha'no'chetsetsa ento't ñeñt ama entpahuoyaye. Ñeñtña oneñeñ pocta'pñapa' ñeñt atarr coshatene' allohuen acheñenesha' ñeñt atparñãttetsa te' arr patsro. ³ Ñehua, ama't allohueney ahua'tpa' e'ñe attecma yeyche't. Aña yoctape'chyese't ñeñt e'ñe atet yemnatse'tyen ya, ñeñt atet muenatse'tateney ya yechets ñaña ñeñt cohuen yente't e'ñe yañeña yocta'pño't. E'ñe ya yocta'pño't ñeñt atet yeyche'tpa' ñeñtaña e'ñe yoctape'chatse'tatiesaye't. Ñeñto'marña Yomporpa' aña o'patatye't attoch coñchaterrey. Ñehua, ama't allohuen po'potantañ acheñenesha' ñeñt atet patse'tyesete'tpa' Yomporñapa' e'ñe attecma o'patatanete't ñeñtara coñcheñets. Ñerra'm allempocmach yerromañpa' e'ñech yechenca'huerrañ, ⁴ tarraña Yomporñapa' atarr nanac amorrentña, atarr muerenya. E'ñe ña puemuereño'teypa' o' a'queshpaterrey. ⁵⁻⁶ Ñato' o'ch netma'ntacha atet ñerra'm o' yerroma yo'chñaro't tarraña Yomporpa' o' alla tantaterrey. Ñehua, allempo tantaterran Puechemer Cristopa' ya'naña tantaterr tarro'mar e'ñe yeparrocmaten epay Cristo. Ñaña atto chapaterran Po'cristor pue'ntaño allcha' atarr cosheñtso'tsen, ya'naña o' chapaterr allcha' atarr cosheñtso'tseney yaña tarro'mar e'ñe yeparrocmaten epay Po'cristor. O'ch netma'ntacha atet ñerra'mrate' o' yechap Yompor pue'ntaño allcha' yecohuentapretera Cristo. ⁷ Attoña Yomporpa' chocmach orrtatennay puemuereña ama't errponañohuen. Attoña o' chapuonaya yeyochro Yomporpa' atarr muerenya nanac. Atto atarr muerenana Po'cristor ya'naña atarr muerena tarro'mar yapa' yeparrocmaterrñaña Po'cristor ñeñtara Jesús. ⁸ Tarro'mar po'ño'ch e'ñe puemuereño'tey Yomporñapa' a'queshpaterrey e'ñe yeyemteño'fa ña. Ama año'teye'ña a'queshpaterreye atto e'ñe cohuenare' es ye'pa'yen ya. Yomporpa' e'ñe atta a'queshpaterrey. ⁹ Ñaña ama yetorreño'teye' ñocop a'queshpaterreyeña Yompor attoch tsa'terrya ñeñt allpon yetorra ñocop. Tarro'mar ñerra'm e'ñe yetorreño'fa ya'queshpatenañ, yañapa' chate' atarr cohuen yentena yañeña ñeñt atto ya'queshpatena. Allempoña Yomporpa' amate' a'queshpatañeye' yente'ne. ¹⁰ Tarraña Yomporpa' o' etserrataterrnay yocta'pña allochñapa' attoch e'ñe cohuen es ye'pa'yen. Po'ño'ch e'ñe yeparrocmateño't Cristo, Yomporñapa' o' etserra yechcaterrey. Tarro'mar ñapa' ama't ahua'toteñpa' atet cotape'che't yocop attochña yapa' e'ñepa'chña cohuenare' es ye'pa'yen.

Cristopa' e'ñe cohuen amo'tstatanna'tña allohuenacop

11 Ñehua, te'pa' o'ch alla seyerpuerra ñeñt atet sepe't ahuat. Allempopa' atarr allaparo'tsa'yenes Yomporeshot. Ñehua, sapa' atet eñalletñas ama judioneshayayso. Añña ñeñt atet eñalletena judionesha' ñetpa' aña ye'chenet o'ch tsorrannenet. Ñeñto'marña ñetpa' otarettenet atorrareñnesha'. Ñeñto'mar ñet sañapa' atta sochatse'tenset sapa' año' atorratareñneshayayso año' puechemereyayso Yompor. 12 Po'ño'ch allempo sapa' atarr allaparo'tsa'yenes Cristeshot tarro'mar ama separrocmaterra' epas. Ñaña ama't israelena'tarnesha' ñeñt otenet Yompor pueyochresha', sañapa' ama parro'marneshayayso. Ñaña atto Yompor a'pocatan israelena'tar allempo otanete't ñeñtcha' atet yenpuerranet esempo, saña allempopa' ama't mameshapa' ama se'mare'tpera'. Ama es secueno ama't mamesha ñeñtcha' sa'queshpaterre' tarro'mar allempo sapa' ama eñalle Seyomporer ñeñtcha' po'ño'ch seyemtena samña arr patsrot. 13 Tarraña te' sapa' o' señoter Cristo Jesús ñeñt rromats ñaña socpa'na. Ashataretta po'rras ama't samña so'chña'recpa'na. Ñeñto'marña yoten e'ñe po'rrasot attoña o' chapaterres samña Yomporesho ama't sa ñeñtes ahuat atarr allaparo'tsa'yenes Yomporeshot. 14 Tarro'mar Cristopa' atarr amo'tstatanna'tña allohuenacop. Ama't ya ñeñtey judioneshay ñaña sa ñeñtes ama judioneshayayso, Cristoñapa' ahuo't parro'marneshatatey allohueney. Ñaña ñeñt atto atsrre'mo'chen yentanna'tyese't ahuat ñaña'pa' o' huapore'tañpesyeny ñeñt yellopa'tetstatyese't ahuat. 15 Ñeñtpa' atet p'onay Cristo allempo rroma yocop. E'ñe ña po'chtso'tpa' o' a'huaña'mpeney atto añcha'no'chen yenten añ ñoñets ñeñt atet anare't ahuat judioneshacop, ñeñtara pa'namen a'pocateñtsoñ ñeñt atet anarettetañ ñocpuet ñeñtcha' atet p'ohuetañ. Attoña allempoteñpa' o' e'ñe patrra yoctape'chen ñeñt atet cotape'chateny Cristo. Allempoteñña amach alla atsrre'mo'chen yentanna'tyerre'te. Ñato' o'ch yot atto ahuat allohuen acheñenesha' ellopa'tetstete't e'ñe ñet pocta'ño'mareta, Cristoñapa' o' a'huaña'mpsanet attoña e'ñe parrocmatauerrey, e'ñe cohuen yamo'tstanna'tuerra allohueney. 16 Attoña epotanto'marey e'ñe yeparrocmateño't, Cristoñapa' e'ñe cohuen amo'tstaterrya ñaña Pomporesho. E'ñe puerromño't corsochopa' ñaña'pa' o' a'pocatonay Pomporesho. Atto ñapa' o' a'huaña'mperrey ñeñt ahuat atto chocma ye'moñe'tanna'tyese't.

17 Ñeñto'marña Cristopa' huapa. Ñach yeserrpare'tatose'

cohuen ñoñets atto ñapa' ña amo'tstanna'tatañtetsa. Attecma serrpare'tatosey allohueney, ama't sa ñeñtes ama judioneshayayso ñeñtes atarr allaparo'tsa'yenes atet entyenesña Yompor. Attecma serrpare'tatosey ama't yama ñeñtey judioneshay ñeñtey e'ñe allame'ttsa entyeney Yompor. ¹⁸ Attoña allohueney ama't ñeñtey judioneshatets ñama ñeñt ama judioneshayaye e'ñe Cristeshotecma e'mñoteneyña Yompor tarro'mar Puecamquëñpa'cho'ña e'ñe patrira ñeñt yechorrenaya allohueney. ¹⁹ Ñeñto'marña te'pa' o'ch notas, sa ñeñtes ama judioneshayayso, te'pa' e'ñe parro'marneshacmay enteneyña Yompor, ama't allohuen ñeñt pueyochresha' pen Parets, tarro'mar allohueney e'ñe puechemerasha' peney Yompor. Ñeñto'marña te' sa ama atteye' entenso atet ñerra'mrrate' ñeñt ama puentare ña, o'huañ atteye' entenes ñerra'mrrate' ñeñt atta huetsa po'poñ anetsot. ²⁰⁻²² Ñeñt atet entenes te'pa' ñato' o'ch netma'ntacha ñeñt atto yatomaten pocoll. Ñehua, atto cohuen torra'yese't allohuen ñeñt allpon Yompor puellsensarnesha' epuet ñama allohuen ñeñt allpon a'mta'yese't po'ñoñ, ñetpa' añ toma'ntete't ñeñt ñanom yatomaten allo echarr yepen yepaquëll. Ñama Jesucristopa' añ toma'ntena pocoll po'quellpach ñeñt atarr echarr orrene' pocoll. Ñehua, sa ñeñt atto o' separrocmaterra Yepartseshar Cristo, pueconer penes ñama pueyoñacher penes allohuenes ñeñtes e'ñe huomenc rremuene' pocoll. Attoña e'ñe cohuen sa'yechcataretterra puepahuarr pocoll, ñeñtes pa'paquëll o' perres Parets, attoña o' yecherra Puecamquëñ sesho.

3

Atto Pablopa' allsensaretterra o'ch serrpare'tatan ñeñt ama judioneshayaye

¹ Ñeñto'marña napa' chocma nema'yochena socop. Neserrpare'tateñoñes sa Cristo Jesús ñeñtes ama judioneshayayso ñeñto'marña na te'pa' yottam'pennet. ² Ñehua, sapa' o'te' se'mare'tuan atto Yomporpa' o' llesenserren e'ñe puemuereñoñen, nach a'potene' po'ñoñ socop sa ñeñtes ama judioneshayayso. ³ Señoteñfe' ñama atto gaterren Yompor atto te'pa' o' neñoterrñañ ñeñt ahuatoteñpa' ama eñotpahuoyaye. Ñehua, ñeñtpa' o' notuanmas mame' necartot. ⁴ Ñerra'm esempoch selleyon ñeñt nequellquënnas allempochña señoñ napa' po'ñoñ o' chapona neyoñchro e'ñe ora ñeñt atet sherbeney Cristo, ñeñt ama't ahuatoteñ ama eñotpahuoyaye. ⁵ Tarro'mar ahuatpa' ama chena' allempo

pocte' enteñ Parets o'ch eñotatey ya ñeñtey arromñateneshay ama't ñeñt corretsa allempo. Ñeñto'marña allempopa' ama e'ñeye' eñotatuanete'te atet ñerra'm te'pa' e'ñe Puecamquëñoť e'ñe eñotatuenan allohuen ñeñt pueyochresha' pen ña atet ñerra'm ñeñt puellsensarnesha' pen ñaña ñeñt a'mtene' po'ñoñ. ⁶ Ñeñt eñotateney te'pa' ñeñtpa' atto ama't ñeñt ama judioneshayaye, ñetpa'cho'ña o'patapreteretcha' Yompor ñeñtcha' apuerranet attecma o'patatenya yaña ñeñtey judioneshay. Te'pa' e'ñe separrocmateñoť Cristo, te'ña sapa' e'ñe po'chets penes atet ñerra'm ya ñeñtey judioneshay. Attoña o' e'ñe yeparrocmatuahuer allohueny. Ñaña atet ote't Yompor ahuat ñeñtcha' atet cohuen perrnay esempo e'ñe Cristeshot attoch a'queshpaterreypa' ñeñtpa' añecpa'ñaña ñeñt ama judioneshayaye. Ñehua, ñet añoť a'queshpataretterret atto e'ñe pame'ñeñoťet añ cohuen ñoñets ñeñt alloch yequeshperra allohueny.

⁷ Ñeñto'marña napa' o' naparetterra llesens attoch nach torrerraya serrpare'terre' añ cohuen ñoñets ñeñt alloch yequeshperra. Napa' atto naparetterra amaña añoťeye' o' naparetterro atto e'ñe cohuen es nepa'yen ñeñt e'ñe nocpa. Ñapa' e'ñe puemuereñoťen o' ahuamencat perren, ⁸ ama't napa' ama esoyayno ama't mamesha, atarr coñe'toť nesherven. Ora allohuen allpon ñeñt pueyochresha' pen Parets ñeñt sherbene' ña, ñaña ellone'tpa' e'ñe atet nentena ñerra'mrrate' atarr coñe'toť nesherbeñ Parets. Tarraña ama't ama esoyaynopa' Yomporña puemuereñoť o' muenaterren nach serrpare'tatyese' ñeñt ama judioneshayaye. Attochña nach eñotatyenahuet atto Cristopa' shonte' esocmañen echyen pa'namen ñeñtña yo'patapreteña ñeñtey yemtenaya ña. Ama't ya arromñataya amate' errotenoť e'ñe çhaphuonayo yeyoçhro ñeñt ora allpon o'patatare'tey e'ñe yeyemteñoť Cristo. ⁹ Ñaña nach eñotatyene' ama't allohuen acheñenesha' ñeñt atet cotape'chennay Yompor. Tarro'mar ñeñtpa' ahuatoteñ ama eñotpahuoyaye tarro'mar ama çhena' allempoch a'poterrnay Yompor, ñeñtara Yompor ñeñt e'ñe yeçcatuahue' ora allpon ñeñt yentyen. ¹⁰ Allochñapa' allohuen ñeñtcha' allpon ame'ñerrtsapa' ñetñapa' orrtateññañetcha' Yompor atto ñapa' atarr esocmañen es eñoten. Attochña ama't allohuen ñeñt amcha'taretetyetsa ñaña allohuen ñeñt allsensaretetyetsa all ento, ñetpa'cho'ña eñotueñet atto Yomporpa' atarr esocmañen es eñoten ñeñt nanac sherbets yocop. ¹¹ Ñeñtpa' atet cotape'che't Yompor ahuat pueyochreshacop ñeñtcha' sherbats allempoteñ e'ñe

errponañohuen. Ñaña añ onañche't ñeñtcha' etsoterre' poctapña ñeñtpa' añ Cristo Jesús ñeñtara Yepartseshar yepen. ¹² Ñeñto'marña yapa' e'ñe yame'ñeñoñ Cristo e'ñech yeñmañesha' yeçhore'teñ Yompor. Amach yem'cha'nañofeye' yeçhore'teñe tarro'mar añ yeyemteññaña Puechemer Cristo ñeñt o' a'poctaterrey Pomporesho. ¹³ Ñeñto'marña napa' o'ch notas, atto señotenen napa' atarr nemueroçhtena socop, sapa' amach sellquëñoña se'charrtatatsto seyoçher. E'ñepa'chña cohuen socshapretenna.

Atto Cristopa' atarr morrentenya

¹⁴ Ñeñto'marña napa' çhocma neconcorpuena Yomporeshonet allot nema'yocham'pensa. ¹⁵ Ñeñtara Yompor allot huena ora allpon pa'namen acheñenesha' ñeñt e'ñe pamo'tsna'tarecma p'annenet ama't ñeñt pue'ntaño'tsa'yen ama't ñaña allpon ñeñt patso'tsa'yen. ¹⁶ Atto Yomporpa' shonte' esocmañen echyen ñeñt atarr nanac cohuenñatsotets Puecamquëño'pa' ñepa'chña atarr ahuamencat sepene' e'ñe seyoçhro. Nema'yochëño'pa' atet nenamuennas Yompor. ¹⁷ Ñaña çhocmuepa'ch yeçhena Cristo e'ñe seyoçhro e'ñe seyemteño'ñ ña. Allochñapa' attochña e'ñe sagapoñ Yompor puemorrenteña attoch e'ñe huomenc sepa' seyoçher Yomporecop. Atet ñerra'mrrate' tsach ñeñt atarr erçhat e'ñech huomenc orrena patso, allochña pue'chorpa' e'ñech cohuen ten. ¹⁸⁻¹⁹ Allochñapa' attochña atarrcha' huomenc çhaponasa seyoçhro atto Cristopa' atarr nanac morrentenya. Ñeñt allpon atto atarr morrentenyapa' ñeñtpa' ama ahuañaño. Ñato' o'ch netma'ntacha atto yeçhope'chen patso. O'ch ahuey tenonet, ama'tcha' yeçhap ßachayo amach yem'tanhuoñeña ñeñt atto morrentenya Cristo. Attecma ñaña toponet ama'tcha' yeçhap ßachayo amach yem'tanhuoñeña ñeñt atto morrentenya Cristo. Attecma ñaña onnatonet ama'tcha' yeçhap ßachayo amach yem'tanhuoñeña ñeñt atto morrentenya Cristo. Attecma ñaña enonet ñaña o'pononet, ama'tcha' yeçhap atarr allaparpa' amach yem'tanhuoñeña ñeñt atto morrentenya Cristo. Ama't ñaña allohuen ñeñt allpon ñeñt ame'ñenayapa' eñoçetepa'ch ñamet atto atarr morrentenya Cristo. Tarraña ama't ama e'ñeye' eñotpahuoyaye ora allpon ñeñt atet pena Cristo puemorrenteña yocop, tarraña sapa' señoçhepa'ch ama't e'ñe allpona. Ñeñtpa' atet nenamatennas Yompor. Allochñapa' attochña e'ñe poctacma chorrersa Yompor.

Aye'choçhtatpahuëpa'ch Yompor allohueney e'ñe yame'ñeño'

20-21 Te'ñapa' aye'choçhtatpahuépa'ch yenteñ Yompor tarro'mar ña ahuamencat yepene'. Ña po'huamencotpa' atetcha' patonay ya ñeñt allpon yenamueñ, elloña ñapa' atetcha' pennay elloch metana'tuonay ñeñt allpon yenamueñ. Ñaña elloña metana'tuennay ñeñt allpon yoctape'chyen. Elloña nanacocmañen e'ñe cohuen es pennay e'ñe po'huamencot ña. Ya'ye'choçhtatoñepa'ch Yompor allohueney ñeñtey yame'ñeñoť chocma yapcha'yena ñocop. Aye'choçhtatpahuépa'ch tayoteñ ama't ñaña errponañohuen tarro'mar ña yapuerre' Puechemer ñeñt Cristo Jesús. Ñeñtpa' attetepa'ch Yompore yocop.

4

Attoch e'ñe yeparrocmatuen allohueney ñeñtey ame'ñenaya Cristo

¹ Ñeñto'marña te'pa' añ notenes ama't na ñeñten ayottam̄psareten e'ñe netorreñoť serrpare'te' Yepartseshar Cristo. Te'pa' o'ch notas: E'ñech cohuen es sorrtyaten ñeñt atet poctetsa añecop ñeñt o' hua'ñerr Yompor ñeñtcha' pueyochresha' perr atet ñerra'm sa. ² Ama't mameshapa' amach sañeña entatstatso ñeñteso' atarr nanac sherbets. E'ñe semorrentanna'teñoť e'ñech acoña es sepanna'tyena. Chocmuepa'ch sa'huantannena ñerra'm erroť penes po'psheñeñ, amachña se'moñe'tatsche saña. Añcha'ña e'ñech cohuen semorrentanna'tuena allohuenes. ³ Añepa'chña se'nen attoch sepaterrtat soctapña allohuenes ñeñt e'ñe atet paterr cotape'chatenes Parets Puecamquẽñ. Allochñapa' e'ñe separrocmateñoť, e'ñech cohuen sentannena, amachña cha po'poñ sentanna'tueno. ⁴ Tarro'mar po'ñoçhpa' e'ñe yeparrocmatuen allohueney ñeñtey ame'ñenaya Cristo ñaña ñeñtara paterr Parets Puecamquẽñ ñeñt yechorra'yenaya allohueney. Ñaña ama't pa'nameney shontey ñeñtey o' chore'terrey Yompor tarraña e'ñe ñeñtara yeyemteñoť yecuen allohueney ñeñt o'patatenya Yompor ñeñtcha' apa'yesuerrey. ⁵ Po'ñoçhpa' e'ñe patrra Yepartseshar Cristo ñaña ñeñtara patrra poctapña ñeñt yame'ña'huen aallohueney, ñaña e'ñe allohueney atecma yapataretta e'ñe yame'ñeñoť Cristo. ⁶ Ñaña e'ñe patrra Parets ñeñt Yeyomporer yeponhuen allohueney, ñeñtara ñeñt ya'mcha'tareter yeponhuen allohueney. Ñaña ñeñtara Yompor ñeñt yetorratyenaya pa'namen allohueney ñaña ñeñtara Yompor ñeñt yechorra'yenaya yeyoçhro allohueney.

Atto Cristopa' apa'yeney allohueney attoch yetorra'yesa e'ñe po'poñe'ttsocma

7 Ñaña Cristopa' apa'yeney allohueney e'ñe po'poñe'ttsoema attoch yetorra'yesa Yomporecop e'ñe pa'namenot. Puesheña'ttsoypa' o'ch apa'yesey errponte' pocte' enten ña. 8 Ñehua, ñeñ'pa' atet oteney Yompor po'ñoñ ñeñ' aquellca'huaret ahuatoteñ, ñeñ'pa' atet oten Cristocop:

Allempo a'terr pue'ntañopa' ahuanerran allohuen ñeñ' e'moñe'tene' attotña a'mchechuahuerranet. Allempoñapa' e'ñe pocsheñeshot shonte' es apa'yesnerran acheñenesha'.

9 Ñehua, all oten "a'terr pue'ntaño." Ñeñto'marña yeñoteñ allempo ama a'terra'pa' ñapa' entot asuaña, chap ama't allohuanen patso o'pono. 10 Ñeñ'fara ñeñ' sohuatsa entot ñeñ'pa' ñeñ'fara ñeñ' a'terrets ama't e'ñe allohuanen ento. Attoña e'ñe erracmañen epa'huenta Cristo. 11 Ñaña ñeñ' atet oten ñoñets ñeñ' anaret ahuatoteñ atto shonte' es apa'yenan acheñenesha' ñeñ'pa' añ oten ñeñ' atto ñapa' e'ñe po'huamencot es apa'yeney attoch yetorra'yesa po'poñe'ttsoema ñocop. Patantarr acheñpa' atet aparettet o'ch torrenet atet ñerra'm ñeñ' allsensarettetsa Yomporecop; po'potantañ'apa' añcha' torrenet o'ch a'mteññañet Yompor po'ñoñ; po'potantañ'apa' añcha' torrenet o'ch serrpare'tatoñet po'ñoñ acheñeneshesho'mar; po'potantañ'apa' añcha' torrenet o'ch cohuanmpenan allohuen ñeñ' ame'ñetsa ñeñ'fara ñeñ'cha' yechatenahuet Yompor po'ñoñ. 12 Attoña ahuamencat pa'yeney allochñapa' ñach po'huamencaro yetorra'yesa po'poñe'ttsoema e'ñe puesheña'ttsoemay ñeñ'tey pueyochresha' o' perrey Parets. Attochña e'ñe cohuen yeyenpanneño'pa' o'ch huomenc ye'panna'ta yeyo'cher Yomporecop allohueney ñeñ'tey ame'ñenaya Cristo. 13 Attochña e'ñe yeparrocmatuen e'ñe yame'ñeño' Yompor Puechemer ñeñ' Cristo tarro'mar allohueneypa' o'ch yeñotuerr ñeñ' e'ñe cohuenare' ñeñ' atet yechateney Yompor Puechemer. Attochña o'ch e'ñe atet ye'pohuen yaña ora allpon ñeñ' cohuentetsa ñeñ' atet pena Cristo ñeñ' yehorra'yenaya. Ñato' o'ch netma'ntacha o'ch not, yapa' o' e'ñe yepo'n Cristocop. 14 Ya te'pa' ama atteye ñerra'm cheshaneshash' ñeñ' ama es e'ñotetso ñeñ' epuoye' cotape'chene' cohuen. Ñehua, atet ñerra'm cheshaneshash' te'pa' ñato' po'poñcha' cotape'chyenet, ñato' tsapañ'apa' o'ch'cho' cotape'chyeneterr po'poñ. Yapa'cho'ña atet yepena yaña allempo ama yepo'nena' Cristocop. Yaña ñeñ'tey ama epuoye' yocteñe Cristopa' amach errotenot ye'mñocheña ya ashcañ attoch ame'ñatya ña pocta'ña, attoch o'ch pantatey. 15 Yapa' añachña e'ñech patrra yoctape'chen

ñeñt e'ñe po'ñoçh alloch yequeshperra ñeñt atet oteney Yompor po'ñoñ. E'ñech yemorrentanna'teñoñ es yeḡa'yen. Attochña e'ñe yeḡohuen allohuen ñeñt atet coḡape'chateney Cristo. Attochña yapa' e'ñech ora yoḡape'chen e'ñe atet coḡape'chen Cristo. Ñeñto'marña esheccha'ña yeparrocmat epay Cristo, ñeñtña Cristopa' yeyoçher* yepeñ ñeñt çhocma yoḡape'chatene' cohuen Yomporecop. ¹⁶ Ñato' o'ch netma'ntacha ñeñt atet pena yechets. Ñehua, yechetspa' amach errotenoñ ellopa'tetsteno. Ama't allemeñ meyna'ten yechets çhocma parrocmaten atto rremannenet e'ñe cohuen attoña yenpannenet. Ñaña yapa' yame'ñeñoñ Cristo e'ñe po'chets ḡohueney allohueney ama't pa'namen acheñrey. Attoña Cristopa' e'ñe parrocmateney ñeñto'marña e'ñe yemorrentanna'teñoñ o'ch yeyenpannena e'ñe cohuen. Attochña allo'nach yesen atontatnomue' ñeñt atet eñotateney Yompor o'ch yemorrentannerra allohueney.

Atto Yomporpa' o' etserrataterrnay yoḡapña ñeñt atet muenen ña

¹⁷ Ñeñto'marña te'pa' o'ch notas ñeñt po'ñoçh sherbets Yepartsesharecop. Sapa' amach allo'na atet seḡa'yesneno ñeñt atet ḡatse'tyena ñeñt ama ame'ñenayo Yompor. Tarro'mar ñeñt atet coḡape'chatse'tyenet ñetpa' ñeñtpa' e'ñe orrena ama't mameshapa' ama es sherbeno. ¹⁸ Ñetpa' ama çhenaneto pueyoçhreto ñeñt Cristo poḡapña. Ñetpa' çha ottenet ñerra'mrrate' atarr checmeto'tsenet. Tarro'mar ñetpa' atarr echarrtenet pueyoçhret attoch coteret Yompor. Ñeñto'marña amach enterreto correñets ñeñt huetsa Yomporeshoñ tarro'mar ama eñoteñeto Yompor. ¹⁹ Ñet po'chñaret ama't mamesha o'huañcha' apencoçhen eñchet. Ñetñapa' e'ñech pocsheñesha' pomuenet po'chets attochña e'ñe ñeñta yoma'yenet ñeñt pa'namen sosya'tsañeçhno ñeñt ama aḡapahuoyaye ama't mamesha. ²⁰ Tarraña sapa' amaña atteye' seyçheno. Sapa' añña seyçhen ñeñt atet yeçhateney Cristo. ²¹ Tarro'mar napa' neñotenes sapa' o' se'mñoterrñañ Cristo po'ñoñ allempo yeyçhatas ñeñt e'ñe po'ñoçh attoch yeyemtera Jesús. ²² Sa ahuatpa' atta soḡape'chatse'tyese't te'ña ñeñtpa' o'ch sa'ypo'ñaḡper. Sapa' ñeñtaña atarr seshcare'taye't attoña añach e'ñe semnatse'tyese't ñeñt ama cohuenayaye ama't mamesha. ²³ Te'ña sapa' añepa'chña setserrataterre' Yompor e'ñe ora ñeñt atet soḡape'chyen seyoçhro. ²⁴ Añepa'chña chorraterra Yompor ñeñtcha' soḡape'chaterre' cohuen e'ñe etserra. Ñeñtpa' attochña

* 4:15 O'ch secue' nota 1.23.

etserrataterrnas Yompor soctapña eñe atet cotape'chen ña. Allochñapa' attoch eñe pocte' es sepa'yen arr patsro ñeñt eñe po'ñoch cohuen enten Parets.

Arrpa' all cotape'chatyenanet pa'namen ñeñt atarr sherbets

²⁵ Ñeñto'marña te'pa' añ poctetsa socop amach allo'na se-shcare'tanna'tyesneno. Eñe puesheña'ttsos erroten sotan-nena, eñepa'ch po'ñoch sa'pochtaten señoñ samo'tseshacop. Tarro'mar eñe yame'ñeñoñ Cristo eñe yeparrocmatuen.

²⁶ Ñaña ñerra'm esempo sa'tsrre'mapa' amach alla señotatoña' o'ch sorrtat ñeñt ama cohuenayaye. Ñaña chocmach sema'cha'nerr eñe mamecma amachña ñeñtaña sellapsateno. ²⁷ Allochñapa' attoch amach yemnatatsche oneñeñ o'ch atarr topateneñ, tarro'mar yocop ama pocteyaye o'ch yemnach oneñeñ o'ch atarr ahuaamencañ peney.

²⁸ Ñaña ñerra'm eseshas etetspa' añ poctetsa te'ñapa' amach allo'na setyesatsetneno. Ñeñt acheñerpa' taruasepa'ña eñe ña potot. Ama't erra'tsena ñeñtcha' po'taruas pa'pa' ñeñt taruaspa' eñe cohuen ama apenco'chenayaye. Allochñapa' atto'cha' echenan shonte' attoch apa'yesan ñaña po'potantañ ñeñt atarr es pallta'yetsa.

²⁹ Amach yeñosatse'tyesatsto ñeñt ama cohuenayaye ama't mamesha. Añcha'ña yeñosyen ñeñt eñe cohuen entuen allohuen acheñenesha' ñeñtcha' yenpuene' ñeñt e'mñotets. Attochña ñetpa' o'ch huomenc pet pueyo'cher Yomporecop.

³⁰ Attochña amach cha yelcateññañe Yompor Puecamquëñ ñeñt ye'chetsa yeyo'chro ñeñtara ñeñt Puecamquëñ pen ñeñt atarr cohuen Parets. Tarro'mar puechorreño'tey ya, Parets Puecamquëñ ñeñt'pa' ñeñtña yeñotatene' yapa' puechemer peney Yompor tayoteñ ñaña esempohuañencha' allempoch ya'queshpataretterra.

³¹ Amach atsrre'mo'chen sentanna'tatsto ama't seyo'chra. Allochñapa' attoch amach cha sa'tsrre'mare'tatanneno, attochña amach seche'chame'tanneno. Ñaña amach sesasare'tanna'tatsto. Ama't mameshapa' amach se'moñe'tanna'tatsto.

³² Añcha'ña eñech cohuen yentannena ñaña eñech cohuen yemuerannena. Ñaña añña poctetsa chocmach ye'pretnannena atto Yomporpa' o' peretnerrey yaña. Ñeñt'pa' añoñ peretnerrey atto rroma Puechemer Cristo yocop.

5

Ñeñtey puechemer pen Yomporpa' o'ch yorrtaten ñeñt atet muenen ña

¹ Yomporpa' atarr morrentenya, attoña e'ñe puechemer peney. Ñeñto'marña yocoppa'cho'ña añ poctetsa o'ch yorrtateññañ ñeñt atet cohuenare' es pa'yen ña ñeñt Yeyomporer yepen. ² Elloña Cristopa' atarr morrentenya. Ñeñto'marña e'ñe pocte' eñch attoña poma ñañaña atto rroma yocop atet pete't ahuat allempo muetsete't carrnero Yomporecop. Ñeñña e'ñe cohuen ente't Yompor e'ñe atet ñerra'mrrate' ñeñt allo atarr eñmosañtanñpsachete't ahuat ña. Atto atarr morrentya Cristo, yocoppa'cho'ña añ poctetsa e'ñech cohuen yemorrentanna'tuena.

³ Ñaña amach yepa'yesatsto ñeñt ama pocteye' enteno ña. Ama't parrocha amach yechtatsche ñeñt ama yetaporeyaye, ñaña coyanesha'pa' amach agapatstano ñeñt ama puerrollareyaye. Ñaña ama't mameshapa' amach yepatsto ñeñt atarr sosya'tsañetyets ñaña ama es aye'chapretanna'tpahu. Ñeñt atet poctetsa allohuenacpay ñeñtey pueyochresha' o' perrey Parets. Allochñapa' ama't parrochapa' amach errotenot otyeto' yapa' atto yepena. ⁴ Ñaña serrpare'tatse'teñets sosya'tsañ ñeñt ama aserrpare'tpahuoyaye ñeñto'marña yapa' amach atet yepatsto ama't mamesha. Ñaña otatse'teñets ñeñtpa' ama sherbeno Yomporecop ñeñto'marña yapa' amach atet yepatsto. Ñaña allocchame'tanneñets ñeñt ama ayellsheñe'chpahuoyaye allo, ñeñtpa'cho'ña amach atet yepatsto. Añcha'ña yapa' Yomporepa'chña yeparasyoso'ten. ⁵ Sapa' señoñeñ ñeñt cañoresha'tetspa' amach es o'paterroña Yomprosho ama't e'ñe esempaña allcha' añcha'taretterra Cristo epuet Pompor. Ñaña allohuen ñeñt eñotene' pa'namen sosya'tsañ, ñeñtpa'cho'ña amach es o'patataretterrtsoña all añcha'tarettena Yompor. Ñaña ñeñt atarr es ye'chapretetsa añña po'yomporer pen ñeñt atarr es ye'chatse'tatene'. Ñeñto'marña ñapa'cho'ña amach es o'patateñoña Yompor all añcha'tarettena. ⁶ Amach se'mñnotatsche achen ñeñt muenene' o'ch shecare'tas o'ch otas ñeñtcha' atet sepatse'ta saña ñeñtpa' e'ñe pocte' Yomporecop. Tarraña napa' o'ch notas, ñeñtpa' ama po'ñochoyaye, tarro'mar Yomporpa' chocmach coñchatuerran allohuen ñeñt atet atpare'tetsa, ñeñtpa' o' e'ñe notuanmas. ⁷ Ñeñto'marña te'pa' o'ch notas, sapa' amach socshapretatstaneto ñeñt atet patse'tyenet.

Ñeñt atet yorrtatyen allempo o' yocrrerra e'ñe cohuen puetaro

⁸ Nehua, sapa' ahuatpa' po'ñoch e'ñe atet socshapretatse'tyese't allempo sapa' checmeta socra'yese't. Tarraña

te' e'ñe seyemteñoĩ Yepartseshar o' çhapatonas seyoçhro ñeñĩ cohuen enten ña. Ñeñto'marña te' socoppa' añ poctetsa o'ch sorrtrateññañ ñeñĩ cohuen enten ña, atto sapa' o' socrrerra puetaro. ⁹ Ñehua, ñerra'm puetaroch yocrrena, ñeñtpa' atetcha' yorrtatyen. E'ñech cohuenacma es yeřanna'tyena ñeñĩ e'ñe pocte' enten Yompor ñaãa ñeñtpa' ama shequẽntsoyaye ama't mamesha. ¹⁰ Ñaãa socoppa' añ poctetsa o'ch sema'yoçhra eñotnomue' ñeñĩcha' atarr cohuen entapretenes Yepartseshar. ¹¹ Ñaãa te'pa' o'ch alla noterrserr, amach socshapretatsche ñeñĩ atet pãtse'tyenet, ñeñtpa' ama es sherbeno ama't e'ñe mamesha. Tarro'mar ñetpa' checmeta correnet. Sapa' añcha'ña sorrrtatyen ñeñĩ e'ñe cohuenare' allochñapa' attoch eñochet ñeñĩ atet pãtse'tyenet ñet, ñeñĩ ama't mameshapa' ama cohuenaye' enteñe Yompor. Ñeñtpa' ñato' yapa' o'ch yot, yapa' o' ya'puetarsamřsanet ñet ñeñĩ atet pãtse'tyenet checmeto. ¹² Ñehua, sapa' señoiteñ ñeñĩ atet pãtse'tyenet a'nahua. Ñerra'm ya'mete'pa' ñeñtpa' atarr apencoçhen. ¹³ Ñaãa ñerra'm ya'puetarsamřsanet ñet ñeñĩ pãtse'tyenet ñeñĩ ama cohuenayaye, attoña ñetpa' o'ch çhapanet pueyoçhro ñeñĩ atet penet ñetpa' po'ñoçh ama cohuenayaye. ¹⁴ Ñeñto'marña socoppa' atet açhotenes añ ñoñets:

Papa' ñeñteř atet pãtse'tyetsa e'ñe atteř ñerra'm çha atarr rroma pemuen. Te'ñapa' o'ch pe'manerra o'ch petanterra atto rroma pemuen. Cristopa' ñach pã'puetarsamřperre'.

¹⁵ Ñeñto'marña te'pa' o'ch notas: Señoita e'ñe erroťente' seřa'yen, ñato' cohuenta' ñato' amate' cohuenayaye. Amach atet seřatsto atet ñerra'mrrate' ñeñĩ ama es eñotetso. Añcha'ña atet seřa'yes atet ñerra'm ñeñĩ atarr es eñotets ñeñĩ cohuentetsa Yomporecop. ¹⁶ Te'pa' arosña atãa es pueçhatstatsa çhochña yetorra Yomporecop tarro'mar te' acheñenesha' atarr sosey yeçchatyenet arr patsro. ¹⁷ Ñeñto'marña notenes amach atãa es sepçhatsto ñeñĩ atet pena ñeñĩ ama es eñotetso. Sapa' añcha'ña o'ch señoitoñ ñeñĩ atet muenen Yepartseshar ñeñĩcha' atet yeřa ñeñĩ cohuen enten ña. ¹⁸ Ñaãa o'ch notas, amach seřosa'tatsto; ñeñtpa' çhach cotape'chatenes sosya'tsañeçhno attoch a'puerrataterres. Amach seřosa'tatsto, añepa'chña sechorrenaya ñeñĩcha' socshatene' ñeñĩara Parets Puecamquẽñ. ¹⁹ Añepa'chña e'ñe socshapretannena ñeñĩ atet saçhoteñ Yepartseshar. E'ñepa'chña socsheñesha' seyoçhrocmañen semorreçhena allo ya'ye'choçhtateññañ

Parets, ñaña allohuen morreñtsochno ñeñt Partsocop.
²⁰ E'ñe yeyerpueñoñ Yepartseshar Jesucristo chocmuepa'ch
 yeparasyoso'teññañ Pompor allohuenacop pa'namenacop.
²¹ E'ñe semorrenteñoñ Cristopa' e'ñepa'chña cohuen
 same'ñannena. Attochña yecohuentateññañ Cristo.

Arrpa' all cotape' chatan yacma epuet puetapor

²² Ñeñtes arrollaretes o'ch notas, añ pocte' serrollarpa'
 ñachña e'ñe same'ñena atet yepen ñaña Yepartseshar
 Cristopa' ñachña e'ñe same'ñena. ²³ Tarro'mar serrollarpa'
 añ poctetsa atetcha' senteñ ñerra'mrrate' samo'mte' sepeñ.
 Attecma yepena yaña allohueney ñeñtey ame'ñetsa, añ
 Yamo'mte' yepen Cristo ñeñt yecuañpene'. Tarro'mar ñapa'
 o' a'queshpaterrey ñeñtey o' po'chets perrey. ²⁴ Ñeñto'mar
 añ pocte' serrollarpa' ñach pomnaren sepene' allohuenacop,
 attecma yaña ñeñtey ame'ñetsapa' añcha' pomnaren yepene'
 Cristo.

²⁵ Te'pa' o'ch notas samña ñeñtes ataporetas, añ poctetsa
 e'ñech cohuen semorreñcha setapor. O'ch semuerya nanac
 atet peney Cristo atarr muerenya yaña ñeñtey ame'ñenaya
 ña. Ñeñto'marña puemorrenteñoñtey ya ñapa' e'ñe pocte'
 eñch o'ch rroma yocop. ²⁶ Allochñapa' attochña e'ñe
 e'shohuerrnay allohuen yo'chñar o'ch a'cohuentaterrey
 Partsocop. Ñehua, ñeñt toma'ntena allempo yapataretterra
 Yomporecop. Ñaña po'ñoñpa' ñeñtña e'ñe ya'cohuentaterre'.
²⁷ Allempoña o' ya'cohuentataretterrappa' ñapa' mueneñ
 o'ch aguërrey allohueney ñeñtey ame'ñenaya ña. Ñaña ya
 atto o' ya'cohuentataretterrappa' amach alla eñalleterre'te
 ama't mamesha ñeñtcha' ya'sosyaterrayerr. Amach alla
 enterrye'te atto ama cohuenaye' yorrteno ama't errotena.
 E'ñechña ya'cohuentataretterra Partsocop. ²⁸ Po'ñoçhpa'
 ñeñtes ataporetaspa' añ poctetsa socop e'ñepa'ch cohuen
 semuerya setapor e'ñe atet atarr semorrentena sañeña.
 Tarro'mar ñerra'm atarr yemorrenteña yetapor ya'ñaña
 atarr morrentetsa, tarro'mar yetaporpa' ñeñtara yechets
 yepen. ²⁹ Ñehua, yapa' yeñoteñ ama't e'ñe puesheñarrofeya
 ama yetsena'tenoña e'ñe ya yechets. Chochña e'ñe cohuen
 yerren esheccha' e'ñe huomencna'ntateney. E'ñech cohuen
 yecuen e'ñe ya yechets. Attecma peney ñaña Cristo
 atarrcha' cohuañpeney ya allohueney ñeñtey ame'ñenaya
 ña. ³⁰ Tarro'mar ñapa' ña e'ñe po'ñoçh po'chets pohueney
 ya. Pa'namenot po'chets pa'yeney allohueney ñeñtey
 ame'ñenaya ña. ³¹ Ñehua, Yompor po'ñoñ ñeñt aquellcaret
 ahuatoteñ ñeñtapa' atet oten: "Ñeñto'marña ñerra'm esempo
 yesna'ta amapa' coyanesha'pa' o'ch echan puerrollar, añ

pocte' o'huañcha' tama yeyemteña yachor ñaña yompor. Allochñapa' attoch e'ñe yeparrocmaten epay yetapor. Attoña e'ñe epsheño'mareypa' e'ñech patrra yechets yepen." ³² Ñeñtpa' ahuatoteñ ama eñotpahuoyaye ñeñt toma'ntatenya añ cotapñats. Tarraña te'pa' napa' noten añ yetma'ntenaya ñeñt atarr cohuen ñeñt atto e'ñe yeparrocmaten epay Cristo allohueney ñeñtey ame'ñenaya ña, ñeñtara ñeñt po'chets yepene' allohueney. ³³ Ñeñto'marña o'ch alla noterrser, e'ñe puesheña'ttospa' e'ñepa'ch cohuen semuerya setapor atet atarr semorrentena e'ñe sañeña. Ñaña ñeñtes coyaneshaspa' o'ch notas, añ poctetsa ñaña socop semorrenteño'tpa' same'ñyach serrollar, ñaña e'ñech cohuen senteñ.

6

Arrpa' all cotape'chatan cheshanasha' epuet pamo'mte'

¹ Te' cheshaneshacha' o'ch notas ñeñt poctetsa socop ñeñtcha' atet sepa. E'ñe same'ñeño't Yepartseshar Cristo chocmuepa'ch e'ñe cohuen same'ñeña sompor ñaña sachor, tarro'mar ñeñt poctetsa socop. ² "Ñaña e'ñe semorrenteño't somporpa' chocmuepa'ch semcha'na'ch ñaña sachor" tarro'mar ñeñtpa' ñeñt e'ñe ñanom atet ot Yompor ñeñtcha' atet yepen yamo'mte' allochñapa' attoch e'ñe cohuen a'ntatenya Yompor. ³ "Attoch pa'nateño'tes e'ñe cohuenpa' atomatcha' socrrena arr patsro."

⁴ Te'pa' o'ch notas samña ñeñtes pamo'mte' pen cheshanasha', se'moñe'teño'tpa' amach sa'tsrre'mare'tatatsche sacñefarnesha'. E'ñechña añetolloteñ e'ñe secuampeño't cohuenpa' o'ch seychatyenanet e'ñe cohuen attoch ñetpa'cho'ña o'ch ame'ñeret ñamet Yepartseshar Cristo. Ñaña amach semnatatstaneto o'ch atfa atarr atpare'taset.

Arrpa' all cotape'chatan ataruasañ epuet po'patronar

⁵ Te'pa' o'ch notas samña ñeñtes ataruasatare'tes ñeñt poctetsa socop. Chocmach same'ñya ñeñt setaruasatene' arr patsro. Ama't erra'tsena apuenset ñeñtcha' setaruas sepa' e'ñechña semcha'na'teño't setaruasen e'ñe cohuen seyo'chrocmañen. Ama't acheñe'cpa setaruasenpa' atetcha' setaruasen ñerra'mrrate' Cristocop setaruasen.

⁶ Amachña e'ñe puecuampeño'tesa sema'yore'teno taruasats attoch e'ñe cohuen socshach sepatronar attoch e'ñe pocte' entenes. Añcha'ña ama't acheñe'cpa setaruasenpa' e'ñechña atet sesherbeñ cohuen ñerra'mrrate' Cristo sesherben. E'ñechña seyo'chrocmañen sepena cohuen ñeñt atet muenen Yompor. ⁷ E'ñe semneñño'tpa' e'ñech cohuen socsheñeshocmañen setaruasen tarro'mar ama ñapfa' acheñecop

setaruaseno, Yomporecpa'naña setaruasen. ⁸ Te' sapa' e'ñe señoñeñ ama't erra'tsente' cohuen es yeṣa'yen, Yepartsesharñapa' chocmach alla aphuerrey e'ñe puesheña'ttsoy ñeñtcha' atarr cohuen yocshaterre' ama't añ acheñer ñeñt ataruasatare't amapa' añ acheñer ñeñt e'ñe cohueno'tsen, attecmaçh apa'yesuerranet ñeñtcha' atarr cohuen coshater-rahuet ñet.

⁹ Naña te'pa' o'ch notas ñeñtes taruasatets. Sapa'cho'ña atetcha' sepoñ sa'taruasañer ñeñt atet poctetsa, amachña cha sechemama'tyenaneto. Señochepa'ch sapa'cho'ña sechen Samo'mte' Cristo ñeñt pue'ntaño'tsen. Ñeñtara ñeñt Pamo'mte' pen allohuen sa'taruasañrenesha'. Naña ñapa' ama puesheña'ttsa morrenteno.

Ñeñt apueney Yompor ñeñtcha' yemoñenaya attoch amach alla a'puerrataterrye oneñe't

¹⁰ Allohuanen arr necartot o'ch masheñneshacha' ñaña nochaneshacha' notas, ahuamencatepa'ch pās Yepartseshar tarro'mar ñapa' ña atarr ahuamencattetsa. ¹¹ Ñeñto'marña añ poctetsa yocop o'ch yaguërrñañ ora allpon ñeñt apueney Yompor allochñapa' ñeñtcha'ña yemoñenaya attoch amach alla a'puerrataterrye oneñe't. Tarro'mar yeñoñeñ oneñe'tpa' chocma e'nenan attoch shecare'teney. ¹² Tarro'mar po'ñoçhpa' ama acheñeye' yeçllareno ñeñt entpo' po'chets. Yapa' añña yeçllaren oneñe'teçhno ñeñt ama erro't aṣapahuo e'ñe ya yoto't tarro'mar ñeñtṣpa' ama entpahuoyaye po'chets erro'tente'ña. Tarraña ñeñtṣpa' atarr añcha'noçhetyena ñaña atarr ahuamencateçhno. Attoña pomnaren penan allohuen acheñenesha' arr patsro ñeñt ṣatse'tyene' ñeñt ama cohuenayaye ñeñt checmeto'tsena. Ñeñtara oneñe'teçhno ñeñt ama cohuenaye' yeçhcatetso ñeñt erracmañen añcha'noçhetyetsa entot. ¹³ Ñeñto'marña notenes, o'ch saguërrñañ allohuen allpon ora ñeñt apueney Yompor allochñapa' ñeñtcha'ña allo yemoñena attoch amach alla a'puerrataterrye oneñe't ñerra'm esempo atarr nanac topateney. Tarraña ama't allempo pa'namenot atarr topateney yañapa' amach erro'tenot a'puerrataterrye. ¹⁴ Te'pa' o'ch neñotatas ñeñt apueney Yompor ñeñtña yemoñenaya attoch ama a'puerrataterrye oneñe't allempo topateney. Ñato' o'ch netma'ntacha ñeñt atet pa'namen chorra'yena solltarnesha' allempo quellarenet.* Ñeñt ñanom ñeñtṣpa' Yompor po'ñoñ ñeñt e'ñe po'noçh ama shequëñtsoyaye ama't mamesha. Ñeñto'marña yapa' e'ñech

* 6:14 Ñehua, ñeñtṣpa' atet chorra'yese't ahuat solltarnesha' allempo quellarete't.

yeñmañesha' es yeḡa'yen, amach yeshcare'tanna'tyesatsto. Ñato' o'ch netma'ntacha ñeñṡpa' ñeñṡña yechanar yepen ñeñṡcha' ahuamencat yepe' atet ñerra'm solltar apueñet chanarets alloch chanena ñeñṡ quellaraten. Elloñapa' e'ñepa'ch cohuen es yeḡanna'tyesnoma ñeñṡ atet e'ñe pocte' enten Yompor. Ñeñṡpa' añ toma'ntena asrom atet ñerra'mrrate' ñeñṡ chorrena solltar ñeñṡ a'natene' puesomap allempo quellarena. ¹⁵ Te'ñapa' o'ch se'shpo'cha e'ñe socsheñesha' o'ch ahues allcha' seserrpare'tyena' atto Yomporpa' o' amo'tsterrya attochña e'ñe cohuen a'queshpaterrey. Ñeñṡpa' añ toma'ntena atet pena solltar o'ch nan po'sapatpa' o'ch ahuo' allcha' quellarosa. ¹⁶ Elloña ñeñṡ nanac sherbets ñeñṡpa' añ, chocmuepa'ch e'ñe cohuen yeyemteña Yompor ñeñṡ atet oteney. Ñeñṡpa' añ toma'ntena solltar pue'scudo allo a'natena allochñapa' attoch ama etaretteneto. Ñehua, atto huomenc topateney oneñet ñato' o'ch netma'ntacha ñerra'mrrate' ñapa' cho sanapecheney po'chopaḡo ñeñṡ huoretnets. Tarraña ya e'ñe yeyemteñoṡ Yompor ñeñṡpa' ñeñṡña ye'scudo yepen ñeñṡcha' chocma emayene' oneñet po'chopaḡ ñeñṡ huoretnets allo sanapecheney. ¹⁷ Ñaña yapa' yeñoteñ Yomporpa' te'pa' o' a'queshpaterrey, ñeñṡña yemoñenaya. Ñeñṡpa' añ toma'ntena atet pena solltar o'ch na'nman asret poño attoch ama etto'cheto. Ñaña o'ch yerrmoñ Yompor po'ñoñ yeyo'chro ñeñṡ atet eñotateney ña Puecamquëñoṡ; ñeñṡpa' ñeñṡña yepanmet yepen alloña yeçllareñña oneñet. ¹⁸ Ñaña sapa' chocmuepa'ch sema'yochena ama't erroteno'tsensa. Añcha'ña seyepuene' Parets Puecamquëñ. Allochñapa' attochña chocma sema'yochrena ma'yochatsa. O'ch senamñ Yompor ora allpon ñeñṡ sepalltena, ñaña chocmuepa'chña e'ñe sema'yochamḡpesueña allohuen ñeñṡ pueyochresha' pen Parets. ¹⁹ Napa'cho'ña chocmuepa'chña sema'yochamḡpenna. O'ch senamon Yompor nocop allochñapa' ñachña ne'ñoratene' attoch amach nemcha'nañoṡa neserrpare'teññañe po'ñoñ. Allochñapa' attochña neñotatyesanet cohuen ñoñets ñeñṡ alloch e'ñe yequeshp'a'huerra allohueney; ñeñṡpa' ama eñotpahuoyaye, ama't ahuatoteñ. ²⁰ Napa' allsensareten ñeñṡen eñosyets e'ñe cohuen Yomporecop. E'ñe neñosyeñoṡ Yomporecop ñeñṡo'marña te'pa' yottamḡpennet. Ñeñṡo'marña nemneñ o'ch sema'yochamḡpenna attoch amach nemcha'nañoṡa neserrpare'teno ñeñṡ e'ñe cohuen ñoñets alloch yequeshp'a'huerra. Attochña e'ñe nocsheñeshocmañen neserrpare'ten tarro'mar ñeñṡ e'ñe cohuen atet poctetsa nocop.

Arrpa' all so'tnerranet e'ñe po'cartot

²¹⁻²² Te'ñapa' o'ch notas, o'ch nemñonas masheñ Tíquico ñeñĩ atarr nemorrentena. Ñapa'cho'ña chocma atarr cohuen torrena Yepartsesharecop. Ñapa' ñeñto'marña o' nemñe se-sho allochñapa' ñach señotatuerre' ñeñĩ atet yepena ya arr. Attochña atarr coshatuerres seyoçhro.

²³ Te'ña masheñeshacha' ñaña noçhaneshacha', Yomporepa'chña semorrentanna'tataya e'ñe same'ñeñot, ñeñtara Parets epuet Puechemer Jesucristo ñeñĩ Yepartseshar yepen. Ñetepa'chña socshatene' seyoçhro.

²⁴ Ñaña ñetepa'chña e'ñe sa'natenaya allohuenes ñeñtes e'ñe cohuen morrentenaya Yepartseshar Jesucristo. Ñeñĩ atto semorrenteñapa' amach ahuañañaattherro ama't e'ñe ahuaata. Ñeñtach notas, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN FILIPOSOMARNESHA' FILIPENSES

*Pablo pa' quellcan carta all ayottam̄psarettena; añecop quel-
lquë' ñeñt ame'ñetsa anetso Filiposo*

¹ Masheñeshacha' ñaña nochaneshacha' ñeñtes allohuenes o' pueyochresha' perres Parets e'ñe separrocmateñoñ Cristo Jesús all anetso Filiposo, ama't ñaña sa'mcha'tareterneshohuen ñaña ñeñtes diáconochnos ñeñtes sherbets all puerahuo. Na Pablon epan masheñ Timoteo ñeñten sequellquëne'ña añ carta. ² Te'pa' e'ñe nehuom̄cha'teñoñes sa, napa' o'ch notas: Yomporepa'chña sebensare'tam̄pene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyoçhro allohuenes.

Arrpa' atet ma'yocham̄penanet Pablo

³⁻⁴ Te'pa' o'ch notas, allempo nema'yocheña Yompor ñeñt neyemtena na, neyerpueñoñespa' çhocma nocshensa Yomporshot. Ñeñto'marña allempo es nenamuennas Yomporpa' çhocma nocshensa Yomporshot allohuenes. ⁵ Tarro'mar allempoteñ saguër Cristopa' sapa' allo'na't sesen ame'ñatsa teme'ttsen. E'ñe same'ñeñoñpa' attoña sellcapretna attoch erroñenoñpa' o'te' epa'huerra erracmañen añ cohuen ñoñets alloch yequeshperra. ⁶ Ñaña napa' neñotenes atto Yomporpa' o' ame'ñatasa ahuaña, te'ñapa' ñepa'chña allo'na ahuamencat sepa'nmue' e'ñe ñocop, tayoteñ ama't esempohuañencha' huerra Jesucristo pue'ntañoñ. ⁷ Ñeñt atet nentapretenespa' ñeñtpa' e'ñe pocte' tarro'mar atarr nemorrentensa e'ñe neyoçhrocmañen. Ñeñto'marña yelcanna'teñoñpa' yeñoteñ Yompor e'ñe puemuereñoñpa' amach a'ypo'ñerrno na ama't ñaña sa. Atet napa' ama't cárcelo'tsenen Yompor puemuereñoñtenpa' amach a'ypo'ñerrno. Ñaña ñerra'm allempo achm̄are'tenet añ cohuen ñoñets alloch yequeshperra, atto napa' nemoñena añ cohuen ñoñets, Yompor puemuereñoñtenpa' çhocma ahuamencat penen. Ñaña allempo name'ñateña acheñenesha' añ cohuen ñoñets alloch yequeshperra, Yompor puemuereñoñpa' çhocma ahuamencat penen. ⁸ Ñeñto'marña te' Yomporpa' eñotenen po'ñoçh te'pa' nanac neyerpuensa. E'ñe atet nanac nemorrentensa

ñerra'm atet morrentenya Jesucristo e'ñe cohuen. ⁹ Atef nenamuennas Yompor socoppa' atet noten, allo'nepa'ch sesen morrentanna'tnomtsa nanac ñaña allo'nepa'ch sesen eñotnomue' ñeñt nanac sherbets yamo'tseshacop. Allochñapa' attoch chocma yorrtaten yemorrenteña e'ñe po'ño'ch. ¹⁰ Attochña seño'ch erra'tsente'ña nanac cohuen sherbets Yomporecop. Allochñapa' e'ñe seño'teño'tpa' añepa'chña atet sepa'yen ñeñt e'ñe cohuenare'. Allochñapa' amach cha sa'yohuaretterro ñerra'm esempohuañencha' huerra Cristo. ¹¹ Ora atet nenamuennas Yompor socoppa' atet noten, e'ñe same'ñeño't Jesucristo poctacmapa' añepa'chña cohuen atet sepa'yen ñeñt nanac sherbets Yomporecop. Ñerra'm atet yepenapa' attochña e'ñe cohuen ya'cshapretare'ttena Yompor po'cohuenña.

Atto epatuan allohuenacop Yompor po'ño'ñ e'ñe cárcelot

¹² Ñeño'tmarña masheñeshacha' ñaña no'chaneshacha' o'ch neñotatas, ama't atto ayottam'psare'ten cárcelo ñeñtpa' ama añecpayaye attoch o'ch epatare'tenan cohuen ñoñets alloch yequeshperra. Elloña e'ñe attotpa' allo'nach sen epa'huatsa Yompor po'ño'ñ. ¹³ Ñeño'tmarña te'pa' allohuen guardianesha' ñeñt cohuan'pene' añcha'tare'tepo' ñetpa'cho'ña o' e'ñe eñotuanet atto ayottam'psare'ten cárcelopa' año'tña e'ñe name'ñeño't Cristo atet pennet. Ñaña ama't pa'namen acheñenesha' te'pa' o' eñotuanet ñeñtecop nemuero'chtana. ¹⁴ Ñeño'tmarña te'pa' shonte' masheñesha' e'ñe allo'na senet yemuetnomuet Yepartseshar Cristo poctacma, tarro'mar ñetpa' atet entennet e'ñe name'ñeño'ta Cristo nemuero'chtana cárcelo. Ñeño'tmarña ñetpa'cho'ña o'huañ mecha'na'tet serrpare'tet Yompor po'ño'ñ.

¹⁵ Ñehua, po'ño'chpa' eñall puesheña'tets tarrecpach serrpare'tenet Cristo e'ñe pue'matare'teño'tetan na. Tarraña po'psheñe'chnopa' e'ñech pocsheñeshocmañen a'poteññañet Yompor po'ño'ñ. ¹⁶⁻¹⁷ Añpa' e'ñe pue'morrenteño'tetan atet penet tarro'mar ñetpa' eñotennet napa' anare'ten atto nach moñenaya añ cohuen ñoñets alloch yequeshperra ñerra'm esempo achmare'teñet. Tarraña ñeñtña serrpare'tene' Cristo po'ño'ñ e'ñe ñocpuetapa' amach pueñmañeshacmaye' serrpare'teneto. Ñetpa' chate' otenapuetañ allo'nach atsre'mo'chen entatnennet ama't cárcelo'tsenen.

¹⁸⁻¹⁹ Ñehua, ama't atetpa' nocoppa' e'ñe pocte'. Ama't erro'teno serrpare'tenet cohuen ñoñets Cristocop, nocoppa' e'ñe pocte' nenteñ. Tarro'mar ama't pue'shqu'eñme'chatsa serrpare'tenet Cristo, ama't ñaña pueñmañesho'tcha' serrpare'tenetpa' napa' ñeñtcha'ña nanac nocshatene'.

Ñeñto'marña napa' chocmach nocshena tarro'mar napa' neñotenes sapa' chocma sema'yochanñenna ñaña neñotena Jesucristo Puecanquëñpa' ñeñña ahuamencat nepene'. Ñeñto'marña neñoteñ añ muerochteñets tsapatonetpa' a'pocataretcha' e'ñe cohuen nocop.

Atto Pablopa' ora allpon corre't arr patsropa' ñeñtpa' e'ñe ora Cristocop

²⁰ Ñeñto'marña e'ñe nocsheñesha' necueñ tarro'mar neñoteñ amach apencatareteno ama't mamesha. Ñaña amach nemñcha'nañotayaya ne'ñoreno e'ñe cohuen Cristocop. Attochña napa' acshapretpo' entapretennet Cristo, ama't napa' erroteno'tsenencha' ama't ñerra'm nerroma amapa' ñerra'm ora nocrenmeñ. Ateñ ahuatoteñpa' te'pa'cho'ña attecmeupa'ch pena. ²¹ Tarro'mar napa' allpon nocrena arr patsropa' ñeñtpa' e'ñe ora Cristocop. Ñaña ama't cho nerromapa' ñeñtpa' elloña nanac cohuen nocop. ²² Ñaña ñerra'm allempo nocrenmeñpa' torrenayanach Yompor po'taruas tarro'mar attotcha'ña allo'nach nesherbātneññañ Yompor po'ñoñ. Ñeñto'marña ñeñtcha' nanac nemna' te'pa' ama neñoteñe erra'tsente'ña ñeñt nanac sherbets, ñato' o'ch nerroma tayecma amapa' ñato' corretsanach. ²³ Ñeñt nanac torrapo' nenten o'ch notas ñeñt atarr cohuen nenten, ñato' o'ch nerroma amapa' corretsanach. Napa' nemneñeñ o'huañcha' nocrra añe patsro allochñapa' o'ch nechap tecma Cristesho, tarro'mar ñeñtpa' elloña nanac cohuen nocop. ²⁴ Tarraña ñerra'm amach nerromopa' ñeñtcha'ña nanac sherbats socop. ²⁵ Ñeñto'marña napa' neñoteñ amach nerromo, amach nesa'nerrso, allochñapa' allo'nach nesen seychatnomue' allohuenes atto ñerra'm allo'na yesen yemtaya Cristopa' chocmachña yocshena. ²⁶ Allochñapa' ñerra'm esempo necherr seshopa' allempochña alla neñotaterrser nanac, attoch allo'na sesen nanacocmañen coshaya Cristo.

Chocmuepa'ch yocrrena e'ñe cohuen ñeñt atet oteneñ Yompor po'ñoñot

²⁷ Te'pa' añach notas, chocmuepa'ch socrra e'ñe cohuen ñeñt atet yorrtaten ñeñtey ame'ñenaya Cristo po'ñoñ. Allochñapa' ñerra'm machayota nabcherrsa' amapa' ñerra'm ama'tcha' ama yabchannerropa' e'ñepa'chña cohuen ne'mare'tenes atto e'ñe huomenc sepen seyocher attoch e'ñe patrra soctape'chen. Ñaña o'ch ne'mare'tas atto sapa' sema'yochrena allohuenes parro attoch semoñena añ cohuen ñoñets alloch yequeshperra. ²⁸ Ñaña amuepa'chña

aña seyore'tatstaye ama't mamesha ñeñt se'moñe'tene' tarro'mar ñetpa' ñeñtcha'ña eñotatahuet po'ñoçh ñetpa' amach qeshperreto. Tarraña yocopña'pa' ñeñtña yeñotatene' po'ñoçhpa' yequeshpa'huerrach. Añeçhnopa' Yomporo poçta'ña. ²⁹ Ama pa'trrayaya muenatenye Yompor atto o' yame'ñera Cristo. Añña e'ñe puemuereño'tey muenateney ñaña e'ñe yame'ñeño'tpa' çhochña yemueroçhta ñocop. ³⁰ Ñeñto'marña sapa'çho'ña e'ñe poçte' o'ch sa'mueroçhtatare'tta Cristocop e'ñe atet sentenen na ahuato'teñ ama't teme'ttsenpa' se'mare'tenen napa' allo'tsenarana all nemueroçhtena e'ñe name'ñeño't Cristo.

2

Atetcha' yentena yañeña e'ñe puesheña'ttsoy atet ente't Cristo e'ñe ñañeña

¹⁻² Te'pa' o'ch notas ñaña po'poñ. Ñerra'm po'ñoçh yame'ñeño't Cristo e'ñech yocshatannena allempoña po'ñoçh sapa' socshaterrencha' ñaña. Añña ñeñtcha' nocshatene' e'ñe poçtacma ñerra'm e'ñech pa'trra soçtape'chuen allohuenes. Ñaña ñerra'm po'ñoçh e'ñe yemorrentanna'teño't e'ñech yeyemtanna'tuenapa' ñehua, te'ñapa' çhocmuepa'ch semorrentannena ama't e'ñe sagattsa ñeñtes e'ñe parro'marneshacmas. Ñaña ñerra'm allohueney po'ñoçh chorra'huenya ñeñtara Parets Puecamquëñpa' ñeñto'tcha'ña e'ñepa'ch sepatrratuen soçta'pño't allohuenes. Ñaña ñerra'm po'ñoçh e'ñe socsheñesha' semuerannena'pa' ñeñto'tcha'ña amach po'poñ sentanna'tuatsto. ³⁻⁴ Ñaña amach aña atarr sellcatsto ñeñt e'ñe socpa. Añcha'ña puesheña'ttsospa' sellcapreta ñeñt llecatyene' samo'ts. Ñaña amach sañeña entatstatsto atet ñerra'mrrate' ñeñtes nanac sherbets. Añcha'ña atet sent samo'ts atet ñerra'mrrate' ñetña nanac sherbetset, pa'ñapa' amach es asherbenaye' penteno.

⁵ Añña poçte' o'ch senta sañeña atet ente't Cristo Jesús e'ñe ñañeña allempo huapa aña patsro. ⁶ Ñehua, ñapa' ama't nanac Paretspa' ama ommo'chane'te po'partsoña. ⁷⁻⁸ Ñapa' e'ñe poçte' enche't o'ch atet enteñ acheñenesha' ñerra'mrrate' ñapa' ama Partsoyaye, o'ch atta orrtena ñerra'm ama esoyaye atet pena acheñ ñeñt e'ñech pauner a'pare'ttena. Tarraña añecop atet pe't attotcha' sherbenan Pompopor ama't ñaña acheñenesha'. Ñaña ñapa' ama't Paretspa' o' acheñetos arr patsro, e'ñe atet orrtosa ñerra'm ya ñeñtey arromña'tey. Ñaña'pa' allo'na sen pauner entatatsa attotña e'ñe pue'mñoteño't Pompopora' e'ñe poçte' e'ñch o'ch rroma corsocho ñeñt nanac apencoçhen entete't ñerra'm

essha' rromats atet corsocho. ⁹ Ñeñto'marña attotña Pomporpa' o' alla nanac a'cohuentater ñaña o' alla aphuer ello pa'so'cheñ ñeñt nanac cohuen sherbets. Ñeñtña so'chñetspa' ello metana'tuanenan allohuen po'poñechno so'chñetsochno. ¹⁰⁻¹¹ Ñeñto'marña esempohuañenpa' allohuenet po'yorñoñetpa' a'meta'hueretcha' e'ñe poctacma, Jesucristepa'tña ñeñt nanac partsotets. Allochñapa' atto e'ñe pame'ña'rreñotet Jesús pa'so'chñopa' concorpa'rretueretcha' allohuenet ñeñt allpon eñall ama't allohuen ñeñt ento'marnesha' ñaña allohuen patso'marnesha' ñaña allohuen o'pono'tsenesha'chno ñeñt patso'tsen. Attochña allempopa' aye'chochtataretterra Yompor ñeñt nanac Parets.

Añach yema'yochrena attoch allo'nach yesen ama't acoña etsotyesnomue' ñeñt poctetsa Cristocop

¹² Te'pa' e'ñe nemorrenteñotes masheñnesha ñaña nochanesha o'ch notenes, ahuañmo'chapa' chocma se'mñotne't ñeñt atet notase't allempo sesho'tsenen. Te'pa'cho'ña atecmach se'mñoten ñeñtcha' atet noterrerr ama't te'pa' nanac ñachayo'tsenen sesho't. Te'pa' añach notas ñeñtcha' atet sepa. Chocmuepa'ch sema'yochra attoch allo'nach sesen etsotnomue' ñeñt cohuen enten Yompor, tarro'mar ñapa' ñeñtecopña o' a'queshpaterres. Tarraña e'ñech sem'cha'na'teñot seyomcha Yompor tarro'mar yeñoteñ yoro'cheno'tsenya ñerra'm ama Yompor po'huamenco yeyemto. ¹³ Tarro'mar Yompora e'ñe yemnatene' e'ñe yeyochro ñeñt cohuen enten ña. Ñaña ñapa' ñach ahuamencat yepene' attoch yetsotoñ ama't ora erra'tsencha' coshatene' ña.

¹⁴ O'ch noterrerr ellonet te'pa' ñeñt ama atteye' es sepeno. Ama't eseshacpa amach epuoye' es atet sepeno, señoñesho'tpa' amach es sotnare'tanna'tatsto. ¹⁵ Allochñapa' ñerra'm ama atet yepenopa' e'ñech cohuen entyeny allohuen acheñenesha', amach eñalle attoch essha'pa' o'ch eñosyenet yocop año' pocteye' es ye'pa'yeno, tarro'mar e'ñech cohuen es yocape'chyen attoch yorrtaten atet penaña ñeñt po'ño'ch o' puechemer per Yompor. Amach eñalle ñeñtcha' a'sosyatene' atto yocrrena e'ñe cohuen Yomporecop a'ne patsro. E'ñech cohuen yorrtena acheñenesha'cop ama't ñeñt ama ame'ñetso ñeñt atarr nanac sosey cotape'chenet. Cohuencha' yorreyena atet ñerra'mrate' ranto'chno ñeñt a'puetarene' checmete' tsapo. ¹⁶ Attoch sa'puetarsañpsanetpa' choch señoñaterranet ñoñets ñeñt huetsa Yomporesho't alloch yocrrerra e'ñe cohuen. Allochñapa' ñerra'm esempohuañencha' huerra Cristopa'

socshaterrencha', tarro'mar neñotercha' ama eñe orrena nanac netorrerro socop. ¹⁷ Ñaña ama'tcha' machayota muetsataterret arr atto napa' o' name'ñatasa, napa' atarr nocshena ñaña te'pa'cho'ña nocshapretensa atto same'ñerra. Añña same'ñeñapa' ñeñtcha' yehuapateññañ Yompor atet ñerra'mrrate' ñeñt amsarettetsa ñocop. Ñaña nerraspa' ñeñtcha' orrtatsa ñerra'mrrate' ñeñtcha' ashatarettatsa all ñeñtcha' o'patateñet Yompor. ¹⁸ Neñto'marña napa' nemneñ sapa' amach cha sellcatsto, chochña socshapreterrna ñeñt atet o' notuas.

Timoteopa' nanac cohuen llecapretane't pamo'tsesha'

¹⁹ Te'pa' o'ch notas ñeñt atet noctape'chen. Añ noctape'chen o'te' nemñer masheñ Timoteo tayecma o'ch enterrsa', ñerra'm atetcha' muena' Yepartseshar Jesús. Allochñapa' ñach neñotatuerre' errotente' sepa'yena, allochñapa' attoch socshaterren ñerra'm cohueno'tseneste'. ²⁰⁻²¹ Añcha' nemñonas masheñ Timoteo tarro'mar ama eñalle ama't puesheñarra ñeñt cofape'chene' cohuen atet ñerra'm ña ñeñtcha' e'ñe po'ño'ch sellcapretenaya ñeñt echarr sentyen. Tarro'mar ama't eñalleñ ñeñt parro yetorrena, ama allohuenacmaye' llecapretenseto ñeñt echarr sentyen. Añach torra'yenet ñeñt e'ñe ñocpueta. Amachña añeye' llecapreteneto attoch torrenet ñeñt nanac sherbets Jesucristocop. ²² Ñaña sapa' e'ñe seño'tueñ atet masheñ Timoteopa' e'ñe cohuen pa'yena allempo parro yeserrpare'tatyen añ cohuen ñoñets alloch yequeshperra. E'ñe cohuen torrapretenna atette'ña ñerra'm yechemerpa' e'ñech cohuen yenpueney yetaruas. ²³ Ñehua, esempoch e'ñe neño'ch ñato' errotente' poptetsa nocoppa' napa' noctape'cheñ o'ch nemñonas masheñ Timoteo. ²⁴ Na te'pa' aña necuen Yepartseshar Cristo ñerra'm ñach muenats, napa'cho'ña nabcherrsa'ch amach atarr natomatatatsche.

Atto Epafroditopa' yenpa'yesosan Pablo all cárcelo

²⁵ Ñaña o'ch notas po'poñ, e'ñe pocte' nenteñ te'pa' o'ch alla nemñer sesho masheñ Epafrodito ñeñt parro yetaruaseño'tpa' nanac yetorre't Yomporcop. Ñeñtara masheñ Epafroditopa' ñeñt semñon ahuaña ñach neyenpa'yesose' all es nepalltena ñeñtcha' neyenpose' arr. ²⁶ Napa' e'ñe pocte' nenteñ te'pa' o'ch alla ahuerri sesho, tarro'mar ñapa' nanac yerpuensa attoch o'ch alla entuerres. Tarro'mar ñapa' añ nanac llecatene' atto sapa' ahuo't se'mare'ch ñapa' cha at-sna'tos arr. ²⁷ Ñehua, po'ño'ch ahuañapa' cha at-sna'tos cha muene' rromañ, tarraña Yompor e'ñe puemuereño'feypa' o' alla a'crrater atto ñerra'm rromañpa' ellote' na'na llecatañ arr

cárcelo. ²⁸ Ñeñto'marña e'ñe poctennana o'ch nemñer e'ñe tayecma sesho allochñapa' o'ch socshapuera ñerra'm esempoch çherr e'ñe sesho. Allochñapa' amach ña'na allo'na nellcatnenaye. ²⁹ E'ñech separasyoso'teñesha' Yepartseshar Cristo o'ch sagapapuer ñaña e'ñe socsheñeshocmañen. Ñaña o'ch notas, çhocmuepa'ch semorrenteña ama't erra'tsena acheñer ñeñt e'ñe atet senten ñerra'm ña. ³⁰ Atto ñapa' e'ñe puemneññoť o'ch torra Cristocop çha atsna't ama't çha muene' rromañ. Atarr yoreretsoť correrra arr, tarraña ñapa' ama ñeñtayaya mecha'to attoch ñapa' o'ch yenposen, ñeñt sapa' amate' erroť sepe attoch sehuaçha'ta ðaçhayoť e'ñe puesheña'ttsos attoch seyepuenna' arr.

3

Arrpa' all eñotatyesanet ñeñt e'ñe po'ñoçh sherbets Yomporecop ñaña ñeñt e'ñe orrena cotapñats

¹ Ellonetpa' o'ch alla masheñnesha ñaña noçhanesha noterrserre po'pocheño, e'ñe same'ñeñoť Yepartseshar Cristopa' çhocmuepa'ch socshena. Ama't te'pa' o'ch alla noterrserre atet tarro'mar amach nemuenme'che sotare'te' atet, tarro'mar ñeñtpa' ñeñtcha' nanac seyemta sa. ² Ñaña te'pa' o'ch notas po'poñoneñ. Señota'tach ñato'tña seyemteña' ñeñt acheñeneshar ñeñt añach torrenet ñeñt ama cohuenayaye, ñeñt e'moñe'tene' cohuen serrparñats ñeñt alloch po'ñoçh yequeshperra. Ñetpa' e'ñe atet nentenanet ñerra'mrrate' ohec ñeñt nanac atsena'taret. Ñeñt judionesha' ñeñt o' notuanmaspa' añach ma'yoçhreten cotapñats attoch tsorrannenet atto'ch puechemer perranetañ Yompor. ³ Tarraña yapa' yaña e'ñe po'ñoçh puechemer o' enterrey Yompor, tarro'mar yapa' e'ñe yeñoteñ ama yetsorranna'teñoťeye' puechemer penyey Yompor. Po'ñoçh puechemer perrey tarro'mar yapa' e'ñe yocsheñoť Parets ñeñtpa' e'ñe Puecamquëñoť huena. Ñaña puechemer o' perrey Yompor tarro'mar yapa' yocsheññaña Puechemer Cristo Jesús ñaña tarro'mar yapa' ama añeye' yeyemteno ñeñt atet yetsotaten e'ñe yañeña, ñeñt e'ñech yechtsochaya. ⁴ Ñehua, ñerra'm esesha' ñetpa' çhate' otenapuetañ añte' poctetsa o'ch yeyemtena ñeñt allo es yepenañ alloch yequeshperra e'ñe yotoťapa' nocoppa'çho' eñalleñ shonte' ñeñt neyemtenañ, tarro'mar ñeñt allpon o' netsotatuena' ello metana'tuenan allohuen po'psheñneçhno namo'tseshaçhno puetsotateñ. ⁵ Tarro'mar napa' o' e'ñe allpon netsotueññañ judionesha' poctapña: Ama't po'psocmatñoťeñ allempo ne'ñalletuapa'

napa' atSORRATAtoLLe'tareTen* ñeñt atet anuaret allohuen
 asheñorrotoLleshacop ñeñtey judioneshay, tarro'mar
 e'ñe israelena'tareshoť ñeñt e'ñe judiomñreyoť eñalletñan.
 Ellonetpa' ñaña napa' Benjamín po'mñrenñen. Ñaña
 napa' e'ñe hebreoneshan tarro'mar ach ñaña apapa'
 e'ñe judioneshet poctacma ñeñt eñets e'ñe ya yeñoño
 ñeñtara hebreacho. Allotpa' ñaña na ahuatpa' e'ñe
 fariseoneshan ñeñten nanac ma'yočhraye't attoch netsotua
 ora allpon ñoñets ñeñt aquellca'huaret judioneshacop.
 6 Nanac netsote't judionesha' poctařña. E'ñe nemoñseñoť
 yoctařña napa' ne'moñe'che't allohuen ñeñt o' ame'ñerrana
 Cristo. Ñeñto'marña epaye'ch ne'name'tanete't attoch
 errotenoťpa' o'te' erroť nepatanet. Ñaña ora atet oteney
 ñoñets ñeñt atet anaret judioneshacop napa' čhocma
 e'ñe atet nepohuahue't. Ñeñto'marña ama eñalle'te ama't
 patrra ñeñt nepalltena attoch ello po'psheñeñpa' o'ch
 otnet ñeñto' nepalltenmeñ. 7 Allempo atet netsotrote't
 ñeñtecop nañapa' ñeñta notenapañ ñeñte'ña nanac sherbets
 nocop. Tarraña te'ñapa' e'ñe nemorrenteñoť Cristopa' o'
 neñoter ñeñt allpon o' nepohuahuaapa' amach es sherberro
 nocop ama't coñe'ta. 8 Ama't ellonet allohuen po'poñečno
 ñeñt nente't ñeñto'ch sherbatseñ nocoppa' te'ña e'ñe
 neyemteñoť Cristopa' ama asherbenaye' nenteñe, ama't
 coñe'ta, tarro'mar te'pa' o' neyemtera Yepartseshar Cristo
 Jesús ñeñt nanac sherbets. Ñapa' ello metana'tuenan
 allohuen po'poñečno ñeñt atet nente't na ñeñto'ña
 nanac sherbets. Ñeñto'marña nemorrenteñoť Cristo
 te'pa' o' nepuesuerr ora po'poñečno, nocop te'ñapa'
 ama esoye' nenteñe esheccha' te'pa' e'ñech nocsheñesha'
 nocter Cristo. 9 Allochñapa' e'ñe yeparrocmateñoť Cristo,
 Pomporpa' e'ñech pocte' enteney tarro'mar amach añoťeye'
 a'queshpaterrye e'ñe yoťota ama't yetsotatsetuahua
 ñoñets ñeñt atet anaret judioneshacop. Añoťcha'ña
 te'pa' e'ñech pocte' enterrey e'ñe yeyemteñoťa ñeñt
 Puechemer pen ñeñtpa' Cristo. 10 Atto e'ñe yeparrocmateñoť
 Cristopa' o'ch yaguerrñañ po'huamenc atto ñapa' nanac
 ahuamencattena allempoteñ tanterra puerromñoť. Ñaña
 e'ñe yeyemteñoť Cristopa' e'ñech pocte' yeñch ama't e'ñe
 errotenoťpa' o'ch yemueročhta e'ñe ño'mara atto ñapa' nanac
 amueročhtatarette't. Ñaña ama't yemueročhetuaneñoť
 Cristocopcha' yerromapa' ñeñtpa' e'ñepa'ch pocte' yeñch
 tarro'mar atetcha' yerromaprecha Cristo. 11 Attochña

* 3:5 O'ch secue' nota San Lucas 1.59.

yapa'cho'ña yetantuerrach esempohuañen.

Ñeñtach e'ñe paterr llequë't Pablo

¹² Ñehua, napa' ama noteno napa' o' e'ñe poctacma netsotuahuen ora allpon ñeñt pocte' enten Cristo. Ñaña po'ñoçhpa' ama noteno napa' e'ñe es coçhneshare' noctape'chuen. Tarraña ama't atet neñotenapa' elloña te'pa' allo'ñaña nesen ama't aco'pa o'ch netsotnom ñeñt pocte' enten Cristo Jesús, tarro'mar ñapa' ñeñtecop o' pueyochresha' perren. ¹³ Napa' masheñnesha ñaña noçhanesha neñotena po'ñoçhpa' ama atteye' ne'pohueno ora allpon ñeñt cohuentetsa Cristocop. Tarraña ama't atetpa' amach ñeñta neyerpuerre'te, çhochña nepuesuanom ñeñt atet ne'patse'tyese't ahuatoteñ. Te'ñapa' añach nema'yoçhrena attoch allo'nach nesen ama't aco'pa etsotayesnomue' ñeñt poctetsa Cristocop. ¹⁴ Tarro'mar ñeñtecop o' çhore'terrey Yompor pue'ntañot attoch e'ñe yeparrocmateñot epay Puechemer ñeñt Cristo Jesús, esempopa' ye'pohuerrach ora errponte' e'ñe pocte' enten ña. Allochñapa' aphuerreycha' ñeñt o'patatenya ñeñtcha' nanac yocshatuerre' allohueney ñeñtey o' yame'ñera.

¹⁵ Ñaña o'ch notas ñeñtes po'ñoçh o' same'ña'huera Cristo ahuañmo'çhoteñ, te'pa' ñeñña o' notuanmas e'ñepa'ch seyoçhre'cha. Ñaña ñerra'm erra'tsente' soctape'chyen ñeñt ama atteye' poctetso Yomporecoppa' ñeñtpa'cho'ña e'ñe ña Puecamquëño'tpa' ñach e'ñe seño'tatuerre'. ¹⁶ Añcha'ña e'ñe pocte' o'ch ye'pohuena ñeñt allpon o' çhapatuonay Yompor e'ñe ye'yoçhro ñeñt yeñoten erra'tsente' e'ñe pocte' enten ña.

E'ñech cohuen yocrrena atet corre't Pablo

¹⁷ Ñaña o'ch masheñneshacha' ñaña noçhaneshacha' o'ch notas, ñeñt atet sentenen atet nocrrena napa' sapa'cho'ña atetcha' socrra samia allohuenes. Ñaña añcha'ña secua' ñeñt señoten erra'tsente' ñeñt e'ñe atet corre'tsa cohuen ñeñt atet entenyet ya. ¹⁸ Tarro'mar añ patsropa' eñall shonte' acheñnesha' ñeñt atet penetpa' yapa' yeñoteñ ama ayemuetpahuoye' enteñeto atto Cristopa' rroma corsocho atto'tcha' yequeshperra. Ama't ñeñtpa' shontoch o' notuanmas ahuañapa' te'pa'cho'ña e'ñe nanac nellquëñesha'pa' o' alla noterrser. ¹⁹ Ñetpa' añ a'opatenahuet attoch allohuenetpa' e'ñech chenca'huerret. Añach yomña'yenet attoch rra'yenet amapa' orrare'tyenet. Ñeñt atet yomiatse'tyenetpa' ñeñtpa' atet ñerra'mrrate' ñeñta po'yomporer penet. Ama't ñeñtcha' pencatahuetañpa' tarraña ñetñapa' ñeñtach atarr coshatenahuet. Ñaña añach e'ñe nenet pueyoçhro ñeñtcha' atet coshatse'tatyenahuet arr patsro. ²⁰ Tarraña yapa'

o'huañ atteye' yoctape'ch tarro'mar añ patsropa' ama't all yeychenañpa' tarraña po'ñoçhpa' ama ya'netsreyaye. Tarro'mar ya'netsro allcha' yeycherra ya errponohuañenpa' ñeñtpa' all Yompor pue'ntañ. Ñeñtara pue'ntañõtpa' yecueñ allot esempohuañencha' huerra Yepartseshar Jesucristo ñeñt Ya'queshpatañer yepen. ²¹ Ñerra'm o'ch huerra añe patsropa' ya ñeñtey arromñañteypa' ñapa' o'ch a'po'poñetuerney yechets, allochñapa' yapa'cho'ña yorrterrach e'ñech attey ñerra'm ña po'partsoteñoñpa' nanac cohuentena. E'ñech ña po'huamencot a'po'poñetuerrey ñeñtara po'huamencotpa' e'ñech pomnaren pohuerran allohuen allpon ñeñt eñall.

4

¹ Ñeñto'marña masheñneshacha' ñaña noçhaneshacha' e'ñe nemorrenteñoñtespa' o'ch notas, çhocmuepa'ch huomenc sepa'nem seyoçher Cristocop ñeñt Yepartseshar yepen. Añpa' atet notenes tarro'mar sapa' çhocma neyerpuensa ñaña çhocma socshatenen atto sapa' e'ñe cohuen same'ñena. Nanac nocshensa tarro'mar napa' nentenes atet ñerra'mrrate' necopa' ñeñt o' naguërr e'ñe netorreñoñ Yomporecop e'ñe so'mar. Atarr nanac nemorrentensa.

² Ñaña o'ch noteñ noçhanesha' Evodia ñaña Síntique, amach allo'na po'poñ entanna'tatsetneneto tarro'mar e'ñe yame'ñeñoñ Yepartseshar Cristopa' e'ñech cohuen yemuerannena.

³ Ñaña o'ch notas, ama't erra'tsenotesa ñeñtes po'ñoçh nanac neyemtenapa' o'ch samo'tstatanna'terranet añ epsheña coyanesha' tarro'mar ahuañmo'chapa' e'ñe parrocmá nanac yema'yoçhre't attoch epa'hua añ cohuen ñoñets alloch yequeshperra, ñaña epay Clemente ñaña po'potantañ ñeñt parrocmá nanac yetorre't ahuañmo'cha. Ñet pa'so'chñeçhnopa' o' aquella'huare'tterret attochña ñetpa' corretsetach.

E'ñe yame'ñeñoñ Yomporpa' çhocmuepa'ch yocshena

⁴ Te'ñapa' o'ch noterrser atet, e'ñe same'ñeñoñ Yepartseshar Cristopa' çhocmuepa'ch socshena. O'ch alla noterrser, çhocmuepa'ch socshena.

⁵ Eñotuasepa'ch allohuen acheñenesha' atto sapa' e'ñe cohuen acheñes, amach çha po'poñ es sentatatsetuenaye, ama't erroteno'tsenes. Tarro'mar yeñoteñ po'ñoçhpa' alla'tsena Yepartseshar Cristo.

⁶ Amach es sellcatsto ama't e'ñe mamesha. Añcha'ña ama't erroteno'tsenes e'ñe sema'yocheñoñpa' çhocmuepa'ch sotue Yompor ñeñt sellcatyene' ñaña e'ñe socsheñoñ Yomporpa' çhocmuepa'ch senamyeyñ ñaña ñeñt sepallta'yena.

⁷ Ñerra'm atetcha' çhocma sepena, Yomporpa' ñachña ama semnatenaye o'ch es sena'yen seyoçhro ama't coñe'ta.

Attoch eñmataterrnay Yompor yeyoçherpa' ya acheñey e'ñe yoctapñoñapa' amate' errotenoñ e'ñe yotapa' yeñmataterro atet. Ñeñto'marña e'ñe yeparrocmateñoñ epay Cristo Jesús, Pomporñapa' cohuanñennaycha' yeyoçher attoch amach allo'na yena'нено yeyoçhro ñeñt' allcatañtetsa.

Añcha'ña e'ñe cohuen yoctape'ch ñeñt' e'ñe cohuen entuen allohuen acheñenesha'

⁸ Te'ña masheñnesha ñaña noçhanesha e'ñe allohuanenpa' o'ch noterres, añcha'ña soctape'chyes ora erra'tsente' señoten ñeñt' e'ñe cohuenetyetsa ñaña ñeñt' ora cohuen entuapotetsa. Ñeñtcha'ña soctape'chyes ora erra'tsente' ñeñt' ama shequëñtsoyaye, allotpa' ñaña ora erra'tsente' asherben entpahuotets, allotpa' ñaña ora erra'tsente' ñeñt' poctetsa, allotpa' ñaña ora erra'tsente' ñeñt' ama sosya'tsañeyaye, ñaña ora erra'tsente' amorrentanna'tatañtetsa, ñaña ora erra'tsente' ñeñt' e'ñe cohuen aserrpare'tpahuotets. Ora allpon añechnopa' ñeñtcha'ña atet soctape'chyes.

⁹ Ñaña o'ch noterrser po'poñ ñeñtcha' atet sepa. Allpon o' neyçhatuas, ñaña allpon o' neçhapatuonas seyoçhro, ñaña allpon o' neñotatyesas, ñaña allpon sentenen ñeñt' atet es nepa'yena napa' sapa'çho'ña te'ñapa' e'ñepa'chña atet es sepa'yen samña. Allochñapa' Yompor ñeñt' acshatañtetsa yeyoçhropa' ñachña parro'tsenes allohuenes.

Atto filiposo'marnesha'pa' es apueñet Pablo ñeñt' pallta'yena

¹⁰ Ñaña o'ch notas, e'ñe neyemteñoñ Yepartseshar Cristo, napa' atarr nocshena tarro'mar sapa' o' alla seyerpuerrna. Ñehua, napa' ama notenso o'te' sepuesuerren, añña noten sapa' ama't erroñ sepeñe attoch seyempa'n. ¹¹ Ama çho es nemnapreteñoñeye' notenso atet, tarro'mar na te'pa' o' çhapona neyoçhro ñeñt' atet cohuentetsa, ñeñto'marña te'pa' o' attañña neyçha ama't erroteno'tsenanapa' tarraña attachña çhocma nocshena neyoçhro. ¹² Ñehua, napa' neñotena errotenopa' nanaccha' es nepallta'yese't atto yocrena añe patsro, el-loneña errotenopa' esocmañencha' nechyses't. Tarraña ama't erroteno'tsenenpa' na te'pa' o' neñoch o'ch attañña neyçha; ñerra'm es nepalltena errotenopa' amach çha llecatenno, ama't çho esocmañen es nechyses errotenopa' amach çha nommo'cheño. Ñaña attecnoch nocshena ama't esempo eñall shonte' nerrar ñeñtcha' neyeten, amapa' esempo ama eñalle ñeñtcha' nerren, amach es ne'нено. ¹³ Ñeñto'marña napa' e'ñe neñoteñ, yapa' ama't erroteno'tsenyapa' çhocmach ahuamencatey tarro'mar Cristopa' ñach nanac ahuamencat

yepene'. ¹⁴ Tarraña ama't o' notuanmas atetpa' e'ñe pocte' nenteñ atto sapa' sellcapretena ñeñt nemuerochtatene' arr.

¹⁵ Ñaña sa ñeñtes filiposo'marneshas e'ñe seño tueñ allempo ñanom neserrpare'tnom cohuen ñoñets alloch yequeshperra, allempo non Macedonioť, allempopa' ama't allemeñ anetso'marpa' ama eñalle acheñenesha' ñeñt atet apcherrtsa Yomporecop ñeñtcha' nellcapretenaya attoch e'ñe parrocmá es yapanna'ta. Sapa' saña e'ñe sapta ñeñtes es napuene' ñeñt allpon nepalltena. ¹⁶ Napa' ama't ahuañmo'cha allempo Tesalónico'tsenenpa' ama parrochotayaya sapa' chocma soñmaten ñeñt sapuenen añecop ñeñt nepallta'yena all. ¹⁷ Ñehua, napa' ama nocpaye' nemnapretenso o'ch es sapuenen. Añña nemnen ñaña allochñapa' socoppa'cho'ña ellopa' o'ch atonetnoma attoch coshatuerres Yompor. ¹⁸ Te'pa' o' aposen masheñ Epafrodito ñeñt allpon soñmaten nocop. Ñeñt allpon o' nagaponaspa' te'pa' ama es nepallteno ama't coñe'ta, elloña cha metanuosan allpon ñeñt nepalltena. Ñeñt allpon sapuanpa' napa' e'ñe attecoptar nenteñ ñerra'mrrate' ñeñt apuenet Yomporecop ñeñt eñmosaftetsa ñeñtcha' e'ñe pocte' enten, ñaña ñeñtcha' nanac coshatene' ña. ¹⁹ Ñaña Yompor ñeñt e'ñe neyemtena napa' ñachña sapuerre' saña ama't ora ñeñt allpon sepallta'yena sa, tarro'mar e'ñe yeparrocmateñoť epay Puechemer ñeñt Cristo Jesús ñeñt e'ñe esocmañen es echyetspa' nanacocmañencha' esocmañen apuerrey yaña. ²⁰ Aye'chochtatarettepa'ch Yompor ñeñt atarr Parets. Ñeñt'pa' attetepa'ch ama't tayoteñ errponohuañen.

Arrpa' all so'tnerranet e'ñe po'cartot

²¹ Ñaña o'ch notas, o'ch sehuomcha'ch allohuen ñeñt pueyochresha' o' perr Cristo Jesús. Ñaña allohuen masheñnesha' ñeñt e'ñe parro'tseneypa' ñetpa'cho'ña mueneñet o'ch huomcha'taset ñamet arr necartot. ²² Ñaña allohuen ñeñt pueyochresha' o' perranet Parets arr Romopa' ñetpa'cho'ña mueneñet o'ch huomcha'taset ñamet necartot. Ñeñt nanac muenets atetpa' ñeñt'pa' ñeñt parro yeçhena ñeñt atarr añcha'tarettetsa arr Romo.

²³ E'ñe Yepartseshar Jesucristopa' ñepa'chña e'ñe sa'natenaya allohuenes. Te'pa' ñeñtach notas, ñeñt'pa' attetepa'chña Nompore. Allohua.

Pablo

AÑ SAN PABLO PO' CARTA ÑEÑT QUELLCAN COLOSASO MARNESHA' COLOSENSES

Atto Pablo pa' quellcan carta añecop ñeñt ame'ñetsa anetso Colosaso

¹⁻² Masheñneshacha' ñaña nochaneshacha' ñeñtes o' pueyochresha' perres Parets e'ñe seyemteñoť Cristo, sa ñeñtes yečhetsa all anetso Colosaso. Na Pablon sequellquene'ña añ carta epan masheñ Timoteo. Napa' ñeñten Cristo Jesús puellsensaren tarro'mar atet muenatenen Yompor. E'ñe nehuom'cha'teñoťes sa napa' o'ch notas: Yomporepa'ch Parets sebensare'tam'pene' ñepa'chña socshatene' e'ñe sa seyočhro allohuenes.

Arrpa' all parasyoso'teñet Yompor ñocpuet

³ Yapa' allempo yema'yocham'pensapa' čhocma yeparasyoso'teñ Yompor, ñeñtara Yepartseshar Jesucristo Pompor. ⁴ Tarro'mar yapa' o' ye'mare'tas atto sapa' atarr same'ñeña Cristo Jesús. Ñaña ye'mare'tenes sapa' atarr semuereña allohuen ñeñt pueyochresha' pen Parets. ⁵ Ñeñt'pa' tarro'marña sapa' atet atarr seyemteña sapa' e'ñe same'ñeñoť Cristopa' sapa' añ atarr seyemtena ñeñt o'patatensa all pue'ntaño. Ñeñtña sapa' ahuañoťeñ se'mñotenña cohuen ñoñets ñeñt e'ñe po'ñočh Yompor po'ñoñ alloch yequeshperra. ⁶ Ñeñtña cohuen ñoñets ñeñt čhapats sesho ñeñtña te'pa' allemeñ čhapyen, allpa'cho'ña nanac ame'ñatenana shonte' acheñenesha'. Allpa' allo'na senet orrtatyeset ñeñt e'ñe cohuen enten Yompor. Ñetpa' e'ñe atet penet atet sepene saña. Sa po'ñočh allempo errtes e'muerre' Yompor po'ñoñ atto ñapa' atarr morrentenya, sañapa' e'ñe allempoteñ čhaponasa seyočhro ñeñtña ñoñetspa' e'ñe po'ñočh Yomporo po'ñoñ. Allempoteñña sapa'cho'ña allo'na sesen orrtatyesnomue' ñeñt e'ñe cohuen enten Yompor. ⁷ Ñeñtara cohuen ñoñets ñeñt ñanom yečhatas masheñ Epafras. Ñapa' ñeñt e'ñe parrocmayetorrena Yomporecop, atarr yemuerannena. Ñapa' čhocma atarr cohuen torrena Cristocop ñeñtña' e'ñe socop. ⁸ Ñapa' e'ñe cohuen eñotaturrey atto sapa' atarr semorrentannena e'ñe same'ñeñoť Cristo.

Arrpa' all ma'yocham'peñet colosaso'marnesha'

9 Ñeñto'marña allempo ye'mare'tas allempoteñ yapa' ama yequechpueno sema'yocham̃psaya Yompor. Yapa' añ yenamuennas Yompor: Sapa' chocmuepa'chña eñotatenes ñeñt atet muenen ña ñeñtcha' atet sepa'yes e'ñe cohuen ñocop. Ñaña chaponasepa'ch seyo'chro ora allohuen ñeñt atarr cohuentetsa yecamquëñecop. 10 Allochñapa' o'ch e'ñe sey'cherr ñeñt atet poctetsa allohuenacop ñeñtey pueyochresha' pen Yepartseshar. Allochñapa' attochña e'ñe socshateñ. E'ñe atto es cohuen sorrtyatenpa' nanaccha' cohuenot sesherbeñ. Allo'nepa'chña sesen eñotnomue' ñeñt atet penaña Parets. 11 Ñaña añ yenamuennas Yompor: Po'partsoteña ñeñt cohuenñatsotetspa' e'ñepa'chña ahuamencañ pa'yesas e'ñe poctacma allochñapa' amach cha sequechpatstere. E'ñechña socsheñesha' sa'huanta'huanomña allohuen ñeñt atarr echarr sentyen. 12 Ñaña sapa' chocmuepa'ch separasyoso'ch Yompor tarro'mar ñapa' a'poctaterrnay attoch yagapapreter yamña ñeñt o'patatenana allohuen pueyochresha'chno. Ñeñtñapa' ñeñt po'cohuenña pen ñeñt atarr cohuentetsa allñapa' puetaretsa. 13 Tarro'mar te' Yomporpa' o' cheterrey checmetot all am̃cha'no'chtana oneñeñ. Te'ña yapa' o' chapaterrey po'cohuenño all ayochreshattena e'ñe ña Puechemer ñeñt Jesucristo ñeñt atarr morrentena ña. 14 Ñeñtña Jesucristo ñeñtña rromats yocop ñapa' attoña e'ñe tsa'tuerrnayaña yo'chñar attoch e'ñe peretna'huerrnay yo'chñar esheccha'ña e'ñech cohuen a'qeshpaterrey Yompor.

Allempo ashataretta Cristo po'rras corsocho, ñeñtña e'ñe a'mchechatue'ña allohuen esocmañen

15 Yompor Paretspa' ama entpahuo, tarraña Cristoña ama't entpo'pa' ñapa' e'ñe parro attecma ñerra'm Pompor Parets ñeñt ama entpahuoyaye. Ora allohuen allpon eñalletyestsas, Cristoñapa' e'ñe ñanom eñall ñeñtcha' pomnaren penahuet allohuenet. 16 Allohuen ñeñt allpon aye'chcataretetyestsas ña e'ñe ye'chcatuahuet, ama't ora allpon ñeñt ento'tsa'yen ñeñt ama entpahuoyaye ñaña allohuen ñeñt yentyen arr patsro, e'ñe ñocma pueye'chcatuar. Ñaña allohuen ñeñt allpon am̃cha'taretetyestsas, ñaña allohuen ñeñt allpon ayochreshatetyestsas, ñaña allohuen ñeñt allpon am̃cha'no'chetyestsas erracmañen, ama't ñaña allohuen ñeñt allpon huomenc entyestsas, ora allohuenet ñeñtet aye'chcataretet e'ñe ñocma pueye'chcatuaranet. E'ñe ñocpacma aye'chcataretetyesuahuet. 17 Ora allpon ñeñt esocmañen eñallpa' ñañapa' e'ñe ñanom

eñall. Ora allpon ñeñt̃ esocmañen eñallpa' ñapa' ña or-ratyenahuet. ¹⁸ Cristoñapa' yeyoçher* yepohueñ allohueney ñeñtey parrocmatenaya e'ñe yame'ñeñoť ña, tarro'mar ñapa' ña yoc̃tape'chatene' e'ñe cohuen allohueney ya ñeñtey e'ñe po'chets p̃ohueney. Ñeñto'mar Cristopa' pomnaren peney allohueney ñeñtey ame'ñenaya ña. Ñapa' e'ñe ñanom or-ratene' allochña yapa' corretsayach allohueney ñeñtey e'ñe po'chets p̃ohueney e'ñe yeparrocmateñoť epay ña. Ñaña ñapa' ñanom tanterrtsa rromoť, ñeñt̃ña' ellochña nanac sherberr. Ñeñtpa' tarro'mar atet̃ p̃a allochñapa' ora ñeñt̃ esocmañen allpon eñall, ñet̃ña' Cristochña e'ñe ñanom nanac cohuen entyenet. ¹⁹ Pomp̃or Parets e'ñe pocte' enteñ o'ch e'ñe cohuen chorrataña ora allohuen po'partsoña. ²⁰ Ñaña' e'ñe alla parrocmaten Pomporesho e'ñe parrocmata allohuen esocmañen, ama't ñeñt̃ patso'tsa'yen, ama't ñeñt̃ ento'tsa'yen. Allempo ashatareťta Cristo po'rras corsocho, ñeñt̃ña e'ñe a'mchechatue'ña allohuen esocmañen.

²¹ Ama't sa ahuatpa' atarr ellařaro'tsa'yenes Yomp̃oreshoť. E'ñe se'moñe'teñoť Yomp̃or seyoçhro sañapa' aña seyeçcatyese't̃ ñeñt̃ ama cohuenayaye. ²² Tarraña te'ña Yomp̃orpa' o' e'ñe parrocmata terres e'ñe ñesho. Ñehua, allempo amueroçhtatareťta Cristo e'ñe ña po'chtso atto rroma, ñeñtpa' attochña e'ñe parrocmata terres saña. O' e'ñe parrocmata terres attoña sapa'cho'ña o' sa'cohuentatareťterra Partsocop, ñaña attoch amach sa'tanmareťterro, amach eñalle attoch sottene'chareťterra. Te'pa' atetca'ye enterresña Yomp̃or. ²³ Ñerra'm po'ñoçh çhocmach same'ñera Cristo, ñerra'm e'ñech huomenc seperr seyoçher attochña sapa' amach sepurrerro. Cohuen ñoñets ñeñt̃ o' se'mhua alloch yequeshperra ñerra'm amach çha sa'ypo'ñañpere ñeñt̃ o' seyemterra Yomp̃orña' enterrescha' o' e'ñe sa'cohuentatareťterra. Añ cohuen ñoñets ñeñt̃ o' se'mare'tua sa, te'ña' aserrpare'tatareťterrach ñaña allohuen ñeñt̃ corra'yetsa aña patsro. Ñeñto'marña na ñeñten Pabl̃on nach sherberrets te'ña' nach serrpare'taterrahuet.

Atto Pablo a'potan ñeñt̃ ahuatoteñ ama eñotpahuo

²⁴ Te'ña na e'ñe nemueroçhteñoť socoppa' atarr nocshena. E'ñe nemueroçhteñoť nechtsopa' ñeñtpa' attoña netsotatenas allpon ñeñt̃ palltetsa attoch nemueroçhtaprecha Cristo allohuenacop ñeñt̃ ame'ñenaya ña ñeñt̃ e'ñe po'chets pen Cristo ñeñt̃ e'ñe a'parrocmaten. ²⁵ Ñeñto'marña te'pa' nach sherberre' allohuen ñeñt̃ ame'ñenaya Cristo. Atet̃ llesensenen

* **1:18** Ñehua, po'ñoçh Cristopa' arr atma'ntataret̃ atet̃ ñerra'mrrate' ñeñt̃ yoñ yepen.

Parets e'ñe socop, attochña napa' o'ch e'ñe na'potuerrñañ ora Yompor po'ñoñ. ²⁶ Añcha' na'poterr ñeñt' ama't ahuatapa' ama eseshaye' eñotaye'te e'ñe yatañeshapoteñ tarro'mar allem-popa' ama čhena' allemPOCH eñotatteranet Yompor. Tarraña te'ñapa' e'ñe eñotatterey Yompor allohueney ya ñeñtey puey-ochresha' pen Parets. ²⁷ Te'ña Yomporpa' atarr mueneñ o'ch eñotatterey ñeñt' atarr cočhneshare' ñeñt' po'cohuenña e'ñe ahuatoteñpa' ama eseshaye' eñotaye'te. Te'ña ñeñt' po'cohuenña' o' e'ñe orrtatere'terra añecop ama't ñeñt' ama judioneshayaye. Ñeñt'ña ama eñotete'te ahuatpa', ñeñt'ñapa' añepa't Cristo ñeñt' chorrenaya yeyočer. Attoña e'ñe yeyemteñoť ña yañapa' o'ch yecohuentapretera.

²⁸ Ñeñto'marña Cristopa' čhocmach ya'poteñ. E'ñechña cohuen yoctape'chatyeñ allohuen ama't erra'tsena acheñer. Ñaña e'ñech cohuen yeyčhatyeñña allohuen ama't erra'tsena acheñer attochña ñetpa'čho'ña e'ñech eñotyeyet ñeñt' atet pena Cristo. Attoña e'ñe pueyemteñoťet Cristopa' o'ch ame'ñeñet e'ñe poctacma. ²⁹ Ñeñto'marña napa' nanac netorrena ñocop. E'ñe po'huamenco ñeñt' atarr ahuamencat nepene' attoña napa' čhocma atarr netorra'yena ñocop.

2

¹ Napa' nemneñ o'ch señoč atto napa' e'ñe nellquëñotes sa atarr nanac netorrena socop. E'ñe attecma netorrena ñaña laodiceo'marneshacop, ama't ñaña allohuenacop ñeñt' ama puentarno. ² Allochñapa' attochña e'ñe socsherra seyočrohuen atto e'ñe semorrentanna'teñoťpa' o'ch e'ñe sep-arrocmaterr. Attochña čhaponasa seyočhro attoch atarr es señoťyerr. O'ch señoťerr ñeñt' ama eñotete'te ahuatoteñ, ñeñt'pa' ñaptaña Yompor eñotene'. Ñeñt'pa' e'ñepa'tca'ye Cristesho'tsenña ³ allohuen pa'namen eñoteñets ñeñt' nanac cočhneshare' yentyen. Ñeñt'pa' e'ñe yeyemteñoťa Cristo esheccha' yeñoterrña ñeñt' ama't ahuatapa' ama eñotpahuo. ⁴ Ñeñto'marña napa' atet notenes allochñapa' sapa' amach esesha' seshquërraye ama'tcha' cotape'chatyesaset ñeñt' atarr cohuen ñoñets sentyerreñ. ⁵ Ama'tcha' ama allo'tsenno e'ñe na tarraña neyerpueñoťes neyočhropa' e'ñe parro'tsa'yenacmay. Sapa' e'ñech nočsheñsha' nentyenes atto e'ñe cohuenare' es sorrtatyen. Ñaña nentenes atto e'ñe same'ñeñoť Cristo o' e'ñe huomenc sepa'yen seyočer ñocop.

⁶ Atto o' sagapuer Yepartseshar Cristo Jesús, te'ña sapa' allo'nepa'ch sesen e'ñe parrocmatats epas. ⁷ Attochña sapa' e'ñech huomenc serrmuerrñañ po'ñoñ atet ñerra'mrrate' tsachreč atarr huomenc rromuenan pats,

e'ñe separrocmateñoť epaspa' allo'nepa'chña atonetnomaña ñeñť atto same'ñena. E'ñe same'ñeñoťpa' huomenquēpa'chña sepa'yesnom seyočher. Atterepa'chña allo'na sesen ñeñť atet yečhatyenes. Ñaña čhocmuepa'chña separasyoso'chña Yompor.

E'ñe yame'ñeñoť Cristopa' o'ch yesuanomña atet muenatyese't yečets

⁸ Señota' tach allochña sapa' amach esesha' seshquērraye. Ñato'rraña po'poñ cotapñatsoťpa' čhate' shequērrset. Ñeñť cotapñatserpa' e'ñe orrena tarro'mar ñeñťpa' atta shequēnsset. Ñeñťpa' arromñaťa a'mtene'ña poctapña ñeñť atto shecare'tyenet. Ñeñťpa' patso'marnesha, ñeñťñapa' ama poctenanoña Cristo poctapña.

⁹ Tarro'mar Cristo atto acheñetos ñepa'tña chorrenayaña allohuen Yompor po'partsoña. ¹⁰ Sapa' e'ñe separrocmateñoť Cristo sa'naña chorrappretenayaña Parets. Ñeñť allohuen allpon amiča'taretetyestsas, Cristoñapa' e'ñe ñapťa atarr sherben. Ñaña allohuen ñeñť allsensaretetyestsas, ñaña'apa' e'ñe ñapťa atarr sherben. ¹¹ Sapa' e'ñe separrocmateñoť Cristo te'pa' sesuanom atet muenatyese't sa sečets. Ñeñťpa' ama añoťeye' hueno o'ch setsorratannena e'ñe sañeña sečets ñeñť atet yečhena judionesha'. Ñeñťpa' Cristeshotña huena e'ñe seyemteñoť ña. Ñeñťo'marña e'ñe separrocmateñoť Cristopa' te'ña sapa' o' seyomporena'tarterra e'ñe po'ñočh. ¹² Tarro'mar allempo sapataretta Yomporecop sapa' añ setma'ntena ñerra'mrrate' čho sepampapreteña Cristo. Elloña e'ñe sa same'ñeñoťpa' attoña o' setantapreteraña Cristo. Tarro'mar sapa' añ same'ñate' atto Yomporpa' orrtatan po'partsoteña allo tantaterran Puechemer allempo rroma. ¹³ Ahuat sapa' so'chñarofña ama es soctape'čhperra' seyočhro ama't e'ñe mamesha ñeñť cohuentetsa Yomporecop. E'ñe atet sepe't ñerra'm po'poñ acheñ ñeñť ama Yomporena'tareyaye. Ñeñťo'marña sapa' čha sottet' ñerra'mrrate' secamquēñpa' čha rromuen. Tarraña te'ña Yomporpa' o' apuerres attoch sapa'čho'ña corretsasach e'ñe atet pena Cristo, tarro'mar ñapa' o' peretna'huerrnas allohuen so'chñar. ¹⁴ Tarro'mar ñapa' o' e'ñe e'shohuerrnay ñoñets ñeñť o' quellca'huetañ alloch yotteñe'charetterrañ ya, atet oten ñoñets ñeñť atet anaret' ahuatoteñ. Ñeñť ñoñets Paretsñapa' alla a'huañatañperrey atet ñerra'mrrate' ñeñť apatarettetsa corsocho. ¹⁵ Ñeñťña amiča'nočhetyetsa añe patsro ama't ñaña ñeñť huomenc entyetsapa' Cristoñapa' e'ñe puerratañpesuerranet allo amiča'nočhetyenet. Atto rroma

corsocho allotña e'ñe a'mtsoññetuerranet. Allempoñapa' orrtatanet allohuenet acheñenesesho attoch ñetpa' eñochet ñeñtpa' o' aprrataretterra po'huamenc.

16 Ñato't same'ñeña'ña ama't erra'tsena acheñer ñeñtcha' sote'sa amo' pocteyaye ñeñt atto es serra'yen ama't ñaña atto es sorryen. Ñaña amach same'ñatsche ñeñtcha' sotene' sapa' amo' setsotenoña añ yetñatser ñeñt allpon ana'y sare't judioneshacop, ama't allempoch çherrerr pate'tets char, ama't ñaña allempoch e'ñe errte' orrterrtsa pueña'tets arrorr. Ñaña amach same'ñatsche ñeñtcha' sotene' sapa' año' set-sotenoña ñeñt yetñatser ñeñt anare't allempocma yamesen.

17 Ñeñtpa' pa'choyeshe'maca'ye peñña ñeñt huapatsa. Ñeñt huapatsapa' po'ñoçhpa' ñeñtca'yeña Cristo ñeñt atarr sher-bets. 18 Ñaña amach same'ñatsche ñeñtcha' soterre' sapa' año'ch saguërroña attoch coshaterres Yompor tarro'mar sapa' año' atteye' sepeno ñeñt atet penet ñet. Ñeñt acheñer atet, ñetpa' aña cotape'chyenet o'ch mueroçhtatenet e'ñe ñañeñeta, tarraña ñetpa' pommo'cheñoña atet penet ñeñt po'ñoçhpa' ama es sherbeno Yomporecop. Ñeñto'marca'yeña ñetpa' añaca'ye ma'yochyenet Yompor po'mllañoñeñer. Ñaña ñetpa' aña nanac yemtenet ñeñt entpesa'tyenetañ. Poçtaþñoçet ñeñt e'ñe ñeta po'chtsoçet huena, ñetpa' ñeñta atarr ommo'chenet, ñeñto'marña ñeñtpa' e'ñe orrena atet penet. 19 Ñetpa' ama parrocmateñeto Cristo ñeñto'marña ama pueyoçhreye' peñetoña Cristo. Ñehua, yapa' yoten yeyoçher* ñeñtña atarr sherbets tarro'mar ñeñt atarrtatene'ña ora yechets. Atet pena yelloquëm ñaña yechtsoreçh ñeñtña orrene'ña yechets ñeñto'marña e'ñe parrocmateñ attoña ora yechetspa' atar-rtena. Atet penaña Cristo atet ñerra'm po'ñoçh ñeñt yeyoçher yepen. Allohueney ñeñtey ame'ña'yenaya Cristo e'ñe parrocmatateney, allochña yapa' allo'nach yesen orrtatyesnomue' ñeñt atarr sherbets Yomporecop tarro'mar yapa' atet muenateney Yompor.

20 Sa atto o' serromapretera Cristo ñeñto'marña añ coçtaþñatser arr patsro ñeñt arromñañenesha poçtaþña, ñeñtpa' amaca'ye socpayaye. Sa atto o' serromapretera Cristo ñeñtpa' añecop attoch sequeçhpurrñañ arromñañenesha' poçtaþña. Te'ñapa' eso'mare'tcha'ña alla same'ñerrerrña patso'mar coçtaþñats. Ñato'tña same'ñena'ña ñerra'm esempo otenset: 21 "Amach es sa'pçlatsetyesatsto, amach es serratse'tyesatsto, amach es seçhta'yestatsto." Tarraña ñeñtpa' e'ñech orrena atet otenset, 22 tarro'mar ñeñt allohuen

* 2:19 O'ch secue' nota 1.18.

ñeñt añe patsro'tsen ñeñtpa' e'ñeca'ye e'nuapo'. Ñerra'm ye'nuepa' o'ch e'ñe huañ. Ñeñto'marña ñeñtcha' atet sotyese' ñeñtpa' arromñañaca'ye poctapña ye'chatenset. ²³ Ñetpa' po'ño'chpa' orrtenetañ atet ñerra'm esocmañen eñotuenetañ ñeñt cohuentetsañ tarro'mar puema'yo'chreñofetpa' muechatse'tyenet, ñaña ñetpa' e'ñe ñañeñeta muero'chtatetset po'chets, tarraña e'ñe pommo'cheño'feta atet penet. Tarraña ñeñt atet penet ñeñtpa' amaña añeye'ña atet peneto alloch huenaterret ñeñt atet muenatse'tatyenanet po'chets pa'namen sosya'tsañe'chno.

3

Añach soctape'chen ñeñt atet muenen Cristo ñeñt pue'ntañ'o'tsen

¹ Atto po'ño'ch o' setantapretera Cristo, te'ñapa' añach soctape'chen ñeñt atet muenen Cristo ñeñt pue'ntañ'o'tsen. Ñapa' allña atarr partsoten e'ñe Parets po'cohuenrot. ² Ento'marecopcha'ña sema'yo'chra. Sapa' amachña aña sema'yo'chrato ñeñt patso'marecpa ³ tarro'mar sapa' o'huañcha' socshenaña ñeñt patso'marecpa. Te'ña sapa' e'ñe ates ñerra'mrrate' puesheñarr ñeñt rromuets o'huañcha' allo'na cosha'nenana ñeñt patso'marecpa. (Ñeñto'marña yapa' yoten o' yerromapretera Cristo.) Te'ñapa' ñeñtña yocshatene' ñeñt ora allpon atarr cohuen enten Cristo. Te'pa' atto yocrrerra ello e'ñe yeparrocmateño'f Cristo ñeñt parrocmatene' Pompor Parets, ya'ñaña o' yeparrocmaterr epay Parets ama't ñeñtpa' ama entpahuoyaye. ⁴ Ñeñto'marña ñerra'm esempoch orrterra Cristo ñeñt allo e'ñe yocrrena, allempoña sapa'cho'ña sorrterrach saña epas Cristo. Attochña sapa' o'ch secohuentapretera saña.

O'ch yesuanom ñeñt mellashañ cotapñats ñeñt ama pocteye' enteno Yompor

⁵ Ñeñto'marña socoppa' añ poctetsa: Ama't erra'tsena sechets ñeñt soctape'chatene' patso'marpa' chosaña a'mchechatterre', ñeñt atto sechta'yeñ ñeñt ama setaporeyaye, ñaña pa'namen sosya'tsañe'chno ñeñt atet muenatse'tatyeney yechets, ñaña allpon yemnatse'tyen ñeñtpa' ama cohuenaye' entapretenye Yompor, ñaña atto es atarr yeye'chapretanna'tyena, ñeñtpa' ñeñtñañ yeyomporer yepen. ⁶ Ñeñto'marcha'ña Yomporpa' entaterranetcha' po'yoro'chenña ama't allohuen ñeñt atpare'tene'. ⁷ Sapa'cho'ña ahuatpa' e'ñe attecma soctape'chyese't allempo sapa' sosya'tsañe'cpa socre't. ⁸ Tarraña te'ña ñeñtpa' chosaña

a'ypo'ña'mperre', ama't ora allohuen e'moñe'tanna'teñets, atsrre'mueñets, o'patarñats, achñare'tanna'teñets, ama't allohuen eñosatse'teñtsochno ñeñt atarr sosya'tsañechno. ⁹ Ñaña amach seshcare'tanna'tatsto tarro'mar te'pa' o' sesuanemñ ñeñt mellashañ ñeñt atet soctape'chatyesaye't seyoçhro. Ñeñt atet sepa'yese't ahuat ñeñt ama pocteye' enteno Yompor ñeñtpa'cho'ña o' sesuanemñ. ¹⁰ Sapa' añcha'ña sechorrerraya ñeñt etserra ñeñtcha'ña soctape'chatterre' ello etserra allochña setserrataterrña soctapña. Attoña e'ñe setserrateño'pa' o'ch soctape'cherr e'ñe cohuen ñeñt atet cotape'chen Yompor ñeñt seyeçhcate'. Attochña sapa' allo'nach sesen eñotnene' ñeñt atet cotape'chen ña. ¹¹ Atto yetserrataterr yocapña Cristocop, yaña allohueneypa' e'ñechca'ye attecma puechemer pohueneyña Yompor. Ñeñto'marña yocoppa' ama eñalleña attoch yotaretta yapa' po'poño' acheñrey, yapa' ellopa'tetstatareyo' año' judioneshayayye, año' atsorrareteyayye, ñaña po'poño' acheñrey ñeñt ahupña po'poñ anetsot ñaña ñeñteyo' yapa' año' es yeñoteno ñaña ñeñt acheñrey ñeñteyo' ataruasatareye e'ñe atfa ñaña ñeñt acheñrey e'ñe cohueno'tseney, tarro'mar Cristopa' ñeñtca'yeña e'ñe allohuenacpay, ñapa' ña e'ñe yechorra'huenaya allohueney pa'namen acheñrey ñeñt parrocmatenaya.

¹² Yomporña puemorrenteño'es sapa' o' acrerres ñeñtescha' a'cohuentatarettertsa Partsocop. Atto acrerrespa' e'ñepa'chña seyçhen attoch e'ñe cohuen semuerannena, e'ñepa'chña cohuen es sorrtatyen po'potantañecop. Sapa' e'ñepa'chña pocte' señch ñerra'm po'psheñeñ o'ch entenes sapa' ama esoshe'mayayso. Ñaña sapa' amachña aña se'natsto ñeñt e'ñe socpa ñeñt atet soctape'chen sa tarro'mar sapa' ñeñtes allechoncatets. Ñeñto'marña sapa' e'ñepa'chña sa'huinta'huanomña ñeñt atarr echarrare' sentyen. ¹³ Ñaña e'ñepa'chña cohuen es sa'huintannena ñerra'm esempoch señch po'psheñeñ ñeñt ama pocteye' orrtateno socop, sapa' e'ñechña cohuen sepretnannena. Atto Yepartseshar Cristopa' o' peretna'huerres sa, sapa'cho'ña chocmachña sepretnannena saña. ¹⁴ Ñeñt atarr nanac sherbets o'ch seyçherr attoch semorrentannena e'ñe cohuen. Tarro'mar ñerra'm po'ñoçh yemorrentannenapa' amate' errotenot ya'ypo'ñerroña po'poñechno ñeñt cohuenteyetsa ñeñt atet ye'pa'yen. Attochña allo'nachña yesen etsotnomue'ña parrocmateñets. ¹⁵ Atto Yompor o' e'ñe coshaterres seyoçhro, ñeñtcha'ña soctape'chatterre'ña e'ñe cohuen, tarro'mar ñeñtecopña

o' chore'terreyña Yompor attoch e'ñe yeparrocmatuerr allohueney ñeñtey ame'ñenaya. Ñaña o'ch notas: Sapa' chocmuepa'chña separasyoso'teñ Yompor.

¹⁶ Cristo po'ñoñpa' chocmuepa'chña e'ñe cohuen soctape'cheñ sa seyo'chro, attochña e'ñe ora seño'teño'huenpa' chocmuepa'ch sey'chatannena attoch e'ñe cohuen socshatannena. Ñaña separasyoso'teño'pa' semor-rechepa'ch allohuen morreñtso'chno ñeñt Partsocop attoch sa'ye'cho'chtatoñ atto sa'choteñ. Socsheñeshohuenña seyo'chropa' separasyoso'chepa'ch Yompor. ¹⁷ Ama't esa ñeñt atet es sepa'yen ama't esa ñeñt atet señosyen, e'ñechña seyemteño' Yepartseshar Jesús attochña sapa' es sepa'yes. Ñeño'marña sapa' chocmuepa'ch separasyoso'teñ Yompor Parets e'ñe Yepartseshar Jesucristo pa'so'chño.

Atetcha' yocrra añecop ñeñt parro yepaclo'tsa'yen

¹⁸ Te'pa' o'ch notas samã ñeñtes arrollaretés: Ñeñt serrollar sepenpa' e'ñech cohuen same'ñeña tarro'mar atet poctetsa yocop allohuenacpay ñeñtey ame'ñenaya Yepartseshar Jesucristo. ¹⁹ Ñaña sa ñeñtes ataporetespa' o'ch notas samã: E'ñech cohuen semuerya setapor, amachña cha muene' erro'tuanen sepeñeña setapor. ²⁰ Ñaña sa cheshaneshacha' o'ch notas samã: Chocmach same'ñya sompor ñaña sachor amachña cha satpare'tatsto. Ñerra'm atetcha' sepa'pa' e'ñech cohuen coshensa ama't Yompor Parets. ²¹ Ñaña o'ch notas samã ñeñtes achemereshatñeshas: Amachña cha sa'tsrre'mare'tatatscheña sechemerasha', te't cha nanac sellcatyenanet. E'ñe puellquëño'fetpa' chach atarr quellañtsotyaset, amach e'ñe cohuenaye' ame'ñenseto. ²² Ñaña sapa' o'ch notas samã ñeñtes ataruasataretés e'ñe atta: Chocmachña e'ñe cohuen same'ñyaña ñeñt samo'mte' sepen añe patsro. Amachña puecuampeño'tesaña sema'yoreñ setaruasatsto, ñeñtpa' añecpaña atet sepena attoch e'ñe cohuen entenes samo'mte'. E'ñechña sema'yorñecma seyo'chrocmañen e'ñech cohuen setaruasen. E'ñechña señcha'na'teño' Yompor setaruasen e'ñe cohuen. ²³ Ama't erra'tsena ñeñt setaruas sepa'yen e'ñechña seyo'chrocmañen e'ñe cohuen setaruasen. Tarro'mar ama't acheñecpa setaruasenpa' e'ñechña atet sepena ñerra'mrrate' Yamo'mtayecop Jesucristocop setaruasen. ²⁴ Sapa' e'ñe seño'teñ ñapa' añ o'patatensa ñeñtcha' atarr socshaterre' tarro'mar sapa' po'ño'ch añ sesherben Cristo ñeñt e'ñe po'ño'ch Yamo'mte' yepen. ²⁵ Tarraña allohuen ñeñt atet pa'yene' ñeñt ama pocteye' enteno Yompor, ñetña'pa' atsa'tataretterretcha'

ñeñt allpon ða'yesaye't ñeñt ama pocteyaye. Ñeñto'marña ama't puesheñarrofeta ñocpuetpa' amach eñalleña attoch pocte' enterranet Yompor.

4

¹ Ñaña sapa' o'ch notas saña ñeñtes pamo'mte' pen ñeñt setaruasaten. Sapa' atetcha' sepe'ña sa'taruasañer ñeñt e'ñe pocte' entenet ñet. Ñaña sapa' señochepa'ch sapa'cho'ña sechenca'yeña Samo'mte' ñeñt pue'ntañotsen.

² Ñaña te' allohuenespa' o'ch notas saña: Chocmuepa'chña sema'yoçhrenaña ma'yochatsa, amach seçllañoña sema'yocheñoña Yompor. E'ñechña separasyoso'teñesha' sema'yocheña. ³ Ñaña o'ch sema'yocheña Yompor yocop, o'ch senamonay attoch eñalleta allcha' yeserrpare'toñ po'ñoñ, allcha' e'ñe ya'potua ñeñt ahuatoteñ ñeñt ama't puesheñarrapa' ama eseshaye' eñotenaye ñeñt atet penaña Cristo. Ñeñto'marña na te'pa' ayottamñsareten cárcelo. ⁴ Ñaña añcha' senamon Yompor allochña napa' o'ch e'ñe neñotaterranet e'ñe eñotoçhen ñeñt atet poctetsa nocop o'ch e'ñe na'potuer allohuen.

⁵ Ñaña añecop ñeñt ama ame'ñetso sapa' señoitepa'chña ñeñt cohuentetsa ñeñtcha' atet sepanet. Ama't taya sapa' arosña atta es pueçhatstatsa. ⁶ E'ñe semuereño'tpa' çhocmuepa'chña e'ñe cohuen se'ñorana'tyenanet, allochña ñetpa' e'ñech cohuen entonaset ñeñt atet señen. Allochña sapa' señocheña eñorana'tyesahuet attoch e'ñe cohuen sanapyesanet e'ñe puesheña'tsocmuet.

Arrpa' all so'terranet po'cartot

⁷ Ñaña te'pa' o'ch notas, masheñ Tíquico ñach señoitatenaya' allohuen ñeñt atet nepena na arr. Ñapa' atarr yemuerannena, ñapa' çhocma e'ñe cohuen yenpuenen atto yetorrena Yepart-sesharecop. ⁸ Ñeñto'marña napa' ñeñtecopña nemñeñaña sesho ñach señoitatenaya' ñeñt atet yepena ya arr. Ñaña ñach socshatose' e'ñe seyoçhrohuen. ⁹ O'ch nemñe epuet masheñ Onésimo. Ñapa'cho'ña çhocma atarr cohuen yenpuenen, nanac yemuerannena. Ñapa' e'ñe parro'marneshas. Ñetcha'ña señoitatos'e'ña allohuen ñeñt atet yepena ya arr.

¹⁰ Ñaña masheñ Aristarcopa'cho'ña mueneñ o'ch huomñcha'tas añ necartot. Ñapa'cho'ña e'ñe parrocmayottamñsaretey. Allo'tpa' o'ch huomñcha'tas ñaña masheñ Marcos ñeñtara añ paterr necartot. Ñapa' Bernabé puepa'ñer. Napa' o' notuas atetcha' sepe' masheñ Marcos. Ñerra'm esempoch çhap seshopa' e'ñech cohuen sagaþ.

11 Ñaña masheñ Jesús ñeñtara sochetsa Justo, ñapa'cho'ña mueneñ o'ch huom'cha'tas añ necartot. Ñetpa' ñeñtet ñapueñ judioneshet ñeñt ame'ñetsa, ñetña netorrapretenet Yomporecop attoch atarr ayochreshattena ña. Ñetña atarr nocshatene'. 12 Ñaña masheñ Epafras ñeñt parro'marneshas, ñapa'cho'ña mueneñ o'ch huom'cha'tas ñaña. Ñapa'cho'ña nanac torrena Cristocop. E'ñe puema'yocheñoť huomencpa' atarr torrena socop. Puema'yocheñoťpa' chocma enamatennas Yomporeshot attoch e'ñe huomenc sepa'nom seyocher Yomporecop. Ñaña añ enamuennas attoch e'ñech poctacma chaponasa seyocho ora allohuen ñeñt atet muenen Yompor. 13 Ñocoppa' o' e'ñe neñotatuas ñeñt atet nanac torrena socop ñaña añecop ñeñt Laodiceo'tsa'yen, ñaña ñeñt Hierápoliso'tsa'yen. 14 Ñaña masheñ Lucas ñeñt apartañtetsa, nanac yemuerannena, ñapa'cho'ña mueneñ o'ch huom'cha'tas añ necartot. Masheñ Demaspa'cho'ña mueneñ o'ch huom'cha'tas ñaña.

15 Te'ña sapa' o'ch sehuom'cha'ch sam'a nocop masheñneshachno ñaña nochaneshachno ñeñt Laodiceo'tsa'yen. O'ch sehuom'cha'ch ñaña Ninfas, sehuom'cha'ch ñaña allohuen ñeñt chocma apchetsa ña pa'paclo e'ñe pame'ñeñoťet Cristo. 16 EsemPOCH lleya'huet añ carta sesho allotpa' o'ch selleyach ñaña laodiceo'marnesha' ñeñt pame'ñeñoťet Cristopa' chocma apchenet ñamet. Ñaña po'poñ necarta ñeñt nemñen Laodiceo sapa'cho'ña selleye'ch ñerra'm esemPOCH huapateret Laodiceoť o'ch cherr sesho. 17 Ñaña o'ch soch masheñ Arquipo ñeñt atet noten na, po'ñočpa' etsotanepa'ña ñeñt atet yecheña Yepartseshar ñeñtcha' po'taruas pa' ñocop.

18 Na ñeñten Pablon arrpa' nequellquëñoť e'ñe na nottpa' o'ch nehuom'cha'tnerres. Te'pa' o'ch seyerpa'na napa' ayottam'psareten. Te'pa' ñeñtach notas, Yomporepa'chña sa'nataya. Ñeñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT QUELLCAN TESALÓNICO'MARNESHA' 1 TESALONICENSES

*Atto Pablopá' quellcan carta añecop ñeñt ame'ñetsa anetso
Tesalónico epuet Silvano ñaña Timoteo*

¹ Masheñeshacha' ñaña nochaneshacha' ñeñtes allohuenes apchetsa all anetso Tesalónico e'ñe seyemteñoť Yompor Parets epuet ñaña Puechemer Jesucristo ñeñt Yepartseshar yepen. Na Pablón sequellquene'ña añ carta epan masheñ Silvano ñaña masheñ Timoteo. E'ñe nehuomcha'teñoťes sa napa' o'ch notas: Yomporepa'ch sebensare'tam̄pene' ñeñtara Parets epuet Puechemer Jesúsristo ñeñt Yepartseshar yepen. Ñetepa'chña socshatene' e'ñe sa seyočhro allohuenes.

Atto ame'ñena ñeñt apchetsa Tesalónico

² Yapa' yema'yocham̄peñoťes sa čhocma yeparasyoso'teñ Yompor socop allohuenacpas. ³ Tarro'mar allempo yema'yocheña Yompor čhocma yeyerpuensa atto sapa' e'ñe seyemteñoť Yompor atarr seťorra'yena ñocop ñaña e'ñe semorrentanna'teñoťpa' atarr seyenpanna. Ñaña e'ñe seyemteñoť Yepartseshar Jesucristo sapa' o' huomenc sepa'nom seyočher e'ñe ñocop. ⁴ Masheñeshacha' ñaña nochaneshacha' Yomporpa' atarr morrentensa. E'ñe yeñoteñ Yomporpa' ahuatoteñ acrerres sa ñeñtescha' ame'ñerraya. ⁵ Tarro'mar añ cohuen ñoñets ñeñt yeserrpare'tatoses ahuaña, ñeñťpa' ama ñoñtsenochayayo, yapa' añña ahuamencat yepene' Parets Puecamquēñ allochñapa' atto sapa' o' čhaponasa seyočhro ñeñt ñoñetspa' e'ñepa't po'ñočh ñeñťpa' ama shequēñtsoyaye. Sapa' e'ñe señoťeney ñeñt atet e'ñe cohuen yorrtatyesonas allempo allo'tseney sesho.

⁶ E'ñe atet sentey ya ñeñt atet yepena, sapa'čho'ña te'pa' e'ñech atet sepena saña, ñaña e'ñe atet cohuen orrtatyen Yepartseshar Jesucristo sapa'čho'ña te'pa' ñeñtara sorrtatyen saña. Atto sagapoñ Yompor po'ñoñ e'ñe socsheñesha' Paretsña Puecamquēñ socshate'ña e'ñe sa seyočhro. E'ñe same'ñeñoť ama't atarr sa'mueročhtatareťetyena tarraña sapa' čhocma atarr socshena. ⁷ Ñeñto'marña allohuen ñeñt ame'ñetsa Macedonio'mar ñaña Acayo'mar, ñetñapa' atet eñotenset e'ñe cohuen sorrtatyen Yomporecop, ñetpa'čho'ña te'pa' e'ñe attecma orrtatyenet ñamet Yomporecop. ⁸ Te'ña e'ñe seshoť o' epa'hua Yompor po'ñoñ all serrpare'tyeñet. Ama allayayo Macedonio ñaña Acayo, oraña o' e'ñe epa'hua

erraparen allemeñ. Erraparen o' e'mare'tuaset sapa' atarr same'ñeña Yompor. Te'ña ñet o' e'mare'tuetpa' ñocpuetpa' ama pallteneto o'ch alla yoterraneterr ya ello. ⁹ Ñetñapa' serrpare'tyenyet atto sapa' e'ñe cohuen sagapapuey. Ñaña serrpare'tatanna'tyenet atto sapa' o' soctape'cherr ello cohuen Yomporecop o' sequechpa'huerr ñeñt semchatse'tyese't aye'chcataret. Te'ña ñeñtpa' o' sequechpa'huer e'ñe poctacma attotña allempoteñ e'ñe cohuen sesherber Yompor ñeñt ama arromñatshayaye ñeñt e'ñe po'ño'ch Yompor. ¹⁰ Ñaña serrpare'tyeñet atto sapa' e'ñe seyemteñot atarr secueññañ Yompor Puechemer esempohuañencha' huerra pue'ntañot ñeñtara Puechemer ñeñt tantaterr allempo rroma, ñeñtara Jesús ñeñtcha' ya'qeshpaterre' ñerra'm esempoch yoro'chtatuer Yompor.

2

Atet pa Pablo allempo Tesalónico'tsen

¹ O'ch masheñneshacha' ñaña no'chaneshacha' notas: Saña po'ño'chpa' e'ñe seño'teñ ahuañmo'cha e'ñe cohuen sagapapuey, ama orrena yemo'tenso. ² Ellonetpa' e'ñe seño'teñ ama't epaye' muero'chtatyete't Filiposo, ama't erro'tuanen pa'yetañe't, tarraña Yomporña atarr ahua'mencat pa'ye't atto yapa' e'ñe yeyemteñot ña yeserrpare'tatas saña añ cohuen ñoñets ñeñt huetsa Yomporeshot. Ama't allo'tsa'yen ñaña ñeñt nanac epatarñatetyetsa, yañapa' chocmaña yeserrpare'tatase't. ³ Ñeñtpa' ama panteñtso'teye' yoctape'chataso, ñaña ama sosya'tsañeye' yoctape'chataso, ñaña ama e'ñe ya yeshquēñot yoctape'chataso. ⁴ Elloña ya Yomporpa' e'ñe pocte' enteney ñeñto'mar llesensa'y yach a'poterre' po'ñoñ ñeñt e'ñe po'ño'ch cohuen ñoñets alloch a'qeshpaterrey. Ñeñt atet ye'ñorenapa' ama añecpayaye o'ch e'ñe orrena yocshach acheñenesha', yapa' añecopña ye'ñorena attoch yocshateñ Yompor ñeñt e'ñe yentuene' ñeñt atet yoctape'chyen yeyo'chro. ⁵ Ñeñto'marña sapa' seño'teney ya ama't ahuatapa' ama e'ñe ya yeñoñot yocshatenso attoch e'ñe cohuen sentuene'y. Ñaña ama't ahuatapa' ama erra yeshquēnso attoch sapa' o'ch sapuey ñeñt yemnapretenes. Ñeñtpa' ama't Yomporpa' e'ñe pocte' entapreteney ñeñt atet yepenes. ⁶ Ñaña ama't ahua'ta ama añeye' yellquēno attoch sapa' o'ch secohuentatennay ama't ñaña allohuen po'potantañe'chno. Ñaña yapa' ama't Cristo yellsensenayeñ ñeñto'marña yocoppa' e'ñe pocteñ o'ch atet yepennaseñ ñeñt atet pena añcha'taret, tarraña yapa' amaña yemno o'ch atet yepennasa. ⁷ Tarro'mar yapa' yemuereñotes sapa' e'ñe

cohuen es yorrtatyennas. E'ñe atet yentenes ñerra'mrrate' cheshatollesha' e'ñech cohuen muereña pachor. ⁸ Atarr nanac yemorrentensa ñeñto'marña ama e'ñe ñapta cohuen ñoñets yapuenso ñeñt Yompor po'ñoñ. Elloña yocoppa'cho'ña pocte' yenteñ o'ch yesuanom ñeñt e'ñe yocpa attoch yeyenpas saña tarro'mar sapa' atarr yemorrentensa. ⁹ Ñeñt atet yepena ya, amate' masheñneshacha' cha sepsenye atto nanac yetaruase't yeto e'ñe tsapome'tets allempo allo'tseney sesho. Ñeñtpa' añecop atarr yetaruase't allochñapa' attoch sa ama't puesheñarroñesapa' amach cha ya'tsrre'mochtana'taso allempo yeserrpare'tatase't cohuen ñoñets ñeñt Yompor po'ñoñ.

¹⁰ Sapa' e'ñe sentye't, Yomporpa'cho'ña e'ñe enteney atto yapa' e'ñe cohuen yorrtatyenes socop ñeñtes ame'ñetsa all. Ñeñtpa' e'ñe cohuen yorrtatyen Partsocop ñeñt e'ñe pocte' enten ña allochñapa' attoch amach errotenot otenyeto "ama pocteyaye ñeñt atet sepena." ¹¹ Sapa' señoñteñ yapa' e'ñe atet yentenes ñerra'mrrate' e'ñe yechemerasha' yepohuenes. Ñeñto'marña e'ñe cohuen yoctape'chatase't e'ñe puesheña'ttsos. E'ñe cohuen yocshatterres, e'ñe cohuen yoctape'chatase't ¹² po'ñoñ sapa' e'ñepa'chña cohuen sorrtatyen ñeñt atet poctetsa añecop ñeñt po'ñoñ ame'ñenaya Yompor tarro'mar ñapa' o' hua'ñerres o'ch so'patapretera all amcha'tarettena ña, attochña secohuentapretera saña.

¹³ Ñeñto'marña añecop chocma yeparasyoso'teñ Yompor ñaña atto sapa' allempo ye'mñotaterres Yompor po'ñoñ sañapa' e'ñe cohuen saguërrñañ po'ñoñ. Ama't ya seserrpare'tatosayeñ ama acheña po'ñoñ senteñe, ñeñtpa' Yomporoña po'ñoñ sentña allempo. Ñehua, ñeñtpa' e'ñe po'ñoñ Yompor po'ñoñ. Te'ña sa ñeñtes o' same'ñerra, Yomporña po'ñoñ o' cotape'chatterres e'ñe cohuen seyoçhro o' e'ñe huenaterres ñeñt atet chocma sepatse'tyese't ahuat; te'ña sapa' añ sorrtatyen ñeñt e'ñe cohuen enten Yompor. ¹⁴ Sapa'cho'ña masheñneshacha' e'ñe atet sa'mueroçhtatarettena Yomporecop e'ñe atet pe't ñeñt ñanom apçhatsa Yomporecop ñeñt Judeo'tsa'yen. Ñetpa' e'ñe pueyemteñoñet Cristo Jesús, judionesha'ña ñeñt e'ñe pamo'ts penetpa' atarr mueroçhtatenanet. Sapa'cho'ña e'ñe seyemteñoñet Cristo atarr mueroçhtatenes saña samo'tsesha'. ¹⁵ Ñeñtara judionesha' ñeñt muetse' Yepartseshar Jesús ñaña ñet muetsanate'te't ñeñt a'mta'yese't ahuat Yompor po'ñoñ. Ama't te' yapa'cho'ña pue'moñe'teñoñetay o' cotare'terryeterr yaña. Ñeñto'marña Yomporpa' ama't e'ñe mameshapa' ama cohuenaye' entenaneto tarro'mar

ñetpa' añe'na e'moñe'tenet allohuen pa'namen acheñenesha'.
 16 Ñetpa' atarr epatare'tenyet attoch yeserrpare'tach po'poñ
 acheñ ñeñt ama judioneshayaye attoch ñetpa'cho'ña o'ch
 a'qeshpataretterret. Attoña ñetpa' atarr nanac yorenet
 po'chñaret. Tarraña te'ña Yomporpa' o' entatuerrmochanet
 po'yoroçhenña.

Secherra Pablo o'ch abcherraneta'

17-18 Ñaña o'ch masheñeshacha' ñaña noçhaneshacha'
 notas: Yaña po'ñoçh allempo çha'nmataterryet seshot
 allempoteñña ama't esempapa' ama yaßchanna'terro e'ñe
 teme'ttsen. Chemerrña te' yapa' o' e'ñe yaptamerra. Tarraña
 ama't ama allame'ttsa yaßchannenopa' yeyoçhroñapa'
 e'ñe parrocmatetsy. Yapa' çhocma yesechenañ o'ch
 yaßcherrsa' ama't napa' allponoche'tats nesechenañ.
 Tarraña oneñeñapa' çhocma epatare'teney. 19-20 Tarro'mar
 sapa' saña ñeñtes atarr yocshatene'. Ama't allempoch
 huerra Yepartseshar Jesucristo sapa' saña ñeñtescha'
 atarr yeyemterra, ñeñtescha' atarr yocshaterre' allempo,
 tarro'mar sapa' ñeñtescha' yapataterre' ñeñtcha' atarr
 yocshatene'ña ya allempo.

3

1 Allempoña na o'huañ na'huanta' ñeñt atto nellquënsa
 ñato' erroteno'tseneste', ñeñto'marña napa' e'ñe pocte' neñch
 o'ch alla na'pa napuet Atenso 2 attoch nemñonas masheñ
 Timoteo ñach semo'terraya', ñach seserrpare'tatose' attoch
 e'ñe huomenc sepa' seyoçher ñeñt atto same'ñena. Ñach
 socshaterre' ello ñeñt atto same'ñena. Tarro'mar masheñ
 Timoteo ñapa'cho'ña atarr cohuen yetorrena parro Yompore-
 cop. Atarr serrpare'tatyenanet cohuen ñoñets atto Cristopa'
 ña a'qeshpatañtetsa. 3 Ñach soçtape'chaterre' e'ñe cohuen
 Yomporecop allochñapa' ama't atto atarr amuerochtatarettes,
 amachña ñeñto'ta sepurratsterro ama't puesheñarrotesa.
 Ñehua, sapa' e'ñe señoñeñ çhocmach huaponaya ñeñt amue-
 roçhtatañ yenten. 4 Allempo e'ñe allo'tsa'yenacmay allo-
 hueney e'ñe parro allempo yapa' atet o' yotuas çhocmach
 huaponaya muerochteñets. Ñeñña te'pa' atetcho' o' pónasa,
 te'pa' e'ñete' señoñeñ e'ñe po'ñoçh atet. 5 Ñeñto'marña ahuaña
 allempo o'huañ na'huanta' ñeñt atto nellquënsa naña allempo
 nemñe masheñ Timoteo attoch neñotas sapa' erroteneste'ña
 sa, ñato' atterate' sesen ame'ñaya Yompor. Napa' nel-
 lquëño'pa' atet noten ñato'rraña oneñeñ puetpateñotes o'te'
 çha queçpaterres Yompor. Ñerra'm atet seperra napa' atet

noten ñeñt atto netorrena e'ñe socoppa' ñato'rraña ñeñtpa' e'ñe' orrena.

⁶ Tarraña allempo huerra masheñ Timoteo seshot, ñapa' serrpare'tatuerrey cohuen ñoñets, sapa' attera e'ñe cohuen same'ñena, e'ñe cohuen attera semorrentannena. Ñaña serrpare'tatuerrey atto sapa' chocma seyerpuenya socsheñsha' ñaña atarr semneñ o'ch yabchannerra parro. Yapa'cho'ña e'ñe attecma atarr yemneñ yaña. ⁷ Ñeñto'marña masheñneshacha' ñaña nochaneshacha' yapa' ama't allohuen es yehuenoya ñaña ama'tcha' atarr yemuerochetuanena, te'ñapa' o' alla socshaterrey. Atto yeñoterres sapa' attera cohuen same'ñena ñeñña atarr yocshaterre'. ⁸ Atto sapa' e'ñe cohuen huomenc sepen seyo'cher Yepartsesharecop, napa' ñeñña e'ñe cohuen nocshatene' atto nocrena arr patsro. ⁹ Ñeñto'marña atarr nanac yeparasyoso'teñ Yompor socop. E'ñe yeyo'chropa' chocma yocshensa Yomporesho ñeñto'marña chocma yeparasyoso'teñ Yompor socop. ¹⁰ Chocma yenamueñ Yompor ye'fo ama't ñaña tsapo attoch yabchannerra. Atarr yemneñ o'ch yoctape'chaterra' erra'tsente'ña sepalltena attoch same'ñera e'ñe poctacma.

¹¹ Yompor Parets ñaña Yepartseshar Jesús ñetepa'chña yechapaterre'ña sesho. ¹² Yepartsesharepa'chña atontaterre'ña semorrenteña allochñapa' allo'nach nanac sesen morrentanna'ttsa e'ñe sagattsa attochña allo'nach sesen morrentenaya allohuen acheñenasha', e'ñe atet yepena ya sapa' nanac yemorrentensa. ¹³ E'ñe semorrentanna'teño' seyo'cherñapa' e'ñech huomenc pennas Yepartseshar Cristo. Ñerra'm atetcha' sepa allempopa' amach errotenot otteñe'chuerrsoña Yompor tarro'mar sapa' e'ñech cohuen es sorrtyen Partsocop e'ñe tayoteñ. Attepa'chña entuerresña Yompor Parets ñerra'm allempoch huerra Yepartseshar Jesús. Esemppo po'ño'chpa' huerrach epuet allohuen ñeñt pueyochreshachno pen ñeñt e'ñe pocte' enten Parets.

4

Allo'nepa'chña cohuen yesen orrtatyesnene' ñeñt atet e'ñe pocte' enten Yompor

¹ Te'ña masheñneshacha' ñaña nochaneshacha' napa' o'ch notas, e'ñe yame'ñeño' Yepartseshar Jesús, sapa' allo'nepa'chña cohuen sesen orrtatyesnene' ñeñt atet e'ñe pocte' enten Yompor ñeñt yey'chatuas ahuañmo'choteñ.

² Sapa' po'ño'chpa' o' seño'ter ñeñt atet yey'chatuas e'ñe yame'ñeño' Yepartseshar Jesús attochña sapa'cho'ña o'ch sorrtyen ñeñt cohuen enten ña. ³ Po'ño'ch ñeñtpa' Yomporña

muene'ña atet, sapa' o'ch sa'cohuentataretterra ñocop attochña ama't puesheñarrotpa' amach sechtatscheña ñeñt ama setaporeyaye. ⁴ E'ñe puesheña'ttsospa' čhochña e'ñe señoč attoch e'ñe cohuen seyore coyanesha' ñeñtcha' e'ñe ñapuef setapor sepa'. Atetpa' e'ñech pocte' entapretenes Parets, ama't ñaña allohuen acheñenesha'. E'ñechña cohuen senteñña setapor. ⁵ Amachña e'ñe añecpa seyoroña setapor attoch e'ñe socshaten sechets ñeñt atet pena po'potantañ acheñenesha' ñeñt ama eñotenaye Yompor. ⁶ Ama't puesheñarrotesapa' amach so'chña'tam'psatscheña semo'nasheñ, amach sechtapretatsche puetapor. Allohuen ñeñt atet ye'pa'pa' čhocmach tsa'taterrya Yompor esempo. Ñeñtpa' ahuañmo'chofeñ e'ñe po'ñoč o' yotuas. ⁷ Yomporpa' ama añecpaye' chore'tenye o'ch ña atet ye'pa'yes ñeñt atarr sosey, añecopña chore'teney o'ch e'ñe ya'cohuentataretterra ñocop. ⁸ Ñerra'm esesha'ch atpare'tene' ñeñt atet neyčhatenes ñetpa' ama acheñeye' po'ñoñ atpare'teneto, ñeñtpa' Yomporña po'ñoñ atpare'tenet ñeñtara Yompor ñeñt yapuene' Puecamquēñ ñeñtcha' ya'cohuentatene' e'ñe ñocop.

⁹ Atto semorrenteña allohuen masheñneshachnopa' te'ña sapa' ama sepallteno o'ch alla noterrser necarto, sapa' o' eñotaterres Yompor attoch semorrentannerra allohuenes. ¹⁰ Po'ñoč e'ñe semorrentueña allohuen ñeñt ame'ña'yetsa allemeñ Macedonio. Tarraña ama't atet sepenañpa' ellopa' o'ch masheñneshacha' ñaña nočhaneshacha' alla noterrser: Allo'nepa'ch sesen morrentanna'tnomtsa e'ñe cohuen. ¹¹ Sapa' añcha'ña se'nen attoch e'ñe cohuen muechet seyčhena sa'netsro, amachña ña sorrtatsetyeso attoch se'moñe'tannena. Ñaña o'ch alla noterrser e'ñe sa sototpa' čhocmachña setaruasa'yes ñeñt atet o' notuas. ¹² Cohuencha' setaruasa'yes allochñapa' e'ñech cohuen entenes ama't ñeñt ama ame'ñetso. Ñaña sapa' añecopcha'ña setaruasa'yes attoch amach čha es sepallteno.

Attoch tantuerra ñeñt arromñañnesha' allemepoch huerra Jesús

¹³ Masheñneshacha' ñaña nočhaneshacha' yapa' yemneñ o'ch e'ñe señoer erroteno'tsa'yente'ña ñeñt pame'ñeñoř rromuets. Allochñapa' amach atta atarr sellquēnaneto ñeñt atet pena po'potantañ, ñetpa' ama es yemteneto. ¹⁴ Yapa' atto yame'ñeña Jesús ña ama't rroma ellopa' alla tanterra, yame'ñeña ñaña Yomporpa' attecmach tantatuerrey allohueney ñeñteycha' e'ñe yame'ñeñoř Jesucristo yerroma.

¹⁵ Ñeñto'marña te' sapa' o'ch neñotatas ñeñt atet eñotaterrey Yepartseshar Jesucristo, ñeñtpa' atet yečhatey: Allohueney

ñeñteycha' orameñ corretsa allemPOCH huerra ña ñeñteycha' ama rromhuetsa' allemPO, yañapa' amach yotam̄pesyona yanom ñeñt̄ o' rromhua, añcha' ñanom oterrtsa ñeñt̄ o' rromhua allotñapa' yam̄a ñeñtey orameñ corretsa, tarro'mar allemPOpa' atetcha' perra. ¹⁶ Partsesha'pa' ñachña eñerrets huomenc ñam̄a ñeñt̄ pa'm̄cha'tareter pen allohuen mellañoteñnanesha' ñachña rrana'nerrtsa, e'ñech allemPOcma e'morrterra ñam̄a Yompor po'pocor. Attochña ñapa' sohua'nerra pue'ntañot̄. Ñeñña rromuets ñeñt̄ amañam̄aya Cristo ñetña allemPOpa' ñanmuetcha' tantrra'tuerret. ¹⁷ Alotñapa' yam̄a ñeñtey orameñ corretsa arr patsro a'tapatareteycha' yam̄a oso e'ñe parro epay ñeñt̄ o' tantrra'tuena rromot̄ attochña e'ñech parrocm̄a yepoc̄ter Yepartseshar eno. Attochña e'ñe allohuenep̄pa' parro'tseneycha' epay Yepartseshar e'ñe allemPOteñ errponañohuen. ¹⁸ Ñeñto'marña sapa' çhocmach seyerpatannena añ cohuen ñoñets attoch e'ñe cohuen socshatannena.

5

¹ Te'ña masheñneshacha' ñam̄a noçhaneshacha' socoppa' ama pallteno o'ch alla noterr̄serr añ necartot̄ e'ñech esempo etsoterra allemPOCH huerraña Yepartseshar. ² Tarro'mar sapa'çho'ña o' e'ñe señoter çherrcha' paterr yet allemPOCH huerra Yepartseshar Jesús. AllemPOpa' e'ñech machayota huerra e'ñe atet ñerra'm̄ esempo huennaya eñet̄ tsapo e'ñech machoyota huapa. ³ AllemPO amach çhena' ñeñt̄ yeter allemPOCH huerra Yepartseshar acheñenesha'ña arr patsro ñetñapa' atetcha' otyerret allemPO: "Te'ña yapa' e'ñe cohuen muechet yeyçhena arr patsro. Yocoppa' ama't ahuatapa' amach eñalleterroña ñeñt̄cha' yeyore'tame'terre'." Tarraña e'ñech allorocma machayotach huerranet ñeñt̄cha' e'ñe a'cllatuerrahuet. AllemPO ama't puesheñarrapa' amach eñalleña attoch yeterret. E'ñech atet çherranet ñerra'm̄rrate' allemPO atsotenana coyanesha' pue'mar amach eñalleña attoch yetam̄psana atto atserrpeñ pue'mar attoch amach atserrpe. ⁴ Tarraña saña po'ñoç masheñneshacha' ñam̄a noçhaneshacha' sapa' ama checmeto'tsenayayso ñeñt̄ atet pena acheñenesha' ñeñt̄ ama ame'ñetso. Sapa' e'ñe señoteñ ñeñto'marña ama'tcha' machayota huerra e'ñe atet machayota huennaya eñet̄, sañapa' amach çha seyorenatsto. ⁵ Tarro'mar sapa' e'ñe same'ñeñot̄ Cristo e'ñe señoteññañ po'cohuenña ñeñto'marña napa' o'ch netma'ntatasa sapa' puetarenana'tarneshas ñam̄a yetena'tarneshas. Po'ñoçh yapa' ama tsapo'marneshayayye

ñaña ama checmeto'marneshayayye tarro'mar yapa' ama añeye' yeþa'yeno ñeñt' atet þatse'tyen ñeñt' ama ame'ñetso. 6 Ñeñto'marña o'ch notas: Yapa' amach ÷ha yeçllatsto Yomporecop, tarro'mar ñerra'm atet yeþapa' ÷hach yottena ñerra'm ÷ha yemuen Yomporecop atet pena po'potantañ ñeñt' atta es pue÷ha'yetsa. Yapa' amachña ÷ha yemanrra'tatsto ÷hochña e'ñe yeñotena attochña yeñose're'tyesuena. 7 Ñehua, yeñoteñ ñeñt' manrretspa' tsapoch manrrenet ñaña ñeñt' posa'tare'tyetspa' tsapoch posa'tare'tyenet. 8 Tarraña yapa' yeto'marneshay ñeñto'mar ÷hocmuepa'ch e'ñe yeñoteñoť yeñose're'tyesuena. E'ñe yame'ñeñoť Yompor ñaña yemorrentanna'teñoť ñeñtña cohuanþene'ña yeyo÷her Yomporecop attoch amach aña yoctape'chatsto ñeñt' ama pocteye' enteno Yompor. Ñeñtþa' añ toma'ntena asrom atet ñerra'mrrate' ñeñt' chorrena solltar ñeñt' a'natene' puesomap allempo quellarena attoch ama etare'tteneto. Ñaña yapa' yeyemteñoť Cristo te'ñapa' e'ñe a'qeshþatare'tey ñeñtþa'cho'ña ñeñtña yemoñenaya. Ñeñtþa' añ toma'ntena atet pena solltar o'ch na'nman asret poño attoch ama etto'tare'tteto. 9 Tarro'mar Yompor po'ño÷hpa' ama añeye' o'patatenyo attoch coñchatuerrey; yapa' añña o'patatenya attoch e'ñe cohuen a'qeshþatuerrey allohueney e'ñe yame'ñeñoťa Yepartseshar Jesucristo 10 ñeñt' rromats yocop, attochña ama'tcha' o' yoclla'huenañ allempoch huerra amapa' ñato' orameñ yocrenmeñ allempoch huerra atterayach yañapa' corretsayach epay ña e'ñe parro. 11 Ñeñto'marña te'pa' notenes, sapa' ÷hocmuepa'ch socshatannena Yomporecop. Chocmuepa'chña huomenc seþanna'ta seyo÷her Yomporecop e'ñech atet seþa tayoteñ.

Pablopa' e'ñe cohuen cotape'chatyesanet

12 O'ch masheñneshacha' ñaña no÷haneshacha' notas po'poñ, semcha'na'teñoťpa' e'ñepa'ch cohuen semorrenteña allohuen ñeñt' torra'yetsa Yomporecop sesho tarro'mar ñetþa' e'ñe Partsesheshoť anarettenet ñeñt'cha' am'cha'tare'ttatsa socop, ñetcha'ña soctape'chatene'ña e'ñe cohuen. 13 Atto atarr torrenet Yomporecop sañapa' e'ñepa'chña cohuen sentenanet, atarrcha' semorrentenanet. Ñaña ama't allohuenes e'ñe sagattsapa' e'ñepa'chña cohuen sentannena attoch e'ñe cohuen sey÷hena e'ñe señmañesha'.

14 Ñaña o'ch masheñneshacha' alla noterrser ñeñt'cha' atet seþa: Ñeñt' atarr quellañtsotyets sesho sachña cotape'chatterahuet cohuen attoch amach allo'na quellañtsoteneto. Ñaña ñeñt' ama coshetso sachña e'ñe cohuen coshaterrahuet ñaña ñeñt' ama huomencaye'

penaye pueyoçher Yomporecop, sachña e'ñe cohuen coshatyerrahuet attoch e'ñe huomenc perret ñamet pueyoçher Yomporecop. E'ñe allohuenet saña e'ñe semorrenteñoñanet ñetpa' çhocmuepa'chña e'ñe cohuen sa'huantenanet.

15 Ñaña sapa' çhocmuepa'ch e'ñe cohuen señoтена allochñapa' ñerra'm po'psheñeñ erroť pñonaspá' sapa' ama't e'ñe puesheñarroťesa amach setsa'tatatsche ama't coñe'ta. Añcha'ña e'ñechña cohuen sepeñ samo'ts ama't ñaña allohuen po'potantañ acheñenesha'.

16 Ñaña sapa' çhocmuepa'ch e'ñe cohuen socshena. 17 Ñaña çhocmuepa'chña sema'yochena. 18 Ñaña ama't erroteno'tsensa çhocmuepa'ch separasyoso'teñ Yompor tarro'mar ñeñtpa' atet muenen e'ñe yocop allohuenacpay ñeñtey yemtenoya Puechemer ñeñt Cristo Jesús.

19 Ñaña amach saťpare'tatsche ñeñt atet cotape'chatenes Parets Puecamquëñ e'ñe seyoçhro, tarro'mar ñerra'm atet seřapa' çhate' sa'huañaterrñañ ñeñt atet eñotatyenes Yompor Puecamquëñoť. Ñeñtpa' e'ñe atet ñerra'mrrate' o' semayerrñañ Yompor po'urare. 20 Ñaña amach atet sentatsche ñeñt atet eñoraten Parets Puecamquëñoť ñerra'm ama asherbenaye' senteñe. 21 Allohuen ama't erra'tsena çhochña ñanom señoçh ñato' e'ñe'te' cohuen ñato'pa' amate' cohuenayaye. Ñeñt allohuen erra'tsencha' e'ñe cohuen sentyes ñeñtñapa' amach sequeçhpatstere ama't ahuata. 22 Tarraña allohuen erra'tsencha' ama cohuenayaye sentyeso ñeñtñapa' çhosaña a'ypo'ñerre'.

23 Yompor ñeñt e'ñe yocshatene' yeyoçhro, ñepa'chña e'ñe sa'cohuentaterre' e'ñe cohuen Partsocop. Chocmuepa'ch allo'na sesen e'ñe cohuen allochñapa' ñerra'm esempoch huerra Yepartseshar Jesucristo, socoppa' amach eñalleña ama't coñe'ta attoch otteñe'chuerres ama't secamquëñoñhuen, ama't seyoçhrohuen, ama't ñaña sechtsohuen. 24 Tarro'mar Yompor ñeñt o' çhore'terres ñapa' ña atarr ayemuetpotetsa, ñachña setsotatue'ña e'ñe ora allohuen ñeñt e'ñe cohuentetsa ñocop.

Arrpa' all so'terranet po'cartot

25 O'ch masheñneshacha' ñaña noçhaneshacha' notas, çhocmach sema'yochañpesya yaña.

26 Ñaña te'pa' nemneñ o'ch nehuomñcha'tas allohuenes ñeñtes ame'ñetsa.*

* 5:26 Po'ñoçh oteney. "Choch setso'ttsa'pa'tannena ñerra'm esempo sehuomñcha'tanna'tena ñeñt atet poctetsa Partsocop." Ñeñtpa' atet yeçhete't ahuat.

²⁷ Ñaña te'pa' o'ch notas, e'ñe yem'cha'na'teñoĩ Yepartseshar Cristo añ cartapa' o'ch selleyach allohuen masheñneshachno ñaña nochaneshachno.

²⁸ Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñtpa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑÑ QUELLQUËRRANERR TESALÓNICO' MARNESHA' 2 TESALONICENSES

Atto Pablopa' quellquërranerr carta añecop ñeññ ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña nochaneshacha' ñeññes allohuenes apchetsa all anetso Tesalónico e'ñe seyemteñot Yompor Parets epuet ñaña Puechemer Jesucristo ñeññ Yepartse-shar yepen. Na Pablon o'ch alla nequellquërrnaserr po'poñ carta epan masheñ Silvano ñaña masheñ Timoteo. ² E'ñe nehuomñcha'teñotes sa napa' o'ch notas: Yomporepa'chña sebensare'tam'pene' ñeññara Parets epuet Puechemer Jesu-cristo ñeññ Yepartseshar yepen. Ñetepa'chña socshatene' e'ñe sa seyo'chro allohuenes.

Allempoch huerra Cristopa' a'coñchatare'ñterrach allohuen ñeññ ama e'ñotaye'te Yompor

³ O'ch masheñeshacha' ñaña nochaneshacha' notas, e'ñe pocte' chocmach yeparasyoso'teñ Yompor socop tarro'mar sapa' po'ño'ch allo'na sesen ame'ña'nmaya Yompor ñaña allohuenes e'ñe puesheña'ttsospa' allo'na sesen morrentanna'tyesnomtsa. ⁴ Ñeñño'marña yañapa' atarr yocshensa. E'ñe yocsheño'ipa' atarr cohuen yeñosyen socop all allampaño'mar all ap'cha'yenet Yomporecop. Ñetpa' chocma yeñotatyenanet atet sepena sa, ama't ñeññ se'moñe'tene' ñeññ chocma soctare'tene' atto muero'chtatenset, tarraña sañapa' chocma atarr sa'huantenanet e'ñe same'ñeñot Yompor. ⁵ Ñehua, yapa' yeñoteñ Yomporpa' e'ñe pocte' es pa'yen. Ñeñño'marña yeñoteñ sapa' e'ñe same'ñeñot ña, ñañapa' e'ñeca'ye pocte' entenes allochñapa' attoch se'cherr all añcha'tare'ttena ña, sapa' ñeññecopña atarr sa'muero'chtatare'ttenaña te'.

⁶ Tarraña Yomporpa' e'ñe pocte' enteñ ñach tsa'taterraya muero'chteñtso allohuen ñeññ semuero'chtatene' sa te'. ⁷ Ñeññ atto atarr semuero'chtena te' e'ñe ñocop, Yomporñapa' e'ñe pocte' enteñ socop, ñachña ello socshaterre'ña sa e'ñe atet atarr coshateney ya. Yapa' ñeññcha'ña atarr yocshaterre' ñerra'm esempoch orretuerra Yepartseshar Jesús allempoch huerra pue'ntañot. Ña po'ño'chpa' orretuerrach epuet po'mllaño'feñnaneshar ñeññ atarr ahuamencatesha' pa'yen.

Ñapa' e'ñech po'yorochenñoñ huerra atet ñerra'mrrate' tso' huoretnets. ⁸ Allempoch huerrapa' coñchatuerrancha' allohuen ñeññ ama eñotaye'te Yompor ñeññ ama ame'ña'poye' entaye'te cohuen ñoñets ñeññ Yepartsesharecop Jesucristo. ⁹ Ñetñapa' attoch a'coñchatare'tterretpa' chenca'huerretcha' errponañohuen. Attoch ñetpa' o'ch ellopa'tetstatare'tterret amach entereto Yepartseshar, amach enterrñañeto po'cohuenña all nanac partsotena. ¹⁰ Ñapa' tarro'marcha' huerra attoch allohueney ñeññey pueyochresha' pen Parets, yañapa' yecohuentatapuerrñañcha'. Allohueney ñeññey ame'ñaye't atarrcha' yecuanrrortapuer. Sa'nachña cohuentatapuerre' tarro'mar sapa'cho'ña same'ñena cohuen ñoñets ñeññ yeñotatenes.

¹¹ Ñeñño'marña yapa' chocma yema'yochamñensa allochñapa' attoch Yomporpa' e'ñe pocte' entenes atto ñapa' o' chore'terres o'ch pueyochresha' perres saña. Ñaña yapa' añ yenamuennas Yompor e'ñepa'chña po'huamenco't etsotatonasña allohuen ñeññ atet soctape'chyen cohuen ñocop ñaña ora ñeññ allpon setorra'yena e'ñe same'ñeñoñ ña. ¹² Attochña sapa' e'ñech cohuen secohuentaterrñañ Yepartseshar Jesús, ñañaapa' cohuentaterrescha' saña. Ñeññpa' e'ñe Yompor puemuereñoñey ñaña Yepartseshar Jesucristo.

2

Allempoch orrterra puesheñarr acheñ ñeññ atarr atparñaitetsa

¹ Te'pa' o'ch masheññeshacha' ñaña nochaneshacha' neñotatas po'poñ ñeññpa' añ allempoch huerra Yepartseshar Jesucristo attoch ñapa' o'ch apchatuerrey allohueney e'ñe ñesho. ² Te'pa' ñeñño'marña notenes: Ama't puesheñarrotesapa' ñato't cha yore'tensa'ña po'poñ coñapñats. Sapa' amach cha seyorenatsto ama'tcha' se'mare'ter o' cherr allempoch huerra Yepartseshar. Ama'tcha' otasetañ ñetpa' e'ño' Parets Puecamquëñ eñoratenahuet, sañapa' ñato'tña cha seyorena'. Ama'tcha' pueserrparñoñet atet otaset, sañapa' amach seyorenatsto. Ama'tcha' atet otasetañ te'pa' o' chap carta ñeññ mueñen Pablo ñeññpa' atet oten carta, te'pa' o' cherr allempoch huerra Yepartseshar, saña e'ñe seyorñoñpa' ñato'tña ñeññaña same'ñena'. ³ Ama't puesheñarrotesa sapa' amach se'mñotatstaneto ama't e'ñe errotench'a' otyesaset, tarro'mar ñetpa' atetcha' shecare'tasetañ. Ñeñño'marña napa' o'ch notas, allempopa' amaca'ye cherra' ñeññeñpo ñeññe yetñatsroch huerra Yepartseshar, ato'tña atarr

atonterra' ñeñtcha' quechpuerre' Yompor. Ñaña allempopa' orrterrach puešeñarr acheñ ñeñt atarr atparñaatetsa, ñeñtpa' chenquēñtsa o'patenaya. Ñaña'pa' Yomporach atarr e'moñe'terr ñaña allohuen acheñenesha' ñeñt muechatse'tyene' pa'namen ñeñt po'yomporer pa'yenet ñachña e'ñe tanterrahuet. ⁴ Ñaña ñeñtña atparñaatpa' e'ñe pommo'cheñoitpa' atetcha' oterran acheñenesha' ñapa' ño'ña e'ñe Yomporetets. Attochña ama't Parets pa'paclopa' o'ch anorruerr, o'ch e'ñe atet perra ñerra'mrrate' ña po'ñoçh Yomporetets.

⁵ Sapa' ama't seyerpuenoña allempo allo'tsenmeñen sesho na ama't ñeñtpa' e'ñe notuase't. ⁶ Sapa' señoñe'te' ñeñt onare'tatene'ña ña attot amo' huerro tarraña çhocmach orrterra allempoch çherr e'ñe atet onañchare't ñocop. ⁷ Ama't e'ñe tayoteñ atto atpare'tenet ñoñets ñeñt atet anare'tpa' ñetña e'ñe a'nahuapa' çhocma atet penet. Tarraña te'pa' eñall ñeñt onare'tatene' ñeñt acheñer ñeñtcha' atarr atparñaaterrtsa, ñeñtña'pa' çhocmach atet pena tarremphuach esepoch aprratam̄psare'tterra ñeñt onare'tatene' te'. ⁸ O'ch aprratam̄psare'tterrappa' ñeñtña acheñer ñeñtcha' atparñaaterrtsa allempochña orrtatare'tterra. Tarraña allempoch huerra Yepartseshar Jesús ñachña e'ñe puenamo't po'rrerrñoitpa' ñeñtcha' muetserre'ña ñeñt atarr atparñaatetsa. Attoch orrterra Jesús e'ñe ña po'partsoteño't ñeñtcha'ña e'ñe a'mchechatterre'ña ñeñt atparñaatetsa. ⁹ Ñehua, ñeñt acheñerpa' oneñe't atarr ahuamencat pene' attoch orrterra. Ñeñto'marña pa'namencha' orrtaterr ñeñt po'partsoña pen ña ñeñt ama't ahuata acheñenesha' arr patsropa' ama't puešeñarro'tetapa' ama puentareto. Tarraña ñeñt po'partsoteña pen ñapa' ñeñtpa' ama Yomporeye' apuenaye, ñeñtpa' oneñe'ta apuene' atto shecare'tyenan acheñenesha'. ¹⁰ Attach e'ñe pa'namenot atarr shecare'tyerran acheñenesha' ñeñt ama't mameshapa' ama pocteyaye. Añcha' ashcare'tterrtsa allohuen ñeñt ama ame'ñetso ñeñt o'patena chenquēñets. Tarro'mar ñetpa' ahuatoteñ ama ame'ña'poye' enteññañetoña Yompor po'ñoñ ñeñt e'ñe po'ñoçh alloch a'queshpatare'tterretañ. ¹¹ Ñeñto'marña Yomporpa' muenaterranetcha' o'ch atarr ashcare'tterret, attochña ñetpa' e'ñech aña ame'ñerret shequēñets ñeñt ama po'ñoçhayaye ama't mamesha. ¹² Attochña allohuen ñeñt ama ame'ña'poye' entaye'te Yompor po'ñoñ ñeñt e'ñe po'ñoçh queshpeñets, ñetpa' aña coshete't ñeñt ama pocteye' enteno Yompor, ñeñto'marña ñetpa' a'coñchatare'tterretcha' allempo.

Yapa' e'ñe ahuatoteñ acrerrey Yompor attoch a'queshpaterrey

¹³ Tarraña saña masheñnesha ñaña nochaneshacha', yapa' chocma yeparasyoso'teñ Yompor socop ñeñtes atarr muerena Yepartseshar. Tarro'mar Yomporpa' ahuatoteñ acrerres sa attoch a'queshpaterres e'ñe cohuen. Ñeñtpa' añcha' sa'queshpaterre' atto Parets Puecamquëñpa' e'ñe a'cohuentatenes ñocop atto sapa' e'ñe cohuen same'ñerrñaña po'ñoñ ñeñt e'ñe po'ñoñ alloch yequeshperra. ¹⁴ Sapa' ñeñtecopña chore'terresña Yompor allempo yeserrpare'tatase't cohuen ñoñets alloch a'queshpaterrey Yompor. Attochña sapa'cho'ña secohuentapreterach Yepartseshar Jesucristo esempohuañen.

¹⁵ Ñeñto'marña o'ch masheñneshacha' ñaña nochaneshacha' noterrser: Sapa' e'ñepa'chña huomenc sepa'nom seyocher Yomporecop. Ñaña ora allpon ñeñt yeychatyesase't e'ñe ya yenamot yeserrpare'tatase't ama't ñaña yecartoñ ñeñtñapa' e'ñepa'ch huomenc seyochre'cha. ¹⁶⁻¹⁷ Te'ñapa' o'ch notas: Yepartseshar Jesucristo ñaña Yompor Parets ñetepa'chña e'ñe cohuen socshaterre'ña sa seyochro, ñetepa'chña ahuamencañ sepa'yese' allochñapa' attochña sapa' chocmach señosyen ñeñt e'ñe cohuen ñoñets ñaña e'ñechña cohuenare' es sorrattyen. Tarro'mar Yomporpa' ñeñtña atarr yemorrentenaya, ñapa' ña ñeñt chocma yocshatene' yeyochro. Ñeñtña cosheñetspa' amach ahuañañaterra ama't errponaña. Ña e'ñe puemuereño'tpa' chocma eñotateney e'ñe cohuen ñeñt atarr yeyemtena.

3

Atto Pablopa' otanet chocmach ma'yochampeñet

¹ Masheñneshacha' ñaña nochaneshacha' te'ña e'ñe allohuapa' o'ch notas: Sapa' chocmach sema'yochampesya yaña. O'ch senamueñ Yompor attoch epa'huerra tecma Yepartseshar po'ñoñ errañaren, cohuenepa'ch entyeññañet po'ñoñ e'ñe atet atarr cohuen señch samña allempo chap sesho. ² Tarro'mar acheñenesha'pa' ama allohuenacmaye' ame'ñeneto, shonte' ñeñt atpare'tene' Yompor ñaña shonte' atsrre'mñañnesha' ñeñt ama cohuenayaye. Ñeñto'marña sapa' añcha' senamueñ Yompor amuepa'chña cha epatare'tatsetyeto. ³ Tarraña Yepartsesharpa' ñachña atarr yeyemtena, ñachña ahuamencañ sepene', ñach secuamipene', ñach sa'nataya, amach muenatano o'ch chaponasa ñeñt ama cohuenayaye. ⁴ Ñaña yapa' e'ñe yeyemteño't Yepartseshar sapa' e'ñe yeñotenes ñeñt atet yotenes sañapa' e'ñech atet

sepena te' ama't ñaña tsapatonet chocmachña atet sepena.
 5 Yepartsesharepa'chña Jesús e'ñe cohuen señotatene'ña seyoçhro atto Yomporpa' atarr morrentensa, attochña e'ñeçh cohuen sa'huantahuanom allohuen topateñets e'ñe atet pe't Cristo.

Yocoppa' añ poctetsa chocmach yetaruasen

6 Te'ñapa' masheñeshacha' o'ch notas e'ñe Ya'micha'tareter Jesucristo pa'so'chño, sapa' ñato't seyemteña'ña ñeñt atarr quellañets ñeñt amach mueno taruasa'. Ñeñt atet pet-sapa' ama mueno o'ch ame'ñanaña ñeñt atet yeychatenes.
 7 Sapa' e'ñe señoñ añ poctetsa socop o'ch atet sepena saña e'ñe atet senteney ya. Yapa' allempo allo'tseney parro yapa' chocma yetaruasen. 8 Yapa' ama't errotena ama't puesheñarrapa' ama yerraprecheña puerrar e'ñe atta. Ñamche'ña yapa' chocma yetaruasen yeto e'ñe tsapome'tets attot yentña ya yerrar allempo allo'tseney sesho. Yapa' ama çhoye' ya'tsrre'moçhtana'taso ama't puesheñarrotesa. 9 Ama't e'ñe pocten o'ch serratapyen e'ñe atta, tarraña yapa' ama yemno tarro'mar yapa'çho'ña yemneñ o'ch yetaruasos yanña allochñapa' attoch yorrtatonas ñeñt e'ñe cohuentetsa socop allochñapa' atetcha' sepa saña. 10 Allempo allo'tseney seshopa' atet yotas, ñerra'm esesha'ch atarr quelletspa' arepa'ña rratstats, rranepa' po'çllañ. 11 Yapa' ye'mare'tenes puesheña'ttsos sapa' seçllaño'pa' atta sellapene't, ama çhoye' setaruaseno ama't mamesha, añaña e'ñe setorra'yena sa ñeñt ama es sherbeno. 12 Allohuenes ñeñtes atarr quellañsarerespa' te'pa' o'ch notas e'ñe Ya'micha'tareter Jesucristo pa'so'chño, sapa' çhoñaca'yena setaruasa'ña e'ñe cohuen señañesha' attotcha' sechen allpon ñeñt sepallta'yena arr patsro.

13 Ñaña sa masheñeshacha' ñaña noçhaneshacha', sapa' ñato'tña çha semuenme'chena'ña orrtatyese' cohuen ñeñt attecma sepa'yena. 14 Ñerra'm esesha'ch ama e'mñotaye atet yotenes añ yecartot, ñeñtña acheñerpa' o'ch se'ñotorrtach ñapa' chocma atet pena. Sañapa' ñato'tña seyemteña'ña ñeñt atet petsa, allochñapa' attotcha' penquerra. 15 Tarraña amach atet sentatsche ñerra'mrrate' çho se'moñe'teñ. Sapa' çhochña e'ñe cohuen soçtape'chater atet e'ñe cohuen yoçtape'chateñ yemo'nasheñ.

Arrpa' all so'terranet po'cartot

16 Yepartseshar ñeñt e'ñe yocshatene' yeyoçhro ñepa'chña socshaterre' sa seyoçhro ama'tcha' erroteno'tsenes. Yepartsesharpa' e'ñepa'chña parro allo'tsenes allohuenes.

17 Na ñeñten Pablon arrpa' nequellquëño' e'ñe na nototpa' o'ch nehuom'cha'tnerres. Sapa' ñeñtcha'ña señotate' añmapa'

e'ñe no necarta. Allohuen ñeñẽ e'ñe no necartapa' attecma nequellquẽñ. ¹⁸Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñẽpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT QUELLCAN TIMOTEO 1 TIMOTEO

Atto Pablopa' quellcan carta Timoteocop

1-2 Masheñe Timoteo ñeñteḗ e'ñe yame'ñeñoḗ e'ñe atet nenteneḗ ñerra'mrrate' e'ñe nechemer nepeneḗ, na Pablon pequellquëne'ña añ carta ñeñten Jesucristo puellsensaren, tarro'mar ñeñtpa' atet llesenserren Yompor Parets epuet Puechemer Jesucristo ñeñtcha' nanac yeyemterra. Ñeñtpa' ñeñtara Yompor ñeñt Ya'queshḗpatañer yepen, ñaña ñeñtara Puechemer Jesucristo ñeñt Yepartseshar yepen. Te'pa' e'ñe nehuoñcha'teñoḗppa' o'ch notaḗ, Yomporepa'chña pebensare'tañpene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña ḗocshatene' e'ñe ḗa peyoḗhro.

Timoteopa' ña cotape'chaterrahuet cohuen all anetso Efeso all ayḗhatarettenet po'poñ cotapñats

3 Ñaña te'pa' o'ch notaḗ, ahuañmo'cha allempo nesechena o'ch ahuen Macedoniopa' atet notnomueḗ, ḗapa' allach ḗa'pa Efeso attoch ḗach cotape'chatyese' ñeñt yeḗchatyets po'poñ cotapñats, attoch ñetpa' amach allo'na yeḗchatneneto ñet poctapñet ñeñt ama po'ñoḗhoyaye. Te'pa' ñeñtecopña nequellquëñnaḗ añ carta allochñapa' o'ch alla neyerpaterrperr. 4 Ñaña te'pa' ḗach otyesahuet attoch amach allo'na cotape'chatyesneneto e'ñe ñet pueserrparñet ñeñt ama po'ñoḗhoyaye. Ñaña ḗach otyesahuet attoch amach allo'na cotape'chatyesneneto ñeñt atet serrpare'tatyesanete't pa'tañneshañ. Tarro'mar ñeñt serrparñatspa' atta nanac moññe'tateñet acheñenesha'. Ñeñtpa' ama añecpayaye alloch e'ñe yeñoter erra'tsente' e'ñe po'ñoḗ alloch yesherber Parets ñeñt atet muenen ña. Añña e'ñe yame'ñeñoḗa Cristopa' o'ch yeñoter.

5 Yomporpa' añña muenen o'ch yeyḗhach acheñenesha' amorrentanna'tpahuepa'ch allohueney. Tarro'mar e'ñe yame'ñeñoḗ Cristo poctacma arrña yeyoḗhropa' e'ñech cohuenare' yoctape'chyen Yomporecop. Ñaña e'ñech yeñmañesha' yoctape'chen cohuen. 6 Tarraña puesheña'tets acheñenesha'pa' ahuo't alla queḗhpa'huerret ñeñt atet muenen Yompor. Ñeñtña atet serrpare'tatenet po'poñ cotapñats, ñeñtñapa' ama es sherbeno ama't mamesha

Yomporecop. ⁷ Ñetpa' aña muenenet ahuo'ch orrtet atet ñerra'mrrate' nanac etsotenet añ ñoñets ñeñt atet anaret judioneshacop ahuať. Tarraña ama't atet penetaña' amaña eñoteñeto este'ña yechateneyña añ ñoñets ñeñt chocma serrpare'tenet. Ama'tcha' ñeñta nanac torrenetaña' amachña čhenaneto pueyočhro ñeñt po'ñočh atet yechateney ñeñt ñoñets.

Attoch yeñoch eseshacopte' sherben añ ñoñets ñeñt atet anaret

⁸ Nehua, allohueneypa' e'ñe yeñotueñ, ama't erra'tsena ñoñets ñeñt atet anaret ñeñtcha' atet yeřapa' chocma sherben ñerra'm añecop yesherbaten añ ñoñets ñeñt atet muenen Yompor. ⁹ Ñaña allohueneypa' e'ñe yeñotueñ añ ñoñets ñeñt atet anaret ñeñtcha' atet yeřapa' ama añecpaye' anarete acheñeneshacop ñeñt cohuenare' es řa'yets, řarro'mar ñetpa' o' yeča'hueñet e'ñe poctacma. Ñeñtpa' añecpa anaret añ acheñrecop ñeñt ama es otapespahuo, ñaña ñeñt nanac atpare'tetsa, ñaña ñeñt ama es čhenoyo pueyočhro ñeñt cohuentetsa Yomporecop, ñaña ñeñt nanac ochña'tare'tets, ñaña ñeñt ama amčha'na'tpo' entenaye Yompor po'ñoñ, ñaña ñeñt ama't Paretspa' achmāre'teñcha'. Ñaña añecpa anaret añ ñoñets añ acheñrecop ñeñt amtsañtetsa, ñaña ñeñt muetsene' pompor, ama't ñaña pachor. ¹⁰ Ñaña añecpa anaret añ ñoñets añ acheñrecop ñeñt cañoresha'tets, ñaña ñeñt aguēne' pacma, ñaña ñeñt a'yetyene' acheñ, ñaña ñeñt atta toma'tyets, ñaña ñeñt shecare'tyets ama'tcha' atarr huomenc nenaneñña po'ñoñ Yompor pa'so'chño, ñaña ama't erra'tsente' acheñer ñeñt atpare'tene' ñeñt atet cohuen yechateney Yompor po'ñoñ. ¹¹ Ñaña ñeñt atet yechateney Yompor po'ñoñ ñeñtpa' ñeñtara cohuen ñoñets ñeñt alloch a'qeshpaterrey Yompor e'ñe po'cohuenño, ñeñtara Yompor ñeñt nellsenserre' na o'ch neserrpare'toñ po'ñoñ, ñaña ñeñtara Yompor ñeñt atarr ya'ye'chočhtatyen allohueney.

Atto Pablopa' atarr parasyoso'ten atto atarr ahuamencat per Yompor

¹² Tarraña ama't ña nellsenserrayeñpa' napa' nanac neparasyoso'teñ Yepartseshar Jesucristo řarro'mar atto nanac ahuamencat řa'n. Ñaña nanac neparasyoso'teñ Yompor, řarro'mar ñapa' e'ñe pocte' enterren o'ch nesherber ¹³ ama't na ahuaťpa' nanac nachmāre'che't Cristo, ñaña nanac noctare'che't ñeñt ame'ñaye't ña, ñaña nanac na'tserrpa'yesanete't. Tarraña ama't atet nepe'tpa' Yomporpa' ama coñe'ta morrenterrno řarro'mar allempopa' ama es nečhenoyo neyočhro, ñaña allempopa' ama

name'ñe'te. ¹⁴ Tarraña Yomporpa' ama coñe'ta morrenterno, ñeñto'marña ame'ñataterna attotña te'pa' e'ñe neyemteño't ñapa' nemorrentera allohuen acheñenesha'.

¹⁵ Ñeñto'mar te'pa' o' neñoter añepa'tña ñoñets ñeñt e'ñe po'ño'ch: Cristo Jesús'pa' añecopña huapa añ patso attoch a'queshpatosan allohuen ochñañenesha'. Ñeñto'marña te' napa' neñotena, allohuen ñeñt ochñañenesha'pa' na ello metana'tuenahuet po'chñaret. Ñeñto'mar te'pa' añ poctetsa o'ch yame'ña'huerra ñeñtara añ ñoñets. ¹⁶ Ñeñto'mar Yomporpa' attotña peretnerren na, ama't napa' nanac ochñañen, allochñapa' attoch eñochet ama't erra'tsente' acheñer ñeñt nanac ochñañpa' attera nanac morrenteña Jesucristo. Allochñapa' ñerra'm esesha'ña ame'ñerrayapa' ñetñapa' corretsetach pocsheñeshocmañen tayoteñ e'ñe errponañohuen. ¹⁷ Ñeñto'marña te'pa' nanac nocsheño't noten, amorrentpahuepa'ch Yompor ñeñt partsotets e'ñe ñapue't ahuatoteñ errponohuañen, ñeñtara ñeñt ama arromñañeshayaye ama't ahuata, ñeñt ama't eseshapa' ama puentare, ñeñtara ñeñt e'ñe ñapue't eñotañ. Ñeñto'marña yecohuentatoñepa'ch tayoteñ errponohuañen. Ñeñtpa' attetepa'ch Nompore.

Añpa' ñeñt atet otan Timoteo ñeñticha' atet pa

¹⁸⁻²⁰ Te' masheñe Timoteo ellopa' o'ch alla noterrperr po'pocheño ñeñticha' atet pe'pa, tarro'mar atet nentene'p atet ñerra'mrrate' e'ñe nechemer nepene'p. Te'pa' e'ñech peyo'chrocmañen petorra Yomporcop atet ñerra'mrrate' cho ye'cllarena. E'ñe pame'ñeño't Cristo e'ñech peñmañeshocmañen es p'orrtatyen. Napa' añ noctape'chen ñeñt atet eños e'ñe cohuen p'ocop ahuañimo'cha ñeñt a'mtene' ñoñets Yomporshot. Ama't p'apa' chocmuepa'ch peyerpa ñeñt atet a'p'octat p'ocop, tarro'mar ñeñt atet eños p'ocoppa' ñeñticha' allo'na ahuañen-ca't pepene'. Ñaña chocmach pame'ñya Cristo e'ñe cohuen e'ñe peñmañesha', tarro'mar ñerra'm ama e'ñe yeñmañesha' yocteñe Cristopa' ñato' aco'ponetpa' o'huañcha' yame'ñera Cristo. Ñeñt atet pa' ahuaña epsheña yacma ñeñt pa'so'cheñ Himeneo ñaña Alejandro, ñaña po'poñe'chno acheñ ñeñt atet petsa. Ñeñto'marña napa' napuenanet oneñe't ñeñtara epsheña yacma attoch ñapa' o'ch muero'chtatanet allochñapa' o'ch eñochet ama achm'are'tpahuo Yompor.

2

Atto e'ñe pocte' o'ch yema'yocham'pesya ñaña ama't am'cha'tarete'chno

1 Te'pa' o'ch notap̄ po'poñ ñeñtcha' atet̄ p̄octape'chatyēs acheñenesha' ñeñtcha' atet̄ pet. Ñanompa' ma'yocham̄pesyetepa'ch allohuen acheñenesha', ñaña enamatoñetepa'ch acheñenesha' Yompor, ñaña parasyoso'chetepa'ch Yompor. 2 Ñaña ma'yocham̄pesyetepa'ch allohuen am̄cha'taretečno ama't ñaña gobiernō'. Allochñapa' attoch Yomporpa' cotape'chatanet e'ñe cohuen attoch am̄cha'taretet e'ñe cohuen, allochñapa' attoch yocrrena yam̄a e'ñe cohuen muechet. Ñerra'm atet̄ penetpa' attochña eñall ñaña yocop attoch yema'yočhrena e'ñe cohuen Yomporecop, ñaña attoch e'ñe cohuen yentannena. 3 Ñerra'm atet̄ña yepenapa' e'ñech cohuen enteney Yompor ñeñt̄ Ya'queshp̄atañer yepen. 4 Tarro'mar ñapa' mueneñ allohuen acheñenesha'pa' o'ch a'queshp̄aterranet, ñaña mueneñ o'ch eñotatuerranet añ ñoñets ñeñt̄ e'ñe po'ñočh Yompor po'ñoñ. 5 Tarro'mar yapa' yeñoteñ Yomporpa' e'ñe patrra. Ñaña yeñoteñ e'ñe puesheñarra ñeñt̄ čhocma eñets yocop Yomproesho, ñeñt̄ara Yompor Puechemer ñeñt̄ Jesucristo ñeñt̄ acheñetosets arr patsro. 6 Ñaña ñeñt̄ara ñeñt̄ a'rroyatsa e'ñe ñañeña attoch puerromueñoť ñapa' o'ch tsa'tuonaya yo'chñar e'ñe allohueney ñeñt̄ey acheñey. Ñeñt̄pa', atet̄ orrtatonay Pompor allochñapa' attoch yeñočh ñeñt̄ atet̄ cotape'chen ña. Allempoña čhap allempo e'ñe pocte' enteñ Pompor o'ch čhap añ patsropa' allempoña e'ñe eñotatey ñeñt̄epa't atet̄ cotape'chen Pompor. 7 Ñeñt̄o'marña napa' na allsensaret̄ atto nach chopeñe'chats erracmañen atto e'ñe na neserrpare'tateñoťpa' o'ch name'ñatyēsanet ñeñt̄ e'ñe po'ñočh Yompor po'ñoñ, ama't ñeñt̄ ama judioneshayaye. Ñeñt̄ atet̄ noten e'ñe name'ñeñoť Cristo ñeñt̄pa' e'ñe po'ñočh tarro'mar ñeñt̄pa' ama shequēnt̄soyaye.

Añ poctetsa e'ñech yeñmañesha' yema'yochena

8 Ñaña napa' nemneñ ora ama't errate' apčha'yenet̄ Yomporecoppa' añ yacmanesha' allempo echantenet̄ pot puema'yocheñoťetpa' e'ñepa'ch pueñmañesha' ma'yochenet̄, amachña čha po'poñ entueneto pueyočhro, ñaña amach čha atsrre'močhen entueneto. 9-10 Ateť ñaña coyaneshačhnopa' chorretepa' atet̄ chorra'yena po'potantañ pacmanesha' ñeñt̄ po'nanesha'. Amachña aña chorra'yēsats̄teto attoch aye'charettenet̄ e'ñe ñet̄ po'llchapoťa. Ñaña pue'chetpa' e'shorretepa' atet̄ e'shorra'yena po'potantañ. Añña ama pocteyaye o'ch aña ma'yočhret̄ attoch añño'tet̄ e'ñe cohuen pue'ch. Añoťepa'chña orrtet̄ e'ñe cohuen atto amuerañtenet̄,

ñaña atfo cohuenare' es p̄a'yenet. Amachña aña cohuen orrtatenahueto atfo na'yenet oro, amapa' seretsma't ñeññ nanac tsa'te', ñaña atfo es chorra'yenet ñeññ nanac cochnesha' ñeññ nanaccha' tsa'te'. Añepa'chña atet penet ñeññ e'ñe cohuentetsa Yomporecop, ñeññ poctetsa coyaneshacop ñeññ otets ñapa' o' ame'ñerrana Yompor. ¹¹ Ñaña allempo sapchena Yomporecoppa' añ coyaneshachnopa' e'mñotetepa' e'ñe muetsoññen atfoch es eñotet. Amachña čha atpare'teneto ama't mamesha. ¹² Ñaña allempo sapchena Yomporecoppa' napa' ama pocteye' nenteñe coyanesha'pa' o'ch yečhaten all chorren allohuen yacmanesha', ñaña amach pomnaren p̄atstano yacma. E'ñepa'chña mamtetenet allempo sapchena Yomporecop. ¹³ Tarro'mar Adánpa' ñanom ayečhcataret acheñ, allotpa' ñaña Eva ñeññcha' puetapor p̄a' Adán. ¹⁴ Ñaña Adánpa' ama esesha' shecaye. Aña shecoñet puetapor Eva, allot orrta atparñats Yomporecop. ¹⁵ Ñeñño'marña te' allempo cheyore'ten coyanesha'pa' e'ñech pa'llpuepñofa cheyore'ten. Tarraña ama't atteñpa' Yomporñapa' čhocmach yenpueñ atfoch čhocma qeshpenet e'ñe cohuen, ñerra'm po'ñoč čhocma ame'ñenet, ñaña ñerra'm čhocma amuerañtenet, ñaña ñerra'm e'ñe cohuen es orrtatyenet Partsocop, ñaña ñerra'm e'ñe cohuen yečhenet.

3

Atfoch yeñoch erra'tsente' pocte' ñeññcha' yena' amcha'taret puerahuo

¹ Te'pa' o'ch notap̄ po'poñ ñeññ e'ñe po'ñoč atet. Ñerra'm esesha' muenats o'ch amcha'taretta allohuenacop ñeññ ame'ñetsa ñeññ atarr muenene' o'ch torrena Yomporecop ñeññpa' e'ñe poctetñ ñeññ atarr mueneneñ tarraña eñoche'pa'chña atarr torrapo' atfoch e'ñe cohuen orrtatyesan ñeññ atarr sherbets. ² Tarro'mar ñeññ muenets o'ch amcha'taretta allohuenacop ñeññ ame'ñetsapa' añcha' se'n ñeññ etsotuene' añechno. Ñeññcha' sena' amcha'taretpa' añcha' se'n ñeññ e'ñe cohuenare' es pets. Ñeññ ama't ahuatapa' amach eñalle atfoch tanmare'cha acheñenesha' ama't mamesha. Ñaña ñeññcha' pa'mcha'tareter p̄a'yes allohuen ñeññ ame'ñetsapa' añcha' sena'yes erra'tsente' senten e'ñe patrpa puetapor pen (ñerra'm ataporet), ñaña ñeññ nanac ma'yočhrenaya ñeññ cohuentetsa Yomporecop, ñaña ñeññ e'ñe eñotuene' ñeññ cohuentetsa, ñaña ñeññ amcha'na'tpo' entuen allohuen acheñenesha'. Ñaña añ e'ñe pocte' o'ch amcha'taretta ñeññ e'ñe cohuen aguene' acheñenesha' pa'paclo, ñaña ñeññ e'ñe cohuen yečhatene'

acheñenesha' Yompor po'ñoñ. ³ Ñaña añcha' se'n ñeñt' ama posa'tare'tetso, ñaña ñeñt' amach orroñateyaye. Ñaña añcha'ña se'n ñeñt' e'ñe cohuen muerenana pamo'ts, ñaña ñeñt' ama atsrre'mñateyaye, ñaña ñeñt' ama nanac ye'chapretetso quelle ñeñt' apencochenot o'ch gana. ⁴ Ñaña ñeñt'cha' añcha'tarettatsapa' añcha' se'n ñeñt' e'ñech cohuen ame'ñatuena puechemeresha', ñaña ñeñt' e'ñech mecha'na'tueñ allohuen ama't ñeñt' parro ye'chena. ⁵ Tarro'mar ñerra'm ama eñotenano attoch e'ñe cohuen ame'ñatuana ñeñt' parro ye'chenapa' amachca'ye cohuenaye' añcha'tarettoña allohuenacop ñeñt' ame'ñenaya Yompor. ⁶ Ñaña ñeñt'cha' añcha'tarettatsapa' amach añña senatsto ñeñt' errte' ame'ñetsa, tarro'mar ñerra'm añña sena' añcha'tare't ñeñt' errte' ame'ñetsapa' ñeñt'pa' amach e'ñe eñotuenano ñeñt' cohuentetsa Yomporecop, allempopa' e'ñe ña pa'm'cha'taretteño'tpa' chate' atarr ommo'cha. Tarro'mar ñerra'm cha yommo'chapa' ñeñt'pa' ama pocteye' enteñe Yompor. Chate' ahupore'tare'tey atet pet ahuat oneñe't e'ñe pommo'cheño'tpa' ahuo't huapore'chet. ⁷ Ñaña ñeñt'cha' añcha'tarettatsapa' añcha' sena' ñeñt' ama't ñeñt' ama ame'ñetsopa' e'ñech cohuen entueñet ñamet. Tarro'mar ñerra'm nanac sasare'teñ ñeñt' ama ame'ñetso, e'ñe puesasare'teño'tetpa' ñato'rraña chate' oneñe'tpa' nanac topachpa' ellopa' o'te' alla nanac atpare'terran Yompor.

Attoch ye'ño'ch ñaña erra'tsente' pocte' ñeñt'cha' yena' diácono

⁸ Attecmach pa' ñaña ñeñt'cha' sherbets Yompor pa'paclo, ñeñt' otenet diácono. Ñeñt'cha' sherbatspa' añcha' se'n ñeñt' añcha'na'tpo' entuen allohuen acheñenesha', ñaña ñerra'm erro't o'tpa' amach shequëno, ñaña ñeñt' ama posa'tare'tetso, ñaña ñeñt' ama nanac ye'chapretetso quelle ñeñt' apencochenot o'ch gana. ⁹ Ñaña ñeñt'cha' sherbats Yompor pa'paclopa' añcha' se'n ñeñt' e'ñech pueñmañesha' ma'yo'chrenaya ora ñeñt' atet yame'ñera Cristo ñeñt' e'ñe po'ño'ch cohuen. ¹⁰ Ñeñto'marña añ pocte' choch ñanom secue' ñeñt'cha' sena' diácono. Ñerra'm atette' pena ñeñt' atet o' notuapa' ñehua, pocte' o'ch sene' ñeñt'cha' sherbats Yompor pa'paclo. ¹¹ Attecmach ñaña coyaneshachnopa' añcha'na'tpo'ch enteñ allohuen acheñenesha', ñaña amachña atta nanac puetomañenteneto, ñaña ñeñt' nanac ma'yo'chrenaya ñeñt' cohuentetsa Yomporecop, ñaña e'ñech cohuen cotape'chenet Partsocop. ¹² Ñaña ñeñt'cha' sena' diáconopa' añcha' sena' erra'tsente' senten e'ñe patrra puetapor pen (ñerra'm atapore't), ñaña erra'tsente' senten

ñeñt e'ñe cohuen ame'ñatuenaya puechemerasha' ñaña ñeñt e'ñe cohuen ame'ñatuenaya ñeñt parro yeçhena pa'paclo. ¹³Tarro'mar ñeñt e'ñe cohuen sherbets atet ñerra'm diáconopa' e'ñech cohuen entueñ allohuen acheñenesha', ñaña o'huañcha' poncha'nañoñayaya serrpare't ama't e'ñe mamesha atto atarr ame'ñenana Cristo Jesús.

Ñeñt atet cotape'chateney Yompor attoch yame'ñerapa' ñeñtpa' nanac coçhnesha' ama't ahuatoteñpa' ama eseshaye' eñotenaye

¹⁴ Te'pa' o'ch notap̄ po'poñ. Napa' nesechenañ o'ch nabcherrpa'. ¹⁵ Tarraña ñerra'm ama nehuapopa' amach sepallteno sapa' o'ch señoçh ñeñtcha' atet sepa, tarro'mar o' notuap̄ añ necartot ñeñtcha' atet sepa ñeñtes parro same'ñeña Yompor, ñerra'm esempo sapçhena Yomporecop, ñeñtara Yompor ñeñt ama arromñateshayaye. Ñaña ñeñtara Yompor ñeñt e'ñe yame'ñeñoñ allohueneypa' çhocña yorrtatyen ñeñt e'ñe po'ñoçh Yompor po'ñoñ amachña çha ya'nasoteño. ¹⁶ Ñaña yapa' yeñoteñ ñeñt atet cotape'chateney Yompor atto yame'ñerapa' ñeñtpa' nanac coçhnesha' ama't ahuatoteñpa' ama eseshaye' eñotenaye. Añpa' ñeñt atet ya'çhoteñ Cristo:

Ama't Paretspa' o' acheñetos aña patsro, tarraña Yompor Puecamquẽñoña nanac ahuamencattosa ñeñt eñotatene'ña acheñenesha' ñapa' e'ñe po'ñoçh cohuen. Ama't allohuen mellañoñeñnanesha'pa' e'ñe entuoñete't ñeñt atet pa'yese't añ patsro, ñaña ñeñt ame'ñaye'tpa' çhocma a'poçet Cristo erracmañen arr patsro ama't all ama judioneshayaye. Ñaña shonte' acheñ ame'ñerraya Cristo, allotña Yompor po'cohuenñoçpa' o' alla aguẽr pue'ntaño.

4

Atto esempohuañenpa' puerruerrach patantarr ama't ñeñt ame'ñetsa te'

¹ Te'pa' o'ch notap̄ po'poñ. E'ñe po'ñoçh atet eñotateney Parets Puecamquẽñoñ. O'ch mellapoterrmochapa' puerruerrach patantarr acheñ ama't ñeñt ame'ñetsa te'. Allempopa' o'ch alla ame'ñeret ñeñt ashcañtetsa, ñaña o'ch aña ma'yoçhrerret oneñet poçtap̄ña. ² Tarro'mar o'ch alla ame'ñeret acheñ ñeñt ashcañtetsa, ñeñtara acheñ ñeñt ama es çhenoyo pueyoçhro ama't mamesha ama't allempo o' achm̄are'tuan Yompor. ³ Ñaña ñeñtara añ acheñpa' o'ch otyenan acheñenesha', ama poçteyaye o'ch sesna'ta. Ñaña ama poçteyaye o'ch es serratse'tyes. Tarraña allohuen ñeñt yerrenpa' e'ñe poçte' o'ch yerreñ, ñeñto'mar yeçhcach

Yompor ñeñtcha' yerren. Tarro'mar ñeñtey o' yeñoterr ñeñt e'ñe po'ñoçh Yompor po'ñoñ, ñaña ñeñtey ame'ñetsapa' e'ñe pocte' o'ch yerren e'ñe yema'yocheñoñ Yompor. ⁴ Tarro'mar allohuen ñeñt yeçhcatua Yompor ñeñtcha' yerrenpa' e'ñe cohuenacma, ñeñto'marña amach errotenoñ yoto ama pocteyaye o'ch yerre'. Añña pocte' çhocmach es yerren e'ñe yeparasyoso'teñoñ Yompor. ⁵ Yema'yoçhampeñoñ yerrarpa' e'ñe pocte' Partsocop o'ch yerreñ, tarro'mar ñeñtpa' atet oteney Yompor.

Atto Timoteo atarr cohuen sherbenan Jesucristo

⁶ Te'pa' o'ch masheñe Timoteo notaþ po'poñ. Ñerra'm atetcha' peychatyes acheñenesha' ñeñt ame'ñetsa ñeñt atet o' notuaþpa' allempoña po'ñoçhpa' e'ñech cohuen pesherbeñ Yepartseshar Jesucristo. Tarro'mar atto þoctape'cheññan Yompor po'ñoñpa' ñeñtcha'ña allo'na ahuaamencat pepene'. Ñaña atto þoctape'chen e'ñe cohuen Yomporecoppa' ñeñtcha'ña allo'na ahuaamencat pepene'. ⁷ Ñaña amach pe'mñotatsto serrparñats ñeñt ama añeyaye ñeñt atet yeçhateney Yompor po'ñoñ attoñ yame'ñera Cristo, tarro'mar ñeñtpa' ama es sherbeno. Añcha'ña pema'yoçhra ñeñt atet yeçhateney Yompor po'ñoñ. ⁸ Ñaña añcha'ña o'ch pema'yoçhra attoch huomenc peþa' peyoçher Yomporecop. Atet pena po'potantañ acheñenesha' ma'yoçhraya attoch huomencatet e'ñe ñañeñeta po'chets, ama't ñeñtpa' ama tama es sherbeno. Tarraña þapa' añcha'ña pema'yoçhra attoch huomenc peþa' peyoçher Yomporecop, tarro'mar ñeñtpa' ello nanac sherben attoch yocrra cohuen añe patsro, ñaña sherben attoch ello yocrra'huerra cohuen esempohuañen. ⁹ Ñeñt atet noteneþpa' e'ñe po'ñoçh atet, ñeñto'marña añ pocte' o'ch ame'ñyet allohuenet. ¹⁰ Ñeñto'marña te'pa' ama't e'ñe yemuerochteñoñpa' çhocma yetorrena Yomporecop, tarro'mar ñapa' ñach yeyemterra e'ñe poctacma, ñeñt Yompor ñeñt ama arromñañeshayaye, ñaña ñeñtara Yompor ñeñt Ya'queshþatañer yepen allohueney añecop ñeñtey ame'ñenaya.

¹¹ Te'pa' ñeñt atet o' notuaþpa' ñeñtcha' atet þotyes acheñenesha' ñeñtcha' atet pet, ñaña e'ñech cohuenacma peychatyesanet. ¹² Ñaña çhocmach þorrra e'ñe cohuen acheñenesnacop, attoch ñetpa' e'mñotapet ama't þapa' nanac huepueshaþ. Ñaña çhocmach þorrra cohuen ama't atet pe'ñorena, ñaña ama't allempo es peþa'yen. Ñaña çhocmach pemuereña acheñenesha', ñaña çhocmach þame'ñya e'ñe cohuen Yompor, ñaña ama't peyoçhropa' çhocmach

poctape'ch e'ñe cohuen ñeñt atet pena ñeñt e'ñe po'ñoch Cristona'tartetsa. Allochñapa' e'ñe peshot añña acheñenesha' ñeñt ame'ñetsapa' o'ch çhapanet pueyoçhreto ñeñt atet cohuentetsa Yomporecop. ¹³ Ñaña te'pa' ama't ama neçhena' napa', çhocmach pelleyatanet Yompor po'ñoñ allempo çhocma sapçhena allohuenes. Ñaña çhocmach peserrpare'tatanet, ñaña e'ñech cohuen peyçhatenanet. ¹⁴ Ñaña çhocmach peyerpa atto ahuañmo'cha Yomporpa' ahuañmencat pa' allempo ñeñt pompornesha' pen ñeñt ame'ñetsapa' ñetpa' net pot pesho. Ñaña atto eñoratanet Yompor ñetña allempopa' e'ñe cohuen eñosyeset pocop. Ñeñto'marña te'pa' añ poctetsa çhocmach pe'torra Yomporecop.

¹⁵ Chocmach pema'yoçhra ñeñt cohuentetsa Yomporecop, ñaña çhoch pa'yonña, attoch acheñenesha'pa' entonapet ñeñt atet petsoten Yomporecop. ¹⁶ Ñaña çhocmach peñota pa'ñeña, ñato' cohuent'e' poctape'chen, ñato' amate'. Ñaña çhocmach peñota pa'ñeña ñato' e'ñete' atet peyçhaten. Ñaña çhocmach peyçhat cohuen e'ñe atet oteney Yompor po'ñoñ attoch pequeshperra pa, ñaña allohuen ñeñt pe'mñotene'.

5

Añpa' ñeñticha' atet ye'panna ñeñtey ame'ñetsa

¹ Masheñe Timoteo, te'pa' o'ch noterrperr po'poñ. Amach peche'ptare'tatsche ñeñt po'nare' yacma ñerra'm esempo pantenet. Elloña çhochña poctape'chaterranet cohuen e'ñe aco'pa. Atetcha' pentanet ñerra'mrrate' e'ñe pompor pepenanet. Añña allohuen hueparneshachnopa' atetcha' pentanet ñerra'mrrate' e'ñe pemo'nasheñ pepenanet poctacma. ² Ñaña coyaneshachno ñeñt po'nare'pa' atetcha' pentanet ñerra'mrrate' e'ñe pa'chor pepenanet poctacma. Añña ñeñt shopshare'pa' atetcha' pentanet ñerra'mrrate' e'ñe po'ch pepenanet poctacma. Amachña cha muene' pa'llocchame'tyenaneto ama't mamesha.

³ Ñaña añ poctetsa çhocmach seyenpue' rretornneshar ñerra'm esempo ama eñallete ñeñticha' yepahuet. ⁴ Tarraña ñerra'm erra'tsen rretornneshar echene' puechoyoresha' amapa' pue'ñaresha', ñeñt'pa' añ pocte' ñetach cohuanpset pachor. Tarro'mar añ pocte' e'ñe ñet o'ch eñochet ñanomcha' añ yecuam'pes yamo'ts attochña yesherber Yompor ñaña attoch yesherbeñ yamo'mte' atto ñetpa' cohuanpseyet yañña ahuat. Tarro'mar ñerra'm atet ye'papa' e'ñech yocshateñ ama't Yompor. ⁵ Añpa' attoch seño'ch erra'tsente' rretornneshar palltetsa o'ch seyenpue': Añcha' seyenpa' ñeñt rratotetsa

e'ñe ñap̄ta ñeñt̄ ama echenaye puechoyoesha', ñaña ñeñt̄ e'ñe yemtenaya Yompor, ñaña ñeñt̄ čhocma ma'yochenaya Yompor pate'tets yeť, ñaña ama't tsapo. ⁶ Tarraña erra'tsen rretorrnaneshar ñeñt̄ atta coshatse'tyetsapa' čhach ottena ñerra'mrate' o' rroma, ama't allempo correnmeñ. ⁷ Te'pa' o'ch p̄otanet ñeñt̄cha' atet pet attoch ama eñalle ama't eseshapa' o'ch sasare'tanet. ⁸ Ñerra'm esesha' ama muenenaye o'ch cohuan̄psan pamo'ts ama't ñeñt̄ parro yečhena ñeñt̄ña acheñ atetpa' amaca'ye po'ñočhaye' ame'ñenano ñeñt̄ atet oteney Yompor. Ñaña ñeñt̄ atet acheñpa' amach pocteye' enteñe Yompor ama't mamesha. Ñeñt̄pa' elloch metaneñ ama't ñeñt̄ ama ame'ñetso.

⁹ Ñaña po'poñ attoch señočh erra'tsente' rretorrnaneshar ñeñt̄ pocte' ñeñt̄cha' seyenpa', ñeñt̄pa' erra'tsente' po'nmeneshar ñeñt̄ echene' pechapoch čcharra' po'charña, ñaña ñeñt̄ patrach puerrollar peť. ¹⁰ Ñaña erra'tsente' senten ñeñt̄ e'ñe cohuenare' es pets, ñeñt̄ e'ñe cohuen cohuan̄pene' puechoyoesha', ñaña ñeñt̄ nanac amueraña, ñaña ñeñt̄ e'ñe cohuen aguene' puemo'to', ñaña ñeñt̄ e'ñe pueñmañesha' sherbene' allohuen ñeñt̄ ame'ñetsa, ñaña ñeñt̄ nanac yenpuene' ama't ñeñt̄ mueročhtetsa, ñaña ñeñt̄ nanac pa'yene' po'poñečno ñeñt̄ cohuentetsa.

¹¹ Tarraña ñeñt̄ rretorrnaneshar attera shopsheshameñ ñeñt̄ ama echenana' pechapoch čcharra' po'charñapa' amach sagapatsche, tarro'mar ñerra'm machaya muenme'cherran sherbe' Cristopa' o'te' alla some'terra, ¹² čhate' tanmare'cha acheñenesha' tarro'mar amach etsotano ñeñt̄ atet otan Cristo ahuañmo'cha. ¹³ Ñaña ñato' o'ch atta nanac quella', ñato' po'čllañoipa' ñato' o'ch atta ta'yesa po'poñ pocollo'mar serrpare'tatse'tyesets pa'namen ñoñets, ñaña ñato' o'ch atta a'metare'tyesan ñeñt̄ atet pa'yena po'psheñnečno ama't ñeñt̄ ama otenayaye. ¹⁴ Ñeñto'marña napa' e'ñe pocte' nenteñ ñeñt̄ shopsheshameñpa' some'terrepa' ñaña cheyore'terrepa' attoch añach ma'yočhrena ñeñt̄ pa'pacllacop. Ñerra'm atet penetpa' attochña amach eñalle ama't ñeñt̄ ye'moñe'tene'pa' amach sasare'tye. ¹⁵ Tarro'mar puesheña'tets rretorrnanesha'pa' o' alla puerruerret o' alla coteret oneñeť.

¹⁶ Te' ellopa' o'ch notap̄ po'poñoneť. Ñerra'm eñall ama't coyanesha' ñeñt̄ ame'ñetsa, ñaña ñerra'm ña pamo'ts rratotatsapa' e'ñe pocte' ñañeñach cohuan̄pse' pamo'ts. Allochñapa' amach pallteno allohuen ñeñt̄ ame'ñetsapa' o'ch apueñet ñeñt̄ pallta'yena. Allochñapa' attoch añcha'ña

yenpuenet po'poñechno rretorrnanesha' ñeñt ama echenaye pamo'ts ñeñtcha' yenuene'.

Añ poctetsa ñeñtcha' atet yepen ñeñt nanac torretsa Yomporecop

¹⁷ Te'pa' o'ch notap po'poñ. Ñeñt pompornesha' pen ñeñt ameñetsapa' ñerra'm eñe cohuen añcha'tarettenetpa' eñe pocte' acheñenesha'pa' cohuencha' cosheñet, ñaña ellopa' añ pocte' o'ch es apueñet ñeñt palltena. Ñeñtpa' ñeñtcha' atet sepeñ erra'tsencha' ñeñta po'taruas pe' atto serrpare'ten, ñaña ñeñt eñe ma'yoçhrenaya yeçhatets Yompor po'ñoñ. ¹⁸ Tarro'mar ama't Yompor po'ñoñ ñeñt anuaret ahuatoteñpa' atet toma'ntateney, ñeñtpa' atet oten: "Ñerra'm esempo sañmama'tateñ huaquesh attoch es serrocllome'chach pa'tcot, allempopa' amach sempanma'tatsche. Eñe pocte' rranepa' ñaña ñeñt serrocllome'chateñ." Ñaña ñeñt atet oten po'poñ Yompor po'ñoñ: "Ñeñt ataruasañpa' eñe pocte' çhocmach agapan po'tsa' atto taruasen."

¹⁹ Ñaña ñerra'm eñall puesheñarr ñeñt a'metare'tamipene' ñeñt pompor pen ñeñt ameñetsapa' sapa' amach sameñatscho. Añña ñerra'm epsheña a'metare'tamipene' amapa' ma'psheña, allempopa' pocte' o'ch se'mñoçh, tarro'mar allempopa' o'ch señoçh ñato' po'ñoçhte' atet. ²⁰ Atteña ñerra'm po'ñoçhte' atet pena, allempo allo'tsa'yen allohuen acheñenesha'pa' añ poctetsa o'ch soch ñeñt atetpa' ama aña'pahuo. Allochñapa' po'potantañpa'çho'ña esheccha' mecha'na'tenet. ²¹ Añpa' çhocmach atet peña ñeñt atet o' notuañ ama't erro'tente' o' pohua ñeñt parro nanac peyemtena ahuaña. Tarro'mar Yomporpa' enteneñ epuet Puechemer Jesucristo ñeñtara Yepartseshar yepen, ñaña epuet po'millaño'teñnaneshar ñeñt epuet yemtena ña. Allohuenetpa' eñe entuenpet ñeñto'marña te'pa' añ pocte' o'ch pepena ñeñt atet o' notuañ.

²² Te'pa' o'ch noctape'chaterrperr po'poñ ñeñtcha' atet seña. Ñerra'm esempo semneñ o'ch sena'yes ñeñtcha' añcha'tarettertsa Yomporecop, amach ahuen senatstere ñeñtcha' añcha'tarettertsa, çhochña secua'yes erra'tsente' acheñer ñeñt eñe cohuen es pa'yets. Tarro'mar ñerra'm ñaña sena'yes ñeñt ama cohuen es petsopa' te't eñe ña po'chñarotpa' atet sepene samña. Ñeñto'marña te'pa' çhocmach pa'ypo'ñañpes ñeñt ama cohuenayaye ama't mamesha.

²³ Te'pa' o'ch notap po'poñ. Atto papa' çhocma patsna'tame'ten, ñaña atto atserrpare'teneñ patopa' añ

pocte' amach p̄orratsterrerro e'ñe ñapueť oñ, añcha'ña epuet p̄orr coñe'ť vino.

²⁴ Ñaña te'pa' o'ch notap̄ po'poñ attoch peñoch. Eñall puesheña'tets acheñ ñerra'm esempo pena ñeñť ama cohuenayaye Yomporecoppa' yapa'cho'ña o'ch yeñotanet allorocma. Allempoña yapa' o'ch yot, po'ñočh añpa' ama pocteyaye. Tarraña eñall ñaña po'poñečno acheñ ama't esempo pet ñeñť ama cohuenayaye Yomporecoppa' ñeñťpa' amach esesha' eñotaye ama't puesheñarroťa. Tarraña esempohuañenpa' orrtatuareťterrach. ²⁵ Attecma pena ñaña ñerra'm esempo yepena e'ñe cohuen, acheñenesha'pa' o'ch entuyenet e'ñe cohuen. Tarraña errotenopa' ama't e'ñe cohuen enteney Yomporpa' acheñenesha'pa' amach e'ñe cohuenaye' entenyeto. Tarraña esempohuañenpa' cherranetcha' pueyočhro.

6

Añpa' ñeñť poctetsa ñeñťcha' atet p̄a ñeñť ataruasataret e'ñe atta

¹ Te'pa' o'ch notap̄ po'poñ ñeñť poctetsa ñeñťcha' atet p̄a ñeñť ataruasataret e'ñe atta ñeñťara ñeñť o' ame'ñerrana Cristo. Añ pocte' ñetpa' cohuencha' eñchet po'patronar, attoch e'ñe ñoťoťetpa' amach errotenot eñalle attoch achmare'tachet Yompor, ñaña ñeñť atet yeychaten Cristocop.

² Ñaña ñeñť ataruasataret e'ñe atta, ñerra'm po'patronarpa' ame'ñenet ñametpa' elloña allempopa' amach atpare'tatscheto ama't mamesha, tarro'mar o' pa'mo'nasheñ peret e'ñe pame'ñeñotet Yompor. Amach otaṗsa'tatsteto "te'pa' ama'tcha' ama e'ñe name'ñyo nepatronarña' o' ame'ñerrapa' amach errot p̄a'no." Elloña te'pa' e'ñech yemorrenteñesha' yesherbeñ yemo'nasheñ e'ñe cohuen. Masheñe Timoteo, añpa' chocmach peychatanet, ñaña o'ch p̄otanet ñeñťcha' atet pet.

Cotaṗñats ñeñť ama po'ñočhoyaye

³ Ñerra'm esesha' yechatats po'poñ cotaṗñats ñeñť ama atteyaye atet yechataney Yepartseshar Jesucristo ñeñť po'ñočh atet muenen Yomporpa' ⁴ ñeñť acheñ atetpa' attach ommo'chena, po'ñočh ñeñťpa' ama choye' es eñoteno. Ñeñť atet acheñerpa' añecpach atet pena attoch es otnare'tyesan acheñenesha' e'ñe po'poñ cotaṗñatso'mara. E'ñe potnare'tanna'teñoťetpa' o'ch atta atsrre'mare'tet, ñaña o'ch atta e'moñe'tanna'tet, ñaña o'ch atta sasare'tanna'tyeset, ñaña allempopa' o'huañcha' eñoranna'tet. ⁵ Po'ñočh añ acheñ ñeñť atta cotaṗe'chatse'tets e'ñe ñañeña poctaṗñoťpa'

po'ñoçhpa' amach cotape'chenano ama't mamesha ñeñt' cohuentetsa ñaña amach eñotenano ñeñt' po'ñoçh alloch yequeshperra. Ñetpa' attach çhocma mueneñet o'ch es otnare'tanna'tyeset. Ñaña ñetpa' añecpach mueneñet o'ch serrpare'tet Yomporecop attoch ganet esocmañen. Ñeñto'marña ñeñt' atet acheñpa' amach peyemtatscho. 6 Ñehua, po'ñoçh yapa' yeñoteñ e'ñe yame'ñeñoç Cristopa' shonte' yechen esocmañen. Ñeñto'marña yapa' ñeñtach nanac yocshena. 7 Tarro'mar allempo ye'ñalleta ahuatpa' atta ye'ñalleta muelle'mcot. Te'pa'çho'ña ñerra'm esempo yerromuenpa' amach errotenoç yahuanmo yechecom. 8 Ñeñto'mar yapa' amach es yelcatsto. Ñerra'm yechen ñeñtcha'yerra' ñaña ñeñtcha'yehorrappa' ñeñtach yocshena. 9 Tarro'mar ñeñt' muenets o'ch echan esocmañenpa' amach errotenoç ahuantano atto topatyeny oneñeñ. Attach pa'namen ye'chatse'tyenet ñeñt' ama es sherbetso. Elloña ñeñtpa' ñeñtcha' anmahuet chenquëñtso esempohuañen. 10 Tarro'mar e'ñe yeye'chapreteñoç quellepa' allot huenaña esocmañen sosya'tsañ. Tarro'mar puesheña'tets ñeñt' nanac muenets o'ch ganet shonte' quellepa' atteñapa' o'huañcha' ame'ñyet Yompör. Ñeñto'marña acoþonetpa' o'ch huapanet shonte' ñeñtcha' nanac llecatahuet.

Añach paterr yema'yoçhra ñeñt' cohuentetsa Yomporecop

11 Tarraña þapa' amach atet peþatsto tarro'mar þapa' anareteþ Yomporecop. Ñeñto'marña þapa' añach pema'yoçhra ñeñt' cohuentetsa Yomporecop, ñaña çhocmach peyerepya Yompör, ñaña çhocmach þame'ñya cohuen, ñaña çhocmach pemorrencha þamo'ts, ñaña çhocmach þa'huantahuanom ñeñt' atarr echarr pentyen amach þañeña e'ñe cohuen entatstatso. 12 Ñaña çhocmach þame'ñya cohuen Yompör atet ñerra'm çho peçllarena Yomporecop. Allochñapa' esheccha' peñoç þapa' corretsapach tayoteñ e'ñe errponañohuen. Ñeñto'mar Yompörpa' çhore'taþ ahuaña allempo peñotach allohuen acheñenesha' atto þapa' o' þame'ñerra. 13-14 Te'pa' o'ch masheñe noterrperr po'poñ ñeñtcha' atet peþa. Chocmach petsotua ora ñeñt' atet oteneþ Yompör. Amach þoctape'chatsto po'poñoneñ attoch amach eñalle attoch tanmare'taþa acheñenesha'. Añpa' atetcha' peþa tarremphua esempohuañencha' huerra Yepartseshar Jesucristo. Tarro'mar ama't te' Yompörpa' enteneþ, ñeñtara Yompör ñeñt' yapuene' yocrreña teme'ttsen, ñaña allohuen ñeñt' yentyen. Ñaña Puechemer Jesucristopa'çho'ña enteneþ, añ ñeñtara Cristo ñeñt' eñosets e'ñe cohuen allempo

a'p̄to'tare'teñ Poncio Pilato. ¹⁵ Esemphuañencha'ña pocte' enter Yomporpa' allempochña mueñerranerr alla Puechemer arr patsro, ñeñtara Yompor ñeñt e'ñe patrra, ñaña ñeñtara ñeñt atarr ya'ye'chochtatyen allohueney, ñaña ñeñtara ñeñt nanac ahuamencat, ñeñt Pompor pen ama't allohuen ñeñt am̄cha'taretetyetsa, ñaña allohuen ñeñt ayochreshatetyetsa. ¹⁶ Ñaña ñeñtara Yompor ñeñt ñapueť ama arromñatēshayaye, ñeñtara Yompor ñeñt yečhetsyallo'tsen puetare' ñeñt nanac a'rrechatañ all amach errotenoť yečhapo. Ama't puesheñarra acheñpa' ama puentare all, tarro'mar amate' errotenoť yečhapo. Ñeñto'marña ya'ye'chochtatoñepa'ch Yompor, ñaña ahuamencatepa'ch tayoteñ errponohuañen. Ñeñtpa' attetepa'ch Nompore.

Arrpa' all cotape'chatan ñeñt nanac ečllayoret

¹⁷ Te'pa' o'ch notap̄ po'poñ. Ñeñt nanac ehecmaťtetsy añ patsropa' o'ch p̄otanet amach om̄mo'chatsteto e'ñe po'checmoť, ñaña amach cotape'chatsteto ñato' počllayoroťpa' amach es pallterreto, tarro'mar ñeñtpa' huañerrcha' esempohuañen. Añña yemchetepa' Yompor ñeñt ama arromñatēshayaye ñaña ñeñt yapuene' shonte' esocmañen ñeñtcha' čhocma yocshatene'. ¹⁸ Ñaña o'ch p̄otanet petepa' e'ñe cohuen Yomporecop, ñaña es apa'yesetepa' ñeñt es palltetsy, ñaña amuerañtetepa'. ¹⁹ Ñerra'm atetcha' petpa' eñallcha' shonte' alloch coshaterranet tsapaťonet Yompor. Ellopa' o'ch apanet ñaña attochña ñetpa' corretsetach pocsheñeshocmañen tayoteñ e'ñe errponañohuen.

Ñeñt atet otan Timoteo e'ñe allohuanen

²⁰ E'ñe allohuanenpa' o'ch masheñe Timoteo noterrperr alla: Chocmach petsotua ora ñeñt atet oteneť Yompor. Amach pe'mñotatsche ñeñt čhocma muenets o'ch es otnare'tanna'tyesa. Ñeñtpa' ama sherbeno ama't mamesha Yomporecop. Ama't ñetpa' otenetañ po'ñocho' es eñotenetpa' tarraña yapa' yeñoteñ ñeñtpa' ama po'ñochoyaye. ²¹ Tarro'mar puesheña'tets ñeñt cotene' atetpa' ama čhenaneto pueyočhro ñeñt atet yame'ñeña Cristo.

Te'pa' Yomporepa'ch p̄a'nataya. Ñeñtach notap̄, ñeñtpa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑÑ QUELLQUËRRANERR TIMOTEO 2 TIMOTEO

Atto Pablopa' alla quellquërranerr carta Timoteocop

¹⁻² Masheñe Timoteo, ñeñteḡ nanac nemuerena tarro'mar atet nenteneḡ ñerra'mrrate' e'ñe nechemer nepeneḡ. Na Pablon o'ch alla nequellquërranerr po'poñ carta, ñeñten Jesucristo puellsensaren tarro'mar atet muenen Yomporep atoch nach eñotatyese' allohuen acheñenesha' ñeñt atet oteney Yompore: E'ñe yeyemteñoñ Puechemer Cristo Jesús'pa' yañapa' corretsayach yocsheñeshocmañen tayoteñ e'ñe errponañohuen. Te'pa' e'ñe nehuomicha'teñoḡḡpa' o'ch notap: Yomporepa'chña pebensare'tam'pene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña ḡocshatene' e'ñe ḡa peyo'chro.

Atto Timoteo e'ñe cohuen ame'ñena

³ E'ñe neyerpueñoḡḡpa' napa' chocma neparasyoso'teñ Yompore ḡocop, yeto ama't ñaña tsapo allempo chocma nema'yocheña Yompore ḡocop. Ñeñtara Yompore ñeñt chocma neñmañesha' nesherven, atet sherbe't ñaña ahua't natañneshañ. ⁴ Ñaña napa' chocma neyerpuena allempo peya'na'tapuen ahuañmo'cha. Ñeñto'mar te' napa' nemneñ errotenuhuaca' yentannerra attote' ḡocshaterren. ⁵ Ñaña chocma neyerpuenḡa atto ḡapa' e'ñe cohuen ḡame'ñena, ñaña atet ame'ñena ñaña ḡacnor Loida ñaña ḡachor Eunice. Ñeñto'marña napa' neñoteñ ḡapa'cho'ña chocmate' ḡame'ñena e'ñe cohuen.

Atto ama apenca'pahuo e'ñe yeserrpare'teñoñ Yompore po'ñoñ

⁶ Ñeñto'mar napa' nemneñ o'ch alla neyerpaterrperr atto ahuañmo'cha Yomporepa' ahuañmencat ḡap' allempo nena' ñaña not pesho. Ñeñto'marña te'pa' amach pemuenme'chatstoñe ñeñt atet otap Yompore. ⁷ Tarro'mar Yomporepa' ama añecpaye' chorratenyoña Puecamquëñ atoch yapa' o'ch cha yem'cha't, añecopña chorratenya atoch ahuañmencat ḡa'y, ñaña atoch yemorrentanna'ta allohueney, ñaña atoch e'ñe cohuen yorrtatyen ñeñt atet muenen Yompore. ⁸ Ñeñto'marña te'pa' amach pepencatsto atto peserrpare'teññañ ñeñt atet pena Yepartseshar

Cristo. Ñaña amach pepencatsto e'ñe no'mar atto napa' o' cárcele'terrnet e'ñe name'ñeñoť Cristo. Elloña čhochña pocte' peñch pãaña o'ch pemueročtapretna e'ñe peserrpare'teñoť Cristo po'ñoñ tarro'mar Yomporpa' attoña ahuamencat peneř. ⁹ Ñeñtara ñeñť o' a'queshpaterrey, attoña o' chore'terrey attoch yema'yochra ñeñť cohuentetsa Partsocop. Tarraña aňmapa' ama aňoteyaye atto e'ñe cohuen es yeřa'yeseť ahuat, aňmapa' tarro'mar atet muenen ña. Yomporpa' nanac morrentyeť ñeñťo'mar ama't ahuatoteňpa' ahuo't o'patatya Puechemer Cristo Jesús. ¹⁰ Ñeñť huapatsa attoña te'pa' o' yeñoter atto nanac morrentya Pompor. Ñeñtara Puechemer Jesucristo ñeñť Ya'queshpatañer yepen, tarro'mar ñach ya'queshpaterre' yerromñoť attoch elloch yocrra'huerra, allempopa' amach alla ya'rromñaťterre'te. Ñeñťo'marña yoten te'ña yapa' o' a'huañaňperrey Cristo atto o'patyeť rromueñets. Te'pa' o' yeñoter tarro'mar atet yečhateney cohuen ñoñets ñeñť huetsa Yomporeshoť.

¹¹ Ñeñťña aň cohuen ñoñetspa' ñeñťecop allsensareten attoch nach a'pote' allemeñ acheñeneshesho'mar ama't ñaña ñeñť ama judioneshayaye, ñaña attoch nach yečhatyesahuet ñeñtara aň ñoñets. ¹² Ñeñťo'marña te'pa' e'ñe neserrpare'teñoť aň ñoñetspa' mueročtatennet, tarraña napa' ama nepenquëno tarro'mar napa' neñoteñ Yompor ñeñť neyemtenapa' nanac ahuamencat. Ñeñťo'marña neñoteñ e'ñe po'huamencotpa' o'ch cohuaňpson ora all netorra'yeseť ñocop ñeñť atet yehenna ama't tayoteñ esempohuañencha' huerra.

¹³ Papa' čhocmach poctape'ch ñeñť atet o' neyčhatuanmař, ñeñtara ñoñets ñeñť e'ñe pačharr cotapñats. Ñaña peparrocmateñoť Cristo Jesúspa' čhocmach pame'ñya cohuen, ñaña čhocmach pã'muerañta. ¹⁴ Ñaña čhocmach peñota, amach pã'po'poñetatstoñe Yompor poctapña ñeñť atet yehenřa Yompor. E'ñe po'huamencot Parets Puecamquëñ ñeñť yečhetsa yeyočhro ñepa'chña peyenpue'.

Atto puesheña'tetspa' a'ypo'ña'haneret Pablo

¹⁵ Napa' o' notap atet tarro'mar ama't papa' peñoteñte' shonte' acheñ ñeñť yeča'yetsa Asio'marpa' o' sohuanerrnet, atet ñerra'm Figelo ñaña Hermógenes. ¹⁶ Te'pa' aña čocma nocshatene' Onesíforo tarro'mar ñapa' ama penquëno ama't napa' cárcelo'tsenen. Ñeñťo'marña Yomporpa' a'natanepa' Onesíforo pamo'tsesha'. ¹⁷ Ahuaňmo'cha allempo čhap Onesíforo arr Romopa' ñapa' nanac e'name'terren attot enterren. ¹⁸ Ama't papa' nanac peñoteñ,

ahuañmo'cha Efesopa' ñapa' nanac yempa'y. Ñeñto'marña Yomporpa' muera'huerepa'ch esempohuañencha' huerra po'yorochenñoñ.

2

Ñeñtcha' atet yetorra e'ñe cohuen Jesucristocop

¹ Nechemere Timoteo, e'ñe peparrocmateñoñ Cristo Jesúsapa' huomenquëpa'ch pepa' peyoçher tarro'mar ñapa' çhocmach yempa'p. ² Allpon pe'mone't ñeñt atet neserrpare'tache't shonte' acheñenesha'pa' p'apa'çho'ña te'pa' attecmaç peyçhach po'poñeçhno ñeñt ame'ñetsa attoch ñetpa'çho'ña eñoçhet yeçhatet allohuen pamo'tsesha'.

³ Ñaña o'ch notap' po'poñ. Papa' amach peñcha'tatsto attoch pemueroçhtapretya. Chochña poçte' peñch o'ch pemueroçhta atet ñerra'mrrate' çho peçllarena e'ñe cohuen Jesucristocop. ⁴ Ñato' o'ch netma'ntacha ñeñt atet pena solltarnesha'. Solltar ñeñt ejército'tsenpa' amach es coçape'cheno po'poñone't ñeñt atet pena ñeñt ama ejército'tseno. Añach paterr coçape'chen attoch coshatan ñeñt mandene'. Añ toma'ntena yapa'çho'ña añach paterr yoçtape'chen attoch yocshach Jesucristo ñeñt yeyeçhenaya yaña. ⁵ Ñato' o'ch netma'ntatererr po'poñ ñeñt atet pena ñeñt atarr jueguëtsa. Ñeñt atarr cohuen jueguëtsa çhocmach jueguënet e'ñe cohuen e'ñe atet anarettenet ñoçpuet attoch e'ñe cohuen ganet. Ñerra'm ama e'ñe atet jueguëto e'ñe atet anarettenet ñoçpuet, amach erroçteno't aparettetoña ñeñtcha' coshatahuet ñeñteçcop atarr jueguënet. Ñeñtpa' añ toma'ntena yapa'çho'ña ñerra'm amach atet yeperro ñeñt atet anaret Yompor po'ñoñ yocop, amach erroçteno't apuerrye ñeñtcha' nanac yocshaterre'. ⁶ O'ch netma'ntatererr po'poñ. Ñeñt nanac taruasets pa'mropa' ñapa' ñanomcha' rre' ñeñt nare'ten. Ñeñtpa' añ toma'ntena ñeñt nanac torretsas Yomporecop ñapa'çho'ña nanaccha' coshateñ po'taruas ñeñt atet torrena Yomporecop. ⁷ Ñehua, poçtape'ch ñeñt atet notene'p tarro'mar Yepartsesharpa' çhapatonap'cha' peyoçhro ora ñeñt atet toma'ntena añeçhno.

Añ poçte' çhocmach yeyerpueña Jesucristo

⁸ Amach pepsatsto atto Jesucristopa' tanterra allempo rroma, ñeñtara ñeñt po'mreneñ David, ñaña ñeñtara Cristo ñeñt çhocma neserrpare'ten attoch yequeshperra. ⁹ Ñeñto'marña napa' attoña huanca'net atto te'pa' nanac nemueroçhtena atet ñerra'mrrate' amtsañen. Tarraña Yompor po'ñoñpa' amach erroçteno't

huanquëto. ¹⁰ Ñeñto'marña napa' chocma na'huanten atto nemueroçhtena, allochñapa' ñerra'm erra'tsencha' acrerr Yompor ñeñtcha' ame'ñerrayapa' queshperretcha' e'ñe pame'ñeñoet Cristo Jesús. Ñaña all Yompor po'cohuenñopa' correrretcha' errponohuañen.

¹¹ Añ ñoñets allo chocma ya'çhoteñ Yomporpa' e'ñe po'ñoçh atet:

Ñerra'm e'ñe yame'ñeñoñ Cristo yerromapa' yeyçherrach parro epay Cristo.

¹² Ñaña ñerra'm cho yemueroçhtaprecha Cristopa' ya'mñcha'tarettapreterach esempohuañen. Tarraña ñerra'm cha ya'nasoteñaapa', ñapa'cho'ña a'nasoterryach esempohuañen.

¹³ Ama't allempo yapa' ama yeyemteño, tarraña po'ñoñ ñeñt atet otenpa' chocma po'ñoçh atet, tarro'mar amach errotenoñ alla a'po'poñeterrano ñañeña po'ñoñ.

Atto Yomporpa' e'ñech cohuen pa'taruasañer peney

¹⁴ O'ch alla noterrperr po'poñ: Chocmach peyerpacha acheñenesha' ñeñt atet o' notuañ, ñaña o'ch potanet e'ñe Yompor po'huamencot amach allo'na otnare'tanna'tyesneneto e'ñe ñañeñeta poctañño'maret. Tarro'mar atto es otnare'tanna'tyenetpa' ama't mameshapa' ama es sherbeno. Ñerra'm attach penetpa' atteñapa' o'ch alla puerruerra allohuen acheñenesha' ñeñt e'mñnotenahuet.

¹⁵ Tarraña pãpa' añcha'ña pema'yoçhra ñeñt cohuentetsa Yomporecop attoch ñapa' entañ e'ñe cohuen ataruasañeñ. Amach eñalle ñeñtcha' pepencate' all petorra'yena ñocop. Attochña chocmach pesherbatoñ po'ñoñ ñeñt e'ñe po'ñoçh ama shequëñtsoyaye.

¹⁶ Ñaña pãpa' amach pã'na otnare'tatstahueto ñerra'm esempo es otnare'tanna'tyenet. Tarro'mar ñeñt atet serrpare'tatyenetpa' ama añeyaye alloch huomenc yepa' yeyoçher Yomporecop. Ñaña ñeñt atet petsapa' atteñapa' o'ch allo'na senet puesuanmuet ñeñt atet yeçhateney Yompor.

¹⁷ Ñaña ñerra'm allo'nach yeçhatnenet ñeñt ama es sherbetsopa', atteñapa' ñerra'm o'chña epa'hua orapa' allo'nach senet puesuanmuet ñeñt atet muenen Yompor. Nato' o'ch netma'ntacha ñeñt atet pena atsnañets ñeñt otenet cáncer ñeñtpa' mamesha o'ch epa'hua ora yechtso o'ch muetsay. Ñeñtpa' atet pã epsheña ñeñt pa'so'cheñ Himeneo ñaña Fileto, tarro'mar ñetpa' aña yeçhatenet po'poñ coaññats. ¹⁸ Ñetpa' atta ayçha'natateññañet Yompor po'ñoñ all oteney esempopa' yetanerrach. Ñetpa' ahuo't serrpare'tatyaset acheñenesha' atet: "All oteney Yompor

attoch yetanterra esempopa' ñeñtpa' toma'nteñtsa. Ñeñtpa' añña toma'ntena atto yapataretta ahuaña oño." Ñeñto'marña patanta'tets ñeññ ame'ñetsapa' alla quechpa'hueret atto ame'ñeñet Yompor. 19 Ama't atet pañ patantarrpa' tarraña Yompor po'ñoçhpa' ama pueno po'ñoñ. Ama't Yompor po'ñoñ ñeññ aquellcareñ ahuañoteñpa' atet eñotateney eñallach pate'tets acheñ ñeññ po'ñoçh ame'ñenaya. Ñeñtpa' atet oten: "Yomporpa' cheme'tenan ñeññ po'ñoçh ame'ñenaya." Añpa' arr eñotateney po'poñ Yompor po'ñoñ ñeññ aquellcareñ ahuañoteñ, ñeñtpa' atet oten: "Allohueney ñeñtey cotene' Cristopa' yequechpa'huerrepa' allohuen sosya'tsañ."

O'ch netma'ntacha ñeññ atet pena pocoll

20-21 Po'ñoçhpa' çhoch yesuanom allohuen sosya'tsañ, allochñapa' attoch añach yema'yoçhra attoch yesherbe' e'ñe cohuen Yompor. Tarro'mar allohueney ñeñtey ame'ñetsapa' ama e'ñe attecma'ye' yesherbe'ne Yompor. Ñato' puesheña'tetspa' nanaccha' cohuen sherbeñet Yompor, ñato' po'potantañña' amach. Ñato' o'ch netma'ntacha ñeññ atet pena pocoll. Ñeññ acheñ eçllayoretpa' arrña pa'paclopa' shonte'ch eñall pa'namen coymeçhno. Ñato' patantarrpa' ororro'ch ñato' po'potantañpa' asrerro'ch, ñato' po'potantañña' tsachrro'ch, ñato' po'potantañña' patsrro'ch. Tarraña allohuenpa' amach e'ñe attecma'ye' sherbenano pamo'mte'. Atet ñerra'm ñeññ ororro'pa' nanaccha' coçhneshot sherbenan pamo'mte', tarraña atet ñerra'm patsrro'pa' amach tama coçhneshoteye' sherbenano pamo'mte'. Ñeñto'marña yapa'çho'ña ñerra'm yemneñ o'ch yesherbe' e'ñe coçhneshot Yamo'mte' Cristopa' añ palltetsa çhoch ñanam yesuanom allohuen sosya'tsañ attoch añach yema'yoçhrena ñeññ cohuentetsa Yamo'mtayecop. Allochñapa' ama't erra'tsena es yeña'yenpa' e'ñeçh cohuenacma yocshateñ Yamo'mte' Cristo.

22 Ñeñto'marña ãpapa' noteneñ o'ch pesuanom allohuen sosya'tsañ ñeññ atet muenatse'tyen huepaneshaçhno ñeññ ama po'ñoçhaye' sherbenaye Yompor, allochña ãpapa' añach pema'yoçhrena ñeññ cohuentetsa Yomporecop, ñaña çhoch ãpame'ñya Yompor e'ñe peñmañesha', ñaña çhocmach pemuerya allohuen ãpamo'tsesha'. Allochñapa' attoch peparrocmat epañ allohuen ñeññ e'ñe cohuen pueyoçher pene' Yepartsesharecop. 23 Ñaña ñerra'm esempo es otnare'tanna'tyenetpa' ãpapa' amach pe'mñotatstaneto, tarro'mar ñeññ atet otatse'tyetspa' e'ñe orrena atet penet. Ama't ãpapa' peñoteñ ñerra'm çho es yotnare'tanna'tapa'

alloŧ huena shonte' atsrre'mueñets. ²⁴ Tarro'mar ñeñŧ torretsa Yepartsesharecoppa' ama pocteyaye o'ch atŧa atsrre'mare'tyesa allemeñ. Elloña čhochña ya'muerañta allohuenacop. Ñaña čhochña yeyčhatyees e'ñe cohuen acheñenesha' ñeñŧ atet cohuen enten Yompor. Ñaña ama't ñetpa' erroŧ pa'yetpa' yapa' e'ñe yemorrenteñoŧpa' o'ch ya'huantoñ. ²⁵ Ñaña añ pocte' o'ch alla yoctape'chater cohuen ñeñŧ ye'moñe'tene'. Tarraña e'ñech acoŧa yoctape'chatyerranet e'ñe cohuen. Ñaña o'ch yecuenanet e'ñe acoŧa esempohuañencha' čhapanet pueyočhro ñeñŧ e'ñe po'ñočh cohuen enten Yompor. Ñaña o'ch yecuenanet esempohuañencha' cotape'cherret ello e'ñe cohuen Yomporecop. ²⁶ Ñerra'm atet yeŧapa' ñato' atŧoŧpa' o'ch a'rroyerranet oneñeŧ atŧo huanquénanet atŧo te'pa' pa'yenet sosya'tsañ ñeñŧ atet muenatenanet ña.

3

Ñeñŧcha' atet perra esepoch mellapoterrmocha

¹ Ñehua, te'pa' o'ch neñotataŧ po'poñ ñeñŧcha' atet perra esepoch mellapoterrmocha. Allempopa' nanaccha' echarr attoch yocte' Cristo. ² Tarro'mar allempopa' atetcha' perra acheñenesha'. Allempo acheñpa' nanaccha' moparrareret, ñaña añach paterr cotape'chenet ñeñŧ atet muenenet e'ñe ñocpueta. Ñaña allempopa' nanaccha' ye'chapretenet quelle. Ñaña allempopa' nanaccha' ommo'chenet ñeñŧ echyenet, atarrcha' cohuen entyerret e'ñe ñañeñeta, po'potantañña' amach esoye' asherben entyereŧo. Ñaña allempopa' nanaccha' achñare'teret Yompor, ñaña allempopa' o'huañcha' ame'ñyet ama't ñeñŧ pamo'mte' penet, ñaña ñetpa' amach es coshatenahueto ama't coñe'ta. Ñaña allempopa' nanaccha' tsena'teret allohuen ñeñŧ anaret Partsocop. ³ Ñaña allempopa' o'huañcha' esesha' mueranna'terrtsa, ñaña o'huañcha' muenet o'ch amo'tstanna'terret. Ñaña allempopa' nanaccha' toma'tamŧpsanna'tyerret ñaña allempopa' errotenčho' muenetpa' atetcha' ŧatse'tyenet, ñaña allempopa' nanaccha' mueročhtatanna'tyerret attoch nanac coshenet, ñaña nanaccha' tsena'terret ñeñŧ cohuentetsa. ⁴ Ñaña nanaccha' apomatatañterret, ñaña allempopa' amach es yepuer entyereŧo, ñaña allempopa' e'ñech ñañeñeta nanac cohuen entetset, ñaña allempopa' ñañeñetach e'nenet alloch nanac coshenet, amachña añeye' e'neneto atet muenen Yompor. ⁵ Ñaña allempopa' ama'tcha' ottenetañ ñerra'mrrate' ame'ñenetpa', tarraña amach po'ñočhaye' ame'ñeneto. Tarro'mar ñetpa' amach

po'ñoçhaye' mueneñeto o'ch çhapanet pueyoçhro ñeñt co-
huentetsa Yomporecop attoch huomenc pa'nmuert pueyoçher
e'ñe po'ñoçh.

Ñeñt atet acheñpa' amach pecua'psatsche. ⁶ Tarro'mar
ñeñt acheñ atetpa' attach mueneñ o'ch sheca'yesan
acheñenesha'. Ñato' o'ch ahuanmuert po'ppauño'marpa'
ñerra'm be'toset a'nahua pocollopa' añña coyaneshaçhno
ñeñt ama es eñotopa' o'ch atta ame'ñateñet e'ñe ñet poçtaþñet.
Tarro'mar ñeñt coyaneshaçhnopa' nanaccha' yorateñet
po'chñar. Ñaña ñetpa' añach e'nenet pa'namen ñeñtcha'
coshatenahuet. ⁷ Ñeñto'marña añ coyaneshaçhnopa'
pa'namencha' topatyenetañ cotapñats. Tarraña ama't
ahuatapa' amach erroteno't enterreto ñeñt po'ñoçh Yompor
poçtaþña. ⁸ Yacma ñeñtcha' atet shequërre' acheñenesha'pa'
ñeñtpa' añña muenen o'ch epatare'tan añ cotapñats ñeñt
e'ñe po'ñoçh Yompor poçtaþña. Atet pa' ñaña ahuat Janes
epuet Jambres ñeñt muenatseñ o'ch epatare'tan Moisés.
Ñeñt yacma ñeñt atet shequëne' acheñenesha'pa' amach
cotape'chenano ñeñt cohuentetsa ama't mamesha. Ñetpa'
çhach a'po'poñetenet ñeñt atet yame'ñena. ⁹ Tarraña ñet
poçtaþñetpa' amach allohuenacmaye' anetso'mar epuerro
tarro'mar esempopa' ñato' allohuen acheñenesha'pa' o'ch
eñotuet ñeñt atet otatse'tyenetpa' ñeñtpa' shequëñtsa. Ñato'
atetcha' pa' atet pa' ahuat epsheña yacma ñeñt muenatseñ
o'ch epatare'taneñ Moisés.

Arrpa' all cotape'chatan e'ñe cohuen Timoteo

¹⁰ Tarraña þapa' ama atteye' pepeno. Tarro'mar
þapa' añ poçta'nen ñeñt atet nepena na. Ñaña þapa'
peñotuennan ñeñt atet neyçhatyen Yomporecop, ñaña
ñeñt atet nocrrena e'ñe cohuen Yomporecop, ñaña atto
e'ñe patrra nema'yoçhrena ñeñt cohuentetsa. Ñaña þapa'
peñotueñ ñeñt atet nanac neyemteña Yompor ñaña atto
nanac na'huanten allohuen ñeñt echarr nentyen, ñaña
atto nanac nemorrenteña allohuen acheñenesha', ñaña atto
ama't nemueroçhteño'tpa' çhocma nocteñ Cristo. ¹¹ Ñaña
peñotueñ atto pue'moñe'teño'tetanpa' çhocma cofare'tnete't
atto mueroçhtatyesnete't. Ñaña ama't þapa' peñotueñ
ñeñt atet mueroçhtatyesnet a'yo anetso ñeñt pa'so'cheñ
Antioquío, ñaña Iconio, allotpa' ñaña Listro. Tarraña ama't
atet pa'yesnete'tpa' Yomporñapa' çhocma a'quesþatyesne't
alloy. ¹² Ñehua, yapa' yeñoteñ erra'tsencha' muenats o'ch
cotan e'ñe cohuen Cristo Jesúsapa' çhocmach mueroçhtatanet
ñeñt e'moñe'tenahuet. ¹³ Tarraña ñeñt ama cohuenayaye

acheñpa' allo'nach senet p̄atse'tnomuet sosya'tsañ. Ñaña ñeñt̄ atta sheca'yetspa' allo'nach senet shecanna'tatset.

14 Tarraña p̄apa' chocmach p̄octape'ch ñeñt̄ atet̄ aychataretep̄, ñeñt̄ara ñeñt̄ ama't̄ p̄apa' o' peñoter ñeñt̄ e'ñe po'ñoçh cohuen cotap̄ñats. Tarro'mar p̄apa' peyemtenya ñeñt̄ey peychate' ahuatoteñ. 15 Ñaña p̄apa' e'ñe cheshoteñ aychataretep̄ Parets po'ñoñ ñeñt̄ara añ ñoñets ñeñt̄ peñotaterre' atto e'ñe yame'ñeñoña Cristo Jesús pa' o'ch yequeshperra. 16 Allohuen Yompor po'ñoñ ñeñt̄ aquellcaretpa' e'ñe Parteshotecma anaret̄. Ñeñto'mar añ ñoñetspa' nanac sherben ñeñt̄cha' yeychate' ñeñt̄ atet̄ muenen Yompor, ñaña ñeñt̄cha' alla yoctape'chaterre' cohuen ñerra'm esempo es yepanten, ñaña ñeñt̄cha' yeñotatene' e'ñe cohuen ñeñt̄ atet̄ poctetsa Yomporecop. 17 Allochñapa' attoch ñeñt̄ey o' puechemer perrey Yomporpa' e'ñech yeñotuen allohuen ñeñt̄ cohuentetsa Yomporecop, ñaña attoch huomenc yeḡa' yeyoçher allohuenacop ñeñt̄ cohuentetsa Yomporecop.

4

Añ pocte' chocmach yeserrpare'toñ Yompor po'ñoñ ama't̄ erroteno'tsenya

1-2 Te'pa' o'ch alla noterrperr ñeñt̄cha' atet̄ peḡa: Chocmach peserrpare'toñ Yompor po'ñoñ ama't̄ esempo erroteno'tsenḡa. Tarro'mar Yomporpa' enteney epuet Puechemer Jesucristo, ñeñt̄ara ñeñt̄ Yepartseshar yepen, ñaña ñeñt̄arach huerrtsa ama't̄ esempohuañen, ñaña ñeñt̄arach am̄cha'taretetuerrtsa esempohuañen, ñeñt̄cha' acrerre' allohuen acheñenesha' ñeñt̄ e'ñe cohuenare', ñaña ama't̄ ñeñt̄ ama cohuenayaye. Atet̄cha' p̄an allohuen ñeñt̄ corretsmeñ allempo, ñaña ama't̄ ñeñt̄ o' colla'huenta. Ñaña te' p̄apa' o'ch peñotatyeshacheñenesha' ñerra'm esempo ñetpa' ama pocteye' es peneto. Pañapa' p̄ach otyesahuet amach atet̄ yeḡatsto, allotpa' o'ch p̄octape'chatyerranet e'ñe peñmañesha'. Ñaña chocmach peychatyesanet ñeñt̄ poctetsa Yomporecop. 3 Tarro'mar esempohuañenpa' chapcha' allempo acheñenesha'pa' o'huañcha' muenet o'ch ame'ñet ñeñt̄ e'ñe paçharr cotap̄ñats, ñeñt̄ atet̄ yeçhateney Yompor po'ñoñ. Allempopa' añach e'nyerret erra'tsente' serrpare'tene' cotap̄ñatser ñeñt̄ e'ñe cohuen entenet ñet attoçcha'ña atonterraña ñeñt̄cha' yeçhaterrahuet ñeñt̄ e'ñe ñet poctap̄ñet. 4 Allempopa' amach esesha' muenerraye o'ch e'mñotet cotap̄ñats ñeñt̄ e'ñe po'ñoçh. Atteñapa' o'ch añ e'ñe cotape'cherret ñeñt̄ e'ñe ñet pueserrparñet. 5 Tarraña p̄apa' añach paterr p̄octape'ch ñeñt̄ cohuentetsa Yomporecop, ñaña

čhocmach p̄a'huanta' ñerra'm huaponap̄a mueročhteñets, ñaña añach pa'terr pema'yočhra serrpare'tatysets cohuen ñoñets alloch yequeshperra. Ñaña čhocmach pe'torra ñeñt atet petaruas apaṣ Yompor.

Allempo o' muetsamochet Pablo

⁶ Napa' amach erro't nepere'te tarro'mar o' čhapmoch allempoch na'mtsaretta Yomporecop. Te'pa' neñotena napa' o' muetsamochet. ⁷ Tarraña napa' o' epaye' netorra'nma Yomporecop atet ñerra'mrrate' čho nečllarena Yomporecop. Ñaña napa' o' netsotua ora ñeñt atet oterren Yompor. Ñato' o'ch netma'ntacha ñeñt atet nepena: Ñerra'm čho erra yesechapa' čhocmach yečhap all yesechena. Ñaña napa' ama't mameshapa' ama nequečhpue'te atto name'ñeña Yompor. ⁸ Te'ña napa' aña necuen esempoch nagap ñeñt o'patatenna Yompor ñeñtcha' nanac nocshaterre', tarro'mar napa' añ neṣa'yese't ñeñt atet muene't Yompor. Ñeñto'marña te' esempoch huerra Yepartseshar Cristopa' allempo napa' aphuerrencha' ñeñt o'patatenna. Tarraña amach nap̄a aphuerrno ñeñt o'patatenya. Añe'nachña aphuerr ñaña allohuen ñeñt čhocma cohame'tene' te' Cristo o'ch huerra. Ñeñtara Yepartseshar Cristo ñeñtcha' yeñotaterre' ñeñt po'ñočh atet yeṣa'yena te'.

Arrpa' all otyesan Timoteo ñeñt atet aṣarettena

⁹ Te'pa' o'ch notaṣ ñaña ñerra'm erro'tenoṣpa' o'te' ṣon arr tayecma. ¹⁰ Tarro'mar arr masheñ Demaspa' o' a'ypo'ña'nerren arr napuet, ñapa' o' ahuerr Tesalónico, tarro'mar ñapa' aña nanac morrentena ñeñt patso'marecpa. Añpa'čo'ña masheñ Crescentepa' o' ahuo' ñaña Galacio. Ñaña masheñ Titopa' o' ahuo' anetso Dalmacio. ¹¹ Te' arrpa' aña arro'tsen masheñ Lucas. Ñaña o'ch p̄a'sech masheñ Marcos ñeñtcha' epaṣ ṣon arr, tarro'mar ñato' ñapa' o'ch yenpa'n arr. ¹² Masheñ Tíquicopa' o' nemñe a'yo anetso Efeso. ¹³ Ñaña o'ch notaṣ ñerra'm ṣoncha' arrpa' ṣanmoncha' necapa ñeñt nena'nom Troaso e'ñe Carpo pa'paclo. Ñaña ṣanmoncha' allohuen nelibročhno, ñaña nepaṣllečhno. Ñeñtara añ nepaṣllečhnopa' ñeñt nanac nemnen.

¹⁴ Alejandro ñeñt po'taruas pene' asrečhnopa' ñapa' atta nanac a'metare'tamṣsen. Tarraña Yomporpa' tsa'taterach ñeñt atet p̄a'n. ¹⁵ Ñeñto'mar ṣapa' e'ñech peñota ñocop, tarro'mar ñapa' nanac epatare'tenan Yompor po'ñoñ ñeñt atet yeserrpare'ten.

¹⁶ Ñaña o'ch notaṣ. Ama't ahuañmo'cha allempo ñanom na'poc̄tat neñoñ añcha'tareteshopa' ama't

puesheñarrapa' ama esesha' neñosapretaye. Elloña ñeñtapa' čha a'ypo'ña' huanet. Tarraña ama't atet ĩa'netañpa' napa' ama nemno Yomporpa' o'ch tsa'taterranet. ¹⁷ Tarraña Yepartseshar Cristopa' ama a'ypo'ña'no, elloña nanac ahuamencat ĩa'n. Ñeñto'marña o' alla neserrpare'terrerr Yompor po'ñoñ attoch e'mare'ch allohuen acheñenesha' ama't ñeñt ama judioneshayaye ñeñt alloch yequeshperra. Atto nequeshperra allempo all atarr amueročhtataretēn, napa' atet nenteñ ñerra'mrrate' Yepartsesharpa' o' a'queshpaterren e'ñe ma'yarr puenamoť. ¹⁸ Ñeñto'marña te'pa' neñoteñ Yepartsesharpa' čhocmach a'queshpaterren arrot all ama cohuenayaye, ñaña napa' neñoteñ čhocmach cohuanĩpenen, attochña čhapterren all ančha'tarettena ña pue'ntaño. Ñeñto'marña čhocmuepa'ch ya'ye'chočhtatoñ errponohuañen. Ñeñtpa' attetepa'ch.

Arrpa' all huomčha'tyesnerranet po'cartot

¹⁹ Ñaña añ necartotpa' nemneñ o'ch nehuomčha'ch noč Prisca epuet puerrollar Aquila, ñaña o'ch nehuomčha'ch Onesíforo pamo'tsesha'. ²⁰ Ñaña masheñ Erastopa' alla a'pa anetso Corinto, ñaña masheñ Trófimopa' alla nesa'nem pat-snañoť Mileto. ²¹ Ñaña ĩapa' ñerra'm erroťenoťpa' čhocmate' pehuapa allempo ama huapuenta'. Ñaña añ necartotpa' mueneñ o'ch huomčha'taĩ masheñ Eubulo, ñaña Pudente, allotpa' ñaña Lino, ñaña noč Claudia ñaña allohuen masheñneshachno ñeñtey ame'ñetsa arr Romo.

²² E'ñe allohuanenpa' o'ch notaĩ, Yepartseshar Jesucristopa' čhocmuepa'chña e'ñe parro'tseneĩ. Ñaña Yomporepa'ch sa'natenaya allohuenes. Ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN TITO TITO

Atto Pablopa' quellcan carta Titocop

1-4 Masheñe Tito ñeñteḡ e'ñe parro yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquëne'ña añ carta ñeñten nanac torretsa Yomporecop. Ñaña napa' ñeñten Jesucristo puellsensaren. Ñapa' atto llesenserren attoch nach ame'ñaterre'ña allohuen acheñenesha' ñeñt acre't Yompor ahuatoteñ attochña ñetpa' o'ch ame'ñeret. Ñaña añecop llesensa'n attoch nach eñotaterrahuet ñeñt e'ñe po'ño'ch atet poctetsa Partsocop, ñaña nach eñotaterrahuet e'ñe yeyemteñoḡ ña yañapa' corretsayach yocsheñeshocmañen tayoteñ e'ñe errponañohuen. Tarro'mar ñeñtpa' atet oteney Yompor ama't ahuatoteñ ñeñtcha' atet ḡonay, ñaña yapa' yeñoteñ Yomporpa' ama puenesho po'ñoñ. Ñeñto'marña te'pa' o' cherr allempo e'ñe pocte' enteñ ña o'ch eñotaterrey ña po'cohuenña. Ñeñto'marña napa' o' llesenserren Yompor ñeñt Ya'queshḡatañer yepen, nach serrpare'terre' po'ñoñ ñeñt atet otenen. Te'pa' e'ñe nehuom'cha'teño'teḡpa' o'ch notaḡ: Yomporepa'chña pebensare'tam'pene' ñeñt atarr Parets epuet Puechemer Jesucristo ñeñt Yepartseshar yepen ñeñtara Ya'queshḡatañer yepen. Ñetepa'chña pemuerenaya. Ñetepa'chña ḡocshatene' e'ñe ḡa peyo'chro.

Ñeñt po'taruas ḡa' Tito Yomporecop all anetso Creto

5 Te'pa' o'ch notaḡ, napa' atto nena'nmaḡ ahuaña Creto attoch ḡach a'poctatyese' ñeñt pallta'yetsa, ñaña ḡach acra'yese' puesheña'tets ñeñtcha' pena'yes allemeñ anetso'mar ñeñtcha' pompornesha' ḡa'yes ñeñt ame'ñetsa. Añmapa' ñeñtña atet notnomueḡ ahuañmo'cha. 6 Ñeñtcha' pompornesha' ḡa'yasetpa' añcha' pena'yes acheñ ñeñt e'ñe cohuenare' es ḡa'yets, ñeñt amach eñalle attoch tanmare'teña acheñenesha'. Ñaña ñeñtcha' pompornesha' ḡa'yasetpa' añcha' pena'yes erra'tsente' penten e'ñe patrra puetapor pen (ñerra'm ataporet), ñaña erra'tsente' penten ama't puechemerasha'pa' e'ñech ame'ña'huenet, ñaña puechemereshetpa' amach atteye' enteñe acheñenesha' atet ḡa'yena po'poñe'chno acheñenesha' ñeñt atta coshatse'tyenet, ñaña ñeñt ama atpare'tetso puechemerasha'. 7 Tarro'mar

ñeñtcha' pa'mcha'tareter p̄a' ñeñt ame'ñetsapa' añcha' pena'yes acheñ ñeñt e'ñe cohuenare' es p̄a'yets, ñeñt amach eñalle attoch tanmare'teña acheñenesha', tarro'mar ñapa' anaret ñach a'pocatyene' pa'namen ñeñt pocetsa Yomporecop. Ñaña ñeñtcha' pa'mcha'tareter p̄a'yes ñeñt ame'ñetsapa' amach añeyaye acheñer ñeñt añach pocte' enten o'ch chocma p̄atanet ñeñt atet muenen e'ñe ña, ñaña amach cha atsrre'moçhen entueno, ñaña ñeñt ama posa'tare'tetso, ñaña ñeñt amach orroñañeyaye, ñaña ñeñt ama nanac ye'chapretetso quelle ñeñt apencoçhenot o'ch gana. ⁸ Añña e'ñe pocte' o'ch amcha'taretta ñeñt e'ñe cohuen aguene' acheñenesha' pa'paclo, ñaña ñeñt nanac muenene' o'ch e'ñe cohuenare' es p̄a'yes, ñaña ñeñt e'ñe eñotene' ñeñt cohuentetsa, ñaña ñeñt e'ñe pocte' es p̄a'yets acheñeneshacop ñaña Partsocop, ñaña ñeñt e'ñech puetpara es p̄a'yen. ⁹ Ñaña ñeñtcha' pa'mcha'tareter p̄a'yes ñeñt ame'ñetsapa' e'ñech yemtenana pocacma añ ñoñets ñeñt e'ñe po'ñoçh Yompor po'ñoñ ñeñt atet yeçhateñet. Allochñapa' ñapa'çho'ña e'ñech attecma yeçhatan ñaña po'potantañeçhno ñeñt e'ñe paçharr cotapñats, ñaña ñeñt eñotene' attoch anapuenan e'ñe cohuenacma ñeñt achm̄are'tene' Yompor po'ñoñ attoch ñetpa' amach errotent anapeto.

¹⁰ Tarro'mar eñall shonte' ñeñt atpare'tets, ñaña ñeñt e'ñe orrena otatse'tyets, ñaña ñeñt shecare'tyets. Po'ñoçh ñeñtpa' atet pena shonte' judionesha'. ¹¹ Ñeñto'marña añ palltetsa o'huañcha' yeçhatyenet po'poñe'ttsocma cotapñats. Tarro'mar ñetpa' atta nanac moññe'tateñet acheñenesha' pocapña; ama puesheña'ttsayaya atet petso ama't allohuen ñeñt parro yeçha'yenet. Ñetpa'çho'ña aña yeçhatenet ñeñt ama pocteyaye. Ñaña añecpa yeçhatenet attoch ganet quelle, tarraña ñeñtpa' apencoçhena.

Ñeñt atet pena creto'marnesha'

¹² Puesheñarr creto'marnesha' ñeñt nanac etsotene' e'ñe ñañañeta pocapñetpa' ñeñtña acheñer ama pocteye' entenano pamo'tsesha' ñeñto'marña atet oten pamo'tseshacop: "Allohuen namo'ts creto'marnesha'pa' ñetpa' chocma nanac toma'tampeñet pamo'tsesha', ñaña ñetpa' nanac atsrre'mñaet e'ñe atfet ñerra'mrrate' berr ñeñt nanac bellac, ñaña nanac quellañsareret, atarr araquet ama ayetñañeto."

¹³ Ñeñt atet a'metam̄penan pamo'ts ñeñtpa' e'ñe po'ñoçh atet. Ñeñto'marña o'ch notap, te'pa' p̄ach otahuet, "te'pa' amach allo'na atet sepanna'tneno." Allochñapa' attoch allo'na ame'ña'nmuert añ cotapñats ñeñt e'ñe paçharr,

14 ñaña allochñapa' amach allo'na e'mñotneññañeto ñeñt pueerrparña pe't ahuatnaneshañ judionesha', ñaña allochñapa' amach allo'na e'mñotneñe acheñenesha' ñeñt atet yechatyenanet ñeñtcha' atet pet, tarro'mar ñetpa' chach atpare'tenet ñoñets ñeñt e'ñe po'ño'ch Yompor po'ñoñ.

15 Ñaña o'ch seño'ch: Ñeñt acheñer e'ñe cohuenare' es cotape'chen pueyo'chro Yomporecoppa' ñocoppa' ama es eñalle attoch sosey enteñ Parets. Tarraña ñeñt nanac sosey cotape'chets pueyo'chro ñaña ñeñt ama ame'ñetsopa' ñocoppa' ama eñalle ñeñt cohuen enten ña. Tarro'mar poctapñetpa' atarr sosey. Ñeñto'marña ñetpa' amach chapaneto pueyo'chro ama't esempo o' pohuet ñeñt ama pocteye' enteno Yompor. 16 Ñeñt atet acheñpa' ama't otenetañ eñoteñeto' Yomporpa' tarraña ñeñt atet p'atse'tyenetpa' yeñoteñ ñeñt'pa' ama atteyaye. Ñeñt Yomporpa' ama pocteye' entapretenaneto, tarro'mar ñetpa' ama es otapahueto, ñaña ñetpa' ama es sherbeneto ama't mamesha.

2

Ñeñt e'ñe pa'charr cotapñats Yomporecop

1 Tarraña p'ocoppa' añña poctetsa o'ch pey'chateñ acheñenesha' ñeñt e'ñe pa'charr cotapñats Yomporecop. 2 Ñaña ñeñt po'nmenesha'chno yacmapa' o'ch pey'chatanet atet: Amach orrare'tatsteto attoch chocma cotape'chenet e'ñe cohuen, allochñapa' pamo'tsesha'pa' añcha'na'tpo'ch enteñ, ñaña attoch nanac eñotenet ñeñtcha' atet p'a'yeset ñeñt cohuentetsa Yomporecop. Ñaña o'ch p'otanet e'ñe cohuenacma, ame'ñetepa' ñeñt e'ñe pa'charr cotapñats Yomporecop, ñaña morrentanna'tetepa' ñaña ahuanta'huetepa'ch allohuen topateñets. 3 Attecmach pey'chach ñaña po'nmenesha'chno coyanesha' ñetpa' añepa'ch orrtatyenet ñeñt e'ñe pocte' enten Parets ñaña ama't allohuen acheñenesha'. Amachña chaña atomañeteneto, ñaña ñetpa'cho'ña amach orrare'tatsteto. Añña pocte' o'ch ye'chachet pacmanesha' ñeñt cohuen enten Yompor. 4 Ñetpa' ye'chachetepa' pacmanesha'chno ñeñt shopshare' ñeñt o' some'tua allochñapa' attoch e'ñe cohuen mueryet puerrollaret, ñaña attoch e'ñe cohuen mueryet puechoyoreshet, 5 ñaña attoch ñetpa' eñotenet nanac ñeñtcha' atet p'a'yeset ñeñt poctetsa ñaña attoch muechettenet, ñaña attoch amach muenme'cheneto ñeñt po'taruas penet pa'pacleto, ñaña e'ñech amuerañtenet, ñaña e'ñech ame'ñeñet puerrollaret. Allochñapa' e'ñe ñesho'tetpa'

amach errotentōt acheñenesha'pa' achñare'toñeto Yompor po'ñoñ.

6 Attecmach peychach ñaña yacmanesha' ñeñt huepaneshameñ attoch ñetpa'cho'ña o'ch eñochet ñeñtcha' atet pa'yeset ñeñt poctetsa. 7 Papa'cho'ña e'ñech cohuenare' es pepa'yes paña, allochñapa' attoch entap̄ acheñenesha' ñeñt cohuen enten Yompor. Ñaña allpon peychatenanetpa' e'ñepa'chña pacharr peychatenanet, amachña cha muene' peyllsheñoŋa peychatenaneto attoch añcha'na'tpo' entoñet Yompor po'ñoñ. 8 Tarro'mar e'ñe peychateñoŋ Yompor po'ñoñ ñeñt e'ñe pacharrpa' amach errotentōt ama't eseshapa' oto aña'pa' ama atteyaye. Ñaña ama't ñeñt pe'moñe'tyene' ñerra'm e'ñe peychateñoŋ e'ñe cohuenpa' allempoña ñetpa' o'ch penquēt, tarro'mar e'ñe peychateñoŋ cohuen pacharr. Allempoña ñetpa' amach errotentōt alla sasare'terrpeterro.

9 Ñaña e'ñech cohuen poctape'chatyes acheñenesha' ñeñt ataruasatarettetsa e'ñe atŋa. O'ch potanet ame'nyetepa' e'ñe cohuen ñeñt po'patronar penet. Ñaña añ pocte' allpon muenenet po'patronaretpa' e'ñepa'chña ame'ña'hueñet, allochñapa' attoch coshateñet po'patronar. Amachña cha anapare'teñeto. 10 Ñaña amachña cha etyeneto attoch po'patronaretpa' e'ñech yemtenanet poctacma. Allochñapa' e'ñe pame'ñeñoŋet cohuen po'patronaretpa' añña acheñenesha'pa' e'ñech cohuen entapretenet Yompor poctap̄ña, ñeñtara ñeñt Ya'queshpatañer yepen.

Atto Yomporpa' orrtatan puemuereña allohuenacpay

11 Yomporpa' orrtaterrnay pomuereña e'ñe allohuenacpay pa'namen acheñeneshacop attoch yequeshperra. 12 Ñaña ñeñt ama cohuen enteno Yomporpa' añ pocte' o'ch ya'ypo'ña'huer, ñaña ñeñt allpon yemnatse'tyen arr patsropa' añ pocte' ñaña o'ch ya'ypo'ña'huer, tarro'mar puemorrenteñoŋ Yomporpa' ñeñto'mar yeçhatey atet. Añña pocte' ama't añe patsropa' o'ch yepena ñeñt cohuentetsa, ñaña o'ch yepena ñeñt atet pocte' enten Yompor, ñaña ñeñt atet muenen o'ch yet-sotoñ. 13 Aña'pa' attoch yecuame'teñ e'ñe yocsheñesha' es-empohuañencha' huerra po'cohuenño Jesucristo ñeñt nanac Parets ñeñt Ya'queshpatañer yepen. 14 Tarro'mar ñapa' ña pocte' ente' o'ch rroma yocop attoch o'huañcha' allo'na yepatse'tnena sosya'tsañ. Ñaña ñapa' attoña e'shohuerrnay allohuen ñeñt ama pocteyaye. Allochñapa' attoch puey-ochresha' perrey, ñaña attoch yapa' yema'yoçhrena ñeñt cohuentetsa.

15 Allohuen ñeñt atet o' notuaþ þapa' ñeñtcha'ña peychatyesanet. Ñaña o'ch þoctape'chatyesanet e'ñe cohuen, ñaña ñerra'm þa'yenet ñeñt ama pocteyayepa' o'ch þotanet, amach þatsteto atet, tarro'mar þapa' ñeñtecop anareteþ. Ñaña ñeñt ama pocteyayepa' amach atet peþatsto, te't acheñenesha'pa' amate' acua'þsenaye' entenpeto.

3

Ñeñt atet poctetsa allohuenacop ñeñtey ame'ñetsa

1 Ñaña o'ch peyerpacha acheñenesha' añ pocte' o'ch ame'ñeñet ñeñt nenet nanac amcha'taret, ñaña allohuen po'psheññechno ñeñt amcha'taretetyetsapa' añ poctetsa o'ch ame'ñeñet. Ñaña añepa'chña pocsheñesha' chocma torra'yenet erra'tsente' cohuen enten acheñenesha'. 2 Ñaña o'ch peyerpatanet amach allo'na sasare'tneñeto ama't puesheñarra, ñaña e'ñepa'chña cohuen entannenet, ñaña e'ñepa'ch acoþa es penet po'psheññecop ñaña e'ñepa'ch cohuen amuerañtenet allohuenacop.

3 Ñeñtpa' e'ñe pocte' atetcha' þannenet tarro'mar yapa'cho'ña yeñoteñ ahuatpa' aña yepatse'tyese't ñeñt ama pocteyaye. Yapa'cho'ña attach ama es yepche'te allempo nanac yepatse'tyese't sosya'tsañ. Ñaña nanac yatpare'te't ahua't, ñaña aña yechatyesyete't ñeñt ama po'ñochoyaye cotapñats. Yechetspa' aña nanac muenatse'tatyete't ñeñt ama cohuenayaye ñaña allempopa' aña nanac yocshe't pa'namen sosya'tsañechno. Ñaña allempopa' nanac atsrre'moçhen yentanna'tyese't ñaña nanac es yeye'chapretanna'tyese't. Ñaña allempopa' ñerra'm esesha' ye'moñe'te'pa' yapa'cho'ña o'chcho' ye'moñe'chcho' yaña. 4 Tarraña allempoña Yomporpa' eñotatey e'ñe ña puemuereñoþpa' mueneñ o'ch yenpa'y, e'ñe allempocma yapa' attoña a'queshþaterrey, ñeñto'marña Yomporpa' ñeñt Ya'queshþatañer yepen. 5 Ñeñtpa' ama añoþeyaye atto e'ñe cohuen es yeþa'yen, añña e'ñe puemuereñoþeya ñapa' a'queshþaterrey. Attoña e'shohuerrnayña yo'chñar attochña ellopa' o'ch yoctape'cherr e'ñe cohuen etserra ñocop, ñaña Puecamquëñoþpa' o' e'ñe etserrataterrnay yoctapña. 6 Ñeñto'marña Puechemer Jesucristopa' attoña a'poctatuonay yocop attoch Pomporpa' chorraterrya Puecamquëñ e'ñe poctacma. Jesucristopa' ñeñtña Ya'queshþatañer yepen. 7 Ñeñto'marña te'pa' yeñoteñ e'ñe puemuereñoþey Yomporpa' o' pocte' entuerrey allohueney, ñeñto'marña te'pa' e'ñe yeyemteñoþ chocma yecuame'ten ñeñt o'patatenya, ñeñtpa'

attochña yapa' corretsayach yocsheñeshocmañen tayoteñ e'ñe errponañohuen.

⁸ Ñeñt atet notenpa' e'ñe po'ño'ch. Ñeñto'marña napa' atarr nemneñ o'ch poctape'chatanet e'ñe huomenco atet, allochñapa' ñeñt ame'ñenaya Yomporpa' e'ñech aña ma'yochrenet o'ch penet ñeñt cohuen enten ña. Ñeñt o' notuapa' ñeñtña cohuentetsa ñaña ñeñtña nanac sherbets allohuenacop. ⁹ Ñaña o'ch notaḡ, amach pa'na anapare'tatstahueto ñerra'm esempo anapare'tanna'tyena acheñenesha' e'ñe ñet poctaḡño'maret. Ñaña amach pa'na anapare'tatstahueto ñerra'm esempo anapare'tanna'tyenet atet pa'yesete't pa'tañneshañet. Ñaña amach pa'na otnare'tatstahueto ñerra'm esempo pueserrparño'tetpa' es otnare'tanna'tyenet. Ñaña amach pa'na anapare'tatstahueto ñerra'm esempo anapare'tanna'tyenet e'ñe Moisés po'ñoño'mar. Tarro'mar atto yanapare'tannenapa' ñeñtpa' ama es sherbeno, ñaña ñeñtpa' e'ñe orrena.

¹⁰ Ñaña ñerra'm esesha' ñeñt muenets o'ch atta e'moñe'tatyesan acheñenesha'pa' ñeñtpa' atetcha' pepe', o'ch peñotach atetpa' ama aḡapahuo. Ñerra'm ama huenano ñeñt atet penapa' ñato' o'ch alla poterr po'pocheño. Ñerra'm allempoña ama huenererropa' añ pocte' o'ch sa'ypo'ñe'. ¹¹ Tarro'mar ñeñt atet acheñpa' yeñoteñ ñeñtpa' po'chñarofcha' nanac es panten. Ama't ñapa' eñoteñeñ ñeñt atet pena ñeñtpa' ochña'teñets.

¹² Ñehua, o'ch noterrperr po'poñ. Ñerra'm esempoch chap pesho masheñ Artemas amapa' masheñ Tíquico ñeñtcha' nemña peshopa' ñerra'm erroteno'tpa' chocmate' ḡon, o'ch pechap Nicópoliso, tarro'mar napa' noctape'cheñ ñato' allcha' nechara'perra. ¹³ Ñaña chocmach peyenpue' masheñ Zenas ñaña masheñ Apolos attoch ñetpa' chapuet all sechenet, ñaña attoch amach es pallteto. Zenaspa' ñeñt nanac etsotene' ñoñets ñeñt atet anaret. ¹⁴ Allochñapa' ñeñt parro yame'ñena allpa' añ pocte' o'ch pa'yenet ñamet ñeñt atet cohuenteyetsa, ñaña attoch ñetpa' yenpueñet ñaña ñeñt nanac es palltetsa. Allochñapa' ñetpa'cho'ña o'ch sherbeñet pamo'ts.

Arrpa' all huomcha'tyesnerranet po'cartot

¹⁵ Allohuenet ñeñt parro'tsenenpa' mueneñet o'ch huomcha'tapet ñamet añ necartot. Ñaña o'ch pehuomcha'ch allohuen ñeñt pame'ñeño'tetpa' chocma morrentenyet. Yomporepa'chña sa'nataya allohuenes. Te'pa' ñeñtach notaḡ, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN FILEMÓN FILEMÓN

Atto Pablopa' quellcan carta Filemónacop

¹ O'ch masheñe Filemóna nequellconañ añ carta, na Pablon epan masheñ Timoteo. Napa' o' yottampennet e'ñe nerrpare'teñoñ Cristo Jesús po'ñoñ. Te'pa' o'ch masheñe yehuomcha'tañ pa ñeñteḡ atarr yemorrentena ñeñteḡ atarr yetorrapretenaya Yomporecop. ² O'ch yehuomcha'teñ ñaña allohuen ñeñt pame'ñeñoñet chocma apchenet pepaclo. Ñaña o'ch yehuomcha'teñ yoçh Apia ñaña masheñ Arquipo ñeñt nanac yetorrapretenaya ñaña Yomporecop. ³ E'ñe nehuomcha'teñoñes sapa' napa' o'ch notas: Yomporepa'ch sebensare'tamḡene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyoçhro allohuenes.

Atto Filemón e'ñe pame'ñeñoñan Cristo atarr morrentenana allohuen ñeñt ame'ñetsa

⁴⁻⁵ Ñaña te'pa' o'ch notañ masheñe. Napa' atet ne'mare'teneḡ ḡapa' nanac peyemteña Yepartseshar Jesús ñaña atarro' pemorrenteña allohuen Yompore pueyochresha'chno. Ñeñto'marña na atet ne'mare'teneḡpa' chocma neparasyoso'teñ Yompore allempo nema'yochamḡpenḡa. ⁶ Ñaña o'ch notañ, añ nenamueñ Yompore ḡocop, ñeñt allpon ḡame'ñatena e'ñe ḡame'ñeñoñ Yompore, ñetpa'cho'ña chapantepa'ña pueyoçhreto atto nanac shonte' e'ñe cohuen bensare'tamḡeney Yompore e'ñe yame'ñeñoñ Puechemer ñeñt Cristo Jesús. ⁷ Ñehua, masheñe atarr nocshena atto ḡapa' atarr pemorrenteña allohuen ñeñt pueyochresha' pen Parets. Atto atarr pemuerenanetpa' ñeñto'marña na'ñaña atarr ḡocshaten neyoçhrohuen.

Atto Pablopa' otenan Filemón e'ñech cohuen aguërran pa'taruasañer Onésimo

⁸ Ñeñto'marña te'pa' o'ch noterrperr po'poñ: Napa' ñeñten Cristo puellsensaren ñeñto'marña ḡocoppa' e'ñe pocten o'te' atet notapeñ e'ñe ne'mueñoçma ñeñt poctetsa atetcha' peḡa. ⁹ Tarraña neñoteneḡ ḡapa' atarr amuerañaḡ ñeñto'marña te'pa' o'ch notañ e'ñe ḡa pemuereñoñ atetñaca'yeña peḡa. Ñehua, na Pablon ñeñten atet ḡotene' napa' po'nḡota

o' yottam̄perrnet e'ñe neserrpare'teñoña Cristo Jesús po'ñoñ. ¹⁰ Tarro'mar na p̄otene' añecop ñeñt̄ atet nenteñ ñerra'mrrate' nechemer. Ñehua, ñapa' o' name'ñacha arr all ayottam̄psareten ñeñto'marña te'pa' e'ñe nechemer nepeñ. Ñeñtpa' añ pa'so'cheñ Onésimo ñeñt̄ p̄a'taruasañer pepe't̄ allempo ama yetam̄penp̄a'.

¹¹ Ña ahuatpa' ama es asherben peñche'te allempo petaruasache't̄ e'ñe at̄ta. Te'ñapa' nanaccha' asherben penter e'ñe atet atarr asherben nenteñ nam̄a. ¹² Te'pa' o' alla nemñer pesho, e'ñepa'chña cohuenacma alla p̄aguër, e'ñech atet pe'papuer ñerra'mrrate' e'ñe no nechemer p̄aguën, tarro'mar ñapa' e'ñe neyo'chrocmañen atarr nemorrenteña. ¹³ Napa' atarrcho' nemneñeñ o'ch na'pacheñ arr ñeñt̄cha' epan atto ñapa' ñate' neshherbenayeñ. Ñehua, napa' neñoteñ ñerra'm p̄a' arro'tsenpeñcha'pa' p̄ate'ña neshherbenayeñ arr all ayottam̄psareten e'ñe neserrpare'teñoñ Cristo po'ñoñ. Tarraña p̄apa' amaña arro'tsenayaype ñeñto'marña napa' nemneñeñ o'ch na'patonapeñ p̄a'cheñer ñeñt̄cha' neshherbenayeñ. ¹⁴ Napa' ama't atarr nemneñeñ o'ch atet nepeñ, tarraña ama nemno o'ch atet ne'pa ñerra'm ama p̄a atet notaye, attoña e'ñe p̄a p̄octap̄ño'pa' añcha'ña p̄orrtatonay pemuereña. Ama nemno o'ch e'ñe na ne'mueñocmapa' o'ch notap̄ atetcha'ña pe'pa'y, ñeñto'marña te'pa' o'ch alla nemñer masheñ Onésimo pesho. ¹⁵ Ñaña o'ch notap̄ ñato' tarrecpate' yetam̄psapa' mame' attoch e'ñe parrocmaterre'p̄ e'ñe tayoteñ errponañohuen. ¹⁶ Te'pa' o'huañcha' atet peñch ñerra'mrrate' p̄a'taruasañra pepeñ ñeñt̄ ama esoye' pente'te. Te'pa' e'ñechña atet penter ñerra'mrrate' e'ñe pemo'nasheñ ñeñt̄ atarr pemorrentena. Napa' atarr nemuereña elloña p̄apa' o'ch atarr pemuerya nanac tarro'mar ñapa' ama e'ñe at̄ta pemo'nasheñ pepeñe atet ye'pannena allohueney acheñey, te'ñapa' e'ñe yame'ñeñoñ Yompor o'ch e'ñe pemo'nasheñtera e'ñe p̄octacma.

¹⁷ Ñerra'm po'ño'ch atette' pentenen na ñeñtey parro attecmay yeyemtannena, ñeñtepñapa' e'ñechca'ye cohuen p̄aguërña yemo'nasheñ Onésimo atet ñerra'mrrate' na e'ñe cohuen p̄aguën. ¹⁸ Ñerra'm chote' erro't̄ penna'p̄ ñeñt̄ ama cohuenayaye amapa' ñerra'm chote' tebene'p̄, te'ñapa' nach petsa'terraya. ¹⁹ Na Pablonpa' te'pa' o'ch nequellconap̄ e'ñe na notot̄ attoch e'ñe cohuen neñotata'p̄ nach petsa'terraya. Tarraña ñato' o'ch neyerpata'pa' atto na p̄ame'ñaterraya attoch p̄a'queshp̄ataretterra, ñeñto'marña p̄ocoppa' añ p̄octetsa te'pa' o'ch alla p̄ocshaterren nam̄a. ²⁰ Po'ño'ch masheñe, napa' añ e'ñe nemnen te'pa' o'ch alla p̄ocshaterren nam̄a e'ñe

þame'ñeñoť Yepartseshar Jesucristo. Allochñapa' napa'cho'ña attoch e'ñe cohuen nocsherra neyočhro e'ñe name'ñeñoť namña Cristo.

²¹ Napa' neñoteneþ þapa' čhocmach pe'mñoten ñeñto'marña nequellquennaþ añ carta. Neñoteneþ amach ñeñtayaya atet peþo ñeñť o' notuaþ, þapa' ellochña atarrcha' cohuen peþa'yes allohuen ñeñť atarr cohuentetsa. ²² Te'pa' o'ch noterrperr po'poñ: þañño'toncha' ñaña nocop allcha' nečhap ñerra'm esempoch a'rroyerrnet. Sema'yochamþeñoťen Yomporpa' napa' añ atarr necuen ñato' esempopa' a'rroyerrnetcha'. Allempopa' eshecte' neta sesho o'ch nemo'terra'.

Arrpa' atto so'tner po'cartot

²³ Arr necartot all huomcha'teneþ ñaña masheñ Epafras ñeñť parro yottamþenyet e'ñe yeserrpare'teñoť Cristo Jesús po'ñoñ. ²⁴ Huomcha'teneþ ñaña masheñ Marcos ñaña masheñ Aristarco ñaña masheñ Demas ñaña masheñ Lucas. Ñetpa' čhocma torrapretennet Jesucristocop.

²⁵ Te'ñapa' ñeñťach notaþ masheñe. Yepartsesharepa'chña Jesucristo sa'nataya allohuenes. Ñeñťpa' attetepa'ch Nompore. Allohua.

Pablo

AÑ CARTA ÑEÑ HEBREONESHACOP HEBREOS

Te'ña Yompor Puechemerpa' ña e'ñe ye'ñorana'terraya ñeñt atet oteñ Pompor yocop

¹ E'ñe ahuatoteñ Yomporñapa' chocma eñorana'tyesane't ñeñt pueyochresha' pe't ñeñtcha' a'mta'yesaye't po'ñoñ ñeñtara profetanesha'. E'ñe pa'namenot eñotatyesanete't. Ñetñapa' o'ch eñotatenayet yatañneshañ judionesha' ñeñt atet otenanet Yompor. ² Tarraña te'ña yapa' e'ñe ña Puechemer o' eñorana'terraya ñeñt atet eñoreññaña Yompor yocop. Ñehua, ñeñtpa' ñeñtara Puechemer ñeñt Jesucristotets ñeñt ne't Pompor ahuatoteñ, ñach o'patenaya allohuen ñeñt ora allpon eñall, tarro'mar ña ye'chcataprete' ahua't Pompor añ patser ñaña allohuen ñeñt esocmañen pa'namen eñalleyesta. ³ Ñeñtara Cristo atto atarr cohuentena ña pa'tsnomueño't, ñeñtpa' Pomporña orrtaten po'partsoña. Ñeñt atet cohuen orrtatyen ñapa', Pomporpa'cho'ña e'ñe parro attecmet. Ñapa' e'ñe po'ñoño'ta orrtatuan ora esocmañen ñeñt allpon pa'namen eñall tarro'mar ña po'ñoñpa' atarr huomenc. Ñeñtara ñeñt rromats attoch e'ñe e'sham'pesuerrey yo'chñar. Allempoña o' orrtatuan atto e'sham'perrey yo'chñar allempoñapa' o' alla anorruerr Pompor Parets po'cohuenrot allña atarr partsotapretuerrana Pompor po'conaño e'ñe all pue'ntaño.

Ñeñt Yompor Puechemerpa' ña metana'tuene' allohuen mellaño'teñnanesha' atto atarr sherben ña

⁴ Ñeñto'marña te'ña ñapa' atarr añcha'tarettena, ello metana'tuenan allohuen mellaño'teñnanesha', tarro'mar ñapa' ñeñt otenet ñapa' e'ñe Parets Puechemer. Ñeñtña mellaño'teñnanesha' ñetpa' ama atteye' otaretteneto. ⁵ Ñaña yeñoteñ ñapa' ña e'ñe metana'tuenahuet tarro'mar mellaño'teñnanesha' ama't puesheñarro'tetapa' ama otaneto ñeñt atet otan Puechemer, ñeñtpa' atet ot Puechemerecop: Papa' pa' ñeñtep e'ñe Nechemerep, te'ñapa' o'ch e'ñe neñotach acheñenesha' po'ño'ch papa' e'ñe Nechemer nepenep.

Po'pocheñoñapa' atet oterrerr Puechemerecop:

Ñapa' na ñeñten Pompor, ñapa' no Nechemer.

⁶ Po'pocheñoña allempo chapatan Puechemer po'moter ñeñt atarr nanac sherbets añe patsro atet eñora ñocop, ñeñtpa' atet ot:

Te'pa' concorpana'teñepa'ch allohuen nemillaño'teñnaneshar.

⁷ Po'millañoŧeñnaneshar ñetpa' añecpa anarettenet ñetcha' sherbenet Yompor. Ñeñto'marña atet eñorena ñocpuet:

Ñerra'm erra nemñayenamet e'ñech poma'yorñecma erra senet e'ñe atet penet ñerra'm mōrr. Atarr cohuen sherbennet atet ñerra'mrrate' tso' ñeññ atarr cohuen huoretyets.

⁸ Tarraña Puechemerecoppa' ama atteye' oteno. Ñocoppa' atet eñora:

Papa' atarr Partsoḡ, ñeñteḡcha' čhocma amčha'tarettsa peconaño ñeññ errponañohuen. Ñaña ñeññ atto ḡa'mičha'tarettena ḡapa' e'ñe pocte' es peḡa'yenanet.

⁹ Ñaña ñeññ e'ñe pocte' nenten napa' ñeñña atarr ḡocshatene'. Ñaña ñeññ ama pocteye' nenteno napa', ḡapa'čho'ña ñeññ atarr petsena'ten. Ñeñto'mar napa' ñeññen Peyomporer pepenen, ahuo't atarr nanac nocshaterreḡ. Atto atarr ḡocshena ḡapa' ello peñtana'tueñ allohuen po'potantañ ñeññ nesherḡa'yene' ñamet.

¹⁰ Yomporpa' alla eñorerrerr Puechemerecop, ñeñtpa' atet otererr:

Partseshacha' ḡa yečcatue' ahuaḡ pats, e'ñe echarr ḡorratue. Enetpa'čho'ña e'ñe pehuamencotecma peyečcatue.

¹¹ Ñeññ e'ñe peyečcatuapa' ñeñtpa' huañerrcha' e'ñech chenca'huerra esempo, tarraña ḡapa' ama arromñatešhayaype ama't e'ñe errponaña. Allohuen ñeññ peyečcatua ñeñtpa' e'ñech mellasha'tua e'ñech atet pena ñerra'mrrate' shetamuets ñeññ atarr añllasha'tña.

¹² Atetcha' peperr peyečcatar atet ñerra'mrrate' shetamtsoshe'm ñeññ o' mellasha't. O'ch a'metatse'chet o'ch huapore'chet allempo chorrenet po'poñ ñeññ atarr cohuen emarr. Tarraña ḡapa' atterapach errponañohuen. Atto ḡocrrena ḡapa' ama't ahuaḡapa' amach ahuañañatferro.

¹³ Po'pocheño Yomporpa' alla oterranerr Puechemer, ñeñtpa' atet och:

Te'pa' o'ch alla ḡanorruerr arr necohuenrot allcha' pepart-sotapretuerrna. Esemphuañencha' allohuen ñeññ pe'moñe'tene' o'ch e'ñe na'mchechuerranet attochña pomnaren peḡohuerranet.

Tarraña mellañoŧeñnaneshañapa' ama atteye' oche ñeññ atet otan Puechemer. (Ñeñto'mar yeñoteñ Yompor Puechemer ña atarr sherbets, ello metana'tuenan allohuen mellañoŧeñnaneshañ.) ¹⁴ Yeñoteñ allohuen mellañoŧeñnaneshañapa' añecpa allsensarettenet atet ñerra'm

Yompor Puecamquëñ, ñetcha' sherbenet Yompor. Attochña ñetcha' yenpuenet allohuen ñeñtcha' a'qeshpatarettertsa.

2

Amach atta es yepchatsto esheccha' ya'qeshpataretterra

¹ Te'pa' atto o' yeñoterrñañ Yompor Puechemer atto atarr nanac partsoten ñeñto'marepa'chña te'pa' elloch yema'yoçhrerra o'ch ye'mñoter e'ñe poctacma ñeñt atto o' ye'muerrñañ po'ñoñ. Ye'mñoterrepa'chña e'ñe cohuen te't acopoteñpa' ñato'rraña o'te' alla yepserrñañ ñeñt atet o' yeçhaterrey Yompor Puechemer. ² Tarro'mar yeñoteñ Yomporpa' ama puenesho po'ñoñ ñeñt atto eñorana'tanet ahuat. Tarro'mar allempo ñeñt ama e'mñotaye ñeñt atta atpare'te'pa' e'ñe tsa'tatuanete't allohuen ñeñt allpon e'ñe pocte' ent ña. Ama't añ ñoñets ñeñt orrtat po'mllañoñeñrenesha' çhocma tsa'tatanete't ñerra'm esempo atpare'tenet ñeñt ñoñets. ³ Ñeñto'marña yapa' yeñoteñ ñerra'm ama ye'mñoterrñañe e'ñe ña Puechemer, yañapa' errotenuachñaca'yeña yeqeshperrate'ña ñerra'm atta ama es yepçheno; e'ñe atta eñalleñca'yeña attoch ya'qeshpataretterrañ e'ñe cohuen. Ñehua, ñenmañpa' Yepartseshar Jesúsña serrpare'tatahuet attoch ya'qeshpataretterra. Allempoña ñeñt e'muene' atet otanet Yepartseshar Jesús, ñetñapa' o' serrpare'tatyet yaña attoch yeñoçh ñeñt e'ñe po'noçh ña a'qeshpatañtetsa. ⁴ Ñaña Pomporñapa' ñaña yeñotate' Puechemer po'ñoñ ñeñt atet oteneypa' e'ñe po'ñoçh. Ñapa' orrtatyesanet po'partsoña ñaña po'huamenc ñeñt acheñenesha'pa' ama puentareto. Ñaña ña Puecamquëño'tpa' o' apa'yese y e'ñe puesheña'ttsoy errotench'a' muenatey ña ñeñtcha' atet yetorra'yesa ñocop.

Atto Jesucristopa' e'ñe poctacma acheñetos arr patsro attoña e'ñe pa'mo'nasheñ pohuerrey

⁵ Te'pa' o'ch noterrser po'poñone't añ patser ñeñtcha' huerrtsa tsapatone't. Ñeñtpa' ama mellañoñeñneshaye' noña Yompor ñeñtcha' pomnaren perre'. Ñapa' aña na' acheñ ñeñtpa' arromñañenesha'. ⁶ Tarro'mar atet anare't Yompor po'ñoñ ahuatoteñ allempo puesheñarrpa' atet otan Yompor: Ama't acheñaya ama't mamesha ama esoyayye, tarraña pa Nomporepa' atarropa't peyerpuenya. Ama't ya ñeñtey arromñañena'taraya tarraña pa Nomporepa' atarropa't pemuerenya.

⁷ Ñeñt arromñañenesha'pa' ama tama ahuamencateyayeto atet atarr sherben mellañoñeñnanesha'. Tarraña

ñeñtpa' mamecpa atet pemnach. Tarraña ama't atteñpa' elloña o'ch alla pecohuentater atet ñerra'mrrate' esempo o'ch net ñeñtcha' añcha'tare'terrtsa, allempopa' o'ch nachtet po'choyo'mñ ñeñt atarr cohuen.

⁸ Ñeñtpa' tarro'marña atet pene' arromña'fena'tar allochñapa' attoch e'ñe pomnaren penan allohuen ñeñt allpon es peye'chcatua. Arrpa' allohua atet oten ñoñets ñeñt ahuatoteñ anaret.

Ñehua, ñeñt ñoñets all oten arromña'fena'tar ñeñtcha' e'ñe pomnaren perre' allohuen, ñeñtpa' añca'yeña oteney allohuenacop ñeñt errañaren eñall; amach eñalleña ama't e'ñe patrra ñeñtcha' ama pomnaren perreto. Tarraña ama't atet oteneñ ñeñtpa' amaña yentera' allempoch pomnaren es perr arromña'fena'tar, tarro'mar ama cherra' allempoch etsoterra ñeñtecop anaret. ⁹ Tarraña e'ñe yeñoteñ puesheñarr ñeñt arromña'feco'ptartostsa ñeñt atet p'ostsa ñeñtca'yeña Jesús. Allempo acheñetos arr patsro Pomporña muenate' amach tama ahua'mencattoso atet atarr ahua'mencattena mellaño'feñnanesha'. Tarraña ñeñtpa' mamecpa atet muenach attoch e'ñe arromña'feco'ptartosa arr patsro. Ñeñtpa' añecopña atet p'a attoch muero'chtosa o'ch rromos allohuenacpay ñeñtey arromña'fenesha'. Yompor e'ñe pue'muereño'fey ya attoña muenatan Puechemer o'ch rroma yocop. Ñeñto'marña Pomporpa' o' alla atarr cohuentaterran Puechemer allempo o' alla ner ñeñtcha' atarr añcha'tare'terrtsa.

¹⁰ Ñehua, Yomporpa' ye'chcatan allohuen ñeñt eñal'leyetsa. Ñaña allohuenpa' tarro'mar ye'chcatue attoch cohuentateñña'ñet ña. Ñaña ñapa' añ muenen shonte' ñeñtcha' e'ñe puechemerasha' perr ñeñtcha' cohuentapre'terraya ña. Yomporpa' e'ñe pocte' enteñ o'ch muenatan Puechemer attoch muero'chtateñ acheñenesha'. Attochña e'ñe etsotatoñ Puechemer eshe'cha' a'queshp'aterran allohuen ñeñtcha' puechemerasha' perr, attochña e'ñe ahuanerranet allcha' cohuentapre'terrña'ñet Pompor. ¹¹ Ñehua, Puechemer ñeñt Jesús, ñapa' a'cohuentatan acheñenesha' Partsocop, attoña e'ñe e'sham'pesuanet po'chñar. Te'ña ñeñtey a'cohuentatuare'tey ñaña ñeñt ya'cohuentaterre' ñeñtpa' ñeñtña e'ñe ñeñt'fena'tarecmay tarro'mar ñeñtara Yompor yepen ñeñt Pompor pen ña. Ñeñto'marña Jesús'pa' ama puepencño'fey'e' pa'mo'nasheñ penye. ¹² Yeñoteñ ama penqu'ënyo tarro'mar Yompor po'ñoñ ñeñt anaret ahuatoteñ ñeñtpa' atet oten ñerra'mrrate'

Puechemer otets:

Napa' neserrpare'tachcha' nemo'nasheñnesha' atet e'ñe co-
huenare' es pepa'yen pa. E'ñe nachoteñoṭeṭṭ papa'
čhocmach na'ye'chočhtatonañ all apčhena allohuen
masheñneshačhno.

13 Yompor po'ñoñ ñeñt' aquellcaretpa' atet oterrerr
ñerra'mrrate' Cristo o' alla oterrerr:
Napa'čo'ña neyemteña Yompor.

Ñaña atet oterrerr Cristo:

Te' arro'tsenen epan Nompor puechemerasha' ñeñt' co-
huamñpsatenen ña.

14 Ñehua, allohuen ñeñt' e'ñe pa'mo'nasheñecmuet
ṭannetsa, ñetpa' e'ñe ñeñtena'tarecmuet. Ñeñto'marña
Jesúsapa' e'ñe acheñetos attoch pa'mo'nasheñ ṭosey. E'ñe
arromñañena'tartosa e'ñe atet ñerra'mrrate' ya. Ñapa'
tarro'marña atet ṭosa allochñapa' attoch rromos. Tarro'mar
allempo rromapa' attoña puerratañpesuan oneñet
po'huamenc atto atarr añcha'nočhtana'teney allempo
yerromuen. 15 Ñeñtpa' Jesúsña a'huañatañpesuose' ñeñt'
ama't cheshoteñ čhocmach yemcha'ten atto yerromuen,
ñeñtpa' atarr añcha'nočhen yenteñ. 16 Ñehua, yeñoteñ ama
mellañoṭeñnaneshaye' llequënoña Jesús ñeñt'cha' yenpos arr
patsro. Yaña llecosa ñeñtey arromñañeneshay ñeñtey e'ñe
po'ñočh po'mrenñey pen Abraham; ñeñto'marña ñapa'
mueneñ o'ch yenposey. 17 Ñeñto'marña ñocoppa' e'ñe
pocñoña o'ch acheñetos, o'ch e'ñe attetos ñerra'm ya ñeñtey
pa'mo'nasheñnesha' pen. Allochñapa' e'ñe puellcapreteñoṭey
ya ñeñtey e'ñe pamo'ts penpa' e'ñech cohuen a'pocaterrey
Partsesho. Attoña ñapa' čhocma e'ñe cohuen sherbenan
Pompor atet ñerra'mrrate' ñeñt' corneshatyets Partsocop.
Ñapa' e'ñe po'ñočh Pa'mcha'tareter peñ allohuen ñeñt'
cornaneshatyets Partsocop. Ñeñto'marña ñapa' e'ñe ña
tsa'tuerraya allohueney acheñeneshay yo'chñar allempo
ashataretta e'ñe ña po'rras. Attoña e'ñe a'pocaterrenay
yo'chñar Yomporesho. 18 Ñapa' atarr mueročhtosa allempo
huapoñe't topateñets; ñeñtpa' attoch a'ypo'ñereñ Pompor.
Ñeñto'marña te'pa' e'ñe puellcapreteñoṭey ya ñapa' e'ñe
eñoteñ o'ch yenpa'y attoch ahuamencañ ṭonay yeyočer
allochñapa' amach alla a'puerrataterrye topateñets ñeñt'cha'
allpon yehuapoya yaña.

3

*Jesús ñeñt' Yompor Puechemer ña metanene' ama't Moisés
atto atarr sherben ña*

1-2 Ñehua, masheñneshacha' ñaña nočhaneshacha' sapa' ñeñtes o' sa'cohuentataretterra Partsocop ñeñtes o' chore'terres Yompor o'ch chapaterres all pue'ntaño. Te'pa' o'ch notas, o'ch soctape'ch e'ñe cohuen ñeñt atet perrnay Cristo Jesús ñeñt yame'ñerra. Ñapa' atto allsensarettapa' e'ñe cohuen etsotuan ñeñt atet llesense' Pompor. Ñaña ñapa' ña Yecorneshar yepen ñeñt atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt atet muenach Pompor acheñeneshacop atet pe't ñaña Moisés ñapa'cho'ña e'ñe etsotan ñeñt atet och Yompor allohuen pueyochreneshacop. Ñehua, allohuen ñeñt pueyochrenesha' pen Yomporpa' ñetpa' pa'paquëll penanet Yompor. ³ Ñehua, yeñoteñ ñerra'm eñall puepahuarr pocoll ñeñt tomatenet e'ñe cohuen añcha'ña atarr cohuen yenten ñeñt tomatene'. Amachña añña cohuen yenteno pocoll tarro'mar pocollpa' ama ñoñaye' cohuenteno; eñallca'yeña pamo'mte' ñeñt a'cohuentatene'. Attecmach yeñch ñaña Jesús atarr cohuen tarro'mar ñapa' atto ame'ñatana shonte' ñeñtcha' pueyochrenesha' pa' Pompor attoña tomatosan ñaña pocoll ñeñt atarr cohuen ñeñtcha' pa'paquëll pen Pompor. Moiséspa' amachña ñañaña atarr cohuen yenteno tarro'mar ñapa' ama ñaye' tomataye ñeñtcha' pa'paquëll perr Yompor. ⁴ Ñehua, yeñoteñ allohuen pocollpa' ama ñoñaye' yeçhquëno; çhocmaca'yeña eñall ñeñt yeçhcatene'. Ñeñt yeçhcate' esocmañen ñeñt eñalletyetsa ñeñtpa' Yomporña yeçhcatuahue'. ⁵ Añña Moiséspa' e'ñe cohuen etsotan ñeñt atet yechya Yompor; ñeñtpa' o'ch es eñotatyesan acheñenesha' tarraña ñeñtpa' toma'nteñtsa. Tsapatoneña Yomporpa' o'ch eñotaterranet ñeñt e'ñe eñotochen. Ama't e'ñe cohuen etsotenaneñ Moisés allohuenacop ñeñt pa'paquëll pen Yompor allempo, tarraña ñeñt atto sherbenan Yompor pa'paclopa' ñapa' atta pueñañra peñ Yompor. Amaña Puechemereye'ña peñe. ⁶ Ñapa' añca'yeña Puechemer pen Cristo ñeñtcha' sherberrets tsapatonet allohuenacop ñeñtcha' e'ñe pa'paquëll perr Pompor. Ñapa' e'ñe cohuen etsoterran ñeñt e'ñe Pomporecop. Allohueneypa' e'ñe pa'paquëll pohueney Yompor allcha' yeçhena ña ñerra'm allo'nach huomenc yeyemuetneña attochña e'ñe yocsheñeshocma yecua'huanom ñeñt o'patatenya.

Yomporpa' e'ñech cohuen amesaterran pueyochreshachno ñeñtcha' e'ñe cohuen ame'ñerraya attoch e'ñe cohuen cosherret

7 Ñeñto'marña Parets Puecamquëñoŋpa' atet oten all aque-llcareŧ Yompor po'ñoño ñeñŧpa' atet oten:

Ñerra'm se'mueñ Yompor atto çhore'tenes te',

8 sañapa' çhochña se'mñoch, amachña çha se'charrtatatsto seyoçher. Amach çha satpare'tatsche atet pe'ŧ israelne-sha' ahuaŧ allempo chopeñe'chyesete'ŧ amayo. Allñapa' epaye' atsrre'moçhtana'tyesnete'ŧ.

9 All amayo satañneshaññapa' atarr topatnete'ŧ atto'ch eñotnet po'ñoçho'te' atsa'tatañen. Ñetpa' atet pa'yesnete'ŧ ama't çhocma entyesonete'ŧ ñeñŧ norrtatyesanete'ŧ. Pa'tatsoch çharra' charohua entyesonete'ŧ ñeñŧ çhocma negatyesanete'ŧ.

10 Ñeñto'marña napa' atsrre'moçhen nentyesanet, napa' atet not: "Ñeñŧ atet cotape'chenet pueyoçhro ñeñŧ ama cohuenayaye ñetpa' atarr panteñet nocop. Ama añeye' mueneneto o'ch cotape'chet ñeñŧ cohuen nenten na."

11 Atarr atsrre'moçhen nentanete'ŧ. Ñeñto'marña atet not ñocpuet: "Ñetña po'ñoçh ama't ahuaŧapa' amach neçhapaterraneto allcha' pocsheñeshoŧpa' o'te' amesapreterrnetañ." Ñeñto'marña ñocpuetpa' atet nena' neñoñ e'ñe na neso'chño.

12 Ñeñto'marña masheñeshacha' ñaña noçhaneshacha' te'pa' o'ch notas saña, e'ñech señoŧa seyoçhro atet soçtape'chyen e'ñe puesheña'ttsos, ñato'pa' amate' cohuenaye' soçtape'cheno, ñato'pa' amate' po'ñoçhaye' same'ñeñoña Yompor. Ñerra'm po'ñoçh atet sepenapa' ñeñŧpa' ñeñŧach sequeçhpaterre' Yompor ama't ñeñŧ Yomporer ñeñŧ ama arromñañeshayaye. 13 Sapa' e'ñepa'chña cohuen soçtape'chatanna'tnoma pate'tets yeŧ tayepa'tñapa' orameñ yeŧ allempoteñ o' çhore'terrey Yompor. Attochña so'chñarpa' amach errotenoŧ alla shequërserro. Attoch amach çha se'charrteno seyoçhro allochñapa' amach alla satpare'tere Yompor, ama't e'ñe puesheñarroŧesa. 14 Allo'nepa'chña e'ñe huomenc yeŧa'nom yeyoçher. E'ñepa'chña yeyoçhrocmañen yeyemteña Cristo atet yeŧa' allempo e'ñe errtey ame'ñenaya. Ñerra'm atetcha' yeyemuetnoña allempopa' yagapapretercha' Cristo ñeñŧ o'patateña Pompor.

15 Ñeñto'marña o'ch alla neyerpaterrserre ñeñŧ atet oten Yompor po'ñoñ ñeñŧ aquellcareŧ ahuaŧoteñ, ñeñŧpa' atet oteney:

Ñerra'm se'mueñ Yompor atto çhore'tenes te' sañapa' çhochña se'mñoch, amachña çha se'charrtatatsto seyoçher.

Amach čha satpare'tatsche ñeñt atet pe't israelnesha' ahuat allempo chopeñe'chyese't amayo.

16 Ñaña te'pa' o'ch neyerpaterrser ñeñt atpare'tyesaye't Yompor allempo puečhore'teño'tpa' eñorana'tanete't, ñetpa' ñeñtareta ñeñtet čha'nmačha'taterr Moisés Egipto't. 17 Ñaña o'ch neyerpaterrser; ñeñt atarr atsrre'močhen entyese't Yompor ahuat ama't pa'tatsoch čharra' charohua, ñetpa' ñeñtareta ñeñtet atarr ochña'tare'tatsete't. Ñeñto'marña ñet allempopa' e'ñe alla colla'huet amayo. 18 Ñaña o'ch neyerpaterrser; ñeñt otarettatsa allempo ñetpa' ama't ahuatapa' amach amnataretterreto attoch pocsheñesho'tetpa' o'te' amesapreteretañ Yompor; ñeñtpa' ñeñtara ñeñtet atarr atparña'atsete't. Ñeñt atet otarettete't allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ. 19 Attoña yeñotenanet ñetpa' ama't puesheñarro'tetapa' amach eshcaye' čhapueto allcha' yečha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

1 Ñehua, Yomporpa' po'ñočh oteneý yečhapcha' allcha' yamesapretera allcha' e'ñe cohuen yocsha'huera Yompor ñerra'm po'ñočhcha' yame'ñera yaña. Tayepa'tña'pa' orameñ atet oteneý yaña e'ñe yemčha'naño'tpa' yame'ñyepa'ch te't puesheña'ttso'tespa' amate' sečherro saña all. 2 Tarro'mar ñeñt atpare'taye't all amayopa' aserrpare'tatarettetañaña cohuen ñoñets Yomporesho't tarraña ama huenetoña patparñet tarro'mar ama't e'metaña'pa' ama eseshaye' ame'ña'pahuoye' entaye. Yapa'čho'ña o' serrpare'taterryet yaña cohuen ñoñets Yomporesho't. 3 Ñeñteyčha' e'ñe po'ñočh ame'ñerraya Yompor ñeñteyčha'ña čherrets allcha' yamesapretera allcha' e'ñe cohuen yocsha'huera Yompor. Ñeñtña ama ame'ñetsopa' ñetpa' amach esesha' čherrtso allcha' coshapreteret Yompor. Ñeñtpa' e'ñe attecma ñeñt atet otarettata ahuat ñeñt ama ame'ñatso. E'ñe atet oteneý Yompor po'ñoñ all aquellcare't, ñeñtpa' atet oten Yompor:

Atarr atsrre'močhen nentanete't ñeñto'marña atet nena' neñoñ ñocpuet: "Ñet po'ñočh ama't ahuatapa' amach nečapaterraneto allcha' amesapreterrnet allcha' e'ñe cohuen cosha'huerrnetañ."

Attoña ñetpa' amach eseshaye' čherrtso allcha' e'ñe cohuen coshapreteret Yompor. Ñehua, ahuat Yomporpa' ña orrtate' ameseñets e'ñe allempoteñ yečcatuahuan pats ñaña enet. Ñeñtña ameseñetspa' atarr coshateneý yeyo'čhrocmañen.

⁴ Tarro'mar all po'ñoño yeñoteñ atet aquellcaret, ñeñtpa' atet oten:

O' ye'chcatuan Yompor allohuen ñeñt allpon ye'chcatyesua, po'can'cherrmatñoñapa' o' ames Yompor.

⁵ Tarraña po'pocheño all oterrerr Yompor po'ñoñ ñeñt aquellcaret, ñeñtpa' atet oten:

Ñeñt ama name'ñenayopa' amach eseshaye' cherrtso allcha' amesapreterrnet attoch e'ñe cohuen coshapreterrnet.

⁶ Ñeñto'mar yeñoteñ ñeñt e'mayeñ ahuat cohuen ñoñets ñetpa' amach eseshaye' cherrtso allcha' amesaterranet Yompor attoch e'ñe cohuen pueyo'chrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteñpa' yeñoteñ Yomporpa' ama puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ño'ch ame'ña'po' enterre', attochña ñetpa' cherretcha' allcha' e'ñe cohuen cosherret. ⁷ Ñehua, ñeñto'marña Yomporpa' onañcherran po'poñ po'yeter, ñeñtpa' o' cherr te' esheccha' ama't patantarra acheñpa' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allempoteñ atpare'chete't all amayopa' o' chap allempo atto eñosatan David. Ñeñtpa' ñeñtara ñeñt o' notuanmas:

Ñerra'm esepoch se'mueñ Yompor atto chore'tenes sañapa' chochña se'mño'ch tayepa'tña orameñ yet allempo o' chore'terres Yompor, amachña cha se'charrtatatsto seyo'cher.

⁸ Ñehua, yeñoteñ Josué ahuatpa' e'ñe chapatan israelnesha' puechemereshachno all patso ñeñt all sechete't ahuatoteñ allcha' ye'choset. Tarraña ama't chapatanetañ allpa' ama eseshaye' pocsheñesho't pueyo'chrohuen amesostsoña all. Ñerra'm e'ñech cohuen amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyo'chrohuen. ⁹ Ñeñto'marña yeñoteñ te'pa' eñallmeñ ñeñt o'patatenya Yompor ñeñtey pueyochresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'can'cherrmatño. ¹⁰ Tarro'mar allohuen erra'tsencha' cherrets allcha' amesaterranet Yomporpa' ñetñapa' amach alla es llecaterrahuete'te; e'ñe pameseño'tet cohuenpa' e'ñech eñmattered pueyo'chrohuenet atet ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames. ¹¹ Yapa'cho'ña añepa'chña ye'nen attoch ye'cherr yaña allcha' amesaterrey Yompor attochña e'ñe yocsherra yeyo'chro. Te'ñapa' ama't

puesheñarrofeyapa' amuepa'ch alla yatpare'terre'te te't ama yeçherro yanña all.

¹² Yompor errof oteney, po'ñoñpa' atarr ahuamencat ñeñtpa' ama ahuañañafe. Ñeñt po'ñoñpa' e'ñe atet etsotenan ñeñt atet muenen ña. Po'ñoñpa' allo çhocma ñerra'mrrate' cochell ñeñt atarr etsotañtaref emoto'mar. O'ch es yepata' allopa' e'ñech be'tosua ora, e'ñech pecha'tañpesuon ama't posapohuen. Atetca'ye penaña Yompor po'ñoñ e'ñech çhaponaya e'ñe yeyoçhro ama't e'ñe yecamquëñoñhuen, ñeñtcha'ña e'ñe yeñotaterre' ñeñt yeyoçhro'tsen ama't ñeñt allpon yoctape'chyen ora esocmañen. ¹³ Ama't puesheñarrofeya amach errotenot ye'potam'pesyoña Yompor ñeñt yeyeçcate'. Amate' errotenot ya'nasotam'pesyoña, ñapa' e'ñeca'ye entuennayña yeyoçher ñeñt ora allpon es yoctape'chyen. Ñapa' ñach ya'metatatuerre' allohuen ñeñt allpon yoctape'chyen.

Jesúspa' ña corneshaterrets, e'ñe metana'tuerran allohuen cornaneshachno atto atarr sherben ña

¹⁴ Ñehua, yeñoteñ eñall ñeñt Yecorneshar yepen ñeñt atarr Partseshatets, ñeñtpa' ñeñtara Jesús ñeñt Yompor Puechemer. Ñaña'pa' o' alla çherr allohuanen pue'ntaño e'ñe all Pomporesho, allña e'ñe cohuen a'pocstatennay yocop. Ñeñto'marña yapa'çho'ña allo'nepa'ch yeyemuetneña. Amuepa'chña yequeçpatstere. ¹⁵ Tarro'mar Jesús ñeñt Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyoçhro. Tarro'mar ñapa'çho'ña attecma huapoñe't allohuen pa'namen topateñets, e'ñe atet yepena ya te' çhocma huennaya pa'namen topateñets. Tarraña ñapa' ama't pa'namen huapoye't topateñets, ñapa' ama't parrocha ama ñano ñeñt ama pocteye' enteno Pompor. ¹⁶ Ñeñto'marepa'chña e'ñe yeyemteño't Yompor Puechemer, amach yen'cha'nañoteye' yeçhore'teñe Yompor ama't ñeñt atarr partsotets po'conaño. E'ñe puemuereno'tey e'ñech cohuen e'mñoteny, çhocmach yenpueny. Ñaña ñerra'm esempo huennaya ñeñtcha' yelcatene' ñachña e'ñe ahuamencat yepene'.

5

¹ Ñehua, yeñoteñ allohuen ama't erra'tsena ñeñt pa'm'cha'tareter pen ñeñt corneshatyets judioneshacop, ñeñtpa' acheña, arromñaña. Ñapa' añecop acraretta ñach anarettatsa attoch eñen acheñeneshacop Yomporesho. Allempo es apueñet Yomporpa' ñach anene' o'pono

Yompor pa'paclo. Allempo muetsenet payara ñeñt allo sherbeñet Yomporpa' ñach nene' eyarra po'rras allo tsa'tenana pueyochresha'chno po'chñar. ²⁻³ Ñapa'cho'ña ama huomencaye' enteno pueyo'chro tarro'mar ñapa' arromñaña ñeñto'marña ama e'ñe pueyochreshacpayaya nenanoña eyarra po'rras; ñeñtpa' ñocpa'naña neñ allo tsa'tenana ñaña po'chñar Yomporesho. Atto ñapa'cho'ña ama huomencaye' enteno pueyo'chro ñeñto'marña ñapa' e'ñe eñoteñ o'ch llecapretana pueyochresha' allempo es pantenet ñet ñaña allempo ye'chcatenet ñeñt sosey enten Yompor tarro'mar amaña e'ñe ñeñta neneto pueyo'chreto; 'hocmaña pueseñet Yompor.

⁴ Ñaña yeñoteñ ama't e'ñe puesheñarrapa' ama eseshaye' netso e'ñe ñañeña attoch corneshat Partsocop. Ñeñtpa' Yomporña 'chore'tene' ama't erra'tsena puesheñarr ñeñtcha'ña corneshatats. Atet pa' ñaña Aarón, ñapa' Yomporña ne' atto corneshate't Partsocop. ⁵ Cristopa'cho'ña attecma pa' ñaña ama ñaye' otatso, "napa' nach corneshatats." Pomporña ne' ñeñtcha' corneshatats attoch yecohuentateññañ. Yeñoteñ Pomporpa' atet cohuentateñ tarro'mar Yompor po'ñoñ ñeñt aquellcaret ahua't ñeñtpa' atet oten:

Papa' Nechemerep, te'ñapa' o'ch neñotach acheñenesha' po'ño'ch pa' Nechemer nepenep tarro'mar te'pa' o'ch nena'p pa'ch añcha'tarettertsa.

⁶ Po'poñ aquellcarea'pa' all otererr:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatats'e't ahua't.

⁷ Allempo allo'tsenmeñ Cristo arr patsropa' ma'yocham'psa ñañeña. Ma'yocham'psa e'ñe huomenc puellquēñesha'. Pueya'chpeñesha' enaman Pompor ñeñt atarr ahua'mencatesha' attoch a'queshpach puerromueño't. E'ñe pom'cha'na'teño'tan Pomporpa' atet och: "Amach a'ñeye' atet pe'patstano ñeñt nemnen na; añcha'ña atet pe'pon ñeñt pemnen pa." Ñeñto'marña Pomporpa' e'ñe e'mñoch. ⁸ Ñehua, Cristo ama't e'ñe Yompor Puechemerpa' ñapa'cho'ña atarr muero'chta, attoña e'ñe ye'chan attoch e'ñe cohuen e'mñotenan Pompor. ⁹ Atto ye'chan pue'mñoteñpa' ñeñto'marña e'ñe etsotuan ora attoch a'queshpataña, allochñapa' attoch a'queshpateran e'ñe poctacma allohuen erra'tsencha' e'mñoterre' ña. ¹⁰ Ñeñto'marña Pomporpa' ne' ñach corneshaterrets Partsocop e'ñe atet corneshate't ahua't Melquisedec.

Ñeñt ama huomencaye' penaye pueyoçher Yomporecop çha ottena ñerra'm ematoll

11 Ñeñtpa' orameñ shontemeñ nemneñeñ o'ch notaseñ. Tarraña ama'tcha' notaseñpa' atarr torrapo' o'ch neçhapatonas seyoçhro tarro'mar te'pa' o'huañ tama semne' ama't erra'tsenapa' o'ch se'mñoteñ. 12 Sapa' ahuañoteñ same'ñenañ ñeñto'marña te'pa' socoppa' añ poctetsañ o'ch seyçhatyeseñ po'potantañeçhno ñeñt allpon shonte' seño'tyeneñ. Tarraña sañapa' amaña atteye'ña sepeno tarro'mar sapa' teme'ttsen sepalltena o'ch alla yeçhaterrseterr Yomporecop po'ñoñ ñeñt yeçhatuaset e'ñe ñenmañ ama't ñeñtpa' ama torrapahuoyaye yocop o'ch yeñoçh. Sapa' ama huomencaye' sepeno seyoçher tarro'mar sapa' çha sottena ñerra'mrrate' ematoll ñeñt añach orren pachor pomosos ñeñt ama etsotenana' o'ch rran rreñets ñeñt yerren ya. 13-14 Ñaña yeñoteñ allohuen ñeñt añach pocrrañ pen pomosos, ñeñtpa' ematolla ama eñotenana' o'ch e'nan rreñets ñeñt çhocma yerren. Ñaña ñeñt ottetsa ñerra'mrrate' ematollpa' ama eñotenanoña Yomporecop po'ñoñ attoch pocte' eñch Yomporecop. Tarraña ñeñt po'ñoçh atet enten Yomporecop ñerra'mrrate' po'nanesha' ñetpa' e'ñech eñotenet ñeñt pocte' enten Pomporet ñaña ñeñt ama pocteye' enteno; tarro'mar ñetpa' ahuañoteñ ame'ñeret Pomporet. Ñeñto'marña ñetpa' allo'na senet etsotnomuet Yomporecop po'ñoñ ama't ñeñt atarr echarr ñeñtña e'ñe pocrrañ penet.

6

1-3 Allo'nepa'ch yesen e'ñe yeçha'nmue' Yomporecop poctapña ama't ñeñt atarr echarr. Allochñapa' yepeno' atet muenen ñapa' e'ñech po'n enteneyña Yomporecop. Ñehua, sapa' o' e'ñe seyçherr ñeñt ñenmañ yeçhataset Cristocop, attoch sequeçhpa'huerrña ñeñt atet seyeçhcatyeseñ ñeñt ama a'queshpatañeyaye. Añca'yeña o' ello soctape'cherr cohuen Yomporecop çhoca'yeña o' same'ñera. O' seño'terr ñaña ñeñt atet yapatarettena Yomporecop, ñaña atto çhocma yenen yot ñesheto ñeñt ame'ñatsa. Ñaña o' sa'yçhataretterra attoch yetanterra ñaña attoch esempohuañenpa' ya'craretterrach allohueney errotencha' entyesuerrey Yomporecop, ñato' cohuenta' ye'pa'yen, ñato' amate' cohuenaye' yepeno. Ñeñt o' yeçhatuanmaset ahuañoteñ Cristocoppa' amachña ñeñtaña alla seserrpare'tame'terre'te. Añcha'ña allo'nepa'chña yesen eñotnomue' po'poñeçhno Yomporecop poctapña ñerra'm Yomporecopa' yemnate'.

4-6 Tarro'mar yeñoteñ ñerra'm esesha' o' çhapoña pueyoçhro ñeñt cohuen enten Yompor ñaña ñerra'm o' agapan Yompor ñeñt apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquëñ ñaña ñerra'm çho yomenana Yompor po'ñoñ ñaña ñerra'm eñotuanman Yompor po'huamenc ñeñt ama ahuañañañeyaye, tarraña ñerra'm o'ch alla puerrerret, ñetpa' amach errotenot alla yoctape'chaterranete'te attoch cotape'cherret etserra cohuen Yomporecop. Tarro'mar ñeñt acheñerpa' añ toma'ntena ñeñt atarr muenene' o'ch alla corso'tañperranerr po'pocheño Yompor Puechemer; attoña o' alla achñare'tererr allo'tsa'yen shonte' acheñenesha'.
 7 Ñeñt atet petsapa' o'ch netma'ntacha ñeñt atet pena pats. Ñehua, allempo e'ñe cohuen huapotañpsatenan Yompor pats ñerra'm o'ch chepares pa'namen narmetsoçhno ñeñtcha' coshatene' pamo'mte' ñeñt nare'tene', Yomporña çhocma a'torene' ñeñt pats esheccha' pa'namen yeçhquëtsa all.
 8 Tarraña ñerra'm aña cheparsats pa'namen ajaçhno ñeñt ama cohuenayaye, ñeñtña patspa' amach es sherbeno. Yomporeshotpa' arrnomare'terrach attoch a'poyare'tterra.

Atto e'ñe yeyemteñoñ Yompor çhocmach yecuen ñeñt o'patatyenya

9 Tarraña ama't atet notensoñ masheñneshacha' sa ñeñtes atarr nemorrentena, napa' necuenes ñaña neñotenes sapa' o'ch alla sorrtyyerr e'ñe cohuenare' ñeñt atet orrtatyen allohuen ñeñtcha' qeshperrtsa. 10 Tarro'mar Yomporpa' e'ñe pocte' es pennay. Ñapa' çhocma po'ñoçh entenes ñeñt atet setorra'yena ñocop ñaña atto semorrenteññaña allohuen ñeñt pueyochresha' pen Parets. Ñeñto'marña e'ñe same'ñeñoñ ñapa' e'ñe cohuen seyepa'yeñ allohuen masheñeshachno ñeñt pueyochresha' pen ña, ama't teme'ttsen attecma sepene.
 11 Añña atarr nemnen ama't allohuenespa' allo'nepa'chña sesen orrtatyeshnomue' ñeñt cohuen enten Yompor, e'ñeçhña socsheñeshocmañen sorrtyeshuanom allohuen ñeñt cohuen enten Yompor e'ñe atet socsheñoñ çhocma seyepa'yeñ ñeñt pueyochresha' pen Parets. Attoña e'ñe seyemteñoñ Yompor secuen ñeñt o'patatenya. 12 Attochña amach çha seçllatsto Yomporecop, añcha'ña sepene samña ñeñt atet pa'yena po'potantañeçhno ñeñt pame'ñeñoñet Yomporpa' ama't erro'tuaneno'tsa'yenet ñetpa' çhocma ahuañta'huaneñet. Attochña e'ñe o'patueññañet Yompor ñeñt oteney Yompor ñeñtcha' aphuerrey.

13 Tarro'mar yapa' yeñoteñ chocmach aphuerrey ñeñt atet oteneý. Ñehua, yeñoteñ Yompor ahua'tpa' atet otane't Abraham ñeñt'cha' atet perrñañ tsapatonet po'm'renñecop. E'ñe ñañeña pa'so'chño atet otan Abraham tarro'mar ama eñalle po'poñ ñeñt atarr ahua'mencatesha' atet ñerra'm ña allcha' a'poc'tatan po'ñoñ. 14 Ñeñto'mar e'ñe ña pa'so'chño atet otan Abraham: "Na po'ño'chpa' atarr'cha' nebensare'tam'psap attochña na'm'raterrna'p ñeñt'cha' pem'reneñ peperr." 15 Ñeñto'marña Abrahampa' e'ñe pueyemteño't Yompor po'ñoñ atet oteñ ñapa' ama que'chpueñe, chocma cohuenan ñeñt atet oteñ Yompor. Ñeñto'marña Abrahampa' po'ño'ch agapater Yompor ñeñt atet oche't ahua'toteñ. 16 Ñehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ño'ch, ñetpa' o'ch otenet e'ñe añ pa'so'chño ñeñt atarr ahua'mencatesha'. Ñerra'm atet penetpa' attoña eñoteñet ñeñt ñoñetspa' o' anare'tta, o'huañ'cha' allo'na otnare'tanna'tnenet po'ñoño'maret. 17 Yomporpa'cho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñeta'm'perryeña po'ñoñ, allohueney ñeñtey o'patatena ñeñt atet oteneý o'ch apuerrey. 18 Ñeñto'mar yeñoteñ Yomporpa' e'ñe epoch eñotateney e'ñe po'ño'ch atet'cha' perrnay, ñaña Yompor po'ñoñpa' ama choye' shequënye. Ñeñto'marña e'ñe yeyemteño't ñapa' yeñoteñ po'ño'chpa' a'ques'hpatuerrey'cha' ñeñt atet oteneý. Ñeñto'marña yecueñ ama't allohueney ñeñtey e'nene' ña ñachña ya'ques'hpatuerre'. 19 Ñeñto'marña yeñoteñ ñeñt yecuen ya o'ch a'ques'hpatuerrey Yompor ñeñt'pa' e'ñe po'ño'ch, ñeñt ama ahuañañayaye. Ñeñto'marña yeñoteñ e'ñe yeyemteño't ña yecamquëñña'pa' e'ñe cohueno'tsen amach erro'teno't chenquërro. Yeyemteño't Yompor ñeñt'pa' añ toma'ntena ñeñt orrene' barco oño ñeñt otenet ancla. Allochña barcopa' amach erro'teno't chenco. Ñeñt atto yeyemteña Yompor ñeñtña anclatetsña yecamquëñecop ñaña ñeñt'pa' e'ñe po'ño'ch allo e'ñe huomenc orrena yecamquëñ tarro'mar ñeñt'pa' Yomporesho't anare't e'ñe allohuanen ñeñt allo'tsen Parets pa'paclo pue'ntaño, e'ñe allohuanen allo'tsen besom allo yotta'm'peññañet Parets po'poner. Allca'yeña anare'ttenaña ñeñt toma'ntenaya ancla atto ya yeyemteña Yompor. 20 Tarro'mar e'ñe all Partseshopa' allña o' cherrña Jesús ñeñt o' otam'perrya allcha' a'poc'tatosnay e'ñe cohuen yocop Pomporesho. Allña'pa' o' corneshatuerr Partsesho. Atto o' corneshatuerr ñeñt'pa' amach huañerro ama't errponaña. E'ñe atet o' allsensare'tterra o'ch corneshatuerr ñerra'm'rate' atet corneshate't ahua't Melquisedec.

7

Jesús pa' atarr cohuen corneshatos Partsocop atet corneshate't ña'ña Melquisedec Partsocop ahua't

¹ Ñehua, te'pa' o'ch alla neyerpaterrsa ñeñt atet pe't ñeñt corneshatats'e't ahua't ñeñtpa' añ pa'so'cheñ Melquisedec. Ñapa' ñeñt corneshatats'e't Partsocop ñeñt atarr partsotets. Ña'ña ñapa' ñeñt añcha'tarettats'e't all anetso ñeñt pa'so'cheñ Salem. Allempopa' correna ña'ña yatañ Abraham. Parrochña Abrahampa' ahua' allcha' quellarenana' po'potantañe'chno ñeñt añcha'tare'tetyetsa allo'mar. E'ñe a'mchechuahuenaneta'pa' huerra. Allempo err, toñopa' all poctapueñ cornesha' Melquisedec. Allña pocteñpa' allenta bensare'tam'psapueñan Abraham. ² Ora ñeñt allpon yoram'psan ñeñt o' quellara'huena'pa' allempoña Abrahampa' aphuenan cornesha' Melquisedec allpon ñeñt Partsocop. Allpon aphueñpa' ñeñtpa' ñeñt allpon otenet la décima parte. Ñeñtpa' atet ñerra'm es eñall ñeñt yechen çharrapa'ttso'cma, pate'tetsñapa' o'ch yeneñ e'ñe Partsocop. Ñehua, ñeñt so'chñets'er Melquisedecpa' añ otenet "ñeñt pompor pen allohuen añcha'tarete'chno ñeñt e'ñe pocte' enten Parets." Allo'tpa' ña'ña ñapa' arr añcha'tare'ttena anetso añ pa'so'cheñ Salem. Ñeñt anets'er pa'so'cheñ añ otenet "muechet'teñtsompañio" tarro'mar all añcha'tare'ttena ñapa' ña orrtatene' e'ñe cohuen morrentanna'teñets attoña yechenet e'ñe cohuen muechet. ³ Ñeñt Melquisedecpa' ama eñotpahuoyayeña ñeñt pompor pe't ña'ña ñeñt pachor pe't tarro'mar ama aquellcare'teyaye ñeñt pa'so'cheñ. Ña'ña ñeñt pa'tañneshañ pe't ñeñtpa'çho'ña ama eñotpahuoyaye. Ama't ña'ña allempoteñ eñalleta Melquisedec ama't ña'ña allempo rroma ñeñtpa'çho'ña ama eñotpahuoyaye. Ñapa' tarro'mar atet pe't añ toma'ntena ñeñt Puechemer pen Parets. Ñeñto'marña atto corneshaten ñeñtpa' amach huañerro ama't errrona'ña.

⁴ Señoche'pa'ch cornesha' Melquisedec ñapa' atarr sherben. Ama't yatañ Abrahampa' çhocma es apane't Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yoram'psan ñeñt o' quellara'huena'. Allpon aphueñ ñeñt atet ñerra'm çho es yenen Partsocop ñeñtpa' atet ñerra'mrrate' ñeñt allpon es yechyen e'ñe çharrapa'ttso'cma, pate'tetsñapa' o'ch yeneñ e'ñe Partsocop. ⁵ Ñehua, yeñoteñ levína'tarnesha'pa' ñeñt'ena'tarña anarettats'e't judioneshacop ñeñt'cha' corneshatets Partsocop. Ñocpuetña nanña Moisés po'ñoñ, ñeñtña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña

allponapa'tets ñeñt Partsocop, atet ñerra'mrrate' ñeñt allpon yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop (ñeñtara otenet diezmo). Ñeñto'marña çhocma cobreñetña pamo'tsesha' ama't e'ñe ñeñtana'tarecmuet, tarro'mar Abrahampa' ñeñtara pa'to' pohueñet allohuenet. ⁶ Tarraña Melquisedec ama't ñapa' ama levína'tarneshayaye ñaña'p' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñtcha' aþ Partsocop. Elloña bensare'tamþenan Abraham ama't Abrahampa' o' otue Yompor ñach bensare'tamþse'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.) ⁷ Ñehua, yeñoteñ po'ñoçh ñeñt atarr nanac añcha'tarettetsa ñapa' ñachña bensare'tamþene' po'potantañeçhno ñeñt ama tama añcha'tarettetso atet ñerra'm ña. Ñeñto'marña yeñoteñ Melquisedecpa' atarr sherben tarro'mar ama't añcha'tare't Abrahampa' ñapa' ello bensare'tamþeñ. ⁸ Ñeñt yenten arr patsro ñeñt corneshatets Partsocop, ñetpa' arromñañota atet penet. Tarraña ama't arromñañota atet penet çhocma aguëññañet acheñenesha' ñeñt apa'yenet Partsocop. Melquisedecpa'çho' ñaña agapaye't ñeñt apa'yesete't Partsocop. Tarraña Melquisedec ñeñt atet anare't Yompor po'ñoño ñocop ñeñtþa' atet oten ñerra'mrrate' ñapa' ama arromñañeshayaye. ⁹⁻¹⁰ Ñehua, ñato' o'ch yot Leví ama't allohuen pue'ñareshohuen, ñeta'ñaña agapanþsanet Melquisedec ñeñt allpon apueñet Partsocop e'ñe allempocma agapan ñeñt aþ Abraham Partsocop. Ama't ama eñalletena' Leví allempopa' te'pa' o'ch yot ñapa' e'ñe pa'to' Abraham po'chtso'tsen allempo, allempo pocten Melquisedec. Ñeñto'mar te'pa' o'ch yot levína'tarnesha' ñeñt po'taruas pene' o'ch cobran acheñenesha' attoch allpon apa'yenet Partsocop, ñeta'netepa'tña cobra'ña allempo Melquisedec. Ñeñto'marña yeñoteñ Melquisedecpa' atarr sherben, ello metana'tuenan levína'tarnesha' ñeñt corneshatyets Partsocop.

¹¹ Ñehua, yeñoteñ ahuat allempo aparetta israelnesha' ñoñets ñeñt atet anare't, ñeñtþa' añ orrtate' levínesha' ñeñt corneshatyestse't ahuat Partsocop. Tarraña añ ñoñets ñeñt orrtat cornaneshachno ñeñtara levínesha'pa' ñeñtþa' amach errotenot a'cohuentaterranetoña Yomprecop. Ñerra'm po'ñoçhcha' a'cohuentatenyeñ amate' eso'mar huapoña Cristo ñeñtcha' corneshatosets ello ñeñt atet corneshate't Melquisedec, ñeñtþa' ama atteye' corneshatoso ñeñt atet corneshaten Aarón ñeñtara levína'tarnesha'. ¹² Ñehua, yeñoteñ ñerra'm esempo Yomporpa' orrtaterran po'psheñeñ

ñeñtcha' corneshaterrets po'poñonet, yeñoteñ añ ñoñets ñeñt atet anaret ñeñt orrtat cornaneshá' levína'tarnesha' ñeñt ñoñtsorpa'cho'ña o'ch cha po'poñetuerr. ¹³⁻¹⁴ Yeñoteñ Yepartseshar Cristo ñeñtña otenña Yompor po'ñoñ ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoroñ eñalleta, ñeñt po'poñ mereñtsor ñeñtara israelena'tar. Ñetpa' ama anareteyayeto o'ch corneshatet Partsocop ñeñt atet anarettá levína'tarneshacop. Moiséspa' ama esoye' sochaneto ñocpuet ama't puesheñarroña attoch corneshatet. Ñaña ñetpa' ama't puesheñarroñeta ama eseshaye' tetso altaro allotecma sherbeñet Parets.

¹⁵ Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempo orrta Cristo, ñach corneshaterrets atet anarettet Melquisedec. Ñapa' ama atteyaye ñerra'mrrate' atet anarettet levína'tarnesha'. ¹⁶ Atto corneshatos Cristo ñeñtpa' ama añecpayaye attoch allo'na corneshatnen levína'tar ñeñt atet anarettenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñt ama arromñañeshayaye ama't erponaña. ¹⁷ E'ñe Cristocop eñotateney añ ñoñets ñeñt atet anaret Yompor po'ñoño, ñeñtpa' atet oteñ Pompor:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt corneshatatset ahuat.

¹⁸⁻¹⁹ Ñeñt ahuatoteñ ñoñets ñeñt atet nonaye't Moisés ñeñtcha' atet yepohueneñ ñeñtña te'pa' o'huañcha' ye'cua'per tarro'mar ñeñtpa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrtternaya po'poñ ñeñtña' ello atarr sherben ñeñtcha' ya'cohuentaterre' Yomporecop esheccha' yecherr Yomporesho ñeñtcha'ña atarr yeyemterraña te'.

²⁰ Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets errponañohuen.

²¹ Po'potantañechno ñeñt corneshatyets ñeñtara levína'tarnesha' allempo acornesha'tareteyaset ñetpa' ama Yomporeye' nahueto pa'so'chño attoch corneshatyaset. Tarraña Cristo allempo allsensarettá attoch corneshatos, ñeñt eñoraten Yompor Cristocoppa' ñeñtña' atet oten:

Yompor o' nan po'ñoñ e'ñe ña pa'so'chño ñeñto'mar amach errotenot a'po'poñetuerrano po'ñoñ; (ñeñtpa' atet ot Cristocop): "Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o'

pa'llsensare'tterra atet ñerra'm Melquisedec ñeñt cor-
neshatate't ahuat."

22 Ñeñto'marña Jesúsapa' eñotochtaterrnay po'ñoch atto
Yomporpa' a'pocdaterrnay etserra ñeñña atarr sherbets, ello
o' metana'tuerran ñeñt atet a'pocdatonaye't ahuat. 23 Ñeñt
ahuatoteñ cornaneshachno ñeñtara levína'tarnesha', ñetpa'
epaye' shonta'nmuet tarro'mar chocmach rromayesete't
attoña o'huañcha' allo'na corneshatyenesnet. Ellopa'
o'chcho' huapa po'psheñeñ ñeñtara levína'tar ñeñtcha'
alla corneshaterrets. Ñeñto'mar epaye'shonta'nma ñeñt
corneshatyenesnomtse't ahuatoteñ. 24 Tarraña Cristopa'
errponañohuencha' corneshaterr tarro'mar ñapa' ama
arromña'eshayaye. 25 Ñeñto'mar Cristopa' ña eñotene'
attoch chocma a'queshpátenan allohuen ñeñt e'nene'
Yompor ñerra'm e'ñe pueyemteño'fet ña, tarro'mar ñapa'
chocma allo'tsen Pomporesho allecma a'pocdatennay ñeñt
e'ñe cohuen yocop. 26 Ñeñtapa' e'ñeca'ye pocte'ña yocop
o'ch yechen Yecorneshar ñeñt Cristo tarro'mar ñapa' e'ñe
cohuen Parets, ama eñalle po'chñar ama't mamesha ñeñtcha'
a'sosyatene'. Ñapa' o' sohanerran allohuen ñeñt cotene'
sosya'tsañ o' alla cherr allohuanen Yompor pue'ntañño
allña partsotapretenan Pompor. 27 Ñapa' ama atteye' p'oso
ñerra'm po'potantañ cornaneshachno ñeñt ahuatoteñ. Ñet
pate'tets yetpa' epaye' muetsete't payarachno; ñeñt eyarra
po'rraspa' alloña peretnatane'tña cornaneshachno po'chñar.
Ellonetpa' o'ch peretnateñet ñaña allohuen acheñenesha'
po'chñar ñeñtara eyarra po'rroso. Tarraña Cristo ñapa'
e'ñe parrocha shatan e'ñe ñañeña po'rros allohuenacop
ochñartsocop allempo rroma yocop e'ñe ña puemnenño't;
ñeñtapa' attoña tsa'tuerrnaya yo'chñar Pomporesho. 28 Moisés
ñeñt atet nan ñoñets ahuatpa' ñeñtapa' acheña na'yés
ñeñtcha' corneshatyeesets atteta ñerra'mrrate' ya ñeñtey
ama cohuenacmaye' es petso. Tarraña allempo met allpon
charpa' allempoña Yomporpa' o' alla nerran po'ñoñ e'ñe
ña pa'so'chño. Allempoñapa' nerran Puechemer ñeñtcha'
corneshaterrets ñeñt e'ñe cohuenare' es pa'yets Partsocop;
ñeñtapa' amach huañerro ama't errponaña. (Ñeñto'marña
Cristopa' e'ñe etsotuan ñeñt nanac sherbets.)

8

Jesúsapa' ña a'pocdatañterrtsa e'ñe etserra yocop

1 Ora allpon ñeñt o' notuanmas ñeñtapa' e'ñe po'ñoch atet
notenes: ñeñt atto atarr sherben Cornesha' Cristo te'ña ñapa'
o' alla anorruerr Parets po'cohuenrot all anen po'conañño

all pue'ntaño. Allñapa' o' alla partsotuerr ñaña. ² Allñapa' o' atarr sherba'huerr e'ñe allohuanen Parets po'prahuo all e'ñe po'ñoçh allo'tsen Yompor. Ñeñtpa' ama atteyaye ñerra'm patso'mar puerahua' ñeñt tomaten acheñ. Allpa' Yomporña tomatene'ña po'prahua' e'ñe ña pue'ntaño. ³ Yeñoteñ allohuen ñeñt corneshatets Partsocop, ñetpa' añecopña anare'ttenet attoch ñetcha' es apuenet Yompor ñaña ñetpa' o'ch muetsenet payaraçhno Yomporecop attoch peretnatenet po'chñaret. Ñeñto'marña Cornesha' Jesús, ñocoppa'çho'ña e'ñe pocte' o'ch es apan Pompor. (Ñeñtpa' año apuerran Pompor e'ñe ñañeña po'chets attoch rroma yocop.) ⁴ Ñehua, ñerra'm ñapa' allo'tsenaraña añe patsropa' ama't mamesha amate' pocteye' enteññeña ñeñt cornaneshatyets añe patsro, tarro'mar ñetpa' añach e'ñe cohuen entenet o'ch es apueñet Yompor ñeñt e'ñe atet nanete't Moisés po'ñoñ. ⁵ Ñeñto'marña yeñoteñ ñeñt atet sherbenet ñet ñeñtpa' atta toma'nteñet ñeñt atto po'ñoçh Cristo e'ñe cohuen sherben Parets po'prahuo ñeñt pue'ntaño'tsen. Añach sherbenet ñeñt attema'ttetsa ñeñt e'ñe po'ñoçh atet muenen Yompor. Yeñoteñ ñeñtecma sherbete't tarro'mar ahua't allempo Moiséspa' ahua'ch tomataneñ ñeñtcha' po'prahua' pa' Parets arr patsro, all aspeno Yomporña gate' ñeñt toma'ntenaya e'ñe ña po'prahua' ñeñt pue'ntaño'tsen. Allempoñapa' atet otan Moisés: "Po'ñoçhpa' e'ñech atet peyeçcaton ñeñtcha' neprahua' nepa' añ patsro allcha' yeçhena Necamquëñ." Arrpa' allohua atet otan Yompor Moisés. ⁶ Tarraña Cornesha' Cristo te' atto sherberr all pue'ntaño, ñeñtpa' e'ñe po'ñoçh poctacma cohuen. Ello metana'tuenan ñeñt atet sherba'yese't ahua'toteñ cornaneshaçhno arr patsro. Tarro'mar te' ñeñt atet o' a'poctaterrnay Pomporeshopa' ñeñtña e'ñe poctacma cohuen yocop, tarro'mar añ a'poctateñetspa' pa'namen oteney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'poctatyeñe't ñeñt ñenma't allempopa' amach palltenañe o'ch alla a'poctaterryeterr e'ñe ello etserra. ⁸ Yeñoteñ ñeñt ahua't a'poctateñetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelneshá'. Tarro'mar po'ñoñpa' atet oten ñeñt aquellcare't ñeñtpa' atet ot Yompor:

Chapcha' allempoch nenerrerr po'poñ neñoñ israe-lena'tarneshacop ñaña judána'tarneshacop, ñeñtpa' allochña na'poctaterranet e'ñe cohuen etserra.

⁹ Ñeñtpa' amach atteyaye ñerra'm ñeñt atet na'poctatanet ñenma't pa'tañeshañ allempo nerraneta' Egipto't e'ñe cohuen na nehuamencot. Tarro'mar

allempto ñetpa' ama atteye' p̄oneto ñeñt̄ atet̄ nenanet
ñeñt̄cha' a'p̄octatahuetañ. Ñeñto'mar napa'cho'ña atta
na'ȳpo'ñanet. Ñeñt̄pa' atet̄ ot Yompor allempto.

10 Allemponapa' o' alla oterrerr Yompor ñeñt̄ara:

Esempohuañenpa' o'ch alla na'p̄octatererr po'poñ ñeñt̄
israelena'tarneshacop. Ñeñt̄pa' atetcha' neperranet
allempto esheccha'ña neçapaterranet neñoñ e'ñe ñet
pueyoçhreto, ñeñt̄pa' ñato' o'ch netma'ntacha atto
neñoñpa' o' aquellcarterret e'ñe ñet pueyoçhreto
ñeñt̄cha' cotape'chaterrahuetña e'ñe cohuen.
Allempona po'ñoçhpa' e'ñech Po'yomporer perrnet,
napa'cho'ña e'ñech neyochrenesha' neperranet ñamet.

11 Ñaña allempto allohuenetpa' e'ñech eñotuerrnanet
ñeñt̄cha' atet̄ noctape'chaterranet cohuen
pueyoçhreto. Allohuenetpa' e'ñech attecma eñoterrnet
pomporneshohuenet ama't ñaña añeñolleshohuen
ama't ñeñt̄ atarr sherbets ama't ñaña ñeñt̄ ama esoye'
enteñeto. Ñeñto'marña allempto ñeñt̄ añcha'na'tpo'
entetsapa' ama pallteno o'ch yeçhatan po'potantañ
pamo'ts ama't ñaña pa'mo'nasheñ. Amach esesha'
oterrahuete'te te'pa' añ p̄octetsa o'ch señoter Yompor,
tarro'mar allemppa' o'ch e'ñe eñotuerrnet.

12 Ñaña napa' e'ñe nemuereñoñanetpa' nepretnerranetcha'
po'chñaret, amach alla neyerpuerranete'te po'chñaret.
Arrpa' allohua atet̄ ot Yompor ahuat̄.

13 Ñeñto'marña yeñoteñ ñeñt̄ atto Yomporpa' all oten
e'ñe etserra o'ch a'p̄octaterrey, ñeñt̄pa' tarro'mar ñapa' o'
a'ȳpo'ñerran ñeñt̄ attoch ñanom a'p̄octatyeyñ. Ñaña ñeñt̄
ahuat̄oteñ a'po'tateñets te'pa' o' a'ȳpoeñare'terra, ñeñt̄pa'
huañerrcha'.

9

*Ñeñt̄ patso'mar Yompor po'prahua'pa' añ toma'ntateññañet
ñeñt̄ e'ñe ña pue'ntaño'tsen po'prahua'*

¹ Ñehua, yeñoteñ ñeñt̄ atet̄ a'p̄octatanetañ ahuat̄ Yompor
ñeñt̄pa' echenan ñoñets anaret̄ ñeñt̄cha' atet̄ sherba'yaset
Parets. Ñaña arrcha' e'ñe etsotetña ñeñt̄ Yomporecop e'ñe
ña po'prahuo, ñeñt̄ puerahua'pa' ama't acheña tomatene'
arr patsro. ² Ñehua, ñeñt̄ puerahuat̄atset̄ ahuat̄ ñeñt̄pa'
shetamtsopo'. Ñeñt̄ tomatenet ñehuapo'tpa' ñeñt̄ otenet Part-
sopahuesho allo'tsen all orratenet huerare ñaña allo'tsen
mesa allecma nenet pan Partsocop. ³ Allohuanen allo-
hua ayottam̄psaret̄ besmo po'ppahueñ shetamtsopo' ñeñt̄

otenet, E'ñe Partsopahuesho Po'ponro. ⁴ Allñapa' allo'tsen altar, enoññapa' allecma a'crratenet tsach puese' ñeñt atarr eñmosařtetsa Partsocop; ñeñña altar eno'marpa' e'ñe cohuen orotattena. Ñaña allohuanen po'ppauño allo'tsen tsapot; ñeñtpa'cho'ña eno'marpa' orotaten. Allña añño'tenet mapuet-tall allo aquellcareř Yompor po'ñoñ ñeñt a'pocstat Yompor ahuat acheñenesnacop. All añño'tenet ñaña pajo' orotaten, allña esha'tareř coñe't maná ñaña tsapoto allo'tsen Aarón po'carr ñeñt tapa'llatse't ahuat. ⁵ Tsapoto enot all ten epsheña mellañoñeñma't ñeñt ayečhcatareř ñeñt otenet querubín ñeñt toma'ntenaya Parets po'partsoña ñeñt chorrets all. Querubín pa'pa'yopa' alloña ca'matenan tsapot enot allot e'tampenet tsapot. Allñapa' allecma peretnanete't Yompor po'chñaret. Ñehua, te'pa' o'ch noterrser po'poñečno ñeñt pa'namen atma'ntatareř all.

⁶ Allpa' pa'namen añño'tareřetyetsa ñeñt all puerahuo. Ñaña ñeñt cornaneshatyets Partsocoppa' čhocmach be'tosyenet ñeñt all puerahuo ñehuapoř, allcha'ña etsotayenet ñeñt atet anareř Partsocop. ⁷ Tarraña ñeñt allohuanen po'ppahueñ Parets po'poner ama eseshaye' be'tetsoña all. Allpa' añach be'tets puesheñarr cornesha' ñeñt pa'mcha'tareter pen po'potantañ cornaneshachno. Ama't ñapa' pařerr charpa' e'ñech parrocha be'ten. Ñaña čhocmach anman eyarra po'rras alloch peretnenanet Yompor po'chñaret. Ñeñtpa' e'ñe ñocpa'na po'chñarecop ama't ñaña allohuen acheñenesha' po'chñarecpuet. ⁸ Ama't ñeñt ñehuapoře'tsen puerahua' allecma sherba'yen cornaneshachno ñeñt atet anareř Partsocop, tarraña e'ñe allohuanen Parets po'ponro añach be'tets ñeñt nanac corneshatets e'ñe ñapueř. Ñeñto'marña te'pa' Parets Puecamquēñña yeñotatene' atto ama atoramřsareřeyayye allohuenacpay attoch yečhapañpeña Yompor all partsoten. ⁹ Ñeñt allempopa' aña toma'tena ñeñtcha' atet cohuen řosa tsapařoneř Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuñetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ pocpařña ñeñt atet sherbenayeñ Yompor. ¹⁰ Tarro'mar ora atet anareřtet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñaña ñeñtcha' orrenet ñaña atto apa'yeseře't Partsocop. Ñeñt orapa' añecpa sherbe't attoch a'pocstatenet po'chets Partsocop. Ñaña ñeñtpa' mamecpa anareřta esempohuañeñña Yomporpa' orrtaterrnaycha' po'poñ

ñeñtcha' ello nanac yesherberre'.

11 Ñeñtpa' e'ñe tarremphua e'ñe etsoterra allempo huapa Cristo, ñeñña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partso pahuesho all pue'ntaño ñeñña ello nanac sherbets Partso cop. Ñapa' e'ñe metana'tuerran ñeñt sherba'yestse't ahuat puerahuo Partso cop ñeñt tomaten acheñ arr patsro. Tarro'mar ñeñt Parets po'prahua' ñeñt pue'ntaño'tsenpa' ama acheñeye' tomatenaye ñaña ñeñt pa' ama aña patsroye' atomatareyaye. 12 Ñaña Cristo allempo be'tosuerr allohuanen Partso pahuesho ñeñt pa' e'ñe parrocha be'tosuerr all pue'ntaño. Ñaña ñapa' ama añeye' anmo eyarra po'rras — cabra amapa' huacshetoll. Ñapa' e'ñe ñañaña po'rras pomhuerr. Ñaña ñapa' e'ñe parrocha pomanña po'rras all ama't allohuen pa'namen acheñeneshacop po'chñarecop. Attoña e'ñe cohuen a'pocatonay attotcha' a'queshpaterrey, ñaña ñeñt pa' amach ahuañañaterra ama't errponaña. 13 Ñehua, yeñoteñ ñeñt atto shellcapechyesane't cornesha' acheñenesha' cabra po'rraso amapa' huaquesh po'rraso amapa' huacshetoll po'tsapñero ñeñt a'poyenet altaro, ñeñt pa' attoña a'pocatenan ama't erratsena acheñer po'chets Partso cop, ama't erroteno a'sosyatena Partso cop. 14 Tarraña ñeñt pa' e'ñe po'chtsochaya a'pocatarettenet Partso cop. Tarraña allempo ashataretta Cristo po'rras, ñeñt pa' ellonet añecopña nanac sherbos attoch a'pocaterrenay ama't ñeñt atet yoctape'chyen yeyochro. Ñeñto'marña allempoteña' amach alla yeyemtererro ñeñt atet yeyeçcatyen arr patsro ñeñt ama a'queshpatañeyaye. Añcha'ña e'ñe cohuen yesherven Yompor ñeñt ama arromñañeshayaye. Cristopa' ñeñto'marña ello atarr sherbeney atto pomuerra ñañaña o'ch rroma yocop ama't ñapa' ama eñalle po'chñar ama't e'ñe mamesha. Ñeñt pa' e'ñe Yompor Puecamquëñoñ atet posa; ñeñña Camuecñetserpa' ama ahuañaño.

15 Atto Jesucristopa' ña eñosets yocop attoch a'pocatuerrnay e'ñe cohuen etserra. Tarro'mar allempo rroma Cristo ñeñt pa' añecopña sherben attoch peretna'huerrnay yo'chñar ñeñt o' allpon yepohuen ahuatoteñ allempoteñ yocta'nom ñeñt ñanom a'pocatañtatsañ. Allochñapa' allohueney ñeñtey o' ya'hua'ñare'terra o'ch yame'ñera, ñapa' aphuerreycha' ñeñt o'patatenya ñeñt atet oteney attochña yapa' corretsayach errponohuañen. 16-17 Ñehua, yeñoteñ arr patsro çhocma

eñall puesheña'tets acheñ ñeñt atet petsa o'ch quellca'nman ñoñets all oten ñeñtcha' allpon puechatsrečno apa'nman pamo'tsesha' ñerra'm esempoch rroma. Tarraña allempo orameñ correna ñeñt quellquene' e'ñe ña po'ñoñ, añña ñeñt o'patatyenapa' amach errotenot amnatareteto o'ch yoret e'ñe allempocma. Tarraña ñerra'm esempoch eñoteñet po'ñoñch o' rromuen ñeñt o'patatenahuet, allempoñapa' aparetetyesetcha' ñeñt allpon o'patataretetyenet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt allpon o'patatyenya yañña ñeñt'pa'cho'ña e'ñe yocma.)¹⁸ Ñeñto'marña ahuañ allempo ñenmañ a'pocstatete't Partsocop, ama't allempopa'cho'ña o'ch muetset eyarra, po'rrasoñapa' allochña shellcata'tyeset. Ñeñt'pa'attoña e'ñe a'pocstatete'tña po'ñoñ.¹⁹ Ñehua, Moisés'pa' atet pa' allempo. E'ñe eñotatuan acheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran carrnero pue'ch ñeñt e'chomaret tsama'to ñeñt'ña' huanquë' hisopoch puetacro, alloñña' yoran ñaña huacshetoll po'rras ñaña cabra po'rras, tsech epuet oñ. Allña e'choman carrnero pue'ch ñeñt huanquën tsachpo' allempoñapa' shellcata'tan allo libro ñeñt all anaret Yompor po'ñoñ, attoña shellcana'tam'pesuan ñaña allohuen acheñenesha'.²⁰ Allempoñapa' atet otan acheñenesha': "Añ po'rras ñeñt'pa' alloña Yomporpa' a'pocstatennas ñeñt atet nenan po'ñoñ socop ñeñtcha' atet seña."²¹ Ñaña attecma pa' ñaña puerahua' ñeñt shetamtsopo' o' shellcapo'ch ñeñtara errasatso. Ñaña ora allpon coymečno ñeñt allo'tsa'yen allecma sherbeñet Parets, ñeñt'pa'cho'ña e'ñe shellca'ta'tue.²² Ñehua, yeñoteñ ñeñt atet oten ñoñets ñeñt atet anaret, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'taretta eyarra po'rraso. Ñeñto'marña yeñoteñ ñerra'm ama es muetseneto attoch shatatoñet po'rraspa' amach eseshaye' a'pretnaretsetso po'chñaret.

Atto amtsaretta Cristo yo'chñarecoppa' attoña e'shohuerrnay yo'chñar

²³ Ñeñto'marña yeñoteñ añe patsro puerahua'pa' eyarra po'rrasoña a'cohuentatyenetña allohuen ñeñt Partsocop. Ñeñt puerahua' añ patso'marpa' añ toma'ntena Parets po'prahua' ñeñt pue'ntaño'tsen, ñeñt'pa'cho'ña attecma errasatso a'cohuentatarettena allohuen ñeñt allpon allo'tsa'yen. Tarraña ñeñt rromats Parets po'prahuacop

ñeñt pue'ntañ'o'tsen ñeñt'pa' añ muenen errasats ñeñt ello atarr cohuen sherbets. ²⁴ Ñeñto'marña Cristopa' ñeñtecopña rroma. Tarro'mar Cristopa' ama arreye' be'tosuerro ñeñt patso'mar puerahua' ñeñt yečcaten acheñ ñeñt atta toma'ntenaya Yompor po'prahua' ñeñt pue'ntañ'o'tsen. Allña be'tosuerrña Cristo Parets po'prahuo ñeñt pue'ntañ'o'tsen ñeñto'marña te' ñapa' allo'tsen e'ñe allohuanen Yomporesho allña torra'huerra cohuen yocop. ²⁵ Ñaña Cristopa' ama atteye' p̄oso atet pena cornaneshachno ahuat. Ñetpa' chocma be'tosete't allohuanen Parets po'ponro e'ñe pate'tets char. Ñaña errasats ñeñt'cha' anenet o'pono ñeñt'pa' ama ñetoyaye po'rraset. ²⁶ Tarraña Cristopa' e'ñe parrochepa anaret o'ch pomuerra ñañeña o'ch rroma attoch ashataretta po'rras. Tarro'mar ñerra'm ama atteye' anareteñepa' chocmate' rromame'tañ ama't tarrempoten allempoten e'ñe errte' ayečcatarettsa pats. Tarraña ñeñt'pa' ama atteye' p̄o. Ñapa' añecopña huapa attoch e'ñech parrocha amtsaretta allohueney yo'chñarecop attoch ñachña yahuanmanperre' yo'chñar. Ñeñto'marña huapa allempohuach cherr yet allempoch mellapoterrmocha. ²⁷ Yeñoteñ ama't allohueney acheñey chocmach yerromuen. Tarraña e'ñech parrocha yerroma allempoñapa' o'ch huernaya attoch Yomporpa' eñotatyesuerrey e'ñe errotentcha' entyesuerrey — ñato' e'ñech cohuen entyesuerrey amapa' ñato' amach cohuenaye' entyesuerrye. ²⁸ Attecma p̄a ñaña Cristo e'ñe parrocha rroma allempo amtsaretta allohuen ochñartsocop. Attoña ñapa' e'ñe ahuanmanperrey shontey allohueney yo'chñar. Ama't amtsarettañ ochñartsocop, tarraña Cristopa' allach orrterra po'pocheño. Allempoch huerra po'pocheño'pa' po'cohuenño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'qeshpatuerran allohuen ñeñt chocma cohueney' ña.

10

¹ Ñeñto'marña yeñoteñ Moisés po'ñoñ ñeñt atet anaret ahuat judioneshacop, ñeñt'pa' ama e'ñeye' cohuenteno ñeñt atet cohuentena te' ñeñt orrtatosnay Cristo. Añ ñoñets ñeñt atet anaret ahuat ñeñt'pa' aña toma'ntena ñeñt'cha' e'ñe po'ñoč cohuenetuerrtsa ñeñt'cha' orrterrtsa tsapatonet. Ñeñto'marña añ ñoñets ñeñt atet anaret ahuat ñeñt'pa' amach errotenet a'cohuentatanoña acheñenesha' ama't puesheñarra ñeñt muenenayeñ o'ch yemtenanañ Yompor. Ama't chocma muetsa'yesetañe't eyarračno po'chñarecop e'ñe atet oteneñ añ ñoñets ñeñt atet anaret, ñeñt'pa'

amach errotentō e'ñe a'cohuentatanoña acheñenesha'. Ama't pate'tets char chocma muetsa'yesetañe't ñeñt Yomporecop, ñeñtpa' ama e'ñeye' a'cohuentatane'teña acheñenesha' Yomporecop ama't puesheñarra ñeñt muenenayeñ o'ch yemtenanañ Yompor. ² Ñerra'm e'ñe po'ñoçh a'cohuentatenaneñña acheñenesha' eso'marte'ña o'ch alla muetsereterrña po'poñeçhno shonte' eyarra. Ñerra'm po'ñoçh a'cohuentatenaneñ acheñenesha' ñeñt atet cotape'chyene' sosya'tsañ pueyoçhreto, eso'marte'ña alla yerpapa'taterranete'tña po'chñaret ñeñt pueyoçhro'tsa'yenet. ³ Tarraña po'ñoçh epaye' yerpapa'taterranete'tña po'chñaret. E'ñe pate'tets char allempopa' o'ch alla muetsereterr eyarraçhno añecop ñeñt atto yerpapa'taterraneterr po'chñaret. ⁴ Ñeñto'marña yeñoteñ eyarra po'rraspa' amate' errotentō ahuanmamñperryeña yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompōr allempo acheñetos arr patsro ñeñtpa' atet ot:

Pa te'pa' ama añeye' pemneno eyarra ñeñt amtsarettetsa pōcop ñeñtcha' atarr pōcshatene'. Ama't ñaña ñeñt es apa'yenet pōcop. Ñeñto'marña nocop te'pa' o' peyeçhcatuerrnan nechets añ patsrecop ñeñt e'ñe atet pemnen ña, e'ñech nechso't nesherboseñ attoch e'ñe cohuen nocshateneñ.

⁶ Po'ñoçh te'pa' ama añeye' atarr pōcshatenaye atto chamuenet eyarra pōcop amapa' allempo muetsanatenet eyarra ñeñt po'chñarecquet.

⁷ Ñeñto'marña Nompore te' napa' o'ch notañ: "Napa' añecopña nohuapa arr patsro attoch netsotosnañ ñeñt atet pemnen ña, ñeñt e'ñe atet anaret peñoño nocop." Arrpa' allohua atet otan Cristo pompōr.

⁸ Ñehua, ñeñt atet ot Cristo arr ñeñtpa' atto Yomporpa' ama añeye' mueneno eyarra ñeñt amtsarettetsa ochñartsocop attoch coshateñet ña. Ama't ñaña ñeñt es apa'yenet ñocop ñeñtpa'çho'ña ama ñeñteye' e'nenno ñeñtcha' coshatene' ama't ñeñt achamareñ ñocop ama't ñaña ñeñt amtsarettetsa ochñartsocop. Ñeñt ora añeçhno ñeñt atet nane't Moisés po'ñoñ atetcha' es apueñet Yompor, te'ña ñeñtpa' ama coshatenano Yompor; atet oten Cristo. ⁹ Elloña ñapa' atet oten, "Napa' añecopña nehuapa Nompore, o'ch netsotosnañ ñeñt atet pemnen ña." Ñeñtpa' añ eñotatosey, ña a'huañatose' ñeñt ahuañoteñ atto muetsete't eyarra po'chñarecop. Attoña ñapa' nosan po'ñoñ ñach rromosets yo'chñarecop. ¹⁰ Ñeñto'marña Jesucristopa' pomosa ñañaña yo'chñarecop. Ama't parrocha

rromapa' ñeñt'pa' allohuenacpay. Atto ñapa' etsotenan ñeñt' atet muenen Pomp'or yañapa' e'ñe a'cohuentaterrey Part'ocop. ¹¹ Ñaña ñeñt' cornaneshatyets judioneshacop ñet pate'tets yet'pa' chocma tenet all altaro allotecma sherbeñet Yomp'or allecma muetsanaterretañe't eyarraçhno ñeñt' ochñartsocop. Tarraña ama't amtsarettenañpa' amach erroteno't ahuanmanoña ochñarets. ¹² Tarraña Jesucristopa' e'ñe parrocha pomuerra e'ñe ñañeña ñach amtsarettertsa ochñartsocop. Ama't parrocha rroma ñeñt'pa' allohuenacop e'ñech errponohuañenacop. Allempoñapa' o' alla anorruerr Pomp'or po'cohuenro't allña partsotuerr. ¹³ Allo'tña cohuenan allohuen ñeñt' e'moñe'tene' esempohuañenpa' a'mchechatuerranetcha'. ¹⁴ Jesucristo allempo pomuerra ñañeña, ñapa' e'ñe etsotatuerrnay attoch e'ñe a'cohuentaterrey Part'ocop. Ama't parrocha rroma ñeñt'pa' e'ñe allohuenacop ama't ahuatoteñ errponohuañenacop añecop ñeñt' pueyochresha' pen Parets. ¹⁵⁻¹⁶ Ama't Yomp'or Puecamquëñ ñeñt'pa' cho'ña eñotoçhtatennay tarro'mar ñapa' añ eñotatye't ñeñt' atet otye't Yomp'or, ñeñt'pa' atet ot:

Esempohuañenpa' napa' o'ch na'poc'aterranet po'pocheño. Ñeñt'pa' atet'cha' neperranet. Allempo esheccha'ña neçhapaterranet neñoñ e'ñe pueyoçhreto. Ñeñt'pa' ñato' o'ch netma'ntacha atto neñoñpa' o' aquell-care'tterret e'ñe ñet pueyoçhreto ñeñt'cha'ca'yeña co'tape'chaterrahuetña e'ñe cohuen.

¹⁷ Ellonet'pa' atet ote't allempo:

Napa' amach alla neyerpuerranete'te po'chñaret. Ama't ora atto at'pare'tnete'tpa' amachña ñeñña alla neyerpuerranete'te.

¹⁸ Ñeñto'marña yeñoteñ atto Yomp'orpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt' yo'chñarecop.

Te'pa' ama es paltetso yocop attoch e'ñe cohuen ye'ñorana'tera Yomp'or Parets

¹⁹ Ñeñto'marña masheñeshacha' ñaña noçhaneshacha' te'pa' yeñoteñ e'ñe poc'te' yocop e'ñe ya yeçhore'teñot Yomp'orpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñt'pa' añ toma'ntena ñerra'mrrate' o' yebe'terr e'ñe allohuanen Parets po'ponro all po'prahuo atet pe't ahuat cornanesh'a' ñeñt' be'tostse't ñapue't ñeñt' anmaye't eyarra po'r'ras all, tarro'mar te'ña atto o' rroma Jesucristo yocop, po'r'rasña ñeñt'ña e'ñe ya'poc'taterre'ña ya attoch ye'ñorana'tera ama't ñeñt' atarr

Parets. ²⁰ Po'ñoçh Jesucristo e'ñe ña po'chtsoř orrtaterrnay po'poñ etserra attoch yapa'cho'ña o'ch yeçhapanpera Yompor attoch ye'ñorana'tera. Ñeñtpa' e'ñe cohuen attoch yeyemteña e'ñe po'ñoçh. Ñeñtpa' añ toma'ntena ñerra'mrrate' Cristopa' o' çhapterrey allohua yottampeññañet besmo Parets po'ponro all po'prahuo. ²¹ Jesús te'pa' yeñoteñ ñeñtña atarr Yecorneshar yepen ñeñt çhets Yompor pa'pacillo, ñapa' allña amcha'taretetuerra Yomporepahuo añecop allohuen ñeñt pueyochreshaçhno pen Parets. ²² Ñeñto'marña e'ñe yeyemteño'tpa' amach yeñcha'naño'ayaya yeçhore'teñe. E'ñepa'chña yeñmañesha' yeyoçhrocmañen yeçhore'teñ, tarro'mar Cristo po'rراسoña o' a'cohuentaterrnay yeyoçher atto te'pa' o' e'ñe cohuen yoctape'chyerr, amachña allo'na yerpapa'tatnenye yo'chñar. Ñeñtpa' añ toma'ntena atto yapa' e'ñe cohuen apatare'tey oño ñeñt poctetsa Partsocop. ²³ Chocmuepa'chña yecueñña ñeñt yeyemtena allochñapa' a'queshpaterreycha', amuepa'chña çha ye'charrtatatstenoña yeyoçher tarro'mar Yompor ñapa' çhocmach a'pocdaterrnay po'ñoñ ñeñt atet oteney. ²⁴ Ñaña añepa'chña e'ñe cohuen ye'nen attoch yeyenpannena allohueny allochñapa' attoch e'ñe cohuen yeyçhen morrentanna'teñets ñaña e'ñech cohuen es yeyenpannena. ²⁵ Ñaña çhocmuepa'ch yesen all çhocma yapçhena e'ñe yame'ñeño't Cristo. Amachña atta ye'patsto ñeñt atet pena po'potantañ ñeñt ama huetso allecma yapçhena. Añcha'ña atet yepena allempo yapçhena e'ñech cohuen yoctape'chatannena Yomporecop. Elloña te'pa' çhocmach yapçhena ñeñt nanac cohuentetsa yocop tarro'mar yeñoteñ te'pa' o' çherrmoch allempoch huerra Yepartseshar Cristo.

²⁶ Tarro'mar ñerra'm o' yeñoter po'ñoçh Cristo rromats yocop attoch a'queshpaterrey ñaña ñerra'm ñeñto' yame'ñerra tarraña ñerra'm allo'na yesen ochña'tare'tnomuets e'ñe ya yemneñño'tpa' allempopa' amach eñalleña ñeñtcha' rromuerttserr po'pocheño ñeñtcha' yetsa'terroyerr ello yo'chñar. ²⁷ Ñeñt allo'na sets ochña'tare'tnomuets añach o'paterrahuet coñcheñets ñeñt atarr amcha'noçhtetsa ñeñtara Yompor po'yoroçhenña ñeñt tso'pa' e'ñech e'nuerran allohuen ñeñt e'moñe'tene' Yompor. ²⁸ Ñehua, ahuat ñerra'm eñall ama't puesheñarra ñeñt atpare'taye't Moisés po'ñoñ, ñerra'm eñall epsheña amapa' ma'psheña ñeñtcha' a'metam'pene' ñeñtña atparña'tpa' ahuo'ch muetse allohuen acheñenesha'. Ama't puesheñarrapa' amach eñalleña ñeñtcha' morrentaya. ²⁹ Elloña ñeñt ama esoye' entenaye Yompor Puechemerpa'

atarrcha' nanac a'coñchatarefterret. Elloña po'rras ñeñtcha' a'cohuentaterrahuetañ Partsocop ñeñtpa'cho'ña ama esoye' enteñeto ama't ñeñt errasatser ñeñt etserra a'pocatañtetsa. Elloña ama't Yompor Puecamquëñ ñeñtpa'cho'ña chach sasare'teññañet ñeñtara Puecamquëñ ñeñtcha' morrenterrahuetañ attoch chorrerranetañ. Ama't señoteñeña elloña atarrcha' nanac acoñchatarefterra ñeñt atet atarr tsena'tene' Yompor Puechemer. ³⁰ Tarro'mar yapa' yeñoteñ Yomporña atet otets: "Napa' ñeñttencha' coñchaterrahuet, napa' ñeñttencha' tsa'taterrahuet." Elloñapa' atet oten Yompor: "Napa' ñeñttencha' otteñe'cherrahuet attochña necoñchatterranet ama't ñeñt neyochreshachno nepeneñ." ³¹ Ñeñto'marña yeñoteñ atarr yoroçheno'tsen ama't allohuen ñeñt aña o'patenaya ñeñt po'yoroçhenña pen Yompor ñeñt ama arromñateshayaye.

³² Tarraña te'pa' o'ch notas, o'ch alla seyerpuerra atet sepa ahuañmo'cha allempo e'ñe errtes eñoterre' po'ñoçh Cristepa'tña a'queshpatañ. Ñeñtpa' allempo ñanom a'puetarsamþsaretta seyoçhro soctapña. Allempopa' ama't atarr amueroçhtatareteseñ sañapa' e'ñe sa'huanta'huanom pa'namen topateñtsoçhno ñeñt setantyesoya; ñeñtpa' e'ñe atet ñerra'mrrate' sapa' cho atarr seçllarena. ³³ Patanta'ttsospa' atarrca'ye che'tatsetasete't e'ñe allo'tsa'yen allohuen acheñenesha'. All atarr sa'mueroçhtatare'tta. Elloña ñerra'm esempo mueroçhtateñet po'potantañ samo'tsesha' sapa'cho'ña çhocmach semueroçhtapretanete't. ³⁴ Po'ñoçh ñeñt arrmanatare'ttatse't o'ch ayottamþsare'ttet, sañapa' e'ñe sellcapreteño'fanetpa' çhocmach e'ñe cohuen seyenpuenanet. Ama't allempo puerratañþsatsre'tase't ñeñt se'moñe'tyesaye't, sañapa' e'ñech socsheñesha' sa'huantenanet. Tarro'mar sapa' señoteñ o' secherr ento ñeñt atarr sherbets ñeñt ello metana'tuene' atto sherbenes sechatser, tarro'mar ñeñtpa' ama aptsano. ³⁵ Ñeñto'marña masheñneshacha' o'ch alla noterrser; amach alla sequeçhpatsterrñañe ñeñt atto atarr seyemteña Cristo tarro'mar Yomporpa' ñachña atarr cohuen setsa'terraya. ³⁶ Te' sapa' aña sepalltena attoch e'ñe acoþa sa'huanta'huanom ñeñt atarr echarr sentyen, attochña allo'nach sesen þa'yesnomue' ñeñt atet muenen Yompor; attochña Yomporpa' apuerrescha' ñeñt e'ñe atet otenes. ³⁷ Tarro'mar yeñoteñ Yompor po'ñoñ ñeñt aquellcayet ahuañoteñ ñeñtpa' Cristocop atet oten:

O' mameshamerra o'ch orretuerra ñeñtcha' huerrtsa, te'pa' amach alla atomato pue'ntaño.

38 Tarraña Yomporpa' atet oten:

Ñeñ e'ñe pocte' nenten na ama't erra'tsena acheñer tarro'mar e'ñe pueyemteñoñen na, ñeññapa' corretsach. Tarraña ñerra'm esesha' nepuerram̄perraya ñapa' o'huañcha' allo'na coshatenen.

39 Tarraña yapa' ama atteyayye ñerra'mrrate' ñeñtcha' puerram̄perraya Yompor ñeñtcha' chenquer̄rtsa. Yapa' añeyca'yeña ñeñteycha' chocma yemterraya Yompor ñeñteycha' a'queshp̄ataret̄ter̄tsa e'ñe yecamquẽñohuen.

11

E'ñe yeyemteñoñ Yomporpa' e'ñech cohuen es yetsotayen ñocop

1 Ñehua, allempo po'ñoçh yeyemteña Yompor e'ñe yeñoteñ chocmach apuerrey ama't esempo ñeññ atarr yecuen te' e'ñe yenamueñoñ. Ama't ama yenteña' e'ñe yeyoçhroña yeñoteñ ñeññ yecuen te' po'ñoçhpa' apuerreycha' ama't esempo. 2 Yatañneshañ ahuatpa' atarr yemuetyesete't Yompor. Ñeññ atto yemuetyesyete't Yomporñapa' e'ñe pocte' entyesanete't.

3 Ñaña ya e'ñe yeyemteñoñ Yompor te'ñapa' o' yeñoter allpon ñeññ yentyen arr patsro ñeñtpa' e'ñe po'ñoñoña yeçhca'hua. Allempopa' ama't coñe'ta ama es orrtetso ñeñtcha' pa'namen yeçhcatyes ñeññ atet yentyen te'.

4 Ñaña Abel ahuat atto yemtane't Yompor, ñapa' apan Yompor ñeññ atarr coshate'. Pa'mo'nasheñña Caín ama't apaneñ ñaña Yompor, ñeñññapa' ama coshatano Yompor. Ñeñto'mar Yomporpa' e'ñe cohuen agapan ñeññ aþ Abel; attoña Yomporpa' eñotatanet e'ñe pocte' entapretan Abel. Tarraña Abel ama't rromañpa' atto atarr yemtane't Yompor, ñeñtpa' e'ñe teme'ttsen eñotateney ñeññ cohuen enten Yompor. Ñeñtpa' attema't ñerra'mrrate' Abelpa' teme'ttsen serrpare'tateney cohuen.

5 Ñaña ahuat Enoc ñeññ atarr cohuen yemtaye't Yompor, ñapa' e'ñe ora aner Yompor pue'ntaño e'ñe beñatot. Ñapa' ama çhoye' rromo arr patsro. E'ñe atta a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshatane't Yompor allempo añe patsro'tsen, tarro'mar ñeñtpa' atet oten Yompor po'ñoñ ñeññ aquellcare't. 6 Ñerra'm ama yeyemteñe Yompor amach errotentot yocshateñe ama't e'ñe mamesha. Tarraña ñerra'm esesha' muenene' o'ch yemteret ñamet Yompor añ poctetsa o'ch otet po'ñoçhpa' Yomporpa' eñall, ñaña eñoteretepa'chña

Yomporpa' chocmach coshaterran allohuen ñeñt' e'nene' ña. ⁷ Ñaña ahuat Yomporpa' eñotatan Noé ñeñt'cha' atet e'chořan oñ tsapařoneř. Allempo atet otan Noé ama't mameshapa' ama huate'te. Tarraña Noéñapa' e'ñe yemtenana atet och Yompor allempo. Ñaña'pa' yeřcatuan po'compuer allochñapa' attoch a'qeshřatan pamo'tsesha'. Atto yeřcatan po'compuer e'ñe ñapueř e'ñe pueyemteñoř Yomporpa' eñotataneñña allohuen po'potantañeřhno pamo'tsesha' ñetpa' coñchatuerranetcha' Yompor. Ñeñto'marña e'ñe pueyemteñoř, Yomporña'pa' e'ñe pocte' entenan Noé.

⁸ Ñaña ahuat Abrahampa' allempo chore'ch Yompor o'ch mueñe allap̄ar allcha' apuer pats, ñaña'pa' e'ñe pueyemteñoř Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen. ⁹ Allempo chap anetso all oteñ Yompor ñeñt'cha' apuer esempohuañen, allñapa' all yeřhosa e'ñe pueyemteñoř Yompor. Tarraña ña allpa' atta yeřhosa atet ñerra'm ahupaña. Ama't ñeñt' patspa' ñeñt' o'patateña Yompor ñeñt'cha' apuer, tarraña allempopa' ama apueña' Yompor ñeñt' atet oteñ. Ñeñto'mar ñapa' atta shetamtsopo'tos all manatoset. Ñaña ama't ñeñt'cha' po'mreñeñ perr Isaac ñaña Jacob ñetpa'cho'ña attera yeřherret shetamtsopahuo. Ñetpa'cho'ña atta cohueñet esempohuañencha' apuerranet Yompor ñeñt' patser e'ñe atet otenanet ñamet. ¹⁰ Abraham po'ñočhpa' aña cohuen ñeñt' Yompor pa'netser ñeñt' e'ñe echarr apareř tarro'mar Yompor yeřcatene' e'ñe echarr peñ.

¹¹ Puetapor Sarapa'cho'ña e'ñe pueyemteñoř Yomporpa' cheyore'terr ama't ñapa' o' atarr po'nme'ten. Ama't o' meten allempo atto cheyore'ten coyanesha' e'ñe pueyemteñořa Yomporpa' ña ahuañencat pe' attoch cheyore't. Tarro'mar ñapa' atarr ayemuetpo' entenan Yompor atet oteñ. ¹² Attoña e'ñe Abrahamořa atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha' ña e'ñe po'mreñeñ řohuenahuet ñeñt' allpon shonte' nanac atet ñerra'mrrate' ora allohuen rantočhno ñeñt' ento'tsa'yen ñaña atet yenteññañ sa'p po'mñer ñeñt' ama e'ñotuapahuoyaye.

¹³ Ñeñtet allponet atarr yemuetnomuet Yompor ama't allempo Yomporpa' ama apuenaneta' ñeñt' patser ñeñt' o'patatanete't. Tarraña ama't ama apareřterreta' ñeñt' patser ñeñt' o'patatanete't Yompor, ñetñapa' pueyemuetneñořet Yompor eñoteñet ñetpa' apareřterretcha' ñeñt'cha' po'ñočh pa'netser perret. Ñeñt'cha' atarr coshaterrahuet.

Tarro'marña ñetpa' eñoteñet añ patser po'ñoçh ama pa'netsreye' peñeto. Ñetpa' ahuapñanesheta entenet arr patsro.

14 Ñehua, yeñoteñ acheñ ñeñt atet entetsa ñerra'm ahuapñanesheta ñetpa' añña e'nenet ñeñtcha' e'ñe pa'netser perret po'ñoçh. 15 Ñaña ama añeye' pa'netser peneto allot onet tarro'mar ñerra'm ñeñta e'nenetañpa' po'ñoçhpa' o'ch alla puerrerretañ allot onet tarraña ñetpa' ama ñeñt-eye'ña e'ne'neto. 16 Ñetpa' añña e'nete't ñeñtcha' e'ñe pa'netser perret po'ñoçh ñeñt atarr nanac cohuen, ñeñtpa' añepa't Yompor pa'netser ñeñt pue'ntañotsen. Ñeñto'marña Yomporpa' e'ñe pocte' entenanet ama penquënaneto atto Po'yomporer peñet. Ñaña'pa' o'patatenanet ñeñtcha' e'ñe po'ñoçh pa'netser perret all pue'ntañe.

17 Ñaña allempo Yomporpa' atarr topatan Abraham; ñeñtpa' atet otan Abraham: "Te'pa' o'ch pemtser pechemer Isaac e'ñe atet ñerra'm ñeñt muetsenet nocop." E'ñe pueyemteño't Yompor Abrahamña'pa' e'ñe pocte' eñch o'ch poman puechemer Isaac o'ch muetse Yomporecop. Ñehua, Yomporpa' atet o' otuan Abraham ahuatoteñ: 18 "E'ñe pechemereshot Isaacpa' mererrach shonte' acheñenesha' ñeñtcha' e'ñe pemreneñ peperr." Tarraña ama't atet oteñeñ Yompor, ñaña'pa' e'ñe pueyemteño't Yomporpa' e'ñe pocte' eñch ahuo'ch muetsan po'patrro' allempo atet otererr Yompor. 19 Tarro'mar ñapa' atet oten, Yomporpa' atarr ahuamencatesha' ñach tantatuerre' ama't ñeñtcha' rromats. Ñeñtpa' atet ñerra'mrrate' Yomporpa' o' alla tantaterrñañ puechemer rromot, o' alla agapuer pompor po'pocheño.

20 Isaacpa'cho'ña allempo po'n e'ñe pueyemteño't Yomporpa' enaman puechemereshacop Yompor pa'nateña añecop Jacob ñaña Esaú; ñeñtcha' atet bensare'tam'perranet tsapatone't. 21 Jacobpa'cho'ña allempo rromamoch e'ñe pueyemteño't Yomporpa' enamatnoman Yompor pa'nateña pue'ñare'tolleshacop ñeñt puechemer José puechemeretollesha' puepo'nmeño'tpa' po'carra quellpuena allña ma'yochenanaña Yompor. 22 Josépa'cho'ña e'ñe pueyemteño't Yompor allempoch rroma allañar all anetso Egipto, ñapa' atet otnoman pamo'tsesha': "Po'ñoçhpa' çhocmach çhap allempoch allohuenes israelena'tarneshas secha'nerrcha' arro't Egipto't, o'ch sahanerra allo'tsen pats ñeñt o'patatye't ahuatoteñ Yompor ñeñtcha' apuerrey. Ñaña ñerra'm esempoch ahuerres arro'tpa' sanerrnancha' nenpa'ts."

23 Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteñoĕt Yomporpa' o' e'pochet. Ama mecha'teññañeto añcha'tareĕt po'ñoñ ñeñĕt atet nen attoch ĕhocma muetsanachet allohuen asheñorroĕollesha' ñeñĕt eñalleteysa. E'ñe ma'pñña arrorr alla e'poteñet. 24 Tarraña Moisés allempo o' po'n ñapa'ĕho'ña e'ñe pueyemteñoĕta Yomporpa' ama mueno o'ch oteñet ño' pue'ñar penña añcha'tareĕt, tarro'mar ñapa' atta ñañreteña añcha'tareĕt po'señ ñeñĕt egipto'marnesha'. 25 Ñapa' añña e'ñe pocte' ent o'ch mueroĕhtapretana israelnesha' ñeñĕt e'ñe pamo'tsesha' pen ñeñĕtara ñeñĕt pueyochreshaĕhno pen Yompor. Ama pocteye' entano o'ch coshapretana egipto'marnesha' ñeñĕt atet yeĕhenet ñeñĕt ama pocteye' enteno Yompor tarro'mar ñapa' eñoteñ ñeñĕt pa' e'ñe mamecpa atet coshenet. 26 Ñapa' atta ahuantenan atto atarr sasare'teñet israelnesha'. Tarro'mar ñapa' añ pocte' enten o'ch mueroĕhta Cristocop. Ñapa' ñeñĕtña atarr cohuen enten, ello metana'tuenan ñeñĕt atet sherben allohuen ñeñĕt esocmañen ñeñĕt atarr morrentena egipto'marnesha'. Tarro'mar ñapa' añña cohuen ñeñĕtcha' apuer Yompor ñeñĕtcha'ña atarr coshaterre'.

27-28 Ñeñto'marña Moisés e'ñe pueyemteñoĕt Yomporpa' atet otan allohuen israelena'tar ñeñĕt Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñĕtña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellañoĕtñ ñeñĕt amñareĕt ñeñĕtcha' muetsanatuenaya' allohuen egipto'marnesha' po'moternesha' attochña sa ñeñĕtes israelena'tarneshaspa' ama't puesheñarroĕesapa' amach muetsenso." Ñaña Moisés e'ñe pueyemteñoĕt Yomporpa' sa'nerran anets Egipto, ama mecha'tnomano ñeñĕt añcha'tareĕtetsa all Egipto ñeñĕt atarr atsrre'mñaĕ. Moiséspa' atta ahuanta'huanman allohuen ñeñĕt atarr echarr entyen tarro'mar ñapa' añ e'ñe yemtena Yompor ñeñĕt ama't ama entpahuoyaye. 29 Ñaña allempo onaĕherr allohuen israelena'tarnesha' Egiptot allempo ĕhaĕha'tet atarr sa'po ñeñĕt otenet Sa'p Tsasasen, israelena'tarnesha' e'ñe pueyemteñoĕt Yomporpa' e'ñe atta ahuanmoset all chope'chnomuet atet ñerra'mrrate' e'ñe porrare' patso chope'chenet. Egipto'marnesha'ña ñeñĕt cotahuetañpa' ñetpa'ĕho'ña ahuanmosetañ ñamet all sa'po, tarraña ñetñapa' e'ñe allohuenet ño'shrra'tuotetña all oño.

30 Ñaña allempo ĕhaĕha'tet all anetso Jericó ñeñĕtña allo'marnesha'pa' ama mueneñeto o'ch abe'tosanĕpsareĕtet.

Tarraña israelena'tarnesha' e'ñe pueyemteñoŕet Yomporpa' cançherratset; o' cançhroch puetesamŕsame'toset ñeñŕ anetser Jericó ñeñŕ atet otanet Yompor. Allempoña e'ñe pueyemteñoŕet Yomporpa' ñeñŕña conçhet allo aconçha'tamŕsaret ñeñŕ anetser all puetesme'tet cançhroch e'ñepa'tcha' ñoŕa mata'nom. ³¹ Ñaña Rahab ama't ñeñŕ atarr ecañoreshaŕtatset' ahuatpa' atto atarr yemterrana ñaña Yompor, ñeñŕ coyanesarpa' ama rromo allempo a'cllataretta allohuen pamo'tsesha' ñeñŕara jerico'marnesha' ñeñŕ atarr atpare'tyesaye't Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeñŕ ñanom amñaretatsa all anetso ñeñŕcha' eñotenaya' errotenete'ña ñeñŕ anetser ñaña ñeñŕ yeçhetsa all, ñato' ahuamencatarerette' ñato'pa' amate'.

³² Po'potantañeçhnopa' shontemeñ ñeñŕcha' alla neyerpaterrsañerr ñeñŕ atarr yemtaye't Yompor ahuat. Tarraña ama eñalle allponmat yet attoch alla neyerpatuerrsa allohuen ñeñŕ atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jefé, ñaña David, ñaña Samuel ñaña allohuen ñeñŕ a'ñta'yesaye't Yompor po'ñoñ ahuat. ³³ Tarraña allohuenet e'ñe pueyemteñoŕet Yomporpa' pa'namen etsotayenet ñeñŕ atet muenatenanet Yompor. Puesheña'ttsetpa' e'ñe a'mchechueñet po'potantañ amçha'taretñeshaçhno ñeñŕ e'moñe'tenahuet. Po'potantañña' e'ñe pueyemteñoŕet Yompor e'ñe cohuen amçha'tarettenet. E'ñe pueyemteñoŕet Yompor ñapa' alla yenpuerranet ñeñŕ atet otanete't. Ama't po'psheñeña' e'ñe pueyemteñoŕ Yompor ama muenatano ma'yarr o'ch erroŕ pe'. ³⁴ Ñaña ama't tso'ña ama't atarr huomenc huorten ama muenache o'ch atserrpe'. Po'psheñeña' e'ñe pueyemteñoŕ Yompor ñapa' a'queshpach attoch ama muetseto espado. Po'potantaña' ama't ama eñalleto po'huamenc, e'ñe pueyemteñoŕet Yompor atarr ahuamencat panet. Ñeñŕña huomencñatserpa' alloña quellarenet. Atto e'ñe a'mchechuet ñeñŕ e'moñe'tenahuet. ³⁵ Ama't po'potantañ coyaneshaçhno ñetpa'çho'ña e'ñe pueyemteñoŕet Yompor, o' alla atantaretterret pamo'ts ñeñŕ rromuets.

Po'potantañ ama't atarr atserrpatset'tarettenet, ñetpa'çho'ña e'ñe pueyemteñoŕet Yompor ama mueneñeto o'ch queçhpuet Yompor attoch a'rroyaretetyerret. E'ñe poçte' enteñet o'ch rromuet pueyemteñoŕet Yompor tarro'mar ñetpa' eñoteñet allach tanterret ello ñeñŕ atarr nanac cohuentetsa. ³⁶ Po'potantañeçhno

ñetpa'cho'ña e'ñe pueyemteño'fet Yompor ahuanta'yenet pa'namen atto atarr atserrp'atse'tare'fetyesete't — attoña atarr ache'tatsetare'ttete't, all ashtare'ttete't, ehuan-canatare'ttete't, ayottan'p'sare'fetyesete't. ³⁷ Po'potantañ amsanatare'ttete't atto arrollapechare'ttete't. Po'potantañpa' asheshare'fetyesete't e'ñe puerro'chreto atto amtsanatare'fetyesete't, atarr huomenc huapanete't topate'ñets. Po'potantañ espado amsanatare'fetyesete't. Po'potantañ atta chope'ñe'chyesete't, aña chorra'yese'te't carnerorrom, ñaña cabrarrom. Atarr huoccha'ñetyesete't atfaña atarr amuero'chtatare'ttete't atto atserrpa'yese're'ttete't. ³⁸ Atta chope'ñe'chyesete't amayo'mar, aspen'to'mar. Esho'tyese'te't arroroto'mar, mapuetpono'mar a'ñe patsro. Allohuenet ñet ñe'ñ't atto atarr amuero'chtatare'ttete't, Yomporña'pa' atarr cohuen entanete't. Ello metana'tue'ñet ora allohuen ache'ñenesha' arr patsro. ³⁹ Allohuenet ñe'ñ'tet atarr yemtete't Yompor ahua't, Yomporña'pa' e'ñe cohuen entanete't, tarraña ñetpa' amaña enterretoña ora allpon ñe'ñ't atet otanete't Yompor ahua't ñe'ñ'tcha' atet apuerranet. ⁴⁰ Tarro'mar Yomporpa' ama't ahua'to'te'ñ a'ñ co'tape'chen ñe'ñ't ello nanac cohuen enten ña. Ñe'ñ'tpa' yocpa'na allohuenacpay. Ñapa' a'ñ muenen allohueney parro o'ch etsotater'nay ñe'ñ't o'patatenya ñe'ñ'tcha' e'ñe cohuen ya'cohuentaterre' allohueney.

12

Chocmuepa'chña e'ñe yeyemuetneña Yepartseshar Jesús

¹ Ñe'ñ'to'marña ye'ñote'ñ shonte' ache'ñ ñe'ñ't orrtatyesaye't ahua'to'te'ñ; e'ñe pueyemteño'fet Yompor e'ñe etsotayese'te't Yomporecop ñe'ñ't atarr echarr. Ñaña ñet te'pa' o'ch netma'ntatanet ñerra'mrrate' allohuenetpa' o' cohuapreterryet yaña o'ch entyesyet erro'tencha' yetsota yaña ñe'ñ't atet muenateney Yompor. Ñe'ñ'to'marña yocoppa' a'ñ poctetsa o'ch e'ñe yesuanom ama't erra'tsena ñe'ñ't yepatare'tene' ama't ñaña yo'chñar ñe'ñ't atarr yetpatyene'. Ñaña e'ñepa'ch ya'huanta'huanom allohuen ñe'ñ't echarr yentyen. Allochña'pa' attoch e'ñe cohuen yetsote'ñña'ñ ñe'ñ't atet muenateney Yompor. Ñe'ñ'tpa' e'ñe atet ñerra'mrrate' ñe'ñ't matetsa ñetpa' chocmach chapuet allohua ona'ñchare'ttenet ñocpuet. ² A'ñcha'ña chocmuepa'chña e'ñe yeyemuetneña Jesús ñe'ñ't orrtaterre' attoch yeyemtera ñaña ñe'ñ'tcha' yetsotaterre' ñe'ñ't atto atarr yeyemuetneña. Tarro'mar ñapa' e'ñe pocte' e'ñche't o'ch ahuanta'huan allohuen ñe'ñ't echarr ente't ama't atto rroma corsocho. Ama't ñe'ñ't atarr

apencochen entyenet, ñapa' e'ñe poctacma ahuenta'huaneni. Tarro'mar e'ñe pueyemteñoña Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenroñ all anen po'conaño allña partsotuerr ñaña.

³ Ñehua, te' sapa' o'ch alla seyerpuera Jesús atto ñapa' atarr muerochtater ñeñt atarr ochñaenesha' ñeñt atarr e'moñe'tayet. Tarraña ñapa' allohuen muerochteñetspa' e'ñe ahuenta'huaneni. Allochña' sapa'cho'ña amach cha semuenme'chatsche ñeñtcha' atarr echarr sehuapoya, attochña amach cha llecatenso. ⁴ Tarraña saña ama't atarr satpare'tyeñeñ atto atarr topatase't so'chñar amaña choye' muetsenseto ñeñt atet a'paretta Jesús, ashataretta po'rras ochñartsocop. ⁵ Ñaña sapa' o'te' cha sepuesua ñeñt atet cotape'chateney Yompor po'ñoño allohueney ñeñtey puechemer pen. Ñeñtpa' atet otaney po'ñoñ:

Nechemere, ñerra'm esempo cotape'chaterres cohuen Yompor amachña atta sentatsche ñerra'm ama esoye' sherbeno. Ñaña ñerra'm esempo coñchatas mame' attoch o'ch alla soctape'cherr cohuen amachña ñeñtota cha muene' sequechpatstere. ⁶ Tarro'mar allohueney ñeñtey morrentena Yompor ñeñteycha'ña cotape'chater cohuen. Ñaña allohueney ñeñtey puechemerasha' pen ñeñteycha'ña coñchatyes mamesha'tets attoch o'ch alla yotape'cherr cohuen ñocop.

⁷ E'ñepa'chña ya'huenta'huanom atto coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atto ñeñt achemereshat errotenopa' o'ch coñchachet puechemer mame' allochña' attoch e'ñe cohuen ame'ñenanet puechemer. ⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñoñ ama puechemereye' peñe; ñeñtpa' cha ottena ñerra'm ellapnanesha'. Ñeñto'mar sapa'cho'ña ñerra'm ama coñchatenso Yompor mame' attoch same'ñya e'ñe cohuen po'ñoñ amaca'ye puechemereye' penso. ⁹ Elloña yeñoteñ allempo cheshenya' ñeñt yompor yepen arr patsro atto e'ñe cohuen cotape'chatyesye't, ñeñtpa' e'ñe pocte' yeñche't tarro'mar yeñoteñ ñeñtpa' e'ñe cohuen yocop. Ñeñto'marña te'pa'cho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñtara Yompor ñeñt pue'ntañotsen ñeñt pamo'mte' pen yecamqueñ attoña yapa' corretsayach. ¹⁰ Ñehua, ñeñt yamo'mte' yepen arr patsro ñetpa' e'ñe allponmata cotape'chatyesyete't allempo yapa'

cheshenya'. Ñetpa' chocma coñchatyesyete't allpon pocte' entyesete't ñet. Ñaña Yompor atto allpon coñchatyenyey mamesha'tets ñeñtpa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen. ¹¹ Ñaña yapa' yeñoteñ ñerra'm esesha' yecoñchatene' ñeñtpa' ama cohuenaye' yenteñe e'ñe allempo coñchatenyet, tarro'mar ñeñtpa' chocmach llecatenyet. Tarraña puecoñchateño'tetaypa' o'ch yeñoterr ñeñt atarr cohuen enten Yompor. Allochñapa' attochña e'ñech yocsheñesha' yeychena cohuen muechet.

Ñato'tña atta es sepchamipena'ña ñeñt atet anaret Partseshot socop te'tña ama secherro ñesho

¹² Ñeñto'marña te'pa' o'ch notas, o'ch alla setanterra o'ch alla sa'huamencaterra Yomporecop. Atetcha' netma'ntatasa atet ñerra'mrrate' o' alla ahuamencat seperr sot ñeñt cha yoncota'ten ñaña atto seyonllocme'chenpa' o'ch alla ahuamencat seperr selloquẽm. ¹³ E'ñepa'ch cohuen es sorrtatyen allochñapa' ñerra'm esesha' ama e'ñeye' huomencaye' penaye pueyo'cher Yomporecop, sañapa' amach aña sorrtateno ñeñtcha' a'puerrataterrahuet. Añcha'ña sorrtateññañ ñeñtcha' e'ñe cohuen yenpuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen pa'charr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach cha sepo'to'tatse'tnomo amach cha sa'tserrpa'nmo attochña e'ñe cohuen sechope'chnom e'ñe huomenc.

¹⁴ Añepa'chña sema'yo'chrena attoch e'ñe cohuen samo'tstannena, e'ñech muechet seychena epas allohuen samo'tseshachno. Ñaña añcha'ña soctape'chyen ñeñt e'ñe cohuenare' enten Parets. Tarro'mar ñerra'm añ ama yoctape'cheno ñeñt cohuenare' enten Paretspa' amach errotent yentereña Yompor. ¹⁵ Ñaña señotanna'tnomuepa'ch, ñato' eseshaspa' ama añeye' e'nenno Yompor ñeñtcha' yenpue'. Ñaña señotanna'tepa'ch ñato'tña ama't e'ñe mameshapa' sorrtatena'ña attoch se'moñe'tanna'ta. Ñerra'm atet sepenapa' acopoteñpa' o'ch e'ñe epa'huapa' chach orrtatan atsre'mo'chen. Attoña ñerra'm shonte' acheñenesha'pa' chach a'sosyatuanet; ñeñtpa' ama pocteye' enteñe Parets. Ñeñtpa' atetcha' netma'ntacha ñerra'mrrate' narmets ñeñt atarr pesherr ye'muen. ¹⁶ Ñaña señotanna'tnomuepa'ch ñato'tña esesha' chetenaya'ña ñeñt ama puetaporeyaye. Amapa' ñato'tña atta es sepchamipena'ña ñaña ñeñt atarr sherbets Partsocop, ñeñt atet pa' ahua't Esaú. Ñapa' e'ñe pa'chporrño'a

pomhuan ñeñt̃ anaret̃ ñocop Partseshot̃. Ñeñt̃pa' ñeñt̃ o'patacha pompor ñeñt̃ metana'tuene' ñeñt̃cha' allpon apa'nman po'poñ puechemerasha' tarro'mar ñapa' ñeñt̃ e'ñe po'moter pen pompor. Tarraña Esaúpa' ama esoye' enteñe ñeñt̃ anaret̃ ñocop Partseshot̃ ñeñto'mar e'ñe pomhuan ñeñt̃ o'patacha pompor ama't e'ñe parrocha rrachet. ¹⁷ Tarraña e'ñe allponmatapa' yeñoteñ o' alla muenerran ñeñt̃ anaret̃ ñocop Partseshot̃, tarraña allempopa' amach errotenot̃ alla apuereterro. Ama't pueya'chpeñesha' enamuerreñ allempopa' amate' errotenot̃ a'po'poñeterretoña ñeñt̃ atet̃ o' p̃ohuet̃ ñenmañ.

¹⁸ Ñehua, yeñoteñ ahuat̃ allempo Yomporpa' eñotatan israelena'tarnesha' attoch a'pocatanetañ Parets all aspeñto Sinaí̃pno, ñeñt̃pa' atarr yoroçhen. Allña aspeñto ñerra'm esesha' çhapats ama't pa'rr̃papa' allorocmach errottoset̃ all. Ñeñt̃ña aspeñterpa' all huorten tso' ñaña ama machecmeto, añcha'noçhtena, huomenquëshaten. ¹⁹ All e'morrtena ñaña poctor atarr yoroçhen. Atto eñorana'tanet̃ Paretspa' atarr añcha'noçhen enteñet. Ñeñto'marña acheñenesha' ñeñt̃ e'mñotene' atto eñorena Parets, ñet̃ñaapa' atet̃ otyenet. “Ñeñt̃epa'ta amach allo'na eñorana'tnenye Parets.” ²⁰ Ama eshcaye' ahuantenaye' enteñeto ñeñt̃ atet̃ otarettenet: “Ñerra'm esesha' çhapats ñeñt̃ aspeñtero ama't pa'rr̃papa' amsaret̃tetepa' — arrolle'taret̃tetepa'ch amapa' enapecharet̃tetepa' panmeto. Ama't ñaña eyarra muetsetepa'.” ²¹ Ama't Moisés̃pa'çho'ña atarr yoroçhen enteñ, ama't ñapa' atet̃ otanet: “Ama't napa' nem̃cha'na'teño'tpa' çha neyonshema'ten.”

²² Tarraña sapa' ama sentare aspeñet̃ all añcha'noçhtena Parets. Sapa' aña senterr ñeñt̃ Siónapen ñeñt̃ toma'ntenaya all yeçhena Yompor ñeñt̃ ama arromñañeshayaye. Ñaña aña senterr Jerusalén ñeñt̃ toma'ntenaya Yompor pa'netser ñeñt̃ pue'ntañot̃sen. Allñapa' shonte' coshame'tam̃peña mellaño'teñnesha' shonte' nanac. Ñeñt̃ allpon allo'tsa'yenpa' ama e'ñotuapahuoyaye. ²³ Ñaña sapa' aña senterr allohuen ñeñt̃ puechemerasha' o' perr Parets ñeñt̃ apçhetsa pame'ñeño'tet̃ ña. Ñet̃ña allohuenetpa' ñeñt̃et̃ aquellcaret̃et̃ pa'so'chñeçhno Yompor pue'ntaño. Ñaña sa te'pa' o' senter Yompor ñeñt̃cha' yeñotaterre' allohueney erra'tsencha' cohuen entyesuerr ñaña erra'tsencha' ama cohuenaye' entyesuerro. Ñaña allo'tsa'yen allohuen acheñenesha' puecamquẽñeçhno ñeñt̃ e'ñe pocte' enten Yompor; ñeñt̃ñaapa' o' e'ñe etsotatuanet̃ all pue'ntaño. ²⁴ Ñaña te' o' senter ñaña

Jesús ñeñt eñsets yocop Yomporesho attoch e'ñe cohuen a'pochtatonay etserra. Ñaña o' señoterrñañ po'rras ñeñt ashatarettatsa alloña o' a'pretnarettterraña yo'chñar. Ñeñtpa' elloña e'ñe cohuen yenpuerrey. Ñeñtpa' ama atteyaye ñerra'm Abel po'rras ñeñt ashatarettatsa ahuat.

²⁵ Ñeñto'marña te'pa' o'ch notas, se'mñoterepa'ch Yompor ñeñt se'ñorana'tenaya te'. Tarro'mar ahuat israelena'tarnesha' ñeñt ama e'mñotaye'te Yompor allempo eñorana'tanete't arr patsro, ñetña'pa' ama eseshaye' queshpato. Ñeñto'marña yeñoteñ ñerra'm yapa' amach ye'mñotere yaña Yompor ñeñt ye'ñorana'tenaya te' pue'ntañot, elloña yapa'cho'ña ama't puesheñarroteyapa' amach eseshay queshperitso. ²⁶ Ahuat allempo eñorana'tanet aspenot, po'ñoñña'pa' cha pelle'llchatenan pats. Ñaña te'pa' elloña o' alla atet oterrerr Yompor ñeñtcha' atet perrerr, ñeñtpa' atet oten: "Elloña esempohuañen po'pocheño'pa' o'ch alla nepelle'llchatterrr pats, tarraña amach ñaptayaya pats nepelle'llchatterro, enta'nachña nepelle'llchatterr." ²⁷ Ñeñtña po'ñoñer all oten "po'pocheño" ñeñtña yeñotatene' esempohuañenpa' ahupore'taretterrach allohuen ñeñt aye'chcataret ñeñt apelle'llchatpo'. Allempopa' añach a'puerrtsa ñeñt ama apelle'llchatpahuoyaye. ²⁸ Ñaña atto añcha'tarettena Yompor, ñeñtpa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt o'patatenyapa' ama ahupore'tpahuoyaye. E'ñe yencha'na'teño'pa' e'ñepa'chña cohuen yesherbeñ Yompor ñeñtcha' e'ñe coshatene' ña. ²⁹ Tarro'mar yeñoteñ ñeñt Yeyomporer yepen ñapa' atarr Parets e'ñe atet ñerra'm tso' ñeñt e'nuene' ama't erra'tsena ñeñt ama erro' apen yenteno.

13

Atetcha' ye'pa attoch e'ñe cohuen yocshach Yompor

¹ Attterepa'ch chocma semorrentannena allohuenes atet ñerra'm e'ñe semo'nasheñ se'panna'tuena. ² Ñaña amach sepsatsto attoch e'ñe cohuen saga'p allohuen ama't esesha ñeñt huapyetsa sepaclo. Tarro'mar ama señotanna'tueno; ñato'rraña añ saguën ñeñt mueñen Yompor atet pena po'potantañ ñetpa' añepa't agapuet mellaño'teñ.

³ Ñaña chocmuepa'chña seyerepya ñeñt ayotam'psare'tetyetsa. E'ñech cohuen sellcapretenanet atet ñerra'mrate' sapa'cho'ña ayotam'psare'tes e'ñe parro. Ñaña ñeñt amuro'chtataretetyetsa e'ñepa'ch cohuen

sellcapretenanet ñamet tarro'mar sapa'cho'ña señoteñ attecma errotenopa' chocmach semueroçhtena saña e'ñe sechtso.

⁴ Ñaña o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas setapor e'ñepa'ch cohuen sentña ñeñ' atto seyorannena. Ama't parrochapa' amuepa'chña se'nam'psanna'tatsto. Yacmapa' amach chetatstano coyanesha' ñeñ' ama puetaporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñ' ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñ' chetene' ñeñ' ama puetaporeyaye ama't ñaña ñeñ' aguëne' ñeñ' ama puerrollareyaye.

⁵ Ñaña te'pa' o'ch noterrser po'poñ: Amuepa'chña aña atarr seye'chapretatsetyesatsto quelle. E'ñepa'chña aña socshena ñeñ' e'ñe allpona sechyen. Tarro'mar Yomporpa' atet otene: "Napa' ama't ahuatapa' amach nequeçhpurrso, amach na'ypo'ñerrso ama't ahuata." ⁶ Ñeño'marña yeyemteño' Yompor e'ñech yocsheñesho' chocmuepa'ch atet yoten:

Yomporpa' ñeñ'ña yeyenpuene' ñeño'marña amach es yem'cha'tatsto. Ama't errotuanen muene' peney po'potantañ Yomporpa' ñach yecuan'pene'.

⁷ Ñaña seyerpueño' chocmuepa'ch cohuen senteñ ñeñ' a'potene' Yompor po'ñoñ socop, ñeñ'cha' seño'tatnomue' cohuen. Ñaña o'ch soctape'ch ñeñ' atarr cohuenare' ortatyesnomuet sesho, atto ñetpa' e'ñe cohuen yemteñet Yompor, sapa'cho'ña atetcha' sepa saña yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuatoteñ, ama't teme'ttsen, ama't ñaña errponañohuen ñeñ'ach attera ayemuetpotena. ⁹ Ñeño'marña amach seyemtatoña ñeñ' po'poñeçhno yeçhateñets ñeñ' ama atteye' ayçhataretso ahuañmo'çoteñ. Tarro'mar aña poctetsa o'ch huomenc ye'pa' yeyoçher e'ñe Yompor puemorreneteño'ey atto atarr yenpueney e'ñe atfa. Ama aña'eye' huomenc yepenoña yeyoçher atto es yerra'yen amapa' atto es ye'tore'tyena. Tarro'mar ñeñ' co'tene' añ yeçhateñets rreñ'socpa'na, ñeñ' yeçhateñ'sorpa' ama yenpuenaneto attoch huomenc pa'nmuet pueyoçher Yomporcop.

¹⁰⁻¹¹ Ñehua, yeñoteñ ñeñ' corneshatets judioneshacop ñerra'm esempo muetsenet eyarra all altaro ñeñ' po'ch'ñarecpuet, ñeñ'ña eyarra po'rraspa' ñeñ'tpa' o'ch aneñ cornesha' e'ñe allohuanen Parets po'ponro ñeñ'

ochñartsocpatets. Tarraña ñeñtña eyarra po'chetspa' amach esesha' rrenaye. Ñeñtña po'chetspa' o'ch anmet a'yo all ama acheñempañoayaye, allcha' chamoset. Tarraña te'ña yocop ñeñt amsarettertsa yo'chñarecop ñeñt'pa' Cristo. Yapa' ñeñt po'ñoñ pocrrañ pen yecamquëñ allohueney ñeñtey yemtenaya ña. Tarraña ñeñt attera corneshatets judionesha' pocta'ñnacop all po'prahuo peñet, ñetpa' amach erroteno' pocrrañ petoña Cristo. ¹² Ñaña atto anenan judionesha' eyarra po'chets a'yo all ama acheñempañoayaye, ñeñt'pa' añ toma'tena atto Cristopa'cho'ña anmet a'yo all ama acheñempañoayaye allcha' e'ñe puemuerochtateño'tetpa' o'ch rroma. Attoña e'ñe ña po'rraso a'cohuentaterrey Partsocop. ¹³ Ñeñto'marña te'pa' e'ñepa'chña yesuanom ñeñt ahuat yocta'ña ñeñtara ñeñt ya'netser yepenpa' o'ch ahuey a'yo allo'tsen Jesús. Allcha'ña yemuerochtapretosya yaña all atarr otnare'tyeñet. ¹⁴ Tarro'mar añe patserpa' ama añeyaye ñeñt po'ño'ch ya'netser yepen tarro'mar ñeñt'pa' huañerrcha'. Yapa' añña ye'nen ñeñt'cha' ya'netser yeperr ñeñt'cha' yenterr Yompor pue'ntaño ñeñt ama ahuañaño ama't e'ñe errponaña. ¹⁵ E'ñe yeyemteño' Jesucristo chocmuepa'chña ya'ye'chochtateññañ Yompor. Atto chocma ya'ye'chochtateññañ ñeñt'pa' añ toma'tena ñeñt'cha' yapueñ Yompor atet pete't ahuat o'ch muetset eyarra ñocop. E'ñepa'chña ya yenamot ya'ye'chochtateññañ pa'so'cheñ attochña e'ñech yocshateñ. ¹⁶ Ñaña chocmuepa'chña e'ñe cohuen seyenpanna ñaña e'ñech cohuen sa'muerañtena. Tarro'mar te'pa' ñeñtña atto es yapueñ Yompor ñeñt'cha' atarr coshatene' ña.

¹⁷ Ñaña ñeñt sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anarettenet ñetcha' cohuanpenet secamquëñ Yomporcop. Ñaña Yomporpa' eñotatuerranetcha' ñeñt atet pa'yenet, ñato' e'ñe'e' cohuen cohuanpenset ñato'pa' amate' cohuenaye' cohuanpenseto. Ñeñto'marña socoppa' añ poctetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atetpa' amach erroteno' coshaterrsetoña saña.

¹⁸ Ñaña te'pa' o'ch notas, chocmach sema'yochampanya. Yapa' yeñotena yeyo'chro ama eñalle attoch po'poñ yentannena. Yapa' añña yemnen chocmach yorrtatyen ñeñt atarr cohuen enten Yompor. ¹⁹ Ellopa' o'ch alla noterr serr chocmach sema'yochampanya allochñapa' amach atarr atomatatstapa' o'ch alla ne'cherrerr sesho.

Arrpa' all so'tnerranet po'cartot

²⁰⁻²¹ Te'ñapa' Yomporepa'chña e'ñe ahuamencat sepene' ama't allohuen pa'namenacop ñeñt atarr sherbets ñocop. E'ñe yame'ñeñot Puechemer ñeñt Jesucristo ñachña ya'cohuentatene'ña ora yoctañña ñeñt atet yoctape'chyen yeyochro allochñapa' attochña e'ñe cohuen yoctape'cherr ora allohuen ñeñt cohuen enten ña. Attochña e'ñech cohuenare' sorrtatyen ñeñt e'ñe atet muenen ña. Ñeñtpa' ñeñtara Yompor ñeñt e'ñe yocshatene' yeyochro ñaña ñeñtara ñeñt tantaterre' Puechemer rromot ñeñt Yepartseshar yepen, Jesucristo ñeñtña atarr cohuen yecuañpene' atet ñerra'mrrate' ñeñt atarr cohuen cohuañpene' po'carrneror. E'ñe po'rراسoña alloña a'pocatonay ñeñt e'ñe etserra ñeñtña a'pocateñetspa' ama't errponañapa' amach huañerro. Te'ña e'ñe tayoteña' yecohuentatoñepa'ch Cristo ama't errponohuañen. Ñeñtpa' atetepa'ch Nompore yocop.

²² E'ñe allohuanen masheñneshacha' ñaña noçhaneshacha' o'ch alla noterrser, e'ñepa'ch cohuen se'mñoton neñoñ ñeñt allpon o'ch alla noctape'chaterres tarro'mar ama atonaye' ñoñets nequellquënnaso. ²³ Ñaña o'ch neñotatas masheñ Timoteopa' o'ch alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

²⁴ Ñaña napa' nemnen o'ch nehuomcha'ch necartot allohuen ñeñt sa'mcha'tareternesha' sepa'yen, ñaña allohuen masheñneshachno ñeñt pueyochresha' pen Parets all se-sho. Ñaña itatio'marnesha' ñeñt ame'ñetsapa' ñetpa'cho'ña mueneñet o'ch huomcha'taset ñamet añ necartot.

²⁵ Te'ñapa' Yomporepa'ch sa'nataya allohuenes. Ñeñtach notas, ñeñtpa' atetepa'ch Nompore. Allohua.

AÑ SANTIAGO PO' CARTA SANTIAGO

*Atto Santiago quellcan carta allohuenacop ñeñt' atta par-
ratse'tyets allemeñ*

¹ Masheñneshacha' ñaña nochaneshacha' ñeñtes Israel puechemerasha' po'mrenñes, ñeñt' charrasheña puechena epsheña ñeñña po'mreneñ sepene'ña sa, ñeñtes atta parratse'tyets allemeñ anetso'mar. Na Santiagon sequellquene'ña añ carta ñeñten torretsa Yomporecop ama't ñaña Puechemerecop Jesucristo ñeñt' Yepartseshar yepen. Te'pa' o'ch nehuomícha'tas allohuenes añ necartot.

Attoch ya' huanten allohuen topateñets

² Ñaña te'pa' o'ch masheñneshacha' ñaña nochaneshacha' notas, ñerra'm esempo huaponasa pa'namen topateñetspa' sapa' socshepa'ch nanac. ³ Tarro'mar sapa' señoteñ ñerra'm cho huaponaya topateñets, ñeñtpa' añecopcha' huapa attoch topatenya' ñerra'm po'ñochte' yame'ñena. Allochñapa' attoch chocma es ya' huanten. ⁴ E'ñe pocte' allo'nepa'ch sesen ahuinta'huanmue' allohuen topateñets, allochñapa' attoch poctacma huomenc sepa' seyo'cher Yomporecop, ñaña attoch amach es sepallteno ama't mamesha atto same'ñeña Yompor.

Yomporpa' chocma mueneñ o'ch es eñotatey

⁵ Ñerra'm eseshaste' ama e'ñeye' eñotenaye ñeñt' cohuen enten Yomporpa' sapa' añcha'ña senam Yompor, ñapa' chocmach es eñotatey, tarro'mar ñapa' e'ñech pocsheñesha' es apueney allohueney, amachña ñeñtapa' cha che'ptare'tye. ⁶ Tarraña ñerra'm esempo es senamueñ Yomporpa' e'ñech seyemteñoñ es sanamñ. Amach cha se'charrtatsto seyo'chro ama't mamesha. Tarro'mar ñeñt' chocma echarrtetsa pueyo'chropa' amach e'ñeye' yemtenano Yompor ñeñto'marña ñeñt' atet petsapa'chach ottena ñerra'mrrate' oñ pue'mo'yer ñeñt' allenmateñ anen mōrr. ⁷⁻⁸ Ñeñt' atet petsapa' eñochetepa' po'ño'chpa' amach es ape Yompor, tarro'mar ñeñt' atet petsapa' amach patrraye' cotape'cheno. Atet ñerra'm te'pa' ñato' po'po'ñcha' cotape'chen, ñato' tsapañapa' o'chcho' cotape'chenan po'poñ. Ñeñt' acheñerpa' chocmach atet pa'yena.

⁹ Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar allempo Yomporpa' atetcha' entenes ñerra'mrrate' ñeñtes nanac sherbets. ¹⁰ Ñaña añ masheñer ñeñt' echene' shonte'

po'čllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeñt' ečllayoreť ñeñt'pa' mamecpa atet' pena ñerra'mrrate' ta'te' puerorer ñeñt' nanac auyaña. ¹¹ Tarro'mar ñeñt'ror atet'pa' ñerra'm o'ch huapa'muena atsne', ñerra'm o'ch atserrtapa' čhach a'uyatoñña pue'chor, añña puerorerñapa' o'ch shorna'tua; ñeñt'ña atto cohuentenapa' o'ch huañ. E'ñe atet' penaña ñeñt' ečllayoreť. E'ñe puechecma'teñoťpa' huañerrcha' ñaña.

E'ñe yañña yemnenñoť topateney oneñt'

¹² Nanac cosheñtso'tsen allohuen ñeñt' ahuantene' ora pa'namen topateñets, tarro'mar ñerra'm esempo ahuinta'huan ora topateñetspa' nanaccha' cohuen entuer Yompor. Allempopa' aphuercha' Yompor ñeñt'cha' atarr coshaterre' alloch ñapa' corretsach tayoteñ ama't errponañohuen. Ñeñt'pa' añña o'patatena allohuen ñeñt' morrentenaya ña. ¹³ Ñaña te'pa' o'ch notas, ñerra'm esempo e'ñe sañña semnenñoť o'ch sepa ñeñt' ama cohuenayayepa' amach sotatsto, "añpa' Yomporte' o' topaten." Tarro'mar Yomporpa' ama esesha' topatenaye attoch ñapa' o'ch pa ñaña ñeñt' ama cohuenayaye. Ñeñt'oma'ña ñapa'cho' amach errotenoť topaty yaña. ¹⁴ Elloña añmapa' e'ñe sañña semneññoť attoch huaponasa topateñets o'ch sepa ñeñt' ama cohuenayaye. ¹⁵ Tarro'mar ñerra'm esempo es yemnatse'tyen yeyo'chro, ñerra'm o'chcho' ye'pa atet'pa', ñeñt'pa' ñeñt'ña yo'chñar yepen. Ñaña ñerra'm čhocma allo'na yesen pa'nmue' ñeñt' ama cohuenayayepa' e'ñe yo'chñarot'pa' o'ch yechenquerra.

¹⁶ Mašheñneshacha' ñaña nočhaneshacha' e'ñe nemorreneteñotespa' o'ch alla noterrser, amach sepantatsche sañña. Po'ñočpa' ama Yomporeye' yetpatenaye attoch ye'pa' ñeñt' ama cohuenayaye. ¹⁷ Yomporpa' e'ñe cohuenare' es apueney ñeñt'cha' allo'na yeyenpuene' ñeñt'ara ñeñt' mueñennay pue'ntañoť. Ñaña ñeñt'ara Yompor ñeñt' yečcate' allohuen ñeñt' yečhoyo'tam'pene' pue'ntañoť. Tarraña erroteno e'ñe puechope'cheñoťpa' amach tama čhoyo'tam'penye. Tarraña Paretspa' ama atteye' peno. Ñapa' amach ellopa' alla a'po'poñeta'm'perrye ñeñt' atet' muenateney. ¹⁸ Allempo yame'ñerrñaña po'ñoñ ñeñt' e'ñe po'ñoč atet' oteney ñeshoťñapa' ye'ñalleterra atet' ñerra'mrrate' e'ñe puechemerey ñeñt' e'ñe po'moter pen ñeñt' anaret' e'ñe ñocop. Tarro'mar ñeñt'pa' atet' muenen ña.

Añpa' ñeñt'cha' atet' yesherbe' Yompor e'ñe cohuen

19 Ñeñto'marña masheñeshacha' ñaña nochaneshacha' e'ñe nemorrenteñotespa' o'ch neñotaterrser po'poñ. Sa allohuenes añ poctetsa chocmach pocte' señch o'ch se'mñoch cohuen ama't erra'tsena ñeñtcha' serrpare'tatets. Añcha'ña chocmach serrmuen señoñ. Ñaña amach e'ñe atto'a sa'tsrre'ma'yeno, chocña ñanom es soctape'ch ñato' atsrre'mochente' ñeñt atet otenset, ñato' amate'. 20 Tarro'mar e'ñe ya'tsrre'mueño'tpa' amach erro'tenot yetsotoña ñeñt atet pocte' enten Yompor. 21 Ñeñto'marña sapa' o'ch seque'chpa'huerr sosya'tsañ ora allohuen ñeñt shonte' sepa'yen ñeñt ama pocteyaye Yomporcop. Añcha'ña sapa' o'ch sagapoñ Yompor po'ñoñ e'ñe señmañesha'. Tarro'mar ñerra'm o'ch chaponaya Yompor po'ñoñ e'ñe yeyochropa' ñeñtpa' ñeñtcha' ya'queshpaterre' esempohuañen yecamquëño't.

22 Ñaña sapa' amach e'ñe orrena se'matstoñe Yompor po'ñoñ, chocña sorratyesa ñeñt atet otene'y. Tarro'mar ñeñt e'ñe orrena e'muene' Yompor po'ñoñpa' ñeñtpa' ñañeñach shequëtsa tarro'mar chate' otenapañ ñato' ñeñtate' poctetsa ñocop atto'ch queshperra. 23 Ñaña ñeñt atet petsapa' chach ottena ñerra'mrrate' ñeñt atta cohuet'sa rerpo. 24 Añecpach cohuenta o'ch entan erro'tente' orrtena pa'clloyot. O'chña entuan ñeñt atet orrtena' allempoñapa' o'ch ahuer. Allempoña cherr a'yopa' o'ch alla puesuerran ñeñt atet orrtena pa'clloyot. 25 Tarraña ñeñña e'ñe pomnenño't ma'yochrenaya Yompor po'ñoñ ñeñt e'ñe cohuen atet oteneypa' ñeñña' ama atteye' peno ñeñt atet pena ñeñt e'ñe orrena e'muene' Yompor po'ñoñ ñeñt atta puesene' ñeñt atet otene'y Yompor. Añcha'ña chocmach orrtatyenan ñeñt atet oten Yompor po'ñoñ. Elloña ñeñt atet petsapa' nanaccha' cosheñtso'tsen.

26 Ñerra'm esesha' otets ñapa' nanac' cohuen sherbenan Yompor, tarraña ñerra'm ña ama anenano po'ñoñpa' ñeñtpa' ñañeñach shequëtsa. Tarro'mar ñerra'm atterach yeñosatse'tyenpa' amach po'ño'chaye' yesherbeñe Yompor. 27 Añña e'ñe pocte' enten Yompor Apa ñeñtcha' atet yesherbeñe ña e'ñe cohuen: O'ch yeyenpueñ huocchanesha'chno, ñaña rretorrnanesha' ñerra'm esempo es muero'chtatenahuet. Ñaña yapa' amach ya'sosyatatsto yechets ñeñt atet patse'tyena ñeñt ama ame'ñetso arr patsro.

2

Atto amach puesheña'ttsa cohuen yentatsto

1 Masheñneshacha' ñaña nočhaneshacha' te'pa' o'ch noterrser po'poñ. Sa e'ñe same'ñeñoť Yepartseshar Jesucristo ñeñť e'ñe cočheshare' orrtatetspa' amach puesheña'ttsa e'ñe cohuen sentatsto. Sapa' e'ñech cohuen senteñ allohuen acheñenesha'. 2-3 Ñato' sa erroťenopa' o'ch sapčhena allohuenes Yompor pa'paclo. Allempoña sapčhenapa' ñato' o'ch huapa puesheñarr ñeñť chorrenaya ñeñť nanac cohuen, ñeñť nene' anillo orotlullen. Ñato' ñapa' e'ñech cohuen sagař o'chcho' sotař: "Panorros arr allame'tets e'ñe cohueno." Ñato' e'ñech allempocma o'ch huapa ñaña ñeñť atarr huocchañ ñeñť čha shetsre'she'muen pa'shtam. Ñato' ñeñťñapa' čhach sotař: "Papa' alla řatomos řaronet, amapa' alla řanorros patso." 4 Tarraña ñerra'm atet sepenapa' ñeñťpa' amach allohuenacmaye' cohuen sentanneno. Ñaña čhach sottena ñerra'mrrate' sañeña eñotene' ñeñť acheñer nanac sherbets. Tarraña ñerra'm atet yepenapa' ñeñťpa' amach cohuenaye' yoctape'cheno. 5 Masheñneshacha' ñaña nočhaneshacha' e'ñe nemorrenteñoťes te'pa' nemneñ o'ch se'mñnoten ñeñťcha' atet notas. Elloña Yomporpa' añña nanac muenen o'ch acerrran allohuen ñeñť nanac huocchañetets añ patsro, attoch e'ñe pame'ñeñoťet ñetpa' echerretcha' esocmañen Yomporeshoť. Esempohuañenñapa' o'ch aguđerret ñaña ñeñť o'patatenanet Yompor all amčha'tareťtena pue'ntaño. Ñaña ñeñť o'patatenya allohueney ñeñťey morrentenaya ña. 6 Tarraña sañapa' čhaña semneñ o'ch sepencah ñeñť huocchañetets. Sapa' ama't señoťeñeña ñeñť nanac ečllayoreťpa' ñeñťña es aprratamřsañ, amapa' o'ch temantas amčha'tareťesho. 7 Ñaña ama't señoťeñeña ñeñť nanac ečllayoreťpa' ñeñťña nanac achmäre'tene' Cristo pa'so'cheñ ñeñťara ñeñť nanac amčha'na'tpo' yenten ya ñeñťey Cristona'tarey.

8 Ñerra'm čhocma semorrentannenapa' allempopa' o'ch set-sotua añ ñoñets ñeñť atet anaret Yompor po'ñoño ahuatoteñ, ñeñťpa' atet oten: "O'ch atarr cohuen pemuerya řamo'ts e'ñe atet atarr pemorrentena řañeña." Añ ñoñets ñeñťña nanac sherbets, ello metana'tuenan po'poñečno. Ñerra'm atetcha' seřapa' allempopa' amach es sepallteno Yomporcop. 9 Tarraña ñerra'm sapa' e'ñe puesheña'ttsa semorrenenapa' ñeñťpa' allotña čhocma yo'chña'ten. Ñaña ñerra'm atet yepenapa' nanaccha' yeyoren yo'chñar, řarro'mar ama atet yepeno ñeñť atet oteney Yompor po'ñoñ ñeñť atet anaret. 10 Ñaña ama't e'ñe yeyčhatset allohuen Yompor po'ñoñ ñeñť atet anareťña', ñerra'm paterrñapa' ama atteye' yepeñepa' Yomporñapa' o'ch enteney ñerra'mrrate' o' ora

yepanta'huoñ. ¹¹ Añ Yompor ñeñt yotene' "amach sechtapretatsto taporets" ñeñtara Yompor ñeñt yotene' ñaña "amach semtsanna'tatsto." Ñeñto'marña ama't ama yechtapretatsto taporetsña' ñerra'm errotenopa' machayota yemtse acheñ Yomporñapa' o'ch enteney ñerra'mrrate' o' ora yatpare'tuoñ po'ñoñ ñeñt atet anaret. ¹² Ñeñto'marña sapa' chocmach seyerpa atto esempohuañen Yomporpa' eñotatyuesuerreycha' e'ñe errotench'a' entyuesuerrey. Tarro'mar ñato' yepena ama't ñeñt atet oteney te' Cristo po'ñoñ ñeñt atet anaret ñeñt ama amuerochtatañeyaye. Ñeñto'marña sapa' e'ñe señoñeñt atetpa' ama't errotena señenpa' e'ñepa'chña cohuenare' señosyen. Ñaña e'ñe señoñeñt atetpa' e'ñepa'ch cohuenare' es sorrtyaten. ¹³ Ñaña sapa' señochepe'ch ñeñt ama morrentenayo te' pamo'tspa' ñapa'cho'ña esempohuañen allempoch eñotatyuesuerrey Yompor e'ñe errotench'a' entyuesuerrey, ñapa'cho'ña allempopa' amach eseshaye' morrenterayo. Añña ñeñt morrentenaya te' pamo'tspa' esempohuañenña allempoch eñotatyuesuerrey Yompor e'ñe errotench'a' entyuesuerrey, allempoña ñapa' nanaccha' amuerare'tterra.

Ñerra'm po'ño'ch yame'ñenapa' choch yorrtat ñaña ñeñt cohuentetsa ñocop

¹⁴ Masheñneshacha' ñaña nochaneshacha' te'pa' o'ch notas. Po'ño'ch ama sherbenoña añ acheñer ñeñt otets ñapa' ame'ñeno', tarraña ñerra'm ama orrtatenano ñeñt cohuentetsa Yomporecop. Ñeñtña acheñer atetpa' amach po'ño'chaye' ame'ñeno. Amachca'ye a'queshpaterena ñeñt atto oten e'ñe orrena ñapa' ame'ñeno'. ¹⁵ Ñehua, ñato' o'ch netma'ntacha atet. Ñerra'm puesheñarr masheñ, amapa' yo'ch palltenet ñeñtcha' chorret, amapa' ñeñtcha' rret allempo, ¹⁶ tarraña ñerra'm sapa' atta sotyeñ: "Ahua'ta, Yomporepa'chña pa'nataya. Eñalletepa' ñeñtcha' pechorra, ñaña ñeñtcha' perra'." Tarraña ñerra'm amaña es sape ñeñt palltenapa' atetpa' amaca'ye choye' es sesherbeno. ¹⁷ Ñeñt'pa' atet pena ñaña ñerra'm esempo atta yoten, "napa' name'ñena", tarraña ñerra'm ama yorrtateno ñeñt cohuentetsa Yomporecoppa', ñeñtña atto yoten, napa' name'ñenapa' amach es sherbeno. Chach yottena ñerra'mrrate' o' huañerr atto yame'ñena.

¹⁸ Ñato' o'ch netma'ntacha atet. Ñato' puesheñarrpa' o'ch otan po'psheñeñ: "Papa' e'ño' peyemteññaña ñeñt atet oteney Yompor po'ñoñ, tarraña amaña porrtatyenoña ñeñt atet oteney Yompor po'ñoñ. Tarraña napa' e'ñe nepohuen ñeñt cohuentetsa Yomporecop. Ñehua, ¿erra'tsenoteyte'ña e'ñe

pocte' enten Yompor?" Ñehua, te'pa' o'ch notap̄ ñeñteḡ atet otets: Po'ñoçh ñerra'm ama yepeno ñeñt̄ cohuentetsa Yomporecoppa' amach errotent̄ yeñotache po'psheññ ñato' po'ñoçhte' yeyemteññaña Yompor po'ñoñ. Tarro'mar ñerra'm po'ñoçh yame'ñenapa' çhocmach yorrtat ñaña ñeñt̄ cohuentetsa Yomporecop. ¹⁹ Ñaña ḡapa' peyemteñoḡpa' peñoteñ Yomporpa' e'ñe patrra. Ñehua, ñeñḡpa' e'ñe pocte' atet, tarraña oneñeḡpa'çho'ña eñotenan ñaña atet. Tarraña ñapa' ama't eñotenaneñña Yomporpa' ama't e'ñe patrra, tarraña po'yorñoḡfach eñoteñ, tarro'mar ñapa' eñotena amach queshperro. ²⁰ Te' ḡapa' amate' peñoteña'. Chote' pemneñ o'ch neñotataḡ atto ñerra'm ama yepeno ñeñt̄ cohuentetsa Yomporecoppa' ama't yoteneñ yame'ñena e'ñech orrena atet yoten. ²¹ Ñehua, Yomporpa' e'ñe pocte' entan ahuaḡ yatañ Abraham allempo muene' muetsaneñ puechemer Isaac Yomporecop,* tarro'mar ñapa' añ orrtaten ñeñt̄ cohuen enten Yompor. ²² Ñapa' e'ñe pocte' entan Abraham tarro'mar e'ñe pueyemteñoḡpa' orrtatuan ora ñeñt̄ atet och Yompor. Ñeñḡo'marña yeñoteñ Abrahampa' e'ñe poctacma ame'ñane't̄ Yompor. ²³ Allempo atet pe'tpa' attotña e'ñe etsotuan Yompor po'ñoñ ñeñt̄ atet aquellcareḡ ahuaḡoteñ Génesis, ñeñḡpa' atet oten: "Abrahampa' nanac yemtana Yompor, ñeñḡo'marña e'ñe pueyemteñoḡa Yomporña'pa' e'ñe pocte' eñche't̄. Ñeñḡo'mar Abrahampa' atet ochete't̄, añmapa' ñeñt̄ e'ñe parro yemtana epuet Yompor."

²⁴ Ñeñḡo'mar yeñoteñ Yomporpa' e'ñech pocte' enteney ñerra'm esempo yorrtatyeññañ ñeñt̄ cohuentetsa ñocop. Ama't errpon yotatset yapa' e'ñe cohuen yame'ñena tarraña ñerra'm ama yeḡohueno ñeñt̄ atet muenen ñapa' amach errotent̄ pocte' entyeña Yompor. ²⁵ Tarro'mar ama't Yomporpa' e'ñe pocte' entan ahuaḡ coyanesha' ñeñt̄ pa'so'cheñ Rahab, ama't ñapa' allempo ḡa ñeñt̄ e'ñe pocte' ent Yompor ñocop. Ama't ñeñt̄ coyanesha'pa' nanac ecañoreshaḡ, tarraña ñapa' e'ñe añoḡa pocte' eñch Yompor atto ñapa' agapan e'ñe cohuen pa'pacillo ñeñt̄ mueña ahuaḡ Josué ñeñt̄cha' entenaya' ñanom pats. Alloḡpa' ñaña ahuo't gaterranet po'poñ toñ allcha' oñerret attoch ama rromuerraneto allo'marnesha' ñeñt̄ e'moñe'tenahuet. E'ñe atet puepeñoḡa Yomporña'pa' e'ñe pocte' eñch e'ñe attecma ñerra'm Abraham. ²⁶ Ñeñḡo'marña te'pa' yeñoteñ ama't errpon yotatset yapa' e'ñe cohuen

* **2:21** Ñehua, ahuaḡ Yomporpa' ahuo't otan Abraham muetsanepa'to' puechemer ñocop. Tarraña ñapa' añecpa atet och attoch topach ñato' po'ñoçhte' ame'ñeña. Ñeñḡo'marña Abrahampa' autsa muetsayeñ puechemer Yomporecop, tarraña ellopa' ama muenache Yompor.

yame'ñena, tarraña ñerra'm ama yorrtateno ñeñt̃ poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeñtpa' o' sa'neñ puecamqueñ tarro'mar ñerra'm ñeñto' o' yerromapa' añ yechetspa' amach es sherberre'te.

3

E'ñe yeñosatse'teñoña nanac yochña'ten Yomporecop

¹ Masheñeshacha' ñaña nochaneshacha' te'pa' o'ch notas po'poñ. Ama pocteyaye o'ch sechen shonte' ñeñt̃ muenets o'ch cotape'chaten ñeñt̃ cohuentetsa Yomporecop. Tarro'mar señoñeñ ñeñtey cotape'chatets cohuen Yomporecoppa' ello nanaccha' yoro'cheno'tseney ñerra'm esempo yepena ñeñt̃ ama cohuenayaye tarro'mar Yomporpa' amach pocteye' entenye ama't e'ñe mamesha. ² Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teñoñpa' ñeñña po'ño'chpa' e'ñech cohuen cotape'chen, ñaña ñeñt̃ atet acheñpa' e'ñech eñoñeñ attoch huenatan ora ñeñt̃ atet muenatse'tyen yechets. ³ Atet pena ñaña cahuall. Ñerra'm echenan attoch yame'ñacha, E'ñe puenamo'tpa' esheccha' yanem̃ all yesechateñ. E'ñe puenamo'tpa' o'ch yame'ñacha ora pue'mocrohuen. ⁴ Ñato' o'ch netma'ntacha ñaña ñeñt̃ atet pena bote ñeñt̃ chope'chets oño. Ñehua, botepa' ama'tcha' nanac añecmuen noñtpa' e'ñe puepopa'otpa' o'ch aneñet all sechateñ pamo'mte'. Ñaña ama'tcha' puepopa'ppa' añeñollpach, ñaña ama't mörppa' mueneñeñcha' o'ch anem̃ a'yenet allenet ama yesechateñe, e'ñe puepopa'otpa' o'ch e'ñe cohuen aneñet allenet sechateñ pamo'mte'. ⁵⁻⁶ Atet pena ñaña yenam. Yenampa' ama't añeñolla yechetspa' atarrcha' pa'namen esocmañen yeñosyen allot. Ñaña ñeñt̃ atto yeñosatse'ten sosey e'ñe yenamotpa' ñeñtpa' atet pena ñerra'mrrate' tso'. Ñehua, tso'pa' ama'tcha' añeñolla ya'torapa' mameshapa' o'ch epa'hua erracmañen puetsato'mar, allotpa' o'ch a'poyuonay ama't ora ñeñt̃ nanac yemorrentena. Ñeñtpa' atet pena ñaña eñosatse'teñets. Eñosatse'teñetspa' ama'tcha' mamesha yeñosatse'tpa' mameshapa' o'ch epa'hua erracmañen. Allempoñapa' o'ch cha a'huañerran ñeñt̃ cohuentetsa Yomporecop. Tarro'mar ñeñt̃ atto yeñosatse'tyenpa' allot huena esocmañen sosya'tsañe'chno ñeñt̃ añe patsro'tsen. Ñaña ñeñtpa' a'sosyatennay ora allohuen yocpa'ña. Ñaña allohuen eñosatse'teñetspa' arrot huena e'ñe oneñeñ

pa'netsroġ, allara coñcha'puetso all parraren tso' erraġaren. Ñeñtcha' a'sosyatene' ora allohuen ñeñt atet yocrrena arr patsro. ⁷ Ñehua, allohueney acheñeypa' e'ñe pomnaren yeġohueñ allohuen berroċhno, ñaña oteċhno, ñaña allohuen shechpeċhno, ñaña ama't ñeñt yeċha'yetsa oño'mar. Ora añeċhnopa' e'ñe pomnaren yeġohueñ. ⁸ Tarraña atto yeñosatse'tyen yenamoġpa' ama esesha' pomnaren penaye. Tarro'mar atto yeñosatse'tenpa' amate' errotenoġ yeunache, ñeñto'marña ċhocmach yeñosatse'tyen. Ñeñto'marña yeñosatse'teñapa' e'ñe atet pena ñerra'mrrate' shecheġ ñeñt nanac amtsañ. Shecheġ amtsañpa' ñerra'm ċho aċhay mameshapa' o'ch muetsay. ⁹ Ñaña añ ñeñtara yenamoġpa' ñato' errotenopa' o'ch ya'ye'ċhoċhtatoñ Yompor ñeñt Yepartseshar yepen. Tarraña errotenopa' ñeñtara añ yenamoġpa' ñato' o'ch yesasare'ch yamo'ts ñeñtara ñeñt yeċhcat Yompor ñeñt puetma'ntatara atet ñerra'm ña. ¹⁰ Ñeñto'marña masheñneshacha' ñaña noċhaneshacha' sapa' amach atet seġatsto tarro'mar ama poċteyaye e'ñe yenamoġpa' allot yenamateññañ yamo'ts Yompor pa'nateña, ñato' elloñapa' o'chċho' alla yesasare'ter yamo'ts ñeñtara añ yenamoġ. Sapa' amach atet seġatsto tarro'mar po'poñ Yompor pueyeċhcatar, ñeñtapa' ama atteye' ġanneneto. ¹¹ Ñato' o'ch netma'ntacha atet: Ama't sapa' señoŧeñ ñerra'm erroġ poten oñ e'ñe cohuenpa' amach erroteno poto ñaña all oñ ñeñt ċha rreno'sen. ¹² Ñaña masheñneshacha' ñaña noċhaneshacha' ama't sapa' e'ñe señoŧueñ, ñerra'm yenare't poporrrpa' amach pue'mer ġanoña ñaña parte allempo me'ten, amapa' ñerra'm yenare't ompa' amach pue'mer ġanoña ñaña poporr.* Ñaña ellopa' e'ñe señoŧueñ, ñerra'm erroġ poten oñ e'ñe cohuenpa' amach errotenoġ poto ñaña all oñ ñeñt ċha poserrsastena. Ñeñto'marña yeñoŧeñ yocoppa' ama poċteyaye o'ch yorrtat ñeñt epa ñeñtara yenamoġ. Ñeñt paŧerrpa' atto ya'ye'ċhoċhtateññañ Yompor, po'poññaapa' o'chċho' alla yeñosatse'terr allohuen pa'namen sosya'tsañ ñeñtara yenamoġ.

Añpa' ñeñt atet pena eñoŧeñets ñeñt huetsa e'ñe yañeña yocġaġñoġ

¹³ Ñehua, te'pa' o'ch noterrserr po'poñ. Ñerra'm eñall sesho ñeñt otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñt e'ñe cohuen

* **3:12** Po'ñoċh arrpa' añ toma'ntatanet higoċh ñaña uva ñaña aceituna tarro'mar ñeñt ċhokuets Palestino. Ñeñtapa' atet oten: "Ñerra'm yenare't higoċhpa' amach pue'mer ġanoña ñaña aceituna, amapa' ñerra'm yenare't uvachpa' amach pue'mer ġanoña ñaña higo."

acheñ attoch acheñenesha'pa' eñochet po'ñoche'pa't eñotuenan ñeñt' cohuentetsa Yomporecop. Tarraña ellopa' amachña cha ommo'chatsteto atto e'ñe cohuenare' es pa'yenet. Tarro'mar ñerra'm po'ño'ch es yeñotenpa' o'ch yeñoch ñaña ñeñt' atto es yepa'yen e'ñe cohuenpa' ama ommo'chpahuoyaye. ¹⁴ Tarraña ñerra'm sapa' attera nanac sa'tsrre'muena seyo'chro e'ñe sesope'chapreteño't samo'ts ñaña ñerra'm aña sema'yo'chrena ñeñt' e'ñe socpa ñeñt'epña'pa' ama pocteyaye o'ch sommo'chena atto es seño'tyeneñ mamesha'tets. Tarro'mar ñerra'm ñeñta atarr yommo'chatene'pa' ñeñt'pa' attaca'yeña yeshquën. ¹⁵ Tarro'mar ñeñt' atet eñoteñetspa' ama arro'teye' hueno Yomporeshot. Ñeñt'pa' arrota huena e'ñe ya yoctapño't ñeñt' patso'marecpa. Ñaña ñeñt' atet eñoteñetspa' arrota huena e'ñe oneñet poctapño't. ¹⁶ Tarro'mar ñerra'm chocma ya'tsrre'muena yesope'chapreteño't yamo'ts amapa' ñerra'm aña yema'yo'chrena ñeñt' e'ñe yocpa, ñeñt'pa' allot huenaña e'moñe'tanna'teñets, ñaña allohuen sosya'tsañe'chno.

Atet pena eñoteñets ñeñt' huetsa Yomporeshot

¹⁷ Tarraña ñerra'm po'ño'ch Yompor eñotañ yepene'pa' ñeñt'pa' atet'cha' yepena: Ñanompa' o'ch yesuanom allohuen sosya'tsañe'chno ñeñt' ama pocteye' enteno Yompor, ñaña amach allo'na atarr atsrre'mo'chen yenteno, ñaña e'ñech cohuen yentueñ allohuen yamo'tsesha', amachña cha po'poñ yentueno. Ñaña ñerra'm po'ño'ch Yompor eñotañ yepene'pa' chochña ya'muerañtena, ñaña e'ñech cohuenare' es yorrtatyen yamo'tseshacop, ñaña ñerra'm erro'ten yotenpa' e'ñech po'ño'ch atet yepena, amachña cha yeshcare'tanneno. ¹⁸ Ñeñt'ña ma'yo'chrenaya attoch e'ñe cohuen yentannenapa' ñeñt'pa' añ muenen o'ch etsotan attoch allohueneypa' o'ch yepohuerra ñeñt' atet pocte' enten Yompor.

4

Ñeñt' coshatse'tyenaya ñeñt' patso'marecpapa' ñeñt'ña e'moñe'tene' ñeñt' cohuentetsa Yomporecop

¹ Ñehua, te'pa' o'ch yoctape'ch po'poñ attoch seño'ch erro'tte' huenaña e'moñe'tanna'teñets ñaña orroteñets ñeñt' chocma orrtatyenet sesho. Ñehua, ñeñt'pa' arro't huena e'ñe sa seye'chapretanna'teño't pa'namen ñeñt'ña quellara'yetsaña seyo'chro. ² Tarro'mar ñerra'm erro'teno nanac es yeye'chapretena, ñerra'm yapa' ama yecheñepa' o'ch'cho' ñeñt'o'mara yemtsanna'ta. Ñaña ñerra'm esempo es yesope'chapreten, ñerra'm yapa' ama yecheñepa'

o'ch'cho' ñeñto'mara yorrota, amapa' o'ch'cho' ñeñto'mara yeçllaranna'ta. Ñehua, yapa' añoñ ama yecheno ñeñt nanac yemna'yen, tarro'mar ama añ yenamueno Yompor. ³ Ñato' ama'tcha' es yenañpa' amach yagape, tarro'mar ñato' añeçpach es yenamueñ ñeñt ama pocteyaye ñocop. Tarro'mar ñato' añeçpach es yenamueñ attoch yañapa' o'ch nanac es yocshatse'tyena allo. ⁴ Ñehua, ahuañapa' soten ahuo'ch same'ñera Cristo, tarraña te'ñapa' añ socshatse'tyena po'poñ. Ama't señoñe ñeñt coshatse'tyenaya ñeñt patso'mareçpapa' ñeñña e'moñe'tene' ñeñt cohuentetsa Yomporecop. Ñeñto'marña ñerra'm yapa'cho' o'ch alla yocshatse'terra ñeñt patso'mareçpapa' o'ch'cho' alla ye'moñe'ter yaña Yompor. ⁵ Ñeñtpa' ama orrena oteno Yompor po'ñoñ ñeñt aquellcaret ahuatoteñ, ñeñtpa' atet oten. "Yompor Puecamquëñ ñeñt chorratenya ñapa' e'ñe puemorrenteñoeypa' nanac mopa'teney." ⁶ Ñeñto'marña Yomporpa' çhocmach mueneñ o'ch ahuañecat pa'y attoch amach alla yepsere ña. Ñeñto'mar ama't Yompor po'ñoñopa' e'ñe anuañet ahuatoteñ ñeñtpa' atet oten: "Yomporpa' amach errotenot yenpano ñeñt e'ñe cohuen entetsa ñañoña, amachña Yomporeye' ame'ñeno. Ñeñto'marña Yomporpa' añach nanac yenpuen ñeñt e'ñe pueñmañesha' ame'ñenaya ña." ⁷ Ñeñto'marña sapa' çhocmach e'ñe cohuen same'ñeña Yompor. Añcha'ña sa'pare't oneñet tarro'mar ñerra'm atetcha' se'papa', oneñetpa' queçhpa'nerrescha'. ⁸ Ñeñto'marña o'ch alla separrocmaterr epas Yompor. Tarro'mar ñapa' çhocmach alla aguërrer. Te'pa' ama't o'te' se'pohua ñeñt ama cohuenayaye Yomporecoppa' te'pa' añ poctetsa o'ch alla soctape'cherr cohuen attoch Yomporpa' o'ch alla enterres e'ñe cohuen. Tarro'mar sapa' ama't semneñeñ o'ch semorrentera Yomporpa', tarraña çhocma semorrentena ñaña ñeñt patso'mareçpa. Ñeñto'marña te'pa' añ poctetsa o'ch sa'ypo'ña'huerr sosya'tsañ ñeñt seyoçhro'tsen. ⁹ E'ñe sa'pare'teñoñ Yomporpa' çhosa llequërrtsa. E'ñe sellquëñoñpa' seyahuepa'ch. Ñaña amach allo'na seche'tatsetneno, çochña seyahua. Ñaña amach allo'na nanac es socshatse'tneno, çochña sellca. ¹⁰ Ñaña o'ch sa'meterr so'chñar Yomporresho attoch Yomporpa' o'ch alla tantaterres.

Atto ama atompare'tpahuo yamo'ts

¹¹ Masheñeshacha' ñaña noçhaneshacha' amach sesasare'tanna'tatsto. Tarro'mar ñerra'm esesha' sasare'tene' pamo'ts, amapa' ñeñt tompare'tene' pamo'tspa' po'ñoçhpa'

o' achmāre'tan ñaña Yompor po'ñoñ ñeñt atet anaret.
 (Tarro'mar Yompor po'ñoñ ñeñt atet anaretpa' atet oten,
 yemorrentanna'tepa'ch allohueney.) Tarro'mar ñetpa' chach
 otenapuetañ Yompor po'ñoñ ñeñt atet anaretpa' ñato' amate'
 es sherbeno. Tarraña ñerra'm esempo atet yepenapa' chach
 yottena ñerra'mrrate' yañeña e'ñe es eñotuets. Tarraña ñeñtpa'
 ama atteyaye. Aña pocte' chocmach yame'ña Yompor
 po'ñoñ ñeñt atet anuaret. ¹² Tarraña yapa' yeñoteñ e'ñe
 puesheñarra ñeñt nene' añ ñoñets ñeñtara Yompor ñeñt e'ñe
 po'ñoch es eñotets. Ñeñtara Yompor ñeñt eñotene' ñeñtcha'
 allpon a'queshpaterr; ñaña ñeñtcha' allpon chenquerrtsa.
 Eso'mare'tña sañapa' chate' sotenapañ ñato' e'ñech sañeña
 eñote' ñeñt ama cohuenayaye acheñ.

Atto ama eñotpahuo ñeñtcha' yetantoya tsapatonet

¹³ Te'pa' o'ch notas ñaña po'poñoneñ. O'ch se'mñoten
 ñeñtes atet otets: "Te'ch amapa' ñato' tsapatcha' o'ch
 ahuen bachayo po'poñ anetso, allcha' netaruasena' paterr
 char attoch negana shonte' quelle." ¹⁴ Tarraña ama't
 atet soteneñpa' amaña señoteñeña ñato' escha' setantoya
 tsapatonet. Tarro'mar añ patsropa' e'ñe mamecpa
 yocrrena. Atto yocrrena arr mame' añ patsropa' e'ñe
 attey ñerra'mrrate' os ñeñt yenta'muene't ahuatecma
 chach rrema'chen e'ñe patso. O'chña enome'ta'muen
 atsne'pa' o'ch huañerr. ¹⁵ Ñeñto'mar aña pocte' o'ch soten
 atet: "Ñerra'm Yomporcha' muenatspa' a'natnepa' attoch
 neña'yes ñeñt atet noctape'chen." ¹⁶ Tarraña sapa' ama
 atteye'ña sepeno. Ñeñtapa' attachña pa'namen sotyen
 e'ñe sommo'cheñoñ. Tarraña ñeñt atto yommo'chyenapa'
 ñeñtpa' ama cohuenayaye. ¹⁷ Ñeñto'marña ellopa' o'ch
 alla noterrser: Ñerra'm esempo yeñoteñ yeyochro ñeñt
 cohuentetsa Yomporecop, ñerra'm amaña atet ye'popa'
 ñeñtpa' ñeñtña yo'chñar yepen.

5

Ñeñt atet otan eçllayoretnesha'

¹ Te'pa' o'ch se'mñoten ñeñtes nanac eçllayoretes.
 Te'pa' e'ñe seya'chpeñesha'pa' serranare'ta tarro'mar
 po'ñoch chocma eñall ñeñtcha' sehuapoya esempo ñeñtcha'
 semuerochtate'. ² Ama't te'pa' o' atta puetsana'tuen
 sechecom. Sapa' ñeñtña atarr semorrentena. Ñaña
 ñeñt nanac coçnesha' ñeñt sechorra'yenapa' o' atta
 pompere'chua. ³ Ñaña ama't te' seçllayorpa' o' atta
 chomatlle'chuen. Te'pa' ama es sherbeno. Yeñoteñ e'ñe

puechmatlle'cheñoť sečllayorpa' ñeñťcha'ña se'nuerre' saña sechets esempohuañen atet ñerra'mrrate' achamaretes to. Te'ña ama't o' mellapoterrmochapa' sañapa' allo'na seshonta'huanen sečllayor. ⁴ Ñaña te' ñeñť atta setaruasatyese't ñeñť ama setsa'tyese'tepa' te'ña ñetpa' puellquëñoťetpa' nanac eñenet socop. Ñeñťo'marña te' Yompor ñeñť nanac Paretspa' e'muenanet ñeñť atet pueya'chpeñesha' čhocma eñenet socop. ⁵ Ñaña sa aña patsropa' esocmañen sechen ama es sepallteno ama't mamesha. Ñeñťo'marña ñerra'm erroťenčho' nanac cohuen sentenpa' atetča'čho' sepena. Chach sottena ñerra'mrrate' chañcho ñeñť nanac errataret attoch nanac ota'. Ñerra'm o'chña nanac esoya'tpa' allempoñapa' o'ch muetset. Sapa'čho'ña atetča' perres saña Yompor esempohuañencha' huerra. ⁶ Tarro'mar sapa' čhocma semueročhtatyen' ačeñ ñeñť ama es yečcatetso attachña sapa' semtsatyenanet. Ñaña ñetpa' amach erroťenoť a'qushp̄ateto ñañeñeta allempo sapa' soteñe'chenanet.

Atto ama amuenme'chpahuo cohuame'te' Cristo

⁷ Ñeñťo'marña masheñeshacha' ñaña nočhaneshacha' o'ch notas, čhocmach e'ñe sa'huantha'huanom ñeñť echarr sentyen, attoch secuame'ch Yepartseshar Cristo esempohuañencha' huerra. Atetča' sepa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' čhocmach ñanom yecuen esempohuañencha' huapotyena esheccha' e'ñech cohuen es yečcatsa ñeñť nanac yemorrentyena. ⁸ Ñeñťo'marña sapa'čho'ña čhocmach es sa'huanten. Amach semuenme'chatsche tarro'mar o' mameshamerrapa' o'ch huerra Yepartseshar. ⁹ Masheñeshacha' ñaña nočhaneshacha' amach setanmare'tanna'tatsto, attoch Yompor ñeñť e'ñe es eñotetspa' amach otteñe'chuerrso saña ñerra'm esempoch huerra. Tarro'mar Yomporpa' o' allanerrmoch. ¹⁰ O'ch masheñeshacha' ñaña nočhaneshacha' soctape'ch ñeñť atet pa'yese't ahuat ñeñť a'mta'yese't Yompor po'ñoñ. Tarro'mar ñetpa' nanac ahuantete't atto nanac amueročhtatarettete't. Ñeñťo'marña sapa'čho'ña atetča' sepa saña. ¹¹ Po'ñočpa' yeñoteñ ñeñť nanac ahuantene' mueročhteñetspa' ñeñťpa' nanaccha' cosheñtso'tsen. Ama't sapa' señoťueñ ñeñť atet pa ahuat Job. Ñapa' nanac ahuantan topateñets. Ñaña sapa' e'ñe señoťueñ ñeñť atet poñ Yompor. Allempo mueročhetua Job Yomporñapa' alla apuer esocmañen attoch eñoch Yomporpa' nanac amueraña.

¹² Ñeñto'marña sa masheñeshacha' ñaña nochaneshacha' añ pocte' sapa'cho'ña añcha' ñanom sequechpa'hua. Ama't e'ñe erra'tsena pa'so'chño'pa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chño, ñaña amach sotatsto o'ch sena' señoñ Yompor po'patseñ pa'so'chño. Añcha'ña ñerra'm esempo e'ñe pocte' es sentenpa' attach sanap: "Atefte'ca'ye." Ñaña ñerra'm esempo ama es pocte' sentenopa' attach sanap: "Ama atteyaye." Allotpa' ñeñfach. Allochñapa' amach eñalle attoch otteñe'chuerres Yompor.

Añ pocte' chocmach yema'yocham̄psannena

¹³ Añña ñeñt poctetsa ñeñtcha' atet sepa. Ñerra'm erra'tsenotes muerochtatsapa' chochña sema'yocha. Ñaña ñerra'm esesha' e'ñe coshetsapa' e'ñe pocte' morrechetepa' allo ya'ye'chochtateñ Yompor. ¹⁴ Ñaña ñerra'm eseshas atсна'tetspa' añ pocte' o'ch sagotach ñeñt pompornesha' pen ñeñt ame'ñetsa, attochña ñetcha' ma'yocham̄psset atснаñe't. Allotpa' e'ñe puechore'teño'tet Yomporpa' noñetepa' coñe't es puese' atснаñe'tesho. ¹⁵ Ñerra'm e'ñe pueyemteño'tet Yompor ma'yochetpa' atснаñe'tñapa' correrrach. Tarro'mar Yomporpa' ñach ahuamencat perre'. Ñaña ñerra'm añ o' p̄ohua ñeñt ama pocteyayepa' allempo Yomporpa' o'ch alla peretnerrñañ po'chñar. ¹⁶ Ñeñto'marña añ pocte' o'ch sa'meta'huerr allohuenes so'chñar. Allochñapa' chocmach sema'yocham̄psannena attoch socrerra e'ñe cohuen. Ñaña ama't erra'tsena acheñer ñerra'm e'ñe cohuen cotape'chen Yomporecop ñaña ñerra'm e'ñe pueyo'chrocmañen ma'yochetpa' atetña e'mñotenña Yompor. ¹⁷ Atet pa' ahuat Elías ñeñt a'mtaye't Yompor po'ñoñ. Ñeñtña Elías ama't atta ñerra'm ya ñeñtey arromña'tey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñaña meterrerr pechapña arorr ama huateno. ¹⁸ Allempoñapa' o' alla ma'yocherrerr attoch enamuerran Yompor huaterrepa'. Allempoñapa' o' alla huaterra, ñaña allempopa' o' alla choparesyerr narmetso'chno.

¹⁹ Masheñeshacha' ñaña nochanesha ñerra'm sa puesheñarrotes o'ch alla sepurrerra ñeñtes te'pa' cotene' cohuen Yompor po'ñoñ, tarraña ñerra'm esesha'ña alla soctape'chatterre' e'ñe cohuenpa' ²⁰ sapa' señoche'pa'ch ñeñt atet cotape'chatets e'ñe cohuenpa' choch a'queshpatenan pamo'ts puecamquëñ ñeñt atarr ochñañ ñaña choch peretnateññañ allohuen shonte' po'chñar. Te'pa' ñeñtach notas. Allohua.

AÑ ÑANOM SAN PEDRO PO' CARTA 1 SAN PEDRO

Atto Pedropa' quellcan carta allohuenacop ñeñt ame'ñetsa ñeñt atta a'parratse'tataret

¹⁻² Masheñeshacha' ñaña nochaneshacha' ñeñtes a'yetaten ñeñt sa'muerochtatene'. O' e'ñe sesuanom seney o' atta a'parratse'tataset allemeña anetso'mar, all anetso Ponto ñaña Galacia, ñaña Capadocia, ñaña Asia ñaña Bitinia. Sapa' ñeñtes ahuatoteñ nase't Yompor Parets e'ñe ñocop. Ñapa' e'ñe eñotuase't sach a'cohuentatarettertsa Partsocop. E'ñe ña Puecamquëñpa' ñeñña sa'cohuentaterre'ña sa attotña e'ñe same'ña'hueraña Jesucristo. Attoña ña po'rraspa' ñeñña o' e'sshojuerrnasña so'chñar. Na Pedron sequellquëne'ña añ carta, napa' ñeñen Jesucristo puellsensaren. E'ñe nehuom'cha'teñotes sa napa' o'ch notas: Yomporpa'chña atarr sebensare'tañpene', ñepa'chña socshatene'ña e'ñe sa seyo'chro allohuenes.

E'ñe yeyemteñot Yepartseshar Jesucristo chocmach yecuame'ten ñeñt o'patataretey

³ Te'ñapa' aye'chochtaterrapo'ch Yompor Parets ñeñt Yepartseshar Jesucristo Pompor ñeñtara ñeñt Po'yomporer pen, tarro'mar o' ye'ñallettera etserra e'ñe ña nanac puemuereñotey. Allempoteñña ya e'ñe yeyemteñot ña chocmach yecuame'teñ esempohuañen tarremphua allempoch ama ya'rromña'terro. Atto Jesucristopa' o' tanterra, ñeñto'marña yapa'cho'ña yecuen yamña attoch amach ya'rromña'terro. ⁴ Ñaña yeyemteñot chocmach yecuame'ten ñeñt o'patataretey pue'ntañot tarro'mar allpa' allña añno'tarettenaña alloch yequeshperra. Ñeñña queshpeñetspa' amach ahuañaña'terro, ñaña ama asosyatño, ñaña ama amllasha'tño. ⁵ Sapa' e'ñe seyemteñotña Cristo Yomporpa' a'natasepa'ch. A'natasepa'ch chocma attoch sequeshpa'huerra esempohuañencha' mellapoterra. Yompor po'huamencopa' a'natasepa'ch attoch e'ñe señotuerr po'ño'ch e'ñech sequeshpa'huerra.

⁶ Ñeñto'marña te'pa' allohuenespa' socshepa'ch. Ama't te'ña atto semuerochtenapa' ñeñtpa' e'ñe mamecpa. Tarraña ama't o' çhaponasa pa'namen topateñetspa' sapa' chocmuepa'ch socsheña Yompor. ⁷ Tarro'mar nanac huomenc echarr yenteñ, tarraña Yomporpa' eñochcha' ñerra'm po'ño'ch e'ñe yame'ñeña ña. Ate't ñerra'm oropa'

čhoch ñanom atserrtachtet huomenc allochñapa' o'ch eñochet ñerra'm po'ñočh ñeñtpa' e'ñe'f'e' oroche'. Ñeñña ama't oropa' huañerrcha' esempo. Ama't nanac tsa'te' oro, tarraña atto po'ñočh yame'ñera Cristo, ñeñña ello nanac sherbets. Ñerra'm po'ñočh yeyemteña ña, yeyemteñoť ñapa' e'ñech cohuen entyesuerrey esempohuañencha' huerra Jesucristo, attochña e'ñe cohuen yecohuentapretera, e'ñech cohuen ya'micha'tarettapretera.

⁸ Jesucristo ama't ama sentarñepa' te'ñapa' o' semorrentera. Ama't ama senteñe, te'ñapa' o' same'ñera. E'ñe socsheñeshocmañen o' same'ñeña, ñeñña cosheñetspa' atarr nanac cohuen. Te'pa' amach erra yenerre'te yeñoñ ñeñtcha' atet yoterrerr. ⁹ Attoña e'ñe same'ñeñoť Cristopa' sa'queshpatercha' secamquëñ.

¹⁰ Ñaña o'ch notas, ama't ñeñt a'mta'yesaye't Yompor po'ñoñ ahuaťpa' ñeñña serrpare'tete't allempo attoch orrtaterrnay Yompor puemuereña alloch yequeshperra. Tarraña ñetpa' ama e'ñeye' eñochete'te errotente'ña alloch yequeshperra. (Ñehua, allempopa' amaca'ye orrtena' Cristo arr patsro.) Ñetpa' ñeñña nanac e'netañe't errotente'ña ñeñtcha' a'queshpatañterrtsa. Ñetpa' nanac a'p'to'tanna'tyesete't e'ñe ñagattseta errotente'ca'yeña Yompor puemuereña alloch e'ñe yequeshperra. ¹¹ Ñetpa'cho'ña e'ñe Cristo Puecamquëñña chorrahuete't ñeñña eñotatahuete't o'ch orrtterra ñeñtcha' Cristoterrets arr patsro. O'ch chap a'ñe patsropa' elloñapa' o'ch muerochtateret. O'ch amurochtataretetuapa' allempochña orrtaterranña po'cohuenña. Tarraña ñeñt a'mta'yesaye't Yompor po'ñoñ ahuaťpa' o' alla a'p'to'tanna'tyerreterr, ta', ¿eseshachña Cristoterrets? ¿Esempto'tcha'ña orrtterra? ¹² Yomporpa' eñotatanet ñeñtpa' amachca'ye ahuenaye' etsoterro; shonte'ch char allempochña etsoterra atet eñotatanet Yompor. Tarraña ñeñt eñotat allempopa' ñeñtpa' ama ñocpuetayaye, ñeñtpa' e'ñechca'ye yocop. Te'ñapa' ñeñt seserrpare'tatene' cohuen ñoñetspa' ñeñña señotatene' e'ñe cohuen ñeñt atet penaña ñeñt coťapñats. Parets Puecamquëñ ñeñt huetsa pue'ntañoťpa' ñeñña eñotatenahuetña attoch serrpare'tataset saña añ cohuen ñoñets. Ama't Parets po'mllañoťeñnashar ñetpa'cho'ña atarr mueneñet o'ch eñochet ñamet ñeñt o' señotuerr sa.

Añ poctetsa o'ch yepomhuerra yañeña e'ñe Partsocop

¹³ Ñeñto'marña te'pa' añ poctetsa e'ñe sa señoťeñoťpa' e'ñech cohuen soctape'chen. E'ñe seyemteñoť ñapa' o'ch secuame'teñ esempoch huerra Jesucristo. Allempopa' ellochña

nanac muera'huerrsa, cohuencha' es aphuerres. ¹⁴ Se'mñnoch Yompor atet ñerra'm ñapa' puechemerasha'ch perres. Amach aña seychatsto atet ñerra'm ahuat allempo ama señoteña'; allempopa' aña semnatse'tyese't ñeñt ama cohuenayaye. ¹⁵ Yomporpa' e'ñe cohuenare' es pen. Ñeñtara Yompor ñeñt o' hua'ñerrey ya. Ñeñto'marña yapa'cho'ña añ poctetsa o'ch yepomhuerra yañeña e'ñe Partsocop. Atet ñapa' e'ñe cohuenare' es pen, yapa'cho'ña añ poctetsa o'ch yepa' atet es pen ña. ¹⁶ Atet oteney Yompor po'ñoñoñ ñeñt anuaret ahuatoteñ: "Atet nepena na ñeñten Seyomporer sepen, napa' e'ñe cohuenare' es nepen, sapa'cho'ña e'ñepa'ch cohuenare' es sepen."

¹⁷ Yomporpa' ñach tsa'taterrahuet allpon ye'chcatyese'te't ñeñt ama cohuenayaye. Amach eñalleña ama't pueheñarra ñeñtcha' queshpatsa ñeñt ama ame'ñenaye ña. Atto yema'yocheña Yompor ñeñtcha' yetsa'tatuerraya, ñeñtepñapa' te'pa' am'cha'na'tpo'ch Yompor. Ama't allponmat socrrena arr patsro ñeñt'pa' ama sa'netsreyaye, e'ñech tayoteñ sem'cha'na'tnomñ Yompor. ¹⁸ Sapa' satañneshañpa' apa'nmaset pocta'ña atet pete't e'ñe orrena. Te'ña sapa' o' señoter Yomporpa' o' tsa'tuonasa attoch sesuanom ñeñt ahuatneshañ pocta'ña. Ama quellayoye' tsa'tonaye. Quellepa' ahuañaña. ¹⁹ Añña atto tsa'tonaya po'rraso Puechemer ñeñt Cristo. Po'rraspa' ñeñt nanac sherbets atet ñerra'm carrnerotollpa' e'ñech co'chnesha' muetsete't Partsocop. ²⁰ Ama't ama aye'chcatarettena' pats Yomporpa' o' nan Puechemer Cristo, ñach tsa'terraya yo'chñar. Ama't ahuatoteñ anare'tpa' tarraña ama orrteno aña patsro. Te'ñapa' orrta e'ñe yocop, tarro'mar te'pa' o' mellapoterrmocha. ²¹ Yame'ñeñoñ Cristopa' o'ch yeyemterrñaña Pompor, tarro'mar Pomporpa' o' tantater ama't o' rromhua. Tantater attoch alla e'ñe cohuentater Pompor. Ñeñto'marña te' yapa' o'ch yeyemcha Yompor, o'ch yecuame'toñ ñeñt o'patatenya.

²² Sapa' o' same'ña'hua ñoñets ñeñt e'ñe po'ño'ch Yompor po'ñoñ. Ñeñto'marña e'ñe Parets po'huamencot o' sesuanom allpon sosya'tsañ ñeñt seyo'chro'tsen, attotcha' e'ñe semor-rentanna'ta. Te'ñapa' semorrentanna'tepa'ch poctacma e'ñe seyo'chrocmañen. ²³ E'ñe yame'ñeñoñ Yompor po'ñoñpa' o' ye'ñallettera etserra. Añ eñalleteñetspa' ama atteyaye ñerra'm allempo eñalletey yachor. Atto eñalletey yachorpa' ñeñt'pa' huañerrcha'. Añña Yompor po'ñoñoñña ye'ñallettera ñeñt'pa' amach ahuañaña'terro ama't errponaña. ²⁴ Tarro'mar Yompor po'ñoñ ñeñt anuaret ahuatoteñ ñeñt'pa' atet oten: Allohueney ñeñtey arromña'teypa' attey ñerra'mrrate'

ta'te' tarro'mar mamecpa yocrrena. Ñaña ñeñt' cohuen yentyen ya, ñeñtpa' atet ñerra'mrrate' ta'te' puerorer. Ta'te'pa' o'ch hueya'hua pue'chorpa' puerorerpa'cho'ña ama't co'chnesha'tenañpa' shor'cha'tuach.

25 Tarraña ñeñt' Parets po'ñoñpa' amach ahuañaña'to ama't errponaña.

Ñeñt' po'ñoñpa' ñeñtara cohuen ñoñets ñeñt' o' serrpare'tatuaset saña.

2

1 Te'ñapa' añ poctetsa o'ch sesuanem allohuen ñeñt' ama cohuenaye' enteno Yompor. Atto ora allpon allo seshcanna'tenapa' o'ch seque'chpa'huer. Añ shecanneñets ñeñt' attoch entenes po'psheñeñ e'ñe cohuenpa' ñeñtpa'cho'ña añ palltetsa te'pa' o'ch seque'chpa'huer. Atto seye'chapretannenapa'cho'ña o'ch sepuesuer ñaña. Sasare'teñetspa'cho'ña o'ch sepuesuer. 2 Añña poctetsa atarrcha' yeye'cheññaña Yompor po'ñoñ e'ñe atet pena ematollpa' nanaccha' ye'chenana puemomos. Yapa'cho'ña añ poctetsa o'ch yeye'chya atet ñerra'm ñeñt' yemomos yepen, tarraña ñeñtpa' ñeñtara Yompor po'ñoñ. Yompor po'ñoñpa' nanac cohuenare' alloch yocshaten yecamquëñ, attotcha' allo'na yesen eñotnomue' ñeñt' poctetsa Yomporecop attochña a'queshpatareteycha'. 3 Sapa' o' señotuerrñañ Yompor pemuereña atto ñapa' nanac muerensa. Ñeñto'marña añ poctetsa sapa'cho'ña o'ch seye'cho'ña po'ñoñ.

Atto Cristo atma'ntataretta mapue'; elloña ñapa' nanac sherben alloch e'ñe yocrrerra

4 Añ poctetsa o'ch separrocmaterr epas Cristo. Cristo ñeñt' atarr sherbets atet ñerra'm mapue' ñeñt' nenet quellpach pa'rrpöt allo orratenet pocoll ñeñt' nanac echarr. Tarraña mapue' ama't nanac sherbenpa' ama añeyaye alloch e'ñe yocrra. Añña Cristo atto sherbenpa' allochña e'ñe yocrra po'ño'ch. Ama't acheñenesha' ama't ama cohuenaye' enteñeto Cristopa' Pomporñapa' e'ñe pocte' enteñ. Pomporñapa' ña acre' ñeñt'cha' nanac sherbats ñocop atet ñerra'm mapue' ñeñt' nanac cohuen allochña tomatenan pa'paquëll. 5 Yomporpa' pa'paquëll penan allohuen ñeñt' ame'ñenaya ña. Yapa'cho'ña attey ñerra'mrrate' mapue' alloch tomatenan pa'paquëll. Tarraña yapa' atteyëñ ñerra'mrrate' mapue'pa' tarraña yapa' ñeñtey o'rrerrñañot yocrrena. Yapa'cho'ña añ poctetsa o'ch yattecmatuerr ñerra'mrrate' Parets pa'paquëll. Allñapa' yesherberrcha' Partsocop. Yecamquëño'pa' o'ch yepomhuerra e'ñe yeyo'chrohuen yepomuerra attoch

Paretspa' coshena. Yame'ñeñoť Jesucristopa' o'ch yesherber errotenchá' muenateney Parets. ⁶ Tarro'mar atet oteney Yompor po'ñoñ ñeñť anuaret ahuatoteñ, ñeñťpa' atet oten Yompor Cristocop:

All anetso Sión ñeñťara Jerusaléñ o'ch nemñanet puesheñarr ñeñť atarr sherbets ñeñť atet ñerra'mrrate' mapue' ñeñť acrareť ñeñť nanac sherbets ñeñť alloch natomat nepaquéll. Ñerra'm esesha' ame'ñenaya ñapa', ñetñapa' amach alla e'nerrete'te po'psheñeñ.

⁷ Ñeñťey ame'ñenaya Cristopa' e'ñech yocsheñeshocmañen yenteñ. Añña ñeñť atpare'tene' Yomporpa' atetcha' enteñet Cristo ñerra'mrrate' mapue' ñeñť huapore'ten ñeñť tomatene' pocoll tarro'mar atet enteñet Cristo ñerra'mrrate' ama es sherbeno. Ñeñťo'marña Yompor po'ñoñpa' atet oterryer:

Añ mapue' ñeñť huapore'ten ñeñť tomatene' pocoll, ñeñťña mapue'pa' Yompor nene' ñeñťcha' nanac sherbets.

⁸ Añ ñeñťara Cristo ñeñť toma'ntenaya

Mapue' allcha' epoto'tena ñeñť ama ame'ñetso ñeñťcha'ña a'shoratahuet chenquéñtso.

Añ epoto'teñetspa' añ toma'ntena atto atpare'teññañet Cristo po'ñoñ. Ñeñťo'marña atet anaret, ñerra'm ama yame'ñyopa' e'ñech yechenca'huerra.

Ya ahuatpa' ama esona'tareyayye, te'ñapa' e'ñe Yomporena'tarey

⁹ Tarraña sapa' ama añeyayso ñeñť atpare'tene' Yompor. Ya ñeñťey ame'ñenaya Yomporpa' atetcha' enteney ñeñťey acraretterrtsa ñocop. Ñaña atetcha' enteney ñeñťeycha' sherberrets Partsocop, ñeñťeycha' anaretterrtsa ñocop. Ñaña e'ñech Yomporena'tar enteney. Ñeñťo'marña yocoppa' añ pocetsa o'ch yorrtatyesoñ po'cohuenña. O'ch yeserrpare'toñ atto ñapa' cheterrey checmetot all sosya'tsañoť, te'ñapa' o' chapaterrey e'ñe ña po'puetarenño all e'ñe cohuentena ña. ¹⁰ Ahuatpa' ama esona'tareyayye, te'ñapa' Yomporena'tarey. Ahuatpa' ama amuerareťeyayye, te'ñapa' o'ya'muerareťterra.

Atto cohuen es yepen attochña e'ñe cohuen yesherbeñ Yompor

¹¹ O'ch masheñneshacha' ñaña nochaneshacha' e'ñe nemorreneteñotes o'ch notas: Sapa' ama't seyçhenañ añe pat-sro ñeñťpa' ama sa'netsreyaye. Ñeñťo'marña añ pocetsa o'ch sa'ypo'ñam̄pes ñeñť muenatse'tyese't sechets. Atet muena'yen yechetspa' ñeñťña quellarene'ña yecamquéñ; mueneñ o'ch a'chencatonay yecamquéñ. ¹² Ñeñť ama ame'ñetso seshopa' añ pocetsa o'ch sorrtratoñ ñeñť atet e'ñe

cohuenare' es sepen. Allochñapa' ñerra'm mueneñet o'ch sasare'tasetpa' o'ch entonaset atto e'ñe cohuenare' es sepen. Allochñapa' ñerra'm esempo huerra Cristo attoch eñotatuerey ñeñt atet ye'pa'yena, ñetpa'cho'ña o'ch aye'chochtaterrñañet Yompor.

13 Te'pa' o'ch notas ñaña, allpon ñoñets ñeñt nen añcha'taret añ patsropa' añ poctetsa o'ch same'ñya. Yame'ñeñot Yepartseshar Cristopa' añ palltetsa o'ch yame'ñera ñaña allpon ñoñets ñeñt nen ñeñt atarr añcha'tarettetsa arr patsro. 14 O'ch same'ñera ñaña ñeñt mueñen añcha'taret ñeñtcha' a'coñchatuene' allohuen ñeñt ama pocteye' es petso, ñaña ñeñtara ñeñtcha' coshapreene' allohuen ñeñt e'ñe cohuenare' es pets. 15 Tarro'mar atet muenen Yompor: chocmach yorrtaten atet e'ñe cohuenare' es yepen. Ñato' yorrtateño' e'ñe cohuenpa' o'ch quechpa'huerret atto eñosatse'tyenet. Ñetpa' patpare'teño'et eñosatse'tyenet tarro'mar ama es eñoteneto. Ñato' yorrtateño' e'ñe cohuenpa' o'ch yequechpatuerranet atto eñosatse'tyenet.

16 Ñaña e'ñech same'ña cohuen ama't Yompor po'ñoñpa' ama añcha'nochenaye' senteñe socop. Tarraña ama't ama añcha'nochteno po'ñoñ yocoppa' amach allo'na ye'pa'yesneno ñeñt sosya'tsañ. Añcha'ña o'ch atet yame'ña atto pueyochresha' perrey Yompor. 17 Añ poctetsa o'ch semcha'na'ch allohuen acheñ. O'ch semorrentanna'ta allohuenes ñeñtes ame'ñetsa. O'ch semcha'na'ch ñaña Yompor. O'ch same'ñya ñaña ñeñt añcha'taretetyetsa arr patsro.

Añ poctetsa o'ch yemueroçhtaprecha Cristo

18 Ñeñtes ataruasataretespa' o'ch notas, añ poctetsa socop. Semcha'na'teño'pa' o'ch same'ñya samo'mte'. O'ch same'ñya samo'mte' ñeñt amueraña. Allo'pa' o'ch same'ñya ñaña ñeñt ama't ama amueraño. 19 Ñaña ama't po'psheñeñ mueroçhtateney ama't allempo yepen ñeñt cohuenare', e'ñe yame'ñeñot Yomporpa' amach ya'tsrre'matsto, ñeñtpa' e'ñech pocte' enteney Yompor. 20 Ñerra'm esempo cho erro' yepeñ po'psheñeñ ñerra'm coñchatuerey, ñeñtpa' e'ñe pocte' yecoñchepa'. Ama't ama ya'tsrre'mo allempo, tarraña amach cohuenaye' entenye Yompor, tarro'mar ñeñtpa' chocma mueneñ o'ch yecoñcha. Tarraña ñerra'm esempo ama't yepena ñeñt cohuenare' ñato' ama't mueroçhtatey po'psheñeñpa' ñerra'm ama ya'tsrre'mopa' ñeñtpa' e'ñech pocte' enteney Yompor. 21 Ñeñto'marña te'pa' yapa' o' hua'ñerrey Cristo attoch yame'ña'huera, allochñapa' o'ch yemueroçhtaprecha ña. Ñapa' ña ñanom mueroçhtatsa,

tarraña ñapa' yechatnerrey attoch añ poctetsa o'ch yemuerochtapretera ña. ²² Ñapa' ama eñalletatane'te po'chñar ama't coñe'ta. Ñapa' ama sheca'ye'te ama't parrocha. ²³ Ama't allempo sasare'chete'tpa' ñapa' amach ellopa' sasare'terraneto ñaña. Ama't allempo muerochtachete'tpa' ñapa' amach ellopa' otterraneto o'ch nemuerochtaterres saña. Ñapa' aña e'ñe yemte't Pompoy, tarro'mar eñoteñ Pomporpa' a'pocataterrñañcha', tarro'mar ñapa' ña e'ñe pocte' es pets. ²⁴ Ñapa' ña yecoñchaterr e'ñe ya yo'chñarot' allempo muerochta all corsocho. Allempoña rroma e'ñe ña po'chtso'tpa' o' ahuanmanperrey yo'chñar. Te'ña yocoppa' añ poctetsa o'ch ya'ypo'ña'huerr ora yo'chñar o'ch yeperra ñeñ't atet poctetsa Partsocop. Atto atarr atserrpare'terra ahua't ñeñ'tpa' attoña a'queshpaterrey ya. ²⁵ "Yapa' ahua'tpa' attey ñerra'm carrnero. Ya'ypo'ña'uye't ñeñ't yecuanpene'." Tarraña te'ñapa' o' alla yoctape'cherr e'ñe cohuen, o' yeyemtera Cristo ñeñ't yecuanpene', ñeñ'tara ñeñ't Pamo'mte' pen ñaña yecamquëñ.

3

Arrpa' all cotape'chatan ñeñ't arrollaretnesha'

¹⁻² Sapa'cho'ña ñeñ'tes arrollare'tes, o'ch notas saña. Añ poctetsa o'ch same'ñya serrollar. Chocmach same'ñya serrollar ama't serrollarpa' ama ame'ñenano Yompor po'ñoñ. E'ñe cohuen same'ñeñot' serrollarpa' ama't ama erro'ten es soteno ñato' atto'tpa' o'te' ame'ñerra ñaña serrollar. Ñetpa'cho'ña o'ch cotape'cherret e'ñe cohuen ñerra'm esempo entenaset atet e'ñe cohuenare' es sepen. ³ Amach e'ñe patrra sema'yo'chratsto atto secohuentena e'ñe orrena. Atet ñerra'm sechpa' amach ñeñ'ta sellquëno o'ch sañño'teñ e'ñe cohuen attoch enteney yamo'tsesha' e'ñe cohuen, tarraña ñeñ'tpa' e'ñe orrena. Ñaña amach e'ñe patrra sema'yo'chratsto attoch sech alloch secohuenta atet ñerra'm oro, tarraña ñeñ'tpa'cho'ña e'ñe orrena. Amach sema'yo'chratsto ñaña attoch sechorra'yesa e'ñe co'chnesha'. Añ aña'teñets ñeñ't yentapretannena e'ñe yechsopa' ñeñ'tpa' e'ñe orrena ortateney e'ñe cohuen. ⁴ Añcha'ña yema'yo'chra o'ch yecohuentena yeyochro attoch Yomporpa' entapretey e'ñe cohuen. Añ cohuentañets yeyochro ñeñ'tpa' ama entpahuoyaye tarraña ñeñ'tpa' amach ahuañañat'erro. Atet ñerra'm muereñets ñeñ'tpa' e'ñech cohuen entapreteney Yompor. Ñerra'm ama atsrre'mña'efayaye ñeñ'tpa'cho'ña e'ñech cohuen entapreteney Yompor. Ñerra'm e'ñe cohuen yoctape'chen, Yomporpa' entapreteney yoctap'ña atet ñerra'm ñeñ't nanac

sherbets, ñaña ñeñt nanac cochnesha'. ⁵ Atet ña'yese't ahuat coyanesha'chno ñeñt e'ñe cohuenare' es ña'yestse't Partsocop. Ñetpa' e'ñe pueyemteño't Yomporpa' e'ñe cohuen ame'ñyete't puerrollaret. Ñetña pueyo'chretpa' e'ñe a'cohuenchete't Yomporecop. ⁶ Atet pe't ñaña ahuat Sara. Ñapa' e'ñe cohuen ame'ñane't puerrollar Abraham. Ñapa' e'ñe atet entane't puerrollar ñerra'mrrate' ñeñt pamo'mte' pen, nanac ame'ñye't. Sapa'cho'ña te'pa' sachorcha' seper Sara ñerra'm ama señchaño'ta es pocte' sepa'yeno samña.

Attecmach cotape' chatan ñaña ñeñt ataporetnesha'

⁷ Attecmach notas samña ñeñtes ataporettes. O'ch se-muerya setapor e'ñe cohuen. Sapa' o'ch senteñ samña setapor e'ñe cohuen, tarro'mar coyanesha' ama tama ahuamencate. Añcha'ña o'ch sagaphuer parro ñeñtcha' apas Yompor. E'ñe puemuereno'tes sapa' apascha' allochña sapa' corretsasach socsheñeshocmañen e'ñe tayoteñ errponañohuen. O'ch seycha e'ñe cohuen epas setapor, attotcha' Yomporpa' e'mñnotas ñerra'm esempo sema'yochya.

⁸ Te'ñapa' o'ch notas allohuenes. Añ poctetsa o'ch soctape'cherr e'ñe patrra ñeñt amuerañtetsa. Ñaña o'ch sellcapretanna'ta ñerra'm esempo es sellcatyene'. Ñaña e'ñech cohuen yemorrentanna'ta allohueney ñeñtey ame'ñetsa, ñaña e'ñech cohuen yemueranna'ta. O'ch es yentaprech po'psheñeñ e'ñe cohuen, amachña yañeña e'ñe cohuen entatstatso. ⁹ Ñerra'm po'psheñeñ erro't ñaspa' sapa' amach setsa'tatatsche eso. Ñerra'm po'psheñeñ sasare'taspa' sapa' amach sesasare'tatsterraneto. Añcha'ña o'ch senamoñ Yompor a'nachepa', tarro'mar atet muenen Yompor atetcha' ye'pa. Allochñapa' ñerra'm atet ye'papa' ñapa' o'ch a'natenya yamña. ¹⁰ Tarro'mar atet otene'y Yompor po'ñoñ:

Ñerra'm yemneñ o'ch yeycha e'ñe cohuen, ñaña ñerra'm yemneñ o'ch yocsherrapa' ñeñt'pa' añ poctetsa, amach yesasare'tatsto, ñaña añ poctetsa, amach yeshcare'tatsto.

¹¹ Ñerra'm yemneñ e'ñe cohuen yocsherra, añ poctetsa o'ch yesuanem ñeñt ama cohuenaye' enteno Yompor. Ñeñt e'ñe atet muenen Yomporpa' ñeñtcha'ña atet ye'pa. Ñaña añ poctetsa, o'ch ye'nerr attoch yentannena e'ñe cohuen epay yamo'tsesha'. Te'ñapa' allo'nepa'ch yesen entanna'ttsa e'ñe cohuen.

¹² Yomporñapa' e'ñech cohuan'peney ñeñtey e'ñe pocte' es pets. Ñapa' e'mñnoteney allempo es yenamueñ e'ñe ñesho. Añña ñeñt petsa ñeñt ama pocteyayepa'

Yomporñapa' amach cohuenaye' enteñe ama't mamesha.

Ñerra'm esempo e'ñe attota muerochtatenyet yapa' atar-rcha' cosheñtso'tseney

¹³ Ñerra'm sapa' chocma sema'yoçhrena ñeññ cohuentetsa Yomporecop, allempoñapa' amach esesha' errotenoñ semue-roçhtataye. ¹⁴ Tarraña ñato' errotenopa' o'ch mueroçhtataset ama't añ sema'yoçhrena ñeññ cohuentetsa Yomporecop. Tarraña ñerra'm e'ñe attota mueroçhtatasetpa' sañapa' atar-rcha' cosheñtso'tsenes. Amach semcha'tatstaneto ñaña amach sellcatsto. ¹⁵ Añcha'ña o'ch seyemcha Cristo e'ñe seyoçhrohuen. O'ch senteñ Cristo atarr cohuen Parets ñeññ Yepartseshar yepen. Ñerra'm esempo esesha'pa' o'ch a'p'to'tas ¿eso'marte'ña atarr same'ñeñaña Cristo? sapa' chocmuepa'chña e'ñe cohuen señoñeña atetcha' sanap e'ñe cohuen. E'ñe semuereñoñ e'ñech acoña sanapanet e'ñe cohuen e'ñe semcha'na'teñoñanet. ¹⁶ Chocmach e'ñe señañesha' seyoçhro e'ñech cohuenare' es sepen. Allochñapa' ñerra'm ama't esempo sasare'tenyetpa' ñeññña atto e'ñe pocte' es yepa'yen Cristocoppa' ñeññpa' ñeññcha'ña pencatahuet. ¹⁷ Añ pocte' ama't yemueroçhta atto ama't e'ñe cohuenare' es yepen. Ñerra'm atet muenen Yomporpa' pocte' o'ch yemueroçhta. Añña ñerra'm e'ñe yo'chñaroñpa' o'ch yemueroçhta, ñeññpa' orrenach yemueroçhta.

¹⁸ Ama't Cristopa'cho'ña ahuatpa' atarr mueroçhtachete't. Ñapa' ña rromats e'ñe parrocha allohuenacpay attotña tsa'tuerrnaya yo'chñar. Cristo ama't ña ñeññ e'ñe pocte' es petspa' attotña rroma yocop ñeññey ama pocteye' es petso. Tarro'mar rroma yocop attotcha' yeparrocmaterr epay Yompor. Ña ama't rroma po'chtso'tpa' puecamquëññapa' ama rromo. ¹⁹ E'ñe puecamquëño'tpa' arr ahuo' allo'tsa'yen ahuatnaneshañ puecamquëññesha' ñeññ alla ayottam'psare't, ñeññ ama cha'netso. Ñaña puecamquëññ allñapa' serrpare'tatosanet. ²⁰ Ñehua, añ puecamquëññ ñeññ ahuatnaneshañ ñeññ nanac atpare'taye't Yompor po'ñoñ allempo corre't Noé. Allempopa' Yompor nanac cohume'tanetañe't o'ch ame'ñyet. Allempoteñ Noépa' yeçhcatane't po'compuer, Yomporpa' cohume'tanete't esesha'ch ame'ñatsa. Tarraña ama eseshaye'ña ame'ñatso, e'ñe posocsheña ñeññ ame'ñatsa. Añ posocsheña ñeññ ame'ñaya Yomporpa' ñeññtara posocsheña ama esesha' ño'sha'tso, ñetpa' queshpet oñoñ. ²¹ Tarro'mar yapa'cho'ña te' ñerra'm yapataretta oñoñ Partsocop e'ñe atet pena ñerra'm ahua't Noépa' o' queshpa e'ñe oñoñ. Ñeñño'marña yapa'cho'ña

ñerra'm yame'ñeñoť o' yapataretta Partsocop e'ñe oñoťpa' yeñoteñ o' yequeshpa. Ñehua, ñeñť apataretteñetspa' ama añecpayaye o'ch yapa oño attoch huañ yepatser. Añcha'ña ñeñť alloch yequeshpa. Atto yapataretta Partsocop o'ch yenamñ Yompor etserrataterrnayepa' yocťapña e'ñe cohuen. Atto yapataretta Partsocoppa' yeñoteñ o' yequeshpa tarro'mar Jesucristo atto tanterra ama't rromhua. ²² Allempo tanterra Cristopa' o' ahuerr pue'ntaño. Te'ñapa' allo'tsen epuet Pompor e'ñe po'cohuenrot, allñapa' all partsoten. Ama't allohuen ñeñť Pompor po'millañoťeññanesharpa' ñetpa'cho'ña te'pa' e'ñe cohuen ame'ñeñet ñamet. Ñaña ama't allohuen ñeñť añcha'taretetyetsa pue'ntaño'pa' ñetpa'cho'ña ello ame'ña'hueñet ñamet. Ama't allohuen ñeñť ahuamencatechnopa'cho'ña ello ame'ña'hueñet.

4

Atto e'ñe yemuerochteñoťpa' o'ch huomenc yeđa' yeyocher Yomporecop

¹ Cristo allempo añe patsro'tsenpa' ñapa' e'ñe pocte' enteñ attoch muerochtateñet nanac. Ñeñťo'marña sapa'cho' e'ñepa'chña pocte' senteñ o'ch semuerochta e'ñe ñocop. E'ñe yemuerochteñoťpa' o'ch huomenc yeđa' yeyocher. Yemuerochteñoť yechtsopa' o'ch yequechpa'huerr ñeñť ama pocteyaye Yomporecop. ² Allochñapa' amach allo'na yeđa'nenno atet muenatyese't yechets ahuat. Yocoppa' añ poctetsa o'ch yocťape'chen ñeñť atet muenen Yompor. ³ Te'ñapa' ñeñťeshañach atet seđa' atet seđa'yese't ahuatoteñ ñeñť atet pena te' ñeñť ama ame'ñetso. Ñetpa' añ pa'namen pa'yenet ñeñť atarr sosya'tsañechno ñeñť allohuen pa'namen muenatse'tyeñets sosya'tsañ ñaña posa'tarñats ñaña coshatse'teñets ñaña orrare'teñets ñaña muechatse'teñets ñeñť ama't mameshapa' ama pocteye' enteñe Yompor. Te'ñapa' ñeñťeshañach atet seđa' ñeñť semnatse'tyen sa. ⁴ Ñeñť peyemte't ahuat ñeñť epađ porrare'te'tpa' te'ñapa' amach chapaneto pueyo'chro eso'marte' o'huañ porrare'tapretanet. Attoña ñetpa' mueneñetcha' o'ch achm'are'taset. ⁵ Tarraña te'pa' o'ch notas, ama't ñeñť ama ame'ñetso, esempohuañenpa' a'metatuerranetcha' Yompor. Po'ño'ch ñapa' ñach tsa'taya ñeñť ame'ñetsa. Ñaña ama't ñeñť ama ame'ñatsopa'cho' ñach tsa'tatuerrahuet, ora allohuenet, ama't ñeñť corretsa, ñaña ama't ñeñť o' colla'huena. ⁶ Ñeñťo'marña ama't ñeñť arromñañesha' o' aserrpare'tatuarettet cohuen ñoñets. Allochñapa' ama'tcha' a'coñchatareťetañ po'chtsotet atet

pena allohuen arromñatenesha', puecamquëñoõtëña'p
corra'huerretcha' e'ñe atet correna Yompor.

⁷ Te'ñapa' o' mellapoterrmocha. Ñeño'marña añ poctetsa,
e'ñe yeñotateñoõpa' o'ch yema'yochera Yompor. E'ñech
yetpara es yepen attotcha' amach yepseñe Yompor
ma'yochaya. ⁸ Añpa' ñeñtña ñanom nanac sherbets:
o'ch yemorrentanna'ta nanac e'ñe yeyochrocmañen.
Yemorrentanneñoõpa' o'ch yepretnanna'ta atto erroten
yepannena. ⁹ Ñaña e'ñech socsheñesha' o'ch sagapannena
e'ñe sepaclo. ¹⁰ Yompor puemuereñoõpa' o' e'ñe apa'yesuas
attoch setorra'yesa e'ñe ñocop. Te'ñapa' o'ch notas, o'ch
seyenpanna'ta año ñeñt apuenes Yompor. Attochña
sesherbatesñañña Yompor puemuereña. ¹¹ Ñeñtpa'
atet ñerra'm eseshas serrpare'tatspa' Yomporepa'chña
po'ñoñ seserrpare'ten. Ñerra'm eseshas yenpuene'
po'psheñeñpa' Yomporepa'chña po'huamencot seyenpan-
nena. Allochñapa' yeparrocmateñoõ epay Jesucristopa'
o'ch ya'ye'chochtatuerrñañ Yompor. Yomporepa'chña
aye'chochtatuapo' allohueney. Añcha'na'tpahuepa'ch
po'partsoña tayoteñ errponohuañen. Ñeñtpa' atepa'chña
Nompore.

*Ñerra'm esempo sasare'tenyet atto yapa'yecristona'tarterra
yañapa' atarrcha' cosheñtso'tseney*

¹² Amach masheñeshacha' ñaña nochaneshacha'
seyorenatsto ñerra'm huaponasa topateñets nanac huomenc;
tarro'marcha' huaponasa o'ch topatensa'. Amach
seyorenatsto atet sepena ñerra'm esempo huaponasa
ñeñt ama sentare. Attecma ama't masheñesha' ñeño'
ame'ña'huapa' attecma o' topatuanet. ¹³ Allempoteñ
o' semueroçhtaprecha Cristo, e'ñe semueroçhteñoõpa'
socshepa'ch. Allochñapa' ñerra'm esempoch orrterra
po'cohuenñapa' sapa'cho'ña socshapreterach e'ñe cohuen.
¹⁴ Ñerra'm cho sasare'tenset atto o' secristona'tarterra,
sañapa' atarrcha' cosheñtso'tsenes, tarro'mar e'ñe allempoteñ
Yompor Puecamquëñ ñeñt cohuenñatsotetspa' çhaponasa
sesho. Po'ñoçh ñetpa' Cristo'na sasare'tenet tarraña sapa'
e'ñe cohuen secohuentateññañ Cristo. ¹⁵ Añña ama cohueno
o'ch yemueroçhta yemtseñoõt acheñ, ama't ñaña yeteñoõt,
ama't ñaña yepeñoõt ñeñt ama cohuenayaye, ama't ñaña
ya'metampeñoõt attochcha' ye'moñe'tanna'ta. Ñerra'm attoña
yemueroçhtapa' ñeñtpa' e'ñech orrena yemueroçhta. ¹⁶ Añña
ñerra'm añecop yemueroçhta tarro'mar o' yecristona'tarta,
amach yepencatsto. Chocmach yecohuentatoñ Yompor
tarro'mar o' yanerrñañ pa'so'cheñ.

17 O' chapmoch allempoch Yomporpa' acranatuerrey allohueney ya. Yapa' yanomcha' a'meterr atet enteney ama't ñeñtey puechemereshay o' perrey Yompor. Ñerra'm yapa' yanomcha' a'metamperr ama't ñeñtey ame'ñatsapa', allempopa' errotenotuachca' queshperrate' ñeñt nanac atpare'tene' cohuen ñoñets ñeñt Yompor po'ñoñ. 18 Ama't ñeñtey e'ñe pocte' es petspa' e'ñech yemuerochenñoña yequeshperra, allempopa' errotenotuachca' chapña ñeñt ochñañenesha' ñeñt atarr atpare'tene' Yompor. 19 Ñeño'marña ñerra'm esempo yemuerochta e'ñe Yompor puenneñoñpa' allempopa' amach yelcatsto. Añña poctetsa o'ch alla yeyemtera Yompor e'ñe yocsheñeshocmañen yeyochro, tarro'mar ñapa' ña ñeñt yeyeçcate'. Ñapa' ña ñeñt e'ñe pocte' es pets, ñapa' e'ñech a'poctatonay. Añcha'ña allo'nepa'ch yesen cotape'cherre' ñeñt cohuentetsa Yomporecop.

5

Atto cotape'chatan allohuen ñeñt pompornesha' pen ñeñt ame'ñetsa

1 Te'pa' o'ch notas samã ñeñtes pompor pen ñeñt ame'ñetsa sesho. Napa'cho'ña nach pompor pen ñeñt ame'ñetsa nesho. Napa' neñche't atet muerochte't Cristo. Tarraña ñerra'm esempo huerra po'cohuenño'pa' yapa' o'ch yecohuentapretera yamã. 2 Napa' te'pa' o'ch notas sa ñeñtes pompor pen ñeñt ame'ñetsa. Atet pena ñeñt cohuanpene' po'carrneror, sapa'cho'ña secuanpesccha' e'ñe cohuen ñeñt ame'ñetsa sesho, tarro'mar ñetpa'cho' po'carrneror penanet Yompor. Amachña seçllañoña secuanpsatstaneto atet sepeñ ñeñt ama tama cohuenaye' senteno. E'ñechña socsheñesha' secuanpenanet atet muenen Yompor. Tarraña amach sagapueñoña quelle secuanpsatstaneto. Ñerra'm quellayecop yecuanpeñpa' o'ch yepenca. Añcha'ña e'ñech yocsheñesha' yecuanpsanet. 3 Amach cha sa'mcha'nochteño'feye' secuanpenaneto, ñeñtes atet anaretes sach cohuanpenahuet. Añcha'ña çhocmach yentatanet atet e'ñe cohuen es yepen. E'ñe yoctape'chateño' cohuenpa' o'ch yeychatenanet allohuen ñeñt e'ñe po'carrneror pen Yompor. 4 Cristoñapa' ñeñt yecuanpene' allohueney atet ñerra'm po'carrnerorey. Ñerra'm esempo huerra, allempopa' yapa'cho' atsa'tareteycha'. Atsa'tareteycha' po'cohuenño ñeñtcha' atarr nanac yocshaterre' ñeñtpa' ama ahuañaño ama't errponaña.

5 Ñeñtes huepaneshas, te'pa' napa' o'ch notas saña. Añ poctetsa o'ch same'ñña ñeñt po'n yacma ñeñt sompor sepen. Po'ñoch o'ch notas allohuenes, e'ñech cohuen same'ñnanna amach sañña e'ñe cohuen entatstatso tarro'mar:

Yomporpa' ama pocteye' entenano ñeñt atet ommo'chetsa. Añña ñeñt ama esoye' entetso ñeñña atarr muerenaña Yompor.

6 Yapa' yeñoteñ Yomporpa' nanac ahuamencat. Yapa' ama ya yehuamencoteye' yommo'cheno. Ñeñto'mañña yeñoteñ Yomporpa' ama cohuenaye' entenano ommo'cheñets. Amach yeyemtatsto e'ñe yañña, tarro'mar yapa' ama es yesherbena. Añcha'ña e'ñe cohuen yeyemtena Yompor, allochñapa' ñerra'm esempo ña muenats, ñachña yocshatuerre'ña e'ñe cohuen. 7 Ora allpon ñeñt yellcatene' añ poctetsa o'ch yotue Yompor. Tarro'mar ñapa' po'ñoch chocma llecapretenya ñeñt yellcatene'. Allochñapa' ñachña ya'metuerre' yellquëña attoch yocsha'huerra e'ñe cohuen.

8 E'ñe señotateño'pa' señota'tach, tarro'mar oneñet ñeñt se'moñe'tene'pa' chocma chopeñe'chen erraparen atet ñerra'm ma'yarr, chach añcha'nochetnena e'nyese' ñeñtcha' a'chencat. 9 Añcha'ña satpare't oneñet. E'ñe yame'ñeñot Cristo o'ch huomenc yepa' yeyo'cher. O'ch seño'ch attec'mach muero'chtatuan allohuen masheñnesh'a ama't ñeñt o' ame'ña'huerra ora erraparen añe patsro. 10 Ama't muero'chtatyesasetcha' mame' tarraña Yomporpa' nanac amueraña. Ñapa' ñachña a'poctatuerre'ña socop, attoch huomenc perrnas seyo'cher. Allochñapa' amach alla sepuesuere. Atetcha' patonay Yompor, ñeñtey muenene' o'ch yecohuentaprecha po'cohuenño. E'ñe yame'ñeñot Cristo yecohuentapreterach po'cohuenña ñeñtcha' ama ahuañaña'terrtso. 11 Yomporepa'chña aye'cho'chtatuapo' allohueney. Añcha'na'tpahuepa'ch po'partsoña tayoteñ errponohuañen. Ñeñt'pa' atetepa'chña Nompore.

Arrpa' all so'tnerranet po'cartot

12 Te'ñapa' ñeñt'ach e'ñe notas necartot. Te'pa' o' notuas o'ch same'ña'huera e'ñe po'ño'chocmañen. Ñaña o' notuas añpa' ñeñtña e'ñe po'ño'ch Yompor pue'nuereña alloch atarr bensare'tañpeney. Te'ñapa' o'ch alla noterr'serr, po'ño'chpa' o'ch seyemtoña Yompor pue'nuereña. Ñeñt masheñ Silvanopa' ña nequellcaten attoch neserrpare'tatas mame' añ necartot. Atet nenteñ masheñ Silvano, ñapa' nanac cohuen ame'ñenana Yompor.

13 Ñaña ñeñĩ ameñetsa arr Babilonia* mueneñet o'ch huomcha'taset ñamet añ necartot. Ñetpa'cho'ña o' acerranet Yompor e'ñe atet ñerra'm sa. Ñaña neyocher Marcospa'cho'ña mueneñ o'ch huomcha'tas ñaña necartot. 14 E'ñe semorrentanna'teñoĩ o'ch sehuomcha'tanna'ta.†

E'ñe seyemteñoĩ Jesucristo, Yomporepa'chña socshatene'ña e'ñe cohuen seyochro. Te'pa' ñeñĩtach notas, ñeñĩpa' attetepa'chña Nompore. Allohua.

Pedro

* 5:13 Anets ñeñĩ pa'so'cheñ Roma te'ñapa' añ toma'ntateñet anets Babilonia.

† 5:14 Po'ñoçh oteneý, "E'ñe semorrentanna'teñoĩ choch setso'ttsa'pa'tannena ñerra'm esempo sehuomcha'tanna'tena." Ñeñĩpa' atet yeçhete'ĩ ahuat.

AÑ PUEPAÑ SAN PEDRO PO' CARTA 2 SAN PEDRO

Atto Pedropa' quellquërranerr carta allohuenacop ñeñt ame'ñetsa

¹ Masheñneshacha' ñaña noçhaneshacha' allohuenes ñeñtes e'ñe attecma cohuen same'ñena atet yame'ñena yaña, tarro'mar allohueneypa' e'ñe ñapña Jesucristo ñeñt Yeyomporer yepen ñeñtara ñeñt Ya'queshpatañer yepen, ñeñña e'ñe pocte' es pets. Na Simón Pedronpa' o'ch alla nequellquërrnaserr po'poñ carta, ñeñten torretsa Jesucristocop, ña puellsensaren. ² E'ñe nehuomicha'teñoñes sa napa' o'ch notas: Yomporopa'chña atarr sebensare'tañpene'; ñepa'chña socshatene'ña e'ñe sa seyoçhro allohuenes e'ñe seyemteñoñ Yompor ñaña Puechemer Jesús ñeñt Yepartseshar yepen.

Atetcha' yeña'yena allohueney ñeñtey e'ñe cohuen ame'ña'yenaya Cristo

³ E'ñe yeyemteñoñ Yompor ñapa' çhocma apueney allohuen ñeñt allpon yepalltena alloch yocrrena e'ñe cohuen ñocop. Ñaña apueney attoch yoctape'cherr ñeñt e'ñe pocte' enten ña. Ñeñtpa' e'ñe ña po'partsoteñoñ apueney. Ñapa' añ muenen o'ch yecohuentapretera ña. Ñaña añ atarr muenen o'ch yorrtatapreter po'cohuenña. ⁴ E'ñe po'cohuenñoñ ñapa' atet otnerrey ñeñtcha' apuerrey ñeñtcha' nanac cohuen yenterr, ñaña ñeñtcha' atarr nanac sherberrets yocop. Añ apuerrey po'huamenc attoch amach ña atarr yemna'yeno ñeñt yentyen arr patsro. Attochña amach atarr nanac ya'sosyateno e'ñe yañeña. Allochñapa' e'ñe yeyemteñoñ Paretspa' o'ch yaguërrñañ ñeñt e'ñe atet pena ña. ⁵ Ñeñto'marña añ poctetsa, ñanomcha'ña Cristo yeyemta. Allotpa' ñaña o'ch yorrtaten atto e'ñe pocte' es yepen. Allotpa' ñaña añ poctetsa, o'ch yeñotua e'ñe ora atet muenen Yompor. ⁶ Allotpa' ñaña o'ch yepuesuanom ñeñt atet yemnatse'tyen ya. Allotpa' ñaña e'ñech ya'huinta'huanom allohuen ñeñt atarr echarr yentyen, alloteñña' o'ch yoctape'ch ñeñt poctetsa Partsocop. ⁷ Allotpa' ñaña o'ch yemorrentanna'ta, e'ñech yemo'nasheñsha' yeñannena. Allotpa' ñaña e'ñech yemuerrannena.

⁸ Ñerra'm atetcha' seña añeçhno atet ñeñt o' notuaspá, allemponapa' allo'nach sesen parrocmatats epas Yeparteshar Jesucristo. Allochñapa' amach e'ñe orrena señoñtere,

añcha'ña e'ñe sorrattyen ñeñt atet muenen Yompor. Allem-
poñapa' nanaccha' sesherberr Cristocop. ⁹ Ñerra'm ama
allo'na yeyemuetneño Cristopa' yapa' amach e'ñe es cohue-
naye' yeñotueno. Chach yottena ñerra'mrrate' puesheñarr
ñeñt ama cheme'tetso a'yo. Añach cheme'ten ñeñt alla'tsena.
Amapa' chach yottena ñerra'mrrate' puesheñarr aporo'yet
ñeñt ama entetso, ama't e'ñe mamesha. Tarro'mar ñapa' o'
cha puesuerran atto Cristopa' e'ñe e'shohuerrñañeñ po'chñar.
¹⁰ Ñeñto'marña masheñneshacha' ñaña nochaneshacha' te'pa'
o'ch alla noterrser. Allo'nepa'ch sesen yemuetnomaya
Cristo atto ñapa' o' hua'ñerres attoch same'ñeño'pa' o'ch
sequeshperra. Ñerra'm atetcha' se'papa' ama't ahuatapa'
amach sepsere, ñaña amach alla sepurrerro atarr toñonef.
¹¹ Allochña sapa' se'cherrcha' all añcha'tarettena Yepart-
seshar Jesucristo ñeñt Ya'queshpatañer yepen. Allñapa'
o'ch aguërres e'ñe pocsheñeshocmañen all partsoten. Ña
po'partsoñapa' ñeñtpa' amach ahuañañat'erro ama't e'ñe er-
rponaña.

¹² Ñeñto'marña napa' noten, chocmach neyerpatasa atet
noctape'chen. Ama't sapa' o' señotue añe'chno, napa' o'ch
alla noterrser. Ama't o' chaponasa seyo'chro ñeñt ñoñets
po'ño'chpa' napa' nemneñ allo'nach neyerpatnensa. ¹³ Napa'
noten, te'pa' orameñ nocrrena e'ñe pocte' o'ch neyerpat-
nomsa attoch o'ch se'orroña Yompor po'ñoñ. ¹⁴ Napa' neñoteñ
o' mañamenapa' o'ch nerromuen, tarro'mar atet otne't
Yepartseshar Jesucristo. ¹⁵ Allochñapa' amach nemnatenso
o'ch sepuesuer ama't errponaña. Ama't allempoch o' nerro-
muenpa' sapa' allo'nach seyerpuerra ñeñt atet o' notuanmas.

*Pedropa' e'ñe entane't Cristo allempo orrtatyesanete't
po'partsoña*

¹⁶ Ya te'pa' o' e'ñe yeñotatas atto Yepartseshar Jesucristo
ña partotets, ñapa' ñach huerrtsa po'pocheño. Añ ñoñets
po'ño'chpa' ama shequëntsoyaye ñoñets ñeñt o' yotuas. Ñeñtpa'
ama yaye' yocpa'ña yotenso, ñaña ama ahuatnaneshañeyaye
pueserrpareñ. Ya po'ño'chpa' e'ñeca'ye allame'tsa yeñche'tña
Yepartseshar Cristo. Yapa' e'ñe yentuoñe'tña po'partsoña.
¹⁷⁻¹⁸ Tarro'mar yapa' e'ñe parro allo'tseney all aspeno
allempo Yompor Parets gatey Puechemer po'cohuenña. Yapa'
allempopa' e'ñe ye'mhuaña ñoñets ñeñt ye'morrtoya entot.
Yompor ñeñt nanac partotets pue'ntaño, po'cohuenñopa' atet
cohuentatenan Puechemer, ñeñtpa' atet oten: "Añmapa' ñeñt
Nechemer ñeñt nanac nemorrentena, ñapa' ña nanac noc-
shatene'." Ñeñtpa' attoña aye'cho'chtatenan Puechemer.

19 Te'ña ñeñt' otyese't ahuat' ñeñt' a'mta'yese't Yompor po'ñoñpa' te'ña e'ñe po'ñoçhpa' o' e'ñe etsotuerra. Ñeñto'marña yapa' attoña yeñoteñ ñapa' e'ñe po'ñoçh otye't po'ñoñoť. Ñeñto'marña yocoppa' añ poctetsa o'ch yame'ña ñaña ñeñt' a'mta'yese't ahuat' Yompor po'ñoñ. Ñeñtña ñoñetspa' a'puetarsam'pennay yoc'apña atet' ñerra'mrrate' lampareñ a'puetarene' checmete'. Te'ña o' huapa Cristo; ñapa' ñeñtcha'ña a'puetarerre' yama yeyoçher. Yapa' atarr cohuen yenteñ Cristo atet' ñerra'm ranto atarreni. 20-21 Ñaña señoche'pa'chña ñeñt' a'mta'yese't ahuat' Yompor po'ñoñ ñetpa' ama añaye' orrtatete'te ñeñt' atet' cotape'chete't ñet. Atto ñet ma'yoçhrete't Partsocop, Paretsña Puecamquëñña eñotatahuate't atetcha' serrpare'toñet Yompor po'ñoñ. Ñeñto'marña señoche'pa'ch ama pocteyaye e'ñe yañeña yoc'apñoť o'ch ye'naçhatateññañ po'ñoñ.

2

Ñeñt' ashcañtetsa amach Yomporeye' po'ñoñ serrpare'teno (Jud 4-13)

1 Te'pa' o'ch notas ñaña po'poñ. Ahuatpa' orrte't ashcañ ñeñt' ama Yomporeye' po'ñoñ orrtatete'te, ñeñt'pa' atta shecane't israelena'tarnesha'. Sapa'çho'ña attec'mach orrtonasa ñeñt' amach Yomporeye' po'ñoñ a'poteno. E'ñe a'nahuapa' o'ch yeçhatas po'poñ poctapña. Tarro'marcha' ñetpa' atet' pet attotcha' a'chencatatuerras. O'ch a'nasotam'psasa atto Yepartseshar Cristopa' ñeñtña tsa'terroyaña yo'chñar. Tarraña ñetpa' machayoťach a'chencatatuerrret ñañeñeta. 2 Esem'poch orrta, shonte'ch acheñ ñeñtcha' ame'ñaya atetcha' yeçhatanet. Ashcañpa' e'ñech pocte' entan ama't ñeñt' atarr yeçhene' sosya'tsañ. Ñeñto'marña e'ñe ñoťoť acheñenesha'pa' o'ch achm'are'teññañet Cristo po'ñoñ ñeñt' po'ñoçh Yompor po'ñoñ. 3 E'ñe pueye'cheñoťpa' o'ch shecaset attoch yoran'pesuas seçllayor. E'ñe poctapñoťpa' shecasetcha'. Tarraña ama't ahuatoteñ Yomporpa' ote't ahuo'ch mueñanet coñcha'puetso. Yomporpa' ama orrena ote'te, ama pueno po'ñoñ; atet' oten, atetcha' pa. Ñeñt' ama Yomporeye' po'ñoñ yeçhatetsopa' chenca'huerretcha'.

4 Tarro'mar ahuatpa' ama't Yompor po'millañoťeññaneshar allempo atpare'chete'tpa' ama esesha' queshpatse'te. Yomporpa' allempoña huapore'tanete't o'pono coñcha'puetso, allña'pa' all ehuncarettenet checmeto. Alloťpa' amach çha'nerreto, allotña esempohuañenpa' a'coñchatare'terrach. 5 Ñaña acheñenesha' ahuatpa'

ama esesha' queshpatso allempto nanac atpare'chete't Yompor. Ñaña'pa' e'choñamipsanet oñ, ora erraparen patso. Ñapña Noé a'queshpat epuet cancherrsheña ñeññ pamo'tsesha'. Tarro'mar Noépa' serrpare'te't ñeññ atet poctetsa Yomporecop. ⁶ Ñaña ahuatpa' ñeññ yechatset anetso ñeññ pa'so'cheñ Sodoma ñaña Gomorra, Yomporpa' etomanipsanet pa'netser. Atto etomanipesuerranet pa'netserpa' allohuenetpa' e'ñe poctacma poyuerret. Ora e'ñe tsapñere'tuet, o' a'chencatuerranet e'ñe poctacma. Atto te'pa' eñotatenan po'psheññechno ñerra'm o'ch atpare'teñet Yomporpa' attecma ch perraneterr. Ñeñño'marña yeñoteñ erra'tsencha' orrtatene' ñeññ ama Yomporeye' po'ñoñ a'poteno, ñetpa'cho'ña attecma chenca'huerret ñamet. ⁷ Tarraña Yomporpa' a'queshpatan puesheñarr ñeññ pa'so'cheñ Lot ñeññ e'ñe pocte' es patset. Ñaña'pa' epaye' entenan pamo'tsesha' atto' pa'yesete't ñeññ nanac sosey enten Yompor. Ñapa' epaye' llecachete't. ⁸ Ñapa' e'ñe cohuen cotape'che't. Pamo'tsesha'ñapa' nanac pa'yesete't ñeññ ama cohuenayaye. Ñaña'pa' epaye' entapretanete't ñeññ cotape'chete't ñet, ñaña epaye' e'mapretanete't atto eñosatsetyesete't. Ñaña'pa' epaye' llecanete't tarro'mar ñapa' e'ñe cohuen cotape'che't pueyo'chro. ⁹ Ñeñño'marña Yomporpa' eñoteñ attoch a'queshpatan ñeññ e'ñe pocte' es pets, ñerra'm esempo o' huapanet topateñets huomenc. Ñaña eñoteñ attoch muero'chtatan ñeññ ama pocteye' es petso. Allo'nach muero'chtatnenanet esempohuañencha' acrare'tetuerra allohuen acheñenesha'. Allempopa' mueñuerranetcha' coñcha'puetso.

¹⁰ Po'ño'chpa' coñchatancha' ñeññ aña ma'yo'chrenaya ñeññ atta muenatsetyets e'ñe po'chtso't, atto nanaccha' sosyare' ye'cha'yenet, añach e'ñe yomenet ñeññ e'ñe ñet poctapñet. Ñeñño'marña ama't Yepartsesharpa' ama añcha'na'tpahuoye' enteñeto, attoña ama't ñaña allohuen ñeññ ahuamencatetyetsapa'cho'ña e'ñe achñare'tueñet. Amach añcha'na'tpahuoye' enteñeto. ¹¹ Tarraña Yompor po'millaño'teññaneshar ama't nanac ahuamencatet, ñaña ama't nanac añcha'taretet, ñetñapa' ama't Yomporesho'tsenet, ama sasare'teñetoña ñeññ ahuamencattetsa.

¹² Tarro'mar ñeññ ama Yomporeye' po'ñoñ ye'chatetso ñetñapa' sasare'tenet tarro'mar ama es eñoteneto, e'ñe atfet ñerra'm es berr ñeññ ama es eñotetso. Ate't muena'yenetpa' atetcha' penet. Ñeññ atet eñalletetsa atet ñerra'm es berr; tsapatonetpa' o'ch rromueñet. O'ch rromuetpa' o'ch muet-

set. Ñeñt ama Yomporeye' po'ñoñ ye'chatetsopa' ñetpa'cho'ña esempohuañen attecmaç a'cllatuaretterret. ¹³ Tarro'mar attoch atsa'tatuaretterret allohuen po'chñaret. Tarro'mar e'ñech ellapenete't coshatse'tatset ñeñt ama pocteyaye. Ama't atto rrallme'chapretasetpa' nanaccha' pencatenset tarro'mar ñetpa' nanac sosyare' es penet. E'ñech pocsheñsha' mueneñet o'ch shecaset.

¹⁴ Ñeñt ama Yomporeye' po'ñoñ ye'chatetsopa' çhocmach mueneñ o'ch cohua'yesan coyanesha' attoch nanac cañoresha'tenet. Amach huañeno atto cotape'chenet sosey. Nanaccha' shequëñet coyanesha' ñeñt ama tama es eñoto attoch aguëñet. Añach ye'chenet atto es ye'chatse'tyenet. Tarraña ñeñt atet petsapa' o'patataretetcha' coñcheñets. ¹⁵ Tarro'mar ñetpa' o' puesuerret ñeñt poctetsa. O' sa'nmet Yompor nanac ellaçar. Ñetpa' cota'neñet atet pe't Balaam ñeñt Beor puechemer. Ñapa' ahuatpa' añach cohuen ente't o'ch pa'yesa ñeñt ama pocteyaye alloña gane't shonte' quelle. ¹⁶ Allempoña atet pe't Balaam ñeñt ama pocteyaye, pashanorñapa' o' che'ptare'ch, atto' eños atet ñerra'm acheñ eñets, ama't ashenpa' yeñoteñ ama eñeno. O'ña eñosuapa' Balaamñapa' allempoteñña o'huañ atet pa'yesan sosey.

¹⁷ Ñeñt ama Yomporeye' po'ñoñ ye'chatenetopa' ñetñapa' amach es sherberrtso. Ñetpa' ama't attetañ ñerra'mrrate' oñ allot potenpa' te'ñapa' o' masohua. Ñetpa' amach es sherbatso ama't attetañ ñerra'mrrate' os, tarraña ñerra'm o' matach mōrr a'yopa', amach huato. Tarraña ñeñt atet petsapa' o'patataretetcha' all ama machecmeto o'pono. ¹⁸ Ñaña nanaccha' ommo'chenet atto pa'yenet ñeñt nanac sosyare'. Ñaña o'ch a'secheñet po'psheñeñ attoch o'ch pachet ñeñt nanac muenenet po'chets attotcha' a'psataretterret, allempoñapa' o'chcho' alla puerrerret. Shonte' acheñ ñeñt e'ñe etserra puesuanmue' ñeñt atet ye'cha'yesete't ñeñt nanac sosyare', tarraña allempoñapa' o'ch alla muenereterr ñeñt o' puesuanmuetañ ahuat poctapñet. ¹⁹ Ñeñt ama Yomporeye' po'ñoñ ye'chatetsopa' o'ch alla oterraneterr: "Ama palltenoña o'ch es yesuanom. Yapa' e'ñe cohueno'tseney. Yocoppa' ama eñalleña ñeñtcha' yeyore'terre'." Ama't atet oteneñ ñeñt atpare'tetspa' tarraña napa' o'ch notas, ñeñt atetpa' aña ye'chenet e'ñe ñet poctapñña ñeñt nanac sosyare'. Tarro'mar ñerra'm erra'tsen es yeychatene' ñeñtpa' ñeñtaña pomnaren yepene'. ²⁰ Attecma ñerra'm ya. O' yeñotuer Yepartseshar Jesucristo, ñeñfara Ya'queshpatañer yepen. Yeparrocmateñoç Cristo o' yesuanom sosya'tsañ. Tarraña ñerra'm yo'chñarpa' alla a'psaterrey Yompor po'ñoñpa' yañapa' elloña nanaccha'

yorocheno'tseney. ²¹ Ahuatpa' yorocheno'tseney tarro'mar ama yentare ñeñt' poctetsa Partsocop. Te'ñapa' o' yenter ñeñt' poctetsa. Tarraña ñerra'm te'pa' o'ch alla yepuerrerra ñaña o'ch alla yepuesuerrñañ po'ñoñ atet' oteneý Parets, te'ñapa' yañapa' elloña nanaccha' yorocheno'tseney. ²² Yapa' po'ñoñch ñerra'm o'ch alla yepuerrerra cha yottena ñerra'mrrate' ochec. Yapa' o'ch alla yepuerrerra "atet' ñerra'm ochec o'ch a'tatsta; o'ch a'tatsetuapa' tematenpa' o'ch alla puerrerra allo'tsen pa'tatsña." Amapa' cha yottena ñerra'm atet' pena ñaña chañcho. "Chañchopa' o'ch apa; o'chña apuapa' o'chcho' alla puerrerra atstso allcha' e'yañna'tuerra o'ch alla atsotseñe'chuerr." Ama't ahuatoteñ atet' otete't atet' pena ochec, ñaña atet' pena chañcho.

3

Esempoch huerrmocha Cristopa' orrterrach ñeñtcha' achmāre'terre' Yompor

¹ Te'ñapa' masheñneshacha' ñaña nochaneshacha' o'ch notas, po'pocheño o' alla nequellquërrnaserr carta. Tarro'mar añecop nemneñ o'ch alla noctape'chaterrser, o'ch alla neyerpaterrser soctañña e'ñe cohuen. ² Ñaña o'ch alla noterrser, añ poctetsa amach sepsatsche ñeñt' otye't ñeñt' a'ñta'yesaye't Parets po'ñoñ. Atet' otye'tpa' atet'cha' etsoterra esempo-huañen. Ñaña amach sepsatsche atet' o' otuas ñeñt' Yompor puellsensarnesha'. Ñetpa' o' yechatuaset Yepartseshar Cristo po'ñoñ ñeñt'pa' atet'cha' sepa, ñeñt'ara Cristo Ya'queshpatañer yepen.

³ Ñanom o'ch señoñch añ, ñerra'm esempocho o' huerrmocha Cristopa' huapach ñeñt'cha' achmāre'tene' Yompor poctañña. Ñeñt'pa' attach cotape'chen atet' muenatse'tyenet ñeñt' cohuen entenet po'chets. ⁴ Pachmāre'teño'tpa' o'ch otet: "Cristopa' otrerr esempopa' ahuo'ch huerra. Te'ñapa' ¿eso'marte' amo' huerro"? Ama't yatañneshañpa' o' colla'huenet; teme'ttsen yenten ora errañaren e'ñe attera atet' orrte't ahuatoteñ allempo errte' ayeçcataret' pats." ⁵ Ñetpa' mueneñet o'ch puesuerret atto ahuat' Yompor e'ñe po'ñoñoña o' yeçcatuan enet. Patspa'cho'ña e'ñe po'ñoñoña yeçca'hua. Ñaña e'ñe oño'tpa' yeçca añ pats. ⁶ Ahuatpa'cho'ña e'ñe puechopeño't oñpa' chenca'hua pats allempo e'ñe chorra oñ errañaren. ⁷ Ñaña Yompor po'ñoño'tpa' te'pa' ama't patspa' esempo-huañenpa' poyuerrcha'. Enetpa'cho'ña attecmaç poyuerrcha' ñaña. Aña cohuen esempohuañencha' acraretetuerra allohuen acheñenesha'. Allempochña mellapoterra. Ñeñt'ña ama ame'ñenaye ñapa' o'ch mueñanet coñcheñtso.

⁸ Tarraña te'ña masheñneshacha' ñaña noçhaneshacha' amach atta es sepçhatsto. Añcha'ña o'ch señoç; Yomporpa' entenan ama't mil char atet ñerra'm pamtarra. Ama't ñeñt' ñapa' pamtarr enten, yocopñapa' yenteñ atet ñerra'm mil char. ⁹ Puesheña'tets acheñpa' otenet o' meten shonte' char amo' huerro. Tarraña yapa' yeñoteñ Yepartseshar çhocmach a'pocatan po'ñoñ o'ch huerra. Yapa' yeñoteñ tarro'mar amo' huerro añ cohuen ñato' esempoch o'ch yoctape'chuerr ello cohuen Yomporecop allohueney. Ñapa' nanac muerenya ama mueno ama't eseshapa' o'ch chenuerra.

¹⁰ Tarraña ama't amo' huerro, esempopa' machayoçach huerra. Atet ñerra'm eñeñ amach es yepçhenopa' machayoçach huapa tsapo. E'nech atet perraña ñaña Yepartseshar Cristo, e'nech machayoça huerra. Allempopa' huañerrcha' enet. E'ne puepotrrareñoçpa' huañcha'. Huañcha' ora ñeñt' orreyetsa ñaña ama't ora allpon eñall, paña'tuerrcha' ñaña e'yohuach. Tso'ñapa' ñach e'ne e'yaturre' allohuen ñeñt' eñall. Patspa'çho'ña ñaña ora ñeñt' ayeçcataret arr patsropa' poyuach.

¹¹ O'ch poyuapa' o'ch e'yohua ora esocmañen. Ñeñto'marña sapa' añ pocetsa socop. O'ch soctape'cherr e'ne cohuen Partsocop, ñaña o'ch sepomhuerra sañeña e'ne Yomporecop. ¹² Ñaña añ pocetsa o'ch secuame'teñ esempoch yoroçhtatuer Yompor. Sapa' o'ch setorreññaña attoçña mameshapa' o'ch huerra. Esemppoch yoroçhtatuer allempopa' ñachña a'çrratuerrre' enet. O'ch a'çrratuerran enetpa' allempoçña potlle'chuerr e'ne pocacma. Ñaña ora ñeñt' orreyetsa entopa' ñeñt'pa'çho'ña e'nech poyuahuer. O'ch poyuahuerpa' o'ch e'yohuerra pocacma. Tso'ñapa' ñach e'ne e'yatuahuerre' ora allohuen ñeñt' eñall. ¹³ Tarraña yapa' yecueñ o'ch et-soterra atet otnerrey. Ñapa' ña yotnerre', eñalleterro'ch po'poñ enet etserrare', Patspa'çho'ña o'ch eñalleterra etserra. Allña'pa' añach orrtatsa ñeñt' e'ne cohuenare' es pa'yets.

¹⁴ Ñehua, masheñneshacha' ñaña noçhaneshacha' o'ch secuame'teñ. Secuame'teñoçpa' o'ch sema'yochrena attoç entuerres Yompor e'ne pocte', attoç amach eñalle ñeñt'cha' sepençate'. O'ch cohuen sentannena epas samo'tsesha'. ¹⁵ Ñaña o'ch señoç e'ne eso'marte' amo' huerro Yepartse-shar Cristo. Ñapa' atarr muerenana allohuen acheñenesha'. Ñapa' mueneñ yapa' o'ch yame'ñatuera acheñenesha' attoç yequeshpa'huerra allohueney. Ñeñt'ara o' quellconas ñaña masheñ Pablo po'cartoç. E'ne Yompor pueñotateñoçey atet quellconas ñaña. Yapa' nanac yemuerannena. ¹⁶ Ora allpon Pablo po'cartoçpa' o' eñotatey atet'cha' perra esempo.

Pate'tets ñoñets ñeñt quellquë't Pablopa' nanac echarr yenteñ o'ch yeñoch e'ñe atet oteneý. Puesheña'tets acheñ ñeñt ama tama es eñotopa' atarr moññe'toñete't Pablo po'ñoñ. Tarro'mar ñetpa' ama tama cosheññañeto Yompor po'ñoñ ñeñto'marña chocmach mueneñet o'ch e'nachaterrñañet atet oteneý Pablo po'cartot. Ñaña po'poñ Yompor po'ñoñ ñetpa' chocma mueneñet o'ch e'nachaterrñañet atet oteneý. Ñetpa' attotcha' a'chencatatuerrret ñetañeña.

¹⁷ Ñeñto'marña masheñneshacha' ñaña nochaneshacha' te' napa' o' notuas necartot ama't ama etsotena' atet notenes, attochña señoç. Te'ñapa' señoçtach allochñapa' amach shecaseto atto es panten ñeñt atpare'tets. Saña te'pa' amach sequeçpatsterrñañe Yompor po'ñoñ atet atarr same'ñena te'. ¹⁸ Añcha'ña e'ñe Yompor pemuereño'tpa' allo'nepa'ch sesen cotape'chnomue' e'ñe cohuen, ñaña allo'nepa'ch sesen yemuetnomaya Yepartseshar Jesucristo ñeñtara Ya'qeshpatañer yepen. Ya'ye'choçhtatoñepa'ch tayoteñ e'ñe errponohuañen. Te'pa' ñeñtach notas, ñeñtpa' attetepa'ch Nompore. Allohua.

Pedro

AÑ ÑANOM SAN JUAN PO' CARTA 1 SAN JUAN

Jesucristo ñeñt po'ñoñ pen Yompor; yañapa' allochña e'ñe yocrrerra

¹ Te'pa' o'ch neserrpare'tatas arr nequellcot ñeñt atet pena Jesucristo; ñapa' chocma eñall ama't ahuatoteñ ama't allempo ama ayeçhcatarettena' pats. Ñeñña yapa' e'ñe ye'me't atet serrpare'tatyese't allempo orrtosa arr patsro, ama't ya yecloyotpa' e'ñe yeñche't e'ñe allame'tets, ama't e'ñe ya yoto'tpa' ya'p'lla'yese't. Ñeñña Jesucristo ñapa' ñeñña po'ñoñ penña Pomporets tarro'mar ñach e'ñe eñotaterre'ña acheñenesha' atet oten Pomporets. Ñeñña ña po'ñoñpa' po'ño'ch yapa' allochña corretsayach. ² Ñeñña Jesucristo allempo acheñetos arr patsro yañapa' e'ñe yeñche't. Ñeñto'marña te' yapa'cho'ña chocma yeñotatenes saña. Ñeñto'marña yeserrpare'tatenes ñeñña Cristopa' ñeñt alloch yocrrena ama't tayoteñ e'ñe errponañohuen. Ña ahuatpa' e'ñe parro'tsen epuet Pomporets. Te'ña atto orrtosnaya arr patsro yapa' e'ñe yeñche't e'ñe ye'me't atet serrpare'tatyese't. Ñeñto'marña te' ya ñeñt atet yentyese't, ñeñt atet ye'myese'ñe't, te'ñapa' o'ch yeserrpare'tatas saña. ³ Allochña' attoch allohueney yeparrocmaterr epay Yompor Porets ñaña Puechemer ñeñt Jesucristo. ⁴ Ñeñto'marña nequellquënnas ñeñt e'ñe po'ño'ch yeñoten attochña sapa'cho'ña o'ch e'ñe socsherra saña.

Yomporpa' añ toma'ntena puetare' tarro'mar ñapa' e'ñech cohuen es orrtatyen

⁵ Añ ñoñets ñeñt ye'mapretyese't Jesucristo, te'ñapa' o'ch yeserrpare'tatas. Ñeñtpa' atet eñotateney: Yomporpa' ña e'ñe cohuenare' es pa'yets, ñapa' e'ñe atet pena ñerra'm puetare' e'ñech cohuen yenteñ. Ñapa' ama't mameshapa' ama orrtatenanoña ñeñt ama cohuenayaye; ñeñto'marña yoten, ñeshopa' ama't coñe'tapa' ama eñalleña checmete'. ⁶ Yapa' ama't yoteneñ o' e'ñe yeparrocmaterr epay Yompor, tarraña ñerra'm ora yorrtatyen ñeñt ama cohuenaye' enteno ña, yañapa' atta yeshquën. Ñeñto'marña chach yottena ñerra'm checmeta yechope'chen tarro'mar ama e'ñe yeychena' ñeñt e'ñe po'ño'ch cohuen enten Yompor. ⁷ Tarraña ñerra'm e'ñe cohuenare' es yorrtatyen atet pena Yompor, ñeñtña' e'ñe atet yepena ñerra'mrate' arr yechope'chen

puetaro e'ñe allo'tseney epay Yompor. Attoña allohueney e'ñech cohuen yeparrocmatuen ñaña Yompor Puechemer ñeñt Jesucristo ña po'rrasoña chocma e'shennayña allohuen yo'chñar.

⁸ Tarraña ñerra'm cha yoten, “napa' amaca'ye eñalle no'chñar”, ñeñtñapa' yañeñaca'ye shequëtsa tarro'mar Yompor poctapña ñeñt e'ñe po'ñoç cohuenpa' amaca'ye çhennayoña yeyoçhro. ⁹ Tarraña ñerra'm cho ya'meten yo'chñar, Yomporñapa' e'ñech peretna'huerrnay allohuen yo'chñar, e'ñech e'shohuerrnay allohuen ñeñt ama pocteye' entapretenye tarro'mar ñapa' ama puenesho po'ñoñ, ñapa' e'ñe pocte' es pen, ñeñto'marña ñapa' chocmach peretnerrey. ¹⁰ Ñaña ñerra'm cha yoten, “napa' ama no'chña'tpeno”, Yomporñapa' cha yottatateñ ñerra'mrrate' ñapa' atarr ashcañ tarro'mar po'ñoñpa' atet oteney ya allohueneypa' e'ñe yo'chña'tuen. Ñeñtña po'ñoñpa' yañapa' ama't e'ñe mameshapa' ama çhappennayoña yeyoçhro.

2

Jesucristo ñeñt e'ñe cohuen eñets yocop Yomporesho

¹ Nechemerneshacha'te' socoppa' o'ch nequellconas attoch amach allo'na sepa'нено ñeñt ama't mameshapa' ama pocteye' enteno Yompor. Tarraña ñerra'm esesha' orrtatene' ñeñt ama cohuenayaye, ñerra'm o'ch enamuerr peretneñets, Yomporpa' o'ch peretner tarro'mar eñall yocop ñeñtcha' eñosets Apuesho. Ñeñtñapa' añ Jesucristo ñeñt e'ñe pocte' es pa'yets. ² Ñapa' ña aparet attoch tsa'tuerrnaya yo'chñar. Ñeñtapa' ama e'ñe yaptecpayaye, añeçpa'naña allohueney ñeñtey añe patsro'tsa'yeney.

³ Ñerra'm e'ñe po'ñoçh yame'ñerrñaña Yompor po'ñoñ ñeñt atet oteney allempoñapa' e'ñech po'ñoçh yeñoter ñeñt atet pena ña. ⁴ Ñeñt otets, ñapa' e'ño' eñoteñ atet pena Yompor, ñerra'm attera atpare'tenan Yompor po'ñoñ ñeñt atet oteney, ñeñtña atet otetspa' ñapa' attaca'ye shequën. Ama't e'ñe mameshapa' ama cheññañoña Yompor po'ñoñ pueyoçhro ñeñt e'ñe po'ñoçh atet oteney. ⁵ Tarraña ñerra'm esesha' e'ñe po'ñoçh ame'ñerraya Yompor po'ñoñ ñeñt atet oteney, ña po'ñoçhpa' o' morrenterrana Yompor e'ñe pueyoçhrocmañen. Ñeñtapa' attoña yeñoteñ po'ñoçhpa' o' yeparrocmaterr epay Yompor. ⁶ Ñerra'm esesha' otets, ñapa' e'ño' parrocmaten epuet Yompor, ñeñtepñapa' orrtatyesanepa'ña ñeñt atet pa'yese't Yompor Puechemer ñeñt Jesucristo.

Cristopa' ña orrtaterre' etserra morrentanna'teñets attochña e'ñe cohuen yemorrentannerra

⁷ O'ch masheñeshacha' ñaña nochaneshacha' notas, ñeñt atet notenes nequellcot te' amorrentanna'tpahuepa'ch sentannena allohuenes ñeñtpa' ama añeyaye ñoñets ñeñt ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñt ñoñets ñeñtcha' atet sepa e'ñe cohuen ñeñtara Yompor po'ñoñ ñeñt e'ñe errtes e'muene' allempo. ⁸ Tarraña morrentanna'teñets ñeñt atet nequellquënnas te' ñeñtpa' e'ñe atet ñerra'mrrate' o' tayo' orrtatonasetña atet morrentanna'teñets, tarro'mar Cristo e'ñe po'ñoçh orrtatonayña e'ñe etserra attoch e'ñe cohuen yemorrentanna'terra, ñeñto'marña sapa'cho'ña te'pa' o' e'ñe etserra sortaterrña saña attoch semorrentannerra. Morrentanna'teñets po'ñoçhpa' ñeñtña atarr sherbets tarro'mar ora allohuen ñeñt ama cohuenaye' enteno Yompor, ñeñtña' allo'na sen huañuanmats. Ñeñtpa' e'ñe atet pena ñerra'mrrate' checmete'pa' allo'na sen metuanmats. Allohuen ñeñt e'ñe po'ñoçh cohuen enten Yompor, ñeñtpa' atet ñerra'mrrate' puetare', ñeñtña po'ñoçh o' a'puetarsamperres.

⁹ Ñeñtña otets ñapa'cho'ña Yomporo' po'puetarenño'tsen tarraña ñerra'm orameñ e'moñe'tyenan pamo'ts, ñapa'cho' orameñ checmeto'tsena. ¹⁰ Tarraña ñeñt e'ñe po'ñoçh muerenaya pamo'tsesha', ñeñtña' e'ñe Yompor po'puetarenño yeçhena. Allña' ama eñalleña ñeñtcha' paterrayerr ñeñt ama pocteye' enteno Yompor. ¹¹ Ñeñtña e'moñe'tyene' pamo'ts ñapa' orameñ checmeto'tsen. Ñaña' atet pena ñerra'mrrate' puesheñarr ñeñt checmetach chopeñe'chyen, ama eñoteñe erreneñte'ña sen tarro'mar checmete'pa' ñeñta a'natacle'chene'.

¹² Nechemerneshacha' sa so'chñarpa' o' apretna'huare'tterra Cristeshot, ñeñto'marña te'pa' atet nequellquënnas. ¹³ Ñaña te'pa' o'ch notas saña allohuenes ñeñtes e'ñe pompornesha' penset. Sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama ayeçhcatarettena' pats; ñeñto'marña te'pa' atet nequellquënnas saña. Ñaña te'pa' o'ch notas saña allohuenes ñeñtes huepueshares, sapa' o' e'ñe satpare'ter oneñe; ñeñto'marña socop te'pa' atet nequellquënnas saña.

Ñaña sa nechemerneshacha' te' sapa' o' e'ñe señoter atet penaña Yompor Parets; ñeñto'marña te'pa' atet nequellquënnas e'ñe socop. ¹⁴ Ñaña sa ñeñtes pompornesha' e'ñe penset, sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama ayeçhcatarettena' pats; ñeñto'marña

te'pa' atet nequellquënnas. Ñaña sa ñeñtes huepueshares, sapa' atarr ahuamencates tarro'mar Yompor po'ñoñpa' o' e'ñe çhaponasa seyochro ñeñto'marña sapa' o' atarr satpare'ter oneñe; ñeñto'marña te'pa' atet nequellquënnas.

¹⁵ Amachña aña atarr semorrentatsto allohuen ñeñt yentyen aña patsro tarro'mar ñerra'm aña atarr yemorrentena ñeñt aña patsro'tsenpa' Yomporña Parets po'ñoçhpa' amach yemorrenteño, (ñeñto'marña amach errotenoç çhaponayoña yeyochro ñeñt atet muenen ña). ¹⁶ Allohuen ñeñt eñall aña patsro, atet ñerra'm ñeñt atet muenatyeney yechets, ñaña ñeñt yeye'chapretyena e'ñe ya yecueñoç, ñaña ñeñt e'ñe yemnen ya o'ch e'ñe cohuen entapretyet, ñeñtña allohuenpa' ama Yomporeshoteye' hueno, ñeñtpa' aña patsro'marnesha poçtañña. ¹⁷ Allohuen ñeñt yentyen aña patsropa' ñeñtpa' atarr ahuañaña, ñaña ñeñt yemnatse'tyen aña patsro ñeñtpa'çho'ña atarr ahuañaña. Tarraña ñeñt atet petsa ñeñt e'ñe atet muenen Yomporpa' ñeñtñapa' amach huañerro ama't errponaña.

Atet pena cotañats ñeñt e'ñe po'ñoçh Yompor poçtañña ñaña atet pena po'poñ cotañats ñeñt shequëntsa

¹⁸ Te' nechemerneshacha' o'ch notas po'poñoneç. Te'pa' o' mameshamerra o'ch huañerr allempochña mellapoterra. Atet se'myen te' ñeñtpa' allempochña orrterra ñeñtcha' atarr e'moñe'terre' Cristo pueyochreshohuen. O' e'ñe tayoteñ orretyesa shonte' ñeñt çhocma e'moñe'tene' Cristo. Ñeñto'marña te'pa' yeñoteñ o' mellapoterrmocha. ¹⁹ Ama't ahuañmo'cha e'ñe parrocmayapçhañe't ñetña te'pa' o' ahuanmuet ellonet o' sohuanerryet tarro'mar po'ñoçhpa' ama allohuenacmaye' yeparrocma'terro. Ñerra'm po'ñoçhcha' allohuenacmay yeparrocma'terreñ allempoña ñetpa' allo'tsa'yenetañate' ñamet yesho. Tarraña te'ña ñetpa' o' ahuanerret ellonet attoña o' yeñoterranet po'ñoçhpa' ama allohuenacmaye' yeparrocma'terro.

²⁰⁻²¹ Tarraña te'ña sapa' Cristoña sechorratenayaña Parets Puecamquëñ. Attoña allohuenes o' e'ñe seño'tuer. Sapa' o' e'ñe seño'tuerr ñoñets ñeñt po'ñoçh, ñeñtpa' ama shequëntsoyaye. Te' sapa' ama e'ñe sepallteño'teye' nequellquënnaso ñeñt atet poçtetsa socop. Tarro'mar sapa' seño'teñ ñeñt ñoñets shequëntspa' ama Yomporeshoteye' hueno tarro'mar ñeñt Yompor po'ñoñpa' ñeñtña e'ñe po'ñoçh ama shequëntsoyaye.

²² Te'ña sapa' seño'che'pa'ch ñeñt atarr nanac ashcañtetsapa' ñeñtcha'yeña otets Jesúsapa' año' Cristoyaye ñeñt atarr yecuen ya ahuatoteñ ñeñtcha' llesenserr Yompor. Ñeñto'marña ñetpa' çha e'moñe'teñetña Cristo, ama çho'ye' ame'ñeñeto,

Pompore'naña ama ame'ñeññañeto, čha a'nasoteñet. ²³ Allohuen ñeñt a'nasotenaya Yompor Puechemer, ñetpa' Pompore'naña ama aguëññañeto. Tarraña allohuen ñeñt otets, Jesús'pa' Yomporo Puechemer ñeñt Cristotets, ñetña'pa' e'ñe aguëññañet Pompor.

²⁴ Ñeñto'marña o'ch notas, Yompor po'cohuenña ñeñt se'muerr ahuañmo'chofeñ, te'ña sa atto o' e'ñe señoter seyočhro allo'nepa'ch sesen ame'ña'nmatza allochña'pa' attoch e'ñe cohuen separrocmaterr epas Yompor Puechemer ñaña epas Yompor Parets. ²⁵ Jesucristopa' atet otrerrey o'ch apuerrey e'ñe po'ñočh attochña yapa' corretsayach yocsheñeshocmañen tayoteñ e'ñe errronañohuen.

²⁶ Ñeñt notenes añ nequellcoť ñeñtpa' añe'pa nequellquënnas attoch sapa' e'ñech señoter allochña'pa' attoch ama sa'shcaretterro. ²⁷ Tarro'mar Jesucristo o' chorraterresa Parets Puecamquëñ, ñeñto'marña sapa' ama sepallteno o'ch esesha' yečhatas tarro'mar ñapa' eñotatascha' allohuen. Ñaña ñeñtcha' atet yečhaterres ñapa' e'ñeca'ye po'ñočh atet, ñeñtpa' ama shequëntsoyaye. Ñeñt atet yečhatenes sapa' allo'nepa'ch sesen parrocmatenaya Cristo.

²⁸ Te'ña nechemerneshacha' allo'nepa'ch sesen parrocmatenaya Cristo allochña'pa' ñerra'm esempoch huerra ñapa' ñachña e'ñe seyemtapuerra attoch sapa' amach čha sepencapuerto ñerra'm esempoch huerra. ²⁹ Ñehua, sa te'pa' o' e'ñe señoter Jesucristo ñapa' e'ñe pocte' es pa'yen. Ñeñto'marña señoche'pa'ch ñaña allohuen ñeñt e'ñe pocte' es orrtatyets ñeñtña'pa' e'ñe po'ñočh puechemer peñ Yompor.

3

Yomporpa' e'ñe puechemerasha' peney

¹ Te' sapa' čhosaña e'ñe cotape'cherre', Yomporpa' atarrca'ye nanac morrentenya. Ña e'ñe puemorrenteñoťey ñapa' e'ñe puechemer peney, ñeñto'marña yapa' e'ñe po'ñočh Yomporena'tarey. Ñeñto'marña acheñenesha' arr patsro ñeñt ama ame'ñetso ñetña'pa' ama eseshaye' eñotenayeña ñeñt atet yotape'chyen Yomporecop tarro'mar Yomporpa'cho'ña ama eseshaye' eñotenaye ñeñt atet cotape'chen ña. ² O'ch masheñeshacha' ñaña nočhaneshacha' o'ch alla noterrser, te'ña yapa' e'ñe po'ñočh puechemer peney Yompor. Ama't ama e'ñe eñotatenya' erroťeneycha'ña ya esempohuañen tarraña yapa' e'ñe yeñoteñ ñerra'm esempo orrterra Jesucristo, yañapa' e'ñech attey yaña ñerra'm ña tarro'mar allempo yapa' yentercha' ñeñt atet atarr cohuentena ña. ³ Allohuen ñeñt atet ame'ñetsa, ñetña e'ñe

pueyemteñotet cohuaame'teñet, attoña ñetpa' e'ñech cohuen a'cohuentataretterret ñamet e'ñech attet ñerra'm Jesucristo ñeñt e'ñe cohuenare' es orrtatyets.

4 Allohuen erra'tsen ochña'tetspa' ñeñtñapa' cha atpare'tenan Yompor po'ñoñ ñeñt atet anaret. Tarro'mar ñerra'm esempo yatpare'ten ñoñets ñeñt atet anaret, ñeñtña yapa' chach yeyoren yo'chñar. 5 Sapa' e'ñe señoñeñ Cristo ñapa' tarro'mar huapa arr patsro ñach ahuanerre' ya yo'chñar ama't ñapa' ama eñalle po'chñar ama't coñe'ta.

6 Ñeñto'marña allohuen esesha'ch parrocmaterre' Cristo, ñetñapa' ama choye' ochña'tare'teneto. Tarro'mar ñeñt atarr ochña'tare'tetspa' ñeñtñapa' ama puentaranoña Cristo, ama cheññañoña pueyo'chro ñeñt atet pena Cristo.

7 Nechemerneshacha' sapa' señoche'pa'ch ñeñtcha' atet noterrserre'te', allochñapa' attoch amach esesha' seshquerraye. Po'ño'ch ñeñt orrtatyene' ñeñt e'ñe pocte' enten Yompor, ñeñtña po'ño'chpa' e'ñe cohuen acheñer, e'ñech atet pena ñerra'm Cristo ñeñt e'ñe pocte' es pa'yets.

8 Tarraña ñeñt chocma orrtatyene' ñeñt ama pocteye' enteno Yompor, ñeñtña acheñerpa' po'ño'ch oneñe'tena'tar, tarro'mar oneñe'tpa' e'ñe ahua'toteñ ñapa' aña orrtatyets ñeñt ama't mameshapa' ama pocteye' enteno Yompor. Ñeñto'marña Yompor Puechemerpa' huapa, allochñapa' ñach e'nuerre' atet patse'tyena oneñe't.

9 Allohueney ñeñtey po'ño'ch eñalletertsa Yomporotpa' amach allo'na yo'chña'tare'tneno tarro'mar yapa' o' yeycherrñañ ñeñt atet pena Yompor Parets. Yapa' po'ño'chpa' o' ye'ñalletterra Yomporot ñeñto'marña amach errotenot alla yo'chña'tare'terre'te. 10 Arrpa' attoña yeñoteñña ñeñt Yomporena'tar ñaña ñeñt oneñe'tena'tar. Allohuen ñeñt ama pocteye' es orrtatyetso ñeñt ama morrentenaye pamo'tsesha', ñetñapa' amaca'ye Yomporena'tareyayeto.

Amorrentanna'tpahuepa'ch yentannena e'ñe allohueney

11 Añ ñoñetspa' e'ñe ahua'toteñ eñotatasete't amorrentanna'tpahuepa'ch e'ñe allohueney. 12 Amach atet yepatsto atet pa' ahua't Caín, ñapa' oneñe'tena'tara. Ñaña'pa' pa'mo'nasheña muetsa. Tarro'marca'yeña muetse ñapa' amaca'ye cohuenaye' cotape'che'te; pa'mo'nasheña Abel ñeñt muetsa, ñaña'pa' e'ñe cohuen cotape'che't Yomporecop.

13 Ñeñto'marña masheñeshacha' ñaña no'chaneshacha' e'ñepa'ch seño'ta sapa' ñeñto'marchaña e'moñe'tasña acheñenesha' añ patsro ñeñt ama ame'ñetso. 14 Tarraña ya e'ñe yemorreneteñot yamo'tspa' e'ñe yeñoteñ yapa' o' yemñanerrña allcha' e'ñe poctacma yerromuerreñ. Yapa' o' yeycherr

allña yapa' corretsayach. Ñeñña ama muerenayo pamo'ts ñetñapa' allo'tsenareta allcha' e'ñe rromuerret e'ñe poctacma. ¹⁵ Allohuen ñeññ' cha e'moñe'tyenan pamo'tspa' ñeññ' po'ñoçpa' amtsaña enteñña Yompor. Ama't e'ñe sapa'cho'ña señoñeñ ñeññ' amtsaña' pueyoçhropa' ama eñalleña attoch ñapa'cho'ña corretsach tayoteñ e'ñe errponañohuen. ¹⁶ Arrpa' attoña e'ñe yeñoñeñña ñeññ' atet penaña e'ñe po'ñoçh morrenteñets, attoña Jesucristopa' a'rroya ñañeña attoch rroma yocop. Yapa'cho'ña e'ñepa'chña pocte' yeñch o'ch ya'rroya yañeña attoch yerroma yamo'tseshacop. ¹⁷ Tarraña yaña ñerra'm yechyen attoch e'ñe cohuen yocrena arr patsro, allempo yenteñ yamo'ts cha atarr es pallta'yenet yañapa' ama yemorrenteño, Yomporpa'cho'ña ama't e'ñe mameshapa' amaca'ye yemorrenteñoña yeyoçhro. ¹⁸ Amach nechemerneshacha' e'ñe yeñoñoçhaya yotanna'tatsto atarr yemorrentannena. Chochña yorrtatyesña yemorrenteña e'ñe po'ñoçh atet es yeña'yen po'psheññecop e'ñe cohuen.

Attoch e'ñe cohuen yeyemtera Yompor

¹⁹ Alloña yapa' e'ñech yeñotena yapa' e'ñe po'ñoçhey ñeññey atet petsa e'ñe cohuen. Ñeñto'mañña yapa' e'ñech yeñmataten yeyoçher Yomporeshonet. ²⁰ Tarro'mar ñerra'm ama e'ñe yeñmañeshocmaye' es yeña'yeno Yomporecop, Yomporñapa' elloña e'ñe po'ñoçh atet eñoteny tarro'mar ñapa' ña atarr eñotañesha'. ²¹ Tarraña nechemerneshacha' ñerra'm e'ñe yeñmañeshocmañen es yeña'yen Yomporecop ñeññepñapa' Yomporcha'ña e'ñe cohuen yeyemtena. ²² Atto yame'ñerrñaña po'ñoñ ñeññ' atet oteneñ, ñapa' atarr coshenya; ñeñto'mañña ñerra'm es yenamueñ, ñapa' çhocmach e'ñe po'ñoçh apueneñ. ²³ Yompor po'ñoñoç' atet oteneñ o'ch e'ñe cohuen yame'ñerrñaña Puechemer ñeññ' Jesucristo. Ñaña oteneñ amueranna'terrapo'ch allohueneñ, atet oteneñña ña. ²⁴ Erra'tsencha' e'ñe cohuen ame'ñenaya Yompor po'ñoñ ñeññ' atet oteneñ, ñetñapa' e'ñe parrocmatenet epuet Yompor. Ñeñto'mañña yeñoñeñ yeparrocmaten, Parets Puecamquëñoç' ñeññ' chorratenya ñeññña yeñotatene'ña e'ñe yeparrocmateña Yompor.

4

Attoch yeñoçh erra'tsente'ña ñeññ' e'ñe po'ñoçh eñoraten Yompor Puecamquëñ; attoch yeñoçh ñaña ñeññ' epatare'tene' Yompor poctapña

¹ Ñaña te'pa' o'ch masheñeshacha' ñaña noçhaneshacha' noterrser; sapa' ñato't same'ñena'ña allohuen pa'namen cotapñats tarro'mar ñetpa' ama't otenetañ Partso'

Puecamquëñ eñoratenahuet, sapa' čhochña seño'tyesña ñeñt pa'namen cotapñatser attochña sapa' e'ñe seño'ch erra'tsente'ña ñeñt e'ñe po'ño'ch huetsa Yomporeshot. Tarro'mar shonteñ ñeñt otetseñ ñetpa' Yomporo' po'ñoñ a'mtenet tarraña ñeñtpa' ama Yomporeyaye po'ñoñ. Ñeñtpa' erraparen o' orretyesa añ patsro. ² Arr sapa' alloch seño'ch erra'tsente'ña e'ñe po'ño'ch eñoratenña Parets Puecamquëñ: Erra'tsencha' otats Jesucristopa' ña po'ño'ch partsoť acheñetos arr patsro, ñeñtña cotapñatserpa' e'ñe po'ño'ch Parets Puecamquëñ eñoratene'. ³ Erra'tsencha' ñeñt amach atteye' otetso Jesúsocop, ñeñtña cotapñatserpa' ama po'ño'ch Parets Puecamquëñ eñoratenahueto. Ñeñtpa' ñeñtña po'ño'ch e'moñe'tene'ña Cristo ñeñt atet se'mare'tyeseť o'ch huapa. Te'ñapa' o' orrtonaya añ patsro.

⁴ Saña po'ño'ch nechemerneshacha' e'ñe po'ño'ch Yomporena'tares tarro'mar sapa' ama aña se'mñoteno atto pa'namenot shecare'tyensetañ. Yompor Puecamquëñ ñeñt sechorrenayapa' ñeñtña sapa' atarr ahuamencattatenes. Ñeñtña chorrenaya añ patso'marnesha'pa' ñapa' ama e'ñeye' ahuamencattatenaneto. ⁵ Ñeñtña shecare'tyets e'ñe ñet poctapñotet po'ño'chpa' patso'marnesheta. Ñeñto'marña ñerra'm eñosetpa' añach serrpare'tyenet ñeñt patso'marecpa. Ñeñto'marña ñetpa' patso'marneshach e'mñotenahuet. ⁶ Yaña po'ño'chpa' Yomporena'tarey. Ñeñt po'ño'ch eñotene' Yompor, ñetñapa' e'ñech cohuen e'mñotenyet ya. Ñeñtña ama Yomporena'tareyaye, ñetñapa' amach e'mñotenyeto. Yapa' alloña yeñotenña cotapñats ñeñt po'ño'ch huetsa Yomporeshot attoña yeñotenña ñaña cotapñats ñeñt shequëñets.

Atto Yomporpa' ña atarr amorrentañtetsa

⁷ Masheñneshacha' ñaña nočhaneshacha' amueranna'tpahuepa'ch allohueney tarro'mar ñeñtpa' Yomporeshot huena. Allohuen amorrentñapa' ñetpa' o' eñalleterret Yomporot, po'ño'ch o' eñoteret ñeñt atet pena Yompor. ⁸ Ñeñtña ama amorrentñopa' ñocpuepa' ama eñoteñetoña atet penaña Yompor, tarro'mar Yompor ñapa' ña atarr amorrentañtetsa. ⁹ Añpa' Yompor orrtate' yocop allochñapa' yapa' o'ch yeñoter Yomporpa' atarr morrentenya. Attoña mueñan Puechemer arr patsro ñeñt po'patrorr pen attochña yapa' corretsayach e'ñe ñeshot. ¹⁰ Arrpa' all orrtatonay Yompor ñeñt e'ñe po'ño'ch morrenteñets: Allempo ya ama't mameshapa' ama yemorrentpeño Yompor, ñañapa' allempoteñ atarr morrentenya ya. Ñeñto'marña ñapa' mueñonay Puechemer ñeñtcha' yetsa'terroya yo'chñar.

11 Ñeñto'mar masheñneshacha' atto Yomporpa' atarr nanac morrentenya, yapa'cho'ña e'ñepa'chña yemorrentanna'tuena allohueney. 12 Yomporpa' ama esesha' puentare. Tarraña ñerra'm e'ñe yemorrentannena allohueney, po'ñoçhpa' e'ñe yeparrocmaten epay Yompor. Ña puemorrenteña'pa' e'ñech chorrenya poctacma. 13 Ña atto apuerrey e'ñe ña Puecamquëñ ñeñtña yeñotatene'ña yapa' e'ñe yeparrocmaten epay Yompor. 14 Ñaña yapa' e'ñe yentuoñe't Yompor Puechemer ñeñto'marña ya te'pa' o' ya'potonas saña atto Yompor po'ñoçhpa' mueñonay Puechemer ñeñtcha' ya'queshpaterre' ya ñeñtey yeçha'yetsa añ patsro. 15 Ñeñt amëñenaya Jesús ñapa' po'ñoçh e'ñe Yomporo Puechemer, ñetña'pa' e'ñe parrocmatenet epuet Yompor.

16 Attoña ya te'pa' e'ñe yeñoteñ ñaña yame'ñeña atto Yomporpa' atarr morrentenya. Yompor ñapa' ña atarr amorrentañtetsa. Ñerra'm e'ñe po'ñoçh yemorrentannena po'ñoçhpa' o' yeparrocmaterr epay Yompor. 17 Attoña yapa' e'ñech cohuen yemorrenteña Yompor e'ñe poctacma, allochña'pa' yapa' amach yeñcha'ñañotayaya yeyemtero Yompor ñerra'm esempohuañen eñotatiesuerrey e'ñe errotencha' entyesuerrey. Tarro'mar e'ñe atet pena Jesucristo, yapa'cho'ña e'ñech atet yepena yaña arr patsro. 18 Ñerra'm po'ñoçh yemorrenteña Yomporpa' amachña cha yeñcha'teñe. Tarro'mar atto e'ñe poctacma cohuen yemorrentannena epay Yompor, ñeñtña po'ñoçh yehuapore'tañpene'ña yeñchañ. Ñerra'm esempo cha es yeñcha'tenpa' attoña e'ñe yañeña coñchatetsa. Ñaña ñerra'm orameñ yeñcha'ten amaca'ye e'ñe yeyçhena'ña attoch e'ñe cohuen yemorrentannena e'ñe poctacma.

19 Yomporpa' o' e'ñe morrenterya yanom, ñeñto'marña yapa'cho'ña te'pa' o'ch e'ñe yemorrentera yaña. 20 Ñerra'm esesha' otets, ñapa'cho'ña e'ño' cohuen morrentenana Yompor, tarraña ñerra'm cha e'moñe'tyenana pamo'ts, ñeñtña atet otetspa' ataca'ye shequën. Atto ama morrentenano pamo'ts ama't ñeñt'pa' e'ñe enteñ, amach errotenot morrentanoña ñaña Yomporña' tarro'mar ñeñt'pa' amaca'ye çhoye' enteñe. 21 Yompor po'ñoñ ñeñt yotene': Ñerra'm po'ñoçh yemorrenteña Yompor, yamo'tspa'cho'ña e'ñepa'chña cohuen yemorrentenanet.

5

E'ñe yeyemteñot Cristo çhocmach pomnaren yepen allohuen ñeñt ama pocteye' enteno Yompor arr patsro

1 Allohueney erra'tseneycha' ameñerraya Jesús pa' ña Cristotats ñeñteyña yapa' o' e'ñe puechemer perrey Yompor. Ñehua, yeñoteñ arr patsro ñerra'm yemorrenteña puesheñarr acheñ ñeñt' achemereshat, puechemerasha'naña e'ñe yemorrentuena. 2 Ñeñto'marña yeñoteñ ñaña ñerra'm esempo yemorrenteña Yompor ñaña yameñerrñaña po'ñoñ atet oteneý, aña'naña e'ñe yemorrentuena ñeñt' puechemerasha' pen Yompor. 3 Atto yemorrenteña Yompor choch yameñerrñaña po'ñoñ ñeñt' atet oteneý. O'ch e'ñe yepena ñeñt' atet oteneý, ñeñtpa' ama torrapahuoyaye. 4 Tarro'mar allohueney ñeñtey puechemer pen Yompor, yañapa' e'ñe yeyemteñoť Jesús chocma pomnaren yepen allohuen ñeñt' ama pocteye' entyeno Yompor arr patsro. 5 Allohuen ñeñt' ameñenaya Jesús ñapa' Yomporo' Puechemer, ñetña e'ñe ñapťet pomnaren penetña allohuen ñeñt' ama pocteye' entyeno Yompor arr patsro.

Allpon ñeñt' yeñotaterre' Jesucristopa' e'ñe po'ñočh Yomporeshot huapa

6 Ñeñta Jesucristo allempo huapa arr patsro eñall ñeñt' yeñotaterre'ña ñapa' e'ñe po'ñočh Yomporeshot huapa. Ñeñt' ñanompa' allempo atto apataretta Yomporecop oño. Tarraña ama e'ñe ñapťa oña yeñotataye ñapa' e'ñe po'ñočh Yompor Puechemer. Po'rraso'naña yeñotate'ña allempo acorso'tamťsaretterra; ñapa' e'ñe po'ñočh Yompor Puechemer. Ñaña Parets Puecamquëñ ñeñtpa'cho'ña ña yeñotaterre'ña Jesús pa' e'ñe po'ñočh Yompor Puechemer tarro'mar Parets Puecamquëñpa' erroten es eñotateney ñeñtpa' e'ñe po'ñočh atet. 7 Ñaña eñall ma'pa ñeñt' pue'ntaño'tsen ñeñt'ña yeñotatene'ña ya. Ñeñtpa' Yompor Parets ñaña po'ñoñ ñaña Puecamquëñ. Ñetpa' ama't ma'po'maret e'ñe patrra atet petsa. 8 Ñaña arr patsro eñall ma'pa ñeñt'ña yeñotatene' Jesús pa' ña po'ñočh Yompor Puechemer. Ñeñtpa' Parets Puecamquëñ, allotpa' oñ allempo apataretta Yomporecop allotpa' ñaña po'rras atto acorso'tamťsaretterra. Ñetpa' ama't ma'po'maret eñotatenet, e'ñe patrra eñotatyenet ñeñt' Jesús ñapa' e'ñe po'ñočh Yomporo Puechemer. 9 Ñehua, arr patsro chocma e'ñe pocte' yenteñ ñeñt' atet eñotateney acheñ tarro'mar ñeñtpa' chocma sherbeney. Ñaña ñeñt' atet eñotateney Yompor elloña ñeñtpa' atarr nanac sherbeney. Tarro'mar ñeñtpa' e'ñe ña Puechemerecop eñotateney Jesús pa' Yomporo Puechemer. 10 Ñerra'm esesha'ch ameñerraya Yompor Puechemer, ñeñt'ña' echerrancha' e'ñe ña pueyočhro ñeñt'cha' eñotaterre'

e'ñe pocte' o'ch e'ñe yemterrana Jesucristo ñeñt e'ñe po'ñoçh Yompor Puechemer. Ñeñtña ama ame'ñenayo Yomporpa' cha ottatateñ ñerra'mrrate' ñapa' atarr ashcañ tarro'mar ñeñt acheñerpa' ama ame'ñenano Yompor ñeñt atet eñotateney Puechemerecop. ¹¹ Yomporpa' atet eñotateney atto yapa' apuey Puechemer, e'ñe ñeshoñña yapa' corretsayach yocsheñeshocmañen tayoteñ e'ñe errponañohuen. ¹² Ñeñtña aguërre' Yompor Puechemer aña'naña o' aguërret attochña ñetpa' corretsetach tayoteñ e'ñe errponañohuen. Añña ñeñt ama aguërraye Yompor Puechemer, ñetñapa' amach esesha' aguërraye alloch correrret.

All pa'namen cotape' chatnerranet e'ñe allohuanen allempo so'tnerranet po'cartot

¹³ Ñeñt allpon o' nequellconas sa ñeñtes ame'ñenaya Yompor Puechemer, sapa' ñeñtcha'ña señotaterre' po'ñoçh sapa' corretsasach socsheñeshocmañen e'ñe tayoteñ errponañohuen.

¹⁴ Yapa' e'ñe yeyemteñoñ Yompor ñeñto'marña yeñoteñ es yenam ñeñt pocte' enten ña, yapa' chocmach e'mñoteney. ¹⁵ Ñaña atto yeñoteñ ñapa' chocma e'mñoteney ñerra'm es yenam ñeñto'marña yeñoteñ e'ñe allorocma o' yo'patataretta ñerra'm escha' yenamueñ.

¹⁶ Ñerra'm eseshascha' eñote' samo'ts ñeñt atet pene' ñeñt ama pocteye' enteno Yompor, ñeñtña po'chñarpa' ñerra'm ama añecpayaye alloch rromuerr attoch chenquërra e'ñe poctacma, sañapa' añcha' senamoñ Yompor attoch ñach a'crraterre' e'ñe puecamquëñoñ. Yomporpa' o'ch a'crrater ñerra'm po'chñarpa' ama añecpayaye alloch rromuerr attoch chenquërra e'ñe poctacma. Po'ñoçhpa' eñall yo'chñar alloch yerromuerr attoch yechenquërra e'ñe poctacma. Ñeñto'marña napa' ama añecpaye' notenso sapa' chocmach sema'yochampeña ñeñtcha' chenquërrtsa e'ñe ña patpare'teñoñ. ¹⁷ Ñehua, yeñoteñ allohuen ñeñt ama pocteye' enteno Yompor ñeñtpa' ochña'teñets enteñ Yompor. Tarraña eñall ñaña ochñarets ñeñtpa' ama añeyaye ñeñt alloch yerromuerr attoch yechenquërra e'ñe poctacma. ¹⁸ Yeñoteñ allohueney ñeñtey po'ñoçh eñallettertsa Yomporotpa' amach allo'na yepa'nenno ñeñt ochñarets enten Yompor. Tarro'mar Yompor Puechemerpa' chocma cohuanpeney ñeñto'marña oneñetpa' ama't e'ñe mameshapa' amach alla erroñ perrye'te.

¹⁹ Te'ña yapa' yeñoteñ o' yeyomporena'tarterra ya. Po'potantañña acheñenesha' arr patsro ñeñt ama ame'ñetso, ñetñapa' aña yochresha'tenahuet oneñeñ.

20 Yañapa' yeñoteñ ñeñt̃ Puechemer pen Yomporpa' ñaña'pa' o' huapa. Ñaña yečhapaterre'ña yeyočhro attochña yapa' o'ch yeñoter Yompor ñeñt̃ e'ñe po'ñočh Parets. Ñeñto'marña yeñoteñ o' yeparrocmaterr epay ñeñt̃ e'ñe po'ñočh Yompor Puechemer ñeñt̃pa' Jesucristo. Attoña yapa' o' e'ñe yeñoter Yompor ñeñt̃ e'ñe po'ñočh Parets, ñeñt̃ña yapa' allochña e'ñe corretsayach yocsheñeshocmañen tayoteñ e'ñe errponañohuen. 21 Te'ña nechemerneshacha' sapa' e'ñech señotnoma, ñato'tña seyomporer sepeña'ña po'poñ ñeñt̃ ama po'ñočh Partsoyaye. Te'pa' ñeñt̃ach notas, ñeñt̃pa' attetepa'ch Nompore. Allohua.

Juan

AÑ PUEPAÑ SAN JUAN PO' CARTA 2 SAN JUAN

Attoch cohuen yemorrentannena e'ñe po'ñoçh atet oteneý Yompor po'ñoñ

¹ Napa' na ñeñten pompor pen allohuen ñeñt ame'ñenaya Yompor, te'pa' o'ch nequellconas añ carta. O'ch nequellconañ pa ñeñteþ e'ñe noçhesha' nepeneþ, pa ñeñteþ o'acrerr Yompor. O'ch nequellconañ ñaña ora pechoyoreshohuen ñeñt e'ñe pachor pepene'. Napa' e'ñe po'ñoçh atarr nemorrentensa, ama e'ñe naptã nemorrentenso, elloña po'potantañeçhno ñeñt o' enterran ñeñt e'ñe po'ñoçh Yompor po'ñoñ, ñetpa'çho'ña e'ñe morrentuenset. ² Tarro'marña sapa' atarr yemorrentensa atto yapa' o' e'ñe çherrnaya ya yeyoçhro ñeñt e'ñe po'ñoçh Yompor po'ñoñ. Ñeñtpa' allach e'ñe a'puena yeyoçhro errponañohuen. ³ E'ñe nehuomñcha'teñoñes sa napa' o'ch notas: Yomporepa'ch sebensare'tamþene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña semuerenaya attochña sapa' e'ñech cohuen socshena seyoçhro. Ñeñtpa' añecop attochña sapa' señoñterñañ ñeñt e'ñe po'ñoçh Yompor po'ñoñ attochña sapa' o'ch semorrentannerra e'ñe cohuen allohuenes.

⁴ Te'pa' o'ch notaþ, pa ñeñteþ e'ñe noçhesha' nepeneþ na atto nentennaþ puesheña'tets ñeñt pechoyoresha' pepen, ñetpa' çhocma e'ñe cohuen cotape'cheññañet Yompor Parets po'ñoñ ñeñt e'ñe po'ñoçh atet oteneý, napa' ñeñtña atarr nocshatene'. ⁵ O'ch noçheshacha' neyerpataþa, allo'nepa'ch amorrentanna'tpo' sentannena allohuenes. Ñeñt atet noteneþ arr nequellcotpa' ñeñtpa' ama añeyaye ñoñets ñeñt ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñt ñoñets. ⁶ Ñerra'm yemneñ yemorrentanna'tapa' añcha'ña atet yeþohuerra ñeñt atet oteneý Yompor. Ñerra'm añ yemneñ o'ch e'ñe atet yeþohuerra ñeñt atet oteneý Yomporpa' çhochña e'ñe cohuen yemorrentannerra allohueney. Ñeñtpa' e'ñe ahuatoteñ atet serrpare'tatyesasete'.

Atet pena ashcañnesha' ñeñt çhocma e'moñe'tene' Cristo

⁷ Ñeñto'marña te'pa' atet notenes tarro'mar ñeñt shequene' acheñpa' o' epa'hua añ patsro. Shonte'ch ñeñtcha' shequene' acheñ, ñetpa' atet otyenet Jesucristo ama partsoye' acheñetostso. Ñeñt otets atetpa' ñeñtña po'ñoçh ashcaña

ñeñña e'moñe'tene' Cristo. ⁸ Sapa' e'ñech seño'ta allochña'p' amach shecaso. Ñerra'm shecas allempopa' e'ñe'e' orrena se'torrerra Yomporecop. Añcha'ña se'torrrena attochña sapa' e'ñech sagaphuerr ora allpon ñeññ' alloch tsa'tuerrsa ña.

⁹ Ñerra'm erra'tsencha' ama attecma'ye' ye'chatatso ñeññ' atet ye'chateney Cristo, ñerra'm cha a'po'poñeteññañ po'ñoñ, ñeññ' atet petsapa' amach Yomporeye' yemteno. Añcha'ña erra'tseneyte' allo'na co'tene' Cristo po'ñoñ yapa' e'ñe po'ño'ch yeyemteña Yompore Parets e'ñe Puechemere'na.

¹⁰ Ñerra'm esesha'ch huapatsa sesho ñapa' atetcha' otos ñapa'cho' año' ye'chaten Yompore po'ñoñ tarraña ñapa' ñerra'm ama atteye' ye'chateno atet ye'chaten Cristopa' ñehua, amach sagapatsche sepaclo. Ama't sehuom'cha'teño'tapa' amach sotatsche, "Yompore't pa'natenaya." ¹¹ Amach sehuom'cha'tatsche tarro'mar ñerra'm sehuom'cha'teñ, sapa' ñeññate' sey'chaprech ñeññ' ama po'ño'choyaye.

Atto so'terranet po'cartot

¹² Shontemeñ po'poñe'chno ñeññ'cha' notaseñ tarraña ama nemno o'ch e'ñe notuas arr necartot. Tarro'mar napa' nesechena o'ch nemo'tensa' allempochña attoch yeserrpare't e'ñe parro, attochña e'ñech cohuen parro yocsherra.

¹³ Añ pemo'nerr puechoyoresha'pa' ñetpa' huom'cha'tenpet ñamet arr necartot. Ñetpa'cho'ña ñeññet o' acerrranet Yompore. Te'pa' ñeññach notas, Yomporepa'ch sa'nataya. Ñeññ'pa' attetepa'ch Nompore. Allohua.

Juan

AÑ POMA'PAÑ SAN JUAN PO' CARTA 3 SAN JUAN

Atto Juanpa' eñotenan Gayopa' e'ñe cohuen ame'ñena

¹ O'ch masheñe Gayo nequellconapñ añ carta, napa' na ñeñten pompor pen allohuen ñeñt ame'ñenaya Yompor. O'ch notapñ, napa' e'ñe po'ñoçh atarr nemuerenpa.

² Ñehua, masheñe çhocma nema'yochamñepenpa allochñapa' Yomporpa' e'ñech a'natenpa. E'ñepa'ch cohuen pehuomñchena, tarro'mar napa' neñoteneñ e'ñe pecamquëñoçpa' e'ñe cohuen poçtape'chen Yomporecop.

³ O'ch notapñ, napa' atarr nocsha allempo huerra masheñnesha' peshot. Ñetpa' atet serrpare'tatuerrnet p'apa' e'ño' po'ñoçh cohuen pame'ñena, e'ño' cohuen poçtape'cheññañ Yompor po'ñoñ ñeñt e'ñe po'ñoçh atet oteney. ⁴ Allempo ne'mare'tas atto sapa' e'ñe cohuen soçtape'chen ñeñt e'ñe po'ñoçh atet oteney Yompor po'ñoñ, napa' ñeñña atarr nocshatene'; ama eñalle po'poñ ñeñt atet atarr nocshatene'. Napa' e'ñe atet nentenes ñerra'mrrate' nechemeres ñeñto'marña napa' atarr nocshensa.

⁵ Ñehua, masheñe o'ch notapñ, p'apa' e'ñe poçte' atet pepena ñeñt atto paguëñ e'ñe cohuen pepaclo masheñnesha' ñeñt huapyetsa po'poñ anetsot. ⁶ Ahuaña allempo yapçhena allohueney ñeñtey ame'ñetsa, ñetñapa' atet serrpare'tatuerryet atto p'apa' e'ñe cohuen pemuerapanet. Ñaña o'ch notapñ, çhocmach peyenpuenanet, p'apanetcha' ñeñt palltenet attoch anerret Yompor po'ñoñ po'poñ anetso. Ñerra'm atet pepenapa' ñeñtpa' e'ñech poçte' enteneñ Yompor tarro'mar ñetpa' Yompor sherbenet. ⁷ Ñehua, ñetpa' o' ahuanmuet attoch serrpare'teññañeta' Jesucristo po'ñoñ tarraña ñetpa' ama mueneñeto o'ch es apapanet ñaña ñeñt ama ame'ñetso. ⁸ Ñeñto'marña yapa' e'ñe poçte' o'ch es yapapanet tarro'mar ñeñtpa' attoña yetorrapretenanetña Yompor po'ñoñ.

Atto Diótrfespa' ama't mameshapa' ama cohuenaye' entenano ñeñt ame'ñetsa

⁹ O'ch noterrperr po'poñ. O' nequellca'hua carta allohuenacop ñeñt apçhetsa all p'a'netsro. O' notuanet ora allpon atet notuapñ arr necartot, tarraña Diótrfespa' çha achmare'tey. Ñapa' e'ñe pommo'cheñoç e'ñe ñañeñapa' añña muenen o'ch pomnaren p'a'yenan acheñenesha' ñeñt o' ame'ñerrana Yompor, ñeñto'marña ama e'ññotenye.

10 Ñeñto'marña esempoch nečhap peshopa' o'ch neyerpatosanet ñeñt atet pena Diótfefes. Ñapa' čhocma toma'tampeney attach eñosatse'tyen yocop. Ama ñeñtayaya atet peno, elloña ama aguënano masheñneshačhno ñeñt anene' Yompor po'ñoñ. Ama aguënaneto ñaña ama muenatenano acheñnesha' o'ch aguëñet ñamet masheñneshačhno. Ñerra'm esesha'ña aguënahuetpa' ñaña'pa' o'chčo' mueño'terranet arroť all sapčhena.

11 Ñehua, masheñe p̄apa' amach peyčhapretatsto ñeñt atet pentapreten ñeñt ama pocteyaye. Papa' añcha'ña peyčha' ñeñt pentapreten atto e'ñe pocte' es p̄a'yenet. Ñeñto'marña atet notenep̄ tarro'mar erra'tsen ñeñt e'ñe pocte' es petspa' ñeñtca'yeña Yompor pueyochresha'; ñeñtña ama pocteye' es p̄a'yetso ñeñtña ama't mameshapa' ama eñotenanoña Yompor.

Atto e'ñe cohuen orrtaten Demetrio

12 Ñehua, o'ch notap̄ ñaña po'psheññecop ñeñt̄pa' añ pa'so'cheñ Demetrio. Ñaña po'ñočhpa' e'ñe cohuen enteñ allohuen acheñnesha'. Ñapa' e'ñe atet pena atet oten Yompor po'ñoñ ñeñt e'ñe po'ñočh cohuen. Ñeñto'marña yapa'čo'ña yeñoteñ ñapa' e'ñe cohuen acheñer. Ñehua, p̄apa' e'ñe peñoteny ñerra'm erroten yoten, ñeñt̄pa' e'ñech po'ñočh atet.

13 Shontemeñ ñeñt̄cha' notapeñpa' tarraña amach e'ñe notuape añ necartoť. 14 Tarro'mar napa' atarr nemneñ ahuenepoña nečhap pesho. Ñerra'm esempoch nečhappa' allempochña e'ñe yeserrpare'tatanna'ta parro.

15 Ñeñt̄ arro'tsa'yen masheñnesha' ñetpa'čo'ña huom̄cha'tenpet ñeñtara añ necartoť. Pañapa' o'ch pehuom̄cha'tyesanet e'ñe puesheña'ttsocma masheñnesha' ñeñt̄ parro'tsenep̄. Te'pa' ñeñt̄ach notap̄ masheñe, Yomporepa'chña p̄a'natenaya. Allohua.

Juan

AÑ SAN JUDAS PO' CARTA SAN JUDAS

Atto Judaspa' quellcan carta allohuenacop ñeñt pueyochresha' pen Yompor

¹ Masheñneshacha' ñaña nochaneshacha', allohuenes ñeñtes o' huañerres Yompor Parets attoch pueyochresha' perres, ñeñtes o' sa'cohuentataretterra Partsocop, ñeñtes e'ñe cohuanpen Yompor e'ñe separrocmateñoť Jesucristo. Ñeñto'marña napa' nequellquënnas añ carta na Judason ñeñten torretsa Jesucristocop. ² E'ñe nehuomicha'teñoťes sa napa' o'ch notas: Yomporepa'chña semuerenaya, ñaña nanquëpa'chña morrentensa, nanquëpa'chña coshatenes seyochro.

*Ñeñt ashcañtetsa amach Yomporeye' po'ñoñ serrpare'teno
(2Pe. 2.1-17)*

³ Te'pa' o'ch notas, masheñneshacha' ñaña nochaneshacha' napa' atarr nemneñ o'te' nequellconas attoch neñotatas ñeñt e'ñe errotenotcha'ña a'qeshpataretey e'ñe allohueney ñeñtey ame'ñenaya Jesucristo. Tarraña te'pa' añ nenten ñeñt atarr paltetsa o'ch notas, nanquëpa'ch sema'yo'chra añ ñeñt atto yame'ñena attochña e'ñech cohuen semoñena, attoch amach semnateñe ama't puesheñarra o'ch a'po'poñetonaset ñeñt atet yame'ñeña Jesucristo. ⁴ Añecopña notenes tarro'mar chocma orretyena acheñenasha' ñeñt ashcañtetsa ñeñt ama Yomporeye' po'ñoñ cotape'cheneto. Ñet puehquëñoťespa' ñato'rraña chate' a'po'poñeterrmayet ñeñt atto po'ño'ch yame'ñerrñaña Yompor po'ñoñ. Ñetpa' atetcha' otyeset, e'ñeca'ye pocte' o'ch sosya'tsañe'chna yeychen tarro'mar Yomporpa' chocma peretnened, ñapa' atarr amueraña ñeñto'mar amach coñchaterrye. Ñetpa' po'ño'ch ama pamo'mtayeye' peñeto Yompor ñeñt ñapuet Yamo'mte' yepen ya. Ñaña ñetpa' ama po'partseshareye' peñetoña Jesucristo. Tarraña sapa' señoche'pa'ch e'ñe ahuatoteñ anuaretta ñeñt atet petsapa' ñeñtña o'patatenetña coñcheñtes.

⁵ Nehua, sapa' po'ño'ch e'ñe seño'teñ ñeñt atet pa' ahuat, tarraña te'pa' o'ch alla neyerpaterrsa atto Yomporpa' cha coñchatuerran ñeñt alla que'chpuerre' ñeñt e'ñe atet oteney Yompor. Ñeñtpa' atet pa' allempo a'qeshpaterran israelnasha' allempo erraneta' Egiptoť all atarr amuero'chtatarettete'ť. Tarraña ama't a'qeshpaterranetañ

allempto, elloña tsapaonetpa' o' alla a'cllatuerran allohuen ñeñt ama cohuenaye' ame'ñaye'te. E'ñech attecma perran allohuen ama't te' ñeñt ama ame'ñetso. ⁶ Te'pa' o'ch alla neyerpaterrser po'poñ ñeñt atet pa ñaña patanta'tets mellañoñeñnesha'. Ñetpa' anaretetañ ñetcha' sherbenet Yompor, tarraña ama't atet anaretetañpa' ñetña ellopa' o' a'ypo'ña'nmuet pue'ntañ e'ñe patpare'teño'tet Yompor. Ñeñto'marña Yomporpa' alla huancanet cadeno ñeñt ama apyapahuoyaye ama't errponaña alla huapore'tanet nanac checmeto. Ñetña'pa' alletach tarremphua esempoch mellapoterra allempochña mueñerranet ñaña coñcha'puetso. ⁷ Te'pa' o'ch alla neyerpaterrser ñaña ñeñt atet pe't sodomo'marnesha' ñaña gomorro'marnesha' ñaña allohuen ñeñt allampaño'marnesha' all. Ñetpa' e'ñe atet pete't atet pa patantarr mellañoñeñnesha' atto nanac ye'chcatenet ñeñt nanac sosey enten Yompor. Cañoresha'tyenet nanac ama't yacmapa' agapannena e'ñe parro yacmacma, ñeñtpa' amaca'ye atteye' anareteye. Ñeñto'marña Yompor allpa' attoña coñchatanet o' etomamñsanet attoch e'ñe a'poyatuerranet tso' ñeñt ama emaya'pahuoyaye. Ñeñto'marña yeñoteñ allohueney eñall coñcheñets ñeñt ama ahuañaño.

⁸ E'ñe attecma patse'tyena ñaña ashcañnesha' ñeñt orretyetsa te'. Ñaña ñetpa' po'poñonta es co'tape'chyenet ñeñt ama po'ño'ch atteyaye. Attoña ñetpa' a'sosyatenet po'chets e'ñe ñañeñeta. Ñeñto'marña ama't Yepartsesharpa' ama añcha'na'tpahuoye' enteñeto, attoña ama't ñaña allohuen ñeñt ahuamencatetyetsapa'cho'ña e'ñe achmāre'tueñet. ⁹ Tarraña ama achmāre'tpahuoyaye ama't Yepartseshar ama't ñaña allohuen ñeñt ahuamencatetyetsa. Ñehua, ama't Miguel ñeñt pa'mcha'tareter pen mellañoñeñnesha' ñapa' ama achmāre'tapanoña oneñe't. Allempto rroma Moisés oneñe'tñapa' huapa, ñapa' añ atarr mueneñ o'ch enana' arromña't, tarraña Miguelñapa' ama muenache o'ch aner. Ama't muene' es otnare'tanna'tetañpa' Miguelñapa' amaca'ye achmāre'tanoña oneñe't. Ñeñtpa' atta och:

“Ñehua, ñeñt atet pepena te' Yomporpa' ñach potteñe'che'.” ¹⁰ Tarraña ñeñtña ashcañnesha' ñeñt orretyetsa te'pa' ñetña'pa' chocma achmāre'teñet ama't ñeñt atarr ahuamencatesha' tarro'mar ñetpa' ama eñoteññañeto po'huamenc. Añach e'ñe paterr eñotenet ñeñt e'ñe patso'marecpa. Ñetpa' e'ñe atet penet ñerra'mrrate' berr ñeñt añach pa'yen ñeñt atet muenatyenanet po'chets, ama es co'tape'chpenayeña o'ch eñotet erra'tsente'ña ñeñt po'ño'ch cohuentetsa. Ñeñto'marña

ñetpa' a'chencataterretcha' e'ñe ñañeñeta.

11 Atarr yoro'cheno'tsa'yenet tarro'mar ñetpa' ama morrenteñeto pamo'ts, e'ñe atet penet ñerra'mrrate' atet pe't Caín allempo muetsan pa'mo'nasheñ Abel. Attoch aparettet quelle, ñetpa' añach cotape'chenet o'ch shecare'teñet acheñenesha' atet pe't Balaam. Ñeñto'marña ñetpa' chenquerretcha' tarro'mar e'ñe atet penet ñeñt atet pe't Coré ñeñt amtsarettatsa ahua't e'ñe ña patpare'teño't. 12 Ñeñña ashcañnesha'pa' sapa' ñeñña sepencna'ntatene' allempo sap'chena o'ch serratallme'channena ñeñtes ame'ñenaya Yompor. Sapa' serratallme'channena e'ñe semorrentanna'teño't, tarraña ñetpa' attach nanac rratse'tyenet amach ayetñatneneto amach cohua'peñetoña ñaña po'psheñeñ ñeñt cheporretsa ñeñt muenets o'ch rra' ñaña. Ñetpa' e'ñe atet penetañ ñerra'mrrate' ñeñt cohuanpenayeñ carrnero ñeñtcha' rratenayeñ tarraña amachña carrneroye'ña rrateno, ñeñtapa' ñañeñetach atarr rretset. Ñetpa' ama es sherbeneto e'ñe atta penet atet ñerra'mrrate' os ñeñt ama huatetso attach matateñ m'orr. Ñaña e'ñe attet ñerra'mrrate' narmetsoch ñeñt ama ame'tño, ama'tcha' chen pueme'teñporopa' amach me'teno. Ñaña ñeñña narmetsocherpa' e'ñech atet pena ñerra'mrrate' rromuech o'ch ya'mare ora puer'chohuenpa' o'ch e'ñe puetsohua o'ch huañ. Ñeñña ama't mameshapa' amach es sherberrye. 13 Amach pueñmañeshofoye' es orrtatyeneto e'ñech pommo'cheñofoeta es orrtatyenet. E'ñe atet penet ñerra'mrrate' oñ apellche' puemo'yer. Ama't mameshapa' amach muechecheno. Ñeñña emo'ypa' chach huapore'tenan sosyare' to'ña'so all pa'so'ten. Ñeñtpa' e'ñe atet penaña ashcañnesha' amach pasayaya orrtatenetoña apenco'chen. Ñetpa' e'ñe attet ñerra'mrrate' shepraño' ñeñt yenten o'ch shora'nom o'ch ahua' patso ñeñtpa' ama es sherbeno. Yomporpa' o'patenanet o'ch mueñanet coñcha'puetso all atarr nanac checmete', alloña ñetpa' amach cha'nerreto ama't errponaña.

14 Ñaña te'pa' o'ch notas, ahua'tpa' eñall puesheñarr yacma añ pa'so'cheñ Enoc ñeñt Adán po'm'reneñ po'can'chroño'hua. Ñaña'pa' ñeñt a'm'taye't Yompor po'ñoñ. Ñapa' eñotatan acheñenesha' atet'cha' a'pare'tterra ama't ñeñt ashcañnesha'. Ñocpueta'ñaña atet ote't: "Huerrach Partsesha' e'ñe pueyochresha'chnohuen ñeñt nanac po'nnacaren patsopueñ. 15 Huerrach allochña'pa' o'ch entuerran allohuen acheñenesha' ñato' cohuenette' ñato' amate' cohuenayayeto. Allohuen

ñeñtcha' ama cohuenaye' entuerro Yompor, ñetñapa' amñaretterretcha' coñcheñtso. Attochña tsa'tatuerrana allohuen ochñatenesha' ora allpon p̄atse'tyesete't ñeñt ama pocteye' enteno Yompor Parets ama't mamesha. Ñaña atetcha' tsa'tatuerranet ora allpon atto sasare'chete't Yompor e'ñe pachm̄are'teño'tet." Arrpa' allohua huañ ñeñt atet eñose't Enoc ahuat. ¹⁶ Ñaña ñeñt ashcañnesha'pa' atarrcha' tanmare'tyeñet, çhach po'poñ entuenet. Añach cotape'chyenet ñeñt muena'yenet e'ñe ñocpueta. Cho'nate' ñetpa' atarrcha' ommoñatet. Ñaña ñerra'm esempo e'ñe cohuen eñosyenet acheñenesnacop, ñetpa' añecpach e'ñe cohuen eñosyenet attoch es apuenanet acheñenesha'.

Atto pa'namen cotape'chatenan allohuen ñeñt ame'ñetsa

¹⁷ Tarraña sa masheñneshacha' ñaña noçhaneshacha' amachña ñeñta same'ñatsto. Sapa' añcha'ña seyepa ñeñt atet otyese't Yepartseshar Jesucristo puellsensarnesha'. Ñetpa' ahuatoteñ atet otete't ñeñtcha' orretyerrtsa tsapatonet. ¹⁸ Ñeñtpa' atet otyete't: "Allempoch mellapoterrmochapa' orrterrach ñeñtcha' achm̄are'terre' Parets. Añach yeçhenet ñeñt muenatse'tyenet ñañeñeta, ñeñtpa' ama't mameshapa' ama cohuenaye' enteñe Parets." ¹⁹ Ñeñt ashcañnesha'pa' çhocmach mueneñet o'ch ellopa'tetstateret ñeñt ame'ñenaya Yompor. Ñeñtara ashcañnesha'pa' añach cotape'chenet ñeñt atet muenatenanet ñet po'çhets; ñetpa' ama chorrenaneto Parets Puecamquëñ.

²⁰ Tarraña sa masheñneshacha' ñaña noçhaneshacha' e'ñe nemuereñotespa' o'ch notas, amach seyçhatstaneto ñeñt atet penet ñet. Sapa' e'ñechña same'ñeño't Yompor huomenquëpa'ch sepa' seyocher tarro'mar ñeñt same'ñena sapa' e'ñeca'ye Partseshotecma huena. Chocmach sema'yochena. Sapa' amach sotaye' se'ñoreno allempo sema'yochena. Añcha'ña se'ñoratene' Parets Puecamquëñ ñeñt atarr ahuamencatesha'. ²¹ Atetcha' sepaña sa allochñapa' çhocmach seño'teñ atto atarr morrentenya Yompor, amach sepurratsterro. Socsheñesha'pa' çhocmach seyemteña Yepartseshar Jesucristo; ña e'ñe puemuereño'tey esempohuañen a'queshp̄aterreycha', attochña yañapa' corretsayach yocsheñeshocmañen errponañohuen.

²² Ñehua, o'ch notas ñaña atetcha' sepe' po'potantañeçhno. Patanta'tets acheñpa' atarr echarr enteñet o'ch ame'ñerrñañet Yompor po'ñoñ. Ñetpa' çhoch soçtape'chaterranet e'ñe cohuen attoch ame'ñerret ñeñt e'ñe po'ñoçh Yompor po'ñoñ, ²³ atarr yoroçheno'tsenet po'chñaro'tet. Ñeño'tmarña sapa' o'ch sa'queshp̄aterranet, ñeñtpa' e'ñech atet

sepenanet ñerra'mrrate' cheshaŋoll ya'queshpāten o'ch yechter all poyapen pocoll. Po'potantañechno ñeñt̄ yeche' atarr sosya'tsañechno, ñetpa' čhochña semuerenanet țarraña ama'tcha' semuerenanetañpa' amach socshapretatstanetoña ñeñt̄ atet̄ yechenet sosya'tsañ. Sapa' čhochña setsena'tapretanet ñeñt̄ atet̄ pa'yenet sosey, te't sa'naña a'shoratatenet.

E'ñe yame'ñeñoĩ Yepartseshar Jesucristo aye'chočhtaterrapo'ch Yompor

²⁴⁻²⁵ Te'ña Yompor ñeñt̄ e'ñe ñapueĩ partsotets, ñeñt̄ allohuen es eñotyets, ñaña ñeñt̄ Ya'queshpātañer yepen, ñañapa' atarr ahuamencatesha', ñachña ahuamencat̄ sepene' allochñapa' amach alla seshora'nerro. Attochña sapa' čapatuerrescha' e'ñe ñesho all atarr cohuentena ña. E'ñech socsheñeshocmañen sečhačherr, amach eñalle ama't coñe'ta ñeñt̄cha' entapreterres ñeñt̄ ama pocteye' enteno ña. Te'pa' e'ñe yame'ñeñoĩ Yepartseshar Jesucristo aye'chočhtaterrapo'ch Yompor attoch e'ñe cohuen yecohuentaterrñañ. Chocmuepa'ch e'ñe ñapueĩ Yepartseshar yepeñ, čocmuepa'ch añcha'tarettena e'ñe tayoteñ errponañohuen ñeñt̄ atet̄ pa' ahuaťoteñ. Te'pa' ñeñt̄ach notas, ñeñt̄pa' attetepa'ch Nompore. Allohua.

Judas

ATTO SAN JUANPA' EÑOTATER YOMPOR ÑEÑTCHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñtpa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt torra'yetsa Yomporecop. Ñeñtcha' eñotatanetpa' ñeñtpa' ñeñtcha' ahuen atet perra ama't esempo. Atto eñotaten na, ñapa' ahuo't mueñon po'millañoñer, allochñapa' ñach negatyese' na ñeñten sochetsa Juan ñeñten torretsa ñocop, allochñapa' attoch eñoch ñaña allohuen ñeñt torra'yetsa Yomporecop. ² Tarro'mar napa' nach eñotatahuet allohuenet ñeñt e'ñe po'ñoñ ñeñt atet eñotatenen Yompor po'ñoñ ñaña ora ñeñt allpon eñotatenen Jesucristo ama't ñaña ñeñt ora allpon gatyennet.

³ Atarrcha' cosheñtso'tsen ñeñtcha' lleyatene' acheñenesha' añ ñoñets ñeñt huetsa Yomporeshot ñeñt yeñotatene' ñeñtcha' atet perra esempo. Atarrcha' cosheñtso'tsa'yen ñaña allohuen ñeñtcha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt aquellcaret arr. Tarro'mar o' chapmoch allempoch etsotuerra añ ñoñets.

*Atto Juanpa' quellcan cancherr ñeñt anetser all apcha'yena
allohuen ñeñt ame'ñenaya Cristo*

⁴⁻⁵ Napa' o'ch nequellconas carta allohuenacpas ñeñtes apcha'yetsa e'ñe same'ñeñot Yompor all ñeñt po'poñe'ttsocma anets ñeñt cancherr ñeñt Asio'tsa'yen. E'ñe nehuomñcha'teñoñespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt Jesucristo. Ñetepa'chña sebensare'tamñene'. Añ ñeñtara Yompor ñeñt chocma eñall, ama't ahuatoteñ chocma eñall ñaña ñeñtara ñeñtcha' huerrtsa po'pocheño. Ñaña Puecamquëñ ñeñtpa' ñeñtara cancherr ñeñt sherba'yets e'ñe all po'conaño e'ñe po'poñe'ttsocma sherbenet. Ñaña ñeñtara Jesucristo ñeñt atarr ayemuetpo' yenten ñeñt ora allpon ñeñt eñotateney; ñaña ñeñtara Jesucristo ñeñt ñanom tanterrtsa puerromñoñ ñapa' amach alla rromuerre'te. Attoña pa'mñcha'tareter peñ allohuen ama't allohuen añcha'taretechno añe patsro. Ya'ye'chochtatoñepa'ch ñeñtara Jesucristo ñeñt atarr amorrentña, e'ñe ña puemorrenteñoñeypa' attoña rroma yocop allochñapa'

attoch ashataretta po'rras e'ñe yocop allochñapa' attoch e'ñe e'shohuaretterra yo'chñar. ⁶ Ñaña ñapa' attoña e'ñe cohuen aguëney attochña ya'micha'tarettapretera attochña yesherbapreterrñañ Pompore ñeñt atarr Parets, attey ñerra'mrrate' ñeñt corneshatets Partsocop. A'cohuentaterrapo'ch Jesucristo, añcha'tarettepa'ch tayoteñ ama't errponohuañen. Ñeñtpa' atetepa'ch Yompore.

⁷ O'ch secueñ huerrach Cristo, oscha' a'suatamperre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñt pata'te'pa' entuapueretcha' ñamet. Allempoña ñeñt shonte' pa'namen acheñenesha' ñeñt yecha'yetsa arr patsropa' ya'na'tapueretcha' e'ñe puellqueñoñet. Ñeñtpa' e'ñech atet perra.

⁸ Yompore ñeñt nanac Parets ñeñt Yepartseshar yepen ñapa' chocma eñall, ama't ahuañoteñ chocma eñall, ñeñtpa' ñeñtara ñeñtcha' huerrtsa po'pocheño. Ñapa' atetña ot: "Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto." Añpa' allohua ñeñt atet toma'ntatena Cristo.

Atto Cristopa' orrtana Juan e'ñe po'cohuentañoñ

⁹ Te' napa' ñeñten sochetsa Juan o'ch alla noterrser. Napa' ñeñten e'ñe semo'nasheñ sephouenen sa. Napa' ñeñten semuerochtapretenaya e'ñe yame'ñeñoñ Jesús. Ñaña e'ñe yeyemteñoñ ñapa' e'ñech acoña es ya'huanten esheccha' ya'micha'tarettapretera. Ñehua, napa' o'ch neñotatas ñeñt atet nepena na arr. Ahuañmo'cha napa' e'ñe neserrpare'teñoñ Yompore po'ñoñ ñeñt atet eñotatenen Yepartseshar Jesucristo, añña ñeñt ne'moñe'tene'pa' o' huapore'tenneta' arr atarr allapar all rrochpe'chañetollo ñeñt otenet Patmos. ¹⁰ Pamñarr allempo chapa'muen añe yetro allempo chocma yeyerpueña Yompore napa' neyerpueñoñ ñapa' e'ñe machayota chorratna huomenc Yompore Puecamqueñ. Allempoñapa' machayota ne'm ñoñets huapa necha'ñoñ. Atarr huomenc eñen atet ñerra'mrrate' poctor e'morrtetsa huomenc. Ñeñtpa' atet oten añ ñoñets:

¹¹ —Napa' ñeñten ñanom eñallen, allempoteñña napa' chocma eñallen ama't esempohuañencha' huañerr ora allpon ñeñt eñall, napa' atten ñerra'mrrate' quellec A ñeñt ñanom huetsa alfabeto, arrohua all huañen alfabeto ñeñt yoten Z. Te' napa' o'ch notap ñeñt ora allpon ñeñtcha' negatyesañ añ poctetsa o'ch pequellca'yep papañllo allotpa' o'ch pemñe all

anetsočno ñeñt cančherr ñeñt apčha'yetsa all pa'namen anetso ñeñt ame'ñetsa. Ñeñt ñanom añ pa'so'cheñ Efeso, allotpa' Esmirna, allotpa' Pérgamo, allotpa' Tiatira, ñaña Sardis, ñaña Filadelfia, allotpa' ñaña Laodicea. Ora añečno anetspa' ñeñt Asio'tsen.

¹² Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allña'pa' nent cančherr ñeñt all orratenet huerare allo čoyo'tenet ñeñtpa' oro ayečcataret. ¹³ E'ñe rročo ñeñt cančherr all orratenet huerare all orrtena puesheñarr yacma ñeñtpa' Jesucristo ñeñtara Ñeñt Acheñetosets. Ashtamat, pa'shtampa' e'ñe čhen pa'tcohua. Achanaret, po'chanarpa' orotommuen ñeñt allo chanena puesomapo. ¹⁴ Poñoñ pue'chpa' e'ñe ora atarr huallama't atet ñerra'mrrate' carrnero pue'ch ñeñt e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñt otenet nieve ñeñt atarr huallama't. Pa'clle'pa' atarr poptena atet ñerra'mrrate' tso' po'huorter nanac a'rrechatañ. ¹⁵ Pa'tacpa'čo'ña attecma poptena atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten. ¹⁶ Pot po'cohuenrotpa' orrenan cančherr ranto. Puenamo'tpa'čo'ña all orrtena cochell ñeñt emoshem'to'mar etsotañtaret. Ora pa'tsa'pot e'ñe atet poptena ñerra'mrrate' atsne' atarr huomenc a'rrechatañ.

¹⁷ Allempo neñchpa' e'ñe nemčha'na'teño'tpa' nañapa' o' nerrmosa patso e'ñe pa'tco. Neyorño'tpa' ama nepelleno ama't mamesha, čha nottena ñerra'mrrate' čo nerromuen. Tarraña ña potot po'cohuenrot a'plla'n, oten:

—Amach penčha'tatsto, napa' ñeñten ñanom eñallen, allempoteñña napa' čhocma eñallen ama't esempohuañencha' huañerr ora allpon ñeñt eñall. ¹⁸ Napa' ñeñten ama arromña'eshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahuata. Ñaña napa' nechen llave, ñeñt nehuamenc nepen alloch pomnaren nepen rromueñets ñaña ñeñtcha' aguërre' allohuen ñeñt rromuets. ¹⁹ Te' p'ocoppa' añ poctetsa o'ch pequellca'yey ora ñeñt allpon o' negatyese'p ñaña allpon ñeñtcha' negatyerrperr ñeñtcha' atet perrtsa esempohuañen. ²⁰ Ñehua, te'pa' o'ch neñotata'p ñeñt atet toma'ntena añ cančherr ranto ñeñt penten e'ñe notot necohuenrot ñeñt ama eñotenaye' penteno. Ñeñt cančherr rantopa' añ toma'ntena ñeñt cohuan'pesyenahuet ora allohuen ñeñt name'ña'yenaya allemeñ ñeñt cančherr anetso ñeñt apčha'yetsa all. Ñaña ñeñt atet pent ñeñt ayečcataret oroch all orratenet huerare,

ñeñtpa' añ toma'ntena ora allpon ñeñt apcha'yetsa allemeñ anetso ñeñt cancherr ñeñt name'ña'yenaya.

2

Atto Juanpa' quellcan carta añecop ñeñt ame'ñetsa anetso Efeso

¹ Ñeñt neserrpare'tatene' ñapa' alla oterrerr, ñapa' atet oten:

—An poctetsa o'ch pequellca' carta añecop ñeñt cohuanmpene' allohuen ñeñt ame'ñetsa all anetso Efeso, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrene' cancherr ranto e'ñe all poto po'cohuenroñ, ñeñtara Cristo ñeñt chope'chets rrocho e'ñe allo'tsen ñeñt ayeçhcataret oroch all orratenet huerare. ² Ñaña'pa' atet otenes: ‘Napa' neñotuennas ñeñt ora allpon atet sepa'yena all. Napa' e'ñe nentuennas ñeñt allpon nanac setorra'yena ñaña allpon ñeñt e'ñe cohuen acopa es sa'huanta'huanen. Ñaña napa' e'ñe nentuenes sapa' ama saguëne ñeñt ama cohuenaye' es pa'yetso. Sapa' atto setpatyeñ ñeñt otetseñ ñetpa' allsensareteto' tarraña ñetpa' atta shecare'tenet. Attoña setpateño' o' señotanet ñetpa'

atta shecare'tenset. ³ Ñaña napa' neñotuenes ñeñt allpon semueroçhtena nocop ñaña atto e'ñe cohuen sa'huanta'huen mueroçhteñets, ama semuenme'cheñe allo setorrena. ⁴ Tarraña ama't atteñpa' nentuennas paterr ñeñt ama cohuenaye' nentapretenso. Ñeñtpa' añ atto sapa' o'huañ e'ñe semorrentna ñeñt atet sepa' ahuañ allempo e'ñe errte' same'ñerrna. ⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeñt atet sepa' allempo e'ñe ñenmañ same'ñenna. Ñerra'm amach ello soctape'cherro cohuen napa' tayecma o'ch ahuen o'ch nepratanmperrres ñeñt atma'ntataret socop ñeñtara ñeñt all orratenet huerare.

⁶ Tarraña ama't atteñpa' napa' añña e'ñe cohuen nentuennas atto sapa' ama pocteye' senteno ñeñt atet patse'tyen acheñenesha' ñeñt cotene' Nicolás poctapña. Napa'cho'ña ama pocteye' nenteno ñeñt atet patse'tyenet sosya'tsañ. ⁷ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëño', ora allohuen ñeñt pame'ñeñotet çhocma apcha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerrampperrayo, ñetña'pa' naphuerranetcha' ñeñt no'patatenanet ñeñtcha' atarr yonña'huerret e'ñe poctacma

Nomporesho, allpa' e'ñech cosheñtso'tsenet. Ñeñña napa' o'ch not, napa' o'ch nemnaterranet attoch o'ch tsohmuerret añ tsach pue'mer alloch corra'huerret e'ñe poctacma amach alla rromuerrete'te ama't ahuata.' " Arrpa' allohua huañ atet ot efeso'marneshacop.

Atto Juanpa' quellcan carta añecop ñeñt ame'ñetsa anetso Esmirno

⁸ Allempoña ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta añecop ñeñt cohuanpene' ñeñt ame'ñetsa all anetso Esmirna, o'ch potanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt ñanom eñall, allempoteña ñapa' chocma eñall ama't esempohuañencha' huañerr ora allpon ñeñt eñall. Jesucristo ñapa' ñeñt rromhuats tarraña te'pa' o' alla betterra. ⁹ Ña te'pa' atet otenes: 'Napa' neñotuennas ora allpon ñeñt atet sepa'yena. Neñotuennas ñaña atto atarr sa'muerochtatarettena, ñaña atto atarr huocchañes. Ñehua, ama't huocchañsoñpa' Yomporeshot shonte' esocmañen ñeñt sechyen. Ñaña ñeñt se'moñe'tene' neñotuennas atto atarr sasare'tenset. Ama't otenetañ ñetpa' judionesheto' tarraña ñetpa' ama Yomporeye' pueyochresha' penahueto; ñetpa' aña pueyochresha' penahuet oneñet ama't allohuenet. ¹⁰ Amach yore'tatstaso muerochteñets ñeñtcha' ahuen sehuapoya. Tarro'mar ñeñtcha' seyottanpse' patanta'ttsos, ñeñtpa' oneñeteshot huena añecopña attoch topatuas ñerra'm po'ñochte' same'ñena. Puesheña'ttsos muerochtatassetcha' e'ñe çharramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñt no'patatensa alloch socrra'huerra e'ñe socsheñeshocmañen. Ñeñtpa' ñeñtara noten po'poñ ñoñtso naphuerrescha' seprenio ñeñtcha' socshatuerre' e'ñe poctacma. ¹¹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet chocma apcha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerranperrayo, ñetpa' ama't puesheñarrotetapa' amach amñarefterreto coñcheñtso ama't ahuata. Ñetpa' amach alla rromuerreterro po'pocheño.' " Arrpa' allohua huañ atet ot esmirno'marneshacop.

Atto Juanpa' quellcan carta añecop ñeñt ame'ñetsa anetso Pérgamo

¹² Allempoña ñeñt neserrpare'tatene', ñapa' alla oterrerr:

—Te'pa' o'ch pequellquerrerr carta añecop ñeñt
 cohuanmpene' ñeñt ame'ñetsa all anetso Pérgamo, o'ch
 potanet atet: "Napa' o'ch nequellconas carta attoch
 neñotatas ñeñt atet otenes Jesucristo ñeñt orrtatene'
 cochell puenamot, po'cchellpa' ñeñt emoshenito'mar
 etsotañtatareñ. ¹³ Ñapa' te'pa' otenes: 'Napa' neñotuennas
 ora allpon ñeñt atet sepa'yena. Napa' neñotenes all seyçhena
 ñeñtpa' all atarr amcha'noçhtena oneñeñ. Tarraña ama't
 atteñpa' sapa' ama sequeçhpueno atto same'ñenna, ñaña
 çhocma sa'meten atto same'ñenna, ama't e'ñe allempo
 muetsennanet ñeñt name'ñenaya ñeñtara Antipas ñeñt
 çhocma neserrpare'tene' neñoñ sesho, allara ñeñt pa'netser
 peñ oneñeñ. ¹⁴ Tarraña ama't atteñpa' napa' nentuennas coñe't
 ñeñt ama pocteye' nentapretenso ñeñt atet sepatse'tena.
 E'ñe all Pérgamo patanta'ttsos ama semno o'ch sequèchpa'
 ñeñt pueyçhateñ pe't atet yeçhate't Balaam ahuat. Balaam
 ahua'tpa' atet cotape'chatane't Balac attoch shecare'tane't
 israelena'tarnesha' allochñapa' attoch ñetpa' o'ch patse'tyenet
 ñeñt ama pocteye' enteno Yompor. Ñeñt atet patse'tyenet
 ñeñtpa' atet pete't o'ch rrallme'chapretan po'poñ acheñ ñeñt
 po'yomporer pene' ñeñt ayeçhcataret, ñerra'm esempo rrenet
 po'chets ñeñt muetsenet allo sherbeñet pueyèchcatar. Elloña
 allempo ñetpa' e'ñe pocshapreteño'tetpa' o'ch agapanna'tet
 ama't ñeñt ama puetaporeyaye, allñapa' o'ch cañoresha'tenet.
¹⁵ E'ñe attecma seshopa'çho'ña patanta'ttsos atarr ashcarètes
 ñeñtes puesheña'ttsos ñeñtes ama semno o'ch sequeçhpoñ
 Nicolás poctapña ñeñt atet yeçhatenes ñeñt ama pocteye'
 nenteno. ¹⁶ Tarraña napa' o'ch notas, sequèchpa' ñeñt añ
 cotapñatser, o'ch alla soctape'cherr e'ñe cohuen. Ñerra'm
 amach ello soctape'cherro cohuen, napa' e'ñe tayecma o'ch
 ahuen o'ch neçllarenaneta' nocchello't ñeñt nenamo'tsen.
¹⁷ Ñeñt e'mñotene' añ ñoñetspa' çhapanetepa'ch pueyoçhreto
 ñeñt atet neñotatenanet na Necamquëño' ora allohuen ñeñt
 pame'ñeño'tet çhocma apçha'yenet allemeñ anetso'mar. Ñeñt
 metana'tue' allohuen pa'namen topateñtsoçhno, ñeñt ama
 nepuerramperrayo ñetñapa' napanetcha' maná ñeñtcha'
 pocrrañ perret ñeñt ama entpahuesho. Ñaña o'ch napanet
 mapyetoll ñeñt atarr huallamemen allo aquellcare'ttena
 so'chñets e'ñe etserra. Ñeñtcha' agapue' ñeñtpa' ñapña
 eñotenan añ so'chñets ñeñt aquellcare't all.' " Arrpa' allohua
 huañ atet ot pérgamo'marneshacop.

*Atto Juanpa' quellcan carta añecop ñeñt ame'ñetsa anetso
 Tiatiro*

¹⁸ Allempoña añ ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta ñaña añecop ñeñt cohuanpene' ñeñt ame'ñetsa all anetso Tiatira, o'ch potanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer, ñeñtara ñeñt pa'cclle'pa' atarr a'rrechatañ atet ñerra'mrrate' tso' po'huorter, ñaña ñeñtara pa'tacpa' atarr poptena atet ñerra'm aser ñeñt bronce ñeñt atarr cohuen poptetsa. ¹⁹ Ñapa' te'pa' atet otenes: ‘Napa' neñotuennas ora allpon ñeñt atet cohuen sepa'yen, atto atarr semorrentannena ñaña atto atarr same'ñena, ñaña atto atarr seyenpannena, ñaña atto e'ñe cohuen sa'huanta'huen ñeñt atarr echarr senten. Ñaña elloña allo'na sesen atet pa'nmue' ñeñt atarr cohuen enten Yompor. ²⁰ Tarraña ama't atteña' eñall paterr ñeñt ama pocteye' nentapretenso. Ñeñtpa' atto sapa' semnateñ coyanesha' ñeñt sochetsa Jezabel atto ñapa' aña yeçhaten ñeñt ama cohuenaye' nenteno na. Ama't ñapa' oteneñ ño' a'mtene' Yompor po'ñoñ tarraña ama atteyaye, ñapa' atta shecare'tenes ñeñtes torretsañ nocop. Ñaña ñapa' aña yeçhatenes ñeñt atto secañoresha'ten, ñapa' otenes ñeñtpa' e'ñe pocte' enteñ Yompor. Ñaña aña yeçhatenes ñeñt atto serrapreten po'chets ñeñt muetsenet ayeçcataretecop, ñapa' otenes ñeñtpa'cho'ña e'ñe pocte' enteñ Yompor. Tarraña Yomporña' ama't mameshapa' ama pocteye' enteñe. ²¹ Napa' atta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen. Ñapa' aña atarr cohuen enten atto cañoresha'ten. ²² Ñeñto'mar te' napa' o'ch nemnach o'ch atsna'ten attoch amach cha'nerro po'mayoñ. Ñaña ñeñt epuet atet penet ñerra'm ama cotape'cherreto cohuen attoch queçhpuenet ñeñt atet yeçhatenanet ña, ñetpa'cho'ña o'ch necoñchatanet nanac. ²³ Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñt pame'ñeñofet açha'yetsa allemeñ anetso o'ch eñochet ñeñt atetpa' ama aþapahuo. Napa' e'ñe nentuenas ama't ñeñt atet soctape'chen seyochro. Napa' ñeñtencha' saphuerre' allpon ñeñt poctetsa e'ñe puesheña'ttsocpas, ñeñt allpon atet sepa'yen. ²⁴ Tarraña po'potantañes ñeñtes tiatiro'marneshas sapa' ama socteññañe ñeñt atet yeçhaten coyanesha'. Ama't ñaña ñeñt otenet oneñet poctapña ñeñt ama eñotpahuoyaye, puesheña'ttsa e'ñe etsotene' — ñeñtpa'cho'ña sapa' ama seycheñe. Ñeñto'mar te'pa' o'ch notas, napa' amach nenonaso po'poñ ñoñets ñeñt atarr echarr senten. ²⁵ Añña notenes, amach sequeçhpatsche ñeñt atto soctape'chen

cohuen Yomporecop, ama't tayoteñ ñaña esempohuañen allempoch nohuerra. ²⁶⁻²⁷ Ñeñt metana'tue' allohuen pa'namen topateñtsočno, ñeñt ama nepuerramperrayo, ñeñt allo'na sets pa'nmue' ñeñt pocte' nenten na, ñetpa' naphuerranetcha' attoch amcha'taret entenanet allohuen pa'namen acheñenesha' ñeñt yecha'yetsa aña patsro. Ñeñtpa' atet Nomporecop apuennen ñaña. Neyorochenñocho amcha'nochtapreterrnetcha'. E'ñe po'huamencotet ñerra'm ñet muenats atarrcha' muerochtateret allohuen pa'namen acheñenesha' arr patsro. Ñeñtpa' o'ch netma'ntacha ñerra'mrrate' ñeñt echene' po'carr asreḡ, ñerra'm allo aso'tet patsro'pa' chach a'mllo'tstach e'ñe poctacma. ²⁸ Ñeñt metana'tue' allohuen pa'namen topateñtsočno elloña ñetpa' napanetcha' ranto ñeñt atarr ateshamerr. ²⁹ Ñeñt e'mñotene' añ ñoñetspa' chapanetepa'ch pueyočhreto ñeñt atet neñotatenanet na Necamquēñoḡ, ora allohuen ñeñt pame'ñeñoḡet chocma apcha'yenet allemeñ anetso'mar.' ” Arrpa' allohua ñeñt atet ot tiatiro'marneshacop.

3

Atto Juanpa' quellcan carta añecop ñeñt ame'ñetsa anetso Sardo

¹ Allempoña ñeñt neserrpare'tatene' ñapa' alla oterrner:

—Te'pa' o'ch pequellquerrerr carta añecop ñeñt cohuanmpene' ñeñt ame'ñetsa all anetso Sardis, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe chorratena Yomporecop Puecamquēñ cancherr ñeñtara cancherr ñeñt sherba'yets. Ñetpa' po'poñe'ttsochma sherbenet. Ñaña ñeñtara Cristo ñeñt orrene' cancherr ranto. Ñapa' te'pa' atet otenes: ‘Napa' neñotuennas ora allpon ñeñt sepa'yen. Ñaña neñotuennas atto sa acheñenesha'pa' atet entensetañ ñerra'mrrate' e'ñe cohuen socrena Yomporecop. Tarraña ñeñtpa' ama atteye' sepeno chaña sottena ñerra'mrrate' cho serromuen, amaña es sesherbenaña Yomporecop.

² Ama't atto same'ñenañ mame' tarraña ñeñtpa' allo'na sen huañuanmats. Napa' nentuenes ama setsotenoña ñeñt e'ñe pocte' enten Nomporecop. Te'pa' o'ch notas, e'ñechña señoḡa, o'ch alla setanterra Yomporecop. ³ Chocmachña seyerpueña ñeñt atto aserrpare'tataretes ahuañmo'choteñ. Amach sepsatsche añ ñoñets ñeñt same'ñataya. Ñeñto'marña te'pa' añ poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayotach nohuernasa

atet ñerra'mrrate' eñetpa' amach señoñe esempopa' machayotach huaponasa. ⁴ Tarraña ama't atetpa' all anetso Sardiso e'ñe puesheña'ttsaña ñeñt ama yechenaye sosya'tsañ ñeñt ama pocteye' enteno Yompor. Ñetpa' atet atma'ntatarettenet ama't pa'shtamuetpa' ama a'sosyateñeto. Ñeño'tmar ñetpa' e'ñe pocte' nentenanet ñaña attochña nemnaterranet o'ch yechope'cherr e'ñe parro tarro'mar ñet ñeñt neshtamtatenanetpa' ama a'sosyateñeto, e'ñe cohuenarer orrtenet e'ñe huallama'tareret. ⁵ Ñeñt metana'tue' allohuen pa'namen topateñets ñeñt ama nepuerranperrayo, ñetpa' neshtamtaterranet shetamuets ñeñt atarr huallama't. Ñetpa' amach ne'sherraneto pa'so'cheñ all aquellcayettenet Yompor po'libro attochña ñetpa' corretsetach. Ñetña'pa' nechme'taterranetcha' ñeñt na Nompor ñaña allohuen po'mllañoñeñnashar. ⁶ Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamqueno't ora allohuen ñeñt pame'ñeño'tet çhocma apçha'yenet allemeñ anetso'mar.' ” Arrpa' allohua ñeñt atet ot sardiso'marneshacop.

Atto Juanpa' quellcan carta añecop ñeñt ame'ñetsa anetso Filadelfio

⁷ Ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta añecop ñeñt cohuanpene' ñeñt ame'ñetsa all anetso Filadelfia, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe Parets ñeñt e'ñe po'ñoç allohuen es oten. Ñeñtara Cristo ñeñt allsensaret ñach amcha'tarettertsa e'ñe atet amcha'tarette't David. Ñato' o'ch netma'ntacha o'ch not ñapa' echenan David po'llave. Ama't erra'tsencha' o'ch toranpenanet attoch çhapanet Yompor po'cohuenña ama't eseshapa' amach errotenot alla epatare'terraneto. Ñaña ñerra'm ñach yottanperre' ama't eseshapa' amach errotenot toranpereto. ⁸ Cristopa' te'pa' atet otenes sa: ‘Napa' e'ñe neñotuennas ñeñt atet cohuen es sepa'yen. Ama't ama tama ahuamencateso Yomporecop, tarraña ama't coñe'ta sehuamenc sepen çhocma same'ñennana neñoñ ñaña çhocma sa'meten atto same'ñenna ama sa'nasotenko. Ñeño'tmar napa' o'ch netoranpsonas allcha' sa'potennan neñoñ, ñaña ama't eseshapa' amach errotenot alla yottanperrnaso. ⁹ Ñaña añña ñeñt otetseñ ñetpa' judionesheto' — ñehua, ñetpa' ama Yomporeye' pueyoçhresha' penahueto tarro'mar ñetpa' añña pueyoçhresha' penahuet oneñeñ, ñetpa' atta shecare'tenset. Tarraña ñetña te'pa' o'ch name'ñatanet

allochñapa' o'ch çhapanet pueyoçhreto sapa' ñeñtes atarr nemorrentena. Ñeñto'marña ñetpa' o'ch huapuet sesho o'ch concorposet allo'tsenes. ¹⁰ Sapa' e'ñe cohuen acopa setsoton allpon neñoñ, ama sa'ypo'ñenno na, ñeñto'marña napa'çho'ña amach na'ypo'ñaso. O'ch necuamperres tarremphua allempoch mueroçhteñsopoterra ñeñtcha' topaterre' ora allohuen acheñenesha' ñeñt yeçha'yetsa aña patsro. ¹¹ O'ch e'ñe mamerrerra' o'ch nohuernasa. Ñeñt atto allpon same'ñena o'ch e'ñe señoñuanem amach sequeçhpatsche. Allochñapa' ama't eseshapa' amach errotenot puerratañpsaso ñeñt no'patatensa ñeñtcha' atarr socshaterre'. ¹² Ñeñt metana'tue' allohuen pa'namen topateñsoçhno ñeñt ama nepuerramperrrayo ñetpa' amate' errotenot ahupore'tareterreto allot, ñetpa' e'ñe attet ñerra'mrrate' all orratenet pocoll ñeñt pa'paquell pen Nompore' ñeñt e'ñe huomenc echarr aparet. Ama't eseshapa' amate' errotenot huapore'che. Ñaña e'ñe ñesheto napa' o'ch nequellcoñ Nompore' pa'so'cheñ, allotpa' o'ch nequellcoñ ñaña Nompore' pa'netser e'ñe allara ñesheto, ñeñtara pa'netser ñeñt soçhetsa Jerusaléñ, ñeñtcha' sohuerrtsa entot e'ñe etserrare'. Allotpa' o'ch nequellca' ñaña neso'cheñ all e'ñe ñesheto ñeñt e'ñe etserrare' neso'cheñ. ¹³ Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamqueno't ora allohuen ñeñt pame'ñeñotet apçha'yenet allemeñ anetso'mar.' " Arrpa' allohua ñeñt atet ot filadelfio'marneshacop.

Atto Juanpa' quellcan carta añecop ñeñt ame'ñetsa anetso Laodiceo

¹⁴ Ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta añecop ñeñt cohuanpene' ñeñt ame'ñetsa all anetso Laodicea, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ama puenesho po'ñoñ. Ñeñt atet oteney Pomporecop ñeñt pa' atetcha' perrnay, ñaña ñeñt allpon oten, ñeñt pa' e'ñe po'ñoçh atet, ñaña ñeñtara Cristo ñeñt ñanom eñall, allotña Pomporepa' yeçhcatyesan allohuen ñeñt allpon eñall. ¹⁵⁻¹⁶ Cristoña te'pa' atet otenes: ‘Napa' e'ñe neñotuennas ñeñt ora allpon atet sepa'yen. Tarraña sapa' seçllaño'tetsetsa same'ñenna, ama e'ñe huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seçllaño'tetsetsa same'ñenna. Ñato' o'ch netma'ntacha atet. Sapa' ama atteyayso ñerra'mrrate'

oñ ñeñt atarr sose', ñaña ama atteyayso ñerra'mrrate' oñ ñeñt atarr atserrsasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Ñeñto'marña napa' e'ñe atet nentenes atet ñerra'mrrate' oñ ñeñt čha aya'pesatañtena. Ñerra'm yorrpa' čhach ya'pesatey o'ch ya'tatstera. Ñeñto'marña sapa' e'ñe atet nentenes čhach nemneñ o'ch nehuapore'tamperres. ¹⁷ Sapa' ama't soteneñ año' es sepallteno e'ño' sechuen ora ñeñt allpon poctetsa socop e'ñe sa setaruasot. Tarraña ñeñt sherbets secamquëñecoppa' ama secheñe ama't coñe'ta. Napa' atta nentenes atet ñerra'mrrate' ñeñt nanac atsena'taret, atarrcha' amueročhtatarettena ñeñt e'ñe huocchañ ñaña aporo'yet attach muelle'mquën. ¹⁸ Ñeñto'marña na te'pa' o'ch noctape'chatterres sa o'ch notas sapa' ñeñt sepalltena. O'ch senamuen nesho ñeñt po'ñočh nanac sherbets secamquëñecop. Allochñapa' attoch sechuerr shonte' esocmañen ñeñt e'ñe po'ñočh sherbets. Ñeñt ama sherbetsopa' o'ch sa'ypo'ñer. Ñato' o'ch netma'ntacha atto allempo atserrtatenet oropa' o'ch nohuanña a'yo ñeñt ama sherbetso allempoñapa' o'ch e'ñe orochayaña ñeñt nanac sherbets. Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atetcha' sepa, o'ch seraña nesho shetamuets ñeñt atarr huallama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquën. Attoch serañtena ñaña quëllo'yeñtsopar alloch separterr seclle' allochñapa' attoch secuerr o'ch senterra e'ñe cohuen. ¹⁹ Ñehua, allohuen ñeñt po'ñočh atarr nemorrentenapa' chocmach e'ñe cohuen noctape'chatterranet ñerra'm esempo atpare'tennet. Ñaña erroteno allohuen ñeñt nemorrentena o'ch necoñchach mame', tarraña ñeñt'pa' e'ñe ñoçpueta allochñapa' attoch o'ch alla cotape'cherret cohuen nocop, o'ch alla ame'ñerrnet huomenc. ²⁰ Señoche'pa'ch ñeñtcha' atet netma'ntaterra. Napa' atetcha' nepena ñerra'mrrate' esesha' ñeñt chocma chore'tets yetarro't. Ñerra'm eseshas se'mapuerrnan neñoñ ñaña ñerra'm setorampenen, nañapa' o'ch nebe'tos all, allñapa' o'ch yerrallme'chen parro. ²¹ Ñeñt metana'tue' allohuen pa'namen topateñtsočno ñeñt ama nepuerramperraye, ñetñapa' nemnatanetcha' o'ch añcha'tarettapreterrnet e'ñe all neconaño. E'ñech attet ñerra'mrrate' na, napa' e'ñe nemtana'tua allohuen pa'namen topateñtsočno. Ñeñto'marña napa' na'mcha'tarettapreteña Nompör e'ñe all po'conaño. ²² Ñeñt e'mñotene' añ ñoñets chapanetepa'ch pueyočhreto ñeñt atet neñotatenanet na

Necamquëñot ora allohuen ñeñt pame'ñeñotet apcha'yenet allemeñ anetso'mar.' " Arrpa' allohua ñeñt atet ot laodiceo'marneshacop.

4

Atto Juanpa' entan Yompor po'conaño e'ñe alla pue'ntaño

¹ Allempoñapa' alla gatyerrnerr po'poñ. Necuerrerr, allña' nentos yetarr atoraret allcha' nebe'tos o'ch nechap ento. Alla ne'muerrerr ñoñets ñeñt atet e'morrtetsa ñorra' atarr huomenc atet ñerra'mrrate' poctor atarr huomenc eñen. Ñeñña ñoñetspa' atet oten:

—Apon arr, o'ch pebe'tosampesna o'ch negatyesañ allohuen ñeñtcha' atet perrtsa tsapatonet.

² Allempoña Yompor Puecamquëñ e'ñe chorrenna, atto nechap ento all nentos puesheñarr alla anen po'conaño.

³ Ñeñt anets all po'conaño'pa' atarr nanac cohuen aspanamcoquëno poptamco'tena atet ñerra'mrrate' mapue' ñeñt atarr cohuen poptetsa ñeñt otenet jaspe. Ellonetpa' po'poñontō atarr nanac cohuen tsamcoquëno poptamco'tena atet ñerra'mrrate' mapue' ñeñt otenet cornalina. Ñaña allo arca'tampenapa' ñeñtpa'cho'ña atet ñerra'mrrate' ayon tarraña ñeñtpa' atarr nanac cohuen aspano shemashro poptena; e'ñe atet poptena ñerra'mrrate' mapue' ñeñt otenet esmeralda. ⁴ Ñaña topño'mar ñeñt rroçhtam'pene' all shonte' po'poñ conañechno. Ñeñt conañechno topño'tsa'yen ñeñt rroçhtam'pene' allo'tsen epoch çharra' puechena pa'tats. Ñaña ñeñt anorrçhets allohuen conañechno ñeñtpa'cho'ña allo'tsen epoch çharrasheña puechena pa'tats ñeñt sherbene' Yompor all pue'ntaño. Coçhneshareret pa'shtam atarr huallama'tarer, po'choyo'met oro ayeçhcataret ñeñt choyo'mtenet. ⁵ E'ñe rroçh conañotpa' allot huena meratste', allot huena ñaña tatste'. Allpa' atarr huomenc ma'moreten. E'ñe alla allame'tets po'conaño ñehuapoñ allot'sen cançherr huerare ñeñt huoretyets all. Ñeñtpa' ñeñt toma'ntenaya Yompor Puecamquëñ ñeñt cançherr ñeñt sherba'yets e'ñe po'poñe'ttsoema. ⁶ E'ñe alla a'yenet po'conaño all orrtena erracmañen atet ñerra'mrrate' ñeñt añecmuen rerpat ñeñt e'ñe orrtatuene' ora ñeñt allpon eñall all.

Allot'sen po'conaño e'ñe pa'tatsshemto'marot all tomçhen pa'tats ñeñt berrma'ttetsa. Ñeñtña' shonte' pa'cllo'yechno emota cohua'yen. Pa'chco'tago'tpa'cho' shonte' pa'clle' allot cohuen. ⁷ Ñeñt ñanom ñeñt berrma'ttetsa all, ñeñtpa' e'ñe atet ñerra'mrrate' ma'ñor. Po'poñpa' allot'sen ñaña atet ñerra'mrrate' toro, po'poñ pa'tsa'pot

pa'clloyotpa' e'ñe atet orrtena ñerra'mrrate' acheñ. Po'poñ all orrtena attema't ñerra'mrrate' ñeñt otenet contor ñerra'm esempo anena. ⁸ Ñeñt pa'tatso'mar berrma'tpa' e'ñe apa'pa'yetarerochet, pate'tetspa' echenan pechapa'ttsocmuet pa'pue' penet. Pa'pa'yot enotpa' e'ñe aclo'yetarerochet, puelleca'notpa'cho'ña aclo'yetareret emoto'mar allof cohua'yenet. E'ñe ellapenete't arepenete't all achoteñet Yompor, ama't mameshapa' ama ameseneto atto achoteñet Yompor. Ñeñtpa' atet otenet:

Parets, parets, parets ñeñtara Yompor ñeñt atarr ahuamencat nanac ñeñt Yepartseshar yepen ñeñt chocma eñall. Ama't ahuatoñeñ eñall ñaña ñeñtara ñeñtcha' ello huer'tsa po'pocheño.

⁹ Ñaña ñeñt berrma'ttetsa allpa' cohuentateññañet Yompor ñeñt anets all po'conaño, atarr añcha'na'tpo' enteñet, ñaña chocma puema'yocheño'tet parasyoso'teñet Parets ñeñt ama arromñañeshayaye ama't ahuata. ¹⁰ Ñetpa' ñerra'm esempo aye'chochtateñet Parets, añña ñeñt epoch charrasheña ñeñt puechetsa pa'tats ñeñt sherbene' Yompor allpa' ñetpa'cho'ña o'chcho' concorpa'rretenet e'ñe all ñesho, o'chcho' ma'yocheñet ñamet Yompor ñeñt ama arromñañeshayaye ama't errponaña. Allotpa' o'ch a'meyet po'choyo'm o'chcho' net e'ñe Yomporeshonet ñeñt anets all po'conaño. O'chcho' aye'chochtateñet Yompor ñamet, ñeñtpa' atet otenet:

¹¹ Yompore, ñeñteþ Yepartseshareþ, ñeñteþ nanac Partsoþ, ya añ poctetsa o'ch yecohuentatonap ñeñteþ añcha'na'tpahueþ ñaña atarr ahuamencateþ. Tarro'mar þa yeçcatyene' ora allpon ñeñt eñall, e'ñe þa pemneñño't ahuo't eñalleyesa, e'ñe þa peñoño't ahuo't yeçhca'yena ñeñt allpon eñall.

5

Atto Juanpa' entan Cristo ñeñt atma'ntataret Carrnero, e'ñe ñapía toran Yompor po'libro

¹ Allempoñapa' alla necuererr ñeñt anets all po'conaño. Potot po'cohuenrotpa' all nent all orrenan libro apco'nottataret, e'ñe emoto'mar aquellca'huaret o'ponot ñaña enot. Echenan cancherr ñeñt allo ayomrraret atto e'ñe echarr aþaret. ² Ñaña all nent puesheñarr mellaño'teñ ñeñt atarr ahuamencat. Ñaña' rana huomenc, ñeñtpa' atet oten:

—Esesha'huaca' e'ñe cohuenare' cotape'chetsña Yomporecop ñeñtcha' tore' añ Yompor po'libro allo echarr aþarettena.

³ Tarraña ama't puesheñarrapa' ama eñalle ñeñtcha' tore' Yompor po'libro. Ama't puesheñarra ñeñt ento'tsen

ñaña ama't ñeñt patso'tsen ñaña ama't ñeñt o'pono'tsen patso, ama eñalle ñeñtcha' muenatet ñeñtcha' tore' Yompor po'libro attoch eñorachet. ⁴ Napa' ñeñtña atarr neyarre' atto ama't puesheñarrapa' ama neñche ñeñt e'ñe cohuenare' es cotape'chets Yomporecop ñeñtcha' muenatet o'ch toran Yompor po'libro ñeñtcha' eñorate'. ⁵ Allempoña ñeñt epoch çharrasheña ñeñt puechetsa pa'tats ñeñt sherbene' Yompor, puesheñarrña' oten:

—Amach peyahuatsto, tarro'mar eñall puesheñarr ñeñt e'ñe pocte' ñeñtcha' tore' Yompor po'libro ñeñt cançherr allo echarr aþarettena, tarro'mar ñapa' ñeñt metana'tue' allohuen pa'namen topateñtsoçhno, ñeñtña' aña'pa't Cristo ñeñtara atma'ntataret Ma'ñor. Ñeñtpa' judámerena'tar ñeñtara David po'mreneñ.

⁶ Necuererr, allña'pa' nent Cristo ñeñt toma'ntenaya Carrnero. All ten e'ñe rroçho allo'tsa'yen Parets po'conañ ñaña añ pa'tatso'mar ñeñt berrma'ttetsa ñaña e'ñe allo'tsa'yen ñeñt sherbene' Yompor. E'ñe rroçho all ten Cristo ñeñt atma'ntataret Carrnero. Orrtena atet ñerra'mrrate' carrnero ñeñt amtsarettetsa ochñartsocop. Ñeñt carrneropa' cançherr po'ucor, echenan ñaña cançherr pa'c'le'. Ñeñt cançherr pa'c'le'pa' ñeñtpa' añ Yompor Puecamquëñ ñeñtara cançherr ñeñtcha' sherba'yesets e'ñe po'poñe'ttsocma ora erracmañen aña patsro allcha' amñarefetyerret. ⁷ Allempoña añ Carrneropa' o' huapa o' çhap allo'tsen Yompor ñeñt anets all po'conaño. Ñaña'pa' chetsosan Yompor po'libro ñeñt orren po'cohuenrot. ⁸ O' chetan libropa' allempoña añ ñeñt pa'tatso'mar berrma't ñaña ñeñt epoch çharrasheña ñeñt puechetsa pa'tats ñeñt sherbene' Yompor, allohuenetña'pa' concorpa'rreteñet Cristo ñeñt atma'ntataret Carrnero. Puesheña'ttsetpa' orrenet arpa ñaña pajo' ñeñt orotaten all anaret ñeñt atarr eñmosa'ttetsa Yomporecop. Ñehua, añ ñeñt eñmosa'ttetsa añ toma'ntena ñeñt atto ma'yochena ñeñt pueyochresha' pen Parets. ⁹ Añña ñeñt concorpa'rrtetsapa' ñetña'pa' morrechenet ñeñt etserra morreñets ñeñtpa' atet açhoteñet Cristo ñeñt atma'ntataret Carrnero:

Papa' e'ñe cohuenare' es peþa'yen ñeñto'mar e'ñe pocte' þach chete' Yompor po'libro, e'ñe pocte' þach tore' allo echarr aþarettena tarro'mar þapa' þa amtsarettatsa, perrasoña þapa' allo petsa'tuonaya yo'chñar allochña'pa' attoch e'ñe puechemer perrey Yompor ama't allohueney ñeñtey pa'namen acheñey, ama't erra'tsena mereñtsorey allot yehuena, ama't ñaña erra'tsena ñoñtsor allo yeñosyen e'ñe po'poñe'ttsocma,

ama't ña'ña pa'namenana'tarey allohuen errohuanen ñeñt e'ñe ya'netser ye'pa'yen.

10 Ñeñtey allohueneypa' pa yemnatene' o'ch ya'm'cha'tarettapreta'pa attochña yesherbapretenep Yompor ñeñt atarr Parets. Attoña yecorneshaten Partsocop. Ña'ña attoch ya'm'cha'tarettterra añe patsro.

11 Allempoña alla necuererr o' ne'muererr mellaño'feñnesha' atet eñosenet. Shontet nanac che'muechenet all rroçhtam'peñet a'yohuen erra'paren. Ña'ña ñeñt berrma'ttetsa all ña'ña ñeñt sherbene' Yompor ñeñt allohuenet ma'potanto'maretpa' ñeñt e'ñe rroçhtam'pene' Yompor ñeñt anets all po'conaño. 12 Ñeñt mellaño'feñnesha' ñetña'pa' e'morrtenet huomenc all a'choteñet Cristo ñeñt atma'ntataret Carrnero. Ñeñtpa' atet otenet:

Cristo ñeñt toma'ntenaya Carrnero ñeñt amtsarettatsa, ñapa' e'ñe cohuenare' es pa'yen ñeñto'marña ñapa' e'ñe pocte' ahuamencatena, agapanepa' shonte' esocmañen ña'ña e'ñe pocte' eñotañtepa'ch, ña'ña e'ñe pocte' partsotepa'ch, ña'ña e'ñe pocte' am'cha'na'tpahuotepa'ch. Ña'ña e'ñe pocte' ya yecohuentateño'f ya'ye'choçhtatoñepa'ch.

13 Allempoña ne'muerrerr atet ama't allohuen ñeñt Yompor pueyeçhcatar aye'choçhtateññañet Yompor ama't ñeñt ento'tsa'yen ña'ña ama't allohuen ñeñt patso'tsa'yen, ña'ña allohuen ñeñt o'pono'tsen patso ña'ña oño. Ama't e'ñe allohuen pueyeçhcatar ñeñt allo'tsa'yen allohuenet aye'choçhtateññañet Yompor, atet otenet:

Ya'ye'choçhtatoñepa'ch Yompor ñeñt anets po'conaño ña'ña Puechemer Cristo ñeñt atma'ntataret Carrnero. Am'cha'na'tpahuepa'ch yenteñ, yecohuentatoñepa'ch tarro'mar ñetpa' atarr ahuamencatet tayoteñ ama't errponañohuen.

14 Ña'ña ñeñt berrma'ttetsa pa'tatso'mar all ñetña'pa' otenet: —Ñeñtpa' attetepa'ch.

Ña'ña añña ñeñt sherbene' Yompor ñeñt epoch çharrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromña'feshayaye.

6

Atto Cristopa' toran ñeñt cançherr allo echarr a'parettena Yompor po'libro

1 Allempoña' nent Cristo ñeñt toma'ntenaya Carrnero attoch ñach tore' ñeñt cançherr allo echarr a'parettena

Yompor po'libro. Allempoña ñapa' o' tore paterr ñeñt e'ñe ñanom allo ayomrrareñt ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrñapa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' cho tatstena. Ñeñtpa' atet oten:

—¡Añon, pecue'!

² Naña necue'pa' nent paterr cahuall atarr huallañnanen. Ñeñtña montenayapa' echenan paterr po'ca'not ñeñt orra'nen potot. Allñapa' apet paterr choyo'mets ñeñtcha' choyo'metnoma. Ñañaapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

³ Allempo torerranerr ñeñt puepañ allo ayomrrareñt Yompor po'libro, nañapa' alla ne'muererr ñeñt puepañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Añon, pecue'!

⁴ Allempoñaapa' cha'nerrerr po'poñ cahuall, ñeñtñaapa' atarr tsañnanen. Ñeñtña montenaya allñapa' apet paterr espada atarr allpocha'p. Ñañaapa' o' muenateñet o'ch quelaratanna'tatan acheñenesha' arr patsro attochña muetsatanna'tatenanet. Attoña ñetpa' o'huañcha' muechet yeçhenet arr patsro.

⁵ Allempo torerranerr ñeñt puema'pañ allo ayomrrareñt Yompor po'libro nañapa' alla ne'muererr ñeñt puema'pañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Añon, pecue'!

Naña necuererrpa' nenterrerr po'poñ cahuall ñeñtñaapa' atarr quellueñnanen. Ñeñt montenayapa' orra'nenan paterr pesamets. ⁶ Allo'tsa'yen ñeñt berrma'ttetsapa' e'ñe all rroçho'tpa' ne'muererr ñeñt atet e'morrterrerr ñoñets, ñeñtpa' atet oten ñoñets:

—Paterr kilo trigopa' nanquëpa'ch tsa'teterr ama't ñeñt paterr denario*, ñaña ma'pa kilo cebadapa' nanquëpa'ch tsa'terra. Tsa'terrep'a'ch ñaña paterr denario. Tarraña olivose' ñaña vinospa' chocmuepa'ch eñall, amach seprratamñpsatsetye.

⁷ Allempo torerranerr ñeñt puepa'tatseñ allo ayomrrareñt Yompor po'libro, nañapa' alla ne'muererr ñeñt puepa'tatseñ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Añon, pecue'!

* 6:6 Denariopa' quelle ñeñt allpon tsa'tenet pamtarr ñeñt taruasetes all pa'nyo.

⁸ Naña necuererrpa' nenterrerr ñeñt̃ paterr cahuall atarr shemashreṣṇaneno puerrama'ṣṇen. Ñeñt̃ montenayapa' añ pa'so'cheñ Rromueñets. Ñeñt̃ cotene' chenta'pa' añ toma'ntena ñeñt̃cha' aguëne' allohuen ñeñt̃cha' rromuets. Ñeñt̃pa' aparet̃ llesens añecop attoch a'cllatatan shonte' acheñenesha' arr patso. Ama't pasheṣarr pats, allpon otenet un cuarto, allponcha' a'cllatatuerran acheñenesha'. Ñeñt̃pa' atetcha' a'cllatatanet, quellareñtsoterrcha', chaporrñatsoterrcha', atsnañtsoterrcha', orrterrach berr ñeñt̃ atarr atsrre'mñañ ñeñt̃ atarr bellac arr patsro.

⁹ Allempoñapa' o' torerranerr ñeñt̃ pa'mnareñ allo ayomr raret̃ Yompor po'libro, naña necuererrpa' allña'pa' nenterrerr altar ñeñt̃ allecma a'crratete't̃ ñeñt̃ eñmosa'tetsa Yomporcop. E'ñe all patsot̃ altaro all nent shonte' camuecñetsoçhno ñeñt̃ amtsanatarettatse't̃ all e'ñe pueserrpare'teño'tet Yompor po'ñoñ atto a'metete't̃ ñaña atto ame'ñeñet Cristo. ¹⁰ Añña ñeñt̃ camuecñetsoçhnopa' ñetñapa' rrannartenetpa' oteñet Yompor:

—Yompor ṣa atarr Partsoṣ, atarr ayemuetpo' atet ṣoteney. Esemphuachca' pecoñchatuerña acheñenesha' all patsro, esempohuachca' petsa'tateraña ñeñt̃ acheñer yemtsanataye't̃ ñeñt̃ patso'tsen. Añpa' allohua atet ot camuecñetsnesha'.

¹¹ Ñetña puesheña'ttsetpa' aparettenet pa'shtam atarr huallama'tarer. Ñaña ñetñapa' otarettet ato't e'ñe ameseta'. “O' mameshaña o'ch etsotua allpon po'potantañecop semo'nasheñ ñeñt̃cha' amtsanatarettterrt̃serr ñeñtes e'ñe attecma sesherbeñ Cristo.”

¹² Allempo torerranerr ñeñt̃ po'pechapueñ allo ayomr raret̃ Yompor po'libro naña o' alla necuererrpa' nent ñaña çha puetalle'chena pats huomenc. Atsne'ñapa' o' checmet atet ñerra'mrrate' shetamuets ñeñt̃ atarr quellue ñeñt̃ chorrena ñeñt̃ atarr llequëtsa. Arrorrñapa' o' çha tsama'tta atet ñerra'mrrate' errasats. ¹³ Rantoçhno ñaña ñeñt̃ ento'tsa'yen allohuenpa' o'çha shorçha'tua o' çhaçha't patso. O'ch netma'ntacha atet ñerra'mrrate' parte ñeñt̃ e'meret̃ o'ch huomenquëshatpa' pue'merñapa' o'ch a'shore'tañpesue huomenquëshas, ama't atarr emem̃ pue'mer.† ¹⁴ Enetpa'çho'ña o' e'ñe chenca'hua atet ñerra'm papell eparetpa' o'huañcha' orrta. Ama't ora allpon aspentarerpa'çho'ña o' e'ñe rrote'tyesuahua ñopa'tets. Ñaña ora allohuen oñeçhno ñeñt̃ rroçhpe'chañeçhno ñeñt̃pa'çho'ña o' e'ñe rrote'tyesuahua. ¹⁵ Allempoñapa' allohuen acheñenesha' ñeñt̃ yeçha'yetsa añe patsropa' o'

† 6:13 Ñehua, Juanpa' añ toma'ntatena higo ñeñt̃ puenareñ penet all pa'nyo.

e'ñe e'potrra'tuet arrorofo'mar ñaña mapuetpono'mar ñeñt' aspentarero'tsa'yen. Ama't allohuen am'cha'taretnesha'chno o' e'ñe e'potrra'tuet, ñaña allohuen ñeñt' atarr sherba'yets, ñaña ñeñt' e'cllayorete'chno, ñaña ñeñt' pa'm'cha'tareter pen solltar, ñaña ñeñt' atarr ahuamencat' entyetsa, ñaña ama't allohuen acheñ ñeñt' ama esoye' enteneto ñeñt' ataruasataret' e'ñe atfa, ama't ñaña allohuen ñeñt' ama ataruasareteyaye ñeñt' e'ñe cohueno'tsen, allohuenet e'ñe e'potrra'tuenet. ¹⁶ Allohuenetpa' chore'teñet aspenet ñaña mapueta'chno atet otenet:

—Te'ñapa' yeñgata'mperrepa' attotcha' e'poterrey attoch amach enterrye Parets ñeñt' anets all po'conaño allochñapa' amach errotenot' coñchaterrye Cristo ñeñt' toma'tenaya Carnero.

¹⁷ Tarro'mar te'pa' o' chap añ yetro allempoch yoro'chterra allempoch atsa'tataret'terra allohuen acheñenesha'. Ama't eseshapa' amach errotenot' ahuantoneto Yompor po'yoro'chenña.

7

Atto Israel po'mireneñ ñeñt'cha' ayato'ma'taretetyetsa

¹ Allempoña napa' nent mellaño'teñnesha' pa'tatssheña. E'ñe allohuanen pats, ñeñt' pa'tats po'to'pñaro'mar allñapa' all tomyen puesheña'tets mellaño'teñ ñeñt' pa'tatssheña. Ñeñt' pa'tatssheña ñetñapa' ñet epatare'tenet m'orr pa'tatssheñto'marot' allot' huapyena m'orr. Allochñapa' attoch amach atarr m'orrarsañpeno' añ patser, ama't ñaña oñe'chno, ñaña ama't patrra tsachpa' amach m'orrarsañpeno.

² Allempoña napa' o' alla nenterrerr po'psheñeñ mellaño'teñ, arr orrtena allot' huena atsne'. Ñapa' añ orren yapets ñeñt' alloch yanatan allohuen ñeñt' pueyochresha' pen Yompor ñeñt' ama arromña'teshayaye ama't ahuata. Ñaña' rrana huomencpa' otan mellaño'teñnesha' ñeñt' pa'tatssheño'mar ñeñt' añecop ahuamencattenet attoch ñetcha' pomnaren pet pats ñaña oñe'chno. ³ Ñeñt'pa' atet otanet:

—Amach erro't sepatsto añ pats ama't oñ ama't tsach ato'tña yeyato'ma'tueya' allohuen ñeñt' torra'yetsa Yomporcop.

⁴ Allempoña ne'muerrerr ñeñt' atet oteñet ñeñt'cha' allpon ayato'ma'tarettatsa. Ciento cuarenta cuatro mil ñeñt'pa' allpon otenet. Ñeñt' ciento cuarenta cuatro mil acheñenesha' ñetpa' e'ñe po'poñe'ttso'cmuet mereñtsoret. E'ñe ñeñta mereñtsore'cmuet ñeñt' charrasheña puechena epa ñeñt' pa'tañ pene' Israel ñeñt' corratse't' ahuat'. ⁵ Ñehua, pate'tets mereñtsorpa' allponsheña ñeñt'cha' ayato'ma'tarettatsa:

Judána'tarpa' allo'tsencha' çharra' puechena epa mil acheñenesha'; Rubénna'tarpa'çho'ña allo'tsencha' çharra' puechena epa mil acheñenesha'; Gadna'tarpa'çho'ña allo'tsencha' çharra' puechena epa mil acheñenesha';
 6 Aserna'tarpa'çho'ña allo'tsencha' çharra' puechena epa mil acheñenesha'; Neftalina'tarpa'çho'ña çharra' puechena epa mil acheñenesha'; Manasésna'tarpa'çho'ña çharra' puechena epa mil;
 7 Simeónna'tarpa'çho'ña çharra' puechena epa mil; Levína'tarpa'çho'ña çharra' puechena epa mil; Isacarna'tarpa'çho'ña çharra' puechena epa mil;
 8 Zabulónna'tarpa'çho'ña çharra' puechena epa mil; Joséna'tarpa'çho'ña çharra' puechena epa mil; Benjamínna'tarpa'çho'ña çharra' puechena epa mil acheñenesha'.

Atto shonte' pa'namen acheñenesha' ñetpa' e'ñe huallama'tarerochet pa'shtam

9 Allempoña napa' o' alla nenterrerr shonte' acheñenesha', nanac che'muechenet ama e'ñotuenteno ñeñt allpon allo'tsen. Shonte' pa'namen acheñenesha'. Ñeñtpa' pa'namen anetsot huaçha'tyenet, shonte' pa'namen mereñtsoret ñeñt huaçhetsa all, shonte' pa'namen ñoñets e'ñe po'poñe'ttsoema eñosyenet. Ñetñapa' all tomçhenet e'ñe ñehuapoç allo'tsen Yompor po'conañ allo'tsen ñaña Cristo ñeñt toma'ntenaya Carrnero. Ñetpa' e'ñe huallama'tarerochet pa'shtam. Pototetñapa' añ orra'yenet atet ñerra'm shequëpan. 10 Allohuenetpa' rranenet, otenet:

Yompor ñeñt po'conaño'tsen ñapa' o' a'qeshpaterrey epuet ñaña Puechemer ñeñt toma'ntenaya Carrnero.

11 Ñeñt berrma'ttetsa pa'tatso'mar ñaña ñeñt sherbene' Yompor all, ñaña allohuen mellañoñenesha' ñeñt tomçhets a'yohuen erraparen, ñetña allohuenetpa' e'ñe rroçtampesueñet Yompor ñeñt po'conaño'tsen. Ñeñt mellañoñenesha' all rrema'rartenet Yompor po'conaño atet ma'yocheñet Yompor. 12 Ñeñtpa' atet aye'choçhtateññañet Yompor, ñeñtpa' atet otenet:

Attetepa'ch yocop ya'ye'choçhtatoñepa'ch, yeco-huentatoñepa'ch, amuepa'ch ahuañaño atto eñotañtena Yompor, yeparasyoso'chepa'ch, añcha'na'tpahuepa'ch yenteñ, amuepa'ch ahuañañaño ñeñt atto ahuamencattena Yompor, añcha'taretepa'ch tayoteñ errponohuañen. Ñeñtpa' attetepa'ch.

13 Allempoña puesheñarr ñeñt sherbene' Yompor, ñañaapa' a'p'to'ten, atet otenet:

—Papa' ¿ama't peñoteñeña eseshačhnote'ña ñeñt chorrenaya huallama'tarer, ñaña ama't peñoteñe errofte'ña huächenet?

¹⁴ Nañapa' atet noch:

—Amaca'ye Nompore neñoteñe. Pate'ca'yeña eñotene'.

Ñaña'pa' o' alla oterren:

—Añenesha' ñeñt chorrenaya huallama'tarer ñetña ahuanterret allempo orrterra pa'namen muerochteñtsočno. Ñaña ñetpa' atto e'shohuarettet po'chñaret e'ñe Cristo po'rraso, ñeñtña ottetsa atet ñerra'mrrate' ñetpa' o' atsama'tarettet pa'shtam attoch e'ñe cohuen a'huallama'tatareppet pa'shtamuet e'ñe cohuen. ¹⁵ Ñeñto'marña ñetpa' allo'tsa'yenet Yompor po'conaño. All chocma sherbeñet Yompor — ellapenete't, arepenete't sherbatset all Yompor pa'paclo. Yomporña ñeñt anets all po'conaño, ñachña e'ñe a'natenahuet e'ñe ñesho. ¹⁶ Ñetpa' amach muerochterrete'te pa'chporrñoť ama't po'ñpañoť. Ñaña ñetpa' amach errotenoť chemuerranete'te atsne' ñaña amach a'mñechaterranete'te ñaña huerate'. ¹⁷ Tarro'mar Cristo ñeñt atma'ntatareť Carrnero ñeñt allo'tsen all Yompor po'conaño, ñachña cohuanpenahuet e'ñe atet ñerra'mrrate' carrnero e'ñech cohuanpeñ pamo'mte'. Ñapa' chapatanetcha' all poten oñ ñeñtcha' apahuet attoch correnet errponañohuen. Yomporña ñach a'huañamñsahuet puellquëña ama't ahuatapa' amach yahuerrete'te.

8

Allempo Cristopa' toruan po'cančhroñ ñeñt allo ayomr-rarettena Yompor po'libro allempoñapa' orrta ñaña puesheñarr mellañoťeñ ñeñt orrene' po'pajo' orotaten

¹ Allempoña Cristo ñeñt toma'ntenaya Carrnero, ñapa' allempo e'ñe toruan po'cančhroñ ñeñt allo ayomrret Yompor po'libro, e'ñe muetsoñeñtua poctacma pue'ntaño tematuanen. ² Allempoña napa' alla nenterrerr mellañoťeñnesha' ñeñt cančherrsheña ñeñt tomčhets e'ñe all Yomporesho. Ñetña puesheña'ttset allpa' aparettet poctor. ³ Allempoña o' huapa po'psheñeñ mellañoťeñ. Huapapa' o' tomos all altaro. Añ altarpa' allecma a'crratenet tsach puese' ñeñtña atarr amostetsa all. Pamosoñña' ñeñt atarr eñmosaťtetsa Yomporecop. Ñeñt mellañoťeñpa' añ orren pajo' orotaten allcha' nenan ñeñtcha' eñmosaťtetsa. Ñeñt mellañoťeñpa' allña apet shonte' eñmosať ñeñtcha' eñmosaťtate' ñeñt atto ma'yochena Parets pueyochresha'. Ñeñtña eñmosaťtetsapa' ñeñtcha'

net altaro ñeñt ayečhcataret oro ñeñt e'ñe ñehuapote'tsen Yompor po'conaño. ⁴ Ñeñt orrampen mellañoñeñ eñmosa'pa' čha amosoñe'chnen enonet allo'tsen Yompor, ñeñtña eñmosa'tatene' ñeñt atto ma'yochena Parets pueyochresha'. ⁵ Allempoña mellañoñeñpa' cheterran pajo'pa' o' esha'tan tso' puecallamshor ñeñt cheta' altarot e'ñe e'chorran tso' pajo. Allempoñapa' huapore'ch patso. Chap patsopa' meratstosa, tatstosa, e'morrtosa huomenc, pellatan pats.

Atto Juanpa' entan cančherrsheña mellañoñeñ ñeñt poc-torets

⁶ Allempoña mellañoñeñ ñeñt cančherrsheña ñeñt epoc-toretarer puesheña'ttsetpa' o' echantyeset po'pocor o'ch a'toret.

⁷ Allempoña ñeñt ñanom mellañoñeñpa' o' pocora', pocora'huatsapa' orrta ñeñt ma'po'mar ñeñtča' ahupore'tarettatsa patso. Ñeñtapa' añ hue' allotpa' ñaña tso' ñeñt tsetetsa errasatso. Atto ahupore'taretta patso allempo chap patsopa' e'ñe a'huortatuosan ñeñt allo'tsen all chap patso. Tso'ñapa' errañaren e'ñe a'poyuosan ñeñt allpon tsachečno ñaña allpon ta'tečno ñeñt allo'tsa'yen ama't allohuanen pats allpon ñeñt otenet la tercera parte.

⁸ Allempoña po'psheñeñ mellañoñeñ ñeñt puepañpa' o' poc-torrerrr. Pocora'huerrtserrpa' orrtorrerrr atet ñerra'm ñeñt nanac atarr aspenet. Ñeñtña'pa' čha huorten. Ñeñt aspenetpa' ahupore'taretta sa'po. O'ña chap oñopa' errañarenña oñpa' puenasa errasats allohuanen oñ ñeñt allpon otenet la tercera parte. ⁹ Ñaña ñeñt allpon yečhetsa all oño errañaren, e'ñe colla'hua, allpon colla'huatsa ñeñt otenet la tercera parte. Ñaña ñeñt allohuen botečno ñeñt chope'chyets all oño errañaren e'ñe chenca'huet, allpon chenca'huatsa ñeñt otenet la tercera parte.

¹⁰⁻¹¹ Allempoña po'psheñeñ mellañoñeñ ñeñt poema'pañpa' o' poc-torrerrr. Pocora'huerrtserrpa' orrtorrerrr ranto ento ñeñt añecmuen atarren. Shora'nerrerr čha huerarere'tnena. Chap allo'tsa'yen po'ñesočno ñaña allot potayen oñečno errañaren arr patsro. Ñeñtapa' arrohua chap ñeñt allpon otenet la tercera parte. Ñeñt rantopa' añ pa'so'cheñ Peshrren. Chap allo'tsa'yen oñečno ñeñtapa' čha a'peshherretuosan oñečno errañaren arr patsro. Ñeñtapa' allponohua a'pesherrtatan oñečno ñeñt allpon otenet la tercera parte. Oñ po'peshrroña ñeñtña a'cllatue'ña shonte' acheñenesha' all.

¹² Allempoña po'psheñeñ mellañoñeñ ñeñt puepa'tatseñ o' poc-torrerrr. Pocora'huerrtserrpa' allempocma čhote' errotetyesa atsne' ñaña arrorr ñaña rantočno, o' attaña

checmetyeset. Ñetpa' allpon checmetyesets ñeñt' allpon otenet la tercera parte. Ñeñt' atto choyo'tenet yeŕo ñaña tsapopa' o'huañ atsnomyeset. Ñeñt' allpon o'huañ choyo'tyeset yeŕo ñaña tsapo ñeñt'pa' allpon otenet la tercera parte.

¹³ Allempoña napa' o' alla necuererrpa' allñapa' nenterrerr po'psheñeñ mellañoŕeñ ñapueŕ all anoma'mtena ento allpononet. Allñapa' ne'muerrerr ñeñt' atet eñosnom huomenc. Panoma'mteñoŕpa' atet oten:

—Llequẽntsa-bee ñeñt' allohuenacop ñeñt' yeŕha'yetsa aña patsro. O' mameshaña o'ch poctora'huerrerr po'poñ ma'psheño'mar mellañoŕeñ.

9

Atto o' e'ñe ma'psheñaña mellañoŕeñ ñeñt'cha' poctorerrt-serr e'ñe allohuanen

¹ Allempoña po'psheñeñ mellañoŕeñ ñeñt' pa'mnareñpa' o' poctorerrerr. Poctora'huerrtserrpa' ñaña'pa' all nenterrerr ranto atarrem' ñeñt' shora'n mats entoŕ o' e'ñe chap patso e'ñe atet orrtosa ñerra'm mellañoŕeñ. Ñeñt'ña mellañoŕeñ allñapa' apet paterr llave alloch toran allo e'tam̄psareŕ arrotŕ ñeñt' atarr o'pononet arrottena pats. ² Ñaña'pa' o' toram̄psan arrotŕ. Ñeñt'ña arrotŕ allotña cha'nom amos shonte' atet ñerra'mrate' cho chemue'chenet. Chepoten amos cha muene' emayenan ama't atsne', erracmañen chepoten, e'ñe chorren amos. ³ Atto atarr chepoten amospa' cha'nmaŕha'tatan ñaña allot ahuañchenclla nanac shonte', pamcha'tyesa erracmañen patso. Ñehua, ñeñt' ahuañchencllapa' o' apet attoch epotaña atet pena ñerra'mrate' yellas ñeñt' atarr epotañ. ⁴ Ahuañchencllaña'pa' atet otareŕta amach erroŕ p̄atstano ta'te' ñeñt' patso'tsen, amach erroŕ p̄atstano ñaña tsach. Ama't ñaña allohuen ñeñt' pa'namen chopyets aña patsro amach erroŕ p̄atsche. Añcha'ña erroŕ p̄a' acheñ ñeñt' ama ayato'ma'tareŕeyaye Yompor pueyotsaparo. ⁵ Ama muenacheto o'ch muetsan ama't patrra acheñ allempo. Ñeñt' ahuañchencllapa' aña oteñet o'ch mueroŕhtatan acheñ amnarm̄a arrorr. Ñeñt'pa' atetcha' atserrpanet atet atserrtena yellas ñerra'm cho epota'y. ⁶ Allempoña acheñenesha'pa' e'netcha' attoch rromuet tarraña amach erroŕtenoŕ rromueto. Ama'tcha' atarr ya ñametare'tenetañpa' amach rromueto.

⁷ Ñeñt' ahuañchenclla atet orrtena ñerra'mrate' cahuallempo o'ch natyeñet attoch quellarachet. Poñpa' e'ñe atet orrtena ñerra'm choyo'mets ñeñt' orotaten. Pa'clloyoŕpa'

e'ñe atet orrtena ñerra'mrrate' acheñ. ⁸ Echet, pue'chpa' añecmuen atet ñerra'mrrate' coyanesha' pue'ch. Pa'spa' e'ñe atet orrtena ñerra'mrrate' ma'yarras. ⁹ Pa'tallpa' e'ñe atet orrtena ñerra'mrrate' asertall ñeñtcha' moñenaya, amach etsoto allo saneñet. Ñaña ahuañchencla ñerra'm esempo anomchenapa' e'ñech atet e'morrtena ñerra'mrrate' shonte' carro ma'moretets allempo matateñ cahuall huomenc attoch chapuet allcha' quellaroset. ¹⁰ Pa'sme'llpa' e'ñe atet orrtena ñerra'mrrate' yellas pa'sme'll allot epotañtena. Pa'sme'llotsen puepotañer allot atserrpenan acheñenesha'. E'ñech amnarmña arorr muerochtatenanet. ¹¹ Ñeñt ahuañchencla ñetpa'cho'ña añ pa'mcha'tareter penet mellañoñeñ ñeñt amcha'tarettetsa all allo'tsen arorroñ ñeñt atarr arorroñ o'pononet pats. Mellañoñeñ ñeñt pa'mcha'tareter pen ahuañchencla, hebreyaçhopa' añ socheñet Abadón; griegaçhoñapa' añ socheñet Apolión. Ñeñt epo'mar so'chñets ya yeñoño ñeñt yoten amt-sanatañ.

¹² Allempopa' met ñeñt ñanom ñeñt allcatañtetsa, tarraña señoche'pa'ch palltena po'poñ epa ñeñtcha' allcatañterrtterr.

¹³ Allempoña po'psheñeñ mellañoñeñ ñeñt po'pechapueñ o' poctorerrerr. Poctora'huerrtserrpa' ñaña allpa' ne'muerrerr ñoñets ñeñt e'morrtetsa altar pa'tatso'marot po'ucoroñ. Añ altar ñeñt ayeçhcataret oro, ñeñt'pa' e'ñe ñehuapote'tsen Yompor po'conaño. ¹⁴ Ñeñtña ñoñetspa' atet otenan mellañoñeñ ñeñt po'pechapueñ ñeñtara ñeñt o' poctora'huerrerr. Ñeñtña ñoñetspa' atet otenan mellañoñeñ:

—Te'pa' o'ch pepyañper mellañoñeñnesha' pa'tatssheño'mar ñeñt ehucarettsa all ñeñt atarr po'ñeso ñeñt pa'so'cheñ Eufrates.

¹⁵ Ñehua, ñeñt mellañoñeñ pa'tatssheño'maretpa' añecop añño'tareñtenet all atomat o'ch çhap allempo onañcharet allempochña ñetpa' o'ch a'cllatueret shonte' acheñenesha'. Ñeñt ora allpon acheñenesha' ñeñt yeçha'yetsa arr pat-sro allponcha' colla'huerrtsa ñeñt allpon otenet la tercera parte. Te'pa' o' e'ñe etsotua ñeñt atet onañcharet ñeñt hora, ñaña ñeñt yetro, ñaña ñeñt arorr-ro ñaña ñeñt chararo. Allempoña ñeñt mellañoñeñ pa'tatssheño'marpa' o' a'rroyaretterret. ¹⁶ Ñeñt mellañoñeñ pa'tatssheño'mar ñetñapa' ahuanmet po'solltarer ñeñt monta'yesnetsa puecahualloro. Nañapa' ne'muen allpon ñeñt atet oten ñeñt allo'tsa'yen. Ñeñt'pa' atarr aton shonte'. Ñeñt che'muechets all, allo'tsen doscientos millones solltarnesha'.

¹⁷ Ñeñt atet gatennet all nent ñaña cahualleçhno, ñaña nent ñeñt atet orrtena ñeñt montenaya. Puesomapotpa'

añ chorra'yenet asrom. Patanta'tetspa' añ chorra'yenet tsamamuenare', po'potantañpa' añ chorra'yenet asollemamuenare', po'potantañpa' añ chorra'yenet shemashremamuenare'. Ñaña cahuallečno poñpa' atet orretyena ñerra'mrrate' ma'yarroto'. Puenamoñapa' allot čha'nen tso' huorte' epuet ñaña amos epuet ñaña ñeñt huoretnets shemashrepñeñen ñeñt otenet azufre. 18 Añña ñeñt čha'nets puenamoñ atsetaren ma'po'marpa' ñeñtpa' ñeñtña amtsañtetsa ñeñtča' a'cllatuerre' shonte' acheñenesha' ñeñt allpon otenet la tercera parte. 19 Ña po'huamenc allo muetsenan acheñenesha' ama puenamoñayaya atet peno, añña ama't pa'sme'llotpa'čo'ña amtsañtena. Tarro'mar pa'sme'llpa' shechpeto' ñeñt poso'sme'll pen. Ñeñtpa' alloña atserrpenan acheñenesha'.

20 Allpon acheñenesha' ñeñt queshpatsa ñeñt ama muetsanato ñeñt amtsañtetsa ñetñapa' attera atpare'teñet Yompor. Ama cotape'cherreto cohuen attoch quechpuet ñeñt atet p̄atse'tyenet sosya'tsañ. Ñetpa' attera mueneñet o'ch ma'yochyet oneñeččno ñeñt ama cohuenayaye. Ñaña ñetpa' attera mueneñet o'ch yečcatatse'tyeset pa'namen ñeñtča' ma'yochenet atet ñerra'm oro ñaña quellema't, ñaña bronze, ñaña mapue', ñaña tsach. Allohuenet ñeñt yečcatyenet ñeñtña po'yomporer penet, ñeñta ma'yochenet ama't ama enteno, ama't ama e'mueno, ama't ama chope'cheno. 21 Ñaña ama quechpueneto ñeñt atto muetsanna'tenet ñaña atto tsanñannenet ñaña atto nanac cañoresha'tenet ñaña atto etatsre'tanna'tyenet. Ora añečnopā' alloña ama cohuenaye' cotape'cheneto.

10

Atto Juanpa' entan puesheñarr mellañoñeñ ñeñt orrene' po'librotoll

1 Allempoña napa' o' alla nenterrerr po'psheñeñ mellañoñeñ ñeñt atarr ahuamencattetsa. Ñaña'pā' sohua'nena entoñ, e'ñe osoñ sohuamñpena. Poñoññapa' añ arca'tamñpesnene' ayon. Pa'clloyotñapa' e'ñe atet poptena ñerra'mrrate' atsne' čchoyotetsa. Pa'tac pa'chepohuen ora atet orrtena ñerra'mrrate' tso' huortets enonet. 2 Sohua'nenapa' orra'nenan po'librotoll. Ñeñtña librotollpa' e'ñe cohuen atorareñ ñeñt rremuen potot. O' chap patsopa' pa'tacña po'cohuenrotpa' tomos oño, po'ptecañña ñeñt pue'hcoterotpa' tomos patso. 3 Allempoña tomospa' rranosa huomenc. Po'ñoññapa' e'ñe atet e'morrtosa ñerra'mrrate' ma'yarr tecoretsa. Atto rranosapa' e'ñe atet e'morrtena

ñerra'mrrate' tecore' anapuene' ñeñt cančhroche'tats
tecorena. ⁴ Allempoña e'morrta ñeñt cančherr tecore' napa'
nemneñeñ o'ch nequellcañ ñeñt atet ne'm tecore', tarraña na
allempopa' ne'muerrerr ñoñets all e'morrtena ento. Ñeñña
ñoñetspa' atet otenen:

—Amach pequellcatsche ñeñt atet pe'mueñ tecore' čhochña
pa'nasocha.

⁵ Allempoña añ mellañoñeñ ñeñt tomosets oño ñaña patso,
ñañapa' echantosana pot enonet po'cohuenrot. ⁶ Allña eñosospa'
e'ñe huomenc nosan po'ñoñ Yompor pa'so'chño, ñeñtpa' atet
otos:

—Yompor ñeñt ama arromñañeshayaye ñeñt yečcate'
enet ñaña ora allpon ñeñt allo'tsa'yen pue'ntaño, ñaña
ñeñt yečcate' pats ñaña ora allpon ñeñt allo'tsa'yen
po'patsño, ñaña ñeñt yečcate' oñečno ñaña ora allpon
ñeñt allo'tsa'yen pueyečcatareso, ñaña' entenen ñeñt atet
noten te' ñeñtpa' e'ñech po'ñočh atet perra. Te'pa' amach
alla yecuame'tere'te atomatuanen. ⁷ Ñerra'm esempoch
pocorrerrerr po'psheñeñ mellañoñeñ ñeñt po'cančhroñpa'
allemPOCHña e'ñe etsotuerra Yompor pocapña ñeñt ama
e'ñeye' eñotpahuoyaye ama't ahuatoteñ ama't allempo ñanom
eñotatyesane't ñeñtcha' a'mta'yesaye't po'ñoñ ñeñtara ñeñt
nanac torra'yestse't ñocop. Allohua ñeñt atet eños mellañoñeñ.

⁸ Allempoña napa' o' alla ne'muerrerr ñoñets ñeñtara ñeñt
atet ne'm ñorra' ñeñt e'morrretsa pue'ntañoč, alla oterrerr:

—Te'pa' o'ch peponemya mellañoñeñ ñeñt tets oño ñaña
patso o'ch pechtosñañ potot po'libro ñeñt e'ñe cohuen
atoraret.

⁹ Nañapa' ahuen allo'tsen mellañoñeñ, nečhap ñeshopa' no-
tos:

—Te'pa' o'ch papuen pelibrotoll.

Ñaña'apa' atet oten:

—Añca'ye peyore o'ch perre'. Penamotpa' atarrcha' nanac
puetsarr pe'm atet ñerra'm pets po'moñ, tarraña ñerra'm o'ch
čhap pa'topa' atarrcha' pesherr pe'm.

¹⁰ Allempoña napa' o' nechtosñañ po'libro pototpa' o' nerre'.
AllemPO nerruepa' nenamoña atarr puetsarr ne'm atet
ñerra'm pets po'moñ tarraña allemPO čhap natopa' atarr pesh-
err ne'm. ¹¹ Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeñtcha' atet
etsotaterr Yompor esempohuañen. Añcha' peserrpare'tyes
ñeñtcha' atet perra shonte' pa'namen ačeñenesha'
ñaña atetcha' perra pa'namen anetso'marnesha' ñaña
atetcha' perra pa'namen mereñtsorečno ñeñt eñosyets

po'poñe'ttsoema ñoñtso ñaña atetcha' perra pa'namen añcha'taretečno.

11

Atto epsheña ñeñt pueyochresha' pen Paretspa' ñetcha'ña eñerrtset Yomporecop

¹ Allempoña napa' apnet tepapets ñeñt atarr allpocha' p e'ñe atet ñerra'm carrots. Ñaña allpa' atet otnet:

—Te'pa' o'ch ahuep o'ch petpueññaña' Yompor pa'paquell allo, ñaña altar ñeñt allo'tsen. Ñaña o'ch pe'ñotena' errosheña'e' ñeñt ma'yochetsa all. ² Tarraña amach petpanpsatscheña ñeñt a'yote'tsa'yen cha'petot. Tarro'mar all ñetpa' aparettetcha' po'poñ acheñ ñeñt ama ame'ñetso. Ñetñapa' atmama'terretcha' all anetso ñeñt anaret Partsocop. Pa'tatsoch çharraña puechena epña arorr allponmatcha' a'sosyateñet all ñeñt anarettetsa Partsocop. ³ Ñaña allempopa' o'ch nemñe epsheña ñeñt neyochresha' nepen. Nach ahuamenca' pahuet attoch a'potet ñeñtcha' atet perra esempohuañen. Mil doscientos sesenta yet allponmatcha' serrpare'tennanet neñoñ. Puellquëño'tet chorretcha' pa'shtamashe'm. Arrpa' allohua ñeñt atet otnet all Yompor pue'ntaño.

⁴ Ñehua, añ epsheño'mar ñeñtcha' eñerrets Yomporecop ñetpa' atma'ntatarettenet epcha olivoch ñaña epa all orratenet huerare ñeñt e'ñe tomçhets all Yomporesho, ñeñtara Yompor ñeñt pomnaren pohuene' allohuen acheñenesha' arr patsro. ⁵ Ñaña añ epsheña ñeñtcha' eñerrets Yomporecop, ñerra'm ama't esesha ñeñt muenene' o'ch errot pet añ epsheña, ñetñapa' puenamotpa' o'ch çha'nmamet tso' huorte' ñeñtcha' e'nue' ñeñt e'moñe'tenahuet. Ñeñto'mar yeñoteñ ñerra'm esesha' e'moñe'tenahuet, ñetñapa' e'ñech rromhuet poctacma. ⁶ Ñaña añ epsheña ñeñtcha' eñerrets Yomporecop, ñetpa' atarrcha' ahuamenca'tet. E'ñe ñet po'huamencot epatare'teñet o' entot attotcha' ama huateno e'ñech allponmat eñorenet Yomporecop. Ñaña e'ñe ñet po'huamencot oñña'pa' o'ch a'pnaseret errasats. Ñaña e'ñe ñet po'huamencotet o'ch çhapterret añ arr patsro pa'namen ñeñtcha' amtsañterrtsa. Ama't esempo allempo atet muenenet ñet, allempocmach atet pet. ⁷ Tarraña ñerra'm esempoch e'ñe e'nuet ñeñtcha' allpon eñoret arr patsro, allempoña'pa' o'ch çha'nom ñaña ñeñt berrma'ttetsa ñeñt atarr bellac. Arrotcha' çha'nom arrotot ñeñt atarr o'pononet arrottena pats. O'chña çha'nompa' o'ch quellariosan añ ñeñt epsheña ñeñtcha'

eñerrets Yomporecop. Ñeñt berrma'ttetsa ñachña ganatsa o'ch muetsan añ ñeñt epsheña. ⁸⁻⁹ Añña epsheña ñeñt amtsaretpa' attach o'shshe'muet toño allecma chopeñe'chen allohuen acheñenesha'. E'ñe ma'pamuet ñaña po'poñ pueshmet yet allach o'shshe'muena all atarr anetso, ñeñfara anetser Jerusaléñ all corso'tam̄pset Yepartseshar Jesucristo ahuat. Ñeñtña anetserpa' ñato' o'ch netma'ntacha ñerra'mrrate' ñeñt atet pete't anetso Sodoma ñaña anetso Egipto. Añña epsheña ñeñt amtsaret attach o'shshe'muet all amach esesha' muenateto o'ch pampuet. Allñapa' allcha' huaçhena shonte' pa'namen acheñenesha' ñeñtcha' cohuanrrortene', shonte' pa'namen mereñtsoreçhno ñeñt eñosyets po'poñe'ttsoçma ñoñtso. Shonte' pa'namen anetsoçhno allot huaçhena. ¹⁰ Acheñenesha' ñeñt yeçha'yetsa erraþaren arr patsro ñetñapa' o'ch coshame'tam̄pesyet añ epsheña arromña. Atarrcha' nanac cosherret. Pocsheñeshoçetña ñetpa' o'ch es apanna'tyeset e'ñe atta. Ñetpa' añecopcha'ña atarr coshenet tarro'mar o' rroma añ epsheña ñeñt atsrre'moçhen entenet ñeñt yore'tatenahuet po'chñaret e'ñe pueserrpare'teñoçet Yompor po'ñoñ. ¹¹ Allempoña o'ch met ma'pamuet ñaña po'poñ pueshmet yet, añña ñeñt epsheña machayotepa'tcha' alla tanterret tarro'mar Yomporña alla tantaterre'. Allohuen acheñenesha' ñeñt cohuanrrortene'pa' atarrepata' tcha' nanac yorenent. ¹² Allempoña tanterret epsheño'maret, e'muet ñoñets ñeñt e'morrtsa atarr huomenc ento. Ñoñetsñapa' atet otenanet:

—Sa'tap arr ento.

Ñetñapa' o'cho' a'tapuet, ospa' ñeñtña anmahuet ento. ¹³ Cohuanrrortets ñeñt e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaña cançherr mil acheñenesha' ñeñt allpon colla'huatsa. Ñeñtña allpon queshþatsapa' atarr yorenent. Pueyorñoçetpa' e'ñe allempocma añcha'na'tpo' eñchet Yompor ñeñt pue'ntañotsen. Allñapa' cohuentatoñet.

¹⁴ Allempopa' o' metuaña ñeñt puepañ ñeñt allcatañtetsa, tarraña señoçhepa'ch palltena po'poñ paçerr ñeñtcha' tecma allcatañtatsa ñeñtcha' poema'pañ.

Allempoch poçtora'huerr mellañoçeñ e'ñe allohuanen allempochña añcha'taretetuerra Yompor arr patsro

¹⁵ Allempoña po'psheñeñ mellañoçeñ ñeñt po'cançhroñpa' o' poçtorerrer ñaña. Poçtora'huerrtserra' entoñapa' atarr huomenc e'morrterrer ñeñt eñoçetsa all ento. Ñeñtapa' atet otenet:

Ñeñt̃ allpon am̃cha'taretetyetsa arr patsro te'ñapa' o'huañcha' allo'na am̃cha'taretetenet tarro'mar ñeñt̃ atto am̃cha'taretetyenetpa' ñeñtpa' allochña am̃cha'taretterra Yompor epuet ñaña Puechemer ñeñt̃ Cristo. Ñeñt̃cha' atto am̃cha'taretterra Yomporpa' ñeñtpa' amach ahuañañañterro ama't errponaña.

16 Allempoña añ ñeñt̃ epoch çharrasheña ñeñt̃ puechetsa pa'tats ñeñt̃ anorrçhets all e'ñe ñet po'conañeto allot sherbeñet Yompor all pue'ntañe, ñetñapa' rrema'rrartenet Yomporeshonet atet ma'yocheñet Yompor. 17 Ñetñapa' atet otenet:

Pa Yompor ñeñt̃ep̃ atarr nanac Partsoḡ ñeñt̃ep̃ Yepartse-shar yepeneḡ, ñeñt̃ep̃ çhocma eñalleḡ ama't ahuatoteñ ñaña ñeñt̃ep̃cha' alla huerrtserr po'pocheño añe patsro, yañapa' atarr yeparasyoso'teneḡ tarro'mar te'pa' o'ch alla ḡo'paterra ḡa pehuamenc attotcha' o'ch alla atarr ḡa'm̃cha'taretterra.

18 Shonte' pa'namen acheñenesha', pa'namen anets allo'tsa'yenet, ñet pa'tsre'mueñoñetpa' e'ñe e'moñe'tuenpet, tarraña te'pa' o' çhap allempoch pecoñchatuerranet. Ñaña te'pa' o' çhap allempo onañcharet̃ añecop ñeñt̃ colla'huetsa ahuatoteñ allempoch peñotatuerranet ñeñt̃ atet ḡa'yesete't̃. Añña ñeñt̃ torra'yestse't̃ atto a'm̃tonapete't̃ peñoñ ñeñt̃ e'ñe peyochresha' pepe't̃, te'ñapa' o' çhap allempoch petsa'tuerranet. Ama't allohuen ñeñt̃ ḡame'ñaye't̃ ḡa ama't ñeñt̃ atarr asherben entyesete't̃ ñaña ñeñt̃ ama asherben entete'te, te'ñapa' o' çhap allempoch petsa'tuerranet allohuenet ñeñt̃ ḡame'ñenaya ḡa. Ñaña te'pa' o' çhap allempoch e'ñe ḡa'chencaatuer allohuen ñeñt̃ a'chencatañtetsa añe patsro.

19 Allempoña añ Yompor pa'paquell̃ ñeñt̃ ento'tsenpa' e'ñe cohuen atorarettena. O'ponoña all nentoñ Yompor po'tsapot all çhocma añño'tenet ñeñt̃ aquellcare't̃ ñeñt̃ a'poc̃tat Yompor yocop. Allñapa' meratstena, tatsllaren ma'moreten huomenc, pellenapa'ts ñaña atet huechen huomenc.

12

Atto Juanpa' entan puesheñarr coyanesha' ñeñt̃ emaret, pue'maretollpa' ñeñt̃ara Cristo, añyaññapa' mueneñeñ o'ch añyañpes pue'maretoll

¹ Allempoña all pue'ntañopa' all orrtena ñeñt̃ ama't ahuaña ama't puesheñarro'teyapa' ama yentare. Ñeñt̃pa' ñeñt̃cha'ña yeñotaterre' ñeñt̃cha' atet perra esempohuañen. Allñapa' all orrtena puesheñarr coyanesha'; añ po'cashe'm pen

atsne'. Pa'rrpoñapa' allo'tsen ñaña arrorr. Poñoñapa' echoyo'met. Po'choyo'mopa' all orrtena charra' ranto puechena epa. ² Ñeñña coyanesharpa' ačhomen, o' čhen allempoch eñalletatan pue'mar. Atto atsotenana pue'marpa' čha rranare'tena, atarr allpatateñ pue'mar. ³ Allempoña all pue'ntaño all orrtena po'poñ ñaña ñeññ ama't ahuatapa' ama yentare. Ñeñtpa' añ orrtetsa añañ ñeññ atarr añcha'nočhen. Ñeññ añañpa' atarr añecmuen ñaña atarr tsama't orrtena. Poñpa' cančherrmaga. Cančherrmago'mar poñpa' e'ñe echoyo'metareroche'. Ñaña po'ucorpa' allo'tsen charra'. ⁴ Pa'sme'll ñeññ chetare'tnen alloña tarra'huanenanña shonte' rantočhno e'ñe a'shore'tuaneñ patso. Ñeññ allpon ranto ñeññ ento'tsen, allpon a'shore'tuareñ ñeññ otenet la tercera parte. Ñeñña añañpa' alla tomos e'ñe coyaneshesho ñeññ atsotenaya pue'mar all cohueñ ñerra'm o'ch eñalletatan pue'marpa' ñach añañmpe'. ⁵ Allempoña coyanesha'pa' o' eñalletatan pue'mar ñeñtpa' asheñorr. Allempo eñalletua ñeññ asheñorroñollpa' e'ñe allempocma a'tapachet Yompor po'conaño tarro'mar ñapa' ñach anare'tterrtsa ñeññča' añcha'tare'tterrtsa allohuen pa'namen acheñeneshacop. E'ñech po'yoročhenñof añcha'tare'tterranet, atet ñerra'mrate' ñapa' a'sreperet o'ch añcha'nočhtana'terranet. ⁶ Allempoña coyanesha'pa' allorocma o' yeta o' čhap allapar all amarato. Allña Yomporpa' e'ñe cohuen añaño'tatoñ allcha' cohuanpeñet allcha' rrateñet allponmat yet ñeññ otenet mil doscientos sesenta yet.

Atto quellarenet Yompor pue'ntaño

⁷ Allempoña quellarenet Yompor pue'ntaño. Ñeññ pa'mcha'tareter pen allohuen ñeññ e'ñe cohuen mellañoñeñnesha'pa' añ pa'so'cheñ Miguel. ⁸⁻⁹ Miguelñapa' all quellara po'mllañoñeñnanesharohuen. Quellareñet añañ, añaññapa' o' quellara ñaña pueyochreshohuen. Miguelpa' chetanna'tet parro epuet añañ all Yompor pue'ntaño. Ñehua, ñeññ pueyochresha' pen añañ ñeñtpa'čo'ña mellañoñeñnesha' tarraña ñeññ mellañoñeñerpa' ama cohuenayaye. Tarraña añañ atto quellaran Miguelpa' ñapa' ama gano. Ñeñto'marña añañpa' huapore'chet entot pueyochreshohuen a'shorare'tterret patso. Attoña ahupore'tare'ttaña añañ ama't atarr nanac añcha'nočheneñ. Ñehua, añañpa' ñeññ shechep ahuatoteñ ñeññara yoten oneñet ñaña ñeññ otenet Satanás ñeññ atarr ashcañtetsa ora errařaren aña patso.

¹⁰ Allempoña napa' o' alla ne'muerrerr po'poñ ñoñets ñeñt atarr e'morrtsesa huomenc all Yompor pue'ntaño. Ñeñt ñoñetspa' atet oten:

—Te'ñapa' po'ño'ch o' chap allempoch queshpa'huerra allohuen acheñenesha' ñeñt pueyochresha' pen Yompor, tarro'mar o'ch alla o'paterrana po'huamenc e'ñe poctacma o'ch alla am'cha'tare'terra ñapuet epuet Puechemer ñeñt Cristo ñeñt nen ña ñeñt'cha' am'cha'tare'tapretenaya. Añ oneñet ñeñt chocma atta toma'tam'pesyene' masheñnesha'chno all Yomporesho yeto ama't ñaña tsapome'tets ñeñt'ñapa' o' ahupore'taretta. ¹¹ Ñeñt

masheñnesha'chnor ñeñt ame'ñenaya Yompor, ñet'ñapa' o' e'ñe a'mchechueret oneñet ñeñt toma'tam'pesyenahuet e'ñe atta. Añ a'mchechatterre' ñeñt atto Cristo rroma, ashataretta po'rras ñeñt toma'ntenaya Carrnero ñeñt muetsete't ochñartsocop. Ñaña añ a'mchechatterre' ñeñt atto masheñnesha'chno chocma eñosyenet e'ñe cohuen ñeñt atet pena Cristo po'cohuenña. Ama't amuro'chtataretetyenetpa' ñetpa' ama que'chpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mamesha o'ch rromuet e'ñe pame'ñeñotet Cristo. ¹² Atarr cosheñets Yompor pue'ntaño allohuenacop ñeñt allo'tsa'yen. Tarraña atarr llequëñets allohuenacop ñeñt ye'cha'yetsa añe patsro ama't ñaña ñeñt oño'tsa'yen. Tarro'mar oneñet'pa' o' sohuan'perranet e'ñe pa'tsrre'mueñesha'. Ñapa' eñoteñ e'ñech mameshapa' o'ch alla ahupore'tare'terrerr.

Atto añyañpa' attera cotare'tenan coyanesha' ñeñt o' eñalletatuan puechoyor

¹³ Allempoña añ añyañ ñeñt'ara oneñet o' eñota ñapa' o' ahupore'taretta ento't, ña pa'tsrre'mueño'tpa' o' alla cotare'terranerr coyanesha' ñeñt o' eñalletatuan puechoyor asheñorro'foll. ¹⁴ Tarraña coyanesha'pa' allempo cotare'terrañyañpa' ñeñt'ña coyanesha'pa' o' apet eppa'ya pa'pue' ñeñt atesha' contor pa'pue'. Ñeñt'pa' alloch anoman'psana po'yallo'p ñeñt'ara añyañ o'ch sa'ne'm o'ch chap ba'chayo all amarato all añño'teññañet ñocop e'ñe cohuen allcha' cohuan'peñet. E'ñech ma'pa char ñaña po'poñerrerr pueshmet char, ñeñt'pa' allponmatcha' rrachet all.

¹⁵ Allempoña añ po'yallo'ppa' e'ñe puenamot cha'nmatan shonte' oñ atet ñerra'mrrate' po'ñes apellchetsa. Ñapa' cha otapañ ñeñt'cha' rremuerraya' coyanesha' ñeñt cotare'ten attoch a'ño'shach. Tarraña ñeñt'pa' ama attetache.

¹⁶ Ama't patspa' yenpan coyanesha', attoña tara'nom all

esha'tanña oñ e'ñe masohua ñeñt allpon čha'nmat po'yallop puenamoť. ¹⁷⁻¹⁸ Ñeñtña atarr atsrre'mate'ña añañ, ello alla atarr e'moñe'terranerr coyanesha'. Allempoñapa' ahuo' allo'tsa'yen po'potantañ coyanesha' puechoyoresha' o'ch quellarosanet ñamet. Tarro'mar ñetpa'čho'ña čhocma ame'ñeñet Yompor po'ñoñ ñeñt atet anaret ñaña čhocma coteññañet Jesucristo poctaṗña.

13

Atto Juanpa' entan berrma't ñeñt atarr amča'nočhen ñeñt čha'nets oñoť

¹ Allempoña napa' natomos sa'patopño, allña' nenterrerr berrma't atarr amča'nočhen ñeñt čha'nmat oñoť. Poñpa' cančherrmaga, po'ucorpa' čharra'. Pate'tets po'ucorpa' e'ñe echoyo'metoche'. Pueñaga'ttso all aquellcareť sochatse'teñets ñeñt pa'namen sosya'tsañ allo achmāre'teñet Yompor. ² Ñeñtña berrma't pue'moquēr e'ñe atet ñerra'mrrate' ma'yarr tarraña pa'tacña' e'ñe atet ñerra'mrrate' orranatec. Puenampa' e'ñe atet ñerra'm ma'ñorenam. Añañña' ñeñt apue' po'huañenc, aṗ ñaña llesens attoch amča'nočtaprecha all po'conaño. ³ Pueñagarr poñpa' all orrtena čha atserrpena nanac huomenc čha mettaguēñ ñeñtča' muetsayeñ tarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet čha otapuetañ ñato' čhach rroma, tarraña ama rromo. Ñeñt atto ama rromopa' acheñenesha'ña arr patsro ñeñtña ame'ñatenahuet. Ñetpa' otenapuetañ ñato' ñeñtē'ña Parets. ⁴ Ñeñto'marña acheñenesha' ma'yocheñet ma'yarrma't. Ñetpa' atet otanna'tyeset:

—Ama eñalle po'poñ ñeñt nanac ahuamencat atet ñerra'm añ ma'yarrma't ñeñt yenten. Ama't e'ñe eseshapa' amate' errotenoť a'mchechachetoña añ ñeñt atarr ahuamencat.

Ama't añañpa'čho'ña ñeñt ma'yochena acheñenesha' tarro'mar añañpa' ña ahuamencat pe' ma'yarrma't.

⁵ Añañpa' muenatenan ma'yarrma't o'ch ommo'chatse'tyesa. Pommo'chatse'teñoťpa' o'ch achmāre'tenan Yompor. Ñaña muenatan ma'yarrma't o'ch amča'tareťta pa'tatsoch čharraña ñaña puechena epña arrorr. ⁶ Atet ṗa ma'yarrma't achmāre'tenan Yompor, sochatse'teññañ pa'so'cheñ. Ñaña Yompor pa'paquēll ñaña allohuen ñeñt allpon allo'tsa'yen pue'ntaño e'ñe achmāre'tueñ. ⁷ Ñaña muenateñ o'ch quellaran ñeñt pueyochresha' pen Parets. Ñaña muenateñ o'ch ganana

Yompor pueyochresha'. Ñaña muenateñ o'ch añcha'taretta allohuenacop ñeñt pa'namen acheñenesha', allpon ñeñt pa'namen mereñtsor ñeñt e'ñe eñosyets po'poñe'ttsoema ñoñtso ñeñt ora allpon allemeñ anetso'mar. ⁸ Ora allohuen acheñenesha' ñeñt añe patsro'tsa'yen añach ma'yochenet ma'yarrma't tarro'mar ñeñt acheñenesha'pa' ama aquellcarefeyayeto pa'so'cheñ Cristo po'libro all aquellcarettena allohuen ñeñt corretsetach ñeñt ame'ñenaya Cristo ñeñt amtsarettatsa ochñartsocop atet ñerra'm carrnero. Ahuat allempo errte' ayeçhcataretta pats, Cristoña po'libropa' all aquellcaret so'chñetso'chno attochña ñetpa' corretsetach.

⁹ Ñerra'm esesha' e'mñotene' añ ñoñets, çhaponëpa'ch pueyoçhro ñeñt atet yeçhateney añ ñoñets. Ñeñt ñoñetspa' atet oten: ¹⁰ Ñerra'm esesha' rromanatene' po'potantañ attoch yottamñsatanet, ñetpa'çho'ña ayottamñsaretterretcha'. Ñaña ñerra'm esesha' muetsanatene' po'potantañ espado, ñetpa'çho'ña amtsaretterretcha' espado. Ñeñto'mar añ ñeñt poçtetsa yocop e'ñe yeyemteñoñ Yompor o'ch ya'huanten acopo'teñ ñerra'm es yehuapoya, allohueney ñeñtey o' pueyochresha' perrey Parets.

Atto Juanpa' entan po'poñ berrma't ñeñt çha'nets o'ponot patsot

¹¹ Allempoña na allpa' nenterrerr po'poñ ñeñt berrma'ttetsa. Ñeñtpa' arro't çha'nom o'ponot patsot. Ñeñtña'pa' e'ñe epa po'ucor atet ñerra'm carrnero po'ucor, tarraña ñeñtpa' atarr añcha'noçhen eñen e'ñe atet eñen ñerra'mrrate' añyañ eñoretta. ¹²⁻¹³ Ñapa'çho'ña atarr añcha'taretta e'ñe atet añcha'tarettena ma'yarrma't ñeñt ñanom nent ñeñt çha'nmats oño't. Allña'pa' añcha'taretta'pretenana ñeñt ma'yarrma'ttetsa all. Ñeñt çha'nmats o'ponot patsot ñeñtña'pa' muenatenan allohuen acheñenesha' ñeñt añe patsro'tsa'yen o'ch ma'yochyet ñeñt ma'yarrma't. Ñeñtara ma'yarrma't ñeñt correr'tsa e'ñe mamecma allempo mettaguën. Ñeñt atto mettaguën ñeñtçha' muetsayeñ tarraña ñapa' ama rromo. Añ berrma't ñeñt çha'nmats o'ponot patsotpa' ñerra'm esempo allo'tsen parro epuet ma'yarrma't ñaña'pa' eñall attoch orrtatanan acheñeneshacop pa'namen ñeñt ama puentareto ama't ahuata. Attoña a'shoran ento't huorte' tso' ñeñtña' tso' huorte'pa' o' e'ñe çhap patso allña'pa' cohuanrrortatan shonte' acheñenesha'. ¹⁴ Ñeñtña'pa' allo shequënan shonte' acheñenesha' ñeñt añe patsro'tsen. Ñeñto'marña ñerra'm

allempto otenan acheñenesha', o'ch seyečcat ma'yarrma't, ñetñapa' e'ñech pocte' enteñet. Añ ñeñtara ma'yarrma't ñeñt metto'ten espada tarraña ñapa' e'ñe mamecma o' alla correrra. ¹⁵ Añña berrma't ñeñt čha'nmats o'ponoť patsot ñeñtñapa' muenateñet o'ch o'rrerratan ayečcataret ñeñt toma'ntatenet ma'yarrma't. Allochñapa' attoch eñorana'tanet pueyečcatar. Ñaña ma'yarrma'tpa' atet nanet po'ñoñ, ñeñtpa' atet oten: Ñerra'm esesha' ama ma'yochenaye ayečcataret muetsanachetepa'ch. ¹⁶⁻¹⁷ Elloñapa' o'terranerr acheñenesha':

—Te'pa' o'ch seyaco'mta'tyesa sotoť secohuenrot amapa' arr seto'mo'mar. Allcha' sena'yeson neso'cheñ amapa' sena'yeson ñeñt nenúmero nepen. Atet p̄atan allohuen acheñenesha' ama't ñeñt ama esoshe'mayaye acheñ, ama't ñaña ñeñt atarr sherbets, ama't ñaña acheñ ñeñt atarr ečllayoret, ama't ñaña ñeñt atarr huocchañetets, ama't ñaña acheñ ñeñt e'ñe cohueno'tsen, ama't añ acheñer ñeñt ataruasataret e'ñe atta. Allohuen acheñenesha' ñeñt ama ayaco'mta'tarete all neññañet ma'yarrma't pa'so'cheñ amapa' ñeñt po'número pen ma'yarrma't, ñetñapa' amach errotenoť es pomueneto ñaña amach errotenoť es rañfneto ñeñt muenenet ñet. ¹⁸ Ñehua, ñeñt allpon po'número pen ma'yarrma'tpa' ñeñtpa' allo'tsen seiscientos sesenta seis. Ñeñt número añ toma'ntena puesheñarr acheñ pa'so'cheñ ñeñtcha' ñanom orrterrtsa tsapatonet. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñt atma'ntataret añ número.

14

Allempo Juanpa' entan Cristo ñeñt atma'ntataret Carrnero, all ten Sióñaño epuet ñaña shonte' acheñenesha'

¹ Allempoña na cohuerrtsanerrpa' alla nentererr Cristo all ten Sióñaño. All orrtena e'ñe atet orrtena ñerra'm Carrnero. All tomčhen ñaña shonte' acheñenesha'. Ñeñt acheñenesha'pa' allo'tsen ciento cuarenta cuatro mil acheñenesha' ñeñt emchorrenaya Cristo. Ñeñtña acheñenesha'pa' e'ñe ayato'ma'taretoche'. Puetomuetopa' all na'yeyññañet Cristo pa'so'cheñ ñeñt atma'ntataret Carrnero, ñaña Pompor pa'so'cheñ ñeñtara ya Yeyomporer. ² Allñapa' ne'muen ñeñt huomenc e'morrtetsa, arroť huena entoť. Atarr huomenc e'morrtena atet ñerra'm all etsase'tena shonte' oñečno ñeñt atarr huomenc ma'moretets. Po'ma'moreteñapa' atarr huomenc e'morrtena čha ottena ñerra'm čho tecorraren huomenc ñeñt yoten tatsllare'. Ñeñt ma'moretets all añepa't ma'moretets ñeñt shontetsa acheñenesha' all

añepa't a'ma'moretenet arpa. ³ Allña'pa' cohuentatenet morreñets ñeñ e'ñe etserra morreñets all Yompor po'conaño. Allo'tsen ñaña pa'tatso'mar ñeñ berrma'ttetsa, ñaña allo'tsa'yen ñeñ sherbene' Yompor ñeñ epoch çharra' ñeñ puechetsa pa'tatssheña. Ama't e'ñe puesheñarrapa' ama eseshaye' yeçhenayeña añ morreñets ñeñ etserra. Añña eñotene' ñeñ ciento cuarenta cuatro mil acheñenesha' ñeñ a'qeshpatarettetsa añe patsro. ⁴ Ñetpa' ama a'sosyateneto atto yorayeñet coyanesha' tarro'mar ñetpa' e'ñe cohuen correnet. Ñetpa' añ e'ñe cohuen coñenet Cristo ñeñ toma'ntenaya Carrnero. All ama't erra muene' sen Cristo, ñetña'pa' e'ñech co'ta'neñet cohuen. Ñetpa' e'ñe ñanom a'qeshpatarettet attoña ñetpa' anarettenet atet ñerra'mrrate' ñeñ ñanom yapueñ Yompor ñeñ atarr cohuen, ñeñtara o'patena ñaña Cristo ñeñ atma'ntataret Carrnero. ⁵ Ama't puesheñarrofetapa' ama shequëneto ama't e'ñe mamesha. Ñetpa' e'ñe cohuen orretyenet amach errotenot otteñe'chare'tterreto ama't ahuata all Yompor po'conaño.

Allempo Juanpa' enterranerr ma'psheña mellañoñeñ ñeñ eñosyetsnets anoma'matof

⁶ Allempoña napa' alla nenterrerr po'poñ mellañoñeñ all anoma'mtena allpononet enonet. Ñapa' ñeñña serrpare'tatenahuet cohuen ñoñets ñeñ ama ahuañaño ñeñ alloch yeqeshperra. Añ cohuen ñoñets ñeñcha' serrpare'tatan allohuen pa'namen acheñenesha' ñeñ yeçha'yetsa añe patsro, ama't ora allemeñ pa'namen anetsoçhno ñeñ pa'namen mereñtsoreçhno ñeñ eñosyets e'ñe po'poñe'ttsoçma ñoñtso. ⁷ Ñeñ atto anoma'mtena all, eñosnen, atarr huomenc e'morrtena, ñeñtpa' atet otnen:

—Semcha'na'chepa'ch Yompor, çochña secohuentatoñ tarro'mar te'pa' o' çhap allempoch entyesas e'ñe puesheña'ttsos errotente' sepa'yena. Te'pa' ñachña sema'yocha ñeñ yeçcate' enet ñaña ñeñ yeçcate' pats, ñaña oñeçhno ama't allot potayen oñ.

⁸ Allempoña'pa' alla co'ta'nererr po'poñ mellañoñeñ ñeñ puepañ mellañoñeñ. Ñapa'çho'ña eñosnerrerr, ñeñña'pa' atet otnom:

—Te'pa' o' ahupore'taretta añ anets ñeñ atma'ntataret Babilonia ñeñ nanac atarr anets. Tarro'mar ñeñtpa' añ yeçhatyenan ora allpon po'poñeçhno anetsoçhno ñeñ atarr sosya'tsañeçhno ñeñ atet muenatse'tatyenanet ñet po'çhets.

⁹ Allempoña'pa' alla co'ta'huererr po'poñ mellañoñeñ ñeñ puema'pañ. Ñapa'çho'ña eñosnerrerr, po'ñoñpa' atarr huomenc e'morrtena, ñeñña'pa' atet otnerrerr:

—Ñerra'm esesha' ma'yochenaya ma'yarrma't amapa' ayeçhcataret ñeñt toma'ntenaya ma'yarrma't, amapa' ñerra'm esesha' muenatenet o'ch yaco'mta'chet ma'yarrma't pueyotsaparo amapa' pueto'mo ayato'ma'tarefta, 10 ñetñapa' a'coñchatare'tterretcha', tarro'mar Yomporña e'ñe po'yoroçhenño'tpa' ñachña e'ñe coñchatuerrahuet e'ñe poctacma. Tso'pa' ñeñtcha'ña mueroc'hatauerrahuet ñaña ñeñt epuet huorten tso'pa' ñeñt'pa' atarr shemasher ñeñt otenet azufre. Allcha' a'coñchatare'tterret, allotcha'ña cohueretña allohuen mellaño'teññaneshachno ñeñt pueyochresha' pen Parets. Cohueretcha' ñaña Cristo ñeñt atma'ntataret Carrnero. 11 Attoch achamare'tterret, tso'ñapa' chepoten pamosoñ enonet ñeñt'ñapa' amach ahuañaña'tterro ama't errponaña. Amach huañerro ama't mamesha ñeñt atto a'coñchatare'ttenet ama't yeto ama't ñaña tsapo. Tarro'mar ñetpa' aña ma'yochenet ma'yarrma't ñaña ayeçhcataret ñeñt toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeñt atet ot mellaño'teñ ñeñt anoma'mtetsa eno'mar.

12 Ñeñto'marña allohueney ñeñtey e'ñe pueyochresha' peney Parets ñeñtey ame'ñenaya Yompor po'ñoñ ñeñt atet oteney ñeñtey e'ñe yemtenaya Jesús, yocopñapa' añ poctetsa o'ch ya'huanta'huen e'ñe aco'pa ñeñt allpon pa'namen es yehuenoya.

13 Allempoña na allpa' ne'muerrerr ñoñets arro't huena entot, ñeñt'pa' atet oten:

—Te'pa' o'ch pequellca' añ ñoñets: “Te'ñapa' atarrcha' cosheñtso'tsa'yen allohuen ñeñtcha' rromayets e'ñe pame'ñeño'tet Yepartseshar Jesucristo.” Po'ño'ch atet oten Yompor Puecamquëñ, ñetpa' amesatare'tterretcha'. Te'pa' amach alla torrerrete'te tarro'mar ñeñt allpon o' torra'yenet añ patsro, ñeñt'pa' e'ñe eñotuare't all Yompor pue'ntaño.

Attoch çherr ñeñteñpo allempoch apçherret narmets ñeñt o' pomella'huen

14 Allempoña na cohuerrtsanerrpa' nenterrerr os atarr huallama't. Ñeñtña ospa' all anen puesheñarr ñeñt'pa' añepa't Jesús ñeñtara Ñeñt Acheñetosets arr patsro. Ñeñtñapa' echoyo'met, ñeñtña po'choyo'mpa' oro ñeñt choyo'mtena. Pototñapa' orrenan cochell ñeñt atore'gorro't ñeñt atarr nanac etsotañ ñeñt otenet hoz. 15 Allempoña Yompor pa'pac'llo'tpa' çha'nom po'psheñeñ mellaño'teñ. Ñaña'pa' otosan ñeñt anets oso. Po'ñoññapa' atarr huomenc e'morrtena, ñeñt'pa' atet otenan ñeñt anets oso:

—Pamat p̄occhello ñeñt̄ pomellets allochñapa' o'ch p̄a'yapache' tarro'mar o' chap ñeñteñpo allempo yapchen ñeñt̄ o' pomella'hua yenareñ.

¹⁶ Allempoña ñeñt̄ anets oso, ñaña'apa' o'cho' amatan ñeñt̄ o' pomella'huen ora errap̄aren aña patsro. Ñaña'apa' o' a'yapachan allemateñ ñeñt̄ pomellets aña patsro.

¹⁷ Allempoña cha'nerrerr po'psheñeñ mellañoñeñ Yompor pa'pacloñ ñeñt̄ ento'tsen. Ñapa'cho'ña orrenan po'cchell ñeñt̄ atarr nanac etsotañ. ¹⁸ Allempoñapa' cha'nerrerr po'psheñeñ mellañoñeñ. Ñapa' arrot huapa allo'tsen altar. Ñaña'apa' ñeñt̄ ahuamencattetsa attoch pomnaren penan tso'. Ñaña'apa' otan ñeñt̄ occhelleñ. Po'ñoñña'apa' atarr huomenc e'morrtena, ñeñt̄pa' atet oten:

—Te'pa' o'ch p̄amat p̄occhello ñeñt̄ atarr nanac etsotañ o'ch p̄apcha' allo puechma'tets uva ñeñt̄ aña patsro'tsen tarro'mar o' atarr nanac yen.

¹⁹ Ñeñt̄ña mellañoñeñ atet oteñetpa' atetcho' p̄a. Allempoña amatan po'cchello uva ñeñt̄ aña patsro'tsen o'cho' a'yapachach. A'yapachatuepa' o' shontanña uva allcha' at̄mama'chet attoch cha'nmatoñet po'ñer. Ñeñt̄ña'apa' añ toma'ntena atto Yompor po'yorochenñoñpa' atarrcha' coñchaterran acheñenesha'. ²⁰ All at̄mama'teñet uva, pocolloñpa' tama a'yente'tsen. Ñeñt̄ atto cha'nen uva po'ñer ñeñt̄pa' añ toma'ntena o'ch chorrerr errasats arr patsro a'yohuen ñeñt̄ allohuanen trescientos kilómetros ñaña enonet chapcha' e'ñe cahuall po'frenohua ñeñt̄ chets e'ñe yelleca'nohua.

15

Allempo Juanpa' enterranerr cancherrsheña mellañoñeñ, ñetpa' o'ch orrtaterret ñeñt̄cha' amuerochtatañterrtsa

¹ Allempoña all ento napa' o' nenterrerr po'poñ ñeñt̄ atarr yorochen ñeñt̄ ama yentare ñeñt̄cha' yeñotaterre' ñeñt̄cha' atet perra esempo. Nenterrerr mellañoñeñnesha' cancherrsheña. Ñetña'apa' allsensarettenet attoch orrtaterret ñeñt̄cha' amuerochtatañterrtsa. Puesheña'ttsetpa' orrtaterretcha' ñeñt̄cha' amuerochtatañterrtsa e'ñe po'poñe'ttsoema cancherrsheño'maret. Allempochña etsotuerra allohuen ñeñt̄cha' atto Yomporpa' yorochtater.

² Allña napa' nenterrerr ñeñt̄ atet orrtetsa erracmañen atet ñerra'mrrate' ñeñt̄ añecmuen rerpat e'ñe atet huorten atet ñerra'm tso' huortets all. Allña'apa' all tomchen allohuen acheñenesha' ñeñt̄ e'ñe metana'tue' ora allpon ñeñt̄ atet

topatyenanet ma'yarrma't ñaña ñeñt pueyeçhcatar. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ amapa' ñaña po'número. All tomçhenet e'ñe arpa'tochet ñeñtpa' Yompor apuenahuet. ³Ñetña puenñtana'tueño'tet allohuen topateñets morrechenet Moisés puemorreo ñeñt Moisés ñeñt atarr torratset Yomporecop. Pa'qeshpatareteño'tet morrechenet ñaña Cristo puemorreo ñeñt toma'ntenaya Carrero. Ñeñtpa' atet açhoteñet Yompor:

Yompore, ñeñteþ nanac Partsoþ þa ñeñteþ Yepartseshar yepen, atarr echarr es petsotatyen, atarr coçhnesha' es peþa'yen. Pa ñeñteþ Pa'mñcha'tareter pen allohuen pa'namen acheñenesha' ñeñteþ e'ñe pocte' es peþa'yen. Ñaña e'ñe po'ñoçh atet ñeñt allpon es þotyen.

⁴ Allohuen acheñenesha' e'ñe añcha'na'tpo' entenpet, Yompore. Ama't puesheñarrapa' ama eñalle ñeñt ama añcha'na'tpahuoye' pentenaye, Yompore. Allohuen acheñenesha'pa' e'ñe þapta cohuentatennapet, tarro'mar e'ñe þapta þa ñeñteþ atarr Partsoþ. Tarro'mar allohuen acheñenesha' ñeñt pa'namen anetsot huaçha'tetcha' pesho attoch ma'yochapet þa e'ñe þapuet tarro'mar ñetpa' o' taya çhapanet pueyoçhro atto þapa' e'ñe cohuen pocte' es peþa'yen.

⁵ Allempoña napa' cohuerrtsanerr nenterrñañerr Yompor pa'paquell ñeñt pue'ntaño'tsen. Ñeñtña pocoll popellrrarpa' e'ñe cohuen atoraret. O'ponoñapa' allo'tsen all añño'tenet mapuettall ñeñt allo aquellcaret Yompor po'ñoñ ñeñt atet anaret ama't ahuatoteñ. ⁶O'ponoñña Yompor pa'paclo'tpa' çha'nmaçherrerr ñeñt cançherrsheña mellaño'teñnesha'. Puesheña'ttset orrtaterretcha' ñeñtcha' amueroçhtatañtertsa e'ñe po'poñe'ttsoçma cançherrsheño'maret. Añ chorra'yenet ñeñt atarr nanac cohuen ñeñt otenet lino ñeñt ama asosyatño ama't e'ñe mamesha. E'ñe cohuen poçtama'tyena. Achanaretareret, po'chanaretpa' orotommuenare' ñeñt allo chana'yenet puesomapo. ⁷Allempoña añ ñeñt pa'tatso'mar berrma't, paterrñapa' apa'yesan mellaño'teñnesha' cançherrsheño'mar pajo'. Apa'yesanet puesheña'ttset po'pajo' ñeñt orotaten. Ñeñtña pajo'pa' all e'chorrayesaret alloch coñchaterran Yompor pa'namen acheñenesha' ñeñt añe patsro'tsen, ñeñtara Yompor ñeñt ama arromñateşhayaye ama't errponaña ama't ahuata. ⁸Allña Yompor pa'paclo e'ñe chorren amos. Ñeñtña amospa' añepa't ottetsa Yompor po'cohuenña ñaña po'partsoña. Allña'pa' ama't puesheñarrapa' ama muenateñeto o'ch be'toset all Yompor pa'paclo

tarrempohuach esempoch orrtatan ñeñt cancherrsheña mellañoñeshá' muerochteñets. Allempochña be'toscherret all Yompor pa'paclo.

16

Allempo Juanpa' enterranerr cancherrsheña mellañoñeñ ñeñt echene' po'pajotollesha' all na'yenet ñeñticha' amuerochtatañterrtsa pa'namenot

¹ Allempoña napa' alla ne'muerrerr ñoñets ñeñt e'morrtetsa huomenc Yompor pa'paclo. Ñeñtña ñoñetspa' atet otenan mellañoñeshá' ñeñt cancherrsheña, atet otenanet:

—Te'pa' o'ch sahuanna allcha' seyo'panat errañaren patso ñeñt sena'yen sepajotollesho ñeñt canchrro'mar attoch sortatoñ Yompor po'yorochenña.

² Allempoña puesheñarr ñanom mellañoñeñpa' o'cho' ahuo'. Allña' yo'posan ñeñt po'pajotollo'tsen patso. Allempo chap patsopa' ñeñtña' orrtatan puetsarñats ñeñt ama amapochatatañe ñeñt'pa' ama eñalle pa'par alloch partet attoch metuerranet. Ñeñt'pa' aña a'ptsarsat ñeñt ayato'ma'tarefetyetsa ma'yarrma't pueyotsaparo ñaña ñeñt ma'yochenaya ayeçhcataret ñeñt toma'ntatenet ma'yarrma't.

³ Allempoña po'psheñeñ ñeñt puepañ mellañoñeñpa' o'cho' ahuerrerr o'ch yo'puenana' oño ñeñt po'pajotollo'tsen. Allempo yo'pos oño all atarr sa'po, oñña' cha errassastach, e'ñe atet orrta ñerra'mrrate' arromña't po'rras. Ñeñtña' e'ñe a'cllatuosan allohuen ñeñt allpon yeçheta all oño'mar.

⁴ Allempoña ñeñt puema'pañ mellañoñeñpa' o' ahuerrerr ñaña o'ch yo'puenana' ontapo ñeñt po'pajotollo'tsen ñaña allot potayen oñ. Ñeñtña allempo ayo'paretta oño cha a'pnasatosan oñ errasats. ⁵ Allempoña napa' ne'muen ñeñt atet otenan mellañoñeñ Yompor. Ñehua, ñeñtña mellañoñeñpa' atarr ahuamencat attoch pomnaren penan ora allohuen oñeçhno. Ñeñtña mellañoñeñpa' atet otenan Yompor:

—E'ñe pocte' Nompore ñeñt atet pecoñchatyenanet, pa ñeñtep' chocma eñallep' ama'tahuatoteñpa' ñeñtep' atarr nanac Partsoþ. ⁶ Tarro'mar acheñeneshá' ñeñt pe'moñe'tene'pa' chocma muetsanatennapet ñeñt peyochresha' pepen ñaña ñeñt a'mta'yene' peñoñ, chocma shatyefñañet po'rras. Te'ña papa' o' ponerranet errasats. Ñeñt'pa' e'ñe pocte' tarro'mar ñetpa' añ o' pohuet ñeñt ama pocteye' penteno pa.

⁷ Allempoña e'morrterrerr ñoñets arr e'morrrta altarot, ñeñtña' atet oten:

—Attesha' Yompore, þa ñeñteþ atarr nanac Partsoþ ñeñteþ Yepartseshar yepen. Ñeñt atto pentyenanet ñeñtpa' e'ñe po'ñoçh atet, e'ñe pocte' ñeñt atet o' pecoñchaterranet.

⁸ Allempoña po'psheñeñ mellañoñeñ ñeñt puepa'tatseñ o' yo'puerranerr ñeñt po'pajotollo'tsen. E'ñe arr yo'pue' allo'tsen ñeñt yeçhoyo'tampene'. Ñeñtcha' ahuañencat pe'atsne' attoch chemuerran acheñenesha' atet ñerra'm tso'.
⁹ Acheñenesha' ama't atarr etomuenanetañañña atsne'pa' tarraña ama es queçhpuenayeña ñeñt atet correnet sosya'tsañeçhno. Ama eseshaye' cotape'cherraye cohuen Yomporecop attoch cohuentateññañet Yompore. Elloña ñetña'pa' atarr nanac achmāre'teññañet Yompore pa'so'cheñ ama't ñeñt atarr ahuañencattetsa atto çhapatanet ñeñtcha' mueroçhtaterrahuet.

¹⁰ Allempoña po'psheñeñ mellañoñeñ ñeñt pa'mnareñ, ñapa'çho'ña o' yo'puerranerr ñeñt po'pajotollo'tsen. E'ñe arr yo'pue' ma'yarrma't po'conaño all añcha'tarettena. Ñeñtña all añcha'tarettena'pa' çha a'cheçmetue. Acheñenesha'ña allpa' epaye' mueroçhtatanet pa'namen atserrpeñets. Ñeñt atserrpeñetspa' çha muellatstame'tatyesanet, açhañeñe'chatyesanet atserr.
¹¹ Tarraña ñetpa' ama't atet o' aþarettetaña'pa' ama queçhpuenetoña ñeñt atet þatse'tyenet sosya'tsañeçhno. Elloña ñetpa' allo'na achmāre'tneñet Yompore ñeñt ento'tsen ñeñt atto atserrpenanet puetsarñats.

¹² Allempoña ñeñt po'peçhapueñ mellañoñeñ, ñapa'çho'ña o' yo'puerranerr ñeñt po'pajotollo'tsen. Arr yo'pue' po'ñeso ñeñt añecmuen atarres ñeñt po'ñes añ pa'so'cheñ Eufrates. Yo'pose'pa' çha emasa'huosanña po'ñes ama't atarr añecmuen. Ñeñtña allot masohuapa' ñeñtña toñeterrets ñeñtña pa'teþ perret allcha' oñem añcha'tareteçhno ñeñtcha' huacha'ttsa allot huena atsne'.

¹³ Allempoña napa' nenterrerr añyañ epuet ma'yarrma't epuet ñaña ñeñt a'ñtene' ma'yarrma't po'ñoñ añe patsro tarraña ñeñtpa' ashcaña. Ñetña e'ñe puenamotetpa' çha'nmatyeset puesheña'tets oneñet ñeñt ama mapoçho. Ñeñt oneñetpa' ma'psheña. Ñetña'pa' e'ñe atet orretyenet ñerra'mrrate' rrehuancro.
¹⁴⁻¹⁶ Tarraña ñeñtpa' oneñetca'ye ñeñtcha' orrtaterre' ñeñt ama puentare allohuen acheñenesha' ñeñtcha' cohuanrrortaterrahuet. Ñetpa' o'ch chopeñe'çhyerret erracmañen attoch apçheret allohuen ñeñt añcha'taretetyetsa añe patsro. Alloçhña'pa' attoch quellareret Yompore ñeñt atarr ahuañencat, attoch quellaret allempoch çherr ponañcho ñeñte yetroch yoroçhtater Yompore. Allohuen añcha'taretnesha' ñeñtcha' quellarerre'

Yompor, arrcha' apčhatareterret anets ñeñt pa'so'cheñ Armagedón, allotcha' quellareret Yompor. Añ Armagedónpa' ñeñtpa' hebreonesha' sochene' añ ñeñt anetser. Ñehua, o'ch neyerpatasa ñeñt atet ote't Yepartseshar Jesús, ñapa' atet ote't: "Señohepa'ch napa' e'ñech machayota nohuerra atet ñerra'mrrate' eñet amach esesha' eñotenaye esempoch huapa. Tarraña atarr cosheñtso'tsa'yen ñeñt čhocma neñose'rtenaya ñeñto'marña ñetpa' e'ñe cohuen añño'tenet pa'shtam ñeñtcha' chorra'nmuet allochñapa' amach muelle'mcota čha'nmueto amach čha apencočterreto."

¹⁷ Allempoña po'psheñeñ mellañoñeñ ñeñt pocančhroñ, ñapa'čo'ña o' yo'puerranerr ñeñt po'pajotollo'tsen. E'ñe arr yo'pue' mörresho. Allempocma e'morrta ñoñets ñeñt huetsa Yompor po'conañoñ ñeñt pa'paclo'tsen all pue'ntaño. Ñeñtña ñoñetspa' atarr huomenc e'morrtena, ñeñtpa' atet oten:

—Te'ña po'ñočpa' o' etsotuerra, huañerrcha' ñeñt ahuatoteñ.

¹⁸ Allempoñapa' meramerta o' tatsllares, e'morrta ñaña ñeñt ma'moretets, atarr huomenc e'morrtena. Puetalle'cha ñaña pats nanac huomenc ñeñt ama't ahuatapa' ama atet pueparo allempoteñ e'ñe pa'motroteñ eñalleta acheñenesha' arr patsro. ¹⁹ Añ ñeñt atarr anets ñeñt atma'ntataret anets Babiloniapa' ñeñtña anetserpa' o' rrara'pes ma'pshenña. Ama't ora allpon pa'namen anetsočhno añe patsro all shonta'yena pa'namen acheñenesha', ñetpa'čo'ña e'ñe ñegatañpesuahuet. Yomporpa' añcha' yerpaterranet ñeñt allohuen allpon pätse'tyenet ñeñt atarr sosya'tsañ all atarr anetso ñeñt atma'ntataret Babilonia. Ñeñt allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yoročhenño. ²⁰ Allempoña ama't ñeñt rročpe'chañečhno ñaña aspentečhno o' e'ñe chenca'huerra. ²¹ Shora'nom ñaña entot hue' ñeñt atarr añecmuesheñ ateshamerr. Pate'tetspa' eñerrtena cuarenta kilo. Ñeñtña e'ñe a'tpetse'tuose' allohuen acheñenesha'. Allempoña ñetpa' atarr achmare'teñet Yompor tarro'mar o' coñchaterranet atarr huomenc.

17

Attoch a'coñchatarēterra coyanesha' ecañoreshať ñeñt toma'ntenaya anets Babilonia all ama esesha' yerpa'penayo Yompor

¹ Allempoña mellañoñeñ ñeñt cančherrsheña ñeñt echyene' po'pajotollesha', puesheñarrñapa' o' huapa. Huapa neshopa' otosen:

—Te'pa' o'ch p̄octa'n o'ch negatenp̄a' allcha' a'coñchatareŕta añ coyanesha' ñeñt̄ atarr ecañoreshaŕ ñeñt̄ ame'ñatenaya pa'namen añcha'tareŕnesha' ñeñt̄ pa'namen anetso'tsa'yen e'ñe allohuanen chen oñechno añe patsro. Ñapa' po'conañ penan oñechno all anen. ² Ñeñt̄ añcha'tareŕetyetsa añe patsropa' pame'ñeñoŕet ñetpa' e'ñe po'cañoreshacma peñet ñeñt̄ coyanesha'. Allohuen ñeñt̄ añe patsro'tsen acheñenesha' e'ñe a'posa'tuenanet tarro'mar ñeñt̄ atto cañoresha'tenanet ñeñt̄pa' chochña a'posa'tenanet attoch e'ñe cohuen ame'ñeñet.

³ Allempoña ñeñt̄ mellañoŕeñpa' arr anmuen amarato, e'ñe Yompor puecamquẽñoŕ anmuenet. Allñapa' nentos puesheñarr coyanesha' ñeñt̄ anets berrma't pa'che'ño. Ñeñt̄ berrma'tpa' atarr añcha'nochen, atarr tsañnanen. Poñpa' cancherrm̄aga, po'ucorñapa' charra'. Ora pue'mocro'marpa' e'ñe aquellca'huareŕ allemeñ. Ñeñt̄ña quellecpa' allo sochatse'teñet Yompor. ⁴ Ñeñt̄ña coyanesha'pa' añ chorrena yetsñorromamuen epuet tsamamuen. Ñaña allo añño'tena ñeñt̄pa' atet ñerra'm orollmemen ñeñt̄ atarr cohuen, ñaña mapyellmetollesha' ñeñt̄ nanac poptallme'chyetsa ñeñt̄ nanac tsa'te' ñaña po'ser ñeñt̄ atarr cohuen orrtatene' ña. Potot̄ orrenan po'pajo' orotaten. Ñeñt̄ pajo'pa' e'ñe e'chorrenan pa'namen sosya'tsañechno ñeñt̄ atarr yetsena'ten ñeñt̄ atto nanac cañoresha'ten. ⁵ Pueto'mpa' aquellcato'ma'tareŕ. Añ so'chñets ñeñt̄ quellquẽnet allpa' ñeñt̄pa' attoch eñotatanet ñeñt̄ ama e'ñeye' eñotpahuo, ñeñt̄pa' atet oten: “Añpa' ñeñt̄ toma'ntenaya anets Babilonia ñeñt̄ nanac atarr anets ñeñt̄ara pachor pen ñaña allohuen ñeñt̄ atarr ecañoreshaŕ ñaña pa'namen sosya'tsañechno ñeñt̄ atarr yetsena'tyen arr patsro.” ⁶ Allempoña ñeñt̄ coyanesha'pa' neñoŕ atarr posa'ten. Ñaña'pa' añ posa'tena errasats ñeñt̄ po'rras ñeñt̄ muetsanatete't ñeñt̄ pueyochresha' pen Parets tarro'mar ñapa' atarr cohuen entenan o'ch muetsachet ñeñt̄ serrpare'tene' atto ame'ñeñet Jesús. Allempo neñch ñaña'pa' atta necuana'ch ñeñt̄ coyanesha'. ⁷ Ñaña allempo mellañoŕeñpa' o' alla oterren:

—¿Eso'mare'tña atta pecuana'teñ? Te'pa' o'ch neñotataŕ ñeñt̄ toma'ntena añ coyanesha' ñaña ñeñt̄ toma'ntena añ berrma't ñeñt̄ allo anen ñeñt̄ cancherrm̄aga poñ, po'ucorñapa' charra'. ⁸ Añ berrma't ñeñt̄ penten, ñeñt̄pa' añ toma'ntena ñeñt̄ corratse't ahuañmo'cha te'pa' ama eñalle o' rroma. Tarraña o' mameshamerra o'ch alla tanterra o'ch cha'nerr arrorotot. Tarraña ñeñt̄pa' mamecpach atet perra, ellochña o'ch alla rromuerrerr. Allempochña o'ch chenca e'ñe poc-

tacma. Acheñenesha' ñeñt yecha'yetsa añe patsro ñeñt ama ame'ñetso ñetñapa' atarrcha' cohuanrrorteret añ berrma't tarro'mar ama puentareto ñeñt atet pena añ berrma't. Ama't ñeñt corratse't arr patsro, tarraña ahuañmo'chapa' o' rroma. Ama't o' rromhuañ tarraña o' alla orrterrerr. Ñeñto'marña acheñenesha'pa' atarr cohuanrrortene't. Nehua, ñeñt cohuanrrortene'pa' ama aquellcareteyaye pa'so'cheñ Yompor po'libro all aquellcarettena pa'so'chñechno ñeñt pueyochresha' pen Yompor; ñetñapa' corretsetach errponañohuen. Ñeñt ama ame'ñetso ama aquellcareteyayeto pa'so'cheñ ahuatoteñ allempoteñ e'ñe errete' ayečcataretsetsa pats.

9 'Te' ñeñtcha' neñotatappa' o'ch poctape'ch e'ñe cohuen esheccha' peñot ñeñt atet toma'ntena añ berrma't poñechno. Ñeñt penten cancherrmaga poñ, ñeñtpa' añ toma'ntena cancherrpena aspenet all yečhena añ coyanesha'. 10 Toma'ntenana ñaña cancherrsheña ñeñt añcha'tarettetsa añe patsro. Tarraña amnarsheñapa' o'huañ añcha'taretta. Te'pa' o' puesheñarraña añcha'tarettetsa. Tarraña puesheñarmeñ palltena ama orrtena'. Tarraña esempoch orrtapa' amach atarr atomat añcha'taretto. 11 Ñaña añ berrma't ñeñt toma'ntenaya puesheñarr añcha'taret ñeñt corratse't ahuañmo'cha te'pa' o' rroma. Ama't o' rromañpa' tarraña ñeñtara o'ch alla orrterra o'ch alla añcha'taretterrerr ñeñtcha' posocsheñterre' ñeñt cancherrsheña añcha'taret ñeñt o' colla'hua. Tarraña ñapa'cho'ña čhocmach rromuerrerr allempoch chenca e'ñe poctacma. Nehua, ñapa' ñeñtara ñeñt añcha'tarettatse't ñaña ahuañmo'cha allempo cancherrsheñtete't.

12 'Ñaña añ berrma't ñeñt čharra' po'ucor ñeñt penten, ñeñtpa' añ toma'ntena čharrasheña añcha'taretnesha', tarraña ñetpa' ama añcha'taretteneta' tarro'mar ama orrteteneta'. Tarraña esempoch orrtterret allempochña añcha'tarettapreteret berrma't e'ñe mame'. 13 Ñetpa' e'ñech patrra cotape'chenet ñeñt atet cotape'chen berrma't, o'ch neñet berrma't ñeñtcha' pa'micha'tareter perret. Ñeñtpa' atto yenpueñet attoch ahuañmencat peñet berrma't. 14 Ñetñapa' pue'moñe'teño'tet Cristo ñeñt toma'ntenaya Carrnero quellareretcha'. Tarraña Cristo ñeñt toma'ntenaya Carrnero ñach a'mchechuehrahuet tarro'mar ñapa' atarr ahuañmencat. Ama't ora allpon ñeñt ayochreshatetyetsa, Cristoñapa' e'ñe Pa'yochreshater pohueñet allohuenet, ñaña ama't ora allpon ñeñt añcha'taretetyetsa, ñetpa'cho'ña e'ñe Pa'micha'tareter pohueñet allohuenet. Ñaña ñeñt epuet parro yemtena, ñetpa' Yompor acerrahuet ñeñt chore'ten ña ñeñt atarr yemtenaya

ña.

¹⁵ Allempoña añ mellañoñeñ alla oterrerr, ñeñtpa' atet oten:

—Ñaña añ oñechno ñeññ penten ñeññ allo anen coyanesha' ñeññ atarr ecañoreshaí, ñeñtpa' añ toma'ntena shonte' pa'namen acheñenesha' ñaña pa'namen anetsochno all yecha'yenet ñaña po'poñe'ttsoema ñoñets ñeññ allo eñosyenet.

¹⁶ Ñaña añ berrma't ñeññ penten çharra' po'ucor ñeññ toma'ntenaya çharrasheña añcha'taretnesha', ñetñapa' tsena'chetcha' ñeññ coyanesha', a'ypo'ñeretcha' e'ñe muelle'mcot. E'nuerrñañetcha' e'ñe ña po'chets allempochña chamueret tso.

¹⁷ Yomporpa' ña nene' allohuen añcha'taretnesha' pueyoçhreto attoch ñetpa' e'ñech patrra cotape'chenet ñeññ atet cotape'chen berrma't, attoch yenpueñet esheccha' ahuañenat peñet berrma't. Allochñapa' attoch etsotateññañet Yompor po'ñoñ ñeññ atet oten.

¹⁸ Ñaña añ coyanesha' ñeññ penten ñapa' añ toma'ntena ñeññ atarr nanac anets ñeññ pomnaren pene' allohuen ñeññ añcha'taretetyetsa allemeñ anetso'mar ñeññ añe patsro.

18

Atto allohuen eçllayoretenesha'pa' ya'na'teretcha' ñeññ anetser Babilonia o' ahuañore'taretterra

¹ Allempoña o' alla nenterrerr po'psheñeñ mellañoñeñ ñeññ sohua'netsa entoí, ñeñññapa' atarr ahuañenat. O' e'ñe çhap patsopa' a'puetarsañpsosan pats e'ñe ña po'popteñoí.

² Ñaña' rranosa huomenc, ñeñtpa' atet otos:

—Te'ñapa' o' a'ypo'ñare'terra añ anetser ñeññ atma'ntataret Babilonia ñeññ atarr añecmuen anets. Te'pa' añeçpach sherberr allcha' shonterra pa'namen oneñe'techno ñeññ atarr apoçhenare' ñaña allcha' shonterra pa'namen o'techno ñeññ atarr yetsena'tyen.

³ Tarro'mar añ coyanesha' ñeññ toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeññ añcha'taretetyetsa añe patsro. Allohuen ñeññ añe patsro'tsen acheñenesha' e'ñe a'posa'tuanete't tarro'mar ñeññ atto cañoresha'tanete't ñeñtpa' çhoch a'posa'tanete't. Ñaña allohuen ñeññ allpon pomatsre'tyestse't, ñaña atarr eçllayorettatahuete't tarro'mar ñapa' shonte' esocmañen muenatse'tyese't.

⁴ Allempoña o' alla ne'muerrerr po'poñ ñoñets ñeññ e'morrtetsa entoí, ñeñtpa' atet oten:

—Ñeñtes neyochresha' nepen, te'pa' o'ch sesa'nemí añ anets ñeññ atma'ntataret coyanesha'. Amach socshapretatsche ña po'chñar te't sa'na mueroçhtapretenaya.

5 Tarro'mar ña po'chñarpa' allo'na sen atonetnomtsa nanac. Yomporpa' e'ñe eñoteññañ po'chñar ñeñt allpon p̄a'yese't. 6 Te'pa' atsa'tatare'tterrepa'ch allpon ñeñt atto erro't p̄a'yese't po'potantañ. Ñehua, ama't epoche'tats atsa'tatare'tterrepa'ch allpon ñeñt atto es p̄atse'tyese't. Ñeñt atto allpon llecatyese't po'potantañ, ñapa' epoche'tatsepa'ch atsa'tatare'tterra llequēntso. 7 Ñeñt allpon coshatse'tyese't, te'ñapa' ñeñtepa'chña allpon llecaterrayer. Ñeñt allpon ehyese't, te'ñapa' ñeñtepa'chña allpon mueroçhtaterre'. Tarro'mar ña ahuañmo'chpa' pommo'cheño't atet ote't pueyoçhro: "Napa' atto nanen na neconaño'pa' atarr na'micha'tarettena. Napa' ama añeyayno ñeñt rretorrnanesha'. Na ama't ahua'tapa' amach nellquērro tarro'mar amach es nemueroçhtaterraye." 8 Tarraña ama't atet ommo'chenañpa' mamererrpa' o'ch çhapaña ñeñtcha' mueroçhtaterre' pa'namen mueroçhteñets – rromueñets, llequēñets ñaña muecheñets. Ñapa' a'poyatatueretcha' tso. Tarro'mar Yompor ñeñt Yepartseshar yepen ñapa' ñeñt atarr Parets ñachña coñchaterre'.

9 Ñeñt añcha'tareteçhno ora errañaren añe patsro, ñetña e'ñe puellquēño'tetpa' ya'na'teretcha' ñerra'm esempo enterrñañet pamosoñ ñeñt atto poyen. Ñeñtara añcha'taretnesha' ñeñt e'ñe po'cañoreshacma pe't ahuañmo'cha ñeñt parroçma epuet atarr coshete't. 10 Ñetpa' pueyorño'tetpa' cohuanrrorteretcha' a'yot tarro'mar atarrcha' yoren et ñeñt atto o' a'coñchatare'tterra. Ñet puellquēño'tetpa' atetcha' otet:

—Atarr llequēñets-bee, ama't ñeñt atarr añecmuen anetser ñeñt atarr ahuamenca't, machayo'ta o' çherrñaña ñeñtcha' coñchaterre'.

11 Ñaña allpon ñeñt pomatsre'tyetsa errañaren añe pat-sro, ñetpa'cho'ña e'ñe puellquēño'tet ya'na'teñet, tarro'mar te'pa' ama eñalle ñeñtcha' rañta'yesehuet ñeñt pomyenet. 12 Tarro'mar ñet ñeñt po'checom penetpa' shonte' esoc-mañen pa'namen — oro, ñaña asreçhno ñaña mapyetollesha' ñeñt poptame'te' nanac tsa'te', ñaña serets ñeñt otenet perla, ñaña shetamtsoçhno ñeñt atarr coçhnesharer — yetsñorromamuenare', tsamamuenarer, sedamamuen. Shonte' ñaña pa'namen tsacheçhno ñeñt atarr eñmosateçhno, ñaña marfil ñeñt elefantas ñeñt allo't yeçhcatyenet pa'namen, ñaña pa'namen ñeñt yeçhcatyenet tsachot ñeñt atarr nanac tsa'te', ñaña ñeñt yeçhcatyenet bronso't ñaña hierro't ñaña mapyo't ñeñt otenet mármol. 13 Ñaña ñeñt pa'namen po'checom

penet atet ñerra'm ñeñt otenet canela ñaña pa'namen aspanatollesha' ñeñt eñmosañare' ñaña tsachese' ñeñtpa'cho'ña eñmosañare' ñerra'm esempo a'crrateñet e'ñe atet ñerra'm ñeñt otenet mirra ñaña incienso. Allotpa' po'poñechno checmañatsochno ñeñtpa' añ vinos, oliveose', harina ñeñt atarr cohuen ñaña trigo. Ñaña po'poñechno ñeñt pomyenet ñeñtpa' añ huacshechno, carrnerochno, cahuallechno ñaña carrotollesha' ñeñt matatyen cahuallechno. Ñaña allpa' ama't acheñ pomueñet ñeñtcha' taruasatenet e'ñe atta. Ñeñt acheñerpa' allña pomueññañet pocrraña ñeñt atto correna arr patsro. ¹⁴ Ñeñt pomatsre'tyetsa allpa' ñetñapa' serrpare'tenet, cha ottenet ñerra'mrrate' cho es oteñet ñeñt anetser, ñeñtpa' atet oteñet:

—Ñeñt allpon atarr payoma'yese't atet ñerra'm puetsarr ñeñt atarr ayoma'po' te'ñapa' ama eñalle o' huañerr. Ñaña ñeñt allpon nanac cohuen pentyese't ñeñt nanac cochnesha'tatse't, te'pa' o' chenca'huerra. Te'ñapa' ama't ahuatapa' amach alla pentere'te. Arrpa' allohua ñeñt atet oteñet ñeñt anetser.

¹⁵ Ñeñt allpon pomyenet allpa' ñetñapa' epaye' ganatanet nanac aton quelle. Tarraña ñet te'pa' po'yorñoñet attach tomcha'tet a'yoñ allotcha' cohuerret ñeñt atet o' a'coñchatare'terra. Ñetñapa' epaye' ya'na'teñet e'ñe puellquëñoñetpa' ¹⁶ atet otenet:

—Llequëñtsa-bee añ atarr anets tarro'mar ñapa' o' atet perrate' ñeñt atarr añecmuen anetser ñeñt atet ñerra'mrrate' puesheñarr coyanesha' ñeñt nanac cohuen añño'tetsa. Añcha' chorrena ñeñt atarr cochnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshma't ñeñt atarr cochnesha' poptallme'chyetsa ñaña nenan cochnesha' seretsochno. ¹⁷ Te'ñapa' e'ñe mamecmapa' o' e'ñe huañerr ñeñt atto atarr nanac esocmañen echyese't. Arrpa' allohua ñeñt atet ot ñeñt pomatsre'tetsa all.

Allempoña allohuen ñeñt po'taruas pene' bote ñeñt amatsetene' checmañats all ñeñt anetsro, ñetpa'cho'ña o' alla tomcha'tet a'yoñ — atet ñerra'm ñeñt pamo'mte' pen bote ñaña ñeñt achopeñañnesha' ñaña marineronesha' ñeñt taruaset all boto. ¹⁸ Ñetpa'cho'ña allohuenet all tomchenetpa' rran-nartenet allempo enterrñañet pamosoñ ñeñt atto poyen ñeñt anetser. E'ñe puellquëñoñetpa' atet otenet:

—Ama eñalle po'poñ anetser ñeñt atarr cohuen atet ñerra'm añ anetser.

¹⁹ Allñapa' atarr yahuanrrortenet. Puellquëñoñetpa' pam-pato'tyeset patso. Rran-naretyesetpa' atet otyeset:

—Llequëñtsa-bee añ atarr anetser tarro'mar allohueney ñeñtey echyene' yebote ñeñt' chocma yanene' oñopa' shonte' quelle ganatye't tarro'mar ñeñt' anetserpa' shonte' echane't quelle nanac aton. Tarraña ama't atet pe'tpa' te'ñapa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeñt' pueyochresha' pen Parets

²⁰ Te'ña sapa' socshepa'ch ñeñtes pue'ntaño'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'mtene' Yompor po'ñoñ tarro'mar ñeñt' atto Yompor o' coñchatteran ñeñt' anetser, ñeñt'pa' attoña o' chemnaterrsa sa.

²¹ Allempoña mellañoñeñ ñeñt' atarr ahuamencatpa' ñañaapa' chetan mapue' ñeñt' atarr añecmuenmen atet ñerra'mrrate' ñeñt' allocma es puetse'tenet ñeñt'ñapa' huapore'ch sa'po cha chencostsa poctacma. Allempoña ñeñt' mellañoñeñpa' atet ot:

—Attecma ahuapore'tare'terra añ atarr anetser ñeñt'ara ñeñt' atma'ntataret' Babilonia. Amach orrterre'te ama't ahuata. ²² Te'ña allpa' amach es e'morrterrtse'te ñeñt' atto toquënet arpa ñaña atto penclla'tenet ñaña ñeñt' atto poctorare'tyenet po'pctoro. Ñaña ñeñt' po'taruas paye't ñeñt' es ye'chcatyesaye't pa'namen esocmañen all, te'ña ama't ahuata amach orrterre'te. Ñaña atto e'morrte't allempo es puetse'tete't allpa' te'ñapa' amach alla e'morrterre'te. E'ñe muetsoñeñtuerra. ²³ Ñaña ñeñt' allo choyo'tam'psete't, te'ñapa' amach alla choyo'tam'perranete'te. Ñaña ñeñt' coshame'tam'psaye't ñeñt' sena'tetsa ñaña coyanesha', te'ñapa' amach alla e'morrterre'te'te pocshamña. Ñaña allpon ñeñt' pomatsre'tyesatse't all ñeñt' atarr anetsro, ñetpa' atarr asherben entete't. Ora erra'paren añe patsropa' ama eñalle ñeñt' atet sherbets. Ama't atarr asherben entyesetañe't tarraña chocma shecare'tyesete't allohuen pa'namen acheñenesha' ora erra'paren añ patsro. E'ñe atet es ame'ñatena amase'ñe'tpa' e'ñe attecma shecare'tenanet ñeñt' anetser.

²⁴ Ñaña all anetsro, ñeñt'pa' all amtsanatarette't ñeñt' a'mtaye't Yompor po'ñoñ ñaña allohuen ñeñt' pueyochresha' pen Parets. Allña ashatarette'te't po'rras ñaña ama't allohuen ñeñt' amtsanatarette'tatse't ora erra'paren añe patsro, ñeñt'ara anetsro't allotña amtsanatarette'te't.

19

¹ Allempoña o' alla ne'muerrerr ñeñt' e'morrtertsa huomenc ento, shonte' acheñenesha' e'ñe parrocmá rrannartenet, ñeñt'ñapa' atet otenet:

¡Aleluya! Aye'chočhtatpo'ch Yompor tarro'mar ñapa' ña ñapueť a'qushpatañtetsa, acohuentatpo'ch Yompor ñeñť ñapueť atarr ahuaencaťesha'.

² Ñańa ñeñť pocte' enten Yompor ñeñťpa' e'ñe pocte' attecma, ñańa allpon ñeñť atet oten ña, ñeñťpa' e'ñe po'ñoč attecma. Tarro'mar ñapa' o' coñchaterran coyanesha' ñeñť atarr ecañoreshaťtetsa tarro'mar e'ñe ña po'chñarotpa' atarr a'sosyatenan acheñenesha' ora allohuen ñeñť yečha'yetsa ańe patsro. Te'ńa Yomporpa' o' e'ñe tsa'tatuera ñeñť allpon muetsanatatońeť ñeñť torra'yestseť ñocop.

³ Po'pocheńońapa' alla oterretter:

—¡Aleluya! Aye'chočhtatpo'ch Yompor tarro'mar te'pa' Yompor o' amosońe'chaterran ñeñť atpare'tayeť. Attońa o' chepoterr pamosoń enonet; ñeñťpa' ama't ahuatapa' amach huańerro.

⁴ Allempońa ań epoch čharra' ñeñť puechetsa pa'tatssheńa ñeñť sherbene' Yompor po'conaño, ñetńapa' concorpa'rrtenet epuet ñańa pa'tats ñeñť berrma'ťtetsa. Allohuenet concorpa'rrtenet all Yomporesho. Allohuenetpa' ma'yocheńet Yompor all anen po'conaño. Ñetńapa' atet oteńet:

—Aye'chočhtatpaupapa'ch Yompore, attetepa'ch p̄ocop erponohuańen.

⁵ Allempońa all Yompor po'conañotpa' allotńa e'morrterrerr po'poń ñońets, ñeñťpa' atet oten:

Sa'ye'chočhtatońepa'ch Yompor, allohuenes ñeńťes torra'yetsa ñocop, ama't sa ñeńťes atarr sherbets ama't sańa ñeńťes ama tama sherbetso. Ama't allohuenes erra'tseneste' ñeńťes atarr ańcha'na'tpo' entene' Yomporpa' te'ńapa' sa'ye'chočhtatońepa'chńa.

Atto Cristopa' e'ñe cohuen aguerran allohuen ñeñť ame'ńenaya ña ñeñť atma'ntataret atet ñerra'mrrate' ña puetapor penahuet

⁶ Allempońa napa' o' alla ne'muerrerr shonte' acheñenesha' rrannartenet, atarr huomenc e'morrtena atet ñerra'mrrate' all etsase'tena shonte' oń atarrcha' huomenc ma'moreten. Po'ma'moreteńńapa' čha ottena ñerra'mrrate' čho tecorraren. Acheñenesha'ńa ñeñť rrannartetsapa' ñetńapa' atet otenet:

Aye'chočhtatpo'ch Yompor tarro'mar te'pa' o' čhap allempoch ańcha'tareťterra ña e'ñe ñapueť ñeñťara Yepartsešhar ñeñť atarr ahuaencaťesha'.

⁷ Te'ńapa' yocsherrepa'ch, yocshame'tam̄perepa'ch, yecohuentaterrńańepa'ch tarro'mar te'pa' o' čhap allempoch yocshame'tam̄pesya Cristo ñeñť atma'ntataret

Carrnero. Te'ñapa' o' chap allempoch sena'ta. Ñaña ñeñt coyanesha' ñeñtcha' puetapor pa', ñaña' o' e'ñe añño'tareta.

⁸ Ñaña' o' apet ñaña ñeñtcha' chorra ñeñt atarr cohuen huallama't atarr co'hnesha' shetamuets ñeñt otenet lino ñeñt ama asosyatño ama't e'ñe mamesha, atterach poptame'tena.

Ñehua, añ shetamuets ñeñt otenet lino ñeñt ama a'sosyatpahuoyaye ama't e'ñe mamesha, ñeñtpa' añ toma'ntena ñeñt atto e'ñe cohuenare' es pa'yen ñeñt pueyochresha' pen Parets. Ñetñapa' añ toma'ntenet Cristo puetapor penahuet.

⁹ Allempoña mellañoñeñpa' alla oterrerr:

—Te'pa' o'ch pequellquërrerr añ ñoñets ñeñt noteneþ, ñeñtpa' atet ot: “Atarr cosheñtso'tsen allohuen ñeñt ahua'ñaretetsa o'ch rrallme'chaprechet allcha' coshame'tampeñet Cristo ñeñt atma'ntataret Carrnero ñeñt sena'tatsa.”

Mellañoñeñpa' alla oterrerr:

—Ora allpon ñeñt atet oteney Yompor arrpa' ñeñtpa' e'ñe po'ñoñ atet.

¹⁰ Nañapa' neconcorposa mellañoñeñ pa'rrpo ñeñt neserpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeñten petorrapretenaya Yomporecop ñaña allohuen pemo'nasheñneshachno ñeñt serrpare'tene' atto ame'ñeñet Jesús. Papa' añcha'ña pema'yocha Yompor ñapue't.

Tarro'mar allohuen ñeñt a'mtene' Yompor po'ñoñ, e'ñe ña Puecamquëño'tpa' añ serrpare'tenet ñeñt atto yame'ñeña Jesús.

Cristo ñeñt montenaya cahuall ñeñt atarr huallaþnanen

¹¹ Allempoña po'pocheñopa' alla nenterrerr atoraret enet. Allña' allo'tsen cahuall ñeñt atarr huallaþnanen. Ñeñt montenaya cahuallpa' añ socheñet, Ñeñt atarr Ayemuetpotetsa ñaña ñeñt e'ñe Po'ñoñ Yompor Po'ñoñ. Tarro'mar ñapa' erra'tsen pocte' ent o'ch coñchach, ñeñtña ñocoppa' e'ñe pocte'. Ñaña ñerra'm ña quellaratahuet ñeñtpa'cho'ña e'ñe pocte' ñocop. ¹² Pa'clloyotñapa' atarr nanac a'rrechatañ atet ñerra'mrate' tso' po'huorter. Poñoñapa' shonte' po'choyo'm ñeñt choyo'mtena. Allña' anaret ñaña pa'so'cheñ ñeñtpa' e'ñe ñapta' eñoteñ. ¹³ Pa'shtampa' año e'chomaret errasatso. Ñaña añ socheñet Yompor Po'ñoñ. ¹⁴ Ñaña ñeñt allpon pa'çllarañeshar pen all pue'ntaño, ñetñapa' coteñet chenta' monta'yenesnet ñamet

puecahualloro ñeñt atarr huallaḡnarren. Ñetpa'cho'ña ñeñt pa'shtam penet atarr huallama'tarer. Ñeñt shetamuetspa' atarr cohuen ñeñt otenet lino ñeñt ama sosyatetso ama't mamesha. ¹⁵ Ñeñt anenahuet, e'ñe puenamoť all orrtena cochell ñeñt atarr etsotañtatareť. Ñeñt cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochñapa' po'yorochenñoťpa' o'ch amcha'taretterranet atet ñierra'mrrate' ñapa' a'sreperet o'ch amcha'nochtana'terranet. Ña'ña ñach coñchaterrahuet. O'ch netma'ntacha atet ñierra'mrrate' ñach atmama'te' uva esheccha' cha'nom po'ñer. Ñeñt atet atmama'teñet uvapa' añ toma'ntena atto Yompor ñeñt atarr ahuamencať e'ñe ña po'yorochenñoťpa' atarrcha' coñchaterran acheñenesha' ñeñt atpare'tetsa. ¹⁶ Ña'ña pa'shtamo e'ñe pa'tapacoptaro allñapa' all aquellcareť ñoñets ñeñtcha' atet enteñet Cristo, ñeñtpa' atet oten ñoñets: "Allohuen ñeñt amcha'taretečno añmapa' ñeñtña e'ñe Pa'mcha'tareter ḡohueñet allohuenet. Ña'ña allohuen ñeñt ayochreshatečno añmapa' ñeñtña e'ñe Pa'yochreshater ḡohuenet allohuenet."

¹⁷ Allempoña napa' o' alla nenterrerr mellañoťeñ ñeñt tets all ñeñt yečhoyo'tam̄pene'. Ñañapa' atarr huomenc eñen, chore'tenan allohuen tse'mačno ñeñt anomcha'tyetsa eno. Ñeñtñapa' atet otenanet:

—Sehuacha'ta allohuenes o'ch sapcha arr o'ch serren po'chets ñeñt atarr aton rratenes Yompor. ¹⁸ Attoch serroñ po'chtsočno shonte' acheñenesha' ñeñt amcha'taretetyetsa, ña'ña shonte' ñeñt capitanatyets, ña'ña shonte' ñeñt atarr ahuamencať entyenet. Serroñ ña'ña shonte' cahuallečno po'chets ña'ña añ po'chets ñeñt montenaya. Ama't shonte' pa'namen acheñenesha' o'ch serroñ po'chets ama't ñeñt acheñer ñeñt atarr sherbets ña'ña ama't ñeñt ama sherbetso, ama't ñeñt e'ñe cohueno'tsen acheñ, ama't ña'ña ñeñt ataruasatareť e'ñe atta — o'ch e'ñe serruanet po'chets allohuenet.

¹⁹ Allempoña napa' o' alla nenterrerr ma'yarrma't epuet ña'ña allohuen amcha'taretečno ora erraḡparen ñeñt añe patsro'tsen epuet ña'ña allohuen ñeñt pa'čllarañneshar pen. Ñetpa' añecop apchenet allochñapa' o'ch quellareñet ñeñt montenaya puecahuallor ñeñt atarr huallaḡnanen ña'ña epuet ora allpon ñeñt pa'čllarañneshar pen ña. ²⁰ Allempoña quellaranna'tet ma'yarrma'tñapa' cha rremuet epuet ña'ña ñeñt a'mtene' e'ñe ña po'ñoñ tarraña ñeñtpa' ashcaña. Añ ñeñt ashcañerpa' e'ñe ma'yarrma't po'huamencoť gatenan acheñenesha' ñeñt ama puentareto. Ñeñtpa' alloña shequēnan acheñenesha' attoch ame'ñeñet. Ñeñtña acheñenesha'pa' o'

e'ñe yato'matuanet ma'yarrma't pueyotsaparo. Ñetñapa' año ma'yochenet ayečcataret ñeñt toma'ntatenet ma'yarrma't. Allempoña rremuet ma'yarrma't epuet ñaña ñeñt a'ñtene' po'ñoñ allempoñapa' ahupore'tarettet epsheño'maret e'ñe betareret all parraren tso' errañaren. Ñeñt tso'pa' atarr shemasher huorten. ²¹ Po'potantañečhnoña ñeñt epuet quelarañ ma'yarrma't ñetpa'cho'ña o' e'ñe amtsanataretetuet. Año amtsanatarettet cochllo ñeñt puenamo'tsen ñeñt montenaya puecahuallor ñeñt atarr huallañnanen. Allempoña ñeñt allohuen tse'mačhno epaye' ochare'ch po'chets allempo rret añ po'chets ñeñt o' e'ñe amtsanataretetua.

20

Attoch čherr allempoch mellapoterra

¹ Allempoña o' alla nenterrerr po'psheñeñ mellañoñeñ ñeñt sohua'netsa entot. Ñaña pototpa' añ orren llave alloch torañpsan arrotot ñeñt atarr o'pononet arrototena pats. Pototñapa' orrenan ñaña cadena ñeñt atarr añecmuen cadena. ² Ñeñtña mellañoñeñpa' rremosan añyañ. Añyañpa' ñeñtara shecheñ ñeñt ahuañoteñ ñeñtara yoten oneñeñ ñaña ñeñt otenet Satanás. Atto rremue'pa' allempoñapa' huanquë'. Ñeñt atto ehucarettapa' e'ñech errponañohuen char ñeñt otenet mil char, atterach ehucarettena. ³ Allempo huanca'huepa' o' huapore'ch o'pono arrototo. Allña yotañpes o' noñ alloch e'ñe echarr pañpes. Allochñapa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch chap mil charpa' allempoñapa' o'ch alla a'rroyeret. Tarraña ñerra'm o'ch alla a'rroyeretpa' ñeñtapa' mamecpach a'rroyeretterra.

⁴ Allempoña o' alla nenterrerr ñeñt anorrča'tyets po'conaño'mar. Ñetñapa' allsensarettet attoch ñetpa' o'ch añcha'tarettetyenet. Ñaña napa' o' e'ñe nentuerrñañ puecamquëñečhno allohuen ñeñt apecha'tanatarettatset e'ñe pueserrpare'teñoñet Yepartseshar Jesús ñeñt atto a'potoñete't Yompor po'ñoñ. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetpa' ama ma'yochyete'te ma'yarrma't ama't ayečcataret ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetña allpa' corretseta all añcha'tarettapreteñet Cristo shonte' char allpon ñeñt

otenet mil char. ⁵ Ñetñapa' ñanmuetcha' atantatare'tterret. Tarraña po'potantañe'chno arromñañnesha' ñetña allpa' ama allo'tseneto tarro'mar ñetpa' ama atantatare'teyayeto tarremphuach allempoch çherr mil char. ⁶ Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantatare'tterret. Tarro'mar ñetpa' amach alla rromuerrete'te po'pocheño ñeñtcha' atet rromuerr po'potantañ ñeñtcha' chenquërrtsa e'ñe poctacma. Tarro'mar ñeñtcha' tanterrtsa ñanompa' ñetpa' amach erro'teno't o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa' Yompor po'corneshar penahuet, añcha'tarettapreteretcha' nanac aton shonte' char ñeñt mil char.

Atto Juanpa' entan oneñe't o' ahupore'taretta all parraren tso' errañaren

⁷ Allempoch metua añ mil charpa' allempochña a'rroyeret oneñe't all ayottam'psare'ttena mil charohua. ⁸ Ñaña'pa' o'ch auyes ora errañaren pa'namen anetso'mar arr patsro allcha' shecare'tyerran pa'namen acheñenesha'. O'ch shecare'terran Gog ñaña Magog attoch a'yapaçhaterranet o'ch quellaraterranet. Ñeñt atet yenteññañ ontap po'mñer atetcha' shonterran ñaña pa'namen acheñenesha' arr patsro, ñeñt ama e'ñotuapahuoyaye. ⁹ Atet nentanet ñetpa' ahuanmuet mopñarero'mar o'ch parratse'tet errañaren allcha' orretyeset. Ñetpa' arrentach ahuanenet Yompor pa'netstronet ñeñt atarr morrentena tarro'mar allpa' allo'tsa'yen ñeñt pueyochresha' pen ña. O' e'ñe arrotam'pesuosyet attoch rremanatoñet Yompor pueyochresha'. Tarraña Yompor pue'ntañotpa' e'ñe allempocma a'shoranet tso' attoch e'ñe a'poyatatuanet. ¹⁰ Allempoña oneñe't ñeñt shecare'tenahuetpa' o' huapore'teret ñaña all parraren tso' errañaren ñeñt huortets shemasher. Allo'tsa'yen ñaña ma'yarrma't epuet ñaña ñeñt a'm'tene' po'ñoñ. Allña'pa' allempoteñ a'coñchatare'tetuerret e'ñe parrocmá, yetome'tets, tsapome'tets ama't ahua'ta ñeñt'pa' amach ahuañañat'erro ama't errponaña.

Ñeñt atto allohuen arromñañnesha'pa' tomçherretcha' Yompor po'conaño allña'pa' allcha' entyesare'tterret erro'tente' ñeñt atet pa'yese't e'ñe puesheña'ttset

¹¹ Allempoña o' nenterrerr atarr añecmuen conañ ñeñt atarr huallama't ñaña ñeñt anets all. Ñaña e'ñe po'partsoteño't a'chencatuan añ pats ñaña enet, o' e'ñe

chenca'huerra poctacma. Ñocpuet ama eñalle allcha' a'puet ama't e'ñe coñe'ta. ¹²⁻¹³ Nent ñaña allohuen arromñañesha' all tomchenet Yompor po'conaño. Ama't allohuen arromñañesha' allo'tsa'yenet ama't ñeñt atarr sherba'yestse't ama't ñaña ñeñt ama asherboyenaye' entete'te. Ama't allpon omarrña'techno ñeñt omarrcha'tyestse't ahuatpa' ñetña ama't oño'tpa' o' alla tantrra'tuerret. Ama't allohuen arromñañesha' ama't o' chapuet all o'patenonet rromueñets, allotña o' alla tantrra'tuerret allohuenet. Ñeñto'mar ñet te'pa' e'ñe Yompor po'conaño tomcha'tuenet allohuenet. Allempoña allpa' tore'tet shonte' libro, ñeñtña librorpa' all aquellca'huaret ñeñtcha' yerpaterrahuet ñeñt allpon atet patse'tyesete't e'ñe puesheña'ttset. Allempoña Yomporpa' all entan ñeñt libro all aquellcare't ñeñt ama cohuenaye' es petso. Ñeñto'marña ñapa' attoña otteñe'cherranet o'ch mueñanet coñcheñtso. Allotñapa' tore'tet po'poñ libro ñeñt libropa' all aquellcare't añ pa'so'chñechno attochña ñetpa' corretsetach. ¹⁴⁻¹⁵ Allohuen ñeñt ama enteññañeto pa'so'cheñ libro all aquellcare't añ pa'so'chñechno ñeñt corretsetach, ñetñapa' asaprrotarettet o'pono all parraren tso' erraparen. Ñeñtpa' attochña rromuerreterr po'pocheño ñeñt puepocheñ rromueñets ñeñt e'ñe poctacma chenquëñets. Ñaña añ rromueñets ñeñt o'patenaya arromña'techno ñeñtara pa'netser pen rromueñets, ñeñtpa'cho'ña ahuapore'taretta o'pono all parraren tso' erraparen.

21

Atto Juanpa' entan po'poñ enet ñeñt e'ñe etserra ñaña patspa'cho'ña o' etserraterr

¹ Allempoña na ñeñten Juanan allpa' o' nenterrerr po'poñ enet ñeñt e'ñe etserra, patspa'cho'ña o' etserraterr. Tarro'mar ñeñt atet yenten enet te' ñaña pats, ñeñtpa' o' e'ñe chenca'huerra o' huañerr. Ñeñt etserra patspa' allña ama't sa'p ñeñt yenten añecmuen ama eñalle. ² Nenterrerr ñaña Parets pa'netser ñeñtara Jerusalén ñeñt o' etserraterr. Ñeñtñapa' entot a'suataretterra e'ñe Yomporeshot. Ñeñtñapa' atarr cohuen orrtena e'ñe atet orrtena ñerra'm puesheñarr coyanesha' allempo some'tenapa' o'ch añño'tena e'ñe cochneshot attochña puerrollarpa' atarrcha' cohuen enteñ. ³ Allempoña napa' o' alla ne'muerrerr all e'morrtena ñoñets ñeñt huetsa entot e'ñe Yompor po'conaño. Ñeñtñapa' atet oten:

—Te'pa' señoche'pa'ch, o' cherr allempoch ye'cherra Parets e'ñe parro epuet acheñenesha'. Ñeñtcha' e'ñe parro ye'cherra ñetpa' e'ñe pueyochreshoche' penanet Yompor. Ña ama't atarr Parets'pa' ye'cherrach epuet acheñenesha' ñeñt e'ñe Po'yomporer penet. ⁴ Te'ña Yomporpa' o' a'huañañperrnay yellquëña, te'ña ama't ahuatapa' amach alla yeyahuerre'te. Te' ama't ahuatapa' amach yerromuerre'te amach yellquërrer'te. Te' ama't ahuatapa' amach eñalleterre'te yahueñets ama't ñaña atserrpeñets amach eñalle. Tarro'mar añe'chno ñeñt allpon yellcatyesaye't te'ñapa' o' e'ñe huañerr.

⁵ Allempoña Yompor ñeñt anets po'conaño'pa' alla eñorana'terrnerr, ñeñt'pa' atet oten:

—Te'ñapa' o'ch seño'ch, napa' o' netserrataterr ñeñt allohuen esocmañen eñall.

Allempoña'pa' alla o'ternerr:

—Te' p'ocoppa' añ pocte' o'ch alla pequellquërrerr ora allohuen añe'chno tarro'mar añ ñoñets ñeñtcha' atarr seyemtena ñeñt'pa' e'ñe po'ño'ch atet.

⁶ Allempoña ñapa' alla o'ternerr:

—Te'ña po'ño'ch'pa' o' e'ñe etsotuerra, o' huañerr ñeñt sentyese't ahuatoteñ. Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto. Te'pa' allohuen ñeñt ama e'ñeye' coshetso pueyo'chro ñeñt chocmach es e'nenet, nañapa' napanetcha' ñeñt alloch e'ñe eñmaterret. Tarro'mar atto ama cosheneto cha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tets'pa' napuerrescha' oñ ñeñt ama ahuañaña'te ñeñt chocma potets all. Ñeñtña oñ alloña sapa' corretsasach. Tarraña ñeñt'ñapa' ama't coñe'tapa' amach setsa'tero. E'ñe atta napuenes. ⁷ Allohuen ñeñt metana'tue' pa'namen topateñtso'chnopa' ñet'ñapa' no'pataterranet ora añe'chno a'nateñets. Attochña ñetpa' e'ñech Po'yomporer pennet, nañapa' e'ñech nechemerasha' nepohuenanet allohuenet. ⁸ Tarraña allohuen ñeñt ama name'ñenayo ñeñt echarrtetsa pueyo'chro, ñet'ñapa' aña o'patenahuet all parraren tso' erraparen, ñaña allohuen ñeñt etsotene' sosya'tsañe'chno ñeñt atarr atsena'tpo' ñaña ñeñt amtsañnesha' ñaña ñeñt cañoresha'tets, ñetpa'cho'ña allohuenetpa' aña o'patenahuet all parraren tso' erraparen. Ñaña ñeñt amase'ñete'chno ñaña ñeñt po'yomporer pa'yene' aye'chcatare'te'chno ñaña allohuen ashcarña'te'chno, ñetpa'cho'ña aña o'patenahuet all

parraren tso' errañaren ñeñ huortets shemasher. Ñeñtpa' allcha' puepocheño rromuerret.

Atto Juanpa' entan Yompor pa'netser ñeñ so'hua'netsa entot ñeñtara ñeñ sochetsa Jerusalén

⁹ Allempoña ñeñ cancherrsheña mellañoñesha' ñeñ echyesaye't po'pajotollesha' all e'chorrayesarette't ñeñ allot e'ñe orrtatuerret allohuanen muerochteñets, puesheñarrña mellañoñepa' o' huapapa' otosen:

—Apon o'ch pōcta'n o'ch negatenpa' ñeñtcha' puetapor perr Cristo ñeñ atma'ntataret Carrnero.

¹⁰ Allempoña napa' o' alla chorraternerr Yompor Puecamquēñ ñeñña nanmue' a'yo allo'tsen ñeñt atarr añecmuen aspenet. Alloña napa' nentapoñ Parets pa'netser ñeñt sohua'netsa entot e'ñe Yomporeshot ñeñtara ñeñt Jerusalén.

¹¹ Ñeñña anetserpa' cha popuetnena atarr cochnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñt atarr poptame'te' ñeñt mapyer otenet jaspe ñeñt nanac amorrentaret.

Ñeñtpa' e'ñe ora orrtatuenan allohuen ñeñt allo'tsa'yen e'ñe all. ¹² Ñeñt anetserpa' e'ñe aconcha'tam̄psaret a'yohuen. Ñeñt allo aconcha'tam̄psaretpa' atarr añecmuen enonet. Ñaña allo'tsen charra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañoñeñ ñeñt cohuan̄pene' yetarr. Pate'tets yetarropa' all aquellca'yesaret añ pa'so'chñechno Israel po'mreneñ ñeñt charrasheña puechena epa.

¹³ Ñeñt conchet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenotem̄ta'npa'cho'ña allo'tsen ma'pa yetarr.

Topotem̄ta'npa'cho'ña allo'tsen ma'pa yetarr. ¹⁴ Ñeñt conchtar allo echarr aparettena pa'rrpōpa' e'ñe allohuenpa' allo'tsen charra' puechena epa mapue' ñeñt allo echarrtateñet. Ñaña pate'tets mapue' allo echarrtateñet conchetpa' all aquellca'yesaret añ pa'so'chñechno ñeñt charrasheña puechena epa ñeñtpa' ñeñt puellsensarnesha' Cristo ñeñt atma'ntataret Carrnero.

¹⁵ Mellañoñeñ ñeñt neserrparetatene' ñañaapa' echenan tepapets ñeñt oropepen allo tepuenan Parets pa'netser ñaña allo aconcha'tam̄psaret ñaña pueyottarohuen. ¹⁶ Mellañoñeñ atto tepuenan Yompor pa'netser e'ñe allponeshacma tepa'hue allem̄ateñ — onnatonet ñaña pa'llpocha'peronet ñaña enonet e'ñe allponeshacma cha'nmach — dos mil doscientos kilómetro allem̄ateñ.

¹⁷ Allempoña tepan ñaña conchet po'bateña ñeñtñaapa' allo'tsen sesenta cuatro metro.

Ñehua, mellañoñeñ e'ñe atet es tepa'yen atet es yetpa'yen
 yamã ñeñtey arromñañe.

18 Ñaña añ conchetpa' añ ayeçhcataret mapue' ñeñt
 atarr cohuen aspanamemeno poptame'tyena ñeñt otenet
 jaspe. Pa'netserña'p' añ ayeçhcataret oro — ora allohuenpa'
 e'ñe oroche'. Añ oropa' atarr nanac cohuen ñeñtpa' e'ñe
 orrtatuenan pa'namen ñeñt allpon allo'tsa'yen. E'ñe atet
 ñerra'mrrate' rerpat ñeñt atarr cohuen e'ñech orrtatuenan
 allohuen pa'namen ñeñt allo'tsa'yen. 19 Ñehua, añ econach
 allo orratenet conchet, ñeñt econach puecllo'ya'tetspa'
 atsetareno poptena ñeñt allo a'cohuentateñet. Ñeñt
 ñanom econach puecllo'yarr allña'p' añ ana'yese'at
 atarr cohuen poptame'te' aspanamemenatollesha'
 ñeñt otenet jaspe. Ñeñt puepuecllo'yañ econach
 allña'p' añ ana'yese'at atarr cohuen poptame'te'
 asollememenaretollesha' ñeñt otenet zafiro. Ñeñt econach
 puema'puecllo'yañ allña'p' añ ana'yese'at atarr cohuen
 poptame'te' huallamemenatollesha' ñeñt otenet ágata.
 Ñeñt puepa'tatsecllo'yañ econach allña'p' añ ana'yese'at
 atarr cohuen poptame'te' aspanamemenatollesha' ñeñt
 otenet esmeralda. 20 Ñeñt econach pa'mnarecllo'yañ
 allña'p' añ ana'yese'at ñeñt atarr cohuen pa'namenot
 poptame'tyena ñeñt otenet ónice. Ñeñt po'pechapuecllo'yañ
 econach allña'p' añ ana'yese'at atarr cohuen poptame'te'
 tsamemenatollesha' ñeñt otenet cornalina. Ñeñt econach
 po'cancherrecllo'yañ allña'p' añ ana'yese'at atarr cohuen
 poptame'te' shemashrememenatollesha' ñeñt otenet
 crisólito. Ñeñt econach po'psoccllo'yañ allña'p' añ ana'yese'at
 atarr cohuen poptame'te' aspanamemenatollesho asolleten
 ñeñt otenet berilo. Ñeñt econach pue'sconecllo'yañ allña'p'
 añ ana'yese'at atarr cohuen poptame'te' e'ñe shemashre-
 memenatollesha' ñeñt otenet topacio. Ñeñt econach
 po'charraccllo'yañ allña'p' añ ana'yese'at atarr cohuen
 poptame'te' ama e'ñeye' aspanamemenaretolleshayaye
 ñeñt otenet crisoprasa. Ñeñt econach po'charraccllo'yañ
 puechena puecllo'yarr allña'p' añ ana'yese'at atarr
 cohuen poptame'te' asollememenma'tetollesha' ñeñt
 otenet jacinto. Ñeñt econach po'charraccllo'yañ puechena
 epuecllo'ya allña'p' añ ana'yese'at atarr cohuen poptame'te'
 yetsñorromemenatollesha' ñeñt otenet amatista. 21 Allohuen
 yetarroçhno ñeñt çharra' puechena epa e'ñe cohuen
 huallatrrren atet ñerra'm chempeshtall o'ponotpa' atarrcha'
 huallatllellen ñeñt otenet perla. Pate'tets yetarr e'ñe patrra

perla ayečhcatareť. Ñaña añ calle ñeñť all chopeñe'chenet ñeñťpa' e'ñe oroche' ayečhcatareť atet ñerra'm rerpat ñeñť e'ñe orrtatuene' ora ñeñť allpon allo'tsa'yen all.

²² All Parets pa'netsro ama't patrra pocoll ama neñche ñeñť all ma'yocheñet Yompor. Tarro'mar allpa' ama pallteno pocoll allcha' ma'yocheñet Yompor, tarro'mar ñeñť nanac Parets ñeñť Yepartseshar yepen ñapa' e'ñe allo'tsen all ñeñťcha' ma'yochena allohuen acheñenesha' epuet ñaña Puechemer Cristo ñeñť atma'ntaret Carrnero. ²³ Ñaña Parets pa'netsro allpa' ama muenenano atsne' ama't arorra ama mueneñeto ñeñťcha' čoyo'tetsa all. Tarro'mar Yompor ñeñť atto poptena pa'tsnomueñoťpa' ñeñťña čoyo'tetsa all epuet ñaña Puechemer Cristo ñeñťña lamparñetets. Ñeñťara Cristo ñeñť atma'ntatareť Carrnero. ²⁴ Ñeñť atto poptena Yompor pa'tsnomueñoťpa' ñeñťña a'puetarsañpene' erracmañen allohuen pa'namen acheñenesha' attoña correnet e'ñe cohuen. Allohuen añcha'tareťnesha' ñeñť atto cohuentenet añe patsro, huapatueretcha' Parets pa'netsro alloch cohuentateññañet ñamet Parets pa'netser. ²⁵ Ñeñť Parets pa'netser ñeñť pueyottar pen allot be'tenet, amach yottañperre'te e'ñech ellapene't atorareť. Allpa' ama't checmetapa' ama eñalle. ²⁶ Allohuen pa'namen acheñenesha' ñeñť añcha'na'tpotyetsa añe patsro ñeñť atto cohuenetyenet, huapatueretcha' Parets pa'netsro alloch cohuentateññañet ñamet Parets pa'netser. ²⁷ Allpa' ama't ahuatapa' amach orrtateto ñeñť sosya'tsañečhno tarro'mar allpa' ama't puesheñarrapa' ama be'teno ñeñť cotape'chene' sosya'tsañečhno ñeñť atarr tsena'ten Yompor ñeñť atet ñerra'm ashcarñať. Allpa' añe be'tets ñeñť aquellcareť pa'so'čhñečhno Cristo po'libro attochña ñetpa' corretsetach.

22

¹ Allempoña mellañoťeñpa' o' alla gaterrnerr po'ñes. Ñeñťpa' arroť huena conañoť allo'tsen Yompor epuet ñaña Puechemer Cristo ñeñť atma'ntatareť Carrnero. Ñeñť oñpa' atarr cohuen, atarr llancasaseno poptaso'tena. Oñ ñeñť atarr cohuen añ toma'ntena atto apuenedey Yompor attochña yapa' corretsayach e'ñe yocsheñeshocmañen errponohuañen. ² Ñeñť Parets pa'netsro e'ñe rročho allecma chopeñe'chenet, allña'pa' all oñen oñ. Ñeñť oñ emoto'mar popame'tar-ro all chopyen tsach. Ñeñťña tsachpa' atarr nanac me'ten, pueña'tets arorrpa' chocma me'ten. Paterr charpa' čarroch me'ten puechena epa. Ñeñť pue'mer ñeñťcha' apuerrey Yompor añ toma'ntena alloch yocrrerra errponañohuen ñeñť ama

ahuañaño ama't ahuata. Ñaña pasopanerpa' añecop sherben ñeñtcha' a'crraterre' allohuen pa'namen acheñenesha' e'ñe puecamquëño huenet. ³ Parets pa'netsropa' amach eñallettero ama't patrra ñeñtcha' a'cmareterrtsa. Tarro'mar Yomporepue't ñaña Puechemer Cristo ñeñt atma'ntataret Carrnero, ñetña partsotetset all po'conañeto. Ñaña allohuene y ñeñtey torretsa Yomporecop e'ñech cohuen yesherberr yaña all. ⁴ Yentercha' Parets yecuacalle'channerrach parro epay Yompore. Yeto'moña yapa' quellquërrancha' e'ñe ña pa'so'cheñ. ⁵ Allña' amach eñallettero checmete'. Ñeñteycha' ye'cherrtsa allpa' amach yemnerro ñeñtcha' ye'choyo'tamñse'. Atto te'pa' chocma yemnen lampareñ alloch ye'choyo'tamñpena. Allempopa' amach yemnerro ñaña o'ch choyo'tamñpeney atsne', tarro'mar Yompore ñeñt Yepartseshar yepen, ñapa' ñaña pa'tsnomueña ñeñtcha' ye'choyo'tamñperre' all. Ñaña yapa' ya'mcha'tarettapreterach allempoteñ errponohuañen.

Arrpa' all eñotateney Jesucristopa' ahuencha' huerra po'pocheño arr patsro

⁶ Allempoña mellaño'teña' o' alla o'terrnerr, ñeñtcha' atet o'terrnerr:

—Ora allohuen añ ñoñetspa' e'ñech seyemcha tarro'mar ñeñtcha' e'ñech po'ño'ch atet perra. Ñaña Yompore ñeñt Yepartseshar yepen ñaña' chocma eñotatenan ñeñtcha' a'mtene' po'ñoñ. Ñeñtara Yompore ama't te'pa' o' llesensan po'mllaño'teñer ñeñtcha' gatyene' ñeñt torretsa ñocop ñeñtcha' ahuen atet perra ama't esempo. ⁷ Ñaña Cristo ñapa' atet oten:

—Seño'chepa'ch napa' ahuencha' nohuerra.

Atarr cosheñtso'tsen allohuen ñeñt yemtenaya ora allpon añ ñoñets ñeñt aquellcare't all Yompore po'libro ñeñtcha' atet perra esempo. Arrpa' allohua huañ ñeñt atet eñotaten mellaño'teñ.

⁸ Na ñeñten Juananpa' ñaña e'muene' ñeñt ora allohuen añ ñoñets ñaña ñaña entene' ñeñt allpon gatyennet. Allempoña napa' neconcorposa e'ñe mellaño'teñ pa'rrpo ñeñt negatyene' ora allpon pa'namen esocmañen o'ch nema'yochyañ.

⁹ Ñaña' oten:

—Amach pema'yochatsetno na, tarro'mar napa'cho'ña e'ñe parropa' atta netorrapretenpa Yomporecop ñaña allohuen ñeñt pemo'nasheñeshachno pepen ñeñt a'mta'yene' Yompore po'ñoñ, epue't ñaña allohuen ñeñt atarr yemtenaya añ ñoñets ñeñt atet aquellcare't añ libro. Papa' Yomporeña pema'yocha.

¹⁰ Allempoña ñeñt mellaño'teña' alla o'terrnerr:

—Ñato't cha pa'nasotena' añ ñeñt allpon Yompore po'ñoñ ñeñt o'pequellca'hua. Tarro'mar allpon ñeñt o'pequellca'hua

ñeñtcha' atet perra esempo, te'ñapa' o' chapmoch allempoch attoch e'ñe etsotuerra esempohuañen. ¹¹ Tarraña e'ñe allempoteñ allohuen ñeñt ama cohuenaye' es petso ñeñtpa' allo'nepa'ch senet patse'tyeset ñeñt ama cohuenaye' enteno Yompor. Allohuenet ñeñt añach yeçhenet sosya'tsañeçhno, ñetpa' allo'nepa'ch senet yeçhcatyesnomuet ñeñt atarr sosya'tsañeçhno. Tarraña allohuen ñeñt e'ñeçh cohuen es pa'yenetpa' ñetñapa' allo'nepa'ch senet e'ñe cohuen es pa'yestset. Ñaña allohuen ñeñt ma'yoçhrenaya ñeñt atto sherbeñet Parets, ñetpa'çho'ña allo'nepa'ch senet ma'yoçhreten ñeñt atarr cohuen enten Parets. ¹² Ñaña Cristo ñapa' atet oten:

—Te'pa' señoçhepa'ch napa' ahuencha' nohuerra. Nehuapaterrnascha' ñeñt no'patatensa alloch netsa'tuerrsa e'ñe puesheña'ttsos sa errofente' setorra'yese't. Tarraña o'ca'ye nehuapaterr ñaña alloch netsa'tatuera ñeñt ama pocteye' es petso. ¹³ Napa' e'ñe pa'motroteñ eñallen, atten ñerra'mrrate' quelled A ñeñt pa'moter pen alfabeto. Allempoteñña napa' çhocma eñallen esempohuañencha' huañerr ñeñt allpon eñall, napa' atten ñerra'mrrate' quelled Z ñeñt all puen alfabeto.

¹⁴ Atarr cosheñtso'tsen allohuen ñeñt e'ñe pocte' enten Yompor o'ch tsomhuerrñañet Yompor puenaren alloch e'ñe correrret poctacma. Allempopa' amach alla rromuerrete'te. Ñeñtpa' ñeñtcha'ña e'ñe yoma'huerret ñesho. Ñehua, ñeñt e'ñe pocte' enten Yompor ñeñtpa' allohuen ñeñt e'ñe e'shohuaretterra po'chñar e'ñe pame'ñeño'tet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' çhapuet Yompor pa'netsro. ¹⁵ Tarraña allohuen ñeñt ama ame'ñenayo Cristo ñetñapa' a'yote'tsa'yenetach Yompor pa'netsrot. Atet ñerra'm amase'ñeteçhno, ñaña ñeñt ecañoreshateçhno, ñaña ñeñt amtsañeçhno ñaña allohuen ñeñt po'yomporer pene' ayeçhcataret ñaña allohuen ñeñt cohuen entene' allohuen shequëntsoçhno. Ñetpa' e'ñe ñeñña eñotenet o'ch shecare'çhet acheñenesha'.

¹⁶ Allempoña Jesúsapa' alla oterrerr, ñeñtpa' atet ot:

—Napa' naña ñeñten llesensene' nemillaño'teñer ñeñt o' eñotaterres ora añeçhno, allohuenes ñeñtes e'ñe same'ñeño'ten na sapa' çhocma sapçha'yena allemeñ anetso'mar. Napa' ñeñten allot huapa añcha'taret David, elloñapa' o' alla po'mreneñ perrnerr naña. Ñaña napa' atten ñerra'mrrate' ranto ñeñt atarr atarrenñ ñeñt atarr huomenc atsnets

o'ch puetarenmoch. Attoña na'puetarsañpeñ allohuen
acheñenesha'.

¹⁷ Allohuen ñeñt̃ pueyochresha' pen Parets ñetpa'
atma'ntatarettenet atet ñerra'mrrate' Cristo puetapor
penahuet. Attoña ñet Parets Puecamquẽño' oteñet Cristo:

—Apon.

Ñaña allohuenes ñeñtes e'mñotene' o'ch soch sama Cristo:

—Apon.

Ñaña allohuenet ñeñt̃ oñpa'tets ñeñt̃ ama eñmatetso
pueyoçhreto ñeñt̃ chocma es e'nyenet, ñetpa'cho'ña
huapuetepa'. Yoretapa' añ oñ, allochñapa' ñetpa'cho'ña
corretsetach. Ñeñt̃ oñpa' e'ñech atta aparettet, amach es
tsa'tayo ama't e'ñe coñe'ta.

¹⁸ Na te'pa' o'ch noctape'chach allohuen ñeñt̃ e'mñotene' añ
ñoñets all oteney ñeñt̃cha' atet perra esempo. O'ch notanet:
Ñerra'm esesha' atontatene' ñet poçapñet ñeñt̃ ama atteye'
oteny e añ ñoñets, Yomporñapa' o'ch atontatanet ñocpuet
ñeñt̃cha' mueroçhtaterrahuet ñeñt̃ atet o' aquellca'huareta
añ libro. ¹⁹ Ñaña ñerra'm esesha' çha a'chencatenan
ama't patrra ñoñets ñeñt̃ allpon aquellca'huareta añ libro,
Yomporñapa' amach muenataneto o'ch es o'patapreteret all
aquellcarettena libro allpon ñeñt̃ñapa' corretsetach. Ñaña
ñetpa' amach be'tosapo'tañpereto Parets pa'netsro ñeñt̃ atet
o' aquellca'huareta añ libro.

²⁰ Ñeñt̃ara Jesús ñeñt̃ yeñotatyene' ora añeçhno, ñañaapa' alla
oterterr:

—Napa' po'ñoçhcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñt̃pa' attetepa'ch
yocop̃.

²¹ Yepartsesharepa'chña Jesucristo sa'natenaya e'ñe allo-
huenes. Ñeñt̃pa' attetepa'ch Nompore allohuenacpay. Arrpa'
e'ñe allohua puen Yompor po'ñoñ.